


Niospa meka fena  
Jesucristoñoa



New Testament in Yaminahua (PE:yaa:Yaminahua)

**Niospa meka fena Jesucristoñoa**  
**New Testament in Yaminahua (PE:yaa:Yaminahua)**

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

## Contents

MATEO . . . . .	1
MARCOS . . . . .	56
LUCAS . . . . .	87
JUAN . . . . .	141
LOS HECHOS . . . . .	179
ROMANOS . . . . .	225
1 CORINTIOS . . . . .	250
2 CORINTIOS . . . . .	277
GÁLATAS . . . . .	293
EFESIOS . . . . .	302
FILIPENSES . . . . .	311
COLOSENSES . . . . .	316
1 TESALONICENSES . . . . .	322
2 TESALONICENSES . . . . .	327
1 TIMOTEO . . . . .	330
2 TIMOTEO . . . . .	337
TITO . . . . .	342
FILEMÓN . . . . .	345
HEBREOS . . . . .	347
SANTIAGO . . . . .	366
1 PEDRO . . . . .	373
2 PEDRO . . . . .	380
1 JUAN . . . . .	384
2 JUAN . . . . .	390
3 JUAN . . . . .	391
JUDAS . . . . .	392
APOCALIPSIS . . . . .	394

## Mateo Jesúsnoa Yoikĩ Keneni

*Jesucristo ãfe xinifãfe anefo  
(Lc. 3.23-38)*

<sup>1</sup> Ë mato yoinõ a taeyoi ipaonifo Jesucristo ãfe xinifo. Jesucristo ãfe xini David. Nã David ãfe xini Abraham. Nãfo Jesucristo ãfe xinifo taeyoi iyopaonifo.

<sup>2</sup> Nã Abraham ãfe fake Isaaca ini. Isaaca ãfe fake Jacobo ini. Jacobo fake Judá ini. Æfe extofori ini. <sup>3</sup> Judapa fake Fares fe Zara ini. Æto afa Tamar ini. Fares ãfe fake Esrom ini. Esrom ãfe fake Aram ini. <sup>4</sup> Aram ãfe fake Aminadab ini. Aminadab ãfe fake Naasón ini. Naasón ãfe fake Salmón ini. <sup>5</sup> Salmón fake Booz ini. Booz ãfe afa Rahab ini. Booz ãfe fake Obed ini. Obed ãfe afa Rut ini. Obed ãfe fake Isaí ini. <sup>6</sup> Isaí ãfe fake xanĩfo David ini. Xanĩfo David ãfe fake Salomón ini. Salomón ãfe ãfa fene fetsaya iyopaoni, Urías.

<sup>7</sup> Salomón ãfe fake Roboam ini. Roboam ãfe fake Abías ini. Abías ãfe fake Asa ini. <sup>8</sup> Asa ãfe fake Josafat ini. Josafat ãfe fake Joram ini. Joram ãfe fake Ozías ini. <sup>9</sup> Ozías ãfe fake Jotam ini. Jotam ãfe fake Acaz ini. Acaz ãfe fake Ezequías ini. <sup>10</sup> Ezequías ãfe fake Manasés ini. Manasés ãfe fake Amón ini. Amón ãfe fake Josías ini. <sup>11</sup> Josías ãfe fake Jeconías ini; ãfe extofori ini. Mã Jeconías rama xanĩfo ikaino, Babilonia anoxõ xanĩfãfe ãfe sorarofõ nĩchini israelifo ato ifitanõfo anã ato yonomaxikakĩ. Mã sorarofãfe ato ifitanaifono israelifo Babilonia ano fonifo. Jeconíasri iyonifo. Jeconías ãfe extofori kainifo.

<sup>12</sup> Nãskata Babilonia anoax fake fetsafori kainifo. Jeconías ãfe fake Salatiel ini. Salatiel ãfe fake Zorobabel ini. <sup>13</sup> Zorobabel ãfe fake Abiud ini. Abiud ãfe fake Eliaquim ini. Eliaquim ãfe fake Azor ini. <sup>14</sup> Azor ãfe fake Sadoc ini. Sadoc ãfe fake Aquim ini. Aquim ãfe fake Eliud ini. <sup>15</sup> Eliud ãfe fake Eleazar ini. Eleazar ãfe fake Matán ini. Matán ãfe fake Jacobo ini. <sup>16</sup> Jacobo ãfe fake José ini. Nã José ãfe ãfi ini, María. Nã María fake ini, Jesús. Jesús ãfe ane fetsa Cristo ini.

<sup>17</sup> Abraham ãfe fenafo ichapa ini, nã David kainitĩa catorce inifo Abraham ãfe fenafo. Askatari nã David ãfe fenafo ichapa ini. Nãskano David ãfe kaifo yora fetsafãfe Babilonia ano ato iyonifo ato yonomaxikakĩ. Babilonia ano ikanax David ãfe fenafo catorce inifo. Askatari David ãfe fenafo Babilonia anoax anã fenifo ãto mai ano. Mã fenixakakĩ David ãfe fena fetsafori kainifo catorce inifo. Askatari Cristo kaini.

*María Jesucristo kãini  
(Lc. 2.1-7)*

<sup>18</sup> Ë mato yoinõ ea nikakapo afeskax Jesucristo kãinimakĩ. José fe María yoinãyonifo fianãxikakĩ. Fianãyofafomano Niospa Yõshi Sharapa María fake nanemani. <sup>19</sup> José Nios Ifofasharakõiax sharakõi ini. Nãskaxõ José María yõapainima yorafãfe ferotaifi. Fomãxopaoni. Nãskaxõ tsoa yoixoma José María enepaini. <sup>20</sup> Nãskano José ãfe namapa õini Niospa ãfe ãjirinĩ yoiaito. Yoikĩ iskafani: “José, rateyamafe María fe fianãxiki. Na fake nanea Niospa Yõshi Sharaõxõ akaki. <sup>21</sup> María fake feronãfake fii kiki. Mĩ anekĩ Jesús faxikai. Nãato ato ifipakenakaki. Nãskaxõ afe yorafo ãto chaka soaxoxii kiki ato nimapakekakĩ,” ixõ ãjirinĩ José yoini.

<sup>22-23</sup> Chanĩmakõi nãskakõi nã Nios yoimisto yoini keskarakõi. Iskafakĩ kirika keneyoni Niospa shinãmanaino:

Kẽro xotofake feronãfake fe imisma fake onixii. Fake feronãfake fixõ anekĩ Emanuel faxii, ixõ yoini. (Akka nõko mekapa Emanuel fakĩ, “Nios nofe ika,” ixõ nõ yoimis.)

<sup>24</sup> Mā ājirinī yoiano José moinākfani. Nā ājirinī yoia keskafakī, José María fini. Mā fixō āfe pexe ano iyoni. <sup>25</sup> Mā afe fīanāx afe chotanānima āfe fake kāiyonō. Mā fake kāiano anekī Jesús fani.

## 2

### *Feronāfakefo fishi tāpikōimisfo a xini oaikirinoax mai fetsa anoax Jesús ōipai fenifo*

<sup>1</sup> Herodes xanīfo ikano Jesús kāini Belén pexe rasi anoax, Judea mai anoax. Nāskano a xini oaikirinoax mai fetsa anoax feronāfakefo fishi tāpikōimisfo fenifo Jerusalén ano.

<sup>2</sup> Nokotoshikaxō yōkanifo: “¿Fanīmē a rama kāia judeofāfe āto xanīfo ikai? Mā nō ōia āfe fishi oaito. Nāskakē nō oa Jerusalén ano xanīfo ōiyoi. Nō akiki inimai nō oa, ‘Mī nōko xanīfokōi,’ ixō yoipaikī,” fanifo.

<sup>3</sup> Askafaifono fetsafāfe yoiaito nikakī Herodes shināchakakōini xanīfo iki kiki ixō. Askatari keyokōi Jerusalén anoafāferi shināchakakōinifo. <sup>4-5</sup> Akka Herodes judeo inima. Nāskaxō ato kenamani a ato Nios kīfixomis āfe xanīfofo fenōfo ato yōkaxiki. Askatari a Moisés yoikī kirika keneni keskara ato tāpimamisfo ato kenamani ato yōkaxiki. “¿Fanīax Cristo kāixiimē?” ato faito kemanifo iskafakakī: “Belén anoax iki, Judea mai anoax,” fanifo. “Niospa meka yoimisto nānori kirika keneyoni a inōpokoai yoikī Niospa shināmanaino. Iskafakī keneni:

<sup>6</sup> Belén, Judá mai anoax pishtakōi. Akka pexe rasi fetsafo efapakōifo. Askafīax Belén sharafinakōia ixii māmāi israelifo āto xanīfo finakōia kāixiaino Belén anoax. Nāskakē āfe inakōifo israelifo āto xanīfokōi ixii, ixō kirikaki keneni Niospa meka yoimisto Niospa shināmanaino,” fanifo.

<sup>7</sup> Nāskakē Herodes a fishi tāpimisfo ato yōkani onexō tsōa nikayamanō: “¿Afetīa fishi mā ōitamē?” ato fani. <sup>8</sup> Nāskaxō ato nīchini Belén ano. Herodes tāpīpaikī, “Belén ano fotakāfe a fake tāpīxikakī. Mā fichixō ea yoifexikakī ēri akiki inimaikanō,” ato fani āa ato pārakī.

<sup>9</sup> Ato askafaino fonifo. Fokakī fishi rekē kaino chīfafainifo. Nāskax fishi nēteni nā fake yome ano. <sup>10</sup> Nā fishi anā ōikanax inimakōinifo. <sup>11</sup> Nāskakanax pexe mēra ikifaikaxō fake yome fichinifo afa María yafi. Mā fichikaxō ratokonō mai chachipakefōfānifo, a fakeki inimakakī. Nāskakaxō āto kafo fēpekaxō afama mīshti sharakōifo Jesús inānifo. Oro minikāta, pirofomāri mininifo a nō koofatiro pirofomā nakas sharakōi. Askatari pirofomā fetsari āfe ane mīra inānifo. <sup>12</sup> Nāskakē namakē Niospa ato yoiano anā Herodes ano fonifoma. Fai fētsa fonifo āto mai ari.

### *María feta José Jesús ichokinifo Egipto mai ari*

<sup>13</sup> Askata a fishi tāpimisfo mā foaifono, José namakē, Niospa āfe ājirinī yoini: “Moinākfāfe. Mī āfi feta mī fake yome ichokitāfe Egipto mai ari. Nāri ikiyoxiki nā ē mato yoiaino mā anā onō. Herodes na fake yome fenai kiki retepaikī,” Niospa ājirinī José fani namakē.

<sup>14</sup> Nāskata moinākfata, nā fakishi fonifo María fe José āto fake Jesús iyoi fokani Egipto ano. <sup>15</sup> Egipto ano José fe María ipaonifo mā Herodes naano fexixakakī. Nāskakē Egipto ano iyopaonifo. Niospa meka yoimisto nānorikōi kirika keneyoni Niospa shināmanaino iskafakī: “Ēfe fake ē kena Egipto ano,” ixō Niospa meka yoimisto kirika keneni.

### *Fakefo retenōfo Herodes ato manamani*

<sup>16</sup> Fishi tāpimisfo Herodes fomākani. Fai fētsa foafono nikai, Herodes ōitifishkikōini. Fishi tāpimisfāfe taeyoi Herodes yoionifo ato yōkaito iskafakakī: “Afetīama nō nā fishi ōikī taefati, mā xini rafe aka,” fanifo. Nāskakē Herodes sorarofa ato manamani fake feronāfake xini rafe akafo, yome mīshtifoya ato retenōfo, Belén anoafō retekāta, a Belén pasotai ikafori ato retenōfo. <sup>17-18</sup> Nāskara taeyoi Jeremías Niospa shināmanaino kirika keneyoni a inōpokoai yoikī. Iskafakī keneni:

Ramā anoxō nikanifo fāsikōi oiaifono. Raquel oiaito nikanifo āfe fake manoi, mā āfe fake nano. Oiyayamafe fafiaifono nishpanima,

ixõ Jeremías keneni.

Nã Jeremías yoini keskara mã askakõia.

<sup>19</sup> Mã Herodes naano Niospa ãjirinĩ afianã José yoini namakẽ iskafakĩ: <sup>20</sup> “Moinãkafafe. Mĩ ãfi feta mĩ fake iyotaxiki Israel mai ano. A fake yomefo retepaimisfo mã naafoki,” fani.

<sup>21</sup> Nãskafaino moinãkafani José. ãfe ãfiri mõini ãfe fake yafi. Nãskakanax Israel ano anã fonifo. <sup>22</sup> Mã fõkakĩ nikanifo ato yoiaifono Herodes fake Arquelao mã xanĩfokẽ Judea anoax. Nikai José rateni Judea ano kapai. Nãskaito anã ãjirinĩ José yoini namakẽ iskafakĩ: “Galilea mai ano katãfe,” fani. Nãskafaino fonifo Galilea ano ãfe ãfi fe Jesús iyokani. <sup>23</sup> Nãskax nokonifo Nazarete pexe rasi ano. Nãno inifo. Nãnori taeyoikõi Niospa meka yoimisfãfe yoionifo, “Cristo Nazarete ano imis,” fakakĩ, a inõpokoai yoikakĩ. Nãskakõini.

### 3

*Juan Maotista tsõa istomaxõ ato yoini  
(Mr. 1.1-8; Lc. 3.1-9, 15-17; Jn. 1.19-28)*

<sup>1</sup> Jesús Nazarete ano ikano Juan ato maotisafapani tsõa istoma ixõ Judea mai anoxõ. Nãnoxõ Niospa meka ato yoipaoni. <sup>2</sup> Nãnoxõ ato yoipaoni iskafakĩ: “Yorafãfe, anã Nios shinãkãfe. Mãto chaka xatekõikãfe, a mã chakafamis shinãmakikãfe. Niospa meka nikakõikãfe. Mã chaima nõko Ifo Nios oi kiki nõko xanĩfo finakõia ixii kiki,” ixõ Juan ato yoipaoni fãsikõi.

<sup>3</sup> Isaías kirika kenekĩ yoiyoni a inõpokoai yoikĩ Niospa shinãmanaino. Iskafakĩ yoini:

Tsõa istoma anoxõ yorafo yoixii akiki feaifono. Iskafaki ato yoixii: “Mã nõko Ifo oi kiki. Nãskakẽ itipinĩsharakãfe. ãfe fai sharafaxokãfe. Mãto chaka xatekãfe,” ixõ ato yoiaito nikaxikani,

ixõ Isaías kirika keneyoni Juanoa yoikĩ.

<sup>4</sup> Akka Juan ãfe rapati kamĩcho fichi kishi faxõ safepaoni. ãfe sĩtorari fichi koiro safepaoni. Nãskaxõ tseo pipaoni, fonari apaoni. <sup>5</sup> Nãskano Jerusalén anoafu yafi Judea anoafu fenifo Juan nikai fekani. A faka Jordán chaima ikafori fenifo. <sup>6</sup> Mã fẽkaxõ Juan yoinifo a afara chakafamisfo. Nãskaxõ ãto chaka xatepaiyaifono Juan ato maotisafapani faka Jordán anoxõ.

<sup>7</sup> Nãskaifono fariseofo xanĩfo metsamafo feaifono, saduceofo xanĩfo metsamafori fenifo Juan ano. Ichapakõi fenifo, “Nokori Juan nashimanõra,” ikanax. Juan ato õikĩ ato iskafani: “¿Afeskai mã ea ano oimẽ? ¿Ë mato maotisafapanõ mã oimẽ? ¿Tsõa mato yoiamẽ? Mã shinãiraka nõ chiifã mẽra katirora ixõ nãskax mã maotisapaimẽ, nõ chiifã mẽra kayamanõra ikax. Maa, mãkai afaa tãpiama, askax mã maotisatiroma. Mã Nios Ifofaima. Mã oa shano keskara mãto õiti chakakõi. Nãskaxõ mã Satanás ifofaa. Nãskakẽ kaxpa ã mato maotisafatiroma mãmã Satanás fisti shinãito. Aa fẽtsa mato pãratiro nõ maotisanõ nõ chiifã mẽra kaimakai Nios nikayamafix ixõ mato pãrano mã chiifã mẽra katiro fetsa afaa tãpiamato mato pãrano. Askara Niospa mato iftirioma mãkairoko shinãito, ãroko mato maotisafaano. <sup>8</sup> Mãto chaka xatekãfe, Nios shinãkãfe. Mã Nios shinãito ã mato maotisafapakai. <sup>9</sup> Ë mato anã yoinõ nikakapo. Mã shinãtiro: ‘Nã Abraham nõko xini ipaoni, õiti sharayaxõ Nios shinãpaoni.’ Akka mã shinãkĩ: ‘Nõmã Abraham fenaxõ nõ shara shinã,’ ixõ mã shinãkĩ mã shinãsharaima. Askara shinãyamakãfe. Akka mãto õitinĩ mã chaka shinãfi mã chanĩ. Nikasharakõikãfe, ã mato yoinõ. Na tokiri Niospa onifaxõ nĩchikẽ mã õitiro Abraham ãfe fena inõ. Nãskakanax Abraham fakefo itirofo na tokiri õikĩ Nios shinãkanax. Akka mãkai anori shinãima mã mã chanĩ: ‘Abraham shinãpaoni keskara nõ shinãira,’ ikax. Askara shinãyamafi Satanás fisti ifofafiai. <sup>10</sup> Akka fana fimiymaito ifãfe reratiro. ãfe tapori tsekaxõ koofatiro anã niyamanõ. Nãskarifikã mã Nios nikakaspaito a omiskõipakenakafo mẽra Niospa mato potaxii mã chaka xateaxma mã isharayamaito. <sup>11</sup> Nãskakẽ ã mato maotisafai mãto

chaka mā xatepaiyaito Nios Ifofapaikī. Akka nã ea keskarama mā chaima oi kiki, nã sharafinakōia. Aato afama mīshti fatiro, ẽ atiroma keskara. Akka ẽ afaama. Mã Nios chanĩmara faino aato ẽfe Yōshi Shara mato mēra naneyoi. Akka tsōa Nios chanĩmara fayamaito, Niospa mato omiskōimaxii. <sup>12</sup> Akka yōra ẽfe tarepa aros fanaxō mā pachiano topitiro. Nãskaxō katotiro a sharafo fixō a chakafo potaxō koofatiro. Nãskarifikī a chipo oaito a chanĩmara faafo yafi a nikakaspamisfo ato paxkanāfaiyoi. Nãskaxō a chanĩmara faifo a ika ano ato iyoxii afe isharapakexanōfo. Akka nã nikakaspamisfo chiifã mēra ato potano anoax omiskōipakenakafo. Chiifã mēranoax omiskōi xatenakafoma,” ixō Juan ato yoini.

*Juan Jesús maotisafani faka Jordán anoxō*  
(Mr. 1.9-11; Lc. 3.21-22)

<sup>13</sup> Askata Galilea anoax Jesús kani faka Jordán ari Juan maotisafanō. <sup>14</sup> Akiki nokoaino Juan Jesús iskafani: “Jesús, ¿afeskakī ẽ mia maotisafatiromē? Akka mīroko ea atironō,” fani.

<sup>15</sup> Askafaino Jesús kemani iskafakī: “Epa Niospa noko yoia keskara keyokōi nō nikakōitiro. Nãskakē ea mĩa maotisafatiro,” fani.

Jesús askafaino, Juan Jesús maotisafani. <sup>16</sup> Nãskata Jesús faka mēranoax fininākafānaino nai fepekemetani. Ariax Niospa Yōshi Shara akiki ftoni, oa rifi keskara Jesús ōiaino. <sup>17</sup> Askaino nai mēraxō Āpa yoiaito nikani iskafaito: “Mī ẽfe Fakekōi ẽ mia noikōi. Ẽ mikiki inimasharakōi,” ikaito nikanifo.

## 4

*Satanás chakata Jesús afara chakafamapaini*  
(Mr. 1.12-13; Lc. 4.1-13)

<sup>1</sup> Nãskaino Niospa Yōshi Sharapa Jesús iyoni tsōa istoma anoxō Satanás afara chakafamapainō.

<sup>2</sup> Mã cuarenta nia oxax Jesús fonāikōini afaa pishta piyamax. <sup>3</sup> Nãno Satanás akiki nokoni. Mã akiki nokoxō ifofamapaini. Askatari chakafamapaini. Iskafakī yoini: “Mī Niospa Fakemākī na tokirifo pãa fapo,” fani.

<sup>4</sup> Askafaito Jesús kemani: “Maa, na mī ea yoiiai keskara ẽ akima. A nō piiai fisti nō shināima nipaikī. Akka Epa Niospa ẽfe meka fisti shara nō shinātiro. Nãskara Niospa meka yoimisto keneni,” Jesús fani.

<sup>5</sup> Jesús askafaino Satanás iyoni Jerusalén ano a Nios kīfiti pexefã māmākīa. <sup>6</sup> Nãnoxō yoini iskafakī: “Mī Niospa Fakekōiaxroko mī niriāx ichopakekafanikai. Mī ichopakekafanax mī afeskaimakai. Nã Niospa meka kirikaki keneaki iskai: ‘Niospa ẽfe ājirifo yoixii mia kexenōfo.’ Askatari kirika keneano iskaki: ‘Mī āto mifiki pakeaito mia achixikani kiki mī tokiriki pakenōma,’ kirika kenea iskaki,” Satanás Jesús fani.

<sup>7</sup> Askafaito anã Jesús kemani: “Akka na kirika keneano yoinifo iskafakī Niospa meka: ‘Nōa nō meka fetsafaxō nō yoitiro: “Ẽ afara afeskarafaito, ea Niospa kexei,” ixō nō shinātiro. Akka, “Niospa ea amapaiyai keskara nã fisti ẽ atiroki Niospa ea kexenō,” ixō shinākāfe,’ ikaki na kirika keneano,” Jesús fani.

<sup>8</sup> Askata Satanás Jesús iyoni mächifã mǎnǎnē. Arixō ōimani nã maifo tii sharafinakōia. <sup>9</sup> “Ōipo. Mī ea ratokonō mai chachixō, ‘Mī ẽfe ifoki,’ mī ea faito na maitio keyokōi ẽ mia inātiro mī ẽfe ifo inō,” fani.

<sup>10</sup> Askafaito Jesús kemani: “Satanás. Emakinoax katāfe. Ẽ mia ifofaimakai. Na kirika kenea ano Niospa meka yoimisto iskafani: ‘Nã nōko Ifo Nios fisti nō ratokonō mai chachixō nō yoitirokī, nã fistimāi nōko Ifokē,’” fani.

<sup>11</sup> Askafaino Satanás Jesús makinoax kaino Niospa ẽfe ājirifo akiki ftonifo pimaxikakī.

*Galilea anoxõ Jesús ato yoikĩ taefani*  
(Mr. 1.14-15; Lc. 4.14-15)

<sup>12</sup> Akka mã Juan sorarofãfe karaxa mēra ikimana nikata Jesús Galilea mai ano anã oni. <sup>13</sup> Nazarete anoax Capernaúm ano nokoni ano ixiki. Nã Galilea ãa kesemē Capernaúm ini. Nãnori yora fetsafori osia ini. Zabulonõfo fe Neftalifo ano ikafo ini. <sup>14-16</sup> Isaías kirika kenekĩ yoini keskakõi Jesús nãno ipaoni. Isaías kirika kenekĩ iskafani:

Zabulonõfo fe Neftalifo ãto mai ano ikafo ãa Galilea ano. Faka Jordán okiri chai poketa nãno judeofoma fakish mēra ika keskara, Niospa meka nikakatsaxakakima. Fakish mēra ika keskara ifiakaxõ, oa koshi penai keskara õixikani. Fakish mēra ipafikeranaxakakĩ atoki penarisatani, ixõ Isaías a inõpokoai yoikĩ Jesúsnoa keneni. Nãskarifiãi omiskõipakenakafo mēra ikeranafo. Askafikeranafono atoki Jesús nokoaitã nã Ifofaafo tii ato nimapakenaka.

<sup>17</sup> Anoxõ Jesús ato yoikĩ taefakĩ iskafani: “Mã chaima nõko Ifo Nios xanĩfo finakõia oi kiki. Nãskakē shinãmitsayanã mãto chaka xatekãfe. Afaa chakafatamaroko Niospa meka nikakõikãfe,” ixõ Jesús ato yoini.

*Jesús cuatro feronãfake kenani tarafanãfãnē foe fimisfono ãfe inakõi inõfo*  
(Mr. 1.16-20; Lc. 5.1-11)

<sup>18</sup> Ato yoita Jesús Galilea ãa kesemē kani. Kakĩ fichini Simón yafi onefetsa Andrés. Simón ãfe ane fetsa Pedro ipaoni. Nã rafeta tarafanãfãnē fimisfo inifo, ãto tarafanãfã faka naki poteaifãfe. <sup>19</sup> “Efe fokãfe. Mãfi tarafanãfãnē fimiskĩ. Mã foe ichapa rasi tarafanãfãnē fiafĩ keskari fakĩ iskaratĩari mã ekeki yora ichapa efexii ã ãto Ifo inõ,” ixõ Jesús ato yoini. <sup>20</sup> Ato askafaino tarafanãfã fafaikani afe fonifo.

<sup>21</sup> Askata ori chaimashta kaxõ Zebedeo fake raferi fichini, Santiago yafi Juan. Nã rafeta ãto apa feta kanõa nakixõ tarafanãfã itipinĩ fanifo, kishifakakĩ. Nã raferi, “Efe fokãfe,” Jesús ato fani. <sup>22</sup> Ato askafaino ãto apa kanõa ano nĩchifainifo Jesús fe fokakĩ.

*Jesús yora ichapafõ tãpimani*  
(Lc. 6.17-19)

<sup>23</sup> Mã askafaxõ afe foafono nã Galilea anoafõ kafãsakĩ Niospa meka ato yoini. Judeofãfe ichanãti pexe mēraxõ Jesús ato Niospa meka shara yoisharakĩ iskafani: “Itipinĩsharakãfe. Nios nonoax mãto xanĩfo ipai kikĩ,” ixõ ato yoifofãsafani. Askatari a isinĩ ikaifo fetsa fetsatapafo ato sharafãpani. <sup>24</sup> Askafaano nikakaxõ Siria mai anoafõ isinĩ ikaifo akiki efenifo ato sharafapanõ. Isinĩ ikaifo fetsa fetsatapafo akiki efenifo. A yõshi chaka ãto mēra naneafori ato sharafani. A nĩsoaifori efeta, a finimismafori efeta, a chatofori efenifo. Ato keyokõi sharafapani. <sup>25</sup> Askafaito yorafã rasichi chĩfafainifo. Atiri Galilea anoax fonifo, atiri Decápolis anoax fonifo, atiri Jerusalén anoax fonifo, atiri Judea anoax fonifo, atiri faka Jordán okirinoax fekãta Jesús chĩfafainifo.

## 5

*Machi mãnãnẽxõ Jesús ato yoini*  
(Lc. 6.20-23)

<sup>1-2</sup> Yorafã rasi akiki feaifono õi Jesús ato paxafãini kaax, machi pochinĩ tsaoni. Tsaono ãfe meka tãpipaimisfo akiki fenifo. ãfe meka nikai fekani. Akiki feafono ato yoikĩ iskafani:

<sup>3</sup> “Fẽtsa ãto shinã mēraxõ shinãkĩ iskafax: ‘Ëakai ã isharamiroma. Ë Nios yopakõĩ,’ ikaito Niospa inimamaxii mãmãi Nios Ifo sharafaino ãfe fakekõi inõ.

<sup>4</sup> “Fetsa shinãmitsakõifiaino chipo Niospa noikĩ inimamaxii.

<sup>5</sup> “Fetsa kakapaimisma imisno Niospa inimamasharaxii. ‘Keyokõi maitio atonã ixii,’ ixõ Niospa yoiyoni keskara atonãri ixii.



<sup>6</sup> “Fētsa Niospa meka noikōikī Niospa ato imapaiyai keskara shara ipaikōikani, nā keskarafo Niospa ato inimamaxii.

<sup>7</sup> “Fētsa fetsafori noikī ato sharafaito Niospa tāpia. Nāskakē ari Niospa noikī axoshara-pakenaka inimamakī.

<sup>8</sup> “Fētsa Nios shināsharakī, āfe ōiti mēra afaa chaka shinātama Nios fisti shinākī chipo Nios ōixii. Nāskax inimakōixii.

<sup>9</sup> “Akka noikaspa faatanāifono fētsafāfe ato raenā faano, nāfo Niospa ato yoikī iskafaxii: ‘Mā ēfe fakefo,’ ixō ato yoiaino inimakōixikani.

<sup>10</sup> “Fētsa Nios Ifofasharapaiyaino, fetsafāfe ato omiskōimafiaifono, Epa Niospa kexe-sharakōiano nāskakē inimakōixii.

<sup>11-12</sup> “Mā ea Ifofakē fetsafāfe mato īchakani, mato omiskōimayanā askatari matoōnoa meka chaka yoikani meka fetsa fetsatapafo. Nā mato chakafaifo keskafakīri mātō xinifāfe nā Niospa meka ato yoixomisfori ato chakafapaonifo. Nāskakē inimasharakāfe eōxō matori chakafakani kiki. Mā askaito Niospa afara sharafo mato mekexona nai mēranoa mātonā inō,” ixō Jesús afe imisfo ato yoini.

*“Mā tashi keskarata askatari mā pena keskara,” ixō a Ifofafo Jesús ato yoini (Mr. 9.50; Lc. 14.34-35)*

<sup>13</sup> Anā Jesús ato yoini iskafakī: “Māfi nono mai anoax tashi keskaraki. Nāskakē shinākāfe. Tashi sharakē nō meetiro. Akka tashi sharayamakekai nō shara meetiroma. Nāskarakai tsoa pishta fichipaima. Mā paispakē anā nō pitiro. Nāskakē nō potatiro. Nāskarifiiai mā tashi keskara. Mā nono mai ano isharaino yorafāfe mato ōikani inimatirofo. Askafixō mā Nios anā Ifofasharayamaito matoōxō tsōakai tāpitirofoma Niospa meka shara. Mā tashi paispa keskarakē mato potatirofo. Iskafakī yoitirofo: ‘Mā chakafoki nonoax fotakāfe. Mā kai afaama,’ ixō yoitirofo.

<sup>14</sup> “Nāskatari mā oa luz peeikai keskarakī. Akka pexe rasi māchi keya mātānēnoax onetiroma. Chai ixō penakōi nō ōitiro. Nāskarifiiai matoōxō yorafāfe xafakīa eōnoa nikatirofo. <sup>15</sup> Nāskafakīri tsōakai fakishaino ōipafikī luz fepotiro. Tapo kamaki luz ōtaxō kēsho fepotiro. Askatamaroko tapo kamaki fomākīa nō ōtaxō tsāotiro a pexe mēra ikafāfe ōisharanōfo. <sup>16</sup> Nāskarifiiai isharakāfe. Mā askaito mato ōikakī tāpitirofo mā eōnoax xafakīa isharakē. Askata mātō Epa Nios nai mēra ikano aōnoa yoikī iskafaxikani: ‘¡Aicho! Na yorafo Niosnoax isharakōimisfo. Āto Nios sharakōi,’ ixō yoixikani,” Jesús ato fani yoikī.

*Jesús ato yoini a Niospa shināmanaino Moisés kenenioānoa nikasharakōinōfo*

<sup>17</sup> Anā Jesús ato yoini: “Mā shināiraka iskafakī: ‘A Moisés Niospa shināmanaino keneni, askatari a Niospa meka yoimis fetsafāferi kirika kenenifo afo Jesús noko nikamakaspai,’ ixō mā shināiraka. Anori shināyamakāfe. Ēkai Moisés feta a Niospa meka yoimis fetsafāfe kenenifo keskara ē potayoi onima. Askatamaroko nā kenenifo keskara ē ato tāpimaxii ē fotoni nai mēranoax. <sup>18</sup> Akka ē mato xafakīa yoi. Ea nikasharakāfe. Nai fe mai keyoyoamano a Moisés yoini keskara tsōa fetsafatiroma. Askatari afaa nō potatiroma. Akka mā keyokōi mitokomeano, mai fe nai keyoxii. Mā afama mīshtifo keyoano nō anā Moisés mekari nō yopaxima. <sup>19</sup> Akka fētsa Moisés meka nikasharayamaxō fetsafori ato meka chaka tāpimanaino nikakaspamisfo a Moisés keneni keskara. Nā feronāfake Epa Nios ika ariax anā afaa itiro. Nāskafekē fētsa Niospa meka nikasharataifakī fetsafori Niospa meka xafakīa yoiax Epa Nios ika anoax afe xanīfo itiroki. <sup>20</sup> Askano nā fariseofo fe a Moisés yoikī kirika keneni keskara ato tāpimamisfo, ‘Nōfi sharakōi,’ ifiamisxakakī Niospa yoini keskara keyokōi nikafoma. Akka a Moisés yoikī keneni keskara nikakōikanaxma tsoa Epa Nios ika ari nokotirofoma,” ixō Jesús ato yoini.

*“Ōitifishkiyamakāfe,” ixō Jesús ato yoini (Lc. 12.57-59)*

<sup>21</sup> Anã Jesús ato yoini iskafakĩ: “Mã mã nikamiskĩ a Moisés nõko xinifo ato yoipaoni keskara. Iskafakĩ ato yoini: ‘Tsoa reteyamakãfe. Mã fetsa retekẽ xanĩfofo ano mato iyotirofo matori kopikiri retematirofo,’ ixõ nõko xinifãfe yoinifo. <sup>22</sup> Mẽstekõĩ anori yoifinikẽ ã mato meka fetsari mẽstekõĩ yoinõ. Ea nikasharakãfe. Fẽtsa fetsa ãchaito mã xanĩfofo ari iyotiro a omiskõĩmanõ. Askatari fẽtsa fetsa chakafai iskafakĩ: ‘Mĩ afaa tãpiama. Mĩ tatimakõĩ,’ faito Niospa a omiskõĩpakenakafo mẽra chiifã mẽra potatiro anoax omiskõĩpakexanõ.

<sup>23-24</sup> “Nãskakẽ mã Nios kĩfiti pexefã mẽraxõ mã kĩfipaikĩ mã iskafaki shinãino: ‘Ooa, ã fetsa chakafaa ã raefama,’ ixõ shinãkĩ, anã Nios kĩfixoma mã mã Nios inãpaifafãinaĩ fetsa ano koshi fotakãfe. Akiki nokoxõ yoisharafe anã mikiki raenõ. Nãskaxõ anã mã Epa Nios kĩfitiro.

<sup>25</sup> “Mã fetsa nimiano matoki oxõ mato iskafatiro: ‘Mĩ ea nimia. ¿Afetĩa mã ea kopifaimẽ? Mĩ ea kopifayamaito ã mia xanĩfofo ano iyoikai,’ mato faito, xanĩfofo ano kayoxoma koshi raefakãfe. Akka mã askafayamaino xanĩfofo ano mato iyotiro. Mã mato iyoano xanĩfãfe policia yoitiro iskafakĩ: ‘Na feronãfãke fetsa nimiakĩ kopifaamaki, karaxa mẽra ikimafe,’ fatiro. <sup>26</sup> Ë mato paraima. Fẽtsa mato karaxa mẽra ikimanano mã fena tseketiroma. Akka mã mã nimia kopifatĩa mã tseketiro,” ixõ Jesús ato yoini.

*“Mãto ãfikõĩma chotapaiyamakãfe,” Jesús ato fani*

<sup>27</sup> Anã Jesús ato yoini: “Mã mã nikamis a nõko xini Moisés yoini keskara. Iskafakĩ ato yoini: ‘Mãto ãfima chotayamakãfe. Askatari kẽromãri mãto fenema chotamayamakãfe,’ ixõ ato yoini. <sup>28</sup> Nãskara chanĩma. Nãskakẽ ãri mato yoi, fẽtsa ãfe ãfima õikĩ ãfe shinã mẽraxõ shinãĩ: ‘Ë na kẽro chotapai,’ ixõ shinãkĩ ãfe shinã mẽraxõ chotai.

<sup>29</sup> “Akka mãto fẽro õikĩ mã chakafatiro. Nãskakẽ afara chaka õiyamakãfe afara chakafaxikakima, mã nõko fero tsekaxõ nõ õitiroma keskafakĩ. Mã mãto chaka xateyamax omiskõĩpakenakafo mẽra mã katiro. Akka mã mãto chaka xateax mã Nios ika ari kaax mã afe ipaxatiro. Askara shara. <sup>30</sup> Nãskarifikĩ mãto mẽke kayakai aõxori mato afara chakafamakẽ, mextemekãfe. Mã askafax shara mã itiroki. Nãskarifikĩ mãto chaka xatekãfe mã mã mextemea keskaraxõ. Akka mã mãto chaka xateyamax, mã omiskõĩpakenakafo mẽra mã katiro. Akka mã mãto chaka xateax, Nios ari mã kaax afe mã ipaxatiro. Askara shara,” ixõ Jesús ato yoini.

*Feronãfake ãfe ãfi fe enẽnãtirofoõnoa Jesús ato yoini  
(Mt. 19.9; Mr. 10.11-12; Lc. 16.18)*

<sup>31</sup> Anã Jesús ato yoini: “Nãskatari Moisés nõko xinifo yoini iskafakĩ: ‘Fẽtsa ãfe ãfi potaxikĩ a potayoxoma iskafatiro kirika kenexõ: “Ë anã mia fipaima. Ë mia eneikai,” ixõ kenexotiro,’ ixõ Moisés ato yoini. <sup>32</sup> Akka anori Moisés yoifinikẽ anã meka fetsari ã mato yoinõ. Tsõa ãfe ãfi chotayamafiano, feronãfake ãfe ãfi eneano mã kẽro feronãfãke fetsa fe chotanãĩ chakanai. Askatari feronãfake fẽtsa mã kẽro fĩax chakanai ãfe ãfikõĩma chotai,” ixõ Jesús ato yoini.

*“A mã yoiyomis keskara akãfe,” ixõ Jesús ato yoini*

<sup>33</sup> Askata anã Jesús ato yoini: “Mã mã nikamis a Moisés nõko xinifo yoini keskara. Ato iskafakĩ yoipaoni: ‘A mã Nios yoiyomis keskara axosharakãfe. A mã yoiyomis keskara Epa Niospa mã nikakĩ akka mã ayamano mã chakakõĩ itiro,’ ixõ Moisés nõko xinifo yoini. <sup>34</sup> Akka nãnori ato yoifinikẽ, ãri mato yoisharanõ. Nikakapo. Mã fetsafo yoiyomis keskara axosharakãfe. Iskafakĩ yoiyamakãfe: ‘A ã mato yoiyoa keskara ã axii. Ë mato yoiyoa keskara ã ayamaino Epa Niospa ea omiskõĩmatiro,’ ixõ yoiyamakãfe. Askatari, ‘A ã mato yoia keskara ã akẽma keyokõĩ nai mẽraxõ ea omiskõĩmatiro,’ ixõ yoiyamakãfe. Akka nai mẽranoax Epa Nios xanĩfofo finakõĩa iki. Nãskakẽ anori nõ yoitiroma. <sup>35</sup> Askatari, ‘A ã mato yoiyoa keskara ã ayamaino nono mai anoafãfe ea omiskõĩmatiro,’ ixõ anori yoiyamakãfe. Keyokõĩ mai ano Epa Niosnã. Askatari, ‘A ã mato yoiyoa keskara ã

ayamaino a Jerusalén anoafāfe ea omiskōimatirofo,’ ixō anori yoiyamakāfe. Nā Jerusalén nōko xanīfo finakōi Niosnā. <sup>36</sup> Askatari, ‘A ē mato yoiyōa keskara ē ayamaino ēfe māpo ea omiskōimatiro,’ ixō yoiyamakāfe. Akka nōa nōko māpo shināxō nōko foo nō fetsafatiroma oxo inō, askatari fiso inō. Epa Nios fistichi askafatiro. <sup>37</sup> Akka fetsafo parayamakāfe. ‘Ē mia axōikai,’ ixō axokāfe. Askatari, ‘Ē mia axōima,’ ixō axoyamakāfe. ‘A ē yoiyōa keskara ē ayamaino afaa ranā ea omiskōimatiro,’ ixō anori yoiyamakāfe. Mā askara yoikī mā chakafai,” ato fani.

*“Tsoa kopiyamakāfe,” Jesús ato fani  
(Lc. 6.29-30)*

<sup>38</sup> Anā Jesús ato yoini iskafakī: “Mā mā nikamiski a nōko xinifo Moisés yoini. Iskafakī ato yoini: ‘Fētsa mato fero tsēkaito, kopikiri mā fero tsēkatiro. Askatari mato piti tēkeaito, pitiri mā tēketiro,’ ixō Moisés yoini. <sup>39</sup> Akka nōko xinifo anori yoifinifono, ē mato meka fetsa yoinō. Ea nikakapo ē mato yoinō. Fētsa mato chakafayanā mato tapasaito, ‘Takai fetsari ea afe,’ fakāfe mato tāpinōfo mā ato kopiyamaito. <sup>40</sup> Fētsa mia xanīfo ano iyoxō mia rapati fīapaiyaito, ināfe fotanō. Mī chōpari ināfe. <sup>41</sup> Xanīfo iyamakī soraronō, ‘Ea pisha chaima foxōikafe,’ mato fafiaito, mā chai foxotiro. <sup>42</sup> Akka fētsa mato afarafo yōkaito inākāfe. ‘Ea ināyope,’ mato faito ināfe fīshkoyamakāfe,” ixō Jesús ato fani.

*“Mato noikaspafiaifono māroko ato noikāfe,” Jesús ato fani  
(Lc. 6.27-28, 32-36)*

<sup>43</sup> Anā Jesús ato yoini iskafakī: “Askatari mā mā nikamis a nōko xinifo yoipaonifo keskara. Iskafakī ato yoipaonifo: ‘Māto kaifo noikāfe. Akka a mato noikaspaifo ato kopikiri noikaspakāfe,’ ixō nōko xinifo yoipaonifo. <sup>44</sup> Anori yoifinifono, akka ē mato yoi a mato noikaspaifo ato kopikima ato noikāfe. Askatari ato axosharakāfe. Askatari a mato omiskōimamisfo Epa Nios ato kīfixokāfe. <sup>45</sup> Mā askafai Niospa fake mā iki. Akka Niospa xini onifani yora chakafoya, yora sharafo ato chaxanō. Askatari oiri imani nā yora sharafoya a yora chakafori ato onifaxoni. Nāskakē māri a mato chakafaifo a mato sharafaifo keyokōi ato noikāfe. Nāskax mā Niospa fake ikikai. <sup>46</sup> Akka a mato noiaifos mā ato noia fetsafo noiyamata askarakai sharama. Akka yora chakafo a ato paraxō kori ichapa ato fīamisfori aska famis. Mā askaino Nios matoki inimaima. <sup>47</sup> Mato fe yorafos mā noia askarakai afaama. Akka a Nios Ifofaafomari nāskarifiakani aa ranāri noinākani. <sup>48</sup> Nāskakē Epa Nios nai mēraxō yorafo noiai keskafakī māri yorafo keyokōi noikāfe. A Epa Niospa shināsharamis keskafakī māri askafakāfe,” ixō Jesús ato yoini.

## 6

*“Afaamaisfori ato noikī afara ato ināsharakāfe,” Jesús ato fani*

<sup>1</sup> Anā Jesús ato yoini iskafakī: “Mā fetsafo sharafaino, ‘Nā feronāfake sharakōi ea fanōfora,’ ixō anori shināyamakāfe yorafāfe ferotaifi. Mā askaino yorafāfe, ‘Sharara,’ mato fafiaifono, akka Epa Nioskai matoki inimatiro. Nāskaxō mato afaa inātiroma. <sup>2</sup> Nā āa keparanāmisfo keskara iyamakāfe. Afāfe nōko kaifāfe ichanāti pexe mēraxō afaamaisfo afara ato ināmisfo, ‘Sharara noko fanōfora,’ ikaxō. Askatari fofāsakakī afaamaisfo ato afara ināfofāsafamisfo, ‘Noko yoisharanōfora,’ ikaxō. Akka askafiaifono Niospa ato afaa ināxima. <sup>3</sup> A afara yopaifo mā afara inākī tsoa yoiyamakāfe tsōa tāpiyamanō. <sup>4</sup> Akka tsōa ōiyamaino a afaamaisfo mā ato ināino Epa Nios matoki imani. Nāskaxō mato afara axosharatiro,” ixō Jesús ato yoini.

*“Epa Nios kīfikī iskafakāfe,” ixō Jesús ato fani  
(Lc. 11.2-4)*

<sup>5</sup> Anā Jesús ato yoini iskafakī: “Mā Epa Nios kīfiatīa a chanīmisfāfe kīfimisfo keskara iyamakāfe. Akka afāfe nōko kaifāfe ichanāti pexe mēraxō yorafāfe ferotaifi Epa Nios kīfimisfo: ‘Noko ōinōfora,’ ikaxō. Epa Nios shinātamaro ko ato ōimapaikani. Yorafāfe ato

õiaifono askamisfo. Akka Epa Nios atoki inimaima. Nāskakē ato afara shara ināxiima. <sup>6</sup> Akka māri ato keskara iyamakāfe. Mā Nios kīfikī tsōa mato õiyamaino nānoxō Epa Nios kīfikāfe. Māto pexe kene mēra ikixō tsōa mato õiyamaino nānoxō Epa Nios kīfikāfe. Akka yorafāfe mato õiyamafaino Epa Nios fistichi mato nikatiro. Nāskakē matoki inimai. Nāskaxō afara shara mato ināxii.

<sup>7</sup> “Akka a Nios chanīmara faafāfema kīfimisfo keskayamakāfe. Nāfāfe mēxotaima nā meka fisti yoiri famisfo. ‘Nō na meka fisti yoirifaito noko Epa Niospa nikai,’ ixō shināmisfo. Askafiaifonokai Niospa a keskara meka nikapaima. <sup>8</sup> Akka māri ato keskara iyamakāfe. Mā Epa Niospa tāpiakī mā afara yopaito, mā yōkayoamano. <sup>9</sup> Akka mā kīfikī iskafatiro:

Epa Niosi, mī fisti sharafinakōia. Mī nai mēra ika. Nō mia noikōi. <sup>10</sup> Nai mēra mefe ikafo mī ato yoiaito mia nikakōimisfo. Akka nono mai anoxori nā mī noko amapaiyai keskara nō atiro. Na nono mai ano ikafāfe keyokōichi mia Ifofanōfo. <sup>11</sup> Nā pena tii a nō piiai noko ināfafāife nō afaa yopayamanō. <sup>12</sup> Nō afara chakafaito nōko chaka noko soaxōfe nā noko chakafafāife nō ato raefai keskafakī. <sup>13</sup> Nokoki Satanás chaka omayamafe, askakimaroko nomakinoa pōtafe nō nikayamanō, ixō kīfikī iskafakāfe.

<sup>14</sup> “Akka fetsafāfe mato chakafaifono mā ato raefai keskafakī Epa Nios nai mēranoato mā fetsafo raefai keskafakī matori chaka soaxotiro. <sup>15</sup> Akka mā fetsafo raefayamaito Epa Niospari mato chaka soaxotiroma,” ixō Jesús ato yoini.

### *Foni tenemisfoōna Jesús ato yoini*

<sup>16</sup> Anā Jesús ato yoini iskafakī: “Ē mato yoiyonō. Mā foni tenei oa shināmitsai keskara mātō femānā iyamakāfe a āa keparanāmisfo ikaifo keskai. Afāfe foni tenekani āto femānā shināmitsai keskara ikani yorafāfe ato õikani. Askatari foaromekanima yorafāfe ato õinōfo. Nāskakē Epa Niosnoa shinākanima. Askafono Epa Nios atoki inimaima. Nāskakē ato afaa ināima. Akka māri foni tenei ato keskara iyamakāfe. <sup>17-18</sup> Akka mā foni tenei mā Nios shināyanā mā fechokometiro. Askatari fōxti mā foaromesharatiro. Nāskakē Epa Nios fistichi tāpitiro yorafāfe tāpiafomano. Mā askaito yorafāfe tāpitirofoma mā foni teneaito. Akka Epa Nios fistichi tāpitiro. Nāskakē Epa Nios matoki inimatiro. Askatari mato afara shara ināxii,” ixō Jesús ato yoini.

### *“Epa Nios ika anoxō afara sharakōifo mato mekexona,” ixō Jesús ato yoini (Lc. 12.33-34)*

<sup>19</sup> Anā Jesús ato yoini iskafakī: “Nono mai anoxō afama mīshti ichapa mekeyamakāfe. Mato nakaxa pīaino mā fenotiroki. Askatari chakanai fetsetiro. Askatari yometsofo mātō pexe mēra ikixō mātō afama mīshtifo keyokōi mato fīano mā fenotiro. <sup>20</sup> Akka afama mīshti noitama Nios noikāfe. Nā mato yoini keskara akāfe. Mā akiki nokoaito nā mato afara sharakōi mekexona mato ināxii. Akka ono nai mēraxō afama mīshti mato mekexona, a nakaxa mato pīatiroma. Askatari chakanaima. Askatari anā mātō pexe mēra ikiax toa yometsotiroma. <sup>21</sup> Akka mātō afama mīshtifo noikī mā shināfafāini. Nā mātō afama mīshtifo mā shināfafāinai keskafakī Niosri shināfafāikāfe, a noikī yonox-osharakāfe,” ixō Jesús ato yoini.

### *“Nōko õiti sharakē nō shināsharakōitiro. Akka nōko õiti chakakē nō shināsharatiroma,” ixō Jesús ato yoini (Lc. 11.34-36)*

<sup>22</sup> Anā Jesús ato yoini iskafakī: “Anā ē mato meka fetsari yoinō mā tāpikōinō. Akka nōko fero rafeta nā rāparinī chai chaxai keskarakē, nōko yora shara itiro. Nāskarifiiai nōko fero sharano nō xafakīa õisharatiro. Nāskatari nō isharakōitiro. <sup>23</sup> Akka nōko fero chakakē nō õisharatiroma. Fakishkōi itiro. Nāskarifiakī nōko õiti mēraxō nō chaka shinākī nō afara chakafamis nō itiro. Akka õisharakāfe. Mā Epa Nios shināi xafakīa ifiaxō āfe

meka kachikiri faxõ mã anã xafakã shinãtiroma. Fakish keskara mã itiro,” ixõ Jesús ato yoini.

*“Nõko afama mĩshti noisharatama nõ Nios noisharakõitiro,” Jesús ato fani  
(Lc. 16.13)*

<sup>24</sup> Anã Jesús ato yoini iskafakĩ: “Tsõa ãfe ifo rafe yonosharaxotiro. Fetsa noikas-pata, fetsa noisharatiro, nõ yoiai keskarakõi axotiro, akka a fẽtsa amapaiyai keskara axotiro ma noikaspatiro. Nãskarifiakĩ mã kori fisti shinãkĩ mã Nios shinãtiroma. Nãskatari Epa Nios fisti shinãkĩ mã kori noitiroma,” ixõ Jesús ato yoini.

*“Epa Niospa ãfe fakefo kexesharamis,” ixõ Jesús ato yoini  
(Lc. 12.22-31)*

<sup>25</sup> Anã Jesús ato yoini iskafakĩ: “Anã ẽ mato yoisharanõ. Ea nikasharakãfe. Shinãchakayamakãfe. Nõ afaa piyamata, afaari nõ ayaima iyamakãfe. Askatari afaari nõ safeima ixõ shinãchakayamakãfe. Akka a nõ piatokai noko imasharatiroma. Askatari a nõ safeatori nõko yora noko imasharaxotiro. <sup>26</sup> Akka shinãkapo. Peyafãfe afaa fanamisfoma. Afaari topimisfoma. Askaxori afaa mekemisfoma. Nãskafekẽ Epa Niospa ato pimamis. Akka nã peyafo afaayamafoiakẽ Epa Nios nai mẽra ikato ato pimamis. Akka Niospa mato noikĩ nã peyafo finõmainĩfofã mato kexesharakõimis. <sup>27</sup> Nãskakẽ, ¿afeskakĩ mã shinãchakaimẽ? A nõ shinãchakaitokai pena fisti noko anã nimatiroma. Nãskakẽ afaa shinãchakayamakãfe.

<sup>28</sup> “Askatari iskakĩ shinãyamakãfe: ‘Ooa. ¿Fanã ẽ rapati fitiromẽ safexiki?’ ixõ anori shinãyamakãfe. Akka shinãkapo afeskax charofo foaikamakĩ. Nã charofãfe yonokanima. Askatari xapo toro atirofoma rapati faxikakĩ. <sup>29</sup> Nãskafiax charofo sharamĩshti foaikani. Nãskarari xanĩfo Salomón rapati sharafinakõia safefixõ nã charofo finõama. <sup>30</sup> Akka Niospa nafefo sharashtafo onifani. Sharafiano nõ sepakĩ xateano natiro. Nãskaxõ nõ koofatiro. Akka Niospa nafefo finõmainĩfofã mato noikĩ mato rapati safematiro mato kexesharaxõ. Akka mã shinãchakakĩ mã Nios chanĩmara fasharaima. <sup>31</sup> Nãskakẽ shinãchakayamakãfe. Shinãkĩ iskafayamakãfe: ‘Ooa. Ẽ fonãiki a ẽ piiai keyoano, a ẽ ayairi keyoano koryaxomari ẽ afaa safeima,’ ixõ anori shinãchakayamakãfe. <sup>32</sup> Akka nã Nios Ifofaifãfema iskara shinãmisfo. A piiai fisti shinãkata, a safepaiyaifori shinãmisfo. Akka Epa Niospa mã mato tãpia afarafo mã yopaito. <sup>33</sup> Nãskakẽ Nios mãto xanĩfoõna shinãkãfe. A Niospa mato amapaiyai keskara nãskara fisti shinãkõikãfe. Mã askafaito afara fetsa mã yopaito Epa Niospa mato inãxii. <sup>34</sup> Nãskakẽ shinãchakayamakãfe. Yoi iskayamakãfe: ‘Ooa. Ẽ tãpiama penama afara chaka afeskara afiaino. Ẽ nã keskara tene-tiroma,’ ixõ shinãyamakãfe. Shinãkĩ iskafakãfe: ‘Epa Niospa na penata ea kexesharamis keskafakĩ penamari ea kexesharai,’ ixõ nãnori shinãkãfe,” ixõ Jesús ato yoini.

## 7

*“Fetsafo mekafakĩ chakafayamakãfe,” ixõ Jesús ato yoini  
(Lc. 6.37-38, 41-42)*

<sup>1</sup> Anã Jesús ato yoini iskafakĩ: “Mẽxotaima fetsafo mekafayamakãfe iskafakĩ yoikĩ: ‘Naato afara chakafakĩ Niospa omiskõimapainõ,’ fakĩ. Akka mã ato askafayamaino Niospari mato mekafatiroma iskafakĩ yoikĩ: ‘Na yorafo chakafo,’ mato fatiroma. <sup>2</sup> Akka mãri nãato akai keskafakĩ afara mã chakafaito, matori Niospa omiskõimaxii. Akka mã fetsafo afara inãsharakẽma Niospa matori afaa ichapa inãxima, mã ato afara inãsharakõikẽma. <sup>3</sup> ¿Afeskakĩ ifi pasta pishta fetsa feronaki ikano mã õimẽ, mãroko ifi pasta efapa feostamefixõ? <sup>4</sup> Akka, ¿mã shinãimamẽ a mã ifi pasta efapa feostamea? Akka, ¿afeskakĩ mã fetsa iskafaimẽ?: ‘Yamã, ẽ mia fixonõ a mã ifi pasta pishta fero naki ika,’ fakĩ, mãkõi mã kakamepaimis. Mãkai afaa tãpiama. <sup>5</sup> Nãskax mã chanĩkõi mã ato parapaimis. Akka ẽ mato yoinõ ea nikakapo. Akka mãto fero mẽranao a ifi pastafã mã feostamea

tsekayokāfe. Nāskaxō ōisharakī, a fetsafo ifi pasta pishta feronaki ika mā tsekaxotiro. Nāskarifikī mātō chaka xateyamaxō mā fetsafo chaka xatematiroma. Akka mātō chaka xatexō fetsafo mā chaka xatematiro.

<sup>6</sup> “Ē meka fetsari mato yoinō mā tāpinō. Paxta pōfe nō nami shara ināpaifiaino noko keyotiro mifiki. Askatari kochi nō afara shara ināino peama peamakī chakana fatiro. Nāskari fakī yorafāfe Niospa meka shara nikakaspakī chakafatirofo, Epa Nios chakafakī mekafakakī. Askaifono Epa Niospa meka shara anā ato yoipaiyamakāfe,” ixō Jesús ato yoini.

*“Nō Epa Nios afara yōkaito noko inātiro,” ixō Jesús ato yoini  
(Lc. 6.31; 11.9-13)*

<sup>7-8</sup> Anā Jesús ato yoini iskafakī: “Nāskakē ē mato yoi, afara fichipaikī Epa Nios yōkakāfe mato ināi kiki. Fena fena kakīma manakāfe nā Epa Niospa mato ināitīa. Nāskakē Epa Nios kīfifafāikāfe mā kīfaiito mato ināi kiki. Akka nā yōkai Epa Niospa afara shara ināxii. Nāskarifiakī fētsa afara shara fenaito Epa Niospa fichimatiro. Nāskarifiakī fētsa Epa Nios kīfaiito ināsharakōixii.

<sup>9</sup> “Akka mātō fake mato yoa yōkaito, ĵmā tokiri inātiromē? Maa. Mākai mātō fake mā askafatiroma. <sup>10</sup> Askatari, ĵmātō fāke mato foe yōkaito mā rono inātiromē? Maa. Mākai mātō fake mā askafatiroma. <sup>11</sup> Akka mā chakafixō mātō fakefo kexesharaxō afara sharafo mā ato inātiro. Nāskarifikī Epa Nios nai mēranoato mā afara yōkaito mato kexesharakatsaxakī afara sharafo mato ināsharaxii nā nai mēraxō mato mekexona.

<sup>12</sup> “Nā mā fichipaiyai keskafakī fetsafāfe mato axosharaifono, nāskarifikī māri fetsafo axosharakāfe. Moisés feta a Niospa meka yoimisfāfe nānori yoinifo kirika kenekakī,” ixō Jesús ato yoini.

*Fepoti pishtaōnoa Jesús ato yoini  
(Lc. 13.24)*

<sup>13</sup> Anā Jesús ato yoini iskafakī: “Meka fetsa ē mato yoinō. Nikakapo. Fepoti rafe iskarakī: Fepoti fetsa pishtaki nā fepoti pishta ikikāfe. Akka nā fepoti fetsa efapa. Nā fepoti efapato fai efapa kaa. Nāskakē nā fai efapato yora ichapa fomisfo a omiskōipakenakafo mēra. <sup>14</sup> Akka fepoti pishta ano fai kaa, pishta fekax. Nā fai Nios ano nokoa nā fai atsō pishtakōi. Nāskakē ichapama aō fomisfo,” ixō Jesús ato yoini.

*Ifi āfe fimioxō nō tāpitiro afe keskaramākī  
(Lc. 6.43-44)*

<sup>15</sup> Anā Jesús ato yoini iskafakī: “Ōisharakāfe, a chanāifāfe mato paratirofokī: ‘Nō Niospa meka yoimis,’ ixō mato paratirofo. Afāfe Niospa meka yoimisfomaki. Akka afofi ovejafo keskarafa fikanax akka āto shinā mēra poomā pōfefe keskarakōifo. Nāskakē ato fishtayamakāfe. <sup>16</sup> Akka mā tāpitiro afaa afeskafakanimākai. Akka ifi āfe fimioxō nō tāpitiro afe keskaramākī. Xopa foaikī moxaya foaitiroma. Askatari kachafi moxaya foaitiroma. Nāskaxō nō tāpitiro moxayafo ōikī xopakairokokē. Nāskarifikī nō tāpitiro kachafimāi moxayakē. <sup>17</sup> Akka ifi shara fimi sharaya itiro. Akka ifi chaka fimi chakaya itiro. <sup>18</sup> Nāskakē Ifi shara fimi chakaya itiroma. Ifi chakari fimi sharaya itiroma. <sup>19</sup> Akka ififo fimi sharaya iyamaito ifāfe reraxō koofatiro. <sup>20</sup> Nāskakē a ato tāpimamisfoōnoa mā ato tāpitiro sharafo iyamakani chakafo itirofo,” ixō Jesús ato yoini.

*“Akka keyokōi fotirofoma Epa Nios ika ano. Fisti rasi fotirofo,” ixō Jesús ato yoini  
(Lc. 13.25-27)*

<sup>21</sup> Anā Jesús ato yoini iskafakī: “Akka yora ichapato yoimis iskafakakī: ‘Jesús, mī ēfe Ifokōi,’ famisfo. Nāskafikaxō atirito ea Ifofamisfoma. Nāskakē ēfe Epa Nios ika ari nokotirofoma. Ēfe Epa nai mēra ikato nā ato amapaiyai keskara akatsaxakakī nāfo ēfe Epa ari nokotirofo afe ipaxakakī. <sup>22</sup> Akka mā mai keyoaino nā onifanifo tii keyokōi Niospa ichanāfaxii. Nā nikakaspamisfo tii omiskōipakenakafo mēra ato potaxii. Nāskakē

yora ichapafāfe ea yoikani iskafakakī: ‘Ifo, shināpo. Nō mī aneōxō nō yorafo yoimis. Mī aneōxori nō a niafaka chakafo yorafo mēra nanea nō ato makinoa potamis. Mī aneōxori nō afama mīshti famis yorafāfe atiroma keskafakī. Noko shināfe, Ifo,’ ixō ea yoixikani. <sup>23</sup> Askaifono ē ato xafakīa yoixii iskafakī: ‘Mākai efe yorama. Māfi ato pāramiski. Afara chaka fisti mā famiski. Emakinoax fotakāfe,’ ē ato faxii,” ixō Jesús ato yoini.

*Pexe rafeōnoa Jesús ato yoini*  
(Mr. 1.22; Lc. 6.47-49)

<sup>24</sup> Anā Jesús ato yoini iskafakī: “Akka nā ea nikaito nā ē yoiai keskara aki, nā yōra pexe fakī tāpixō mai chai pōkixō mai teikī pexe kishi nīchitiro keskafakī. <sup>25</sup> Akka oi ikaino, pexe nāmā faka faitiro. Askatari nēfefakī pexe afeskafatiroma. Nāskakē pexe paketiroma mā mai teikōikimāi pexe kishi niano. <sup>26</sup> Akka nā ē yoiaito ea nikafikī a ē yoiai keskara nikaima, askara yora nā yora tatimato pexe fakī mashi ano pexe fatiro keskarakōi. <sup>27</sup> Akka oi ikaino faka faitiro. Askatari nēfefakī pexe potatiro. Nāskax pexe chakanatiro. Nāskarifiakī fētsa ēfe meka nikafikī ea nikaima afofi fenoi fetsekani. Nāskakē omiskōipakenakafo,” ixō Jesús ato yoini.

<sup>28-29</sup> Nāskata mā Jesús mekai xateano yorafāfe nikakaxō, “¡Kee! Nikakapo. Nato tāpikī finakōia, a Moisés yoikī kirika keneni keskara ato tāpimamisfo keskarama, meka sharakōi nato yoi,” fanifo.

## 8

*Jesús yora rashkishiai sharafani*  
(Mr. 1.40-45; Lc. 5.12-16)

<sup>1</sup> Askata Jesús ato yoikī xateta māchi keya ariax tisirimepakeaito yorafāfe chīfafainifo afe fōkakī. <sup>2</sup> Jesús kaino feronāfake isinī iki rashkishi fetseax Jesúski oni. Akiki oxō ratokonō mai chachipakefofā yoini iskafakī: “Ifo, ea sharafapaikī mī ea sharafatiro,” fani. <sup>3</sup> Askafaino Jesús āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino, a rashkishi fetseai koshikōi sharatani. <sup>4</sup> Mā sharano Jesús nīchini iskafakī yoianā: “Mī toa yoiki. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

*Jesús sharafani romanō xanīfāfe āfe ina yonaito*  
(Lc. 7.1-10)

<sup>5</sup> Askafafāini Capernaúm ano kani. Nāno akiki soraro xanīfo nokoni a yonoxomis sharafamapai. <sup>6</sup> Nokoxō yoini: “Ifo, a ea yonoxomis isinī iki. Ēfe pexe ano rakax omiskōiferoikima,” fani.

<sup>7</sup> Askafaino, “Ē kanōkī sharafaxikī,” fani.

<sup>8</sup> “Ifo, ēkai afama. Akka mī toa keskarama. Mī finakōiakī ēfe pexe ano kayamafe. Mī mekapa a ea yonoxomis ea sharafaxōfe nonoxō. <sup>9</sup> Akka eari ēfe xanīfāfe yonomamis. Ēri sorarofa yonomatiro. ‘Katāfe,’ ē faino karisatiro. Askatari, ‘Ekeki ofe,’ ē faino ekeki orisatiro. Nāskakē a ea yonoxomis afara ea axōfe ē faino ea axotiro. Akka mī afama mīshti fatiroki. Mī mekapa a ea yonoxomis ea sharafaxōfe,” ixō yoini.

<sup>10</sup> Askafaito nikakī a afe foafo Jesús ato yoini: “Kee, nikakapo. Na feronāfake israeliyamafixō ea chanīmara fakī finakōi fetsafo keskarama. Akka Israel anoafāfe ea iskafamisfoma chanīmara fakakī. <sup>11</sup> Ē mato xafakīa yoinō. Na maitio ano ikafo Nios chanīmara fakanax nōko xinifo Abrahamnō Isaacanō Jacobonō ichanāxikani Nios yorafo ixikakī. <sup>12</sup> Akka atiri nōko kaifo nā israelifo Niospa afe yorafo ato imapaifiaino chanīmara fakanima. Nāskakanax Nios ika ano nokotirofoma. Niospa ato fakishifā mēra potaxii. Anoax eaiyanā fasi omiskōixikani,” ixō Jesús ato yoini.

<sup>13</sup> Nāskata Jesús yoini soraro xanifo: “Mĩ pexe ano katāfe. Mĩ ea chanĩmara faino a mia yonoxomis mā sharaki,” fani.

*Jesús Pedro rayos sharafani*  
(Mr. 1.29-31; Lc. 4.38-39)

<sup>14</sup> Askata Jesús Pedro pexe ano kani. Nāno Pedro āfe rayos yōxafo yonai oxati kamaki raka ini. <sup>15</sup> Jesús ōikĩ āfe mēkemā ramāni. Ramāino āfe yona matsirisatani. Mā Jesús sharafaano anā yonanima. Mā sharaxō fininākfāta Jesús pimani.

*A isinĩ ikaifo Jesús ato sharafani*  
(Mr. 1.32-34; Lc. 4.40-41)

<sup>16</sup> Nāskano mā xini kaino a isinĩ ikaifo Jesúski efenifo ato Jesús sharafapanō. Atiri a niafaka chakafo ato mēra nanea Jesús āfe mekapa ato makinoa pōtapakeni. Keyokōi Jesús ato sharafapani. <sup>17</sup> Nānori Niospa meka yoimisto Isaías a inōpokoai yoikĩ kirika kenekĩ iskafani: “Nō isinĩ imisno Cristo mā noko sharafaa. Askatari nā noko pāefaifo nomakinoa mā noko potaxona,” ixō Isaías kirika keneni keskara Jesús ani.

*A afe fopaimisfoōnoa Jesús ato yoini*  
(Lc. 9.57-62)

<sup>18</sup> Askata Jesús ōini yorafā rasi akiki feaifāfe. Askaifono aōxō tāpimisfo yoini iskafakĩ: “Okiri nō ĩamāfā pokefainō fokāfe,” ato fani. <sup>19</sup> Akka Jesús kayoamano a Moisés yoikĩ kirika keneni keskara ato tāpimamis akiki oxō yoikĩ iskafani: “Maestro, ěri mefe kapai nā mĩ kai ari ěri mefe kafāsaxiki,” faito, <sup>20</sup> Jesús kemani: “Akka maxoteneroa kiniya, peyafari naayafo akka ěkai pexe yama,” fani.

<sup>21</sup> Askatari a afe kafāsamis fētsa iskafakĩ yoini: “Maestro, ea nĩchiyofe ěfe epa naito ě maifayotanō. Chipa mia Ifofaxiki,” faito, Jesús kemani: <sup>22</sup> “Iskaratĩa ea Ifofafe. Akka nā ea Ifofaafāfema yora nakē maifatirofo,” ixō Jesús yoini.

*Jesús nefe yafi ĩamāfā poo iki meseniaito nishpa fani*  
(Mr. 4.35-41; Lc. 8.22-25)

<sup>23</sup> Nāskata Jesús kanōanāfānē naneinīkfāni aōxō tāpimisfori afe naneinīfofānifo. <sup>24</sup> ĩamāfā pokefainaifono atoki nēfefā nokoni. Jesús kanōanāfā xaki mēra rakax oxano nefeyanā ĩamāfā poo ini. Kanōanāfā faka fospikōini. <sup>25</sup> Askaino aōxō tāpimisfāfe mōinifo iskafayanā: “¡Ifo, mā nō āsaikai! ¡Nō āsayamanō moife!” fanifo.

<sup>26</sup> Askafaifono, Jesús ato yoini: “¿Afeskai mā rateimē? Mā ea chanĩmara fasharama. Nāskakē mā ratei,” ato fani. Ato askafata, fininākfāta fāsikōi, “¡Nēfe, nishpafe!” fata, “¡ĩamā, nishpafe!” fani. Askafaino anā ĩamāfā feroinima. <sup>27</sup> Askafaito ōikani yoinānifo: “¡Kee! ¿Na feronāfake afe keskaramē na nefe feta ĩamāfānē ato yoiaito nikaifo?” ikanax yoinānifo.

*Feronāfake rafeta Gadara mai anoxō niafaka chakafo nanea- fono Jesús ato makinoa potani*

(Mr. 5.1-20; Lc. 8.26-39)

<sup>28</sup> Askata Jesús okiri ĩamāfā aōxō tāpimisfo feta pokefainax Gadara mai ano nokonifo. Nāno feronāfake rafe niafaka yōshi chaka nanekanax Jesúski nokonifo kinĩfā mēranoax. Nā rafe mesekōi ipaonifo. Nāskakē yorafāfe a ikafo ano tsōa ato finōtiroma ipaoni atoki mesekakĩ. Nā maiyafo ano nā rafe ipaonifo. <sup>29</sup> Nāskakē Jesús fichikanax fāsikōi fiisiyanā yoinifo: “Mĩfi Niospa Fakeki. Akka, ¿mĩ noko afeskafaiyoamē? ¿Mĩ noko omiskōimaniyoamē?” Jesús fanifo.

<sup>30</sup> Askafaifono chaimaxō kōchifā rasichi pinifo. <sup>31</sup> Nāskakē niafaka chakafāfe Jesús iskafanifo: “Mĩ nā feronāfake rafe makinoa mĩ noko potaimākai kochifo mēra noko nĩchife,” faifono, <sup>32</sup> “Fotakāfe,” Jesús ato fani. Nāskax niafakafo feronāfake rafe makinoax



tsekekanax kochifo mēra ikinifo. Nāskakē kochi rasi ichoax ĩamãfã mēra keyopakeni. Nāskax āsai fetseni.

<sup>33</sup> Askaito ōikani a kochifo kexemisfo ichonifo. Mã pexefo tii ano nokokaxõ ato yoinifo: “Nã feronãfake rafe nã niafaka naneafo rafe mã Jesús ato makinoa niafaka põta. Askatari nõko kochifo mēra ikimanano keyokõi nãfoya nõko kochifo ĩamãfã mēra keyopakeax āsai fetsea,” ato fanifo. <sup>34</sup> Ato yoiaifono nikakanax keyokõi nã pexefo tii anoax Jesúski fenifo. Akiki nokokaxõ yoinifo: “Na nõko mai anoax katãfe,” fanifo.

## 9

### *Jesús yora finimisma sharafani* (Mr. 2.1-12; Lc. 5.17-26)

<sup>1</sup> Askata Jesús kanõanãfã mēra nanekaini. ĩamãfã okiri pokefaini kaax ãfe mai ano nokoni. <sup>2</sup> Nãno ikano a feronãfake finimisma yorafãfe akiki efenifo ãfe ratatinĩ ratakaxõ Jesús sharafanõ ikaxõ. Jesús ōini shinãifãfe iskakakĩ na finimisma Jesús sharafai kiki ikaxõ. Nāskakē a finimisma Jesús iskafani: “Efe yorashta, inimafe. Iskaratĩa mẽ mia chaka soaxonaki,” fani.

<sup>3</sup> Askafaino a Moisés yoikĩ kirika keneni keskara ato tãpimamisfãfe atirito nikakaxõ ãto shinã mēraxõ shinãnifo iskafakakĩ: “Natokai ato chaka soaxotiro. Nios fistichi ato chaka soaxotirokĩ. Akka nato noko feparapai, ‘Ē Niosra’ noko fapai,” ixõ ãto shinã mēraxõ shinãnifo. <sup>4</sup> Askaifono Jesús tãpixõ a shinãifo keskara ato yoini: “¿Afeskakĩ mato shinã mēraxõ mã chaka shinãimẽ? <sup>5-6</sup> Ĕfi Cristokĩ ĕ yorafo ato chaka soaxotiro. Akka, ¿ĕ afaa fatiromẽ? Mẽ mia chaka soaxona ĕ fatiroraka. Askatari ĕ mia sharafaa ĕ fatiroraka,” ato fani. “Akka ĕ mato tãpimanõ ĕ Niosxõ mato chaka soaxotiro nono mai anoxõ.” Nāskata Jesús a feronãfake finimisma yoini: “Fininãkafata mĩ rakati fifaini mĩ pexe ano katãfe,” Jesús fani.

<sup>7</sup> Jesús askafaino a finimisma fininãkafãta ãfe pexe ano kani. <sup>8</sup> Askaito ōikani yorafo ratei fetsenifo. “¡Kee, ōikapo! Nios tsoa keskarama. Fãsi sharakõi. Nõ ōimisma keskara mã noko rama ōimana. Niospa Yõshi Sharaõxõ na feronãfake finimisma Jesús ãfe mekapa mã sharafaa. Askatari ãfe chakari mã soaxona,” ikanax yoinãnifo.

### *Jesús Mateo ifini aõxõ tãpimis inõ* (Mr. 2.13-17; Lc. 5.27-32)

<sup>9</sup> Jesús nãnoax kakĩ feronãfake fisti fichini, ãfe ane Mateo,\* ãfe xanĩfo kori fixõi tsaokẽ. Nāskaito Jesús yoini: “Efe kofe ĕ mia tãpimanõ,” faino Mateo fininãkafã Jesús fe kani.

<sup>10</sup> Nāskafaito Mateo Jesús iyoni ãfe pexe anoxõ pikikakĩ. Askatari a yora chakafori afe inifo a xanĩfo kori fixomisfo. Nãfãfe ãa chanĩxõ kori finõmainĩfofã fimisfo inifo. Askatari a yora fetsafo chakafamisfori fekanax akairi mĩsa ano Jesús fe tsaonifo a feta pixikakĩ. Jesúsxõ tãpimisfori nãno ato fe tsaonifo ato feta pixikakĩ. <sup>11</sup> Askaito ōikakĩ fariseofãfe Jesúsxõ tãpimisfo yõkanifo: “¿Afeskakĩ mato maestro nã ato kori fixomisfo feta piimẽ, a yora fetsa chakafo fetari pii?” fanifo.

<sup>12-13</sup> Askafaiãfãfe nikakĩ Jesús ato yoini: “A sharafãfe notoro fenakanima. Akka nã isinĩ ikaifãfe notoro fenakani. Nāskafakĩri yorafãfe yoimisfo iskakakĩ: ‘Ĕkai afaa chakafamisma. Nāskakē ĕ afaa yopaima ĕfe chaka ea soaxonõ,’ imisfo. Nāskakē ĕ ato chaka soaxotiro. Akka fetsafãfe yoikĩ iskafafono: ‘Ĕ afara chakafamis. Nāskakē a ĕ imis keskara ĕ anã ipaima,’ ikaifono ĕ ato chaka soaxotiro. Akka nã nõ sharakõi ikaifoõnoax ĕ onima. Akka ĕ oni a yora chakafo ãto chaka ato soaxoxiki. Akka ĕ mato yoipai mã tãpinõ a Niospa ato shinãmanaino iskafakĩ kenenifo: ‘Mã yoinãfo retexõ ea inãxiki mã koamis mato chaka soapikĩ, askara ĕ fichipaima. Akka ĕ fichipai fetsafo mã ato noikĩ mã ato sharafaxõaito,’ ixõ kenenifo.

\* 9:9 Mateo ane rafeya ipaoni. Āfe ane fetsa Levĩ.

“Akka ĕ onima a yora sharafoĥnoax. Askatamaroko a yora chakafoĥnoax ĕ oni ato chaka soaxoxiki,” ixĥ Jesĥs ato yoini.

*Nĥ foni tenemisfofĥfe Jesĥs yĥkanifo  
(Mr. 2.18-22; Lc. 5.33-39)*

<sup>14</sup> Juan ĥfe inafu fĕkaxĥ Jesĥs yoinifo iskafakakĥ: “Fariseofĥfe foni tenekĥ feyafamisfo Nios shinĥkakĥ. Nĥri askafamis foni tenekĥ Nios shinĥkĥ. Akka, ĥafeskakĥ mĥĥxĥ tĥpimisfĥfe foni tenekanimamĕ?” fanifo.

<sup>15</sup> Askafaifĥfe Jesĥs ato kemani: “Feronĥfake ĥfiyaino, yorafo ano fisti ichanĥkaxĥ afara fetsa fetsatapafu afeta pitirofo inimayanĥ, aicho fakakĥ akiki inimakakĥ. Nĥ kĕromĥ ĥfe fene ano ato fe ikano tsĥa foni tenetirofoma inimakakĥ. Akka mĥ fene rĕteafono afe yorafĥfe shinĥkakĥ foni tenetiro,” ixĥ Jesĥs ato yoini.

<sup>16</sup> “Tsĥa sama fenaya sama xini kishi fatiroma. Nĥ askafaino sama fena samama chakanatiro. Nĥskatari sama fena fe sama xini isharatiroma. Nĥskakĕri nĥ ĕ mato yoiai keskara mĥ nikakĥixĥ a mĥ ipaoni keskara anĥ mĥ itiroma mĥmĥi ea nikakĥiax. A mĥ ipaoni keskara shinĥmakita nĥskax mĥto yora fena keskara shara itiro. <sup>17</sup> Nĥskarifikĥ tsĥa mĥmĥ fata koiro pisha xini mĕra nanetiroma nĥ mĥmĥnĥ faraxakaino toxamĥiyanĥ. Nĥskakĕ nĥ mĥmĥ fata fe koiro pisha chakanatirofo. Akka nĥ mĥto xinifĥfe mato yoimisfo keskara fe nĥ ĕ mato yoiai keskara ĥsinĥtiroma. Nĥ ĕ mato yoiai keskara Niospa meka sharakĥi. Akka a mĥto xinifĥfe mato yoimisfo anori shinĥx mĥ isharatiroma. Niospa mekaya meka chaka ĥsinĥtiroma. Nĥskakĕ mĥ nikapaifi mĥ shinĥsharatiroma. Nĥskarifikĥ tsĥa mĥmĥ fata koiro pisha xini mĕra nanetiroma nĥ mĥmĥnĥ faraxakaino toxamĥiyanĥ. Nĥskakĕ nĥ mĥmĥ fata fe koiro pisha chakanatirofo. Akka nĥ mĥto xinifĥfe mato yoimisfo keskara fe nĥ ĕ mato yoiai keskara ĥsinĥtiroma. Nĥ ĕ mato yoiai keskara Niospa meka sharakĥi. Akka a mĥto xinifĥfe mato yoimisfo anori shinĥx mĥ isharatiroma. Niospa mekaya meka chaka ĥsinĥtiroma. Nĥskakĕ mĥ nikapaifi mĥ shinĥsharatiroma,” ixĥ Jesĥs ato yoini.

*Jairo fake xotofake mĥ nakĕ Jesĥs otofani. Askatari kĕromĥri Jesĥs rapati mĕeax sharani  
(Mr. 5.21-43; Lc. 8.40-56)*

<sup>18</sup> Nĥnori Jesĥs ato yoianino judeofĥfe xanĥfo nokoni. Jesĥski nokoxĥ xanĥfĥfe a nĥmĥ ratokonĥ mai chachipakefofĥ yoini: “Ĕfe fake xotofake rama naa. Akka mĥ kaxĥ mĥ mĕkemĥ mĥ ramĥino anĥ ototiro,” xanĥfĥfe Jesĥs fani.

<sup>19</sup> Askafaino Jesĥs fininĥfata aĥxĥ tĥpimisfo fe kani xanĥfo aĥo. <sup>20</sup> Askatari nĥnori kĕro imi nesemisma ini, doce xinia amis imi nesekima. Nĥ kĕromĥ Jesĥs kaito aĥo kaxĥ a kachikirixori ĥfe tari kexa ramĥkani. <sup>21</sup> “Ĕ ĥfe tari mĕeax ĕ sharatirora,” ixĥ ĥfe shinĥ mĕraxĥ shinĥni. <sup>22</sup> Akka Jesĥs ifiakekafĥta nĥ kĕro fichini. Fichita yoini: “Yĥxashta, rateyamafe. Mĥ ea chanĥmara faax mĥ mĥ sharaki,” Jesĥs faino nĥ kĕro imi neserisatani.

<sup>23</sup> Askata mĥ Jesĥs nokoax xanĥfĥfe pexe mĕra ikikaini. Anoxĥ Jesĥs ĥia yorafĥfe ĥto xĥiti manenifo, yora fetsafo oiakanĥ sheesaifono. <sup>24</sup> Askaifono Jesĥs ato iskafani: “Nonoax fĥtakĥfe. Na fakekai naamaki. Oxaki,” ato faito Jesĥs ĥsanifo. <sup>25</sup> Ato kĥimata xotofake mĕtsoinĥfĥfanino koshikĥi fininĥkafani. <sup>26</sup> Nĥskata Jesĥs nĥ xotofake naa otoakĕ nikakanax pexefo tii chanifofĥsanifo.

*Fĕxo rafe Jesĥs sharafani*

<sup>27</sup> Nĥskata Jesĥs xanĥfĥfe pexe anoax kaino fĕxo rafetari ĥĥfafainifo iskafayanĥ fĥsikĥi: “Mĥ nĥko xini David fenaki, noko noife,” fanifo. <sup>28</sup> Askafaifono Jesĥs pexe fetsa mĕra ikikaini. Nĥno afe ikiafono Jesĥs ato yĥkani: “ĥMĥ chanĥmara faimĕ a ĕ mato sharafatiro?” ato faito, “Ĕje, Ifo, nĥ mia chanĥmara fai,” fanifo. <sup>29</sup> Nĥskata ato fero ramĥkayanĥ ato yoini: “Ea chanĥmara faaxfi mĥ sharaikai,” ato fani. <sup>30</sup> Ato askafaino ĥisharanifo. Nĥskakĕ Jesĥs ato yoisharani: “Ea nikakapo. A ĕ mato sharafaa tsoa yoiyamakĥfe,” ato fani. <sup>31</sup> Akka ato anori yoifekĕ nĥ Jesĥs sharafaa nĥ ano ikafo ato yoifofĥsafanifo nĥ rafeta.

### *Feronāfake mekamisma Jesús sharafani*

<sup>32</sup> Nā fēxo rafe imisfo peXe mēranoax tsekefainaifono fetsafāfe feronāfake mekamisma Jesúski efenifo Jesús sharafanō. Niafaka chaka a mēra naneano mekamisma ini. <sup>33</sup> Jesús mā feronāfake makinoa niafaka chaka potano nā feronāfake mekamisma mekani. Nāskakē nā ano ikafo rateyanā yoinānifo: “¡Kee, ōikapo! Na nōko mai Israel anoxō Jesús akai keskara tsōa ōimisma,” ikanax yoinānifo. <sup>34</sup> Askafaifono fariseofāfe yoinifo: “Nato nīafaka xanīfoōxō niafaka potai,” ikanax yoinānifo chakafakī mekafakani.

### *Jesús yorafo shinākōini*

<sup>35</sup> Nāskakē Jesús pexefo tii judeofo ikafo ano kafāsani. Judeofāfe ichanāti peXe mēraxō Jesús Niospa meka shara ato yoisharani iskafakī: “Isharakāfe. Nios mātō xanīfokōi ipai kiki,” ixō ato yoifofāsafani. Nāskaxō a isinī ikaifo fetsa fetsatapafo ato sharafani. <sup>36</sup> Yorafā rasi akiki feaifono ōikī Jesús ato shinākōini fekaxteafāfe ōikī, nā ovejafo ifomaiskanax tsōa ato kexeyamano fofāsatirofo keskara ato ōikī. <sup>37</sup> Nāskaxō a aōxō tāpimisfo ato yoini iskafakī: “Yora ichapafāfe ea nikayamafiaifono ichapatoma ea yonoxokani eōnoa ato yoikakī. Nāskakē mā Epa Nios kīfikāfe a yonoxomisfo katonō eōnoa ato yoinōfo. <sup>38</sup> Akka Epa Nios kīfikāfe yorafo nīchinō ēfe meka ato yoitanōfo ea Ifofanōfo,” ixō Jesús ato yoini.

## 10

### *Jesús aōxō tāpimisfo doce feronāfake ifini*

*(Mr. 3.13-19; Lc. 6.12-16)*

<sup>1</sup> Askata Jesús aōxō tāpimisfo kenani: “Ekeki fekāfe,” ato faino, akiki foaifono ato yoini aōxō yorafo sharafanōfo, a niafaka chakafo yorafo mēra nanea ato makinoa potanōfo, a isinī ikaifo fetsa fetsatapafo aōxō sharafanōfo.

<sup>2</sup> Nā feronāfake docefāfe āto anefo iskarakī: fetsa Simón. Nā Simón āfe ane fetsa Pedro. Āfe exto Andrés. Fetsafori āto ane Santiago, āfe exto Juan, nā rafe Zebedeo fake ini. <sup>3</sup> Felipe, Bartolomé, Tomás, Mateo, nā Mateo Roma anoxō xanīfo kori fixomis ini. Askatari Santiago fetsa, Alfeopa fake, Tadeori ini. <sup>4</sup> Simón fetsa nāato āfe kaifo feta romanōfo potapaini anā israelifo yonomayamanōfo. Askatari Judas Iscarioteri ifini, nāato Jesús chakafakī ato achimani Jesús retenōfo. Nā tii Jesús ifini aōxō tāpimiskōi inōfo.

### *Jesús aōxō tāpimisfo nīchini Nios Xanīfoōnoa ato yoitanōfo*

*(Mr. 6.7-13; Lc. 9.1-6)*

<sup>5</sup> Nāskata Jesús aōxō tāpimisfo nīchini ato iskafakī yoiyanā: “Nā nōko kaifomafāfe āto mai ano foyamakani. Askatari nā samāritanōfo ikafo anoriri foyamakani. <sup>6</sup> Akka nā nōko kaifo israelifo ato mēra fotakāfe. Nāfo oveja fenoafo keskarafofokī. <sup>7</sup> Fokaxō ato yoikī iskafatakāfe: ‘Mā chaima nōko Ifo Nios oi kiki nōko xanīfo finakōia ixii,’ ixō ato yoitakāfe. <sup>8</sup> A isinī ikaifo ēfe sharaōxō ato sharafatakāfe. Askatari naafono ato otofatakāfe. A rashkishii fetseifori ato sharafatakāfe. A niafaka chakafori āto mēra naneafo ato makinoa pōtatakāfe. Akka ēfe shara kaxpa ē mato minia afaa ē mato yōkama. Nāskari fakī, ato kaxpa sharafatakāfe.

<sup>9-10</sup> “Akka mā kakī afaa mā fokiki. Mātō kori foyamata, mātō rapati fetsa foyamata, mātō sapato fetsa foyamata, mātō forosa foyamata, mātō mēsteti foyamata fakāki, eōxō ēfe meka mā ato tāpimani kaikai. Nāskakē mā afara yopaito mato inātirofo mā pinō a mato nikamisfāfe.

<sup>11</sup> “Mā peXe rasi ano nokoxō nā feronāfāke Nios Ifofasharakōia fenakāfe. A keskara fichixō āfe peXe ano iyoxō Niospa meka ato yoisharaxikaki nā mā kaitīa. <sup>12</sup> Nā peXe mēra ikixō ato yoikī iskafakāfe: ‘Aicho. Nō mato ōiyoa,’ ato fakāfe. <sup>13</sup> Akka mato ifisharaino, mā tāpitiro nā peXe ifāfe afe yorafo īkisharamis. Nā mā yoiyai keskafakī Epa Niospa axosharai tanaima shara inō. Akka a mato ifisharayamaifo, afāfe afe yorafo īkisharamisfoma. Nāskakē nā mā yoiyai keskafakī Epa Niospa ato axosharaima. <sup>14</sup> Akka peXe fetsa mēraxō

mato ifikaspaifono, a pexe mēranoax mā tseketiro. Askatari pexe rasi mēraxori mato askafaifono, mā anoax katiro. Mā anoax tsekekaikī mātō taekinoa mā mapo taa taa atiro ato ōimakī. Mā askafaino tāpitirofo Nios atoki inimayamaino. <sup>15</sup> Ĕ mato paraima yoi. Nā pexe rasi Sodoma anoafō feta Gomorra anoafāfe afara chakakōi fapaonifo. Nāskakē Niospa nā ato omiskōimanaitīa ato omiskōimaxii. Akka nā mato nikakaspaifo nāfo ato omiskōimaki finakōixii,” ixō Jesús ato yoini.

*“Mato omiskōimakani kiki,” ixō Jesús ato yoini*

<sup>16</sup> Anā Jesús ato yoini iskafakī: “Ōikapo. Ĕ mato nīchikai nā yora chakafo mēra. Akka nā yora chakafāfe nā poomānā ovejafo pipaitiro keskafakani kiki mato. Mato askafaifono nā poomā onāyakōi keskara ikāfe eōxō tāpisharakāfe. Nā rīfi afaa chaka shināmisma keskafakī māri askara shinākāfe. <sup>17</sup> Ōisharakaki. Nā yora chakafāfe mato achikaxō āto xanīfofo ano mato iyotirofoki. Nāskakaxō āto ichanāti pexe mēraxō mato koshatirofoki. <sup>18</sup> Nāskakaxō xanīfofo ano mato iyotirofo eōxō. Akka anoxō na meka shara eōnoa mā ato yoixii. Askatari judeofomari mātō kaifomafori na meka shara eōnoa mā ato yoixii. <sup>19</sup> Akka mato achikaxō xanīfofo ano mato ināifono shināchakayamakāfe afeskaxō mā ato yoisharaimākai. Xanīfofo ano mato iyofaifono Epa Niospa mato shināmanaino mā ato yoisharaxii. <sup>20</sup> Akka mā ato yoi mā mekaima Epa Niospa Yōshi Shara mekai mā ato yoiaino.

<sup>21</sup> “Nāskatari yorafāfe āto extofo ato achimaxikani, yora fetsafāfe ato retenōfo. Askatari ato apafāferi āto fakefo ato achimakani fetsafāfe ato retenōfo. Fakefāferi āto apa yafi āto afakī ōititishkikakī ato achimakani fetsafāfe ato retenōfo. <sup>22</sup> Mā ea chanīmara fakē nāskakē eōxō mato yorafāfe noikaspakani. Akka mato noikaspafiaifono mā eōnoax omiskōifikī mā ēfe meka nikasharakōiaito ē mato kexesharakōixii Epa Nios fe mā isharpapakexanō. <sup>23</sup> Akka pexe rasi anoxō mato omiskōimanaifono, pexe rasi fetsa ano ichotakāfe. Akka ē mato yoisharanō. Ea nikasharakāfe. Mā israelifāfe pexe rasi anoxō keyokōi mā ato yoioamano, ē orisaxii.

<sup>24</sup> “Akka a aōxō tāpimisfāfe a ato tāpimamis finōtirofoma. Askatari a yonoxomisfāfe āfe patoro finōtirofoma. <sup>25</sup> Akka a aōxō tāpimisfo a ato tāpimamis keskara ikani. Askatari a yonoxomisfo āto patoro keskara itirofo. Nāskax māri ea keskara ixii. Nāskakē nā ea chakafamisfo keskafakī matori chakafakakī finakōixikani. Nāfāfe ea noikaspakakī ea yoimisfo iskafakakī: ‘Mī niafaka yōshi chakafāfe xanīfo. Mī Beelzebú,’ ixō ea yoimisfo. Ĕ mātō Ifofekē ea askafamisfo. Akka matori askafakakī finakōixikani,” ixō Jesús ato yoini.

*Akka Nios fistiki nō mesetiro*

*(Lc. 12.2-7)*

<sup>26</sup> Anā Jesús ato yoini iskafakī: “Akka mato omiskōimafiaifono, atoki rateyamakāfe. Akka nā afara one yoifimisfono Niospa ato xafakīa kāimaxoxii, afarari fomāpaimisfono, nāfori Niospa ato xafakīa kāimaxoxii. <sup>27</sup> Akka nā ē mato yoimis yorafāfe ato ferotaifi xafakīa ato yoisharakāfe. <sup>28</sup> Akka mato retepaifiaifono rateyamakāfe. Afāfe mato retefitirofono, akka mātō fero mēsho afeska fatirofoma. Atoki ratetamaroko, Nios fistiki mesekāfe. Nāato noko retexō nōko fero mēsho nā omiskōipakenakafo mēra potatiro.

<sup>29</sup> “Nāskakē a yora chakafo retemitsamisfoki atoki rateyamakāfe. Epa Niospa mato kexesharai kiki. Shinākapo. Peya mīshti afaayamafekē Epa Niospa afo shināki. Ato namapaiyamaino tsōakai nā peya mīshtifo retetiroma. <sup>30</sup> Akka ē mato yoi, Epa Niospa mātō foo fisti rasi mato tāpikakōia. <sup>31</sup> Nāskakē rateyamakāfe. Nā peya mīshtifo kexesharamis keskafakī, matori Epa Niospa kexesharakī finakōiakī,” ixō Jesús ato yoini.

*“Akka atiri yorafāfe, ‘Jesús ēfe Ifora’ ea famisfo yorafāfe ferotaifi. Akka atirifāferi, ‘Jesús ēfe Ifomara’ ea famisfo,” ixō Jesús ato yoini*

*(Lc. 12.8-9)*

<sup>32</sup> Anã Jesús ato yoini iskafakī: “Yora fetsafāfe ferotaifi, ‘Jesús ěfe Ifora’ ea faifāfe ěri ěfe Epa Nios nai mĕra ika anoxō, ‘Nafo efe yoraki’ ě ato faxii. <sup>33</sup> Akka nã yora fetsafāfe ferotaifi, ‘Jesús ěfe Ifomara’ ea faifāfe ěri, ‘Nafo efe yorafomara’ ě ato faxii ěfe Epa Nios arixō,” ixō Jesús ato yoini.

*“Akka atirifāfe ea chanĩmara faifono, atirifāferi ea chanĩmara fakanima,” ixō Jesús ato yoini*

*(Lc. 12.51-53; 14.26-27)*

<sup>34</sup> Anã Jesús ato yoini iskafakī: “¿Mã shināimĕ maitio anoax keyokōi yorafo eõnoax inimanõfo ě oni? Maa. Anorima. Akka nã ě mato yoiai keskara tsōa anoris shinākanima. Akka nã ea chanĩmara faifāfe shara shināifono akka nã ea chanĩmara faafāfema afara fetsa chakafo shinākani. <sup>35</sup> Akka āfe apa ea chanĩmara faino āfe fāke ea chanĩmara fakaspakī āfe apaki õitifishkitiro. Askatari āfe āfari ea chanĩmara faino āfe fake xotofāke ea chanĩmara fakaspakī āfe afaki õitifishkitiro. Askatari āfe fāfafa yōxafāfe ea chanĩmara faino, āfe fāfafa naetāfa ea chanĩmara fakaspakī, āfe fāfafa yōxafoki õitifishkitiro. Akka ě nai mĕranoax matoki oyamanikĕ askakeranafoma. <sup>36</sup> Eõxō nãnorifos shinākanima. Akka fetsafāfe ea chanĩmara faifono eõxō ato fe yorakõifo noikaspatirofo.

<sup>37</sup> “Fĕtsa āfe apa yafi āfe afa noikī finakõixō akka ea noikī finayamax, ea Ifofamis itiroma. Askatari fĕtsari āfe fake feronāfake yafi āfe fake xotofake noikõixō, akka ea noikī finayamax ea Ifofamis itiroma. <sup>38</sup> Akka fĕtsa yoitiro iskafakī: ‘Ea omiskõimafiaifono ěfe Ifo ě potatiroma,’ ixō yoitiro. Akka fĕtsari yoikī iskafatiro: ‘Ea omiskõimanaifono ě Jesús Ifofaima,’ ea askafax efe nĩpaxatiroma. <sup>39</sup> Akka fĕtsa iskafakī shināi: ‘Ĕ Jesús Ifofaito ea omiskõimakanira,’ ixō shinākī, ěfe meka kachikiri faax, nã keskara yora naax omiskõipakenaka. Akka fetsa eõnoax omiskõifikī ea potaxma nã keskara yora naax efe isharpakenaka,” ixō Jesús ato yoini.

*Akka fetsafāfe ato sharafaxōaino, Niospa afara shara ināxii*

*(Mr. 9.41)*

<sup>40</sup> Anã Jesús ato yoini iskafakī: “Akka fetsafāfe mato nikakõikakī eari nikakõikani. Askatari fetsafāfe ea nikakõikakī ěfe Epa Niosri nikakõikani nãatomāi ea nono mai ano ea nĩchinino. <sup>41</sup> Akka fĕtsa shinākī iskafatiro: ‘Nãatofi Niospa meka yoimiski. Nãskakĕ ě āfe meka nikasharai,’ ixō yoitiro. Akka nã Niospa meka yoimis afara shara ināi keskafakī ari Niospa ināsharaxii. Nãskakĕ fĕtsari shinākī iskafatiro: ‘Nã feronāfake sharaki Niospa meka nikasharamiski. Nãskakĕ āfe meka ě nikakõi,’ ixō shināino, nã Niospa meka yoimis afara shara ināi keskafakī ari afara shara ināsharaxii. <sup>42</sup> Fĕtsa ea chanĩmara faxō ea Ifofakī, aato shināi iskatiro: ‘Ĕ Jesús Ifofamis. Nãskakĕ afara shara ě axõ,’ ixō shinākī afara shara axotiro. Nãskakĕ ě yoinō, ea nikakapo. Faka pishta mã fetsa ayamakĕ Niospa matori afara shara ināsharaxii,” ixō Jesús ato yoini.

## 11

*Juan aõxō tãpimisfo Jesúski nĩchini*

*(Lc. 7.18-35)*

<sup>1</sup> Askata Jesús aõxō tãpimisfo doce ato tãpimaxō ato nĩchini yorafo Niospa meka shara ato tãpimatanõfo. Jesús mã ato yoikī keyoax ari kani, fetsafo tãpimanikai a pexe rasi chaimashta ikafo ano.

<sup>2-3</sup> Askatari Juan Maotista karaxa mĕra ixō nikani Jesús Apa Niosxō yorafo sharafaito. Nãskakĕ tãpisharapaini. Nãskaxō karaxa mĕraxō aõxō tãpimisfo nĩchini Jesús ano. Mã ato nĩchia fõkaxō yõkanifo: “¿Mĩmĕ Cristo nã Epa Niospa nokoki nĩchiai, askayamai fetsa nokoki oiraka nã nõ manai?” ixō yõkatanõfo Juan ato nĩchini.

<sup>4-5</sup> Mã Jesús ano nokokaxō yõkanifo. Askafaifono Jesús ato kemani: “Fokaxō Juan yoitakāfe a mã õiyanã a mã nikafori. Yoitakāfe, mã fĕxofāfe sharakaxō õisharakani kiki, askatari nã chatofori mã sharakanax niafoki, a rashkishiaifori mã sharafokī, a

pastofãferi mã nikasharakani kiki, a namisfori mã otoafoki, a afaamaisfãferi Niospa meka shara nikakani kiki afeskaxõ Epa Niospa noko ifitiromakĩ.”<sup>6</sup> Nãskaxõ ato yoini: “Akka a ea chanĩmara fasharakõia afara fetsa shinãtama ekeki inimakõitiro,” Jesús ato fani, Juan ina rafe.

### *Jesús ato yoini Juanoa*

<sup>7</sup> Nã a Juan ato nĩchia rafe mã foaifono Jesús yorafo yoikĩ taefani Juanoa. “¿Afeskakĩ tsõa istoma anoa Juan õifokani fonifomẽ? Juankai nã nẽfe tafa pei taka taka akai keskarama. Nãskarifiakĩ mã mã tãpia Juankai õiti ranãyama.<sup>8</sup> Akka, ¿tsoa õikai mã kamismẽ? Õitsai, feronãfake rapati sharakõi safekẽ õikai mã kamisraka. Akka mã mã tãpia a rapati sharakõi safemisfo xanĩfofofãfe ato pexe anoxõ rapati sharakõi safetirofo.<sup>9</sup> Akka, ¿tsoa õikai mã kamismẽ? Nã Niospa meka yoimis õikai mã kamisraka. Akka chanĩma, nã Juan Niospa meka yoimis finakõia, fetsafo keskarama.<sup>10</sup> Akka nã Juanoa yoikĩ Isaías kirika kenei iskafakĩ:

Mĩ nai ariax mai ano oyoamano, nã ãfe meka yoimis ã nĩchi taefakĩ mĩnoa ato yoiaino itipinĩ sharakaxõ mia nikakõinõfo, ixõ kenei.<sup>11</sup> Akka ã mato yoi ã mato paraima. Tsõakai Juan finõama. Juan yoimis keskara meka shara noko tsõa yoimisma. Juanki Nios inimakõimis. Akka fetsafãferi afaayamafikaxõ ea Ifofaifono Nios atoki inimakõirikai. Nãskakẽ Juan Maotista finakõifiano fetsafãfe finõkõiafo Niospa ato õimis.

<sup>12</sup> “Nã Juan ato matotisa fapanitã Niospa meka nikanixakakĩ, iskaratĩari yorafo Nios ika ano ikipaikõikani. Iskakĩ shinãmisfo; ‘Nios xanĩfo ariax ãri ãfe yora ipai afe nĩpaxakĩ. Afaa pishtakai ea nẽtefatiroma ã ãfe yora inõ, ixõ shinãmisfo.<sup>13</sup> Akka Juan oniyamano taeyoi nã Niospa meka yoimisfo feta Moisésri kenei iskafakĩ: ‘Nã noko ifimis nõko Xanĩfo finasharakõi oxii,’ ixõ keneifo. Akka nã Niospa meka yoimisfãfe keneifo keskara nãnorikõi Juan ato yoini.<sup>14</sup> Niospa meka yoimisto kenei iskafakĩ: ‘Ë matoki Elías nĩchixii,’ ixõ Niospa yoini. Akka mã ãfe meka chanĩmara fapaikĩ mã tãpitiro nã Juan Elías keskarari.<sup>15</sup> Mã ea nikatirokĩ ea nikakãfe. Ëfe meka mãto shinã mẽra nanekãfe,” ato fani.

<sup>16</sup> Nãskaxõ anã ato yoini: “Iskaratã na niyoafo afe keskarafomãki ã mato yoinõ mã tãpinõ. Nã fakefo ãto kaxeti anoax kaxekakĩ ãto yamafo kenatirofo tai tai iyanã. Akka mã ãto yamafo nokokanax a ato yamafãfe fichipaiyaifo keskai tsoa kaxesharayamaino ato yoitirofo iskafakakĩ:<sup>17</sup> ‘Nõ nõko xãiti maneaino akka mã mairamisma. Askatari shinãmitsayanã nõ fanãikaino mã oiamisma,’ ixõ ato yoitirofo. Akka mãri nãskariai mã tsoaki inimamisma.<sup>18-19</sup> Nãskafakĩri Juan yafi ea mã mekafai. Juankai pikĩ finapaimisma nã õiai pishta pimis, askatari fimi ene pae pishta ayamisma. Nãskakẽ aõnoa mã yoia iskafakĩ: ‘Nã Juan niafaka yõshi chakaya,’ mã famis. Akka ã yorakõi ã Niospa Fakekõi piyanã ã ayasharamis. Akka mã ea iskafakĩ yoimis: ‘Jesús ichapakõi piimis, askatari pae ayamis,’ mã ea famis. ‘Nãskax yora chakafo fe rafemis, a romanõ xanĩfo kori fixomisfo feri rafemis,’ mã ea famis. Akka ã shara imis ea Niospa ea shinãmanaino. Juanri shara imis Niospa shinãmanaino. Yorafãfe noko õikĩ tãpitirofo,” ixõ Jesús ato yoini.

### *Pexe rasi anoxõ Jesús nikakaspanifo*

*(Lc. 10.13-15)*

<sup>20-21</sup> Askata anori ato yoita Jesús nã pexe rasi anoafo ato yõani iskafakĩ: “Ooa, Corazin anoafãfe Betsaida anoafo fe, mã omiskõi finakõixii. Akka Tiro anoxõ Sidón anoxori nã ã mato õimana keskara, ã ato õimanano ãto chaka xatekaxõ Epa Nios Ifofakeranafo. ‘Ooa, nõ afara chakafamiskĩ iskaratã nõ anã Nios Ifofai,’ iyanã rãfikaxõ ãto rapati chapo safekaxõ chii mãpo raish akeranafo fetsafãfe ato õinõfo.<sup>22</sup> Akka Niospa Tiro anoafo yafi Sidón anoafori ato omiskõimafiakĩ ato omiskõimasharaima, akka matoroko omiskõimakĩ finakõixii.<sup>23</sup> Akka, ¿nõ Capernaúm anoax nõ nai mẽra kai Epa Nios ari ixõ mã shinãimẽ?

Maa. Nã omiskõipakenakafo mēra ě mato potaxii. Akka yōra atiroma keskara afara shara ě mato ispafiano mãto chaka mākai xateama. Akka nã ě mato õimana keskara Sodoma anoafõ ě ato õimamiskē ãto chaka xatekeranafo. Nãskakē keyokeranafoma. Askatari ãto pexefã rasi keyokeranama. <sup>24</sup> Ĕ mato yoinõ. Afetiãara Epa Niospa nã chanĩmara faafoma ato omiskõimani. Nã Sodoma ano ipaonifo omiskõixikani. Akka mãfi omiskõi finakõixii,” ixõ Jesús ato yoini.

*“Ekeki fekãfe ě mato shinãmasharanõ,” ixõ Jesús ato yoini  
(Lc. 10.21-22)*

<sup>25</sup> Ato askafata Jesús Apa kĩfini iskafakĩ: “Epa, ě mia aicho fai. Keyokõi nai mēranoafoya nono mai anoafõ mĩ ãto Ifo. Mĩ sharafinakõi. Akka atirifãfe kirika kene tãpifikaxõ mia Ifofakaxoma. Iskafakĩ shinãmisfo: ‘Tsoa fetsakai noko keskarama. Nõ tãpikõia,’ ixõ shinãmisfo. Akka nãfo mĩ meka mĩ ato tãpimani. Akka nã kirika kene tãpikaxoma, mia Ifofaifono nãfo mĩ meka shara mĩ ato tãpimani, <sup>26</sup> nã mĩ fichipaiyai keskafakĩ,” ixõ Jesús yoini.

<sup>27</sup> Askata anã Jesús ato yoini iskafakĩ: “Epa Niospa a tãpia keskara eari keyokõi tãpimani, ěmãĩ ãfe Fakekē. Akka tsõakai ea tãpiama, ěfe Epa fistichi ea tãpikõia. Nãskarifikĩ tsõa ěfe Epa tãpiama, akka eres fisti ě tãpikõia. Akka nã fetsafori ě ato tãpimanaino nãfãferi Epa Nios tãpitirofo. <sup>28</sup> Akka mã shinãchakakõikĩ ea kifikãfe. Nãskaxõ mã ea chanĩmara fasharayanã mã ea nikasharaito a mato fekaxtefai ě mato potaxotiro anã mã shinãchakayamanõ. <sup>29</sup> Akka ea shinãkõikĩ eõxõ mã tãpisharakõitiro. Ĕ mato noikĩ fenãmãshta ě mato yonomamis tenemasharayanã. Nãskaxõ mã anã shinãchakatiroma. <sup>30</sup> Akka a ě mato amapaiyai keskara anã fekaxma. Nãskakē anã mãto õiti fekaxtetiro,” Jesús ato fani.

## 12

*Nã judeofãfe pena tenetitã Jesúsxõ tãpimisfãfe aros keskara metesfenifo  
(Mr. 2.23-28; Lc. 6.1-5)*

<sup>1</sup> Askata judeofãfe ãto pena tenetitã Jesús aõxõ tãpimisfo fe tarepa kani. Aõxõ tãpimisfãfe fonãikakĩ aros keskara meteskaxõ pii fonifo. <sup>2</sup> Fariseofãfe õikakĩ Jesús yoinifo: “Õipo, Jesús. Iskaratã nõko pena teneti. Akka Moisés noko yoini na pena tenetitã tsõa pishta yonotiro. Akka mĩ inafãfe yonokani na aros keskara meteskakĩ,” ixõ yoinifo.

<sup>3</sup> Ato askafaifono Jesús ato kemani: “Akka, ¿a nõko xini Davidõnoa kirika kenenifo keskara mã õimismē David afaa afeska fanimē ãfe inafõ feta fonãikõikĩ? <sup>4</sup> Nãskaxõ Nios kĩfiti pexefã mēra ikikaixõ a mēranoa pãa ato pikĩni fonãikõikĩ ano afaayamano. Akka nã pãa nã judeofo ato Nios kifixomisfonã ini. Nãskakē fetsafãfe nã pãa tsõa pitiro. Nãnorĩ Niospa Moisés yoifinino akka fonãikõikĩ David pini a afe rafeafo feta. <sup>5</sup> Akka, ¿a Moisés kenenĩ keskarari mã tãpiamamē? Iskafakĩ yoini: ‘Nios kĩfiti pexefã mēra a ato Nios kifixomisfãfe yonotirofo nã pena tenetitã. Nãskakē afaa chakafakanima,’ ixõ Moisés kenenĩ. <sup>6</sup> Nios kĩfiti pexefã sharafiano akka ě na pexefã finõkõia. <sup>7-8</sup> Epa Niospa shinãmanaino Niospa meka yoimisto Oseas kirika kenenĩ iskafakĩ: ‘Mã yoinãfo inafõ retexõ ea inãxikĩ, mã koofamis ea shinãkĩ nã shara. Askafiano fetsafo noikĩ, mã ato sharafaxõaito ě õimis nã sharafinakõia,’ ixõ kirika kenenĩ Niospa shinãmanaino. Niospa noko yoimis keskara mã tãpisharaxõ, mã ato yoikĩ chakafakeranama. Nãskakē ě mato yoi iskafakĩ, ěfe Epa Niospa ea nãmã nĩchini xanĩfofinakõi ě inõ. Nãskakē ě yoitiro afaa nõ atiomakĩ pena tenetitã. Ĕ mato yoi na ěfe inafãfe akaifo keskara shara,” ixõ ato yoini.

*Feronãfake mēke yõshiya Jesús sharafani  
(Mr. 3.1-6; Lc. 6.6-11)*

<sup>9</sup> Nãskata Jesús nãnoax kaax judeofãfe ãto ichanãti pexe mēra ikitoshini. <sup>10</sup> Nãno feronãfake ãfe mēke yõshia ini. Nãskakē fariseofãfe Jesús yõkanifo afara chakafaito

yōaxikakī. Iskafakī yōkanifo: “Maestro, pena tenetitīa, ĵnō yora sharafatiromē?” ixō yōkanifo.

<sup>11</sup> Askafaifono Jesús ato kemani iskafakī: “Mā ovejayaxō mātō oveja kini mēra pakeano, ĵmā pena tenetitīa mā ifirisafatiromamē?” ato fani. <sup>12</sup> “Akka yorafo sharafinakōiafo, oveja keskarafoma. Nāskakē yorafo nō shinākī pena tenetitīa nō ato sharafatiro. Nāskaxō nō afaa chakafaima. Na pena tenetitīa yorafo nō sharafakī Epa Niospa ōia shara,” ixō Jesús ato yoini.

<sup>13</sup> Nāskata a feronāfake mēke yōshiya Jesús yoini iskafakī: “Mēshafe,” faino, nā feronāfake mēke yōshiya mēshatanaino āfe mēke sharatani. Nā takai fetsa keskara shara ini. <sup>14</sup> Nāskata fariseofo mā tsekekanax yoinānifo: “ĵafeskaxō nō Jesús ato achimatiromē retenōfo?” ikanax yoinānifo.

### *Epa Niospa shināmanaino Isaías keneni Jesúsnoa a inōpokoai yoikī*

<sup>15</sup> Jesús nānoax kani mā tāpiax retepaiyaifono. Nāskakē anoax kaino yorafā rasichi chīfafainifo. Akka a isinī ikaifo Jesús ato sharafapani. <sup>16</sup> Akka ato sharafaxō ato yoini: “Ē Niospa Fakekī tosa yoyiamakāfe,” ato fani. <sup>17</sup> Nāskarākōi Isaías kirika keneni Niospa shināmanaino Jesúsnoa. <sup>18</sup> Iskafakī keneni:

Ōikapo. Nakīa ea yonoxomis ē katoni. Ē aō noikōi. Ē akiki inimakōi. Ēfe Yōshi Shara ē afe rafemamis. Nā maifotio ano ikafāfe āfe meka nikasharaifono ē āto chaka soaxotiro efe yora inōfo. <sup>19</sup> Nakai yora fetsafo fe feratenāxima. Meka mitsisipato ato yoima. <sup>20</sup> Akka tafa kerexma ē xatexima. Askatari chii ketesharayamaito ē nokafaxima. Askatamaroko ē ketefaxii. Nāskarifikī yorafāfe ēfe meka nikapaifikakī nikasharayamaifono ē ato potaima. Ato potatamaroko ē ato axosharai ea Ifo sharafanōfo. <sup>21</sup> Nāskakē keyokōi maitio ano ikafāfe yoixikani iskafakakī: “Nā fistichi noko ifitiro nō aōnoax Epa Nios fe nīpaxanō,” ixō yoixikani.

Nāskara Isaías yoikī kirikaki keneni. Nāskarākōi nō ōi Isaías keneni.

### *Yora fetsafāfe, “Jesús niafakaōxō ato sharafaira,” fanifo (Mr. 3.20-30; Lc. 11.14-23; 12.10)*

<sup>22</sup> Askata Jesúski feronāfake fēxo efenifo. Askatari mekamisma ini. A mēra niafaka chaka naneano Jesús sharafanō akiki efenifo. Nāskakē Jesús a fēxo ōimasharani, askatari mekamasharani anā mekanō. <sup>23</sup> Askafaito ōikani yoinānifo: “ĵKee! Ōikapo. Jesús afama mīshti shara fatiro. Akka, ĵnamē David āfe fena nā Epa Niospa katoni, nāmē na nō manai?” ikax yoinānifo.

<sup>24</sup> Askafaifāfe nikakaxō fariseofāfe yoinifo: “Maa. Natokai Epa Niosxō niafaka chaka potatiroma. Akka nā niafaka chakafāfe āto xanīfo nā Beelzebūxō ato makinoa niafaka chaka potai,” ikax yoinānifo.

<sup>25</sup> Askafaifono Jesús tāpini a shināifo keskara. Nāskaxō ato yoini: “Yorafo paxkanākanax āa ranā retenāi keyotirofo. Askatari pexe rasi anoax āa ranā retenāi keyotirofo. Nāskax ishariatirofoma āa ranā retenāitirofo. <sup>26</sup> Nāskarifikī Satanás āfe niafaka chakafo potaxō anā afaa afeska fatiroma. <sup>27</sup> Akka mā ea iskafai: ‘Nato niafaka xanīfoōxō niafaka chakafo ato makinoa potai,’ mā ea fai. Akka ea yoikapo, ĵtsōaōxō mātō inafāfe niafaka chakafo potafomakī? Akka, ‘Niosxō nōko inafāfe niafaka chakafo potafo,’ ixō mā ea yoitiro. Nāskakē mā tāpitiro ēri Niosxō niafaka chakafo potaino. <sup>28</sup> Akka ē niafaka chakafo Niospa Yōshi Sharaōxō ato makinoa potaino mā tāpitiro a Niospa matoki nīchiai mā nokoano. Nāskakē yorafāfe ea Ifo sharafaxii.

<sup>29</sup> “Ē anā mato yoinō, nikasharakāfe. Akka, ĵafeskaxō yorafāfe feronāfake mitsisipakōi āfe pexe kene mēranoa āfe rapatifo fīatirofomē? Akka rapati fīakakī achixō metexkere akaxō āfe rapati fīatirofo. Askafakaxō fīaifonokai ato afeska fatiroma.



<sup>30</sup> “Akka fetsa efe rafepaikima ea nikakaspai. Akka fētsa ēfe meka nikakaspai ea noikaspai. Nāskakē fetsafāferi ea Ifofaifono fichikaspakani. Askakimaroko emakinoa ato paḡkanāfapai Epa Nios Ifofayamanōfo.

<sup>31</sup> “Nāskakē ē mato yoi. Fētsa afara fetsafo chakafakē Niospa āfe chaka soaxotiro. Askatari fētsa afara chaka yoiaino Niospa āfe chaka soaxotiro. Akka ēfe Yōshi Shara chakafakī mekafaito, Niospa āfe chaka soaxonakama. Āto chaka neepakenaka. <sup>32</sup> Askatari fētsa Niospa Fake yorakōi chakafaino Epa Niospa āfe chaka soaxotiro. Akka fētsa Epa Niospa Yōshi Shara mekaḡakī chakafaino, Epa Niospa āfe chaka soaxonakama. Āto chaka neepakenaka. Nā naitīari āfe chaka aō neepakenaka,” ixō Jesūs ato yoini.

*Ifi āfe fimioxō nō tāpitiro afe keskaramākī*  
(Lc. 6.43-45)

<sup>33</sup> Anā Jesūs ato yoini iskafakī: “Akka shinākapo. Ifi shara āfe fimi sharakōi itiro. Akka ifi chaka āfe fimiri chaka itiro. Ififo āfe fimioxō nō tāpitiro afe keskaramākī. <sup>34</sup> Akka māfi keyokōi chakakōi, nā rono pae keskarakōi mā. Nāskaxō meka shara mā yoitiro ma mā māi chakakōixō. Nā māto shināmā mā shināi keskafakī chakai mā mekamis. <sup>35</sup> Nāskarifikī yora sharapa meka shara yoitiro, āfe ōiti mēraxomāi shara shinākī. Akka yora chakapari meka chaka yoitiro, āfe ōiti mēraxomāi chaka shinākī. Nāskaxō nā āfe ōiti mēraxō shināi keskara yoitiro. <sup>36</sup> Akka ē mato yoinō. Fatora penata keyokōi Niospa ato ichanāfai tāpikōixō ato yoixiki fatofāfe chanīmara faafomākī, akka fatofāferi nikakaspakanimākī. Nāskatari nā shinātama chaka yoimisfori Niospa ato shināmaxii kiki. <sup>37</sup> Akka mā māto mekaoxō mā Nios ispatiro mā isharamākī, askayamai mā isharamamākī. Nāskax isharax mā afe nipanaka. Askatari mā meka chaka yoimisno nā omiskōipakenakafo mēra mato potaxii. Māto mekaḡa mato omiskōimaxii,” ixō Jesūs ato yoini.

*Yora chakafāfe, “Tsōa atiroma keskara noko ispafe nō mia chanīmara fanō,” ixō yōkanifo*  
(Mr. 8.12; Lc. 11.29-32)

<sup>38</sup> Askata fariseofo feta a Moisés yoikī kirika kenei keskara ato tāpimamisfāfe Jesūs iskafanifo: “Maestro, nō ōipai tsōa atiroma keskara mī faito,” ixō yoinifo.

<sup>39</sup> Askafaifono Jesūs ato kemani: “Māfi afara chaka shināyanā mā Nios kachikiri famis. Nāskakē, ‘A tsōa atiroma keskara noko ispafe,’ mā ea fai. Akka nā Jonás ini keskara nā fisti mā ōixii. <sup>40</sup> Akka nā Jonás ini keskai ēri askai. Jonás fafīnōa xaki mēra tres nia ini. Nāskarifikai ēri mai mēra maiax tres nia ixii. <sup>41</sup> Akka fatora penata nā Niospa yorafo keyokōi ichanāfaiḡa ato yoixii fatofāfe chanīmara faafomākī, akka fatofāferi nikakaspakanimākai. Nāskakē nā Nīnive anoafāfe mato yoixikani iskafakakī: ‘Jonāspa noko Niospa meka yoiāito nikaxō nōko chaka xatexō nō Niospa meka chanīmara fani. Akka mā Niospa Fake nikafikī māto chaka mā xatemisma,’ ixō mato yoixikani. Akka ē Jonás finōfekēkai mā ea nikapaimisma. <sup>42</sup> Askatari okirinoax nā nafa kēro āto xanīfo ipaoni nōko xanīfo Salomón ōipai chai inoaxkōi oni. Afara sharafo tāpikōia nikaferani oni. ‘Afara shara ea tāpimanō,’ ikax akiki oni. Akka ē nā Salomón ē finōfekē, mā kai ea nikapaima. Akka keyokōi mā mai keyoano Niospa noko yoixii fatofomākī sharafo fatofomākī nikayospafo. Askatari nā kēromā mato yoixii iskafakī: ‘Māfi chakakōifokī. ¿Afeskakī mā Niospa Fake nikakaspamismē? Māto xanīfo Salomón tāpikōia keskafakī nāato keyokōi tāpikōifiano. Akka ē Salomón nikaikai chaikōi ē kani. Akka mā kai nā Jesūs mato fe ifiakē mā nikakaspamis nāato tāpikōifekē,’ ixō mato yoixii,” ixō Jesūs ato yoini.

*Anā niafaka chaka yoraki nanetiro*  
(Lc. 11.24-26)

<sup>43-44</sup> Anā Jesūs ato yoini iskafakī: “Ē mato yoinō meka fetsafaxō. Niafaka chaka feronāfake makinoax tsekeax kafāsatiro tsōa istoma ano fenafofāfofāitiro ano tsoaxō tenepaikī. Akka tsoa fichixoma niafaka chakata anā shinātiro: ‘A ē anoax tsekeita ano ē anā kapai,’ itiro. Mā nokoxō ōia nā feronāfake nā pexe xaka mātsomea keskara shara

ini. <sup>45</sup> Nāskakē nā nīafaka afe nīafaka siete efetiro nā chaka finakōiafo, nāfo nā feronāfake mēra iki fetsenō. Nāskakē nā feronāfake chaka finakōi itiro a iypaoni keskarama,” ixō Jesús ato yoini.

*Jesús ōifekani āfe afanō āfe extonō fenifo  
(Mr. 3.31-35; Lc. 8.19-21)*

<sup>46</sup> Jesús yorafo yoiaino āfe afanō āfe extonō akiki fenifo afe mekapaikani, pexe emāiti nikaxō mananifo. <sup>47</sup> Fētsa yoini: “Mī efanō mī extonō emāiti nīafo mēfe mekapaikani,” fani. <sup>48</sup> Askafaino kemakī: “¿Fatomē ēfe efa keskarafo ēfe exto keskarafori?” ato fani.

<sup>49</sup> Nāskata a aōxō tāpimisfo yoini mētoxō: “Nafo ēfe efafo keskarafo, ēfe exto keskarafori ē ato ōi. <sup>50</sup> Akka nā ēfe Epa nai mēra ikato ato amapaiyai keskara akaifo nāfofi ēfe extofo ēfe chikofori ēfe efafori,” ixō Jesús ato yoini.

## 13

*Jesús ato yoini meka fetsafaxō fimi exe saamisnoa  
(Mr. 4.1-9; Lc. 8.4-8)*

<sup>1</sup> Askata na pena fisti Jesús pexe mēranoax tsekekaini kaax, ĩamāfā kesemē tsaoni. <sup>2</sup> Nāno tsaono yorafā rasi akiki fenifo, āfe meka nikai fekani. Akka Jesús kanōanāfā xaki mēra tsaoxō ato yoiaino nikanifo, ĩamāfā kesemēxō. <sup>3</sup> Askata meka fetsafaxō afama mīshti Jesús ato yoini iskafakī: “Feronāfake fistichi fimi exe saafoni āfe nōxati mēra kēchoxō fokī. <sup>4</sup> Fimi exe safoikaino ranāri fai nēxpakīa pakeaino a kachikirixori peyafāfe pini. <sup>5</sup> Nāskata fimi exe ranāri makexfoki pakei fetseni mai shara anoma. Nāskakē samakōi fimi exe foaipaini. <sup>6</sup> Akka mā foaipaiyaito xinī namani, yosipanā, āfe tapokairoko mai mēra kasharakē. Foaikax, samama nani xinī tsasifaano. <sup>7</sup> Ranāri fimi exefo moxafo mēra pakei fetseni. Moxafo mēranoax moxafoya foaipaiyaito moxafāfe namani. <sup>8</sup> Akka fimi exe ranāri mai shara ano pakeni. Nāskax foaisharax fimi ichapayakōi ini. Fetsa cien fimiya ini, fetsari sesenta fimiya ini, fetsari treinta fimiya ini. <sup>9</sup> Mā pachoyakī ea nikasharakōikāfe,” ato fani.

*Meka fetsafaxō yorafo yoixō a aōxō tāpimisfo xafakīakōi ato yoini  
(Mr. 4.10-12; Lc. 8.9-10)*

<sup>10</sup> Nāskata Jesúski a aōxō tāpimisfo fēkaxō yōkanifo: “¿Afeskakī meka fetsafaxō mī yorafo yoimē? Meka xafakīa mī ato yoimisma,” ixō yōkanifo.

<sup>11</sup> Askafaiāfe Jesús ato kemani: “Akka afeskaxō Epa Niospa afe yorafo ĩkināmakī ē mato fisti tāpimanō. <sup>12</sup> Akka nā Niospa meka nikasharakōiaifo āfe Yōshi Shara āto mēra nanano nāato ato tāpimasharakōixii kiki. Nāskaxō mā tāpikī finasharakōi. Akka nā nikasharayamaifāfe tāpisharakanamax nāfo fenokōixikani. <sup>13</sup> Nāskakē meka fetsafaxō ē ato yoi. Akka ōifikakī tāpikanima. Askatari nikafikakī nikasharakanima. <sup>14</sup> Nānori a Niospa meka yoimisto Isaías kirika keneni a inōpokoai yoikī. Iskafakī yoini:

Nikataifafiafikakī nikakanima. Ōifikakī tāpikanima. <sup>15</sup> Nā yorafo āto mapo kerexkōifo. Askatari āto pacho fēstokōifo. Askatari āto fero fepoa keskarafo. Nāskaxō ēfe meka chanīmara fakanima. Nāskakē ē āto chaka soaxotiroma, ixō Niospa yoini keskara Isaías kirika keneni.

<sup>16</sup> “Akka mā kai ato keskarama. Ē mato yoia keskara mā nikasharamis. Ē mato tāpimanai keskara mā tāpisharakōia. <sup>17</sup> Shinākapo. Mā ōimis keskara a Niospa meka ato yoimisfo feta a Nios Ifofamis fetsafāferi ōipaifakakī ōipaonifoma. A ē mato yoimis keskara nikasharapaifakakī nikapaonifoma,” ixō Jesús ato yoini.

*Jesús meka fetsafaxō fimi exe saamisnoa ato yoini ato tāpimasharakōixiki  
(Mr. 4.13-20; Lc. 8.11-15)*

<sup>18</sup> Anā Jesús ato yoini iskafakī: “Nā ē mato meka fetsafaxō yoiai nā fimi exe saamisfoōna ē mato yoikai. Nikasharakāfe tāpikakī. <sup>19</sup> Atiri fimi exe fai kesemē pakeaino

peyaŕãfe pinifo. Nãskafakĩri fẽtsa Nios Xanĩfoõnoa nikafikĩ Niospa meka nikasharaya-maito, nã Satanás chakata Niospa meka fĩatiro. <sup>20-21</sup> Akka atiri fimi exe makex mẽra pakeax, foaipafiaito xinĩ namani, ãfe tapo mai mẽra ikikẽma. Nãskafakĩri fẽtsa taefakĩ Niospa meka nikai inimayotiro. Akka afara chaka nokoaino anã inimatiro, anã Nios Ifofayamaino Niospa meka anã ãfe shinã mẽra nanetiroma. <sup>22</sup> Akka atiri fimi exe moxafo mẽranoax foaikax yosinima. Nãskari fakĩ fẽtsa Niospa meka nikasharamax, nãskaxõ afara fetsa shinãkĩ, ãfe shinã mẽraxõ shinãchakakõitiro. Nãskaxõ kori ichapakõĩ noikĩ, ‘È kori ichapayax ã inimatiro,’ ixõ shinãkĩ Niospa meka anã shinãima. Nãskakẽ Niospa meka nikafikĩ afara fetsafo shinãino, afaa Niospa axotiroma. <sup>23</sup> Akka atiri fimi exe mai shara anoax foaikax mã yosiax fimi ichapaya ini, ãfe fimi cien ini, fetsari ãfe fimi sesenta ini, fetsari ãfe fimi treinta ini. Nãskafakĩri fẽtsa Niospa meka nikakõikĩ Niospa meka nanexõ nikasharakõitiro. Akka fẽtsa Niospa meka nikakõisharakĩ nã fimi exe cien keskara itiro, fẽtsari nikasharakõĩ nã fimi exe sesenta keskara itiro, fẽtsari nikakõisharakĩ nã fimi exe treinta keskara itiro,” ixõ Jesús ato yoini.

*Meka fetsafaxõ afara fetsa ato tãpimaxiki anã Jesús ato yoini*

<sup>24</sup> Anã Jesús meka fetsafaxõ afara fetsa ato tãpimaxii ato yoini iskafakĩ: “È mato yoinõ nã Nios xanĩfokõĩ ika anoax afe keskara ixikanimãkai. Ifokõĩ faafo afe keskaramãkĩ ã mato anã yoinõ. Nã yorafãfe Nios Ifokõĩ faafãfe fimi exe shara fana keskarafo. <sup>25</sup> Akka tare ifo ãfe inafõ fe oxano, a ato noikaspamis fakishi kaxõ a fana shara ano fana chakafanafaini kani. <sup>26</sup> Akka nã fana shara foaikĩ pei sharayakõĩ foaini. Askatari fana chakari foaini. <sup>27</sup> Nãskata a tare ifoki ãfe inafõ fokaxõ yoinifo: ‘Ifo, fana shara mã tarepa mã fanafiano, akka, ¿fanĩax na fana chaka foaikamẽ?’ ixõ yõkanifo.

<sup>28</sup> “Askafaifono nã tare ifãfe ato yoini: ‘Nã noko noikaspamisfãfe fanafõ rakikĩa,’ ato faito ãfe inafãfe yoinifo: ‘¿Na fana chaka nõ tsekatiromẽ?’ fanifo. <sup>29</sup> Akka a tare ifãfe ato yoini iskafakĩ: ‘Maa, fana chaka tsekapaikĩ fana sharari mã tsekatiro. <sup>30</sup> Nãskanõki. Nã fana sharafoya yosiyonõ nã fana shara ãfe fimi topiaifotĩa, ã mato yoixinõ iskafakĩ: “Na fana chakafo xatekãfe. Xatexõ mextexõ koaxikaki. Nãskata nã fana sharafo ãfe tapas mẽra ea faxoxikakĩ,” ’ ixõ a tare ifãfe ato yoitiro keskafakĩ, nãskarifikĩ Epa Niospa mato paxkanãfaxii ea Ifofafo ã ato ifixii. Akka ea Ifofayamafo chiifã mẽra ã ato nĩchixii,” Jesús ato fani.

*Mostaza exeõnoa yoikĩ meka fetsafaxõ Jesús ato tãpimani*  
(Mr. 4.30-32; Lc. 13.18-19)

<sup>31-32</sup> Askata anã Jesús meka fetsafaxõ ato yoini iskafakĩ: “Afe keskaramãkĩ Nios xanĩfãfe noko ãkinã ã mato yoinõ. Nã fimi exe mostaza yõra ãfe tarepa fanatiro. Akka nã mostaza exe pishtakõĩ. Akka mã yosiax eŕapakõĩ itiro fana fetsafo keskarama. Nãskakẽ peyaŕãfe ãfe teshpafo ano naa faxõ too fatiro. Nãskari fakĩ taefakĩ pishta mã Epa Nios Ifofayotiro. Nãskaxõ fisti rasichi mã Ifofayotiro. Akka chipo ichapakõichi atirofo Nios Ifofakakĩ,” ixõ ato yoini.

*Meka fetsafaxõ pãa faraxika keskaraõnoa Jesús ato yoini*  
(Lc. 13.20-21)

<sup>33</sup> Askata anã Jesús meka fetsafaxõ ato yoini iskafakĩ: “Afe keskaramãkĩ Nios xanĩfãfe noko ãkinã ã mato yoinõ. Nã kẽromã pãa fakĩ levaduraya arinã osixõ kamosakano faraxitiro keskara. Nãskarifiakĩ nõ õitiro. Yorafãfe Niospa meka ãto shinã mẽra naneano nõ õiyamafiaino ãto õiti fetsafakanax Nios keskara shara itirofo,” ixõ Jesús ato yoini.

*Afama mĩshatikiri yoikĩ meka fetsafaxõ Jesús ato yoipaoni*  
(Mr. 4.33-34)

<sup>34</sup> Askatari Jesús nã yorafã rasi yoini meka fetsafaxõ afara fetsa ato tãpimaxii. Akka meka fetsafaxõ Jesús mẽxotaima ato yoipaoni. <sup>35</sup> Akka nã Niospa meka yoinisto a

inõpokoai yoikĩ kirika kenekĩ keskakõifakĩ Jesús nãskakõi fani. Iskafakĩ keneni Jesúsnoa yoikĩ:

Ë ato meka fetsafaxõ yoixii. Niospa keyokõi onifanitĩa nãskatari a nikamisfoma Ë ato tãpimaxii,  
ixõ Jesúsnoa yoikĩ keneni.

*Jesús nã fana chakafoõnoa ato tãpimani*

<sup>36</sup> Askata yorafã rasi makinoax Jesús pexe mēra ikikaini. Mã pexe mēra kaano, aõxõ tãpimisfãfe anã yõkanifo ato yoisharanõ. “Ifo, meka fetsafaxõ mĩ noko yoia nã fana chakaõnoa nõ tãpiama. Anã noko xafakĩa yoife nõ tãpisharanõ,” ixõ yoinifo.

<sup>37</sup> Askafaifono Jesús ato kemani: “A fana shara fanamisfo keskara êkĩa,” ato fani.  
<sup>38</sup> “Akka a tare Ë yoiai mã tãpitiro nã maitio Ë yoi. Akka nã fimi exe shara Ë yoiai nã Nios Ifofamisfo Ë yoi. Akka nã fana chakafo Ë yoiai nã Satanás ifofamisfo Ë yoi. <sup>39</sup> Akka nã noko noikaspamisto fimi chakafana Ë yoiai, a Satanás Ë yoi. Akka nã fimi exe topiaifo Ë yoiato mã nikai, mã mai keyoaino Ë yoi. Akka a fimi exe topimisfo Ë yoiato mã nikai, nã Niospa ãfe ãjirifo Ë yoi. <sup>40</sup> Nã fana chakafo xatekaxõ chĩi koatirofo keskai, nãskarifaxikani nã omiskõiai nokoaitĩa omiskõixikani mã mai keyoaino. <sup>41-42</sup> Nãskarifaxĩ Ëfe ãjirifo Ë nĩchixii a afara ato chakafamamisfoya a afara chaka tãpimisfori ato chii xoisai mēra ato potanõfo anoax oiayanã omiskõipakexanõfo. <sup>43</sup> Akka nã Niospa meka nikasharakõiaifo, Epa Nios ika anoax nã xinĩ chaxai keskara shara ixikani. Mã pachoyakĩ Ëfe meka nikasharakĩ mãto shinã mēra nanekãfe,” ato fani.

*Afara sharakõi oneaõnoa yoikĩ meka fetsafaxõ Jesús ato tãpimani*

<sup>44</sup> Anã Jesús ato yoini iskafakĩ: “Ë mato yoinõ nã Nios xanĩfokõi ika anoax afe keskara ixikanimãkai. Feronãfãke tare ano yonokĩ orokĩ afara sharafinakõia fichixõ nã fichia ano anã oneni. Nãskaxõ ãfe afama mĩshti keyokõi ato minixõ mã kori fixõ nã mai fini nã afara sharakõi ãfenã inõ. Nãskarifaxĩ mã Nios Ifokõifapaikĩ mã fichikõipaitiro,” ixõ Jesús ato yoini.

*Makex oxo fakkai fakkaisai keskaraõnoa ãfe ane perlaõnoa, meka fetsafaxõ Jesús ato tãpimani*

<sup>45-46</sup> Anã Jesús ato yoini iskafakĩ: “Ë mato yoinõ nã Nios xanĩfokõi ika anoax afe keskara ixikanimãkai. Yora fistichi fenafofãfofãimis perla ato inãxii. Akka nã perla sharafinakõia mã fichixõ ãfe afama mĩshti keyokõi ato minixõ kori fixõ nã perla sharakõi fini. Nãskarifaxĩ nõ Epa Nios Ifofasharapaikĩ nõko afama mĩshtifo nõ shinãmakitiro Epa Niosmãi sharafinakõikẽ,” ixõ Jesús ato yoini.

*Anã meka fetsafaxõ riniõnoa Jesús ato tãpimani*

<sup>47</sup> Anã Jesús ato yoini iskafakĩ: “Ë mato yoinõ nã Nios xanĩfokõi ika anoax afe keskara ixikanimãkai. Nã rini faka mēra potexõ foe fetsa fetsatapafo fitirofo keskara ixikani.  
<sup>48</sup> Akka nã rini mã foe fospikõiano, nã rinipa fimisfãfe faka ketokonõ rini ninifotirofo. Faka ketokonõ tsoaxõ fofo katotirofo. Nã sharafo fēta mēra nanekaxõ nã chakafo potatirofo. <sup>49</sup> Nãskarifaxii nõko mai keyoaino. Nãskatari Niospa ãfe ãjirifãfe noko paxkanã faxii nã chakafoya nã sharafo. <sup>50</sup> Akka nã chakafo nã chii xoisai mēra ato potaxii. Nãnoax oiayanã omiskõipakenakafo,” ato fani.

*Afara fena sharakõi yafi afara shara xiniõnoa Jesús ato yoini*

<sup>51</sup> Nãskaxõ Jesús ato yõkani: “¿Nã Ë mato yoiai keskara mã mã nikaimẽ?” ato feito, “Ëje, a mĩ noko yoiai nõ nikai,” faifono anã Jesús ato yoini: <sup>52</sup> “Akka pexe ifãfe pexe xaki mēra ãfe afara shara onekatsaxakĩ nã fena yafi nã xini ato ispatiro. Nãskarifaxĩ a Moisés yoikĩ kirika keneni keskara ato tãpimamisfãfe mã Nios Ifokõi faifono, Nios xanĩfoõnoa ato yoitirofo. Akka meka xiniõxõ meka fena sharari mã tãpitiro,” ato fani.

### *Jesús Nazarete anoxō nikakaspanifo*

*(Mr. 6.1-6; Lc. 4.16-30)*

<sup>53</sup> Askata Jesús mā meka fetsafaxō ato yoikī keyoax nānoax kani. <sup>54</sup> Mā kaax āfe mai anokōi nokoni. A judeofāfe āto ichanāti pexe mēraxō ato yoikī taefani ano. Nānoxō yorafāfe iskafanifo: “¡Kee, nikakapo! ¿Fanīxō iskara tāpīxō yoimē askatari nā tsōa atiroma keskara fai? ¿Fanīxō iskara tāpiamē?” fanifo. <sup>55</sup> “Nā mīsa famisto fakeki. Āfe afa María. Āfe extofo mā nō ōimis. Santiago ikaino, José ikaino, Simón ikaino, Judas ikaino, nāfo āfe extofo,” fanifo. <sup>56</sup> “Āfe poifori nofe imisfo. Nōfi Jesús tāpia. Nākai afama. Akka, ¿afeskaxō afama mīshti fatiromē?” ikax yoinānifo.

<sup>57</sup> Nāskakē nikakaspanifo. Akka Jesús ato yoini iskafakī: “Keyokōi nā maitio anoxō Niospa meka yoimis nikatirofo. Akka nā āfe maikōi anoxō nikapaitirofoma. Nāskakē mā ea nikakaspamis,” ixō ato yoini.

<sup>58</sup> Nāskakē anoxō afama mīshti ato ōimanima tsōakairoko nikaito.

## 14

### *Juan Maotista nani*

*(Mr. 6.14-29; Lc. 9.7-9)*

<sup>1-2</sup> Nāskatari Galilea anoa nā xanīfo Herodes ini. A Jesús afama mīshti faito nikaxō āfe inafō yoini iskafakī: “Akka nā Juan Maotista ē ato textemayamea mā anā otoa. Mā otoxō tsōa atiroma keskara afama mīshtifo fai,” ixō shināni.

<sup>3-4</sup> Akka Herodes Juan reteyoamano Juan yōani iskafakī: “Xanīfo Herodes, mī exto Felipe mī āfe āfi Herodías mī fīa. Askara chakakōi,” nāskafani. Nāskakē Herodes akiki ōitifishkini. Nāskaxō āfe sorarofō achimani karaxa mēra ikimaxii.

<sup>5</sup> Akka Herodes Juan retepaifi yorafoki meseni yorafāfemāi chanīmara faifono Juanmāi Niospa meka ato yoimiskē. Nāskakē Herodes shināni iskafakī: “Ē Juan retekē eari yorafāfe retetirofo,” ixō shināni. <sup>6-7</sup> Akka Herodes āfe cumpleño ikaino, yorafo ato ichanāfani. Ichānāfono nā Herodías fake xomaya ares mairani yorafāfe ferotaifi ato inimamai. Nāskakē Herodes yoikī iskafani nā xomaya yorafāfe ferotaifi, “Mī afara fichipaiyai keskara ea yōkafe ē mia inānō,” ixō yoini. <sup>8</sup> Nāskakē nā kēro xomayato āfe afa ano kaxō yōkani iskafakī: “¿Ē afaa Herodes yōkatirofō?” faito āfa yoini iskafakī: “Juan Maotista āfe mapo textexō ea sapaki rataxō ea fexōfe fafe,” fani.

<sup>9</sup> Askafaito nikai xanīfo Herodes shināmitsani. Shināmitsayanā āfe shinā mēraxō shināni iskafakī: “¡Ooa! Ē Juan ato textemapaima. Akka yorafāfe nikaifono mē na kēro xomaya yoia. Nāskakē ē Juan ato textemapaiyamafikī ē ato textemani,” ixō shināni. <sup>10</sup> Nāskaxō xanīfāfe āfe sorarofō yoini: “Juan textexō āfe mapo ea fixotakāfe,” ixō yoini. <sup>11</sup> Ato askafaino fōkaxō sorarofāfe Juan textekaxō āfe mapo sapaki rataxō fenifo. Fēkaxō nā kēro xomaya inānifo. Nāatori āfe afa ināni.

<sup>12</sup> Nāskakē Juan inafō fēkaxō āfe yora fōkaxō maifanifo. Mā askafakaxō Jesúski nokokaxō yoinifo.

### *Jesús cinco mil feronāfakefo ato pimani*

*(Mr. 6.30-44; Lc. 9.10-17; Jn. 6.1-14)*

<sup>13</sup> Askata Herodes sorarofō Juan textemana nikai Jesús ares fisti kani kanōanāfānē tsōa istoma ano. Mā Jesús ato makinoax kaa nikakani pexe rasi anoax yorafā rasi fāi fonifo.

<sup>14</sup> Mā kanōanāfā makinoax fotoxō akiki yorafā rasi foaito fichini. Ato ōikī ato shinākōini. Nāskaxō a isinī ikaifo ato sharafapani.

<sup>15</sup> Mā yātapakeaino aōxō tāpimisfo akiki nokokaxō yoinifo: “Mā yātapakei kiki nono afaamakī yorafo nīchife a piaifo fitanōfo pexe rasi anoafō,” ixō yoinifo.

<sup>16</sup> Askafaifono Jesús ato kemani: “Maa. Fokanima kiki. Māroko ato pimakāfe,” ato faito, <sup>17</sup> kemanifo: “Nō nono cinco pāaya, askatari foe rafes,” fanifo.

<sup>18</sup> Askafaifono Jesús ato yoini: “Ea fixotakāfe,” ato fani.

<sup>19</sup> Nāskaxō yorafā rasi yoini fasi ano tsaonōfo. Askata foe rafe yafi cinco pāa tsofaxō nai foisinīfofā Apa Nios kīfini iskakakī: “Aicho, Epa, mīōxō ē ato pimai. Mī sharakōi,” fata, pāa kaxketa foe rafeya osixō aōxō tāpimisfo ināni a yorafo ato ināketsanōfo. <sup>20</sup> Nāskax pikanax māyakōinifo. Akka nā chetefafo doce fēta fospini. <sup>21</sup> Nā piaifo cinco mil feronāfakefo ini. Kērofāferi fakefo feta pinifo.

*Jesús ĩamāfā femākīa kani*  
(Mr. 6.45-52; Jn. 6.16-21)

<sup>22</sup> Mā cinco mil yorafo pimata Jesús aōxō tāpimisfo yoini iskakakī: “Kanōanāfānē nanekāfe, okiri ĩamāfā pokefaitaxikākī,” ixō ato yoini. Jesús kayoxoma yorafo nīchiaino aōxō tāpimisfo fonifo. <sup>23</sup> Mā yorafo nīchita, māchi keya ari arese kani arixō Apa Nios kīfikai. Mā fakishaino, ares fisti ano ini. <sup>24</sup> Akka a aōxō tāpimisfo kanōanāfānē mā chai foafono, nēfefaino ĩamāfā poikī ato katimafani. <sup>25</sup> Akka mā penaino Jesús ĩa femākīa atoki kaito tsōa tāpinima. <sup>26</sup> Nāskata tāpikanamax aōxō tāpimisfo Jesús ĩamāfā femākīa kaito fichikanax tai tai iyanā ratekōinifo, niyakara ikanax.

<sup>27</sup> Askaifono Jesús ato yoini: “Rateyamakāfe, ēki,” ato fani.

<sup>28</sup> Ato askafaino Pedro kemani: “Ifo, mīmākī eari kenafe ēri ĩamāfā femākīa kanō mia ari,” Pedro fani.

<sup>29</sup> “Ofe,” Jesús fani. Nāskakē Pedro kanōanāfā makinoax fotopakekafā ĩamāfā femākīa Jesús ari kani. <sup>30</sup> Kapaiifi nefeaito ōi nefe kerexkōi mei mesekōini. Nāskakē ĩamāfā mēra ikipakekafakī fāsikōi kenani: “Ĵifo, ea ifife!” fani.

<sup>31</sup> Askaito Jesús koshikōi āfe mēke achixō yoini: “Mīkai ea chanīmara fasharama. Ĵafeskakī mīa chanīmara faimamē?” ixō Jesús yoini.

<sup>32</sup> Askata nā rafe kanōanāfā mēra naneinīfofanafono nefe nishpatani. <sup>33</sup> Nāskakē nā kanōanāfā mēra naneafāfe Jesús nāmā ratokonō mai chachipakefofā yoinifo: “Chanīma, mīfi Niospa Fakeki,” ixō yoinifo.

*Jesús Genesaret anoafō a isinī ikaifo ato sharafani*  
(Mr. 6.53-56)

<sup>34</sup> Akka ĩamāfā pokefaikani Genesaret mai ano nokonifo. <sup>35</sup> Nāskata nā ano ikafāfe yorafāfe Jesús tāpirisafanifo. Nāskakē nā chai ikafori ato yoinifo akairi tāpinōfo. Nāskakē a isinī ikaifo Jesúski efenifo. <sup>36</sup> Nāskakē Jesús yōkanifo: “ĴNō mia tari kexa maikiri pishta ramākatirōmē nō sharaxiki?” fanifo. Nāskakē Jesús tari ramākanax sharai fetsenifo.

## 15

*Jesús ato yoini afeskai yorafo chakafomakī*  
(Mr. 7.1-23)

<sup>1</sup> Askata fariseofo fe a Moisés yoikī kirika keneni keskara ato tāpimamisfo Jerusalén anoax Jesúski fēkaxō yōkanifo: <sup>2</sup> “Ĵafeskai na mīōxō tāpimisfo a nōko xinifo ipaonifo keskakanimamē? Akka a nōko xinifāfe yoinifo keskara tāpifikaxō pixikakī mechokomekeranafo,” ixō yoiaifāfe Jesús ato kemani:

<sup>3</sup> “Akka, Ĵafeskakī māri māto xinifo ipaonifo keskara mā tanapaimē? Nāskaxō a Niospa yoini keskara mā nikatama nā māto xinifāfe yoimisfo keskara mā nikamis. <sup>4</sup> Akka Epa Niospa yoikī iskakani: ‘Māto epa yafi māto efa nikasharakāfe. Akka a āto apa yafi āto afa chakafaifo ato retetakāfe,’ ixō Niospa yoini. <sup>5-6</sup> Nānori Niospa yoifinikē māfi ato mēstekōi nofe yorafo mā ato tāpimamismaki. Akka mā ato yoimis iskakakī: ‘Māto epa yafi māto efa mā yoikī iskakatiro: “Epa, na kori ē mia inākerana. Nāskafixō mē kori keyoa ē Nios inākī. Nāskakē ē mia anā afaa inātiroma,” ixō mā ato yoitiro. Nāskaxō māto epafo mā shināmākīa keskara mā itiro,’ ixō mā ato yoimis parakī. Askafixō mā ato tāpimasharamisma. A kirikaki yoikī Niospa meka kenenifo anori mā yoimisma. Nā

mãto xinifo ipaonifo keskara fisti mã tanamis. A Niospa yoini keskara mã akima. <sup>7</sup> Mãfi keparanãmiski. Matoõnoa yoikĩ Niospa meka yoimisto Isaías kirika keneni chanĩmakõi iskafakĩ:

<sup>8</sup> Nã yorafãfe eõnoa yoisharafikakĩ ãto shinã mëraxõ ea shinãkõiafoma. <sup>9</sup> Æa kaxpa ichanãkanax fanãimisfo ea kĩfiyanã. A ato tãpimanaifo yorafãfe shinã keskarafo. Akka askarakai Niospa shinãma, ixõ Isaías keneni, Niospa shinãmanaino.”

<sup>10</sup> Nãskata Jesús yorafo kenaxõ ato yoini iskafakĩ: “Ea nikasharakõikãfe tãpisharakõixikakĩ ã mato yoinõ. <sup>11</sup> Na mã piato choshta keskara mato imatiroma. Askatamaroko yorafãfe ãto shinã mëraxõ chaka shinãkani, askatari chakai mekaifono choshta keskara Niospa ato õi,” Jesús ato fani.

<sup>12</sup> Askata aõxõ tãpimisfo fõkaxõ Jesús yõkanifo: “Ifo, ¿mĩ tãpiamamẽ fariseofo õitifishkikani nã mĩ yoiaito nikakani?” ikaxõ yoinifo.

<sup>13</sup> Askafaifono Jesús ato kemani meka fetsafaxõ: “Tare ifãfe afara chakafo fanatiroma. Askatamaroko a chaka foaikaino tsekaxõ potatiro. Nãskarifikã ãfe Epa nã nai mëra ikato afarafo fanayamaxõ, ãfe tapo tsekaxõ potaxii anã afaa inõma. <sup>14</sup> Akka fariseofo nikayamakãfe. Nã fëxo keskarafo. Akka fëxo afe fëxo iyopai xato mëra paketiro. Nãskarifiakĩ nã fariseofãfe Niospa meka tãpikaxoma fetsafo tãpimatirofoma. Nãskakẽ ato fe Nios ari nokotirofoma,” ixõ Jesús ato yoini.

<sup>15</sup> Ato askafaito Pedro Jesús yoini: “A na mĩ yoia keskara meka fetsafaxõ noko yoisharafe nõ tãpisharanõ,” fani.

<sup>16</sup> Askafaito Jesús kemani: “¿Afeskakĩ mãri mã nikasharaimamẽ? <sup>17</sup> Akka nõ afara pi-ano nõko ato mëranoax payokomeano nõ aya safatiro. Nãatokai mato chakana fatiroma. <sup>18</sup> Akka a mãto shinãmã shinãxõ mã afara chaka yoiaino nãato mato chakana fatiro. <sup>19</sup> Akka yorafãfe afara chakafakakĩ ãto shinã mëraxõ chaka shinãtirofo, ato retetirofo, askatari ãto ãfima chotatirofo, askatari këro fetsa kaxefatirofo, askatari yometsotirofo, askatari chanĩtirofo, askatari ato ichatirofo. <sup>20</sup> Akka mechokomexoma mã piaino Epa Niospa choshta keskara mato õima. Akka yorafãfe ãa shinãkaxõ afara chakafatirofo. Nãskakẽ Epa Niospa ato õi choshta keskara,” ixõ Jesús ato yoini.

### *Xotofake judeoyamafixõ Jesús chanĩmara fakõini*

*(Mr. 7.24-30)*

<sup>21</sup> Askata Jesús aõxõ tãpimisfo fe kani nã peixe rasi Tiro fe Sidón chaimashta ano.

<sup>22</sup> Askata këro fisti Canaán mai ano ikatsaxakĩ judeo kaifoma Jesús ano kani. Kaxõ fãsikõi yoikĩ keneni iskafakĩ: “Ifo, mĩ David fenaki, ea shinãfe. Æfe fake xotofakeshta niyafaka chakata omiskõimamiski,” ixõ yoini.

<sup>23</sup> Askafaito nikafikĩ Jesús kemanima. Nãskakẽ ãfe inafãfe fõkaxõ yoinifo: “Ifo, na këro yoife katanõ. Nocho okĩ noko fekaxtefawei kiki. Fãsikõi fiisiki kiki,” fanifo.

<sup>24</sup> Askafaifono Jesús ato yoini: “Æfe Epa Niospa ea nĩchini judeofos ano, nãfo oveja fenoa keskarafo. Akka yora fetsafo ano ea nĩchinima,” ato askafani.

<sup>25</sup> Akka nã këro Jesús nãmã ratokonõ mai chachipakefofãyanã iskafakĩ yoini: “Ifo, ãfe fake ea sharafaxope,” fani.

<sup>26</sup> Askafaino Jesús kemani meka fetsafaxõ: “A fakefãfe piyai fĩaxõ nõ paxta inã, askarakai sharama,” fani.

<sup>27</sup> Jesús askafaito nã këromã kemani: “Æje, Ifo. Akka paxtafãfe pitirofo a ifãfe piyai ãfe potofõ mĩsa nãmã keyo pakeaito,” fani.

<sup>28</sup> Askafaito Jesús yoini nã këro: “Mĩ ea chanĩmara fakõini fetsafo keskarama. Akka nã mĩ ea yoiai keskara ã mia axonõ,” ixõ Jesús nã këro yoini. Askafaino ãfe fake xotofake shararisatani.

### *Jesús yora ichapa sharafani*

<sup>29</sup> Askata Jesús anoax aõxõ tãpimisfo fe kaax ãa Galilea kesemẽ nokoni. Nãskata machi keya mãpefainax tsaoni. <sup>30</sup> Nãno yorafã rasi akiki fenifo. Nã isinĩ imisfo akiki efenifo Jesús ato sharafanõ. Fetsa chãto ini, fetsari fẽxo ini, fetsari mifi yõshia ini, fetsari mekamisma ini. Nãskakẽ fetsa fetsatapafo a isinĩ ikaifo Jesús keyokõi ato sharafani. <sup>31</sup> Ato sharafaino õikani yorafo yoinãnifo: “¡Kee! Õikapo. Iskarakai nõ õimisma. Nã mekamisfoma mã mekakani. A mifi yõshiafori mã sharafo. Nã chatofori mã nisharakani. Nã fẽxofãferi mã õisharakani. Jesús afama mĩshti fatiro. Akka nõfi israelifokĩ nõko Nios fãsi sharakõi,” ikanax yoinãnifo.

*Jesús cuatro mil feronãfakefo pimani*  
(Mr. 8.1-10)

<sup>32</sup> Askata Jesús aõxõ tãpimisfo kenaxõ yoini: “Ë na yorafo shinãkõi, nono tres nia mã efe ikafono, nonoxori afaa pikanima. A piaifo mã keyoa. Akka afaa pimaxoma ãto pexe ano ã ato nĩchiano fonãikani afaa pikanaxma fai nẽxpakã paketirofo,” ixõ Jesús ato yoini.

<sup>33</sup> Akka ato askafaino aõxõ tãpimisfãfe kemanifo: “Akka, ¿afeskaxõ a nõ piai nõ fichitiromẽ na yorafo ato pimaxikĩ nono tsoa ikama?” fanifo.

<sup>34</sup> Askafaifono Jesús ato yõkani: “¿Afe tii mã pãayamẽ?” ato faito, “Siete pãa pishta, foe ichapamashtari,” fanifo.

<sup>35</sup> Nãskata nã yorafo nãmã tsaonõfo Jesús aõxõ tãpimisfo ato yoini. <sup>36</sup> Nãskata Jesús siete pãa yafi foeri tsomaxõ Apa Nios kĩfini: “Aicho Ëpa, mĩõxõ ã ato pimaikai. Mĩ fãsi sharafinakõiaiki,” fata, pãa kaxketa, foeri tekenãfaxõ aõxõ tãpimisfo ato inãni nã yorafã rasi ato miniketsanõfo. <sup>37</sup> Nãskakẽ keyokõichi pikanax mãyakõinifo. A pikĩ chetefaafõ siete fẽta fospikõia ini. <sup>38</sup> Akka nã pãa piafo cuatro mil feronãfakefos inifo. Kẽrofãferi fakefoyaxori ato feta pinifo. <sup>39</sup> Nãskata Jesús yorafo yoini fõtanõfo ãto pexe ano. Nãskata Jesús kanõanãfã mẽra naneinãkafani aõxõ tãpimisfo fe. Mã naneinãkafãta aõxõ tãpimisfo fe mai fetsa ano kani, Magdala ano.

## 16

*Fariseofo feta saduceofãfe, “Tsõa atiroma keskara noko ispafe nõ mia chanĩmara fanõ,”*  
*ixõ Jesús yõkanifo*  
(Mr. 8.11-13; Lc. 12.54-56)

<sup>1</sup> Askata Magdala mai ano Jesús nokoano fariseo fe saduceofo Jesús õifokani fonifo afara chakafamapaikani. Nãskakaxõ yoinifo: “Mĩ Niospa Fakemãkĩ tsõa atiroma keskara noko ispafe nõ mia chanĩmara fanõ,” fanifo. Nãskakaxõ Jesús afara chakafamapainifo.

<sup>2</sup> Askafaifono Jesús ato kemani: “Mã yãtapakeaino xini iki sharapakekõikai, ‘Penama oi ikima,’ mã famis. <sup>3</sup> Akka mã penaino nai choshtakõi õikĩ, ‘Oi iki kiki,’ mã famis. Akka nai choshtakẽma õikĩ, ‘Oi ikima,’ mã famis. Nai foiskĩ mã tãpitiro oi feyamai feima rakikã mã fatiro. Askafixokai nã Niospa mato yoiai keskara mã chanĩmara faima. Nãskakẽ mã ea tsõa atiroma keskara fafe, nõ õinõ mã ea famis. Akka, ¿afeskakĩ mã tãpãmãmẽ Epa Niospa noko ikĩfiano?” ato askafani yoikĩ. <sup>4</sup> “Na yora chakafãfe ea chanĩmara faafãfema õipaikani ã Niosxõ afara shara ã ato ispanõ. Akka ã ato õimanimã. Akka Jonás fãfĩnõfãnẽ xeaitano fãfĩnõfãnẽ xaki mẽra tres nia ini. Nãskakẽ Niospa Jonás kãimani fãfĩnõfãnẽ xãki mẽranoax tsekeinõ. Nãskakẽ a tsõa atiroma keskara ã mato ispaima,” ato fata ato makinoax Jesús kani.

*“Fariseofo feta saduceofãfe anorima yoimisfoki ato nikayamakãfe,” Jesús ato fani*  
(Mr. 8.14-21)

<sup>5</sup> Nãskano Jesúsxõ tãpimisfãfe okiri ãamãfã pokefaini fõkakĩ a pii foaifo shinãmakifainifo. Nãskakaxõ shinãnifo: “Kee, ¿nõ afaa piikaimẽ? A nõ piikai mã nõ shinãmakikerani,” ikanax yoinãnifo. <sup>6</sup> Nãskakẽ Jesús ato yoini iskafakĩ: “Nã fariseofo feta saduceofãfe ãto pãa faraxati keskara fiyamakãfe,” ixõ ato yoini.



<sup>7</sup> Ato askafaito nikakani aõxõ tãpimisfo yoinãnifo: “¿Afeskakĩ Jesús noko yoimẽ fariseofa feta saduceofãfe ãto pãa faraxati fiyamakãfe noko fai? Akka nõ pãa feama. Nãskakẽ pãanoa noko yoiraka,” ikax yoinãnifo.

<sup>8</sup> Akka mã tãpixõ Jesús ato yoini: “¿Afeskai nõ pãayamara mã ikimẽ? Akka mã ea chanĩmara fasharama,” ato fani. <sup>9</sup> “Mãkai ea tãpisharama. Akka, ¿mã shinãimamẽ cinco pãa kaxkexõ cinco mil feronãfakefo ã to pimati? Akka, ¿afe tii fẽta pãa fospia ikitamẽ?” ato fani. <sup>10</sup> “Askatari, ¿mã shinãimamẽ nõ siete pãa kaxkexõ cuatro mil feronãfakefo ã to pimati? Akka, ¿afe tii fẽta texefafo mã fitamẽ? <sup>11</sup> Akka, ¿mã tãpiamamẽ pãanoa ã mato yoima? Nã fariseofoya saduceofoõnoa ã mato yoi,” Jesús ato fani.

<sup>12</sup> Nãskakẽ tãpinifo Jesús ato yoiãito. Akka nõ pãa faraxitiõnoa Jesús ato yoinima. Nã fariseofãfe saduceofo feta ato anorima tãpimapaiyãito Jesús ato yoini.

*“Mĩ Cristo mia Niospa ifini nokoki nĩchixii mĩ nõko xanĩfo finakõia inõ,” ixõ Pedro Jesús yoini*

*(Mr. 8.27-30; Lc. 9.18-21)*

<sup>13</sup> Askata Jesús aõxõ tãpimisfo fe mai fetsa ari nokoni, Cesarea Filipino mai ano. Nãnoxõ aõxõ tãpimisfo yõkani iskafakĩ: “Yorafãfe, ¿afaa ea fakanimẽ ã tsoamẽ?” ato fani.

<sup>14</sup> Ato askafaito kemanifo iskafakakĩ: “Fetsafãfe, ‘Juan Maotistara’ mia fakani. Fetsafãferi, ‘Elíasra’ mia fakani. Fetsafãferi mia iskafakani: ‘Nã Niospa meka ato yoimis nõ Jeremíaskĩa, askayamai nõ Niospa meka ato yoimis fetsa rakikĩa,’ mia fakani,” fanifo aõxõ tãpimisfãfe.

<sup>15</sup> “Akka, ¿mã, ea tsoara faimẽ?” ato faito, Pedro kemani iskafakĩ: <sup>16</sup> “Mĩfi Cristoki, nõ Nios nĩpanakato Fakekõi,” fani.

<sup>17</sup> Askafaito Jesús kemani iskafakĩ: “Simón, mĩfi Jonãspa fakeki. Niospa mia noixõ mia sharafaxõa. Akka ã Niospa Fakekẽ tsõa mia tãpimanama. Ëfe Epa Niospa nõ nai mẽra ikato ãa mia tãpimana. <sup>18</sup> Ë mia anã yoinõ. Mĩfi Pedroki,” ixõ Jesús yoini. Akka israeli mekapa Pedro Tokirinĩfã nõ fatiro. Tsõa tokiri efapa pĩtsi itiro. Nãskaxõ Jesús anã yoikĩ iskafani: “Mĩ ea yoia: ‘Mĩ Cristo, nõ Nios nĩpanakato Fakekõi,’ mĩ ea faa. Nã mĩ yoia keskaraõxõ fetsafãfe arifi chanĩmara faxikani. Nãskaifãfe efe yorafo ã to imaxii. Nãskax ichanãxikani ea fanãkani ekeki inimakani. Yõshi chakafãfe Nios noikaspakakĩ ato namapayanã ato xatemapaifaifono tsoa xatetiroma. Nã ea Ifofaafo xatenakafoma ea fanãkani. Tokiri efapanãfã pĩtsikiki tsõa tararatiroma keskara ixikani. <sup>19</sup> Akka fẽtsa chamisi fepoti fẽpetiro yorafo pexe mẽra ikimaxikĩ. Nãskarifiakĩ ã mia yoi mĩ yorafo eõnoa mĩ ato tãpimaxii ea Ifofanõfo. Akka mĩ ato yoiãito nikakõikanax efe yora itirofo Epa Nios fe ipaxakakĩ. Nãskai mĩ chamis keskara itiro. Nã mĩ õiai fato sharakõimãkĩ mĩ ato yoitiro: ‘Nã sharakõi mã atiro,’ ixõ mĩ ato yoitiro. Nã sharakõi mĩ õiai, Epa Niospari sharakõi õi. Askatari mĩ õikai fato chakamakĩ, mĩ ato yoitiro: ‘Na chaka mã atiro.’ Nãskara mĩ yoiãino, Epa Niospari nõ chaka õitiro.”

<sup>20</sup> Nãskata Jesús aõxõ tãpimisfo yoini: “Tsoa yoiyamakãfe ãfi Cristoki,” ato fani.

*“Chipõ ea retexikani,” Jesús ato fani*

*(Mr. 8.31-9.1; Lc. 9.22-27)*

<sup>21</sup> Akka anã meka fetsafaxõ Jesús ato yoinima. Xafakĩakõi a aõxõ tãpimisfo ato yoini achiyoafomano: “Ë Jerusalem ano kai. Nãnoxõ a ato Nios kĩfixomisfãfe ãto xanĩfofo feta a Moisés yoikĩ kirika keneni keskara ato tãpimamisfãferi, askatari nõko kaifãfe ãto xanĩfofofãferi ea omiskõimaxikani. Ea ato retemafiafono, tres nia oxata ã anã otoxii,” ixõ ato yoini. <sup>22</sup> Askafaino Pedro Jesús ori iyoxõ yoini iskafakĩ: “Ifo, askayamafe. Miakai retekanima kiki,” fani.

<sup>23</sup> Pedro askafaino Jesús texkeakekafãni. Nãskaxõ iskafakĩ yoini: “Satanás, emakinoax katãfe. Mĩ ea xĩtipaikai a Niospa ea amapaiyai ã anõma. A Niospa shinãi anori mĩ shinãima. Akka nõ yorafãfe shinãi keskara mĩ shinãi,” fani.

<sup>24</sup> Askafata Jesús aõxõ täpimisfo yoini: “Fatora fetsa ãfe inakõi ipaikĩ ãakõi apaiyai keskara anã atiroma. Nã ã yoiai keskara nikakõitiro. Nãskakẽ iskatiro: ‘Ëfe Ifoxõ ea retefiaifono ãkai ãfe Ifo ã potapakenakama,’ ixõ shinãtiro. <sup>25</sup> Akka fetsa ãa shinãtiro iskakĩ: ‘Ë Nios Ifofaito ea retetirofo. Nãskakẽ ã Nios Ifofaima,’ ixõ shinãtiro mesekĩ. Askara yora naax ãfe Epa ano katiroma. Akka nã ea Ifofaa, eõxõ reteafono ã ifixii efe ãpaxanõ eamãi Ifofamiskẽ. <sup>26</sup> Akka fatora fetsa nono mai anoax kori ichapaya ikatsaxakĩ mã naax aya katiroma. Ea Ifofayamax koriya ifiyakatsaxakĩ Epa Nios ano katiroma. Nãskakẽ afama mĩshtifoya iyopaofinixakĩ nã omiskõipakenakafo mẽra mã kaax anã aya itiroma. Nãskakẽ ãfe afaraforikai Nios inãtiroma afe ãpaxakĩ. <sup>27</sup> Akka ãfi Niospa Fakekĩ yorakõiri. Nãskakẽ sharafinakõia chaxapakefõfãxii ãfe ãjirifo fe nai mẽranoax mã ano okĩ. Mẽ oax ã ãto xanĩfo finakõia ã ixii. Nãskakẽ nã afara shara famisfo ã ato inãsharakõixii ã atoki inimakõikĩ. Akka nã afara chakafamisfo afara shara ã ato inãsharakõima. Ë ato omiskõimaxii. <sup>28</sup> Ë mato yoi ã xanĩfo finakõia ixii. Akka mã atirito ea Ifofaxõ nayoxoma mã õiyotiro,” ixõ Jesús ato yoini.

## 17

*Jesús ãfe femãnã fetsa keskara ini, fafekõini. ãfe rapatiri oxokõi ini*  
(Mr. 9.2-13; Lc. 9.28-36)

<sup>1</sup> Askata seis nia mã finõano Jesús aõxõ täpimisfo tres iyoni. Pedro iyota, Santiago iyota, Santiago ãfe exto Juanri iyoni. Ranãri ato nĩchifaini. Nãskaxõ mãchi keya mãmãkã ato iyoini. <sup>2</sup> Nãnoax ãto ferotaifi Jesús fetsa keskara ãtani. ãfe femãnã fafekõini xini keskara. ãfe rapatiri oxokõi itani oa luzpa chaxa keskara. <sup>3</sup> Nãskakẽ nãnoa Moisés yafi Elías õinifo Jesús fe mekaifãfe. <sup>4</sup> Askaito Pedro Jesús yoini: “Ifo, sharakõi ano nõ oa. Akka, ¿mĩ fichipaimẽ ã tres tapas fanõ? Mia fetsafaxota, Moisés fetsafaxota, Elías fetsafaxota, ã fanõ,” ixõ Pedro yoini.

<sup>5</sup> Akka Pedro askafaino kõinĩ ato keyokõi maipakefõfãni. Nã kõi mẽranoax Nios mekaito nikanifo iskaito: “Nafi ãfe Fakeki ã fichisharapaikõi. Ë akiki inimakõi. A nikakõikãfe,” ikaito nikanifo. <sup>6</sup> Nikakani Jesúsxõ täpimisfo ratekõiyãnã feopakefõfãnifo. <sup>7</sup> Askafono Jesús ato ano kaxõ ato ramãyanã ato yoini: “Finikãfe. Ratekakima,” ato fani. <sup>8</sup> Nãskakẽ foisinĩfõfãkakĩ anoa tsoa õinifoma, Jesús fisti nikẽ õinifo.

<sup>9</sup> Nãskata machi keya ariax anã tisirimepakenifo mã fekani. Tisirimepakekĩ Jesús ato yoifeni: “A mã õia keskara mã tsoa yoiki. Ë naax mẽ anã otoano mã ato yoitiroki,” ixõ Jesús ato yoini.

<sup>10</sup> Nãskakẽ a aõxõ täpimisfãfe Jesús yõkanifo iskafakakĩ: “A Moisés yoikĩ kirika keneni keskara ato täpimamisfãferi iskafakĩ yoinifo: ‘Cristo oyoamano Elías rekẽ oi taexii kiki,’ ixõ yoimisfo. Akka, ¿afeskakĩ iskara yoimẽ?” fanifo.

<sup>11</sup> Askafaiãfe Jesús ato kemani: “Chanĩma, Elías rekẽ oi taei nãato keyokõi itip-inĩsharafaiyoi ãto chaka xatenõfo. <sup>12</sup> Akka ã mato yoinõ mã Elías ifana mãkai täpiama. Nãskakẽ nã apaiyai keskafakakĩ chakafanifo. Nãskarifikã ea omiskõimakani,” ixõ Jesús ato yoini.

<sup>13</sup> Nãskakẽ aõxõ täpimisfãfe täpinifo Juan Maotistaõnoa Jesús ato yoiaito.

*Jesús feronãfake naetapa niafaka chaka põtaxoni*  
(Mr. 9.14-29; Lc. 9.37-43)

<sup>14</sup> Askata Jesús a aõxõ täpimisfo fe mã mãchifã ariax fotoano yorafã rasi akiki fenifo. Akka feronãfake fistichi ratokonõ mai chachipakefõfã Jesús yoini: <sup>15</sup> “Ifo, ãfe fake shinãfe. Ëfe fake nĩsoi omiskõimiski. Nãskakẽ chii naki pakeyanã faka mẽra pakemiski. <sup>16</sup> Akka mã inafõ ano ãfe fake ã efefekẽ mã inafãfe ãfe fake ea sharafaxomisfoma,” fani.

<sup>17</sup> Askafaito Jesús kemani: “Ooa. Mãkai ea täpisharama. Mã afara shinãmis. Akka afetĩakai ã matoki onima. ¿Afetĩakai mã ea täpimẽ? Niri nã fake efekãfe,” Jesús ato fani.

<sup>18</sup> Nāskakē Jesús nā feronāfake naetapa makinoa niafaka chaka potani. Nāskax sharakōi itani nā feronāfake naetapa.

<sup>19</sup> Nāskaxō aōxō tāpimisfāfe Jesús yōkanifo: “Akka, ¿afeskakīri nō niafaka yōshi chaka potatiromamē?” ixō yōkanifo.

<sup>20</sup> Askafaifono Jesús ato yoini: “Akka mā ea nikaima. Ē mato yoinō, ea nikakapo. Akka mā ea pishta nikaxō mā na machi, ‘Nonoax tsekekainax mai fetsa ari katāfe,’ mā faino na machi tsekekaitiro. Ea nikakōixō nā mā apaiyai keskara mā atiro. <sup>21</sup> Akka na keskara niafaka chaka mā foni tenekī Nios shinākī mā Epa Nios kīfianā mā potatiro,” ixō Jesús ato yoini.

*Anā Jesús ato yoini: “Chipo ea retexikani,” ixō  
(Mr. 9.30-32; Lc. 9.43-45)*

<sup>22-23</sup> Askata aōxō tāpimisfo fe Galilea ano ichanāxō ato yoini: “Ea achikaxō āto xanīfofo ano ea iyoxikani, afāfe ea retenōfo. Akka ea retefiafono tres nia oxata ē anā otoxii,” ixō Jesús ato yoini. Ato askafaito nikakani aōxō tāpimisfo shināmitsakōinifo.

*Nā Nios kīfiti pexefā ano yonomisfāfe ato kori yōkanifo*

<sup>24</sup> Askata Jesús aōxō tāpimisfo fe Capernaúm ano nokoaino a Nios kīfiti pexefā anoxō ato kori fiamisfāfe Pedro ōifokaxō yōkanifo: “¿Mī Ifāfe kopifaimamē na Nios kīfiti pexefā nā ato kori fixomisfāfe?” Pedro fanifo. <sup>25</sup> “Ēje, kopifai,” Pedro ato fani.

Askata Pedro pexe mēra ikikainaito Jesús yoini iskafakī: “Simón, ¿afe keskara mī shināimē? ¿Xanifāfe nā maitio anoa āfe kaifo kori fīaimē, askayamakī yora fetsafo ato fīairaka?” ixō Jesús Pedro yōkani.

<sup>26</sup> Askafaito Pedro kemani: “Yora fetsafo fīatiro,” fani. “Ēje, chanīma,” Jesús ini. “Akka āfe kaifāfe kopifatiroma. <sup>27</sup> Akka nokoki ōitifishkiyamanōfo ĩa ano kaxō mīshkimātāfe. Nā mī fafī mīshkimāna āfe axfa mēranoa mī kori exe fichikai. Nāskakē nā Nios kīfiti pexefā kori fixomisfo nō ato kopifaikai,” ixō Jesús Pedro yoini.

## 18

*“Akka, ¿tsoakaimē sharafinakōia?” inifo  
(Mr. 9.33-37; Lc. 9.46-48)*

<sup>1</sup> Akka nāskatari aōxō tāpimisfo fōkaxō Jesús yōkanifo: “Akka, nō mia Ifofamiski, ¿fatomē finakōia?” ixō yōkanifo.

<sup>2</sup> Askata Jesús fake yome kenaxō ato nēxpakīa nīchini. <sup>3</sup> Nāskaxō ato yoini: “Ē mato pāraima. Iskara mā shinātiroma: ‘Ē keyokōi finōfakī,’ mā itiro. Akka fake yome kakapaitiro. Akka mā shinā fetsafaax na fake yome keskara mā itiro. Mā askayamaxō mā Nios Ifofatiroma. <sup>4</sup> Akka Nios Ifo sharakōi faax nā Nios nikakōiaifo fake yome keskarafo, askatari, ‘Nō tsoama,’ ixō shināifo nāskarafo sharafinakōiafo. <sup>5</sup> Akka fatora fētsa ēfe aneōxō na fake yome noikī nāatori ea noisharakōi,” ixō Jesús ato yoini.

*Noko fētsa afara chakafamaino āfenā mesekōi itiro  
(Mr. 9.42-48; Lc. 17.1-2)*

<sup>6</sup> Jesús anā yoini iskafakī: “Akka nā ea rama Ifofai fetsafāfe ato afara chakafamaino ōikī, nā keskarafo ato achixō tokirinīfāya tenextifaxō fakafā noa mēra potatirofo āsanōfo fetsafo anā ato afaa chakafamayamanōfo. Nā keskara shara ikerana,” ato fani.

<sup>7</sup> Askafata Jesús aōxō tāpimisfo yoini iskafakī: “Mēxotaima ea chanīmara faafāfema yorafo chakafamapaimisfo. Akka fētsa fetsafo chakafamax omiskōi finakōixikani.

<sup>8-9</sup> “Akka mātō mēkemā mato afara chakafamatiro, askayamākī mātō tāe mato afara chakafamatiro, askayamākī mātō fēro mato chakafamatiro. Nāskaino mātō chaka xatekōitakāfe anā chakafayamaxii. Oa mātō mēke xateta pota keskara itaxikakī, oa mātō tae xateta pota keskara itaxikakī, oa mātō fero fetoshimea keskarakōi itaxikakī afaa mā

chakafayamanõ. Akka mã mã mẽke fisti potax anã afaa chakafayamai mã Epa Nios fe isharapakenakaki. Nã keskara sharakõi. Nã mãto mẽke mã xateama keskaraxõ mã aõ chakafaino, nã omiskõipakenakafo mẽra mã kanaka ari chiifã nokanakama mẽra. Nã mãtonã chaka finakõia ixii. Nãskatari mãto tae fisti xatea keskara mã sharafinakõia mã isharapakekõitiro. Nãskax, mã askayamaino nã omiskõipakenakafo mẽra mã ipanakaki ari chiifã nokanakama mẽra. Nãskatari mãto fero chakafaino, mã fetoshimeax mã isharapakenakaki. Mã askayamax fero rafeyax nã omiskõipakenakafo mẽra mã kaxii nã chiifã nokanakama mẽra,” ato askafani.

*Oveja fenoaõnoa Jesús meka fetsafaxõ ato yoini*  
(Lc. 15.3-7)

<sup>10</sup> Anã Jesús ato yoini iskafakĩ: “Nã rama ea Ifofaõnoa fakefo keskara shinãkĩ iskafayamakãfe: ‘Na rama Jesús Ifofaafokai afaafoma,’ ixõ yoyiamakãfe. Ë mato mẽstekõi yoinõ. Epa Niospa ãfe ãjirifãfe nã rama ea Ifofaafõ ato kexesharafafãimis. Nã ãjirifo Epa Nios fe imisfo. Nãskakẽ ãfe fakefo kexesharamis. <sup>11</sup> Akka nã yorafo fenoafõ ãto chaka soaxoniyoi ã oni isharapakexanõfo.

<sup>12</sup> “Akka, ¿afaa mã shinãimẽ? Feronãfake fetsa cien ovejaya itiro. Nãskakẽ fisti a maki-noax fenoano nã noventa y nueve anã kãimatiroma nã fenoa fenakĩ. <sup>13</sup> Ë mato chanĩma yoinõ. Mã oveja fisti fichiãx inimaifinakõitiro. Akka nã fenoamafoki inimatama nã fenoitaki mã fichiãx inimaifinakõitiro. <sup>14</sup> Nãskarifiã Epa Nios nã nai mẽranoato nã rama Ifofaifo keyokõi ato noisharai ato õikĩ. Askatari tsoa pishta fenopaima ãfe fakefo,” ato fani.

*Jesús chanĩmara faa fẽtsa mia chakafaito mã raefatiro*  
(Lc. 17.3)

<sup>15</sup> Anã Jesús ato yoini iskafakĩ: “Akka meka fetsa ã mato yoinõ. Ea chanĩmara famis fẽtsa mia chakafakẽ mã yoitiro iskafakĩ: ‘Yamã, mã ea chakafaa,’ ixõ mã yoitiro. Mã askafaito mia nikaxõ, ‘Ëje. Ea mã chakafa. Ea anã raefafe,’ ixõ mã yoiaito mã afe rae faatanãtiro. <sup>16</sup> Nã mã askafafaito mia nikakaspaito feronãfake fisti kenafe, askayamakĩ rafe kenafe nã rafetari nikanõfo mia chanĩmara faimãkai. <sup>17</sup> Nãskatari atori nikayamaito nã ea Ifofaafõ ichanãfo anoxõ ato yoife mia tãpinõfo. Nã ichanãfo anoxõ mã yoiaito mia nikayamaito mã iskafakĩ yoitiro: ‘Na feronãfãke Epa Nios Ifofafiax nã Nios Ifofaafoma keskara ika. Nãskatari nã ato pãraxõ ato kori fãamisfo keskarakõi,’ ixõ mã yoitiro.

<sup>18</sup> “Ë mato chanĩma yoi. Nã mã õiai fato sharakõimãkĩ mã ato yoitiro: ‘Nã sharakõi. Nãskara nõ atiro,’ ixõ ato yoitiro. Nãskara mã sharakõi õi Epa Niospari shara õi. Askata mã õikai fato chakamakĩ, mã ato yoitiro: ‘Na chaka. Nãskara nõ atiroma,’ ixõ ato yoitiro. Nãskara mã õikĩ chakamakĩ, ‘Na chaka nõ atiroma,’ ixõ mã yoiaino, Epa Niospari nã chaka õitiro.

<sup>19</sup> “Askatari fetsari ã mato yoinõ, ea nikakõikapo. Fatora mã rafeta nono mai anoxõ mã shinãsharaxõ, mã Epa Nios afara yõkaiyanã mã kãfiãito ãfe Epa nai mẽranoato mato afara inãsharaxii. <sup>20</sup> Akka rafe iyamakani tres yora ea shinãkani eõnoax ichanãkaxikani ãri ato fe ichanãxii,” ixõ Jesús ato yoini.

<sup>21</sup> Askata Pedro akiki kaxõ Jesús yõkani: “¿Ifo, oato ea noikaspakĩ ea chakafamis, afe tii fakĩ ã yoitiromẽ ã raefaxiki? ¿Siete fakĩ ã yoitiromẽ?” faito, <sup>22</sup> Jesús kemani: “Maa. Siete fakĩ mã yoitiroma. Mẽxotaima mã yoitiro,” fani.

*Jesús anã meka fetsafaxõ ato yoini feronãfake fẽtsa a afeta yonomis raefapainima*

<sup>23</sup> Anã Jesús ato yoini: “Nõ Epa Nios Ifofaxõ nõ fetsafo raefatiro, Epa Niospa mato raefamis keskafakĩ. Nã ã mato yoiaĩ keskara nikakapo mã tãpinõ mã rae faatanãino. A xanĩfãfe ato yonomamis kenani ato yoixii afe tii mã nimiamakĩ. <sup>24</sup> Xanĩfãfe taefakĩ afe rafea kenani ichapakõi nimiano. <sup>25</sup> Akka a nimia koriya inima afaa kopifatiroma ini. Nãskakẽ xanĩfãfe iskafani: ‘Mã koriyama mã kori nokotiroma mã ea kopifapanã. Akka ã

mia xanifo fetsa ināi mī āfe ina inō ea kori inānō. Mia ināta mī āfi ināta mī fakefo ināta mī afama mīshtifo keyokōi ea ināi mī ea aō kopifanō, ixō xanifāfe yoini. <sup>26</sup> Nāskakē āfe inapa ratokonō mai chachipakefōfā yoini: 'Ifo, ea manayofe. A ē mia nimia ē mia chipo kopifaikai,' ixō yoini.

<sup>27</sup> "Askafaito nikakī xanifāfe shinākōini. Nāskaxō yoini: 'Rateyamafe. A mī ea nimia ē anā shināima. Mī ea nimia ē keyokōi sofai mī anā ea niminōma. Kasharatāfe,' ixō yoini. <sup>28-29</sup> Nāskakē xanifāfe pexe mēranoax kakī, āfe yama fichini, nāato ichapama pishta nimia ini. Nāskakē fichixō testopa achixō temo temosayanā yoini: 'Mī ea nimia ea kopifarisafāfe,' fani. Mā eneano ratokonō mai chachipafofā yoini, 'Ea manayofe ē mia inānō,' fani. <sup>30</sup> Askafaito nikakaspakī karaxa mēra ikimani a mēraxō kopifanō. <sup>31</sup> Nāskakē ranāri shināmitsakōikakī a ōiaifo āto xanifo yoifokani fonifo. <sup>32</sup> Nāskakē xanifāfe kenaxō mā oano yoini: 'Mī chaka finakōia. Akka ē mia askafatima mī ea nimifiano, "A ē mia nimia ē mia kopifanō ea manayofe," mī ea faito, <sup>33</sup> akka mīri mī yama mī shinākerana nā ē mia noikī shināti keskafakī,' ixō xanifāfe yoini. <sup>34</sup> Nāskax ōitifishki finakōikī xanifāfe nā āfe ina karaxa mēra ikimani anoax omiskōi finakōinō nā nimia kopifayanā.

<sup>35</sup> "Ēfe Epa nai ari ikato matori askafaxii fetsafo mā raefayamaito mato omiskōimaki," ixō Jesús ato yoini.

## 19

### *Feronāfake āfe āfi fe enēnātirofoōnoa Jesús ato yoini (Mr. 10.1-12; Lc. 16.18)*

<sup>1</sup> Mā ato yoikī keyota Jesús aōxō tāpimisfo fe Galilea anoax kakī faka Jordán pokefainax Judea mai ano nokoni. <sup>2</sup> Nāskakē yorafā rasichi chīfafāinifo. Nārixō nā isinī ikaifo ato sharafapani.

<sup>3</sup> Nāskakē fariseofo akiki fēkaxō chakafakī mekamapainifo. Nāskaxō yōkanifo iskafakī: "Nōko xinifāfe Niospa meka yoikī kenenifo keskafakī, ¿feronāfake āfe āfi enepaikī enetiromē afeskaraito?" ixō yōkanifo. <sup>4</sup> Askafaifono Jesús ato kemani: "¿A Moisés kirika keneni mā ōimismamē? Iskafakī keneni: 'Niospa keyokōi onifani. Feronāfake yafi kēro onifakī taefani. <sup>5-6</sup> Mā askafaxō iskafakī yoini: "Feronāfake mā āfiyax āfe apa yafi āfe afa makinoax paxkatiro āfi fe fianāxiki. Nāskakē āfe āfi fe yora fisti keskara itirofo," ' ixō Niospa yoinino Moisés keneni. Nāskakē anā yora rafema, yora fisti keskara ikani āfe āfi fe. Nāskakē feronāfake āfe āfi enetiroma Niospamāi ato fianāmano," ixō Jesús ato yoini.

<sup>7</sup> Ato askafaino yōkanifo: "Akka, ¿afeskakī Moisés yoinimē iskafakī? 'Feronāfake āfe āfi eneyoxoma kirika kenexō yoitiro iskafakī: "Ē anā mia fipaima. Ē mia enei," ' ixō yoitiro Moisés fani," fariseofāfe Jesús fanifo.

<sup>8</sup> Askafaifono Jesús ato yoini: "Akka māri mātō xinifo keskara mā Niospa meka nikakaspamis. Akka Moisés yoini nō kēro enetiro. Akka Niospa taefakī anori shinānima. <sup>9</sup> Ē mato yoinō. Akka fētsa āfe āfi enetiroma fetsa fe chotanāyamafiano. Akka fētsa āfe āfi enexō kēro fetsa fia askara sharama, chakafai. Askatari a kēro fenē enea fētsa fia askarari sharama, chakafai," ixō Jesús ato yoini.

<sup>10</sup> Askara nikakakī Jesús a aōxō tāpimisfāfe yoinifo: "Akka nā mī noko yoiai keskara nikakanax, fianāfoma askara shara itirofo," ikaxō yoinifo.

<sup>11</sup> Askafaifono Jesús ato kemani: "Na ē yoiai keskara atirifāfe nikasharatirofoma. Akka nā Niospa ato shināmanai tiitos shinākanax nāfo shara itirofo fianākanamax. <sup>12</sup> Akka yōshikōi kāiax mā yosiax āfiyatiroma. Akka fetsafori ato oxkofīxotirofo āfiyanōfoma. Akka fetsafāferi Epa Nios fisti nikakōipaikakī, nā fisti nikakōitirofo. Nāskakē afo āfiyapakenakafoma," ixō Jesús ato yoini.

### *Jesús fakefo chishtoxō ato māmāyanā Epa Nios kīfixopakeni (Mr. 10.13-16; Lc. 18.15-17)*

<sup>13</sup> Ato askafaino yorafāfe āto fakefo Jesúski efenifo ato māmāpakeyanā ato Nios kīfixonō. Akka a Jesúsxō tāpimisfāfe ato iskafanifo: “Māto fakefo efexō nōko Ifo fekaxtefayamakāfe,” ato fanifo.

<sup>14</sup> Ato askafaifono Jesús ato yoini: “Ato enekāfe nā fakefo ekeki fenōfo. Ato nētefayamakāfe. Ēfe Epa Nios xanīfo ika ari na fakefo keskarakōifoki,” ixō ato yoini.

<sup>15</sup> Nāskaxō fakefo māmāpaketa Jesús nānoax kani.

*Feronāfake naetapa kori ichapayax Jesús fe mekani  
(Mr. 10.17-31; Lc. 18.18-30)*

<sup>16</sup> Feronāfake naetapa fistichi Jesús ōikaxō yōkani: “Maestro, mī sharaki, ea yoife afaa shara ē afeska fatiromakī Nios xanīfo fe ipaxaki,” ixō yōkaito, <sup>17</sup> Jesús kemani: “¿Afeskakī sharara mī ea faimē? Akka Nios fisti sharafinakōia. Nios xanīfo fe mī ipaxapaikī a Moisés yoini keskara mī nikasharakōitiro,” faito, <sup>18</sup> “¿Fatomē ē nikanō?” faito, Jesús yoini iskafakī: “Nā Moisés yoini keskarakōi mī nikakōitiro. Iskafakī yoini: ‘Ato reteyamakāfe. Askatari māto āfima chotayamakāfe. Askatari atoki yometsoyamakāfe. Askatari chanī yoiyamakāfe. Askatari kaxpa ato parayamakāfe. <sup>19</sup> Askatari māto epa yafi māto efa nikasharakōikāfe, ato sharafakāfe. Askatari a mā chaima nikari noisharakōikāfe a mā mā noimeai keskafakī,’ ” ixō Jesús yoini.

<sup>20</sup> Askafaito a kori ichapayato kemakī iskafani: “Nā mīa yoiai keskara mē nikakōimis. Akka, ¿afaa fetsari ē nikamamē?” faito, <sup>21</sup> Jesús kemani: “Mī isharakōipaikī, mī afama mīshtifo ato minitāfe. Kori fixō nā afaamaisfo ato ināketsatāfe. Nāskakē nai mēranoax afama mīshtifoya mī ixikai. Mā mī kori ato ināketsata anā oxō ea Ifofasharafe,” ixō Jesús yoini.

<sup>22</sup> Askafaito nikai nā feronāfake shināchakakōi tooxinima kori ichapayamāiyaxō ato inākaspai. Nāskax Jesús makinoax kani.

<sup>23</sup> Nāskaxō Jesús aōxō tāpimisfo yoini: “Ē mato pārāima, fekaxkōi yora kori ichapayato Epa Nios Ifofapaia. <sup>24</sup> Akka anā ē mato yoinō meka fetsafaxō. Camello akoja kini mēra ikipaifi ikitiroma, fekaxkōi, efapamāiax. Nāskarari yora kori ichapayato Nios Ifofapai, fekaxkōi āfe afama mīshtifomāi potakaspakī,” ixō Jesús ato yoini.

<sup>25</sup> Ato askafaito nikakakī a aōxō tāpimisfāfe tāpipainifo. “¡Kee! ¿Afeskax nō Nios fe ipaxatiromē?” ikanax yoinānifo.

<sup>26</sup> Askafāfe ōikī Jesús ato yoini: “Yorafokai āa ifimetirofoma. Nios fistichi yorafo ifitiro. Niospa afama mīshtifo fatiro, yorafāfe atiroma keskara,” ixō ato yoini.

<sup>27</sup> Ato askafaito nikakī Pedro yoini: “Ifo, nō mefe okī nōko afama mīshtifo nō ōiferani nō mefe oni. Akka, ¿afaa nō fīmē?” fani.

<sup>28</sup> Askafaito Jesús ato kemani: “Ē mato pārāima. Keyokōi ē ato īkināno sharafinakōia ea ōixikani, ēfe Epa Nios keskara sharakōi ē ikaito. Akka māmāi ea Ifofasharakatsaxakī nai mēranoax mā efe xanīfofo ixii. Mā nōko kaifo israelifāfe āto xanīfori mā ixii. Nā doce nofe yorafo israelifo mā ato īkipakenakakī. <sup>29</sup> Akka yora fētsa eōxō ēfe meka sharaōnoa ato yoikakī āfe pexe ōifaini, askatari āfe onefetsafori ōifaini, āfe poifori ōifaini, āfe apari ōifaini, āfe afari ōifaini, āfe āfiri ōifaini, āfe fakefori ōifaini, āfe tareri ōifaini, akka nāto afama mīshtifo fixii. Nāskatari mā naax Nios fe ipanaka. <sup>30</sup> Akka iskaratīa yora ichapafāfe ato finōpaikani, nō finakōiara ikaxō, akka chipo fenotirofo. Akka a ato finōpaiyamaifo iskaratīa Niospa ato finakōia imaino Nios fe ipanakafo,” ixō ato yoini.

## 20

*A yonomisfokiri yoikī meka fetsafaxō Jesús ato yoini*

<sup>1</sup> Anā Jesús ato yoini: “Afe keskaramākī Epa Niospa keyokōi ato īkinā mā Ifosharafaino, ē anā meka fetsafaxō ē mato yoinō. Ea nikasharakāfe. Nā tare ifo mā fakishparikōi kani yorafo fenaikai āfe tare ano yonoxonōfo. <sup>2</sup> Ato fichixō ato yoini iskafakī: ‘Ē mato

pena fisti yonomapai. Akka nã ã ato kopifamis tii mã pena fisti yonoano ã mato kopifai, ¿nãskara sharamẽ? ato feito, ‘Eje, shara,’ fanifo. Nãskaxõ ãfe tare ari ato nĩchini. <sup>3</sup> Askata rama xini keyaino tare ifo anã kakĩ õia plaza anoxõ ranãrito manaifono yonopaikakĩ tsõa ato yonomayamaino. <sup>4</sup> Askaifono tare ifãfe ato yoini: ‘¿Mãri ãfe tare ano yonopaimẽ nã ã ato kopifamis keskafakĩ ã mato kopifanõ?’ ato feito nikakata atiri fonifo yonoi fokani. <sup>5</sup> Askata tare ifo anã xini keya kaxõ õia ranãrito mananifo yonopaikakĩ. Nãskakẽ afori nĩchini ãfe tare ano. Askata mã xini kaino anã kaxõ õia ranãritori manaifono. Nãfori nĩchini yonotanõfo. <sup>6</sup> Askatari yãtapishtakõ plaza ano anã kaxõ õia nãnoa ranãri ato fichitoshini yonopaiyãifãfe. Nãskaxõ ato yõkani: ‘¿Afaa nonoxõ mã afeskafaimẽ yonokima?’ ato feito kemanifo, <sup>7</sup> ‘Tsõa noko yonomayamaino nõ iki,’ fanifo. Askafaifono ato yoini: ‘Mãri ãfe tare ano yonotakãfe,’ ato fani.

<sup>8</sup> “Nãskata mã fakishano nã tare ifãfe afe xanifo yoini iskafakĩ: ‘Ea yonoxonaifo ato kenafe ato kopifanõ. Nã rama ikiafo ato kopifakĩ taefafe. Askata nã iki taeafõ chipo ato kopifaxiki,’ fani. <sup>9</sup> Akka yãtapishtakõ ikikaxõ yonoafo nãfo ato kopifani nã pena fisti yonoafo kopifamis keskafakĩ. <sup>10</sup> Akka nã yonoi iki taeafãfe shinãnifo: ‘Nõ kori ichapa fira,’ ikaxõ, askafikaxõ nã fetsafãfe fiatiri finifo. <sup>11</sup> Nãskakẽ mã ato kopifaino, nã tare ifo mekafakakĩ yõachẽpenifo. <sup>12</sup> Iskafakĩ yoinifo: ‘Akka nã rama fẽkaxõ yonoafo mã ato kopifaa nã mã noko kopifaa keskafakĩ. Akka nõ xini pae meeyanã nõ yonoa nĩskayanã nã pena tii,’ fanifo. <sup>13</sup> Akka nã tare ifãfe fisti kemani: ‘Efe yorashta, ã mia chakafakĩ mekafaama. Akka mẽ mia kopifaa nã mã pena fisti yonoa. Nã pena fisti ã ato kopifamis tii ã mato kopifai ã mato faaki. Nã sharaki mã ea faaki,’ fani. <sup>14</sup> ‘Akka ã mia kopifanõ, nakã mã kori. Katãfe mã pexe ano. Akka nã rama ikikaxõ yonoafo nã ã mia inãi keskafakĩ atori ã inãi. <sup>15</sup> Nã ã inãpaiyai keska fakĩ ã ato inãtiro, ãfe korimãiyakẽ. Akka, ¿afeskai mã ekeki õitifishkikimẽ ã fetsafo inãsharaino?’ ixõ yoini. <sup>16</sup> Nãskarifikã Epa Niospa nã taefakĩ chanĩmara faafo ato inãi keskafakĩ nã rama chanĩmara faifo nãfori ato inãsharaxii. Akka Epa Niospa yora ichapa kena a ika ano fonõfo. Nãskakẽ Epa Niospa ato kenafiaito tsõa nikayamaito nã Ifofaafos ato ifixii,” ixõ Jesús ato yoini.

*Anã Jesús ato yoini: “Mã chaima ea retekanira,” ixõ  
(Mr. 10.32-34; Lc. 18.31-34)*

<sup>17</sup> Askata Jesús Jerusalén ari fãi kakĩ a aõxõ tãpimisfo kenaxõ ato yoini iskafakĩ: <sup>18</sup> “Ea nikakãfe. Mã mã õikai iskaratã Jerusalén ano nõ mãpei kaikai. Nãnoxõ ea achikaxõ ea ato inãkani, a Nios ato kifixomisãfe ãto xanĩfofo, askatari a Moisés yoikĩ kirika keneni keskara ato tãpimamisfo anori ea iyoxikani. Nãnoxõ, ‘Mã mã naikai,’ ixõ ea yoixikani kiki. <sup>19</sup> Nãskakaxõ yora fetsafo nõko kaifoma ea inãkani ea kamaketsayanã ea koshaketsakani. Nãskakaxõ ifi cruz ikaki ea mastakani. Akka ea askafafono tres nia oxata ã anã otoxii Epa Niospa ea otofaano,” ixõ ato yoini.

*Ãfa ãfe fake rafe Jesús yoixoni  
(Mr. 10.35-45)*

<sup>20</sup> Zebedeo fake rafe Juan fe Santiago ini. Nã rafe ãto afa fe Jesús ano fonifo. Mã Jesúski nokoxõ nã kãromã ratokonõ mai chachipakefõfãni Jesús afara shara yõkapaikĩ. <sup>21</sup> Askafaito Jesús yõkani: “¿Afaa mã fichipaimẽ ã mia axonõ?” feito, nã kãromã yoini: “Ifo, nã mã xanĩfo finakõia ikaitã ãfe fake raferi mefe xanĩfo inõfo ato xanĩfo imafe. Nã xanĩfãfe tsaoti ano mã tsaono ãfe fake rafe takairafe mefe ketaxamei tsaonõfo,” fani.

<sup>22</sup> Askafaito Jesús nã kãromã fake rafe yoini: “Mã tãpiama a mã ea yõkai keskara. ¿A ã omiskõixiai keskara mãri omiskõitromẽ?” Jesús ato feito kemanifo: “Eje, nõri tenetiro,” fanifo.

<sup>23</sup> Askafaifãfe Jesús ato yoini: “Chanĩma, mãri mã omiskõixii. Akka ãkai tsoa yoitiroma, ‘Efe ketaxamei tsaofe efe rafexii’ ixõ. Akka ãfe Epa Nios fistichi yoitiro. Nã Niospa ato katoafos nãfo afe ketaxamei tsaotirofo efe rafexikakĩ,” ixõ ato yoini.

<sup>24</sup> Nāskakē a aōxō tāpimis rafeta askafakī yōkaifāfe a aōxō tāpimisfo fetsafāferi nikakakī, “¿Afeskai oa iskai rafe mekakanimē?” ikaxō a rafe meepainifo. <sup>25</sup> Askaifono Jesús ato kenaxō ato yoini: “Mā mā tāpia yora fetsafāfe āto xanīfofo afe keskarafomākī. Nā xanīfāfe mitsisipakōixō ato yonomamis. A xanīfo fe rafeafāferi ato yoimisfo iskafakakī: ‘Nōri māto xanīfo. Nō mato yoiaito mā noko afara axorisafatiro,’ ixō fāsikōi ato yoimisfo. <sup>26</sup> Akka mā ranā askayamakāfe. Askatamaroko fatora fetsa mā xanīfo ipai ato yonoxomis keskara mā itiro. <sup>27</sup> Askatari fatora fetsari xanīfo ipaikī iskafakī shinātiro: ‘Ēkai afaama. Nāskakē ē fetsafo axosharapai. Nā apaiyaifo keskara ē ato axosharai,’ ixō shinātiro. <sup>28</sup> Akka ēri anori shināima, ēfe Epa Nios ariax ē nāmā ftoni feronāfakekōi ixiki, ē Niospa Fakefekē ea afara axonōfo ē onima. Askatamaroko fetsafo ē ato afara sharafaxoxiki ē oni. Ē atoōnoax naxiki ē oni Satanás chaka āto ifo inōma,” ixō Jesús ato yoini.

*Jesús yora fēxo rafekōi sharafani*  
(Mr. 10.46-52; Lc. 18.35-43)

<sup>29</sup> Askata Jericó anoax Jesús aōxō tāpimisfo fe kaino yorafā rasichi chīfafainifo. <sup>30</sup> Akka fai kesemē fēxokōi rafe tsaonifo. Nānoxō Jesús fāi kaito nikakaxō nā rafeta kenanifo iskafakakī: “Ifo, David fenapa, noko shināfe,” fāsikōi fanifo.

<sup>31</sup> Askafaifono nā yorafā rasichi ato iskafanifo: “Nōko Ifo fekaxtefayamakāfe,” ato faifono, akka nā fēxokōi rafe fāsikōi kenanifo: “Ifo, David fenapa, ¡noko shināfe!” fanifo.

<sup>32</sup> Askafaifono Jesús nēteakekafani. Ato kenaxō ato yōkani nā fēxokōi rafe: “¿Afaa mā fichipaimē ē mato axonō?” ixō ato yōkani.

<sup>33</sup> Ato askafaito kemanifo: “Ifo, nō fēro ōisharapaikōi,” fanifo. <sup>34</sup> Jesús ato shinākī āto fero mēeni. Āto fero mēeaino nā fēxokōi rafeta āto fēro ōirisafatanifo. Nāskakaxō Jesús chīfafainifo.

## 21

*Jesús nokoni Jerusalén ano*  
(Mr. 11.1-11; Lc. 19.28-40; Jn. 12.12-19)

<sup>1</sup> Nāskata mā Jerusalén chaima fokanax pexe rasi Betfagé ano nokonifo machi Olivos ano. Nānoxō Jesús a aōxō tāpimis rafe nīchini, <sup>2</sup> ato iskafayanā: “Mēstekōi fotakāfe oa ono pexe rasi ano. Nānoa burro nexekē mā fichi kaikai āfe fake fe nexekē. Nāskakē tēpexō ea efexotakāfe. <sup>3</sup> Anoxō yora fētsa mato yōkaito: ‘¿Afeskakī mā burro tēpeyoamē?’ mato faito, yoikī iskafakāfe: ‘Nōko Ifāfe fichipaiyaito nō ifixoniyoa. Akka samama nō mia nīchixoniyoi, fakāki,’ a aōxō tāpimis rafe fani.

<sup>4</sup> Nā Niospa meka yoimisto kirikaki kenekī yoini keskakōini Jesús. <sup>5</sup> Iskafakī keneni:

Pexe rasi Sión anoafō ato yoikāfe iskafakī: “Ōikapo. Māto xanīfokōi mā matoki oi kiki. Xanīfofiāx afama keskara oi kikī. Burro fake kamaki tsoa na feronāfakekai kakapaimisma,”

ixō Niospa meka yoimisto kirika keneni.

<sup>6</sup> Nā Jesúsxō tāpimisfāfe mā fōkaxō nā ato yoia keskara fanifo. <sup>7</sup> Nāskata burro fake yafi āfe afa iyonifo. Nāskaxō burro kate kamaki āto sama fanifo. Nāskakē Jesús a kamaki tsoinākakāni. <sup>8</sup> Yora ichapakōi inifo. Nāfāfe āto rapatifo kakafa fonifo fai nēxpakīa. Ranāritori epe pei xatekaxō kakafanifo. <sup>9</sup> Akka nā rekē foaifo fe a acho foaifo fāsikōi mekafonifo. Tai tai fokani. “¡Aicho! ¡Nōko xanīfo David āfe fena nokoki oi kiki! ¡Sharafinakōia nokoki oi kiki Niospa nīchiano nai mēraxō! ¡Nōko Ifo Nios sharafinakōia!” ikanax tai taifonifo.

<sup>10</sup> Nāskata Jesús Jerusalén ano kaito ōikani yorafo ratei fetsenifo ōiakefaikani. “¿Tsoamē na?” ikanax āa ranā yōināi fetsenifo. <sup>11</sup> Askaifāfe nā Jesús fe foafāfe ato kemanifo: “Nafi Jesúski Niospa meka ato yoimis. Nazarete anoa Galilea mai ano imis,” ixō ato yoinifo.



*Jesús a Nios kīfiti pexefā mēraxō a ato ināifo ato potani  
(Mr. 11.15-19; Lc. 19.45-48; Jn. 2.13-22)*

<sup>12</sup> Mā fotoax Nios kīfiti pexefā mēra Jesús ikitoshini. Ikikaixō ōia a mēraxō yorafāfe āto afama mīshtifo ato miniketsakani inifo kori fikani. Askafaifāfe ōikī Jesús ato pōtaketsani a ato afama mīshtifo miniaifo, a ato fīaifori potani. A kori fīanōnāifo anoari āto mīsa pōtakī ato nāpakaketsani. Askatari a ato rifi miniaifori āto tsaotifori ato pōtaketsani. <sup>13</sup> Askafata ato yoini iskafakī: “Niospa shināmanaino Isaías Niospa meka keneni iskafakī: ‘Mā ēfe pexefā mēraxō mā ea kīfitiro,’ ixō keneni. Akka nā yometsofāfe pexe keskara mā famis,” ixō Jesús ato yoini.

<sup>14</sup> Ato askafaino a Nios kīfiti pexefā ano fēxofo, chatofa Jesúski fenifo. Nāskakē anoxō Jesús ato sharafani. <sup>15</sup> Jesús askarafa ato sharafaino ōikani. Akka nā Nios ato kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe ōinifo afama mīshtifo Jesús akaito. Askatari fakefo Nios kīfiti pexefā mēranoaxri tai tai ikaifāfe nikanifo iskaifāfe, “¡Aicho! ¡Nā Jesús David āfe fena sharafinakōia!” ikaifāfe nikakani ōitifishkinifo.

<sup>16</sup> Nāskakakī Jesús yoinifo iskafakakī: “¿Oaiskai mī nikaimē yoiaifo keskara faifāfe?” Jesús ato kemani: “Ēje, mē nikai,” ato fani. “Akka a kirika keneano, ¿mā ōimismamē? Iskafakī kenenifo, Niospa ato shināmanaino:

    Fake yomēfāfe mia fanākani, mī ato fanāimaino,  
ixō kenenifo,” Jesús ato fani.

<sup>17</sup> Askafakī ato yoita ato makinoax kani pexe rasi ano Betania ano. Nāno oxafistishini.

*“Fana higuera, mī anā fimiyanakama,” Jesús fani  
(Mr. 11.12-14, 20-26)*

<sup>18</sup> Mā penano Jerusalén ano anā okī Jesús meea fonāikōini. <sup>19</sup> Mā anā kakī Jesús ōini a fana higuera fai kesemē nikē. Nāskakē akiki kaxō āfe fimi fenani pipaikī. Akka fimiya inima, āfe pei fisti ini. Nāskakē yoikī iskafani: “Anā mī fimiyanakamaki,” faino koshikōi nā higuera xanarisatani.

<sup>20</sup> Askaito ōikakī aōxō tāpimisfāfe yōkanifo: “Kee, ¿afeskai na ifi xanarisatanimē?” ikaxō, <sup>21</sup> yōkaifono Jesús ato kemani: “Ē mato pāraima mā ea nikakōixō māri atiro na ē ifi higuera xanafaa keskafakī. Nāskarifikī na machiri mā yoitiro iskafakī: ‘Nonoax tsekekainax fakafā mēra paketāfe,’ mā faino fakafā mēra paketiro. <sup>22</sup> Mā Epa Nios chanīmara fakōixō mā afara kīfaiato mato inātiro,” ixō ato Jesús yoini.

*“¿Tsōa mia nīchinimē mī xanīfo inō?” ixō Jesús yōkanifo anoxō achipaikakī  
(Mr. 11.27-33; Lc. 20.1-8)*

<sup>23</sup> Ato askafata Nios kīfiti pexefā mēra ikikaini. Nā Nios kīfiti pexefā mēraxō ato tāpimanaino, nā ato Nios kīfixomisfāfe āto xanīfofo fe judeo anifofo fonifo. Akiki fōkaxō yōkanifo iskafakakī: “¿Tsōa mia nīchinimē? ¿Tsōa mia yoiamē mī iskafanō?” ixō yōkanifo.

<sup>24-25</sup> Askafaifono Jesús ato kemani: “Ēri mato yōkanō. Ea yoikapo ē nikanō. ¿Tsōa Juan nīchinimē ato maotisafakī ato faka mēra ikimapakenō? Niospa nīchiyamakī yorafāfe nīchiniforaka. Akka mā ea kemaito, ēri mato yoikai tsōaōxō ē iskafaimākai.”

Ato askafaino, āa ranā mēenāpai fetsayanā. Shinānifo iskakakī: “Niospa Juan nīchini nō faito noko yoikī iskafatiro: ‘¿Akka afeskakī mā Juan nikamismamē?’ noko fatiroki,” ikanax yoinānifo. <sup>26</sup> “Akka nō iskafatiroma: ‘Yorafāfe Juan nīchinifo,’ nō fatiroma. Nō yorafoki mesei keyokōichi shinākani Niospa shināmanaino Juan ato yoipaoni,” ikanax xanīfofo yoinānifo.

<sup>27</sup> Nāskakaxō Jesús yoinifo iskafakakī: “Nō tāpiama,” faifono Jesúsri ato kemani iskafakī: “Ēri mato yoima tsōa ea nīchinimākī ē iskafanō,” Jesús ato fani.

*Meka fetsafaxō feronāfake rafeōnoa Jesús ato yoini*

<sup>28</sup> Jesús ato yoini: “Meka fetsafaxõ ã mato yoinõ. Feronãfake fisti fake naetapa rafeya ini. Nãskaxõ ãfe fake iyoa yoini: ‘Èfe tare ano kaxõ ea yonoxotãfe,’ fani. <sup>29</sup> Askafaito ãfe fãke kemani: ‘È kapaima,’ fani. Askafiax mã shinãx kani.

<sup>30</sup> “Askata ãfe fake chipokori yoini iskafakĩ: ‘Mĩri kaxõ ãfe tare ano ea yonoxotãfe,’ fani. Askafaito nãato kemani iskafakĩ: ‘Ia, epa. È yonotanõkĩ,’ fafiax kanima. <sup>31</sup> Akka, ¿fatoto a ãfe ãpa fichipaiyai keskafakĩ axonimẽ?” ato faito, “Iyoato axoni,” fanifo. Nãskaxõ Jesús ato yoini: “È mato pãraima. Nã xanĩfo kori fĩxomisfo fe, nã kẽro chotaferomafo ãto chaka xatekanax mã Epa Nios Ifofakõikani. Akka mã afaa afeskafaxoma mã Epa Nios Ifofaama. <sup>32</sup> Akka Juan ato maotisafamis oni ato tãpimaxiki afeskax mã itiomãki, Niospa fichipai keskara. Akka mãkai Juan nikamisma. Akka nã xanĩfo kori fĩxomisfo feta nã kẽro chotaferomafãfe nikakõinifo. Akka mãto chaka mã xateama mã afara fetsafo shinãmis,” ixõ Jesús ato yoini.

*Meka fetsafaxõ Jesús ato yoini a ato yonoxomis chakafoõnoa  
(Mr. 12.1-12; Lc. 20.9-19)*

<sup>33</sup> Anã Jesús ato yoini iskafakĩ: “Ea nikakapo ã mato meka fetsafaxõ yoinõ. Tare ifãfe ãfe tare ano uva fanani. Fanaxõ akiki keneakeni. Nãskaxõ mai põkini a mẽraxõ uva tsinĩxiki. Askatari pexe keya fani anoxõ kexexiki tsõa mẽeyamanõ. Mã askafakĩ fetsaxõ ato inãni nã uva tare kexenõfo. Nãskata mai fetsa ari kani. <sup>34</sup> Akka nã fimimistĩa mã ãfe fanafo pachiano, a yonoxomisfo nĩchini a kexexonafo ato yõkaxõ nã ãfenã tiiri fixotanõfo. <sup>35</sup> Akka nã tare kexexonafãfe a xanĩfo yonoxomis achikaxõ fisti seteketsanifo. Askatari fetsari retenifo. Askatari fetsari tokirinĩ tsakaketsanifo. <sup>36</sup> Nãskakẽ tare ifãfe anã ãfe inafõ ichapakõĩ nĩchini. Mã foafono nã tare kexemisfãfe ato askari fanifo.

<sup>37</sup> “Mã ato askafapaxõ ãfe fakekõĩ nĩchini aõnoa shinãchakatama, ‘Èfe fake nikatirofokĩ,’ ixõ. <sup>38</sup> Akka mã ãfe fake kaito fichikanax nã tare kexemisfo aa ranã yoinãnifo: ‘Nato ãfe apa naano na fanafo fixii kiki. A nari retekape na ãfe fanafo nõkonã inõ,’ inifo. <sup>39</sup> Nãskakata achinifo. Mã achikaxõ tare pasotai iyokaxõ retenifo. <sup>40</sup> Akka, ¿mã tare ifo oxõ a tare kexemisfo ato afeskafatiromẽ?” ixõ Jesús ato yõkani.

<sup>41</sup> Ato askafaito kemanifo: “Ato retetiro ato noitama yora chakafokẽ. Nãskaxõ tare ifãfe yora fetsafo ãfe tare inãtiro, nãfãfe inãnõfo nã ãfenã tiiri mã ãfe fana fimifo pachiano,” ixõ yoinifo.

<sup>42</sup> Nãskata Jesús ato yoini meka fetsafaxõ: “¿Na kirika kenea anoa mã anemismamẽ? Iskafakĩ kenenifo:

Tokiri pexe fapaikakĩ nã pexe famisfãfe na tokiri chakara ixõ potafiafono, fetsafãfe fichikaxõ na tokiri sharakõĩ ikaxõ akiki pexe fatirofo. Nãskarifiakĩ xanĩfofãfe, ‘Nakai afama,’ ikaxõ Niospa Fake õikaspamisfo. Askafafiafono Niospa ãfe Fake katonĩ nõko Ifo inõ. Nãskakẽ nõ akiki inimakõĩ, ixõ kirika ano kenenifo,” Jesús ato fani.

<sup>43</sup> “Nãskakẽ ã mato yoi, taeyoi Nios fe rafexõ ãfe meka mã ato yoiyomis. Askafixõ mã ea nikakaspai. Nãskakẽ Epa Niospa fetsafo yoi ãfe meka ato tãpimanõfo afeska faxõ Nios Ifo sharakõĩfatiromakĩ. <sup>44</sup> Akka tokiriki fetsa pakeki aõ xao teketiro. Akka tokiri yoraki pakekĩ yamakõĩ fatatiro. Nãskarifiakĩ ã Niospa Fakekõixõ a ea nikakaspafono ã ato omiskõimaxii,” ixõ Jesús ato yoini.

<sup>45</sup> Akka nã Nios ato kĩfixomisfo ãto xanĩfofo feta fariseofãfe nikanifo Jesús meka fetsafaxõ ato yoiato. Nãskakaxõ tãpinifo Jesús atoõnoa yoiato. <sup>46</sup> Nãskakaxõ achipainifo. Akka achipaifikani mesenifo yorafãfemãĩ chanĩmara faifono Jesús Niospa meka ato yoiimiskẽ. Nãskakẽ achinifoma achipaifikakĩ.

## 22

*Meka fetsafaxō Jesús ato yoini a feronāfake āfiyaino inimayanā piaifoōnoa yoikī*  
(Lc. 14.15-24)

<sup>1</sup> Anā Jesús meka fetsafaxō ato yoini iskafakī: <sup>2</sup> “A Epa Nios xanīfo ika ano iskaraki ē mato yoinō. Nikakāfe. Nā xanīfāfe āfe fake āfi fiaino fista axoxiki. <sup>3</sup> Akka xanīfāfe a yonoxomisfo nīchini ato yoitanōfo fenōfo. Akka mā fōkaxō ato yoiaino fekaspanifo. <sup>4</sup> Nāskaxō anā a yonoxomis fetsafo nīchini ato iskafayanā: ‘Ato yoikī iskafatakāfe: “Mā xanīfāfe āfe fāke āfiyaino mā itipinīsharakōi faa pixiki. Āfe fakka efapa mā ato retemana. Askatari fakka fake xoakōiari ato retemana. Mā keyokōi itipinīsharafakī, kookāfe pixikakī,” ’ ato fani. <sup>5</sup> Akka ato askafaino ato fe fekaspanifo. Fetsa āfe tare ari kani. Fetsari kani āfe afama mīshti minikai. <sup>6</sup> Atirifāfe nā xanīfāfe inafō ato achikaxō ato seteketsayanā ato retenifo. <sup>7</sup> Nāskakē xanīfo ōitifishkifinakōini. Nāskaxō āfe sorarōfo nīchini a retemitsamisfo ato reteyanā āto pexefori ato kōakī mītōkakōitanōfo. <sup>8</sup> Nāskaxō xanīfāfe a yonoxomis fetsafo yoini ato iskafakī: ‘Mē itipinīshara faa ēfe fāke āfiyaino pixiki. Akka nā chakafo ē ato kenamanafo fekaspanōiafokī. <sup>9</sup> Akka māri fotakāfe nā pexe rasi ano. Nāria ato fichixō nā mā ōiaifo ato yoikāfe fenōfo pii fenōfo, ēfe fāke āfiyaino,’ ixō ato yoini. <sup>10</sup> Nāskakē a yonoxomisfo fai fētsa fonifo. Mā fōkaxō yora ichapafo fichikaxō ato efenifo. Yora sharafo efeta yora chakafori efenifo. Nāskakē xanīfāfe āfe fāke āfiyaino yorafo pexe fospikōinifo.

<sup>11</sup> “Nāskakē xanīfo pexe mēra ikikaini yorafo feaito itipinīsharafaxō ato rapati sharakōi ato ināketsani safenōfo āfe fāke fista akaino. Xanīfo ikikaini ato ōikai mā sharakōi safeketsafomakī. Akka fistichi rapati shara safea inima, chapokōi safea fichini. <sup>12</sup> Akka a rapati shara safeama fichixō yoini: ‘¿Afeskakī mī rapati sharakōi safeax mī oamamē ēfe fāke āfiyafaino?’ Askafaino nā feronāfake tooxinima. <sup>13</sup> Nāskaxō xanīfāfe a yonoxomisfo yoini: ‘Na feronāfake otekere ata metexkeraxō fakishifā mēra potakāfe, anoax omiskōipakexanō eaiyanā,’ ixō ato yoini. <sup>14</sup> Nāskarifiāi Epa Niospa yora ichapa kenai a ika ano fenōfo nā āfe Fake Ifofo tii afe ipanakafo,” ixō Jesús ato yoini.

*“¿Xanīfo nō kori inātiromē noko yōkaito?” ixō Jesús yōkanifo*  
(Mr. 12.13-17; Lc. 20.20-26)

<sup>15</sup> Nāskata mā Jesús ato yoiāito nikakata mā fokanax fariseofo yoinānifo: “¿Afeskaxō nō Jesús afara chaka yoimatiromē? Afara chaka noko yoiāito nō yōaxiki,” ikanax yoinānifo. <sup>16</sup> Nāskafakata āto inafō nīchinifo, Herodes āfe inafōya iskafakī yoitanōfo: “Maestro, mā nō tāpia mī chanīmakōi yoimis. Nā Epa Niospa noko shināmapaiyai keskarakōi mī noko yoimis yorafāfe mīōnoa afara chaka yoiāifono. Afara mī yoipai mī ranomisma. Keyokōi nāskarafos mī ato yoimis. <sup>17</sup> Nāskakē noko tāpimasharafe. Akka chanīmamakī noko yoife na romanō xanīfo nō kopifatiromakī askayamakī nō kopifatiroma rakikā,” fanifo. Jesús chakafamapaikakī askafanifo.

<sup>18</sup> Askafaiāfe ōikī Jesús tāpini feparapaiāifāfe. Ato yoini: “Feparamisfāfe, ¿afara chaka mā ea yoimapaīmē eōnoa afara chaka yoipaikī? <sup>19</sup> Akka māto kori exe ea ispakāfe a aō mā xanīfo kopifamis,” ato fani. Ato askafaito kori exe fisti fōxonifo. <sup>20</sup> Nāskaxō Jesús ato yōkani: “¿Tsōa femānā na keskaramē? ¿Tsōa aneri na kori exe ano keneamē?” ixō ato yōkaito, <sup>21</sup> kemanifo iskafakakī: “Nōko xanīfo César keskara,” fanifo. Nāskakē Jesús ato yoini: “Akka na kori exe Césarnākē César inākāfe, akka Niosnākē Niosri inākāfe,” ixō Jesús ato yoini.

<sup>22</sup> Ato askafaito nikakani, ratekōiyanā. “Kee. Āfe mekakai tsōa finōtiroma,” ikanax a makinoax fonifo ōifaikani.

*“¿Yora naax anā otoax afeskatiromē?” ixō Jesús yōkanifo*  
(Mr. 12.18-27; Lc. 20.27-40)

<sup>23</sup> Nāskatari afia pena fisti saduceofo fenifo Jesús õifekani. Nā saduceofāfe yoimisfo iskafakakī: “Yora naaxkai anā afeskax ototiroma,” ixõ shināmisfo. Nāskakaxõ Jesús yõkai fekani fenifo iskafakakī: <sup>24</sup> “Maestro, Moisés yoini iskafakī: ‘Feronāfake naano āfe āfi feta fake akamax, one fētsa nā kēro fitiro, āfe āfi inõ. Mā fixõ afeta fake atiro āfe õchi fake inõ,’ ixõ Moisés noko yoikī keneni. <sup>25</sup> Akka nõ mia yoikī taefanõ. Noko nikafe chipo noko yoixiki. Akka nā nane tii siete inifo, feronāfake. Āto ochi iyoa āfiyai taeni. Mā āfiyax afeta fake akamax nani. Mā āfe ochi naano chipokoto fini. <sup>26</sup> Nāskarifiyai nā chipokori nani afeta fake akamax. Nāskatari chipoko fētsari fini, nāri nani afeta fake akamax. Nāskakanax akikinoax nai keyonifo afeta fake akanamax. <sup>27</sup> Nāskata mā nai keyoafono nā kērori chipo nani. <sup>28</sup> Akka, ¿a yorafo mā otokaxõ nai mēraxõ, fatoto nā kēro fixiimē, nā fistimāi fīpakaxõ?” ixõ yõkanifo.

<sup>29</sup> Askafaifono Jesús ato kemani: “Mā kai afaa tāpiama. Nā kirika ano Niospa meka yoikī kenenifokai mā tāpiama. Nāskaxori Niospa akai keskara āfe sharaõxõ ari mā tāpiama. Na mā ea fanīrira yoiai,” ato fani. <sup>30</sup> “Akka yorafo nakanax anā otokanax anā āfiyatirofoma. Kērofori anā feneyatirofoma. Nāskakanax ājirifo keskara itirofo nai mēranoax. <sup>31</sup> Akka, ¿a yorafo naax otokiaifo Niospa yoini keskara, a kirika keneano mā õimismamē? <sup>32</sup> Iskafakī Niospa yoini: ‘Ēfi mī xinifāfe āto Nioskõiki, Abraham ikaino Isaaca ikaino Jacobo ikaino,’ ixõ Niospa yoini. Akka yorafo mā nafiafono naafoma keskara Epa Niospa ato õimis. Niospa yoini iskafakī: ‘Ēkīa āto Nioskõi,’ ixõ Niospa yoini.” Nāskara Jesús keyokõi ato yoini.

<sup>33</sup> Saduceofāfe nikanifo Jesús ato askafaito, “¡Aira! ¡Nikakapo! Jesús sharakõi yoi,” ikanax yoinānifo.

*“Akka, ¿fato meka sharafinakõiamē, nā Niospa shināmanaino Moisés ato yoiniraka? ikaxõ fariseofāfe Jesús yõkanifo*

*(Mr. 12.28-34)*

<sup>34</sup> Nāskakē saduceofo Jesús ato meka xatemanaito nikakaxõ fariseofo ichanākanax Jesús ano fenifo. <sup>35</sup> Akka feronāfake fisti a Moisés yoikī kirika keneni keskara ato tāpimamis ini. Nāato Jesús fanīrira kemamapaikī yõkani, <sup>36</sup> “Maestro, ¿fato meka sharafinakõiamē, nā Niospa shināmanaino Moisés keneniraka sharafinakõia?” faito,

<sup>37-38</sup> Jesús yoini iskafakī: “Moisés yoikī taefani iskafakī: ‘Nõko Ifo Nios noikõikāfe nõko õitifoyaxõ, nõko māpori shināsharakõita, nõko yõshi sharafoyaxori.’ Nā mekafi sharafinakõiakī nā Moisés yoini keskara. <sup>39</sup> Nāskatari nā ě mato taefakī yoia keskarakõiri nāno fetsari, a mia chaima nikari noisharafe a mīa mī noimeai keskafakī ixõ Moisés keneni. <sup>40</sup> Moisés noko yoini keskai afeskax nõ shara itiomāki. Askatari a Niospa meka yoimisfāfe yoinifo keskai afeskaxri nõ askatiromakī. Akka nõ askasharapai nā meka rafe nikakõisharax nõ askasharakõitiro,” ixõ Jesús ato yoini.

*“Akka, ¿tsõa fenamē Cristo?” ixõ Jesús ato yõkani*

*(Mr. 12.35-37; Lc. 20.41-44)*

<sup>41</sup> Fariseofo afe ichanāyoafono, <sup>42</sup> Jesús ato yõkani: “Akka, ¿nā Niospa katoa nā Cristoõnoa, afaa mā shināimē? ¿Tsõa fenamē?” ato faito kemanifo: “David āfe fenakīa,” fanifo. <sup>43</sup> Nāskata Jesús ato yoini: “David Niospa Yõshi Sharapa shināmanaino nõko Ifo Cristoõnoa kirikaki keneni iskafakī Cristo oyoamano. Ē mato yoinõ mā shinākõinõ:

<sup>44</sup> Epa Niospa ěfe Ifo yoini iskafakī: ‘Mī efe xanīfokõi ĩpanakaki. Akka nā mia noikaspaifo mī ato finõkõinõ ě ato mīnāmā nīchikai,’ ixõ Epa Niospa yoinino David kirika keneni.

<sup>45</sup> “Akka, ¿afeskai Cristo David āfe fena itiomē, nā David Cristo ěfe Ifora fafiapaonino?” Jesús ato fani.

<sup>46</sup> Ato askafaino nikakakī tsõakai pishta kemanima. Nāskakē akiki ranokakī anā tsõa afaa pishta yõkanima.

## 23

*Jesús ato yōani fariseofoya a Moisés yoini keskara ato tāpimamisfo  
(Mr. 12.38-40; Lc. 11.37-54; 20.45-47)*

<sup>1</sup> Mā askafata Jesús yorafo yoini aōxō tāpimisfoya: <sup>2</sup> “A Moisés yoikī kirika keneni keskara ato tāpimamisfo feta fariseofāfe a Moisés yoini keskara mato tāpimakani. <sup>3</sup> Akka ato nikakāfe. Nā mato yoiaifo keskara akāfe. Akka nāfāfe nā yoiaifo keskara akanima. Nāskakē nā yoiaifo keskara akātama afara fetsafo amisfo. Nāskakē mări ato keskara iyamakāfe. <sup>4</sup> Āto patoronō ato yoitiro iskafakī: ‘Na efekōi pefexō fōtakāfe,’ ato fafiāxō ēri foyoikanō ato fatiroma. Nāskarifiakī a Moisés keneni ato tāpimamisfo feta fariseofāfe mato afara fekaxkōi yoimisfo afeskax Epa Nios fe mā itirōmākī Epa Nios matoki inimanō ikaxō. Nāskafikaxō mato afara axosharamisfoma. <sup>5</sup> Afama mīshti sharafo apaikani yorafāfe noko ōinōfora ikaxō kakapaiyanā. Niospa meka kirikaki kenekata koiro kafo pishta fakāta a mēra Niospa meka nanekaxō āto fishpi ano nētamisfo. Askatari āto pōya anori nētamisfo. Askatari tari kepanātia chainipa safemisfo sharakōira noko fanōfo ikaxō. <sup>6</sup> Askatari sharakōi anoxō pipaimisfo, askatari tsaoti sharakōi anori tsaopaimisfo ichanāti pexe anoax, keyokōichi noko ōinōfora ikanax. <sup>7</sup> Nāskakata nā yora ichapa rasi ano fopaikani noko finōkakī noko yoisharakakī, ‘Maestro noko fanōfora,’ ikanax.

<sup>8</sup> “Akka mā, ‘Maestro, noko fakāfe,’ ato fayamakāfe. Akka keyokōi mā yora fisti keskara. Tsoa fetsakai finama. Akka māto Maestro fisti finakōiaki. <sup>9</sup> Nāskakē iskaratīa nono mai anoxō tsoa Ēpa fayamakāfe. Akka nōko Epa Nioskōi nai mēra ikaki. Nā fisti Epa nō fatiroki. <sup>10</sup> Askatari tsoa ifofayamakāfe. Akka nā Epa Niospa katoni fisti na Cristo fisti mā Ifofatiro. <sup>11</sup> Nā fatora fetsa xanīfo ipai nā ato yonoxomis keskara itiro. Nāskaxō ato afara axosharatiro. <sup>12</sup> Akka fatora fētsa ato finōpaiyaito a keskara Niospa ato nāmā nīchitiro anā afaa inōma. Akka a shināi iskai: ‘Ēkai afama, ē fetsafo finōpaima, ē ato keskarama,’ ixō shināito Niospa fetsafo finōmainīfofā sharakōi nīchitiro,” ixō Jesús ato yoini.

<sup>13</sup> Nāskata Jesús a Moisés yoikī kirika keneni keskara ato tāpimamisfoya fariseofo yoini iskafakī: “Moisés meka ato tāpimamisfāfe, mări fariseofāfe ea nikasharakāfe. Māfi ato pārapaimiski. Mākai a mā yoia keskara mā ato yoimisma. Mā ato xītimis Epa Nios Ifofayamanōfo. Mări mā Nios Ifofamisma. Nā Nios Ifofapaiyaifo mā ato xītimis. ¡Ooa! Epa Niospa mato fāsi omiskōimaxii.

<sup>14</sup> “¡Ooa! Mā omiskōikai, Moisés meka ato tāpimamisfāfe fariseofo fe. Mā ato yoimiski iskafakī: ‘Nō mato afara shara faxōira,’ ixō mā ato pāramis. Akka kēro ifomafa mā pāraxō mā pexe fīamis. Nāskaxō mā Nios kīfikī mā chaikōi kīfimis yorafāfe sharakōi shinānōfora ixō. Nāskakē Epa Niospa mato fāsi omiskōimaxii.

<sup>15</sup> “¡Ooa, a Moisés yoikī kirika keneni keskara ato tāpimamisfāfe, mā omiskōixii fariseofo fe! Akka mā judeofoma ari kafāsamis ato yoikai noko keskara inōfora ikax, nō mato Niospa meka tāpimanōra ixō. Askafixō mā ato yoisharamisma. Nāskakē mato nikakanax mato keskarari ikani kiki. Mā chakakōifo nāfori chakafinakōia ikani kiki. Nāskakē mā nakanax Epa Nios ari foxikani. Mato fe nā omiskōipakenakafo mēra foxikani.

<sup>16</sup> “¡Ooa! Niospa mato omiskōimaxii, mā ato mēstekōi yoimiskēma. Mā tāpiamafixō mā ato paramiski ato tāpimapaikī. Mā fēxo keskarakī fēxo afe fēxo iyoikai nā rafe fenotirofo. Nāskarifiakī Niospa meka anoriyamafiano mā ato paramiski iskafakī mā ato yoikī: ‘Ē mato paraima. Nāskakē ē mato yoi, nā ē mato yoiyoa keskara ē ayamaito Nios kīfiti pexefānē ea omiskōimatiro,’ mā imis. ‘Akka nā Nios kīfiti pexefā aneōxō mā yoiyoa keskafakī mā ato axoyamaxō shināchakayamakāfe. Askafixō nā Nios kīfiti pexefā mēranao oro aneōxō mā ato yoiyoa keskafakī ato axokāfe,’ ixō mā ato yoimis. <sup>17</sup> Mā tatimakōifo, askatari mā fēxo keskarakōifo. Akka, ¿fato sharafinakōiamē? Nā Nios kīfiti pexefā

měranoa oro raka sharafinakōia, askayamai Nios kīfiti pexefā raka sharafinakōia. Akka oro ares rakax shara itiro. Akka Nios kīfiti pexefā mēramāi rakax shara itiro.

<sup>18</sup> “Nāskarifiakī, ‘Nā ě mato yoioa keskara ě ayamaito nā a kamakixō yoinā koati mīsamāfānē ea omiskōimatiro,’ ixō yoimisfo. Akka mā fariseofāfe, anorima mā ato yoikī iskafamis: ‘Nā mīsamāfā aneōxō mā ato yoioyomis keskafakī mā ato axoyamafixō shināchakayamakāfe. Askatari nā mīsamāfā kamakixō yoinā koaki nā yoinā aneōxō mā ato yoioyomis keskara akāfe,’ ixō mā ato yoimis.

<sup>19</sup> “Akka mā fēxo keskarakōi. Akka, ĵfato sharafinakōiamē? Nā afarafo mā Nios ināi raka sharafinakōia, askayamai a kamakixō yoinā koati mīsamāfā raka sharafinakōia. Akka nā yoinā ina ares shara itiro. Askafīax nā shara, māmāi mā Nios ināno mīsamāfā anoxō koakī. Nāskakē nā yoinā inapa nā koati mīsamāfā finōama. <sup>20</sup> Akka nā koati mīsamāfā aneōxō afara yoiaito nā koati mīsafā fistiōnoa aneima. Akka nā mīsamāfā kamaki rakaōnoari yoi. <sup>21</sup> Akka nā Nios kīfiti pexefā aneōxō afara yoikī Nios kīfiti pexefā fistiōnoa yoima. Akka Niosri a mēra ikano mā yoi. <sup>22</sup> Akka nā nai aneōxori mā afara yoikī, nai fistiōnoa mā yoima. Nā Nios Xanīfo nai mēra ika anoafori mā yoi.

<sup>23</sup> “ĵOoa, a Moisés yoikī kirika keneni keskara ato tāpimamisfāfe fariseofo feta! Ea nikakapo. Māfi ato parapaimiski. Māto afama mīshtifo mā Nios ināpaifikī a Niospa afara fetsa yoia keskara mā shināmisma. Mā māto fana mīshtifo nā korātorofo fana fetsa mīshtifori mā Nios ināmis. Akka fetsafo mā ato yonomaxō afara fichipaifiaifāfe mā ato noikima mā ato afaa ināmisma. Epa Niospa yoini keskafakī mā ato noima. Akka a mā yoiai keskara tsōa māto meka chanīmara fatiroma. Nāskaxō māto fana mīshtifo mā Nios ināfikī a Niospa yoia keskara mā shināima. <sup>24</sup> Akka mā nā fēxo afe fēxo iyotiroma keskarafō. Nāskarifiakī māri mēstekōi shināsharaima yorafo Niospa meka tāpimapaifikī. Nāskaxō afara sharakōifo mā ato tāpimasharamisma. Akka afara sharama mā ato tāpimamis. Akka nāpe pishta māto kecho mēra naneano, mā fixō mā potamiski. Akka nā camello efaapakōi mā potakaspakī mā ayamis.

<sup>25</sup> “ĵOoa, a Moisés yoikī kirika keneni keskara ato tāpimamisfāfe fariseofo feta! Mā ato parapaimiskōi. Akka māto kecho yafi māto sapa femākīa fisti chokasharafikī, oke mērakai mā chokasharamisma, nachoshtax pisikōi itiro. Nāskarifiakī mā yorafo ōimapai nafo sharafora noko fanōfora ixō. Akka māto shinā mēraxō mā shara shināyamafikī, oa choshta pisi keskaraxō. Nāskaxō afarafo mā ato fīamis fetsafo ratexō. Askatari mareskōi mā shinākī, ichapakōi fichipaikī mā icha icha famis. Nāskakē Epa Niospa mato omiskōimakōixii. <sup>26</sup> Fariseofāfe, mākai mēstekōi shināsharamisma. Akka iskaratīa māto shinā mēraxō shināsharakāfe, isharakōixikakī. Anā afaa chaka shinākakima. Nāskaxō mā yorafo ĩkisharakōitiroki.

<sup>27</sup> “ĵOoa, a Moisés yoikī kirika keneni keskara ato tāpimamisfāfe, fariseofo feta! Māfi ato parapaimiski. Māfi nā mafa kini keskaraki. Akka mafa kini femākīa oxo sharakōi nō ōifiaino oke mēra sharama. A namisfāfe āto xafo fospikōia pisia fetsa fetsatapafo. <sup>28</sup> Nāskarari shara keskara yorafāfe mato ōikani. Akka māto shinā mēraxō mā shara shināima. Afara chakakōifo mā shināmisa, ato mā parakōimis.

<sup>29</sup> “ĵOoa, a Moisés yoikī kirika keneni keskara ato tāpimamisfāfe, fariseofo feta! Mā ato parapaimis. Nāskakē Niospa mato omiskōimakī finakōixii. Nā māto xinifo a Niospa meka yoimisfo fetsafāfe ato retenifo mairafo ano mā tokiri famis a māto xinifo namisfo ato shināxikī. Nāskaxori a mairafo mânăo charofori mā famis yorafāfe ōikakī na mēra sharakōira fanōfora ixō. <sup>30</sup> Nāskaxō mā yoimis iskafakī: ‘Nōko xinifāfe a Niospa meka ato yoimisfo retenifo keskafakī nōri niyoxō nō ato retekeraanima,’ ixō mā yoimis. <sup>31</sup> Akka nā mā yoiai keskara chanīma. Māto xinifāfe ato chakafakī ato retenifo. Māri ato keskarakōifo. <sup>32</sup> Nā Niospa matoki nīchiari mā retexii. Akka nā mā apaiyai keskafakī ayotakāfe.

<sup>33</sup> “Mā afara chakafa fafafaīni. Nāskakē mā rono keskarrafo. Mā chakafa fafafaīni. Mā rono paekapato fake keskarakōifo. Nāskakē mā omiskōipakenakafo mēra mā kaxii. Akka afeskax mā faki ichotiroma. Askatari tsōakai mato nētefatiroma. <sup>34</sup> Nāskakē a Niospa meka yoimis ē matoki nīchikai. Askatari a Niospa meka tāpisharakōixō shināsharakōimisno ē nīchikai. Nāskatari a Moisés yoikī kirika keneni keskara ato tāpimamisfori ē matoki nīchixii. Nāskakē atiri mā ato retexii. Askatari fetsafori ifi cruz ikaki mā ato mastaxii nanōfo. Askatari fetsafori mato ichanāti pexe mēraxō mā ato koshaxii. Nāskakī mā ato omiskōimakōixii. Nāskaxori fetsafori mā ato chīfafofāsa faxii ato omiskōimayanā. <sup>35</sup> Nāskakē Epa Niospa matori omiskōimaxii nā mato xinifāfe nā yora sharafo retenifono. Akka taefakī nā Abel sharafiano āfe ōchi reteni. Askatari fetsafori sharafiafono ato retenifo. Chipori mā xini ichapa finōano nā Zacarías, Berequías fake, mato xinifāfe retenifo. Nā Zacarías feronāfake sharafiano Nios kīfiti pexefā chaimashtaxō koati mīsamāfā nakirafexō retenifo. Nāskakē Niospa atoōxō mato omiskōimaki finakōixii. <sup>36</sup> Akka chanīma ē mato yoinō. Na yorafo iskaratīa niyoafo Niospa ato omiskōimaki finakōixii,” ixō Jesús ato yoini.

*Jesús Jerusalén anoafo ato shināi oiani  
(Lc. 13.34-35)*

<sup>37</sup> Anā Jesús ato yoini iskafakī: “¡Ooa, Jerusalén ano ikafāfe! Māfi a Niospa meka yoimisfo mā ato retemiski. Askatari aōnoa āfe meka shara yoitanōfo Niospa mato ano nīchiafori mā ato tokorinī tsakakī retemis. Oa takaranā āfe fakefo āfe pei nāmā onetiro keskafakī ē mato kexepaifiaito mā ea nikakaspamis. Māfi ekeki omismakī ē mato īkipanā. <sup>38</sup> Akka ōikapo, iskaratīa anā tsōa mato kexeima nā mā imis ano. <sup>39</sup> Ē mato yoinō, iskaratīakai mā ea anā ōima. Nā ē oaitīa mā ea ōixii. Nā ē nai mēranoax ē oaitīa mā yoikī iskafaxii: ‘Nafi Niospa nokoki nīchia. Fāsi sharafinakōia Epa Niospa na shara fapanaka,’ ixō mā eōnoa yoixii,” ixō Jesús ato yoini.

## 24

*Jesús ato yoini: “Na Nios kīfiti pexefā pāoixii,” ixō  
(Mr. 13.1-2; Lc. 21.5-6)*

<sup>1</sup> Nāskata Jesús Nios kīfiti pexefā mēranoax tsekekainaino, aōxō tāpimisfo akiki fēkaxō yoinifo iskafakakī: “Ifo, ōipo. Nōko Nios kīfiti pexefā sharakōi,” fanifo. <sup>2</sup> Askafaifono Jesús ato yoini: “Na mā ōiai, akka ē mato pāraima anākai tokirifo petsanāmēxima, keyokōi pāoixii. Na tokirifori maoui fetsexii,” ato fani.

*Afaa afeskaximāikai mā chaima nōko mai keyoaino Jesús ato yoini  
(Mr. 13.3-23; Lc. 21.7-24; 17.22-24)*

<sup>3</sup> Askata fonifo māchifā Olivos ano. Nāno Jesús tsaoni. Nāskakē aōxō tāpimisfo akiki fonifo yōkaxikakī iskafakakī: “Nō tāpipai mī noko yoinō afetīa iximē a mī yoiai keskai. Afeskaxō nō tāpitiromē a mī anā oxiai mā mai keyoaino noko yoife,” fanifo.

<sup>4</sup> Askafaifono Jesús ato kemani: “Kexemesharakani mā ato nikaino mato afara chakafamatirofoki. <sup>5</sup> Yora ichapa fēkaxō, ‘Ē Cristora,’ ixō mato paraxikani. <sup>6</sup> Nāskaxori mā nikaxii yorafo retenāifāfe chai inoax. Nāskatari nonoaxri askaxikani retenākani. Askara ōi, rateyamakāfe. Nā ē mato yoimis keskakōi kiki. Nāskafiax nōko mai fena keyoxima kiki, chipo ixii. <sup>7</sup> Akka yorafo mai fetsa anoax mēnāpaiyaifono yora fetsafori mai fetsa anoax retenāxikani. Askatari fonāiki finakōixikani afaa pikanima. Nāskatari nā mai fetsa anoax mai naya naya ixii. Askatari pae finakōia fetsa fetsatapafafo nokoxii kiki. <sup>8</sup> Akka taei nā omiskōiaifo, askai fetsexii.

<sup>9</sup> “Nāskata mato achikaxō fetsafo mato ināxikani mato omiskōimanōfo. Nāskaxō mato retenōfo. Nāskaxō keyokōi nā mai tio anoxō eōxō mato noikaspaxikani. <sup>10</sup> Nāskatari yora ichapafāfekai ea anā chanīmara fakanima. Nāskakanax āa ranā noikaspa faatanāxikani. Nāskakaxō yora fetsa yōsixikani ato achinōfo. <sup>11</sup> Nāskatari yora ichapafo āa chanīxikani

iskakani: ‘Ea Niospa shināmani kiki ě Niospa meka mato yoinō,’ iki āa chanīxikani. Nāskaxō yora ichapafo ato pāraxikani. <sup>12</sup> Nāskaxō ato chakakōi faxikani. Ato noimisfo keskafakī atirififāfe anā ato noisharaxikani. <sup>13</sup> Akka nā ea shināmakixoma ea shinākōiai nāfi ěfe Epa Nios fe ipaxatiroki. <sup>14</sup> Nāskakē na meka shara Jesúsnoa nikaxakani Jesús noko nāxonikē Epa Nios xanīfo anoax nō afe ĩpaxanō. Na maifo tii ano ato yoiaifono, chipo nōko mai keyoxii.

<sup>15</sup> “Nā Niospa meka yoimisto Daniel a inōpokoai yoikī keneni iskafakī: ‘Nios kīfiti pexefā mēra afara chakakōi faxikani,’ ixō kirika keneni. Nāskakē na kirika kenea anexō tāpikāfe. <sup>16</sup> Nā chakafinakōia ōikanax, nā Judea anoafō machi keya ano ichorisatakāfe. <sup>17</sup> Askatari āfe pexe māmākīa tsoxō ato fichiax koshikōi fotopakekafā āfe afaa fiamax ichotiro. <sup>18</sup> Askatari a āfe tare ano yonoaito anā oxō āfe rapati fitiroma. <sup>19</sup> Askatari a kēro fake naneafo fe a fake yome pishta chocho amaifo omiskōixikani māmāi yorafo omiskōifinakōiaifono. <sup>20</sup> Akka Epa Nios kīfikāfe iskafakī: ‘Epa Niosi, noko omiskōimayamafe nōko pena tenetitīa askayamai yōtaino matsi meexikakīma,’ ixō yoikāfe. <sup>21</sup> Askatari a omiskōiaifo nokoxii, taeyoi askakatsaxakīma. Nā Niospa yora onifakī taefanitīa tsōa askara ōiyomisma. Askatari anā tsoa chipo omiskōinakama. <sup>22</sup> Akka a omiskōiaifo nōko Ifāfe xateyamano, tsoa nikeranama nai keyokeranifo. Akka afe yorafo ato noikī omiskōinōfoma xateni atomāi katonixakī.

<sup>23</sup> “Akka fētsa mato yoikī iskafaino: ‘Ōikapo, nakīa Cristo,’ mato fayanā, ‘Oa onokīa, ōikapo,’ mato faito nikayamakāfe. <sup>24</sup> Akka nā chanīmisfo fekani, ě Cristora ixikani, nāfo nō Niosxō nō mato yoira ikani. Nāskakaxō tsōa atiroma keskara fakani Satanás yōshixō mato parapaikakī. Nā Niospa ato katoafori nāfo ato parapaikani. <sup>25</sup> Mē mato yoikai iyoamano shināsharakāfe. <sup>26</sup> Nāskakē mato parapaikani: ‘Cristo mā tsōa istoma ano oa,’ ikaxō. Nāskakē ari foyamakāfe. Askatari mato iskafakani: ‘Ōikapo, na Cristo na pexe mēra,’ mato faifāfe ato nikayamakāfe. <sup>27</sup> Akka nā kana peikī fafetanaito nō ōitiro keskara, nāskarifiāi ě oxii xafakīakōi ea ōixikani ě oaito. <sup>28</sup> Akka nā naafo ano ishpifo ichanātiro. Nāskari fakī keyokōichi ea tāpīxikani ě oaito,” ato fani.

*“Niospa Fake fotoaino afe keskara iximākai,” ixō Jesús ato yoini  
(Mr. 13.24-37; Lc. 17.26-30, 34-36; 21.25-33)*

<sup>29</sup> Anā Jesús ato yoini iskafakī: “Akka nā penatari, nā omiskōiaifo mā keyoano, xini fakishkōi ixii, ōxeri anā chaxaxima. Fishifori nai mēranoax pakei fetsexii, askatari nā nai mēranoafō naya naya iki fetsexii. <sup>30</sup> Nāskatari ōixikani nai mēranoax afara afeskaraito mā tāpinō ě fotoaitīa. Nāskatari keyokōi nā maitio anoax ratei fetseyanā oiaxikani. Nāskatari ea ōixikani ě nai mēranoax nai kōinī fotoiyoaito. Ě sharafinakōia ěfe sharaōnoax ě fotoaito ea ōixikani. <sup>31</sup> Nāskatari ěfe ājirifori ě yoixii āto maneti fāsikōi manekakī chāi chāisafanōfo a nikakanax efe yorafo a ě ato katoa ichanānōfo. Chai inoax fisti rasi efe yorafo fexikani nāno fistiāx ichanāxikakī.

<sup>32</sup> “Akka shinākapo ě mato yoinō. Mā yōkkafaino mā tāpitiro āfe pei sirikiaito. Nāskakē āfe peifo keyopakeaito ōikī mā tāpitiro māmāi chaima xiniaito. <sup>33</sup> Nāskarifiakī afarafo afeskaraito ōikī mā tāpitiro mē chaima oaino askai fetsexii. <sup>34</sup> Ě mato pāraima ě mato yoikōi, na ě mato yoiai keskara nono mai anoxō yorafāfe nayokaxoma ōiyokani. <sup>35</sup> Akka nai fe mai keyoi. Akka ěfe meka fisti keyonakama, nā ě mato yoiai keskakōi.

<sup>36</sup> “Afetīara nai mēranoax ě oxii tsōakai tāpiama. Nā ājirifāfe nai mēra ifiakaxō tāpiafoma. Ěrikai tāpiama. Ěfe Epa Nios fistichi tāpia. <sup>37</sup> Akka nā Noé niyoano ini keskai, nāskarifiāxii ě anā oaino. <sup>38</sup> Nāskata fakafānē ato maiyoamano, Noé kanōanāfā mēra ikini, yorafo pikāta, ayakāta fīanākāta ikaifono. <sup>39</sup> Akka tsōa shināyamaino mā faka faipafaxō keyokōi ato āsakī mitokōini. Nāskarifiāxii ě oaino ea shinātama afara chakafaifono. <sup>40</sup> Nāskatari feronāfake rafeta āto tare ano yonokani. Fetsa ea ari kai yamarisatitiro. Akka fetsa



nĕtetiro nã omiskõipakenakafo mĕra kaxiki. <sup>41</sup> Nãskarifiiai kĕro rafeta xiki renekani. Fetsa ea ari kai yamarisatanaino akka fetsa nĕtetiro nã omiskõipakenakafo mĕra kaxiki.

<sup>42</sup> “Nãskakĕ itipinĩsharakãfe oa mã moinãkafanai keskakãfe. Akka mã tâpiamaki afetiara ĕ anã oxikai. <sup>43</sup> Nãskakĕ mãri nã keskara tâpisharakãfe. Akka pexe ifãfe mã tâpixõ afetiã yometso nokoimãkai ixõ ãfe pexe itipinĩshara fatiro mã moixõ, a mĕra ikiãx yometsoyamanõ. <sup>44</sup> Nãskarifiiai mãri itipinĩsharakãfe. Akka oimara ixõ mã ea manayamaino ĕ matoki nokorisatani,” ixõ Jesũs ato yoini.

*Ina shara yafi ina chakaõnoa Jesũs yoini*  
(Lc. 12.41-48)

<sup>45</sup> Anã Jesũs ato yoini iskafakĩ: “Ĕ mato yoinõ afe keskaramãkĩ a yonoxomis shara mã tâpinõ. Xanĩfãfe mai fetsa ari kakĩ, a yonoxomis ãfe pexe ano nĩchifaini nãnoxõ a yonoxomis fetsafo a piaifo pena tii ato inãfafainõ. <sup>46</sup> Mã mai fetsa ari katani oxõ õitoshini a yonoxomisto mã yonoxosharakõiano. Nãskakĕ akiki inimakõini a yonoxomisri inimakõini mãmãi yonoxosharakõiax. <sup>47</sup> Ĕ mato paraima. Nãskaxõ ãfe xanĩfãfe mã xanĩfo imaxõ ãfe afama mĩshtifo kexexonõ inãtiro. <sup>48</sup> Akka nã yonoxomis chakapa shinãtiro: ‘Ĕfe xanĩfo fena oimara,’ ixõ. <sup>49</sup> Nãskaxõ a yonoxomis fetsafori ato seteketsani. Askatari nã pãemisfo fe rafexõ ato feta piyanã askatari ato feta ayayanã. <sup>50</sup> Iskaratĩã ĕfe xanĩfo oimara ixõ manasharayamaino nã penata ãfe xanĩfo nokorisatani. <sup>51</sup> Mã oxõ nã yonoxomis omiskõimaxii. Nã yora keparanãmisfo fomisfo mĕra potaxii. Nãskakĕ anoax oiayanã omiskõipakenaka,” ixõ Jesũs ato yoini.

## 25

*Meka fetsafaxõ Jesũs ato yoini diez xotofake xomayaõnoa*

<sup>1</sup> Anã Jesũs ato yoini iskafakĩ: “Ĕ mato yoinõ meka fetsafaxõ mã tâpinõ ĕ anã oxii a Nios Ifofaafoõnoax afe keskara ixikanimãkai. Akka nã diez xotofake xomayafãfe ãto rãpari fifaikani fonifo. Feronãfãke rama ãfiyaino afe fista mĕra foxikakĩ manai fokani fonifo. <sup>2</sup> Akka nã cinco xomayafãfe shinãsharanifoma, itipinĩnifoma. Akka nã cincoãferi shinãsharanifo. <sup>3</sup> Akka nã shinãsharaifãfema ãto rãpari foiyakakĩ ãto kirosĩ fonifoma anã fospifaxikakima. <sup>4</sup> Akka nã shinãsharakõiaifãfe ãto manishomoki kirosĩ fonifo. Askatari ãto rãpari fonifo. <sup>5</sup> Akka feronãfake fena nokoyamaino, mã fakishaino, oxakatsa ikani. Nã kĕro xomayafo oxanifo. <sup>6</sup> Nãskakĕ yame nakekafanaino nikanifo kenaifãfe iskaifono: ‘jMã nã feronãfake oi kiki! jMoinĩfofãkãfe, ifixikaki!’ ato faifono. <sup>7</sup> Nãskakĕ nã kĕro xomayafo moinĩfofãkata itipinĩ fakĩ fetsanifo ãto rãparifo õtaketsakakĩ. <sup>8</sup> Nãskata nã cinco xotofake shinãsharaifãfema nã cinco xotofake shinãsharaifo ãto kirosĩ pishta yõkanifo: ‘Noko kirosĩ pishta inãkãfe. Nõko rãpari otasharaima kiki,’ ato fanifo.

<sup>9</sup> “Ato askafaifono nã xotofake shinãsharaifãfe ato kemanifo ato iskafakakĩ: ‘Maa. Nõ mato inãtiro, nõri afaa otatiroma. Akka mã kaxõ fitiro a kirosĩ miniaifo anoa fitakãfe mãtonã faxikakĩ,’ ato fanifo. <sup>10</sup> Akka nã cinco xotofakefãfe kirosĩ fiifofãfono nã manaifo feronãfake nokoni. Nãskakĕ nã cinco xotofakefo shara shinãmisfo nã feronãfake mã nokoaino afe pexe mĕra ikinifo afeta fista ayanã pixikãki. Nãskakaxõ pexe fepoti feponifo. <sup>11</sup> Nãskano nã xotofakefo kirosĩ fitakani anã fenifo. Mã fĕkaxõ iskafakĩ yoitoshinifo: ‘Xanĩfo, noko fepoti fĕpexõfe nõ ikikanõ,’ faifãfe, <sup>12</sup> ato kemani: ‘Maa. Ĕkai mato õimisma, ĕ mato ikimatiroma,’ ato fani.

<sup>13</sup> “Nãskarifiakĩ mãri isharakõixõ ea manasharakõikãfe. Afetiara ĕ anã matoki oxikai tsõã tâpiamaki,” Jesũs ato fani.

*Meka fetsafaxõ koriõnoa Jesũs ato yoini*  
(Lc. 19.11-27)

<sup>14</sup> Anã Jesũs ato yoini iskafakĩ: “Ĕ anã mato yoinõ Nios xanĩfo iskaraki. Feronãfake mã mai fetsa ari kakĩ a yonoxomis kenaxõ yoini ãfe kori kexexonõ. <sup>15</sup> Akka a yonoxomis

fetsa ināni cinco mil. A yonoxomis fetsari ināni dos mil, fetsari ināni mil. Akka nā kori kexekī tāpia ichapa ināni. Akka a kori kexekī tāpisharafomari ichapa ato inānima. Nāskax kani mai fetsa ari. <sup>16</sup> Akka āfe ina fetsa nā cinco mil fiato nā kōri afama mīshti fini. Nāskaxō anā cinco mil fini āfe afama mīshtiōxō. <sup>17</sup> Nāskafakīri nā dos mil kori fiato nāatori nāskarifani afianā dos mil kori fikī. <sup>18</sup> Akka nā mil kori fiato nāato kori oneni āfe xanīfo mekexokī. Mai kini mēra maifani.

<sup>19</sup> “Akka mā samarakax anā oni āto xanīfo. Mā oxō a yonoxomisfo nā tres ato yōkani afe tii kori fixofafomākī. <sup>20</sup> Nāskakē nā cinco mil kori fini akiki oi taeni. Nāskaxō āfe xanīfo kori ināni iskafakī yoiyanā: ‘Xanīfo, mī ea cinco mil kori ināti. Akka ē finōmainīfofā anā cinco mil faxō ē fia. Ōipo. Nakīa mī kori,’ fani.

<sup>21</sup> “Askafaito āfe xanīfāfe yoini: ‘Aicho, mī ea yonoxomis sharakōi. Nā pishta ē mia ināoxō mī yonosharakōia. Nāskakē ēfe afama mīshtifo ichapakōi ē mia anā ināi mī ea kexexonō. Nāskakē nā ē inimai keskariai mīri inimafe,’ ixō yoini.

<sup>22</sup> “Nāskatari a yonoxomis fetsari chipo oni, nā dos mil kori fini. Oxō yoini iskafakī: ‘Xanīfo, mī ea dos mil kori ināni. Akka ē finōmainīfofā anā dos mil faxō ē fia. Nakīa mī kori,’ fani. <sup>23</sup> Nāatori askafaito āfe xanīfāfe yoini: ‘Aicho, mī ea yonoxomis sharakōi. Nā ē mia ināoxō mī yonosharakōia. Nāskakē ēfe afama mīshtifo ē mia anā kexemani. Nāskax mīri nā ē inimai keskariai mīri inimafe,’ fani.

<sup>24</sup> “Nāskata a yonoxomis fetsari oni nā mil kori fini. Mā oxō āfe xanīfo yoini: ‘Xanīfo, ē tāpia mī feronāfake mitsisipakōi. A mī fanama anoa mī fimis. Askatari a mī saakama anoafori mī fimis. <sup>25</sup> Nāskakī ē mesekī ē mia kori maifaxōa. Nakīa mī kori,’ faito āfe xanīfāfe kemani: <sup>26</sup> ‘Mī ea yonoxomis chakakōi. Askatari mī xanikōi. Akka, ¿mī shināmē a ē fanama anoafō fita, a ē saakama anoafori ē fimis? <sup>27</sup> Nāskakī nānori mī shinākī mī kori banco ano ea fāxōama anā oxō ē kori ichapa fikerana mā ēfe kori ichapano ē anā fikerana,’ fani. <sup>28</sup> Nāskaxō nā anoafō ato yoini: ‘Nā feronāfake nā mil kori fīakāfe fetsa ināxikakī nā kori diez milya,’ ato fani. <sup>29</sup> Akka nā afara ichapaya ichapayakōi itiro. Nāskaxori āfe afara ranāri anā meketiro. Akka nā afaa ichapayama āfe afara fiatiro anā afaa ichapaya iyamanō. <sup>30</sup> Nāskata a yonoxomis chaka mā potaxō fakishifā mēra nīchini nā fakishi mēranoax oiayanā omiskōipakexanō,” ixō Jesús ato yoini.

### *Mā mai keyoaino nā omiskōipakenakafoōnoa Jesús ato yoini*

<sup>31</sup> Anā Jesús ato yoini iskafakī: “Ē mato anā yoinō, ea nikakapo. Ē nai mēranoax oni. Ē Niosfiax feronāfakekōi ē oni. Ē anā nai mēranoax fotoyoi, ē xanīfokōi oxii ēfe ājirifo fe keyokōi ē oxii, ea kemataima mapoi fetsexikani. Askatari efe xanīfāfe tsaotī ano tsaoxikani. Keyokōi sharafinakōia ōixikani. <sup>32</sup> Nāskatari yorafo keyokōi nā maitio anoafō ēfe ferotaifi ichanāxikani. Nāskakē ē ato paxkanā faxii nā oveja kexemisto āfe ovejafōya āfe cabrafo paxkanā fatiro keskafakī. <sup>33</sup> Nā āfe inafō kexemisto āfe inafō paxkanā fakī āfe ovejafos āfe pōya kayakai aōri nīchixii. Askatari āfe cabrafori āfe pōya mishkiori nīchixii. Nāskarifiakī ē yorafo keyokōi ē paxkanā faxii. Nā ea Ifofaafos ēfe pōya kayakai aōri ē ato nīchixii, akka a ea Ifofaafomafori ēfe pōya mishkiori ē ato nīchixii. <sup>34</sup> Nāskaxō mē xanīfoxō ē ato yoixii nā ēfe pōya kayakai aōrinoafō ekeki fekāfe, ēfe Epa Niospa mato inimamamiski. Nāskakē ēfe Epa Xanīfo anoa mā afara fikai nā mai onifaitīa mato yoiyoni keskara. <sup>35</sup> Akka ē fonāikaito mā ea pimamis; ē nōamāikaitori mā ea ayamamis; ē pexemaisax kafāsaitori, ‘Nono ēfe pexe ano ofe nono oxaxiki,’ mā ea famis. <sup>36</sup> Askatari ē rapatimaiskē mā ea ināmis; ē isinī ikaitori mā ea kexesharamis; ē karaxa mēra ikikēri kaxō mā ea ōimis.

<sup>37</sup> “Ē ato askafaito ea yōkaxikani iskafakākī: ‘Ifo, ¿afetīa nō mia ōimismē mī fonāikaito, akka mī fonāikaito nō mia pimamis? Askatari, ¿afetīa nō mia ōimismē mī nōamāikaito, akka mī nōimāikaito nō mia ayamamis? <sup>38</sup> Askatari, ¿afetīa nō mia ōimismē pexemaisax mī kafasaito, akka nō mia pexe ināmis ano mī oxanō, askatari mī rapatimaiskē akka nō

mia rapati ināmis? <sup>39</sup> Askatari, ¿afetīa mī isinī ikaito nō mia ōimismē? Askatari, ¿afetīa karaxa mēranoa nō mia ōikamismē? ixō ea yōkaxikani.

<sup>40</sup> “Ea askafaifono ē ato kemaxii: ‘Ē mato paraima, nā fetsafo omiskōiaino mā tanaima isharaxō eōxō mā axomis.’

<sup>41</sup> “Askatari na ēfe pōya mishkiorinoa ē ato yoikī iskafaxii: ‘Na ēfe pōya mishkiorinoa emakinoax fotakāfe mā chakakōikī. Chii xoisai mēra fotakāfe anoax omiskōixikaki. Nā ē chii xoisai itipinī fani mēranoax Satanás chaka fe āfe yōshi chakafori anoax afe omiskōinakafo. <sup>42</sup> Akka ē fonāikaito mā ea pimamisma. Askatari ē nōamāikaito mā ea ayamamisma. <sup>43</sup> Askatari ē pexemaisax kafāsaito, “Nono nōko pexe mēra ife,” mā ea famisma. Askatari mā ea rapati ināmisma. Askatari karaxa mēranoa mā ea ōikamisma. Askatari ē isinī ikaito mā ea ōikamisma,’ ixō ē ato yoixii.

<sup>44</sup> “Ato askafaito yorafetsafāfe yōkaxikani iskafakakī: ‘Ifo, ¿afetīa nō mia ōimismē mī fonāikaito, askatari a mī nōiamāikaito, askatari mī pexemaiskē, askatari mī rapatimaiskē, askatari a mī isinī ikaito, askatari a mī karaxa mēra ikikē nō mia tanamisma nō mia ōikaspamis?’

<sup>45</sup> “Ea askafaifono ē Xanīfokōixō ē ato kemaxii iskafakī: ‘Ē mato paraima. Nā omiskōiaifo mā ato tanamisma nafokai afaafoma ixō askatari eari mā tanamisma,’ ixō ē ato yoixii. <sup>46</sup> Nāskakē nāfo nā omiskōipakenakafo mēra foxikani. Akka nā ea Ifofafo efe nīpanakafo,” ixō Jesús ato yoini.

## 26

*“¿Afeskaxō nō Jesús retetiromē?” ixō shinānifo  
(Mr. 14.1-2; Lc. 22.1-2; Jn. 11.45-53)*

<sup>1</sup> Nāskata mā ato yoikī keyota Jesús aōxō tāpimisfo yoini: <sup>2</sup> “Mā mā tāpiakī oxa rafeta Pascua fista ikiki. Nāskatari Pascua fistaīa ea achikani fetsafāfe ea mastanōfo,” ixō Jesús ato yoini.

<sup>3</sup> Nāskakē a Niospa meka yoimis xanīfofo fe a judeo anifofo ichanānifo Caifás pexe anoax. Nā Caifás ato Nios kīfixomisfāfe āto xanīfo ini. <sup>4</sup> Nāno ichanākanax yoinānifo: “¿Afeskaxō nō Jesús achitiromē paraxō retexiki?” ikanax yoinānifo. <sup>5</sup> Nāskakanax yoinānifo: “Fistaīakai nō achitiroma yorafā rasi meikai fetsekani nokoki ōitifishkitirofo,” ikanax yoinānifo.

*Kēromā Jesús shinākī āfe mapoki pirofomā nachini  
(Mr. 14.3-9; Jn. 12.1-8)*

<sup>6</sup> Nāskata Jesús Betania ano ini Simón pexe ano. Nā Simón “Rashkishiai” fapaonifo. <sup>7</sup> Jesús nānoxō piaino kēro fisti akiki kani pirofomā manishomo sharakōikī foikai nā manishomo āfe ane alabastro. Akka nā pirofomā kopikōi ini. Jesús mīsa ano tsoaxō piaino, nā kēromā āfe mapoki pirofomā nachini. <sup>8</sup> Askafaito ōikani Jesúsxō tāpimisfo ōitifishkiyanā iskanifo: “¿Afeskakī nā pirofomā shara mī nachimē? <sup>9</sup> Mī ato minixō mī kori ichapa fixō a afaamaisfo mī ato inākerana,” fanifo.

<sup>10</sup> Askafaifāfe nikakī Jesús ato yoini: “¿Afeskakī na kēro mā fekaxtefaimē? Na ea iskafai sharaki,” ato fani. <sup>11</sup> “Akka nā afaamaisfori mato fe ipanakafo. Akka eakai mēxotaima mā ea anā ōima. <sup>12</sup> Akka na kēromā ea iskafakī ēfe yoraki pirofomā nachia ea itipinīsharafakī ea iskafa ea maifasharaxinōfo. <sup>13</sup> Ē mato pāraima, fanīxōra na meka shara eōnoa yoikakī nā mai tio anoxō na kēromā ea iskafaōnoa yoixikani. Askatari na kēroōnoa shināpakenakafo, shināmakiyamaxikakī,” ixō Jesús ato yoini.

*Judaspa aōxō tāpifikatsaxakī Jesús ato achimani  
(Mr. 14.10-11; Lc. 22.3-6)*

<sup>14</sup> Nānori Jesús ato yoiaino a aōxō tāpimis fetsa, āfe ane Judas Iscariote, nā kani nā ato Nios kīfixomis xanīfofo ano. <sup>15</sup> Mā kaxō ato yoini: “¿Afe tii mā ea kori inātiromē ē mato

Jesús achimanō?” ato faito yoinifo: “Treinta nō mia inātiro,” fanifo. <sup>16</sup> Nāskaxō Judaspa shinākī taefani: “¿Afeskaxomāi ē Jesús ato achimanō?” ixō shināni.

*Mā chaima reteaifono Jesús aōxō tāpimisfo feta yātapake pini  
(Mr. 14.12-25; Lc. 22.7-23; Jn. 13.21-30; 1 Co. 11.23-26)*

<sup>17</sup> Akka nā Pascua fistatīa pāa faraxatimais pipaonifo. Nāskata mā fista pakeano aōxō tāpimisfo akiki fokaxō yōkanifo: “¿Fanī mī fichipaimē ano kaxō nō itipinī fanō, anoxō Pascuatīa yātapake pixiki?” fanifo.

<sup>18</sup> Askafaifono Jesús ato kemani iskafakī: “Oa pexe rasi ano fotakāfe. Nānoa feronāfake fetsa fichixō yoitakāfe iskafakī: ‘Nōko Ifāfe nōko yoia nō mia yoiyonō iskafaki: Mē chaima naikai. Nōko fistatīa mī pexe anoxō eōxō tāpimisfo feta ē pii kaikai,’ ixō yoitakāfe,” ato faano, <sup>19</sup> nāskafakī yoinifo nā āto Ifāfe ato yoia keskakakī. Nānoxō itipinī fanifo Pascua fistatīa pixikakī.

<sup>20</sup> Jesús mā fakishaino pexe ano nokoax mīsa ano tsaoni a aōxō tāpimiskōifo fe. <sup>21</sup> Nānoxō piyanā ato yoini: “Ē mato pārāima, fatora mā fētsa ea mā ato achimafainaka,” ato fani.

<sup>22</sup> Ato askafaito nikai shināmitsakōinifo. Nāskaxō yōkaketsanifo: “¿Ēraka, Ifo?” fakī fetsanifo.

<sup>23</sup> Askafaifono Jesús ato kemani: “Nā efeta sapakinoa pāa momoxō piaito nāato ea ato achimaxii. <sup>24</sup> Ē Niospa Fakekōifiax ē yorakōi. Nā eōnoa yoikī kirika kenenifo keskakōi fakī ē asharakōitiro. Akka nā feronāfake ea ato achimafiax akairi omiskōikōixii. Akka nā feronāfake shara ikerana fakeyamanixakī,” ixō Jesús ato yoini.

<sup>25</sup> Nāskakē Judaspa nā ato achimanaito yōkani: “Maestro, ¿ēraka?” faito, “Ēje, nā mī yoiai keskarakīa,” Jesús fani.

<sup>26</sup> Nāskakaxō piaifono Jesús pāa tsomainīfofā Apa Nios kīfini. Mā Apa kīfita pāa kaxkeketsaxō aōxō tāpimisfo ināni ato iskafayanā: “Na ēfe nami keskara pikāfe,” ato fani.

<sup>27</sup> Ato askafata kechokinoa fimi ene tsomainīfofāxō Apa Nios kīfini. Nāskaxō aōxō tāpimisfo ato ayamani ato iskafayanā: “Na fimi ene ayakāfe,” ato fani. <sup>28</sup> Nāskaxō ato yoini: “Nafi ēfe imi keskaraki. Akka nā ē mato yoiyoni keskai mē nai. Nāskakaxō ēfe imi ōikaxō tāpitirofo Epa Niospa yoiyoni keskakakī yora ichapafo ē ato chaka soaxonō. <sup>29</sup> Akka anā ē mato yoinō ē anā mato feta fena na fimi ene ayaima. Mā mā nai mēra kano ē mato feta anā fimi ene ayaxii ēfe Epa xanīfo anoxō,” ixō Jesús ato yoini.

*“Ē Jesús ōimisma,” Pedro ixiaino Jesús ato yoini  
(Mr. 14.26-31; Lc. 22.31-34; Jn. 13.36-38)*

<sup>30</sup> Nāskakata mā fanāiki xatekata machi Olivos ano fonifo. <sup>31</sup> Nānoxō Jesús ato yoini: “A na fakishi keyokōi mā ea shināmaki fetsei. Nānori kirika kenenifo iskafakakī: ‘Āfe ifo reteaifono, āfe ovejafo ichoi fetsetirofo,’ ixō kirika kenenifo,” ato fani. <sup>32</sup> “Akka ea retetiafono ē otoax ē Galilea ano rekē kai mā kayoamano,” ato faino, <sup>33</sup> Pedro kemani: “Keyokōi shināmakifiaifono, akka ēkai mia shināmakima,” fani.

<sup>34</sup> Askafaito nikakī Jesús yoini: “Ē mia pārāima na fakishi takara fene keofamano, ‘Ē Jesús ōimismara,’ mī ea fai tres fakī,” fani.

<sup>35</sup> Askafaito nikakī anā Pedro kemani: “Maa. Mia retetiaifono ē mefe nai. Ē ōimismara ē mia faima,” fani. Pedro askafaito nikakakī keyokōichi aōxō tāpimisfāfe askafakī fetsanifo.

*Getsemaní anoxō Jesús Apa Nios kīfini  
(Mr. 14.32-42; Lc. 22.39-46)*

<sup>36</sup> Nāskata Jesús kani aōxō tāpimisfo fe Getsemaní ano. Nānoxō ato yoini: “Nono tsaokāfe onī chaimashta kaxō ē Epa Nios kīfiyotanō,” ato fani.

<sup>37</sup> Akka Pedro iyoni, Zebedeo fake rafe yafi. Nāskaxō āfe yora meeni shināmitsakōiyanā fekaxteaito. <sup>38</sup> Anoxō ato yoini: “Ēfe yōshi shināmitsai napaiyaito ē meikai. Nono nētekāfe oxakakima māri efeta ōisharaxikakī,” ato fani.

<sup>39</sup> Ato askafata Jesús ares fisti ori chaimashta kani. Nānoax maikiri fepepakekafata āfe fishpi mai tiisani. Nāskaxō Apa kīfini iskafakī: “Epa, na ē omiskōiai ekeki nokoyamafe. Akka nā ē apaiyai keskafakima. Nā mī ea amapaiyai keskafafe,” fani.

<sup>40</sup> Nāskata anā anoris oni aōxō tāpimisfo ano. Oxō ato ōia oxafo inifo. Nāskaxō Pedro yoini: “¿Mā efeta pishta oxa tenetiromamē?” ato fani. <sup>41</sup> Nāskafata anā yoini: “Moikaxō Epa Nios kīfikāfe Satanás chakata mato chakafamapaiyai keskara axikakima. Chanīma, nā Epa Niospa mato amapaiyai keskara mātō shinā mēraxō mā apafikī mā atiroma. Akka mātō yora pachikōikī,” ato fani.

<sup>42</sup> Ato askafata anā kani Apa Nios kīfikai iskafakī: “Epa, ea mīa omiskōimayamakī ea mīa omiskōimatiroma. Akka nā mī ea amapaiyai keskafafe,” fani.

<sup>43</sup> Nāskata anā oxō ato fichitoshini aōxō tāpimisfo oxafono, oxa paemei fetsoafono.

<sup>44</sup> Nānoa ato ōifaini kaxō anā Apa Nios kīfini, afia yoitana keskafakī. <sup>45</sup> Nāskata Jesús anā oni aōxō tāpimisfo ano. Mā oxō ato yoini: “¿Aimā oxamē tenekōiyanā? Akka iskaratīa a ea ato achimaniyoai mā chaima oi kiki. Yora chakafāfe ea achifenōfo ato efei kiki.

<sup>46</sup> Fininīfofākāfe nō kanō. Mā chaima oi kiki a ea ato achimaniyoai,” Jesús ato fani.

### *Jesús achinifo*

*(Mr. 14.43-50; Lc. 22.47-53; Jn. 18.2-11)*

<sup>47</sup> Jesús ato yoiaino Judas nokoni, nā Judaspa Jesúsxō tāpifikatsaxakī, yorafā rasifo fe oni. Nā yorafo kenofoya ifi xatefoya fenifo, a ato Nios kīfixomisfāfe āto xanīfofo feta judeofāfe āto xanīfofofāfe ato nīchiafono. <sup>48</sup> Judaspa nā ato efeaito ato yoiyoni iskafakī: “A ē kokoki tsoo akaito ōikī achirisafaxikākī,” ato fani.

<sup>49</sup> Mā Jesús ano nokoxō Judaspa iskafakī yoini: “Maestro, ¿mīmē?” fatishoni. Nāskaxō kokotoshini.

<sup>50</sup> Askafaito ōikī Jesús kemani: “Efe yora, nā mī apaiyai keska farisafafe,” fani.

Askafaito ōikakī nā Judas fe foafāfe Jesús achinifo. <sup>51</sup> Akka Jesús achiaifāfe ōikī a aōxō tāpimis fētsa āfe keno chainipa tsekainīfofā a ato Nios kīfixomisfāfe āto xanīfāfe ina paxteni.

<sup>52</sup> Askaito ōikī Jesús yoini: “Mī keno fafe. Akka nō kenopa retenāino kenopari noko retetirofo. <sup>53</sup> ¿Mī tāpiamamē Epa Nios ē yoiaito iskaratīa āfe ājirifo ichapakōi ea nīchixotiro ea kexei fenōfo?” fani. <sup>54</sup> “Ē iskaratīa ājiri kenano ea kexeaifono ē naima. Akka nā Niospa meka yoikī kirika kenekī yoinifo keskai ē naikai,” Jesús ato fani.

<sup>55</sup> Askafono ōikī Jesús yorafo yōkani: “¿Afeskai kenofoya ifixatefoya mā oamē ea achiyoai oa ē yometso keskarakē? Pena tii ē mato fe itiani Nios kīfiti pexefā mēraxō ē mato tāpimani, akka mākai ea achipaimisma. <sup>56</sup> Akka nā eōnoa yoikī kenenifo keskafakī mā ea achi,” ixō Jesús ato yoini.

Ato askafaino aōxō tāpimisfo Jesús ōifaikani. Ichoi fetsenifo a makinoax.

### *Xanīfo finakōiafo ano Jesús iyonifo*

*(Mr. 14.53-65; Lc. 22.54-55, 63-71; Jn. 18.12-14, 19-24)*

<sup>57</sup> Mā Jesús achikaxō a ato Nios kīfixomisfāfe āto xanīfo Caifás āfe pexe ano iyonifo. A xanīfofo fe a Moisés yoikī kirika keneni keskara ato tāpimamisfo fe a judeo anifofo fe nā tsaoafo ano Jesús iyonifo. <sup>58</sup> Pedro chai ixō ōini faki Jesús iyoai fokanimākai. Nāskaxō ato chīfafoni. Nāskata nā ato Nios kīfixomisfāfe āto xanīfāfe pexe emāiti ano Pedro nokoni. Mā nokoax nāno tsaoni nā pexefā kexemisfo fe anoxō Jesús afeska fakanimākai ōixiki.

<sup>59</sup> Nā Nios kīfixomis xanīfofo feta a ato fe rafeafāfe Jesús noikaspakakī, “¿Afaa nō fatiromē Jesús afaa chakakōi faamakī nō retexiki?” ixō shinānifo. <sup>60</sup> Akka Jesús afaa chakafayamafiano, yora ichapafāfe āa chakafakakī mekafanifo parakī. Akka aōnoa afaa

chaka nikanifoma. Nāskakē feronāfake raferi mekafai fekani fenifo. <sup>61</sup> Nā rafeta yoinifo: “Mā nō nikaita Jesús iskaito: ‘Ē na Nios kīfiti pexefā ē pāo fatiro. Nāskata tres nia oxata ē anā pexefā fatiro,’ ikaito nō nikaita,” fanifo nā rafeta āa parakakī.

<sup>62</sup> Askafaifono a ato Nios kīfixomis xanīfo fininīkafāta Jesús yōkani: “¿Mī kemamit-saimamē afamē na mīōnoa meka chaka yoiainifo?” ixō yoini.

<sup>63</sup> Akka Jesús tooxinima. Nā Nios ato kīfixomis xanīfāfe yoini iskafakī: “Nā Nios nipanakato mia ōi kiki mī yoikai chanīmakōi, noko yoife mīmākī Cristo Niospa Fake,” fani.

<sup>64</sup> Askafaito nikakī Jesús kemani: “Nā mī ea yoiyai keskarakīa, ēkīa Niospa Fake. Ē mato yoinō. Akka mā ea ōixii ēfe Epa ketaxamei āfe pōya kayakai aōri ē tsāokē xanīfo finakōia ēfe Epa fe. Askatari mā ea ōixii nai kōi mēranoax ē anā fotofaito,” Jesús ato fani.

<sup>65</sup> Ato askafaito nikakakī a Nios ato kīfixomisfāfe āto xanīfāfe āfe rapati faxteni yorafāfe tāpinōfo Jesús yoiaino nikakaspakī. Askafata yoini: “Na feronāfake āfe meka chakakōi Nios chakafakī mekafai. Mā nōakōi nō nikakī noko anā tsōa yoitiromaki nō tāpinō,” ato fani. <sup>66</sup> “¿Afe keskara mā shināimē?” ato faito keyokōichi kemanifo: “¡Nanōki!” fanifo.

<sup>67</sup> Mā fenexkaxō āfe femānāki kemo mechoketsayanā koshaketsanifo. Atirito fepas-ketsanifo. <sup>68</sup> Iskafakī yoiyanā: “Mīkai Cristomākī, noko yoife tsōa mia koshaketsamakī,” fanifo.

*“Ē Jesús ōimisma,” Pedro ini*

*(Mr. 14.66-72; Lc. 22.56-62; Jn. 18.15-18, 25-27)*

<sup>69</sup> Pedro nāno ato fe pexefā emāiti tsoano, nāno kēro xomaya a xanīfo yonoxomis akiki kaxō yoini: “Mīri Jesús fe kafāsamis Galilea anoax,” faito, <sup>70</sup> Pedro kemani, yorafāfe ōiaifono iskafakī: “Ēkai Jesús ōimisma. Ēkai afaa tāpiama tsoaraōnoa mī yoi,” fani.

<sup>71</sup> Nāskafata pexe fepoti ano kani. Nānoa kēro xomaya fētsari fichixō fetsafo yoini: “A nari Jesús fe Nazarete anoax kafāsamis,” fani.

<sup>72</sup> Askafaino anā Pedro kemani: “Maa, nā mī yoiyai keskara Niospa tāpia ē na feronāfake ōimisma,” fani.

<sup>73</sup> Nāskafaino nā anoafāfe Pedro ano fōkaxō yoinifo: “Chanīma, mīri Jesús fe rafemis mā nō mia nikai mī mekaito, nā keskara,” fanifo.

<sup>74</sup> Nāskafaifono Pedro ato yoikī taefani iskafakī: “Ē mato paraima, Niospa ea ōi ē chanīkē Niospa ea omiskōimatiro. Niospa tāpia ē mato yoikōi nā feronāfake ē ōimisma,” ixō ato yoini.

Pedro askaino takara keoinākafani. <sup>75</sup> Nāskaino Pedro shināni nā Jesús yoita keskara. “Takara keoyoamano mī ato yoikī tres faxii: ‘Ē Jesús ōimismara,’ mī ixii,” ixō Jesús yoita keskara Pedro shinātani. Nāskata Caifās pexefā mēranoax kāikainax oiāi finakōini.

## 27

*Pilato ano Jesús iyonifo*

*(Mr. 15.1; Lc. 23.1-2; Jn. 18.28-32)*

<sup>1</sup> Nāskata mā penaino keyokōi a ato Nios kīfixomis xanīfofo fe judeo anifofo yoinānifo: “¿Afeskaxō nō Jesús retetiromē?” ikanax yoinānifo. <sup>2</sup> Nāskakaxō metexkere akaxō Jesús iyonifo Pilato ano. Nā Pilato āto xanīfo yora fetsa Roma anoa ini.

*Judas nani*

<sup>3</sup> Judaspa Jesús ato achimaxō reteifāfe ōikī shināmitsayanā ato treinta kori exe ināni, a ato Nios kīfixomis xanīfofoya judeo anifofo. <sup>4</sup> Ato iskafayanā: “Ē chakafaa, Jesús afaa chakafayamafiamiskē. Paraxō ē ato achimana retenōfo,” ato faito kemanifo: “Nōkai aōnoa afaa shināchakakōi,” fanifo.

<sup>5</sup> Askafaifāfe nikai nā Nios kīfiti pexefā mēraxō ato nāmā kori exe saafaini kaax āari tenexemeax Judas nani.

<sup>6</sup> A ato Nios kīfixomis xanīfofōfāfe anā kori finifo iskayanā: “Na kori exe imi foano mā chakanaki. Nāskakē a kori fati mēra nō nanetiromaki,” ikax yoinānifo.

<sup>7</sup> Nāskakanax yoinānifo: “A na kōri nō mai finō ano yora fetsafo maifaxiki. Nā neo kesho fakakī neo fimisfo anoa nā mai nō finō,” ikanax yoinānifo. <sup>8</sup> Nāskakē nā mai anakī fetsafanifo. “Imi Mai,” fanifo. Akka iskaratīari, “Imi Mai,” famisfo. <sup>9</sup> Nāskakē nā Niospa meka yoimisto Jeremías a inōpokoai yoikī kirika keneni keskakōini. Iskafakī yoikī keneni:

Kori exe treinta fixikani nā israelifāfe yoinifo keskafakī. <sup>10</sup> Nāskakē nā kōri kesho faxii mai fimisfo anoa nā mai finifo nā Niospa ea yoiyoni keskafakī, ixō Jeremías keneni.

*Pilato xanīfāfe Jesús yōkani*

(Mr. 15.2-5; Lc. 23.3-5; Jn. 18.33-38)

<sup>11</sup> Jesús iyonifo Pilato xanīfo ano. Mā iyoafono nānoxō yōkani iskafakī: “¿Mīmē judeofāfe xanīfo?” faito Jesús kemani: “Ēje, nā mī ea yoiai keskarakīa,” fani.

<sup>12</sup> Akka nā ato Nios kīfixomis xanīfofo feta judeo anifofōfāfe, “Mī chakakōi famis,” pārakī fanifo. Askafaifono Jesús ato kemanima. <sup>13</sup> Nāskakē Pilato yōkani: “¿Mī nikaimamē mia chakafakī mekaifāfe?” fani.

<sup>14</sup> Askafaito nikakī, Jesús kai pishta kemanima. Nāskakē xanīfo Pilato, “Kee, ¿afeskai ea kemaimamē?” ixō shināni.

*Pilato ato yoini Jesús retenōfo*

(Mr. 15.6-20; Lc. 23.13-25; Jn. 18.38-19.16)

<sup>15</sup> Akka Pascua fistatīa xanīfo Pilato yora fisti karaxa mēranoa kāimapaoni. Nā yorafāfe kāimapaiyaifo ato kāimaxopaoni. <sup>16</sup> Akka nā karaxa mēra ika feronāfāke chakakōi ini, āfe ane Barrabás ini. <sup>17</sup> Nāskakē yorafo ichanāfono Pilato ato yōkani: “¿Fato mā fichipaimē ē mato kāimaxonō? ¿Barrabás iyamai Jesús nā Cristo nā Niospa nīchini ē kāimatiromē?” ato fani.

<sup>18</sup> Akka mā Pilato tāpia ini judeo xanīfāfe shināchakaito nō anā xanīfo itiromara ixō, a ano Jesús iyoaifono.

<sup>19</sup> Nā xanīfāfe tsaoti kamaki tsoxō Pilato shināino, āfe āfinī āfe ina nīchini Pilato yoitanō: “Mī āfinī ea yoia ē mia yoinō iskafakī: ‘Na feronāfāke afaa chakafamismakī afeska fayamafe. Ēfe namapa aōxō chakakōi ē namakī, mia faa,’ āfe inapa fani.

<sup>20</sup> Akka nā ato Nios kīfixomisfāfe āto xanīfofo feta judeo anifofōfāfe āfe yorafo ato yoinifo iskafakakī: “Jesús kāiyamanō. Akka Barrabás kāinō. Jesús ato retemanō Pilato yoikāfe,” ato fanifo. <sup>21</sup> Askafāfe xanīfo Pilato anā ato yōkani: “Fato mā fichipaimē ē mato kāimaxonō ea yoikāfe,” ato faito, “Barrabás kāimafe,” fanifo.

<sup>22</sup> Anā Pilato ato yōkani: “Akka, ¿ē Jesús nā Cristo famisfo ē afeska faimē?” ato faito, keyokōichi kemanifo: “¡Ifi cruz ikaki mastamafe!” fanifo.

<sup>23</sup> Askafaifāfe nikakī Pilato ato yoini: “Akka, ¿naato afaa chakafamē?” ato fani.

Ato askafaito nikakakī fāsikōi yoinifo: “¡Mastafe!” fanifo.

<sup>24</sup> Akka Pilato ōia tsōa nikakanima inifo. Yorafā rasi fāsikōi mekanifo. Nāskakē āfe ina faka fixotanō nīchini. Askata mechokomeni yorafāfe ferotaiifi ōinōfo ato iskafakī yoiyanā: “Ēkai afaamaki na feronāfāke ē retepanā. Mā mā apaikai akāfe. Eōnoax naima kiki. Matoōnoax nai kiki,” ato fani.

<sup>25</sup> Ato askafaito yorafāfe kemanifo: “Akka nō akikai retekī nō tenetiroma nokoōnoax nai. Nōko fakefoōnoaxri nai,” fanifo.

<sup>26</sup> Nāskakē Pilato Barrabás ato kāimaxoni. Nāskata mā Jesús ato koshamata ifi cruz ikaki mastatanōfo ato yoini.

<sup>27</sup> Askata sorarofāfe Jesús iyonifo xanīfāfe pexefā ano. Nānoax sorarofō ichanākanax Jesús kemataima niakenifo. <sup>28</sup> Nāskakaxō āfe rapati pēkakaxō, rapati ōshi nana safe-manifo, xanīfāfe tari keskara. <sup>29</sup> Nāskatari moxa chainipafo maiti fākaxō maimanifo.

Āfe mēke kaiyakai aōriri ifi chati tsomamanifo. Nāskakaxō āfe ferotaifi ratokonō mai chachipakefofā āto xanīfo feyakanakōi keskarakaxō kaxemetsamakōi fanifo, iskafakī: “Mī sharakōi. Mīfi judeofāfe āto xanīfo,” fanifo kaxefakakī. <sup>30</sup> Nāskakata akiki kemo mechokata, afia ifi xate tsoma fīakaxō aō mapoki koshanifo. <sup>31</sup> Mā kaxemetsama fakaxō, tari ōshi fīakata, Jesús āfe rapatikōi safemakaxō iyonifo mā mastai fokakī.

### *Jesús ifi cruz ikaki mastanifo*

(Mr. 15.21-32; Lc. 23.26-43; Jn. 19.17-27)

<sup>32</sup> Anoax fōkakī, feronāfake fisti fichinifo āfe ane Simón. Nā Simón Cirene anoa ini. Nāskaxō yoinifo: “Na Jesús ifi cruz ika foxōi afe,” fanifo.

<sup>33</sup> Nāskakata nokonifo machi āfe ane Gólgota ano. (Nā āfe ane fetsa Mapo Xao fanifo.)

<sup>34</sup> Nānoxō fimi ene moka osia Jesús ayamapainifo. Akka Jesús mā meexō ayakaspani.

<sup>35</sup> Nāskata mā Jesús mastakaxō āfe rapati fīanifo. Sorarofāfe makex tokoronō tsakaket-sakaxō nāskakaxō sakka sakka anifo kanānōnākakī. Nā kanāto Jesús tari fōani. Nāskaxō Jesús rapati fetsa fīanifo. <sup>36</sup> Mā Jesús mastakanax nāno tsaonifo anoxō kexexikakī.

<sup>37</sup> Nāskaxō āfe mapo mānāori tafaraki kenexō mastanifo. Mā retekaxō kenekī iskafanifo: “Jesúsfi judeofāfe xanīfoki,” ikaxō kenenifo.

<sup>38</sup> Jesús yafi yometso rafe mastanifo, fetsa āfe pōya kayakai aōri ata, fetsari āfe pōya mishkiori anifo. <sup>39</sup> Nā ano finōfāifāfe ĭchayanā āto mapo rafe rafeanifo. <sup>40</sup> Iskafakī yoinifo: “Mī yoimis ē Nios kīfiti pexefā pāofaxō ē tres nia oxata ē anā axii pexefā fakī mī imiski, akka mī ifimetiromākī mīa ifimefe. Mī Niospa Fakemākī na ifi cruz ikakinoax fotopakekafāfe,” fanifo.

<sup>41</sup> Nāskariakani akiki kaxemetsamanifo a ato Nios kīfixomisfāfe āto xanīfofo fe a Moisés yoikī kirika kenenī keskara ato tāpimamisfo a judeofāfe āto xanīfofori āa ranā yoinānākani iskanifo: <sup>42</sup> “Naato fetsafo ififitiroxakī, akka āakai ifimeima. A nafi israelifāfe ato xanīfokī, akka ifi cruz ikakinoax fotoano nō chanīmara fai. <sup>43</sup> A naato Nios shināmis. Mēxotaima noko yoimis: ‘Epa Nios ēfe Epakōira,’ noko famis. Akka chanīmamakī Niospa noikī ifimākai nō ōinō,” ixō mekafakī chakafanifo.

<sup>44</sup> Nāskaxō nā yometso rafeya mastafono fētsa chakafakī mekafakī ĭchani.

### *Jesús nani*

(Mr. 15.33-41; Lc. 23.44-49; Jn. 19.28-30)

<sup>45</sup> Nāskata xini keya nā mai tio fakishifākōi itani. Nāskax mā xini kaino anā penani.

<sup>46</sup> Nāskata mā penano Jesús fāsikōi āfe mekapa kenai iskani: “Elí, Elí, ¿lema sabactani?” Nōko mekapa iskafakī yoini: “Ēfe Nios, Ēfe Nios, ¿afeskakī mīa ea potamē?” fani.

<sup>47</sup> Nāskaito nā ano niafāfe nikakakī iskafanifo: “Nikakapo, nā ato Niospa meka yoipaoni Elías kenai kiki,” fanifo.

<sup>48</sup> Nāskaito nikafaini fetsa ichoni xapo keskara fikai. Nā xapo keskara fimi ene kachaki momoxō tafa xate kaxkexō akiki aō nētaxō ayamapaini. <sup>49</sup> Askafaito ranārito yoinifo: “Enefe. Elías nai mēranoax fotoxō ifimākai nō ōinō,” fanifo.

<sup>50</sup> Anā Jesús fāsikōi ea ini. Nāskax nani. <sup>51</sup> Mā Jesús natanaino, sama nami Nios kīfiti pexefā mēranoax naki rafekōi faxtepakekafāni fomākīanoax. Nāskatari mai naya naya ini. Tokirinīfāfori kaxkei fetseni. <sup>52</sup> Nāskakē a maiafo anoax kini fepekemetani. Akka a Nios Ifofafo nakatsaxakakī otoiñifōfanifo. <sup>53</sup> Nāskakata maiafo anoax fonifo. Mā Jesús otoitano, Jerusalén ano fonifo. Nānoxō yora ichapafāfe ōinifo.

<sup>54</sup> Nāskata soraro xanīfāfe a afeta Jesús kexeafō feta ōinifo mai naya naya ikaito afarafōri afeskara ikaito. Nāskakē ratekōiyanā yoinānifo iskayanā: “Chanīma, na feronāfake Niospa Fake ika,” fanifo.

<sup>55</sup> Kērofāferi chaimashta nikaxō ōinifo. Kēro ichapafāferi Jesús fe fōpaonifo Galilea anoax ato afara axosharamisno. <sup>56</sup> Nā tiixō Jesús ōinifo. María Magdalena ikaino María



fetsari ikaino, nã Mariá Jacobo feta José ãto afa ini. Askatari kãro fetsari ini Zebedeo ãfe ãfi. ãfe fake rafe Santiago fe Juan ini. Keyokõichi Jesús õinifo chaimashta nikaxõ.

*Jesús makex kini mēra maifanifo*

(Mr. 15.42-47; Lc. 23.50-56; Jn. 19.38-42)

<sup>57</sup> Akka mã fakishaino feronãfake kori ichapaya fisti kani ãfe ane José. Nã José Arimatea mai anoa ini. Nãatori Jesús Ifofamis ini. <sup>58</sup> Nã José xanĩfo Pilato ano kaxõ Jesús ãfe yora yõkani maifai axiki. Nãskakẽ Pilato ato yoini Jesús ãfe yora inãnõfo. <sup>59</sup> Nãskata José mã Jesús yora fixõ, sama oxosharakõipa rakoni. <sup>60</sup> Nãskaxõ makex kini a tsoa maiyomisma mēra ratani. Nã makex kini fakĩ José ayoni. Nãskata nã Jesús maifaa ano makex kini tokirinĩfanẽ fepofaini kani. <sup>61</sup> Akka Mariá Magdalena fe Mariá fetsa nãno nētekanax a Jesús maia ano tsaokaxõ õinifo.

*Sorarofãfe Jesús maia ano kexenifo*

<sup>62</sup> Mã askaitano, judeofo ãfe pena tenetitĩa a ato Nios kĩfixomisfãfe ãto xanĩfofo fe fariseofo fonifo Pilato õifokani. <sup>63</sup> Mã fõkaxõ yoinifo iskafakakĩ: “Xanĩfo, mã nõ shinã na feronãfake chanĩmisto nayoxoma yoikĩ iskafamis: ‘Ë naax tres nia oxata ã otoxii,’ ixõ yoimis. <sup>64</sup> Nãskakẽ mã sorarofõ nĩchife a maia ano kexeyonõfo tres nia aõxõ tãpimisfo fakishi fẽkaxõ ãfe yora fiyamanõfo. Fĩakaxõ yorafo yoitirofo iskafakĩ: ‘Mã Jesús otoaki,’ ato fatirofoki. Akka ã otoxira ikax a chanĩmiskĩ. Nãskakẽ mã otoara ikaxõ ato parakĩ finakõitirofoki,” fanifo.

<sup>65</sup> Askafaifono Pilato ato yoini: “Nakĩa sorarofõ. Ato iyotakãfe. Fokaxõ mafa kini kexesharatakãfe nã mã apaiyai keskafakĩ,” ato fani. <sup>66</sup> Nãskakanax fonifo. Mã fõkaxõ itipinĩ fanifo nã mafa kini. Nãskata nã aõ fepoa tokirinĩfã sichopa marakka fanifo. Nãskakaxõ ano sorarofõ nĩchitakani fenifo anoxõ kexesharanõfo.

## 28

*Jesús otoni*

(Mr. 16.1-8; Lc. 24.1-12; Jn. 20.1-10)

<sup>1</sup> Judeofãfe ãto pena teneti safaro mã finõano, nãskata nomĩkonõ fakishparikõĩ fonifo a Jesús maia ano. Mariá Magdalenanõ Mariá fetsanõ fonifo a Jesús maia ano õifokani. <sup>2</sup> Nãskata samamakõĩ fãsikõĩ mai naya naya ini, nõko Ifo Niospa ãfe ãjiri nai mēraxõ fotomanaino. Mã fotota a Jesús maia ano kaxõ, a aõ fẽpoita tokirinĩfã fepeta a kamaki tsaoni. <sup>3</sup> Nã nõko Ifo Niospa ãfe ãjiri fafekõini, nã kana peeikai keskara. ãfe rapati oxofinakõĩ ini. <sup>4</sup> Askaito õikani sorarofõ choayanã ratekõinifo. Nãskakanax oa naa keskara nãmã pake pakefõfãnifo. <sup>5</sup> Akka nã nõko Ifo Niospa ãfe ãjirinĩ nã kãro rafe yoini: “Rateyamakãfe. Mẽ tãpiakĩ mã Jesús fenaiyoaki a mastaitafo,” ato fani. <sup>6</sup> “Nonomaki, mã otoaki a mato yoimis keskai. Õifekapo, a rãtaitafo ano. <sup>7</sup> Koshikõĩ fõkaxõ aõxõ tãpimisfo yoirisafatakãfe iskafakĩ: ‘Mã otoaki. Galilea ano kai kiki mã kayoamano. Nãnoa mã õikaikai ato yoitakãfe. Mẽ mato yoikai shinãmakiyamakãfe,’” ato fani.

<sup>8</sup> Ato askafaito nikafaikani nã kãro rafe koshikõĩ fonifo nã Jesús maita anoax. Ratefianã ãto shinã mēra inimakõinifo aõxõ tãpimisfo chanifaifokani ichonifo. <sup>9</sup> Ichoaifono Jesús atoki nokorisatani nã kãro rafeki. Nãskaxõ, “Mẽ oi,” ato fani. Ato askafaino nã kãro rafe Jesúski fõkaxõ akiki inimakakĩ ratokonõ mai chachipakefõfã ãfe fitax ano achinifo. “Mĩ sharakõĩ,” fanifo. <sup>10</sup> Nãskaxõ ato yoini: “Rateyamakãfe. Fokaxõ ãfe extofo ã yoimis keska fakĩ ea ato yoixotakãfe Galilea ano fotanõfo. Nãnoa ea fichifokani kiki,” ixõ ato yoini.

*Sorarofãfe ato yoinifo*

<sup>11</sup> Mã nã kãro rafe foaifono, nã Jesús maia ano kexekanax soraro ranãri fonifo pexe rasi ano. Mã fõkaxõ a ato Nios kĩfixomis ãto xanĩfofo yoinifo nã õiafo keskara. <sup>12</sup> Nã xanĩfo

ano fonifo. Nã anifofo fe mekai fokani, ato fe yoinãsharaxikaki. Nãskakaxõ sorarofõ kori ichapakõ i inãnifo. <sup>13</sup> Ato iskafanifo: “Ato iskafakakĩ yoitakãfe: ‘Nõ fakishchã i oxano Jesús ãfe inafõ fẽkaxõ ãfe yora yometsoanafo,’ ato fatakãfe. <sup>14</sup> Mã ato askafaito xanĩfãfe nikaxõ mato afara faito, nõ yoisharanõ mato afeska fanõfoma,” ato fanifo.

<sup>15</sup> Nãskakaxõ sorarofãfe mã kori fikaxõ, mã fõkaxõ nã ato yoiafo keskafakĩ ato yoinifo. Nãskakẽ nã maitio anoxõ nikaketsanifo. Iskaratĩari a keskara chanĩmara famisfo jude-ofãfe.

*Jesús aõxõ tãpimisfo yoini aõxõ keyokõ i yoifofãsafatanõfo*  
(Mr. 16.14-18; Lc. 24.36-49; Jn. 20.19-23)

<sup>16</sup> Nãskakanax Jesús aõxõ tãpimisfo once fonifo Galilea ano, nã Jesús ato yoiyomis keskai fonifo mãchifã ari. <sup>17</sup> Nãskakata Jesús õikakĩ, “Aicho, mĩ nõko Ifo Jesús nõ mia noikõ i,” fanifo. Akka Jesús otoano ranãrito chanĩmara fanifoma. <sup>18</sup> Nãskaifono Jesús atoki kaxõ ato yoini: “Ëfe Epa Niospa ea yoia nai mẽranoafoya nono mai anoafori ãfe ato yoinõ. <sup>19</sup> Akka nã maitio ano yorafoki fotakãfe ato yoixikakĩ ea Ifofasharanõfo. Nãskaxõ ãfe Epa aneõxõ ato maotisafapatakãfe. Ëfe aneõxori ato askafatakãfe, ãfe Yõshi Sharaõxori ato askafatakãfe. <sup>20</sup> Nãskaxõ ato yoisharakãfe nikasharakõinõfo nã ãfe mato yoia keskara. Akka ãfe mato fe mẽxotaima ipanakaki,” Jesús ato fani.

## Marcos Jesúsnoa Yoikĩ Keneni

*Juan Maotista tsõa istomaxõ ato yoini*  
(Mt. 3.1-12; Lc. 3.1-9, 15-17; Jn. 1.19-28)

<sup>1</sup> Ë mato meka shara yoinõ Jesucristoõnoa. Nã Jesucristo Niospa Fakekõi.

<sup>2</sup> Afetĩama nã Isaías Niospa shinãmanaino Jesucristoõnoa yoikĩ kirika keneni iskafakĩ:

Mĩ nai mēranoax nãmã fotoyoamano nã ěfe meka yoimis ě atoki rekē nĩchixii mĩõnoa ato yoinõ, itipinĩsharanõfo chipo mia nikasharaxikani kiki,

ixõ Epa Niospa ģfe Fakeõnoa yoinino Isaías keneni. <sup>3</sup> Askatari anã keneni iskafakĩ:

Tsõa istoma anoxõ yorafo yoixii akiki feaifono iskafakĩ ato yoixii nã ěfe meka yoimisto ato yoixii iskafakĩ: “Itipinĩsharakãfe. Mã chaima nõko Ifo oi kikĩ. Mãto chaka xatekãfe isharaxikãki,” ixõ ato yoixii,

ixõ Juanoa yoikĩ Isaías kirika keneni. <sup>4</sup> Nãnorikõi Juan ato yoini tsõa istomaxõ yorafo ato maotisafayanã. Ato iskafakĩ yoiyanã: “Anã Nios shinãkãfe mãto chaka xateyanã ě mato maotisafanõ Epa Niospa mãto chaka mato soaxonõ,” ixõ Juan ato yoini. <sup>5</sup> Nãskakē keyokõi Judea anoax feaifono, Jerusalén anoaxri fenifo, ato yoiaito nikai fekani. Nãnoxõ a afara chakafamisfo yoiaifono, Juan ato maotisafapani faka Jordán anoxõ.

<sup>6</sup> Akka Juan ģfe rapati kamĩcho fichi kishi faxõ safepaoni. ģfe sĩtorari fichi koiro safepaoni. Nãskaxõ tseo pipaoni, fonari apaoni. <sup>7</sup> Nãskaxõ Juan ato mēxotaima yoipaoni: “Nã ea keskarama mã chaima oi kiki, nã sharafinakõia. Aato afama mĩshti fatiro, ě atiroma keskara. Akka ě afaama,” ixõ ato yoipaoni Jesúsnoa yoikĩ. <sup>8</sup> “Akka ě mato fãka mēra ikimapakea maotisafakĩ. Akka nã rama oaito ģfe Yõshi Shara mato mēra naneyoi,” ixõ Juan ato yoini.

*Juan Jesús maotisafani faka Jordán anoxõ*  
(Mt. 3.13-17; Lc. 3.21-22)

<sup>9</sup> Nãskano Jesús kani Nazarete anoax, Galilea mai ano. Nãnoxõ faka Jordán anoxõ Juan ato maotisafani. <sup>10</sup> Nãskafaino Jesús fakanakinoax fininãkafã õia nai fepekemeaito õini. Akiki Niospa Yõshi Shara fotoiyoi oa rifi keskara oni. <sup>11</sup> Nãskaino nai mēranoax mekaito nikani iskafakĩ yoiaito: “Mĩ ěfe Fakekõi, ě mia noikõi. Ë mikiki inimasharakõi,” ixõ yoiaito nikani.

*Satanás chakata Jesús afara chakafamapaini*  
(Mt. 4.1-11; Lc. 4.1-13)

<sup>12</sup> Nãskata Niospa Yõshi Sharapa Jesús iyoni tsõa istoma ano. <sup>13</sup> Nãri cuarenta nia ini, yoinãfo mēra. Nãrixõ Satanás afara chakafamapaiyaito ģfe ãjirifãfe kexenifo.

*Galilea anoxõ Jesús ato yoikĩ taefani*  
(Mt. 4.12-17; Lc. 4.14-15)

<sup>14</sup> Akka mã Juan karaxa mēra ikimaitafono Jesús kani Galilea ano Niospa meka shara yorafo yoikai. <sup>15</sup> Ato yoikĩ iskafani: “Nõko Ifo Nios mã chaima matoki oi kiki, xanĩfofinakõi a ixii. Mãto chaka xatekãfe anã Nios nikakõisharaxikakĩ. ģfe meka sharari nikakõikãfe chanĩmara fayanaã.”

*Jesús cuatro feronãfake kenani tarafanãfãñē foe fimisfono ģfe inakõi inõfo*  
(Mt. 4.18-22; Lc. 5.1-11)

<sup>16</sup> Ato askafakĩ yoita Jesús Galilea ĩa kesemē kani. Kakĩ fichini Simón yafi onefetsa Andrés. Nã rafeta tarafanã fimisfo inifo, ãto tarafanãfã faka naki poteaifãfe. <sup>17</sup> Jesús ato yoini iskafakĩ: “Efe fokãfe. Mãfi tarafanãfãñē fimiskĩ. Mã foe ichapa rasi tarafanãfãñē fiafai keskari fakĩ iskaratĩari mã ekeki yora ichapa efexii ě ãto Ifo inõ,” ixõ Jesús ato yoini.

<sup>18</sup> Ato askafaino tarafanãfã fafaikani afe fonifo.

<sup>19</sup> Anã orishta fã katapaikĩ Jesús òia Santiago onefetsa Juan fe nia ini. Nã rafeta ãto apa feta kanõa nakixõ tarafanãfã itipinĩ fanifo, kishifakãkĩ. <sup>20</sup> Nã raferi Jesús ato kenaino nã rafeta ãto apa Zebedeo yafi ãfe inafoya ato nĩchifainifo. ãto kanõari òifainifo Jesús fe fokãkĩ.

*Nã feronãfake niafaka nanea ini*  
(Lc. 4.31-37)

<sup>21</sup> Jesús aõxõ tãpimisfo fe kaax Capernaúm ano nokoni. Pena tenetitã nã ichanãti pexe mẽra Jesús ikikaixõ ato yoikĩ taefani. <sup>22</sup> Ato yoiaito nikakĩ yorafã rasichi Jesús òiketsanifo. “¡Kee! Nikakapo. Nato tãpikĩ finakõia, a Moisés yoikĩ kirika keneni keskara ato tãpimamisfo keskarama, meka sharakõi nato yoi,” fanifo. <sup>23</sup> Judeofãfe ichanãti pexe mẽraxõ yora mẽra niafaka yõshi chaka nanexõ Jesús fãsikõi mekafani.

<sup>24</sup> Iskafakĩ yoini: “¿Afeskakĩ mĩ noko fekaxtefaiyoamẽ, Jesús Nazarete anoato? ¿Mĩ noko a omiskõipakenakafo mẽra mĩ noko potaiyoamẽ? Ë mia òimisnõ, mĩ sharakõinõ Niospa mia nĩchiano,” fani.

<sup>25</sup> Jesús niafaka yõshi chaka iskafakĩ yoini: “Askayamafe. Na feronãfake makinoax tsekekaitãfe,” faino, <sup>26</sup> niafaka yõshi chakata feronãfake choamata, fãsikõi mekainãkafata a makinoax tsekekaini. <sup>27</sup> Askaito òikani, yora rasi ratei fetseyanã ãa ranã yoinã fetsefeno iskakani: “¿Tsoamẽ na? Na tãpisharakõixõ ato yoiai nã xanĩfãfe tãpisharakõixõ ato yoiai keskara. Nã niafaka yõshi chakafãferi nikakani ato yoiaito,” ikanax yoinãnifo.

<sup>28</sup> Nãskakẽ keyokõichi nikaketsanifo Galilea mai anoxõ nã Jesús aka keskara.

*Jesús Simón Pedro rayos sharafani*  
(Mt. 8.14-15; Lc. 4.38-39)

<sup>29</sup> Nã ichanãti pexe mẽranoax Jesús tsekekaini. Santiagonõ, Juannõ fonifo, Simón feta Andrés ãfe pexe ano. <sup>30</sup> Akka nãno Simón ãfe rayos yõxafo yonai raka ini. Nãno rakano Jesús yoinifo. <sup>31</sup> Jesús akiki kaxõ ãfe mĩfi fininĩfofanaino a yonai koshikõi sharatani. Mã sharaxõ pĩchani ato pimaxii.

*A isinĩ ikaifo Jesús ato sharafani*  
(Mt. 8.16-17; Lc. 4.40-41)

<sup>32</sup> Mã xini kaino a isinĩ ikaifoya a niafaka chaka naneafõ Jesúski efenifo. <sup>33</sup> Nãskakẽ nãnoafõ keyokõi yorafo ichanãnifo nã pexe fepoti anoax. <sup>34</sup> Jesús ato sharafani yora ichapa pae fetsa fetsatapafãfe ikaifono. Niafaka chakafori ato mẽra naneano ato makinoa põtani. Akka Jesús niafakafo mekamanima mãmãi tãpiafãfe Jesúsmaĩ Niospa Fakekẽ.

*Jesús ichanãti pexe mẽraxõ Apa Niospa mekasharaõnoa ato yoini*  
(Lc. 4.42-44)

<sup>35</sup> Mã chaima penaino, Jesús fininãkafã pexe rasi mẽranoax tsekekaini tsõa istomaxõ Apa Nios kĩfikai. <sup>36</sup> Mã Jesús ato makinoax penaino kaano Simón ãfe rafeafõ fe kani Jesús fenaikai. <sup>37</sup> Mã fichikaxõ yoinifo iskafakakĩ: “Keyokõichi mia fenakani,” fanifo.

<sup>38</sup> Askafaiãfe nikakĩ Jesús ato kemani iskafakĩ: “Nõ chaima fetsa ano kanõ fokãfe, anoxori nõ ato Niospa meka tãpimanõ. Nãskakẽ ã oa,” ato fani.

<sup>39</sup> Nãskakẽ Jesús kafãsapõni nã Galilea pexefõ tii ano Niospa meka shara ato yoifõfãsafai ichanãti pexe mẽraxõ. Fanĩma mĩshtixõ niafaka yõshi chakafo ato makinoa ato potafõfãsafai.

*Jesús yora rashkishiai sharafani*  
(Mt. 8.1-4; Lc. 5.12-16)

<sup>40</sup> Feronãfake fetsa isinĩ iki rashkishi fetseax Jesúski oni. Akiki oxõ ratokonõ mai chachipakefõfã yoini iskafakĩ: “Ea mĩa sharafapaikĩ, ea mĩa sharafatiro,” fani.

<sup>41</sup> Askafaito nikakĩ Jesús shinãkõini, omiskõiaito. Nãskaxõ ãfe mẽkemã ramãyanã yoini iskafakĩ: “Ë mia sharafanõ. Iskaratĩa mĩ sharaikai,” faino, <sup>42</sup> a rashkishi fetseai koshikõ sharatani. Nãskax sharakõini. <sup>43-44</sup> Mã sharano Jesús nĩchini iskafakĩ yoivanã: “Mĩ tsoa yoiki. Akka nã ato Nios kĩfixomis ispatãfe. Nãskaxõ ovejanã fake foxõ inãfe mia retexonõ Moisés yoini keskafakĩ. Nãskaxõ keyokõichi tãpinõfo a mĩ isinĩ imis mã mĩ sharano,” ixõ Jesús yoini.

<sup>45</sup> Jesús askafakĩ yoifiano, akka nã feronãfake mã kaxõ ato yoifofãsafani. “Õikapo, mã Jesús ea sharafaa,” ixõ ato yoifofãsafani. Nãskakẽ Jesús anã pexe rasi ano ikixõ ato yoitiroma ini. Xafakĩa nini, tsõa istoma ano. Nãskafiaino pexe rasi anoafõ akiki fenifo õifekani.

## 2

### *Jesús yora finimisma sharafani* (Mt. 9.1-8; Lc. 5.17-26)

<sup>1</sup> Mã samaraka pishtata Capernaúm ano anã oni Jesús. Mã nokoano, “Mã Jesús anã oa ãfe pexe ano,” fanifo. <sup>2</sup> Nãskakata Jesús fe anã ichanãnifo pexe mẽraxõ. Jesús nikakani. Pexe ano fospikõikanax ãfe emãiti ninifo ãfe fepoti ano ikitiroxakãkima. Nãnoxõ Jesús ato tãpimani Niospa meka. <sup>3</sup> Mã ato tãpimanainõ feronãfake cuatro nokotoshinifo. Yora finimisma ãfe xefapa efenifo. <sup>4</sup> Mã xĩtiafono ikitirofoma, Jesús ano nã yora finimisma efepaiyaifono ikitirofoma ini. A pexe sapa mãnãoxori paitinĩ mãpekaxõ fotomanifo ãfe xefapa ratakaxõ. Risfi rafeta nexati fãkaxõ a mãnãoxori kini fakaxõ, nã finimisma fotomanifo, ãfe xefapa. <sup>5</sup> Jesús ato õikĩ tãpikõia ini. “Naato nõko yama noko sharafaxotiroki,” faifono Jesús tãpini. Nãskafaifono a finimisma Jesús yoini iskafakĩ: “Efe yorashta, mĩ chaka mẽ mia soaxona,” Jesús fani.

<sup>6</sup> A Moisés yoikĩ kirika keneni keskara ato tãpimamisfãfe ranãrito ano tsoaxõ nikakĩ shinãnifo. <sup>7</sup> Nãnoxõ shinãnifo: “¿Afeskai Jesús mekaimẽ iscai? Tsõa noko chaka soaxotiroma. Nios fistichi noko axotiro. ¿Jesús ãa shinãimẽ Nios?” ixõ shinãnifo.

<sup>8</sup> Askafaifãfe Jesús ato tãpini ãto shinã mẽraxõ shinãifãfe. Jesús ato yoini: “¿Afeskai mã iskara shinãimẽ?” ato fani. <sup>9-10</sup> “Akka ea Niospa shinãmani. Nãskakẽ ã mato õïmanõ Niosxõ na feronãfake ã sharafatiro. Tsõa iskara atiroma, Niospa shinãmanai fistichi atiro. Nãskakẽ ã na feronãfake sharafa mã tãpinõ Niosxõ ãri ãfe chaka soaxotiro,” ixõ ato yoini. Nãskafata anã yoini feronãfake finimisma, <sup>11</sup> “Fininãkafãfe. Mĩ xefa fifaini, mĩ pexe ano katãfe,” fani.

<sup>12</sup> Askafaino fininãkafani. Fininãkafaxõ ãfe xefa fifaini, ãfe pexe ano kaito keyokõichi õinifo. Nãskakaxõ, “¡Aicho, Nios sharakõ! Na keskara nõ õïmismo, sharakõ!” fanifo.

### *Jesús Leví ifini aõxõ tãpimis inõ* (Mt. 9.9-13; Lc. 5.27-32)

<sup>13</sup> Nãskax Jesús anã kani ãa efapa ano. Anoxõ yora ichapa rasichi õinifo. Nãnoax Jesúski ichanãnifo. Nãnoxõ ato tãpimani. <sup>14</sup> Nãnoax kakĩ Jesús finõfãikĩ Leví\* õini, a yonoai ãfe tsaoti mĩsa ano tsoaxõ, ato keyokõi kori fãaito. Nã Leví ãto kori fãamis ini ãfe xanifo minixiki Roma anoa. Leví Alfeo fake ini. Jesús õixõ yoini: “Leví, efe kafe ã mia tãpimanõ,” fani. Askafaino Leví afe kani.

<sup>15</sup> Nãskax Jesús aõxõ tãpimisfo fe kani Leví ato kenano a anoxõ pii fokani. Ato kori fãamisfo fe yora chakafori a Moisés keneni nikamisfomafãferi Jesús feta pinifo. Yora ichapa Jesús fe foafofãinifo. Nãskakẽ yora ichapakõichi Leví pexe mẽraxõ pinifo.

<sup>16</sup> Nãskakẽ a Moisés yoikĩ kirika keneni keskara ato tãpimamisfo nãfori fariseofo inifo. Afãfe Jesús õinifo yora chakafo feta piaino. Nãskaxõ a Jesúsxõ tãpimisfo yõkanifo: “¿Afeskakĩ mãto maestro na ato kori fĩxomisfo feta piimẽ? Yora chakafo fetari pii,” ato faifono,

\* **2:14** Leví ane rafeya ipaoni. ãfe ane fetsa Mateo.

<sup>17</sup> Jesús nikaxõ ato yoini: “A sharafãfe notoro fenakanima, a isinĩ ikaifãfemari notoro fenakanima. Akka nã isinĩ ikaifãfe notoro fenakani. Nãskakãri ã ato yora sharafos kenatapa ikerani ã oama. Nã yora chakafo ã ato tãpimaniyoi ã oanõ,” ato fani.

*Nã foni tenemisfofãfe Jesús yõkanifo  
(Mt. 9.14-17; Lc. 5.33-39)*

<sup>18</sup> Juan Maotista ãfe inafãfe ãto feyafati ipaoni fisti rasi pikakĩ pipaonifoma foni tenemisfo ipaonifo Nios shara shinãkakĩ. Nã fariseofo nãskarari ipaoni ãto feyafati. Nãskakã yora fetsafãfe Jesús yõkanifo tãpipaikakĩ, “Jesús, ¿afeskakĩ mĩ inafãfe mẽxotaima piimẽ? Juan ãfe inafãfe foni tenekaninõ Nios shinãsharakakĩ. Askatari fariseofãferi foni tenekaninõ. Akka, ¿afeskai mĩõxõ tãpimisfo askaramamẽ?” fanifo.

<sup>19</sup> Askafaiãfe anã Jesús ato yoini: “Feronãfake ãfiyaino, yorafo ano fisti ichanãkaxõ afara fetsa fetsatapafo afeta pitirofo inimayanã, aicho fakakĩ akiki inimakakĩ. Akka feronãfake ãfi fikĩ foni tenetiroma. Askafixõ inimakĩ pitiro. <sup>20</sup> Akka mã fene rẽteafono ãfe yorafãfe shinãkakĩ foni tenetiromo,” Jesús ato fani. (“Nãskakã ã nono ikano inimakĩ eõxõ tãpimisfãfe efeta pimisfo. Akka mẽ naano ea shinãkakĩ tsõa pitiroma eõ noikakĩ,” ato fani.)

<sup>21</sup> Askata anã fetsa ato yoini: “Tsõa sama fenaya sama xini kishi fatiroma. Nõ askafaino sama fena samama chakanatiromo. Nãskatari sama fenafe sama xini isharatiroma. Nãskakãri nã ã mato yoiai keskara mã nikakõixõ a mã ipaoni keskara anã mã itiroma mãmãi ea nikakõiax. A mã ipaoni keskara shinãmakita nãskax mãto yora fena keskara shara itiro. <sup>22</sup> Nãskarifikĩ tsõa mãmã fata koiro pisha xini mẽra nanetiroma nã mãmãnõ faraxakaino toxamãiyano. Nãskakã nã mãmã fata fe koiro pisha chakanatiromo. Akka nã mãto xinifãfe mato yoimisfo keskara fe nã ã mato yoiai keskara osinãtiroma. Nã ã mato yoiai keskara Niospa meka sharakõi. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka osinãtiroma. Nãskakã mã nikapaifi mã shinãsharatiroma. Nãskarifikĩ tsõa mãmã fata koiro pisha xini mẽra nanetiroma nã mãmãnõ faraxakaino toxamãiyano. Nãskakã nã mãmã fata fe koiro pisha chakanatiromo. Akka nã mãto xinifãfe mato yoimisfo keskarafe nã ã mato yoiai keskara osinãtiroma. Nã ã mato yoiai keskara Niospa meka sharakõi. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka osinãtiroma. Nãskakã mã nikapaifi mã shinãsharatiroma.”

*Nã judeofãfe pena tenetitã Jesúsxõ tãpimisfãfe aros keskara metesfenifo  
(Mt. 12.1-8; Lc. 6.1-5)*

<sup>23</sup> Jesús aõxõ tãpimisfo fe kani a judeofãfe tenetitã. Tarepa kakĩ ãfe inafãfe aros keskara meteskaxõ fikaxõ pinifo. <sup>24</sup> Nãskafaiãfe fariseofãfe õikakĩ ato iskafanifo: “Õipo. ¿Afeskakĩ mĩ inafãfe na aros keskara metesfekanimẽ na pena tenetitã tsõa yonotiroma ixõ Moisés noko yoifinino?” fariseofãfe fanifo.

<sup>25</sup> Ato askafaifono Jesús ato kemani: “Akka, ¿a nõko xini Davidõnoa kirika kenenifo keskara mã õimismamẽ? ¿David afaa afeska fanimẽ ãfe inafãfe feta fonãikõikĩ? <sup>26</sup> Nãskakã David Nios kĩfiti pexefã mẽra ikikaini. Akka nã Nios kĩfiti pexefã anoax Abiatar nã ato Nios kĩfixomisfãfe ãto xanĩfo ini. Akka nã Nios kĩfiti pexefã mẽranoa David pãa pini a pãa tsõa pishta pifiatiromano. Akka nã ato Nios kĩfixomisfãfe arese a pãa pimisfo ini. Nãskafekã nã pãa David pini a afe foafori ato pikĩni.

<sup>27</sup> “A Niospa taefakĩ feronãfake onifani. Askata teneni. Nã feronãfake Niospa tenemani, pena tenetitã yonoyamanõ. <sup>28</sup> Nãskakã Niosxõ ã yoitiro na pena tenetitã emãi xanĩfokõixõ afeskaimãkai ã yoitiro. Nãskakã ã mato yoi ãfe inafãfe afaa chakafakanima aros keskara meteskakĩ pena tenetitã fonãiki finakõikaxõ,” ato Jesús fani.

### 3

#### *Feronāfake mēke yōshiya Jesús sharafani* (Mt. 12.9-14; Lc. 6.6-11)

<sup>1</sup> Jesús anā ikikaini judeofāfe āto ichanāti pexe mēra. Nāno feronāfake mēke yōshiya ini.  
<sup>2</sup> Aas ōinifo, judeofāferi. “Jesús sharafaimākai nō ōinō na pena tenetitīa,” fanifo yōaxikakī.  
<sup>3</sup> Askata Jesús yoini nā feronāfake mēke yōshiya: “Fininākfata ano nife nakirafe,” fani.  
<sup>4</sup> Askata yorafo yōkani: “¿Afaa nō afeska fatiromē pena tenetitīa? ¿Shara nō atiomē? ¿Chaka nō atioraka? ¿Nō ifitiromē? ¿Nō retetioraka?” ixō ato yōkani.  
 Ato askafaito tsōa kemanima. <sup>5</sup> Ato feratexō Jesús ato ōini, yora fetsafoōnoax shināyamaifāfe. Askatari Jesús shināmitsani. Shināmitsaxō yoikī iskafani feronāfake: “Mēshafe,” fani. Askata nikax mēshatani. Mēshatanaino sharatani. <sup>6</sup> Askaito ōikani farise-  
 ofo ōitifishkinifo. Tsekefainifo ichanāti pexe anoax. Taefakakī shinānifo: “¿Afeskafaxō na Jesús nō retetiromē?” fanifo. Herodes āfe inafō feta shinānifo.

#### *Yora ichapa ini ĩamāfā ano*

<sup>7</sup> Askata Jesús anā kani aōxō tāpimisfo fe ĩamāfā kesemē ano. Nāskakē Galilea anoafō yora ichapa rasi fonifo. Jesús chīfafainifo. <sup>8</sup> Mā yorafāfe nikakanax fonifo, nā Jesús ato sharafaino nikafaikani fonifo Jesús ari. Judea anoafori, Tiro yafi Sidón anoafori fonifo. Jesús ano nokonifo.

<sup>9</sup> “Kayakōi yorafo fei kiki,” ato fani aōxō tāpimisfo Jesús. “Ea shoi aki fetirofoki, ea kanōa fexokāfe ē nanenō,” ato fani. <sup>10</sup> Jesús ichapa yora rasi sharafaino, nāskakē na yora isinī ikani akiki fenifo Jesús shināfāikani ramāpaikani ato sharafanō. <sup>11</sup> Nāskaino a niafaka chakafoyafāfe Jesús ōinifo. Nāskakē Jesús fichikanax feopakefofānifo Jesús nāmā. “Jesús mī Niospa Fakekōiki,” niafaka naneafāfe fāsikōi fanifo.

<sup>12</sup> Askata Jesús ato yoini: “Tsoa yoiyamakāfe ē Niospa Fakeki,” ato fani.

#### *Jesús aōxō tāpimisfo doce feronāfake ifini* (Mt. 10.1-4; Lc. 6.12-16)

<sup>13</sup> Nāskata Jesús māchi keya māpeni. Ari kakī aōxō tāpimisfo ichapa ato kenani ato yoixiki arixō tāpinōfo. Askata Jesús ano fonifo aōxō tāpimisfo. <sup>14-15</sup> Feronāfake doce faxō ato ifini, afe rafeafono ato nīchixiki aōnoa āfe meka shara ato yoitanōfo, nāfāfe yorafo makinoa niafaka yōshi chakafō ato potaxotanōfo. Nāskata nāfo ato aneni, “Ēfe meka yoimisfo” ato fakī. <sup>16</sup> Nā tii ato ifipakeni fisti rasi. Taefakī Simón ifini. Āfe ane fetsafaxoni, Pedro kenaxiki. Simón ikaino, <sup>17</sup> Jacobo yafi āfe onefetsa Juan kenani, āto apa Zebedeo ini. Jesús ato ane fetsa kenani Boanerges fakī. Nō askafatiro, “Yora finakōia oa nai tiri ikai keskara” fakī. <sup>18</sup> Askatari Andrés kenani, Felipe ikaino, Bartoloméri ikaino, Mateori ikaino, Tomásri ikaino, Jacobo fetsari ikaino, Alfeo fake. Askatari Tadeori ikaino, Simón fetsari ikaino. Na Simón nāskara ipaoni nā yora xanīfo chakafapaikī, potapaikī fetsafo feta. Mā ato makinoax ota Jesús fe rafeni. <sup>19</sup> Askatari Judas Iscarioteri ifini. Nā Judás Iscariote Jesús fe iyopaoni. Nāskaxō chipo chakafakī ato achimani Jesús retenōfo. Nā tii Jesús ifini aōxō tāpimiskōi inōfo.

#### *Yora fetsafāfe, “Jesús niafakaōxō ato sharafaira,” fanifo* (Mt. 12.22-32; Lc. 11.14-23; 12.10)

Nāskata māchifā ariax fotota, āfe inafō fe ikikaini pexe mēra. <sup>20</sup> Anā yora rasi ichanāfatishoni. Askaito ōikī, yora ichapa ōikīkakī, pitirofoma inifo. <sup>21</sup> Jesús afe yorafāfe tāpinifo mā pexe mēra kaano fōkaxō Jesús anoa ifipainifo. Yoiaifāfe nikakakī ifipainifo fōkaxō Jesús anā shināsharaima faifāfe.

<sup>22</sup> Askatari a Moisés yoikī kirika keneni keskara ato tāpimamisfo Jerusalén anoax Jesús ano feafono ato yoini: “Na Jesús nā niafaka chakafāfe āto xanīfoōxō nā Beelzebú āfe shara miniano aōxō āto niafaka pōtai,” fanifo.

<sup>23</sup> Jesús nikakĩ ato kemani meka fetsafaxõ: “¿Afeskax Satanás ãa potametiromê? Æa itiriroma. <sup>24</sup> Nãskakëri yorafo paxkanãkanax ãa ranã retenãni keyotirofo. Askatari pexe rasi anoax ãa ranã retenãni keyotirofo. Nãskax isharatirofoma ãa ranã retenãtirofo. <sup>25</sup> Fetsari nã nofe yorafo mĩshti paxkanãtirofoma. Paxkanãx keyotirofo. <sup>26</sup> Nãskakëri Satanás ãfe inafõ fe paxkanãtiroma. Paxkanãx keyotiro anã xanĩfo itiriroma.

<sup>27</sup> “Askatari feronãfake mitsisipakõni taefakĩ metexkere akaxoma tsoa ãfe pexe mëra ikitiroma ãfe afama mĩshti fĩaxikakĩ. Nãskarifiakĩ nõ yora nexaxõ ãfe afara nõ fiatiro keskafakĩ, nãskarifikĩ ã Satanás nexaxõ Niospa Yõshi Sharaõxõ ã Satanás ãfe ina põtatiro.

<sup>28-29</sup> “Chanĩma ã mato yoikõni, keyokõni chaka Niospa soaxotiro. Askatari keyokõni meka chakari Niospa soaxotiro. Askafixõ fëtsa yoixõ, ‘Jesús Niospa Yõshi Sharaõxõ askara ato sharafatiroma, Satanás ãfe yõshioxõ ato sharafai,’ askafaito Niospa ato ãfe chaka soaxotiroma, ãto neepakexanõ,” ato fani Jesús.

<sup>30</sup> Anori yorafãfe yoini: “Jesús yõshi chakaya,” fanifo. Nãskakë Jesús ato yoini Epa Niospa Yõshi Sharaõxõ ato sharafai.

*Jesús õifekani ãfe afanõ ãfe extonõ fenifo*  
(Mt. 12.46-50; Lc. 8.19-21)

<sup>31</sup> Jesús ãfe afanõ onefetsanõ nokonifo a Jesús ano. Mã nokokanax pexe mëra ikinifoma. Xafakĩa ninifo pexe emãiti. Nãnoxõ yora fetsa nĩchinifo Jesús yoitanõfo. <sup>32</sup> A Jesús foaketifaya kekanax tsoafãfe yoinifo: “Jesús, mã mĩ efanõ mĩ extonõ nokoafõ. Mia yõkakamekani,” fanifo.

<sup>33</sup> Askafafãfe ato Jesús kemani: “Èfe efanõ, ãfe poinõ, ã ato fistis shinãima. Yora fetsafori ã ato shinãni efe yora keskarafo. ¿Tsoamë ãfe efa, ãfe extofori? ¿Mã tãpipaimë tsoamãni ãfe efa, ãfe extofori? È mato yoinõ,” ato fani.

<sup>34</sup> Askafaxõ Jesús õini a tsoafo. Nãskaxõ ato yoini: “Nã ea Ifofaifo, ea nikaifo efe yorafo. Nakĩa ãfe extofo, ãfe efafo,” nãskafani. <sup>35</sup> “Nã Niospa fichipaiyai mã akaino Niospa mato fichipaiyai keskarifikĩ nã ãfe extofo, ãfe chikofo, ãfe efa keskara,” ato fani Jesús.

## 4

*Jesús ato yoini meka fetsafaxõ fimi exe saamisnoa*  
(Mt. 13.1-9; Lc. 8.4-8)

<sup>1</sup> Nãskata anã Jesús ato tãpimani ãa kesemëxõ. Nãskakë yora ichapa ichanãnifo Jesús ano. Nãskaifono Jesús kanõa ãa ketokonõ rakano aõ naneinĩkafanax tsaoni. Akka yorafo ãa ketokonõ tsaonifo. <sup>2</sup> Nãskaxõ Jesús ato tãpimani afama mĩshti meka fetsafaxõ. Ato yoikĩ iskafani:

<sup>3</sup> “Ea nikakãfe ã mato yoinõ,” Jesús ato fani. “Feronãfake fistichi fimi exe saafoni ãfe nõxati mëra këchoxõ fokĩ. <sup>4</sup> Fimi exe saafõkaino ranãri fai nẽxpakĩa pakeaino a kachikirixori peyafãfe pini. <sup>5</sup> Nãskata fimi exe ranãri makexfoki pakei fetseni mai shara anoma. Nãskakë samamakõni fimi exe foaipaini. <sup>6</sup> Akka mã foaipaiyaito xinĩ namani, yosipanã, ãfe tapokairoko mai mëra kasharakë. Foaikax, samama nani xinĩ tsasifaano. <sup>7</sup> Akka ranãri fimi exe moxafo mëra pakeni. Nãskakë moxafo foaikĩ namani. Nãskakë fimi exe foaikax fimi yamax nani. <sup>8</sup> Akka fimi exe ranãri mai shara ano pakeni. Nãskax foaisharax fimi ichapayakõni ini. Fetsa treinta fimiya ini. Fetsa sesenta fimiya ini. Fetsari cien fimiya ini.”

<sup>9</sup> Nãskaxõ Jesús ato yoini: “Mã pachoyakĩ ea nikasharakõikãfe,” ato fani.

*Meka fetsafaxõ yorafo yoixõ a aõxõ tãpimisfo xafakĩakõni ato yoini*  
(Mt. 13.10-17; Lc. 8.9-10)

<sup>10</sup> Mã yora ichapa rasi foaifono Jesús ares nẽteni, akka nã foafãfema a aõxõ tãpimisfo docefo fe nẽteafãfe yõkanifo. “¿Afaa mã noko yoipaiamë meka fetsafaxõ?” faifono, <sup>11-12</sup> Jesús ato kemani, “Epa Niospa a ika anoxõ ãfe yorafo ato ikinãni ãfe keskaramãkĩ ã mato xafakĩa



yoinō. Akka fetsafo meka fetsafaxō ē ato yoiaki. Akka ōifikakī tāpikanima nikafikakīri nikasharakanima. Nios Ifofakaspakani. Nāskakē Niospari ato chaka soaxotiroma.”

*Jesús meka fetsafaxō fimi exe saamisnoa ato yoini ato tāpimasharakōixiki*

*(Mt. 13.18-23; Lc. 8.11-15)*

<sup>13</sup> Nāskata ato yoini: “¿Nā ē ato meka fetsafaxō yoiaki mā tāpiamamē? Akka, ¿afeskakī fētsa nikatiromē? <sup>14</sup> Nā fimi exe fanamis, nā Niospa meka yoimis keskara. <sup>15</sup> Akka ranāri yora fetsafo fimi exe fai nēxpakīa pakea keskarrafo Niospa meka nikafikani. Akka Niospa meka mā nikafiaifono Satanás ato xītitiro peyafāfe fimi exe pitiro keskafakī. <sup>16</sup> Fetsafo nā fimi exe tokirifo mēra pakeax foaipaiyai keskarrafo. Niospa meka nikai akiki inimakōikī nikayotiro. <sup>17</sup> Akka nā fimi exe foaikax āfe tapo mai mēra ikikēma xinī namatiro keskafakī. Nāskarifikī fētsa taefakī Niospa meka nikai inimayotiro. Akka afara chaka nokoaino anā inimatiroma anā Nios Ifofatiroma, Niospa meka anā āfe shinā mēra nanekema. <sup>18-19</sup> Akka atiri fimi exe moxafo mēranoax foaikax yositiroma keskarrafo. Nāskariatirofo Niospa meka shara nikasharakanaxma. Akka fētsa afarrafo shinākī āfe shinā mēraxō shināchakakōitiro. Nāskaxō kori ichapakōi noikī, ‘Ē kori ichapayax ē inimakōitiro,’ ixō shinākī Niospa meka anā shināima. Nāskakē Niospa meka nikafikī afara fetsafo shināino afaa Niospa axotiroma. <sup>20</sup> Akka atiri fimi exe mai shara anoax foaikax fimi ichaya ini. Āfe fimi treinta ini, fetsari afe fimi sesenta ini, fetsari āfe fimi cien ini. Nāskafakīri fētsa Niospa meka nikakōikī nikasharakōitiro. Akka fētsa Niospa meka nikakōisharakī nā fimi exe treinta keskara itiro, fetsari nikasharakōikī nā fimi exe sesenta keskara itiro, fētsari nikasharakōikī nā fimi exe cien keskara itiro,” ixō Jesús ato yoini.

*Meka fetsafaxō rāpariki Jesús aōxō tāpimisfo yoini*

*(Lc. 8.16-18)*

<sup>21</sup> Nāskatari ato yoini. “Akka tsōa rāpari otaxō kafo mēra nanetiroma, askatari a ika nāmā tsāotiroma chaikairoko chaxanō. Akka nō rāpari fomākīa tsāofaano chai chaxatiro. Nāskakē ōisharakōitirofo. <sup>22</sup> Nāskarifiakī nō afaa pishta onetiroma, nō onefiano keyokōichi tāpitirofo. Nāskarifiakī a fomāyomisfo Niospa xafakīa faxii. <sup>23</sup> Mā pachoyakī ea nikasharakōikāfe,” ixō Jesús ato yoini.

<sup>24</sup> Nāskaxō anā ato yoini. “Nikakapo, ē mato yoinō. Akka a ea nikakī finasharakōiai, Niospa tāpimasharakōi. <sup>25</sup> Akka nā tāpia nā Epa Niospa tāpimakī finasharakōi. Akka fetsa ē tāpisharakōia iflaxō nikamiskēma, askara yora nā tāpia pishta Niospa anā fīatiro,” ixō Jesús ato yoini.

*Jesús meka fetsafaxō yoini, fimi exe yositiroōnoa*

<sup>26-29</sup> Nāskata Jesús anā ato yoini. “Epa Nios xanīfāfe noko īkinā iskaraki. Nā feronāfāke fimi exe mai shara ano fana keskaraki. Mā fanax oxatiro fakishi, akka penata yonotiro. Nāskakē ifāfe ōiyamaino ares fimi exe yositiro. Nāskakē mai mēranoax fimi exe āfe tapo foaikax yositiro. Mā yosiax efapa itiro, nāskata chipo fimitiro. Nāskata mā fana fimi pachiano, ifāfe topitiro māmāi pachiano,” ixō Jesús ato yoini.

*Mostaza exeōnoa yoikī meka fetsafaxō Jesús ato tāpimani*

*(Mt. 13.31-32; Lc. 13.18-19)*

<sup>30</sup> Askata anā Jesús ato yoini iskafakī: “Afe keskaramākī Nios xanīfāfe noko īkinā ē mato yoinō. <sup>31</sup> Nā mostaza exe yōra āfe tarepa fanatiro. Akka nā fimi exe pishtakōi fetsafo keskerama. <sup>32</sup> Akka nā fimi exe fanax, mā yosiax efapakōi itiro fana fetsafo keskarama. Nāskakē mā teshpapafai fetseano peyafāfe āfe teshpafano ano naa fatiro. Nāskarifiakī taefakī ichapatoma Nios Ifofayotirofo. Akka chipo ichapafāfe Ifofakōitirofo,” ixō Jesús ato yoini.

*Afama mīstikiri yoikī meka fetsafaxō Jesús ato yoipaoni  
(Mt. 13.34-35)*

<sup>33</sup> Nāskatari meka fetsafaxō Jesús ato tāpimani Niospa meka shara keyokōi tāpikanimākai. <sup>34</sup> Akka meka fetsafaxō Jesús mēxotaima ato yoipaoni. Akka nā aōxō tāpimisfo xafakīakōi ato yoipaoni.

*Jesús nefe yafi ĩamāfā poo iki meseniaito nishpa fani  
(Mt. 8.23-27; Lc. 8.22-25)*

<sup>35</sup> Mā yātapakeaino nā pena fisti Jesús aōxō tāpimisfo yoini: “Nō okiri ĩamāfā pokefainikanō, fokāfe,” ato fani.

<sup>36</sup> Nāskata nāno yorafo nīchifainifo, Jesús iyoifokakī. Nāskakanax kanoānāfā mēra nanefainifo. Mā foaifono kanōanāfā fētsari fokākī yorafāfe ato chīfafainifo. <sup>37</sup> ĩamāfā pokefainifono nāno atoki nēfefākōi nokoni. Atoki nēfefākōiaino ĩamāfā pooiyanā kanōanāfā faka fospikōini. <sup>38</sup> Akka Jesús oxano kanōanāfā chipo kamaki rakax, āfe tēkesati kamaki tēkesameax. Oxakē aōxō tāpimisfāfe mōinifo iskafayanā: “¿Ifo, mī noko shināimamē mā nō āsaikai?” faifono, <sup>39</sup> Jesús fininīkafāta, “Nēfe, nishpafe,” fata, “Īmā nishpafe,” fani.

Nāskafaino nefe nishpani anā feroinima ĩa fe nefe. <sup>40</sup> Nāskata chipo Jesús aōxō tāpimisfo yoini. “¿Afeskaī mā rateimē? ¿Mā ea chanīmara fasharamamē?” ato fani.

<sup>41</sup> Ato askafaino, akka aōxō tāpimisfo ratekōiyanā āa ranā yoinānifo iskakani: “¿Keel! ¿Na feronāfake afe keskaramē na nefe feta ĩamāfānē ato yoiaito nikaifo?” ikanax yoinānifo.

## 5

*Gadara anoxō Jesús feronāfake makinoa niafaka rasi potani  
(Mt. 8.28-34; Lc. 8.26-39)*

<sup>1</sup> Nāskata okiri ĩamāfā pokefaikanax nokonifo, Gadara mai ano. <sup>2</sup> Nāskata Jesús kanōanāfā makinoax fotopakekafanaino, nā feronāfake niafaka yōshi chaka nanea nāno akiki oni. Nā feronāfake nā maiifo kinīfā mēranoax oni. <sup>3</sup> Mai kinīfā mēra ipaoni. Tsōa nexatiroma ipaoni kaninānā nexafiaifono. <sup>4</sup> Akka mēxotaima kaninānā otekere ata metekere ata fafiaifono, kaninā tesa tesa aki fetsapaoni. Tsōakai afeska fatiroma ipaoni. <sup>5</sup> Nāskata penata kafāsata fakishchāiri kafāsapaoni, māchifā ariri māpepaoni maiifo anori kinīfā mēra kapaoni. Nāskata fiisiyanā tokirinī āa tsakamepaoni. <sup>6</sup> Akka chai ixō Jesús fichiax, akiki farekekeranax aō ferotaifi ratokonō mai chachipakefofāni. <sup>7-8</sup> Fāsikōi yoini fiisiyanā. “¿Ea afeska fayamafe, Jesús! Mī Nios Sharapa Fakekī, ē mia yoi Niospa mia ōi kiki ea omiskōimayamafe,” fani. Nāskai mekani, akka Jesús māi iskafakī yoiano: “Niafaka yōshi chakata, na feronāfake makinoax tsekekaitāfe,” māmāi faano.

<sup>9</sup> Askafaito Jesús yōkani: “¿Mī afe anemē?” faito, nāato kemani: “Ēfe ane Legión nōmāi ichapax,” fani.

<sup>10</sup> Nāskaxō nā nīafaka Jesús yoini iskafakī: “Mai fetsa ari noko nīchiamape,” fani. <sup>11</sup> Akka nā chaima māchifā mēnānēxō kochifāfe pinifo. <sup>12</sup> Nāskakē niafaka yōshi chakafāfe iskafainifo: “Kochifo mēra noko nīchife, kochifo mēra nō ikinō,” faifono, <sup>13</sup> kochifo mēra Jesús ato nīchini. Nāskakē niafaka yōshi chakafo feronāfake makinoax tsekekainax kochifo mēra iki fetseni. Nā niafaka chakafo dos mil ini. Nā niafakafo kochifo mēra ikiano kochifo ichoax māfāfā ariax ĩamāfā mēra keyopakeax āsai fetsenifo.

<sup>14</sup> Askaito ōikani nā kochifo kexeafō ichoi fetsenifo. Mā fokaxō a pexe rasi anoafō ato yoinifo, a pexe rasi pasotai ikafori ato yoinifo nā ōiafo keskara. Ato askafakī yoiaifono nikakani yōrafā rasi fenifo kochifo āsaito ōipaikani. <sup>15</sup> Mā nokokaxō ōiafo nā feronāfake tsoa ini rapati shara safeax, mā shināsharai a makinoax mā niafaka yōshi chaka tsekeano. Nāskaito ōikani yōrafā rasi ratei fetsenifo. <sup>16</sup> Nā Jesús niafakafo kochifo mēranoa potaito ōikaxō āto kaifo yoifokani fonifo. <sup>17</sup> Nāskakē yorafāfe yoinifo iskafakakī: “Jesús, nonoax katāfe, nō mia ōipaimakai,” fanifo.

<sup>18</sup> Mā Jesús kanōanāfā mēra naneinākfaino, nā feronāfake niafakaya ikato, “Ēri mefe kapai,” fani. <sup>19</sup> Nāskafaino, “Maa, mī efe katiroma. Mī pexe ano katāfe. Mī kaifofo fe kaxō mefe yorafo ato yoitāfe a nōko Ifāfe mia sharafa, mīo noikī mia sharafaki,” ixō Jesús yoini.

<sup>20</sup> Askafaito nikafaini nā feronāfake kani. Kaxō nā pexe rasi anoafō ato yoini, nā Decápolis anoafō nā Jesús sharafaa keskara. “Aira, nikakapo, ¿afeskax sharamē?” iki fetsenifo.

*Jairo fake xotofake mā nakē Jesús otofani. Askatari kēromāri Jesús rapati mēeax sharani (Mt. 9.18-26; Lc. 8.40-56)*

<sup>21</sup> Askafata Jesús mā kanōanāfānē ĩamāfā pokeferani oano yōrafā rasi ano ichanānifo. Akka Jesús ĩamāfā ketokonō nēteni. <sup>22</sup> Akka nāno nā ichanāti pexe ano xanīfo fisti akiki oni, āfe ane Jairo. Jesús fichiāx a nāmā feopakekafani. <sup>23</sup> Nāskaxō yoini iskafakī: “Mā ēfe fake xotofake nai kiki. Mī mēkemā ea rāmāxoniyofe, sharax ninō,” ixō yoiaino, <sup>24</sup> Jesús afe kani, yōrafā rasiri afe fonifo. Afe fokakī shoiakī fetsanifo.

<sup>25</sup> Nā yōrafā rasi mēra kēro fisti ato fe kani, doce xinia aka ini isinī iki, imi nesemisma ini. <sup>26</sup> Omiskōitiani sharapai notorofo mēra katiani, mā kori potakī mitotiani ini. Tsōa pishta sharafatiroma ini, askatamaroko isinī iki finakōini. <sup>27-28</sup> Nā kēromā Jesúsnoa yoiāifāfe nikani. Nāskakē yōrafā rasi foaifono ato acho kaxō āfe tari kexa ramākani. “Ē āfe tari kexa ramākax ē sharatiroraka,” ixō āfe ōiti mēraxō shināni. <sup>29</sup> Nāskaxō āfe tari kexa ramākaxō meea āfe imi kosikōi nesetani. Nāskaxō āfe yora meea mā sharakōia meeni. <sup>30</sup> Jesús mā tāpīxō āfe sharaōnoax nā kēro mā sharano, yōrafā rasi mēra fesoakekafā ato yōkani: “¿Tsōa ea tari ramākamē?” ato faito, <sup>31</sup> a aōxō tāpimisfāfe yoinifo iskafakakī: “¿Mī meimamē yorafāfe mia shoiakifetsakaxō mia pitsikinaifāfe? ¿Afeskakī mī noko yōkaimē tsōa ea ramāmē?” ixō fanifo.

<sup>32</sup> Askafaifono Jesús aa kemataima ōiakeni, tāpīxiki tsōa ramāmākī. <sup>33</sup> Nāskaino nā kēromā ratei choayanā a sharafaa mā tāpīxō, akiki kaxō ratokonō mai chachipakefōfā yoini: “Ē mia tari kexa ramākax mē shara,” ixō yoita a isinī itianiri yoini. <sup>34</sup> Nāskafaito Jesús yoini: “Yōxashta, mā mī shara ea chanīmara faax. Nāskakē tanaima katāfe a mī isinī imis mā mī sharaki,” fani.

<sup>35</sup> Jesús mekai xateamano nā xanīfo Jairo pexe anoax fetsafo akiki fēkaxō yoifekani fenifo. Iskafakī yoinifo: “Mā mī fake naaki anā nōko Ifo fekaxtefayamafe,” faifono, <sup>36</sup> akka Jesús ato nikakima, iskafakī nā xanīfo Jairo yoini: “Ratekima, ea chanīmara fafe,” ixō yoini.

<sup>37</sup> Nāskaxō Jesús, “Tsoa nofe kaima kiki,” ato fani. Pedro iyota, Santiago iyota, āfe exto Juan iyota ato fani. <sup>38</sup> Nāskata mā Jairo pexe ano nokokaxō ōiafo yorafo oiakani fiisinifo nā fake xotofake manokani mā naano. <sup>39</sup> Nāskata pexe mēra ikikaixō ato yoini iskafakī: “¿Afeskai mā oiai fiisikimē? Na fakekai nakeroko oxanō,” ato fani.

<sup>40</sup> Ato askafaito yorafāfe Jesús ōsaketsanifo. Askafaifono pexe xaki mēranoa keyokōi Jesús ato kāimani. Nāskaxō apa yafi afa iyonī, a afe foafori afe fonifo. Nāskakanax nā fake xotofake raka ano ikifainifo. <sup>41</sup> Nāskata Jesús mēkemā mētsoinīfōfā yoini: “Xotofakeshta, ē mia yoikai fininīkafāfe,” faino, <sup>42</sup> kosikōi fininīkafāni, nā xotofake doce xinia aka ini. Mā fininīkafānax kani. Nāskaito ōikani yorafo ratei fetsenifo. “¡Kee, ōikapo! ¿Afeskaxō otofamē?” fanifo. <sup>43</sup> Nāskaxō Jesús ato yoini: “Mā tsoa yoiki na fake xotofake nakē ē otofakī,” ato fani. Nāskaxō, “Pimakāfe na fake xotofake,” ato fani.

## 6

*Jesús Nazarete anoxō nikakaspanifo (Mt. 13.53-58; Lc. 4.16-30)*

<sup>1</sup> Nāskata Jesús nānoax kani āfe maikōi ano. A aōxō tāpimisfori afe fonifo. <sup>2</sup> Nāskata pena tenetitīa ichanāti pexe mēraxō ato yoikī taefani. Anoxō Jesús ato yoiāito nikakani yorafo āa ranā yoinākani iskanifo: “Aira nikakapo, ¿Fanīxō iskara tāpikī finakōiamē?”

Tāpikī finakōixō afama mīshtifo fai tsōa atiroma keskafai,” ikanax āa ranā yoinānifo. <sup>3</sup> “¿Akka namamē a mīsa famis? María fake Santiagonō Josēnō Judasnō Simōnnō āto ochi. ¿Akka mā ōimamē afe chikofori nono nofe ikafo? Nāskakē nō nikapaiyaitoroko,” fanifo. <sup>4</sup> Askafaifono Jesús ato yoini iskafakī: “Na mai tio anoxō a Niospa meka yoimis nikakōitirofo aōnoa yoisharakōiyanā. Akka āfe maikōi anoxō nikatirofoma, āfe kaifofa feta afe yorakōifāfe.”

<sup>5</sup> Nāskakē arixō afama mīshti fapaifikī anima. Akka a isinī ikaifo fisti rasi ato ramāino sharai fetsenifo. <sup>6</sup> Nāskata Jesús shināni: “¿Afeskakī ea chanīmara fakanimamē?” ixō tsōa nikayamaino. Nāskakē pexe rasi chaima ano Jesús kafāsani ato tāpimafofāsafai.

*Jesús aōxō tāpimisfo nīchini Nios Xanīfoōnoa ato yoitanōfo*  
(Mt. 10.5-15; Lc. 9.1-6)

<sup>7</sup> Nāskata aōxō tāpimisfo doce kenani. Ato kenaino akiki feafono rafe rasi faxō ato nīchini: “Eōxō niafaka yōshi chakafo ato makinoa pōtatakāfe,” ixō ato yoini. <sup>8</sup> Nāskaxō anā ato yoini: “Fāi kakī, mā afaa fokiki, akka māto mēsteti fisti mā fotiro. Māto pishari mā fokiki a mā piairi mā fokiki māto koriri mā fokiki. <sup>9</sup> Nāskax fotakāfe māto sapato fistiya, māto rapati fetsari mā fokiki.” <sup>10</sup> Nāskaxō ato yoini: “Mā pexe fetsa mēra ikiax nāno nētekāfe, nā mā anoax kaitīa. <sup>11</sup> Akka fatora pexe rasi anoxō mato ifikaspayanā mato nikakaspafono anoax tsekekāfe māto taekinoa mapo taa taa ayanā. Mā askafaino tāpinōfo Nios atoki inimayamaino. Ē mato parakima yoi. Nā pexe rasi Sodoma anoafō feta Gomorra anoafāfe afara chakakōi fapaonifo. Nāskakē Niospa nā ato omiskōimanaitīa ato omiskōimaxii. Akka nā mato nikakaspaifo nāfo ato omiskōimaki finakōixii,” ixō Jesús ato yoini.

<sup>12</sup> Nāskakē Jesúsxō tāpimisfo anoax fonifo yorafo yoifokani. “Māto chaka xatekaxō Nios Ifofakāfe,” ato fayanā. <sup>13</sup> Ato makinoa ichapa niafaka chakafo potanifo. A isinī ikaifoya ato sharafayanā xiniyaxō ato māmāyanā.

*Juan Maotista nani*  
(Mt. 14.1-12; Lc. 9.7-9)

<sup>14</sup> Xanīfo Herodes nikani Jesúsnoa yoiaifono aōnoa fanīma mīshtixō yoifofāsafaifono. Nāskakē Herodes shinākī iskafani: “Mā Juan Maotista otoita, nāskakē āfe sharaōxō ato sharafai,” ixō shināni.

<sup>15</sup> Akka fetsafāfe yoikī iskafanifo: “Nā ato Niospa meka yoimis Elíaskīa,” faifono, fetsafāferi yoikī iskafanifo: “Nato Niospa meka ato yoimis, nā afetīama Niospa meka ato yoipaonifo keskafakī,” ixō yoiaifono.

<sup>16</sup> Nāskafakī yoiaifāfe nikai Herodes iskani: “Nākīa Juan, mē ato textemafaitano mā anā otoa,” ixō shināni.

<sup>17</sup> Herodes Juan reteyoamano yoikī iskafani: “Mī exto āfi fīayamafe,” faito nikakī, Herodes akiki ōitifishkiki āfe sorarofō yoini achikaxō metexkere akaxō karaxa mēra ikimanōfo. Akka nā Herodías Felipe āfe āfi ini, nā Felipe Herodes āfe exto ini. Akka nā Herodes Herodías fe fīanāni. <sup>18</sup> Akka Juan Herodes yoini: “Na mī exto āfi mī fīatiroma,” ixō yoiaino, <sup>19</sup> nāskakē Herodías Juan noikaspakōikī retepaini. Akka retepaifkī retetiroma ini. <sup>20</sup> Akka Herodes Juanki rateni māmāi tāpiax Juanmāi feronāfake sharakōikē Nios Ifofasharakōia. Nāskakē kexesharakōini. Nāskakē āfe āfinī noikaspafaito nikafikī, “¿Ē afeskaimē?” ixō shināta, Herodes Juan nikakōini. <sup>21</sup> Akka Herodías mā ato Juan retematiro ini, Herodes āfe cumpleaños ikaino. Nāskakē Herodes fista akī afe xanīfofoya soraro xanīfofoya Galilea anoax xanīfofori ato ichanāfani. <sup>22</sup> Nāskaifono Herodías fake xomaya fista ikaino ikikainax ares yorafāfe ōinōfo mairani. Mairaito ōikī Herodes inimani, a afeta piaifori inimanifo askafanifo. Nāskakē nā xanīfāfe nā fake xomaya iskafani: “Ea yōkafe a mī fichipaiyai, ē mia mininō,” fani. <sup>23</sup> “Mā na yorafāfe ōikani ē mia pāraima a mī fichipaiyai keskara ea yōkafe ē mia mininō,” ixō yoini.

<sup>24</sup> Askafaino nã xomaya kãikaixõ afa yoini iskafakĩ: “¿Ë afaa xanĩfo yõkatromẽ?” faito ãfa kemakĩ iskafani: “Juan textexõ ea ãfe mapo inãfe fafe,” fani.

<sup>25</sup> Nãskata nã xomaya anã ikikaixõ xanĩfo yoini iskafakĩ: “Iskaratĩa sapaki rãtaxõ Juan Maotista textexõ ea ãfe mapo inãfe,” fani.

<sup>26</sup> Askafaito nikai xanĩfo shinãmitsakõini, Juan shinãni. “Akka na yorafãfe nikaifono mẽ na kẽro xomaya yoia. Nãskakẽ ã to Juan textemapaiyamafikĩ ã to textemani,” ixõ shinãni. <sup>27</sup> Nãskakẽ ãfe soraro nĩchini, Juan textexõ ãfe mapo fixotanõ. <sup>28</sup> Nãskakẽ soraro karaxa mẽra kaxõ, Juan textexõ ãfe mapo sapaki feni. Nãskaxõ nã kẽro xomaya inãno, nãatori ãfe afa inãni.

<sup>29</sup> Nãskakẽ Juan ãfe inafãfe nikanifo mã texteaifono. Nãskakẽ ãfe yora fonifo maifaxikakĩ.

*Jesús cinco mil feronãfakefo ato pimani*  
(Mt. 14.13-21; Lc. 9.10-17; Jn. 6.1-14)

<sup>30</sup> Mã askano a aõnoa yoimisfãfe afe ichanãkaxõ yoinifo a atanaifo keskara ato tãpimayanã. <sup>31</sup> Askafaiãfe nikakĩ Jesús ato yoini: “Niri fekãfe tsõa istoma ano nores kaxõ nõ teneyonõ,” ato fani. Yorafo mẽxotaima atoki feaifono, nãskakẽ pitirofoma inifo.

<sup>32</sup> Nãskakẽ Jesús aõxõ tãpimisfo fe kanõanãfãnẽ tsõa istoma ano kani. <sup>33</sup> Akka mã fõkaxõ yorafãfe Jesús kaito õikakĩ tãpinifo. Nãskakẽ nã peixe rasi anoafõ nã aõxõ tãpimisfo fe kai ari ichonifo. Jesús aõxõ tãpimisfo fe nokoamatai nokoi taenifo. <sup>34</sup> Mã nokoax Jesús kanõanãfã makinoax fotopakekafã õia yõrafã rasi õini. Ato fichixõ ato shinãkõini, nã oa ovejafo ifomais keskara ato õikĩ. Nãskaxõ afama mĩshtifo ato yoisharakõini. <sup>35-36</sup> Nãskakẽ mã yãtapakeino aõxõ tãpimisfo akiki fõkaxõ yoinifo: “Mã yãtapakei kiki nono tsoa ikamakĩ. Na yorafo nĩchife peixe rasi ari yafi a peixe pasotai ikafo ari fokaxõ a piaifo fitanõfo,” faifono, akka Jesús ato kemani: <sup>37</sup> “Askakakĩma mãroko ato pimakãfe,” ato faito, kemanifo iskafakakĩ: “¿Mĩ shinãimẽ na yorafo pimaxiki kaxõ a piaifo dos cientos kori exenẽ pãa nõ ato fixotanõ?” faifono, <sup>38</sup> Jesús ato yoini: “¿Afe tii mã pãayamẽ? Fokaxõ õiyotakãpo,” ato faito, mã fokaxõ õitakakĩ yoinifo iskafakakĩ: “Nãno cinco pãa yafi foe rafes,” fanifo.

<sup>39</sup> Nãskakẽ ato yoini: “Ichanãfaxõ na yorafo yoikãfe fasi ano tsaonõfo,” ato fani. <sup>40</sup> Ato yoikĩ askafaiifono keyokõi tsaõi fetsenifo, fetsa ano cien ini, fetsa ano cincuenta ini. <sup>41</sup> Nãskata Jesús cinco pãa yafi foe rafe tsomainĩfofã, nai foisnĩfofã Apa Nios aicho fani. Nãskata mã pãa kaxkeketsaxõ aõxõ tãpimisfo inãni, yorafori ato inãnõfo. Askatari foe raferi keyokõi ato inãnifo pinõfo. <sup>42</sup> Nãskakẽ mã keyokõichi pikanax mãyakõinifo. <sup>43</sup> Nãskakẽ a chetefafo pãa yafi foe doce fẽta fospikõiya ini. <sup>44</sup> A cinco pãa piaifo cinco mil feronãfakefos inifo.

*Jesús ãamãfã femãkĩa kani*  
(Mt. 14.22-27; Jn. 6.16-21)

<sup>45</sup> Mã yorafo pimata Jesús aõxõ tãpimisfo yoini iskafakĩ: “Kanõanãfãnẽ nanekãfe okiri ãamãfã pokefaitaxikãki Betsaida ano rekẽ nokotaxikakĩ. Ë fenakaimakai, ã na yorafo nĩchyonõ,” ixõ ato yoini. <sup>46</sup> Mã yorafo nĩchita mãchi keya ari arese kani arixõ Apa Nios kĩfikai. <sup>47</sup> Mã fakishaino ãamãfã nakirafe kanõanãfã ini. Akka Jesús kanima, ares fisti nẽteni. <sup>48</sup> Jesús õini aõxõ tãpimisfãfe tõfeaiãfe nẽfetanẽ ato katima faino ãamãfã pooiki mesenikõiaino, mã penaino. Nãskakẽ Jesús atoki kani ãamãfã femãkĩa. Akka ãamãfã femãkĩa kakĩ oa ato finõfainai keskara ini. <sup>49-50</sup> ãamãfã femãkĩa kaito õikakĩ niáfakara ixõ shinãkani. Tai tai inifo. Nãskakẽ keyokõichi õikani rateaifono. Akka Jesús ato yoini iskafakĩ: “¿Afeskai mã rateimẽ? Ëki rateyamakãfe,” ato fani.

<sup>51</sup> Nãskata kanõanãfã mẽra naneinãkafã, nẽfefã nishpafani. Nẽfefã nishpafaito õikakĩ a aõxõ tãpimisfãfe, “¡Kee! ¿Afeskaxõ nẽfefã nishpafaimẽ?” fanifo. <sup>52</sup> Akka Jesúsnoa tãpiyonifoma, Jesús afama mĩshti fatiroxakĩ cinco pãa cinco mil feronãfakefo ato pimafitano. Niospa Fake fiano ãto õiti mẽraxõ tsõa shinãnima, tãpiyonifoma.

*Jesús Genesaret anoafo a isinĩ ikaifo ato sharafani  
(Mt. 14.34-36)*

<sup>53</sup> Jesús aõxõ tãpimisfo feta ãamãfã pokefainax Genesaret mai ano nokoni. Nãno ãamãfã ketokonõ kanõanãfã nexanifo. <sup>54</sup> Nã kanõanãfã mēranoax fotopakefofãnaifono, yorafãfe tãpinifo. <sup>55</sup> Mã tãpikanax pexe rasi pasotai ichoi fetsenifo. Nãskakaxõ a isinĩ ikaifo, rãtati kamaki rãtakaxõ ato efenifo Jesús ano. <sup>56</sup> Nã Jesús kai ari fanĩma mĩshtixõ, a isinĩ ikaifo fai nēxpakĩa ato rãtanifo. Nãfãfe, “Noko ramãmafe nõ mia tari kexa ramãkanõ,” fanifo. Nã ramãifo tii sharai fetsenifo.

## 7

*Jesús ato yoini afeskai yorafo chakafomakĩ  
(Mt. 15.1-20)*

<sup>1</sup> Nãskata fariseofo fe a Moisés yoikĩ kirika keneni keskara ato tãpimamisfo Jerusalén anoax Jesús ano fenifo. <sup>2-3</sup> Nãfãfe õinifo Jesúsxõ tãpimisfãfe mechokomexoma piaifãfe, a ãto xinifãfe yoinifo keskayamaifono. Nãskakẽ ato mekafanifo. Akka fariseofãfe keyokõi judeofo ãto xinifãfe yoipaoni keskapaonifo. Piamax taeyoi mechomepaonifo chipo pixakakĩ. <sup>4</sup> Akka a afarafo ato miniaifo anoax fekanax, a ato xinifãfe yoinifo keskai mechokomekaxoma pitirofoma. ãto xinifãfe afarafo feyafapaonifo keskai nãfori askapainifo. ãto kechofoya, ãto jarafoya ãto ochamefetifoya, ãto rakoti chokapaonifo ãto xinifãfe apaonifo keskara.

<sup>5</sup> Nãskakẽ fariseofo feta a Moisés yoikĩ kirika keneni keskara ato tãpimamisfãfe Jesús yõkanifo: “¿Afeskakĩ na mĩõxõ tãpimisfãfe a nõko xinifãfe yoinifo keskara nikakanimamẽ na mechokomexoma piaifofaifãfe?”

<sup>6-7</sup> Jesús ato kemani iskafakĩ: “Nã Niospa meka yoimisto Isaías matoõnoa yoini iskafakĩ: Na yorafãfe afaa tãpiafoma ato feparapaimisfo. Na yorafãfe eõnoa yoisharafikakĩ, akka ãto õiti mēraxõ ea shinãsharafoma. ãakõi ichanãkanax fanãikani ea kĩfianã. A yorafo tãpimanaifo keskarakai ěfe mekama. ãakõi shinãkaxõ ato yoikani, ixõ Isaías Niospa meka keneni. <sup>8</sup> Nãskakẽ a Niospa yoini keskara mã shinãkima, a mãto xinifãfe yoini keskara mã shinãmis.

<sup>9</sup> “Nã mã shinãpaiyai keskara fisti mã shinãpai. Nãskakẽ a Niospa mato yoini keskara mã anã nikapaima. <sup>10</sup> Akka Moisés yoini iskafakĩ: ‘Mãto epa yafi mãto efa nikasharakãfe. Akka a ãto apa yafi ãto afa chakafaifo ato retekãfe,’ ixõ yoini. <sup>11-12</sup> Anori kenekĩ yoifinino, akka mã yoikĩ iskafamis: ‘Feronãfãke ãfe apa yafi ãfe afa yoikĩ iskafatiro: “Ë mato afaa inãtiroma, nã ěfenãfo mẽ Nios inãkĩ ixõ yoitirofo,” ’ mã famis. Nãskata a Niospa yoini anori mã ato yoimisma mãto epa yafi mãto efa kexeshakãfe ifiano. Akka mã ato yoimis iskafakĩ: ‘Anã mãto epa yafi mãto efa mã afaa inãtiroma,’ ixõ mã ato yoimis. Na shara. <sup>13</sup> Nãskakẽ a Niospa yoini anori yoitama, a mãto xinifãfe yoipaonifo anori fisti mã ato yoimis. Nãskaxõ afara fetsafo mã famis, Niospa mekakõi mã yoimisma,” ixõ Jesús ato yoini.

<sup>14</sup> Nãskaxõ Jesús yorafo kenaxõ ato yoini iskafakĩ: “Keyokõichi ea nikasharakõikãfe tãpisharakõixikakĩ ě mato yoinõ. <sup>15</sup> Nã nõ piaitokai noko chakana fatiroma, akka nõko shinã mēraxõ nõ afara chakafo shinãito noko chakanafatiro. <sup>16</sup> Mã pachoyakĩ nikasharakãfe,” ato fani.

<sup>17</sup> Nãskata Jesús yorafo nĩchifaini pexe mēra ikini, nãnoxõ a aõxõ tãpimisfãfe yõkanifo: “A mĩ yorafo yoia keskara nokori yoife nõ tãpinõ,” faifono, ato yoikĩ iskafani: <sup>18</sup> “¿Afeskakĩ mãri mã nikasharaimamẽ? ¿Mã tãpimamẽ afara nõ piato nõko xaki mēraxõ noko chakafatiroma? <sup>19</sup> Akka a nõ piati nõko õiti mēra kaima, nõko ãto mēra kai, mã nõko ãto mēranoax payokomeano chipo nõ aya safatiro.”

“Akka a nõ piyai chakama, keyokõi shara,” ixõ ato yoini. <sup>20</sup> Nãskaxõ anã ato yoini: “Akka mãto shinãmã shinãxõ mã afarafo chakafatiro. <sup>21-22</sup> Nãskakẽ ãto shinã mëraxõ shinãkakĩ, yorafãfe afara chakafo shinãmisfo. Feronãfakefãfe ãto ãfima chotaifono, kërõfãferi ãto fenema chotamamisfo. Nãskata yometsokata, ato retemisfo. Askatari këro fetsafo kaxefakãta, fetsafo chakafakĩ, mekakakãta; afara fetsafo chakafakãta, ato pãrakãta, a afara apaiyaifo fisti akãta, a fetsafãfe fiati fipaikãta, ãa chanĩkãta, ãa kakapaikãta, askatari shinãsharamisfoma. <sup>23</sup> Nã afara chakafo ãto shinã mëraxõ shinãifo keskafakĩ nãato ato chakafaxii,” ixõ ato yoini.

### *Xotofake judeoyamafixõ Jesús chanĩmara fakõini*

*(Mt. 15.21-28)*

<sup>24</sup> Nãskata nãnoax pexe rasi Tiro ano Jesús kani. Mã kaax pexe fetsa mërã ikini, ano ikikẽ tsõa tãpiamanõ. Akka nãno ikiãx onetiroma ini. <sup>25</sup> Nãnoa koshikõi tãpinifo, nãskakẽ nã fake xotofake niãfaka naneato ãfe afa Jesús ano kaxõ a nãmã ratokonõ mai chachipakefõfãni. <sup>26</sup> Nã këro xoko fetsa Sirofenicia mai anoa ini. Nãskakẽ Jesús ano kani. Kaxõ yoikai iskafakĩ: “Èfe fake xotofake makinoa niãfaka yõshi chaka potaxõfe,” fani.

<sup>27</sup> Askafafaiato nikakĩ Jesús yoini iskafakĩ: “Ãa fakefãfe pikĩ taefayonõfo. Enefe, a fakefãfe piã fãxõ nõ paxta inã, askarakai sharamaki,” faito, <sup>28</sup> nã kërõmã kemani iskafakĩ: “Èje Ifo, a mĩ ea yoiai keskara mẽ nikai. Akka paxtafãfe pitirofo a fakefãfe piã ãfe potofo mĩsa nãmã keyo pakeaito,” faito, <sup>29</sup> Jesús yoini iskafakĩ: “Chanĩma, mĩ ea kemasharakõia. Nãskakẽ mã mĩ katiro, mĩ fake xotofake makinoax mã niãfaka yõshi chaka mã tsekeaki,” fani.

<sup>30</sup> Nã këro mã ãfe pexe ano nokoxõ õia ãfe fake xotofake raka ini, a makinoax mã niãfaka tsekeano.

### *Jesús feronãfake pãstokõi ita mekamisma sharafani*

<sup>31</sup> Jesús Tiro mai anoax tsekekainikakĩ, Sidón yafi pexe rasi Decápolis finõfaini kaax, Galilea ãamãfã kesemẽ nokoni. <sup>32</sup> Nãno yorafãfe feronãfake mekamisma ita pãstokõi iyonifo. Mã iyokaxõ yoinifo iskafakakĩ: “Mĩ mĩfi mãmãfe nikamismaki pãstokĩ,” faifono, <sup>33</sup> Jesús a fisti ori iyonni, yorafo makinoa. Nãskaxõ ãfe mĩfi ãfe pachõ kini mërã meeini. Askafatari ãfe mifikĩ kemo mechota ãfe ana ramãkani. <sup>34</sup> Nãskafata nai foisnĩfõfã xakaita yoini iskafakĩ: “Efata,” fakĩ. (Akka nõko mekapa nõ yoimis iskafakĩ: “Papeita nikasharafe,” faki.)

<sup>35</sup> Nãskafaino, nã pãsto ãfe pãcho nikasharakõini. ãfe anari sharakõitani, nãskax meka sharakõini. <sup>36</sup> Nãskafata, “Mã tsoa yoiki,” Jesús ato fafiaino, askatamaroko ato yoikĩ finakõifõfãsa fanifo. <sup>37</sup> Nãskakẽ, “¡Kee, õikapo! ¿Afeskaxõ iskara sharafaimẽ?” ikata iskafakĩ yoinifo: “A pastofõ ato sharafaino mã nikakani, a mekamisfomari mã ato sharafaino mã mekakani,” ikanax yoinãnifo.

## 8

### *Jesús cuatro mil feronãfakefo pimani*

*(Mt. 15.32-39)*

<sup>1</sup> Nãskata pena fetsa yorafã rasi anã Jesúski fenifo ãfe meka nikai fekani. Nãskata a piaifori ano afaa inima. Nãskaifono Jesús aõxõ tãpimisfo kenaxõ yoini iskafakĩ: <sup>2</sup> “È na yorafo shinãkõi, nono tres nia mã efe ikafono, nonoxori afaa pikanima. A piaifo mã keyoa. <sup>3</sup> Akka afaa pimaxoma ãto pexe ano ãto ãto nĩchiano, fonãikani afaa pikanaxma fai nẽxpakĩa paketirofo. Atiri chai inoax feafoki,” ato faino, <sup>4</sup> a aõxõ tãpimisfãfe kemanifo: “Akka, ¿afeskaxõ nõ ato pimatirõmẽ? ¿Faniã nõ afaa fitirõmẽ, nonokai tsoa ikama?” faifono, <sup>5</sup> anã Jesús ato yõkani: “Akka, ¿afe tii mã pãayamẽ?” ato faito, “Siete pãakĩa,” fanifo.

<sup>6</sup> Nãskakẽ Jesús, “Yorafã rasi nãmã tsaokãfe,” ato fata, siete pãa tsomainĩfõfã. Apa Nios aicho fata, pãa kaxke pakexõ aõxõ tãpimisfo inãni. Nãfãferi nã yorafo inãnifo pinõfo.

<sup>7</sup> Nāskata foe ichapama ranāri ini. Nāskakē atoõxõ Jesús Apa Nios aicho fata, aõxõ tãpimisfo foe ināni a yorafori ato inānõfo. <sup>8</sup> Nāskakē keyokõichi pikanax mãyakõinifo. A pikĩ chetefaafo siete fēta fospikõia ini. <sup>9</sup> A piafo yorafo ichapakõi inifo, cuatro mil inifo. Nāskaxõ Jesús ato nĩchini fotanõfo. <sup>10</sup> Nāskata Jesús a aõxõ tãpimisfo fe kanõanãfã mēra naneinãkafanax Dalmanuta mai ano kani.

*Fariseofãfe, “Jesús, tsõa atiroma keskara noko ispafe nõ mia chanĩmara fanõ,” ixõ yõkanifo (Mt. 16.1-4; Lc. 12.54-56)*

<sup>11</sup> Nāno fariseofo akiki fenifo afe yoināi fekani, feparaxõ yõkapaikani. Iskafakĩ yoinifo: “Tsõa atiroma keskafakĩ afama mĩshtifo fakĩ noko ispafe nõ mia chanĩmara fanõ mĩ Nios ariax oamāki,” faifono, <sup>12</sup> Jesús fāsi xakainãkafã ato yoini iskafakĩ: “¿Afeskakĩ na yorafãfe tsõa atiroma keskafakĩ noko ispafe ea fakanimē? Ë mato pãraima a Nios fistichi atiro keskara ã mato ispaima,” ixõ ato yoini.

<sup>13</sup> Ato askafata mã ato makinoax kai kanõanãfã mēra naneinãkafã okiri ãamãfã pokefaini kani.

*“Fariseofo feta saduceofãfe anorima yoimisfoki ato nikayamakãfe,” Jesús ato fani (Mt. 16.5-12)*

<sup>14</sup> Akka mã fõkakĩ, a pifofaifo shinãmaki fainifo. Akka mã kanõanãfã mēra pãa fisti ini. <sup>15</sup> Askaifono Jesús ato yoini: “Õisharakãfe. Fariseofãfe Herodes feta pãa faraxakafo piyamakãfe,” ato fani.

<sup>16</sup> Ato askafaino, a aõxõ tãpimisfo ãa ranã yoinãnifo iskakani: “¿Afeskakĩ noko iskafaimē? Nõkai pãa yama,” ikanax yoinãnifo.

<sup>17</sup> Nāskaifono mã tãpixõ Jesús ato yoini iskafakĩ: “¿Afeskai nõ pãayamara mã ikimē, mãto õiti mēraxõ mã shināsharaimamē? <sup>18-19</sup> Feroyafiaxõ mã õi sharaima, pachoyafiaxori mã nikasharaima. ¿Akka mã shināimamē? A cinco pãa cinco mil yorafo ã ato pimaita akka, ¿a chetefaafo afe tii fēta fospia mã fiitamē?” ato feito kemanifo: “Doce fēta ikita,” fanifo.

<sup>20</sup> “Askatari a siete pãa cuatro mil yorafo ã ato pimaita, akka, ¿afe tii fēta fospia mã fiitamē?” ato feito, “Siete ikita,” fanifo. “Askatari, ¿nã siete pãa ã kaxkeketsaxõ ã ato minita cuatro mil feronãfake, afe tii fēta texefafo mã fiitamē?” ato fani. “Sietekĩa,” fanifo.

<sup>21</sup> Askafaifono ato yoini iskafakĩ: “¿Ai mã tãpiamamē?” ato fani.

*Jesús yora fēxo Betsaida anoxõ sharafani*

<sup>22</sup> Nāskata mã Betsaida ano nokoafono, yora fēxo Jesús ano iyonifo. Mã iyokaxõ iskafakĩ yoinifo: “Jesús, na feronãfake ramãfe,” faifono, <sup>23</sup> Jesús ãfe mēkemã mã fēxo mētsoinĩfofã pexe rasi pasoatai iyoni. Nārĩxõ ãfe kemõ ãfe fero mechanafayanã ãfe mēkemã ramãni iskafakĩ yõkayanã: “¿Mã mã afara õitromē?” feito, <sup>24</sup> mã fēxo mã õisharaki iskafakĩ yoini: “Ë õi na feronãfakefo oa iffo kafanai keskara,” feito, <sup>25</sup> Jesús anã ãfe mēkemã fero ramãkani. Nāskafaano mã fēxo mã sharaxõ õisharakõini. Nāskaxõ keyokõi xafakĩakõi õisharakõini. <sup>26</sup> Nāskakē Jesús ãfe pexe ano nĩchini iskafakĩ yoiyanã: “Mĩ anã pexe rasi ano kakiki, mã pexekõi ano katãfe, mã tsoa yoikĩ,” fani.

*“Mĩ Cristo mia Niospa ifni nokoki nĩchixii mã nõko xanĩfo finakõia inõ,” ixõ Pedro Jesús yoini*

*(Mt. 16.13-20; Lc. 9.18-21)*

<sup>27</sup> Nāskafata Jesús a aõxõ tãpimisfo fe pexe rasi Cesarea Filipino pasoato fonifo. Fãi kakĩ Jesús ato yõkani: “¿Ea afaa yorafãfe faimē?” ato feito, <sup>28</sup> aõxõ tãpimisfãfe kemanifo iskafakakĩ: “Fetsafãfe Juan Maotistara, mia fakani. Fetsafãferi Elíasra mia fakani. Fetsafãferi mã ato Niospa meka yoipaoni fetsa rakikĩa mia fakani,” ixõ yoinifo.

<sup>29</sup> “Akka, ¿mã ea tsoara faimē?” ato feito, Pedro kemanĩ iskafakĩ: “Mĩ Cristo mia Niospa ifni nokoki nĩchixii mã nõko xanĩfo finakõia inõ,” feito, <sup>30</sup> Jesús yoini iskafakĩ: “Eõnoa tsoa yoiyamakãfe,” fani.



*“Chipo ea retexikani,” Jesús ato fani  
(Mt. 16.21-28; Lc. 9.22-27)*

<sup>31</sup> Nāskata Jesús ato yoikī taefani iskafakī: “Ē chipo omiskōi finakōixii. Askatari ea ōikaspakakī ea potaxikani, judeofāfe āto xanīfofo feta a Nios ato kīfixomis xanīfofāfe a Moisés yoikī kirika keneni keskara ato tāpimamisfāfe. Askatari ea retexikani, akka ea retefiafono tres nia oxata ě anā otoxii,” ato fani. <sup>32</sup> Nāskakē xafakīakōi ato yoini. Ato yoikī askafaito ori iyoxō Pedro yoini iskafakī: “Ifo, askayamafe mia retekanima kiki,” faito, <sup>33</sup> anā Jesús fesoakekafā aōxō tāpimisfo ōiyanā iskafakī Pedro yoini: “Emakinoax katāfe, Satanás. A Epa Niospa shināi keskara mī tāpiamaki. Akka nā yorafāfe shināifo keskara mī shināikai,” fani.

<sup>34</sup> Nāskata Jesús aōxō tāpimisfoya yorafo kenaxō ato yoini iskafakī: “Fatora fetsa ěfe inakōi ipaikī āakōi apaiyai keskara anā atiroma. Nā ě yoiai keskara nikakōitiro. ‘Ēfe Ifoxō ea retefiaifono ěkai ěfe Ifo ě potapakenakama,’ ixō shinātiro. <sup>35</sup> Akka fĕtsa āa shinātiro iskakī: ‘Ē Nios Ifofaito ea retetirofo. Nāskakē ě Nios Ifofaima,’ ixō shinātiro mesekī. Askara yora naax ěfe Epa ano katiroma. Akka nā ea Ifofaa, ěfe meka yoiaito askayamākī eōxō reteafono ě ifixii efe ĩpaxanō eamāi Ifofamiskē. <sup>36</sup> Akka fatora fetsa afara ichapayakōi ikatsaxakī, anā āfenā itiroma. Mā naax omiskōipakenaka. <sup>37</sup> Akka, ĵnĭpaxakī yorafāfe afe tii kopifatirofomē? Maa, afaa kopifatirofoma. <sup>38</sup> Akka fatora fetsa eō rāfikī, ěfe meka sharari yoikaspai yora chakafāfe ferotaifi ěri aō rāfikī yoikī iskafaxii: ‘Ē na yora ōimisma,’ ě faxii ěfe Ēpa sharafoya fotoxō, ěfe ājiri sharafori efe fotopakefōfāxikani,” ixō ato yoini.

## 9

<sup>1</sup> Askatari anā Jesús ato yoini iskafakī: “Ē mato pāraima, fatora fĕtsa nono efe iyoxō nayoxoma ěfe Epa xanīfo finakōia ōiyoxikani āfe sharaŋnoax oaito,” ixō ato yoini.

*Jesús āfe femānā fetsa keskara ini, fafekōini. Āfe rapatiri oxokōi ini  
(Mt. 17.1-13; Lc. 9.28-36)*

<sup>2</sup> Nāskata mā seis nia finōta, Jesús māchi keyakōi ari māpekī āfe ina tiis ato iyoni. Pedro iyota, Santiago iyota, Juan iyota ato fani. Nāriax āto ferotaifi Jesús fetsa keskara ini. <sup>3</sup> Āfe rapati fafekōini oxo finakōia ini, mā patsasharafikakī tsōa askafatiroma ini. <sup>4</sup> Nānoa Elías yafi Moisés ōinifo Jesús fe mekaifono. <sup>5</sup> Nāskaifono Pedro Jesús yoini iskafakī: “Ifo, sharakōi ano nō oa. Nono nō tres tapas fanō, fetsa mia axota, fetsa Moisés axota, fetsa Elías axota, nō fanō,” fani.

<sup>6</sup> Akka aōxō tāpimisfo ratekōinifo. Nāskakē Pedro tāpinima a yoiai keskara, shināyamaino yoini. <sup>7</sup> Nāskaifono kōinī ato maipakefōfāni. Nā kōi mĕranoax mekai iskaito nikanifo: “Nafi ěfe Fakekōiki ě aō noikōi. Nāskakē nikasharakōikāfe,” ikaito nikanifo.

<sup>8</sup> Askaito nikafikakī, a kemataima ōiafo ano ato fe tsoa inima, Jesús fisti ares ato fe ini.

<sup>9</sup> Nāskata mā māchi keya ariax fotoxō, “A mā ōia keskara mā tsoa yoiki. Ē naax mĕ anā otoano mā ato yoitiro,” ixō ato yoini. <sup>10</sup> Nāskakē tsoa yoitama. Ares fisti āto ōiti mĕraxō shinānifo mā tāpifikaxō. Naax ě anā otoxira nokofaito nō tāpiama ikanax yoinānifo.

<sup>11</sup> Nāskaxō Jesús yōkanifo, iskafakakī: “ĵAfeskakī a Moisés yoikī kirika keneni keskara ato tāpimamisfāfe iskafakī yoimisfomē Elías rekē oi taexii?” ixō yoimisfo faifono, <sup>12</sup> ato kemakī iskafani: “Chanīma, Elías rekē fotoi taexii, nāato ato yoisharaxii itipinīsharanōfo. Akka, ĵafeskakī kirika ano kenenifomē, a ě omiskōixiai yorafāfe ea chakafakakī ea potaifono? <sup>13</sup> Akka ě mato yoinō mā Elías ifana. Nāskakē nā apaiyai keskafakakī chakafanifo. Nānori aōnoa yoikī kirika kenenifo,” ixō ato yoini.

*Jesús feronāfake naetapa niafaka chaka pōtaxoni  
(Mt. 17.14-21; Lc. 9.37-43)*

<sup>14</sup> Nāskata mā Jesús fe fōtakakī a Jesúsxō tāpimis fetsafo ano nokokaxō ōitoshinifo yōrafā rasifo fe a Moisés yoikī kirika keneni keskara ato tāpimamisfo fe ato fe feratenāifāfe. <sup>15</sup> Nāskaifono Jesús oaito fichikanax akiki keyokōi farekefaikaxō, “Kee, mā Jesús oi kiki,” ikaxō yoisharanifo.

<sup>16</sup> Askaifono Jesús ato yōkani iskafakī: “¿Afeskai mā ato fe feratenāimē?” ato faino, fētsa kemani iskafakī: <sup>17</sup> “Maestro, ēfe fake ē mikiki efea, niafaka chaka a mēra nanexō mekamamismano. <sup>18</sup> Nā kapaiyai arixō, niafaka chakata achiano paketiani. Āfe axfapa fākokeyopaketiani, askatari āfe piti yeyexamis, askatari charishi fetsemis. Mē mī inafō yoia a makinoa niafaka yōshi chaka pōtanōfo. Akka mī inafāfe atirofoma,” faino, <sup>19</sup> Jesús kemani: “Mā kai ea chanīmara faima. Mā afara shināmis. Akka afetīakai ē nono mato fe itianima. ¿Afetīakai mā ea nikaimē? Niri nā fake efekāfe,” faino, <sup>20</sup> nāskakē Jesús ano nā fake iyonifo. Akka nā nīafaka mā Jesús tāpixō, nā feronāfake anā choamanaino anā nāmā pakeni. Nāskakē tarame tarame iyanā āfe axfapa fākokeyopakeni.

<sup>21</sup> Nāskaxō Jesús apa yōkani iskafakī: “¿Afetīa fichinimē?” iskaifaito, apa yoini iskafakī: “Afetīa fichinima. Yomeax fichini. <sup>22</sup> Mēxotaima na niafaka chakata iskafaino, chiinaki paketa fakanaki pakemis, retepaikī iskafaino. Nāskakē mī sharafatiromakī sharafafe, noko shinākī ēfe fake ea sharafaxōfe,” faino, <sup>23</sup> Jesús yoini: “¿Afeskakī ēfe fake mīa ea sharafaxotiromamē mī ea faimē? Ea chanīmara faifono ē ato afama mīshti faxotiro,” fani.

<sup>24</sup> Nāskakē nā fake āpa fāsikōi mekani iskafakī yoini: “Ē mīa chanīmara fai, ea axōfe ē mia chanīmara fakī finakōinō,” ixō yoiaino, <sup>25</sup> yōrafā rasi ichanāfono Jesús ōini, Jesús feronāfake makinoa niafaka potaito ōipaikani. Nāskakē Jesús niafaka iskafakī yoini: “Niafaka yōshi chakata, na fake mī mekamamatama, mī nikamamismaki, ē mia yoikai na fake makinoax tsekekaitāfe, nāskax mī anā a mēra ikiki,” faino, <sup>26</sup> niafaka yōshi chaka fāsikōi fiisini. Nāskakī nā fake anā choamani. Nāskata mā fake makinoax tsekekaikī oa naa keskara fafāini. Nāskakē iskafakī yoinifo: “Mā naa raka,” faifono, <sup>27</sup> akka Jesús āfe mēkemā mētsota fininīfofanaino nā feronāfake niinākafāni.

<sup>28</sup> Nāskafata Jesús pexe mēra ikikainano, anoxō a aōxō tāpimisfāfe a fisti yōkanifo: “Akka, ¿afeskakīri nō niafaka yōshi chaka potatiromamē?” ixō yōkaifono, <sup>29</sup> Jesús ato kemani: “Na keskara niafaka mā potakī Epa Nios kīfita foni teneyanā Nios shinākī mā potatiro. Akka mā askayamaxō mā potatiroma,” ato fani.

*Anā Jesús ato yoini: “Chipo ea retexikani,” ixō  
(Mt. 17.22-23; Lc. 9.43-45)*

<sup>30-31</sup> Nāskata Jesús nānoax a aōxō tāpimisfo fe kakī Galilea finōfaini. Akka Jesús ato tāpimakaspani, “Ea tāpiyamanōfora,” ixō. A aōxō tāpimisfoosmāi ato tāpimakī iskafakī ato yoini: “Ea achikaxō āto xanīfofo ano ea iyoxikani, afāfe ea retenōfo. Akka ea retefiafono tres nia oxata ē anā otoxii,” ato faito, <sup>32</sup> tsōa tāpinima a ato yoiai keskara. Yōkapai akiki ranonifo.

*“Akka, ¿tsoakaimē sharafinakōia?” inifo  
(Mt. 18.1-5; Lc. 9.46-48)*

<sup>33</sup> Nāskata pexe rasi Capernaúm ano nokonifo. Nā pexe anoxō Jesús ato yōkani: “¿Afeskai fai anoax mā feratenāmē?” ato faino, <sup>34</sup> tsoa tooxinima, akka fai nēxpakīanoax feratenāi iskakanax: “¿Tsoakai sharafinakōiamē?” ikanax.

<sup>35</sup> Nāskakē Jesús tsoaxō a aōxō tāpimisfo doce kenaxō ato yoini: “Fatora fētsa ato finōpai nā yorafāfe āto ina keskara itiro, nāskakē keyokōi ato axosharakōitiro,” ixō ato yoini.

<sup>36</sup> Nāskata ato nēxpakīa fake yome nīchita, chishtoinīfofā ato yoini: <sup>37</sup> “Akka fatora fētsa ēfe aneōxō na fake yome noikī nāatori ea noisharakōi. Nā ea noisharaito ea fisti noima, nā ea nīchiniri noisharai,” ixō Jesús ato yoini.

*Fētsa noko noikaspatama noko sharafai  
(Mt. 10.42; Lc. 9.49-50)*

<sup>38</sup> Ato askafaito Juan yoini: “Maestro, mã nõ õia oa feronãfake fistichi mã aneõxõ niafaka chaka potaito. Nãskakẽ mã nofe rafemismaki, askafayamafe mã yorafo makinoa niafaka potatiromaki nõ faa,” faito, <sup>39</sup> Jesús kemani iskafakĩ: “Askafayamakãfe. Akka mã ãfe aneõxõ afama mĩshtifo faxõ chipo ea chakafakĩ mekafatiroma. <sup>40</sup> A noko chakafakĩ mekafaima, nofe rafesharai. <sup>41</sup> Akka fẽtsa mato shinãkĩ, nato Cristo Ifofaki ixõ mato faka ayamanaito, askara Niospa afara inãsharatiro. Chanĩmakõĩ ãfe mato yoi,” ixõ ato yoini.

*Noko fẽtsa afara chakafamaino ãfenã mesekõĩ itiro*  
(Mt. 18.6-9; Lc. 17.1-2)

<sup>42</sup> Anã Jesús ato yoini iskafakĩ: “Na fakefãfe ea chanĩmara faifono, fatorafãfe ato afara chakafamaifono, tokirinĩfaya tenextifaxõ fakafã nõafã mẽra mã ato potatiro ato anã afaa chakafamanõfoma. <sup>43-44</sup> Akka mãto mẽkemã mato afara chakafamaino mextemekãfe. Akka mã mã mextemeax Epa Nios ari mã katiro afe nĩpaxakĩ. Akka mifi rafeyaxõ mã afara chakafaax chiifã xoisai mẽranoax mã omiskõipakenaka, a chiifã nokanakama anoax. Anoax xenafo nayamaino, chiiri nokanakama anoax. <sup>45-46</sup> Askatari mã tãe mia afara chakafamaino oxtemefe. Akka mã mã oxtemeax Epa Nios ari mã katiro afe ãpaxakĩ. Akka mã oxtemeamax tae rafeyax chiifã mẽranoax mã omiskõipakenaka, anoax xenafo nayamaino, chiiri nokanakama anoax. <sup>47</sup> Askatari mã fẽro mia afara chakafamakẽ tsekafe. Nãskax mã fero fistiax Epa Nios xanĩfo ano mã katiroki. Akka mã fero rafeyax chiifã mẽranoax mã omiskõipakenaka. <sup>48</sup> Anoax xenafo nayamaino chiiri nokanakama anoax.

<sup>49</sup> “Nãskakẽ chiifã mẽranoax keyokõĩ omiskõipakenakafo. <sup>50</sup> Akka tashi shara. Akka mã nami tashiya ayamaxõ, afeska faxõ mã anã sharafatiromẽ, mã anã sharafatiroma, chakanatiro. Nãskakẽ oa tashi keskara ikãfe isharakõiax. Fetsafo ato yoisharaxikakĩ anã afaa chakafanõfoma.”

## 10

*Feronãfake ãfe ãfi fe enenãtirofoõnoa Jesús ato yoini*  
(Mt. 19.1-12; Lc. 16.18)

<sup>1</sup> Nãskata Jesús Capernaúm anoax tsekekainax Judea mai ano kani. Nã Jordán faka ketokonõ, nãnoxõ anã yorafo ichanãfaxõ anã ato yoini, ato yoimis keskafakĩ. <sup>2</sup> Ato yoikĩ askafaino fariseofo Jesús ano fenifo. Akiki fẽkaxõ chakafakĩ mekamapaikani. Nãskaxõ yõkanifo iskafakĩ: “Nõko xinifãfe Niospa meka yoikĩ kenenifo keskafakĩ, ¿feronãfake ãfe ãfi enepaikĩ enetiromẽ?” ixõ yõkaifono, <sup>3</sup> Jesús ato kemani: “Moisés mato kirika kenexokĩ, ¿fanĩri mato yoinimẽ?” ato faito, iskafakĩ yoinifo: <sup>4</sup> “Moisés kenekĩ iskafani: ‘Fẽtsa ãfe ãfi enepaikĩ taefakĩ kirika kenexotiro iskafakĩ: “Ë mia anã fima, mã anã ãfe ãfi ikima,” ’ ixõ mã yoitiro noko fani,” ixõ yoiaifono, <sup>5</sup> Jesús ato kemani iskafakĩ: “Moisés iskafakĩ mato yoini: ‘Mãkai afaa tãpiama mãto õiti kerexkõĩ,’ ixõ mato yoini. <sup>6</sup> Akka taekõifakĩ, Niospa feronãfake yafi kẽro onifani. <sup>7-8</sup> Nãskakẽ feronãfake mã ãfiyax ãfe apa yafi ãfe afa makinoax paxkatiro ãfi fe fianãxiki. Nãskakẽ ãfe ãfi fe yora fisti keskara itirofo. Nãskakẽ anã yora rafema, yora fisti keskara ikani ãfe ãfi fe. <sup>9</sup> Nãskakẽ feronãfake ãfe ãfi enetiroma Niospamãĩ ato fianãmano,” ixõ ato yoita, <sup>10</sup> mã pexe mẽra ikiano, anã a aõxõ tãpimisfãfe yõkanifo: “A mã yorafo rama yoiai keskara nokori yoife,” faifono, <sup>11</sup> Jesús ato yoini iskafakĩ: “Akka fẽtsa ãfe ãfi enexõ kẽro fetsa fixõ afe ikĩ a fikĩ taefani chakafai. <sup>12</sup> Askatari feronãfake ãfe ãfi enexõ fetsa fixõ fetsa fe ikĩ ãfe ãfi chakafai,” ixõ Jesús ato yoini.

*Jesús fakefo chishtoxõ ato mãmãyanã ato Epa Nios kĩfixopakeni*  
(Mt. 19.13-15; Lc. 18.15-17)

<sup>13</sup> Askatari yorafāfe āto fakefo Jesúski efenifo ato māmāpakeyanā ato Epa Nios kīfixonō. Akka a Jesúsxō tāpimisfāfe ato iskafanifo: “Māto fakefo efexō nōko Ifo fekaxtefayamakāfe,” ato faifono, <sup>14</sup> nikakī Jesús ato iskafani: “Ato enekāfe na fakefo ekeki fenōfo, ato nētefayamakāfe. Ēfe Epa Nios xanīfo ika ari na fakefo keskarakōifoki,” ixō ato yoini.

<sup>15</sup> “Ē mato pāraima, mā Epa Nios xanīfo nikayamax na fakefāfe ea nikaifo keskafakī, Epa Nios xanīfo ika ari mā katiroma,” ixō ato yoita, <sup>16</sup> fakefo chishtoinīfofā ato māmāpakeyanā: “Epa Niospa, na fakefo sharafafe,” fani.

*Feronāfake naetapa kori ichapayax Jesús fe mekani*  
(Mt. 19.16-30; Lc. 18.18-30)

<sup>17</sup> Mā askafata mā Jesús kaino feronāfake fetsa ichoax akiki nokoni. Mā akiki nokoxō ratokonō mai chachipakefofā yōkani iskafakī: “Maestro mī sharaki, ea yoife ē afaa afeskatiromakī Nios xanīfo fe ipaxakī,” ixō yōkaito, <sup>18</sup> Jesús kemani: “¿Afeskakī sharara mī ea faimē? Akka Nios fisti shara. <sup>19</sup> Niospa shināmanaino a Moisés yoini keskara mā mī tāpia. Iskafakī yoini: ‘Ato reteyamakāfe, askatari māto āfima chotayamakāfe, askatari kēromāri māto fenema chotamayamakāfe, askatari atoki yometsoyamakāfe, askatari chanī yoiyamakāfe, askatari mā kaxpa ato pārayamakāfe, askatari māto epa yafi māto efa nikasharakōikāfe,’” ixō Jesús yoini.

<sup>20</sup> Askafaito nā feronāfake kemani iskafakī: “Maestro, nā mīa yoiai keskara mē nikamis yomexō,” faito, <sup>21</sup> nikakī Jesús ōiyanā aō noiyanā iskafakī kemani: “Nāno afara fisti mī tāpiama. Kaxō mī afarafo minixō kori fixō nā afaamaisfo ato ināketsatāfe. Nāskakē nai mēranoax afama mīshtifoya mī ixikai. Mā mī kori ato ināketsata anā oxō ea Ifofasharafe,” ixō yoini.

<sup>22</sup> Askafaito nikai nā feronāfake shināchakakōi tooxinima kori ichapayamāiyaxō ato inākaspai. Nāskax Jesús makinoax kani.

<sup>23</sup> Nāskaito Jesús aa kemataima ōiakexō, aōxō tāpimisfo yoini iskafakī: “A yora afama mīshti ichapaya Nios xanīfo ano katiroma, fekax pishta,” ixō ato yoiaito, <sup>24</sup> nikakakī āfe inafāfe: “Kee, āfe meka nō tāpitiroma,” ixō tāpipainifo. Askaifono anā Jesús ato yoini iskafakī: “Ēfe fakefāfe, fekax pishta afama mīshtifoya ikatsaxakī mā Nios Ifofapaia. <sup>25</sup> Māraki camello akoja kini mēra ikipaifi ikitiro, fekaxkōi efapamāiax. Nāskarari yora afama mīshti ichapayato Nios Ifofapai, fekaxkōi āfe afama mīshtifomāi potakaspakī,” ixō Jesús ato yoini.

<sup>26</sup> Ato askafaito nikakakī a aōxō tāpimisfāfe tāpipainifo. “¡Kee! ¿Afeskax nō Nios fe ipaxatiromē?” ikanax yoinānifo.

<sup>27</sup> Askaifāfe ōikī Jesús ato yoini: “Yorafokai āa ifimetirofoma. Nios fistichi yorafo ifitiro. Niospa afama mīshtifo fatiro, yorafāfe atiroma keskara,” ixō ato yoini.

<sup>28</sup> Ato askafaito nikakī Pedro yoini: “Ifo, nō mefe okī nōko afama mīshtifo nō ōiferani nō mefe oni,” faito, <sup>29</sup> Jesús kemani iskafakī: “Ē mato paraima, fētsa eōxō ēfe meka sharaōnoa ato yoikakī āfe pexe ōifaini, āfe onefetsafori ōifaini, āfe poifori ōifaini, āfe apari ōifaini, āfe afari ōifaini, āfe fakefori ōifaini, āfe tareri ōifaini, <sup>30</sup> nāto niyoxō afama mīshtifo fitiro, Niospa ināino, pexefoya ita, onefetsafoya ita, poifoya ita, afafoya ita, fakefoya ita, tarefoya ita itiro. Nāfo Niospa ināsharafiano omiskōixii. Nāskafiax chipo Epa Nios fe ipanaka. <sup>31</sup> Akka iskaratīa yora ichapafāfe ato finōpaikani, nō finakōiara ikaxō, akka chipo fenotirofo. Akka a ato finōpaiyamaifo iskaratīa Niospa ato finakōia imaino Nios fe ipanakafo,” ixō ato yoini.

*Anā Jesús ato yoini: “Mā chaima ea retekanira,” ixō*  
(Mt. 20.17-19; Lc. 18.31-34)

<sup>32</sup> Askafakī ato yoita Jerusalén ari kani. Jesús rekē kaino aōxō tāpimisfo acho fonifo. “Kee, ¿afeskai nōko Ifo Jerusalén ano kaimē?” ikanax ratekōinifo. Nāskaifono a aōxō tāpimisfo tii ato kenaxō Jesús ato yoini iskafakī: “Iskaratīa afaa afeskaimākai ē mato

yoinō. <sup>33</sup> Mā mā ōikai, iskaratīa Jerusalén ano nō māpei kaikai. Nānoxō ea achikaxō a ato Nios kīfixomis xanīfofo yafi a Moisés yoikī kirika keneni keskara ato tāpimamisfo ea ato inākani kiki. Anoxō ea iskafakani: ‘Na Jesús ato chakafamiskī retekāfe,’ ixō ea yoikāta, yora fetsafo ano ea iyokani afāfe ea retenōfo. <sup>34</sup> Nāfāfe ea kaxemetsama fayana, ekeki kemo mechoketsayanā ea koshaketsakata ea retékani. Akka ea askafafiafono tres nia oxata ē otoxii,” ixō ato yoini.

*Santiago feta Juan Jesús yōkanifo afe xanīfo ipaikakī*  
(Mt. 20.20-28)

<sup>35</sup> Santiago fe Juan, Zebedeo fake rafe ini. Nā rafeta Jesús ano fōkaxō iskafakī yoinifo: “Maestro, na nō mia yoiai keskafakī noko axōfe, nō mia yōkaikai,” faifono, <sup>36</sup> ato yōkani: “¿Ē mato afaa afeska faxotiromē?” ato faito, <sup>37</sup> anā yoinifo iskafakakī: “Mī xanīfokōikī nokori xanīfo imafe, nō mefe xanīfo inō. Takai fetsa ē tsaofaino, takai fetsari ēfe ochi tsaonō,” faifono, <sup>38</sup> Jesús ato yoini iskafakī: “Na mā ea yōkai keskara mā tāpiama. ¿Na ē omiskōiai keskai māri mā omiskōitiromē?” ato faino, <sup>39</sup> kemanifo iskafakakī: “Ēje, nōri nō tenetiro,” faifono, Jesús ato yoini iskafakī: “Chanīma, nā ē teneai keskafakīri, mā tenetiro omiskōifinakōifikī. <sup>40</sup> Akka efe ketaxamei tsaopai tsoa efe ketaxamei tsaotiroa. Ēfe Epa Nios fistichi tāpia. Nā Epa Niospa katoafo ano efe tsaotirofo,” ixō ato kemani.

<sup>41</sup> Askafaiāfe nikakani a aōxō tāpimisfo diez atoki ōitifishkinifo, Santiago yafi Juan mepaikani.

<sup>42</sup> Askaifono akka Jesús ato kenaxō ato yoini iskafakī: “Mā mā tāpia, yora fetsafo xanīfokaxō fāsikōi mekayanā ato yonomamisfo. A xanīfo fe rafeafāferi ato yoimisfo iskafakakī: ‘Nōri mato xanīfo. Nō mato yoiaito mā noko afara axorisafatiro,’ ixō fāsikōi ato yoimisfo. <sup>43-44</sup> Akka mā ranā askayamakāfe. Askatamaroko fatora fetsa mā xanīfo ipai, ato yonoxomis keskara mā itiro. <sup>45</sup> Akka ēri anori shināima, ēfe Epa Nios ariax ē nāmā fotoni feronāfakekōi ixiki, ē Niospa Fakefekē ea afara axonōfo ē onima. Askatamaroko fetsafo ē ato afara sharafaxoxiki ē oni. Ē atoōnoax naxiki ē oni. Satanās chaka āto ifo inōma ē oni,” ixō Jesús ato yoini.

*Jesús Bartimeo fēxokē sharafani*  
(Mt. 20.29-34; Lc. 18.35-43)

<sup>46</sup> Nāskata Jericó pexe rasi ano nokonifo. Nānoax mā Jesús tsekekainaino, aōxō tāpimisfo fe yōrafā rasi afe fonifo. Fokākī yora fēxo fai ketokonō tsoa fichinifo, āfe ane Bartimeo, Timeo fake ini. Nāno fai ketokonō tsoxō ato kori yōkatiani ini. <sup>47</sup> Nāno fai ketokonō tsoxō nā fēxo nikani Jesús Nazarete anoa kafani faifāfe. Nāskafaiāfe nikai nā fēxo fāsikōi fiisini, iskafakī yoini: “¡Jesús mīfi David fenaki, ea shināfe!” fani.

<sup>48</sup> Askafaito, “Nōko Ifo fekaxtefayamafe,” fanifo. Askafafiaifono fāsikōi fiisini, iskani: “¡David fenapa, ea shināfe!” faito nikai.

<sup>49</sup> Nāskakē Jesús nēteakekafā ato yoini iskafakī: “Ea kenaxokāfe,” ato faino, kenanifo iskafakī yoianā: “Inimayanā fininākafe, Jesús mia kenakī,” ixō yoiaifono, <sup>50</sup> nikakī āfe tari rashkita potata koshikōi niinākafe ichotiri ichotiri ita Jesús ano oni.

<sup>51</sup> Mā akiki oano Jesús yōkani: “¿Ē mia afeska fanō ea mā yōkamē?” faito, nā fēxo kemanī: “Maestro, ēfe fero ē sharafapai,” faino, <sup>52</sup> Jesús yoini iskafakī: “Mā mī katiro, ea chanīmara faax, mā mī sharaki,” fani. Naskafaino nā fēxo ōisharakōitani. Mā sharaxō Jesús fāi kaino chīfafaini.

## 11

*Jesús nokoni Jerusalén ano*  
(Mt. 21.1-11; Lc. 19.28-40; Jn. 12.12-19)

<sup>1</sup> Nāskata Jesús fe fokakī Jerusalén chaima fonifo. Nāno pexe rasi Betfagé fe Betania chaima ini, machi Olivos ano. Nānoxō Jesús a aōxō tāpimis rafe nīchini. <sup>2</sup> Ato iskafakī

yoiyanā: “Mēstekōi fotakāfe oa ono pexe rasi ano. Nāno mā nokoxō mā fichi kaikai burro fake nexekē tsoa aō nimisma. Tēpexō ea efexotakāfe. <sup>3</sup> Anoxō mato yōkaifono iskafakaki: ‘¿Afeskakī mā burro tēpeimē?’ mato faifono, iskafakī ato yoikāfe: ‘Nōko Ifāfe fichipaiyaito nō ifixoniyoa, samama mato nīchixoni kiki,’ ixō ato yoikāfe,” Jesús a aōxō tāpimis rafe fani.

<sup>4</sup> Askata mā fōkaxō fichitoshinifo burro pexe fepoti ano nexekē emāiti fainaki fichixō tēpexō efenifo.

<sup>5</sup> Nā ano ikafāfe ato iskafanifo: “¿Afaa mā afeskafaimē? ¿Afeskakī mā burro tēpeimē?” ato faifono, <sup>6</sup> nā Jesús ato yoia keskafakī ato kemanifo: “Ia. Iyoxotakāfe,” ato fanifo. <sup>7</sup> Nāskata Jesús ano burro efekāta, āfe kate kamaki āto rapati kakafanifo. Nāskafafono a kamaki Jesús tsaoinākafāni. <sup>8</sup> Akka mā Jesús kaino yorafāfe āto rapatifoya epe peifo xatekaxō kakafaxō fonifo akiki inimakakī.

<sup>9</sup> Akka nā rekē foaifāfe a acho foaifo fāsikōi tai taifonifo. Iskafa fonifo: “¡Aicho, nā sharafinakōia nokoki oi kiki, nōko Ifo Niospa nokoki nīchiano! <sup>10</sup> Nōko xini David xanīfo ipaoni keskai, mīri nōko xanīfo ixiki oa. ¡Aicho! ¡Nios sharakōi!” ixō yoinifo.

<sup>11</sup> Nāskata Jesús mā Jerusalén ano nokoax, Nios kīfiti pexefā mēra ikixō, a mēranoafo ōifofāsafani. Nāskata nānoax tsekekaini kaax a aōxō tāpimisfo docefo fe Betania ano kani, mā yātapakeaino.

*“Fana higuera, mī anā fiminakama,” Jesús fani  
(Mt. 21.18-19)*

<sup>12</sup> Pena fetsa mā Betania anoax okī Jesús mea fonāikōi fini. <sup>13</sup> Nāskakē chai ixō fana higo nikē ōini, peifoya ini. Kaxō ōini fimiyamakī, akka kaxō ōia fimiya inima āfe peifos ini. Nā fimiyamaitīa ōini. <sup>14</sup> Nāskakē Jesús fana higo yoikī iskafani: “Anā tsōa mī fimi pinakama,” faito, āfe inafāfe nikanifo.

*Jesús a Nios kīfiti pexefā mēraxō a ato ināifo ato potani  
(Mt. 21.12-17; Lc. 19.45-48; Jn. 2.13-22)*

<sup>15-16</sup> Nāskata anā Jerusalén ano nokonifo. Nānoax Jesús anā Nios kīfiti pexefā mēra ikitoshini. Ikitoshixō ōia a mēraxō afarafo ato miniaifono xafakīa ato kāimani, a ato fīaifori askafani xafakīa kāimakī. A ato kori ināifo anoari mīsafo ato pōtaketsani, askatari a ato rifi miniaifo anoari āto tsaotifori ato pōtaketsani. “Nā Nios kīfiti pexefā mēraxō tsōa afaa ato inātiroma,” ixō fāsi mekainākafā ato yoini. <sup>17</sup> Ato tāpimakī iskafakī ato yoini: “Niospa meka yoikī iskafakī kirikaki kenenifo: ‘Na ēfe pexefā anoxō keyokōichi nā maitio ano ikafāfe ea kīfitirofo,’ ixō kenefinifono, akka nā yometsofāfe pexe keskara mā famis,” ixō ato yoini.

<sup>18</sup> Ato askafaito, a ato Nios kīfixomis xanīfofo feta, a Moisés yoikī kirika kenei keskara ato tāpimamisfāfe nikanifo. Nāskakē afeskaxoma Jesús retepainifo, retepaifikani mesenifo, yorafāfemāi nikakōiaifono a yoiai keskara, “Aira, na keskara meka nō nikamisma, āfe meka sharakōi,” ikaxō. <sup>19</sup> Akka mā fakishaino Jesús a aōxō tāpimisfo fe Jerusalén anoax anā kani.

*Fana higuera xanani  
(Mt. 21.20-22)*

<sup>20</sup> Askano anā pena fetsa finōfāikakī ōinifo, nā fana higuera mā xanano āfe tapofoya. <sup>21</sup> Nāskakē Pedro shinākī Jesús yoini iskafakī: “Maestro, ōipo na higuera mī kamafofāita mā xana,” faito, <sup>22</sup> Jesús kemakī iskafakī: “Nios nikakōikāfe,” ato fani. <sup>23</sup> “Akka ē mato pāraima. Māto ōiti mēraxō mā Nios nikakōixō na māchifā mā yoikī iskafatiro: ‘Nonoax tsekekainax fakafā mēra paketāfe,’ mā faino fakafā mēra paketiro. Nā mā yoiai keskai nāskakōitiro. <sup>24</sup> Nāskakē ē mato yoi, afara mā fichipaikī mā Epa Nios chanīmara faxō mā kīfiaito mato inātiro, mātonā inō. <sup>25</sup> Akka mā Epa Nios kīfikī, fetsaki mā ōitifishki iyoxō īkisi raefayokāfe, Epa Nios nai mēranoato māto chaka mato soaxonō. <sup>26</sup> Akka mā fetsafo

raefayamaito, matori Epa Niospa nai mēraxō mātō chakafo mato soaxotiroma,” Jesús ato fani.

*“¿Tsōa mia nīchinimē mī xanīfo inō?” ixō Jesús yōkanifo anoxō achipaikakī  
(Mt. 21.23-27; Lc. 20.1-8)*

<sup>27</sup> Nāskata Jerusalén ano anā fenifo. Nānoax Nios kīfiti pexefā mēra Jesús kafāsaino, nāno akiki fenifo. A ato Nios kīfixomisfāfe āto xanīfofo fe, a Moisés yoikī kirika keneni keskara ato tāpimamisfo, judeofāfe āto xanīfofori fenifo. <sup>28</sup> Anoxō yōkanifo iskafakakī: “¿Tsōaōxō mī iskafaimē, tsōa mia yoiamē mī iskafanō?” ixō yōkaifono, <sup>29-30</sup> Jesús ato kemani iskafakī: “Ēri mato yōkanō ea yoikapo ē nikanō. Ea mā yoiaito ē mato yoikai tsōaōxō ē iskafaimākai. Akka, ¿tsōa Juan nīchinimē ato maotisafakī ato faka mēra ikimapakenō? Niospa nīchiyamakī yorafāfe nīchiniforaka ea yoikapo,” <sup>31</sup> ato faino āa ranā mēenāpaiyanā iskanifo: “Nō kemakī iskafaino: ‘Niospa nīchini,’ nō faino noko yoikī iskafai: ‘Akka, ¿afeskakī mā Juan nikamismamē?’” <sup>32</sup> Akka nō iskafakī yoitiroma: ‘Yorafāfe Juan nīchinifo,’ ixō nō yoitiroma, yorafoki nō mesei nokoki ōitifishki itirofo.” Akka yorafāfe keyokōichi tāpiafo Niospa shināmanaino Juan ato yoipaoni.

<sup>33</sup> Nāskakē yoikī iskafanifo: “Nō tāpiama tsōara Juan nīchini,” faifono, Jesúsri ato yoikī iskafani: “Ēri mato yoitiroma tsōaōxō ē iskafaimākai,” ixō ato yoini.

## 12

*Meka fetsafaxō Jesús ato yoini a ato yonoxomis chakafoōnoa  
(Mt. 21.33-46; Lc. 20.9-19)*

<sup>1</sup> Anā Jesús ato yoini meka fetsafaxō iskafakī: “Feronāfake fētsa āfe tare ano uva fanani. Fanaxō akiki keneakeni. Akiki keneakexō mai pōkini a mēraxō uva tsinīxiki. Askatari pexe keya fani anoxō kexexiki tsōa mēeyamanō. Mā askafakī fetsaxō a ano yonofaifo ato ināyoni. Nāskafata mai fetsa ari kayoni. <sup>2</sup> Nā fimimistīa mā āfe fana pachianō, āfe ifāfe a yonoxomis nīchini, a kexexonafo ato yōkaxō āfe fana fimifo fixotanō nā āfenā tiiri. <sup>3</sup> Akka āfe kaifo fichikaxō nā fana kexeafāfe achikaxō seteketsakaxō, afaa inākaxoma afaamaiskōi nīchinifo. <sup>4</sup> Nāskata nā tare ifāfe anā a yonoxomis fetsa nīchini. Akka nāri īchaketsayanā tokirinī mapoki tsakakī imi tofeketsafono oni. <sup>5</sup> Nāskano afianā fetsari nīchiano nāa retenifo. Mā reteafono ranāfaxō ato nīchini, nāfori ato seteketsayanā, ranāri ato retenifo.

<sup>6</sup> “Mā ato askafafono, nāno āfe fake fisti ini, nā aō noikōiai. Nāskakē chipokōi fakī āfe fake nīchini: ‘Ēfe fake nikatirofokī,’ ixō. <sup>7</sup> Akka mā āfe fake nīchia kaito fichikanax nā tare kexemisfo yoinānifo iskakani: ‘Nato āfe apa naano na fanafo fixii kiki, a nari nō retenō na tare nōkonā inō,’ ” ikanax yoinānifo. <sup>8</sup> Nāskakē achikaxō mā retekaxō tare pasotai potanifo.

<sup>9</sup> Nāskakē Jesús ato yōkani: “Akka, ¿a tare ifāfe ato afeska fatiromē? Kaxō a tare kexemisfo ato retekī mitoxō fetsafo āfe tare inātiro afāfe kexexonōfo,” ixō Jesús ato yoini.

<sup>10-11</sup> “Akka, ¿a kirika kenekī iskafanifo mā anemismamē?:

Tokiri pexe fapaikakī nā pexe famisfāfe na tokiri chakara ixō potafono, fetsafāfe fichixō na tokiri sharakōi ikaxō akiki pexe fatirofo. Nāskarifiakī xanīfofōfāfe, ‘Nakai afama,’ ikaxō Niospa Fake ōikaspamisfo. Askafafiaifono Niospa āfe Fake katoni nōko Ifo inō. Nāskakē nō akiki inimakōi, ixō kirika ano kenenifo,” Jesús ato fani.

<sup>12</sup> Nāskakē Jesús achikaxō karaxa mēra ikimapainifo, mā tāpikaxō meka fetsafaxō atoōnoa yoiaito. Akka achipaifikani yorafoki mesekani a makinoax fonifo.

*“¿Xanīfo nō kori inātiro mē noko yōkaito?” ixō Jesús yōkanifo  
(Mt. 22.15-22; Lc. 20.20-26)*

<sup>13</sup> Nāskakē chipo fariseofāfe Herodes feta afe yorafo Jesús ano nīchinifo, fanīrira Jesús ato yoiaito afāfe yōanōfo āto xanīfofo yoikakī. <sup>14</sup> Nāskakē mā akiki fēkaxō nāfāfe yōkanifo iskafakakī: “Maestro, mā nō tāpia a mī yoiai anori chanīmakōi mī yoimis. Epa Niospa noko shināmapaiyai anorikōi mēstekōi mī noko yoimis. Afara yoipai mī ranomisma, afarikai mī fomāmisma, na yorafāfe yoiaifo anori mī nikatama, a shināifo anori mī shināmisma. Askatamaroko Epa Niospa meka shara mēstekōi mī yoimis. Akka chanīmamakī noko yoife na romanō xanīfo nō kopifatiromakī askayamakī nō kopifatiroma rakikīa,” ixō yōkaifono, <sup>15</sup> Jesús tāpini feparapaiyaifāfe, nāskaxō ato yoini iskafakī: “¿Afeskakī mā ea feparapaimē?” ato fata, “Ea kori exe fisti fēxokāfe, ē ōinō,” ato faino, <sup>16</sup> kori exe fisti fēxofafono, nā kori exe ōiyanā Jesús ato yōkani: “¿Tsōa femānā na keskaramē? ¿Tsōa aneri na kori exe ano keneamē?” ato faino, kemanifo iskafakakī: “Nōko xanīfo César keskara,” faifono, <sup>17</sup> Jesús ato yoini iskafakī: “Akka na kori exe Césarnākē César inākāfe, akka Niosnākē Niosri inākāfe,” ato faino, “¡Kee! ¡Nikakapo! Āfe meka finakōia tsōakai finōtiroma,” ikanax rateyanā yoinānifo.

*“Yora naax anā otoax, ¿afeskatiromē?” ixō Jesús yōkanifo  
(Mt. 22.23-33; Lc. 20.27-40)*

<sup>18</sup> Nāskakē saduceofo Jesús ōifokani fonifo. Nā saduceofāfe yoimisfo iskafakakī: “Yora naaxkai anā afeskax ototiroma,” ixō yoimisfo. Nāskakē mā fokaxō yōkanifo iskafakakī:

<sup>19</sup> “Maestro, Moisés noko kirika kenexoni iskafakī yoikī: ‘Feronāfake fetsa āfiyax natiro afeta fake akamax, akka nā kēro ifomafa onefētsa fitiro, afeta fake axiki nā fake nā onefetsa naitanā inō.’ <sup>20</sup> Akka nā nane tii siete feronāfake inifo. Āto ochi iyoa āfiyai taeni, mā āfiyax afeta fake akamax nani. <sup>21</sup> Nāskata nāa chipoko fētsa nā kēro ifomafa fini. Nāskarifiiai nāari nani afeta fake akamax. Afianā chipoko fētsari fini, nāari nani afeta fake akamax. <sup>22</sup> Nāskakē nā siete feronāfakefāfe nā kēro fīpakanax, afeta fake akanamax nai keyonifo. Chipokōitani nā kērori nani.

<sup>23</sup> “Nāskakē mā otokaxō, ¿fatoto nā kēro fiximē, nā fistimāi fīpakaxō?” ixō yōkaifono, <sup>24</sup> Jesús ato kemani: “Māakai afaa tāpiama. Na Niospa meka yoikī kenenifokairoko mā ōikatsaxakī. Niospa āfe sharaōnoari mā ōimisma. <sup>25</sup> Yorafo nakanax mā anā otokanax, anā āfiyatirofoma, anāri āto āfi feta fake atirofoma. Askatamaroko nā ājiri nai mēranoafo keskara itirofo. <sup>26-27</sup> Akka, ¿a yorafo nakanax anā otokiaifoōnoa yoikī Moisés kirika kenekī yoiniōnoa mā anemismamē? Niospa fana koofai mēraxō Moisés yoini iskafakī: ‘Ēfi mī xinifāfe āto Nioskōi, Abraham ikaino, Isaaca ikaino, Jacobo ikaino,’ ixō Niospa yoini. Akka Niospa naafoma keskara ato ōi, aōnoax keyokōi niafono. Akka māakai afaa tāpiama mā mā chanīmis,” ixō Jesús ato yoini.

*“Akka, ¿fato meka sharafinakōiamē, nā Niospa shināmanaino Moisés ato yoiniraka?”  
ikaxō fariseofāfe Jesús yōkanifo  
(Mt. 22.34-40)*

<sup>28</sup> A Moisés yoikī kirika keneni keskara ato tāpimamis Jesús ano nokoni, Jesús anoax ato fe yoināino māmāi tāpixō Jesúsmāi ato kemasharakōiaino. Nāskaxō akairi yōkani: “Akka, ¿fato meka sharafinakōiamē, nā Niospa shināmanaino Moisés keneniraka sharafinakōia?” ixō yōkaito, <sup>29</sup> Jesús kemani iskafakī: “Niospa yoini iskafakī: ‘A sharafinakōia ē mia yoinō nikapo. Nā israelifo nikasharafe, nōko Ifo Nios fisti nōko Ifokī anā ano fetsamaki. <sup>30</sup> Nōko Ifo Nios noisharakōikāfe nōko ōitifoyaxō, nōko yōshi sharafoyaxori noikāfe. Nōko mapo mēraxori shināsharakāfe, nōko kerex sharafoyaxō,’ ixō nā meka shara Moisés keneni. <sup>31</sup> Nā ē mato taefakī yoia keskarari nāno fetsari. ‘Nā mato chaima nikari noisharakōikāfe a mā mā noimesharakōiai keskafakāfe.’ Na meka rafe sharafinakōia Niospa yoini,” ixō Jesús ato yoini.

<sup>32</sup> Naskafaito a Moisés yoikī kirika keneni keskara ato tāpimamisto yoini iskafakī: “Mī yoikōi. Maestro, chanīmakōi mī yoimis. Nāno Nios fisti, anā ano a keskara fetsama.



<sup>33</sup> Askatari iskafakī mī yoia, mātō òitifofoxō Nios noikōikāfe, mātō shinā sharafoxyori askafakāfe, mātō yōshi sharafoxyori askafakāfe, mātō kerexfoxyori askafakāfe, a mato chaima nikafori noisharakōikāfe, a mā mā noimeai keskafakī askatari a afarafo nō Nios inā, nāfo nō finōinīfofana sharakōikī. A nō afara koakī nō Nios ināfori nāfori nō finōinīfofana nōko òitifofoxō nō Nios noikōikī,” ixō mī yoia fani.

<sup>34</sup> Askafakī yoisharaito nikakī Jesús yoini iskafakī: “Epa Niospa afe yorafo imasharai keskara mīri mī tāpiax mī afe nīpanaka,” ixō yoiaito, nikakakī tsoa anā tooxinima. Askata anā tsōa yōkanima.

*“Akka, ¿tsōa fenamē Cristo?” ixō Jesús ato yōkani*

*(Mt. 22.41-46; Lc. 20.41-44)*

<sup>35</sup> Jesús Nios kīfiti pexefā mēraxō ato tāpimayanā ato yōkani iskafakī: “Akka, ¿afeskakī a Moisés yoikī kirika keneni keskara ato tāpimamisfāfe na Cristo David āfe fenara fakanimē? <sup>36</sup> Akka Niospa Yōshi Sharapa shināmanaino nā David yoini iskafakī:

Epa Niospa ēfe Ifo yoini iskafakī: ‘Mī efe xanīfokōi īpanakaki. Akka nā mia noikaspaifo mī ato finōkōinō ē ato mī nāmā nīchikai.’

ixō Niospa yoinino David keneni.

<sup>37</sup> “Akka, ¿afeskai Cristo David āfe fena itiromē, nā David Cristo ēfe Ifora fafiapaonino?”

Nāskakē yōrafā rasi inimanifo Jesús ato yoiaito nikakani.

*Jesús ato yōani a Moisés yoikī kirika keneni keskara ato tāpimamisfāfe anorima ato yoiaifono*

*(Mt. 23.1-36; Lc. 11.37-54; 20.45-47)*

<sup>38</sup> Nāskano Jesús ato yoianā iskafakī ato yoini: “Ōisharakakī a Moisés yoikī kirika keneni keskara ato tāpimamisfo tari chainipa safekanax fofāsamisfoki, askatari nafāfe tāpikōiara noko fanōfora ipaikani. Yora ichapafo ano fofāsapaimisfo noko yoisharakōinōra ikanax, nāfo kakapaimisfo. <sup>39</sup> Nāfāfe ichanāti pexe mēraxō tsaoti sharakōi fenamisfo noko òinōfora ikaxō. A piaifo anoaxri ano tsaopaikakī sharakōi ano tsaopaimisfo. <sup>40</sup> Nāskarafāfe kēro ifomafafo ato pexe fīamisfo, nō mato Nios kīfixonira ikaxō chaikōi Nios kīfimisfo atoki kaxemetsamapaiyanā. Nāfo omiskōi finakōixikani Epa Niospa ato omiskōimanaino,” ixō Jesús ato yoini.

*Kēro ifomafa afaamais fixō Epa Nios ināsharakōini*

*(Lc. 21.1-4)*

<sup>41</sup> Nāskata Jesús tsoaxō òini yorafāfe a kori naneti mēra kori naneaiifāfe Nios kīfiti pexefā mēraxō. Akka nā afama mīshti ichapayafāfe kori naneti mēra kori ichapa nanenifo.

<sup>42</sup> Nāskafaifono nāno kēro ifomafa nokoni. Nā kēro ifomafa afaamais fixō āfe kori exe rafe nā kori naneti mēra āfe kori nanekī mitofaito Jesús òini.

<sup>43-44</sup> Nāskafaito òikī Jesús aōxō tāpimisfo kenaxō iskafakī ato yoini: “Chanīma ē mato yoikōi, nā kēro ifomafa afaamaisfixō fetsafo finōmainīfofā āfe kori exe rafe nā kori naneti mēra nanea. Akka nā kori ichapayafāfe nā kori naneti mēra mā āto kori nanefikakī tsōa keyo naneama. Akka nā kēro ifomafa afaamaisfixō nā kori naneti mēra āfe kori nanekī mitokōia. Nāskakē a piai anā afanā fitiroma,” ixō Jesús ato yoini.

## 13

*Jesús ato yoini na Nios kīfiti pexefā pāoixii ixō*

*(Mt. 24.1-2; Lc. 21.5-6)*

<sup>1</sup> Mā Jesús a Nios kīfiti pexefā mēranoax tsekeano, a aōxō tāpimis fētsa yoini iskafakī: “Maestro, òipo, nōko Nios kīfiti pexefo tokirifo petsanāmeakea sharashtakōifo,” ixō yoiaito, <sup>2</sup> Jesús kemani iskafakī: “¿Mā mī òimē na Nios kīfiti pexefo? Akka, ¿na tokirifo anā petsanamexima chipo maoui fetsexii anākai na tokirifo petsanāmxima?” ixō Jesús ato yoini.

*Afaa afeskaximākai mā chaima nōko mai keyoaino Jesús ato yoini  
(Mt. 24.3-28; Lc. 17.22-24; 21.7-24)*

<sup>3</sup> Nāskakata machi Olivos ano fonifo, anoxō ōiafo Nios kīfiti pexefā chaima ini. Nāno Jesús tsaono, Pedro ikaino, Santiago ikaino, Juan ikaino, Andrés ikaino one yōkanifo tsōa ato nikayamanō iskafakakī:

<sup>4</sup> “Nō tāpīpaikai noko yoife. Na mī yoiai keskai afetīa iximākai, afeskaxō nō tāpītiromakī. Askayoamano afaa nō ōītiromakī noko tāpīmafe,” faifono, <sup>5-6</sup> Jesús ato kemani iskafakī: “Kexemesharakani mā ato nikaino mato afara chakafamatirofokī. Yora ichapafo fekani kiki, ēfe aneōnoa mato yoikī iskafakani kiki. ‘Ē Cristoki,’ ikaxō yora ichapafo ato pārāpaikani kiki.

<sup>7</sup> “Akka yorafo retenāifāfe nikai rateyamakāfe. Nā ē yoiai keskai nāskakōixii. Akka fena nōko mai keyoima, chipo ixii. <sup>8</sup> Akka yorafo mai fetsa anoax mēenāpaiyaifono, yora fetsafori mai fetsa anoax retenāixikani. Nāskaifono mai fetsa anoax mai naya naya ixii. Askatari fonāiki finakōixikani afaa pikanima. Askatari mekai finakōixikani. Nāskai omiskōi taexikani.

<sup>9</sup> “Akka māroko kexemesharakāfe. Mato achikaxō xanīfofo mato inākani kiki, nāskakaxō mato koshakani kiki ichanāti peke mēraxō. Xanīfofofāfe ferotaifi mato iyoxikani. Eōxō mato askafaifono, mā ato yoisharakōixikani. <sup>10</sup> Akka a omiskōiaifo nokoyoamano efe īpaxanōfo ēfe meka sharaōnoa ato yoikāfe, nā mai tio anoafō. <sup>11</sup> Akka mato achikaxō mato iyoxikani, xanīfofo mato ināxikakī. Shināchakayamakāfe nō ato afaa faikaimē iyamakāfe. Mā afaa shināpaimakai, nā Niospa mato shināmapaiyai anori mā ato yoikai. Akka mā mekaimakai Niospa Yōshi Shara mekai kiki. <sup>12</sup> A yorafāfe āto extofo yora fetsafo ato achimaxikani ato retenōfo. Ato apafāferi āto fakefo yora fetsafo ato achimaxikani. Nāskarifiakī āto fakefāfe āto apakōifo ato chakafakī mekafaxikani, yora fetsafāfe ato retenōfo. <sup>13</sup> Akka eōxō keyokōichi mato noikaspaxikani. Akka mato noikaspafiaifono mā eōnoax omiskōifiki mā ēfe meka nikasharakōiaito ē mato kexesharakōixii Epa Nios fe mā isharapakexanō.

<sup>14</sup> “Nā Niospa meka yoimisto Daniel a inōpokoai yoikī kirika keneni Nios kīfiti pexefā mēra afara chakakōi faxikani kiki ixō yoikī. (Nāskakē na kirika kenea anexō tāpīkāfe.) Nā chakafinakōia ōikanax, nā Judea anoafō machi keya ano ichorisatakāfe. <sup>15</sup> Askatari āfe peke māmākīa tsoaxō ato fichiax koshikōi fotopakekafā āfe afaa fiamax ichotiro. <sup>16</sup> Askatari a āfe tare ano yonoaito anā oxō āfe rapati fitiroma. <sup>17</sup> Askatari a kēro fake naneafō fe a fake yome pishta chocho amaifo omiskōixikani māmāi yorafo omiskōifinakōiaifono. <sup>18</sup> Askatamaroko mā Epa Nios kīfikāfe mato kexesharanō ichoxō yōtaino matsi mexikakīma. <sup>19</sup> Askatari a omiskōiaifo nokoxii, taeyoi askakatsaxakīma. Nā Niospa yora onifakī taefanītīa tsōa askara ōiyomisma. Askatari anā tsoa chipo omiskōinakama. <sup>20</sup> Akka a omiskōiaifo nōko Ifāfe xateyamano, tsoa nikeranama nai keyokeranifo. Akka afe yorafo ato noikī omiskōinōfoma xateni atomāi katonixakī.

<sup>21</sup> “Akka fētsa mato yoikī iskafaino: ‘Ōikapo nakīa Cristo,’ mato fayanā: ‘Oa onokīa, ōikapo,’ mato faito nikayamakāfe. <sup>22</sup> Akka nā chanīmisfo fekani, ē Cristora ixikani, nāfo nō Niosxō nō mato yoirā ikani. Nāskakaxō tsōa atiroma keskara fakani Satanás yōshixō mato pārāpaikakī. Nā Niospa ato katoafori nāfo ato pārāpaikani. <sup>23</sup> Akka ōisharakāfe afetīama keyokōi mē mato yoiyomiski,” Jesús ato fani.

*Niospa Fake fotoaino afe keskara iximākai ixō Jesús ato yoini  
(Mt. 24.29-35, 42-44; Lc. 21.25-36)*

<sup>24-25</sup> Anā Jesús ato yoini iskafakī: “Akka nā penatari, nā omiskōiaifo mā keyoano, xini fakishkōi ixii, oxeri anā chaxaxima. Fishifori nai mēranoax pakei fetsexii, askatari nā nai mēranoafō naya naya iki fetsexii. <sup>26</sup> Askatari ea ōixikani nai mēranoax nai kōifoya ē fotoaito

sharafinakōia ěfe sharafoya ě fotoxii. <sup>27</sup> Nāskatari ěfe ājirifo ě nīchixii a ě ato katoafo ato ichanāfatanōfo, a chai ikafo ekeki efenōfo.

<sup>28</sup> “Akka shinākapo ě mato yoinō. Mā yōkkafiaino mā tāpitiro āfe pei sirikiaito. Nāskakē āfe peifo keyopaito ōikī mā tāpitiro māmāi chaima xiniaito. <sup>29</sup> Nāskarifiakī afarafo afeskaraito ōikī mā tāpitiro mē chaima oaino askai fetsexii. <sup>30</sup> Ĕ mato pāraima ě mato yoikōi, na ě mato yoiai keskara nono mai anoxō yorafāfe nayokaxōma ōiyokani. <sup>31</sup> Akka nai fe mai keyoi. Akka ěfe meka fisti keyonakama, nā ě mato yoiai keskakōi.

<sup>32</sup> “Afetīara nai mēranoax ě oxii tsōakai tāpiama. Nā ājirifāfe nai mēra ifiakaxō tāpiafoma. Ĕrikai tāpiama. Ĕfe Epa Nios fistichi tāpia.

<sup>33</sup> “Nāskakē mā itipinīsharayanā kexemesharakāfe Epa Nios kīfiyanā. Mā tāpiamaki afetīara ě oxikai. <sup>34</sup> Akka feronāfake fētsa fakira chaikakī, akka kayoxoma a yonoxomisfo yoini āfe pexe kexexonōfo. Nāskaxō ato yono ināketsani yononōfo, akka fētsa āfe pexe fepoti anoxō kexesharayanā mananō yoini. <sup>35-36</sup> Nāskarifiāi māri kexemesharakāfe, mā tāpiamaki fatora penata ě matoki nokorisatanikai. Xini kaino nokoyamata, yame-nakefanaino iyamata, takaranā akaino iyamata, fakishparikōi ě matoki nokotiroki. Iskaratīa oimara ea faax mā oxakē ě mato fichitoshitiroki, nāskakē itipinīsharaxō ea yonoxosharakāfe isharakōixō. <sup>37</sup> Nā ě mato yoiai keskafakī, keyokōi ě yorafo yoi itipinīsharakāfe ixō ě ato yoi,” Jesūs ato fani.

## 14

*“ĵAfeskaxō nō Jesūs retetiromē?” ixō shinānifo  
(Mt. 26.1-5; Lc. 22.1-2; Jn. 11.45-53)*

<sup>1</sup> Mā chaima oxa rafeta āto fista Pascua ikaino, nā fistatīa pāa faraxatimais pipaonifo, nā Niospa ājirinī Ejipto anoxō āto fake iyoafo rētenima shinākakī. Nāskaifono a ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe, afeskaxoma Jesūs pārapainifo pārakaxō retekakakī. <sup>2</sup> Akka achixō retepaifikani, iskanifo: “Fistatīakai nō achitiro ma yorafā rasi mekai fetsekani nokoki ōitifishkitirofo,” ikanax yoinānifo Jesūs retepaifikani.

*Kēromā Jesūs shinākī āfe mapoki pirofomā nachini  
(Mt. 26.6-13; Jn. 12.1-8)*

<sup>3</sup> Akka Jesūs Betania ano ini, Simón pexe ano. Nā Simón “Rashkishiai” fapaonifo. Nāato pexe ano Jesūs mīsa kamaki tsaoano, nāno akiki kēro fisti oni manishomo “alabastro” foikai. Na manishomo mēra xinia pirofomā osia nanea nakas sharakōi ini, āfe ane “nardo.” Nā pirofomā kopipaekōi ini, na manishomo āfe fepoti fepexō maneakefōfā Jesūs āfe mapoki nachini, nā kēromā. <sup>4</sup> Askafaito ōikani nā anoafo ōitifishkiyanā āa ranā yoinānifo iskakani: “ĵAfeskakī na kēromā na pirofomā sharakōi chakanafaimē? <sup>5</sup> Ato minixō, aōxō kori ichapa fixō a afaamaisfo ato inākerana,” ikaxō nā kēro feratenifo.

<sup>6</sup> Askafaiāfe ōikī Jesūs ato yoini iskafakī: “Enekāfe. ĵAfeskafakī na kēro mā fekaxtefaimē? Na ea iskafai sharakī,” ato fani. <sup>7</sup> “Akka nā afaamaisfori mato fe ipanakafo, fatora penata mā ato sharafaxopaikī mā ato sharafaxotiro. Akka eakai mēxotaima mā ea anā ōima. <sup>8</sup> Akka na kēromā ea iskafakī ea sharafa. Ĕ nayoamano taefakī ěfe yoraki pirofomā nachia. <sup>9</sup> Ĕ mato pāraima, fanīxōra na meka shara eōnoa yoikakī nā mai tio anoxō na kēromā ea iskafaōnoa yoixikani. Askatari na kēroōnoa shināpakenakafo, shināmakiyamaxikakī,” ixō Jesūs ato yoini.

*Judaspa aōxō tāpifikatsaxakī Jesūs ato achimani  
(Mt. 26.14-16; Lc. 22.3-6)*

<sup>10</sup> Nāskafakī Jesūs ato yoiaino nā afe rafemis fetsa nā docefo ano, nā Judas Iscariote a ato Nios kīfixomis xanīfofo fe mekaikai kani. Mā kaxō ato yoini iskafakī: “ĵAfe tii

mã ea kopifatiromẽ ã mato Jesús achixonõ?” ato faito, <sup>11</sup> nikakani inimakõiyana yoikĩ iskafanifo: “Nõ mia kori ichapa inãikai,” faifono, nãskakẽ Judaspa shinãni: “Afeskaxomã ã Jesús ato achimanõ,” ixõ shinãni.

*Mã chaima reteaifono Jesús aõxõ tãpimisfo feta yãtapake pini*  
(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup> Akka nã fistatã pãa faraxatimais pipaonifo. Afia penatari Pascua fistatã ovejanã fake retexõ pinifo. Nãskano aõxõ tãpimisfãfe Jesús yõkanifo. “¿Fanĩ mĩ fichipaimẽ ano kaxõ nõ itipinĩ fanõ, anoxõ Pascuatã yãtapake pixiki?” ixõ yõkaifono, <sup>13</sup> nãskakẽ Jesús aõxõ tãpimis rafe nĩchini, iskafakĩ ato yoianã: “Pexe rasi ano fotakãfe. Nãnoa feronãfake fisti mã fichikaikai keshoki faka tetsaomexõ foikaino, nã feronãfake fe fõtakãfe. <sup>14</sup> Akka nã feronãfake ikiai ano afe ikixõ, nãnoa pexe ifo yõkakãfe iskafakĩ: ‘Nõko Maestro noko yoikĩ iskafaa: “Nã pexe ifo yõkakãfe, ¿Fato kene mëraxõ Pascua fistatã eõxõ tãpimisfo feta yãtapake ã pitromãkĩ?” ixõ yõkakãfe.’ <sup>15</sup> Mã askafakĩ yõkaito pexe kene efapa fomãkãano mato ispai kiki mã itipinĩkõia. Nãno noko itipinĩsharafxokãfe,” Jesús aõxõ tãpimisfo rafe fani.

<sup>16</sup> Ato askafaino aõxõ tãpimis rafe fonifo. Mã fokanax pexe rasi ano nokonifo. Mã nokokaxõ nã Jesús ato yoia keskarakõĩ fichitoshinifo. Nãnoxõ itipinĩ fanifo Pascua fistatã pixikakĩ.

<sup>17</sup> Mã fakishaino Jesús aõxõ tãpimis docefo fe nokonifo. <sup>18</sup> Mã fokaxõ mĩsa ano tsoaxõ piaifono Jesús ato yoini. “Ë mato pãraima fatora na mã efeta piai fẽtsa mã ea ato achimafainaka,” ato faino, <sup>19</sup> nikakani shinãmitsakõiyana maikiri fepepakefofãnifo. Nãskakanax ãa ranã yoinãnifo iskakani: “¿Tsoamẽ, ãraka?” Fetsari iskani: “Õitsai, ãraka,” iki fetsenifo.

<sup>20</sup> Askaifono Jesús ato kemani: “Nã mã docefo anoafãfe, nã mã efeta sapaki piai fẽtsa mã ea yõaikai ea achinõfo. <sup>21</sup> Nã Niospa meka yoiki, eõnoa yoikĩ kenenifo keskai ã askakõĩ. Akka na feronãfãke ea ato achimafãax akairi omiskõikõixii. Akka na feronãfake shara ikerana fakeyamanixakĩ,” ixõ Jesús ato yoini.

<sup>22</sup> Piaifono Jesús pãa tsomainĩfofã. Apa Nios kĩfiki aicho fata, mã kaxkepakexõ ato inãni, iskafakĩ ato yoianã: “Na ãfe nami keskaraki pĩkãfe,” ato fani.

<sup>23</sup> Nãskata mã Apa Nios aicho faxõ, kecho tsomainĩfofã ato inãni. Nãskakẽ mã ato inãno keyokõichi ayanifo. <sup>24</sup> Nãskaxõ ato yoikĩ iskafani: “Nafi ãfe imi keskaraki. Mẽ naino ãfe imi foxii. Keyokõĩ yorafãfe afara chakafamisfono ã atoõnoax naikai. Ë askaino Niospa ato potapakenakama. Ë ato naxõĩ ãto chaka ato soaxoxiki. <sup>25</sup> Ë mato pãraima. Ë mato yoikõĩ ã anã mato feta na fimi ene ayaima. Mẽ nai mërã kai. Nã ãfe Epa Nios xanĩfokõĩ ika anoxõ ã anã mato feta na fimi ene shara ayaxii,” ixõ ato yoini.

*“Ë Jesús õimisma,” Pedro ixianõ Jesús ato yoini*  
(Mt. 26.30-35; Lc. 22.31-34; Jn. 13.36-38)

<sup>26</sup> Nãskata mã fanãiki xatekata machi Olivos ano fonifo. <sup>27</sup> Nãskata Jesús ato yoini iskafakĩ: “A na fakishi keyokõĩ mã ea shinãmakĩ fetsei. Akka kirika ano kenekĩ iskafakĩ yoinifo: ‘Ãfe ifo reteaifono, ãfe ovejãfo ichoi fetsetirofo,’ ixõ kirika ano kenenifo,” ato fani. <sup>28</sup> “Akka ea retefiafono mẽ otoax Galilea ano ã nokoi taexii mã nokoamano,” ixõ ato yoini.

<sup>29</sup> Ato askafaito nikakĩ Pedro kemani. “Akka keyokõĩ shinãmakifiaifono ãkai mia shinãmakima,” ixõ yoiaito, <sup>30</sup> nikakĩ akka Jesús yoini iskafaki: “Ë mã pãraima na fakish fistichi takara keoi rafeyamano, ‘Ë Jesús õimismara,’ mĩ ato fai tres fakĩ.”

<sup>31</sup> Askafaito nikakĩ anã Pedro kemani. “Maa. Mia retefiaifono ã mefe nai. Ë õimismara ã mã faima,” fani.

Pedro askafaito nikakakĩ keyokõichi askafakĩ fetsanifo.

*Getsemaní anoxõ Jesús Apa Nios kĩfini*  
(Mt. 26.36-46; Lc. 22.39-46)

<sup>32</sup> Nãskakata nã ifi mapoa ãfe ane Getsemaní ano nokonifo. Nãnoxõ Jesús aõxõ tãpimisfo yoini iskafakĩ: “Nono tsaokãfe. Ë Epa Nios kĩfiyotanõ,” ato fani.

<sup>33</sup> Akka Pedro iyota, Santiago\* iyota, Juan iyota ato fani. Nãskaxõ ãfe yora meeni shinãmitsakõiyana fekaxtekõiaito, <sup>34</sup> nãskakĩ ato yoini: “Ëfe yõshi shinãmitsakõ napaiyaito ã meikai. Nono nẽtekãfe, akka mã oxaki,” ato fani.

<sup>35</sup> Nãato askafata ori chaimashta Jesús ares kani. Nãnoxõ ratokonõ mai chachipakefofã Apa Nios kĩfikĩ iskafani: “Epa, ea mã kexetiromakĩ ea kexefe ea reteafono ã omiskõinõma. <sup>36</sup> Epa, mã keyokõ tãpiakĩ. Ea mã ifipaikĩ ea mã ifitiro ã omiskõinõma. Akka nã ã apaiyai keskafakĩma nã mã ea amapaiyai keskafafe,” Apa fani.

<sup>37</sup> Nãskata mã aõxõ tãpimisfo ano oxõ õia oxafo ato fichitoshini. Nãskaxõ Pedro yoini: “Simón, ¿mã mã oxamẽ? ¿Afeskakĩ mã pishta oxa tenetiromamẽ? <sup>38</sup> Moikaxõ Epa Nios kĩfikãfe Satanás chakata mato chakafamapaiyai keskara axikakima. Chanĩma, nã Epa Niospa mato amapaiyai keskara mãto shinã mẽraxõ mã apaifikĩ mã atiroma. Akka mãto yora pachikõikĩ,” ixõ Jesús Pedro yoini.

<sup>39</sup> Ato askafata anã kani Apa Nios kĩfikai a yoitana keskafakĩ. <sup>40</sup> Nãskata anã oxõ ato fichitoshini aõxõ tãpimisfo oxafono, oxa paemei fetsoafono, a Jesús ato yoiai keskara tãpikaxoma tsõa kemanima. <sup>41</sup> Nãato askafata anã ato makinoax kani orishtaxõ Apa Nios kĩfikai. Mã Apa Nios kĩfitani oxõ ato yoitoshini iskafakĩ: “¿Ai mã oxamẽ tenekõiyana? Moikãfe. Akka iskaratĩa a ea ato achimaniyoai mã chaima oi kiki. Yora chakafãfe ea achifenõfo ato efe ikiki. <sup>42</sup> Fininĩfofãkãfe nõ kanõ. Mã chaima oi kiki a ea ato achimaniyoai,” Jesús ato fani.

*Jesús achinifo*

(Mt. 26.47-56; Lc. 22.47-53; Jn. 18.2-11)

<sup>43</sup> Jesús ato yoiaino Judas nokoni, nã Judaspa Jesúsxõ tãpifikatsaxakĩ, yorafã rasifo fe oni. Nã yorafo kenofoya ifi xatefoya fenifo, a ato Nios kĩfixomisfãfe ãto xanĩfofo feta a Moisés yoikĩ kirika keneni keskara ato tãpimamisfãfe, a xanĩfo fetsafãferi ato nĩchiafono. <sup>44</sup> Judaspa nã ato efeaito iskafakĩ ato yoiyoni: “A ã kokoki tsoo akaito õikĩ koshi achirisafaxikãki metexkere axõ iyotaxikãki,” ixõ ato yoini.

<sup>45</sup> Nãskata Judas mã Jesús ano nokoxõ iskafakĩ yoini: “¿Maestro, mãmẽ?” ixõ kokotoshini. <sup>46</sup> Nãskafaito õikakĩ nã Judas fe foafãfe Jesús achinifo.

<sup>47</sup> Akka Jesús achiaifãfe õikĩ a aõxõ tãpimis fẽtsa ãfe keno chainipa tsekainĩfõfã, a ato Nios kĩfixomisfãfe ãto xanĩfãfe ina paxteni. <sup>48</sup> Nãskakẽ Jesús yorafo yoini iskafakĩ: “¿Afeskai kenofoya ifi xatefoya mã oamẽ ea achiyoi oa ã yometso keskarakẽ? <sup>49</sup> Pena tii ã mato fe itiani Nios kĩfiti pexefã mẽraxõ ã mato tãpimani, akka mãkai ea achipaimisma. Akka nã eõnoa yoikĩ kenenifo keskafakĩ mã ea achi,” ixõ Jesús ato yoini.

<sup>50</sup> Ato askafaino aõxõ tãpimisfo Jesús õifaikani. Ichoi fetsenifo a makinoax.

<sup>51</sup> Akka naetapa fistichĩ sabanã nã rakoxõ Jesús chĩfafainaito õikakĩ achinifo. <sup>52</sup> Akka achiaifono ãfe sabanã potafaini chitoria ichoni.

*Xanĩfo finakõiafo ano Jesús iyonifo*

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Nãskakẽ Jesús achikaxõ iyonifo a ato Nios kĩfixomisfãfe ãto xanĩfãfe pexe ano. Nãskakẽ keyokõ anofistiax ichanãnifo a ato Nios kĩfixomisfãfe ãto xanĩfofo fe a judeofãfe ãto xanĩfofo a Moisés yoikĩ kirika keneni keskara ato tãpimamisfori ato fe inifo. <sup>54</sup> Akka Pedro acho kakĩ chai ixõ õifoni. Nãskata a ato Nios kĩfixomisfãfe ãto xanĩfãfe pexe emãiti nokoni. Nãnoax a Nios kĩfiti pexefã kexemisfo fe chii ketefax ato fe yoini.

\* 14:33 Santiago ãfe ane fetsa Jacobo ini.

<sup>55</sup> A ato Nios kīfixomis xanīfofōfāfe a āto xanīfofinakōiafo fe is kai yoinānifo: “Afeskaxomāi nō pāranō na Jesús afara chakafara ixō retexiki. Akka afaakai chakafa nō nikaima,” inifo. <sup>56</sup> Nāskaifono yora ichapafāfe, “Na Jesús afara chakafaito nō ōia,” ixō pāraketsanifo. Askafafiakakī anoris yoiketsanifoma. Āa chanī fetsenifo. <sup>57</sup> Askafaifono ranāri fininīfofākāta āa mekafakakī chakafakī fetsanifo iskafakakī: <sup>58</sup> “Nō nikaino na feronāfake iskaita: ‘Na Nios kīfiti pexefā yorafāfe akafo ē pāofaxii. Nāskata tres nia oxata ē anā fetsafaxii, anā yorafāfe efeta akanima, eres fisti ē aki,’ ixō yoiāito nō nikaita.”

<sup>59</sup> Askafakī yoifikakī tsōa anoris yoinifoma, āa chanī fetsenifo.

<sup>60</sup> Nāskafaifono a ato Nios kīfixomisfāfe āto xanīfāfe ato nēxpakīa niinākfā iskafakī Jesús yōkani: “¿Mī kemamitsaimamē afamē na mīōnoa meka chaka yoiāifo?” ixō yoini.

<sup>61</sup> Askafaino akka Jesús tooxinima, pishtakai kemanima. Afianā a ato Nios kīfixomisfāfe āto xanīfāfe iskafakī yōkani: “¿Mīmē Cristo? ¿Nā Nios nipanakato āfe Fakemē, mī?”

<sup>62</sup> Askafaito nikakī Jesús kemani: “Ēje, ěkīa Niospa Fake. Akka mā ea ōixii ěfe Epa ketaxamei āfe pōya kayakai aōri ē tsāokē xanīfo finakōia ěfe Epa fe. Askatari mā ea ōixii nai kōi mēranoax ē anā fofofaito,” Jesús ato fani.

<sup>63</sup> Askafaito nikakī a Nios ato kīfixomisfāfe āto xanīfāfe āfe rapati faxteni fetsafāfe tāpinōfo nā xanīfo ōititishkikaito. Nāskaxō ato yoini iskafakī: “Mā nōakōi nō nikakī noko anā tsōa yoitromaki nō tāpinō. <sup>64</sup> Mā mā nikakī na feronāfake āfe mekapa Nios chakafakī mekafaito. Akka, ¿nō afeskafaimē?” ato faito keyokōichi, “Nanōki,” fanifo.

<sup>65</sup> Nāskakata mā fenexkaxō āfe femānāki kemo mechoketsayanā koshaketsanifo iskafakī yoiyanā: “Tsōa mia koshamakī tāpipo noko yoixiki,” faifono, a Nios kīfiti pexefā kexemisfāferi fepasketsanifo.

*“Ē Jesús ōimisma,” Pedro ini*

*(Mt. 26.69-75; Lc. 22.56-62; Jn. 18.15-18, 25-29)*

<sup>66-67</sup> Pedro pexefā emāiti ato fe tsaoano, nāno akiki a xanīfo yonoxomis xomaya nokoni. Nāno ato fe chii ketefaax tsaoax yooaito ōikī, iskafakī yoini: “Mīri Nazarete anoax Jesús fe kafāsamis,” faino, <sup>68</sup> akka Pedro iskafakī kemani: “Ēkai Jesús ōimisma. Ēkai afaa tāpiama tsoaraōnoa mī yoi,” fata, pexefā kāiti ano Pedro nasteinīfofānaino, takara keonākfāni.

<sup>69</sup> Afianā nā xanīfo yonoxomis xomayato Pedro ōiki, nānoafo iskafakī ato yoini: “A na feronāfake Jesús fe rafemis ōikapo, a nā Jesús Nazarete anoax fe kafāsamis,” fani.

<sup>70</sup> Akka Pedro anā iskani: “Maa, ěkai Jesús fe rafemisma,” ini. Nāskaino nā anoafāfe anā Pedro yōakakī iskafanifo: “Chanīma, mīri Jesús fe rafemis. Mīri Galilea anoakī mī mekai nā Jesús mekai keskarakī,” faifono, <sup>71</sup> akka Pedro ato yoikī iskafani: “Ē mato pāraima, ē chanīaito ea Niospa omiskōimatiro. Niospa tāpia chanīmakōi ē mato yoi. Ēkai na Jesús ōimisma tsoaraōnoa mā yoi,” Pedro ato fani.

<sup>72</sup> Pedro nāskaino anā takara keoinākfāni. Nāskaino Pedro shinātani nā Jesús iskafakī yoita keskara: “Taeyoi takara keofi rafeamano, ‘Ē Jesús ōimismara,’ mī ea faxii tres fakī,” ixō yoitano, nā shinātani Pedro shināmitsai oiakōini.

## 15

*Pilato ano Jesús iyonifo*

*(Mt. 27.1-2, 11-14; Lc. 23.1-5; Jn. 18.28-38)*

<sup>1</sup> Mā penaino a ato Nios kīfixomisfāfe āto xanīfofo ichanānifo, a judeofāfe āto xanīfofo fe, a Moisés yoikī kirika kenenī keskara ato tāpimamisfori ato fe inifo. Nā xanīfo fetsafori a ato rafeafori ato fe inifo. Nāskakaxō Jesús metexkere akaxō iyokaxō Pilato inānifo. <sup>2</sup> Mā iyoxō ināfono Pilato yōkani iskafakī: “¿Mīmē judeofāfe xanīfo?” askafaito, Jesús kemani: “Ēje, nā mī ea yoiāi keskarakīa,” Jesús fani.

<sup>3</sup> Nāskaino nã ato Nios kīfixomisfāfe āto xanīfofofāfe āa pāarakakī yōaketsanifo.  
<sup>4</sup> Nāskafaifono anã Pilato yōkaxō iskafakī yoini: “¿Mī ato kemaimamē mīōnoa afara chakafo yoifiaifono?”

<sup>5</sup> Askafaito nikakī Jesús tooxanima. Nāskakē Pilato shināni iskafakī: “Kee, ¿afeskakī ea kemaimamē?” ixō shināni.

*Pilato ato yoini Jesús retenōfo*  
*(Mt. 27.15-31; Lc. 23.13-25; Jn. 18.38-19.16)*

<sup>6</sup> Akka Pascua fistatīa Pilato karaxa mēranoa nã xinia tii fisti rasi ato kāimapaoni māmāi askafakī feyafakatsaxakī. Nã yorafāfe kāimapaiyaifo ato kāimaxopaoni. <sup>7</sup> Akka nã karaxa mēra feronāfake āfe ane Barrabás ika ini. Nãato fetsafo feta yora retemis ini nã āto xanīfo ato pōtapaikī. <sup>8</sup> Akka yorafo fenifo. Mā fēkaxō Pilato yōkanifo māmāi askafakī feyafakatsaxakakī.

<sup>9</sup> Askafaifono Pilato ato kemani: “¿Mā fichipaimē judeofāfe āto xanīfo ē kāimanō?” ato fani.

<sup>10</sup> Akka Pilato tāpini a ato Nios kīfixomisfāfe āto xanīfofofāfe Jesús chakafakī mekafaifono anã yorafāfe noko nikakanimara ikaxō, nāskakaxomāi akiki efekaxō ināfono. <sup>11</sup> Akka a ato Nios kīfixomis āto xanīfofofāfe fāsikōi yorafo mekamanifo: “¡Noko Barrabás kāimaxōfe!” ikaxō Pilato yoinifo.

<sup>12</sup> Askafaifono Pilato ato yōkani: “Akka, ¿na judeofāfe āto xanīfora mā fai ē afeska fatiromē?” ato faito, <sup>13</sup> kemakakī fāsikōi iskafanifo: “¡Mastafe!” fanifo keyokōichi.

<sup>14</sup> Askafaifono Pilato ato yoini iskafakī: “Akka, ¿na feronāfake afaa chakafamē?” ato faino, anã fāsikōi mekainīfofānifo: “¡Mastafe!” fanifo.

<sup>15</sup> Nāskafaifono yorafāfe sharakōi fanōfo Pilato ato Barrabás kāimaxoni. Nāskata mā Jesús ato koshamata, ato nīchixononi ifi cruz ikaki mastatanōfo.

<sup>16</sup> Nāskakē sorarofāfe xanīfāfe pexe emāiti Jesús iyonifo, nānoax sorarofa ichanānifo. <sup>17</sup> Nāskakaxō āfe rapati pēkakaxō, rapati ōshi nana safemanifo, moxa maiti fakaxori maimanifo. <sup>18</sup> Nāskakaxō fāsikōi mekafanifo iskafakakī: “¡Aicho, mīfi judeofāfe āto xanīfo!” ikaxō kaxemetsama fanifo.

<sup>19</sup> Nāskatari tafa xatenē mapoki koshaketsayanā akiki kemo mechoketsanifo. Nāskakata akiki ratokonō mai chachipakefofā kaxemetsama fanifo. <sup>20</sup> Nāskai mā akiki kaxemetsamakaxō a rapati ōshi nana safemanifo fīakaxō āfenākōi safemanifo. Nāskakaxō iyonifo mā ifi cruz ikaki mastafokakī.

*Jesús ifi cruz ikaki mastanifo*  
*(Mt. 27.32-44; Lc. 23.26-43; Jn. 19.17-27)*

<sup>21</sup> Mā Jesús iyoifokakī feronāfake Cirene anoa fichinifo, āfe ane Simón. Alejandro feta Rufo āto apa ini. Pexe rasi pasotai inoax oaito, fichikaxō yoinifo iskafakakī: “Na Jesús āfe cruz foxōikafe,” fanifo.

<sup>22</sup> Nāskaxō Jesús iyonifo āfe ane Gólgota ano. Āfe ane fetsa Mapo Xao fanifo. <sup>23</sup> Nānoxō fimi ene osia mokakōi Jesús ayamapainifo. Akka Jesús ayakaspani. <sup>24</sup> Nāskafakaxō mastanifo. Mā mastakanax sorarofa makex tokoroya kaxenifo. Nã potakī kanāto āfe rapati fīani. Nāskafakaxō keyofīanifo.

<sup>25</sup> Rama xini keyaino Jesús mastanifo. <sup>26</sup> Mā mastakaxō a mñāo tafaraki kenenifo iskafakakī: “Judeofāfe āto Xanīfokōi,” ikaxō a mñāo kenenifo. <sup>27</sup> Nāskakaxō Jesús yafi yometso raferi mastanifo, fetsa āfe pōya kayakai aōri ata, fetsari āfe pōya mishkiori anifo. <sup>28</sup> Afetīama aōnoa yoikī keneyonifo iskafakī yoinifo: “Nã yora chakakōifo keskarakōi ixō aōnoa yoixikani,” ikaxō kenenifo. Chanīmakōi. Nāskakōi fanifo aōnoa yoikakī.

<sup>29</sup> Nã ano finōfāifāfe ĭchayanā āto mapo rafe rafe ayanā iskafanifo: “Iskafakī mī yoimis: ‘Nã anoxō Nios kīfiti pexefā ē pāo axii. Nāskaxō tres nia oxata ē anã axii,’ ixō mī yoimis. <sup>30</sup> Mī ifimetiromakī mña ifimefe na ifi cruz ikakinoax fotopakekafāfe,” faifono,

<sup>31</sup> nāskarifikā a ato Nios kīfixomisfāfe āto xanīfofo feta a Moisés yoikī kirika kenei keskara ato tāpimamisfāfe askafanifo akiki kaxemetsamapaikakī. Nāskax āa ranā yoinākani iskanifo: “Nato fetsafo ififikatsaxakī, akka aakai ifimeima. <sup>32</sup> A na Cristo israelifāfe āto xanīfo, iskaratīa nō ōipanā afeskai ifi cruz ikakinoax fotopakekafanimamē, nāskaito nō chanīmara faikai,” ikaxō, nā ayafi mastaforti īchaketsanifo.

### *Jesús nani*

*(Mt. 27.45-56; Lc. 23.44-49; Jn. 19.28-30)*

<sup>33</sup> Nāskata xini keya nā mai tio fakishifākōitani. Nāskax mā xini kaino anā penani. <sup>34</sup> Nāno xini rakano fāsikōi Jesús kenani iskai: “Eloi, Eloi, ¿lema sabactani?” fani. Nōko mekapa iskafakī yoini: “Ēfe Nios, ēfe Nios, ¿afeskakī mī ea potaimē?” fani.

<sup>35</sup> Nāskaito nā ano niafāfe nikakakī iskafanifo: “Nikakapo, nā ato Niospa meka yoipaoni Elías kenai kiki,” fanifo.

<sup>36</sup> Nāskaito nikafaini nānoa fetsa ichoni xapo keskara fiikai. Nā xapo keskara fimi ene kachaki momoxō tafa xate kaxkexō akiki nētaxō ayamapaini, iskafakī ato yoiyanā: “Enekāfe nō ōinō Elías oi kiki fotomaniyoi,” ixō ato yoini.

<sup>37</sup> Nāskakē Jesús fāsikōi eaita nani. <sup>38</sup> Nāskakē sama nami Nios kīfiti pexefā mēranoax naki rafekōi faxtepakekafāni fomākīanoax. <sup>39</sup> Nāskaito ōikī nā soraro xanīfāfe Jesús eaita naito ōikī chaimashta nīxō iskafakī yoini: “Chanīma, na feronāfake Niospa Fake ika.”

<sup>40</sup> Askatari kērofāferi chai nikaxō ōinifo. Nāno ato fe María Magdalenari ini, María fetsari ini, Jacobo feta José āto afa ini. Saloméri ato fe ini. <sup>41</sup> Nā kērofāfe Jesús chīfamisfo inifo, pimaxikakī Jesús Galilea ano ikano. Nānori kēro fetsafo inifo, Jerusalén anoax afe foitaxakakī.

### *Jesús makex kini mēra maifanifo*

*(Mt. 27.57-61; Lc. 23.50-56; Jn. 19.38-42)*

<sup>42</sup> Penama safaro ikaino judeofāfe itipinīfapaonifo, nā safaromāi āto teneti penakē, nā yātapake <sup>43</sup> José oni, nā Joséri judeofāfe āto xanīfo. Nāato Nios xanīfo manapaoni, nā José finakōixō Pilato ano ikikaixō Jesús āfe yora yōkani. <sup>44</sup> Askafakī yōkaito nikai Pilato rateni, “¿Mā Jesús naamē?” ikax. Nāskaxō soraro xanīfo kenani yōkaxiki mā Jesús naamakī.

<sup>45</sup> Nāskafaito soraro xanīfāfe yoini: “Mā naakīa,” faito, Pilato Jesús āfe yora José ināni.

<sup>46</sup> Nāskakē José sama sharakōi fixō nā samapa Jesús āfe yora rakoni. Nāskaxō a makex kini fanifo mēra rātani. Nāskaxō makexefanē nā kini feponi. <sup>47</sup> Akka María Magdalena feta María José āfe afa nā maifaafo anoxō ōinifo.

## 16

### *Jesús otoni*

*(Mt. 28.1-10; Lc. 24.1-12; Jn. 20.1-10)*

<sup>1</sup> Mā pena teneti finōano María Magdalena ikaino, María fetsa Jacobo āfe afa ikaino, Salomé ikaino, nā tiito pirofomā fonifo, Jesús āfe yora raish akī foxikaki. <sup>2</sup> Fakishparikōi fonifo mā pena teneti finōano nāskanax a Jesús maia ano nokonifo, mā xini keyaino. <sup>3</sup> Mā nokokanax āa ranā yoinākani iskanifo: “¿Tsōa na kini anoa tokiri noko fēpexotiomē?” ikanax yoinānifo.

<sup>4</sup> Akka ōiafo a kini aō fepoitafo a tokirinīfā, mā fepekemea ini, anā fepoa inima.

<sup>5</sup> Nāskakē nā kini mēra ikifaikakī ōiafo. Nā kini mēra naetapa tsaoa ini, nā nōko pōya kayakai aōri. Rapati chainipa oxokōi safeax, nāskaito ōikani ratekōinifo. <sup>6</sup> Nāskaifono nāato ato yoini iskafakī:

“Rateyamakāfe, Jesús Nazarete anoa mā fenaikai nā ifi cruz ikaki mastaitafo mā otoaki anā nonomaki. Ōikapo a rātaitafo ano. <sup>7</sup> Fokaxō aōxō tāpimisfo yoitakāfe, Pedrori yoikakī mā nokoamano nā Galilea ano nokoi taei kai kiki. Nā mato yoifafaina keskara



nārixō mā ōikaikai,” ixō ato yoiaino,<sup>8</sup> nāskakē nā kērofo fonifo nā kini anoax ato yoiaito nikafaikani. Ratei choayanā ato yoinifoma, mesemāiakaki.

*Jesús María Magdalenaki nokoni*  
(Jn. 20.11-18)

<sup>9</sup> Mā pena nomīkonō fakishpari Jesús otoitaxaki, María Magdalenaki nokoi taeni, nā María makinoa siete niafaka yōshi chakafo Jesús pōtani. <sup>10</sup> Nāato kaxō a afe rafemisfo ato yoikai kani a ōia keskara. Kaxō ato ōia shināmitsakani oiaifāfe ato ōini. <sup>11</sup> “Mā nōko Ifo Jesús otoakī mē ōiaki,” ixō ato yoiaito, tsōa chanīmara fanima.

*Jesús aōxō tāpimis rafeki nokoni*  
(Lc. 24.13-35)

<sup>12</sup> Mā askata fetsa keskarax Jesús aōxō tāpimis rafeki nokoni fāi foaifono. <sup>13</sup> Nā rafetari a afe rafemisfo yoifokani fonifo. “Mā nō Jesús ōiaki,” ato faifono, tsōa ato nikanima.

*Jesús aōxō tāpimisfo yoini aōxō keyokōi yoifofāsafatanōfo*  
(Mt. 28.16-20; Lc. 24.36-49; Jn. 20.19-23)

<sup>14</sup> Nāskata chipo Jesús aōxō tāpimis oncefoki nokoni, mīsa ano tsaoxō piaifono. Mā atoki nokoxō iskafakī ato yoini: “¿Afeskakī mā ato chanīmara famamē mē ofofiano nā ea ōiafāfe mato yoiaifono?” <sup>15</sup> Nāskaxō ato yoikī iskafani: “Nā mai tio ano fokaxō na meka shara eōnoa keyokōi ato yoitakāfe mē otoakī āto chaka ato soaxoxiki efe īpaxanōfo. <sup>16</sup> Akka na meka shara chanīmara fakanax, faka mēra iki maotisameax ēfe Epa Nios fe nīpanakafo. Akka na meka shara eōnoa chanīmara fayamakanax, nāfo omiskōipakenakafo. <sup>17</sup> Akka nā ea chanīmara faifāfe, ēfe aneōxō ato makinoa niafaka yōshi chakafo potatirofo. Nāskakanax meka fena sharapa mekatirofo. <sup>18</sup> Nāskakaxō rono tsomatirofo nāskakaxori rao paekōi ayakanax afeskatirofoma. A isinī ikaifori ato ramāifono sharatirofo,” ixō Jesús ato yoini.

*Jesús nai mēra kani*  
(Lc. 24.50-53)

<sup>19</sup> Nāskafakī ato yoita, nōko Ifo Jesús ronoinākfāni nai mēra kai. Mā nai mēra kaax Apa Nios ketaxamei tsaoni afe xanīfokōi ixiki. <sup>20</sup> Mā Jesús nai mēra kaano aōxō tāpimisfo fonifo. Nā mai tio anofo aōnoa meka shara yoifokani afe nīpaxanōfo. Nōko Ifāfe ato axōfaino aōxō aōnoa meka shara yoikōinifo, tsōa atiroma keskafakī aōxō afama mīshtifori fanifo. Nā tii.

## Lucaspa Jesúsnoa Yoikĩ Keneni

### *Lucaspa kirika keneni Jesús nõko mai ano ipaonino*

<sup>1-4</sup> Teófilo, ẽ mia kirika kenexõ manamani, mĩ tãpinõ. Mã mĩ tãpia Jesús nõko mai ano ipaoni. Nõko mai ano ikano yorafãfe õipaonifo. Akka nã fakenitã õiaifono yosini. Nãfãferi õikaxõ yora fetsafo yoipaonifo akairi Jesúsnoa tãpinõfo. Ato yoiãifãfe nikakakĩ akairi kirika kenepaonifo afeskai nofe Jesús ikimamẽ ikaxõ. Nãskarifiakĩ ẽ mia kirika kenexoni, nã Jesús tãpiafo yõkaxõ. Efe yorashta Teófilo, nãskakẽ ẽ mia kirika kenexõ manamani, nã mia Jesúsnoa yoiãifono nikakĩ mĩ chanĩmara fanõ.

### *Ãjirinĩ yoini, Juan Maotista kãiyõamano*

<sup>5</sup> Jesús fakeamano Zacarías iyopaoni Judea mai ano ãfe kaifo fe. Ari ikano Herodes ãto xanĩfo finakõia ipaoni. Nã Zacarías ãfe xini ane ipaoni Aarón. Nã Aarón ãfe fena Zacarías ipaoni. Akka ãfe ãfi Elizabetri Aarón fena ipaoni, ãto xinimãi Aarónkẽ. Nã Aarón ãfe fenãfãfe ato Nios kĩfixopaonifo ãto kaifofo. Zacaríasri ato kĩfixopaoni Aarón ãfe fenamãi axõ. Nã Zacarías ãfe kaifo feta yonopaoni, Nios kĩfiti pexefã mẽraxõ Abíasfo feta. <sup>6</sup> Zacarías ãfe ãfi feta Niospa meka nikasharakõipaonifo, nã Niospa meka yoikĩ kenenifo keskafakĩ. Akka nã Niospa yoiãi keskafakĩ nikasharakõiaifono Niospa ato õini, shara shinãi ikafono. <sup>7</sup> Akka Elisabet fake fimisma ipaoni. Nãskaxõ mã yõxãfoxõ fake fipaonima fene feta. Nãskax fene anifoaino nãri askani yõxãfoi.

<sup>8</sup> Nãskakẽ ãto xanĩfãfe ato yoini, Abías yorafo: “Nã Nios kĩfiti pexefã mẽra yonomisfo mã tsekefaini fokani kiki. Mãri ikiferakãfe,” ato fani. Ato askafaino a mẽra ikifaikaxõ yononifo. Zacaríasri a mẽra ato fe ikikaixõ ato feta yononi. <sup>9</sup> Nios kĩfiti pexefã mẽra ikifaikanax yoinãnifo iskakani: “¿Iskaratã tsõa na pirofomã shara koofaimẽ nõ õinõ?” inifo. Askafono ãfe xanĩfãfe Zacarías yoini: “Mĩ koofafe na nakas Niospa xeteax inimanõ,” fani. Akka nãskara feyafapaonifo, pirofomã nakas shara koofapaonifo. <sup>10</sup> Zacarías pirofomã shara koofaino yorafãfe emãiti nikaxõ Nios kĩfinifo. <sup>11</sup> Yorãfãfe emãitixõ Nios kĩaifono, Zacarías pexefã xãki mẽraxõ pirofomã koofaino ãjiri nĩtani, pexe xaki mẽra pirofomã koofai kesemẽ ãfe põya kayakai aõri. <sup>12</sup> Nãskakẽ ãjiri nikẽ fichiax Zacarías mesta itani. <sup>13</sup> Rateaino Niospa ãfe ãjirinĩ yoini: “Zacarías, rateyamafe. Mã Niospa mia nikakĩ mĩ kĩaifito mã mĩ ãfinĩ fake feronãfake fii kiki. Mĩ fake kãiano anekĩ Juan mĩ faxikai. <sup>14</sup> Mã mĩ fakeyax mĩ inimaxikai. Yorãfori akiki inimakõixikani. <sup>15</sup> Niosri akiki inimasharakõixii. Fãsi finakõia Niospa õixii, Niospa Yõshi Sharapa shinãmanaino. Nãskakẽ afaa pae pishta ayaxima. <sup>16</sup> Nãskaxõ mã yosixõ Niospa meka ato yoixii ãfe kaifo israelifo ãfe fenafo, Niospa meka ato yoiaino ãto chaka xatenõfo. ãto chaka xatekaxõ Nios fisti nikakõinõfo. <sup>17</sup> Nõko Ifo oyoamano taeyoi Niospa Juan nĩchixii ãfe meka ato yoinõ. Akka Juan ãfe shara nã Elíasnã ipaoni keskara ixii Niospa Yõshi Sharapa shinãmanaino. Afe yorafo ato tãpimaxii. Nãskaino ãto apafo fe ãto fakefo anã noinãxikani. Askatari nã Niospa meka nikakaspamisfãfe akairi ãto chaka xatekaxõ Nios Ifofaxikani shinãsharaxikakĩ. Nãskakẽ Juanoax ãfe kaifo itipinĩsharaxikani Niospa Fake atoki nokoaitã ifisharaxikakĩ,” ixõ ãjirinĩ yoini.

<sup>18</sup> Askafaito nikakĩ yoini: “¿Afeskai ẽ fakeyatiromẽ? Ẽkai anã fake atiroma ẽ anifokõi. Ẽfe ãfiri nãskarari yõxãfokõi. Afeskaxõ afeta nõ anã fake fitiroma,” fani.

<sup>19</sup> Askafaito nikakĩ ãjirinĩ kemani: “Ẽkã Gabriel, ẽ Nios fe ika. Ea nĩchiano ẽ oa. Nikapo, ãfe meka shara ẽ mia yoinõ. Mã mĩ ãfinĩ fake feronãfake fii kiki. <sup>20</sup> Akka, nã ẽ mia yoiãito mĩ ea nikakaspax mĩ anã mekaima. Mã mĩ fake kãiano mĩ mekaxii. Nãskax mĩ mekamais iyoi. Akka Niospa ea fake fimatiroma ẽmãi anifokẽ mĩ ifiaito Niospa mia fake fimatiro.

Nã ã mia yoiai keskafakĩ Niospa mia askafaxii. Nã Niospa mia apaiyaitĩã mia askafaxõĩ kiki,” ãjirinĩ fani.

<sup>21</sup> ãjiri fe Zacarĩas pexe xaki mẽranoax yoinãino yorafo pexe emãiti nikanax yoinãnifo, Zacarĩas fena kãiyamaino pexe xaki mẽranoa. “¿Afeskai Zacarĩas samarakaimẽ pexe mẽranoax? Afetĩakai ikiyama,” faifono <sup>22</sup> Zacarĩas kainãkafani Nios kĩfiti pexefã xakĩ mẽranoax anã mekanima yõkapaifiaifono. “¿Afaa pexefã mẽranoa õiax mĩ iskaimẽ?” fanifo. Askafaifono ato yoipaifi mekanima. Mekapaikĩ ãfe mĩfis ato yoini a õia.

<sup>23</sup> Nãskai anã mekaima Zacarĩas ãfe xanẽnẽ kani mã yonokĩ keyoax. <sup>24</sup> Nãskata mã Zacarĩas ãfe pexe ano nokoano ãfe ãfinĩ chipo fake naneni. Mã fake naneax faki kafãsapoanima nã ãfe xanẽnẽ fisti ipaoni cinco oxe ani ãfe xanenẽxõ. <sup>25</sup> Nãskaxõ mã postoxõ yoini: “Aicho, mã Niospa ea sharafakĩ ã fake finõ ã yõxafofiakẽ. Niospa ea fake fima. Aicho, iskaratĩã ã anã yorafoki rãfinakamaki mẽ fakeyakĩ,” Elizabet ini.

### *ãjiri fotopakekafãni, Marĩa yoiyoi*

<sup>26</sup> Elisabet mã fake nanekĩ seis oxe akano Galilea mai ano Niospa anã nĩchini ãfe ãjiri Gabriel, Nazarete pexe rasi ano. <sup>27</sup> Nãskakẽ Niospa ãfe ãjiri Marĩa ano fotopakekafãni yoiyoi. Fotopakekafaxõ yoini. Nã Marĩa fenemais ini. Feronãfake fetsa fe oxamisma. Marĩa fenemais ikano José apa yõkani, Marĩa fixiki. Nã José ãfe xini David ipaoni. Nã David ãto xanĩfo finakõia ipaoni. Akka José Marĩa fiyoamano ãjiri fotopakekafãni, Marĩa ano. <sup>28</sup> Fotopakekafãxõ Marĩa yoini: “Mẽ oi mia yoiyoi, Nios mikiki inimai mefe ika,” fani.

<sup>29</sup> Askafaino Marĩa shinãpaini: “¿Afaa ea yoipaimẽ, na ea iskafai?” ixõ shinãpaini. <sup>30</sup> Shinãpaiyaito anã ãjirinĩ yoini: “Rateyamafe. Mia Niospa noisharai kiki mia sharakõĩ õi kiki, mikiki inimasharai kiki. <sup>31</sup> Mã mĩ fake feronãfake fikai. Mã mĩ fake kãixõ anekĩ Jesús mĩ faxikai. <sup>32</sup> Mĩ fake xanĩfo finakõia Niospa imaxii. ãfe xini David keskara ixii. Nios nã nai mẽra ikato ãfe Fakekõĩ faxii. <sup>33</sup> Nãskakẽ mĩ Fake xanĩfo finakõia ixii. Mĩ kaifãfe xanĩfo ipanaka. Anã xanĩfoi xatenakama,” fani.

<sup>34</sup> Askafaito Marĩa kemani: “¿Afeskakĩ ã fake fitiromẽ ã feneyaxoma, ea tsõa tanamismano?” Marĩa ini.

<sup>35</sup> Askafaito ãjirinĩ kemani: “Niospa ãfe Yõshi Shara mikiki oxõ mia fake nanemaxii. Nãskax nã fake kãiax Niospa Fakera faxikani. Akka na fake kãiax sharafinakõia fisti ixii. <sup>36</sup> Nã mĩ yaya Elisabet ‘Fake fitiromara’ fafiamisfono mã fake nanea seis oxe aka yõxafofiaxõ. <sup>37</sup> Nãskakẽ nã apaiyai keskara fakĩ Niospa afama mĩshti fatiro. Miari fake fimatiro mĩ fenemaisfikẽ,” ãjirinĩ fani.

<sup>38</sup> ãjirinĩ askafaino, “Nãskafinõ, ã fake finõ, ã Nios nikamiskĩ. Nã ea amapaiyai keskafanõ ã Nios itixomafamiski,” nãskafani.

Marĩa askafaino ãjiri anã nai mẽra kani.

### *Marĩa kani Elisabet õikai*

<sup>39</sup> Nãskata nã pena fisti mã Niospa ãjiri kaano Marĩa itipinĩ fata koshi kani ãfe yaya õikai Judea mai ari. Judea mai ari mãchifãfo mẽra kaax pexe rasi ano nokoni. <sup>40</sup> Mã nokoax Zacarĩas ãfe pexe mẽra ikitoshini. Mã nokoxõ Marĩa ãfe yaya yoitoshini. “Yaya, ã oi mia õiyoi,” fatishoni. <sup>41</sup> ãfe rare askafatishonaito Elizabet nikani. ãfe rare askafaito nikakĩ Elisabet xakĩ mẽraxõ ãfe fake tokko tokko ani. <sup>42</sup> Nãskata Niospa Yõshi Sharapa shinãmanaino Elisabet onãni mã Marĩa fake naneano. Nãskakẽ fãsi yoini iskafakĩ: “Marĩa, Niospa mia inimamasharakõĩ. Fato xotofake fetsakai iskafaima mia fisti inimamakõĩ. Mĩ fake feronãfake chipo kãiano Apa Niospa akiki inimakõikĩ kexesharakõixii. <sup>43</sup> Nõko Ifokõĩ mĩ fake ixii. Akka, ¿mĩ ea ano oamẽ, nõko Ifãfe afafiãx êkai afaakeroko êakõĩ ã ikanõ? <sup>44</sup> Akka mĩ ea yoiaito nikakĩ ãfe xakĩ mẽraxõ ãfe fake ea tokko tokko aka, mikiki inimakĩ. <sup>45</sup> Niospa meka nikakõikĩ, ‘Nẽ askanõki,’ ixõ mĩ yoita. Nãskakẽ Niospa meka nikai mĩ inimasharakõĩ,” ixõ Elisabet yoini.

<sup>46</sup> Nāskafaito María kemani:

Ēfe òiti mēraxō ē shinākī iscafai, nōko Ifo tsoa keskaramākī. Nōko Ifo Nios fāsi sharakōi. <sup>47</sup> Akiki ē inimakōiaino ea anā potanakama, ē afe ipanaka, ea kexepakenaka, ea ifixii ē afe ĩpaxanō. <sup>48</sup> Ē nā yonoxomis, ē afaa tāpīamafekē nā Niospa ea noikōi. Nāskakē yorafāfe yoipakenakafo: “Nā María Niospa inimamakōia,” ixō yoipakenakafo. <sup>49</sup> Nios fāsi sharafinakōia. Afaa pishta fayamatiroma. Afama mīshti fatiro, ea sharakōi faxōa. Niosfi sharakōiki. Afaa chakafamisma Niosfi nāskarākōi. <sup>50</sup> Nāskara yorafāfe yoitirofo: “Ē Nios nikasharapaikōiaino, ē nikakaspaitori ea chakafatiro. Nāskax ē akiki mesetiro. Akiki mesekī ē Nios nikasharakōi,” ixō yoiaito nā keskara yorafo Niospa ato noikī ato shināpakenaka. <sup>51</sup> Akka Nios nikakaspakī āto òiti fekaxtefakani, “Tsōa afaa tāpikeroko ē akai keskafakī,” ixō āto òiti fekaxtefatirofo. Nāskaifono Niospa ato fenomatiro. Nāskara ato òimatiro afaa tāpīamafāfe. Akka Niospa āfe shināmā afama mīshti famiski. Afaa pishta Niospa fayamatiroma. Nāfi mitsisipakōikī tsoa keskarama. Nāato afara mīshti fatiro. <sup>52</sup> Nāato xanīfofo potano anā tsoa xanīfo itiro. Akka nā afaayamafo Niospa ato sharakōi imatiro. <sup>53</sup> Akka fetsafāfe Nios shināifono Niospa ato kexesharatiro. Āfe shināmā āto òiti mēra ato shināmātiro inimanōfo. Akka fētsa shinākī iscafai: “Ē iskaratīa shara ē afara fetsa anā shināima Niospa afara fetsa ea anā shināanima ē anā Nios fe rafepaima,” ixō shināito askara yora Niospa anā tanaima. Afaa pishta tāpikanamax yorafo askatirofo. <sup>54</sup> Niospa noko kexesharapakenaka nōko kaifo israelifāfemāi yonoxomisfono. Noko shināmakinakama mēxotaima noko noipakenaka nā yoini keskafakī. <sup>55</sup> Niospa nōko xini Abraham yoikī iscafani: “Mī kaifo efe yorafo ipanakafo. Askatari mī fenafo ē ato kexesharapakenaka,” ixō Niospa nōko xini Abram yoini,

ixō María fani.

<sup>56</sup> Nāskax María Elizabet ano ipaoni tres oxe ani anoxō. Tres oxe ata anā María āfe xanēnē oni.

### *Juan Maotista kāini*

<sup>57</sup> Mā María āfe xanēnē oano Elisabet fake feronāfake kāini. <sup>58</sup> Mā fake kāiano āfe kaifāfe a chaima nikafāfe tāpinifo. “Mā Elisabet fake kāia nōko Ifo Niospa mā Elisabet aō noikī fake fimismano mā fake fima,” nāskafanifo. Askafakanax akiki inimanifo. <sup>59</sup> Mā fake kāitaxakī ocho nia oxano Zacarías pexe ano yorafo fonifo. Fake òikai fokani āfe foshki repa xateyanā nāskaramāi feyafakatsaxakakī. Fokaxō yoinifo: “Āfe apa anekiriri nō anenō Zacarías fakī,” fanifo. <sup>60</sup> Nāskafaifono āfa ato yoini: “Maa, ē aō aneima, Zacarías ē faima. Afeskakīkai apa anekiri ē anetiroma. Ēa ē anei Juan fakī,” ato fani.

<sup>61</sup> Ato askafaito yoinifo: “¿Tsōa anekiri mī aneimē? Anokai āfe xinifo Juanma. Āfe apa nō yōkanōki,” fanifo.

<sup>62</sup> Akka nā fāke apa mekamais ita pastori ini. Nāskakaxō apa yōkanifo. Mēkemā ato yoini: “¿Afe ane mī fake mī faimē?” fanifo. <sup>63</sup> Askafaifono ato yoini mēkemā: “Ea kirika inākāfe, ē mato kenexonō,” ato askafani. Kirika ināfono kirikaki kenekī: “Ē āfe ane Juan fai,” ixō kirikaki kenei. Mā kirikaki keneano òikaxō yoinifo: “Ōikapo. Mā anea Juan fakī. Āfe ane Juan ixii,” fanifo, apa feta āfe āfa aneaito shināpainifo. <sup>64</sup> Nāskata āfe fake ane keneta Zacarías mekani. Anā mekamais inima, mā mekaya ini. Mā mekayaxō ato yoini: “Nios sharakōi,” ato fani. <sup>65</sup> Mā Zacarías mekaito òikani ratenifo. Mā ratekanax fokani yoināi fetsenifo. Nāskakanax mā fokani Judea mai ari fokani yoināfonifo: “Mā Zacarías āfe fake aneax mā mekai. Mā āfe āfinīri fake fikatsaxakima, mā fake fia,” ikanax yoināi fetsenifo. <sup>66</sup> Yoināi fetsekaxō shinānifo: “Nā fake afeskaimākai nō òinō shināya iki kiki, Niospamāi shināmasharaino,” ikaxō shinānifo.

### *Zacarías fanāini*

<sup>67</sup> Niospa Yōshi Sharapa shināmanaino Juan āfe apa Zacarías yoini:

68-69 Ēfe kaifo israelifāfe nōko Niosfi sharakōikī, nāfi nōko Ifokōikī. Nōko chaka noko soaxoxii. Nōko xini David āfe fena finakōia ixii. Nā David nōko xinifāfe āto xanīfo ipaoni. Nā āfe fena Niospa nīchia noko ifipakexanō afe nō ĩpaxanō. Nāskakē noko shināmakinakama. 70 Nāskakaxō ato yoipaonifo, nā ato Nios yoixomisfāfe Judea mai anoafō. 71 Niospa ato shināmanaino yoipaonifo noko kexesharano afanā noko afeskafanōma noko ōikaspaifono ixō yoinifo. 72 Nā noko yoiaifāfe nō ato nikapaoni keskafakī noko Niospa kexesharapakenaka noko noikī. Nā noko yoipaonifo keskai Nios noko shināmakimisma. 73 Nāskaxō nōko xini Abraham Niospa yoini iskafakī: “Mī kaifo efe yorafo ipanakafō. Nāskakē mī fena ě ato nīchixonī āto xanīfo finakōia inō. Nāskaxō keyokōi ato ifixii afe ĩpaxanōfo. 74 Nāato nā mato ōikaspaifo ato paxkaxii anā mato afeskafanōfoma,” ixō Niospa yoini. Noko askafaino nō āfe inafōax nō anā mesetiroma nokomāi nōko Ifāfe ĩkikē. 75 Nō āfe ina kayakōikē nōko ōiti noko shara faxoxii aa noiax nō isharakōipakexanō, ixō Zacarías ato yoini.

76 Nāskata Zacarías āfe fake yome pishta yoini:

Anifoshta, nōko Nios finakōia nō mānāo nikōina. Akka mī yosixō Niosnoa mī ato yoixoxii. Taefakī mī ato yoixonano chipo nā nōko Ifo finakōia oxii. Nāskakē itipinīkāfe mā nōko Ifo oi kiki mī ato faxii. 77 Nāskakē mī ato tāpimaxii mā nōko Ifo oaino afe yorafo ato chaka soaxoniyo. 78 Akka Niospa noko shināino āfe Fake finakōia nai mēranoax nokoki oi nōko ōiti noko sharafaxoxiki. Oa fakishpari xini koshi kafanai keskafakī nōko ōiti xafakīa sharakōi noko faxoxiki, 79 anā fakish keskara nōko ōiti inōma. Nāskax nai nō mesetiroma noko shināmasharaino, ixō Zacarías ato yoini.

80 Nāskax Zacarías āfe fake yosini Niospa āfe shināmā shināmasharaino. Nāskax ares tsōa istoma ano ipaoni, nā Niospa meka israelifo ato yoikī taefaitā.

## 2

### *María Jesucristo kāini (Mt. 1.18-25)*

1 Nā Jesús kāiyaitā romanō āfe xanīfāfe César Augusto āfe yorafo nīchini nā maitio anoafō ato tanākaxō āto anefo kenenōfo afe tii yorafomakī. 2 Taefakīkōi kirika kenenifo āto anefo keyokōi. Akka Siria mai anoafāfe āto xanīfāfe ane Cirenio ipaoni. 3 Nāskakē keyokōi fonifo āto mai anoxō āto ane kenei fokani. 4 Nāskaifono María ferī José kani Belén ari, Nazarete ano ikanax. Nā Nazarete pexe rasi Galilea mai anoa ini. Nānoax José fe María fonifo, José āfe xini Davidmāi Belén anoax kāinino. Nā Belén Judea mai anoa ini. 5 Nāskakē María fe José fonifo āto ane kenei fokani. María fe José mā yoināfo ini fianāxikakī. Fianāyokanamax María fe José kani. Nā María tsoa pishta tanamisma ini, akka Niospa Yōshi Sharapa fake nanemani. 6 Mā María Belén ano nokoano fāke pāe fani mā kāiki. 7 Mā fake kāiax fakeyai taeni. Āfe fake feronāfake ini. Akka āto fakka inafāfe piaī mēra fonifo. Anoax María fake kāini. Mā fake kāixō sama faxte pishta rakoni. Askata āfe fake rātani a fakkafāfe piaī kamaki.

### *Ājirifo oveja kexemisfoki nokoni*

8 Nā María fakishi fake kāiano oveja kexemisfāfe fasifo mēraxō āto ovejafo kexeshinifo pexe rasi pasotaixō. 9 Āto ovejafo kexeshinaifono Nios ariax āfe ājiri atoki fotokī chaxapakefofāni. Niospa nīchiano chaxapakefofāni. Mā Niospa ājiri nīchiakī inifo chaxatanaito fichikanax ratekōinifo. 10 Nāskaifono ājirinī ato yoini: “Rateyamakāfe. Ē mato meka shara yoiyoaki nikax mā inimai finakōinō. Askatari yorafāferi nikakanax akairi keyokōi inimakōinōfo. 11 Iskaratīa fotoxō ě mato yoiyoa. Nā fakishi mā māto Ifo Cristo mā kāia māto Ifokōi mato ifixiki mā afe ĩpaxanō. Nā māto xini David kāini anoaxri kāia māto

Ifokōi. <sup>12</sup> Ē mato yoinō nikakapo afeskaxō mā tāpitiromakī nā fake āfe afa rapatinī rakoxō rāta fakkafāfe piyai ano fichixō mā tāpitiro nā mātō Ifo finakōia,” ixō ājirinī ato yoini.

<sup>13</sup> Ato yoikī xatetanaino atiri Niospa āfe ājiri ichapakōifo atoki fotopakefōfāni. Fotopakefōfākata inimakōi Nioski fanāinifo. Inimakata iskafakī yoinifo:

<sup>14</sup> Nios sharakōi nai mēra ika. Nā ato fichipaiyai tii nono mai anoax ikafo ato shināmasharai inimanōfo, ixō yoinifo.

<sup>15</sup> Mā yoikanax anā nai mēra fonifo. Mā nai mēra ājirifo foafono, “Nō ōinō,” inifo, “Chanīmamakī nō ōinō, fokapo Belén ano na nōko Ifo Niospa āfe ājirifo nīchiano noko yoiafo keskara nō ōinō fokapo,” ixō yoinifo.

<sup>16</sup> Nāskata nā oveja kexemisfo fonifo. Mā fokakī ichokaxō fichitoshinifo María yafi José. Nāno āto fake yome rātafono fakkafāfe piyai mēra fasi mēra rakakē ōinifo. <sup>17</sup> Nā fake yome ōiafo tiito ato yoifofāsafanifo. <sup>18</sup> Nā oveja kexemisfāfe ato yoiaifāfe nikakakī, “Aira, ħafeskakī iskara shara noko yoikanimē?” inifo. <sup>19</sup> Nāskakē María nā nika keskafakī āfe ōitinī fāsi shināfafāini. <sup>20</sup> Nāskakata nā oveja kexemisfo ato yoitakani anā ato ovejafo ano fenifo. “Aicho, Nios sharakōikī nā noko yoia keskafakī mā nō ōitanikai,” ikanax āa ranā yoinānifo.

*Nios kīfiti pexefā mēraxō apa feta āfa āto fake Jesús Nios ispanifo*

<sup>21</sup> Mā ocho nia oxano Jesús foshki repa xatenifo. Nāskafakaxō anenifo Jesús fakakī, nā ājirinī yoiyoni keskafakī María fake naneyoamano.

<sup>22</sup> Moisés israelifo yoini iskafakī: “Kēro fake kāiax fena faki kafāsatiroma. Askatari Nios kīfiti pexefā mēra fena ikitiroma cuarenta nia oxa finōaxma,” ixō ato yoini. Akka mā cuarenta nia oxa finōano José fe María fonifo. Jerusalén ano iyoifokani āto fake Nios kīfiti pexefā mēraxō Apa Nios ispaxikakī. <sup>23</sup> Nānori Niospa shināmanaino Moisés kirikaki keneni iskafakī: “Fake kāi taexō feronāfakekē mā Nios ispatiro āfenā inō,” ixō ato yoipaonino, José feta María āto fake Jesús iyonifo Jerusalén ano. <sup>24</sup> Nāskakē José fe María mā fokaxō a Moisés yoini keskafakī a Nios ato kīfixomis rifi rafe iyamai nopoxpoiki rafe inānifo retexō Nios kīfixonō nānorimāi Moisés yoipaonino.

<sup>25</sup> Nā Jerusalén anoa feronāfake Nios Ifokōi faa ini, āfe ane Simeón. Nāato Nios Ifo sharakōi faxō kīfitaifapaoni. Niospa Yōshi Sharapa Simeón ĩkināno, nāato Cristo manapaoni, āfe kaifo israelifo ifinō Niospa Yōshi Sharamāi afe ikano. <sup>26</sup> Niospa Yōshi Shara a mēra naneano a mēraxō tāpimani iskafakī: “Mī fena naima na Niospa nīchiai nōko Ifo Cristo mī ōiyoi mā mī ōiax mī naxii,” ixō tāpimani, Niospa Yōshi Sharapa Simeón. <sup>27</sup> Nāskata Niospa Yōshi Sharapa shināmanaino Nios kīfiti pexefā mēra ikikaini. Nānori José fe María āto fakeya ikifainifo, Moisés yoini keskafakī āto fake ispaxakakī. Mā ikiafono, <sup>28</sup> Simeón atoki oxō inimayanā Jesús yome pishtakē chishtoinīfōfāni, mā tāpixō. Nāskafaxō Nios yoisharani iskafakī:

<sup>29-31</sup> Ifo, ea mīa yoimis keskafakī mē ōi. Aicho, mē akiki inimakōiax mē naikai ēfe Ifo ōiax. Nāatofi noko ifixii kiki nō afe ĩpaxanō. Keyokōichi nō Ifofanō mī nokoki nīchia.

<sup>32</sup> Nāskata mī nōko kaifo yamafiano mia shinākatsaxakakīma mī fākeoxō mia tāpikōikani. Akka nō israelifo mefe yorafo nō tāpikōixii, nā fakeōnoa Niospa nokoya rafemanano. Aōxō nā noko yoimis keskafakī noko axoxii, Simeón fani.

<sup>33</sup> Ato askafaito nikakī María feta José āto ōitinī shinānifo: “Aira, nōkai nafo meka nikamisma,” ixō shinānifo. <sup>34</sup> Akka Simeón Niospa Yōshi Sharapa shināmanaino ato yoisharani. Nāskaxō āfe afa yoini: “Nā mī fake chanīmara fakanax nōko kaifofo israelifo inimatirofo. Aōnoax isharapakekakī. Akka nōko kaifo fetsafori afe rafeyamakanax omiskōipakenakafo. Nāskakē yora ichapafāfe chanīmara fakani. Akka fetsafāferi chanīmara fakaxō mā shinākani. <sup>35</sup> Akka a āto ōitinī shināifo keskafakī onetirofoma. Akka fētsa āa shinākī a shināi keskara onetiroma. A shināyamaifori onetirofoma. Xafakīakōi

ato õitiro. Nāskakē mī fake aa noikaspakaxõ chakafaxikani. Askafaifāfe õi aõnoax mī omiskõixii shināi. Nā kenopa mī õiti xatea keskara mī meexii omiskõikī,” Simeón fani.

<sup>36</sup> Nānori kēro fistiri ini, āfe ane Anā. Nāatori Niosnoa yoini, a inõpokoai yoikī. Akka nā Anāmā apa Fanuel ini. Āfe kaifo Aser nafafo ini. Akka nā Anā yõxafokõi ini. Xomayakõi feneyayoni, siete xinia afeta akax fene nani. Nāskakē anā Anā feneya ipaonima. <sup>37</sup> Ares ikax yõxafokõi ini ochenta y cuatro xinia ani feneyaxoma. Nāskakē Anāmā mēxotaima Nios kīfipaoni, pena fisti foni teneyanā. Nios kīfiti pexefā mēranoax Anā askapaoni. <sup>38</sup> Nāskata María fe José Simeón fe yoināifono Anāri atoki oni. Oxõ nānoa Jesús fichini. Fichita akiki inimani. Inimayanā Epa Nios iskafani: “Aicho Epa Niosi, iskaratīa mī Fake mī nokoki nīchiaki nofe rafemis ĩpaxanõ,” ixõ yoini. Mā õixõ Anāmā Jerusalén anoafõ ato yoini a na manamisfoki israelifo ato ifinõ. “Mē nõko Ifo õiaki mā nokoki nokoaki,” Anāmā ato fani.

### *Nazarete ano anā fenifo*

<sup>39</sup> Nāskata María feta José Jesús Nios ispatakani, nā Niospa yoipaoni keskai anā āto mai ano fenifo, Nazarete pexe rasi ano. <sup>40</sup> Nānoax Jesús mitsisipakõi yosini María fake. Afama mīshti tāpiakõi ini. Niospa aõ noikī shināmasharani.

### *Jesús Nios kīfiti pexefā mēra ikini yomeax*

<sup>41</sup> Nāskax nā xinia tii Jesús āfe afa fe apa Jerusalén ano fopaonifo. Pascua fista aki fokani. <sup>42</sup> Jesús mā doce xinia akano apa feta āfa iyonifo, amisfo keskafakakī fista akifokakī. <sup>43</sup> Mā fista keyoano María fe José fenifo, āto pexe shināferakani. Akka Jesús nēteaito apa feta āfa tāpinifoma, māmāi ato fe kaira ikaxõ tsõa tāpinima. <sup>44</sup> Mā ato fe kaira ikanax tāpiamax fāi fonifo. Fāi fokāta shinānifo akka nõko fake akka inifo. Nāskata apa feta āfa fenani. Fenayanā afe yorafoya a afe rafemisfo yõkani: “¿Mā nõko fake õimamē?” ato fani. <sup>45</sup> “Maa, nõ mī fake õima. Niri oama,” fanifo. Ato askafaifono āfe apa fe āfe afa anā anori nētefaikani anā fonifo. Afianā fõtanifo Jerusalén ari. Mā nokokaxõ fenafofāsafanifo.

<sup>46</sup> Nāskata mā tres nia oxakata fichinifo nā judeofāfe Nios kīfiti pexefā mēranoa nā ato tāpimamisfo fe tsoaxõ nikaino. Ato nikayanā ato yõkapakeni a ato tāpimamisfo. <sup>47</sup> Ato askafaino nikakakī, “Nikakapo, ¿na fāke yomefixõ afeskakī mekakī tāpisharakõiamē? Ato kemasharakõi,” fanifo. <sup>48</sup> Ato askafaino afa feta āpa fichinifo. “Nono tsaofekē nõ fenai nõko fake,” fanifo. Nāskata āfa kenatoshini: “Kõkaishta, ¿afeskai mī nēteamē? Mā mī noko ratekõia epa yafi. Afeskara ikara nõ mia faa. Nāskakē nõ mia fenafei nono ato fe tsoaxõ mī yoifiaino,” fanifo.

<sup>49</sup> Askafaifono ato kemani apa yafi afa: “¿Afeskakī mā ea fenaime? ¿Ea mā tāpiamamē nā ěfe Epa Niospa pexe mēra ě ikikē nā ěfe Epa ea yoiai keskara ě faito?” ixõ Jesús ato yoini.

<sup>50</sup> Ato askafaito apa feta āfa tāpinima.

<sup>51</sup> Nāskata apa feta āfa iyonifo Nazarete pexe ari ato xanēnē. Nāskata mā nokoxõ María shināni āfe fakeõnoa. Nāskaxõ Jesús apa feta āfa yoiaito ato nikakõisharapaoni ato shinākõikī. <sup>52</sup> Nāskata Jesús yosikõini, āfe õiti sharakõia. Mā āfe māpo afama mīshti shinākõi ini. Nāskax yosini. Nāskaito õikani yorafo akiki inimakõinifo. Niosri akiki inimakõi ini.

## 3

### *Juan Maotista tsõa istomaxõ ato yoini (Mt. 3.1-12; Mr. 1.1-8; Jn. 1.19-28)*

<sup>1-3</sup> Akka mā yosixõ Zacarías fāke ato Nios yoipaoni tsõa istoma anoxõ. Tsõa istoma ano yora ichapa akiki fonifo nikaxikakī, nāskakē Zacarías fāke ato Nios yoiaino. Nānori Tiberio xanīfo finakõia ipaoni, Roma anoax. Nāskakē aa ranā ikanax āto pexefo anoax

xanīfo ikaxō ato ikīpaonifo. Pexe fisti rasi anoax xanīfo iki fetsepaonifo. Judeofāfe āto xanīfo ini pexe fetsa anoax āfe ane Poncio Pilato. Askata pexe fetsa anoaxri āto xanīfo fetsa Galilea anoax Herodes ato xanīfo ini. Akka Feliperi xanīfoxō pexe rasi anoa rafe kexepaoni. Itoria ano kexeta Traconite ano kexeta fapaoni. Akka nā Felipe āfe exto ipaoni Herodes. Nāskatari pexe fetsa anori xanīfo fetsa ipaoni āfe ane Lisantias Abilinia anoax. Akka āto xanīfo finakōia ipaoni Tiberio. Nāato keyokōi kexepaoni. Mā xanīfokī catorce xinia akano Zacarías fake Juan tsōa istoma ano ixō Niospa meka yoipaoni. Askatari judeofo yoipaoni āto mai ano ixō, yorafāferi ato Nios kīfixopaonifo. Akka Anás fe Caifás āto xanīfo ipaonifo. Nāskakē nā Zacarías āfe fake Juan Judea mai ano ipaoni. Akka mā yosiax tsōa istoma ikē Niospa yoini aōxō ato yoinō iskafakī: “Māto chaka xatekāfe, a mā afara chaka shināi keskara anā shināyamakāfe. Niospa mato yoiai keskara nikakōikāfe. Mā nikakōiaito Niospa mato chaka soaxotiro. Mā askaito ē mato maotisafatiro, faka mēra ikimapakekī māto chaka mā xatenō ato ispaxiki ixō ato yoitāfe,” ixō Niospa nīchiano Juan ato yoifofāsafani faka Jordán arixō. <sup>4</sup> Afia Isaías ato yoipaoni keskafakī Juan yoifofāsafani. Nānorikōi Isaías kirika keneni a Juan mekanōpokofai yoikī:

Tsōa istoma ixō yorafo yoixii akiki feaifono. Iskafakī ato yoixii: “Mā nōko Ifo oi kiki. Nāskakē itipinīsharakāfe, āfe fai sharafaxokāfe. Māto chaka xatekāfe. <sup>5</sup> Nā xexa naxpe chakafo ano mai forosharakōi fanōfo. A machifo anori sapa sharakōi fanōfo. Nāskatari āfe fai mēstesharakōi faxonōfo. A xexa naxpefo ano mai forosharafaxonōfo sapa sharakōi inō nōko Ifofai. <sup>6</sup> Mā nōko Ifo Niospa nīchiano oxō a shināifo ato ifiyoi afe īpaxanōfo. Nāskakē keyokōichi ōixikani,”

ixō yoinōpokoi kiki nā yōra, ixō Isaías kirika keneyoni, Juannoa yoikī.

<sup>7</sup> Nāskakē nā Isaías ato yoipaoni keskafakī Juan ato yoipaoni, mā chaima Jesús oaino. Ato Juan yoikī iskafapaoni, a nikakani akiki yora ichapa feafono: “Noko Juan maotisafanō faka mēra ikimakī nō chiifā mēra kayamanō,” ikanax akiki feafono Juan ato yoini iskafakī: “¿Afeskai mā ea ano oimē? ¿Ē mato maotisafapanō mā oimē? ¿Tsōa mato yoiamē? Mā shināiraka nō chiifā mēra katirora ixō nāskax mā maotisapaimē, nō chiifā mēra kayamanōra ikax. Maa, mā kai afaa tāpiama, askax mā maotisatiroma. Mā Nios Ifofaima. Mā oa shano keskara māto ōiti chakakōi. Nāskaxō mā Satanás ifofaa. Nāskakē kaxpa ē mato maotisafatiroma māmāi Satanás fisti shināito. Āa fētsa mato pāratiro nō maotisanō nō chiifā mēra kaimakai Nios nikayamafix ixō mato pārano mā chiifā mēra katiro fētsa afaa tāpiamato mato pārano. Askara Niospa mato ifitiroma mā kairoko shināito, ēroko mato maotisafaano. <sup>8</sup> Māto chaka xatekāfe, Nios shinākāfe. Mā Nios shināito ē mato maotisafapanō. Ē mato anā yoinō nikakapo. Mā shinātiro: ‘Nā Abraham nōko xini ipaoni, ōiti sharayaxō Nios shināpaoni.’ Akka mā shinākī: ‘Nōmāi Abraham fenaxō nō shara shināi,’ ixō mā shinākī mā shināsharaima. Askara shināyamakāfe. Akka māto ōitinī mā chaka shināi mā chanī. Nikasharakōikāfe, ē mato yoinō. Na tokiri Niospa onifaxō nīchikē mā ōitiro Abraham āfe fena inō. Nāskakanax Abraham fakefo itirofo na tokiri ōiki Nios shinākanax. Akka mā kai anori shināima mā mā chanī, ‘Abraham shināpaoni keskara nō shināira’ ikax. Askara shināyamafi Satanás fisti ifofafai. <sup>9</sup> Akka fana fimiya maito ifāfe reratiro. Āfe tapori tsekaxō kooatiro anā niyamanō. Nāskari fakī mā Nios nikakaspaito a omiskōipakenakafo mēra Niospa mato potaxii mā chaka xateaxma mā isharyamaito,” ixō Juan ato yoini.

<sup>10</sup> Ato Juan askafaito nikakakī kemanifo: “¿Chanīmamē? ¿Na mī yoiai keskara tāpiaxma nō afeskatiromē? ¿Afeskaxō a keskara shara nō shinātiromē?” faifāfe anā ato yoini: <sup>11</sup> “A yora omiskōiaito afaamais oxō mato rapati yōkatoshiaito mā inātiro mā rapati rafeyaxō. Askatari yora fonāiki oaito mā pimatiro,” ato Juan faito nikanifo.

<sup>12</sup> Xanīfo kori fixomisfāferi Juan yōkanifo: “Maestro, ¿nō afeskatiromē, mī noko maotisafanō?” fanifo.



<sup>13</sup> Askafaifono ato yoini: “Māto xanĩfāfe a tii mato yoiyamafiano finõmainĩfofā mã kori fitiroma,” ato fani.

<sup>14</sup> Nāskatari sorarofāferi yōkanifo: “Akka, ¿nõ afeskatiromẽ?” ixõ yōkanifo. Askafaifono ato yoini: “Ato kori fĩapiakĩ shināyamakāfe. Askaxori ato feratani mitsisipayamakāfe. Ato askafayamakāfe. Māto xanĩfori pārayamakāfe. Nā xanĩfāfe mato inā tiiya inimakāfe,” ixõ ato yoini.

<sup>15</sup> Nāskata yorafāfe õinifo Juan mekaito. “¿A naamẽ Cristo?” ixõ āto õiti mēraxõ shinānifo. <sup>16</sup> A shināifo keskara mã tāpixõ Juan ato yoini: “Ēkai Cristoma. Nāskakē ē mato maotisafapai. Akka nā chipo oaito āfe Yōshi Shara mato mēra naneyoi. Nā sharafinakōia, ea keskarama. Aato afama mĩshti fatiro, ē atiroma keskara. Akka ē afaama,” ixõ Juan ato yoini. Mã chaima Jesús oaito yoikĩ ato askafani. <sup>17</sup> Nāskaxõ ato yoipakeni: “Mã Nios shināito mato ifixii. Akka a shināyamaifo ato ifixiima. Afāfekairoko ifofaifono nāfo chiifā mēra ato potano anoax omiskōipakenakafõ” ato fani.

<sup>18</sup> Nāskatari meka shara ato yoini, āto õiti mēra ato nanemapaikōini āto chaka xatenõfo. “Mã nõko Ifo Jesucristo chaima oi kiki, shināsharakōikāfe,” ixõ ato yoitaifapaoni. <sup>19-20</sup> Askatari xanĩfo Herodes yoini: “¿Afeskakĩ mĩ exto āfi fĩaitamẽ? Askatari mĩ ato chakafafofāsafai,” fani Juan. Askafaito nikakĩ Herodes akiki õitifishkixõ achixõ karaxa mēra ikimani.

*Juan Jesús maotisafani faka Jordán anoxõ*  
(Mt. 3.13-17; Mr. 1.9-11)

<sup>21</sup> Akka Herodes karaxa mēra nĩchiyoamano Juan ato maotisafapani. Jesúsri mã yosiaito nāri maotisafani. Mã maotisafaano fininākakāta Apa Nios kĩfini. <sup>22</sup> Apa kĩfiaino nai mēranoax oa rifi keskara āfe Yōshi Shara fotopakekafāni akiki. Fotopakekafanaino nai mēranoax mekaito nikani iskaito: “Mĩ ēfe Fakekōi ē mia noikōi. Ē mikiki inimasharakōi,” ixõ Apa Jesús yoiaito nikani.

*Jesucristo āfe xinifāfe anefo*  
(Mt. 1.1-17)

<sup>23</sup> Jesucristo mã treinta xinia axõ taefakĩ ato yoini Apa Niospa meka. Yorafāfe José fakera fafiaifono Niospa Fake ini. Nāskafiax nāato chata ipaoni Elí. <sup>24</sup> Elí apa Matat ini. Matat apa Leví ini. Leví apa Melqui ini. Melqui apa Jana ini. Jana apa José ini. <sup>25</sup> José apa Matatías ini. Matatías apa Amós ini. Amós apa Nahúm ini. Nahúm apa Esli ini. Esli apa Nagai ini. <sup>26</sup> Nagai apa Maat ini. Maat apa Matatías ini. Matatías apa Semei ini. Semei apa Josec ini. Josec apa Judá ini. <sup>27</sup> Judá apa Joanán ini. Joanán apa Resa ini. Resa apa Zorobabel ini. Zorobabel apa Salatiel ini. Salatiel apa Neri ini. <sup>28</sup> Neri apa Melqui ini. Melqui apa Adí ini. Adí apa Cosam ini. Cosam apa Elmadam ini. Elmadam apa Er ini. <sup>29</sup> Er apa Josué ini. Josué apa Eliezer ini. Eliezer apa Jorim ini. Jorim apa Matat ini. <sup>30</sup> Matat apa Leví ini. Leví apa Simeón ini. Simeón apa Judá ini. Judá apa José ini. José apa Jonam ini. Jonam apa Eliaquim ini. <sup>31</sup> Eliaquim apa Melea ini. Melea apa Mena ini. Mena apa Matata ini. Matata apa Natán ini. <sup>32</sup> Natán apa David ini. David apa Isaí ini. Isaí apa Obed ini. Obed apa Booz ini. Booz apa Sala ini. Sala apa Naasón ini. <sup>33</sup> Naasón apa Aminadab ini. Aminadab apa Admín ini. Admín apa Arni ini. Arni apa Esrom ini. Esrom apa Fares ini. Fares apa Judá ini. <sup>34</sup> Judá apa Jacobo ini. Jacobo apa Isaaca ini. Isaaca apa Abraham ini. Abraham apa Taré ini. Taré apa Nacor ini. <sup>35</sup> Nacor apa Serug ini. Serug apa Ragau ini. Ragau apa Peleg ini. Peleg apa Heber ini. Heber apa Sala ini. <sup>36</sup> Sala apa Cainán ini. Cainán apa Arfaxad ini. Arfaxad apa Sem ini. Sem apa Noé ini. Noé apa Lamec ini. <sup>37</sup> Lamec apa Musalén ini. Musalén apa Enoc ini. Enoc apa Jared ini. Jared apa Mahalaleel ini. Mahalaleel apa Cainán ini. <sup>38</sup> Cainán apa Enós ini. Enós apa Set ini. Set apa Adán ini. Nāskanifo āto xinifo. Akka āto fenafo mã kaiafo. Adán āfe apa Nios ini, nāatomāi onifakē.

## 4

*Satanás chakata Jesús afara chakafamapaini*  
(Mt. 4.1-11; Mr. 1.12-13)

<sup>1</sup> Mā Juan Jesús maotisafaano Niospa Yōshi Sharapa iyoaino faka Jordán anoax kani. Tsōa istoma ano kani, Niospa Yōshi Sharapa iyoaino māmāi Niospa Yōshi Shara āfe ōiti mēra naneano. <sup>2</sup> Nāskata Jesús ares kafāsani, tsōa istoma ano cuarenta nia oxax afaa pishta piaxma. Nāskakē Satanás akiki kani. Mā akiki nokoxō ifofamapaini. Nāskaxō afara chakafamapaini. Nāskata mā cuarenta nia oxax Jesús fonāikōini, afaa pishta piaxma. <sup>3</sup> Nāskaito ōiki Satanás yoini iskafakī: “Mī Niospa Fakemākī na tokiri pāa fapo,” fani.

<sup>4</sup> Nāskafaito Jesús kemani: “Maa, na mī ea yoiāi keskara ē akima. A nō piāi fisti nō shināima nipaikī. Akka Epa Niospa āfe meka shararoko nō shinātiro. Nāskara Niospa meka yoimisto kenei,” Jesús fani.

<sup>5</sup> Nāskata Jesús fe Satanás yamaris iakekēfofānifo. Māchifā māmānē fokani. Nārixō Satanás Jesús nā maitio ispani. <sup>6-7</sup> Nāskaxō Satanás yoini: “Ōipo, ea mīa ifofaxō mī ea yonoxonaito na mī ōiaifo keyokōi sharashtakōifo ē mia inātiro. Nāskakē keyokōichi āto ifo mī itiro. Nafo ēfenākōifo. Ōipo, na maitio ē ato ināpaiki ē ato inātiro atonā inō,” Satanás fani.

<sup>8</sup> Nāskafaito Jesús kemani: “Maa, ē mia ifofaima. Nios fisti nōko Ifokōi. Nāskakē nō ratokonō mai chachixō nō yoitiro aato noko shināmanō. Nāskaxō nō yoitiro iskafakī: ‘Mīfi nōko Ifoki nō mia shināi,’ ixō nō yoitiro. Nāskarafi kirika ano keneakī,” Jesús fani.

<sup>9</sup> Jesús askafaito Satanás anā Jesús iyoni a Nios kīfiti pexefā māmākīaxō yoixiki iskafakī: “Mī Niospa Fakekōiaxroko mī niriāx ichopakekafanikai. <sup>10</sup> Mī ichopakekafānax mī afeskaimakai. Nā Niospa meka kirikaki keneaki iskai: ‘Niospa āfe ājirifo yoixii mia kexenōfo.’ <sup>11</sup> Askatari kirika keneano iskaki: ‘Mī āto mifiki pakeaito mia achixikani kiki mī tokiriki pakenōma,’ kirika kenea iskakī,” Satanás Jesús fani.

<sup>12</sup> Satanás askafaito afianā Jesús kemani: “Nōa nō meka fetsafaxō nō yoitiro, ‘Ē afara afeskarafaito, ea Niospa kexei,’ ixō nō shinātiro. Akka, ‘Niospa ea amapaiyai keskara nā fisti ē atiroki Niospa ea kexenō,’ ixō shinākāfe, ikaki na kirika keneano,” Jesús fani. <sup>13</sup> Jesús askafaito nikai Satanás kani, Jesús afeskafatiroma mei. Anā oxō Satanás Jesús afara chaka shināmaniyoxiki ikaini kani. Jesús afara chakafamapaifiki chakafamanima. Akka Jesús finakōia ini Satanás māmānō nia.

*Galilea anoxō Jesús ato yoikī taefani*  
(Mt. 4.12-17; Mr. 1.14-15)

<sup>14</sup> Nāskata Jesús Galilea ano anā kani, Niospa Yōshi Sharapa shināmanaino. Mā nokokē Galilea anoxō yorafāfe nikanifo mā Jesús nokoa ikaxō. <sup>15</sup> Nāskata mā nokoxō judeofāfe ichanāti peke mēraxō ato yoini. Nāskaito ōikani, akiki inimasharakōinifo. “Na feronāfake āfe meka sharakōi,” fanifo.

*Jesús Nazarete anoxō nikakaspanifo*  
(Mt. 13.53-58; Mr. 6.1-6)

<sup>16</sup> Nāskata nā yosini ano kani Nazarete ano. Nāskax safaronō judeofāfe ichanāti peke mēra ikini māmāi askai feyakatsaxakī. Ikikainax tsaoni. Nāskata niinākafā kirika fita aneni. <sup>17</sup> Nāskata afia Niospa shināmanaino Isaías kirika kenei inānifo anenō. Nā kirika fepepō aneni iskafakī:

<sup>18</sup> Niospa Yōshi Shara emēra naneano ea nīchini ē ato yoinō āfe meka shara a afaamaisfo, “Niospa mato noisharai,” ixō, “A Satanás chaka ifofaafō a chaka potakāfe, mato mēra nanepaiyaito anā a chaka nikayamakāfe isharakōixikakī,” ixō ē ato yoinō; askatari nā fēxofori ē ato fero sharafaxonō aō ōisharanōfo: nāskatari nā omiskōikakī afaa

shinãifoma nãfori ã ato shinãmasharanõ; <sup>19</sup> askatari ã ato yoisharanõ afetĩa Epa Niospa afe yorafo ifimãkai, ixõ Jesús aneni. <sup>20</sup> Niospa meka mã yoikĩ xatexõ kirika fẽpoxõ feronãfake fetsa inãni, tsaopakekafãxõ ato yoixiki.

Ato askafaito aas õiketsanifo. <sup>21</sup> Nãskata ato yoini: “Ë fakeyoamano Isaías eõnoa yoipaoni keskafakĩ iskaratĩa mẽ mato kirika anexona,” ato Jesús fani.

<sup>22</sup> Ato askafaito nikakakĩ: “¡Aira! Nikakapo, ãfe meka sharakõi. José fakefixõ ¿afeskakĩ iskara yoimẽ?” fanifo.

<sup>23</sup> Askafaifono Jesús ato yoini: “Mã ea iskafairaka: ‘Mĩ ato Capernaúm anoa sharafaito nõ nikamiski mã anoi sharamefe. Nãskakẽri nã mã yoiãi keskafakĩ nonoãfori ato sharafafe mia õixõ nõ mia chanĩmara fanõ,’ ixõ mã ea yoipairaka,” Jesús ato fani.

<sup>24</sup> Anã Jesús ato yoini: “Chanĩma ã mato yoikõi. ãto pexekõi anoxõ noko iskafatirofo mã nõ na õimis koshikai afaa tãpiama na Niospa meka yoipaiyai aa chanĩ noko fatirofo.

<sup>25</sup> Chanĩma ã mato yoikõi. Kirika kenekĩ nõ anetiro iskafakĩ. Elías nõko mai ano ipaoni. Israel mai ano ari ikano akiki oi inima. Arixõ tres xinia ata seis oxe ani, oi manakĩ. Nãskakẽ israeli yorafo fonãiki finakõinifo, afaa pikanima. Ari kẽro ifomafa fenemais ichapa inifo omiskõikani. <sup>26</sup> Nãskafixõ Epa Niospa nõko xini Elías ato ano nĩchinima. Askatamaroko Sarepta pexe rasi Sidón mai ano nĩchini kẽro ifomafa fisti nĩchini pimanõ. Niospa nĩchiaino chai kani. <sup>27</sup> Askatari yora fetsafo israelifãfe mai anoax ichapakõifo rashkishikani inifo. Akka Elías Niospa meka yoimisto aa rashkishiaifo ato sharafapaonima. Askatamaroko nã Siria mai anoa fistikõi sharafani. ãfe ane Naamán. Nã Naamán Siria mai anoa ini, israeli inima,” Jesús ato yoini.

<sup>28</sup> Jesús ato askafaito nikakani yorafo ichanãti pexe anoax akiki õitifishkinifo. Akiki õitifishkikaki achinifo. <sup>29</sup> Achikaxõ iyonifo Nazarete pasotai mafa keyakõi ano Jesús iyopainifo arixõ potapaikakĩ. <sup>30</sup> Potapaifiaifono Jesús ato rãfiferani. Nãskax ato makinoax kani.

### *Nãnori feronãfake niafaka chaka nanea ini*

*(Mr. 1.21-28)*

<sup>31</sup> Jesús Capernaúm ano kani, Galilea mai ano. Nãnoxõ pena tenetitĩa Apa Niospa meka ato yoini. <sup>32</sup> Ato yoiãito nikai iskanifo: “¡Kee! Nikakapo. Nato tãpikĩ finakõia, meka sharakõi nato yoi,” ikanax aa ranã yoinãnifo.

<sup>33</sup> Judeofãfe ichanãti pexe mẽraxõ yora mẽra niafaka yõshi chaka nanexõ Jesús fãsikõi mekafani. <sup>34</sup> Iskafakĩ yoini: “¿Afeskakĩ mã noko fekaxtefaiyoamẽ, Jesús Nazarete anoato? ¿Mĩ noko a omiskõipakenakafo mẽra mã noko potaiyoamẽ? Ë mia õimisnõ, mã sharakõinõ Niospa mia nĩchiano,” fani.

<sup>35</sup> Nãfaka askafaino Jesús yoini: “Mekayamafe. Na feronãfake makinoax tsekekaitãfe,” ixõ mitsisipakõikai Jesús niafaka nĩchini.

Jesús askafaino nãfaka yora fia kekẽfofã potafaini yorafãfe ferotaifi nãskax tsekekaikĩ afeskafanima.

<sup>36</sup> Askafaito õikakĩ yorafãfe iskafainifo: “Chanĩma, Jesús afama mĩshti fatiro. Iskarakai nõ tsõa õimisma. ¿Afeskaxõ iskafaimẽ, na feronãfake makinoa niafaka potai? Meka finayakõikẽ nãfaka nikafainikai,” yorafãfe fanifo.

<sup>37</sup> Askafaito õikaxõ yorafãfe pexe tii anoãfo yoifofãfofãinifo Jesús yora makinoa niafaka potaito õikaxõ.

### *Jesús Pedro rayos sharafani*

*(Mt. 8.14-15; Mr. 1.29-31)*

<sup>38</sup> Askakaini Jesús judeofãfe ichanãti pexe anoax tsekekainax Simón pexe mẽra ikini. Nãnoax Simón rayos yõxãfo yonãi finakõini. Nãskaito õikakĩ Jesús yoixonifo: “Na yonãi sharafafe,” fanifo. <sup>39</sup> Askafaifono nã kẽro yõxãfo yonãi mãnão kãta Jesús kãtipakekafãta

yoini iskafakī: “Mī yona nishpafe,” faino samamakōi āfe yona nishpatani. Nāskata mā yonai nishpata, fininīkafāta itipinīshara fani ato pimaxiki.

*A isinī ikaifo Jesús ato sharafani*  
(Mt. 8.16-17; Mr. 1.32-34)

<sup>40</sup> Akka mā xini kaino nā isinī ikaifo fetsa fetsatapafo Jesús ano efenifo. Nāskakē Jesús āfe mēkemā ato māmāpakeaino sharai fetsenifo. <sup>41</sup> Ranāri nā isinī ikaifo mēranoax niafaka chakafo tsekeni. Fāsikōi mekayanā iskafanifo: “Mīfi Niospa Fakekī,” fanifo. Niafakafāfe askafaifono kerexkai Jesús ato pōtapakeni. Nāskaxō ato mekatima fani māmāi tāpiafāfe nāmāi Cristokē.

*Jesús ichanāti pexe mēraxō Apa Niospa mekasharaōnoa ato yoini*  
(Mr. 1.35-39)

<sup>42</sup> Mā penaino Jesús tsekekaini, pexefā rasi anoax tsōa istoma ano kai. Nāskaino yorafāfe fenanifo. Nāskakanax akikī nokokaxō nētefapainifo ato makinoax kayamanō. <sup>43</sup> Askafaifono Jesús ato yoini: “Akka, ē Niospa meka shara ato yoifofāfōfāni pexe fetsafo ano afe keskaramākī Epa Nios xanīfāfe noko īkinā. Nāskakē Epa Niospa ea nīchini, ē ato yoinō.”

<sup>44</sup> Nāskakē kafāsakī Jesús Niospa meka ato yoifofāsafani, ichanāti pexe mēraxō Judea mai anoxō.

## 5

*Jesús foe rasi tarafanāfā mēra ato fospi faxoni, tsōa atiroma keskafakī*  
(Mt. 4.18-22; Mr. 1.16-20)

<sup>1</sup> Pena fetsa Jesúsxō foe rasi finifo ĩamāfā ketokonōxō Genesaret anoxō. Askafaito ōikani yora rasi akiki fenifo. Niospa meka niakai fekani. <sup>2</sup> Jesús nānoa kanōanāfā rafe rakakē fichini, nā kanōanāfā mēranoax mā fotokaxō ifofāfe ato tarafanāfā chokaifono. <sup>3</sup> Nāskakē nā kanōanāfā fetsa mēra Jesús naneinākafani, nā Simonā mēra. Nāskaxō yoini: “Eaya fenāmāshta kanōanāfā pitsikife,” fani. Nāskata kanōanāfā mēra tsaioxō yorafo yoikī taefani. <sup>4</sup> Mā ato yoikī xatexō Simón yoini: “Nā ĩa noa ano kanōanāfā fotakāfe. Anoxō mātō tarafanāfā potaxō foe fixikakī,” fani.

<sup>5</sup> Askafaito Simón kemani: “Maestro, fakishchāi nō yonoshina tarafanāfānē fipaikī. Akka nō fiama. Akka mī noko yoikai ē tarafanāfā potenō,” fani.

<sup>6</sup> Mā āto tarafanāfā potekaxō foe ichapakōi finifo. Oa tarafanāfā faxteai keskara meenifo. <sup>7</sup> Nāskakaxō nā ato fe rafeafo ato kenanifo, kanōanāfā fetsaōnoa, ato feta fii fenōfo. Nāskakaxō nā kanōanāfā rafe foe rasi fospikōi faafono nā kanōanāfā rafe faka fospikōiax fofoya ikikerani. <sup>8</sup> Nāskara ōikī Simón Pedro Jesús nāmā ratokonō mai chachipakefōfā yoini: “Ifo, emakinoax katāfe, ē feronāfake chakakī,” fani.

<sup>9</sup> Simón askaito ōi a āfe rafeafori ratekōinifo Jesús foe ichapa tarafanāfā mēra ato nanexonano. <sup>10</sup> Akka nā Simón fe rafeafo inifo, Santiago fe Juan āto apa Zebedeo ini. Nāskakē Jesús Simón yoini: “Rateyamafe. Iskaratīa yorafo ēfe Yōshi Sharaōxō mī ekeki efeikai,” fani.

<sup>11</sup> Nāskakata āto kanōanāfā fōkata ĩamāfā kesemē nexakata mā Jesús fe fōkakī āto afama mīshti ōifainifo.

*Jesús yora rashkishiai sharafani*  
(Mt. 8.1-4; Mr. 1.40-45)

<sup>12</sup> Pena fisti pexe rasi ano Jesús ikano nāno feronāfake isinī iki rashkishi fetseax akiki oni. Mā akiki oxō ratokonō mai chachipakefōfā yoini: “Ifo, ea sharafapaikī mī ea sharafatiro,” faito, <sup>13</sup> Jesús āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino a rashkishi fetseai koshikōi sharatani. <sup>14</sup> Mā sharano Jesús nīchini iskafakī yoiyanā: “Mī tsoa yoiki. Akka nā ato Nios kīfixomis ispatāfe. Nāskaxō

ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

<sup>15</sup> Jesús askafaito aōnoa mēxotaima nikakī finakōinifo. Nāskakanax yora kaya akiki fenifo nikakani, a isinī ikaifori ato sharafapanō. <sup>16</sup> Nāskax Jesús ato makinoax kani, a tsōa istoma anoxō Apa Nios kīfikai.

*Jesús yora finimisma sharafani*  
(Mt. 9.1-8; Mr. 2.1-12)

<sup>17</sup> Pena fetsa Jesús ato yoiaino nāno fariseofo tsaoafo inifo. A Moisés yoikī kirika keneni keskara ato tāpimamisfōri inifo. PeXe rasi Galilea anoax fekāta Judea anoax fēkata Jerusalén anoax fēkata inifo. Nānoxō Niospa āfe shara Jesús ato ōimani, a isinī ikaifo ato sharafapakī. <sup>18</sup> Nāskakata feronāfakefo nokonifo. Feronāfake finimisma ratatinī rataxō iyoifokani. Nāskakata peXe mēra ikimapainifo, Jesús ano iyopaikakī. <sup>19</sup> Akka afeskaxma ikitiroma inifo, yorafo ichapakōimāiyakē ikipanāfāfe. Nāskakanax peXe fomākīa inanifo. Nārixō nā finimisma ratatinī rataxō fotomapakefōfānifo, yorafāfe ferotaifi Jesús nia nāmā. <sup>20</sup> Jesús ōini shināifāfe iskakakī na finimisma Jesús sharafai kiki ikaxō. Nāskakē a finimisma Jesús yoini: “Efe yorashta, mē mia chaka soaxona,” fani.

<sup>21</sup> Nāskafaito ōikakī, a Moisés yoikī kirika keneni keskara ato tāpimamisfo feta fariseofāfe shinānifo iskakakī: “Akka, ĵna tsoamē na chanīai Nios chakafakī mekafayanā? Akka Nios fistichi ato chaka soaxotiro,” fanifo.

<sup>22</sup> Akka Jesús tāpini askafaifono. Nāskaxō ato yōkani: “ĵAfeskakī iskara mā shināimē? <sup>23</sup> Akka, ĵē afaa fatiromē? Mē mia chaka soaxona ē fatiroraka, askayamakī mē mia sharafaa ē fatiroraka,” ixō ato yoini. <sup>24</sup> “Akka ē mato tāpimanō Niosxō ē ato chaka soaxotiroki nono mai anoxō,” ato fani. Nāskaxō a finimisma yoini: “Ē mia yoi, fininīkafāta mī rakati fifaini mī peXe ano katāfe,” fani.

<sup>25</sup> Nāskafaino a finimisma fininākafani yorafāfe ferotaifi. Nāskaxō a kamaki rakamis āfe rakati fifaini āfe peXe ano kani. Epa Nioski inimayanā. “Aicho, Epa Nios shara-finakōia,” faafoni. <sup>26</sup> Finikainaito ōikani ratei fetsenifo. Nāskakanax, “ĵAicho, Epa Nios sharafinakōia!” inifo. Ratekōiyanā iskafakī yoinifo: “Akka mā nō ōi afama mīshti shara fai,” fanifo.

*Jesús Leví ifni aōxō tāpimis inō*  
(Mt. 9.9-13; Mr. 2.13-17)

<sup>27</sup> Mā askafata Jesús tsekekaikī ōini, a āfe xanīfo Roma anoa kori fixomis. Nā āfe xanīfo kori fixomisto āfe ane Levī\* ini. Akka nā ato kori fixomis ano tsoa ini. Nāskakē Jesús yoini: “Efe kafe,” fani.

<sup>28</sup> Nāskafaino Leví fininākafāta āfe afama mīshtifo ōifaini Jesús fe kani. <sup>29</sup> Nāskata chipo Leví āfe peXe anoxō fista efapa ani Jesús noisharakōiyanā. Yora ichapa rasiri afe inifo. Nā xanīfo Roma anoa kori fixomisfo. Yora fetsafori afe inifo. Nāno ato fe mīsa ano tsaonifo. <sup>30</sup> Akka nā fariseofo feta a Moisés yoikī kirika keneni keskara ato tāpimamisfāfe Jesúsxō tāpimisfo mekafakī taefanifo. Ato iskafanifo: “ĵAfeskakī ato feta pita ato feta ayata mā faimē? Na ato kori fixomisfo feta na yora chakafo fetari mā pii,” ato faifono, <sup>31</sup> Jesús ato kemani: “A sharafāfe notoro fenakanima, a isinī ikaifāfemari notoro fenakanima. Akka nā isinī ikaifāfe notoro fenakani. <sup>32</sup> Akka a yora sharafoōnoax ē onima. Nā afara chakafakanax shināmitsaifoōnoax ē oni, ato chaka soaxoxiki Epa Nios Ifofanōfo,” ato fani.

*Nā foni tenemisfofāfe Jesús yōkanifo*  
(Mt. 9.14-17; Mr. 2.18-22)

<sup>33</sup> Iskafakī Jesús yoinifo: “Akka Juan inafāfe, fariseofāferi foni tenekōiyanā Epa Nios kīfikī chai yoimisfo. Akka mī inafāfe mēxotaima piyanā ayakani,” faifono,

\* 5:27 Leví ane rafeya ipaoni. Āfe ane fetsa Mateo.

<sup>34</sup> Jesús ato kemani: “Akka yorafo matoki feafono mã ato foni tenematiroma, feronãfake ãfiyai. Nã feronãfake mato fe ikano inimakõikĩ mã ato feta pitiro. <sup>35</sup> Akka nã feronãfake ato makinoa iyoafono ãfe yorafãfe shinãkakĩ foni tenetirofo. Nãskarifiakĩ eõxõ tãpimisfãfe inimakakĩ pitirofo. Akka mẽ ato makinoax kaano ea shinãkakĩ tsõa pitiroma,” ixõ Jesús ato yoini.

<sup>36</sup> Nãskafata afianã Jesús ato yoini iskafakĩ, meka fetsafaxõ: “Tsõa sama fenaya sama xini kishi fatiroma. Nõ askafaino sama fena samama chakanatiro. Nãskatari sama fena fe sama xini isharatiroma. Nãskakẽri nã ã mato yoiyai keskara mã nikakõixõ a mã ipaoni keskai anã mã itiroma mãmã ea nikakõiax. A mã ipaoni keskara shinãmakita nãskax mãto yora fena keskara shara itiro. <sup>37</sup> Nãskarifikĩ tsõa mãmã fata koiro pisha xini mẽra nanetiroma nã mãmãno farax akaino toxamãianõ. Nãskakẽ nã mãmã fata fe koiro pisha chakanatirofo. Akka nã mãto xinifãfe mato yoimisfo keskara fe nã ã mato yoiyai keskara osinãtiroma. Nã ã mato yoiyai keskara Niospa meka sharakõi. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka osinãtiroma. Nãskakẽ mã nikapafikĩ mã shinãsharatiroma. <sup>38</sup> Nãskarifikĩ tsõa mãmã fata koiro pisha xini mẽra nanetiroma nã mãmãno farax akaino toxamãianõ. Nãskakẽ nã mãmã fata fe koiro pisha chakanatirofo. Akka nã mãto xinifãfe mato yoimisfo keskara fe nã ã mato yoiyai keskara osinãtiroma. Nã ã mato yoiyai keskara Niospa meka sharakõi. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka osinãtiroma. Nãskakẽ mã nikapafikĩ mã shinãsharatiroma. <sup>39</sup> Akka mãmã pae ayatiakaxõ anã tsõa fata ayapaitiroma. Nãskariai iskatirofo: ‘Nã ã ipaoni keskara afianã ã askapai, ãfe xinifãfe ea yoimisfo keskara shara nã fisti ã shinãi. Akka meka fetsa chaka ã nikapaima. Askatari meka fena chaka ã shinãima,’ ixõ shinãmisfo fariseofãfe,” Jesús fani.

## 6

### *Nã judeofãfe pena tenetitã Jesúsxõ tãpimisfãfe aros keskara metesfenifo (Mt. 12.1-8; Mr. 2.23-28)*

<sup>1</sup> Nã pena tenetitã Jesús aõxõ tãpimisfo fe tarepa kani. Kakĩ aõxõ tãpimisfãfe aros keskara meteskaxõ fonãikakĩ piifonifo. <sup>2</sup> Nãskakẽ fariseofãfe ato yõkanifo: “¿Afeskakĩ mã na aros keskara metesfeimẽ na pena tenetitã tsõa yonotiroma ixõ Moisés noko yoifinino?” fariseofãfe ato fanifo.

<sup>3</sup> Ato askafaifono Jesús ato kemani, “Akka, ¿a nõko xini Davidõnoa kirika kenenifo keskara mã õimismẽ David afaa afeska fanimẽ ãfe inafõ feta fonãikõi? <sup>4</sup> Nãskax a Nios kãfiti pexefã mẽra ikikaini. A mẽra ikikaixõ pãa fichixõ pini, nã pãa Nios inãmisfo. Nãskaxõ ãfe inafõri inãni akairi pinõfo, akka nã Nios ato kãfixomisfãfe ares nã pãa pifiamisfono. Akka fonãikĩ finakõikĩ David nã pãa pini ãfe inafõ feta. <sup>5</sup> Akka ãfe Epa Niospa ea katon. Nãskakẽ eres fisti ã yoitiro a nõ atiro keskara na pena tenetitã,” ixõ Jesús ato yoini.

### *Feronãfake mẽke yõshiya Jesús sharafani (Mt. 12.9-14; Mr. 3.1-6)*

<sup>6</sup> Pena fetsa pena tenetitã Jesús ikikaini judeofãfe ichanãti pexe mẽra anoxõ ato yoixiki. Anoxõ ato yoiaino, nãno ato fe feronãfake ãfe põya kayakai aõri ãfe mẽke yõshiya ini. <sup>7</sup> A Moisés yoikĩ kirika keneni keskara ato tãpimamisfo feta fariseofãfe õinifo, na pena tenetitã na mẽke yõshiya Jesús sharafaimãkai ikaxõ, afara chakafaira ixõ yõapaikakĩ.

<sup>8</sup> Akka Jesús mã tãpia ini a shinãifo keskara. Nãskaxõ a feronãfake mẽke yõshiya yoini: “Fininãkafãta ato nẽxpakã nife,” faino, nã mẽke yõshiya fininãkafãta niini. <sup>9</sup> Nãskaxõ Jesús ato yoini: “Ëri mato yõkanõ. Akka, ¿pena tenetitã afaa nõ afeskafatiromẽ, shara fayamakĩ nõ chakafatiroraka? Askatari ato ifiyamata, nõ ato retetiroraka,” ato fani. <sup>10</sup> Nãskaxõ keyokõi ato õiakeni, a kemataima tsaoafo. Nãskata a feronãfake mẽke yõshiya yoini: “Mẽshafe,” faino nã mẽke yõshiya meshatani. Nãskax mẽke sharakõia ini. <sup>11</sup> Akka nã

fariseofo fe a Moisés keneni tãpimisfo akiki õitifishkinifo. Nãskax ãa ranã yoinãnifo: “¿Nõ Jesús afeskafatiromẽ?” ikanax.

*Jesús aõxõ tãpimisfo doce feronãfake ifini*  
(Mt. 10.1-4; Mr. 3.13-19)

<sup>12</sup> Pena fetsa Jesús kani mãchi keya ano Apa Nios kifikai. Arixõ fakishchãi Apa Nios kifishini. <sup>13</sup> Mã penano a aõxõ tãpimisfo ato keneni. Nãnoxõ doce faxõ ato katonì, aõnoa ato yoimisfo inõfo. <sup>14</sup> Nã feronãfake docefãfe ãto anefo fetsa Simón ini, ãfe ane fetsa Jesús faxoni Pedro fakì; fetsari Andrés ini, nã Simón exto; fetsari Santiago ini; fetsari Juan ini; fetsari Felipe ini; fetsari Bartolomé ini; <sup>15</sup> fetsari Mateo ini; fetsari Tomás ini; fetsari Santiago ini, nã Alfeo fake; fetsari Simón ini. Nãato ãfe kaifo feta romanõfo potapaipaoni, anã israelifo yonomanõfoma. <sup>16</sup> Fetsari Judas ini, nã Santiago fake; fetsari Judas Iscariote ini, nãato Jesús ato achimani. Nã tii Jesús ifini doce faxõ aõxõ tãpimisfo inõfo.

*Jesús yora ichapafõ tãpimani*  
(Mt. 4.23-25)

<sup>17</sup> Jesús mãchi keya ariax fotoni, aõxõ tãpimisfo fe a mai sapa shara ano. Nãnoax aõxõ tãpimisfo mã ichanãfo inifo. Yora fetsafori ato fe inifo, Judea mai anoax, Jerusalén anoaxri feafo ini fãkafã kesemẽnoaxri. Tiro anoa fekãta Sidón anoaxri fenifo. ãfe meka nikaxikakì Jesúski fenifo, aa isinì ikaifori ato sharafapanõ. <sup>18</sup> A niáfaka chakata ato fekaxtefai to ato makinoa Jesús potano sharai fetsenifo. <sup>19</sup> Nãskakẽ yorafãfe Jesús ramãpaikani, ãfe sharaõxomãi Jesús ato sharafapaino.

*Nã inimaifo yafi a inimaifoma Jesús ato yoini*  
(Mt. 5.1-12)

<sup>20</sup> Jesús aõxõ tãpimisfo õikì yoini iskafakì: “Afaamaisfiãx mã inimakõitiro. Nios Ifofaax afe mã ipaxatiro nõko xanìfokõimãiyakẽ. Nãskakẽ mã inimatiro.

<sup>21</sup> “Nã yorafãfe fonãikì pipaiyaifo keskafakì mãri mã Nios Ifofasharakõipaiyaifo mãto õiti mẽra ãfe meka shara nanetiro, mã inimasharakõinõ. Iskaratãri omiskõi mã oiafiãx chipo mã inimai fitsakõitiro Nios fe ipaxakì,” ixõ Jesús ato yoini.

<sup>22</sup> Anã Jesús ato yoini: “Inimakõikãfe yorafãfe mato noikaspaifono mato potayanã. Askatari mato ìchaifono, askatari mato õikaspaifono askatari mato anekì chakafaifono. nãskakẽ inimakãfe eõxõ mato askafakani kiki. <sup>23</sup> Nãskakẽ mato askafaifono inimai finasharakõikãfe. Nãskaxõ a nai mẽraxõ Niospa afara sharafo mato mekexona mã fixikai. Akka nã mato chakafaifo keskafakì ãto xinifãferi nã Nios ato yoixomisfo chakafapaonifo ato omiskõimayanã,” ixõ Jesús ato yoini.

<sup>24</sup> Akka nã kori ichapayafo Jesús ato yoini iskafakì: “Ooa. Iskaratã mã kori ichapayax mã inimakõi. Akka chipo naax mã omiskõipakenaka, Nios Ifofamax kori fisti shinãkatsaxakì.

<sup>25</sup> “Ooa. Iskaratã afara ichapayax mã inimakõiyoi; akka chipo mã fonãixii. Askatari iskaratã mã fitsakõiyoi; akka chipo shinãmitsai mã oiaxii.

<sup>26</sup> “Yorafo sharakõira mato faifono, mã inimakõimis. Mãto xinifori nãskapaonifo, nõ Niospa meka tãpikõikẽ noko yoisharakõikanira ikanax ãa chanìfikani,” Jesús ato fani.

*“Mato noikaspaifafono mãroko ato noikãfe,” Jesús ato fani*  
(Mt. 5.38-48; 7.12)

<sup>27</sup> Nãskata anã Jesús ato yoini: “Akka mã ea nikaito ã mato yoi. A mato noikaspaifo ato kopikima ato noikãfe. Askatari ato axosharakãfe. <sup>28</sup> Mato chakafaifãferi ato yoisharakãfe. Askatari a mato omiskõimamisfo Epa Nios ato kifixokãfe. <sup>29</sup> Akka fẽtsa mato tapasaito, ‘Takai fetsari ea afe,’ fakãfe. Askatari fẽtsa mato tari fiãino ãa fotanõ inãkãfe, rapatiri mato fiãito inãkãfe ãa fotanõ. <sup>30</sup> Akka fẽtsa mato afara yõkaito inãkãfe. Askatari fẽtsa mato afara fiãito ferateyamakãfe. <sup>31</sup> Nã mã fichipaiyai keskafakì fetsafãfe mato axosharaifono, nãskarifiakì mãri fetsafori axosharakãfe.

<sup>32</sup> “Akka mā ato noikī nā mato noiaifos mā ato noia, askarakai sharama. Yora chakafori nāskariakani; nā ato noiaifos ato noikani. Mā askainokai, ‘Mā afarafo shara faa,’ ixō Niospa mato yoima. <sup>33</sup> Askatari mā ato afara axoshara nā mato afara axosharaifos, askarakai sharama. Nāskariakani yora chakafori. ‘Mā afara sharafo shara faa,’ ixō Niospa mato yoima. <sup>34</sup> Akka mā ato kori ināxō mā ato shinākōimis nokomāi kopifakōikanira ixō; akka na yora fetsafāfe ea afaa kopifatirofoma. Nāskakē ē ato afaa ināpaima ixō mā shinākī mā afaa ināma, askara sharama. Nāskarifiakani yora chakafo kori inānōnāmisfo nokomāi kopifasharakōikanira ikanax. <sup>35</sup> Akka ē mato yoinō, nikakapo. A mato noikaspaifāfe māroko ato noikāfe, ato shara fakāfe. Afara ato ināxō ea kopifafe iyamakāfe. Mā askai Epa Nios ari mā nokoaito matoki inimayanā afara sharafo mato ināxii. Nāskax mā Nios Sharapa fake mā iki. Nāfi tsoa keskaramāki sharafinakōiaki. Epa Nios sharakōi tsōa fayamafiaino ato noikōi. Nā yora chakafori ato noi. <sup>36</sup> Nāskakē māri ato noikōikāfe, nā Epa Niospa ato noikōiai keskafakī,” ixō Jesús ato yoini.

*“Fetsafo mekafakī chakafayamakāfe,” ixō Jesús ato yoini  
(Mt. 7.1-5)*

<sup>37</sup> Anā Jesús ato yoini iskafakī: “Mēxotaima fetsafo mekafayamakāfe iskafakī yoikī: ‘Nato afara chakafakī Niospa omiskōimapainō,’ fakī. Akka mā ato askafayamaino Niospari mato mekafatiroma iskafakī yoikī: ‘Na yorafo chakafo,’ mato fatiroma. Akka yorafo fe rafesharaxō ato raefakāfe. Mā askaino Epa Niospa matori raeshara faxii mā yorafo fe rafesharano. <sup>38</sup> Fetsafo afara ināsharakōikāfe. Mā fetsafo afara ināsharakōikē, matori Niospa afara ichapa sharakōifo ināxii. Akka mā fetsafo afara ināsharakōikēma Niospa matori afaa ichapa ināxima, mā ato afara ināsharakōikēma,” Jesús ato fani.

<sup>39</sup> Jesús meka fetsafaxō ato yoini iskafakī: “Akka yora fēxo afe fēxo iyopaikī iyotiroma, mai xato mēra paketiro. Nāskari fakī fētsa Niospa meka tāpioxoma mato yoitiroma. Askara yorafo yoiyamakāfe, mato anorima yoitirofoki. <sup>40</sup> Akka a aōxō tāpimisfāfe a ato tāpimamis finōtirofoma. Akka mā tāpisharakōikanax āto maestro keskara itirofo.

<sup>41</sup> “¿Afeskakī ifi pasta pishta fetsa feronaki ikano mā ōimē, māroko ifi pasta efapa feostamefixō? <sup>42</sup> Akka, ¿mā shināimamē a mā ifi pasta efapa feostamea? Akka afeskakī mā fetsa iskafaimē: ‘Yamā, ē mia fixonō a mī ifi pasta pishta fero naki ika,’ fakī, mākōi mā kakamepaimis. Māikai afaa tāpiama. Akka a mā ifi pastafā feostamea mā tsekayokāfe. Nāskaxō mā mā ōisharakī a fetsa feronaki ika mā fixosharatiro. Nāskari fakī mā chaka xateyamaxō mā fetsafo chaka xatematiroma. Akka māto chaka xatexō fetsafo mā chaka xatematiro,” ixō Jesús ato yoini.

*Ifi āfe fimioxō nō tāpitiro afe keskaramākī  
(Mt. 7.17-20; 12.34-35)*

<sup>43</sup> Anā Jesús ato yoini iskafakī: “Ifi shara fimi chakaya itiroma. Ifi chakari fimi sharaya itiroma. <sup>44</sup> Akka ififo āfe fimioxō nō tāpitiro afe keskaramākī. Moxaya ōikī nō tāpitiro. Na keoimara nō fatiro. Nāskari fakī nō tāpitiro moxaya ōikī, nari uvamara nō fatiro. <sup>45</sup> Nāskari fakī yora sharapa meka shara yoitiro, āfe ōiti mēraxomāi shara shinākī. Akka yora chakapari meka chaka yoitiro, āfe ōiti mēraxomāi chaka shinākī. Nāskaxō nā āfe ōiti mēraxō shināi keskara yoitiro.”

*Pexe rafeōnoa Jesús ato yoini  
(Mt. 7.24-27)*

<sup>46</sup> Nāskaxō anā Jesús ato yoini: “Akka, ¿afeskakī mā ea Ifofafiakī, a ē mato yoiai keskara mā akimamē? <sup>47</sup> Ē mato yoinō afe keskarafofomākī nā ea nikaifo, nāfāfe nā ē ato yoiai keskara amisfo. <sup>48</sup> Nā yōra pexe fai keskara, pexe fakī mai chai pōkixō mai teiki nokoxō pexe kishi nīchiano. Mā faka faikī faka poikōikī pexe afeskafatiroma pexemāi kerexkōikē. Nāskarifiakī yōra ea Ifofasharakōixō afara afeskara afiāito shināchakatiroma. <sup>49</sup> Akka nā ē yoiaito ea nikaito nā ē yoiai keskara akima, nā yora tatimato pexe fai



keskara. PeXe fakī tāpīxoma peXe kishi nīchisharamano, a nāmā faka faikī potatiro. Nāskax mā peXe pāoikax chakanakōitiro. Nāskarifiakī fētsa ēfe meka nikafikī ea nikasharaima. Nāskakē omiskōipakenakafo,” ixō Jesús ato yoini.

## 7

### *Jesús sharafani romanō xanīfāfe āfe ina yonaito* (Mt. 8.5-13)

<sup>1</sup> Mā Jesús yorafo yoikī xateax Capernaúm ano kani. <sup>2</sup> Nāno soraro xanīfo romanō ini. Nāato a yonoxomis fichisharapaikōimis yonaifinakōi nakerani. <sup>3</sup> Nānoxō nā soraro xanīfāfe nikani Jesúsnoa yoafono. Nāskaxō judeo anifofo nīchini Jesús yoixotanōfo a yonoxomis sharafaxoyonō.

<sup>4-5</sup> Ato askafaino mā fokaxō Jesús yoinifo iskafakakī: “Oa soraro xanīfāfe nofe yora yamafixō noko axosharamis ikaxō chikishta,” fanifo. “Noko keyokōi noikōimis nāato ichanāti peXe noko faxoni. Nāskakē āfe ina mī sharafaxotiro,” judeofāfe Jesús fanifo.

<sup>6</sup> Askafafono Jesús ato fe kani. Akka Jesús mā peXe chaima faikaino, nā soraro xanīfāfe afe rafeafo nīchini yoitanōfo iskafakī: “Ifo, ē mia fekaxtefaima. Ēkai afaama. Akka mī tsoa keskarama. Mī finakōiakī ēfe peXe ano kayamafe. <sup>7</sup> Akka ěkairoko afaax nāskakē ē mikiki kaama. Akka mī mekapa a ea yonoxomis ea sharafaxōfe nonoxō.

<sup>8</sup> Akka eari ēfe xanīfāfe yonomamis. Ēri sorafono yonomatiro. ‘Katāfe,’ ē faino karisatiro. Askatari, ‘Ekeki ofe,’ ē faino ekeki orisatiro. Nāskakē a ea yonoxomisri afara ea axōfe ē faino ea axotiro. Akka mī afama mīshti fatirokī. Mī mekapa a ea yonoxomis ea sharafaxōfe,” ixō yoini.

<sup>9</sup> Askafaito nikakī a afe foafo Jesús ato yoini: “Kee, nikakapo. Na feronāfake israeli yamafixō ea chanīmara fakī finakōi, fetsafo keskarama. Akka Israel anoafāfe ea iskafamīsfoma chanīmara fakakī,” ato fani.

<sup>10</sup> Ato Jesús askafaino a sororo xanīfo fe rafeafo mā āto peXe ano fokaxō ōiafo a yonaito ōifaino mā shara fichitoshinifo.

### *Jesús otofani kēro ifomāfa fake*

<sup>11</sup> Mā askafata Jesús kani peXe rasi āfe ane Nain ano. Āfe inafono fe kaino yora ichapafori afe fonifo. <sup>12</sup> Mā peXe rasi chaima fāi kakī ōini a naa iyoifofaifono maifaifokakī. Kēro ifomafa nā āfe fake fisti ini. Nā kēro ifomafa fe yora ichapafono afe fonifo. <sup>13</sup> Nā kēro ifomafa oiaito ōikī, Jesús shinākōikī yoini iskafakī: “Ōiayamafe,” fata, <sup>14</sup> Jesús kaxō a kamaki rataxō iyoifo foaifo ramāni. Akka nā iyoifo foaifo nāno nētenifo. Nāskata nā naita Jesús yoini: “Naetapa, ē mia yoi, fininīkafāfe,” faino, <sup>15</sup> fininīkafāni. Nāskakē a naita fininīkafā tsaota mekani. Nāskaxō Jesús afa yoini: “Nakīa, mī fake,” fani. <sup>16</sup> Nā naita Jesús otoa ōikani. Yorafo ratei fetsenifo. Nāskakaxō Nios yoisharakōinifo iskafakakī: “Epa Niosfi finakōiakī āfe meka yoimis nokoki nokoa,” fanifo. Nāskatari yoikī iskafanifo: “Epa Nios nokoki nokokōia, afe yorafo kexesharaxiki,” fanifo. <sup>17</sup> Nāskakē Judea anoxō keyokōi nikaketsanifo, aa kematai ixori nikaketsanifo a naita Jesús otofakē.

### *Juan aōxō tāpimisfo Jesúsni nīchini* (Mt. 11.2-19)

<sup>18</sup> Juan karaxa mēraxō nikani Jesús ato sharafaito Apa Niosxō. Nāskaxō āfe ina rafe kenani. <sup>19</sup> Nāskaxō ato nīchini Jesús ano fotanōfo mā ato nīchia fokaxō yoinōfo iskafakī: “¿Mīmē Cristo nā Epa Niospa nokoki nīchiai, askayamai fetsa nokoki oiraka nā nō manai?” ixō yoitanōfo Juan ato nīchini. <sup>20</sup> Mā Juan ato nīchia fokaxō Jesús yoinifo: “Juan Maotista noko nīchia nō oa mia yōkaiyoi, mīmakī a Niospa nokoki nīchia, askayamakī fetsa nō manairaka,” fanifo. <sup>21</sup> Jesús anoxō yora ichapa sharafapani, a isinī ikanaifo sharafata, a omiskōifinakōiafo sharafata, a niafaka chaka ato mēra nanea ato makinoa potata, a fēxofo ato fero sharafaxōaito ōinifo.

<sup>22</sup> Nãfo askafata Jesús ato kemani iskafakĩ: “Fokaxõ Juan yoitakãfe a mã õiyanã a mã nikafori. Yoitakãfe, mã fẽxofãfe sharakaxõ õisharakani kiki, askatari nã chatofori mã sharakanax niafoki, a rashkishiaifori mã sharafokĩ, a pastofãferi mã nikasharakani kiki, a namisfori mã otoafoki, a afaamaisfãferi Niospa meka shara nikakani kiki afeskaxõ Epa Niospa noko ifitiromakĩ. <sup>23</sup> Akka a ea chanĩmara fasharakõia afara fetsa shinãtama ekeki inimakõitiro,” Jesús ato fani, Juan ina rafe.

<sup>24</sup> Nã Juan ato nĩchia rafe mã foaifono Jesús yorafo yoikĩ taefani Juanoa, iskafakĩ ato yoikĩ: “¿Afeskakĩ tsõa istoma anoa Juan õifokani fonifomẽ? Juankai nã nẽfe tafa pei takka takka akai keskarama. Nãskarifiakĩ mã mã tãpia Juankai õiti ranãyama. <sup>25</sup> Akka, ¿tsoa õikai mã kamismẽ? Õitsai, feronãfake rapati sharakõi safekẽ õikai mã kamisraka. Akka mã mã tãpia a rapati sharakõi safemisfo xanĩfofõfãfe ãto pexe anoxõ rapati sharakõi safetirofo. <sup>26</sup> Akka, ¿tsoa õikai mã kamismẽ? Nã Niospa meka yoimis õikai mã kamisraka. Akka chanĩma, nã Juan Niospa ina finakõia fetsafo keskarama. <sup>27</sup> Akka nã Juanoa yoikĩ Isaías kirika keneni iskafakĩ:

Mĩ nai ariax mai ano fotoyoamano nã ãfe meka yoimis ã nĩchiki taefai mĩõnoa ato yoiaino itipinĩsharakaxõ mia nikakõinõfo, ixõ keneni. <sup>28</sup> Akka ã mato yoi, ã mato pãraima. Tsõakai Juan finõama. Juan yoimis keskara meka shara noko tsõa yoimisma. Juanki Nios inimakõimis. Akka fetsafãferi afayamafikaxõ ea Ifofaifono Nios atoki inimakõi. Nãskakẽ Juan finõkõiafo Niospa ato õimis.”

<sup>29</sup> Keyokõichi Juan nikanifo, a xanĩfo Roma anoa kori fixomisfãferi nikanifo. Nãskakẽ Juan ato maotisafapani mãmãi tãpikõiafãfe Nioskairoko chanĩmiskẽ. <sup>30</sup> Akka nã fariseofo fe a Moisés yoikĩ kirika keneni keskara ato tãpimamisfo afo maotiskaspanifo Juan yorafo maotisafapaino. Nã Niospa ato yoipaiyai keskara nikakaspanifo.

<sup>31</sup> Nãskaxõ anã ato yoini: “Iskaratĩa na niyoafo afe keskarafomãkĩ ã mato yoinõ mã tãpinõ. <sup>32</sup> Nã fakefo ãto kaxeti anoax kaxekakĩ ãto yamafo kenatirofo tai tai iyanã. Akka mã ãto yamafo nokokanax a ato yamafãfe fichipaiyaifo keskai tsoa kaxesharayamaino ato yoitirofo iskafakakĩ: ‘Nõ nõko xaiti maneaino akka mã mairamisma. Askatari shinãmitsayanã nõ fanãikaino mã oiamisma,’ ixõ ato yoitirofo. Akka mãri nãskariai mã tsoaki inimamisma. <sup>33</sup> Akka Juan Maotista oni. Atokai pikĩ finapaimisma, askatari afaa pae ayamisma. Akka mã yoimis iskafakĩ: ‘Juan niafaka yõshi chakaya,’ mã famis. <sup>34</sup> Akka ã Niospa Fakekõi oni. Piyanã ã ayamis. Akka ea mã iskafakĩ yoimis: ‘Jesús ichapakõi piimis, askatari pae ayamis,’ mã ea famis. ‘Nãskax yora chakafo fe rafemis, a romanõ xanĩfo kori fixomisfo feri rafemis,’ mã ea famis. <sup>35</sup> Akka ã shara imis Niospa ea shinãmanaino. Juanri shara imis Niospa shinãmanaino. Yorafãfe noko õikĩ tãpitirofo,” ixõ Jesús ato yoini.

### *Jesús Simón pexe ano kani. Nã Simón fariseo ini*

<sup>36</sup> Fariseo fistichi pikĩxiki Jesús iyoni. Afe Jesús kani ãfe pexe ano nãno mãsa ano tsoaxõ piaino. <sup>37</sup> Nãnoa nã kẽro chotaferomato nikani nãno ato fe ixõ. Nã fariseo pexe anoxõ Jesús pii ano, nãno nã kẽro nokoni, manishomo oxokõiki pirofomã foikai. <sup>38</sup> Mã nokoax oiayanã Jesús ãfe tae resotai nitishota tsaopakekafãni. Tsoax oiaino Jesús ãfe tae pichiki ãfe fẽotoshini. Nãskaxõ ãfe fõo otekere ayanã ãfe tae tsõokakata akiki pirofomã nachini. <sup>39</sup> Nã fariseo a Jesús iyoato na kẽro askaito õikĩ ãfe õiti mẽraxõ shinãni: “Na feronãfake Niospa meka yoikatsaxakitsi tãpi kiki na kẽro afe keskaramakĩ na ãfe tae ramãkai, nã kẽro chakakõi,” ixõ ãfe õiti mẽraxõ shinãni.

<sup>40</sup> Nãskara ãfe õiti mẽraxõ shinãito Jesús yoini nã fariseo: “Simón, afara fetsa ã mia yoipai,” feito nã Simón fariseo kemani: “Ea yoife, Ifo,” fani.

<sup>41</sup> Askafaito nikakĩ Jesús yoini feronãfake rafeõnoa meka fetsafaxõ: “Nã feronãfake rafeta a ato kori minimis niminifo. Fẽtsa nimini quinientos nã kori ane denarios. Fẽtsari nimini cincuenta. <sup>42</sup> Afeskaxoma kopifatiroma inifo. Akka nã ato kori minimisto

ea kopifakāfe ato fanima. Ato shara fani nā rafe. Akka ea yoife fatoto noikī finasharakōimākai,” faito, <sup>43</sup> Simón kemani: “Ētsa, nā ichapa nimiato noikī finakōi rakikīa,” faito, Jesús yoini: “Ēje, mī yoisharakōiaki.”

<sup>44</sup> Nāskaxō nā kēro ōiyanā Jesús Simón yoini: “¿Mā mī na kēro ōimē? Akka ē mī pexe mēra ikikē mī ea faka ināma, ē aō ochokomepanā. Akka na kēromā oiayanā ēfe taeki āfe fēo tosiyanā ea ōchoa. Nāskaxō āfe fēo ea otekere aka. <sup>45</sup> Akka mā nō feyai askafimisno, mī ea tamoki tsoo akama. Akka na kēromā ikitoshixō ēfe tae pemākīa tsoo akī xateama. <sup>46</sup> Akka mā nō feyai askafimisno mīkai xinī ēfe mapoki mīa matekere akama. Akka na kēromā ēfe taeki pirofomā nachia. <sup>47</sup> Akka ē mia yoi, na kēro chaka finakōikē mē āfe chaka soaxona, ea noikōiatio. Akka fētsari afaa chakafai finamano mē āfe chaka pishta soaxofiano ea noisharaima,” ixō Jesús yoini.

<sup>48</sup> Nāskaxō a kēro yoini: “Mē mia chaka soaxona,” fani. <sup>49</sup> A ato feta piaifori nāno ato fe inifo. Nāskax aa ranā yoinānifo. “¿Tsoamē na ato chaka soaxonai?” ikanax yoinānifo. <sup>50</sup> Nāskaxō afianā Jesús nā kēro yoini iskafakī: “Ea mīa chanīmara faito ē mia chaka soaxonaki, kasharatāfe,” ixō Jesús yoini.

## 8

### *Kērofāfe afara Jesús axosharapaonifo*

<sup>1</sup> Mā askafata pexe rasi mēra Jesús kafāsapaoni. Afe keskaramakī Apa Nios xanīfoōnoa ato yoifofāsafai. Nā doce feronāfake aōxō tāpimisfo afe fofāsapaonifo. <sup>2</sup> Kēro ranāri Jesús fe fofāsapaonifo, māmāi ato sharafaano ato makinoa niafaka yōshi chaka potakī, a isinī ikaifori ato sharafani. Nānori ato fe ini āfe ane María Magdalena. Nā María Magdalena makinoa Jesús siete niafaka potani. <sup>3</sup> Nāskata Juanāri ato fe ipaoni, Cuzapa āfi. Nā Cuzapa Herodes yonoxopaoni. Susanāri ato fe ipaoni. Nāskatari nā kēro fetsafāferi Jesús yafi aōxō tāpimisfo ato kori ināpaonifo.

### *Jesús ato yoini meka fetsafaxō fimi exe saamisnoa*

*(Mt. 13.1-9; Mr. 4.1-9)*

<sup>4</sup> Pexe rasi anoax yora rasi fenifo, Jesús ōifekani. Nāskakē yora kaya ichanāfono meka fetsafaxō Jesús ato yoipakeni iskafakī: <sup>5</sup> “Feronāfake fistichi fimi exe saafoni āfe nōxati mēra kēchoxō fokī. Āfe tarepa āfe fimi exe saakaino ranāri fai nēxpakīa pakeaito peamanifo, ranāri peyafāfe xēani. <sup>6</sup> Akka mā foaipaiyaito xinī namani, yosipanā, āfe tapo airoko mai mēra kasharakē. Foaikax samama nani xinī tsasifaano. <sup>7</sup> Ranāri fimi exe fo moxafo mēra pakei fetseni. Moxafo mēranoax moxafoya foaipaiyaito moxafāfe namani. <sup>8</sup> Akka fimi exe ranāri mai shara ano pakeni. Nāskax foaisharax fimi ichapayakōi ini fetsa cien ini,” ixō Jesús ato yoini. Nāskaxō anā fāsi ato yoini: “Mā pachoyakī ea nikasharakōikāfe,” ato fani.

### *Meka fetsafaxō yorafo yoixō a aōxō tāpimisfo xafakīakōi ato yoini*

*(Mt. 13.10-17; Mr. 4.10-12)*

<sup>9</sup> A aōxō tāpimisfāfe Jesús yōkanifo: “Noko yoisharafe, nō mia nikasharamakī afaa mī yoiamāki meka fetsafaxō,” faifāfe <sup>10</sup> ato yoini: “Ē mato yoinō Epa Nios xanīfāfe afeskaxō afe yorafo ikināmāki, ē mato tāpimasharai afe keskaramāki. Akka fetsafo meka fetsafaxō ē ato yoi. Nā ē ato yoiai ōisharafikakī ōisharafoma. Nikafikakīri nikasharafoma,” ixō Jesús ato yoini.

### *Jesús meka fetsafaxō fimi exe saamisnoa ato yoini ato tāpimasharakōixiki*

*(Mt. 13.18-23; Mr. 4.13-20)*

<sup>11</sup> Anā Jesús ato yoini iskafakī: “Na meka fetsafaxō ē mato yoiai iskarakī nikakapo. Na fimi exeōnoa ē mato yoiai, fimi exeōnoa ē mato yoima. Niospa mekaōnoa ē mato yoi. <sup>12</sup> Akka na fai nēxpakīa fimi exe pakea peamatirofo keskafakī, nāskarifiakī Niospa meka

nikapaiyaifono Satanás chakata ato nikatima fatiro afe iyamapakexanõfo. <sup>13</sup> Akka nã fimi exe makex mēra pakeax foaitiro keskariki, nãskarifiakī fētsa Niospa meka nika-paisharakōiyotiro. Akka nã fana tapo foaisharama keskaraxõ nikafikī nikasharaima. Nãskaxõ afara afeskaraino samamashta kachikiri fatiro. <sup>14</sup> Akka nã moxafo mēra fimi exe pakea keskarafori a ea nikaifo. Akka ea nikafikani, nã moxafāfe fanafo namai keskarafõ, āto shinã mēraxõ afara sharafo shinākakī. Nãskakakī a Niospa ato amapaiyai keskara shinākanima. Nã fimi exemais keskarafõ. <sup>15</sup> Akka nã fimi exe mai shara ano pakea keskara. Nãskarifiakī yora õiti sharayato itipinīsharaxõ ea nikasharai, Niospa meka chanīmara fakõini, nã fimi exe ichapaya keskarakõixõ. Nãskasharakõikaxõ fetsafo Niospa meka nikamasharakõikani fetsafāfe chanīmara fanõfo,” ixõ Jesús ato yoini.

*Meka fetsafaxõ rãpariki Jesús aõxõ tãpimisfo yoini*  
(Mr. 4.21-25)

<sup>16</sup> Anã Jesús ato yoini iskafakī: “Akka rãpari õtaxõ tsõa kēsho fepotiroma, askatari a ika nãmãri tsõa tsãotiro. Askakimaroko fomākīa tsãotirofo, chai chaxasharakõikē fetsafāfe ikikaxõ õisharakõinõfo. <sup>17</sup> Nãskarifiakī a afara oneyomis chipo xafakīakõi õixikani. Nãskatari a afara fomãyomisfo Niospa xafakīakõi ato faxoxii keyokõichi õinõfo. <sup>18</sup> Nãskakē nikakõisharakāfe. Akka a ea nikakī finasharakõiai Niospa tãpimasharakõi. Akka fetsa ē tãpisharakõia ifiaxõ nikamiskēma, askara yora nã tãpia pishta Niospa anã fīatiro,” ixõ Jesús ato yoini.

*Jesús õifekani āfe afanõ āfe extonõ fenifo*  
(Mt. 12.46-50; Mr. 3.31-35)

<sup>19</sup> Jesús yorafo yoiaino āfe afanõ āfe extonõ akiki fenifo afe mekapaikani. Akka akiki fotirofoma inifo, yora ichapa fospikõimāiyafono. <sup>20</sup> Nãnoa fētsa Jesús yoini: “Mī efanõ mī extonõ emãiti niafo mia õipaikani.” <sup>21</sup> Askafaino Jesús kemani: “Akka nã ēfe Epa Niospa meka nikakõiaifo nãfofi ēfe efafo ita ēfe extofoki,” ixõ ato yoini.

*Jesús nefe yafi ãamãfã poo iki meseniaito nishpa fani*  
(Mt. 8.23-27; Mr. 4.35-41)

<sup>22</sup> Pena fetsa Jesús kanõanãfã naneinīkafã aõxõ tãpimisfo yoini: “Nõ okiri ãamãfã pokefainõ fokāfe,” ato faino afe fonifo. <sup>23</sup> Mã ãamãfã pokefainafono kanõanãfã xaki mēra rakax Jesús oxani. Nãno atoki nēfefakõiyana ãamãfã poo ini. Nãskaino kanõanãfã faka fospikõini mesekõi ini mã kanõanãfã ikikerani. <sup>24</sup> Nãskakē aõxõ tãpimisfāfe Jesús mõinifo iskafayanã: “Ifo, mã nõ nataramaikai, moife,” faifono, Jesús fininãkafã nefe yafi ãamãfã poo ikaito āfe mekapa nishpa fani. Nãskax anã ãamãfã poo inima, sharakõi ãtani.

<sup>25</sup> Askafaifono aõxõ tãpimisfo yoini: “¿Afeskai mã rateimē? ¿Mã ea chanīmara faimamē?” ato faino, akka aõxõ tãpimisfo rateyanã ãa ranã yoinãnifo iskakani: “¿Keel! ¿Na feronãfake afe keskaramē na nefe feta ãamãfã ato yoiaino nikaifo?” ikanax yoinãnifo.

*Gadara anoxõ Jesús feronãfake makinoa niafaka rasi potani*  
(Mt. 8.28-34; Mr. 5.1-20)

<sup>26</sup> Nãskata Gadara mai ano nokonifo, nã ãamãfã Galilea okiri. <sup>27</sup> Mã nokoax Jesús kanõanãfã makinoax fotopakekafanaino, peke rasi makinoax feronãfake niafaka yõshi chaka nanea akiki oni. Rapati safekatsaxakima. Peke mērari ikatsaxakīma. Akka nã maiifo mafa kini mēra ano ika ini. <sup>28</sup> Nãskakē Jesús fichita a nãmã ratokonõ mai chachipakefõfã fãsikõi fiisiyanã yoini: “¿Ea afeska fayamafe, Jesús! Mī Nios Sharapa Fakeki ē mia yoi mī ea omiskõimayamafe,” fani. <sup>29</sup> Nãskafakī yoini mãmã Jesús a makinoa niafaka yõshi chaka potaino, mēxotaimamã a mēra niafaka yõshi chaka nanemisno. Nãskaito yorafāfe kaninãnã metexkere ata otxkere axõ kexefiafono, nãfo tesaketsafaini ichopaoni. Nãskakē niafaka yõshi chakata nã feronãfake tsõa istoma ano iyopaoni.

<sup>30</sup> Nāskaito Jesús yōkani: “¿Mĩ afe anemě?” faito, nāato kemani: “Ĕfe ane Legiόν,” fani, a mēramāi niafaka yōshi chaka ichapa nanekē. <sup>31</sup> Nāskaxō niafaka yōshi chakafāfe Jesús yoinifo: “A omiskōipakenakafo kinĩfā mēra noko potayamape,” fanifo.

<sup>32</sup> Akka nāno māchi keya anoxō kochifāfe pinifo. Nāskakē niafaka yōshi chakafāfe Jesús yoikakĩ iskafanifo: “Noko kochifo mēra nĩchife,” faifono Jesús kochifo mēra ato nĩchini. <sup>33</sup> Nāskakē niafaka yōshi chakafo feronāfake makinoax tsekefaini kochifo mēra iki fetseni. Kochifāfe pifiai ĩamāfā mēra keyopakei fetseax āsai fetseni, keyokōi.

<sup>34</sup> Askaito ōikani a kochifo kexeafō ichoi fetsenifo, a pexe rasi ano a ato chanifai fokani. Askatari a pexe rasi pasotai ikafori ato chanifanifo. <sup>35</sup> Askaito nikakani yōrafā rasi fenifo kochifā rasi āsaito ōifekani. Nokokaxō ōiafo Jesús nāmā a feronāfake niafaka yōshi chaka nanea tsoa ini, mā a makinoa Jesús niafaka yōshi chakafo pōtano. Rapati safeta mā shināsharakōia ini. Nāskakē yorafo ratei fetsenifo. <sup>36</sup> Nā feronāfake makinoa Jesús niafaka yōshi chaka potaito, ōiafāfe ato yoinifo afeskax sharamākĩ a feronāfake niafaka yōshi chaka nanea. <sup>37</sup> Keyokōi yorafāfe nā Gerasa anoafāfe nikakaxō ratekōiyanā. “Nonoax katāfe,” faifono, Jesús kanōanāfā mēra naneinākafanax kani. <sup>38</sup> Nā feronāfake a makinoax niafaka yōshi chakafo tsekeato, “Ĕri mefe kapai,” faito, akka Jesús, “Mĩ efe katiroma. Nono mĩ nētetiro. <sup>39</sup> Akka mĩ pexe ano kaxō a mia Niospa axōa keskara yorafo yoifotāfe,” fani.

Nāskafaino nā feronāfake kaxō nā pexe rasi anoafō ato yoifofāsafani nā Jesús axōa keskara.

*Jairo fake xotofake mā nakē Jesús otofani. Askatari kēromāri Jesús rapati mēeax sharani (Mt. 9.18-26; Mr. 5.21-43)*

<sup>40</sup> Nāskafaferani Jesús anā oni ĩamāfā pokeferani. Jesús nokoaito fichikaxō akiki inimakōiyanā yorafāfe ifinifo keyokōichimāi manakakĩ. <sup>41</sup> Akka nāno feronāfake āfe ane Jairo akiki nokoni. Nā Jairo Niospa meka yoimis xanĩfo ipaoni nā judeofāfe ichanāti pexe sināgoga anoax. Nā Jairo Jesús nāmā ratokonō mai chachipakefōfā fāsikōi yoini āfe pexe ano kanō, <sup>42</sup> āfe fake xotofake napaiyaino. Akka nā Jairo fake xotofake fisti ini, doce xinia aka. Nā xotofake mā nakerakōini. Jesús Jairo fe kakĩ meea yorafāfe shoiakĩ fetsafo meeni afe fokakĩ.

<sup>43</sup> Nānori kēro ato fe kani. Na kēro imi nese kima, doce xinia amis. Notoro kopifakĩ āfe kori keyotiani. Tsoa pīshta sharafatiroma ini. <sup>44</sup> Nā kēromā aa kachikiri kaxō āfe tari kexa Jesús ramākani. Tari kexa ramākaino koshikōi āfe imi nesetani. <sup>45</sup> Nāskakē Jesús ato yōkani: “¿Tsōa ea ramāmě?” ato faito, keyokōichi yoinifo: “Nō mia ramāma,” fanifo. Ato askafaito Pedro yoini: “Ifo, yorafāfe mia shoiaki fetsakaxō mia pitsikinafo,” faito, <sup>46</sup> afianā Jesús ato yoini: “Fatora mā fētsa ea ramā. Akka mē tāpia fatora fetsa ěfe sharaōnoax mā shara,” ixō ato yoiaino, <sup>47</sup> nikai nā kēro ratekōini. “¿Mā ea tāpiaromě?” ikax ratekōiyanā Jesús ano kaxō ratokonō mai chachipakefōfā yoini yorafāfe ferotaifi nāatomāi āfe tari kexa ramākaxō. “Ĕ mia tari kexa ramākata mē shara,” ixō yoini.

<sup>48</sup> Askafaito Jesús yoini: “Yōxashta, mā mĩ shara mĩmāi ea chanĩmara faax. Nāskakē tanaima kasharatāfe,” fani.

<sup>49</sup> Jesús nā kēro yoiaino, yora fistichi oxō Jairo yoini: “Mā mĩ fake xotofake naaki. Anā nōko Ifo fekaxtefayamafe,” faito, <sup>50</sup> nikakĩ Jesús yoini: “Ratekima. Ea chanĩmara fāfe mĩ fake naamakĩ otoi kiki,” fani.

<sup>51</sup> Mā pexe ano nokoxō, tsoa Jesús ikikinima. Akka Pedro kaino Santiago kaino Juan kaino inifo nā fāke apa fe fokani, nā fāke afari ato fe kani. <sup>52</sup> Pexe mēra ikifaikaxō ōiafo keyokōi oiakani fiisinifo shinākani nā fake xotofake mā naano. Akka Jesús ato yoini: “Oiyamakāfe. Na fake xotofake naamakĩ oxaki,” ato faino, <sup>53</sup> keyokōichi ōsaketsanifo, tāpifikaxō nā fake xotofake mā nafiano. <sup>54</sup> Nāskaxō Jesús mēkemā mētsoinĩfōfā fāsikōi yoini: “Xotofakeshta, fininākafāfe,” faino, <sup>55</sup> mā otoax nā xotofake koshikōi fininākafani. Nāskaxō ato yoini nā xotofake pimanōfo. <sup>56</sup> Nāskakē apa fe afa ratekōinifo. “¿Kee! ¿Afeskaxō

otoamē?” ikanax inimakōiyanā. Nāskaifono ato yoini: “Tsoa yoiyamakāfe nā mātō fake xotofake nakē mē otoaki,” ixō ato yoini.

## 9

*Jesús aōxō tāpimisfo nīchini Nios Xanīfoōnoa ato yoitanōfo*  
(Mt. 10.5-15; Mr. 6.7-13)

<sup>1</sup> Jesús aōxō tāpimisfo doce ichanāfani. Nāskaxō ato yoini iskafakī: “Ēfe sharaōxō ato makinoa niafaka fetsa fetsatapafo pōtatakāfe, a isinī ikaifo ato sharafayanā. <sup>2</sup> Askatari Nios xanīfoōnoa ato yoitakāfe, a isinī ikaifori ato sharafayanā. <sup>3</sup> Afaa mā fokiki, mātō mēstetiri mā fokiki, mātō pishari mā fokiki, a mā piikairi mā fokiki, koriri mā fokiki, rapati fetsari mā fokiki. <sup>4</sup> Akka nā mā ōiai pexe fetsa anoxō mato ifiaifono, nāno iyokani, nā mā anoax kaitīa. <sup>5</sup> Akka fatora pexe rasi anoxō mato ifikaspaifono, anoax tsekekaikī mātō taekinoa mā mapo taa taa atiro ato ōimaxiki. Mā askafaino tāpitirofo Nios atoki inimayamaino,” ixō Jesús ato yoini. <sup>6</sup> Nāskata Jesúsxō tāpimisfo fonifo, pexe fetsafo mēra ato yoifokani. Fokaxō ato yoisharakōinifo. Nios nikasharakōikāfe ato fayanā a isinī ikaifo ato sharafanifo.

*Juan Maotista nani*  
(Mt. 14.1-12; Mr. 6.14-29)

<sup>7</sup> Xanīfo Herodes nikani Jesúsnoa yoiiaifono afama mīshti akaito. ¿Tsoamē a feronāfake? ixō shināni. Akka yoinifo: “Mā Juan afianā mā otoa,” fanifo. <sup>8</sup> Fetsafāferi yoinifo: “Nā ato Niospa meka yoipaonikīa Elías,” fanifo. Fetsafāferi yoinifo: “Nā nōko xinifo ato Niospa meka yoipaonikīa afianā mā otoa,” ixō yoinifo. <sup>9</sup> Askafaifono Herodes ato yoini: “Maa, akai Juanma. Mē Juan ato textemayamea. Akka na nō nikai tsoamē na aōnoa yoiiaifo afama mīshti faito,” ixō Herodes Jesús ōipaikōini.

*Jesús cinco mil feronāfakefo ato pimani*  
(Mt. 14.13-21; Mr. 6.30-44; Jn. 6.1-14)

<sup>10</sup> Nā Jesúsnoa yoimisfāfe mā fēkaxō yoitoshinifo a atanaifo keskara. Askafaiāfe nikakī ato tiis iyonī, pexe rasi āfe ane Betsaida chaima tsōa istoma ano. <sup>11</sup> Akka mā yorafāfe tāpikanax Jesús kaino, nāskakē chīfainifo. Akiki foafono Jesús ato ifini. Apa Nios xanīfoōnoa ato yoīyanā a isinī ikaifori ato sharafapani.

<sup>12</sup> Mā yātapakeaino, aōxō tāpimisfo doce akiki fēkaxō yoinifo: “Yorafo nīchife fokaxō tenetanōfo a piaifo fenayanā fonāikani kiki, pexe rasi ano fokāta a chaima ikafo anori fotanōfo. Akka nono afaamaki,” faifono, <sup>13</sup> Jesús ato yoini: “Ato pimakāfe,” ato faito kemanifo: “Nōko pāa cinco pishta foe raferi,” fanifo. “Akka, ¿mī shināimē na yorafo pimaxiki a piaifo nō ato fixotanō?” ixō yoinifo. <sup>14</sup> Akka nāno cinco mil feronāfakefo inifo. Akka Jesús aōxō tāpimisfo yoini: “Cincuenta faxō ato tsāoketsakāfe,” ato fani.

<sup>15</sup> Ato askafaifono keyokōi tsoai fetsenifo. <sup>16</sup> Askata Jesús cinco pāa tsomainīfofāni foe rafeya. Nāskaxō nai foisnīfofā Apa Nios kīfini iskafakī: “Aicho Epa, mīoxō ē ato pimai. Mī sharakōi,” fata, pāa kaxketa foe rafeya osixō aōxō tāpimisfo ināni a yorafo ato ināketsanōfo.

<sup>17</sup> Nāskakē yorafāfe pikanax māyakōinifo. Akka nā chete faafo doce fēta fospini.

*“Mī Cristo mia Niospa ifini nokoki nīchixii mī nōko xanīfo fīnakōia inō,” ixō Pedro Jesús yoini*

(Mt. 16.13-19; Mr. 8.27-29)

<sup>18</sup> Pena fetsa Jesús Apa Nios arese kīfini. Akka aōxō tāpimisfo afe inifo. Nāskaxō ato yōkani: “¿Yorafo afaa ikanimē ē tsoamāki?” ixō āto yōkani.

<sup>19</sup> Ato askafaito kemanifo iskafakakī: “Fetsafāfe Juan Maotistara, mia fakani. Fetsafāferi Elíasra mia fakani. Fetsafāferi mia iskafakani: ‘Nā nōko xinifo ato Niospa meka yoipaonikīa mā otoa,’ mia fakani,” aōxō tāpimisfāfe fanifo. <sup>20</sup> “Akka mā, ¿ea tsoara

faimē?” ixõ ato yõkani. Ato askafaito Pedro kemani iskafakĩ: “Mĩ Cristo nã Niospa mia nĩchini mĩ nõko Xanĩfo finakõia inõ,” fani.

*“Chipo ea retexikani,” Jesús ato fani  
(Mt. 16.20-28; Mr. 8.30-9.1)*

<sup>21</sup> Nãskata Jesús aõxõ tãpimisfo yoini: “Tsoa yoiyamakãfe ãfi Cristoki,” ato fani. <sup>22</sup> Nãskata aõxõ tãpimisfo yoini iskafakĩ: “Ë chipo omiskõifinakõixii. Askatari ea õikaspakakĩ ea potaxikani, judeofãfe xanĩfofo feta a Nios ato kĩfixomis ãto xanĩfofofãfe a Moisés yoikĩ kirika keneni keskara ato tãpimamisfãferi. Askatari ea retexikani. Ea retefiafono, tres nia oxata ã anã otoxii,” ato fani.

<sup>23</sup> Nãskata keyokõi ato yoini iskafaki: “Fatora fetsa ãfe inakõi ipaikĩ ãakõi apaiyai keskara anã atiroma. Nã ã yoiai keskara nikakõitiro. Pena tii iskatiro, ea Ifofapai: ‘Ëfe Ifoxõ ea retefiafono ãkai ãfe Ifo ã potanakama,’ ixõ shinãtiro. <sup>24</sup> Akka fẽtsa ãa shinãtiro iskakĩ: ‘Ë Nios Ifofaito ea retetirofo. Nãskakẽ ã Nios Ifofaima,’ ixõ shinãtiro mesekĩ. Askara yora naax ãfe Epa ano katiroma. Akka nã ea Ifofaa, eõxõ reteafono ã ifixii efe ãpaxanõ eamãi Ifofamiskẽ. <sup>25</sup> Askatari fatora fetsa nõko mai anoax afara ichapayakõi ikatsaxakĩ mã naax aya katiroma. Ea Ifofayamax koriya ifiakatsaxakĩ Epa Nios ano katiroma. Akka afama mĩshtifoya iyopaofinixakĩ nã omiskõipakenakafo mẽra kaax anã aya itiroma. ãfe afarafori Nios inãtiro afe ipaxakĩ. <sup>26</sup> Akka fatora fetsa eõ rãfikĩ ãfe meka sharari yoikaspaito, ãri aõ rãfikõixii ã yoikĩ iskafaxii: ‘Ë na yora õimisma,’ ã faxii. Ëfe sharafoya mẽ oax ãfe Epa sharafoyari ã oxii, ãfe ãjiri sharafori efe fotopakefõfãxikani. <sup>27</sup> Ë mato pãraima, fatora mã fetsa nayoxoma nono efe iyoxõ ãfe Epa xanĩfo finakõia mã õiyoxii,” ixõ Jesús ato yoini.

*Jesús ãfe femãnã fetsa keskara ini, fafekõini. ãfe rapatiri oxokõi ini  
(Mt. 17.1-8; Mr. 9.2-8)*

<sup>28</sup> Askata ocho nia mã finõano ato yoikĩ keyota, Jesús mãchi keya mãpefaini arixõ Apa Nios kĩfikai. ãfe ina tres iyoni. Santiago iyota Juan iyota Pedro iyota ato fani. <sup>29</sup> Apa Nios kĩfiaino, ãfe femãnã fetsa keskara ãtani. ãfe rapati oxokõi ini fafekõiyana. <sup>30</sup> Akka nãno feronãfake rafe akiki nokokanax afe mekanifo. Mã nafianixakĩ Moisés fe Elías inifo. <sup>31</sup> Nã rafeta chaxapakefõfãnifo. Mã fotokanax Jesús fe ketaxamei nikaxõ yoinifo nã Jerusalén anoax Jesús omiskõixiai reteaifono. <sup>32</sup> Nãskata Pedronõ Santiagonõ Juannõ oxapaifikakĩ oxatenekõinifo. Jesús fafekõiaito õinifo nã feronãfake raferi õinifo Jesús fe niafãfe. <sup>33</sup> Mã Moisés fe Elías Jesús makinoax foaifono, Pedro yoini: “Ifo, sharakõi ano nõ oa. Nono nõ tapas fanõ, tres fakĩ. Mia fetsafaxota Moisés fetsafaxota Elías fetsafaxota nõ fanõ,” fani. Akka Pedro tãpinima a yoiai keskara shinãfenokõini. <sup>34</sup> Pedro mekai askaino ato kõinĩ maipakefõfãni. Ato kõinĩ maipakefõfãnaito õikani ratekõinifo. <sup>35</sup> Nã kõi mẽranoax mekai iskaito nikanifo: “Nafi ãfe Fakekõikĩ ã aõ noikõi. Nãskakẽ nikasharakõikãfe,” ixõ yoiaito nikanifo. <sup>36</sup> Mã mekai askai nishpatanaino, Jesús ares nikẽ õinifo. Akka tsoa yoitama ares fisti ãto õiti mẽraxõ shinãnifo. Nãskaxõ tsoa yoinifoma nã õiafo keskara.

*Jesús feronãfake naetapa niafaka chaka põtaxoni  
(Mt. 17.14-21; Mr. 9.14-29)*

<sup>37</sup> Pena fetsa mãchi keya ariax mã Jesús aõxõ tãpimisfo fe fotoano, yõrafã rasi akiki fenifo õipaikani. <sup>38</sup> Nãnoxõ yõrafã rasi mẽraxõ yora fistichi fãsikõi Jesús yoini: “Ifo, ãfe fake ea õixoniope. Nã fisti ãfe fakeki. <sup>39</sup> Niafaka chaka a mẽra nanexõ, fãsikõi fiisimamiski, mesta mesta imayanã ãfe axfapari fãkox potamamiski. Chakakõi famis a makinoax tsekekaspayana. <sup>40</sup> Akka mã inafõ mẽ yoia ãfe fake makinoa niafaka yõshi chaka potakãfe ã ato fafiaino akka tsõa atiroma,” fani.

<sup>41</sup> Askafaino Jesús kemani: “¡Ooa! Mãkai ea tãpisharama. Mã afara shinãmis. Akka afetĩakai ã matoki onima. ¿Afetĩakai mã ea tãpimẽ?” Jesús ato fani. Nãskaxõ yoini: “Niri

mĩ fake ea efexõfe,” Jesús apa fani. <sup>42</sup> Nãskata ãpa Jesús ano efeaino, nã fake nĩafaka fia kekẽfõfã anã nãmã potani, anã ea ea imapaikĩ. Akka Jesús fãsi mekainãkafã iskafani: “Nĩafaka mĩ chaka chakakõikĩ, nã feronãfake makinoax tsekekaitãfe,” fani. Nãskax nã feronãfake sharakõi itani. Nãskaxõ apa ãnãni. “Nakĩa mĩ fake,” fani.

<sup>43</sup> Askafaito õikani ãa ranã yoinãnifo: “Airã, Niospa afama mĩshti atiro,” ikanax ãa ranã yoinãnifo.

*Anã Jesús ato yoini: “Chipo ea retexikani,” ixõ  
(Mt. 17.22-23; Mr. 9.30-32)*

Jesús nã feronãfake sharafaito õikaxõ shinãifono, Jesús aõxõ tãpimisfo yoini, <sup>44</sup> “Ë mato yoiaito nikakõisharakãfe, shinãmakikãkĩma. Fetsafãfe ea ato achimaxikani kiki,” ixõ ato yoini. <sup>45</sup> Akka tsõa tãpinima a ato yoiai keskara Niospamãi ato shinã mẽraxõ ato shinãtima faino. Nãskai ranonifo Jesús yõkapaikani ato xafakĩa yoipanã.

*“Akka, ¿tsoakaimẽ sharafinakõia?” inifo  
(Mt. 18.1-5; Mr. 9.33-37)*

<sup>46</sup> Nãskata chipo aõxõ tãpimisfo ãa ranã feratenãnifo, “Akka, ¿fato nõ fetsa sharafinakõimẽ?” ikanax. <sup>47</sup> Nãskaxõ a aõxõ tãpimisfãfe shinãifo keskara mã Jesús tãpixõ fake yome ifixõ chishtoinĩfõfãni. <sup>48</sup> Nãskata aõxõ tãpimisfo yoini: “Akka fatora fẽtsa ãfe aneõxõ na fake yome noikĩ nãatori ea noisharakõi. Nã ea noisharaito ea fisti noima, nã ea nĩchiniri noisharai. Akka fatora mã fetsa ãto ina keskaraxõ mã yorafo shara faa, nãfi sharafinakõiakĩ,” ixõ Jesús ato yoini.

*Fẽtsa noko noikaspatama noko sharafai  
(Mr. 9.38-40)*

<sup>49</sup> Ato askafaito Juan yoini: “Ifo, mã nõ õia oa feronãfake fistichi mĩ aneõxõ niafaka chaka potaito. Nãskakẽ, ‘Askafayamafe,’ nõ faa. ‘Mĩ nofe rafemismaki mĩ niafaka chaka yorafo makinoa potatiroma,’ ixõ nõ yoia,” fani.

<sup>50</sup> Askafaito Jesús kemani: “Askafayamakãfe, noko chakafatama, noko sharafai askara sharaki,” fani.

*Jesús Santiago yafi Juan mekatima fani*

<sup>51</sup> Mã chaima Jesús Apa Nios ari nai mẽra kaino tsõakai nẽtefatiroma ini mãmãi tãpikẽ a Jerusalén anoax noko nãxoxiai Apa Niospa yoiyoni keskai. <sup>52</sup> Nãskaxõ fetsafo rekẽ nĩchini, mã fokaxõ pexe rasi Samãria anoxõ itipinĩsharafaxonõfo a nokoikai anoxõ. <sup>53</sup> Akka samãritanõfãfe ato ifikaspanifo, mãmãi tãpikaxõ Jerusalén anoamãi foaifono. <sup>54</sup> Ato askafaiãfe a aõxõ tãpimisfo rafeta Santiago feta Juan õinifo. Nãskaxõ yoinifo: “Ifo, mã noko yoife nõ atoõxõ Epa Nios kĩfinõ na pexe rasi anoafõ nai mẽranoax chii pakeki ato kooakĩ mitonõ,” ixõ yoinifo. <sup>55</sup> Akka Jesús anã ato yoini: “Anori shinãyamakãfe. Mã shinãi keskara ã shinãimakai,” ixõ ato yoini. <sup>56</sup> Askafata pexe rasi fetsa ari fonifo.

*A afe fopaimisfoõnoa Jesús ato yoini  
(Mt. 8.19-22)*

<sup>57</sup> Fãi foaifono feronãfake fistichi Jesús yoini iskafakĩ: “Ifo, ãri mefe kapai nã mĩ kai ari ãri mefe kafãsaxiki,” faito, <sup>58</sup> Jesús kemani iskafakĩ: “Maxoteneroa kiniya, peyafari naayafõ. Akka ãkai pexeyama,” fani. <sup>59</sup> Nãskaxõ Jesús anã feronãfake fetsa yoini: “Efe kafe,” faito, akka nãato kemani iskafakĩ: “Ifo, ea manayofe ãfe epa naito ã maifayotanõ,” faito, <sup>60</sup> Jesús kemani: “Askakima ea Ifofafe. Akka nã ea Ifofaafãfema yora nakẽ maifatirofo. Akka mĩ efe koofe ãfe Epa Nios xanĩfoõnoa ato yoifofãsafaxiki,” fani. <sup>61</sup> Akka anã fẽtsari yoini iskafakĩ: “Ifo, ã mefe kapai, akka ea manayofe ãfe pexe ano kaxõ ã ato yoisharayotanõ,” faito, <sup>62</sup> Jesús kemani iskafakĩ: “Akka fẽtsa ea yonosharaxofiakĩ a apaoni keskara anã aki, askara yorakai itipinĩsharama. Nãskakẽ ãfe Epa Nios xanĩfo ano katiroma,” ixõ Jesús yoini.



## 10

### *Jesús setenta y dos yorafo nīchini pexe rasi ano fotanōfo*

<sup>1</sup> Nāskata Jesús anā setenta y dos yorafo katonī. Nāskaxō rafe rasi faxō ato nīchini nā pexe rasifo mēra fanīma mīshti fotanōfo chipo akairi atoki kaxiki. <sup>2</sup> Nāskaxō ato yoini iskafakī: “Yora ichapafāfe ea nikayamafiaifono ichapatoma ea yonoxokani eōnoa ato yoikakī. Nāskakē mā Epa Nios kīfikāfe a yonoxomisfo katonō eōnoa ato yoinōfo. <sup>3</sup> Akka mā fotakāfe, ē mato nīchikai yora chakafo mēra nāfāfe mato chakafapaikani. Oa chaxo poomānā pipaitiro keskafakī, matori askafapaikani eōnoax mā isharafiakē yora chakafāfe mato chakafapaikani. <sup>4</sup> Ato mēra kakī māto forosa foyamakāfe, māto koriri foyamakāfe, māto saporiti foyamakāfe. Fokākī yorafo finōfāikakī nēteax ato fe mekakakīma. <sup>5</sup> Pexe fetsa mēra ikixō taefakī ato yoisharakāfe iskafakī: ‘Niospa mato sharafanō mā isharakōinō,’ ixō ato yoikāfe. <sup>6</sup> Akka nā pexe mēra ika fetsa isharakōikē nā Niospa shara fakōini. Akka a mā ato yoiai keskara nikakaspafono Niospa ato inimamaima. Nāskakē fenokani. Akka mā ato yoiai keskarakōinoax mā afaa fenoima. Epa Niospa mato sharafakōini. <sup>7</sup> Nāskata pexe rasi mēra nokoax pexe fetsa mēra oxayamakāfe. Nā mā nokoax anoxō mato pimayanā mato ayamanaifono pikāfe. Akka Niosxō yonomisfo nā afara yopaifo ato inātirofo. Nāskakē pexe fetsafo mēra iki foa foayamakāfe. <sup>8</sup> Mā nokoaito pexe rasi anoxō mato ifiyanā mato pimaifono pikāfe. <sup>9</sup> Nānoxō a isinī ikaifo eōxō ato sharafakāfe, iskafakī yoianā: ‘Epa Nios xanīfo finakōi afe yorafo ikixikī mā chaimashta oi,’ ixō ato yoikāfe. <sup>10</sup> Akka pexe rasi ano mā mā nokoano anoxō mato ifikaspaifono, anoax tsekekāikī ato iskafakāfe: <sup>11</sup> ‘Nā māto pexe rasi anoax nōko tae ano mapo neano, nō taa taa akano anā nōko neima. Nāskarifiakī mā noko nikakaspaino māto chaka nōko neima, māto nei. Akka shināsharakāfe Nios xanīfo māto Ifo ipai mā chaimashta matoki oi kiki,’ ixō ato yoikāfe. <sup>12</sup> Akka ē mato yoi, nā omiskōiai nokoaitīa, na pexe rasi anoa ato omiskōimaniyoi nā Sodoma anoafō ani keskafakī finōmainīfofā ato omiskōimakī finakōiyoi,” ixō Jesús ato yoini.

### *Pexe rasi anoxō Jesús nikakaspanifo (Mt. 11.20-24)*

<sup>13</sup> Anā Jesús ato yoini iskafakī: “¡Ooa! Corazin anoafāfe Betsaida anoafō fe mā omiskōifinakōixii. Akka Tiro anoxō Sidón anoxori nā ē mato ōimana keskara, ē ato ōimanano āto chaka xatekaxō Epa Nios Ifofakeranafo. ‘¡Ooa! Nō afara chakafamiskī iskaratīa nō anā Nios Ifofai,’ iyanā rāfikaxō āto rapati chapo safekaxō chii māpo raish akeranafo fetsafāfe ato ōinōfo. <sup>14</sup> Akka Niospa Tiro anoafō yafi Sidón anoafori ato omiskōimafiakī ato omiskōimasharaima, akka matoroko omiskōimakī finakōixii. <sup>15</sup> Akka, ¿nō Capernaúm anoax nō nai mēra kai Epa Nios ari ixō mā shināimē? Maa. Nā omiskōipakenakafo mēra ē mato potaxii,” ixō Jesús ato yoini.

<sup>16</sup> Nāskata Jesús anā aōxō tāpimisfo yoini: “Nā mato nikaifāfe, eari nikasharakani. Akka nā mato nikakaspafāfe, eari nikakaspakani. Nā ea nikakaspafāfe nā ea nīchiniri ēfe Epari nikakaspakani,” ixō Jesús ato yoini.

### *Anā fenifo setenta y dos feronāfakefo Jesús ato nīchitano*

<sup>17</sup> Nā setenta y dos feronāfakefo anā fenifo, inimakōiyanā. Mā fēkaxō iskafakī yoinifo: “Ifo, niafaka chakafāfe noko nika mī aneōxō yorafo makinoa nō potaino,” faifono, <sup>18</sup> Jesús ato kemani: “Ēje, mē ōia Satanás nai mēranoax pakeaito oa kana piishikai keskara. <sup>19</sup> Ē mato ēfe shara inā, ēfe sharaōnoax mā kaito rono feta nīfo mato chachiya-manō. Nāskaxō nā noko noikaspamis Satanás chaka mā finōkōinō, mato afeskafanōma. <sup>20</sup> Akka inimayamakāfe niafaka yōshi chaka potax. Akka mā nai mēraxō Epa Niospa māto anefo āfe kirikaki keneaki, nā sharafinakōia,” ixō Jesús ato yoini.

*“Ekeki fekāfe ē mato shināmasharanō,” ixō Jesús ato yoini (Mt. 11.25-27)*

<sup>21</sup> Ato askafata, Jesús Apa Yōshi Sharaōnoax inimakōikī yoini iskafakī: “Epa Niosi, keyokōi nai mēranoafoya nono mai anoafo mī āto Ifo. Mī sharafinakōia. Akka atirifāfe kirika kene tāpifikaxō mia Ifo fakaxoma. Iskafakī shināmisfo: ‘Tsoa fetsakai noko keskarama, nō tāpikōia,’ ixō shināmisfo. Akka nāfo mī meka mī ato tāpimanima. Akka nā kirika kene tāpikaxoma mia Ifofaifono nāfo mī meka shara mī ato tāpimani, nā mī fichipaiyai keskafakī. Nāskakē ē mia aicho fai,” ixō yoini. <sup>22</sup> “Ēfe Epa Niospa a tāpia keskara eari keyokōi tāpimani ēmāi āfe Fakekē. Akka tsōakai ea tāpiama, ēfe Epa fistichi ea tāpikōia. Nāskarifiakī tsōa ēfe Epa tāpiama, akka eres fisti ē tāpia. Akka nā fetsafori ē ato tāpimanaino nāfāferi Epa Nios tāpitirofo,” ixō Jesús ato yoini. <sup>23</sup> Anā aōxō tāpimisfoki oxō ato fisti yoini: “Nā mā ōiai keskara ōikanax fetsafori inimakōikani. <sup>24</sup> Akka ē mato yoi, Niospa meka yoimisfo feta xanīfofofāfe nā ē mato yoiai keskara ōipaifikakī ōipaonifoma. Nā mā nikai keskarari nikapaifikakī nikapaonifoma.”

*Meka fetsafaxō samāritanō sharaōnoa Jesús ato yoini*

<sup>25</sup> Feronāfake fisti a Moisés yoikī kirika kenei keskara ato tāpimamis Jesús fe mekaikai kani. Jesús ea kemaimākai ixō yōkaikai: “Ifo, ¿ē afeskatromē Nios fe ĩpaxakī?” ixō yōkaito, <sup>26</sup> Jesús kemani: “Akka, ¿a Moisés kenei ano anexō mī ōimismamē afaa ikamākī?” faito, <sup>27</sup> a Moisés kenei tāpiato kemani iskafakī: “Nōko Ifo Nios noikōikāfe nōko ōitifoyaxō nōko yōshi sharafoyaxori nōko kerex sharafoyaxō nōko māpori shināsharakōikāfe, askatari a mia chaima nikari noisharafe a mā mī noimeai keskafakī ixō Moisés kenei,” faito, <sup>28</sup> Jesús kemani: “Mī ea kemasharakōia, mī askafai mī Nios fe ĩpaxatiro,” ixō Jesús yoini.

<sup>29</sup> Akka nā Moisés kenei ato tāpimamisto shināni, mī isharakōimisra ea Jesús fanōra ixō. Nāskaxō Jesús yōkani: “Akka, ¿tsoamē ea chaima nika?” faito, <sup>30</sup> Jesús yoini: “Ē mia yoinō mī tāpinō. Feronāfake fisti Jerusalén anoax Jericó ari fāi kaito, yometsofāfe achikaxō rapati fīanifo. Nāskakē seteketsakata nasharakēma fai kesemē rātafainifo. <sup>31</sup> Nāskano nā ato Nios kīfixomisri nā fai fistichi kani. Akka kakī ōia fai kesemē rakakē ōifikī tanafainima. <sup>32</sup> Nāskano feronāfake fetsa levita arifi okī ōia rakakē ōini, nāatori kakī finōfaini. <sup>33</sup> Akka feronāfake fisti Samāria anoax nā fai fistichi akairi chipo kakī, mā fichixō aō noikōikī shinākōini. <sup>34</sup> Nāskata akiki kaxō, a āfe tsefefe ano xini yafi uva ene osixō aō tereaki fetsani. Nāskaxō taxta fakī fetsaxō, āfe kamayo kamaki tsaoinīfofā iyoni, pexe mēraxō kexeshiyoni. <sup>35</sup> Nāskata pena fetsa nā feronāfake samāritanō āfe kori exe rafe tsekaxō nā pexe ifo kopifani iskafakī yoiyanā: ‘Na feronāfake ea kexexōfe. Mī kexesharakē ē mia anā kopifaiyoxikai,’ ixō yoini. <sup>36</sup> Akka na feronāfake tresnoa ē mia yoipai. Akka, ¿fata aō noikōinimē na feronāfake omiskōiai, a noko chaima nika nō noitiro keskafakī?” ixō yoikaito, <sup>37</sup> a Moisés kenei tāpiato kemani iskafakī: “Nā noikōiaito akiki kaxō sharafani,” ixō yoiaito, Jesús iskafani: “Mīri ato noikī askafafe,” fani.

*Marta feta María pexe ano Jesús kani*

<sup>38</sup> Nāskata Jesús fāi kai pexe rasi mēra nokoni, nāno kēro āfe ane Marta ika ini nāato āfe pexe ano ifini. <sup>39</sup> Akka nā Marta āfe chiko fistiya ini, āfe ane María. Nā María Jesús nāmā tsaoni a Jesús yoiai keskara nikakōixikī. <sup>40</sup> Akka Martakai nikanima. Pīchani Jesús pimapaikī. Nāskakē Jesúski kaxō yoini: “Ifo, ¿ea mā shināimamē eres fisti ē pīchai ēfe chikokai efeta akima? Ea yoixōfe efeta anō,” faito, <sup>41</sup> akka Jesús kemani: “Marta, mī fekaxtei afarafo shināi. <sup>42</sup> Akka nā sharafinakōia María nikakōisharai. Nāskakē ēfe meka shara nikaito tsōa xītitiroma,” ixō Jesús yoini.

## 11

*“Epa Nios kīfikī iskafakāfe,” ixō Jesús ato yoini (Mt. 6.9-15; 7.7-11)*

<sup>1</sup> Pena fetsa Jesús Apa Nios kīfini. Mā kīfikī xateano aōxō tāpimis fistichi yōkani: “Ifo, afeskaxō Epa Nios nō kīfitiromakī noko tāpimafe, Juan aōxō tāpimisfo tāpimani keskakakī,” faito,

<sup>2</sup> Jesús yoini: “Akka mā kīfikī iskafatiro:

Epa Niosi, mī fisti sharafinakōia. Keyokōichi mia Ifofanōfo mī āto xanīfo finakōia inō ato īkisharakōipakexakī. <sup>3</sup> Nā pena tii a nō piai noko ināfafāife nō afaa yopayamanō. <sup>4</sup> A noko chakafaifo nō ato raefa keskakakī noko chakari noko soaxōfe. Satanás noko afara chakafamapafaito nokoki kematimafafe, ixō kīfikāfe,” Jesús ato fani.

<sup>5</sup> Nāskafata anā Jesús ato yoini: “Ōitsai, fatora mā fetsa mā yamayano, mato yama yamenakē kafanaino māto pexe ano kaxō mato yoikī iskafaino: ‘Yamā, tres faxō ea yoa ināpe. <sup>6</sup> Mā ēfe yama rama noi kiki chai inoax ēfe pexe ano, ē afaayamaki afaa ē pimatirodaki,’ ixō mato yōkaito, <sup>7</sup> kemakī māto pexe mēraxō mā iskafatiroma: ‘Ea fekaxtefayamafe. Ēfe pexe fepoti fetaxikakī ēfe fakefo fe ē oxaki. Finixō ē mia afaa inātiroma,’ ixō mā yoitiroma. <sup>8</sup> Ē mato yoi, fininākafā afara āfe yama inākaspaikī inātiroma fekaxtefaito nā fichipaiyai tii.

<sup>9</sup> “Nāskakē ē mato yoi, afara fichipaikī Epa Nios yōkakāfe mato ināi kiki. Fena fenakākīma manakāfe nā Epa Niospa mato ināitīa. Nāskakē Epa Nios kīfifafāikāfe mā kīfifaito mato ināi kiki. <sup>10</sup> Akka nā yōkai Epa Niospa afara shara ināxii. Nāskarifiakī fētsa afara shara fenaito Epa Niospa fichimatiro. Nāskarifiakī fētsa Epa Nios kīfifaito ināsharakōixii.

<sup>11</sup> “Akka, ¿fatora fētsa mā āto epaxō māto fakefo mā rono ato inātiromē mato foe yōkaito? Maa. Mākai māto fake mā askafatiroma. <sup>12</sup> Māto fake mato takaranā too yōkaito, ¿nifo mā inātiromē? Maa. Mākai māto fake mā askafatiroma. <sup>13</sup> Akka, mā chakafixō māto fakefo kexesharaxō afara sharafo mā ato inātiroma. Nāskarifiakī Epa Nios nai mēra ikato āfe Yōshi Shara mato ināsharakōixii mā yōkaito,” Jesús ato fani.

*Yora fetsafāfe, “Jesús niafakaōxō ato sharafaira,” fanifo  
(Mt. 12.22-30; Mr. 3.20-27)*

<sup>14</sup> Nāskata Jesús niafaka yōshi chaka potani feronāfake makinoa mekamamismano. Mā a makinoax niafaka tsekeano, nā mekamisma mekainīkafani. Mā mekaito ōikani, “¡Kee! Ōikapo, mā mekai,” yorafo iki fetsenifo. <sup>15</sup> Akka atirifāfe yoinifo iskafakakī: “Na Jesús nā niafaka chakafāfe āto xanīfoōxō nā Beelzebúxō\* ato makinoa niafaka yōshi chakafo potai,” ikanax yoinānifo.

<sup>16</sup> Fetsafāferi chakafamapai kakī yoinifo iskafakakī: “Nios feta nai mēraxō afara fetsafo noko ōimafe,” faifono, <sup>17</sup> akka Jesús tāpini a shināifo keskara. Nāskaxō ato yoini: “Keyokōi mai tio anoax āa ranā retenākani keyotirofo. Nāskarifiyai pexe fisti mēra ikanax āa ranā noikaspa faatanākani paxkanātirofo anā ano fistikai toa itiroma. <sup>18</sup> Nāskarifiakī Satanás āfe yōshi chakafo potaxō anā afaa afeskafatiroma. Akka āfe yono keyoano anā āfe yōshi chaka afe itiroma. Nā ē mato yoi, akka mā yoikī iskafai: ‘Satanás yōshi chakaōxō niafaka potai,’ mā ea fai. <sup>19</sup> Akka askafiano, akka, ¿tsōa āfe shara māto ināfo ināno niafaka chakafo potamisfomē? Nāskakē atoōxō mā tāpitiro akka mā eōnoa shināsharamisma. Akka Niosxō māto inafāfe niafaka potamisfo. <sup>20</sup> Akka ē niafaka yōshi chakafo potatiroma Niospa Yōshi Sharaōxō ato makinoa. Nāskakē mā tāpitiro a Niospa atoki nīchiai mā nokoano. Nāskakē yorafāfe ea Ifofasharakōixikani.

<sup>21</sup> “Akka feronāfake mitsisipakōichi marayaxō āfe pexe kexekōiano tsōa āfe afaa fīatiroma. <sup>22</sup> Akka fetsa nā mitsisipa finakōia oxō achixō metexkere axō āfe afarafo fīaitokai anā afeskafatiroma. Nāskax paxkanāi fetsetirofo.

\* 11:15 Satanás āfe ane fetsa Beelzebú.

<sup>23</sup> “Akka fetsa efe rafekaspakī ea chakafai. Nāskakē nāfāfe fetsafo ea Ifofamakaspakani ato paxkanā fakani Epa Nios Ifofayamanōfo,” ixō Jesús ato yoini.

*Anā niafaka chaka yoraki nanetiro*  
(Mt. 12.43-45)

<sup>24</sup> Anā Jesús ato yoini iskafakī: “Ē mato yoinō mā tāpinō. Niafaka chaka feronāfake makinoax tsekeax tsōa istoma ano kafāsatiro anoxō tenepai. Akka anoxō tsoa fichiamax niafaka chakata anā shinātiro iskakī: ‘A ē anoax tsekeita ano anā kapa,’ ixō shinātiro. <sup>25</sup> Mā kaxō ōia nā feronāfake nā pexe xaki mēra mātsumea keskara sharakōi ōitiro itipinīsharakōia. <sup>26</sup> Nāskakē nā niafaka afe niafaka siete efetiro nā chakafinakōiafo, nāfo nā feronāfake mēra iki fetsenō. Nāskakē nā feronāfake chakafinakōia itiro a iyopaoni keskarama.”

*Niospa meka nikakani inimasharakōitirofo*

<sup>27</sup> Nāskata Jesús anori ato yoiaino kēro fistichi yorafā rasi mēraxō fāsikōi yoini iskafakī: “Mī efa mikiki inimakōi mia fake fixō mī yome pishtakē mia chocho amayanāmāi mia pekoax,” ixō fāsikōi yoiaito, <sup>28</sup> Jesús kemani: “Akka nā Niospa meka nikasharakōiai nāfi inimai finasharakōi kiki,” ato fani.

*Yora chakafāfe Jesús yōkanifo: “Tsōa atiroma keskara noko ispafe nō mia chanīmara fanō,” ixō yōkanifo*  
(Mt. 12.38-42; Mr. 8.12)

<sup>29</sup> Yorafā rasi Jesúski feafono anā ato yoini iskafakī: “Na keyokōi yorafo chakakōifo. Tsōa atiroma keskafakī ē afara afeskarafanō ōipaikani ea Niospa nīchiamākī tāpaxikakī. Akka a keskara ōipaifakī ōikanima. Nā Jonás ini keskara fisti ōixikani. <sup>30</sup> Akka Epa Niospa Jonás Nīnive pexe rasi ano nīchini āfe meka shara ato tāpimatanō Epa Nios Ifofanōfo mā āto chaka xatekaxō. Nāskarifiakī Epa Niospa ea nīchia na yorafā rasi āfe meka shara ē ato tāpimanō. <sup>31</sup> ¿Mā shināimamē nā kēro xanīfo chai inoax kani Salomón tāpisharakōiano nikaikai? Akka mā kai ea nikamisma ē Salomón finōkōifiano nono efe ifiaxō. Akka nā Niospa yorafo keyokōi ichanāfaitīa ato yoipakexii fatofo afe ipanakafo makī, fatofori a omiskōipakenakafo mēra fokanimākai. Nāskaifono nā kēro xanīfo Salomón nikaikai chai inoax kanito mato yoikī iskafaxii: ‘Mā chakakōifo mā Jesús nikakaspamis,’ ixō mato yoixii. <sup>32</sup> ¿Mā shināimamē nā Nīnive anoafāfe Jonás Niospa meka ato yoiaito anā Nios nikakōinifo? Akka mā kai ea nikamisma ē Jonás finōkōifiano nono efe ifiaxō. Akka nā Niospa yorafo keyokōi ichanāfaitīa ato yoipakexii fatofo afe ipanakafo makī, fatofori a omiskōipakenakafo mēra fokanimākai. Nāskaifono nā Nīnive ano ipaonifāfe mā āto chaka xatekaxō mato yoikī iskafaxikani: ‘Mā chakakōifo mā Jesús nikakaspamis,’ ixō mato yoixikani,” Jesús ato fani.

*“Nōko ōiti sharakē nō shināsharakōitiro. Akka nōko ōiti chakakē nō shināsharatiroma,” ixō Jesús ato yoini*  
(Mt. 5.15; 6.22-23)

<sup>33</sup> Anā Jesús ato yoini iskafakī: “Akka tsōa rāpari otaxō tsōa istoma tsāotiro. Askatari tsōa kesho fepotiro. Askatamaroko fomākīa tsāotirofo chai chaxasharakōikē a mēra ikiaifāfe ōinōfo. <sup>34</sup> Akka māto afama mīshtifo noikī mā shināfafāini. Akka nōko fero rafeta nā rāparinī chai chaxai keskarakē, nōko yora shara itiro. Nāskarifiāi nōko fero sharano nō xafakīa ōisharatiro. Nāskatari nō isharakōitiro. Akka nōko fero chakakē nō ōisharatiroma, fakishkōi itiro. <sup>35</sup> Akka ōisharakāfe mā Epa Nios shināi xafakīa ifiaxō āfe meka kachikiri faxō mā anā shināsharatiromaki, fakish keskara mā itiro. <sup>36</sup> Akka mā xafakīa isharakōiano, māto ōiti mēra oa fakish keskara itiro. Mā xafakīa shināsharakōitiro rāpari otaxō mato xafakīa chaxa keskara shara mā itiro,” Jesús ato fani.

*Jesús ato yōani fariseofoya a Moisés yoini keskara ato tāpimamisfo*  
(Mt. 23.1-36; Mr. 12.38-40; Lc. 20.45-47)

<sup>37</sup> Mā Jesús ato yoikī xateano fariseo fistichi iyoni āfe pexe ano pikīxikī. Nāskakē Jesús āfe pexe mēra ikikainax mīsa ano tsaoni. <sup>38</sup> Akka nā fariseo shināni Jesús mechokomeyamaito āto xinifāfe yoipaonifo keskai. Akka taeyoi mechokomepaonifo, chipo pixikakī. <sup>39</sup> Akka nōko Ifāfe Jesús mā tāpixō yoini askara shināito: “Mā fariseofo mechokomesharafxō, akka māto shinā mēraxō afara sharafo mā shināima. Yora fetsafo mā noima, afara fetsa fetsatapafo noikī māto shinā mēraxō afara chakafo mato mēra fospikōia. <sup>40</sup> Akka mā anorima shināmis. ¿Mā tāpiamamē tsōa nōko yora femākīa onifata, nōko ōiti mērari onifanimē? <sup>41</sup> Nāskaxō a yora afaamaisfo afara ato inākāfe. Mā askafakī yorafo mā ōimatiro māto ōitinī mā Nios shinākī. Nāskax mā isharakōitiro, Nios matoki inimanō. Nāskaxō a Niospa mato amapaiyai keskara mā atiro.

<sup>42</sup> “¡Ooa, fariseofāfe! Māto afarafo atiri mā Nios ināmis. Māto fanafori atiri mā ināmis. Askafxō mā fetsafo mā ato shināmisma, askatari mā ato sharafamisma. Askatari mā Nios noikōiama. Akka nā māto fanafo mā Nios ināmis keskafakī fetsafori noikōikāfe Niosri noikōiyanā.

<sup>43</sup> “¡Ooa, fariseofāfe! Ichanāti pexe anoax tsaoti sharakōi ano mā tsaopaimis noko ōisharanōfora ikax. Askatari yorafāfe noko finōkakī noko yoikōisharanōfora ikax.

<sup>44</sup> “¡Ooa! Māfi nā yora naa keskarafokī. Nā yora maia ano kaxō nō pisi xetetiroma keskarafō mā oke mēra pisifiano. Nāskarifiakī māto ōiti chakafiano mato ōikakī sharara mato famisfo,” ixō fariseofo Jesús yoini.

<sup>45</sup> Jesús ato askafaito, a Moisés yoikī kirika keneni keskara ato tāpimamisto kemani iskafakī: “Maestro, anori mī yoikī nokori mī ichayanā yoi,” faito, <sup>46</sup> akka Jesús yoini: “¡Ooa a Moisés yoikī kirika keneni keskara ato tāpimamisfāfe! Akka māto kaifofo yoikī mā iskafamis: ‘Moisés keneni keskara nikakōikāfe,’ ixō mā ato yoifikī akka māri nikasharakōimisma. Askatamaroko a Moisés yoini keskara finōmainīfofā mā ato yoimis mato nikakanax askanōfo. Nā mā ato yoiyai keskara apafikakī tsōa atiroma. Akka māri mā ato afaa axomisma.

<sup>47</sup> “¡Ooa! Māfi nā Niospa meka yoimisfo maiafo anoxō mā afarafo onifamiski ato shināxikī. Akka nāfo māto xinifāfe retepaonifo. <sup>48</sup> Akka mā mā nikakī tāpikōia a māto xinifāfe apaonifo keskara. Akka māto xinifāfe ato retepaonifo. Akka a maiafo anoxō mā afarafo onifamis yorafāfe ōinōfo. Nāskarafo mā ato ōimani nā māto xinifāfe apaonifo keskara, māri ato fe ixō mā ato feta askafakerana.

<sup>49</sup> “Nāskakē Niospa atoōnoa tāpixō iskafakī yoini: ‘A ēfe meka yoimisfo yafi eōxō yonomisfo fetsa ē ato nīchixii. Akka ranāri ato reteyanā ranāri ato omiskōimakani.’ <sup>50-51</sup> Nāskakē na yorafo iskaratīa niyoafo Niospa ato omiskōimaxii atoōxō. Nā Niospa mai onifaki taefanitīa Abel sharafiano āfe ōchi reteni. Nāskatari xinia fetsa finōmata a Niospa meka yoimisfo ato retepaonifo. Nāskata chipokōi fakakī Zacaríasri retenifo. Nā Nios kīfiti pexefā chaimashtaxō koati mīsamāfā nakirafexō retenifo. Akka ē mato yoi na yorafo iskaratīa niyoafo Niospa ato omiskōimaxii atoōxō.

<sup>52</sup> “¡Ooa a Moisés yoikī kirika keneni keskara ato tāpimamisfāfe! Niospa meka shara oa onea keskara mā faa yorafāfe tāpinōfoma. Māikai Niospa meka tāpisharama. Nāskaxō fet-safāfe nikapaifiaifono mā ato nikatimafai. Nāskakē Niospa mato omiskōimakī finakōixii,” ixō Jesús ato yoini.

<sup>53</sup> Ato Jesús askafakī yoiaino, a Moisés yoikī kirika keneni keskara ato tāpimamisfo fe fariseofo akiki ōitifishkiki finakōinifo. Nāskakaxō fekaxtefayanā afara ichapakōi yōkanifo, <sup>54</sup> afara ato yoiaino nikakaxō yōaxikakī. Nāskakaxō yōkanifo xanīfofo yoipaikakī.

## 12

*Jesús ato yoikī iskafani: “Ato feparapaimis iyamakāfe,” ixō ato yoini (Mt. 10.26-27)*

<sup>1</sup> Nāskakē yorafā rasi akiki fekanax ichanānifo. Shoiki fetsenifo yora ichapakōi māiyakanax. Nāskakē Jesús aōxō tāpimisfo yoikī taefani, ato iskafakī: “Ōisharakāfe farise-ofāfe nafo sharafora noko fanōfora ikaxō mato anorima yoimapaikani kiki sharafoya-mafikaxō. Nāfo feparamitsapaimisfokī. Nāskakē māri ato keskara iyamakāfe.

<sup>2</sup> “Akka nā afara one yoifimisfono Niospa ato xafakīa kāimaxoxii, afarari fomāpaimisfono nāfori Niospa ato xafakīa kāimaxoxii.

<sup>3</sup> “Nāskakē a yora fetsafo fomāfai ares shināmisfo, nāfori Niospa xafakīa faxii. Nā pexe kene mēraxō pexe fepoti tserexō afara one yoimisfori, nāfori Niospa pexe kachiori ato xafakīa kāimaxoxii keyokōichi tāpinōfo,” ixō Jesús ato yoini.

*Akka Nios fistiki nō mesetiro*  
(Mt. 10.26-31)

<sup>4</sup> Anā Jesús ato yoini iskafakī: “Efe yorafāfe, ě mato yoi. Mato retepaifiaifono rateyamakāfe. Akka māto yora nafaiino māto fero mēsho naima kiki. <sup>5</sup> Akka ě mato yoi, tsoaki mā mesetiro, atoki mesetamaroko Nios fistiki mesekāfe. Nāato noko retexō nōko fero mēsho nā omiskōipakenakafo mēra potatiroki. Nāskakē akiki mesekāfe.

<sup>6</sup> “Akka ě mato yoi mā tāpinō. Na cinco peya mīshtifo minixō mā kori ichapa fiima. Āfe exe rafes mā fii. Askatamaroko Niospa keyokōi peya mīshtifo noi. Atokai shināmakīnakama. Peya mīshtifo afaamafiakē Niospa ato noi. Keyokōi Niospa ato shināpakenaka. <sup>7</sup> Akka ě mato yoi, Epa Niospa māto foo fisti rasi mato tāpikakōia. Nāskakē rateyamakāfe. Nā peya mīshtifo kexesharamis keskafakī matori Epa Niospa kexesharakī finakōiakī,” ixō Jesús ato yoini.

*Akka atiri yorafāfe, “Jesús ěfe Ifora,” ea famisfo yorafāfe ferotaifi. Akka atirifāferi, “Jesús ěfe Ifomara,” ea famisfo*  
(Mt. 10.32-33; 12.32; 10.19-20)

<sup>8</sup> Anā Jesús ato yoini iskafakī: “Akka ě mato yoi yorafāfe ferotaifi, ‘Jesús ěfe Ifora,’ ea faifono, ěri, ‘Nafo efe yorafo,’ ě ato faxii Epa Niospa āfe ājirifāfe ferotaifi. <sup>9</sup> Akka nā yorafāfe ferotaifi, ‘Jesús ěfe Ifomara,’ ea faifono, ěri Niospa āfe ājirifāfe ferotaifi, ‘Nafo efe yorafomara,’ ě ato faxii.

<sup>10</sup> “Akka Niospa Fake chakafakī mekafaifono Niospa ato chaka soaxotiro. Akka Epa Niospa āfe Yōshi Shara chakafakī mekafaifono Epa Niospa ato chaka soaxonakama.

<sup>11</sup> “Nāskata ichanāti pexefo ano mato iyoaifono, askayamakī xanīfofo ano mato iyoaifono, shināchakayamakāfe afeskaxō mā ato kemaimākai afaa mā ato faimākai. Epa Niospa mato shināmasharai kiki. <sup>12</sup> Akka a mato chakafakī mekafaifono Epa Niospa Yōshi Sharapa mato shināmasharaino mā ato kemasharai,” ixō Jesús ato yoini.

*Yora afama mīshti ichapayax mesekōixii*

<sup>13</sup> Nānoa fētsa Jesús yoini: “Ifo, ěfe ochi ea yoixōfe āfe afama mīshtifo ea paxkaxonō,” faito, <sup>14</sup> Jesús kemani: “Efe yorashta, tsōakai ea nīchima ě ato yoinō āto afama mīshti paxkanānōfo,” ixō yoita. <sup>15</sup> Nāskaxō anā yoini: “Mā kexemesharakāfe afarafo ato fichipaiyamakāfe, ayafixō finōmafāi fipaiyamakāfe. Nā nō yopaifo shināyamakāfe, afama mīshtiōnoaxkai nō ishariatromaki. Nōko afama mīshtifāfekai nōko ōiti noko inimamax-otiomaki,” ixō Jesús ato yoini.

<sup>16</sup> Nāskaxō anā meka fetsafaxō ato yoini: “Feronāfake fetsa afama mīshti ichapaya ini. Āfe tare ano yonosharaxō afama mīshti fanano ichapakōi ini. <sup>17</sup> Nāskakē nā feronāfake afama mīshti ichapayato iskafakī shināni: ‘ĴĒfe yonofa ě afeskafaimē? Fanīkai ěfe yonofa ě fatiroma,’ ixō shināni. <sup>18</sup> Nāskaxō anā shināni: ‘Ēje, mē shinā ě afeskafaimākai. Nā ě ano afama mīshtifo famis ěfe pexe nasaxō anā efapafai, nāno ěfe fana fimifo mekexiki ěfe afama mīshtifoya. <sup>19</sup> Nāskaxō ěfe shināmā ě shināi iskafakī: “Nē afama mīshti mekekōia nā xiniai tii rakakōikai pixiki, ayayanā inimasharakōiyānā.” ’

<sup>20</sup> “Nāskaito Niospa iskafakī yoini: ‘Mīkai afaa tāpiama. A na fakishi mī nai, akka, ¿na mī mekeafo tsoanā ikimē?’ fani. <sup>21</sup> Nāskariatiro a yora afama mīshti ichapaya ikatsaxakī Nios shinātama. Akka Niospa ōiaino anā afaya itiroma,” ato fani Jesús.

*“Epa Niospa āfe fakefo kexesharamis,” ixō Jesús ato yoini  
(Mt. 6.25-34)*

<sup>22</sup> Nāskata chipo Jesús aōxō tāpimisfo yoini iskafakī: “Ē anā mato yoisharanō. Ea nikasharakāfe. Shināchakayamakāfe. <sup>23</sup> Akka a nō piatokai noko imasharatiroma. Askatari a nō safeatori nōko yora noko imasharaxotiroma. <sup>24</sup> Shinākapo. Nā peyafāfekai afaa fanamisfoma, afarikai topimisfoma. Askatari afari mekemisfoma. Nāskafekē Epa Niospa ato pimamis. Akka Niospa nā peyafō finōmainīfofā matoroko kexesharakōimis. <sup>25</sup> Nāskakē, ¿afeskakī mā shināchakaimē? A nō shināchakaitokai pena fisti noko anā nimatiroma. <sup>26</sup> Akka afaa shināyamakāfe. A nō shināitokai noko nimatiroma. Nāskakē afaa shināyamakāfe.

<sup>27</sup> “Akka shinākapo afeskax charofo foaikamakī. Na charofāfe yonokanima. Askatari xapo toro atirofoma rapati faxikakī. Nāskakē ē mato yoi, na charofo sharafiano xanīfo Salomón rapati sharafinakōi safefixō na charofo finōama. <sup>28</sup> Akka Niospa nafefo shara mīshti onifasharafiano nō sepakī xateano natiro. Nāskaxō nō koofatiro. Akka charofo finōmainīfofā Niospa mato noikī mato rapati shara safematiro, mato kexesharaxō. Akka mā shināchakakī mā Nios chanīmara fasharaima. <sup>29</sup> Nāskakē shinākī iskafayamakāfe: ‘Ooa, ē afaa piimēti a ē piiai keyoano, askatari ē afaa ayaima,’ ixō shināyamakāfe. <sup>30</sup> Akka nā Nios Ifofaifāfema iskara shināmisfo. A piiai fisti shinākata, a safepaiyaifori shināmisfo. Akka Epa Niospa mā mato tāpia afarafo mā yopaito. <sup>31</sup> Nāskakē māroko Nios xanīfoōnoa shināfafāikāfe. Mā askaito afara shara Niospa mato ināxii kiki,” ixō Jesús ato yoini.

*“Epa Nios ika anoxō afara sharakōifo mato mekexona,” ixō Jesús ato yoini  
(Mt. 6.19-21)*

<sup>32</sup> Anā Jesús ato yoini iskafakī: “Efe yorafāfe, rateyamakāfe, Epa Niospa mato kexesharaikiki. Akka Epa Niospa āfe afama mīshti mato ināsharai inimakōikai mato ināsharai. <sup>33</sup> Māto afama mīshtifo minixō kori fiyokāfe. A yora afaamaisfo ato ināxikakī. Mā askaino Niospa nā ika anoxō mato afama mīshti mekexona. Nāfokai keyonakama, tsoarikai yometsotiroma. Askatari nakaxari mato pīatiroma, Epa Niospamāi mato mekexonano. <sup>34</sup> Akka māto afama mīshti shinākī nā fisti mā shināi. Akka mā Nios fisti shinākī nā fistiri mā shinākōitiro māmāi noikōikī. Nāskax mā afe isharpakexatiro,” ixō Jesús ato yoini.

*Īkisi itipinīsharakāfe*

<sup>35</sup> Anā Jesús ato yoini iskafakī: “Nāskakē itipinīsharakāfe māto rapati safesharakōita māto rāpariri ōtasharakōikāfe. <sup>36</sup> Nā āfe ifo yonoxomisto āfe ifo manatiro keskakāfe pexe fetsa ari kaax, āfiyatani oaino. Mā nokoaito āfe fepoti koshi fepexoxiki, mā nokoxō fepoti ramātoshaiaino. <sup>37</sup> Nāskaifono āto ifo atoki inimasharakōitiro, manasharakōiaifono. Akka ē mato yoikōi āto ifāfe mīsa ano ato tsāotiro atoki inimayanā. Nāskaxō ato pimatiro atoki inimasharakōiyanā. <sup>38</sup> Nāskakē inimasharakōitirofo āto ifomāi manasharakōikanax, yamenake kafanaino nokoaino, askayamai penanaki kafanaino nokoainori akiki inimasharakōitirofo. <sup>39</sup> Nāskakē māri nā keskara tāpisharakāfe. Akka pexe ifāfe mā tāpixō afetiā yometso nokoimākai ixō āfe pexe itipinīshara fatiro, a mēra ikiāx yometsoyamanō. <sup>40</sup> Nāskarifiāi māri itipinīsharakāfe. Akka oimara ixō mā ea manayamaino ē matoki nokorisatani,” ixō Jesús ato yoini.

*Ina shara yafi ina chakaōnoa Jesús yoini  
(Mt. 24.45-51)*

<sup>41</sup> Nāskaito Pedro yōkani: “Ifo, ¿noko fisti mēka fetsafaxō mī yoiamē, askayamakī keyokōi mī noko yoiamē?” ixō Pedro yoikaito, <sup>42</sup> Jesús kemani: “Mā tāpinō ē mato yoi

afe keskaramākī ina shara āfe xanīfāfe āfe afama mīshiti kexemafaini mai fetsa ari kakī nā āfe pexe anoafō ato kexesharaxonō ato pimasharayanā, nā āfe xanīfo fena oyamaino. <sup>43</sup> Mā mai fetsa ari katani oxō ōitoshini a yonoxomisto mā yonoxosharakōiano. Nāskakē akiki inimakōini a yonoxomisri inimakōini māmāi yonoxosharakōiax. <sup>44</sup> Ē mato pāraima. Nāskaxō āfe xanīfāfe mā xanīfo imaxō āfe afama mīshiti kexexonō inātiro. <sup>45</sup> Akka nā āfe xanīfo yonoxomisto, ‘Ēfe xanīfo fena oimara,’ ixō shinākī, a yonoxomis fetsafo sēteketsani, kērofoya. Nā pāemisfo fe rafexō ato feta piyanā, askatari ato feta ayayanā, askatari ato fe pāeyanā. <sup>46</sup> Iskaratīa ēfe xanīfo oimara ixō manayamaino, nā pena fistichi āfe xanīfo nokofiaino mā nokoxō a yonoxomis omiskōimatiro, nā yora chakafo fomisfo mēra potakī.

<sup>47</sup> “Akka a yonoxomisto mā tāpia āfe ifāfe fichipaiyai keskara, nāskakē mā tāpifiax itipinīsharama, nāskakēri nikasharaima, nāskakē āfe ifāfe omiskōimayanā koshaketsatiro. <sup>48</sup> Akka a yonoxomis fētsa āfe ifāfe yoia keskara tāpixoma afara chakafakē āfe ifāfe omiskōimafiakī, omiskōimasharanima. Nāskarifiakī Niospa fetsa ichapa tāpimaxō ichapari yōkaxii. Iskafakī a ē mia yoia keskafakī, ¿fetsafo mā mī ato tāpimasharamē? ixō yōkaxii. Akka fetsafo tāpimasharamano Niospa omiskōimakī tāpimaxii,” ixō Jesús ato yoini.

*“Akka atirifāfe ea chanīmara faifono, atirifāferi ea chanīmara fakanima,” ixō Jesús ato yoini*

*(Mt. 10.34-36)*

<sup>49</sup> Anā Jesús ato yoini iskafakī: “Ē keyokōi maifo tii anoa āto chaka xatemaniyoi ē oa. Atirifāfe ea chanīmara faifono, fetsafāferi ea chanīmara fakanima. Nā chanīmara faamafo Niospa ato omiskōimaxii. Ēfe Epa Niospa ea mai ano yonomanai keskara iskaratīa keyokōi shara ikerana. <sup>50</sup> Akka matoōnoax naxii ē oni. Akka ē nayoamax ē omiskōixii. Nāskakē ē omiskōifinakōita ē naxii. <sup>51</sup> Akka, ¿mā shināimē ē oni nono mai anoax eōnoax inimanōfo? Maa. Askarakaima. Akka ē mato yoi nā ea chanīmara faafāfe shara shināifono, akka a ea chanīmara faafāfema shara shinākanima, afara chaka shinākani. <sup>52</sup> Akka iskaratīa nā pexe fisti mēra cinco yorafo ikaxō anorisfo shinākanima, paxkanātirofo. Trespato nā rafe noikaspaifono, nā rafetari nā tres noikaspatirofo. <sup>53</sup> Apa āfe fake noikaspaino āfe fakefāferi āfe apa noikaspatiro. Āfe āfari āfe fake xotofake noikaspaino āfe fake xotofākeri āfe afa noikaspatiro. Askatari āfe fāfa yōxafāfe āfe fāfa naetafa noikaspaino āfe fāfa naetafari āfe fāfa yōxafo noikaspatiro.”

*Nai foiskī nō tāpitiro*

*(Mt. 16.1-4; Mr. 8.11-13)*

<sup>54</sup> Nāskata Jesús yorafo yoini iskafakī: “Nai foiski nai kōi ōikī nai choshtakē oi feira mā faino oi itiro. <sup>55</sup> Akka nā xini oaima anorinoax nēfefā oaino, mā xiniaira mā fatiro. Chanīma, nāskatiro. <sup>56</sup> Akka mā kai afaa tāpiama, mā kōi mā kakamepaimis a mā yoiai keskara mā yoifikī mā chanīmara famisma. Mā nai foiskī mā yoimis oi feira mā famis. Askara tāpifixō mā kai a Niospa mato yoiai keskara mā chanīmara fapaima. Iskaratīa afara afeskarafaitokai mā tāpiama,” ixō Jesús ato yoini.

*Fētsa mia chakafaito raefarisafafe*

*(Mt. 5.25-26)*

<sup>57</sup> Anā Jesús ato yoini iskafakī: “Akka, ¿afeskakī mā shara shināimamē a sharafinakōia? <sup>58</sup> Akka fētsa mato yoikī iskafaino: ‘Mī ea chakafaa. Ē xanīfo yoikai,’ ixō mato yoiaino, xanīfo ari kayoamano koshi raefakāfe. Akka mā askafayamaino nā xanīfāfe āfe sorarofō yoitiro nā sorarofāfe mato karaxa mēra ikimanōfo. <sup>59</sup> Ē mato paraima. Fētsa mato karaxa mēra ikimanano mā fena tseketiroma. Akka nā mā nimia kopifatīa mā tseketiro,” ixō Jesús ato yoini.



## 13

### *Nôko chaka xatexô nã Jesús noko amapaiyai keskara fisti nõ atiro*

<sup>1</sup> Nãskaino yorafo Jesúski fokaxô yoinifo iskafakĩ: “¿Mã mĩ tâpiamẽ na Pilato yorafo ato retemanita Galilea anoafô yoinã retexaxô Nios kĩfiti pexefã mëraxô Epa Nios inãifono ãto imifo yoinã nã imifoya osita?” ixô yoinifo. <sup>2</sup> Askafaiifãfe Jesús ato yoini iskafakĩ: “¿Mã shinãimẽ na Galilea anoax na feronãfakefo naitafo? ¿Yora chakakõifo keskarakanax ãto kaifo keskarakanaxma chakafinakõiax naitafo ixô mã shinãimẽ? <sup>3</sup> Maa. Askarama. Akka mãri mãto chaka xateyamaxô mã Nios Ifofayamax nã ikaifo keskai mãri mã narisatiro mato reteafono. <sup>4</sup> ¿Akka mã shinãimẽ nã feronãfake dieciochonoa atoki pexe keya ãfe ane Siloé atoki pakeano nanifo? ¿Mã shinãiraka: ‘Nãfo chakafinakõia nanifo Jerusalén anoafô keskaraxma,’ ixô mã shinãimẽ? <sup>5</sup> Maa. Askarama. Chanĩma ã mato yoi. Akka mãto chaka mã xateyamaxô mã Nios Ifofayamax, mãri mã omiskõipakenaka.”

### *Meka fetsafaxô higuera fimimaisnoa Jesús ato yoini*

<sup>6</sup> Jesús meka fetsafaxô ato yoini iskafakĩ: “Feronãfake fistichi ãfe tarepa higuera fana ini. Nãskax õikai kani mã fimiyamãkĩ, kaxô õini fimimais ini. <sup>7</sup> Nãskakẽ yoini a tare kexemis. ‘Õipo mã tres xinia aflux na fana higuera fimiyama. Ë ãfe fimi fichipafinao fimiyama. Ichakanõ rerafe, ano fimi fetsa nõ fananõ,’ fani.

<sup>8</sup> “Akka ifãfe askafaino a tare kexexomisto kemani: ‘Ifo, na xinia fisti manayofe. Ë a nãmã orosharata ã mai tatsispo sharayonõ. <sup>9</sup> Õitsai, ã askafaano fimisharatirokĩ. Akka fimiyamaito mã ea reramanõ,’ ixô a tare kexemisto yoini.”

### *Jesús pena tenetitã kẽro petoko sharafani*

<sup>10</sup> Nãskano pena tenetitã ichanãti pexe mẽra kaxô Jesús ato yoini. <sup>11</sup> Nãnori kẽro ini isinĩ itiani dieciocho xinia amis, niafaka chakata isinĩ imamis nã kẽro sharamisma ini petoko itiani. <sup>12</sup> Nãnoa Jesús õikĩ kenaxô yoini iskafakĩ: “Yõxafoshta, mã mĩ shara isinĩ itianixakĩ,” fani.

<sup>13</sup> Nãskaxô ãfe mẽkemã ramãino, koshikõi nã kẽro sharakõitani. Nãskaxô, “Epa Nios fãsi sharakõi,” nã kẽromã fani. <sup>14</sup> Nãskakẽ Jesús pena tenetitã kẽro sharafaino, nã ichanãti pexe anoaxanĩfo õitifishkikĩ yorafo yoini iskafakĩ: “Seis nia nõ yonotiro, akka na pena tenetitã tsõa yonotiroma. Nãskakẽ seis nia otafe sharaxiki, akka na pena tenetitã tsõa mato sharafatiroma,” xanĩfãfe ato fani.

<sup>15</sup> Askafaito nõko Ifo Jesús kemani iskafakĩ: “Mãkai afaa tâpiama, mãkõi mã kakapaimis, akka pena tenetitãri mã yonomis mãto yoinã inafô mã tẽpemis ato faka ayamanikakĩ. <sup>16</sup> Akka na kẽro Abraham ãfe fena Satanás chakata finitima famis isinĩ imayanã dieciocho xinia amamis. ¿Akka afeskakĩ na pena tenetitã na kẽro ã sharafatiromamẽ?” ixô Jesús ato yoini.

<sup>17</sup> Nikakani a Jesús noikaspamisfo rãfipainifo. Akka yorafo inimakõinifo nã kẽro Jesús sharafaito õikani.

### *Mostaza exeõnoa yoikĩ meka fetsafaxô Jesús ato tâpimani*

(Mt. 13.31-32; Mr. 4.30-32)

<sup>18</sup> Nãskata Jesús anã ato yoini iskafakĩ: “Afe keskaramakĩ Nios xanĩfãfe noko ãkinã ã mato yoinõ. Nikakapo iskarakĩ: <sup>19</sup> Oa mostaza exe feronãfãke ãfe tarepa fana keskarakĩ. Mã foaikax efapakõiax ifi tio itiro. Mã efepakõiano peyafãfe ãfe põyamã naa fatirofo. Nãskarifiakĩ mã taefakĩ fisti rasichi mã Epa Nios Ifofayotiro. Akka chipo ichapakõichi mã Epa Nios Ifofatiro,” ixô Jesús ato yoini.

### *Meka fetsafaxô pãa faraxika keskaraõnoa Jesús ato yoini*

(Mt. 13.33)

<sup>20</sup> Afianã Jesús ato yoini: “Afe keskaramakĩ Nios xanĩfãfe noko ãkinã ã mato yoinõ. <sup>21</sup> Nã kẽromã pãa fakĩ levaduraya harina osixô kamosakano faraxitiro keskara. Nãskarifiakĩ

nō ōitiroma. Yorafāfe Niospa meka āto shinā mēra naneafono nō ōiamafiaino āto ōiti fetsafakanax Nios keskara shara itirofo,” ixō Jesús ato yoini.

*Fepoti pishtaōnoa Jesús ato yoini*

*(Mt. 7.13-14, 21-23)*

<sup>22</sup> Jerusalén ano fāi kakī, Jesús pexe rasi anoafo ato yoini a pexe rasi pasotai ikafo anoafori ato yoifoni. <sup>23</sup> Ato askafaito fistichi yōkani: “Ifo, ¿fisti rasi Niospa ato ifimē?” faito Jesús kemani,

<sup>24</sup> “Pexe fepoti atsokē ikipaifikani tsoa ikitiroma. Akka ē mato yoi yora ichapakōi ikipaifikani ikitirofo. Nāskarifiai ēfe Epa ika ano ikipaifikani ikitirofoma. Nāskakē āfe meka tāpisharakāfe a mēra ikisharaxikakī. Akka yora ichapato ēfe Epa nikafikatsaxakakī, tsōa Ifofamax a ika ano ikipaifikani tsoa ikitiroma. <sup>25</sup> Nāskakē pexe ifo fininākfā āfe pexe fepoti fepotiro. Nāskakē mā pexe emāiti nīxō mā kenakī iskafatiro: ‘Ifo, noko fepoti fepexōfe,’ mā faino mato kemakī iskafatiro: ‘Ēkai mato ōimisma mākai efe yorama tiiri fakiranoax mā oa,’ ixō mato yoitiro.

<sup>26</sup> “Nāskakē mā yoikī taefakī iskafaxii: ‘Nō mefeta pita nō mefeta ayamis, askatari mī noko yoiaito nō nikamis,’ mā faxii.

<sup>27</sup> “Mā askafaino mato kemakī iskafaxii: ‘Mē mato yoi ē mato ōimisma fakiranoax mā oa. Emakinoax fotakāfe mā yora chakafo mato faxii.’ <sup>28</sup> Mato askafaino anoax mā oiayanā mā omiskōi fetsexii, Abrahamnō Isaacanō Jacobonō a Niospa meka yoimisfonō ato ōi Nios xanīfo ika anoa ato ōi. Nāskakē ato makinoa Niospa mato potaxii. <sup>29</sup> Akka yorafo nā mai ano keyokōi ikanax fetsa fetsatapafo fexikani Nios xanīfo anoxō afe tsoaxō pixikakī. <sup>30</sup> Nāskakē fetsafo iskaratīa Nios nikafikani afe rafeafoma, akka a chipo nikaifo Ifofakanax afo afe rafetirofo. Akka fetsafāfe nikakī taefafianixakakī Ifofakanamax a rama nikaifo keskarakanax afe ipaxatirofoma,” ixō Jesús ato yoini.

*Jesús Jerusalén anoafo ato shināi oiani*

*(Mt. 23.37-39)*

<sup>31</sup> Nāskata fariseofo Jesús ano fēkaxō yoinifo iskafakakī: “Nonoax katāfe Herodes mia retepai kiki,” faifono,

<sup>32</sup> Jesús ato kemani: “Fokaxō ea Herodes yoixotakāfe aato ato pāramiski. Ē fena nonoax kaimakai. Iskaratīa na yorafo sharafayanā penamari ē ato makinoa niafaka chakafo ē ato pōtaikai. A isinī ikaifori ē ato sharafapaikai. Mā ato askafakī keyota nā ē kapaiyai ari ē kaikai. <sup>33</sup> Akka iskaratīa ē yonoyoi, pena fetsari ē yonoi, akka a Niospa meka ato yoimis Jerusalén makinoax na sharama.

<sup>34</sup> “¡Ooa Jerusalén ano ikafāfe! Māfi a Niospa meka yoimisfo mā ato retemiski. Askatari aōnoa āfe meka shara yoitanōfo Niospa mato ano nīchiafori mā ato tokorinī tsakakī retemis. Oa takaranā āfe fakefo āfe pei nāmā onetiro keskafakī ē mato kexepaifiaito mā ea nikakaspamis. Māfi ekeki omismakī ē mato īkipanā. <sup>35</sup> Akka ōikapo, iskaratīa mato anā tsōa kexeima na mā imis anoa. Ē mato yoi anā mā ea ōima. Akka nā ē anā oiaitīa mā ea ōixii. Mā yoikī iskafaxii: ‘Nafi Niospa nokoki nīchia fāsi sharafinakōia Epa Niospa na shara fapanaka,’ ixō mā eōnoa yoixii,” ixō Jesús ato yoini.

## 14

*Jesús a isinī imis sharafani pōya rafe faraxita kishi raferi faraxikē*

<sup>1</sup> Nāskakē pena tenetitīa Jesús kani nā fariseo xanīfāfe āfe pexe anoxō pikai. Akka nānoxō fariseo fetsafāfe ōinifo Jesús afaa afeska faimākai nō ōinō ikaxō. <sup>2</sup> Nāskano nānori āfe ferotaifi feronāfake fisti isinī imis ini pōya rafeki faraxika ita kishi rafeki faraxika ini. <sup>3</sup> Nāskakē Jesús ato yōkani, a Moisés yoikī kirika keneni keskara ato tāpimamisfoya fariseofo: “¿Na pena tenetitīa a isinī ikaifo nō ato sharafatiromē, askayamakī nō ato sharafatiromaraka?” ixō ato yōkaito, <sup>4</sup> akka tsōa tooxanima. Nāskakē Jesús a isinī ikai

mētsoinĩfofã sharafani. Nãskaxõ yoini: “Mã mĩ sharaki, katãfe,” fani. <sup>5</sup> Nãskaxõ fariseofo Jesús ato yoini iskafaki: “Akka, ¿fatora mã fẽtsa, mãto fake iyamãĩ mãto yoinã ina kini mẽra pakeano mã koshi ifrisa fatiromamẽ pena tenetitã?” ato faino, <sup>6</sup> tsõa kemanima.

*Feronãfake ãfiyaino fista ayanã pitirofoõnoa Jesús ato yoini*

<sup>7</sup> Nãskata Jesús õini mã fẽkaxõ tsaoti sharakõĩ fikanax mĩsa ano tsaofaifãfe. Nãskaifãfe õikĩ Jesús meka fetsafaxõ ato yoini iskafakĩ: <sup>8</sup> “Akka fẽtsa fista ayanã kẽro fĩkĩ mato kenano, tsaoti sharakõĩ ano tsaoyamakãfe. Akka mato keskarama nã feronãfake shara-finakõia pexe ifãfe kenano oax nã tsaoti sharakõĩ ano tsaotiroki. <sup>9</sup> Akka pexe ifãfe fetsa fe oxõ mia yoikĩ iskafatiro: ‘Na feronãfake tsaoti inãfe,’ mia faino mĩ rãfikõiyãna kaax chikayakõĩ mĩ tsaotiro. <sup>10</sup> Akka askatamaroko mia fẽtsa kenamana kaax ori chikayakõĩ mĩ tsaoyotiro. Akka nã mia kenamanato mã oxõ mia yoinõ iskafakĩ: ‘Efe yorashta, na tsaoti sharakõĩ ano tsaoyofe,’ mia faino, nãskakẽ mĩ inimasharakõitiro yorafãfe ferotaifi a mefe mĩsa ano tsaofafãfe mia õiaifono. <sup>11</sup> Akka fatora fẽtsa ato finõpaiyaito a keskara Niospa ato nãmã nĩchitiro anã afaa inõma. Akka a shinãĩ iskai: ‘Ëkai afama, ã fetsafo finõpaima, ã ato keskarama,’ ixõ shinãito Niospa fetsafo finõmainĩfofã sharakõĩ nĩchitiro,” ixõ Jesús ato yoini.

<sup>12</sup> Ato askafata a ato pimairi Jesús yoini iskafakĩ: “Mĩ ato pimakĩ mĩ yamafoos ato pikĩyamafe, mĩ extofoosri ato pikĩyamafe, mĩ kaifoosri ato pikĩyamafe, a mia chaima nikafori kori ichapayafori ato pikĩyamafe. Akka afãferi kopikiri mia pikĩtirofo, nãskakẽ mã pimanãsharakõitiro. <sup>13</sup> Askatamaroko mĩ fista ayanã a yora afaamaisfoya a nipaikĩ ranãifo chãtofoya a fẽxofori ato pikĩfe. <sup>14</sup> Nãskakẽ mĩ ato askafaax mĩ inimakõitiro. Akka afãfe mia kopifatirofoma, akka mĩ ato askafaito Niospa mia inimamasharaxii naax mĩ anã otokẽ,” ixõ Jesús yoini.

*Meka fetsafaxõ Jesús ato yoini feronãfake mã a piã mã itipinĩsharakõĩ faxõ ato pimapaiyãõnoa yoikĩ*  
(Mt. 22.1-10)

<sup>15</sup> Ato askafaito nikakĩ fẽtsa a mĩsa ano tsaoto Jesús yoini iskafakĩ: “Ifo, ini-masharayanã Epa Nios xanĩfãfe keyokõĩ yorafo ikinãĩ anoax ato fe ikanax fãsi ini-masharakõitirofo,” ixõ yoiaito, <sup>16</sup> Jesús yoini iskafakĩ: “Feronãfake fistichi a piã sharakõĩ faxõ yora ichapa kenamani afeta pii fenõfo. <sup>17</sup> A piã mã itipinĩshara faxõ a yonoxomis nĩchini ato yoitanõ iskafakĩ: ‘Kookãfe pixikakĩ. Mã ãfe xanĩfãfe itipinĩshara faki,’ ixõ ato yoitanõ.

<sup>18</sup> “Ato askafaino, akka keyokõichi yoinifo iskafakakĩ: ‘Nõ kayotiroma,’ ixõ yoinifo. Akka a yoikĩ taefato yoini iskafakĩ: ‘Ë rama mai fiaki ã õiyotanõ. Ë mia yoikai ã mefe kayotiroமாகি,’ ixõ yoini. <sup>19</sup> Fẽtsari yoikĩ iskafani: ‘Ë rama diez faxõ fakka fiaki yonomaxii ã õiyonõ sharamakĩ. Nãskakẽ ã mefe kayoi kaimakai,’ ixõ yoini. <sup>20</sup> Fẽtsari yoikĩ iskafani: ‘Ë rama kẽro fia. Ë mefe katiroma,’ ixõ yoini.

<sup>21</sup> “Nãskakẽ a yonoxomisto oxõ nã yoiafo keskafakĩ ãfe ifo yoini, a yonoxomisto yoiaito nikai õitifishkikõini. Nãskakẽ afianã a yonoxomis yoikĩ iskafani: ‘Nã mĩ kapaiyai ari kaxõ pexe rasi pasotainoa ato ifitãfe a afaamaisfoya, a nipaikĩ ranãifo ifita fẽxofori ifita chatofori ifita ato fatãfe,’ ixõ nĩchini.

<sup>22</sup> “Mã ãfe ifãfe nĩchia katani. Okĩ yoitoshini, iskafakĩ yoini: ‘Ifo, nã mã yoia keskafakĩ mẽ ato yoitani. Akka mã fekani, mã fefiakanax mĩ pexe fospikanima,’ faito, <sup>23</sup> afianã ãfe ifãfe yoini iskafakĩ: ‘Na fãĩ kaxõ ato yoirisafafe a chaima ikafoya, nãskaxõ ato yoikĩ iskafafe: “Ëfe ifãfe pexe mẽra ikikãfe afeta pixikakĩ,” ato fafe ãfe pexe fospikõinõfo. <sup>24</sup> Akka ã mato yoi nã yorafo taefakĩ ã ato pimapaiyõa ãfe pexe anoxõ efeta pinõfo akka afãfe anã efeta pinakafoma,’ ixõ pexe ifãfe yoitiro,” ixõ Jesús ato yoini.

*Jesús Ifofai omiskōifikani isharakōitirofo*  
(Mt. 10.37-38)

<sup>25</sup> Yora ichapafāfe Jesús chīfaifono atokiri fesoakekafā ato yoini: <sup>26</sup> “Fētsa ea Ifofapaikī ea noikī finakōitiro. Āfe apanō āfe afanō āfe āfinō āfe fakefonō āfe extonō āfe chikonō ato noifikī earoko noikī finakōiama, askatari āa anoi noimei ea noisharakōitama nāskakē a keskara eōxō tāpimis itiro. <sup>27</sup> Akka ē cruznoax mato nāxoxii. Nāskakē ea tsōa yoikī iskafaima: ‘Iskaratīa ē Jesús Ifofai. Nāskakē ē nai omiskōifikī ē shināchakaima,’ ixō tsōa anori yoiaxma, nāskakē ēfe ina itirofoma.

<sup>28</sup> “Akka fatora fētsa mā pexe fapaikī ikisi mā shināyotiromamē afe tii xepa peimāki ōixiki aō pexe fakī mitoxiki. <sup>29</sup> Akka mā pexe fapaikī mā xepa pei ichapama fixō mā mitotiroma. Nāskakē nā ōiaifāfe mato kaxemetsama fatirofo.

<sup>30</sup> “Mato iskafakī yoianā: ‘Kee, ōikapo, na feronāfāke pexe fafiakī akka pexe fakī mitoama.’ <sup>31</sup> Nāskarifiakī xanīfo fētsa afe xanīfo fetsa fe retenāpaikī shinātiro a diez mil soraroyato a veinte mil soraroya retetiromakī. <sup>32</sup> Nāskakē afe retenātiroma meekī, xanīfo fetsa oyoamano meka fomatiro iskafakī yoikī: ‘Nō retenāimakai, nō raenānō,’ ixō yoitiro. <sup>33</sup> Nāskarifiakī fatora mā fetsa mato afarafo mā potayamax ēfe ina mā itiroma,” ixō Jesús ato yoini.

*Akka tashi sharakēma nō pitiroma*  
(Mt. 5.13; Mr. 9.50)

<sup>34</sup> Anā Jesús ato yoini iskafakī: “Akka shinākāpo. Tashi sharakē nō tsopeitiro. Akka tashi sharayamakē nō tsopeitiro, paispa chakakē. <sup>35</sup> Askarakai tsōa fichipaima. Potatirofo. Nāskariakakī ea Ifofayamakakī ea tsōa Ifofasharakanima chakakōi ea fakani. Akka mā pachoyakī ea nikasharakāfe,” ixō Jesús ato yoini.

## 15

*Oveja fenoaōnoa Jesús meka fetsafaxō ato yoini*  
(Mt. 18.10-14)

<sup>1</sup> Nāskakē nā xanīfo Roma kori fīxomisfo fe yora chakafo Jesúski fenifo āfe meka nikai fevani. <sup>2</sup> Nāskaifono fariseofo feta a Moisés yoikī kirika keneni keskara ato tāpimamisfāfe Jesús mekafakakī iskafakī yoinifo: “Ōikapo nato yora chakafo ifimis, askatari ato feta pimis,” ixō yoinifo.

<sup>3</sup> Askafaifono Jesús ato yoini meka fetsafaxō mā tāpixō iskafakī: <sup>4</sup> “Fatora mā fetsa cien oveja inayano fisti ato makinoax fenoano, nā noventa y nueve mā anā fasifo mēra nīchitiro. Nāskaxō nā oveja fenoa fisti mā fenatiro shināmitsakōiyanā. Nā mā fichiaitīa fetsafo kāimaxiki. <sup>5</sup> Mā fichiax āfe oveja fenoaki akiki inimakī tepapiinīfofā tepokomexō iyotiro. <sup>6</sup> Nāskax mā āfe pexe ano nokoxō āfe yamafoya a chaima nikafo yoitiro iskafakī: ‘A ēfe oveja fenoa. Mē fichiakī efe inimakāfe,’ ixō ato yoitiro. <sup>7</sup> Nāskakē ē mato yoi, nāskarifiakī inimakōikani nā nai mēra ikafo fētsa āfe chaka xatekōiano Jesús Ifofakī. Akka nā noventa y nueve yorafokiri nai mēranoax atokiri inimakani, afomāi isharakōipaonifono nono mai ano ikanax. Akka nā feronāfake chakafinakōi iyopaonixakī āfe chaka xatekōiano akiki inimaifinakōikani nai mēranoax,” ixō Jesús ato yoini.

*Meka fetsafaxō Jesús ato yoini kēromā āfe kori exe fenoa fīaoxō*

<sup>8</sup> Anā Jesús ato yoini iskafakī: “Nāskarifiakī kēro kori exe diezyaano fisti pakeano āfe pexe mēra rāpari otaxō fenakī ōisharata mātsokī fichitiro. <sup>9</sup> Nāskata mā fichixō, āfe yamafoya a chaima ikafoya ato ichanāfatiro. Nāskaxō ato yoikī iskafatiro: ‘¡Aicho! A ēfe kori exe fenoa mē fichiaki efe inimakāfe,’ ixō ato yoitiro. <sup>10</sup> Nāskarifiakī ē mato yoi. Nāskarifiakani Epa Niospa āfe ājirifo inimakani fētsa āfe chaka xateax a anā ipaoni keskara iyamaito ōikani,” ixō Jesús ato yoini.

*Meka fetsafaxō Jesús ato yoini apa āfe fake raefatiroōnoa yoikī*

<sup>11</sup> Jesús afianā ato yoini iskafakī: “Feronāfake fisti fake rafeya ini. <sup>12</sup> Akka nā chipokoto apa yoikī iskafani: ‘Epa, mā mī chaima nakī a mīa ināxiai ikisi ea ināfe,’ fani. Nāskakē āpa āfe afama mīshti ato paxkaketsaxoni.

<sup>13</sup> “Nāskano pena fetsa āfe fake chipokoto āfe afama mīshti ato ināketsani kori fixiki. Mā kori fiax chaikōi kani mai fetsa ari. Nārixō āfe kori potakī mitoni mēxotaima pākē kēro chota feromafo fe ikī. <sup>14</sup> Akka mā āfe kori potakī keyoano, nā mai anoaxri fonāikōinifo. Nāskakē nā mai anoax nā feronāfakeri chipo omiskōini afaamaisax. <sup>15</sup> Nāskakē kaxō nā mai anoa feronāfake fetsa yono yōkani yonoxopaikī, iskafakī yoini: ‘Ē mia yonoxopai,’ ixō yōkaito āfe tarepa nīchini āfe kochifo pimaxonō. <sup>16</sup> Nāskata fonāikōifikī a kochifāfe piāi maropei xaka pisharapaikōini tsōakairoko afaa pimaino.

<sup>17</sup> “Nāskakī iskafakī shināni: ‘Ēfe epa yonoxomisfāfe ēfe ēpa pexe anoxō pikī finasharakōiyanā texefamisfo. Akka ē nonoax fonāiki finakōi mē nairokomē,’ ixō shināta, <sup>18</sup> ‘Mia iskaratīa afianā ēfe ēpa pexe ari kapa. Mē kaxō iskafakī ēfe epa yoi kaikai, “Epa, ē Nios chakafata miari ē chakafamis. <sup>19</sup> Nāskakē iskaratīa ēfe fakera mīa ea fatiroma. Mia yonoxomisfo keskara mī ea fatiro,”’ ixō shināta, <sup>20</sup> āfe āpa pexe ari fāi kani. Nāskakē chai inoax oaito āfe āpa fichini shināmāi fakī. Nāskax akiki koshi farekekāi akiki nokota chishtoinīfofā kokoketsani.

<sup>21</sup> “Nāskafaito āfe fāke āfe apa yoikī iskafani: ‘Epa, ē Nios chakafata miari ē chakafamis. Nāskakē ēfe fakera mīa fatiroma,’ ixō apa yoini.

<sup>22</sup> “Apa askafaino akka āfe āpa a yonoxomis yoini ato iskafakī: ‘Koshikōi rapati fenasharakōi fīxokāfe ēfe fake ea safemaxokāfe, askatari anīcho sharari safemakāfe, askatari sandalia sharari safemakāfe,’ ato fata, <sup>23</sup> ‘Fākka fake xoakōiari ifitakāfe retexikakī nō pinō fista ayanā. <sup>24</sup> Akka na ēfe fake mā nani keskara ikatsaxakī mā anā ekeki nokoaki. Mā fenofinino mā nō anā fichiaki,’ ixō akiki inimakī fista axoni.

<sup>25</sup> “Akka āfe fake iyoato āfe tare ano yonofai okī nikaferani pexe chaima nokoiyokī mōsika maneyanā mairafono. <sup>26</sup> Nāskakē a yonoxomis fetsa kenaxō yōkani āfe āpa pexe anoxō afaa afeskafakanimākai. <sup>27</sup> Askafaito a yonoxomisto yoini: ‘Mā mī exto noko. Nāskakē āpa fakka fake xoa sharakōia ato retemana afeskaxma mī exto sharakōi nokoano,’ ixō yoini.

<sup>28</sup> “Akka āfe ochi iyoa akiki ōitifishkiki finakōini. Nāskakē pexe mēra ikinima. Nāskaino āfe apa āfe pexe mēranoax kāinākafani āfe fake yoioi mā āfe fake chipoko nokoano, ‘Mā mī exto nokoaki. Nōko pexe mēra ikikofe,’ fani. <sup>29</sup> Āpa askafaino apa kemani iskafakī: ‘Shināpo epa, ē mia yonoxomis keskaraxō, ĵafe tii xinia ē mia yonoxomismē? Ea mīa yoiaitokai ē mia nikakaspamisma, akka eakai cabranā fakeshta mīa ināmisma retexō piyanā ēfe yamafo feta ē fista apanā. <sup>30</sup> Akka mī fake mā noko nā mī kori ināni kēro chotaferomafoki potakī keyotani. Nāskafikē mī fākka fake xoashara retexona,’ faito, <sup>31</sup> āpa kemani: ‘Anifoshta, mīkai ea potamisma, mī efe itiani. Akka na ēfenāfo mīnā, keyokōi iki kiki. <sup>32</sup> Akka iskaratīa nō fista aki mī extoki inimayanā. Akka mī exto naa keskara ikatsaxakī, mā anā ekeki noko afaa afeskaxma, mā afetīama fenofinino anā oaito nō fichia,’ ixō āpa āfe fake iyoa yoini,” ixō Jesús ato yoini.

## 16

### *Meka fetsafaxō Jesús ato yoini, xanīfokōichi afe xanīfo yōaniōnoa yoikī*

<sup>1</sup> Jesús afianā aōxō tāpimisfo yoikī iskafani: “Feronāfake fetsa afama mīshti ichapayato feronāfake fetsa afe xanīfo inō yoini. Nāskaxō nikani āfe afama mīshti āfe inapa kexesharaxokēma. <sup>2</sup> Nāskakē āfe xanīfāfe kenaxō yoikī iskafani: ‘ĵAfamē a mīōnoa ea mīa yoiai? Akka a mī yonofaiōnoa ea yoife. Akka iskaratīa mī anā efe xanīfo ikima,’ ixō yoini.

<sup>3</sup> “Askafaito nikakī āfe inapa shinākōini: ‘ĵĒ afeskaimē? Iskaratīa ēfe xanīfāfe ea anā yonomanipa, mā ea potai. Ēkai afeskaxō anā yonotiroma kerexkai ē tarepanā. Nāskatari ē anā afaa yōkapaima ē rāfitiro. <sup>4</sup> ĵChoo! Mē shināi. Nā ēfe ifo nimiyāfo ē ato

xekaxopakefofāni anā ichapa niminōfoma. Ē ato askafaino āto pexe anoxō ea ifinōfo ēfe ifāfe ea potano,' ixō shināni.

<sup>5</sup> “Nāskaxō fisti rasi ato kenapakeni afe tii āfe ifo nimiafomāki ato yoixiki. Nā akiki kai taea yōkakī taefani: ‘¿Afe tii mī ēfe xanīfo nimiamē?’ ixō yōikaito, <sup>6</sup> kemani iskafakī: ‘Ē nimia xini ene cien galon,’ faito, a xanīfo fētsa yoini iskafakī: ‘Nā mī nimia potaxō nono tsaoxō fetsa arisafafe cincuenta faxō kenefe,’ fani.

<sup>7</sup> “Nāskaxō fetsari yōkani: ‘Akka mīri, ¿afe tii nimiamē?’ faito, atori yoini iskafakī: ‘Cien saco de trigo ē nimia,’ faito, ari yoini iskafakī: ‘A mī nimia potaxō fetsa arisafafe ochenta faxō kenefe,’ fani.

<sup>8</sup> “Nāskakē a āfe ina chakapa āa shināxō akai keskara āfe xanīfāfe tāpikōini. Nāskakē yoini iskafakī: ‘Mī tāpikōia, nāskakē fetsafāfe mia sharara fakani,’ ixō yoini. Nāskarifiakī a Nios Ifofaafāfema tāpikī finakōiafo ato pārakīki, āa shināxō. Akka a Nios Ifofafo askarafoma, ato pāratirofoma. Chanīma fisti yoitirofo.

<sup>9</sup> “Ē mato yoinō, mā afama mīshti ichapayaxō a afaamaisfo ato inākāfe, mā ato askafakē mato yoisharanōfo. Nāskakē mā mā naxō mā anā kori yopatiroma mā Nios ari nokoaito nā mā kori ināmisfāfe mato yoikī iskafatirofo: ‘Aicho, mī noko shara famis. Iskaratīa nono Nios ano mī nofe ipanaka,’ ixō mato yoitirofo.

<sup>10</sup> “Akka nā isharakōixō afara ichapama kexesharakōimis nō tāpitiro afara ichapa kexesharakōitirokē. Akka nā isharaxoma afara ichapama kexesharamisma nāri nō tāpitiro afara ichapa kexesharakōitirokēma. <sup>11</sup> Akka nono mai anoxō āto afarafo kexesharaya-maifono, Niospa ato afara sharakōifo ināpaifikī anā ato afaa inātiroma. <sup>12</sup> Nāskarifiakī Niospa mato afara shara ināpaifikī mato inātiroma.

<sup>13</sup> “Nāskarifiakī tsōa āfe ifo rafe yonoxosharatiroma. Akka fetsa noikaspata fetsa noisharatiro, nā yoiai keskarakōi axotiro, akka a fētsa amapaiyai keskara axotiroma noikaspatiro. Nāskarifiakī mā kori fisti shinākī mā Nios shinātiroma. Nāskatari Epa Nios fisti shinākī mā kori noitiroma,” ixō Jesús ato yoini.

<sup>14</sup> Akka nā fariseofāfe kori noikōimisfono Jesús atoōnoa yoiaito nikakani akiki kaxemet-samanifo. <sup>15</sup> Askafaifono Jesús ato yoini: “Māfi nō sharafora imiski yorafāfe ferotaifi, akka mā askafiaito Epa Niospa mato tāpikōia. Akka yorafo mā pāratiro nafo sharafoki mā ato fatiro, mā ato askafaino Niospa mā mato tāpixō mato iskafai: ‘Nafo chakakōifo,’ ixō mato yoi,” Jesús ato fani.

#### *A Moisés yoini keskara sharafiano Nios xanīfāferoko ato finōkōinīfofana*

<sup>16</sup> Anā Jesús ato yoini iskafakī: “Moisés Niosxō yoini keskafakī, a Niospa meka yoimisfāferi yoinifo keskara Juan mato yoini. Nāskakē meka shara Nios xanīfoōnoa Juan ato yoini iskafakī: ‘Māto chaka xatekāfe anā a mā ipaoni keskara iyamakāfe Nios xanīfo ari ikixakakī.’

<sup>17</sup> “Akka chanīma, maife nai koshikōi keyotiro. Akka a Moisés yoini keskakōi, Niospa meka shara keyonakama,” ixō Jesús ato yoini.

#### *Feronāfake āfe āfi fe enēnātirofoōnoa Jesús ato yoini (Mt. 19.1-12; Mr. 10.1-12)*

<sup>18</sup> Anā Jesús ato yoini iskafakī: “Akka fētsa āfe āfi enexō, fetsa fia sharama. Chakafai. Askara sharama. Askatari mā fenē enea feronāfake fētsa fīari sharama. Nāatori chakafai āfe āfimakōi fe ikī,” ixō Jesús ato yoini.

#### *Feronāfake fetsa afama mīshti ichapaya ikaino akka Lázaro afaamais ini*

<sup>19</sup> Nāskata afianā Jesús ato yoini iskafakī: “Feronāfake fetsa afama mīshti ichapaya ini, rapati sharakōi safea. Nāskaxō pena tii fista apaoni pisharakōiyanā inimakōikī. <sup>20-21</sup> Nānori feronāfake afaamais ini āfe ane Lázaro, yorafoki koyoi fetseax tsaoni a yora afama mīshti ichapayato āfe pexe feptoti ketokonō. Nā feronāfake afaamaisyato

shināni iskafakī: ‘Na feronāfake afama mīshti ichapayato a piyai ea ināpainōra,’ ixō shināni. Nāskaino paxtafo akiki kaxō āfe koyoyo faxoketsani.

<sup>22</sup> “Nāskax Lázaro nani. Mā nakē ājirifāfe āfe fero mēsho iyonifo Abraham fe ikikanō Nios xanīfo ano. Nāskatari a yora afama mīshti ichapayari nani. Nāri nakē maifanifo. <sup>23</sup> Nāskakē a yora afama mīshti ichapaya omiskōikōini chiifā mēranoax a yorafo naax fomisfo anoax. Nānoxō foisnīfōfā chai inoa Abraham yafi Lázaro fichini. <sup>24</sup> Nāskakē fāsikōi Abraham kenani iskafaki: ‘¡Epa Abraham, ea shināfe! Ea Lázaro nīchixōfe āfe mifi rechoko fāka mechanafaxō ea ana mechana faxoyonō. Nonoax ē omiskōi finakōikai na chiifā mēranoax,’ ixō yoiaito, <sup>25</sup> akka Abraham kemakī iskafani: ‘Ēfe fāke, ¿mī shināimamē nayoamax mī isharakōiyopaoni inimakōiyanā? Akka Lázaro isharakōipaonima. Omiskōipaoni. Nāskakē iskaratīa nonoax isharakōia inimasharakōiyanā, akka mī omiskōikōi. <sup>26</sup> Nāskakē afeskax mia ari tsoa katiroma, mīrikai afeskax noko ano otiroma. Na mafa kinifā mesekōi afeskaxō nō finōtiroma. Māri afeskaxō arixori finōtiroma,’ ixō yoiaito, <sup>27</sup> nā afama mīshti ichapayato anā yoini iskafakī: ‘Ē mia yoi epa Abraham mī Lázaro nīchinō ēfe ēpa pexe ano <sup>28</sup> a ēfe exto cinco ikafo ano, anoxō Niospa meka ato yoinō nikakōinōfo akairi nono feyamanōfo nonoax omiskōi fetirofoki,’ ixō yoini.

<sup>29</sup> “Askafaito Abraham yoini iskafakī: ‘Afāfēfi mā kirika kene oiafoki a Moisés feta a Niospa meka yoimisfāfe kenenifo. Nā oikaxō tāpisharakōinōfo,’ ixō yoiaito, <sup>30</sup> a afama mīshti ichapayato anā kemani iskafakī: ‘Mē tāpia, Epa Abraham, akka a yora naax otoato atoki oxō ato yoiaito nikakōitirofo,’ ixō yoiaito, <sup>31</sup> anā Abraham yoini iskafakī: ‘Akka a Moisés feta Niospa meka yoimisfāfe yoinifo keskara nikakaspakaki. Nāskarifiakī tsōa nikatiroma a yora otoato ato yoiaito,’ ixō Abraham yoinino,” Jesús ato fani.

## 17

### *Noko fētsa afara chakafamaino āfenā mesekōi itiro* (Mt. 18.6-7, 21-22; Mr. 9.42)

<sup>1</sup> Jesús aōxō tāpimisfo yoini iskafakī: “Mēxotaima a ea Ifofaafāfema yorafo afara chakafamapaimisfo. Akka fētsa fetsafo afara chakafamax omiskōifinakōixii. <sup>2</sup> Akka ato askafamayoamano, tokiriya tenexti faxō fakafā nōafā mēra potatirofo a ea rama Ifofaifo ato afaa chakafamayamanō. Nāskara shara,” ato fani.

<sup>3</sup> “Kexemesharakāfe. Fētsa mia chakafaito yoisharafe anā mia chakafanōma. Mī yoiaito nikakī iskafakī shinānō: ‘Chanīmarokomē ea yoisharakōi ē anā askanōma,’ ixō shināito raefaxō yoisharafe. <sup>4</sup> Akka anā mia chakafakī mekafaxō, ea raefafe ixō mēxotaima mia yoiri faito akiki oitifishikīma mī yoisharaxō mī raefatiro,” ixō Jesús yoini.

### *Nō chanīmara faito Niospa noko afama mīshti faxotiro*

<sup>5</sup> Nāskata a aōna yoimisfāfe Jesús yoinifo iskafakakī: “Ifo, nō mia chanīmara fai finōmainīfōfā noko yoisharafe nō mia chanīmara fakōinō,” ixō yoiaifono, <sup>6</sup> Jesús ato kemani: “Akka mā ea nikakōixō na ifi efapa mā yoikī iskafakerana: ‘Mī tapofoya tsekekainax fakafā mēra pakeax anā foaife,’ mā faino anā foaitiro.”

### *Āfe xanīfāfe yoiai keskafakī a yonoxomisto axosharakōitiro*

<sup>7</sup> Nāskaxō anā ato Jesús yoini iskafakī: “Na meka fetsari ē mato yoinō nikakakī. Fatora fetsa mā inayaxō mato inapa mato tare ano yonoxotani oaino askayamakī fakkafo kexetani oaino akka, ¿mā iskafakī yoitiro mē: ‘Pexe mēra ikikerafe tsoxō pixiki,’ mā fatiro mē? <sup>8</sup> Maa, mā askafatiroma. Askafatamaroko mā yoitiro iskafakī: ‘Ea pīchaxōfe ē pinō, mā nafakē ea yoixii ē pikī taefanō, mī chipo axiki,’ ixō mato ina mā yoitiro. <sup>9</sup> Nāskatari āfe inapa nā āfe xanīfāfe yoia keskafakī mā axosharakōiano iskafakī yoima: ‘Aicho, ea mīa axosharakōia,’ ixō yoima. <sup>10</sup> Nāskarifiakī māri a Niospa mato yoia

keskarakōi fakī iskafakī yoikāfe: ‘Nōkai afama, nōa shināxō nō afaa akima. Nōko Ifāfe noko yoia keskafakī nō aki,’ ixō yoikāfe,” Jesús ato fani.

### *Jesús diez feronāfake sharafani rashkishi fetseaito*

<sup>11</sup> Jerusalén ano fāi kakī Jesús Samāria yafi Galilea xatsokama rafe finōfaini. <sup>12</sup> Nāskax Jesús pexe rasi pasotai nokoni. Nāno mā nokoano chai ixō diez feronāfake nā rashkishi fetseañāfe ōikakī kenanifo fāsikōi. <sup>13</sup> Akka iskafakī fāsikōi yoinifo: “Jesús, Maestro, noko shināfe,” faifono, <sup>14</sup> Jesús ato ōikī ato yoini iskafakī: “A ato Nios kīfixomisfo ano fotakāfe, a mā shara ato ispaxiki,” ato faino, mā fokani koshikōi a isinī ikaifo sharai fetseñifo.

<sup>15</sup> Akka fistichi āfe yora sharakōi meekī anā akiki oxō fāsikōi yoikī iskafani: “¡Aicho, fāsi Nios sharakōi! Mā ea sharakōi faki,” ixō yoini. <sup>16</sup> Nāskafata Jesús ferotaifi ratokonō mai chachipakefofā maikiri fepopakekafā. “¡Aicho Jesús, mī ea sharafaa! ¡Mī fāsi sharakōi!” ixō yoini. Akka nā feronāfake Samāria anoa ini.

<sup>17</sup> Askafaito Jesús yoini: “¿Akka diez feronāfake ikafomamē a ē ato sharafa isinī ikaifono? ¿Akka fakimē ranāri a nueve feronāfake? <sup>18</sup> ¿Akka na feronāfake fisti efe yora yamafixō ekeki oxō Nios aicho faiyoamē?” ixō Jesús yoini. <sup>19</sup> Nāskaxō nā feronāfake yoini iskafakī: “Fininīkafāfe kātaxiki. Mī ea chanīmara fakōinax mā mī sharaki,” ixō Jesús yoini.

### *Nios xanīfāfe keyokōi yorafo īkināino afe keskara iximē*

<sup>20</sup> Nāskano fariseofāfe Jesús yōkanifo iskafakakī: “¿Afetīa nono mai anoax yorafāfe ato xanīfo iximē Nios?” ixō yōkaifono, Jesús ato kemani: “Nios xanīfāfe ato īkināino nō ōitiro. <sup>21</sup> Tsōakai yoima iskafakī: ‘Nakīa, ōikapo,’ askatari, ‘Oa onokīa, ōikapo,’ mato faima. Akka Nios xanīfo mato mēra ixō mā mato shināmani nō ōiyamafiaino,” ixō ato yoini.

<sup>22</sup> Nāskaxō āfe ināfo yoini iskafakī: “Ē samama mato makinoax kai. Mē mato makinoax kaano anā mā ea ōima. Ea ōipaifikī mā ea shinākōixii iskayanā, ‘Nōko Ifo nofe imis keskara nō ōipaikōi,’ ixō mā ea yoifikī a keskara mā anā ōima. <sup>23</sup> Akka mato fetsafāfe pārakī iskafakani: ‘Nakīa Cristo,’ mato fata, ‘Oa onokīa,’ mato faifāfe, akka ato nikayamakāfe āa mato pārakani kiki. <sup>24</sup> Akka ē nai mēranoax oi oa kana peiki fafetanaito nō ōitiro keskara, nāskarifiāi ē oaito mā ea ōixii ē chaxaferanaito. <sup>25</sup> Akka ē taei omiskōifinayoxii yorafāfe ea ōikaspaifono nā ea ōikaspaifotīa. <sup>26</sup> Akka nā Noé niyoano ini keskai nāskarifiāxii ē anā oaino. <sup>27</sup> Akka yorafo pikāta ayakāta fīanākāta ikaifono, mā Noé kanōanāfā mēra ikiano faka faipafāino, keyoi āsai mitokomenifo. Nāskarifiāxii ē oaino ea shinātama afara chaka shināifono.

<sup>28</sup> “Nāskarifiāni nā feronāfake Lot niyoano, yorafo pikāta, ayakāta, afarafo fīkāta, afarafo ato minikāta āto tarepa afarafo fanakāta pexe fakāta ikaifono, <sup>29</sup> akka Lot mā Sodoma anoax tsekeano, oa oi ikai keskara nai mēranoax atoki chiifā pakeaino keyokōi koofi mitokomenifo.

<sup>30</sup> “Nāskarifiāxii ē oaino, ea shinākātama nā ipaiyai keskara shināifono. <sup>31</sup> Nāskarifiākī ē oaino fetsa āfe pexe fomākīa tsoaxō anā āfe afara fipai āfe pexe mēra ikitiro ma āfe afara fixiki. Askatamaroko ichotiro. Nāskarifiāi a āfe tarepa yonofai anā āfe pexe ano katiroma āfe afara fixiki. <sup>32</sup> Akka nā Lot āfe āfiōnoa shinākāfe. Nā kēromā āfe afarafo shināi iflakēkafā ōipai narisatani keskai māri askatiroki. Askayamakāfe. <sup>33</sup> Akka fētsa shinākī iskafai: ‘Ē Jesús Ifofaito ea omiskōimakaniraiti,’ ixō shinākī ēfe meka kachikiri fai. Nā keskara yora naax omiskōipakenaka. Akka aa eōnoax omiskōiai naax efe ishakarōipakenaka.

<sup>34</sup> “Akka ē mato yoi, yora rafe nā fakishi mishkitiro fistichi oxakanax ē oaino fetsa efe kaino fetsa nētetiro. <sup>35</sup> Nāskarifiāi kēro rafeta xiki renekani. Fetsa ea ari kai yamarisatanaino akka fetsa nētetiro nā omiskōipakenakafo mēra kaxiki. <sup>36</sup> Nāskatari feronāfake rafeta āto tare ano yonokani, fetsa ea ari kai yamarisatanaino, fetsa nētetiro nā omiskōipakenakafo mēra kaxiki,” ixō ato yoaino, <sup>37</sup> yōkanifo iskafakakī: “Ifo, ¿faki fokanimē?” ixō yōkaifono ato kemani iskafakī: “Mā tāpitiro a afara naa ano ishpifo



fotofaifãfe. Nãskarifiaxii ã fotofaino a ea Ifofamisfo ekeki ferisaxakani,” ixõ Jesús ato yoini.

## 18

### *Meka fetsafaxõ këro ifomafaõnoa yafi xanĩfo Jesús ato yoini*

<sup>1</sup> Jesús anã ato yoini meka fetsafaxõ ato tãpimaxiki, Epa Nios mēxotaima kīfikani xokenāyamanõfo. <sup>2</sup> Ato yoikĩ iskafani: “Nã pexefã rasi anoxõ xanĩfãfe Nios shinãtama yorafori noimisma. <sup>3</sup> Nã pexefã rasi anori këro ifomafa ika ini. Nãskakẽ nã këro ifomafa mēxotaima a xanĩfoki kapaoni yoikĩ iskafaikai: ‘A ea noikaspamisto ea chakafai kiki ea yoixõfe ea anã chakafayamanõ,’ ixõ yoifiaito, <sup>4</sup> nã xanĩfãfe nikakaspayanã tooxanima. Nã këro ifomafa fekaxtefafiaino akka nãskaxõ xanĩfãfe shinãni iskakĩ: ‘Ë Nios shinãima, yorafori ã noima. <sup>5</sup> Akka na këro ifomãfa ea fekaxtefai kiki, ã yoisharaxonõ anã a chakafaito fekaxtefayamanõ, mē yoixonano anã ea fekaxtefaima kiki,’ ixõ xanĩfãfe yoini.”

<sup>6</sup> Iskafakĩ Jesús ato yoini: “A xanĩfo chakapa yoini keskara nikasharakãfe. Chakafixõ nã këro ifomafa fekaxtefaito axosharaniki. <sup>7</sup> Akka Nioskai nã xanĩfo chaka keskarama. Akka, ¿Niospari ãfe yorafo ato afara axosharatiromamē? Noko nikaikai fekaxtetiroma penachã yafi fakishchã kīfiaifono ato nikakaspatiroma. ¿Askayamakĩ, ‘Ea manayokãfe,’ ixõ ato yoitromē? <sup>8</sup> Maa. Akka ã mato yoi mã manamiskẽ koshi mato afara shara faxoxii. Akka a mato chakafamisfo ã ato omiskõimaxii. Akka, ¿efe Epa ariax anã ã nãmã fotoaitĩa ea chanĩmara faifãfe ã õitoshiximē?” ixõ Jesús ato yoini.

### *Meka fetsafaxõ fariseofoya a ato kori fiamisfo Jesús ato yoini*

<sup>9</sup> Jesús meka fetsafaxõ ato yoini ato tãpimaxiki. “Ëfi sharaki, êkai afaa chakafamisma yora fetsafokai ea keskarama,” ixõ shinãmisfoõnoa Jesús ato yoini iskafakĩ: <sup>10</sup> “Feronãfake rafe fonifo Nios kīfiti pexefã mēra anoxõ Nios kīfi fokani. Fetsa fariseo ini. Fetsari ãfe xanĩfo kori fixomis ini. <sup>11</sup> Nã fariseo arese nĩxõ kīfikĩ iskafani: ‘Epa Niosi, ã fetsafo keskarama. Akka fetsafo yometsomisfo, chakakõifo, askatari ato ãfima chotamisfo. Akka êkai nã ãfe xanĩfo kori fīxomis keskarama. Nãskakẽ ã mia aicho fai. <sup>12</sup> Na semãna tiifi ã foni tenekĩ rafefa fafãfãini mia shinãkĩ. Akka nã ã fiari ã mia paxkaxõ fafãini,’ ixõ fariseo Epa Nios kīfimi. <sup>13</sup> Akka a ãfe xanĩfo kori fīxomis ori chai nini. Nãri chai nĩxokai nai foispainima. Askatamaroko shinãmitsayanã Epa Nios yoini iskafakĩ: ‘¡Ooa! Epa Niospa, ã mia chakafamiski. Eõ noikĩ ea sharafafe ã chakakĩ,’ fani. <sup>14</sup> Ë mato yoi nã ãfe xanĩfo kori fixomis ãfe pexe ano oni mã Niospa ãfe chaka soaxonano. Akka nã fariseo ãfe chaka soaxonima. Nãskarifiari fetsa ãa anoi yoimesharai: ‘Ë sharara,’ imiskẽ chipo Niospa afaa imatiroma. Akka fetsa shinãkĩ iskafai: ‘Ëfi afarafo chakafamiski,’ ixõ shinãito nã keskara yora Niospa chaka soaxotiro afe ipaxanõ,” ixõ Jesús ato yoini.

### *Jesús fakefo chishtoxõ ato mãmãyanã ato Epa Nios kīfixopakeni (Mt. 19.13-15; Mr. 10.13-16)*

<sup>15-16</sup> Nãskatari yorafãfe ato fake mĩshti Jesúski efenifo ato mãmãpakeyanã ato Epa Nios kīfixonõ. Akka nã Jesúsxõ tãpimisfãfe ato iskafanifo: “Mãto fakefo efexõ nõko Ifo fekaxtefayamakãfe,” ato fanifo. Ato askafaifono Jesús ato yoini: “Ato enekãfe na fakefo ekeki fenõfo. Ato nētefayamakãfe. Ëfe Epa Nios xanĩfo ika ari na fakefo keskarakõifoki,” ixõ ato yoini. <sup>17</sup> “Ë mato pãraima, mã Epa Nios xanĩfo nikayamax na fakefãfe ea nikaifo keskafakĩ, Epa Nios ika ari mã katiroma,” ixõ Jesús ato yoini.

### *Feronãfake naetapa kori ichapayax Jesús fe mekani (Mt. 19.16-30; Mr. 10.17-31)*

<sup>18</sup> Xanĩfo fetsa Jesús ano oxõ yõkani iskafakĩ: “Maestro, mĩ sharaki, ea yoife ã afaa afeska fatiromãki Nios xanĩfo fe ipaxaki,” ixõ yõkaito, <sup>19</sup> Jesús kemani: “¿Afeskakĩ sharara

mĩ ea faimẽ? Akka Nios fisti shara. <sup>20</sup> A Niospa yoini keskara mã mĩ tãpia. Iskafakĩ yoini: ‘Mĩ ãfima chotayamafe; askatari yora reteyamafe; askatari yometsoyamafe; askatari chanĩyamafe mã kaxpa ato pãrayamakãfe. Nãskaxõ mãto epa yafi mãto efa nikasharakãfe,’ ” ixõ yoiaito, <sup>21</sup> nã feronãfake yoini iskafakĩ: “Nã mã yoiaino keskara mẽ nikamis naetapaxõ,” faito, <sup>22</sup> askafakĩ yoiaino nikakĩ Jesús kemani iskafakĩ: “Nãno afara fetsa fisti mĩ tãpiama. Akka mã afarafo minixõ kori fixõ nã afaamaisfo ato minife. Nãskax nai mẽranoax mã afama mĩshtifoya ixikai. Nãskafata efe koofe,” ixõ yoiaino, <sup>23</sup> akka nã feronãfake Jesús askafaito nikai, shinãchakakõi tooxinima, afama mĩshti ichapayax.

<sup>24</sup> Shinãmitsaito õikĩ Jesús ato yoini: “A yora afama mĩshti ichapaya Nios xanĩfo ano katiroma, fekax pishta. <sup>25</sup> Mãraki camello akoja kini mẽra ikipaifi ikitiro fekaxkõi efapamãiax. Nãskarari yora afama mĩshti ichapayato Nios Ifofapai fekaxkõi ãfe afama mĩshtifomã potakaspakĩ,” ixõ Jesús ato yoini.

<sup>26</sup> Ato askafaito nikakakĩ a aõxõ tãpimisfãfe tãpipainifo. “¡Kee! ¿Afeskax nõ Nios fe ipaxatiromẽ?” ikanax yoinãnifo. <sup>27</sup> Jesús ato kemani: “Akka yorafokai ãa ifimetiroma, Nios fistichi yorafo ifitiro. Niospa afama mĩshti fatiro. Tsõakai afama mĩshti fatiroma, Nios fistichi atiro,” ato faito, <sup>28</sup> Pedro yoini: “Ifo, nõ mefe okĩ nõko afama mĩshtifo nõ õiferani nõ mefe oni,” faito, <sup>29</sup> Jesús kemani iskafakĩ: “Ë mato yoikõi, fẽtsa Nios xanĩfoõxõ ato yoikakĩ ãfe pexe õifaita ãfe apa yafi ãfe afa õifaita ãfe onefetsafo õifaita ãfe ãfi õifaita ãfe fakefo õifaita ixõ, <sup>30</sup> nãato afama mĩshtifo fixii. Nãskatari mã naax Nios fe ipanaka,” ixõ Jesús ato yoini.

*Anã Jesús ato yoini: “Mã chaima ea retekanira,” ixõ  
(Mt. 20.17-19; Mr. 10.32-34)*

<sup>31</sup> Jesús aõxõ tãpimis tiis doce kenani. Nãskaxõ ato yoini iskafakĩ: “Iskaratĩa mã nõ Jerusalén ano kaikai. Nãnoax nã Niospa meka yoimismfãfe eõnoa yoikĩ kenenifo keskakõi kaikai ã. <sup>32</sup> Nãnoxõ yora fetsafo ea ato achimakani kiki. Nãfãfe ea kaxemetsama fayana ea ãchakani kiki ekeki kemo mechoketsayanã. <sup>33</sup> Ea koshaketsakata ea retekani. Akka ea askafafiaifono tres nia oxata ã otoxii,” ixõ ato yoini.

<sup>34</sup> Ato askafakĩ yoiaino tsõa tãpinima. Mã nikafikakĩ tsõa tãpisharanima, Niospa Yõshi Sharapa ato shinãmayoamano.

*Jesús yora fisti fẽxokõikẽ Jericó anoxõ sharafani  
(Mt. 20.29-34; Mr. 10.46-52)*

<sup>35</sup> Mã chaima Jesús Jericó ano nokoi kakĩ, yora fẽxo fai ketokonõ tsaokẽ fichini, anoxõ ato kori yõkaito. <sup>36</sup> Nãnoxõ nã fẽxo fai ketokonõ tsaõxõ nikakĩ yorafã rasi fofãnaifãfe ato yõkani: “¿Afaa afeskafakanimẽ?” ato faito, <sup>37</sup> yoinifo: “Jesús Nazarete anoa kafani,” fanifo. <sup>38</sup> Askafafiaifono nikai fãsikõi kenani iskai: “Jesús mĩfi David fenakĩ, ea shinãfe,” fani.

<sup>39</sup> Askafaito nã rekẽ foaifãfe iskafanifo: “Nõko Ifo fekaxtefayamafe,” fafiaifono, akka nã fãsikõi kenai iskani: “¡David fenapa, eõ noife!” faito nikai, <sup>40</sup> Jesús nẽteakekafã ato yoini iskafakĩ: “Ea ifixotakãfe oaiskai kenariai,” ato faito ifixotanifo. Mã oano Jesús yõkani iskafakĩ: <sup>41</sup> “¿Ë mia afeskafatiromẽ?” faito, nã fẽxo kemani iskafakĩ: “Ifo, ã oĩsharapai afeskaxõ ã õisharatiroma,” faito, <sup>42</sup> Jesús yoini iskafakĩ: “Ea mã chanĩmara faax mã mĩ shara. Nãskaxõ mã mĩ õisharai,” fani.

<sup>43</sup> Nãskafaino nã fẽxo õisharakõitani. Nãskax Jesús fe kakĩ, “Aicho mã ea Niospa sharafaki, Nios fãsi sharakõikĩ,” ikax afe kaino yorafãfe õikakĩ akairi, “Nios fãsi sharakõi,” ikanax akiki inimakõinifo.

1-2 Nāskano Jesús Jericó pexe rasi ano finōfaini. Akka nāno feronāfake afama mīshti ichapaya ika ini, āfe ane Zaqueo. A ato kori fixomisfāfe āfe xanīfo ini. Nāatori āfe xanīfo kori fixomis ini. <sup>3</sup> Nāato Jesús ōipaifiki ōinima, yora ichapafāfemāi nakifafono Zaqueomāi mīsto pishtamāi axō. <sup>4</sup> Nāskakē fāi rekē ichoni Jesús kaito ōixiki. Nāskata ifiya inani nā Jesús kafanai anori. <sup>5</sup> Jesús anori finōfāikī fomākīa naiskī fichixō yoini iskafaki: “Zaqueo, fotopakekafāfe. Iskaratīa mī pexe ano ē nēteyoikaikai,” faino, <sup>6</sup> koshikōi Zaqueo fotopakekafāni. Nāskakē akiki inimasharakōiyanā āfe pexe ari iyoni.

<sup>7</sup> Nāskaito ōikakī yora rasichi iskafakī yoinifo: “¡Kee, ōikapo! ¿Afeskai na yora chakapa pexe ano Jesús iki kaimē?” fanifo. <sup>8</sup> Askafafiaifono Zaqueo fininākafe Jesús yoini iskafakī: “Ifo, ōipo. Nā afaamaisfo na ēfenāfo ē ato paxkaxonikai. Nā ē atoki yometsom-isfo cuatro veces faxō ē ato ināi,” ixō yoini.

<sup>9</sup> Askafaito Jesús yoini iskafaki: “Iskaratīa mē mia chaka soaxona mī Niospa fake iki mī afe ĩpanaka,” ixō yoini. Nāskaxō nānoafo ato yoini: “Na feronāfake Abraham āfe fena. Abraham Nios nikakōipaoni keskafakī natori Nios nikakōi. <sup>10</sup> Akka ē oni ēfe Epa Nios anoax a fenoafo ato fenayanā ato ifiyoi,” ixō ato yoini.

*Meka fetsafaxō koriōnoa Jesús ato yoini  
(Mt. 25.14-30)*

<sup>11</sup> Nā yorafāfe nikanifo Jesús ato yoiato māmāi Jerusalén chaima faifokakī, “Mā Nios xanīfo chaima nokoira,” ixō shināifono. Nāskara shināifono mā tāpixon Jesús meka fetsafaxō ato yoini. <sup>12</sup> Iskafakī ato yoini: “Nāno feronāfake fetsa xanīfo keskara ini. Nā feronāfake chai kani mai fetsa ari, nāriax mā xanīfo ikax opai. <sup>13</sup> Akka kayoxoma a yonoxomisfo diez kenani. Nāskaxō ato kori ichapa ināketsayanā ato yoini iskafakī: ‘Na kōri afara ichapa mā fikāfe nā ē oaitīa,’ ixō ato yoini. <sup>14</sup> Akka yorafāfe āfe mai anoxō noikaspanifo. Nāskaxō acho yora rafe nīchinifo iskafakī ato yoitanōfo: ‘Na feronāfake nō fichipaima nōko xanīfo inō,’ ixō ato yoitanōfo.

<sup>15</sup> “Akka askafafiaifono mā xanīfo itani anā anoris oni āfe mai ano. Mā nokoxō a yonoxomisfo kenamani nā ato kori ināfaini tii, tāpixon afe tii kori fiafomākī. <sup>16</sup> Nāskano fetsa akiki oitaexō yoikī iskafani: ‘Ifo, a ea mīa kori ināfainitatima finōmainīfofā kori exe diez faxō mē mia fīxōa,’ fani. <sup>17</sup> Askafaino āfe xanīfāfe kemani: ‘Aicho, mīfi ea yonoxō sharamiski. Ē mia afaa ichapa ināyamafiano finōmainīfofā mīa fīxosharakōia. Nāskakē pexe rasi diez anoa ē mia xanīfo imai,’ ixō yoini. <sup>18</sup> Nāskatari āfe ina fetsari akiki oxō yoikī iskafani: ‘Ifo, a ea mīa kori ināfainitatima finōmainīfofā kori exe cinco faxō mē mia fīxōa,’ fani. <sup>19</sup> Nāskafaino nāri kemakī iskafani: ‘Mīri cinco pexe rasi anoa xanīfo ikikai,’ fani. <sup>20</sup> Akka a yonoxomis fetsari akiki oxō iskafakī yoini: ‘Ifo, nakīa mī kori ē mia mekexona samapa rakoxō. <sup>21</sup> Ē mikiki mesekī, mīmāi feronāfake mitsisipakōikē, mīnāyamafekē mī fimis, askatari a mī fanama anoafori mī fimis. Nāskakē ē mikiki mesekī ē mia kori mekexona, nakīa mī kori,’ ixō yoini.

<sup>22</sup> “Askafaito nikakī āfe xanīfāfe yoini iskafakī: ‘Mī ea yonoxosharamisma, mī chakakōi, askatari mī xanikōi. Mī mekaōxō ē mia omiskōimani. Mī ea iskafakē, na feronāfake mitsisipakōi āfenāyamafekē fimis, askatari a fanama anoafori fimis mī ea fakē. <sup>23</sup> Akka, ¿afeskakī banco ano mī ea kori faxōfamamē mā ēfe kori ĩchapano ea ināxikima, mē anā ēfe pexe ano ē oano?’ <sup>24</sup> Nāskata nā anoafo ato yoini iskafakī: ‘Na feronāfake kori fīakāfe nā diez faxō finōmainīfofā ea kori fīxōa ināxikakī,’ ato faito, <sup>25</sup> kemakī iskafanifo: ‘Ifo, akka nāatoroko mā diez faxō finōmainīfofā fia,’ faifono, <sup>26</sup> anā xanīfāfe ato kemani: ‘Akka ē mato yoi nā afara ichapaya nō afara ichapa inātiro. Akka a afaa ichapayama, āfe afara nō fīatiro anā afaa ichapaya inōma. <sup>27</sup> Askatari a ea noikaspakakī a ea xanīfo fakaspafo, fitakāfe ato retexikakī ēfe ferotaifi,’ ixō xanīfāfe ato yoini,” Jesús ato fani.

*Jesús nokoni Jerusalén ano  
(Mt. 21.1-11; Mr. 11.1-11; Jn. 12.12-19)*

<sup>28</sup> Nāskara ato yoita Jesús kani Jerusalén ano a aõxõ tãpimisfo fe. <sup>29</sup> Mā chaima Betfagē fe Betania ano nokoxõ machi Olivos anoxõ a aõxõ tãpimis rafe nĩchini. <sup>30</sup> Ato iskafakĩ yoivanā: “Mēstekõĩ fõtakāfe oa ono pexe rasi ano. Mā nokoxõ nãnoa burro fake nexekē mā fichi kaikai tsoa aõ nimisma. Tēpexõ ea efexotakāfe. <sup>31</sup> Anoxõ mato yõkaifono iskafakĩ: ‘¿Afeskakĩ mā burro tēpeimē?’ mato faifono ato yoikĩ iskafakāfe: ‘Nõko Ifāfe fichipaiyaito nõ ifixoniyoa,’ ato fakakĩ,” Jesús ato fani. <sup>32</sup> Ato nĩchia fõkaxõ õiafo nã Jesús ato yoia keskarakõĩ fichitoshinifo.

<sup>33</sup> Mā burro tēpeaifono, nã burro ifofāfe ato yõkanifo: “¿Afeskakĩ mā noko burro tēpekaimē?” ato faifono, <sup>34</sup> ato kemanifo iskafakakĩ: “Nõko Ifāfe fichipaiyaito nõ ifixoniyoa,” ato fanifo. <sup>35</sup> Nāskaxõ burro kateki āto rapati kakafakaxõ efenifo Jesús ano. Nāskaxõ a kamaki Jesús tsaoinĩfõfanifo. <sup>36</sup> Nāskakē Jesús tanaima kani. Akka yorafāfe āto rapatifo fai nēxpakĩa kakafafonifo. <sup>37</sup> Mā chaima machi Olivos tisiri mekani keyokõĩ a aõxõ tãpimisfāfe fāsikõĩ yoinifo iskafakakĩ inimayanā: “¡Aicho, Nios fāsi sharakõĩ! ¡Niosxõ afama mĩshti mĩ akaito nõ oia!” fanifo. <sup>38</sup> Iskafakĩ yoinifo akiki inimakakĩ: “¡Aicho, nõko xanĩfo nokoki oaki! ¡Niospa nai mēraxõ shara famafafāini! ¡Niospa yoini Jesús nõko xanĩfo inõ, aõnoax yorafo Nios fe nĩpaxanõfo! ¡Aicho, Nios fāsi finakõial!” ixõ fāsikõĩ yoinifo.

<sup>39</sup> Nāskafaifono fariseofāfe yorafā rasi mēraxõ yoinifo iskafakakĩ: “Maestro, mĩ inafõ yoife iskanõfoma,” faifono, <sup>40</sup> akka Jesús ato kemani: “Ē mato yoi nafāfe ea yoisharayamaifono, na tokirifāfe fāsikõĩ eõnoa meka shara yoikeranafo,” ixõ Jesús ato yoini.

<sup>41</sup> Mā chaima Jerusalén ano nokoax nã pexe rasi anoafõ ato õi, atoõnoax Jesús oiani. <sup>42</sup> Iskafakĩ ato yoivanā: “Ea chanĩmara faax mā isharapakenakaki. Akka mākai tãpiama iskaratĩa Niospa Fake mā nokoa. Eakai mā xanĩfo fapaima ě mato imasharapaifiatio, mā ea nikakaspai. Iskaratĩa ě mato afeskafatiroma. Mā mā fenõa. <sup>43</sup> Fatora penata mato noikaspakani nã mato noikaspaiifāfe. Nāskaxõ mato chetekaxõ mato mēra ikiferakaxõ mato retekĩ mitokani. <sup>44</sup> Māto pexefori pãoiki fetsexii, mĩ kaifofoya mato retekĩ mitoxikani tsoa pishta ichoxima, mā ea nikakaspamis Niospa ea matoki nĩchifiano,” ixõ Jesús ato yoini.

*Jesús a Nios kĩfiti pexefā mēraxõ a ato ināifo ato potani  
(Mt. 21.12-17; Mr. 11.15-19; Jn. 2.13-22)*

<sup>45</sup> Nāskata Nios kĩfiti pexefā mēra Jesús ikikaixõ õia a mēraxõ afarafo ato miniaifāfe õikĩ ato kãimani. <sup>46</sup> Naskafata ato yoini iskafakĩ: “Niospa meka yõra kenekĩ iskafani: ‘Mā ěfe kĩfiti pexefā mēraxõ mā ea kĩfitiro,’ ixõ yoifinino, akka nã yometsofāfe pexe keskara mā famis,” ixõ Jesús ato yoini.

<sup>47</sup> Nāskata Nios kĩfiti pexefā mēraxõ pena tii Jesús ato yoini. Ato yoifiaino a ato Nios kĩfixomisfāfe āto xanĩfofo feta a Moisés yoikĩ kirika kenenĩ keskara ato tãpimamisfāfe judeofāfe āto xanĩfofofāferi afeskaxoma Jesús retepaikakĩ shinānifo. <sup>48</sup> Akka afeskaxõ retetiroma inifo, yorafāfemāi nikasharapaikõiaifono a Jesús ato yoiai keskara.

## 20

*“¿Tsõa mia nĩchinimē mĩ xanĩfo inõ?” ixõ Jesús yõkanifo anoxõ achipaikakĩ  
(Mt. 21.23-27; Mr. 11.27-33)*

<sup>1</sup> Pena fetsa Nios kĩfiti pexefā mēra Jesús ikikaini anoxõ yorafo tãpimani afeskax Nios fe ĩpaxatirofomākĩ. Anoxõ ato yoianõ a ato Nios kĩfixomisfāfe āto xanĩfofo fe, a Moisés yoikĩ kirika kenenĩ keskara ato tãpimamisfo, judeofāfe āto xanĩfofori fenifo. <sup>2</sup> Iskafakĩ yõkanifo: “¿Tsõaõxõ mĩ iskafaimē? ¿Tsõa mia yoiamē mĩ iskafanõ?” ixõ yõkanifo.

<sup>3</sup> Askafaifono Jesús ato kemani: “Ēri mato yõkanõ ea yoikapo. <sup>4</sup> ¿Tsõa Juan nĩchiamē ato maotisafakĩ ato faka mēra ikimapakenõ? Niospa nĩchiyamakĩ yorafāfe nĩchiniforaka.”

<sup>5</sup> Ato askafaino āa ranā mēenāpai fetseyanā shinānifo iskakakĩ: “Nõ kemakĩ iskafaino: ‘Niospa nĩchini,’ nõ faino noko yoikĩ iskafai: ‘Akka, ¿afeskakĩ mā Juan nikamismamē?’

<sup>6</sup> Akka nõ iskafakĩ yoitiro: ‘Yorafãfe Juan nõchinifo,’ nõ fatiroma yorafãfemã tokirinĩ tsakakakĩ noko retenõfo. Akka keyokõichi shinãkani Niospa ato shinãmanaino, Juanmã Niospa shinãmanaino ato yoiaino,” ikanax yoinãnifo. <sup>7</sup> Nãskaxõ kemanifo: “Nõ tãpiama tsõara Juan nõchini ato maotisafakĩ ato faka mēra ikimapakenõ,” faifono, <sup>8</sup> akka Jesúsri ato kemani iskafakĩ: “Èri mato yoima tsõaõxõ ã iskafaimãkai,” ixõ ato yoini.

*Meka fetsafaxõ Jesús ato yoini a ato yonoxomis chakafoõnoa*  
(Mt. 21.33-44; Mr. 12.1-11)

<sup>9</sup> Nãskata taefakĩ Jesús yorafo yoini. Meka fetsafaxõ ato yoikĩ iskafani: “Feronãfake fẽtsa ãfe tare ano uva fanaxõ fẽtsafãfe kexexonõ ato inãfaini chai kayoni. <sup>10</sup> Nã ãfe fana fimimistã ifãfe a yonoxomis nõchini a kexexonafo ato yõkaxõ ãfe fana fimifo fixotanõ nã ãfenã tiiri. Akka nã fana kexeafãfe seteketsakaxõ afaamais nõchinifo. <sup>11</sup> Nãskata tare ifãfe anã a yonoxomis fetsa nõchini. Akka nãari ìchaketsayanã seteketsakaxõ afaamais nõchinifo. <sup>12</sup> Nãskaxõ afianã fetsari nõchini. Akka mã kaano nãri imi tofeketsakaxõ tarepaxõ potanifo.

<sup>13</sup> “Nãskata tare ifãfe shinãni: ‘¿È afeskafaimẽ? Èfe fakekõi a ã aõ noiai mia nõchiba, õitsai ãfe fake nikakõitirofoki,’ ixõ nõchini. <sup>14</sup> Akka mã ãfe fake nõchia kaito fichikanax nã tare kexemisfo yoinãnifo iskakani: ‘Nato ãfe apa naano na fanafo fixii kiki. A nari nõ retenõ na tare nõkonã inõ,’ ikax yoinãnifo. <sup>15</sup> Nãskakata achikaxõ tare pasotai iyokaxõ retenifo. Akka, ¿afaa mã shinãimẽ ato afeska faimẽ a tare ifãfe? È mato yoinõ. <sup>16</sup> Kaxõ a tare kexemisfo ato retekĩ mitoxõ, fetsafo ãfe tare inãxii afãfe kexexonõfo,” Jesús ato fani.

Ato askafaito nikakani iskanifo: “Askayamapainõra,” inifo.

<sup>17</sup> Akka askaifãfe õikĩ Jesús ato yoini: “Akka, ¿afeskakĩ Niospa meka iskafakĩ keneni-fomẽ?

Tokiri pexe fapaikakĩ nã pexe famisfãfe na tokiri chakara ixõ potafiafono, fetsafãfe fichikaxõ na tokiri sharakõi ikaxõ akiki pexe fatirofo, ixõ kirikaki keneniifo. <sup>18</sup> Akka tokiriki fetsa pakekĩ aõ xao teketiro. Akka tokiri yoraki pakekĩ renekõitiro.”

<sup>19</sup> Nã ato Nios kifixomisfãfe ãto xanõfofo feta a Moisés yoikĩ kirika keneni keskara ato tãpimamisfãfe Jesús achipainifo karaxa mēra ikimapaikakĩ. Atoõnoa meka fetsafaxõ yoiaino nikakakĩ akiki õitifishkikaki. Akka achipaifkã tsõa achinima yorafoki mesekakĩ.

*“¿Xanõfo nõ kori inãtiromẽ noko yõkaito?” ixõ Jesús yõkanifo*  
(Mt. 22.15-22; Mr. 12.13-17)

<sup>20</sup> Nãskakaxõ a ato feparamisfo nõchinifo Jesús fe yoinãtanõfo fanõrira Jesús ato yoiaino nikakakĩ ãto xanõfofo yoixikakĩ Jesús achinõfo. <sup>21</sup> Nãskakẽ nãfãfe yõkanifo: “Maestro, mã nõ tãpia a mã yoiai anori chanĩmakõi mã yoimis. Nã mã ato yoiai anoriri, nokori yorafãfe yoimisfo. Chanĩmakõi mã yoimis nã Niospa fichipaiyai keskarakõi. Afara yoipaikai mã ranomisma, mēstekõi mã ato yoimis. <sup>22</sup> Akka chanĩmamakĩ noko yoife na romanõ xanõfo nõ kopifatiromãki askayamakĩ nõ kopifatiroma rakikã,” ixõ yoinifo.

<sup>23</sup> Akka Jesús tãpini feparapaiyaifãfe. Nãskaxõ mã tãpixõ ato yoini, <sup>24</sup> “Ea kori exe fisti ispakãfe ã õinõ,” ato faito ispaifono ato yoini iskafakĩ: “¿Tsõa femãna na keskaramẽ? ¿Tsõa aneri na kori exe ano keneamẽ?” ixõ ato yõkaito kemanifo iskafakakĩ: “Nõko xanõfo César keskara,” faifono, <sup>25</sup> Jesús ato yoini: “Akka na kori exe Cēsarnãkẽ César inãkãfe, akka Niosnãkẽ Niosri inãkãfe.”

<sup>26</sup> Ato askafaito nikakani, rateyanã yoinãnifo: “Kee, na yoiai keskarakai tsõa finõtiroma. Tãpikĩ finakõia,” ikanax ãa ranã yoinãnifo. Nãskakẽ yorafãfe õiaifono Jesús fanõrira mekamapaifiaifono fanõrira mekatiroma ini. “Kee, finakõia,” ikanax anã tsoa tooxinima.

*“Yora naax anā otoax ¿afeskatiromē?” ixō Jesús yōkanifo  
(Mt. 22.23-33; Mr. 12.18-27)*

<sup>27</sup> Nāskata saduceofo Jesús ōifokani fonifo. Nā saduceofāfe yoimisfo iskakakī: “Yora naaxkai anā afeskax ototiro,” ixō yoimisfo. Akka nāfāfe Jesúski fōkaxō yōkanifo <sup>28</sup> iskakakī: “Maestro, noko Moisés kirika kenexoni iskakakī yoikī: ‘Feronāfake fetsa āfiyax afeta fake akamax naano one fētsa nā kēro ifomafa fitiro āfe āfi inō. Mā fixō afeta fake atiro āfe ōchi fake inō,’ ixō Moisés keneni. <sup>29</sup> Akka nō mia yoinō, nā naneti siete feronāfake inifo. Āto ochi iyoa āfiyai taeni. Mā āfiyax afeta fake akamax nani. <sup>30</sup> Mā āfe ochi naano chipokoto fini. <sup>31</sup> Nāskata nā chipoko fētsari nā kēro fini. Nāskarīfiai nāari nani afeta fake akamax. Nāskakanax akikinoax nai keyonifo nā siete feronāfake afeta fake akanamax. <sup>32</sup> Nāskata mā nai keyoafono nā kērori chipo nani. <sup>33</sup> Akka, ¿fatoto mā otokaxō na kēro fixikanimē, nā fistimāi fīpakaxō?” ixō yōkaifono, <sup>34</sup> Jesús ato kemani: “Yorafo nono mai ano niyokanax feronāfakefo fe kērofo fianāyokani. <sup>35</sup> Akka fatorafāfe Niospa meka chanīmara faafono Niospa ato imasharatiro afe ipaxanōfo. Akka nāfo mā otokanax feronāfakefo fe xotofakefo anā fīanātirofoma Nios ika ari nokokanax. <sup>36</sup> Nāskakē anā tsoa natiroma. Ājirifo keskara ixikani Niospa fakekōifori ixikani mā otokanax. <sup>37</sup> Akka Moisés nikani oa fana kooai xoisai keskara mēranoax mekaito, yoikī iskaifaito: ‘Mā nafianixakakī mā anā otoafō, ēfi Abraham ikaino Isaaca ikaino, Jacobo ikaino, ē āto Nioskōiki. Iskaratīa efe niafo,’ ixō yoiaito Moisés nikani. Nāskakē nō tāpitiro naax nō anā ototiro. <sup>38</sup> Akka Epa Niospa naafoma keskara ato ōi Epa Niosnoax keyokōi niafo,” ixō Jesús ato yoini.

<sup>39</sup> Nā Moisés yoikī kirika keneni keskara ato tāpimamisfāfe ranārīto iskakakī yoinifo: “Maestro, mī ato yoisharakōi,” fanifo. <sup>40</sup> Nāskakē anā tsoa yōkapainima, atomāi kemasharakōiaito akiki rāfikakī.

*“Akka, ¿tsōa fenamē Cristo?” ixō Jesús ato yōkani  
(Mt. 22.41-46; Mr. 12.35-37)*

<sup>41</sup> Nāskata Jesús ato yōkani: “Akka, ¿afeskakī Cristo David āfe fenara mā faimē? <sup>42</sup> Nā David Niospa Yōshi Sharapa shināmanaino fanāiti kirika keneni iskaifaki:

Epa Niospa ēfe Ifo yoini iskaifakī: ‘Mī efe xanīfokōi īpanakaki. <sup>43</sup> Akka nā mia noikaspaifo mī ato finōkōinō ē ato mī nāmā nīchikai,’ ixō yoini. <sup>44</sup> Akka, ¿afeskai Cristo David āfe fena itiomē, nā David Cristo ēfe Ifora fafiapaonino?” ixō Jesús ato yoini.

*Jesús ato yōani a Moisés yoikī kirika keneni keskara ato tāpimamisfāfe anorima ato yoiaifono*

*(Mt. 23.1-36; Mr. 12.38-40; Lc. 11.37-54)*

<sup>45</sup> Keyokōichi yorafāfe nikaifono Jesús aōxō tāpimisfo yoini, <sup>46</sup> “Ōisharakakī. A Moisés yoikī kirika keneni keskara ato tāpimamisfāfe mato pārāpaikani kiki. Akka nāfo rapati chainipa safekanax fofāsapaimisfo. ‘Noko yoisharakōinōfora,’ ikanax tsaoti sharakōi fenamisfo īchanāti peixe anoxō, a piaifo anori sharakōi ano tsaopaimisfo, ‘Noko ōisharanōfora,’ ikanax. <sup>47</sup> Nāskakaxō kēro ifomafa peixe fīamisfo. Nāskatari Epa Nios chaikōi kīfimisfo, ‘Noko nikanōfora,’ ikaxō. Akka nāfo chanīmifono Epa Niospa ato omiskōimakī finakōixii,” ixō Jesús ato yoini.

## 21

*Kēro ifomafa afaamaisfixō Epa Nios ināsharakōini  
(Mr. 12.41-44)*

<sup>1</sup> Jesús ōini a kori ichapayafāfe kori naneti mēra kori naneaifāfe Nios kīfīti pexefā mēraxō. <sup>2</sup> Nāskatari ōini a kēro ifomafa afaamaisfixō āfe kori exe rafe kori naneti mēra āfe kori nanekī mitofaito. <sup>3</sup> Nāskata ato yoikī iskaifani: “Chanīma ē mato yoikōi, na kēro

ifomāfa afaamaisfixō ato finōmainĩfofā inākōia. <sup>4</sup> Akka na kori ichapayafāfe mā Nios ināfikakī tsōa keyo ināma, texe faafo. Akka na kēromā omiskōifikī āfe kori rafe potakī mitokōia. Anā afanā a paii fitiroma,” ixō Jesús ato yoini.

*Jesús ato yoini na Nios kīfiti pexefā pāoixii ixō*  
(Mt. 24.1-2; Mr. 13.1-2)

<sup>5</sup> Nāskata a afe rafea fetsafāfe Nios kīfiti pexefāōnoa yoinifo iskafakakī: “Nōko Nios kīfiti pexefā sharafinakōia. Tokiri petsanāmeax nā kori ichapayafāfe afara sharafofikaxō nētakeafo,” ikaxō yoiaifono, Jesús ato yoini: <sup>6</sup> “Akka na mā ōiai anākai tokiri petsanāmexima, keyokōi pāoixii. Na tokirifori maoui fetsexii,” ixō Jesús ato yoini.

*Afaa afeskaximākai mā chaima nōko mai keyoaino Jesús ato yoini*  
(Mt. 24.3-28; Mr. 13.3-23)

<sup>7</sup> Nāskakē yōkanifo iskafakī: “Maestro, ¿na mī yoiai keskai afetīa iximē? ¿Afeskakō nō tāpitiromē na ixiai keskara?” ixō yōkanifo.

<sup>8</sup> Askafaifono Jesús ato kemani: “Kexemesharakani mā ato nikaino mato afara chakafamatirofoki. ‘Ēfi Cristokī. Mē oa mātō xanīfo ixiki,’ ixō mato pārapaikani kiki. Nāskakaxō afāfe yoikani kiki a ē yoimis keskara. Akka yoiaifāfe ato nikayamakāfe. <sup>9</sup> Akka yorafo retenāifāfe nikai rateyamakāfe. Askatari a fetsafāfe āto xanīfofori potapaiyāifāfe nikairi rateyamakāfe. Nā ē mato yoimis keskakōiyoxii kiki. Nāskafīax nōko mai fena keyoxima, chipo ixii.

<sup>10</sup> “Akka yorafo mai fetsa anoax mēenāpaiyāifono, yora fetsafori mai fetsa anoax retenāixikani. <sup>11</sup> Nāskaifono nā mai fetsa anoafō mai naya naya ixii. Askatari fonāiki finakōixikani, afaa pikanima. Askatari pae finakōia ixii nā mai fetsa anofo. Askatari nā nai mēranoafori a ōimismafo ōixikani. Ratekōixikani.

<sup>12</sup> “Akka askayoamano, mato achikaxō fāsi mato omiskōimaxikani. Mato achikaxō judeofāfe āto ichanāti peze mēra mato iyokani xanīfofofāfe mato yōkanōfo. Nāskakaxō mato karaxa mēra ikimakani xanīfofofāfe. Eōxō mato askafakani. <sup>13</sup> Mato askafaifono mā eōnoa ato yoitiro. <sup>14</sup> Akka kayoxoma shināchakayamakāfe. Ē mato shināmanikai mā ato yoisharanō. Afaa nō ato faimē iyamakāfe. <sup>15</sup> Akka ē mato ato kemamasharaikai fanīrira mato mekaifaifono mā ato kemasharanō. Nāskakē nā mato noikaspāifāfe mato kemakanima, fanīrira mā noko yoi tsōa mato faima. <sup>16</sup> Akka mātō epafāfe mātō efafo feta mato ato achimaxikani. Mātō ochifāfe, mātō kaifofofāfe mato fe rafemisfāferi mato askafaxikani. Akka ranāri mato retekikani. <sup>17</sup> Akka eōxō yorafāfe keyokōichi mato noikaspaxikani. <sup>18</sup> Akka mato noikaspāifaifono Epa Niospa mato kexesharai mato retēfiaifonokai mātō fero mēsho fenonakama. <sup>19</sup> Akka afara afeskara ifiaino ea shināmakiyamakāfe. Nāskax mā efe isharapakenakaki.

<sup>20</sup> “Jerusalén anoafō sorarofāfe ato cheteafono mā ōikī mā tāpitiro mā chaima ato reteafono, āto pexefori pāo iki keyoi. <sup>21</sup> Nāskakē a Judea ano ikafo māchi keya ari ichotanōfo. A Jerusalén ano ikafori nā pexefā rasi mēranoax tsekenōfo. A Jerusalén pasotai ikafori anā Jerusalén ano feyamanōfo. <sup>22</sup> Nā Niospa meka yoikī kenenifo keskakōi fakī Jerusalén anoafō Niospa ato omiskōimani. <sup>23</sup> Askatari a kēro fake naneafo fe a fake yome pishta chocho amaifo omiskōixikani māmāi yorafo omiskōifinakōiaifono. Nāskakē nā Judea mai anoafō omiskōifinakōixikani, Niospa ato omiskōimanaino. <sup>24</sup> Ranāri ato kenopa retekani. Akka ranāri ato achikaxō karaxa mēra ato ikimakani mai fetsafo ano. Ato askafaifono nā judeofoma Jerusalén ano iyokani. Akka nā Niospa ato omapaiyāitīa judeofo Jerusalén ano anā fexikani,” ixō Jesús ato yoini.

*Niospa Fake fotoaino afe keskara iximākai ixō Jesús ato yoini*  
(Mt. 24.29-35, 42-44; Mr. 13.24-37)

<sup>25</sup> Anā Jesús ato yoini iskafakī: “Nāskakē xini fe oxe fishifori a nō ōimis keskara anā iki fetseima. Fetsa keskara iki fetsei. Askaito ōikani nono mai anoafō ratekōixikani.

Fākafāri poo iki meseniaito nikakani. Ratekōixikani nōkai iskara afaa ōimisma ikanax. <sup>26</sup> Nāskaito ōikani yorafo ratekani shinā fenoyotaxikani. Afarafo afeskaraito ōikani a ōiyomisfoma keskara ōikani. <sup>27</sup> Nāskatari ea ōixikani ē nai mēranoax nai kōinī ē fotoiyoaite. Shara finakōia ē fotoaito ea ōixikani. <sup>28</sup> Nāskakē nā ē mato yoiai keskai taei afarafo afeskaraino, inimayanā ea manasharakāfe, ea chanīmara fayanā. Mē chaima okī ē mato ifirisa fatanō,” ixō ato yoini Jesús.

<sup>29</sup> Nāskaxō anā meka fetsafaxō ato yoini iskafakī: “Akka shinākāpo yōkka fiyafi ifi fetsaōnoa. <sup>30</sup> Āfe pei siri ikaito ōikī mā tāpitiro māmāi chaima xiniaito. <sup>31</sup> Nāskarifiakī mā tāpitiro nā ē mato yoimis keskara afarafo afeskaraito ōikī mā chaima Nios Xanīfo oi kiki xanīfo ikiyoi nono nāmānoax.

<sup>32</sup> “Akka ē mato pāraima. Na afarafo ē mato yoiai keskaito na yorafāfe nayokaxoma ōiyokani. <sup>33</sup> Akka nai fe mai keyoi. Akka ēfe meka fisti keyonakama na ē mato yoiai keskakōi.

<sup>34-35</sup> “Nāskakē kexemesharakāfe mātō ōitinī afaa chaka shinākakīma. A mā pāepaiyai fisti shināyamakāfe. Afaa fetsafori shināyamakāfe. Anori shinākī a ikaifo keskakī mā ea chanīmara fatiromaki. Akka afo itipinīsharafomano ē nokorisataxi. Māraki poomānā tanasharaxma tarapa faafo mēra ikiyamatiro. Māri nāskatiro ea shināxma. Nāskata afarafo afeskara iki fetseaino nā mai tio anoax omiskōi fetsexikani. <sup>36</sup> Nāskakē itipinīsharakāfe, Epa Nios mēxotaima kīfifafāikāfe afara afeskaraino omiskōixikakima. Nāskax mā ekeki chipo nokoaino ē matoki inimaxikai,” ixō Jesús ato yoini.

<sup>37</sup> Nāskata Jesús pena tii Nios kīfiti pexefā mēraxō ato yoini. Akka fakish tii machi āfe ane Olivos ano oxatai apaoni. <sup>38</sup> Nāskakē yorafā rasi pena tii akiki fepaonifo Nios kīfiti pexefā ano. Anoxō ato yoiaito nikai fekani.

## 22

*“¿Afeskaxō nō Jesús retetiromē?” ixō shinānifo  
(Mt. 26.1-5, 14-16; Mr. 14.1-2, 10-11; Jn. 11.45-53)*

<sup>1</sup> Mā chaima fista ikaino a Niospa ājirinī Egipto anoxō āto fake iyoafo retenima shinākakī pāa faraxatimais pipaonifo, Pascua fistatīa. <sup>2</sup> Afia penata a ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe afeskaxoma Jesús pāraxō retepaikani yorafoki ratenifo.

<sup>3</sup> Nāskaifono Judas mēra Satanás ikini. Nā Judasri Jesús āfe ina ini. Āfe ane fetsa Iscariote ini. <sup>4</sup> Nā Judas kani a ato Nios kīfixomis xanīfofo yafi a anoxō Nios kīfiti pexefā kexemisfo xanīfofo yoikai. Anoxō ato yoini iskafakī: “¿Afeskaxō ē mato Jesús achimatiromē?” ixō ato yōkani. <sup>5</sup> Akiki inimayanā yoikī iskafanifo: “Aicho, nō mia kori ināi mī noko ato Jesús achimaxonō,” ixō Judas yoiaifono, <sup>6</sup> “Ia. Ē mato achixonō,” ixō ato yoini. Nāskaxō Judaspa shināni afetīa ē ato Jesús achixotiromē ini. Yorafā rasichimāi naki faafono afeskaxō achitiroma ini.

*Mā chaima reteaifono Jesús aōxō tāpimisfo feta yātapake pini  
(Mt. 26.17-29; Mr. 14.12-25; Jn. 13.21-30; 1 Co. 11.23-26)*

<sup>7</sup> Akka nā fista Pascuatīa pāa faraxatimais pinifo. Afia penatari oveja fake retexō Nios ināpaonifo āto xinifāfe anifo keskafakī. Akka mā fista pakeano, <sup>8</sup> Jesús Pedro yafi Juan nīchini ato yoikī iskafayanā: “Fokaxō itipinīsharafatakāfe fistatīa nō pinō,” ato faito, <sup>9</sup> kemanifo: “¿Fanīxō nō itipinīsharafaikaimē?” faifono, <sup>10</sup> Jesús ato kemani: “Mā mā pexefā rasi ano nokoxō feronāfake fisti mā fichi kaikai keshoki faka tetsaomexō foikaino. Nā chīfafaitakāfe fato pexe mēra ikikaimākai ōixikakī. <sup>11</sup> Nānoxō nā pexe ifo yoikī iskafaxikakī: ‘Nōko Ifāfe noko yoikī iskafakī: ‘Fato pexe kene mēraxō eōxō tāpimisfo feta fistatīa ē pitiromāki ixō yōkatakāfe nōko Ifāfe noko faa,’ mā faito, <sup>12</sup> nāato mato ispai kiki



pexe keya kene efaapaya itipinīsharakōia. Nāno itipinīsharafakāfe anoxō nō pinō,' ” Jesús ato fani.

<sup>13</sup> Nāskata mā fokaxō fichinifo nā Jesús ato yoia keskarakōi. Nāskaxō itipinī fanifo Pascua fistatīa pixikakī.

<sup>14</sup> Mā itipinīshara faafono, Jesús a aōxō tāpimisfo fe kaax, mīsa ano tsaoni. <sup>15</sup> Nāskaxō tsaofono Jesús ato yoini: “Ē mato feta pipaitiani na fista Pascuatīa ē nayoxoma. <sup>16</sup> Akka ē mato yoikōi ēkai anā mato feta Pascua fistatīa pifainakama. Akka nā mā Epa Nios xanīfo ano nokoaitīa ē mato feta pixii inimayanā.”

<sup>17</sup> Nāskata kecho tsomainīfofā Apa Nios kīfikī, “Aicho,” fata, ato yoikī iskafani: “Na mato tiito ayakāfe. <sup>18</sup> Ē mato yoikōi ē anā mato feta na fimi ene ayaima. Akka nā ēfe Epa Nios fe ē xanīfo ixō keyokōi ē yorafo ikixō na fimi exe ē anā ato feta yaxii,” ixō ato yoini.

<sup>19</sup> Nāskaxō anā pāa tsomainīfofā, Apa Nios kīfikī aicho fata, ato pāa kaxkexopakeyanā ato yoikī iskafani: “Nafi efe nami keskaraki. Matoōnoax ē nai. Nāskakē nā mā piatīa ea shināfafāikāfe,” ixō ato yoini.

<sup>20</sup> Nāskarifiakī kecho tsomainīfofā nā pixō ato yoini iskafakī: “Na ayatiōxō ē mato afara fenashara yoi iskafakī: Ēfe imi foaino ē matoōnoax nai mā ēfe Epa Nios fe ĩpaxanō.”

<sup>21</sup> “Akka nā efe mīsa ano tsoa fētsa ea ato achimani. <sup>22</sup> Akka nā eōnoa yoikī kirika kenenifo keskakōi ē naikai. Akka nā ea ato achimanai akairi omiskōi finakōi,” ixō Jesús ato yoini.

<sup>23</sup> Ato askafaito nikakani āa ranā yoināi fetsenifo: “¿Fatotokai nō achimanimē?” ikanax āa ranā yoinānifo.

### *Akka, ¿tsoa sharafinakōiamē?*

<sup>24</sup> Nāskakē aōxō tāpimisfo feratenānifo fatokai sharafinakōiamē ikanax. <sup>25</sup> Nāskaifono Jesús ato yoini iskafakī: “Nā yora fetsafo xanīfokaxō ato ferateyanā ato yonomamisfo. Ato askafafiakakī nōko xanīfo noko afara shara faxō fafāini ixō nokoōnoa yoikāfe, ato famisfo.

<sup>26</sup> “Akka māri askayamakāfe. Askatamaroko nā sharafinakōia mātō exto chipoko keskara ikāfe. Nā chipokofāfe āto iyoafo ato yonoxosharatirofo keskara ikāfe. Akka xanīfo ipaikakī fetsafo sharafakāfe ato axosharaxikakī. <sup>27</sup> Akka, ¿fatokaimē sharafinakōia, nā mīsa ano tsoaxō pimistraka, askayamai nā ato pimamistraka? Akka nā mīsa ano tsoaxō piai nā sharafinakōia. Akka ē mato fe ixō ē mato yonoxomis keskara ē imis.

<sup>28</sup> “Akka mā efe itiani mā ea potamisma, na afara chakafāfe ea chakafafiaino. <sup>29</sup> Nāskakē ēri mato xanīfo imaxii, ēfe Epa Niospa eari xanīfo imaino. <sup>30</sup> Akka mā efeta pita efeta ayata mā faxii ēfe mīsa ano tsoaxō. Nāskakē mā mā xanīfoxō nā doce nōko kaifo israelifāfe mā ato ikixii,” ixō Jesús a afe rafeafo yoini.

### *“Ē Jesús ōimisma, Pedro ixaino,” Jesús ato yoini (Mt. 26.31-35; Mr. 14.27-31; Jn. 13.36-38)*

<sup>31</sup> Nāskata nōko Ifāfe Simón yoini iskafakī: “Simón, ōipo Satanás Nios yōkaxō mato afara chakafamapai, mā ea potanō. <sup>32</sup> Akka ē mia Epa Nios kīfixoni mī ea nikakī xateyamanō. Akka mā mī paxkafixō mī ea anā Ifofakōixō a mefeta ea Ifofaafō ato yoisharafe ea Ifosharafanōfo,” ixō yoiato, <sup>33</sup> Simón kemani: “Īfo, ē mia potanakama. Mia karaxa mēra ikimanaifono ēri mefe kai. Mia reteaifonori ēri mefe nai,” faito, <sup>34</sup> Jesús kemani: “Pedro, ē mia yoi iskaratīa takara fene keoyoamano mī ato yoi iskai: ‘Ē Jesús ōimisma,’ ixō mī ato yoikī tres fai,” Jesús fani.

### *“Mē samamashta omiskōikai,” Jesús ato fani*

<sup>35</sup> Nāskafata Jesús anā ato yoini iskafakī: “Ē mato nīchiyamea pishamais koriri mā foyameama, sapatori mā fotima. Akka ē mato nīchia kaxō ¿mā afaa yopatimē?” ato faito kemakakī iskafanifo: “Maa. Nōkai afaa yopatima,” fanifo.

<sup>36</sup> Nāskata ato yoini iskafakī: “Akka iskaratīa nā pishayato āfe pisha foikanō, āfe koriyafi. Akka nā keno yamato āfe rapati minixō kori fixō, nā kōri keno fetsa finō. <sup>37</sup> Akka ē mato yoi nā eōnoa yoikī kirika kenenifo keskai mē askakōi. Ē askarayamafiano ea pārakani yora chakafāfe, ‘Nato ato chakafamis,’ ea fakani. Nāskakē nā eōnoa yoikī kirika kenenifo keskara nē askakōi,” ixō ato yoiato, <sup>38</sup> a aōxō tāpimisfāfe yoinifo: “Ifo, nono keno rafe,” faifono, ato kemani: “Nā rafe inōkī anā nō yopaimakai. Nāskanō,” ixō ato yoini Jesús.

*Getsemani anoxō Jesús Apa Nios kīfini*  
(Mt. 26.36-46; Mr. 14.32-42)

<sup>39</sup> Nāskata Jesús kani nā kamis keskai machi Olivos ano. Aōxō tāpimisfori afe fonifo. <sup>40</sup> A kamis ano mā nokoxō ato yoini: “Epa Nios kīfikāfe Satanás mato afara chakafamapaiyai keskara axikakīma,” ixō ato yoini.

<sup>41</sup> Ato askafata ato makinoax orishta kaxō Apa kīfini ratokonō mai chachipakefofā. <sup>42</sup> Apa kīfikī iskafani: “Epa, ea ifipaikī ea ifife ē omiskōinōma. Akka nā ē apaiyai keskafakīma, nā mī ea amapaiyai keskafafe,” Apa faino, <sup>43</sup> āfe ājiri nai mēranoax akiki nokorisatani mitsisipakōi imaxiki. <sup>44</sup> Shināmitsai finakōiyanā, Jesús Apa kīfini nā omiskōiai shināyanā. Nāskaino āfe nīskaya āfe imi mai ano tosini.

<sup>45</sup> Mā Apa kīfita fininākfāta, aōxō tāpimisfo ari kani. Kaxō ōia oxafo inifo shināmitsai finakōikani āto Ifo omiskōiaino. <sup>46</sup> Nāskaxō ato yoini: “¿Afeskai mā oxaimē? Fininīfofākāfe Epa kīfixikakī Satanás chakata mato afaa chakafamayamanō,” ato fani.

*Jesús achinifo*  
(Mt. 26.47-56; Mr. 14.43-50; Jn. 18.2-11)

<sup>47</sup> Jesús ato yoiaino yorafā rasi nokotoshinifo. Nā āfe ane Judas, nāri Jesúsxō tāpimis iyopaoni, nā Judas rekē oaino acho yorafā rasi fenifo. Nā Judas Jesús ari kani kokoikai.

<sup>48</sup> Askafaito Jesús yoini iskafakī: “¿Judas, ea mīa kokoxō mī ea ato achimanimē?” fani.

<sup>49</sup> Askafaito ōikakī a aōxō tāpimisfāfe Jesús yōkanifo: “¿Ifo, nō ato kenopa rerapake-tiromē?” ixō yōkanifo.

<sup>50</sup> Nāskata fētsa nā ato Nios kīfixomisto āfe xanīfāfe ina āfe pacho kayakai aōri paxteni. <sup>51</sup> Askafaito ōikī Jesús yoini iskafakī: “Enefe. Nāskanō,” fata afianā koshikōi xanīfāfe āfe ina āfe pacho ramākaxō pacho tichixotani. <sup>52</sup> Nāskaxō ato yoini a Nios kīfixomis xanīfofo yafi a Nios kīfiti pexefā kexemis xanīfofo, nā anifo tiiri mā ifi feafono ato yōkani: “¿Afeskai kenofoya ifixatefoya mā oamē ea achiyoi oa ē yometso keskarakē? <sup>53</sup> Pena tii ē mato fe itiani Nios kīfiti pexefā mēraxō ē mato tāpimani, akka mākai ea achipaimisma. Akka na fakishi mā ekekī oa Satanás māto ifono,” Jesús ato fani.

*“Ē Jesús ōimisma,” Pedro ini*  
(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Jesús achixō iyonifo a ato Nios kīfixomis xanīfāfe pexe ano. Akka Pedro acho chipo kani. <sup>55</sup> Akka pexe emāiti chii ketefaax tsoax yoaifono Pedrori nāno ato fe tsoax yooni.

<sup>56</sup> Nāno ato fe tsoax yooaino xanīfo yonoxomis xomayato fichixō yoini iskafakī: “A nari Jesús fe imiski,” faito,

<sup>57</sup> Akka Pedro iskani: “Ēkai Jesús ōimisma. Mī ea pārai,” faito, <sup>58</sup> fētsari tāpixō yoini iskafakī: “Mīfi na Jesús fe imiski,” faito, Pedro kemani: “Maa. Ēkai Jesús fe imisma,” fani.

<sup>59</sup> Mā askafafo samaraka pishtano, fetsari anā iskafani: “Chanīma, a nafi Jesús fe imiski. A na feronāfake Galilea anoa,” faito, <sup>60</sup> Pedro yoini iskafakī: “A mī yoiāiōnoa ē tāpiama tsoaraōnoa mī yoi ē tāpiama,” Pedro faino takara keoinākfāni.

<sup>61</sup> Pedro askaito Jesús texkeakekafā festani. Festanaino Pedro shinātani nā āfe Ifāfe yoiā keskara. “A takara keoyoamano, ‘Ē Jesús ōimismara,’ ixō mī ato yoi tres fakī,”

Jesús faa nã Pedro shinãtani. <sup>62</sup> Nãskakẽ nãnoax tsekekaini kaax Pedro shinãmitsai oiiai finakõini.

*Jesús kaxemetsama fanifo*  
(Mt. 26.67-68; Mr. 14.65)

<sup>63</sup> Nãskakẽ nã kexeafãfe Jesús kaxemetsama fanifo koshaketsayanã. <sup>64</sup> Nãskata feopokaxõ yõkanifo: “Noko yoife tsõa mia koshamakĩ.”

<sup>65</sup> Nãskakata ìchaketsanifo afara fetsa yõkaketsayanã.

*Xanifo tiito Jesús yõkanifo*  
(Mt. 26.59-66; Mr. 14.55-64; Jn. 18.19-24)

<sup>66</sup> Mã penano a judeofãfe ãto xanifofo ichanãnifo. Nã ato Nios kifixomisfãfe ãto xanifofofõ, a Moisés yoikĩ kirika keneni keskara ato tãpimamisfori ato fe ichanãnifo. Nãskakaxõ Jesús iyonifo xanifo finakõia ano. Nãrixõ yõkanifo iskafakakĩ: <sup>67</sup> “Noko yoife mĩmãkĩ Cristo.”

Askafaifono ato Jesús kemani: “Èje, ã mato faitokai mã ea chanĩmara faima. <sup>68</sup> Èri mato yõkaito mã ea kemaima. <sup>69</sup> Akka iskaratĩa ãfe Epa Nios ketaxamei ã tsaosharakõi. Nãmãi fasi finakõikẽ afama mĩshti atiro,” ixõ ato yoiaito, <sup>70</sup> keyokõichi yõkanifo: “Akka, ¿mĩmẽ Niospa Fake?” ixõ yõkaifono Jesús ato kemani: “Nã mã yoiai keskarakĩa ã,” ato fani.

<sup>71</sup> Ato askafaito nikakakĩ anã yoinifo iskafakakĩ: “¿Nikakapo! Nõkai anã aõnoa meka fetsa nõ nikapaima. Mã nõakõi nõ nika noko yoiaito,” ikanax yoinãnifo.

## 23

*Pilato ano Jesús iyonifo*  
(Mt. 27.1-2, 11-14; Mr. 15.1-5; Jn. 18.28-38)

<sup>1</sup> Nãskakata keyokõi fininĩfofãkãta Jesús iyonifo Pilato xanifo finakõia ano. <sup>2</sup> Nãskakata judeofãfe Jesús chakafakakĩ yõanifo iskafakakĩ: “Na feronãfãke nõko kaifofo ato chakafamai iskafakĩ yoikĩ: ‘Na romanõ xanĩfokõichi mato kori yõkaito inãyamakãfe,’ ato faa. Nãskatari, ‘Èkĩa Cristo, ea Niospa nĩchia ã mãto xanifo inõ. ã Niospa Fake,’ noko faa,” ixõ Pilato yoinifo.

<sup>3</sup> Askafaifono Pilato yõkani: “¿Mĩmẽ judeofãfe xanifo?” ixõ yõkaito Jesús kemani: “Èje, nã mĩ ea yoiai keskarakĩa,” fani.

<sup>4</sup> Nãskafaino Pilato nã ato Nios kifixomis xanifofo yafi nã ano niafo yoini iskafakĩ: “Na feronãfãkekai afaa chakafaa ã õima,” ato fani.

<sup>5</sup> Ato askafaito fãsikõi mekainĩfofã yoinifo iskafakakĩ: “Na feronãfãke ato tãpimayanã pexefo tii anoa ato chakafakĩ mekafamafõsafai. Galilea anoxõ ato taefamati, iskaratĩa nono Judea anoxori ato askafamai,” ixõ yoinifo.

*Jesús Herodes ano iyonifo*

<sup>6</sup> Askafaifãfe nikakĩ Pilato ato yoini: “¿Chanĩmamẽ na feronãfake Galilea anoamẽ?” ato faino, <sup>7</sup> “Èje, nãnoa,” fanifo. Nãskaxõ xanifo Herodes ano nĩchini, nã Herodesmãi Galilea anoax xanĩfokẽ. Nãskafaifono Herodes Jerusalén ano oni. <sup>8</sup> Jesús õi Herodes inimakõini, mẽxotaimamãi õipaikatsaxakĩ, aõnoa yoiaifãfe nikakatsaxakĩ afama mĩshti faito õipaikĩ. <sup>9</sup> Nãskaxõ afama mĩshtifo yõkaketsani. Akka Jesúskai pishta kemanima. <sup>10</sup> Nãskano nãnori inifo, a ato Nios kifixomisfãfe ãto xanifofo fe a Moisés yoikĩ kirika keneni keskara ato tãpimamisfo, nãfãfe Jesús mekafakĩ chakafanifo. <sup>11</sup> Nãskakẽ Herodes ãfe sorarofõ feta chakakõifayanã kaxemetsama fanifo. Nãskakaxõ rapati nana safemanifo nã rapati xanifonã. Nãskaxõ Herodes anã Pilato ano Jesús nĩchini. <sup>12</sup> Nãskatari Pilato fe Herodes rafe fatanãnifo. Akka taeyoi chakafatanãyopaonifo.

*Pilato ato yoini Jesús retenõfo*  
(Mt. 27.15-26; Mr. 15.6-15; Jn. 18.39-19.16)

<sup>13</sup> Nāskaxō Pilato ato ichanāfani a ato Nios kīfixomis xanīfofo yafi xanīfo fetsafo, askatari a ano ikafori ato ichanāfani. <sup>14</sup> Nāskaxō ato yoini iskafakī: “Mā ekeki na feronāfake efea iskafakī yoiyanā: ‘Nato yorafo chakafakī mekafa,’ ixō. Akka māto ferotaifi mẽ yōka. Natokai afaa chakafa ē ōima, askatarikai ato chakafakī mekafaama a mā yoiyai keskafakī. <sup>15</sup> Akka Herodesri aōnoa afaa chaka nikama. Nāskaxō nokoki anā nīchia. Mā mā ōi natokai afaa chakafaama napanā. <sup>16</sup> Akka ē omiskōimakī tāpimani, chipo anā nīchixiki katanō,” ixō ato yoini.

<sup>17</sup> Akka Pascua fistatīa Pilato ato inimamapaoni yora fisti karaxa mēranoa tsekakī. <sup>18</sup> Akka keyokōi fāsikōi mekainīfofānifo. “¡Na chaka retefe, Barrabás noko kāmioxiki!” fanifo.

<sup>19</sup> Nā Barrabás karaxa mēra ikimanifo pexefā rasi anoxō romanōfāfe āto xanīfo nō potanō fāsikōi mekainīfofākāfe ato faito. Askatari ato retekē karaxa mēra ikimanifo. <sup>20</sup> Akka Pilato Jesús nīchipaikī, afianā yorafo yoini. <sup>21</sup> Ato askafaito nikakakī yorafāfe fāsikōi mekafainīfofānifo: “¡A chaka mastafe!” fanifo.

<sup>22</sup> Askafaifono afianā Pilato ato yoini: “Akka, ¿afaa chakafamē? Natokai afaa chakafa ē ōima. Afeskaikai natiroma. Akka ē omiskōimakī finata ē nīchi katanō,” ato faito, <sup>23</sup> akka afo mēxotaima mekarianifo. “¡Mastafe!” faria fanifo. Askafaria faifono, “Māa akāfe,” ato fani. <sup>24</sup> Ato iskafakī, yoiyanā, “Nā mā apaiyai keskafakāfe” ato fata, <sup>25</sup> nāskaxō nā Barrabás karaxa mēranoa kāmiani, “Noko kāmioxife,” faifono. Nā Barrabás karaxa mēra ipaoni xanīfofo potapaita ato retekatsaxakī. Nāskaxō Jesús ato ināni nā apaiyai keskafanōfo.

### *Jesús ifi cruz ikaki mastanifo*

*(Mt. 27.32-44; Mr. 15.21-32; Jn. 19.17-27)*

<sup>26</sup> Mā Jesús mastafokakī iyokakī, feronāfake fisti fichikaxō yoinifo cruz foxōikanō. Nā feronāfake Cirene anoa ini, āfe ane Simón. Oriax oaito fichikaxō cruz iyamanafono Jesús acho cruzya kani.

<sup>27</sup> Nāskakē yorafā rasi kērofo fe oiakani, fiisi fonifo. Acho fokani, shināmitsakani āto Ifo shinākani. <sup>28</sup> Nāskaifono Jesús ato ōikī ato yoini iskafakī: “Kērofo Jerusalén anoafōfāfe, eōnoax ōiyamakāfe, eōnoax ōiakīmaroko māa ranā oia faatanākāfe, māto fakefoōnoaxri oiakāfe. <sup>29</sup> Akka chipo a mā omiskōiai nokoxii, nāskakē mā yoikī iskafaxii: ‘Inimakāfe a fake fimisfoma, mā nofe omiskōikeranaki,’ ixō mā yoixii. <sup>30</sup> Nāskakē yorafāfe machi yoikī taefakī iskafaxikani: ‘Nokoki māchifā mafakerafe noko fepoxiki nō narisanō omiskōixikima,’ ixō yoixikani. <sup>31</sup> Ē afaa chakafayamafiamiskē ea iskafakani. Akka nā afara chakafakī xateyamaifo omiskōimakī finakōikani,” ixō Jesús ato yoini.

<sup>32</sup> Nāskata yora chaka raferi iyonifo Jesúsya mastafokakī. <sup>33</sup> Nāskata a mastaiфо ano nokonifo āfe ane Mapo Xao ano. Nānoxō Jesús mastanifo. Yora chaka rafeya fetsa takaiфetsa ata, fetsari takaiфetsa anifo. <sup>34</sup> Nāskaxō mā mastafono Jesús Apa kīfini: “Epa, ato raefafe na ea iskafaiфо tsōa tāpiamakī,” Apa fani.

Nāskano sorarоfo ato kaxetiya kaxenifo mā kanākanax Jesús rapati paxkanāxikakī. <sup>35</sup> Nānoxō yorafāfe ōinifo. Nā xanīfofōfāfe kaxemetsamafaiфono iskafayanā: “Nō ōinō nato yorafo ifimiski, iskaratīa āari ifimeimākai. Niospa Fakeaxroko āa ifimei kiki a Niospa katonino,” fanifo.

<sup>36</sup> Sorarоfori Jesúski kaxemetsamanifo. Nāskaxō akiki fokaxō fimi ene kacha ayama-painifo. <sup>37</sup> Iskafakī yoiyanā: “Mī judeofāfe āto xanīfomākī mīari ifimefe,” fanifo.

<sup>38</sup> Nāskaxō āfe mapo mānāori tafara kenekī iskafanifo: “Nafi judeofāfe āto Xanīfoki,” fanifo.

<sup>39</sup> Nāskano nā aya mastaiфо fētsa Jesús chakafakī mekafani iskafakī: “Mī Cristomākī mīa ifimeta nokori ifife,” faito, <sup>40</sup> akka fētsa yoikī iskafani: “Askafayamafe. ¿Mī Nioski meseimamē a mī afara chakafaax omiskōiai?” fani. <sup>41</sup> “Akka nō omiskōikōi chanīmakōi

nõmāi afara chakafakatsaxakī. Akka na feronāfakekai afaa chakafama na omiskōiai,” fani.

<sup>42</sup> Nāskaxõ nāato Jesús yoini iskafakī: “Ifo, xanīfo finakōixõ ea shināfe,” faito, <sup>43</sup> Jesús kemani: “Ë mia pāraima iskaratiakōi mī efe kai nā sharafinakōia ari mī efe ini-makōipakenaka,” fani.

### *Jesús nani*

(Mt. 27.45-56; Mr. 15.33-41; Jn. 19.28-30)

<sup>44</sup> Nāskata xini keya nā mai tio fakishifākōitani. Nāskax mā xini kaino anā penatani.

<sup>45</sup> Nāskakē xini peinima. Nāskaino sama nami Nios kīfiti pexefā mēranoax nakirafekōi faxtepaakekafāni. <sup>46</sup> Nāskaino Jesús fāsikōi Apa kenani: “Epa, ea ifife ã mia ano kanõ,” fata, nāskax nani.

<sup>47</sup> Nāskaito soraro xanīfāfe õikī, Epa Nios aicho fayanā iskafakī yoini: “Chanīma, na feronāfake afaa chakafamisma,” ixõ yoini.

<sup>48</sup> Nā ano niafāfe õinifo Jesús naito. Nānoax fokani, oiai finakōi fonifo Jesús shinākani.

<sup>49</sup> Akka nā Jesús õimisfāfe ano nētekaxõ chai nikaxõ õinifo. Kērofāferi õinifo, Galilea anoax afe foitaxakakī.

### *Jesús makex kini mēra maifanifo*

(Mt. 27.57-61; Mr. 15.42-47; Jn. 19.38-42)

<sup>50-51</sup> Nāno feronāfake sharakōi fisti ini. Nāato Nios Ifofasharapaikōini. Āfe ane José, Arimatea anoa ini judeofāfe āto xanīfo. Nā José Nios xanīfokōi manapaoni. Nāatokai xanīfo fetsafāfe shināifo keskara shināpaonima. <sup>52</sup> Nā José Pilato ano kaxõ Jesús yora yōkani maifai axiki. <sup>53</sup> Mā yōkatani oxõ cruz anoa fotomaxõ sabanā fena sharakōipa rakoxõ iyoxõ mafa kini mēra rātani, a toa maiyomisma mēra. <sup>54</sup> Nā penata itipinīshara fanifo, mā chaima safaro faino, <sup>55</sup> kērofo Jesús fe Galilea anoax foitaxakakī. Nāfāfe José chīfafainifo afeskaxõ kini mēra Jesús rātaimākai õifokakī. <sup>56</sup> Mā āto pexe ano fēkaxõ, pirofomā yafi a aõ tereati itipinīsharafanifo. Akka kērofāfe judeofāfe pena tenetitīa teneyonifo nā Moisés yoini keskafakī.

## 24

### *Jesús otoni*

(Mt. 28.1-10; Mr. 16.1-8; Jn. 20.1-10)

<sup>1</sup> Akka nā pena teneti safaro mā finōfaano nomīkonõ fakishparikōi fonifo a Jesús maia ano. Pirofomā foifokani mā itipinīshara fakaxõ. <sup>2</sup> Mā nokokaxõ õiafo a kini a aõ fepoitafo tokirinīfā mā fepekemea ini. <sup>3</sup> Akka ikifaikakī õiafo āto Ifo Jesús āfe yora ano inima. <sup>4</sup> Nāskai ratekōiyanā afeskamē ikaxõ shināpaiyaifono, feronāfake rafe ato ketaxamei nītani, āto rapati fafekōiyanā. <sup>5</sup> Nāskaifono kērofo ratekōiyanā maikiri fepepakefōfānifo. Nāskaifono nā ājiri rafeta ato yoini: “¿Afeskakī nā yora nia mā fenaimē na yora nakē maifamisfo mēranoa? <sup>6</sup> Anākai nonoma, mā otokaina. Akka shinākapo a Galilea ano iyoxõ mato yoimis keskara. <sup>7</sup> ‘¿A yora chakafāfe ea achikaxõ ea mastafono tres nia oxata ã anā otoxira,’ mato faito mā nikamismamē?” ixõ ājiri rafeta ato yoini.

<sup>8</sup> Ato askafaino a Jesús ato yoimis anori shinānifo. <sup>9</sup> Nāskakata nā Jesús maita anoax anā fekakī, nā once aõxõ tāpimisfoya nā fetsafori ato yoitoshinifo nā õitanaifo keskara. <sup>10</sup> Akka nā Jesúsnoa ato yoimiski chanifōfāifo tii, María Magdalena ikaino Juana ikaino Santiago āfe afa María ikaino kēro fetsafori inifo. <sup>11</sup> Akka a aõxõ tāpimisfāfe, “Āa chanīkanira,” ato fanifo. Ato nikakaspanifo.

<sup>12</sup> Ato askafaifono nikai Pedro fareke kaini, a Jesús maita ano õikai. Kaxõ õia kini mēra a aõ rakoita sabanā fisti mania ini. Nāskax anā Pedro pexe ano oni, “Kee, ¿afeskaitamē?” ikax.

*Jesús Emaús ano fāi kani*  
(Mr. 16.12-13)

<sup>13</sup> Afia pena fistichi Jesús fe rafemisfo rafe peixe rasi āfe ane Emaús ano fonifo. Jerusalén fe Emaús once kilometro ini. <sup>14</sup> Fokakī yoifonifo a Jesús reteitafo. <sup>15</sup> Yoināfōfāifono Jesús atoki nokoax ato fe fāi kani. <sup>16</sup> Akka mā ōifikakī tsōa tāpinima, Niospa ato onātimafaino. <sup>17</sup> Askafofāifono Jesús ato kemani: “¿Tsoaōnoa mā yoifokaimē fāi kakī?” ato faino tsoa tooxinima nāno nētenifo shināmitsakōiyanā.

<sup>18</sup> Nāskaito nā āfe ane Cleofás kemani: “¿Meres fisti mī Jerusalén ano ixō, mī tāpitamamē na rama iskaita?” faito, <sup>19</sup> Jesús kemani: “¿Afaa afeskaitamē?” ato faito yoinifo: “Jesús Nazarete anoa nō yoi, nāatofi Niospa meka yoimiskī. Nāskakē yorafo akiki inimakōimisfo, Niosri akiki inimakōimis. Niospa āfe sharaōxō noko yoimis Niosxō afama mīshti noko faxomis. Āfe meka yorafo sharafata afara sharafo noko axomis. <sup>20</sup> Nāskafaito a ato Nios kīfixomis xanīfofo feta nōko xanīfofōfāfe achikaxō ato ināitafo retekaxō mastanōfo. <sup>21</sup> Akka nā nōko kaifo israelifo romanōfo anoa ifimis ipainōra nō famis nōko xanīfo ixiki romanōfāfe anā noko afeskafanōfoma. Akka mā tres nia finōa a naita. <sup>22</sup> Akka nā kērofo nofe ikafāfe noko yoikakī noko ratekōiafo. Fakishparikōi a maia ano ōifokaxō ōiafo āfe yora ano ikama. <sup>23</sup> Ano āfe yorakēma ōitakani peixe ano anā feafo. Nāskaxō yoiāfo a āfe ājiri rafeta atoki nokoxō ato yoiāfo keskara iskafakī: ‘Jesús naama, iskaratīa nia,’ ato faafono. <sup>24</sup> Nāskakē nofe yora rafe chipo a maia ano fokaxō ōiafo nā kērofāfe yoiāfo keskarakōi ika. Akka Jesús āfe yora ano ikama.”

<sup>25</sup> Nāskafaito Jesús ato yoini iskafakī: “Kee, mā kai afaa tāpiama, mā tatimakōi. Akka a Niospa meka yoimisfāfe yoinifo keskarakai mā chanīmara faima. <sup>26</sup> Akka kenenifo iskafakī: ‘A Niospa nīchia Cristo omiskōikōifiax, chipo Apa Nios fe xanīfokōi ixii,’ ixō aōnoa kenenifo,” Jesús ato askafani.

<sup>27</sup> Nāskaxō ato yoikī taefani a aōnoa yoikī kenenifo, a Moisés aōnoa yoikī keneni yoita, a Niospa meka yoimisfāfe aōnoa yoikī kenenifori; nāfo ato fe kakī ato yoifoni.

<sup>28</sup> Mā chaima peixe rasi ano nokokakī nā rafeta shinānifo: “Noko finōfainikaira,” ikaxō. <sup>29</sup> Akka nā rafeta nētefanifo iskafakī yoiyanā: “Kayamafe. Nono nofe nētefe mā yātapakei kiki. Mā fakishaki,” faifono Jesús nāno ato fe nēteni. <sup>30</sup> Nāskata mā mīsa ano tsoafono pixakakī Jesús pāa tsoainīfōfā, Apa Nios kīfikī. “Aicho,” fata, nāskaxō pāa kaxkepakexō ato ināni pinōfo. <sup>31</sup> Ato askafaito nāskakē koshikōi Jesús tāpinifo. Akka mā tāpiafono ato makinoax yamarisatani. Nāskakē anā tsōa ōinima. <sup>32</sup> Nāskakē āa rafe yoinānifo: “No fe fāi okī a Niospa mekaōnoa yoikī kenenifo keskara noko yoifeaito nō mea nōko ōiti fepeisharakōia. Āfe meka sharakōi,” ikanax yoinānifo.

<sup>33</sup> Nāskakanax Jerusalén ano anā fenifo. Mā fēkaxō ato fichitoshinifo, nā Jesúsxō tāpimisfo once a ato fe rafeafo fe ĩchanākaxō, <sup>34</sup> iskafakī yoiāifono: “Chanīma, mā nōko Ifo otoa, mā Simón ōimana,” ixō yoinifo.

<sup>35</sup> Nāskaifono nā rafetari ato yoinifo nā Jesús ato fe fāi kaito ōitanaifo: “Mā nō ōia noko pāa torexopakeaito,” ixō ato yoinifo.

*Jesús aōxō tāpimisfoki nokoni*  
(Mt. 28.16-20; Mr. 16.14-18; Jn. 20.19-23)

<sup>36</sup> Nā ato yoiāifono, Jesús ato nakirafekōi nirisatani. Nāskaxō ato yoisharakōini iskafakī: “Inimakōikāfe,” ato fani.

<sup>37</sup> Ato askafaino ratekōinifo, “Niafaka chaka nokoki nokoara,” ikanax. <sup>38</sup> Askaifono Jesús ato yoini: “¿Afeskai mā rateimē? ¿Afeskakī māto ōiti mēraxō mā chanīmara fatiro-mamē? <sup>39</sup> Ōikapo ēfe mēke yafi ēfe tae. Ēkīa. Ea ramākapo. Akka ōikapo na rāfo tsefeto. Akka niafakakai namiyata xaoyama, nā mā ea ōiai keskara,” ixō ato yoini.

<sup>40</sup> Ato askafakī yoiyanā, āfe mēke toa yafi āfe tae toa ato ispani. <sup>41</sup> Ato askafakī yoiaino āto ōiti mēraxō shinānifo: “Jesús mara,” ikaxō. Nāskaxō chanīmara fakeratama

akiki inimakõinifo. Nãskaifono Jesús ato yõkani: “¿Nono mã afaayamamẽ ã pipanã?” ato faito, <sup>42</sup> foe xoia pishta inãnifo. <sup>43</sup> Mã fixõ ãto ferotaifi pini.

<sup>44</sup> Nãskaxõ afianã ato yoini: “Mẽfi mato yoiyomiskĩ mato fe iyoxõ eõnoa yoikĩ Moisésnõ nã a Niospa meka yoimisfonõ, eõnoa fanãiti kenenifo keskai nẽ askakõi,” ixõ Jesús ato yoini. <sup>45</sup> Nãskakẽ ãfe shinãmã a kenenifo keskara ato shinãmanaino tãpikõinifo. <sup>46</sup> Ato yoikĩ iskafani: “Eõnoa yoikĩ kenekĩ iskafanifo: ‘Cristo a Niospa nĩchia mã nafiã tres nia oxata anã otoxii,’ ixõ eõnoa yoikĩ kenenifo. <sup>47</sup> Akka ãfe aneõxõ ato yoikãfe. Jerusalén anoxõ ato yoikĩ taefakãfe. Nãskaxori nã maniafo tii anoafori ato yoifofãsafakãfe ãto chaka xatekaxõ anã Nios nikasharakõinõfo, nãskaifono ãto chaka ã ato soaxonikai. <sup>48</sup> Akka nã ã mato yoiaito, mã õiai a mã nikaifori fetsafo yoipakexakãfe. <sup>49</sup> Akka ãfe Yõshi Shara ã matoki nĩchi ãfe Epa yoiyoni keskafakĩ. Akka mã nono Jerusalén ano nẽteyokãfe, ãfe shara matoki nĩchyonõ nai mẽraxõ nã ã mato yoiai keskafakĩ mã fetsafo eõnoa mã ato yoinõ,” ixõ Jesús ato yoini.

*Jesús nai mẽra kani*

*(Mr. 16.19-20)*

<sup>50</sup> Nãskaxõ Jesús ato iyoni Jerusalén anoxõ Betania pasotai. Nãnoxõ Jesús mẽshainãkafã Apa Nios yoini iskafakĩ: “Epa Niospa, eõxõ tãpimisfo ato kexesharapakexafe.” <sup>51</sup> Nãskafakĩ yoianã ato makinoax Jesús Apa Nios ari kani. <sup>52</sup> Akka a aõxõ tãpimisfãfe iskafakĩ yoinifo: “Jesús, mã nõko Ifo sharakõi, nõ mã noikõi,” ixõ yoikanax chipo Jerusalén ano fonifo inimakõianã. <sup>53</sup> Nãskakẽ mẽxotaima Nios kĩfiti pexefã mẽraxõ Nios yoisharapaonifo. Nã tii.

## Juan Jesúsnoa Yoikĩ Keneni

### *Jesucristoõnoa Juan keneni*

<sup>1</sup> (Ēkĩa Juan. Iskaratĩa Jesucristoõnoa ě mato yoi mã tãpinõ. Cristo ãfe ane ipaoni, Meka. Nãato Niosnoa noko tãpimani.)

Afaa oniataima na Meka aneya iyopaoni. Apa Nios fe iyopaoni. Nãrifi Nioski. <sup>2</sup> Taefenakõi Nios fe iyopaonixakĩ, iskaratĩari afe ika. Afaa oniamatai nã Meka aneya Apa Nios fe iyopaoni. <sup>3</sup> Aõxõ Epa Niospa keyokõi onifani. Akka Jesúsmaisxõ afaa onifanima. Nãskaxõ Jesús feta Niospa afama mĩshti onifani. <sup>4</sup> Aõnoax keyokõi niafo. Niospa yorafo tii shinãmapaiyai keskafakĩ Jesúsxõ ato shinãmatiro ãto õiti xafakĩakõi inõfo. <sup>5</sup> Āfe õiti xafakĩakõifiax yora chakafo mēra Jesucristo ipaoni. Yora chakafãfe ãto õiti fakish keskara, shara shinãkanima. Askafiano yora chakafãfe Jesucristo xĩtirofoma yorafo shara shinãmanaino ãto õiti anã fakish keskara inõfoma.

### *Niospa Juan Maotista nĩchini ato yoinõ*

<sup>6-7</sup> Epa Niospa Juan nĩchini Jesucristoõnoa yorafo yoinõ iskafakĩ: “Āfe õiti xafakĩakõi. Epa Niospa mato shinãmapaiyai keskara aõxõ mato shinãmatiro,” ixõ Juan ato yoini Jesús chanĩmara fanõfo.

<sup>8</sup> Juankai Cristoma, Niospa nĩchini Jesucristoõnoa ato yoinõ. <sup>9</sup> Cristo fistichi yorafo shinãmatiro ãto õiti xafakĩakõi inõfo. “Mã oi,” ixõ Juan ato yoini. <sup>10</sup> Oaito yorafãfe tãpinifoma. Niospa Jesúsxõ ato onifafiano tsõa tãpinima Jesús. <sup>11</sup> Nã mai onifani ano nokoni. Nãno nokofiaito ãfe yorafãfe, nãfãfe ifikaspanifo. <sup>12</sup> Askafafiaifono a ifipaiyaiãfe Jesús ato yoini iskafakĩ: “Mã ea noikĩ chanĩmara faa. Nãskakē ěfe Epa Niospa fakefo mã itiro ea chanĩmara faax,” ixõ Jesús ato yoini. <sup>13</sup> Niospa fakefo yorafãfe fakefo keskarama. Yorafãfe fakefo yora keskara, yõramãi ato fake faano. Akka Nios fistichi ato fake fatiro. Yõrakai Niospa fakefo fake fatiroma. Nã Jesús chanĩmara faafo tii Epa Niospa ãto shinã ato fetsafaxotiro ãfe fakefo inõfo.

<sup>14</sup> Nãskakē na Meka aneya Apa Nios ika anoax mai ano oni yorakõi ixikĩ. Nonoax nofe iyopaoni. Apa Nios keskara sharakõi mã nõ õipaoni. Nãato yorafo noikõimis. Āfe meka chanĩmakõi. Nã fisti Epa Niospa Fakekõi. Apa Nios imis keskara nãskakõiriai sharakõi imiski.

### *Juan Maotista Jesucristoõnoa ato yoini*

<sup>15</sup> Jesúsnoa Juan ato yoini iskafakĩ: “Ea nikakãfe, õikapo. Nãõnoa ě mato yoimis. Iskafakĩ ě mato yoimis: ‘Mã oi. Ē taeyoi ofiano ea finõkõia ě fakeamano amãi Apa Nios fe iyopaonixakĩ,’” ixõ Juan ato yoini.

<sup>16</sup> Jesús keyokõi noko shara famiski. Noko noikõixõ noko sharafa fafãfãini. Akka keyokõichi nõko õiti inimasharakõiaito nõ meemis. <sup>17</sup> Epa Niospa noko amapaiyai keskara Moisés yoini. Nãskakē Niospa noko yoini keskara Moisés noko tãpimani. Nãskakē Niospa noko õimapai noko noikõi afi chanĩmakĩ. Nãskaxõ Jesucristo nokoki nĩchini. Jesucristo noko keyokõi noimis. Nãskaxõ noko õimatiro Nios chanĩmakõi. Askatari Epa Niospa noko noi. <sup>18</sup> Tsõakai Epa Nios õimisma. Askafiax ãfe Fakekõi nã afe rafemis, arifi Nioskõi. Apa Niosnoa noko yoimis. Aõxõ nõ tãpitiro afe keskaramãki Epa Nios.

### *Juan Maotista judeofãfe ãto xanĩfofo yoini*

(Mt. 3.11-12; Mr. 1.7-8; Lc. 3.15-17)

<sup>19</sup> Nã judeofãfe ãto xanĩfofãfe Jerusalén anoxõ nã ato Nios kĩfixomisfo nĩchinifo, Juan ano. Akka nã Levifori ato nĩchinifo Juan yõkatanõfo: “¿Mĩ tsoamē?” fatanõfo.



<sup>20</sup> Askafaifono Juan ato kemani: “Ēkai Cristoma. A nō manai nōko xanīfo ēkai aama,” ato faito, <sup>21</sup> “¿Akka mī Cristoma, mī tsoamē? ¿Mīmē Elías?” faifāfe, “Ēkai Elíasma,” ato faito, “¿Akka mī Elíasmaax mī tsoamē? ¿Mīmē nā nō manamis Niospa meka yoimis, nā nokoki oai?” faifāfe, “Maa, ēma,” ato fani.

<sup>22</sup> Ato askafaino anā yōkanifo: “¿Akka mī tsoamē? Noko yoife a noko nīchiafo nō ato yoitanō. Mī tsoamāki noko tāpimafe,” fanifo.

<sup>23</sup> Askafaifono Isaiás kirika keneni keskara nānorikōi Juan ato yoini iskafakī: “Niospa mato yoipaiyai keskara ē mato yoinō. Tsōa istoma anoxō ē fāsikōi mekaikai: ‘Nōko Ifo nokoki oxii. Īkisi itipinīsharakāfe. Mā ipaoni keskara afianā iyamakāfe. Keyokōichi mātō chaka potakāfe, mēstekōishara isharaxikakī,’ ” ixō Juan ato yoini.

<sup>24-25</sup> Nikakata judeofāfe nā fariseofo a Juanki nīchinifo yōkatanōfo iskafakakī: “Mī Cristomamamāki, mī Elíasmamamāki nā nō manamis Niospa meka yoimis mīmaraka, akka, ¿afeskakī mī yorafo faka mēra ikimapakeimē maotisafakī?” ixō yōkakāfe ato fanifo.

<sup>26</sup> Juan ato kemani: “Ēfi ato maotisafapaikai. Ē ato askafafiaino nono fetsa nokoki nokoi. Mākai tāpiama. <sup>27</sup> Ē iskaratīa mato Niospa meka yoifafāini. Askafiano aato chipo mato yoixii. Fāsi ea finōkōia. Ē afaa tāpiama ē sharakeroko ē āfe zapato risfi nexaxopanā,” ixō Juan ato yoini.

<sup>28</sup> Nā pexe rasi Betania faka Jordán okirishtaxō Juan ato faka mēra ikimapakekī maotisafani. Nānoax ato fe yoināni.

### *Niospa āfe oveja fake keskara, Jesús*

<sup>29</sup> Askata pena fetsa Juanki Jesús kani. Jesús fichixō Juan yorafo yoini iskafakī: “Ōikapo. Nā Niospa āfe oveja tetomashta keskara oa. Nato keyokōi yorafo chaka soaxonō Epa Niospa nīchia nokoōnoax naxō nōko chaka noko soaxonō. <sup>30</sup> Ē mato aōnoa yoimis. Ē mato yoia iskafakī: ‘Chipo oi ea keskarama finakōia, nāmāi ē fakeamano iyopaonixakī.’ Nakīa mā oa. <sup>31</sup> Ērifi Cristo tāpixoma yorafo maotisafapai a nōko kaifo judeofāfe tāpinōfora,” ixō Juan ato yoini Cristoōnoa yoikī.

<sup>32</sup> Ato yoixō anā Jesúsnoa Juan ato yoini: “Niospa Yōshi Shara nai mēranoax rifi keskara Jesúski fotopakekafanaito ē ōia. <sup>33</sup> Ēri ōiyamano Epa Niospa ea yoiti iskafakī: ‘Fatofāfe ea chanīmara faimākai mī faka mēra ato ikimapaketiro maotisafakī. Akka mikiki fetsa nokoano ēfe Yōshi Shara nā feronāfakeki fotopakekafāxii. Afe nītaxii. Nā mī ōikī mī tāpixii nāato ēfe Yōshi Shara matoya rafemaxii āfe shinā shara mātō shinā mēra nanenō,’ ixō ea yoia. Epa Niospa ea anori yoiyamakē Jesús nā Niospa Fake ēri tāpikeranama. <sup>34</sup> Askafixō mē ōia. Askaxō ē mato chanīmakōi yoi nafi Niospa Fakeki,” ixō Juan ato yoini.

### *Jesúsxō tāpikī taefanifo*

<sup>35</sup> Pena fetsa nāno Juan aōxō tāpimisfo rafe ini. <sup>36</sup> Afe niafono Jesús ato finōfaini. Ato finōfainaito Juan ato yoini: “Ōikapo. Oa Niospa ina oveja fake keskara,” ixō Juan ato yoini.

<sup>37</sup> Juan ato yoiaito nikakata Jesús chīfafāinifo. <sup>38</sup> Jesús ifiakekafā ato ōikī ato yōkani: “¿Tsoa mā fenaime?” ato faito, “Maestro, ¿fanī mī ikamē?” faifāfe, <sup>39</sup> “Ono ōifokāfe, ē mato ispanō,” ixō ato iyonī. Askata afe fokakī ōiafo nā ika ano afe nokoni. Mā nokoafono mā xini kai ini. Nāno afe yātapakenifo.

<sup>40</sup> Nā rafe Juan ato yoia keskara nikakata Jesús chīfafainifo. Fetsa āfe ane Andrés. Nā Andrés Simón Pedro āfe exto ini. <sup>41</sup> Jesús ika ano nokokata Andrés āfe ochi Simón fenaikai kani. Akiki nokoxō yoini: “A Niospa nokoki nīchia Mesías mā nō fichia. Nā Cristora nō famis. Ōiyotāfe,” fani. <sup>42</sup> Askata Andrés Simón Jesúski nokokini. Akiki nokoaino Jesús Simón yoini: “Mī Simón, Jonásfa fake. Iskaratīa ē mia ane fetsafaxonō. Nō mia Cefas fanō,” fani. (Cefas nāfa mekapa yoimis Pedro fakī.)

### *Jesús Felipe yafi Natanael kenani afe fonōfo*

<sup>43</sup> “Ē Galilea ano kaira,” ixō Jesús shināni. Kapaikī Felipe fichixō yoini: “Efe kafe, eōxō tāpisharakōixikī,” fani. Askafaino afe kani. <sup>44</sup> Felipenō Andrésnō Pedronō pexe rasi āfe ane Betsaida ano imisfo.

<sup>45</sup> Askata Felipe Natanael fichixō yoini: “Moisés Niospa yoini keskara kenekī iskafani: ‘Ē mātō xanīfokōi Cristo matoki nīchixira,’ ixō Niospa yoini anori Moisés keneni. Nānorikōi Niospa meka yoimisfāfe kenenifo. Nākai mā nō fichia. Jesús José fake Nazarete ano ika. Nāōnoa Moisés feta Niospa meka yoimis fetsafāfe kenenifo,” faito, <sup>46</sup> “¿Afaa shara Nazarete anoax oimē?” ixō yōkaito, “Ofē, ōixikī,” Felipe fani.

<sup>47</sup> Natanael akiki nokoaino Jesús ōixō aōnoa yoini: “Nafi israelifāfe fakeki. Nato afaa chaka yoimisma. Chanīmakōi fisti shināfafāimiskī. Tsoakai pāramisma,” ixō Jesús aōnoa yoini.

<sup>48</sup> Askafaito nikakī Natanael kemani: “¿Afeskaxō mī ea ōiyamafikatsaxakī mī ea tāpiamē?” faito, “Mia Felipe fichiyoamano ē mia ōikī taefaita ifi higuera nāmānoa ē mia ōita,” Jesús fani. (Akka Jesús Natanael chai ixō tāpini ōiyamafikī.)

<sup>49</sup> Askafaito, “Maestro, mīfi Niospa fakeki. Askatari mīfi israelifāfe āto xanīfokī,” faito, <sup>50</sup> Jesús kemani: “ ‘Mī ifi higuera nāmā tsoa ē mia ōia,’ ixō ē mia yoia, ¿nā nikaxō mī ea chanīmara faamē? Afara shara fetsa finakōia mī ōixii. <sup>51</sup> Chanīmakōi ē mia yoi. Ēfi yōra fakefiāx ē Niospa Fakekōi. Nai fepekemeano mī Niospa ājirifo ōixii. Epa Nios ika anoax āfe ājiri ekeki fotota, māpeinīfofā fotota, māpeinīfofā ikaito mī ōixii,” ixō Jesús fani.

## 2

### *Jesús āfe mekapa fakakōifekē fimi ene onifani*

<sup>1-2</sup> Tres nia oxakata Caná pexe rasi anoxō Galilea mai anoxō feronāfāke kēro fiaino yorafo ano fisti ichanānifo. Jesús ikaino afa ikaino Jesúsxō tāpimisfori nāfo ato kenamanafono fenifo. <sup>3</sup> Fimi ene mā netsoafono, āfa Jesús yoini iskafakī: “Nafokai fimi eneyama,” fani. <sup>4</sup> Āfa askafaito Jesús kemani: “Efa, ¿afeskakī mī ea yōkaimē afara fetsa afeskarafanōra ixō? Iskaratīa ē afara fetsa fena ayoima. Tsōa atiroma keskara ē fena akimakai,” fani. <sup>5</sup> Askafaito Jesús āfe āfa a yonoxomisfo ato yoikī iskafani: “Nā Jesús mato yoiai keskara faxokāfe,” ato fani.

<sup>6</sup> Nāno tokiri kesho seis efapafo chaimashta tsoa ini. Treinta galon a mēra ikitiro ini. Nāskata nā kesho mēra faka fikaxō, judeofāfe āto chokati mēraxō chokaketsanifo. Nāskakī judeofāfe chokasharaifāfe Niospa ato ōi nafo sharara ato fanō, āto xinifo ipaonifo keskara.

<sup>7</sup> Nāskata Jesús a yonoxomisfo yoini: “Nā keshofo mēra faka fospifakāfe,” ato faito, faka fospikōi fanifo keshofo mēra. <sup>8</sup> Askata Jesús ato yoini: “A ichanāifono ato kexemis na faka ayamatakāfe,” ato faino, nāskata a ato kexemis faka foxonifo. <sup>9</sup> A ato kexemisto ayaxō mea faka inima fimi enekōi ini. Nāskakē tāpinima Jesús faka fetsafaano. (Akka nā yonoxomisfāfe ōinifo Jesús faka fetsafaito. Nāskakē tāpinifo.) Nāskakē tāpixoma a ato kexemisto a Jesús faka fetsafaa a rama kēro fīai foxoni. <sup>10</sup> Nāskaxō yoini: “Fistatīa nā fimi ene sharakōi taefakī nō ato ayamamis. Akka nā fimi ene sharakōi mā mitoxō, nā fimi ene sharama chipo nō ato ayamamis. Akka iskaratīa fimi ene sharakapakōi mī ato ayamani,” fani.

<sup>11</sup> Jesús nā pexe rasi Caná anoxō tsōa atiroma keskara taefaito ōinifo Jesús māi finakōixō tsōa afama mīshti atiroma keskara atiro. Nāskakē ōikaxō aōxō tāpimisfāfe chanīmara fanifo.

<sup>12</sup> Askata Jesús afanō āfe extofonō aōxō tāpimisfonō nā pexe rasi āfe ane Capernaúm ano fonifo. Nāno oxa ranāyonifo.

*Jesús a Nios kīfiti pexefā mēraxō a ato ināifo ato potani  
(Mt. 21.12-13; Mr. 11.15-18; Lc. 19.45-46)*

<sup>13</sup> Mā judeofāfe āto fista Pascua mā chaima ikaino Jesús nā pexe rasi Jerusalén ano kani. <sup>14</sup> Nānoxō Nios kīfiti pexefā mēraxō fakkafo, ovejafo, rifico afo ato minikaxō kori finifo. Nānori a kori kāmiafamisfori tsaofono Jesús ato fichini. <sup>15</sup> Jesús ato fichita risfi koshati fata ato koshapaita a ato inafō ato pōtaketsani. Ovejafo potakī, fakkafo potakī fani. Askata yorafōri potani. Mīsa kamaki āto kori māchiafō saakī fetsani. Mīsari kexkafaya kekēfōfā potani. <sup>16</sup> Nā rififāfe āto ifofo ato yoini: “Na māto inafōya ēfe Epa Niospa pexe mēranoax fotakāfe. ¿Afeskakī ēfe Ēpa pexe mēraxō mā afarafo ato miniketsaimē kori fixikī? Afianā ēfe Ēpa pexe mēranoax afarafo inānōnāyamakāfe kori fixikī. Na ēfe Epa āfe pexe mēranoaxkai mā afarafo minimitsaima,” ixō Jesús ato yoini.

<sup>17</sup> Ato askafaito nikakata aōxō tāpimisfāfe shinānifo iskakakī: “Chanīma, Niospa meka nānorikōi Jesúsnoa kenenifo iskakakī: ‘Epa Niosi, ē mī pexe kexesharapai a mēraxō mia fisti shinānōfo. Afara fetsa a mēraxō anōfoma. Afara fetsakai mī pexe mēranoa ē ōipaima,’ ixō kenenifo Jesúsnoa yoikī.”

<sup>18</sup> Jesús askafaito judeofāfe āto xanīfofōfāfe yōkanifo: “¿Afeskakī Nios kīfiti pexefā mēraxō mī ato potaimē? Niospa mia yoiaito afara tsōa atiroma keskara noko ōimafe nō mia chanīmara fanō,” ixō yōkaifāfe <sup>19</sup> Jesús ato yoini: “Mā na pexe pāoikano afianā tres nia oxata ē anā pexe faxii,” ixō Jesús ato yoini.

<sup>20</sup> Ato askafaino, “Kee. Nōko xinifāfe cuarenta y seis xinia anifo Nios kīfiti pexefā fakakī. Akka, ¿mī koshikōi tres nia pexe faimē?” fanifo. <sup>21</sup> Askafafiakakī tsōa tāpinifoma Jesús Niospa pexeōnoa yoinima. Aafi anofi yoimeni. <sup>22</sup> Askata Jesús nafiax oxa rafeta tres nia ĩta otoano aōxō tāpimisfāfe shinānifo: “Chanīma, a Jesús ato yoita keskara, nā pexefā pāoikaikiri keparanākī, ‘Ēfi tres nia otoxii,’ ixō yoita. Iskaratīa mā nō tāpia aafi anofi yoimeita,” ixō aōxō tāpimisfāfe shinānifo Jesús otoano. Nāskakē Niospa meka kenenifo keskara chanīmara fanifo. Nāskata nā Jesús ato yoini keskara shinākakī: “Chanīmakōi Jesús noko yoini,” fanifo.

### *Jesús keyokōi yorafo tāpini*

<sup>23</sup> Askata tsōa atiroma keskara afama mīshti Jesús fani Jerusalén anoxō fista Pascuatīa. Nāskara ōikaxō yorafā rasichi, “Na Cristo,” ixō chanīmara fanifo. <sup>24</sup> Askafiaifono a yorafāfe āto shinā mēraxō shināifo keskara Jesús ato tāpini. (“Iskaratīa ea chanīmara fakani. Askafikaxō chipo, āa chanīra, ea fakani,” ixō Jesús ato tāpini.) <sup>25</sup> Yorafāfe āto shinā mēraxō shināifo keskara tsōa Jesús tāpimatiro. Areskōi Jesús onātiro a āto shinā mēraxō shināifo Jesús tāpikōia. Chanīmara fayoaifāfe Jesús ato onāni nāskax koshi shināmakī fetsenifo.

## 3

### *Jesús Nicodemo tāpimani*

<sup>1</sup> Nā feronāfake fariseo ini, āfe ane Nicodemo. Nāri judeofāfe āto xanīfo ini. <sup>2</sup> Nāato fakishi oxō Jesús yōkani: “Maestro, nō tāpia mī noko tāpimanō mia Niospa nīchini. Mā nō tāpia Nios fe rafexoma tsōa afara fetsa atiroma nā mī akai keskara fakī tsōa atiroma,” faito, <sup>3</sup> Jesús kemani: “Ēfi chanīmakōi mia yoikai. Tsoari oa fake yome rama kāia keskaraxma Nios xanīfo ano nokotiro,” fani.

<sup>4</sup> Askafaito afianā Nicodemo Jesús kemani: “¿Afeskax afianā feronāfake yometatirōmē? ¿Mā anifofiax afeskai afianā āfa xaki mēra nanetirōmē, fake yomeax anā kāixikī?” ixō Nicodemo Jesús yōkani.

<sup>5</sup> Askafaito afianā Jesús kemani: “Fake yome rama kāi fakaya kāitiro. (Nāskax yōra fake itiro. Nāskariakī āfe Yōshi Sharaōxō Niospa mato ōiti fetsafaano mā āfe fake itiro.) Akka Niospa Yōshi Sharapa māto ōiti fetsafayamano mā Nios xanīfo ano nokotiro. <sup>6</sup> A yōra fake fia nā keskara itiro. Nāskarifiakī Niospa Yōshi Sharapa mato fake fiano māri a keskara itiro. <sup>7</sup> Ē mia yoiaino mī ea nikax, ‘Mīri oa fake yome rama kāia keskara mī itiro,’

ē mia yoiano, ‘Aira, ¿afeskax nõ afianã yometatiromē?’ iyamafe. <sup>8</sup> Nefeaito tsõa tãpitiroma fakirinoax oimãkai. A nefe kai ariri tsõa tãpiama fakiri nefe kaimãkai. Nãskari fakĩ Niospa yorafo ãfe Yõshi Sharapa ãto shinã fetsafaano tsõa tãpitiroma,” Jesús faito, <sup>9</sup> anã Nicodemo kemani: “¿Afeskax nõ askatiromē?” ixõ fani.

<sup>10</sup> Askafaito afianã Jesús kemani: “Mĩ israelifo tãpimamis, ¿afeskakĩ na ē mia yoiai mĩ tãpiamamē? <sup>11</sup> Ë mia chanĩmakõ i yoi. Nã nõ nikafo nõ nõ õiafo nõfo nõ mato yoi. Nãskafekē nõ mato yoiaino mã noko chanĩmara faima. <sup>12</sup> Nono mai anoafõ afarafo afeskaraito ē mia yoiaito mĩ ea chanĩmara faima. Askatari nai mēranoafori afeskaraito ē mia yoiaito mĩ ea chanĩmara faima.

<sup>13</sup> “Tsoakai nai mēra kaax anã fototiroma. Akka ē fisti ē nai mēranoax fotoa yora fakekõ i ikiyoi. Ë afianã chipo kaxii. <sup>14-15</sup> (Nõko kaifo israelifo tsõa istomanoax chaka iyopaonifo. Nãskakē Niospa rono atoki nĩchini ato chachinõ. Nãskaxõ Niospa Moisés yoini iskafakĩ: ‘Na rofetaxõ rono faxõ nĩchinĩfofãfe ifiki ratãfe yorafãfe õikanax sharanõfo, a ato chachia tii.’) Nãskari fakĩ ifi cruz ikakĩ ea mastakaxõ ea nĩchinĩfofãxikani. Nãskakē nã ea chanĩmara faafo tii eõnoax Nios fe nipanakafo,” ixõ Jesús ato yoini.

### *Epa Niospa keyokõ i yorafo noi*

<sup>16</sup> Anã Jesús ato yoini iskafakĩ: “Epa Niospa keyokõ i yorafo noikĩ ãfe Fake fisti ato nĩchixoni nai mēraxõ nono mai anoax atoõnoax naiyonõ. Nãskakē nã chanĩmara faafo tii omiskõipakenakafoma afe nĩpanakafo. <sup>17</sup> Niospa ãfe Fakekõ i mai ano nĩchini ato omiskõimatama ãto chaka soaxoniyonõ aõnoax isharapakexanõfo,” ixõ Jesús ato yoini.

<sup>18</sup> Askata anã Jesús ato yoini iskafakĩ: “Nã Niospa Fake chanĩmara faifokai omiskõipakenakafoma. Akka nã nikakaspai fo ato Niospa omiskõimaxii. Niospa Fake nikakaspakanax omiskõipakenakafo. <sup>19</sup> Pena fe fakish osinãtiroma. Nãskarifiã afara chaka fe Niospa fake rafetiroma. Nãskakē Niospa ãfe fake nãmã nĩchini nã yorafo pena keskara shara inõfo ãto chaka xatekanax. Akka yorafãfe ãto chaka potakaspakani. Niospa ãfe fakeki fekaspakani. Nãskax isharakaspakani, chaka fisti shinãkani. Niospa fake õikaspakani ãto chaka xateax isharaxikakima. Nãskakē Niospa ato omiskõimani. <sup>20</sup> Afara chaka fichipaiyaito Niospa Fake õikaspai. Nã chakafaifo fisti fichipaikani. <sup>21</sup> Nã shara nipaiaifo Niospa Fakeki fekani. Ato õimasharaxikakĩ Niospa ato imasharanõ,” ixõ Jesús ato yoini.

### *Jesús Judea mai ari kani*

<sup>22</sup> Nãskata Jesús fe aõxõ tãpimisfo Judea mai ari fonifo. Nãno ato fe iyoni. Nãnoxõ ãto chaka potapaiyaifãfe ato maotisafapani. <sup>23-24</sup> Juan karaxa mēra ikimayofafomano nãatori yorafo maotisafapani. Nã Enón nã Salim chaimashta nika ini. Nãno faka noa ini. Nãskata nãnoxõ ato maotisafapani. Nãno yorafo akiki feaifãfe ato maotisafapani.

### *Juan Maotista Jesúsnoa anã ato yoini*

<sup>25</sup> Nãskata Juan aõxõ tãpimisfo ãto kaifo judeo fetsafo fe feratenãnifo. Afeskaxõ mã chaka soatiromē ikanax feratenãnifo. <sup>26</sup> Nãskaxõ Juan ano fõkaxõ Juan yoinifo: “Maestro, nõ mia yoipai. Faka Jordán okixori mĩ Jesús fichita. Fichixõ mĩ noko yoita: ‘Nã Cristo Niospa noko nĩchixona nõ nõ manamis,’ mĩ noko feita. Nãatori iskaratĩã yorafo maotisafapai. Oa yorafo keyokõ i akiki fokani,” fanifo. <sup>27</sup> Askafaifono nikakĩ Juan ato kemani iskafakĩ: “Nios fistichi yonomatiro a yonoxonõ. Akka Niospa axoyamaino afaa afeska fatiroma. <sup>28</sup> Akka êkai Cristoma. Epa Niospa ea yoia ē Cristoõnoa yorafo tãpimanõ ãto chaka xatenõfo, Cristo nokoaito chanĩmara fanõfo. Nãnori ē mato yoiaito mã nikamis. <sup>29</sup> Afianã ē mato yoinõ ea nikapo. Mã mã tãpia feronãfake ãfe yama yoikĩ iskafatiro: ‘Aicho. Na kēro mĩ ea yoixona iskaratĩã ēfe ãfi iki,’ ixõ yoiaino ãfe yamari aõnoax inimatiro. Nãskarifiã ē Cristoyamafax fetsafãfe nã Cristo Jesús chanĩmara faifono ēri fãsi akiki inimakõ i. <sup>30</sup> Akka nã Cristo finakõia. Êkai Cristoma. Ë afaa tãpiama, Cristo

finakõia. Akka ẽ afianã afaa yoitiroma ea tanatamaroko, Cristo fisti nikakõinõfo,” ixõ Juan ato yoini.

### *Jesús nai mēranoax fotoni*

<sup>31</sup> Anã Jesús ato yoini iskafakĩ: “A nai mēranoax nãmã fotoato nãato nãmãnoafo ato finõa. Akka nã nãmãnoax fakeafãfe nãmãnoa fisti yoitirofo. Akka nã nai mēranoax fotoato nãatofi keyokõi finõa. <sup>32</sup> Nãato noko yoitiro a õiafo, a nikafori. Nãskakẽ fisti rasichi chanĩmara fakani. <sup>33</sup> Niospa meka chanĩmara fakĩ nõko õiti mēraxõ nõ tãpisharakõitiro Niospa noko pãramisma, ẽfe meka chanĩmakõi.

<sup>34</sup> “A Niospa nĩchiato Niospa meka yoi Niospa ẽfe Yõshi Shara a mēra naneano. Nãskaxõ tãpikõia. <sup>35</sup> Epa Niospa ẽfe Fake noikĩ nĩchini nai mēra ikafãfe ẽto Ifo inõ, nãmãnoafãferi ẽto Ifo inõ. <sup>36</sup> Nãskakẽ Niospa Fake chanĩmara faax nõ afe nipaxatiro. Akka tsõa chanĩmara fayamakẽ Niospa ato omiskõimapakenaka. Akka Jesús nikayamakanax nakanax afe nĩpanakafoma fakishifã mēranoax omiskõipakenakafo.”

## 4

### *Jesús kēro samãritanõki nokoni*

<sup>1-3</sup> Fariseofãfe nikanifo Juan yorafo maotisafapaito. Akka yora ichapa Jesús maotisafapaito fariseofãfe nikanifo. Akka Jesúskai ato maotisafapanima, nã aõxõ tãpimisfãfe ato maotisafapanifo. Aõnoa yoinifo keskai mã Jesús tãpiax aõxõ tãpimisfo fe Judea anoax Galilea ano kani. <sup>4</sup> Judea mai anoax Galilea ano kakĩ Jesús Samãria finõfaini.

<sup>5</sup> Askata Samãria ano Jesús nokoni. Nãno nã pexe rasi ẽfe ane Sicar ano nokoni. Nãno chaimashta Jacobo ẽfe tare ipaoni. Nã tare ẽfe fake José inãni mãmãni anifoxõ. <sup>6</sup> Nãnoru Jacobo kini fani nã kini mēranoa faka fixikĩ. Nã faka fiti ano xini keya Jesús nokoni. Chai inoaxmãni oax xokenãni Jesús nãno tsaoni. <sup>7-8</sup> Jesús teneyoaino, a aõxõ tãpimisfãfe a piaifo pexe rasi ano a fiifokani fonifo. Mã foafono nãno kēro samãritanõ akiki nokoni faka fiyoi. Faka fiti ketokonõ Jesús tsaono akiki nokoni. Nãskaxõ Jesús a kēro yoini: “Ea faka fexõfe ẽ ayanõ,” fani.

<sup>9</sup> Judeofo fe samãritanõfo õikaspa faatanãmisfo. Ato fetakai pimisfoma. Nãskakẽ nã kēromã Jesús yoini: “Mĩfi judeoki. Ẽfi samãritanõki. ¿Afeskakĩ mĩ, ‘Ea faka fexõfe,’ mĩ ea faimẽ?” faito, <sup>10</sup> Jesús kemani: “Niospa mia inãpaiyai mĩ tãpiama mĩ eari tãpiama. Akka mĩ ea yõkaito ẽ mia faka shara inãkerana. Nã faka sharapa yorafo nimasharatiro,” Jesús fani. <sup>11</sup> Nãskafaito kēromã Jesús kemani: “Mĩ keshoyata mĩ risfi yama. Kini chaikõi, ¿afeskafaxõ mĩ faka kini mēranoa fimẽ a noko nimasharatiro a mĩ ea yoiyai keskara?” kēromã fani.

<sup>12</sup> Nãskata anã kēromã yoini: “Nõko xini Jacobo kini faxõ faka fixõ ayapaoni. Ẽfe fakefãferi ayapaonifo. Ẽto inafori ayamapaonifo. Nõri nã faka ayai. ¿Mĩ nõko xini Jacobo finõamẽ?” kēromã fani.

<sup>13</sup> Askafaito Jesús kemani iskafakĩ: “Na faka kini mēranoa ayax chipo afianã mã nõamã iki. <sup>14</sup> Nãskafixõ na faka ẽ ato ayamani anã nõamãkiyamanõfo. Chanĩmakõi, nã faka ayakanax isharapakexanõfo,” fani.

<sup>15</sup> Askafaito kēromã kemani: “Mĩ feronãfake shara. Na faka shara ea inãfe ẽ ayax anã ẽ nõamãkiyamanõ ẽ afianã nonoa faka fiyamanõ,” fani. (Jesús fakakiri keparanãkĩ yoiaino nã kēromã tãpinima.)

<sup>16</sup> Nãskaxõ Jesús yoini: “Mĩ fene ifitãfe afianã nētekaini kaxõ mĩ fene ifitãfe afe oxikĩ,” faito, <sup>17</sup> “Ẽkai feneyama,” faito, “Mĩ chanĩmakõi yoi. Mĩkai feneyama,” Jesús fani. <sup>18</sup> “Mĩ fene cincoya mia fimisfo mĩ fenefo. Akka iskaratĩa mĩ fetsa fe ika a mĩ fenema fe. Ea mã yoiakõi mĩ feneyama,” ixõ Jesús yoiaino, <sup>19</sup> “Ẽ iskaratĩa ẽ mia tãpia mĩ Niospa meka ato yoimis. <sup>20</sup> Nõko xinifãfe na machi anoxõ Nios kĩfipaonifo. Akka mĩ kaifo judeofãfe yoimisfo iskakakĩ: ‘Jerusalén anoxõ nõ Nios kĩfitiro,’ faito, <sup>21</sup> “Ẽ mia yoinõ, ea chanĩmara fafe. Na machi fisti anoxos nõ Nios kĩfitiroma. Jerusalén fisti anoxori nõ

Nios kīfitiroma. Akka fanīma mīshtixō nō Nios kīfitiro. <sup>22</sup> Māfi samāritanōfoki. Nios kīfikī nōko Epa Nios mā tāpisharama. Akka nōfi judeofoki. Nō nōko Epa Nios tāpikōia. Niospa noko tāpimani afeskaxō yorafāfe āto chaka soatirofomāki Epa Nios fe ipaxakakī. <sup>23</sup> Chipo afetiara nō Nios kīfikōikē, āfe Yōshi Shara fistichi noko tāpimatiro nō kīfisharanō. Āfe Yōshi Sharaōxō nō Epa Nios kīfikōiaito nāskara Niospa fichipai. <sup>24</sup> Nios yorama. Niosfi fero mēsho keskara sharaki. Nāskakē āfe Yōshi Sharaōxō nō Nios kīfitiro,” Jesús fani.

<sup>25</sup> Askafaito kēromā kemani: “Mē tāpia a Niospa nīchia chipo nokoki nokoxii. Nā āfe ane Cristo. Nāato afama mīshti noko tāpimaxii,” faito, <sup>26</sup> “Ēfi Cristoki, ē mefe meikai,” ixō Jesús yoini.

<sup>27</sup> Askata Jesús kēro fe mekaino aōxō tāpimisfo fenifo. Fēkaxō ōiafo Jesús a kēro samāritanō fe mekaito ōikani ratenifo. Nāskax yoinānifo: “¿Afeskai mī na kēro fe mekaimē?” nō Jesús faima,” fanifo. Nāskata shinānifo: “Nā kēro samāritanō mī yoia keskarari nokori yoife, nōkai faima,” inifo.

<sup>28-29</sup> Askata nā kēromā āfe kesho potafaini āfe pexe rasi ano kakī. Āfe pexe ano kaxō āfe yorafo yoini: “Oa feronāfake ekeki nokoxō ea yoia. Nā ē afama mīshti ē chakafamis mā ea kāimaxōa. Nāraka Cristo, ōifokāfe,” ixō ato iyoni. <sup>30</sup> Nikakata nā pexe rasi anoax Jesúski fenifo.

<sup>31</sup> Mā kēro kaano aōxō tāpimisfāfe Jesús yoinifo: “Maestro, piyofe,” faifono, <sup>32</sup> “Ē aya a ē piyai. Nā ē piyai mā tāpiama,” ato fani. <sup>33</sup> Ato askafaito nikakani yoinānifo: “Kee. ¿Tsōa a piyai ināfanamē?” ikanax yoinānifo.

<sup>34</sup> Askata Jesús ato yoini: “Ēfe Epa Niospa ea nīchini ē āfe yono shara yonoxonō. Nāato ea amapaiyai keskara ē apai. Nā ē piyai keskara,” Jesús ato fani. (“Mā nō piax nō anā fonāikima, nō shara iki. Nāskarifiyai Niospa noko amapaiyai keskara nō iki nōko ōiti sharakōi iki. Nāskara noko amapaiyai nō aki, a nō piyai keskara,” ato fani.)

<sup>35</sup> Anā Jesús ato yoini: “Māfi iskamiski: ‘Mā nōko tarepanoax mā nōko xiki choshiaki. Mā cuatro oxe akaki nō finō,’ mā imis. ¿Nāskarifiakī mā shināimē: ‘Nō Jesúsnoa yorafo Niospa meka yoiano chipo chanīmara faxikani,’ ixō mā shināimē? Akka ē mato yoi: ‘Ōikapo, mā iskaratīa itipinīsharakōiafo Nios Ifofaxikakī,’ ato fani. <sup>36</sup> Akka fētsa āfe yama āfe tare kexexotiro, āfe xiki topixoxiki. Chipo kopifaxinō, tare ifāfe. Nāskarifiakī fētsa taefakī yorafo Niospa meka yoitiro. Ato yoifiaino chanīmara fayokanima. Askatari chipo fetsa oxō ato yoiaito chanīmara fakani. Nā rafe Niospa ato shara imapakenaka nā rafetamāi Niospa meka ato yoimisfono. <sup>37</sup> Nāskakē chanīkima mā yoimis iskakī: ‘Fētsa xiki fanano chipo fētsa nā xiki fimi fitiro.’ Nāskarifiakī fētsa Niospa meka yoikī taefaano fētsari chipo rama oxō nāatori ato chanīmara famatiro. <sup>38</sup> Akka mā taefakī ato yoimisma iskaratīa ē mato nīchia mā ato chanīmara famanō. Taefakī fetsafāfe Niospa meka ato tāpimani, mā ato tāpimayoamano. Mā ato tāpimayoxoma koshikōi mā ato chanīmara famatiro māmāi taefakī ato yoiyomisfono,” ixō Jesús ato yoini.

<sup>39</sup> Nāskata Jesús aōxō tāpimisfo yoiaino nā kēro samāritanō āfe kaifo yoikai kani pexe rasi ano. Kaxō ato yoini: “Oa feronāfake mā ea tāpixō ea yoia nā ē afara amis keskara. Ea ōiyamafikatsaxakī mā ea tāpia,” ato fani. Ato askafaino Jesús fisti rasichi chanīmara fanifo.

<sup>40</sup> Askata nā kēro nikakanax Jesúski fonifo āfe meka nikakani. Akiki nokoxō yoinifo: “Nofe nono iyofe,” fanifo. Askafaifono nikata Jesús ato fe oxa rafeyoni. <sup>41</sup> Āfe meka nikakaxō yora ichapato chanīmara fanifo. <sup>42</sup> Askata chanīmara fakaxō yorafāfe nā kēro yoinifo: “Mī Jesúsnoa noko yoia fisti nō chanīmara faima. Nōakōi mā nō āfe meka nikakōia. Nāskakē iskaratīa nō chanīmara fai. Nāato na yorafo ikafo tii ato ifitiro afe ĩpaxanōfo.”

### *Jesús sharafani xanīfo yonoxomisto fake*

<sup>43</sup> Askata mā oxa rafeta Jesús nā samāritanōfo anoax Galilea ano kani. <sup>44</sup> Jesús Galilea anoax yosini, nānoxori yonopaoni. Afe yorafo nāno inifo. Askata Jesús ato yoini iskafakī:

“A afe pexkonifāfe a ato Nios yoixomis yoikakī iskafatirofo: ‘Akai tsoama, afi nofe pexkoniki,’ fatirofo,” ixō ato Jesús yoini.

<sup>45</sup> Askata Jesús Galilea ano nokoni. Jerusalén anoax Galilea ano Jesús nokoamano yorafo Galilea anoax Jerusalén ano fonifo fista aki fokani. Nānoxō tsōa atiroma keskara Jesús Niosxō ani. Nā afama mīshti Jesús anoxō akaito ōinifo. Nāskakē Galilea ano Jesús atoki nokoano akiki inimanifo: “Aicho, mā mī oaki,” Galilea anoxō fanifo.

### *Jesús xanīfāfe fake sharafani*

<sup>46</sup> Askata nā pexe rasi āfe ane Caná ano Jesús nokoni nā Galilea mai ano. A āfe mekapa faka fetsafani ano fimi ene keskara fakī nāno Jesús nokoni. Nānoa xanīfo fētsa Jesús ōiyoi oni. Nā pexe rasi āfe ane Capernaúm anoax oni. Nānoax xanīfāfe fake isinī ini.

<sup>47</sup> Askata xanīfāfe nikani Jesús Judea anoax oano Caná ano nā Galilea mai ano. Nikata akiki oxō yoini: “Xanīfo, ēfe fake isinī iki nai kiki. Ēfe fakeshta ea ōixoni ope ēfe fake ea sharafaxoxikī,” ixō iyopaini. <sup>48</sup> “¡Ooa! Tsōa atiroma keskara ē fayamakē mā ea chanīmara fakeranama,” ixō Jesús ato yoini. <sup>49</sup> Afianā nā xanīfāfe Jesús yoini: “Xanīfo, efe kayoikape ēfe fake nayamanō,” ixō iyopaini. <sup>50</sup> Askafaito Jesús kemani: “Mī fake namaki. Katāfe. Iskaratīa mī fake niaki,” Jesús fani.

Jesús askafaito nikafaini kani. <sup>51</sup> Mā nokoi kaino āfe inafō akiki nokokaxō yoinifo: “Mī fake mā shara, anā isinī ikima,” fanifo. <sup>52</sup> Askafaiāfe ato yōkani: “¿Fanī xini rakano ēfe fake sharamē?” ixō ato yōkaito, “Xini keya mī fake āfe yona matsita,” fanifo. <sup>53</sup> Yoiaifāfe nikata āpa shināni: “Chanīma, Jesús ea yoita xini keya, ‘Mā mī fake sharaki katāfe,’ ea Jesús feita,” ixō xanīfāfe shināni. Nāskata na xanīfonō āfinō afe yorafoyaxō Jesús chanīmara fanifo.

<sup>54</sup> Nāskata Jesús Judea anoax Galilea ano nokoxō afianā tsōa atiroma keskara fakī ato ōimani. Ato ōimakī rafe fani.

## 5

### *Jesús feronāfake isinī imis Betesda anoxō sharafani*

<sup>1</sup> Askata Jesús Galilea anoax Jerusalén ano kani āfe kaifo judeofo feta fista akikai. <sup>2</sup> Nāno Jerusalén ano ovejafāfe āto kāiti ano ĩa ini. Judeofāfe yoimisfo a ĩamā āfe ane Betesda. Nā ĩa kesemē pexe kafāshara mīshti tsaofafāina ini, cinco pexe. <sup>3-4</sup> Nāno yora isinī imisfo ichapa rasi inifo nāno rakafafāinafo. Fēxoxo, chātofo, sifitianifo nāfo isinī imisfo nā pexe kafāshara mīshti mēra rakafafāinafo ini. Akka Niospa āfe ājiri nā ĩa ano nokomis nā ĩa fecha fecha axiki. Nā ĩa fecha fecha akaino nā isinī ĩkaifo nā nashi taea nashi ax koshi sharamisfo. Nāskakē nā isinī ĩkaifāfe Niospa āfe ājiri manamisfo ato ĩa fecha fecha axoyonō nā nashi nā taea koshi sharaxikakī.

<sup>5</sup> Jesús nāno nokoxō feronāfake fichini treinta y ocho xiniya amis finipaikī ranāmis. <sup>6</sup> Feronāfake finimisma fichixō Jesús tāpini nā feronāfake treinta y ocho xiniya amis isinī itiani. Nāskaxō yōkani: “¿Mī sharapaimē?” ixō yōkani. <sup>7</sup> Askafaito kemani: “Niospa ājirinī ĩa fecha fecha akaino tsōakai ea ĩa ano iyomisma. Akka ē nashipaifaino ea xītimisfo. Ēkai fena nashitiroma. Nono tsōama ea ĩa ano iyoikaxiki,” faito, <sup>8</sup> Jesús yoini: “Fininākfā, mī rakati fifaini kasharatāfe,” Jesús fani. <sup>9</sup> Askafaito nikai fininākfāta āfe rakati fifaini kani.

Nā pena safaronō finimisma Jesús sharafani. <sup>10</sup> Nāskano nā judeofāfe āto xanīfofōfāfe ōinifo nā feronāfake finimismato āfe rakati fifaini kaito yōkanifo: “¿Afeskakī mī rakati safaronō mī foikaimē? ¿Mī tāpīamamē nōko xinifāfe yoipaonifo safaroaino nō afaa metiroma? Akka mī rakati na safaronō mī fotiroma,” fanifo. <sup>11</sup> Askafafono ato kemani: “Oa feronāfāke ea sharafaxō ea yoia iskafakī: ‘Mī rakati fotāfe,’ ea faa,” ato faito, <sup>12</sup> “¿Tsōamē a feronāfake anori mia yoia?” fanifo. <sup>13</sup> Finimismatokai tāpinima tsōa sharafaamāki Jesús māi a finimisma sharafafāini koshikōi a makinoax yorafā rasi mēra kaano. Nāskakē finimismato anā ōinima.

<sup>14</sup> Askano chipo Jesús a feronãfake sharafaa Nios kîfiti pexefã mēranoa fichixõ yoini: “Anã mī isinī ikima. Mā mī shara. Anã a mī chakafapaoni keskafakī afianã chakafayamafe. Mī chaka xatefe. Mī chaka mī xateyamakē afaranã mia anã omiskōimatiroki,” ixõ Jesús yoini. <sup>15</sup> Nāskax nã feronãfake Jesús makinoax kani judeofo yoikai, “Oa Jesús ea sharafaa,” ato fani. <sup>16</sup> Nã Jesús safaronõ yora sharafaa nikakanax judeofo ãto xanīfofo Jesúski õitifishkinifo. Õitifishkikakī Jesús mekafakī chakafanifo. <sup>17</sup> Askafaifono Jesús ato yoini: “Èfe Epa pena tii yonofafāini. Iskaratīari yonoi. Èri èfe Epa yonoai keskafakī èri yonoi,” ixõ ato yoini.

<sup>18</sup> Nāskakē fakirira shinānifo. Nāskara shinākakī Jesús mekafanifo: “Nōko xinifāfe yoini keskara nō safaronõ afaa metiroma, akka Jesús yonoi yorafo sharafakī. Nāskaxõ noko yoia: ‘Nios èfe Epakōi,’ noko faa. Nāskax Nios keskarakōi ipai,” fanifo. Nāskax a ranã yoinānifo: “¿Afeskakõ nō Jesús ato retematiromē?” ikanax yoinānifo judeofo ãto xanīfofo.

### *Jesús Niospa Fakexõ nã Niospa akai keskara fai*

<sup>19</sup> Nāskara shināifāfe Jesús ato tãpini. Nāskaxõ Jesús ato yoini iskafakī: “Chanīma ã mato yoinõ. Ea nikakapo. È Niospa Fakekōikī ãa ã afara afeskarafaima. Èfe Epa Niospa akai keskara õixõ èri aki. Nã fisti ã aki. <sup>20</sup> Èfe Epa Niospa ea noikōi. Nāskakī nã akai keskara ea tãpimani èri anõ. Akka afara fetsa finakōia ea ispaxii. Askaino mã ea iskafakī yoixii: ‘Airã õikapo. ¿Afeskakī iskara shara akimē?’ mã ea faxii. <sup>21</sup> Epa Niospa yora naano anã otofatiro. Nāskaxõ anã nimasharatiro. Èri ãfe Fakexõ nāskari fakī ã ato nimapaikī ã ato nimatiro shara ãpaxanõfo. <sup>22</sup> Epa Niospa ato yoima fatora yora shara nãpanaka, akka fatorari omiskōipakenaka. Èfi Niospa Fakeki. Ea nĩchini ã yorafo yoinõ fatofomāki a afe nãpanakafo, akka fatoforimāki a omiskōipakenakafo. <sup>23</sup> Nāskaxõ yorafāfe Epa Nios yoixikani: ‘Mī fāsi shara. Tsõa mia finõtiroma,’ ixõ yoixikani. Nāskarifiakī eari yoixikani ãmāi ãfe Fakekē. Ea nĩchini. Akka iskaratīa ea tsõa yoisharaima. Èfe Epa Niosri askari fakani yoisharakima.

<sup>24</sup> “È mato chanīmakōi yoinõ. Fatoto èfe meka nikasharaimākai, akka nã ea nĩchiniri, fatotori chanīmara faimākai nãfi èfe Epa Nios fe nãpanakakī. Akka iskaratīa yorafo oa naa keskara ikafo Nios Ifofaamax. Akka Epa Nios chanīmara fakanax afe ipanakafo. Nafix afianã otoxikani.

<sup>25</sup> “È afara fetsa chanīmakōi mato yoinõ. Yorafāfe ãto õiti mēra shināsharakōiafoma oa naa keskarakōi ikafo. Akka ã Niospa Fakeki. Iskaratīa ã ato yoiaito ea nikakanax anã naa keskara ikanima, efe isharpakenakafo. <sup>26</sup> Akka tsõa Epa Nios onifanima. Akōi ika. Nāskarifiakī Epa Niospa yoia keskara ãfe Fakeri tsõa onifanima. Èakōi ã ikaki. <sup>27</sup> Èfi Niospa Fakeki. Nāskakē ea yoia iskafakī: ‘Mī yorafo yoitiro fatofomāki efe nãpanakafo, akka fatoforimāki omiskōipakenakafo,’ ixõ ea nĩchini. <sup>28-29</sup> Nāskara ã mato yoiaino rateyamakāfe. Akka nã namisfāfe èfe meka nikakani otoxikani. Afara shara famisfo nikasharakōimisfo nãfo Nios ano nãpanakafo. Akka nã afara chakafamisfo afo otkanax omiskōipakenakafo,” ixõ Jesús ato yoini.

### *Niospa Jesús nĩchini a apaiyai keskara famaxikī*

<sup>30</sup> Anã Jesús ato yoini iskafakī: “Akka èakōi ã yorafo omiskōimanimã. Epa Niospa ea yoiaino ã aki. Epa Niospa keyokōi tãpia. Akka ea mēstekōi yoia keskara ã yorafo yoitiro fatofomiskōipakenakafomāki. È ato kaxpa omiskōimanimã. Eres fistikai ã apaiyai keskara ã shināima. Èfe Epa Niospa ea nĩchini a apaiyai keskara ea famaxiki. <sup>31</sup> Èakōi ã yoimesharaito tsõa ea tãpitiroma ã afe keskaratiromakī. <sup>32</sup> Akka nãno yora fetsa eõnoa yoisharamis. Nãato ea chanīmara fakē mări a nikasharakōitiro. <sup>33</sup> Akka mã yorafo Juan Maotistaki nĩchimis eõnoa nikanõfo. Juan eõnoa meka shara yoimis nã yorafāfe mato tãpimakani. ‘Jesúsfi Cristoki,’ Juan ato famis. Nã nikakaxõ mato tãpimamisfo.



<sup>34</sup> “Ĕfi tsōa atiroma keskara fakē mā mā ōimiski. Akka tsōa eōnoa mato yoiamaito nāfo ōixō mā tāpitiro ě mato chanĭkima yoimis. Nāskafekē Juan eōnoa mato yoimis keskara ě afianā mato shināmani mātō chaka mā xatenō omiskōitamaroko Epa Nios fe mā isharapakexanō. <sup>35</sup> Juan feronāfake fāsi sharakōi. Oa rāpari fafeai keskara shara. Fakishikakī nō rāpari ōtano fai chaxasharano nō fāi katiro. Oa rāpari fafeai keskara shara mato Juan tāpimanano mā mātō chaka xateax mā Nios fe mā isharapakexatiro. Mato yoimis keskara mā shināmis iskafakī: ‘Aicho, Juan noko mēstekōi Niospa meka yoimis. Nō nikashara,’ ixō mā shināmis. <sup>36</sup> Juan eōnoa yoikōimis; akka ěfe Epa Niospa Juan finōkōia. Ĕfe Epa ea nĭchini a apaiyai keskara ě anō. Iskaratīa a ea yonomanai keskara ě aki. Akka a ě akai keskara ōixō mā tāpitiro Epa Niospa ea nĭchini a ea yonomanai ě mitonō. <sup>37</sup> Epa Niospa ea matoki nĭchini. Nāatori eōnoa yoimis. Mākai Epa Niospa āfe meka nikamisma, askatari mā ōimisma. <sup>38</sup> Niospa ea nĭchifinino mā ea chanĭmara faima. Nāskax āfe meka shara mātō shinā mēra naneama.

<sup>39-40</sup> “Moisés feta a Niospa meka yoimis fetsafāferi kenenifo keskara mā mā ōisharai māmāi shinākī iskafakī: ‘Ĕ Niospa meka anekī ě tāpitiro afeskax ě Nios fe isharapakenakamāki,’ ixō mā shināi. Nāskaxō a Niospa meka yoikī kenenifo mā anefafāimis. Akka Moisés feta a Niospa meka yoimisfāfe eōnoa kenefinifono mā ekeki opaima ě mato imasharapanā.

<sup>41</sup> “Epa Niospa ea yoikī iskafaino: ‘Ĕfe fake shara,’ ea faino ě inimatiro. Akka yorafāfe, ‘Jesús sharaki,’ ea faifono ě askafamapaima. <sup>42</sup> Ĕ mato tāpikōia. Mākai Epa Nios noima. <sup>43</sup> Epa Niospa ea nĭchini ě matoki onō. Ĕ matoki ofiakē mā ea ifipaima. Akka yora fetsa āakōi matoki oaito mā ifitiro. <sup>44</sup> Akka mā yora fetsafo, ‘Na yorafo sharafora, noko fanōfora,’ ixō mā ato yoimapai. Akka Niospa mato yoisharaino mā fichipaima. Nāskakī mā Niospa meka mā nikakaspai.

<sup>45</sup> “Mā ea chanĭmara fayamakē ěfe Epa Nios ě yoima. Nāskakē, ‘Nā Jesús noko chakafai,’ ixō shināyamakāfe. Mā shināmis iskakī: ‘Moisés meka nikai nō Epa Nios fe nĭpanaka,’ ixō mā shināmis. Anori mā shināfiaino Moisés Epa Nios yoixii mākairoko āfe meka nikakōimiskē. <sup>46</sup> Moisés eōnoa yoikī keneni. Nāskaxō Moisés āfe meka chanĭmara faxō eari mā chanĭmara fakerana. <sup>47</sup> Nāskafixō a Moisés kirika keneni mā chanĭmara faima. Nāskaxō eari mā chanĭmara faima,” ixō Jesús judeofāfe āto xanĭfofo yoini.

## 6

### *Jesús cinco mil feronāfakefo ato pimani* (Mt. 14.13-21; Mr. 6.30-44; Lc. 9.10-17)

<sup>1</sup> Askata Jesús anā ĭamāfā āfe ane Galilea pokefaini. Āfe ane fetsa Tiberias. <sup>2</sup> Nāskaxō Jesús isinĭ imisfo āfe mekapa ato sharafaito ōikani yorafā rasichi chĭfafainifo. <sup>3-4</sup> Nāskaifono judeofāfe āto fista Pascua mā chaima pakeaino Jesús māchi keya ano nokoax aōxō tāpimisfo fe tsaoni. <sup>5-6</sup> Nāno tsaofono yorafā rasi Jesúski fenifo. Akiki feaifāfe atokiri fesoxō Jesús ōini. (Ato ōikī Jesús shināni oa yorafo fonāikani rakikīa. Nāskaxō Jesús āa tāpini afeskaxō ato pimaimākai.) Nāskaxō Jesús Felipe tāpimapaikōini a āfe mekapa afama mĭshti atiro. Nāskaxō Jesús Felipe yōkani: “ĜFanā afaa ato pimaxikī nō fimē?” ixō Jesús Felipe yōkaito, <sup>7</sup> nikaxō Felipe kemani: “Kee, Ifo, nō dos cientos nia oxata yonoxō nō kori fitiro akka a tiikai nokotiro ma na yorafā rasi nō ato pimapanā,” Felipe fani. <sup>8</sup> Nāskafekē Jesúsxō tāpimis fetsa Andrés nā Pedro ěxto yoini: <sup>9</sup> “Ōipo. Na fāke cinco pāa fea. Foe rafeya fea. Akka yora ichapato pitirofoma. Fisti rasichi pitirofo. Nono yora ichapa rasi. Na pāa pishta tsoa nokotiro ma,” fani.

<sup>10</sup> Askafaito Jesús yoini iskafakī: “Ato yoikāfe tsaonōfo,” ato fani. Nāno fasi ichapa ini. Nā Jesús ato yoiai keskai fasi mēra tsaoi fetsenifo. Cinco mil feronāfakefo tsaoi fetsenifo. Kērofori, fakefori tsaonifo. <sup>11</sup> Nāskax tsaofafono Jesús nā cinco pāa fita Apa

Nios yoini: “Aicho, Epa,” ixō Apa Nios yoita pãa yafi nã foe rafe kaxkepaketa aõxõ tãpimisfo ato inãni, afãferi ato inãnofo. Fikaxõ pikani mãyakõinifo. <sup>12</sup> Nãskax keyokõi yorafo mãyakõiafono Jesús ato yoini: “Nã pãa yafi foe texefafo fikãfe fẽta mẽra nanekãfe afaa pishta fenoyamanõ,” ato fani. <sup>13</sup> Ato askafaito nikakaxõ nã pãa yafi foe texefafo finifo. Doce fẽta fospifanifo.

<sup>14</sup> Nãskata Jesús ãfe mekapa foe rafe yafi cinco pãa ato pimaito õikanax yoinãnifo: “Chanĩmakõi Jesús Niospa meka yoimis. Nã Epa Niospa aõnoa yoipaoni. Nokoki nĩchini,” ikanax yoinãnifo. <sup>15</sup> Askafaifono Jesús tãpixõ ãfe õiti mẽra shinãni: “Na yorafãfe ea kerexkai ãto xanĩfokõi ea imapaikani,” ixõ tãpini. Askata ato makinoax machi fetsa ari kani.

*Jesús ãamãfã femãkã kani*  
(Mt. 14.22-27; Mr. 6.45-52)

<sup>16-17</sup> Askata mã xini kaino aõxõ tãpimisfo kanõanãfã mẽra nanefainifo ãamãfã pokefainifo nã pexe rasi Capernaúm ano fokani. Nokoafomano mã fakishaino Jesús atoki nokonima. <sup>18</sup> Nẽfefaino ãamãfã pooitifikõini. <sup>19</sup> ãamãfã chai naisti nẽxpakĩaxõ nẽfefãne ato akaino ãamãfã pooitifikõini. Jesús ãamãfã kamaki kaitokai tsõa tãpinima mã fichifikaxõ. Tãpiamax ratekõinifo. <sup>20</sup> “Ëkã. Rateyamakãfe,” Jesús ato fani. <sup>21</sup> Nãskaxõ yoinifo: “Aicho. Kanõa mẽra naneyofe,” fanifo. Mã Jesús naneano nãskax ãamãfã kesemẽ nokorisanifo.

*Yorafã rasichi Jesús fenanifo*

<sup>22</sup> Nãskaino mã penano yorafã rasi okiri ãamãfã kesemẽ nẽtenifo. “A aõxõ tãpimisfo fe Jesús kaito nõ õiama. Nonokai kanõa fetsama. Akka Jesús nonoki,” ikanax yoinãnifo.

<sup>23</sup> Nãskatari Tiberias chaimaxõ kanõa rasi fenifo. A Jesús yorafã rasi ato pimaita ano fenifo. <sup>24</sup> Askatari Jesúsxõ tãpimisfo ano inifoma. Jesúsri ano inima. Nãskaxõ yora rasichi Jesús fenaifokani fonifo kanõanãfãne Capernaúm anoa.

*Jesúsfi a nõ piai keskaraki. Akka nõ piaxma nõ nitiroma. Nãskarifiakĩ nõ Jesús chanĩmara faaxma nõ afe nĩpaxatiroma*

<sup>25</sup> Mã fichikaxõ Jesús yoinifo: “Maestro, ¿afetã mã nono oamẽ?” ixõ yõkanifo. <sup>26</sup> Askafaifono ato kemani: “Chanĩmakõi ã mato yoi. A yõra atiroma keskara ã mato ispafekẽ mã ea fenaima. Akka ã mato pimaino keyokõi mã mãyakõita. Nãskakẽ mã ea fenai. <sup>27</sup> Shinãkapo. a piai fisti mã shinãfãini. Akka a mã piai pisiãx payokometiro. Nãskaxõ mã yonofãini a mã piai fixiki. Akka a mã piai fisti shinãyamakãfe. A ã mato inãtiro shinãkãfe. A mã piai ã mato inãtiro a keyonakama. Nã piãx mã efe isharpakenaka. Ëfi yõra fakekõiki. Ëfe Epa Nios ekeki inimai ea katoxõ matoki ea nĩchini ã mato imasharapakexanõ,” ato faino, <sup>28</sup> nikakakĩ yoinifo: “¿Nõ afeskatromẽ Nios nokoki inimanõ?” ixõ yoinifo. <sup>29</sup> Askafaifãfe Jesús ato kemani: “Epa Niospa ea matoki nĩchini. Akka mã Epa Nios inimamapaikĩ ea chanĩmara fakãfe,” Jesús ato faino, <sup>30</sup> kemanifo: “A tsõa atiroma keskara fakĩ noko afama mĩshti ispafe nõ mia chanĩmara fanõ. <sup>31</sup> Akka Niospa meka kenenifo iskafakĩ: ‘Tsõa atiroma keskara Moisés a piaifo ato inãpaoni. Nã pena tii nai mẽranoax pakepaoni a piaifo,’ ixõ kirika kenenifo. A nõko xinifãfe pipaonifo tsõa istoma anoxõ ãfe ane mãnã. Nãskakẽ mĩri a Moisés aka keskara fafe, nõ mia chanĩmara fanõ,” ixõ yoinifo.

<sup>32</sup> Askafaifono Jesús ato yoini: “Ë mato pãraima na Moiséskai a nõko xinifãfe piai ato inãnima, nai mẽraxõ Epa Niospa ato inãni. Akka Epa Niospa mã iskaratã mato mẽra nĩchia a mã piai keskara nai mẽraxõ mãto õiti mẽra nanenõ. <sup>33</sup> Nã fistichi yorafo nimapakekõixatiro. Epa Niospa nãmã nĩchini yorafo ato imasharapakexanõ,” ato faito, <sup>34</sup> “Ëfo, a nõ piai noko inãfãife a mã noko yoiai,” fanifo. <sup>35</sup> Jesús ato kemani: “Ëfi nã mã piai keskarakĩ. Ë yorafo nimasharapakexatiro. Mã nõ piãx mãyatiro. Nãskax nõ anã fonãitiro. Nãskarifiakĩ ea shinãifãfe ã ato shinãmafãini. Ë ato potanakama. Nãskakẽ

āto ōiti mēra inimakōitirofo. Askatari mā nō faka ayax nō anā nōamāitiroma. Nāskarifiakī ea shinākanax efe isharapakenakafo. <sup>36</sup> Nāskafekē ē mato yoiāito mā ea nikakī mā ea chanīmara faima. <sup>37</sup> Akka nā ea Ifofaafo Epa Niospa ea atoya imasharapakenaka nāfāfemāi ea Ifofakōiafono. Akka fatorafāferi ea Ifofaifāfe nāfo ē ato kexesharapakenaka. Ē ato potapakenakama. <sup>38-39</sup> Epa Niospa ea nīchikī ea yoini iskafakī: ‘Nā mefe ipaikani mefe ipanakafo tsoa pishta fenonakama. Nāfo mā nafiamisfono mī anā fotoxō mī ato ōtofaxii nofe nipaxanōfo. Nāskara ē fichipai,’ ixō ea nīchini. Nāskakē nā ēa ē apaiyai keskara faxiki ē mai ano onima. Akka nā ea nīchiato ea amapaiyai keskara faxikī ē mai ano fotoni.

<sup>40</sup> “Ēfi Niospa Fakeki. Ea chanīmara fakanax nāfo ēfe Epa Nios ari efe isharapakenakafo. Nafiafāfe ē afianā mai ano fotoxō ē ato ōtofaxii isharapakexanōfo. Nāskara ēfe Epa Niospa fichipai,” ixō Jesús ato yoini.

<sup>41</sup> “Ēfi nai mēranoax onikī a mā piai keskaraxō yorafo imasharaxikī,” Jesús ato faito nikafikaxō chanīmara fatama judeofāfe Jesús mekafakakī yōachepenifo: <sup>42</sup> “Kee, nikakapo. Na Jesús, āfe apa José yafi āfe afa María nō ōimis. Nakai afaama. Akka, ¿afeskakī noko yoimē: ‘Ēfi nai mēranoax Nios ika ariax onikī?’ Nāskakē na meka nō chanīmara faima. Iskara meka nō nikapaima,” ikanax yoinānifo. <sup>43</sup> A āto ōiti mēraxō shināifo keskara Jesús ato onāxō ato yoini: “Ekeki yōachepeyamakāfe. <sup>44</sup> Ē chanīma. Epa Niospa ea nīchini. Nāskafekē Epa Niospa āto ōiti mēra ato shināmayamaino ea tsōa chanīmara fatiroma. Akka nā ea chanīmara faax nakē ē anā nai mēranoax fotoxō ē ato otofaxii efe ipaxanōfo. <sup>45</sup> Niosnoa yoimifāfe kirika kenenifo iskafakakī: ‘Epa Niospa keyokōi ato tāpimaxii,’ ixō kirika kenenifo. Fatora yorafāfe ēfe Epa Nios nikaifono ato tāpimaxii. Nāskaxō afāferi ea chanīmara faxikani.

<sup>46</sup> “Tsōakai Epa Nios ōimisma. Eres fisti ē Epa Nios ōimis, ēmāi a makinoax onixakī. <sup>47</sup> Ēfi mato chanīmakōi yoikai. A ea chanīmara fai ēfe Epa Nios fe ipanaka.

<sup>48</sup> “Ēfi nā mā piai keskaraki. Nā ea chanīmara faafo tii Epa Nios fe isharapakenakafo. <sup>49</sup> Nōko xinifo Moisés fe tsōa istoma ano ipaonifo. Nā pipaonifo, āfe ane mǎnā. Akka mǎnā pipaofinixakī mā nai mitokomenifo. <sup>50-51</sup> Ē nai mēranoax ēfe Epa Nios ika anoax oni. Ēfi na mā piai keskaraki. Nā ea chanīmara fai nāfi efe nīpanakakī. Nā nōko xinifāfe pipaonifo nai mēranoax pakeaito aatokai ato nimasharamisma. Iskaratīa afianā Epa Niospa nai mēraxō mato ināi a mā piai. Nā piāx yorafo isharapakenakafo anā nanakafoma. Ēfi nā mā piai keskaraki. Nāskakē ē keyokōi yorafo ē ato nāxoxii nisharapakexanōfo,” ixō Jesús ato yoini.

<sup>52</sup> Nikakani judeofo fochishpanā faatanānifo. “¿Afeskakō na feronāfāke āfe nami noko inātiromē nō pinō?” ikanax yoinānifo. <sup>53</sup> Jesús āfe namikiri keparanākī ato yoini: “Ē mato pāraima. Ēfi yōra fakekōiki. Mā ēfe nami piyamata ēfe imi ayayamata ikax mā nipaxatiroma. <sup>54</sup> Fatorafāfe ēfe nami pikani ēfe imiri ayakani isharapakexikakī. Nāskakē ē afianā nai mēranoax fotoaitīa a namisfo ē ato otofaxii Epa Nios ari nisharapakexanōfo. <sup>55</sup> Ēfe nami na mā piai keskara. Ēfe imiri a mā ayatiro keskara. <sup>56</sup> Fatorafāfe ēfe nami pikani, ēfe imiri ayakani, nāfo efe rafesharapakenakafo. <sup>57</sup> Akka ēfe Epa nīpanakato nāato ea nīchini. Nāskai ēri aōnoax nīpanaka. Nāskakē efe rafesharkanax eōnoax nīpanakafo.

<sup>58</sup> “Afianā ē mato yoi. Nōko xinifāfe a pipaonifo āfe ane mǎnā. Nā pifiakanax mā nai keyonifo. Akka ēfi Epa Nios ariax ē matoki oni. Ēfi a mā piai keskarakī. Ea pikanax eōnoax nisharapakenakafo,” ixō Jesús ato yoini. <sup>59</sup> Judeofāfe āto ichanāti pexe mēraxō Capernaúm anoxō āfe meka Jesús ato yoini.

### *Jesúsnoax yorafo nīpaxatirofo*

<sup>60</sup> Jesúsxō tāpimisfo a ranā yoinānifo: “A Jesús noko yoia keskara fekakōi. Tsōakai tāpitiroma. Nōkai na keskara meka nikamisma,” ikanax yoinānifo. <sup>61</sup> Jesús ato onāni a

ranā yoināifāfe. Akka atirifāfe Jesús nikapainifoma. Nāskaxō ato yoini: “¿A ě mato rama yoia keskara mā nikapaimamē? ¿Anā mā ea chanīmara faimamē? <sup>62</sup> Ě yōra fakekōi fiax a ě ipaoni ano nai mēra ě anā kaito mā ea ōiki, ¿mā ea chanīmara faimamē? <sup>63</sup> Akka Niospa Yōshi Sharapa nā fistichi yorafo nimasharapaketiro. Yorafokai yōra nimapaketiroma. Akka ěfe Epa Niospa Yōshi Sharaōxō ě mato yoimis. Nāskakē ěfe meka chanīmara faax mā nisharapakexatiro. <sup>64</sup> Nāskafekē fetsafāfekai ea chanīmara fakanima,” ixō Jesús ato yoini. Jesús taefakī ato ifini. “Fatotokai ea chanīmara fatama ea ato achimaximē,” ixō Jesús tāpiyoni. <sup>65</sup> Askaxō anā ato yoini: “Ě mato yoia iskafakī, Epa Niospa āto ōiti mēra ato shināmayamaino ea chanīmara fatirofoma,” ixō ě mato yoia.

<sup>66</sup> Nāskaxō Jesús ato yoiai keskara nikakaxō a chīfamisfāfe Jesús potakaxō anā tananifoma. <sup>67</sup> Akka Jesús a aōxō tāpimis doce ato ifini. Afetīama ato ifiyoni aōxō tāpimisfo inōfo. Nāskaxō ato yoini iskafakī: “¿Māri emakinoax kapaimē?” ato faino, <sup>68</sup> Pedro kemani: “Ifo, nō fato fetsakai Ifofatiroma. Mī fistichi mī noko yoitiro afeskax nō isharapakexatiromākī. <sup>69</sup> Mīfi mī Nios ariax nokoki oniki. Mīfi sharakōi Cristokī. Nios nā nipanakato nāato āfe Fakekōi mī. Nā nō chanīmara fai,” askafaito, <sup>70</sup> “Ě mato doce feronāfake ifini mā eōxō tāpimis inō. Akka ě mato ififinino a mato fe rafea fetsa mā a mēra Satanás chaka nanea,” ixō Jesús ato yoini. <sup>71</sup> Nā Simón Iscariote āfe fake Judas ini. Nā Judasnoa Jesús ato yoini. Jesús nā Judasri ififinino nāato Jesús ato achimani fetsafāfe retenōfo.

## 7

### *Jesús āfe extofāfe chanīmara fanifoma*

<sup>1</sup> Askata Jesús Galilea ano kafāsani ato tāpimafofāsafai. Judea ano kayopainima judeofāfe āto xanīfofāfemāi retepaiyaifono. <sup>2-5</sup> Judeofāfe āto xinifāfe tapas fapaonifo shinākakī fista anifo. Askata judeofo ichapa rasi Judea mai ari Jerusalén anoxō fista aki fokani fonifo. Mā fista chaima ikaino Jesús Judea mai ari kayotama, Galilea ano nēteni. Āfe extofori nā Galilea ano afe inifo. Āfe extokōifofiakaxō Jesús kai nafi Cristoki Niospa nīchini ixō tsōa chanīmara fanifoma. Nāskaxō yoinifo iskafakakī: “Nonoax Judea mai ano katāfe nā mia Ifofamisfāfe nā mī ato axomis keskara ōinōfo. Nā mī amis keskara mī ato ōimanamano fetsafāfekai mia tāpitirofoma. Nā mī afama mīshti akaifo ato ispatōfāfe,” faifāfe <sup>6</sup> ato kemani: “Ě iskaratīa ari katiroma. Ěfe Epa ea nīchiyoima. Akka afetīara kapai mā katiro,” ato fani. <sup>7</sup> “Na yorafāfekai Epa Nios yafi ea chanīmara faafoma. Nāfāfe ea noikaspakani. ‘Māfi afarafo chakafamis,’ ě ato famis. Nāskakē ea noikaspakani. Akka mato noikaspakanima. <sup>8</sup> Akka māri fista axiki Jerusalén ano fotakāfe. Ě kayoikaima. Ěfe Epa Niospa ea nīchiyoima,” ixō Jesús āfe extofo yoini.

<sup>9</sup> Mā ato yoita Galilea ano Jesús nēteni.

### *Jesús kani fista akikai*

<sup>10</sup> Nāskata mā āfe extofo fista akikai, Jerusalén ano foafono Jesúsri chipo kani. Tsōa tāpiamano onekōi Jerusalén ano kani. <sup>11</sup> Nānoxō nā judeofāfe āto xanīfofāfe Jesús fenakani yoinānifo: “¿Fanīmē nā feronāfake?” fanifo. <sup>12</sup> Nāno yora ichapa rasi inifo. Atirifāfe iskafanifo: “Jesús feronāfake sharakōi,” ikaxō yoinifo. Askafafiaifāfe atirifāfe yoikī iskafanifo: “Maa. A feronāfakekai sharama. Yorafo pāramis,” ikaxō yoinifo. <sup>13</sup> Nāskax a ranā yoinānifo judeofāfe ato nikayamanōfo judeo xanīfofoki mesekakī.

<sup>14</sup> Fista mitokomeamano Jesús Nios kīfiti pexefā mēra ikikaini a mēraxō ato yoixikī. <sup>15</sup> Judeofāfe āto xanīfofāfe nikakaxō yoinifo: “Aira. Nikakapo. ¿Afeskakī na feronāfāke kenekī tāpikī finayamafixō tāpifinakōiamē?” ikanax yoinānifo. <sup>16</sup> Nā yoiaifo keskara onāxō Jesús ato yoini: “Ěfe shināmā shinākōixō ě mato yoima. Epa Niospa ea nīchini nā ea shināmanai keskara ě mato yoi. <sup>17</sup> Fatotora a Niospa yoiai keskara apaikī tāpitiro akka ěa ě shināxō ě mato yoima, Epa Niospa ea shināmanaino ě mato yoi. <sup>18</sup> Fatora

yora fētsa āfe shināmā shināxō āakōi ato yoi. Nāato yorafo shināmapai iskafakī: ‘Nā feronāfāke mekakī tāpikōia, ea fanōfora,’ ixō anori ato shināmapai. Akka yōra fētsa āa āfe shināmā shināx mekaime. A nīchinio shināmanaino mekaime, a nīchini fisti yoisharanōfo. Nāskakē nā yōra ato chanīkima yoi, ato pāraime. <sup>19</sup> Nōko xini Moisés Niospa meka mato kenexoni. Akka mā nikasharamisma. Nāskakē pena tenetitīa ē feronāfake sharafaano mā ea retepai,” ato faino, <sup>20</sup> “Kee. Tsoakai mia retepaima. Mī mēra niafaka yōshi chaka nanea,” faifāfe <sup>21</sup> ato kemani: “Ē feronāfake pena tenetitīa sharafaino akka mā ea yoikī iskafamis: ‘¿Afeskakī Jesús pena tenetitīa feronāfake sharafaimē?’ ixō mā eōnoa yoimis. <sup>22</sup> Ē pena tenetitīa afara shara faa keskafakī māri pena tenetitīa afara memis. Moisés kirika kenekī yoini keskafakī māri mātō fake feronāfakefo rama kākē mā ocho nia oxano mātō fake feronāfakefo mā foshki repa xatemis. (Akka Moisés kai askara noko yoinima, nōko xinifāfe askara yoinifo.) Akka iskaratīa pena teneti ikaino mā mātō fake feronāfakefo mā foshki repa xatemis.

<sup>23</sup> “Moisés yoini keskara nikakī pena tenetitīari mā mātō fake feronāfakefo mā foshki repa xatemis. Akka, ¿afeskai mā ekeki ōitifishkikimē na pena tenetitīa ē na feronāfake sharafaano? <sup>24</sup> Nāskakē a yōra afara shara fakē ōixō yoikī iskafayamakāfe: ‘Nāto afara chakafai kiki,’ fayamakāfe. Mēstekōi yoisharakāfe,” ixō Jesús ato yoini.

### *“Ē ēfe Epa Nios ariax ē oni,” Jesús ato fani*

<sup>25</sup> Askata yora rasi Jerusalén ano ikanax yoinānifo: “¿A na feronāfakemē xanīfofōfāfe retepaiyaifo?” ikanax yoinānifo: <sup>26</sup> “Ōikapo, yorafā rasichi ōifiaifono mā ato yoi. Akka tsōakai afaa faima. Mā xanīfofōfāfe mā tāpiafo rakikīa nā Cristo, a Niospa nokoki nīchini. <sup>27</sup> Ētsa, aama rakikīa Cristo. Cristo oaito nō tāpitiroma fakiranoax oi. Akka na feronāfake mā nō tāpia fakiax oamāki,” ixō yoinifo.

<sup>28</sup> Askafaifāfe nikaxō Nios kīfiti pexefā mēra ikixō Jesús ato yoini iskafakī: “Chanīma, mā mā ea tāpia ē fakiax oamē,” ato fani. “Akka ēa ēfe shināmā shināx ē oama. Akka ēfe Ēpa ea nīchini. Nāfi chanīmismaki. Akka māfi ēfe Epa mā tāpiama. <sup>29</sup> Ē ēfe Epa ariax oni. Nāato ea nīchini. Nāskakē ē a tāpikōia,” ixō Jesús ato yoini.

<sup>30</sup> Ato askafaito nikakani akiki ōitifishki ikakī achipainifo karaxa mēra ikimapaikakī. Akka a reteaifo āfe pena nokoamano achipainifo. Tsōakai Jesús afeska fanima. <sup>31</sup> Nā yorafā rasichi Jerusalén anoafāfe yoinifo: “Tsoa fētsa atiroma keskara fakī Jesús Niosxō afama mīshti noko ispa. Nā Jesús afama mīshti fai tsōa atiroma keskara fakī. Akka yora fetsa oax āa iscai yoi: ‘Ēkīa Cristo,’ iki yoi. Akka atokai afama mīshti fakī Jesús finōtiroma,” ikanax yoinānifo. Nāskakī Jesús chanīmara fanifo.

### *Fariseofāfe āto inafō nīchinifo Jesús achitanōfo*

<sup>32</sup> Nā yorafā rasichi Jesúsnoa meka shara yoiaifāfe fariseofāfe nikanifo. Nāskaxō judeofāfe āto xanīfofo feta fariseofāfe a Nios kīfiti pexefā kexemisfo nīchinifo Jesús achitanōfo karaxa mēra ikimaxikakī.

<sup>33</sup> Askata Jesús ato yoini: “Ē anā nono mato fe samarakaima. Ē samamashta kai a ea nīchini shināfāini. <sup>34</sup> Ē mato anoax kaino mā ea fenakī mā ea fichitiroma. A ē kai arikai mā katiroma,” ixō Jesús ato yoini.

<sup>35</sup> Ato askafaito nikakanax judeofāfe āto xanīfofo yoinānifo: “¿Faki na feronāfake kaimē nō fichitiroma? Nā nōko kaifo griegofo nā peke rasi anoax paxkafainifo nāno kai rakikīa. Nānoxō griegofo tāpimaxikī kai rakikīa,” fanifo. <sup>36</sup> “¿Afaa noko yoipaimē iskafakī? ‘Mā ea fenafikikai mā ea fichitiroma. Ē ika arikai mā katiroma,’ ixō noko yoiai. ¿Afaa noko yoipai iskaimē?” ikanax yoinānifo.

### *Niospa Yōshi Sharapa yorafo nimapaketiro*

<sup>37</sup> Askata mā fista mitokomeaino Jesús nā yorafā rasi mēraxō niinākakā fāsi mekainākakā ato yoini iskafakī: “Nikakapo. Nā mā nōamā iki faka ayapaiyai keskai

ekeki fekāfe. <sup>38</sup> A ea chanīmara faafāfe Niospa meka kenenifo keskara yora āfe xaki mēra faka poyo poyo iki netsotiroma keskara shara itiro ea Ifofaax,” ixō āfe Yōshi Sharaki keparanākī Jesús ato yoini. <sup>39</sup> Akka faka ato yoinima, Niospa Yōshi Sharaōnoa ato yoini iskafakī: “A ea chanīmara fai ēfe Epa Niospa āfe Yōshi Shara fe rafepakenaka,” ixō Jesús ato tāpimani Apa Nios ari kayoxoma yorafāfe āto xanīfokōi ixikī. Nāskakē Jesús kayoamano Niospa āfe Yōshi Shara ato fe rafeama.

*Jesúsnoa yoinifo. Askafikaxō anoris shinānifoma*

<sup>40</sup> Jesús nikakaxō atirifāfe yoinifo: “Chanīmakōi nā feronāfake Niospa meka yoimis a nō manai,” ikanax yoinānifo. <sup>41</sup> Atirifāferi yoinifo: “Nāfi Cristoki,” ixō yoinifo. Akka fetsafāfe yoini: “Maa, nakai Cristoma. Cristokai Galilea anoax kāitiroma. <sup>42</sup> Niospa meka kenenifo keskara, ‘David āfe fena inō Cristo. Nā David ipaoni Belén ano. Nānoaxri Cristo kāixira,’ ixō kirika kenenifo. Akka Cristokai Galilea anoax kāitiroma,” ixō yoinifo. <sup>43</sup> Nāskakē nā yorafāfe Jesúsnoa nikakaxō anoris shinānifoma. Fetsafāfe Jesús chanīra fanifo, fetsafāferi chanīmara fanifo. <sup>44</sup> Atirifāfe Jesús achipainifo karaxa mēra ikimapaikakī. Achipaifikakī tsōa Jesús afeska fanima.

*Judeofo āto xanīfofāfe Jesús chanīmara fanifoma*

<sup>45</sup> Askata fariseofāfe āto Nios kīfiti pexefā kexemisfo fenifo. Āto xanīfofoki feaifono ato yōkanifo: “¿Afeskakī mā Jesús achiamamē noko efexoxikī?” ixō ato yoinifo. <sup>46</sup> Ato askafaifono ato kemanifo: “Na feronāfake āfe meka sharakōi, tsōa anori yoimisma,” ato fanifo. <sup>47</sup> Ato nikakaxō fariseofāfe ato yoinifo: “Kee, Jesús mā matori pāra. <sup>48</sup> Akka nōfi māto xanīfofo feta a Moisés kirika keneni nō tāpikōiakī. Akka nō fatotokai nō Jesús chanīmara faima. <sup>49</sup> Akka nā yorafāfe mā rama Jesús nikafo nāfāfe a Moisés kirika keneni tsōa tāpiafoma. Niospa ato omiskōimaxiki,” ikaxō ato yoinifo.

<sup>50</sup> Askafafiaifono Nicodemo taeyoi nāto pena fetsa Jesúski kani fakishi afara yōkaikai. Nārimāi fariseoax nāskaxō afe rafeafo yoini: <sup>51</sup> “Efe yora mīshtichi, ē mato yoinō. Nōko xinifāfe āto xanīfofāfe yoinifo keskara nō fatora feronāfake nikasharayamaxō, ‘Afara chakafaira,’ nō fatiroma iskafakī: ‘Nāto afarafo chakafai kiki nō omiskōimanō,’ ixokai nō askafatiroma,” ato askafaino kemanifo: <sup>52</sup> “Mī noko yoi Galilea anoxō yoiaifo keskara. Galilea anoxō Niospa meka tāpiafoma. Shināpo. Fato feronāfakekai a Galilea anoxō Niospa meka yoimis oama. Akka nono fistixō Niospa meka noko yoitirofo,” ikaxō Nicodemo kemanifo.

<sup>53</sup> Nāskax yoinākanax āto pexe rasi ano fonifo.

## 8

*Kēro āfe fenema fe ikaito xanīfofāfe retepainifo*

<sup>1</sup> Nāskata Jesús machi āfe ane Olivos ano kani. <sup>2</sup> Penaino Jerusalén ano nokoax anā a Nios kīfiti pexefā mēra Jesús oni. Nāno yorafā rasi afianā akiki fenifo nikai fekani. Askata tsaoxō ato yoini.

<sup>3</sup> Ato yoiaino a Moisés yoikī kirika keneni keskara ato tāpimamisfo fe fariseofo fenifo. Kēro āfe fenema fe ikaito fichikaxō Jesúski efenifo. Yorafā rasi nēxpakīa kēro nīchinifo keyokōichi ōinōfo. <sup>4</sup> Askafakaxō Jesús yoinifo: “Maestro, na kēromā afarafo chakafaa. Āfe fenema fe ikaito nō fichia. <sup>5</sup> Moisés iskafakī noko yoini: ‘Kēro āfe fenema fe ikaito ōikī nō tokirinī tsakakī retetiro,’ ixō Moisés noko yoini. Akka, ¿mī noko afaa faimē?” fanifo.

<sup>6</sup> Nāskaxō Jesús kemamapainifo, “Fakiri noko yoimāikai,” ikaxō āto xanīfofo yoipaikakī. Askafaifono Jesús āfe mēkemā mai keneni. <sup>7</sup> Yōkarifaifono Jesús atoki finināka fāto ato yoini iskafakī: “Fatotokai mā afaa chakafamismamē na kēro mā tokirinī tsakakī taefai,” Jesús ato fani.

<sup>8</sup> Mā ato yoixō afianā āfe mēkemā mai keneni. <sup>9</sup> Nāskano mā ato yoiaito nikakaxō a Jesús mai keneai ōikanax nā kēro mekakakī chakafamisfo fisti rasi tsekefaifānifo. Nā

anifo tii foi taenifo. Chipa naetapafo fonifo. Mā foafono Jesús fisti nāno kēro fe nēteni. <sup>10</sup> Nāskax Jesús finināakafā nā kēro yōkani: “¿Nā feronāfakefo mia yōafo mā foafomē? ¿Tsoa fisti nēteamamamē anā mia yōaxikakīma?” ixō Jesús yōkaito, <sup>11</sup> “Ífo, tsoa pishta nēteama,” faito, “Ērikai mia mekafakī chakafaima. Iskaratīa mī katiro. Afianā mī chaka ipaoni keskara anā askayamafe,” ixō Jesús nā kēro yoini.

### *Jesús pena xafashara keskara*

<sup>12</sup> Askata mā kēro kaano Jesús yorafā rasi yoini. Ato yoini iskafakī: “Ēfi pena keskarakī. Ē nā yorafo tii imasharatiro shara ĩpaxanōfo, anā fakish keskara inōfoma. A ea Ifofai fenotiro,ma,” ixō Jesús ato yoini. <sup>13</sup> Nikakakī fariseofāfe yoinifo: “Na mī noko yoiyai anorikai tsōa mīōnoa noko yoima. Mīa mī yoimei. Akka a mī noko yoiyai tsōa mia nikatiroma,” faifāfe <sup>14</sup> Jesús ato kemani: “Ē fakiax oamē fakiri ē kaimē mē tāpia. Akka ēa ē yoimeai ēfe meka chanīmakōi. Askafiax fakiax ē oamē ē fakiri ē kaimē mā kai tāpiama. <sup>15</sup> Mā ea tāpixoma, mā ēfe meka chanīmara faima. Ea tāpixoma mā ea shināi oa chanīai keskara ē mekaito. Mā askara shināi Niospa mato askara anori shināmanainoma. Ē kai tsoa mekafakī chakafaima. <sup>16</sup> Akka, ‘Na yorafāfe afara chakafamisfo,’ ēa ē mato faima. Ēfe Epa shināi keskara nānorikōiri ē mato yoi. Askaxō chanīmakōi ē yoimis. Ēfe Epa nāato ea nīchini, nā ea tāpimanai ē yoimis. <sup>17</sup> Moisés mato yoini iskafakī: ‘Feronāfake rafeta nānoris mato yoiāito mā nikatiroma,’ ixō mato Moisés yoini. <sup>18</sup> Akka ēakōi ē yoimei. Akka nā ea nīchinito ēfe Ēpari eōnoa nānorikōi yoimis,” ato faito, <sup>19</sup> nikakakī yōkanifo: “¿Fanīmē mī Epa?” faifāfe, “Mā kai ēfe Epa yafi mā ea tāpiama. Ea tāpixō ēfe Epari mā tāpikerana,” ixō ato Jesús yoini.

<sup>20</sup> Nios kīfiti pexefā mēraxō ato yoini. Nāno nā kene mēra judeofāfe āto kori naneti ini. Niospa meka yoimisfo ato ināmisfo. Jesús ato yoiaino judeo xanīfofofāfe achipainifo. Askafixō tsōa achinima āfe penakairoko nokokē achipanāfāfe.

### *Jesús yorafo yoini: “Ē kai arikai mā katiroma,” ato fani*

<sup>21</sup> Askata Jesús afianā judeofo āto xanīfofo yoini: “Ē chai mē kai. Ē kaano mā ea fenafikī mā ea fichitiro. Māto chaka soaxoma nāskax mā nai. Ē kai arikai mā nokotiro,ma,” ixō Jesús ato yoini. <sup>22</sup> Jesús ato askafaito nikakaxō yoinifo: “¿Akōi retemeimē? Nā noko yoiyai: ‘A ē kai ari mā nokotiro,ma,’ noko fai,” ikanax judeofo xanīfofo yoinānifo.

<sup>23</sup> Jesús ato tāpixō ato yoini: “Māfi na mai anoakī. Akka ēfi nai mēranoakī. <sup>24</sup> Nā ēa ē yoimea keskara māto chaka potaxma mā nai eakairoko mā ea chanīmara faax. Nāskakē afara chakafaxō māto chaka soaxma mā naax Epa Nios ari mā nokotiro. Mā mā naano māto chaka mato fe ipanaka.”

<sup>25</sup> Ato askafaito kemanifo: “¿Mī tsoamē?” ixō yōkaifāfe, “Nā ē mato yoitaifamis ekīa. <sup>26</sup> Matoōnoa afama mīshti ē yoitiro. A mā afara chakafamis ē yoitiro. A ea nīchinito ea yoiāito ē nikai. Nāskakē nā ē mato yoifafāini. A ea nīchinito yoiyai chanīmakōi,” Jesús ato fani.

<sup>27</sup> Apa Niosnoa ato yoifiaitokai tsōa tāpinifoma. <sup>28</sup> Nāskaifāfe Jesús ato yoini: “Ēfi yōra fakekōiki. Mā ea ifi cruz ikakī mastaxō mā ea fininīfofāxō mā ea ōixii ē tsoamāki mā ea tāpitiro. Nāskatari eōnoa mā tāpitiro ēa ē mato yoimisma. Epa Niospa ea yoiāi keskara ē mato yoimis. <sup>29</sup> Nā ea nīchini efe ika. Eres ē ikama. A ea amapaiyai keskara ē amiski. Nāskax ekeki inimasharamiski,” ixō ato Jesús yoini. <sup>30</sup> Yoiāito nikakaxō yora ichapato chanīmara fanifo.

### *Niospa fakefāfe Nios āto Ifo, akka afara chakafamisfāfe afara chaka āto ifo*

<sup>31</sup> Nāskaxō Jesús a chanīmara faafo yoini: “Ē mato yoiāito mā ea nikasharakōiax mā eōxō tāpimiskōifo mā itiroki. <sup>32</sup> Ēfe meka nikakōixō mā Nios tāpitiro, Nios chanīmisma. Askax mā isharatiro. Afara chanī māto ifo itiro,ma.”

<sup>33</sup> Ato askafaito kemanifo: “Nōfi Abraham āfe fenaki. Fato fetsa nōko ifo imisma. Nōkai tsōa yonomatifoma. ¿Afeskakī ‘Afara chanī mātō ifo itiroma’ noko Jesús faimē?” fanifo.

<sup>34</sup> Askafaifāfe anā Jesús ato yoini: “Chanīmakōi ē mato yoi. Nā afara chakafamisfāfe nā chaka āto ifo ixii. <sup>35</sup> Mā mā tāpia peXe ifāfe āfe yonomati āfe peXe mēra ipaxatiroma. Akka āfe fake fisti āfe peXe mēra ipaxatiro. <sup>36</sup> Nāskarari Niospa Fāke mato chaka soaxonano afara chaka mātō ifo itiroma. Niospa mato fakekōifai, mā afe isharakōipakenaka. <sup>37</sup> Mē mato tāpia mātō xini Abraham. Āfe fenafofiāxō ēfe meka mā nikakaspai. Nāskaxō mā ea retepai. <sup>38</sup> Ēfe Epa amis keskara mē ōimis. Nāōnoa ē yoimis. Māri a mātō epa mato yoimis keskara māri yoimis,” ato faito, <sup>39</sup> kemanifo: “Akka nōko xini Abraham,” faifāfe, “Akka mā Abraham āfe fenafofōi ¿afeskai mā Abraham apaoni keskara mā amismamē? <sup>40</sup> Epa Niospa ea yoimis keskara chanīma ē mato yoifiaino mā ea retepai. Abrahamkai mato keskara ipaonima. <sup>41</sup> Mātō epa akai keskara māri mā amiski,” ato faito, “Nōkai Epa ichapayama. Nōko Epakōi fisti Nios. Nōfi āfe fakekōifoki,” faifāfe <sup>42</sup> Jesús ato yoini: “Ēfi Nios fe imiski. Ē Nios ariax oni. Ēa shināx na mai ano ē onima, ēfe Ēpa ea nīchini. Akka mātō Epa Nioskē mā ea noikerana. <sup>43</sup> ¿Afeskakī ēfe meka mā nikaimamē? A ē mato yoiaito mā nikakaspai. <sup>44</sup> Akka mātō epa Satanás. Mā āfe fakekōifo. Nāskaxō mātō epa apaiyai keskara māri mā apai. Nāfi taeyoi retemitsamis iyopaoni. Afi iskaratīa nāskara. Atokai afara shara yoimisma, chanīkōi. Āfe shinā mēraxō chanī fisti shināmis. Nāskaxō chanī fisti yoimis. Nā chanīai shināifāfe nā chanīmis nāfi āto apaki. <sup>45</sup> Nā keskara chanī ē mato yoiyamafaito mā ea chanīmara famisma. <sup>46</sup> Ē afaa chakafaito mā ea ōimisma. Ēkai afaa chakafamisma. Ramashara ē chanīmisma. Ē askafiaito mā ea chanīmara famisma. <sup>47</sup> Nā Nios fe rafeafāfe Niospa meka nikatirofo. Mākai Nios fe rafeama. Nāskaxō mā āfe meka mā nikaima,” ixō Jesús ato yoini.

### *Abraham fakeamano Cristo Apa fe iyopaoni*

<sup>48</sup> Judeofāfe Jesús kemanifo: “Chanīma nō yoimis. Mīfi samāritanō chakaki. Askatari mī mēra niafaka chaka nanea,” faifāfe, <sup>49</sup> “Niafaka chaka ē mēra naneama. Ē ēfe Epa Niosnoa meka shara ē yoimis. Akka māfi eōnoa meka chaka yoimis. <sup>50</sup> Askafixō, ‘Ea yoisharakāfe,’ ē yorafo famisma. Ēfe Epa Niospa meka shara eōnoa ato tāpimapai. Nāato ato yoitiro fatofomāki yora sharafo, fatoforimāki yora chakafo. <sup>51</sup> Chanīmakōi ē mato yoinō. Nā ēfe meka nikaifo nakanamax nīpanakafo,” ato faito kemanifo, <sup>52</sup> “Iskaratīa mā nō mia tāpikōi mīfi niafaka chakaya. Akka mā Abraham nani, Niospa meka yoimisfori mā nanifo. Nāskafikē mī noko yoia: ‘Nā ēfe meka nikakōiaifo nātamaroko nīpanakafo,’ ixō mī noko yoi. <sup>53</sup> Mā nōko xini Abram nani. Niospa meka yoimisfori mā nanifo. ¿Akka mī Abram finōkōiamē? ¿Mī shināimē ‘Ē ato finōara’ iki?” faifāfe, <sup>54</sup> Jesús ato kemani: “A ēa ē yoimesharai ēfe meka sharama. Akka ēfe Ēpa eōnoa yoisharai. Mā a yoimis: ‘Nōko Epa Nios,’ fakī. <sup>55</sup> Mākai ēfe Epa Nios tāpimisma. Akka ēfi ēfe Epa tāpikōia. Akka ē mato keskaraxō, ‘Ēfe Epamara,’ ē fakerana mato keskara chanīmis ē ikerana. Askatamaroko ēfe Epa Nios ē tāpikōia. Ea yoiai keskara ē amis. <sup>56</sup> Mātō xini Abram yoini: ‘Cristo oaito ē ōixii,’ ixō yoi inimani. Mā ē oaito ea ōini askax fāsi inimani,” ato faito, <sup>57</sup> “Mīkai cincuenta xiniya akama. Mīkai nōko xini Abram ōimisma. Afetiakai nanima. Akka, ¿afeskakī, ‘Ē Abram ōimis,’ ixō mī noko yoimē?” faifāfe, <sup>58</sup> “Chanīmakōi ē mato yoinō. Abram fakeamano ēfi iyopaoniki,” ixō Jesús ato yoini.

<sup>59</sup> Askaito nikakani nā judeofāfe āto xanīfofo ōitifishkikaxō tokiri fikaxō Jesús tsakapainifo. Askafapaifiaifono Jesús ato makinoax yamarisatani, Nios kīfiti pexefā mēranoax. Kaitokai tsōa ōinima.

## 9

### *Feronāfake fēxo kāini Jesús sharafani*



<sup>1</sup> Jesús kakĩ feronãfake fêxo nãskarapa kãini fichini. <sup>2</sup> Ōikakĩ aõxõ tãpimisfãfe yõkanifo: “¿Maestro, afeskai na feronãfake fêxo kãinimẽ? Afara chakafakatsaxakĩ ikaraka, apa feta ãfa afara chakafamisfono ikaraka,” ixõ Jesús yõkanifo. <sup>3</sup> “Afara chakafayamafikatsaxakĩ nãskarapa fêxo kãini. Apa feta ãfari afara chakafamismo nã feronãfake fêxo kãini. Nãskarapa kãini. Akka Niospamã afama mĩshti fatirokẽ nãskax fêxo kãini ato õimasharaxikĩ. <sup>4</sup> Niospa ea nĩchini ã yonoxonõ. Nã ã akaitĩa ã yonoxotiro. Akka fakishikai nõ yonoxotiroma. Nãskarifiakĩ mã nõ naxõ nõ anã Nios yonoxotiroma. <sup>5</sup> Ë nono mai ano iyoax ã pena keskara. Ë ato õimayoi afeskax isharakanimãkai,” ixõ Jesús yoini.

<sup>6</sup> Nãskara yoita maiki kemo mechota a mai kemõ mechanafaxõ a feronãfake fêxo aõ fetekere ani. <sup>7</sup> Askafata, “Iamã fechokometãfe,” fani. Nã iamã ãfe ane Siloé, ãto mekapa anemisfo na Siloé ãfe ane “Nĩchia” famisfo.

Nãskata fêxo iamã kaax fechokomeni. Fechokomexõ õiakefaini. Nãskax oni. <sup>8</sup> Nãskata nã chaima nikafãfe a õimisfãferi yoinifo: “Nã fêxo tsaoax afara yõkakameaito nõ õimis. ¿Nãmẽ?” faifãfe <sup>9</sup> atirifãfe, “Nãkĩa,” fanifo. Atirifãfe yoinifo: “Akerokõi,” fanifo. Nãskafikaxõ yoinifo: “Nã keskarakõi,” faifãfe, ato yoini: “Ëkĩa. Ëfi fêxo iyopaoniki. Nãskafixõ iskaratĩa mẽ õisharai,” ato faito, <sup>10</sup> “¿Afeskaxõ mã iskaratĩa õisharaimẽ?” faifãfe, <sup>11</sup> “Nã feronãfake ‘Jesúsra’ faifãfepi ãfe kemõ mai mechanafaxõ ea fetekere axõ: ‘Nã Siloé iamã fechokometãfe,’ ea faano, Siloé iamã fechokomexõ ã õishara,” ato fani. <sup>12</sup> Ato askafaito nikakaxõ, “¿Fanimẽ a feronãfake Jesús?” faifãfe, “Ëtsa ã tãpiama. Mã fakira kaa,” ato fani.

*Nã fêxo kãinito õisharaino fariseofãfe a yõkanifo.*

<sup>13</sup> Askaito yorafãfe nã feronãfake fêxo iyopaoni fariseofo ano iyonifo. <sup>14</sup> Jesús nã feronãfake pena tenetitĩa sharafani. <sup>15</sup> Fariseofãfe nã feronãfake anã yõkanifo: “¿Afeskax mã fero sharamẽ?” faifãfe, “Ea Jesús sharafaa ãfe kemõ mai mechanafaxõ ea aõ fetekere akano. Ë iamã fechokomexõ ã õisharakõia,” ato fani.

<sup>16</sup> Nikakakĩ fariseo fetsafãfe yoinifo: “Akai Nios fe rafeama. Moisés kirika kenexõ noko yoini iskafakĩ: ‘Pena tenetitĩa nõ yonotiroma,’ ixõ yoini. Nãskakẽ nõ yora sharafatiroma pena tenetitĩa,” faifono, fetsafãfe ato kemanifo: “Akka yora chakapa fêxo sharafatiroma. Yora chakapakai nãato akai keskara fatiroma,” ikanax fariseofo fochishpanã faatanãnifo. Atirifãfe fariseofãfe yoinifo: “Jesúska sharama,” faifono, atirifãferi, “Jesús sharaki,” fanifo. <sup>17</sup> Nãskata afianã fariseofãfe a yora fêxo ipaoni yõkanifo: “Mã noko yoia, ‘Nãto ea fero sharafaxõa,’ fakĩ. ¿Akka afa mã shinãmẽ tsoamãki?” faifãfe, “Nã Nios ato yoixomisto ea sharafaa,” ato fani.

<sup>18</sup> Ato askafaito nikakakĩ judeo fetsafãfe, “A chanĩa,” fanifo. “Na fêxo ipaonima,” ixõ. Nãskaxõ fariseofãfe apa yafi afa kenaxõ yõkanifo. <sup>19</sup> “¿Namẽ mã fake fêxo ipaoni? Akka, ¿afeskakĩ iskaratĩa õimẽ?” faifãfe, <sup>20</sup> “Nãkĩa nõko fake, nã fêxo kãini. Mã nõ tãpia nõko fake. <sup>21</sup> Tiiri afeskara axora mã õi nõkai tãpiama. Akka fakefomaki, xiniki mato yoitiroki afeskax sharamãki. Yõkakãfe,” afa feta ãpa ato fani. <sup>22</sup> Judeofoki mesekakĩ nãnori yoinifo. Akka judeo xanĩfãfe yoiyoni iskafakĩ: “Tsõa yoitiro: ‘Epa Niospa Jesús nĩchini nõko Ifo Cristo inõ,’ ixõ yoitiro. Akka askara yoixõ anã nõko ichanãti pexe ano ikitiro,” judeo xanĩfãfe anori ato yoiaino nã fêxo ipaonito ãfe afa fe ãfe apa mesenifo. <sup>23</sup> Nãskaxõ ato yoinifo: “Xiniki fakefomaki. Yõkakãfe,” ato fanifo.

<sup>24</sup> Nãskata fariseofãfe nã feronãfake fêxo ipaoni yõkanifo: “Noko yoikĩ iskafafe: ‘Niospa ea sharafaa,’ ife,” fanifo. “Jesúska sharama. ‘Niosfi sharaki,’ ife. ‘Jesús sharara,’ fayamafe. Nõ tãpia Jesús chakaki,” fanifo.

<sup>25</sup> “Ëtsa. Ë tãpiama chaka iyamai shara rakikĩa. Ë tãpia ã fêxo iyopaoni ã iskaratĩa õisharai. Nã fisti ã tãpia,” ato faito, <sup>26</sup> “¿Afeskafaxõ mia sharafaamẽ?” ixõ yõkaifãfe, <sup>27</sup> “Ë mato yoiaito, ¿mã ea nikamamẽ? ¿Afeskakĩ mã afianã ea yõkaimẽ? ¿Mãri aõxõ tãpimis mã ipaimẽ?” ato faito, <sup>28</sup> nikakakĩ ãchaketsanifo. Nãskaxõ yoinifo: “Mifi a Ifoiaikai. Akka nõfi

Moisés meka nikamiski. <sup>29</sup> Nō tāpia Moisés Nios fe mekapaoni. Nōkai na Jesús tāpiama. Fakira anoax oa afe keskarara a feronāfake nō tāpiama,” faifāfe anā ato kemani: <sup>30</sup> “¿Mā tāpiamamē fakira anoax oxō ea sharafaa ē fēxokē? <sup>31</sup> Nō tāpia yōra chakafamisfokai Niospa ato nikapaitiroma. Fatorato Nios Ifofasharapai isharatiro. Nāskara Niospa nikapai. <sup>32</sup> Nā Niospa mai onifani chāikakai nō afaa nikayomisma yora fēxo kāini tsōa sharafai. Akka iskaratīa mā ea Jesús sharafaa. <sup>33</sup> Na feronāfake Niospa nīchiyamanokai afaa afeskafakeranama,” ato faito, <sup>34</sup> nikakani akiki ōitifishkinifo. “Mīfi chakakōi kāini. ¿Afeskakī mī noko tāpimapaimē mī chakafixō? Anā nōko ichanāti pexe mēra mī ikitiroma. Nonoax kariskatāfe. Nōkai anā mia ōipaima. Anā nōko ichanāti pexe mēra ikiyamafe,” fanifo.

### *Fatorafāfe Jesús chanīmara fayamakanax nā yora fēxo keskarakōifo*

<sup>35</sup> Nāskano nā fēxo imis āto ichanāti pexe mēraxō potaifāfe nikafaini Jesús kani. Nāskaxō fenakī a fēxo imis fichini. Fichixō yōkani: “¿Mī Niospa Fake chanīmara faimē?” ixō yōkaito, <sup>36</sup> “¿Fatomē ē chanīmara fanō?” faito, <sup>37</sup> “Nā mī ea ōi. Ēkīa,” Jesús fani. <sup>38</sup> Askafaito ratokonō mai chachipakefōfā yoini: “Ifo, ēfi mia chanīmara faikai. Mī fāsi sharakōi. Ē mia Ifofai. Mī Niospa Fakeki,” ixō yoini.

<sup>39</sup> Askata chipo afianā yorafo akiki feafāfe Jesús ato yoini iskafakī: “Ēfe Epa Nios ika anoax ē nono mai ano oni. Fato yorafomāki a ea nikayamaifo, fatoforimāki a ea nikaifo ē ato ōiyoi oni. Fatatora shināi iskaito: ‘Mē afara chakafamiski. Ea chaka soaxope,’ ixō anori shināito ē āfe chaka soaxotiro afianā afara chakafayamanō. Ē na fēxo fero sharafaxōa keskakakī ē yorafo āto chaka soaxotiro shara inōfo. Akka fetsafāfe shināi iskakani: ‘Ē afaa chakafamisma, ē yora sharakōi. Ē tāpikōia,’ ixō shinākani. Askarafofi yora fēxo keskarafokī, a ato sharafamis ano fopaikanima ato sharafapanā. Nāskarafāfekai yoipaikanima āto chaka soapaikanima. Nāskarafo fenopakenakafo,” ixō Jesús ato yoini. <sup>40</sup> Fariseofāfe a Jesús yoiai nikakaxō yōkanifo: “Kee. ¿Mī noko yoimē nōmē fēxo?” faifāfe <sup>41</sup> Jesús anā ato yoini: “Mā ea yoikerana: ‘Nō fēxo keskarafo. Mā nō afara chakafamis,’ ixō mā ea yoiaito ē mato chaka soaxokerana. Akka mā kai ea askafamisma. Mā yoimis: ‘Nō ōisharatiro. Nōkai fenoama. Nō sharakī. Nōkai chakama,’ ixō anori mā yoimis. Akka māto chaka soaxma, mā fenokōiax Epa Nios ika ano mā nokopakenakama,” ixō Jesús ato yoini.

## 10

### *Oveja keneaki keparanākī Jesús ato yoini*

<sup>1</sup> (Askata Jesús ato tāpimani nāatomāi āto kexekatsaxakī. Oveja kexemisto āfe ovejafo kexemis keskari fakī nāskarifiakī Jesús ato kexemis.) Nānori Jesús ato yoini iskafakī: “Chanīmakōi ē mato yoinō. Yōra ovejafo kenexotiro āfe kene mēra inōfo, faki fofāsanōma. Nāskata yora yometsopai ovejafo āfe kāiti ano ikitiroma, fomākīari ikitiro. <sup>2</sup> Akka nā ovejafo kexemis nā oveja kāitinī ikikaitiro. <sup>3</sup> Kāiti ano nokoano feronāfake nā kāiti kexemisto fepoti fēpexonano oveja kexemis ikitiro. Nā oveja kexemis ikiano āfe ovejafāfe āfe oi tāpikatirofo. Nāskaxō āfe ovejafo āfe anē ato kenaito āfe ovejafāfe chīfafāitirofo. <sup>4</sup> Nā ovejafo kexemis rekē kaino āfe ovejafo āfe kene mēranoax kāiferatirofo. Māmāi āfe oi tāpikanax nāskaxō chīfafāitirofo. <sup>5</sup> Akka a kexeamatokai iyotiroma, āfe oi tāpikatiro, a ato kexemisto āfe oikairoko askarakē. Nāskakē a makinoax ichotirofo,” ixō Jesús ato yoini. <sup>6</sup> Jesús nā ovejafoki keparanākī ato yoini. Ato yoiaito tsōa tāpinifoma.

### *Jesús noko kexesharamis*

<sup>7</sup> Nāskano Jesús afianā ato yoini: “Ē chanīmakōi mato yoinō. Nā ovejafo kene mēra ikikani nā kini fisti mēra ikitirofo. Ēfi na oveja kini keskaraki. Nā Epa Nios ano ikipaikani eōnoax fisti ikitirofo. <sup>8</sup> Ē matoki nokoamano fetsafāferi mato yoikī iskafakani:

‘Ĕfi Cristoki. Ĕ mato tãpimatiro afeskax mã Epa Nios ari nokotiomãki afe ipaxakĩ, ixõ anori yoikani ãa chanĩmisfo. Yometso keskarakõifo. A Nios chanĩmara faifo ato pãrapaikani: ‘Noko fisti nikanõfora,’ ikaxõ. Nãskakẽ Niospa fakefãfe ato nikakanima, ‘Noko fisti nikanõfora,’ ixõ ato pãrapaiyaifono. <sup>9</sup> Akka Ĕfi na kini kãiti keskaraki. Nã Ĕfe Epa Nios ika ano ikipaikani eõnoax ikitirofo afe ipaxakakĩ. Nãskatari eõnoax isharatirofo anã fekaxtetirofoma. <sup>10</sup> Akka fetsafãfe efe yorafo ato pãrapaikani: ‘Ea ifofakãfe. Ĕ mato tãpimasharanõ,’ ixõ ato yoifikakĩ anorima ato pãrakani. Nãskakaxõ emakinoa ato ifipaikani. Yometso keskarakõifo. A ea chanĩmara faafo ato kexesharapaikanima. Ato chakafata ato retepaikani. Akka Ĕ askarama. A ea Ifofamisfo Ĕ ato kexesharai efe isharapakexanõfo, nono nãmãnoaxri isharapakexanõfo. Nãskax Ĕ nono nãmã oni ato kexesharaxikĩ.

<sup>11-13</sup> “A ea chanĩmara faifo ovejafo keskarafa. Ĕfi nã oveja kexesharamis keskaraki. Nãskakẽ Ĕ efe yorafo Ĕ ato nãxoxii. Oveja ifãfe feronãfake fetsa kori inãtiro ãfe oveja kexexonõ. Nãskaxõ mã kori inãno nã feronãfake oveja kexesharatamaroko, kori fisti shinãtiro. Nãskakẽ poomã oaito fichiax ovejafo kexetama ichotiro. Nãskaxõ shinãi iskakĩ: ‘Na poomã mesekõi. Na ovejafo Ĕfenãkõima, aa poomã nã pinõ Ĕfenãkõimakĩ. Nãskakẽ Ĕ ichoikai ea poomã nã afeska fanõma,’ ixõ shinãtiro. Akka ovejafãfe ifokõi askarama. Ĕfe oveja kexesharai. Poomã oaito fichixõ ato kexesharatiro, poomã nã ato afeska fanõma. Nãskaxõ shinãtiro iskakĩ: ‘Ĕfe ovejafoõnoax Ĕ natiro afokai afeskatiroma,’ ixõ shinãtiro.

<sup>14-15</sup> “Ĕfi nã ovejafãfe ifo keskara sharakĩ. Ovejafo ãfe ifãfe ato tãpia atomãi kexesharakatsaxakĩ. Ĕri nã ea chanĩmara faafo Ĕ ato kexesharamis. Ĕfe Epa Niospa ea tãpikõia. Ĕri Ĕfe Epa Ĕ tãpia. Nãskarifiakĩ a ea chanĩmara faafo Ĕ ato tãpia. Afãferi ea tãpiafo. Nãskax Ĕ atoõnoax naxii. <sup>16</sup> Yora fetsafãferi ea chanĩmara faxikani. Afokai nono ikafoma. Mai fetsa ano ikafõ. Nãfãfe ea nikasharaxikani. Nãfo Ĕfe Epa ika ano Ĕ ato iyotiro. Akka nã yora fetsafãfe a nono ikafãferi ea chanĩmara fakanax yora fisti keskara ixikani. Nãskax Epa Niospa yorakõifo ixikani. Eres fisti Ĕ ato kexesharai. <sup>17</sup> Ĕ ato kexeax Ĕ atoõnoax naxii. Nãskaito Ĕfe Epa Niospa ea noi. Naax Ĕ anã otoxii. <sup>18</sup> A ea chanĩmara faafoõnoax Ĕakõi Ĕ nai, ea tsõa retekaranama. Ĕfe Ĕpa ea yoini keskara Ĕ atoõnoax naikai. Ĕfe Epa Niospa ea yoini keskara Ĕ atoõnoax nafx Ĕ anã otoxii,” ixõ Jesús ato yoini.

<sup>19</sup> Nikakaxõ judeofãfe chanĩmara fanifo. Akka atirifãfe chanĩmara fanifoma. <sup>20</sup> Atirifãfe yoini iskafakakĩ: “Nĩafaka yõshi chaka a mẽra nanea. Afaa tãpiama. Noko yoiai nõ tãpitiroma. ¿Afskakĩ na feronãfake nõ nikatiromẽ?” ixõ yoinifo. <sup>21</sup> Akka atirifãfe yoinifo: “Niafakakai a mẽra naneanama. Niafaka a mẽra naneanokai iskara meka shara yoikeranama. Nĩafakakai feronãfake fẽxo õimatiroma,” ixõ yoinifo.

### *Judeofãfe ãto xanĩfofãfe Jesús chanĩmara fanifoma*

<sup>22-23</sup> Askafafono Jesús kani judeofãfe ãto Nios kĩfiti pexefã mẽra Jerusalén ano mã mechakaino. Nãno tapas keskara ini peke kachiori. Ano Jesús kani. Nã tapas ãfe ane Salomón. Nãskatari judeofãfe ãto fista anifo. Nã fistatã shinãnifo a Niospa peke onifani.

<sup>24</sup> Judeofãfe ãto xanĩfofo Jesúski fenifo yõkai fekani: “¿Mĩmẽ Cristoki? Noko yoife. ¿Afskakĩ mĩ noko yoisharaimamẽ? ¿Afetãkairoko mĩ noko xafakã yoimẽ?” faifãfe, <sup>25</sup> “Ĕ mato yoifimiskẽ mã ea chanĩmara faima. Ĕfe Epaõxõ a yorafãfe atiroma keskara fakĩ mẽ mato ispa Ĕmãi Niospa Fakexõ. <sup>26</sup> Akka mãkai ea chanĩmara faima mãkairoko Ĕpa Niospa yorafoxõ. <sup>27</sup> A ea chanĩmara faifãfe ea nikasharatirofo. Mẽ ato tãpia a ea Ifofakõinafo. <sup>28-30</sup> A ea Ifofaafoma omiskõipakenakafo mẽra fokani. Akka a ea Ifofamisfokai ari fokanima. Askatamaroko Ĕ ato imasharapakenaka. Epa Niospa atoya ea rafemani. Epa Niospa keyokõi ato finõkõia. Ĕ Ĕfe Epa Nios fe nã yora fisti keskara. Nãskakẽ a ea Ifofamisfo emakinoa tsõa ato ifitiroma, Ĕfe Epa makinoari tsõa ato ifitiroma,” ixõ Jesús ato yoini.

<sup>31</sup> Nikakaxō judeofāfe āto xanīfofōfāfe anā tokiri fikaxō aō Jesús tsakapainifo retapaiyanā. <sup>32</sup> Nāskafaiāfe Jesús ato yoini: “Epa Niosxō afama mīshti ē mato ispa tsōa atiro ma keskakā. Akka, ¿afaōxokai mā ea tokirinī tsakaimē?” ato faito, <sup>33</sup> “Akka na afama mīshti mī noko ispaōxokai nō mia tokirinī tsakaima. Akka nā mī meka chakaōxō nō mia tokirinī tsakapai, ē Nios keskarara mī ikaito. Anā ano Nios fetsama. Mīri noko keskara yora. Akka mī noko yoia: ‘Ēri Nios keskara,’ iki. Akka mī Nios chakafai. Nāskakē nō mia tokirinī tsakai,” faifāfe, <sup>34</sup> Jesús ato kemani iskafakī: “Mā iskai: ‘Anā ano Nios fetsama,’ mā imis. Akka nā Niospa meka yoimisto kirika kenei iskafakī: ‘Ē mato yoi māfi Nios keskarakōifokī. Niospa mato nīchia,’ ixō kirika kenei, Niospa meka yoikī. Akka nā meka tsōa chanīra fatiroma. <sup>35-36</sup> Akka Niospa anori yoifiano ¿afeskakī mā ea yoimē ē Nios chakafai? Akka Niospa ea nai mēraxō nāmā nīchini. Nāskakē ē mato yoitiro ēfi Niospa Fakeki. <sup>37-38</sup> Mākai ea nikapaima. Ēfe Epa Niospa aka keskara ē ayamakē, āa chanīra mā ea fakerana. Akka ēfe Epa akai keskara ēri akaito mā yoikerana: ‘Chanīma Epa Niospa atiro keskara Jesús aki,’ ixō mā yoikerana. Nāskakē a ē afama mīshti akaōxō ea chanīmara fakāfe. Ēfe Ēpa akai keskara ēri akaito mā ea tāpitiro ēfe Epa fe ika,” ixō Jesús ato yoini.

<sup>39</sup> Nikakaxō anā Jesús achipaifiaifono, ato makinoax kaitokai tsōa tāpinima. Nāskakē tsōa achinima.

<sup>40</sup> Ato makinoax kai, faka Jordán ari kani nā Juan yorafo maotifapaoni ano. Nāno chaimashta Jesús nēteni faka kesemē. <sup>41</sup> Nāskakē yorafo akiki fēkaxō yoinifo iskafakakī: “Jesús Niosxō afama mīshti fakī noko ispa. Juankai askafapaonima. Askafixō Juan Jesúsnoa noko yoini chanīmakōi,” ikanax yoinānifo. <sup>42</sup> Nāskakaxō yora ichapato Jesús Niospa fakera fakaxō Jesús chanīmara fanifo.

## 11

### *Lázaro mā nani*

*(Mt. 12.46-50; Lc. 8.19-21)*

<sup>1</sup> Askata feronāfake Lázaro isinī ini. Nā Lázaro Betania ano ikax isinī ini. Poi rafe fe ikax María ikaino, Marta ikaino, nā rafe ato fe ikax. <sup>2</sup> Nā María pirofomā sharakapa Jesús āfe tae pemākīa nachiyoni. Nāskaxō āfe fōo otekere ani.

<sup>3</sup> María feta Marta iskafakī Jesús yoitanōfo ato nīchini: “Ifo, mī yamakōi Lázaro isinī iki kiki,” ikaxō yoitanōfo. <sup>4</sup> Kenamanaifāfe nikaxō Jesús aōxō tāpimisfo ato yoini iskafakakī: “Nā Lázaro isinī ikai naima. Akka yorafāfe ōikani ē afara afeskarafaito. Nāskakē ea tāpikani ēmāi Niospa Fakekē. Nāskaxō yorafāfe yoikani: ‘Epa Nios fāsi sharakōi,’ ikaxō yoinōfo,” ixō Jesús ato yoini.

<sup>5</sup> Jesús poi rafeya Lázaro noikōini. <sup>6</sup> Lázaro isinī ikaito nikafi Jesús oxa rafeyoni. <sup>7</sup> Nāskata a aōxō tāpimisfo Jesús yoini: “Nō Judea mai ano nō anā kanō,” ixō Jesús ato yoini. <sup>8</sup> Ato askafaito kemanifo: “Maestro, nōko xanīfofāfe Judea anoxō mā mia retekeraifaito. ¿Afeskai mī afianā ari kapaimē?” ixō yoiaifono, <sup>9</sup> Jesús anā ato kemani: “Penata nō ōisharatiro. Xinī chaxaino nō ōisharatiro. Nāskax nō otisikax nō paketiroma. Nāskarifiakī pena tii Niospa ea amapaiyai keskara ea tāpimani. Nāskaxō ea kexeano ē mesetiroma. <sup>10</sup> Akka fakishi yora kai xafasharayamano otisikax paketiroma. Nāskarifiakī Nios fe rafeamato tāpisharatiroma afeskax isharatiromāki. Askax fenotiro,” ixō Jesús ato yoini.

<sup>11</sup> Nānori ato yoita anā Jesús ato yoini iskafakī: “Nofe yora Lázaro mā oxakē ē mōikai,” ato faito, <sup>12</sup> a aōxō tāpimisfāfe nikakaxō yoinifo: “Ifo, akka oxakōiax naima. Chipō sharatiro,” fanifo. <sup>13</sup> “Nofe yora Lázaro mā oxaki,” Jesús ato fani. Mā Lázaro nafiakē ato tāpimapainima. Nāskakē shinānifo: “Lázaro oxara,” ikaxō tsōakairoko tāpixō. <sup>14-15</sup> Nāskaxō Jesús ato xafakīa yoini mā Lázaro nakōinano: “Mā Lázaro naki. Nāskax ē inimaikai ē ano ikamano Lázaro naki. Akka mā ea chipō ōitiro ē afara afeskarafaito. Nāskaxō mā ea

chanĩmara fai. Nãskakẽ iskaratĩa nõ Lázaro ano kanõ,” ixõ Jesús ato yoini. <sup>16</sup> Ato askafaito nikakata Tomás nã Rafe Naneni nãato Jesúsxõ tãpimis fetsafori ato yoini: “Nõ kanõ nõri afe naxikĩ,” ixõ ato yoini.

### *Jesús fistichi naafo ato otofatiro*

<sup>17</sup> Askata Betania ano nokoxõ Jesús nika: “Mã Lázaro naa,” nikani. Mã cuatro nia oxa nikani a maifaitafo mafa kini mẽra, Betania ano. <sup>18</sup> Betania fe Jerusalén chaima ini. <sup>19</sup> judeofo ichapa María fe Marta ika ano fenifo ato ferarofai fekani, mã ãto poi naano.

<sup>20</sup> Nãskata Marta Jesús oaito nikai akiki nokoikai kani María pexe mẽra nĩchifaini. <sup>21</sup> Marta Jesúski nokoxõ yoini: “Ifo, mũ nono ikanokai ãfe exto nakeraitama. <sup>22</sup> Ë tãpia mũ iskaratĩa afara fetsa mũ Nios yõkaito mia axorisafatirokĩ,” faito, <sup>23</sup> “Extofi anã otoi kiki,” faito, <sup>24</sup> “Ë tãpia nã namisfo mã mai keyoaino afianã otoxikani. Ëfe extori otoxii,” ixõ Marta yoiaino, <sup>25</sup> Jesús kemani: “Eõnoax nã nafo tii otokani. Akka eõnoax niafori. Nã ea chanĩmara faax nafiax anã otoxii kiki. <sup>26</sup> Nãskakẽ ea chanĩmara faax anã nanakama. ¿Nãskakẽ mũ ea chanĩmara faimẽ?” faito, <sup>27</sup> “Ëje, Ifo, ã mia chanĩmara fai mũmã Cristokẽ, Niospa fake. Nõ mia manamis. Akka nõko xinifãferi Cristo manapaonifo. ‘¿Afetĩa na mã ano Cristo oimẽ?’ ikaxõ nõko xinifãfe mia manapaonifo,” Marta fani.

### *Lázaro mafa kini mẽra maia õi Jesús oiani*

<sup>28</sup> Nãskata mã yoikĩ xateta, Marta ãfe chiko María yoikai kani. Kaxõ õia a María fe rafeafo oiyakani inifo. Nãskata Marta ãfe chiko María one mẽshanãxõ yoini: “Mã nõko Ifo oakĩ. Mia kenamana, õikofe,” fani. <sup>29</sup> María nikata fininãkafãta kani Jesúski nokoikai. <sup>30</sup> Jesúska pexe rasi ano nokoama ini. Nã Marta akiki nokoano Jesús nẽteni. <sup>31</sup> Mã María ato fe oiafai kaino a afe oiafaiyafãfe õinifo. “María poi maia mãnãonoax oiai kai kiki,” ikaxõ chĩfafainifo.

<sup>32</sup> María Jesúski nokota ratokonõ mai chachipakefõfã yoini: “Ifo, mũ nono ikanokai ãfe exto nakeraitama,” María fani. <sup>33</sup> María oiaito Jesús õini. Judeofori a María fe feafori oiaifãfe Jesús ato õini. Nãskaxõ ato shinãkõini. <sup>34</sup> Nãskaxõ ato yõkani: “¿Fanĩ mã maifaitamẽ?” ato faino, yoinifo: “Ifo, ono nõ akitakĩa õiyopo,” fanifo. <sup>35</sup> Askafafono Jesús oiani. <sup>36</sup> Oiaito õikakĩ judeofãfe: “Õikapo. Lázaro manoi oiai,” fanifo. <sup>37</sup> Nãskaxõ fetsafãfe yoinifo: “Nã fẽxo sharafaita keskafaxõ, ¿afeskafakĩ nonoxõ Lázaro sharafaitamamẽ?” fanifo.

### *Jesús Lázaro otofani*

<sup>38</sup> Nãskata Jesús anã shinãmitsani Lázaro maia ano nokoax. Nã Lázaro maia ano nã kini tokiri efapato fepoafõ ini. <sup>39</sup> Nãno nokoxõ Jesús ato yoini: “Na tokiri aõ fepoa fepekãfe,” ato faito, nikakĩ Marta yoini: “Iskaratĩa mã pisiaki,” faito, <sup>40</sup> nikakĩ anã Jesús yoini: “¿Ë mia yoiaito mũ ea nikaimamẽ? Ea mũa nikaino Niospa afara shara faito mũ õitiro,” fani. <sup>41</sup> Askafaito nikakakĩ fẽpexonifo. Fẽpexonaifono nai foisnĩfofãta Apa yoini: “Epa, ã mia kĩfaiito mũ ea nikai. Ë mia aicho fai. <sup>42</sup> Ë tãpiaki ea mũa nikafafãimiskĩ. Nãskakĩ ã mia kĩfi na yorafãfe mia chanĩmara fanõfo. Nãskakaxõ ea tãpinõfo ea mũa nĩchiniki.”

<sup>43</sup> Apa kĩfikĩ askafata fãsikõi Lázaro kenani: “Lázaro, kini mẽranoax kãikerafe,” faino, <sup>44</sup> Lázaro kãikerani nã aõ rakoitafoya. Nãskaxõ ato yoini: “Na mã aõ rakoita pekakãfe kãisharanõ,” ato fani.

### *“¿Afeskaxõ nõ Jesús retetiromẽ?” ixõ shinãnifo*

*(Mt. 26.1-5; Mr. 14.1-2; Lc. 22.1-2)*

<sup>45</sup> Nãskata judeofo a María fe feafãfe Jesús Lázaro otofaito õikakĩ Jesús chanĩmara fanifo. <sup>46</sup> Nãskafaito õikani atiri fariseofoki chanifokani fonifo. <sup>47</sup> Ato yoiãfãfe nikakanax fariseofo fe a Nios ato kĩfixomisfãfe ãto xanĩfofo ichanãnifo. Ichanãkanax yoinãnifo: “¿Nõ Jesús afeska faimẽ? Tsõa atiroma keskara fai kiki. <sup>48</sup> Nõ afeskafayamaino keyokõichi chanĩmara fakani kiki. Romano xanĩfokõifo fẽkaxõ noko yoitirofo iskafakakĩ: ‘Mãkai anã

xanĩfoma,' noko fatirofo. Nãskaxõ nõko kĩfiti pexefã noko põtatirofo," ikanax yoinãnifo. <sup>49</sup> Nãskaifãfe Nios ato yoixomis xanĩfokõichi Caifás ato yoini: "Mãfi tatimakõikĩ," ato fani. <sup>50</sup> "¿Mã tãpiamamẽ? na feronãfake fisti a yorafoõnoax naxiai. Nãfi sharaki. Ares fisti natiro nõ nanõma, nõko kaifo fetsafori nanõfoma," ixõ ato yoini. Chanĩmakõi Caifás yoini a ixiai keskara yoikĩ.

<sup>51</sup> A Caifás yoiai ãa shinãkĩ yoinima. Niospa ãfe shinãmã shinãmanaino yoini. Nios kĩfixomisfãfe ãto xanĩfokẽ Niospa ãfe shinãmã shinãmanaino, "Jesús judeofonoax naxira," ixõ yoini. <sup>52</sup> Jesúskai judeofo fistiõnoax naima. Mai fetsa ano ikafãferi chanĩmara faafono ato nãxoxii. Nãskata Niospa fake ixikakĩ noinãkõikanax, nã yora fisti keskara ixikaki.

<sup>53</sup> Nãskata nã penata judeo xanĩfofãfe shinãnifo: "¿Afeskaxõ nõ Jesús retetiromẽ?" ikaxõ pena tii shinãpaonifo. <sup>54</sup> Mã retepaiyaifono tãpiax judeofo ano anã Jesús kanima. Yorafã rasi ano katamaroko pexe fisti rasi ano kani, nã pexe ãfe ane Efraín ano, tsõa istoma ano. Nã aõxõ tãpimisfo fe nãno iyoni.

<sup>55</sup> Judeofãfe ãto fista Pascua mã chaima ikaino, yora rasi Jerusalén ano fonifo, Pascua fista akifokani. Moisés ãto xinifo yoipaoni keskai akairi ãto chaka soapaikani Nios kĩfiti pexefã mẽra ikifokani, fista ikamano fonifo. <sup>56</sup> Nãskaifono judeofãfe Jesús fenanifo. Nãskakanax Nios kĩfiti pexefã mẽra ikinifo. Nãnoax yoinãnifo: "¿Fanĩmẽ Jesús?" ikanax yoinãnifo. " 'Nonoxõ Jerusalén anoxõ Jesús fista akiyoira,' ¿mã ikimẽ?" ikanax aa ranã yoinãnifo. <sup>57</sup> Askakaxõ judeofo ãto xanĩfofo feta fariseofãfe ato yoinifo iskafakakĩ: "Jesús fichixõ noko tãpimakãfe nõ achinõ," ato fanifo.

## 12

### *Kẽromã Jesús shinãkĩ pirofomã ãfe tae pemãkĩa nachini (Mt. 26.6-13; Mr. 14.3-9)*

<sup>1</sup> Nãskano seis nia Pascua fista mã chaima ikaino Jesús aõxõ tãpimisfo fe Betania ano kayoni. Nãno Lázaro ika ini. Nã Lázaro nakẽ Jesús otofani. <sup>2</sup> Nãnoxõ Jesús pimaxikakĩ pĩchanifo, a Jesús fe foafãferi pinifo. Lázarori ato feta pini. Nã Marta ato pimani. <sup>3</sup> Mã piafono María Jesúski oni ãfe pirofomã sharaya. Oxõ nã pirofomã ãfe tae pemãkĩa nachini. Nãskaxõ ãfe fõo otekere ani. Nãskafaano yorafãfe nã pexe mẽra ikafãfe nã pirofomã sharakõi xetenifo. <sup>4</sup> Nã Jesúsxõ tãpimis fẽtsa nã Judas Iscariote, Simón fake, nã ato achimaxiaito yoini, <sup>5</sup> "Kee. ¿Afeskakĩ na kẽromã pirofomã shara potaimẽ? Ato minixõ kori ichapa fixõ noko inãkerana a afaamaisfo nõ ato inãpanã. Nãskax shara ikerana," Judaspa fani. <sup>6</sup> Anori Judaspa yoifkĩ ato kori inãkeranama. Nã Judasfi yometsokõi iniki. Nã Judaspa ãto kori kexexopaoni. Yometsofixõ nãskakẽ tsõa tãpipaonima. Nã kori fixõ a afaamaisfo ato inãkeranama, nã a kori onekerana. <sup>7</sup> Nãskafaito nikakĩ Jesús Judas yoini: "María fekaxtefayamafe. Ë samamashta naito mã tãpixõ ekeki pirofomã nachia," fani. <sup>8</sup> "Nã yora afaamaisfo mato fe ipanakafo. Nãskakẽ mã ato mẽxotaima afarafo inãtiro. Akka êkai mato fe nono mai ano ipanakama, ã mato yoi. Akka na María iskaratĩa ea shara faa," ato Jesús fani.

### *Judeofãfe ãto xanĩfofãfe Lázaro retepainifo*

<sup>9</sup> Nãskata judeofo ichapa rasi Jesúski fenifo, Betania ano ikano mã tãpikanax Jesús fistikai õifekani fenifoma. Lázarori õifekani fenifo. Nã Lázaro Jesús otofaita nikakaxõ õipainifo. <sup>10-11</sup> Nã Lázaro Jesús otofaita nikakaxõ judeofãfe ranãrito anã ãto xanĩfofo tananifoma Jesús fisti chanĩmara fakakĩ. Nãskaifono nã xanĩfofo õitifishkikanax yoinãnifo: "Jesús yafi Lázaro nõ retenõ. Jesús fistima. Lázarori nõ retenõ," ikanax yoinãnifo.

### *Jesús nokoni Jerusalén ano*

#### *(Mt. 21.1-11; Mr. 11.1-11; Lc. 19.28-40)*

<sup>12</sup> Nãskano pena fetsa judeofãfe ãto fistatĩa yorafã rasi Jerusalén ano fenifo. Jesús nokoaito nikakani nãskax akiki fenifo. <sup>13</sup> Epe pei tsomakanax akiki fekani. Nãskakanax

fāsikōi tai tai ifenifo iskakani: “¡Sharafinakōi nokoki oi kiki Niospa nīchiano! Israelifo mī nōko xanīfo oi nokoki. ¡Sharafinakōial!” ikaxō fāsikōi yoinifo. <sup>14-15</sup> Askafaifono Jesús burro fakeshta kamaki tsaoax oni. Niospa meka fētsa keneni iskafakī Niospa shināmanaino:

Jerusalén ikafāfe, rateyamakāfe. Māto xanīfo matoki oxii burro fakeshta kamaki tsaoax,

ikaxō kirika keneni. <sup>16</sup> Nāskafikē Jesúsnoa yoikī kirika keneni keskara aōxō tāpimisfāfe tāpiyonifoma. Akka mā reteafono otoax Apa ari kaano nāskakē aōnoa tāpinifo. Iskakakī shinānifo: “Nā Jesús nono mai anoxō a afama mīshti axiai aōnoa yoikakī kirika keneyoni. Nōko xinifāfe Jesús fakeyoamano a inōpokoai aōnoa yoikakī kirika keneni,” ikaxō Jesúsxō tāpimisfāfe āto ōiti mēraxō shinānifo.

<sup>17</sup> Jesús Jerusalén ano nokoaino nikakakī yorafā rasichi a mananifo ōipakakī. Atirifāfe mā Lázaro nakē Jesús ofofaitano ōinifo. Nāskakē mā Lázaro Jesús ofofaita ōikanax fetsafoki chaninifo akairi tāpinōfo. <sup>18</sup> Jesús Lázaro mā nakē ofofaita nikakaxō nāfāferi ōipainifo. Nāskaxō fai nēxpakīaxō mananifo. <sup>19</sup> Nāskakē fariseofo yoinānifo: “Kee. Shinākapo. Nōkai na yorafo afeska fatiroma anā Jesús tanayamanōfo. Tsōakai noko anā tanapaima keyokōichi yorafāfe Jesús nikakōipaikani,” ikanax yoinānifo.

### *Griegofāfe Jesús fenanifo*

<sup>20</sup> Nāskata Jerusalén ano nā yorafā rasi mēra griegofori ato fe inifo judeofāfe āto fista akaifono. <sup>21</sup> Nānoax Felipe ano fonifo, Felipe yōkai fokani. Nā Felipe Galilea mai anoax fakeni, nā pexe rasi āfe ane Betsaida anoax. Felipe ano fokaxō griegofāfe Felipe yōkanifo: “Nō Jesús ōipai noko efexōfe nō afe yoinānō,” Felipe fanifo.

<sup>22</sup> Askafaifāfe nikaxō Felipe Andrés yoini: “Na griegofo Jesús fe mekapaikanikiki. Nō Jesús ato yoixonō,” fani. <sup>23</sup> Yoiaifāfe nikakī Jesús ato kemani: “Ēfi samamashta ēfe Epa ari ē kaikai afe xanīfo ikikai. Akka ēfe Epa ari kayotama ē yorafonoax nayoxii. <sup>24</sup> Akka ē mato tāpimani mā tāpinō. Xiki fero fisti nō fanayamano kāitiroma. Akka nō fanasharano foaikax āfe fimi ichapa itiro. Nā nō fana āfe exe fisti payokometiro, akka āfe kaya yositiro. Nāskarifiāi ē matoōnoax nayamakē mā efe ipaxatiroma. Eres fisti ē ipaxatiro. <sup>25</sup> Akka āa fētsa shināi iskai: ‘Niospa ea amapaiyai keskara ē shināima, ēa ē apaiyai keskara ē shināi,’ ixō anori shināi fenotiro. Akka nā iskakī shināi: ‘Ē nono mai ano niyoxō ē apaiyai keskara ē shināpaima, Niospa ea amapaiyai keskara fisti ē shināpai,’ ixō shināi afi Epa Nios fe nipanakaki. <sup>26</sup> Akka a ea yonoxopaikī ēfe meka nikakōixō a ē yoiai keskara atiro. Ea Ifofax a ē ika ano nāri efe ipaxatirokī. Ea yonoxomis a ē yoiai keskara ea axōaito ēfe Epa Niospa yoixii iskafakī: ‘Aicho. Mī ēfe Fake Jesús nikasharamiski. Mī fāsi sharakōiki,’ Epa Niospa yoikī iskafaxii a ea Ifofamis.

<sup>27</sup> “Iskaratīa ēfe ōiti mēra ē shināmitsai. ¿Ē afeskaimē? Akka, ‘Epa, ea ifife ea omiskōimayamanōfo,’ ē faima. Akka ēfe Epa ea nīchini ē ato omiskōixonō,” ato Jesús fani. <sup>28</sup> Nāskaxō Jesús Apa yoini: “Epa, eōxō ato ispafe mī fāsi sharaki,” ixō Jesús Apa yoini. Askafaito nikakī nai mēraxō fāsikōi Niospa kemani: “Ē mīōxō mē ato ispa ēmāi afama mīshti shara fakī afianā afama mīshti ē ato ispai,” ixō yoini.

<sup>29</sup> Nā yorafā rasichi anoxō nikakani yoinānifo. Atirifāfe yoinifo: “Mā nai tiri ika,” fanifo. Atirifāfe yoinifo: “Epa Niospa ājirinī Jesús yoia,” ikanax yoinānifo. <sup>30</sup> Nāskafono Jesús ato yoini: “Na meka nai mēranoa mā nikai ea tāpimatama, mato tāpimaxikī yoia,” ato fani. <sup>31</sup> “Iskaratīa nā ea Ifofaifoma Niospa ato omiskōimani. Āto ifori nā yōshi chaka Satanás nāri ēfe Epa Niospa potaxii anā xanīfo inōma. <sup>32</sup> Akka ēfi yōra fakekōi. Ea retexaxō ifi cruz ikakī ea mastakaxō ea fininīfōfāxikani. Ea askafaifono ē yorafo ē ato ifi efe rafenōfo,” ixō Jesús ato yoini. <sup>33</sup> Nānori ato yoini nā ifi cruz ikakī mā mastaxiaifono ato tāpimani.

<sup>34</sup> Nikakaxō yorafāfe nāno nixō yoinifo iskafakakī: “Niospa meka sharaōnoa kirikaki kenekī yoikī iskafanifo: ‘Cristo, nā Niospa nīchia nīpanaka nanakama,’ fanifo. Akka,

¿afeskakĩ mĩ noko yoimẽ iskafakĩ?: ‘Na yõra fakekõi retekaxõ ifi cruz ikakĩ mastakaxõ fininĩfõaxikani,’ mĩ noko fai. ¿Akka tsoaõnoa mĩ noko yoimẽ?’ fanifo. <sup>35</sup> Askafaifono Jesús ato yoini: “È nono ika pena keskara shara. Nãskakẽ ã anã mato fe nono ifãinakama. È mato yoiaito nikasharakãfe fenoxikakima. Pena yamaino fakish itiro. Nãskakẽ yora fenotiro. Tsõa fakish mẽra õitiroma, fãi kai fenotiro. Nãskarifiai a chaka shinãmis fenotiro. Fenokĩ tãpitiroma afeskax Nios fe rafetiromãki. <sup>36</sup> È mato fe iyoano ea Ifo shara fakãfe fenoxikakima. Mã ea nikasharaino ã mato pena keskara shara fatiro, xafakĩa mã inõ. Èfi pena keskarakĩ. Ea Ifo shara fakaxõ mãri fetsafo pena keskara shara fatiro mãtoxõ eari Ifo sharafanõfo,” ato Jesús fani. Mã ato yoikĩ senẽfax, nãskax ato makinoax kaitokai anã tsõa õinima.

### *Judeofãfe Jesús nikanifoma*

<sup>37</sup> Yorafãfe ferotaifi tsõa atiroma keskara Jesús fafiaino tsõa chanĩmara fanima nã Niospa Fakekõi fiano. <sup>38</sup> Nã Isaías Niospa meka ato yoipaoni. Nãato kirika keneyoni a inõpokoai yoikĩ. Iskafakĩ yoini:

Ifo, nõ mĩ meka nõ ato yoifiainokai tsõa noko chanĩmara faima. Yõra atiroma keskafakĩ mĩ ato ispafiaino tsõa tãpiama, ixõ Isaías a inõpokoai yoikĩ kirika keneyoni.

<sup>39</sup> Nãskakẽ tsõa Jesús nikanima. Askatari afianã Isaías kirika keneni a inõpokoai yoikĩ iskafakĩ:

<sup>40</sup> A nikaiyamaifo Epa Niospa fẽxo keskara ato imapakenaka Niospa meka chanĩmakõi mã tãpifikaxõ tsõa nikayamaito. Niospa ato shinãtimafai anã shinãsharanõfoma. Nãskakẽ Niospa meka õifikakĩ tsõa shinãima ãto õiti kerexkõi fakani mã nikafikaxõ. ãto chaka xateaxma ekeki fekanima ã ato fetsa keskara shara fapanã, ixõ Niospa ato yoini. Nãnori a Jesús inõpokoai yoikĩ Isaías kirika keneyoni.

<sup>41</sup> Isaías Niospa shinãmanaino Jesús tãpini xanĩfo sharakõi ikiyoai. Nãskaxõ Isaías Jesúsnoa yoini.

<sup>42</sup> Judeofãfe xanĩfofo atirifãfe Jesús chanĩmara fanifoma. Akka atirifãfe chanĩmara fanifo. Akka afaa tsõa yoinifoma fariseofoki mesekakĩ noko potayamanõra ikanax ãto ichanãti pexe mẽraxõ. <sup>43</sup> Yora fetsafãfe ato yoiaito nafo sharakõifora nã yorafãfe atoõnoa meka shara yoiaifono nikapaimisfo. Akka Niospa atoõnoa nafo sharakõira ixõ yoiaino fichisharapainifoma.

### *Jesús mekaõxõ nõ tãpia nõ chakakõifo*

<sup>44</sup> Nãskata Jesús fãsikõi mekainĩkafã ato yoini iskafakĩ: “Nã ea chanĩmara faito ea fisti chanĩmara fatama nã ea nĩchiniri chanĩmara fai. <sup>45</sup> Nãskafakĩri mã mã ea õia nã ea nĩchiniri mã mã õia. <sup>46</sup> Nono mai ano fakish keskara. Nãskakẽ ãfe Epa Nios ariax ã nono mai ano ã oni pena keskara ikiyoi. Fakishi tsõa õitiroma. Akka nã ea chanĩmara faito Epa Nios Ifo sharakõifatiro pena keskara shara ixiki.

<sup>47</sup> “Mã ãfe meka nikafikaxõ ea nikayamaifono ãkai ato omiskõimania. Akka ã mai ano oni yorafo omiskõimatama ato ifiyoi ã oni efe ãpaxanõfo. <sup>48</sup> Akka nã iskakĩ shinãi: ‘Èkai Jesús Ifofapaima, askatari ãfe mekari ã nikapaima,’ ixõ shinãi nã ã mato yoimis keskara nikayamax Nios ari katama omiskõipakenakafo mẽra kaxii. Nãskakẽ ã mato yoiaito mã ea nikayamax mã mai keyoaino mã omiskõipakenaka. <sup>49</sup> ãfe Epa Niospa ea yoia keskara nãnorikõi ã mato yoimis. Èa ã mato yoima. ãfe Epa Nios nã ea nĩchinioxõ ã mato yoimis. <sup>50</sup> Mẽ tãpia Epa Niospa yoia keskara chanĩmara faax mã nĩpaxatiro. Nãskakẽ, ‘A ã ato yoimis keskara nãnori ato yoife,’ ãfe Epa Niospa ea famis,” ixõ Jesús ato yoini.

## 13

### *Jesús aõxõ tãpimisfo ãto tae chokapakeni*



<sup>1</sup> Mā judeofāfe āto Pascua fista chaima ikaino Jesús tāpini a mai anoax Apa ari kaxiai. A Ifofaafo nā nono mai anoafō ato noini. Mā atoōnoax nakī ato noikōini.

<sup>2</sup> Jesús aōxō tāpimisfo feta mā xini kaino ato feta pipaini. Nāskaino nā Judas Iscariote mēra Satanās yōshi chaka nanetani. Nā Simón fetsa āfe fake Judas Iscariote. Nā Judas mēra niāfaka nanexō shināmani iskafakī: “Ato tāpimafe afeskaxō na Jesús achitirofomāki,” ixō Satanās shināmani.

<sup>3</sup> Akka Epa Niospa āfe Fake yoini: “Nā nai mēranoafōya nā mai anoafōri mī ato yonomatiro. Mī āto xanīfo,” ixō Epa Niospa anori yoiaito Jesús tāpini. Epa Nios ariax onixakī mā anā akiki kakī Jesús tāpini. <sup>4</sup> Nāskata pikī keyotama Jesús finināka fā āfe rapati pekata āfe rakotini pinixemeni. <sup>5</sup> Nāskata faka tasoki manexō a aōxō tāpimisfo ato fāka ochopakeni. Mā ato ochopakexō ato otekere apani āfe rakotini.

<sup>6</sup> Ato askafapakī Pedrori āfe tae chokapaiyaito yoini: “Ifo, ¿afeskakī mī ēfe Ifo fixō mī ea fāka ochopaimē?” faito, <sup>7</sup> Jesús kemani: “Na ē mato fāka ochofai mī tāpiama. Akka mī chipo tāpixii,” faito, <sup>8</sup> anā Pedro kemani: “Maa, Ifo, mīakai ea fāka ochopakēnakama,” Pedro faito, anā Jesús kemani: “Ē mia ōchoyamainokai mī efe rafetiroma,” fani. <sup>9</sup> Askafaito nikakī Pedro yoini: “Ifo, taekis ea chokakima ēfe mifikiri ea afe, ēfe mapokiri ea māchofe,” faito, <sup>10</sup> “Nā rama yora nashiax āfe yora choshtanatiroma, āfe tae fisti choshtanatiroma. Nāskakē nō tae fistiki nō chokatiro. Akka keyokōi mā choshtama, ranāri mā shara,” ato Jesús fani. <sup>11</sup> Nānori ato yoini māmāi tāpixō fatoto ato achimaximākai.

<sup>12</sup> Mā ato ochopaketa āfe rapati safeni. Mā āfe rapati safeta afianā tsaopakekafāni. Nāskaxō ato yoini: “¿Mā mā tāpiamē na ē mato fāka ochofaito?” ato fani. <sup>13</sup> Nāskaxō anā ato yoini: “Māfi, ‘Maestro,’ mā ea fayana, ‘Ifo,’ mā ea famis. Chanīmakōi ēmāi māto Ifo ita ē māto maestrōri.” <sup>14</sup> Askata anā ato yoini: “Ē māto Ifokī, askatari ē māto maestrokī ē mato fāka ochopakea oa māto ina keskarakōixō. Akka nā ē mato fāka ochopakea keskarai mā ranā fāka ōchokome faatanākāfe oa māto inafō keskarax. <sup>15</sup> Ē mato ōimana keskarai māri askakāfe,” ato fani. <sup>16</sup> “Ē mato chanīma yoi. A yonoxomistokai āfe xanīfo finōtiroma. Akka ē mato nīchia mā fetsafo ēfe meka yoinō. Nāskafixokai fetsafo ēfe meka ato yoifikīkai mā ea finōama. Ē mato fāka ōchomis oa ē mato yonoxomis keskaraxō. Nāskaxō, ‘Nō fetsafo finōa, nō āto inama,’ iyamakāfe,” ato Jesús fani. <sup>17</sup> “Na ē mato yoiaito mā nikakōiax, nāskax mā fāsi inimakōitiro.

<sup>18</sup> “Nāskakē ē mato yoi, akka keyokōiōnoa ē mato yoima. Ē tāpia fatomākī ē katoa a nofe kai, askatari a nofe kaima. Nāskakē ē mato yoi, eōnoa Niospa meka yoikī kirika keneyonifo nō nikakī nō chanīmara fatiro. Iskafakī kirika keneyonifo, Niospa meka: ‘A feta piāi fētsa ea ōikaspakī ea chakafaxii,’ ixō kirika keneyonifo. Chanīmakōi mā ōifainaka,” ato Jesús fani. <sup>19</sup> “Ea askafayoamano ē mato yoiyomis. Akka nā ē mato yoiai keskara ea askafafono mā ea ōikī, nāskakē mā ea chanīmara fatiro. <sup>20</sup> Ē chanīkima mato yoi ē mato nīchi mā ēfe meka ato yoitanō. Mā ato yoiaito nikakaxō eari nikakani. Nāskatari ea chanīmara fakaxō nā ea nīchiari chanīmara fakani,” ixō Jesús ato yoini.

*“Mā fētsa ea ato achimaxii,” ixō Jesús ato yoini  
(Mt. 26.20-25; Mr. 14.17-21; Lc. 22.21-23)*

<sup>21</sup> Mā yoikī keyota Jesús fāsi shināmitsakōini. Nāskaxō xafakīakōi ato yoini: “Ē chanīma mato yoi. Fatora mā fētsa ea mā ato achimaxii,” ato faito, <sup>22</sup> nikakani fesēnākefainifo tāpikanaxma. <sup>23</sup> Afe ketaxamei tsoa Jesús fichisharapaikōini. <sup>24</sup> “Fatora mā fētsa ea mā ato achimaxii,” ato faito nikakī a Jesús fe ketaxamei tsoa Pedro fenāmāshta yōkani: “Tsoaōnoa yoimākai, yōkafe,” fani. <sup>25</sup> Nāskafaito nikakī a Jesús fe ketaxamei tsoato chaimashta fani yōkaxikī: “Ifo, ¿tsoaōnoa mī yoimē?” faito, <sup>26</sup> Jesús kemani: “Na pāa tore pishta nami ene mēra mechanafaxō ē ināito nāatofi ea ato achimaxii kiki,” Jesús fani. Nāskafaxō nami ene mēra pāa mechanafaxō Judas Iscariote Jesús ināni, Simón fetsa āfe

fake. <sup>27</sup> Jesús pãa mechanafaxõ Judas inãino Judas mēra Satanás chaka nanerisatani. Nāskaxõ Jesús Judas yoini: “Nã mĩ apaiyai keskara farisafafe,” fani.

<sup>28</sup> Nã tsaokaxõ piaifāfekai tāpinifoma afeska fakī askafaimākai. <sup>29</sup> Atirifāfe shinānifo: “Jesús Judas nīchiaito Judaspa afara fitanõ Jesús nīchi fista ayanā pixikī,” ixõ shinānifo. Akka atirifāferi shinānifo iskafakī: “Jesús Judas nīchia a afaamaisfo kori inātanõ,” ixõ shinānifo. Nã Judaspa āto kori kexexomis ini. <sup>30</sup> Nāskax Judas koshi kani mā fakishaino.

### *Jesús Ifofamisfo noinã faatanātirofo*

<sup>31-32</sup> Nāskata mā Judas ato makinoax kaano Jesús ato yoini: “Iskaratīa ē naino Epa Niospa mato õimani ēmāi āfe Fake sharakōikē. Nāskafiax ēfi yōra fakekōi. Ē afama mīshti akaito õikaxõ, ‘Epa Nios fāsi sharara,’ faxikani. Nāskakē mā tāpitiro ēmāi Niospa Fakekōikē a keskara sharakōi.

<sup>33</sup> “Ēfe fakefāfe, ēkai anã nono mato fe ifīnakama. Mā ea fenaxii. Ē judeofo yoita keskafakīri ē matori yoi. Ē kai arikai mā katiroma. <sup>34</sup> Ēfe meka fenashara ē mato yoikai, noināi finakāfe. Nã ē mato noiai keskariai māri noinã faatanāsharakāfe. <sup>35</sup> Mā noināiyaito yorafāfe õinõfo mā eõxõ tāpimiski,” Jesús ato fani.

*“Ē Jesús õimisma, Pedro ixiaino,” Jesús ato yoini  
(Mt. 26.31-35; Mr. 14.27-31; Lc. 22.31-34)*

<sup>36</sup> Nāskata Pedro Jesús yōkani: “Ifo, ¿faki mĩ kaimē?” faito, nikakī Jesús kemani: “Ē kai arikai iskaratīa mĩ efe kayotiroma. Chipõ mĩ kaxii,” faito, <sup>37</sup> anã Pedro kemani: “¿Afeskai iskaratīa ē mefe katiromamē? Mē iskaratīa itipinīshara mĩõnoax naxikī,” faito, <sup>38</sup> anã Jesús kemani: “¿Mĩ chanīmamē? ¿Mā mĩ itipinīsharamē naxikī?” Jesús fani. Nāskaxõ anã yoini: “Na fakishi takara keoyoamano mĩ ea iskafai: ‘Ēkai Jesús õimisma,’ ixõ mĩ ato yoi tres fakī,” Jesús fani.

## 14

### *Jesús fai keskara. Aõnoax nõ Nioski nokotiro*

<sup>1</sup> Anã Jesús ato yoini: “Ēfe fakefāfe, mātõ õiti fekaxtefayamakāfe. Nios chanīmara fata, eari chanīmara fakāfe. <sup>2</sup> Ēfe Epa ika ano pexe ichapa sharakōifo. Ē mato itipinīsharafaxõi kaikai. Askarayamakē ē mato yoikerana. <sup>3</sup> Ē kaxõ ē mato itipinīshara faxõikai. Afianã oxõ ē mato ifiyoxii, a ē ika ari mato iyoxiki ari mā efe ĩpaxanõ. <sup>4</sup> Mā mā fai tāpiaki a ē kai ari,” ato faito, <sup>5</sup> Tomás kemani: “Ifo, nõkai a mĩ kai ari tāpiama, afeskaxõ nõ fai tāpitiro,” faito, <sup>6</sup> Jesús kemani: “Ēfi nã fai keskarakī. Ēfi chanīmismaki. Eõnoax yorafo nĩpaxatirofoki. Tsoakai ēfe Epa ika ano nokotiro. Eõnoax fisti ēfe Epa ari nokotirofo.

<sup>7</sup> “Ea tāpikōixõ ēfe Epari mā tāpikōitiro. Akka iskaratīa mā ēfe Epa tāpikōikai. Nã mā ea õiai keskarakī mā ēfe Epa mā õi,” ato Jesús faito, <sup>8</sup> Felipe kemani: “Ifo, noko Epa Nios õimafe. Mĩ noko Epa Nios õimanaino nõ inimakōitiro,” faito, <sup>9</sup> Jesús kemani: “Felipe, afetīakai ē mato fe imisma. ¿Afeskakī mĩ ea tāpiyomismamē? Ea õikī ēfe Epari mā mĩ õi. ¿Afeskakī: ‘Ea Epa õimafe,’ mĩ ea faimē? <sup>10</sup> Ēfi ēfe Epa fe fisti keskarakōiki. ¿Nã mĩ chanīmara faimamē? A ē mato yoiai ēa ē mato yoima ēfe Epaõnoa ē mato yoi. Epa Niospa nã apaiyai keskara ea famai efe imis. <sup>11</sup> Ē mato yoi ēfe Epa efe rafea ēri ēfe Epa fe rafemiski. Nāskakē ea chanīmara fakāfe. Nã tsõa atiroma keskarafori ē famis nã õixõ ea chanīmara fakāfe.

<sup>12</sup> “Chanīmakōi ē mato yoi. Nã ea chanīmara faxõ nã ē akai keskarakī faxii. Ēfe Epa ari kaxõ a ē aka keskaramaroko finõmainīfofā axikani. <sup>13</sup> Afara ēfe aneõxõ ēfe Epa mā yōkaito ē mato axoxii, eõxõ Epa Nios sharara fanõfo. <sup>14</sup> Afara fetsa ēfe aneõxõ mā Epa Nios yōkaito ē mato axotiro,” ixõ Jesús ato yoini.

*“Epa Nios āfe Yōshi Shara ē matoki nīchixii,” Jesús ato fani.*

<sup>15</sup> Anã Jesús ato yoini iskafakī: “Ea noikōikī nã ã mato yoiai keskai ikãfe. <sup>16</sup> Ë Epa Nios mato kīfixoni mato fetsa nīchixonō, nãato mãto òiti fepeaxoyonō. Nã Niospa Yōshi Shara, nãfi chanīmismaki. Mato fe ipanaka. <sup>17</sup> A nikayamaifãfe òitirofoma. Askatari tãpitirofoma. Akka mãfi mã mã tãpimiski mato femãi ikē. Nãskatari mãto shinã mēra mato fe ika.

<sup>18</sup> “Akka êkai mato fe ikima. Askafixō ã mato potaima. Ë matoki anã oxii. <sup>19</sup> Ë anã nono ikima. A ea Ifofaifãfema anã ea òikanima. Akka mã ea òixii, ã niano. Nãskakē mãri efe nīpanaka. <sup>20</sup> Naax ã otoaito mã ea tãpitiro êmãi Epa Nios fe nīpanakakē. Nãskarifiã mã efe ixii. Ëri ã mato fe ixii. <sup>21</sup> Nãskakē ã mato yoiaito mã ea nikakōixō mã ea fãsi noi. Ea noixori êfe Epari mã noi. Askatari êri ã mato noi. Nã ã shinãi keskara ã mato tãpimani,” ixō Jesús ato yoini.

<sup>22</sup> Nãskaito Judas fetsa, Judas Iscariotema yōkani: “Ifo, ¿afeskakī a mia Ifofaifoma mĩ ato tãpimatama noko fisti mĩ tãpimanimē?” ixō yōkaito, <sup>23</sup> Jesús kemani: “Ea noikakī nã ã mato yoiai keskara ea nikakōitirofo. Ëfe Epa ato noiaino êri ato noi. Nãskax nõ ato fe rafetiro. <sup>24</sup> Ea noiyamakaxokai ã yoia keskara ea nikakanima. Na meka mã nikai êfe mekama, êfe Ëpa meka ã mato yoi. Nã ea nīchinito ãfe meka.

<sup>25</sup> “Mato fe iyoxō ã mato yoiyofafãina. <sup>26</sup> Nãskaxō Epa Niospa ãfe Yōshi Shara matoki nīchi eōxō mato fe ixō mãto òiti mato inimamasharaxonō. Keyokōi mato tãpimani. Nã ã mato yoia keskara mato shinãmani.

<sup>27</sup> “Ë mato makinoax kakī ã mato òiti fepeaxosharafãinikai. Akka nã ea nikaifãfema mato òiti fepeaxotirofoma, ã fistichi ã mato axotiro. Nãskakē shinãchakayamakãfe. Rateyamakãfe. <sup>28</sup> Ë mato yoiaito mã mã nikai ã mato makinoax kaikai. Askafiax ã anã matoki oxii. Ea noikōiax mã ekeki inimatiro êmãi êfe Epa ari kaino, êfe Epamãi ea finōkōikē. <sup>29</sup> Nã ã mato rama yoiai keskaito mã ea chanīmara fatiro. Mē mato yoi a ixiai mã òixō mã ea chanīmara fanō.

<sup>30</sup> “Ë mato mēxotaima yoipaifiaino nã yōshi chakafãfe ãto xanīfo Satanás chaka ekeki oi. Askafixō ea afeska fatiroma. <sup>31</sup> Akka ã Epa Nios fãsi noikōi. Nãskakē nã ea yoiai keskai ã akōini. Nãskaxō keyokōichi ea tãpikani ã fãsi aō noiaito. Fininīfofãkãfe. Nonoax nõ kanō,” ato fani.

## 15

### *Jesúsfi fana ãfe kaya keskaraki. Akka nã fana pōya keskarafõ a Ifofamisfo*

<sup>1</sup> Anã Jesús ato yoini iskafakī: “Ëfi uva ãfe kaya keskarakōiki. Akka êfe Epa nã uva ãfe ifo keskara. <sup>2</sup> Akka mã na uva ãfe pōya keskarafõ. Nã uva pōya fetsa fimiyamaito ãfe ifãfe mextetiro potaxikī. Akka nã uva ãfe pōya fimiyafõ nã ãfe teshpa mīshti ifãfe xatetiro. Nãskax uva pōya sharayakōi itiro fimi sharaya ixikī. <sup>3</sup> Nãskarifiãkī mã êfe meka nikaxō mã mãto chaka mã potax mã isharaxii. <sup>4</sup> Emakinoax paxkayamakãfe. Efe rafekãfe, nã ã mato fe ika keskariai. Akka uva pōya fisti fimitiroma ãfe kayamaisax. Nãskarifiãkī mã efe rafexoma nã ã mato amapayai keskara mã atiroma.

<sup>5</sup> “Ëfi nã uva ãfe kaya keskarakī. Akka mã na uva ãfe pōyafõ keskara. Akka nã efe rafekōiai êri afe rafekōiaino ea keskarakōiri itiro. Ë mato fe ikamano mã afaa afeskatiroma. <sup>6</sup> Uva ãfe pōya chaka fimimais nõ mextexō potatiro. Nãskaxō mã xinī tsasifaano nõ ichafaxō nõ kofatiro. Nãskarifiã nã efe rafekaspaifo nãfo chiifã mēra fokani.

<sup>7</sup> “Akka mã efe rafekōixō êfe meka mã nikakī mãto òiti mēraxō mã shinãkī mã afarashta fapaikī êfe Epa Nios mã kifiaito mato axōi. <sup>8</sup> A ã mato amapayai keskara mã akī nãskax eōxō tãpimis mã iki. Mã askafaito òikakī Epa Nios tãpitirofo Epa Niosmãi fãsi finakōikē. <sup>9-10</sup> A Epa Niospa noikōiai keskafakī êri mato noikōi. Epa Niospa ea yoiai keskara ã afafãini. Akka ã afe imiskē ea noifafãini. Nãskafakīri nã ã mato yoiaito mã atiro mãmãi efe ixō. Nãskakē ã mato noifafãini.

<sup>11</sup> “Anori ě mato yoi ě inimai. Nāskarifiāi māri mā inimanō. Ĕ mato yoiaito mā anori akī mā tāpitiro ě mato noiaino. <sup>12</sup> Iskafakī ě mato yoi: Ĕ mato noiai keskai māri noinākāfe. <sup>13</sup> Nō fetsafo fe rafekōiax nō aō noikōiax nō aōnoax natiro. A mā nakī noiai keskarakōi tsōa finōtiroma. <sup>14</sup> Ĕ mato yoiai keskara aki mā efe rafemis mā itiro. <sup>15</sup> Akka a mato fe rafea mā tāpimatiro a mā shināi keskara. Nā ěfe Epa ea yoimis keskara ě matori tāpimani māmāi efe rafeano. Nāskakē ea yonoxomisfora ě anā mato faima. Efe rafeafora ě mato faxii. <sup>16</sup> Mā ea ifyamafiaino ě mato ifini ea keskara mā inō mātoxō fetsafāferi ea chanīmara fanōfo. Nāfāfe ea Ifofapanakafo efe ipaxakakī. Nāskaifono mā afarashta ěfe Epa Nios ěfe aneōxō mā yōkaito mato axosharaxii. <sup>17</sup> Nā ě mato yoiai keskai noinākāfe,” ixō Jesús ato yoini.

### *Jesús Ifofamisfo ato noikaspakani*

<sup>18</sup> Anā Jesús ato yoini iskafakī: “Anā ě mato yoi mato noikaspayokanima. Akka ea noikaspayokani. Mato iskaratīa noikaspafiaifono mā tāpitiro taefakī ea noikaspakani. <sup>19</sup> A ea Ifofaafoma fe mā ato fe rafeaito mato noikeranafo. Aa ranā noināifo keskari fakī matori noikeranafo. Akka māakai ato keskarama. Ĕ mato ifini a ea Ifofaifoma keskara mā inōma. Akka nā ea Ifofaafāfema mato noikaspakani. <sup>20</sup> Nā ě mato yoiai keskara shinākāfe. Ĕ mato yoi iskafakī a yonoxomistokai āfe ifo finōtiroma. Akka ea omiskōimakani matori omiskōimaxikani. Akka a ě ato tāpimana nikakaxō matori nikaxikani mā ato yoiaito. <sup>21</sup> Akka mā ea Ifofaito, nā ea amisfo keskafakakī matori askafaxikani. Akka a ea nīchini tsōa tāpiama. Nāskaxō mato chakafaxikani.

<sup>22</sup> “Ĕ atoki oyamaxō Niospa meka ě ato yoiyamaito tsōa tāpikeranafoma. Akka Niospa meka pishta tsōa nikayomisma afara chakafamisfo. Nāskax āto chaka atoō neama. Nāskafiaifono Niospa meka ě ato yoixiki ě oni. Nāskakē tsōa iskaratīa iskatiro: ‘Tsōa ea Niospa meka yoiaima.’ Askatari: ‘Ĕ afaa chakafamisma,’ itirofoma. Mā nikafikat-saxakakī āto chaka xateafoma. Nāskax āto chaka atoō nea. <sup>23</sup> Ea noikaspayanā ěfe Epari noikaspakani. <sup>24</sup> Niosxō tsōa atiroma keskara ě ato ispamis. Askafikaxokai tsōa āto chaka xateafoma. Tsōa atiroma keskara ě faito ōifikakī ea nikakanima. Nāskax shara ikanima. Akka ě afarafo shara fayamaito ea tāpikeranafoma. Nāskax ato chaka atoō nekeranama. Akka ě afarafo shara faito mā ōifikaxō ea noikaspayanā ěfe Epari noikaspakani. <sup>25</sup> A Niospa meka yoikī kirika kenenifo nē askakōi. Niospa meka yoikī eōnoa kirika kenenifo iskafakakī: ‘Ĕ afara chakafayamafiakē ea noikaspakani,’ ixō eōnoa yoikī kirika kenenifo.

<sup>26</sup> “Matori noikaspafono ěfe Epa Nios arixō āfe Yōshi Shara ě matoki nīchixii. Nāato mato ōiti fepeaxosharanō. Nāfi chanīmakōikī eōnoa mato yoixii. <sup>27</sup> Ĕ yorafo Niospa meka ato yoikī taefani. Nāskax mā efe imiski. Nāskarifiakī māri eōnoa tāpixō mā ato yoitiro.

## 16

<sup>1</sup> “A mā omiskōixiai ě mato yoiyoni mā iskakī shinānōma: ‘Ĵafeskai Jesús ěfe Ifo fiano ě omiskōimē?’ ixō mā anori shinākī mā ea potapaixii, anāakai mā ea chanīmara faxima. <sup>2</sup> Tāpikāfe. Māto kaifāfe nā ea Ifofaafāfema mato potaxikani mā anā āto ichanāti pexe mēra ĩkinōma. Ĕ mato yoikōi anā shināsharakanima. Fakirira shinākani iskakakī: ‘Nā Niospa apaiyai keskara nō faxōi. Nā Jesús Ifofaafō nō retei,’ ixō anori shinākani. <sup>3</sup> Ĕfe Epa tāpiafoma eari tāpiafoma. Nāskakaxō mato chakafaxikani. <sup>4</sup> Akka nā mā ea Ifofakī taefanītīa mā omiskōixii ě mato famisma, ě mato fe ifiaxokai ě mato afaa yoimisma. Akka iskaratīa ě mato yoi. Nāskakē mā mato omiskōimanaifono mā shināxii nā ě mato yoimis keskara,” Jesús ato fani.

### *Niospa Yōshi Sharapa noko shināmatiro*

<sup>5</sup> Anā Jesús ato yoini iskafakī: “Ĕfe Epa ea nīchini. Iskaratīa ě anā akiki kai. Akka mā, ‘Ĵfaki mī kaimē?’ mā ea faima. <sup>6</sup> Ĕ mato yoiaino mā shināmitsai. <sup>7</sup> Ĕ mato yoikōi,

ẽ mato makinoax kaano mã shara ixii. Akka ẽ mato makinoax kayamaino Niospa Yõshi Shara matoki oima. Nãskakẽ mãto õiti mato fepeaxoyoima. Nãskafiano ẽ mato makinoax kaxõ ẽfe Yõshi Shara ẽ matoki nĩchixii. <sup>8</sup> Nã ẽfe Yõshi Sharapa nai mẽranoax oxõ a ea Ifofaafoma ato yoixii iskafakĩ: ‘Mã mã afarafo chakafamiski,’ ato faxii. Nãskatari a Niospa fichipaiyai ato tãpimaxii. Nãskaxõ a Nios Ifofaafoma ato yoixii iskafakĩ: ‘Mã mã afarafo chakafamiski, nãskakẽ mã omiskõĩ,’ ato faxii. <sup>9</sup> Nã ea Ifofaitoma afara chaka shinãĩ. Nãskakẽ ẽfe Yõshi Sharapa a afara chakafamis ispayoxii. <sup>10</sup> Ẽfi nã ẽfe Epa ea amapaiyai keskara ẽ amiski. Nãskax ẽfe Epa ari ẽ kai anã ea õinõfoma. Nãri Niospa Yõshi Sharapa ato tãpimaniyoxii. <sup>11</sup> Nãskatari Niospa Satanás omiskõĩmaniyoxiai Niospa ãfe Yõshi Sharapa ato tãpimaniyoxii, nã Satanás ãto xanĩfo.

<sup>12</sup> “Ẽ mato meka ichapa yoipaiƒaitokai mã tãpitiroma. <sup>13</sup> Nãskafikẽ Niospa Yõshi Shara matoki oxõ a Niospa ãfe meka chanĩmakõĩ mato tãpimaxii. Nãfi chanĩmismo. Akka ãfe meka mato yoitama nã ẽfe Epa shinãmanai anori mato tãpimaniyoi. Nã afarafo afeskara ixiai mato tãpimaniyoi. <sup>14</sup> Nãato eõnoa yoisharakõixii. Nãskakẽ nã ẽ mato yoimis keskara Niospa Yõshi Sharapa mato tãpimaxii. <sup>15</sup> Nã ẽfe Epanãfori ẽfenãfori. Nãskakẽ nã ẽ yoiai keskara ẽfe Epa ãfe Yõshi Sharapa mato tãpimaxii,” ixõ Jesús ato yoini.

### *Jesús aõxõ tãpimisfo shinãmitsafikanax chipo inimaxikani*

<sup>16</sup> Anã Jesús ato yoini iskafakĩ: “Akka ẽkai anã mato fe nono samarakaima. Mẽ ẽfe Epa ari kai. Nãskakẽ mã ea õiyoima. Nãskafiax anã ẽ samamashta oaito mã ea õixii,” aõxõ tãpimisfo Jesús ato fani.

<sup>17-18</sup> Ato askafaito nikakani yoinãnifo: “¿Afeskakĩ, ‘Ẽfe Epa ari kaito mã anã ea õiyoima,’ noko faimẽ? ‘Afianã ẽ oaito mã ea õixii,’ noko fai. Na noko yoiai keskarakai nõ tãpiama,” ikanax yoinãnifo.

<sup>19</sup> Nãskakaxõ yõkapaiyaifãfe Jesús ato tãpini. “¿Na ẽ mato yoiai keskara mã tãpiamax mã yoinõnãimẽ?” ato fani. <sup>20</sup> “Ẽ mato xafakĩa yoinõ. Mẽ omiskõĩaino a ea Ifofaafoma fãsi inimakani. Akka mãfi ea shinãĩ mã oiai. Mã ea shinãĩ oiafiãx chipo mã ekeki inimaxii. <sup>21</sup> Akka mã kẽro fake kãikĩ pae metiro. Nãskax mã fake kãixõ anã pae metiroma mãmãĩ ẽfe fake kãiax. Nãskax inimasharakõitiro mãmãĩ ẽfe fake kãisharax. <sup>22</sup> Nãskarifiãĩ ẽ mato makinoax kaino mã oiai omiskõixii. Nãskax ẽ anã chipo matoki oaino mã inimakõixii. Tsõakai mato xatematiroma mã ekeki inimaito.

<sup>23</sup> “Ẽ naax ẽ otoax ẽ anã mato fe iyamaino mã anã afara mã ea yõkatiroma. Akka ẽfe aneõxõ mã Epa Nios yõkatiro. Afarashta ẽfe aneõxõ mã Epa Nios yõkaito mato axoxii. <sup>24</sup> Ẽfe aneõxokai ẽfe Epa mã yõkayomismo. Akka ẽ naax otokẽ nãskakẽ ẽfe aneõxõ ẽfe Epa mã yõkatiro. Mã yõkaito ẽfe Epa mato inãxii. Mato inãino mã fãsi inimakõixii,” ixõ Jesús ato yoini.

### *Jesús keyokõĩ finõa*

<sup>25</sup> Anã Jesús ato yoini iskafakĩ: “Ẽ mato meka fetsafaxõ yoiaito mã tãpiyomismo. Ẽkairoko xafakĩa mato yoiaito mã tãpipanã. Akka iskaratĩa xafakĩa ẽ mato yoi Epa Niosnoa mã tãpinõ. <sup>26-27</sup> Nãskaxõ mã ea noi. Ẽmãĩ Nios ariãx matoki onikẽ mã mã ea chanĩmara faa. Nãskakẽ Epa Niospa matori noikõĩ. Akka, ‘Ẽ mato makinoax kakĩ anã ẽ mato Epa Nios kĩfixoni,’ ẽ mato faima. Mã mã yõkaxii ẽfe aneõxõ. <sup>28</sup> Ẽ Epa ariãx nono mai ano oni. Nãskakẽ iskaratĩa nono mai anoax ẽfe Epa ari ẽ kai,” ixõ ato Jesús yoini.

<sup>29</sup> Ato askafaino aõxõ tãpimisfãfe kemanifo: “Aicho, iskaratĩa xafakĩakõĩ mĩ noko yoikai. A mĩ noko taefakĩ yoiaito nõ tãpiyoitama. Anã meka fetsafaxõ mĩ noko yoima. <sup>30</sup> Iskaratĩa mã nõ tãpia keyokõĩ mĩ tãpikõia. Nõ mia yõkapaiyaito mĩ noko tãpitiro. Nãskakẽ mĩ Nios ariãx onikẽ nõ mia chanĩmara fai,” ixõ yoiaifãfe <sup>31</sup> Jesús anã ato kemanifo: “¿Chanĩmamẽ mã mã ea chanĩmara faimẽ?” ato fani. <sup>32</sup> Nãskaxõ anã ato yoini: “Chipo mã emakinoax mã paxkakãinikai. Mã fakirira kai. Chanĩma, iskaratĩa mã emakinoax

mã fakirira kai. Tsoakai efe nêteima. Mã askafiainokai eres ã nêteima. Ëfe Epa fe ã nêtei. <sup>33</sup> Nã ã mato yoi mato õiti shara inõ. Akka nã ea chanĩmara faafoma fe mã nono nãmã nêtei. Nãskakẽ mato omiskõimafiaifono shinãchakayamakãfe. Ë Satanás yafi nã ea chanĩmara faafomafo ã ato finõkõia. Nãskakẽ ã mato kexesharatiro,” Jesús ato fani.

## 17

### *Aõxõ tãpimisfo Jesús Epa Nios ato kifixoni*

<sup>1</sup> Nãskata Jesús nai foisnĩfofã Apa yoini: “Epa, iskaratĩa ã naano ato tãpimafe ã mã Fakekõiki. Mĩ ato tãpimanaino ãri ato tãpimatiro mã fãsi sharakõi. <sup>2</sup> Mĩ ea nĩchini ã ato xanĩfo inõ. Nãskaxõ mã ea ato inãni ã ato imasharapakexanõ. <sup>3</sup> Meres fisti mã Nioskõi. Akka ãfi Jesucristo nã mã nĩchini. Nã noko tãpiafo nãfo nipanakafo.

<sup>4</sup> “Ë nono mai anoxõ afarafo ã ato ispa, mĩmãi sharafinakõikẽ. Nã mã yoiai keskara mẽ aka. <sup>5</sup> Nõ mai onifamatai ã mia keskara xanĩfo shara iyopaoni. Nãskakẽ iskaratĩa ã mefe xanĩfo inõ ea xanĩfo imafe a ã ipaoni keskara.

<sup>6</sup> “Nono mai anoa yorafo mã ea ato minini ã ato tãpimanõ mã afe keskaramãki. Nã mãnãfofiano mã ea ato minini. Mĩ meka nikakõinifo. <sup>7</sup> A mã ea yoia keskara ã ato yoimis. Nãfo mã tãpikõiafo. <sup>8</sup> A mã yoiai keskara ã ato yoiaito ea chanĩmara fakõikani. A ã mia ariax oniri mã tãpiafo. Chanĩmara fakani a ea mã nĩchini.

<sup>9</sup> “Ë mia ato kifixõfafãini. Akka a ea chanĩmara faafoma ã mia ato kifixonima. Nã ea mã ato mininiõxõ ã mia kifixõfafãini. Ë mia ato kifixõfafãini nãfomãi mãnãfokẽ. <sup>10</sup> Akka nã ãfenãfori mãnãki. Nã mãnãfori ãfenã. Nãskaxõ nã ea chanĩmara faafoõxõ fetsafãferi tãpitirofo ã sharakẽ.

<sup>11</sup> “Ëkai anã na mai ano ikima. Ë mikiki kai. Akka nã mia Ifofaafofi nono na mai ano nêtekani. Epa, mã fãsi sharaki. Ato kexesharafe. Mĩ aneõxõ ato kexesharafe. Nã mã ea inãni tii ato kexesharafe. Akka nõfi fisti keskaraki. Nãfori nofe fisti keskara inõfo. <sup>12</sup> Ë ato fe iyoxõ ã ato kexeshara. Mĩoxõ ã ato kexeshara, ã fato fenoama. Akka nã Satanás ãfe fake fisti ã fenoa. Nã mã meka yoikĩ kirika keneyonifo keskarax nã fisti mã fenoa.

<sup>13</sup> “Iskaratĩa ã mia ari kai. Ë kayoxoma ã ato yoiyoi nã ã ikai keskariai akairi inimakõinõfo. <sup>14</sup> Nã mã yoiai keskara mẽ ato tãpimani. A mia chanĩmara faafãfema ato noikaspakani, miamãi Ifofaafono. Nãskakẽ ato noikaspakani. Nãskakẽri ãrikai ato keskarama. Akka eari noikaspakani.

<sup>15</sup> “Akka ã mia yoima na mai anoa mã ato ifinõ. Akka ã mia yoi na mai anoa mã ato kexesharanõ Satanás chakata ato afeska fanõma. <sup>16</sup> Nã mia Ifofaafõ a mia chanĩmara faafomafo fe, ato fe rafetirofoma. Ërikai ã ato fe rafetiroma. <sup>17</sup> Mĩ meka chanĩmakõi. Mĩ mekapa ato sharafafe mia keskara shara inõfo. <sup>18</sup> Ea mã mai ano nĩchini ã mã meka ato yoinõ. Nãskarifikĩ ã yorafo nĩchi mã meka shara ato yoitanõfo. <sup>19</sup> Mã ea yoia keskara ã akaino nãfãferi askari fanõfo.

<sup>20-21</sup> “Ëkai ato fistiõxõ kifixõfafãinima. Nã ea Ifofaafãfe ato yoiaifono nikakaxõ ea Ifofaxikani. Nãskakẽ ã mia ato kifixõfafãini nã nõ shinãi keskara fisti shinãnõfo. Mĩ efe imis keskai nãfori nofe inõfo. Nõ ato fe tanaima niaito õikakĩ a ea chanĩmara faafãfema akairi chanĩmara fanõfo mã ea nĩchini. <sup>22</sup> Mĩ efe imis keskai ãri ato fe imiski. Nã nõ shinãi keskarafo akairi shinãnõfo. <sup>23</sup> Mĩ efe ika keskarari ãri ato fe ikaki. Akka nã mã shinãi keskarafo nõri shinãtiro. Mĩ õiti keskara nõ itiro. Akka mã ea atoki nĩchini. Nã mã ea noiai keskari fakĩ nãfori mã ato noikõi. Mĩ askafaino nã ea chanĩmara faafãfema tãpitirofo.

<sup>24</sup> “Epa, nã yorafo mã ea inãfo efe inõfo mã ika anoa mia keskara shara ea õinõfo. Mĩ mai onifayoxoma mã ea noiyopaoni. <sup>25</sup> Epa, mã fãsi sharakõi. Nã ea chanĩmara faafãfemakai mia tãpiafoma. Akka ã mia tãpikõia. Mĩ ea nĩchini nã efe ikafãfe mã tãpiafo. <sup>26</sup> Mĩ afe keskaramãki mẽ mia ato tãpimamis nã mã ea noiai keskari fakĩ, nãfãferi fetsafo noikõinõfo ã ato fe ikano. Askatari ã ato õimafãfãini,” ixõ Jesús Apa kĩfini.

## 18

### *Jesús achinifo*

(Mt. 26.47-56; Mr. 14.43-50; Lc. 22.47-53)

<sup>1</sup> Nāskata mā Apa kīfikī nishpata aōxō tāpimisfo fe fakishi Jesús kani, xexa Cedrón pishta pokefaini. Nāno ifi fanafāfe āfe anefo olivos ini. Olivos mēra ikitoshinifo. <sup>2</sup> Judaspa ato Jesús achimani kakī tāpini faki Jesús kaamāki, Olivos anomāi aōxō tāpimisfo Jesús ato iyomiskē. <sup>3</sup> Nānori Judaspa sorarofō iyonī Jesús achinōfo. Nā ato Nios kīfixomis xanīfofōfāfe askatari fariseofāferi Nios kīfiti pexefā kexemisfo nīchinifo Judas fe fōtanōfo. Chiifoya kenofoya koshatifoya ashifoya fonifo. <sup>4</sup> Mā achifōfāifono Jesús ato tāpini. Mā nokoafono ato yōkani: “¿Mā tsoa fenaimē?” ato faito, <sup>5</sup> “Nō Jesús Nazarete anoa nō fenai,” faifāfe, ato kemani: “Ēkīa, nono ē ika,” ato fani. Ato askafaino nā Jesús ato achimanai Judasri nāno ato fe ini. <sup>6</sup> “Ē nono ikaki,” Jesús ato faino, chetekiri ifiakekafāpakei fetsenifo. <sup>7</sup> Nāskaxō Jesús anā ato yōkani: “¿Tsoa mā fenaimē?” Jesús ato faino, “Nō Jesús Nazarete anoa nō fenai,” faifāfe <sup>8</sup> anā ato yoini: “Ēkīa nā mā ea fenai ē mato faa,” ato fani. Nāskaxō ato yoini: “Mā ea fenamākai na eōxō tāpimisfo ato nīchikāfe fotanōfo,” ato fani.

<sup>9</sup> Nā Jesúsnoa yoikī kirika keneyonifo iskafakī: “A mā ea minia fato fisti fenoima,” ixō kirika kenenifo. Nāskaxō nā kirika kenenifo keskarakōi Jesús Apa Nios kīfini. <sup>10</sup> Nāskaino Pedro āfe keno tsekani, āfe keno tsiostamexō. Mā āfe keno fixō nā ato Nios kīfixomisto āfe xanīfāfe yonomati paxteni. Nā xanīfāfe āfe yonomati āfe ane Malco ini. Nā Pedro paxteni. <sup>11</sup> Pedro askafaito oikī, “Mī keno fafe,” Jesús Pedro fani. “¿Mī shināimamē? Ēfe Epa ea afara kechoki inā ē ayai,” ayatiki keparanākī Jesús Pedro yoini. “Nā ēfe Epa Niospa apaiyai keskara ē akikai,” ixō Jesús yoipaini.

### *Jesús Anás ano iyonifo*

(Mt. 26.57-58; Mr. 14.53-54; Lc. 22.54)

<sup>12</sup> Sorarofāfe āfe xanīfo feta a Nios kīfiti pexefā kexemisfo feta osinākaxō Jesús achikaxō metexkere anifo. <sup>13</sup> Metexkere akaxō Anás pexe ano iyonifo. Nā Anás Caifás āfe rayos ini. Nā Caifás Nios ato kīfixomis xanīfokōi ini. <sup>14</sup> Nā Caifás āfe kaifo israelifo yoini: “Feronāfake fisti yorafoōnoax naa, sharaki,” ato fani.

### *“Ē Jesús ōimisma,” Pedro ini*

(Mt. 26.69-70; Mr. 14.66-68; Lc. 22.55-57)

<sup>15</sup> Askata Jesús iyoaifono Pedro fe a Jesúsxō tāpimis fetsa ato acho fonifo. Mā pexe ano nokoano nā Jesúsxō tāpimis fetsa xanīfāfe mā ōimis ini. Nā Jesús fe ikikaini. <sup>16</sup> Akka Pedro kāiti ano nēteni, ikinima. Akka nā Jesúsxō tāpimis fetsa ikikaini. Nāato xomaya a kāiti kexea yoini Pedrori ikimanō. <sup>17</sup> Mā Pedro ikiano nā kāiti kexemis xomayato yōkani: “¿Mīri mī Jesús āfe inamē?” faito, “Maa, ēkai Jesús āfe inama,” Pedro fani.

<sup>18</sup> Mā fakishano matsinākōikanax chii ketefaax keyokōi chii yoonifo matsi meya-maxikakī. Nā xanīfofo āto yonoxomisfo fe a Nios kīfiti pexefā kexemisfāfe chii ketefaax yoonifo. Pedrori ato fe yooni.

### *Judeofāfe xanīfāfe Jesús yōkani*

(Mt. 26.59-66; Mr. 14.55-64; Lc. 22.66-71)

<sup>19</sup> Nāskata ato Nios kīfixomisfāfe āto xanīfāfe Jesús yōkani iskafakī: “¿Fatofomē a mīōxō tāpimisfo? ¿Afaa mī ato yoimismē?” faito, <sup>20</sup> “Ēkai one ato yoiamā. Keyokōichi ea nikanōfo ē ato yoimis. Ē māto ichanāti pexe mēranōa yafi a māto Nios kīfiti pexefā mēranōa ē ato yoimis. Ēkai ēfe meka ē onemisma. <sup>21</sup> ¿Afeskakī mī ea yōkaimē? Ea yōkakima a ea nikamisfo yōkafe. A ē ato yoimis tāpiafoki,” Jesús faito, <sup>22</sup> a Nios kīfiti pexefā kexemisto afe ketaxamei niato fepasyanā yoini: “¿Afeskakī nōko xanīfo mī anori yoimē?” faito, <sup>23</sup> Jesús anā kemani:

“Afaa chaka ě yoimě ea yoife. Akka ě afaa chaka yoiana ¿afeskakĩ mĩ ea fepasimě?” Jesús fani.

<sup>24</sup> Askafaito nikakĩ Anás ěfe rayos Caifás ano Jesús nĩchini metexkere axõ. Nã Caifás ato Nios kĩfixomis ģto xanĩfokõĩ ini.

*Pedro anã ato yoini: “Ĕkai Jesús õimisma,” ato fani*

*(Mt. 26.71-75; Mr. 14.69-72; Lc. 22.58-62)*

<sup>25</sup> Nãnoax Pedro ato fe chĩi yooni. ato fe yooaito afianã Pedro yõkanifo: “Mĩfi nã Jesús ěfe ina fetsakĩ,” faifãfe, “Maa, ěkai nã Jesús ěfe inama,” ato fani.

<sup>26</sup> Ato askafaino nã paxteato afe yõra yõkani: “¿Ĕ mia õiamamě? Akka ě mia õia. Nã fanafo mapoa mērao Jesús yafi ě mia õia,” nã paxteato afe yõra Pedro fani. <sup>27</sup> “Maa. Ĕkaima,” Pedro faino takara keoinãkafani.

*Pilato ano Jesús iyonifo*

*(Mt. 27.1-2, 11-14; Mr. 15.1-5; Lc. 23.1-5)*

<sup>28</sup> Nãskano fakishpari judeofãfe Caifás ěfe pexe anoxõ Pilato xanĩfo ano Jesús iyonifo. Nã judeofo Pilato ěfe pexe mēra ikitiroma inifo. Pilatokairoko judeokē a mēra ikipanãfãfe. “Nõ Pilato ěfe pexe mēra ikiax nõ chakanatiro,” ikanax, ikikaspanifo. Nã judeofo a judeofoma fe rafexõ Pascua fistatĩa pitirofoma ipaonifo. Nãskara feyafamisfo ipaonifo. Nãskakē Pilato ěfe pexe mēra ikikaspanifo. <sup>29</sup> Nãskaifono pexe kachiori kãinãkafã Pilato ato yõkani: “¿Afaa chakafakē na feronãfake mã ea ano efeamě?” ato faito, <sup>30</sup> “Afaa chakafayamakekai nõ mikiki efekeranama,” faifãfe, <sup>31</sup> ato Pilato yoini: “Iyotakãfe. Mãto xinifãfe yoini keskafakĩ omiskõimaxikakĩ. Nã keskara mã feyafamiski. Afaa chakafamãki mã akãfe,” ato Pilato faito, judeofãfe kemanifo: “Akka mãto xanĩfofãfe yoinifo nõ tsoa retekĩ mastatiroma,” fanifo.

<sup>32</sup> Jesús aõxõ tãpimisfo taeyoi yoini keskafakĩ nãskakõĩ fanifo ifi cruz ikaki mastakakĩ.

<sup>33</sup> Nãskano Pilato ěfe pexe mēra Jesús ikimani yõkaxiki. Mã ikimaxõ yõkani: “¿Mĩmě judeofãfe ģto xanĩfo?” Pilato faito, <sup>34</sup> Jesús kemani: “¿Mĩ ea shinãimě ě judeofãfe xanĩfo mia yoiaforaka?” Jesús faito, <sup>35</sup> anã Pilato kemani: “¿Mĩ shinãmě ě judeo? Ĕ judeoma. Akka mĩ kaifo feta mĩ xanĩfofãfe mia ekeki efeafõ ě mia omiskõimanõ. ¿Mĩ afaa chakafakē mia ekeki efeafomě? Ea yoife,” Pilato faito, <sup>36</sup> Jesús kemani: “Ĕkai na mai anoax xanĩfoma. Ĕ nonoax xanĩfokē a ea Ifofaafãfe yorafo setekeranafo ea achiyamanõfo. Akka ěkai na yorafãfe ģto mai anoax ě ģto xanĩfoma,” Jesús faito, <sup>37</sup> Pilato kemani: “¿Akka mĩ xanĩfo rakikĩa?” faito, “Nã ea mã yoiai keskarakĩa ě xanĩfo. Nãskakē ě yõra fakekõĩ kãini meka chanĩmakõĩ ato yoixikĩ. A meka chanĩmakõĩ fisti nikapaiyãifãfe nãfãfe ea nikamisfo,” Jesús faito, <sup>38</sup> “¿Afaamě a meka chanĩmakõĩ?” Pilato fani.

*Pilato ato yoini Jesús retenõfo*

*(Mt. 27.15-31; Mr. 15.6-20; Lc. 23.13-25)*

Askafata Pilato pexe kachiori kãinãkafani. Kãinãkafaxõ judeofo yoini: “Ĕ na feronãfake yõkakĩ ěkai aõnoa afaa chaka nikama,” ato fani. <sup>39</sup> “Iskaratĩa na Pascua fistatĩa ě yora fisti karaxa mērao ě mato kãimaxomis, nãskaramãĩ mãto feyafamiskē. ¿Akka ě mãto xanĩfo ě mato kãimaxotiromě katanõ?” ato faino, <sup>40</sup> fãsikõĩ mekainĩfofãfãfo: “¡Jesús tsekakima! ¡Barrabás noko kãimaxõfe!” fanifo. Nã Barrabás yometso ini.

## 19

<sup>1</sup> Nãskaxõ Pilato ato yoiano Jesús iyonifo sorarofãfe koshatinĩ koshaxikakĩ. <sup>2</sup> Askano sorarofãfe moxa chainipafo maiti fakaxõ maimanifo. Akiki kaxepaiyanã nãskatari tari õshi nana safemanifo. <sup>3</sup> Nãskax akiki kaxepai kakĩ iskafanifo: “Aicho. Mĩfi judeofãfe ģto xanĩfoki. Mĩ mēxotaima nipanakaki,” iyanã fepasketsanifo.

<sup>4-5</sup> Askafaifono Pilato Jesús pexe xaki mērao kãimani õinõfo. Jesús tari õshi nana safeax kãikaini, moxari maiti fakaxõ maimanafono. Nãskaxõ Pilato ato yoini: “Õikapo na



feronãfakekai afaa chakafaa ã nikama ã chakafapanã,” ato fani. <sup>6</sup> Ato askafaito judeofãfe ãto xanĩfoyaxõ a Nios kĩfiti pexefã kexemisfãferi fãsikõĩ mekafanifo: “¡Mastafe! ¡Mastafe!” faifono, “Mã iyokaxõ mastatakãfe. Ëkai aõnoa afaa chaka ã nikama ã chakafapanã,” Pilato ato fani. <sup>7</sup> Ato askafaino judeofãfe kemanifo: “Akka na feronãfãke noko yoimis: ‘Ëfi Niospa fakeki,’ noko famis. Akka nõko xinifãfe yoini: ‘Ë Niospa fakera ikai natiro,’ fanifo. Nãskakẽ na feronãfake nayamaima,” fanifo.

<sup>8</sup> Askafaifãfe nikai Pilato ratekõini. <sup>9</sup> Nãskaxõ ãfe pexe mẽra Jesús anã iyonĩ. Iyoxõ yõkani: “¿Fanĩamẽ mĩ?” faino, Jesús kemanima. <sup>10</sup> Pilato anã Jesús yoini: “¿Ea mĩa kemaimamẽ? ¿Ea mĩa tãpiamamẽ ã xanĩfo? Ë mia kãimatiro, askayamai ã mia ato mastamatiro,” Pilato askafaino, <sup>11</sup> Jesús kemani: “Niospa mia xanĩfo imayamainokai mĩ ea afeska fakeranama. Akka mĩ ea ato mastamanax mĩ chaka iki. Akka nã ea mikiki efe nã chakafinakõĩ iki mĩ ea reteano,” Jesús fani.

<sup>12</sup> Askafaito nikakĩ Pilato Jesús kãimapaini. Kãimapaiyaino nikakani fãsikõĩ judeofo mekainĩfofãkata yoinifo: “Fatora fetsa xanĩfo ipaikĩ nãato César xanĩfo chakafai. Akka na Jesús xanĩfo ipai. Akka mĩ Jesús kãimaxõ mĩ anã nõko xanĩfo César tanaima,” fanifo.

<sup>13</sup> Askafaifãfe nikakĩ afianã Pilato Jesús pexe mẽranoa kãimani. Nãskax Pilato a xanĩfãfe tsaoti ano tsaoni. Nã xanĩfãfe tsaoti pexe emãiti ini tokiri sapa kamaki ãfe tsaotiki tsãoni. Nã tokiri hebreofãfe ãto mekapa anemisfo Gabata fakakĩ. <sup>14</sup> Mã Pascua fista ikaino xini keya Pilato tsoaxõ ato yoini mã Jesús kãimaxõ, “Nakĩa õikapo mãto xanĩfo,” ato fani. <sup>15</sup> Ato askafaino fãsikõĩ mekainĩfofãkata yoinifo: “¡Iyoxõ mastatãfe ifi cruz ikikakĩnoax nanõ!” faifono, “¿Mã õipaimẽ ã mãto xanĩfo mastanõ?” ato Pilato faino, “César fisti nõko xanĩfokõĩ. Anã ano nõko xanĩfo fetsama,” judeofãfe ãto xanĩfofãfe Pilato fanifo.

<sup>16</sup> Askafaifono Pilato ato Jesús nĩchixonĩ iyoxõ mastatanõfo.

### *Jesús ifi cruz ikaki mastanifo*

*(Mt. 27.32-44; Mr. 15.21-32; Lc. 23.26-43)*

<sup>17</sup> Nãskano sorarofãfe Jesús iyonifo. Iyoaifono ãakõĩ ifi cruz ika Jesús iyaxõ foni. A mastaifo ano nokoni. A mastaifo nãno ãfe ane ini: “Mapo Xao,” fanifo anakakĩ. Judeofãfe mekapa Gólgotara fapaonifo. <sup>18</sup> Nãskata Jesús yafi yometso raferi mastanifo. Takai rafe yometso rafe mastanifo. Akka Jesús nẽxpakĩa anifo.

<sup>19</sup> Mã Jesús mastakaxõ ãfe mapo mãnãori kenenõfo Pilato ato yoini. “Jesús Nazarete anoa judeofãfe ãto xanĩfokõĩ,” fanifo kene kakĩ. <sup>20</sup> Jerusalén ano yora fetsafo osiafo ichapakõifo inifo. Nãnoxõ Jesús Jerusalén chaimashtaxõ mastafõ ini. Nãnoxõ Pilato meka fetsa fetsatapafo ato kenemani Jesús judeofãfe ãto xanĩfokẽ tãpinõfo. Judeofãfe ãto meka keneta, griegofãfe ãto meka keneta, romanõfãfe ãto mekari kenenifo. <sup>21</sup> Nãskax judeofãfe ãto xanĩfofo Pilato ano fonifo yoi fokani: “Jesús nõko xanĩfoma. Nãskakẽ ato kenemayamafe iskafakĩ: ‘Jesús judeofãfe ãto xanĩfokõĩ,’ askara ato kenemayamafe. Akka, ‘Jesús yoimis, “Ë judeofãfe xanĩfora” imis.’ Nãnori mĩ ato kenematiro,” faifãfe, <sup>22</sup> Pilato ato yoini: “Nã ãto kenemana keskara ãto kenemani. Ëkai anã afaa fetsa ãto kenematiroma,” Pilato ato fani.

<sup>23</sup> Sorarofãfe Jesús mastafono ãfe rapati fĩanifo. Nãskax paxkanãĩ fetsenifo Jesús ãfe rapati soraro cuatropa Jesús rapati finifo. Nãskata nã ãfe tari chainipari fĩanifo. <sup>24</sup> Nãskax yoinãnifo: “Nã tari nõ faxteimãkai fetsakanãyamaxikĩ. Nãskara memashara nõ finõ,” inifo. Nãskax ãfe tariya kaxenifo ãto kaxetiya. “Na finõmanato Jesús ãfe tari fii kiki,” inifo. Nãnori Niospa meka yoikakĩ keneyonifo. A Jesús inõpokoai yoikakĩ keneyonifo. Iskafakĩ kenenifo: “Ëfe rapati paxkanãxikani. Askata ãfe tari chainipayari ãto kaxetiya kaxexikani. Nã finõmanato ãfe tari fixii,” ixõ kirika keneyonifo. Nãskakẽ sorarofõ Jesús ãfe tariya kaxenifo.

<sup>25</sup> Nãskano nã Jesús mastafõ ano chaimashta Jesús ãfe afa nini. ãfe afa fetsari nãno nini. Nã Cleofaspa ãfe ãfinõ María Magdalenanõ nãno chaimashta ninifo. <sup>26</sup> Nã aõxõ tãpimis

fisti ãfe yamakõi a Jesús noikõipaoni afa fe ketaxamei nikê Jesús õini. Nãskaxõ Jesús afa yoini: “Na feronãfakefi mĩ fakeki,” fani. <sup>27</sup> Nãskata nã feronãfakeri Jesús yoini: “Nafi mĩ efaki,” fani. Askafaino nikakĩ María ãfe pexe ano iyoni kexesharaxikĩ.

### *Jesús nani*

(Mt. 27.45-56; Mr. 15.33-41; Lc. 23.44-49)

<sup>28</sup> Jesúsnoa yoikĩ Niospa meka keneyonifo keskakõini. Mã Jesús tãpixõ yoini: “Ë nõamãiki,” ato fani. <sup>29</sup> Ato askafaino fimi ene kacha ocha mefetiki tsoano nã mĩxa fikaxõ fimi ene kachaki momokaxõ Jesús ayamapainifo tafa xatekĩ rõtati fakaxõ. <sup>30</sup> Mã fimi kacha ayaxõ Jesús yoini: “Keyokõi ãfe Ëpa ea yoia keskara mẽ aka,” ato fani. Ato yoita nãskax nai tepopakekafãni.

### *Soraronõ Jesús ãfe pishi nãmã chachini*

<sup>31</sup> Mã Pascua fista ikaino Jesús yafi yometso rafe ifi cruz ikakĩnoa judeofãfe õikaspanifo. Nã fistatĩa ato pena tenetitĩa ini. Nãskax mã fista ikaino Pilato ano fonifo yoi fokani iskafakakĩ: “Mã penama nõko fista iki kiki. Nã Jesús yafi nã yometso rafe ãto fitax xao tẽkerisa fanõfo koshi nanõfo ato yoife. Mã penama nõko fista iki kiki nã ato mastafõ ano anã inõfoma nõko fistatĩa,” judeofãfe ãto xanĩfofõfãfe Pilato fanifo. <sup>32</sup> Nãskafaifono Pilato sorarõfo yoini iskafakĩ: “Ãto fitax xao ato tẽkerisa fakãfe koshi nanõfo.” Ato askafaino fokaxõ õiafo yometso rafe naafoma inifo. Naafomano ãto fitax xao ato tãkenifo nanõfo. <sup>33</sup> Akka Jesúski fokaxõ õiafo mã Jesús naa õinifo. Nãskakẽ tsõa ãfe fitax xao tẽkenima. <sup>34</sup> Akka soraro fistichi ãfe ãshi ãfe pishi nãmã chachiano ãfe imi fakaya siini.

<sup>35</sup> Ëkĩa Juan na kirika ã keneai nã ã õimis keskara ã mato yoi na kirika kenekĩ mã chanĩmara fanõ. Ëfi chanĩmakõi mato yoi. <sup>36</sup> Niospa meka yoimisto a Jesús inõpokoai yoikĩ kirika kenei iskafakĩ: “Ãfe xaokai tsõa tẽkexikanima,” ixõ kirika keneyonifo. <sup>37</sup> Askatari, “A ãfe pishi chachiaifono õixinõfo,” a Niospa meka yoimisto nãnorikõi kirika keneyoni.

### *Jesús makex kini mẽra maifanifo*

(Mt. 27.57-61; Mr. 15.42-47; Lc. 23.50-56)

<sup>38</sup> Nãskano José Arimatea ano ikax Pilato ano kani. Kaxõ Jesús ãfe yora yõkani: “Ifi cruz ikakĩnoa ã Jesús fotomapai maifaxikĩ,” José faito, “Atãfe,” Pilato fani. Nã José Jesús Ifofamis ini. Jesús Ifofafxõ ato yoinima. Judeofãfe ãto xanĩfõfõki mesekĩ ato yoinima. <sup>39</sup> Nicodemo feta José Jesús ifi cruz ikakĩnoa fotomanifo maifaxikakĩ. Nã Nicodemo Jesúski fakishi kaxõ yõkayoni. Nãato ãfe pirofomã shara treinta kilo feni Jesús ãfe yora raish axiki fena pisiyamanõ. Fetsa ãfe ane mĩrra ini. Fẽtsa aneri áloes ini. Nã rafe osia ini. <sup>40</sup> Askano José feta Nicodemo sama oxo shara pirofomã raish axõ aõ rakonifo. Judeofãfe ãto kaifo maifakĩ askara feyafamisfo ini. <sup>41</sup> Nã ifi shara mĩshti mapoa anoxõ chaimashtaxõ Jesús mastanifo. Nãnori mafa kini fena, tsoa a mẽra maiyomisma ini. <sup>42</sup> Mã judeofãfe ãto pena teneti chaimashta ikaino mã xini kaino Jesús maifanifo. Nãskakẽ nã mafa kini chaimashta nã mẽra Jesús maifanifo.

## 20

### *Jesús otoni*

(Mt. 28.1-10; Mr. 16.1-8; Lc. 24.1-12)

<sup>1</sup> Nãskano nomĩkonõ fakishparikõi María Magdalena kani nã Jesús mafa kini mẽra maia ano. Kaxõ õia mã mafa kini fepekemea ini. Nã tokirinĩfã aõ fepoitafo mã fepekemea ini.

<sup>2</sup> María õifaini ichoni Pedro yafi nã Jesúsxõ tãpimis fetsa nã Jesús ãfe yamakõi chanifaikai kani. Ato yoini: “Nõko Ifãfe ãfe yora kini mẽranoa mã fakira oneafo nõkai tãpiama,” ato fani.

<sup>3</sup> Ato askafaino Pedro fe a Jesúsxõ tãpimis fetsa õifokani ichonifo. Mafa kini ano õifokani. <sup>4</sup> Nã fẽtsa Pedro xonõfaini rekẽ nokoikakĩ. Akka Pedro chipo nokotoshini. <sup>5</sup> Rekẽ

nokotoshixō a Jesús maia ano mafa kini mēra tēkepakekafā naisni. Ari naiskī ōia a aō rakoitafo sama mania ini. <sup>6</sup> Nāskata Pedrori chipo nokotoshini. Nokoax mafa kini mēra ikikaini. Ikikaixō ōia aō rakoitafo mania ini. <sup>7</sup> A aō mapoki marakoitafo nā fosoita ariri āfe sama mania ini chaimashta. <sup>8</sup> Askaino a Pedro fe kaari kini mēra ikikaini. Ikikaikī ōia ano Jesúsma ini. Nāskaxō chanīmara fani. <sup>9</sup> A Jesús otoxiai Niospa meka yoikī kirika kenenifo tsōa tāpiyonima. <sup>10</sup> Nāskata mā ōita āto pexe ano fenifo.

### *Jesús María Magdalenaki nokoni*

*(Mr. 16.9-11)*

<sup>11</sup> Mā foaifono María kanima. Mafa kini kachiori ni ax María oiani. Oiayanā nāatori kini tēkepakekafā naiski ōini. <sup>12</sup> Niospa āfe ājiri rafe rapati oxokōi safekanax tsaoafo ini Jesús rakaita ano. Nā fosoita ariri fetsa tsaoa, fetsari āfe tae ikita ariri tsaoa ini. <sup>13</sup> Nāskaxō Niospa āfe ājiri rafeta yoini: “¿Afeskai mī oiaimē?” faifono, “Ēfe Ifāfe āfe yora mā fakira oneafo ē tāpiama,” ato fani.

<sup>14</sup> Nāskata María texkeakekafā ōia Jesús a kachiori niano tāpinima. <sup>15</sup> Jesús María yōkani: “Kēromā, ¿afeskai mī oiaimē? ¿Mī tsoa fenaimē?” faito, María shināni: “Nā fanafo kexemisra,” fani. Nāskaxō María yōkani: “Mī ēfe Ifāfe āfe yora fanī mī faamē ea yoife, ē afianā nono maifanō,” faito, <sup>16</sup> Jesús: “María,” faito, foisnīfofā María ōia nā Jesús āfe fesokōi ini. Nāskaxō María judeo mekapa: “Rabonī,” fani. Rabonī fakī, “Noko tāpimamisto,” fani. <sup>17</sup> Askafaino, “Ea ramāyamafe. Ēfe Epa ari ē kaamaki. Akka ea ramākima efe yorafo ea ato yoixotāfe, mā ēfe Epa Nios ari ē kaikai. Nā ēfe Epari mātō Epaki. Nā ēfe Niosri mātō Nioski, ato fatāfe,” fani. <sup>18</sup> Askafaino María kaxō aōxō tāpimisfoki nokoxō ato yoini: “Mē nōko Ifo ē ōiaki,” ato fani. Nā āfe Ifāfe yoia keskara ato yoini.

### *Jesús aōxō tāpimisfoki nokoni*

*(Mt. 28.16-20; Mr. 16.14-18; Lc. 24.36-49)*

<sup>19</sup> Nāskata nomīkonō mā xini kaino a aōxō tāpimisfāfe judeofoki mesekakī āto pexe fepoti feponifo ichanākakī. Mā ichanāifono āto nēxpakīa Jesús nirisatani. Ato yoini: “Mātō ōiti fepeakax inimasharakāfe,” ato fani. <sup>20</sup> Ato askafata a mifiki rāfomā mastaitafo āfe tsefe ato ispani. A āfe pishiki āshi chachitafori ato ispani. Ato ispaito ōikani āto Ifoki fāsi inimakōinifo.

<sup>21</sup> Afianā Jesús ato yoini: “Mātō ōiti fepeakax inimasharakāfe. Nā ēfe Ēpa ea nīchini keskafakīri iskaratīa ē matori nīchikai,” ato fani. <sup>22</sup> Nāskaxō ato yoini: “Na ēfe Epa āfe Yōshi Shara fikāfe,” ixō atoki axfainākafa ato xoō ani. <sup>23</sup> “Fatora fetsa mā āto chaka soaxonaino Niospari āto chaka soaxoxii. Mā ato chaka soaxoyamaino atoō chaka nepakenaka,” ixō Jesús ato yoiax nāskax ato makinoax kani.

<sup>24</sup> Ato Jesús yoiaainokai Tomás ato fe ano inima. Nā Tomásri Jesúsxō tāpimis ini. Āfe ane fetsa “Rafe Kāini” fapaonifo. <sup>25</sup> Tomás atoki oaino yoinifo: “Mā nōko Ifo nokoki oaito nō ōia,” faifāfe Tomás ato yoini: “Ē āfe mifi natakino a rāfo tsefefe ē meikerana a āfe pishi tseferi ē meikerana nāskaxō ē chanīmara fakerana. Akka ē āfe tsefefe ramākayamaxō a mā Jesús ōia ē chanīmara faima,” ato Tomás fani.

### *Jesús aōxō tāpimisfoki anā nokorisatani*

<sup>26</sup> Nāskata ocho nia oxata Jesús aōxō tāpimisfo anā kene mēranoax ichanāfono Tomásri nāno ato fe ini. Pexe fepoti fepokōiafono Jesús atoki nokorisatani. Anā ato yoini: “Mātō ōiti fepeakax inimasharakāfe,” ato fani. <sup>27</sup> Nāskaxō Jesús Tomás yoini: “Ea mī mīfi ramāfe ēfe mifi nataki. Ēfe pishi nāmāri ea ramāfe. Anā ea chanīmara fakima, ea chanīmara fafe,” Jesús faito, <sup>28</sup> Tomás kemakī: “Mīfi ēfe Ifoki. Mīfi ēfe Nioski,” faito, <sup>29</sup> “Ea mīa ōikī mī ea chanīmara fai,” fani. “Akka ea ōiyamafikakī ea chanīmara faifofi Epa Niospa ato shara faxii. Inimakōixikani,” Jesús fani.

### *Juan kirika keneni tāpinōfo*

<sup>30</sup> Akka afama mīshiti tsōa atiroma keskafakī Jesús aōxō tāpimisfo ato ōimamis. Afara fetsafori Jesús aka ē afo mato kenexonama. <sup>31</sup> Epa Niospa Jesús nīchini nōko Ifo inō. Nāfi Niospa Fakeki. Ē mato Jesúsnoa kenexoni mā chanīmara fanō. Chanīmara faax mā aōnoax Nios fe nīpaxanō.

## 21

### *Īamāfā kesemē Jesús aōxō tāpimisfoki nokoni*

<sup>1</sup> Nāskano Jesús anā aōxō tāpimisfoki atoki nokoni. Īamāfā Tiberias kesemē nāno atoki nokoni. Ē mato yoinō afeskax Jesús onimāki.

<sup>2</sup> Pedro fe Tomás (nā Tomás “Rafe Naneni” fapaonifo), Natanael Caná anoa ini Galilea mai anoa, Zebedeo fake raferi ini, Jesús fe rafemis raferi ato fe ichanānifo. <sup>3</sup> Nāskaxō Pedro ato yoini: “Ē rinipa fii kaikai,” Pedro ato faino, “Nōri mefe kai,” fanifo. Nāskax fonifo kanōanāfānē nanefainifo. Fōkata rini potenifo nā rini fakishchāi potefikaxokai tsōa foe finifoma.

<sup>4</sup> Mā penaino Jesús Īamāfā kesemē atoki nokorisatani. Īamāfā kesemēxō aōxō tāpimisfāfe tsōa Jesús tāpinifoma. <sup>5</sup> “ĴĒfe fakefāfe, mā foe fiamamē?” ato faino, “Nō fiama,” fanifo. <sup>6</sup> Askafaifono ato yoini: “Māto pōya kayakai aōri māto rini potekāfe. Askafaxō mā fitiroki,” ato faino nikakakī nā ato yoiai keskafanifo āto rini potekakī āto pōya kayakai aōri. Nāskaxō meafo mā foe kayakōi fia menifo. Ato kanōanāfā mēra nanepaikakī ranānifo. <sup>7</sup> Nā Jesúsxō tāpimis fētsa nā Jesús āfe yamakōi ipaonito Pedro yoini iskafakī: “ĴNāfi nōko Ifoki!” fani. Askafaito nikai Pedro koshikōi āfe rapati safeni nāskax kanōanāfā makinoax Īamāfānaki pakekaini āfe Ifoki nokorisapai. <sup>8</sup> Nāskaito ōikani atiri kanōanāfānē acho fonifo. Āto rini foe fospikōiano ninifonifo Īamāfā kesemē chaimashta nokoxikakī.

<sup>9</sup> Mā Īamāfā kesemē nokokaxō ōiafo chii mǎnā mǎnā ikaito ōinifo. Foe yafi pāa xoimea chii ketokonō raka ōinifo. <sup>10</sup> Askata Jesús ato yoini: “A mā rama foe fia niri fekāfe,” ato fani.

<sup>11</sup> Akka Pedro kanōanāfāoxō rini ninifoni Īamāfā kesemē rataxiki. Mā rini fixō ōia foe rini mēra fospikōia ōini. Ciento cincuenta y tres ini. Akka fōe rini faxtenima. <sup>12</sup> Askafaifono Jesús ato yoini: “Piyoi fekāfe,” ato fani. Akka tsōa yōkanima: “ĴMī tsoamē?” tsōa fanima māmāi tāpikaxō āto Ifomāiyakē. <sup>13</sup> Nāskaxō Jesús ato pimakī ato pāa yafi foe ato ināni.

<sup>14</sup> Mā reteafono otoitaxakī aōxō tāpimisfoki nokoni. Tres ves ini atoki oi.

### *Jesús Pedro yoini*

<sup>15</sup> Mā pixō Jesús Simón Pedro yoini: “Simón mīfi Juan fakeki. ĴNa fetsa finōmainīfofā mī ea noimē?” faito, “Ēje Ifo. Mā mī tāpiaki ē mia noiaito,” Pedro faito, Jesús yoini: “A ea noisharaxō a ea rama Ifofaifori ato kexesharafe ea Ifosharafanōfo. A oveja kexemisto āfe oveja fake kexemis keskafafe ato kexekī,” fani.

<sup>16</sup> Anā Jesús Pedro yōkani: “Simón, mīfi Juan fakeki. ĴChanīmamē mī ea noimē?” faito, “Ēje, Ifo. Mā mī tāpia ē mia noiaito” Pedro faito, anā Jesús yoini: “A ea noisharaxō ea Ifofamisfo ato kexesharafe ea Ifosharafanōfo. A oveja kexemisto āfe oveja kexemis keskafafe ato kexekī,” fani.

<sup>17</sup> Nāskaxō anā Jesús yōkani: “Simón, mīfi Juan fakeki. ĴEa māa noikōimē?” ixō Jesús yōkari faino Pedro anā tooxinima. Nāskaxō anā Pedro kemani: “Ifo, mīfi afama mīshiti tāpiaki. Mā mī tāpia ē mia noiaito,” fani. Askafaino anā Jesús yoini: “A ea Ifofamisfo ato kexesharafe ea Ifofasharanōfo. <sup>18</sup> Ē mia yoikōinō. Mī naetapakī nā mī apaiyai keskara mī fapaoni. Askatari nā mī kapaiyai ari mī kapaoni. Akka mā mī anifoax mī takairafe mēshax kaxii mia iyoaifono a mī kapaiyamai ari mia iyoxikani,” Jesús fani. <sup>19</sup> Askafakī Jesús Pedro tāpimani afeskax naximākai. Pedro Jesúsnoax naxiaino yorafāfe mā tāpikaxō, “Nios finakōia,” faxikani. Nāskano Jesús Pedro yoini: “Ea Ifosharafafe,” fani.

<sup>20</sup> Askafaino Pedro texkeakekafã Juan fichini acho oaino. (Nã Juanri Jesúsxõ tãpimis ini, Juan Jesús noikõia ini. Jesús reteyoafomano aõxõ tãpimisfo feta fakishi piyoni. Akka Juan afe ketaxamei tsaõxõ Jesús yõkani iskafakĩ: “¿Ifo, tsõakai mia ato achimaximẽ?” fani Jesús reteyoafomano afeta pikĩ.) <sup>21</sup> Nãskaxõ Pedro nã Juan fichixõ Jesús yõkani: “¿Ifo, afeskax na Juan naximẽ?” fani.

<sup>22</sup> Askafaino Jesús kemani: “A ã nimapaikĩ ã nimaino niyoxii nã ã anã oaitã. Akka mĩkai aõnoa shinãchakatiroma. Askatamaroko ea Ifofatitaifafe. Eõnoa fisti shinãfafãife,” fani. <sup>23</sup> Nãskax Jesúsxõ tãpimisfo ãa ranã yoinãnifo: “Juankai nanakama,” fanifo. Askafafi-aifono Jesúscai Pedro anori yoinima. Akka iskafakĩ yoini: “A ã nimapaikĩ ã nimaino niyoxii nã ã anã oaitã. Akka mĩkai Juanõnoa mĩ shinãchakatiroma,” fani. Nãnori fisti Jesús Pedro yoini.

<sup>24</sup> Ëkã Juan ã kirika kenexõ ã mato yoi. Ëri Jesúsxõ tãpimis. Ea Jesús noikõia. Jesús afarafo faito ã õimis. Nãfo ã mato kenexoni. Jesús afarafo akaito mẽ õimis. Nãskakẽ mã ãfe meka chanĩmara fatiro. Ë mato yoiaito mã Jesús chanĩmara fatiro. <sup>25</sup> Jesús afama mĩshti fani afo yoikĩ nõ kirika kenekĩ mitotiroma. Ëkã Juan ã mato kirika kenexoni. Nã tii.

## Jesúsxō Tāpimisfāfe Apaonifo Keskara

*“Niospa āfe Yōshi Shara matoki nīchixii kiki,” ixō Jesús yoini aōxō tāpimisfo*

<sup>1</sup> Teófilo, ē mia anā kirika kenexoni mia yoikī. Ēfi Lucaski, mia kirika fomai. A Jesús nai mēra kayoxoma afama mīshtifo fayanā ato tāpimapaoni keskara yoikī ē mia kirika kenexō fomayoni, mī tāpinō. <sup>2-3</sup> Mā Jesús retefiafono oxa rafeta anā otoni. Mā otoxō aōxō tāpimisfo ato ifixō ato tāpimani Niospa Yōshi Sharapa shināmanaino akairi fetsafo tāpimanōfo. A metasitafo ato ispaketsani a aōxō tāpimisfo. “Nafō ea metasitafokī ōikapo,” ato fani ōikakī tāpisharanōfo. Mā anā nia afia ipaoni keskara ixō tāpinōfo ato yoisharani nai mēra kayoxoma. Cuarenta nia oxata ato tāpimasharani chipo katāxiki ato yoipakeyoni a Nios xanīfoōnoa ato yoisharapakeni. Nāskax Apa Nios ari kani nai mēra.

<sup>4</sup> Nai mēra kayoxoma anā pena fetsa aōxō tāpimisfo yoisharani iskafakī: “Nonoax fakifoyoyamakāfe. Ē mato yoisharayonō, mā nikasharanō. Ēfe Epa āfe Yōshi Shara matoki nīchixii kikī a ē mato yoimis keskafakī. Mā mā nikafafainakī ē mato yoiaito. Nāskakē na Jerusalén anoxō manayokāfe, ēfe Epa āfe Yōshi Shara mato mēra naneyonō. <sup>5</sup> Juan mato maotisafakī faka mēra ikimapakeni Niospa mātō chaka mato soaxonano mā ato ōimanō. Nāskafakīri samama fatora penata Niospa āfe Yōshi Shara mato mēra naneaino mā shinā sharaya ixii.”

*Jesús nai mēra kani*

<sup>6</sup> Anā ano fisti Jesús fe ichanākaxō yorafāfe yōkanifo iskafakakī: “¿Ifo, iskaratīa nōko kaifo israelifāfe āto xanīfo mī ikimē? ¿Anā nafa nōko xanīfo ixiiimamē?” fanifo yōkakakī.

<sup>7</sup> Askafafāfe Jesús anā ato yoini iskafakī: “Tsōa tāpiama. Epa Nios fistichi tāpia. Afetīara inōpokoi mā tāpitiro. <sup>8</sup> Mā tāpiyamafitirono Niospa āfe Yōshi Shara mato mēra naneano aōxō mā afama mīshti tāpitiro. Nāskakē mā eōnoa ato yoitiro mēstekōi. Taefakī nā Jerusalén anoafō yoita, nā Judea anoafō yoita, nā Samāria anoafō yoita, keyokōi nā maitio anoafō eōnoa mā ato yoitiro,” ixō Jesús aōxō tāpimisfo yoini.

<sup>9</sup> Nāskata mā ato yoita Apa Niospa ifiaino nai mēra kani. Aōxō tāpimisfāfe ōiaifono fininākafā kani. Mēstekōi māpeinīfofani nai kōi mēra ikikainaito aōxō tāpimisfāfe anā ōinifoma mā kaano. <sup>10</sup> Nai mēra foisaifono feronāfake rafe ato ketaxamei nītanifo rapati oxo shara safekanax ato yoinifo iskafakī: <sup>11</sup> “¿Na Galilea anoafāfe, afeskakī mā nai mēra foisimē? Mā Jesús nai mēra kaa. Afetīara anā matoki oxii. Fatora penata afia mā kaito ōia keskara oxii kiki,” ixō feronāfake rafeta ato yoini.

*Jerusalén anoax aōxō tāpimisfo ichanānifo*

<sup>12</sup> A māchifanē āfe ane Olivos anoax Jesús ronoinākafā nai mēra kaito ōikata anā anoris fenifo Jerusalén ano chaima. Un kilometro Olivos fe Jerusalén nā tiixō rafe ini. <sup>13-14</sup> Jerusalén ano nokokata pexe mēra ikifaikata fomākīa māpeinīfofākata a ikafo ano ikifainifo. Ano ikifaikanax ano fistiax ichanānifo. Pedro ikaino, Jacobo ikaino (nā Jacobo āfe ane fetsa Santiago ipaoni), Juan ikaino, Andrés ikaino, Felipe ikaino, Tomás ikaino, Bartolomé ikaino, Mateo ikaino, Jacobo Alfeo fake ikaino, Simón Celote ikaino, Judas Santiago fake ikaino, Jesús onefetsafo ikaifono, Jesús āfe afa María ikaino, a kēro fetsafori ikaifono ano fisti ichanānifo Nios kīfikani. Nānoxō pena tii Nios kīfifāinifo.

<sup>15</sup> Askata pena fetsa yora rasi ciento veinte ichanānifo. Askaifono Pedro niinākafā ato yoini <sup>16</sup> iskafakī: “Efe yorafāfe, ea nikakōisharakāfe ē mato yoinō. Na Judaspafi yorafo iyoita Jesús achifonōfo. ‘Fato Jesús mākī noko yoife,’ faifāfe, ‘Nakīa,’ ato faito ōikakī achitafo. Afia Niospa shināmanaino nōko xini David yoikī kirika kenepaoni keskafakī Judaspa ato yoita. <sup>17</sup> Na Judas nofe rafemis noko akai keskari fakī Jesús ifini. Nāskakē nofeta yonoxofikatsaxakī mā chakafakī yorafo ato achimanita,” ixō Pedro ato yoini.

<sup>18</sup> (Ato askafaito kori ināitafo āa anofi chakamenō. Kori ināiafono anā anoris xanīfofo ināita. Nā kōri xanīfofofāfe mai fiitafo. Askata Judas āa tenexemeta ifiki nexeax ronoināakafāita. Ronoax ariax xetaori pakei mā nafaraxikax āfe poko napakemeita. <sup>19</sup> Askaito nikaitafo Jerusalén anoxō. Anoax āfe imi fokē nā mai aneitafo “Acéldama” ixō aneitafo. Nōko mekapa nō yoitiro iskafakī: “Imi Mai” fakī.) <sup>20</sup> Askata anā Pedro ato yoini iskafakī: “Nōko xini David a inōpokoai yoikī kirika Salmos ano keneni a Judasnoa yoikī iskafakī:

A yōra āfe mai ano tsoa inōma,  
yoikī keneni. Nāskata anā yoini iskafakī:  
Feronāfake fetsa a yonomis ano ikiakēkafanō,  
ixō anori yoikī noko kenexoni.

<sup>21</sup> “Nāskakē iskaratīa a feronāfake fetsa nō ifinō, a nofe Judas ipaoni keskara inō. Fatora fetsa nō ifinō, a Jesús fe taefenai kafāsapaoni keskara nofe inō. <sup>22</sup> Nā nofe ixō ōini Juan Jesús maotisafakī faka mēra ikimanaino, nāskakē mēxotaima nofe imis, akka mā Jesús nai mēra kaito nofeta ōitakī, nāskakē nō ifinō nofeta ato yoimis inō. Nofe rafexō Jesúsnoa iskafakī yoinō: ‘Mā Jesús nayofiax mā anā otoa,’ ixō ato yoinō,” Pedro ato fani.

<sup>23</sup> Ato askafaino José Barsabás fe Matías nāno inifo. Nā rafe ato ifipaikī, “¿Fato nō ifimē?” ixō shinānifo. Nā José Barsabás āfe ane fetsa Justo. <sup>24</sup> Askata a rafe ifipaifakī fisti ifinifo. Nāskakē Nios kīfinifo iskafakakī: “Epa Niospa, ¿fato nō ifimē? Epa, mī nōko Ifoki. Keyokōi nōko ōiti mēra mī tāpikōiaki. Nāskakē noko tāpimafe fato mī ifiamāki nofeta mīōnoa yoimis inō. <sup>25</sup> Judaspa Jesús ato achimaita. Nāskakē Judas naax omiskōipakenaka. Nāskakē Judaspa anā mīōxō yonotiroma nofeta. Noko tāpimafe fato a Judas ipaoni keskara itiomākī mīōxō ato yoimis inō,” ixō Nios kīfinifo.

<sup>26</sup> Nāskakata āto ane rafe tokiriki kenexō kesho mēra nanexō napakefofānaifono fisti pakeaito ōikakī nā ifinifo. Matías āfe ane ini. Nāskakē Matías ifiafono nā feronāfake oncefo feta Jesúsnoa yoimis ini.

## 2

### *Niospa Yōshi Shara ato ōiti mēra naneni*

<sup>1</sup> Askata judeofāfe āto fista Pentecostés ikaino a Jesús Ifofaafo pexe fisti mēra ichanānifo. <sup>2</sup> Anoxō nikafo nai mēranoax oa nēfefā oi itikikerani pexe mēraxō nikafo. <sup>3</sup> Nāskata ōiafo oa chii keskara fotopakekafāni. Oa nōko ana keskarafiax oa chii rekēfo keskara maratamefafāinafo ini. <sup>4</sup> Askaifono Niospa Yōshi Shara ato mēra nanetani. Askaino anā a meka fistichi tsoa mekanima. Meka fetsafāfe fisti rasi mekanifo Niospa Yōshi Sharapa ato meka fetsafamano.

<sup>5</sup> Nāskaifono judeofāferi Nios Ifofapaikani Jerusalén ano ipaonifo, chai inoax fekanax. Nā Jerusalén ano inifo mai fetsa fetsatapafo anoax fekanax. <sup>6</sup> Anoxō nikafo oa nēfefā oai keskara nikanifo. Askaito nikaferakani a Jesús Ifofaafo ichanāfo ano ikitoshinifo. Tāpipaikani afaa afeskaimākai ikanax. Nāskata nikafo a chai inoax feafāfe āto mekapa mekaifāfe nikanifo, fisti rasi āto mekapa mekaifono. “¿Afeskaxō nōko meka tāpiafomē? Nikakapo,” ato fakī fetsanifo. Askakanax ratei fetsenifo. <sup>7-8</sup> Rateyanā yoinānifo. Iskanifo: “Na Galilea anoafāfe nōko meka nikayamafikatsaxakakī nōko meka tāpiafo nō nikai. ¿Afeskaxō tāpiafomē mai fetsanoax nō ofiafiano? <sup>9</sup> Akka nō Partia anoax oni. Fetsafori Media anoax fenifo. Fetsafori Elam anoax fenifo. Fetsafori Mesopotamia anoax fenifo. Fetsafori Judea anoax fenifo. Fetsafori Capadocia anoax fenifo. Fetsafori Ponto anoax fenifo. Fetsafori Asia anoax fenifo. <sup>10</sup> Askatari fetsafori Frigia anoax fenifo. Fetsafori Panfilia anoax fenifo. Fetsafori Egipto anoax fenifo. Fetsafori nā Africa fe, Cirene chaima nikakanāfo anoax fenifo. Akka fetsafori judeofo Roma anoax fenifo; <sup>11</sup> nāfo judeokōifo ini. Akka a Roma anoax feafori judeokōifoma inifo. Nāskafikaxō mā Nios Ifofakani judeofo keskara inifo. Askatari fetsafori Creta anoaxri

fenifo. Askatari fetsafori Arabia anoaxri fenifo. Nõfi mai fetsa fetsatapafo anoax nõ onikĩ,” ikanax yoinãnifo. “Nãskax nõ ichanãiyoi oa chai inoax, akka nõko mekapa mekaifãfe nõ nikai. Nãskaito nikai nõ ratei,” ikanax yoinãnifo. “Na Galilea anoafõ nõko mekakõichi xafakĩakõi yoikani iskakani: ‘Niospa afama mĩshti tãpikõia,’ ixõ noko yoikani nõko mekapa. <sup>12</sup> Afeskaxõ na yorafãfe nõko meka nikayamafikatsaxakakĩ noko yoiãifãfe nõ ato nikasharakõi,” ikanax rateyanã yoinãnifo: “¿Afeskai iskafo mē?” ikanax.

<sup>13</sup> Askãifãfe õikakĩ a yora fetsafãfe ato iskafo mē: “¿Afeskai na yorafo pãekanax nõko mekapa mekakanimē?” ixõ yorafãfe ato kaxemetsama fanifo ato õsakakĩ.

### *Pedro Niospa meka ato yoini*

<sup>14</sup> Askãfono Pedro niinãkafã Jesúsxõ tãpimisfo oncefo feta fãsikõi mekainãkafã ato yoini: “Èfe kaifo judeofõfãfe na Jerusalén ano ikafo feta, ea nikasharakãfe. <sup>15</sup> ¿Afeskakĩ pãekanax nõko mekapa mekakanira, mã noko faimē? Nafo pãekanima. Penamakai tsoa pãeima mã rama xini keyaino. <sup>16</sup> Nã mã nikai anori Niospa meka yoimisto Joel kirika keneni Niospa Yõshi Sharapa shinãmanaino. Nã iskanõpokoai yoikĩ kirika keneni iskafo mē:

<sup>17</sup> A ea Ifõfaifo nã maniafo tii anoã èfe Yõshi Shara ãto õiti mēra ã nanexii. Nãfo askayoi mã chaima nõko mai keyoaino. Afia penatari mãto fenafãfe èfe meka yoixikani. Naetapafãfe õiafo oa namakē õia keskara õixikani. Anifo tiitori eõnoa namaxikani. <sup>18</sup> Askata a ea yonoxomisfori feronãfakefoya kērofoya èfe Yõshi Shara ã ato mēra nanei fatora penata èfe Yõshi Sharaõxõ eõnoa ato yoinõfo. <sup>19</sup> Afama mĩshti tsõa õimisma afo ã ato ispaxii nai arixõ, nãmãxori ã ato afama mĩshti ispaxii. Imi yafi chii ãfe kõimãfãri õixikani ã ato õimanaino. <sup>20</sup> Askatari xinĩ anã chaxaxima, fakishkõi ixii. Oxeri oa imi keskarakõi õshikõi ixii. Askata nãfo askai fetseyoi mã chaima mãto Ifo oaino. Askata mã mãto Ifo nokokõiaino keyokõichi xafakĩa õixikani. <sup>21</sup> Mã askai fetseaino akka nõko Ifo yoikĩ fatorafãfe iskafo mē: ‘Ifo Cristo, ea shinãfe, ã mefe ipaxanõ,’ faifãfe ato ifixii,

ixõ Joel kirika keneni Niospa anori yoiaino,” ixõ Pedro ato yoini.

<sup>22</sup> Askatari Pedro anã ato yoini iskafo mē: “Israelifãfe,\* ea nikakãfe. Mã mã tãpia Jesús Nazarete anoã Niospa nai mēraxõ nãmã nĩchini, nãmãxõ mato afama mĩshti õimanõ afara sharafo fakĩ. Mato askafaino mã tãpinõ Niospa Jesús nĩchinikē. <sup>23</sup> Nãskafikē mãfi Jesús achixõ yora chakafo inãyameaki achixõ cruzki mastanõfo. Akka reteyoafomano Niospa mã tãpixõ Jesús nãmã nĩchini: ‘Èfe Fãke mato nãxoxii,’ ixõ Niospa yoini mã tãpixõ. Nãskakõikĩ mãtoõxõ yora chakafãfe reteyameafo Niospa yoini keskafakĩ. <sup>24</sup> Mã retefitafono Niospa anã Jesús ofõfani. Anãkai omiskõinakama. Anãkai nanakama. Anãkai natiroma. <sup>25</sup> Askatari a xanõfo David afianori yoikĩ kirika mēra keneni Cristoõnoa ãfe meka iskafo mē:

Mē tãpia èfe Ifo Nios efe itiani. Efe ixõ efeta aki kiki. Nãskaxõ ea kexei tsõa ea fekaxtefanõma. <sup>26</sup> Nãskakē èfe õiti mēra ã fãsi inimakõi Niospa ea kexesharaino. Nãskakē ã yoikĩ: ‘Nios fãsi sharakõi,’ ã fãfãfãini. È Nios chanĩmara fakõini afe ipaxakĩ èfe yora ea fena faxõano. <sup>27</sup> Ea potayamaino èfe fero mēsho omiskõipakenakama. Èfe yora mai mēra nēteima. Epa Niosi, mã ea noi. Èfi mã fakekõikĩ, èfe yora mã pisi famaima.

<sup>28</sup> È nafiakē mã ea nimapakenaka. È mia ari kai, mefe ikax ã inimakõixii, ixõ David yoini Cristoõnoa yoikĩ.

<sup>29</sup> “Èfe yora mĩshtichi, ea nikakãfe. Nõko xini David ãa yoikĩ kenenima. Jesúsnoa yoikĩ keneni. Afetĩama mã David nani. Mã nõ tãpia a maia ano. <sup>30</sup> A mã askanõpokoai yoikĩ keneni. Niospa David yoini iskafo mē: ‘È mia yoi na chipo kãiyai mã fena èfe Fakekõi ixii. Mia keskara xanõfokõiri ixii. Èfi Nioskĩ. È mato pãraima,’ ixõ Niospa yoini. Niospa yoiãito nikakĩ David chanĩmara fani, tãpini Niospa pãrayamaino. <sup>31</sup> Nãskakē David tãpixõ a inõpokoai Cristoõnoa yoini iskafo mē:

\* **2:22** Israelifo ãto ane fetsa judeofo ipaoni.



Nafiax otoxii. Nāskax āfe fero mēsho omiskōipakenakama, āfe yorari pisinakama, ixō David keneni. <sup>32</sup> Nā David yoini keskakōifakī Epa Niospa mā Jesús otoakē nō ōita keyokōichi. <sup>33</sup> Mā otoax mā nai mēra kaa Apa Nios ano. Iskaratīa xanīfo finakōia Apa fe. Nāskaxō Epa Niospa yoikī taefani iskafakī: ‘Ēfe Yōshi Shara ē atoki nīchixikai nāmā,’ ixō Niospa yoini. Nāskakē Niospa āfe Yōshi Shara nai mēraxō nāmā nīchia. Oa nēfefā keskara Niospa āfe Yōshi Shara nokoki nīchia. Nāskakē nō mātō meka nikayamafikatsaxakī nō meka fetsafāfe nō mekai fetsea. Mā chai inoax oxō mā noko nika, nō mātō mekapa mekai fetseaito. <sup>34-35</sup> Nāskakē māri tāpikāfe, nānori David kirika kenenikī Jesúsnoa yoikī. Āa yoinima. David otoax nai mēra kanima. Nāskaxō kirika kenepakekī yoini iskafakī nōko Ifo Cristoōnoa:

Nono efe ife, efe xanīfokōi ixiki. A mia noikaspaifo ē ato mī nāmā nīchinō, ixō yoini Niospa. Nānori tāpixō David yoikī kirika keneni,” ixō Pedro yoini.

<sup>36</sup> Askata Pedro anā ato yoini: “Ēri mato anori yoikai, israelifāfe, ē mato pāraima. Mā Jesús retēkī mā mastayamea. Akka Niospa yoini Jesucristo nōko Ifokōi inō,” ixō Pedro ato yoini.

<sup>37</sup> Ato askafaito nikakakī shinānifo: “¿Afeskakī Jesús askafayameafomē?” ixō shinākī ato ōitinī shināketsanifo, Jesús shinākakī. Askata Pedro yafi a Jesúsnoa yoimis fetsafori yōkanifo: “No fe yorafāfe, nō mato nikai. ¿Nō anā afeskatromē?” ixō ato yōkanifo.

<sup>38</sup> Askafaiāfe nikakī Pedro ato yoini: “Iskaratīa mātō chaka soakāfe anā anori shinākakīma. Jesús aneōxō mato maotisafanōfo, faka mēra ikimapakekī. Mato maotisafafono yorafāfe mato ōinōfo mā Jesucristo Ifofaito. Nāskaxō āfe Yōshi Shara mato mēra nīchi kikī mato fe rafekōinō. <sup>39</sup> Jesús yoini iskafakī: ‘Fatora fetsa nōko Ifo Niospa ifixii āfe Yōshi Shara ato mēra nanexii. Mātō fakefori, mātō fenafori a chai ikafo tiiri nā fake refonoafori Niospa āfe Yōshi Shara ato mēra nanexii Niospa ato ifiano,’ ixō noko Jesús yoini.”

<sup>40</sup> Ato askafakī yoita anā Pedro ato yoini ato iskafakī yoianā: “Mātō chaka soakāfe. Na yora nono nāmā ikafo ichapa chakakōifo chaka shināmisfo. Askakakīma māa kexemesharakōikāfe anā askayamaxikakī. Mā askaito Jesús mato chaka soaxonō mato ifixiki mā afe īpaxanō,” ixō Pedro ato yoini.

<sup>41</sup> Ato askafaito nikakakī yora rasichi chanīmara faifāfe, ato maotisafapanifo, ato faka mēra ikimapakekakī. A ato maotisafaifo tres mil yorafo ini. Nāskax ato fe rafenifo a Jesús Ifofakakī taefanifo fe. <sup>42</sup> Nāskakē keyokōichi ato nikakōinifo a Jesúsnoa yoimisfāfe ato yoiaifono. Nāskax Jesús Ifofafo fe rafesharakōipaonifo, a rama Jesús chanīmara faifo. Askaxō pāa torekaxō ato pikīpaonifo Jesús shinā kakī, a ato nāxoyamea. Nāskakē Nios kīfitai fapaonifo pena tii ichanākaxō.

### *Jesús Ifofamisfo isharakōipaonifo*

<sup>43</sup> Nāskaxō anoxō a Jesúsnoa yoimisfāfe, nā docefāfe, afama mīshtifo apaonifo, yonai-fono ato sharafata, afara fetsafori apaonifo, nāskaxō afama mīshti faifāfe ato tāpinōfo. Nāskafaiāfe ōikani keyokōi anoax yorafo ratenifo. <sup>44</sup> Jesús chanīmara fakani pena tii ichanānifo. Anoax āto afama mīshti paxkanāi fetsexikakī. <sup>45</sup> Āto afarafo ato minikaxō kori fixō, a afaamaisfo kori inānifo tsoa afayakēma. <sup>46</sup> Nāskata pena tii Nios kīfiti pexefā mēranoax ichanākaxō Nios kīfinifo. Nāskaxō āto pexe mēraxō a Jesús ato nāxoyamea shinākakī pāa torepakexō pinifo inimakōiyanā. <sup>47</sup> “Aicho, Nios fāsi sharaki,” ikanax inimai finakōinifo. Askafāfe ōikani a Jerusalén ano ikafāfe ato yoinifo iskafakakī: “Na Jesús Ifofafo isharakōiafo,” ixō ato yoinifo. Nāskakē pena tii a yora fetsafāferi Jesús Ifofaifono Niospa ato chaka soaxoni. Nāskax nā Jesús rama Ifofaifo fe ano fistiax ichanānifo, ato fe rafekanax.

### 3

#### *Pedro feta Juan yora finimisma sharafanifo*

<sup>1</sup> Askata a Nios kīfiti pexefā mēra Pedro fe Juan yātapake fonifo. Yātapakes anoxō yorafāfe Nios kīfifokani fopaonifo. <sup>2</sup> Nā Nios kīfiti pexefā kāiti ano feronāfake finimisma nāskarapa kāini tsoa ini. Nā mēxotaima iyopaonifo pexe fepoti ano, nā pexe fepotinī afe ane “Sharashta” fanifo. Anoxō ikiaifāfe ato kori yōkanō iyopaonifo. <sup>3</sup> Pedro fe Juan ikifainaifāfe ōikī a finimismato ato kori yōkani iskafakī: “Ea kori inākāfe,” ato faito, <sup>4</sup> Pedro feta Juan feesnifo. Pedro yoini iskafakī: “Noko feisfe,” fani.

<sup>5</sup> Askafaito, “Ea kori inākanira,” ixō ato feisni. <sup>6</sup> Ato feisaito Pedro yoini: “Ē mia kori ināima. Ē koriyama. Ē mia kori inākima Ē mia sharafatiro. Nikafe, Ē mia yoinō. Jesucristo nā Nazarete ano ipaoni āfe sharaōnoax fininākafāfe,” fani.

<sup>7</sup> Askata Pedro mētsoinīfofāni aō pōya mēste aōxori. Nāskax a finimisma fininākafani. Pedro mētsoinīfofānaino niinākafāni. Askaxō mea mā nisharakōia meeni a finimismato. Āfe taefoya āfe opoxko mā shara meeni. <sup>8</sup> Nāskax inimakōini. Askata mono mono ini. Mono mono ita Pedro fe Juan ikifainaifono, akairi ato fe ikikaini ichotiri ichotiri ikani inimayanā. Nios kīfiti pexefā mēra ato fe ikikaini. Askata mekani: “Aicho, Niospa mā ea sharafaki,” ixō Nios sharafani. <sup>9</sup> Askaito yorafāfe a ichanāfo anoxō ōiketsanifo kafāsaito Nios yoisharayanā. <sup>10</sup> Askata, “Kee, ōikapo. Mā finia, na pexe kāiti āfe ane ‘Sharashta’ ano tsaotiani, a ato kori yōkamis. ¿Afeskax finiamē?” ikanax yoinānifo, rateyanā.

#### *Nios kīfiti pexefā kene fetsa āfe ane Salomón anoxō Pedro ato yoini*

<sup>11</sup> Pedro fe Juan kaino ato fe kani nā finimisma mā sharax. Nā Nios kīfiti pexefā kene fetsa mēra ikifainifo. A pexe kene āfe ane “Salomón” ini. Askaito nikakani yorafāfe ōifokani ichonifo ano ikiafono. Nāno nokotoshikata ōiafo a finimisma Pedro fe Juan niano ato fe nia ini ato mētsoax. <sup>12</sup> Askafāfe ōikī Pedro ato yoini iskafakī: “Israelifāfe, ea nikakāfe. ¿Afeskax nā finimisma sharamē ixō mā shināimē? ¿Afeskakī mā noko ōimē? Nōkai sharafama. Akka Jesúsxō nō sharafaa,” Pedro ato fani. <sup>13</sup> Askata anā Pedro ato yoini: “Nōko xinifo Abraham, Jacobo, Isaaca atiito Nios Ifofapaonifo. Afia fistichi a yonoxomis Jesús finakōia imani. Nāskakē afama mīshti famis. Nāskafikēkai mā Jesús Ifofapaiyameama. Nāskakē xanīfo Pilato Jesús shinākī, ‘Nō reteimakai’ fafiato, ‘Maa, nō sharafaima, ato retemafe,’ ixō Pilato mā yoiyamea, Jesús retenōfo. <sup>14</sup> Jesús ōiti sharayaxō afaa pishta chakafamisma, akka mā noikaspayamea. Nāskakē mā Pilato yoikī: ‘A chaka kāimayamafe,’ mā fayamea. Pilato Jesús kāimapaifiaino a yora chakakōi Barrabás kāimakaspakī. Askafaito mā iskafayamea: ‘Barrabás kāimafe, Jesúsroko ato retemafe,’ mā fayamea. <sup>15</sup> Akka nā Jesús taefakī yora onifani, iskaratīari noko ikinā, aōnoax nō nia. Nāskafekē mā reteyamea. Mā mā retefiano Apa Niospa afianā otoyamea. Nāskaito Juan feta nō ōiyamea. Mā anā otoyamea. Iskaratīa nia. <sup>16</sup> Nāskakē nā finimisma Jesús chanīmara faax mā fininākafāna. Jesúsnoax mā shara. Nāskakē keyokōichi mā ōi.

<sup>17</sup> “Nāskakē ē mato yoi, efe yora mīshtichi. Akka ēfi mē mato tāpimiskī. Akka mā tāpixoma mā Jesús reteyamea, ‘Niospa Fakemara,’ ixō. Askata mato xanīfofofāferi tāpiyameafoma. Jesús nōko Ifokōi fiano tāpixoma reteyameafo. <sup>18</sup> Nāskakē afetiāma Niospa yoini a inōpokoai mā tāpixō: ‘Ēfe Fake Cristo retexikani,’ ixō Niospa yoini. Nānori yorafāfe kirika kenenifo, Niospa ato shināmanaino. Nāskakē mā reteyameafo a Niosnoa ato yoimisfāfe nānorikōiri yoinifo. Mā askakōia. Akka Niospa mā tāpiano, mā askakōifayamea. <sup>19</sup> Nāskakē mato chaka xatekāfe. Mā afara chakafamiskī anā anori shināyamakāfe. Nāskakē Epa Nios fisti shinākāfe, mato chaka mato soaxonō. <sup>20</sup> Nāskaxō nōko Ifāfe mato ōiti mato inimamasharakōinō. Nāskakē mato ano Cristo Jesús Niospa anā nīchixii, mato Ifokōi mato nīchixoxii. Āfe Fake Cristo Jesús katoni mato ifimis inō. <sup>21</sup> Iskaratīa Apa fe nai mēra iyoa, oyoxoma na nāmā anoafo keyokōi Niospa fena shara fayoi. Askata chipo nāmā Jesús anā fotoxii. Nānori a Niosnoa yoimisfāfe yoiyopaonifo a inōpokoai yoi kakī,

Niospa ato shināmanaino. <sup>22</sup> Moisésri nānori yoikī kirika keneni iskafakī afia Nios fistichi shināmanaino: ‘Nōko Ifo Niospa mato mēra fisti nīchixii mato Nios yoixomis inō, ea ani keskafakī. Nāato mato yoiai anori nikasharakōikāfe. <sup>23</sup> Akka a nikakaspaifo Niospa afe yorafo mēra ato ifixiima. Ato makinoa ato potaxii anā ato fe inōfoma.’ <sup>24</sup> Na iskaratīa nō ōiai yoikī Samuel taefakī yoini a inōpokoai yoikī. Nānori fisti a Niosnoa yoimis fetsafāferi keyokōichi yoinifo Niospa ato shināmanaino. <sup>25</sup> Nāskax mā mātō xinifāfe āto fenakōifokī mā. Nāskakē Niospa mātō xinifo iskafakī yoini: ‘Mātō fenafoōxō ē ato sharafai keyokōi nā maniafo tii,’ ixō Niospa Abraham yoini. <sup>26</sup> Nāskakē Niospa āfe Fake Jesús nokoki nīchini nai mēraxō yonoxomis inō. Taefakī nokoki nīchini nōko chaka nō xatenō anā chaka shināyamaxiki a Ifo sharafaxō. Nāskax nō isharakōinō,” ixō Pedro ato yoini.

## 4

### *Pedro yafi Juan xanīfofo ano iyonifo*

<sup>1-2</sup> Pedro feta Juan Jesúsnoa yorafā rasi yoiaifono ōikani atoki fenifo, a ato Nios kīfixomisfo ita, a Nios kīfiti pexefā kexemisfo xanīfofo ita, saduceofo ita nāfo atoki fekanax ōitifishkinifo, Pedro feta Juan mā Jesús nafiax anā otoita ato faifono. <sup>3</sup> Nāskakata yātapakē ato achixō karaxa mēra ato ikimanifo. Fakishchāi ishinifo a mēra. <sup>4</sup> Ato ikimayofafomano a yora rasi ato yoiaifono nikakakī ato chanīmara fakōinifo. Afia penata cinco mil yora rasichi Jesús Ifofanifo.

<sup>5</sup> Pedro fe Juan karaxa mēra ikafono, Jerusalén anoax judeofāfe xanīfofo fe a xanīfo fetsafori, askatari a Moisés yoikī kirika keneni keskara ato tāpimamisfori pena fetsa fakishpari ichanānifo. <sup>6</sup> Nānori a ato Nios kīfixomis xanīfo finakōia ini āfe ane Anás. Askatari a xanīfo fetsari āfe ane Caifás ini, Juanri ini, Alejandrōri ini, a ato Nios yoixomisfāfe āto kaifori ato fe inifo, ano fisti ichanākani. <sup>7</sup> Nāskaxō Pedro yafi Juan kenanifo ato yōkaxikakī. Tsōaōxō a finimisma sharafafomāki tāpipai kakī Pedro yafi Juan kenanifo karaxa mēranoa. Mā feafono ato nakirafe nīchikaxō ato yōkanifo iskafakakī: “¿Tsōaōxō na finimisma mā sharafaitamē?” ato fanifo.

<sup>8</sup> Ato askafaifono Pedro ato yoini iskafakī Niospa Yōshi Sharapa shināmanaino: “Efe xanīfofōfāfe, efe anifofōfāfe, ea nikakapo ē mato yoinō. <sup>9</sup> ¿Tsōaōxō nō yora sharafatiromē mā tāpipaimē? Na mā tāpipaiyai finimisma tsōaōnoax sharamākī mā noko yōkaito ē mato yoinō. Ea nikakāfe. <sup>10</sup> Tāpīxikakī israelifāferi tāpinōfo mēstekōi ē mato yoisharanō. Ea nikakāfe. Na feronāfake keyokōichi ōiaifo Jesús Nazarete anoato mā sharafaita. Nā mā ifi cruz ikaki mastaitato mā Apa otōaitano nāato mā sharafaa,” Pedro ato fani. <sup>11</sup> “Aōnoa yoiyokī yōra kirika keneni iskafakī Niospa shināmanaino:

Tokiri pexe famisfāfe, ‘Na tokiri chakara,’ ixō potanifo sharafiano. Nāskakaxō chipo tāpinifo nā tokiri sharafinakōifiano.

Nāskarifikakī nā Jesucristo tokiri keskarafiano mā potamis sharafinakōifiano. Mā mā potafiano Epa Niospa ifini aōnoax mā afe yorafo inō. <sup>12</sup> Anā fato yora fetsakai nāmā ikama noko shara fatiro. Jesús fistichi nōko ōiti noko shara faxotiro nō afe nīpaxanō,” ixō Pedro ato yoini.

<sup>13</sup> Ato askafaito nikakani a xanīfofo āa ranā yoinānifo: “¿Afeskakī iskara yoimē kirika kenekī tāpisharayamafixō? Ranotamakōi iskara noko yoi. ‘Na rafe Jesús fe ipaonifo,’ ” ikanax yoinānifo. <sup>14</sup> Nāskaxō ōiaifono nā finimisma mā finiax ato fefotai kafāsaito ōinifo mā sharax. Nāskakē na rafeta afaa chakafafoma ixō atoōnoa afaa yoitiro ma inifo nā finimisma mā shara ōikakī. <sup>15</sup> Nāskakaxō Pedro yafi Juan nīchinifo ato makinoax fotanōfo. Pedro fe Juan mā kāifainaifono, nā xanīfofo āa ranā yoinānifo iskakani: <sup>16</sup> “¿Na rafe nō afeska faimē? Akka keyokōi Jerusalén anoafāfe mā tāpiafo, na feronāfake rafeta finimisma sharafaito ōitaxakakī. Fato feronāfake fētsakai iskara finimisma sharafatiroma. Iskarakai nō fomātiro ma. <sup>17</sup> Akka iskaratīa nō ato yoinō anā Jesúsnoax mekanōfoma. Nō ato yoinō iskafakī: ‘Mā anā Jesúsnoa yoiaito nō nikakī nō mato omiskōimani,’ ” ikanax āa

ranā yoinānifo. <sup>18</sup> Askaxō ato kenanifo pexe emāitinoa. Ato kenakaxō ato yoinifo: “Anā mā Jesúsnoa afaa yoikī.”

<sup>19</sup> Ato askafaifāfe nikakī Pedro feta Juan ato kemani iskafakakī: “¿Akka nō tsoa nikaimē? Mato nō nikasharairaka, askayamakī Nios nō nikairaka. Mā shinākāfe fato sharamākī. <sup>20</sup> Nā nō Jesús ōifafaina keskafakī, nā noko Jesús yoiaito nō nikafafaina keskafakī nō yoipaketiro enetama,” ixō Pedro feta Juan ato yoini.

<sup>21</sup> Ato askafaifono ato yoinifo iskafakakī: “Mā anā Jesúsnoa yoiaito nikaxō nō mato omiskōimani,” ato fanifo xanīfo tiito. Ato askafakaxō ato nīchinifo yora fetsafāfemāi ato ōiaifono. A xanīfo tiito ato koshapaifikakī ato koshanifoma yorafoki mesekakī. Akka a yorafāfe, “Epa Nios sharakōira,” fanifo Pedro feta Juanmāi Niosxō ato sharafaino. <sup>22</sup> A finimisma nāskara kāini ini mā cuarenta xinia akano Pedro feta Juan sharafanifo Niospa Yōshi Sharaōxō.

### *Jesús Ifofaafāfe Nios kīfinifo mitsisipakōi ixikakī*

<sup>23</sup> Nāskata a xanīfofāfe ato nīchiafono Pedro fe Juan fonifo mā ichanāxō a ato fe rafeafo ato yoixikakī, a ato Nios kīfixomis xanīfofo feta anifofofāfe ato yoiafo keskara. <sup>24</sup> Ato askafakī yoiaifono nikakaxō a Jesús Ifofamisfāfe Nios kīfinifo iskafakakī: “Epa Niosi, mī nōko Ifo finakōiaki. Mī keyokōi onifani. Nai yafi mai mī onifani. Fākafāri mī onifani. Nai mēranoari mī onifani. Nāmānoafori mī onifani, fākafā mēranoafori mī onifani, afama mīshtifo. <sup>25-26</sup> Akka nā mia yonoxomis nōko xini David mī Yōshi Sharapa mī shināmani mīōxō ato yoini iskafakī:

¿Afeskai na yorafo Nioski ōitifishkikanimē? Keyokōichi yorafāfe āa shinākani Nios potapaikakī. Askafikaxō potatirofoma. Āto xanīfo tiitori ano fisti ichanākaxō nōko Ifo Nios noikaspaxikani potapaikakī. Askatari a Niospa noko nīchixoxiai Cristori noikaspaxikani. Aa askara shinākakī, ixō David kirika keneni mīōxō yoikōikī.

<sup>27</sup> “Iskaratīa nāskakōi Herodes fe Poncio Pilato yorafetsafo fe ichanāitafo, israelifori ato fe ikitāfo mī Fake Cristo Sharafinākōia ifixō mī nīchifinino chakafakani. <sup>28</sup> Nā mī yoiyoni keskafakī mā nāskakōi faitāfo a inōpokoai mī yoini keskafakī. <sup>29</sup> Epa Niosi, noko nikāfe mīōxō noko noimati fakani kiki. Nāskakē noko mesemayamafe nō mia yonoxosharamiskī. Nāskakē atoki mesetama mī meka shara nō ato ranotamakōi yoinō mitsisipakōi noko imafe. <sup>30</sup> Epa Niosi, mī sharaōxō a isinī ikaifo ato sharafafe, afama mīshtifo ato ōimayanā a mia yonoxomis Jesucristo aneōxō,” ixō Epa Nios kīfinifo.

<sup>31</sup> Mā askafakakī kīfikī xateaifono nā ichanāfo anoax mai naya naya ini. Nāskaino Niospa Yōshi Shara āto mēra naneaino ranotamakōi Niospa meka shara yoinifo.

### *Nā afarafo keyokōi atonā ini*

<sup>32</sup> Jesús Ifofaafāfe nānori fistis shinānifo āto ōitinī. Nāskakanax na afarafo nōkonā fistis ixō tsōa shinānima. Askakimaroko keyokōi atonā ini. <sup>33</sup> A Jesúsnoa yoimisfāfe, “Nōko Ifo Jesús noko nāxofiax mā anā otoni,” ixō ato yoinifo Niospa Yōshi Sharapa ato shināmanaino. Nāskakē keyokōi nā chanīmara faafo Epa Niospa ato shināmasharaino inimakōinifo. <sup>34-35</sup> A Jesús Ifofaafāfe atirito āto tarefoya āto pexefo ato minikaxō kori fikaxō nā Jesúsnoa yoimisfo ato inānifo afāferi a afaamaisfo ato inānōfo tsōa afaa yopayamanō. <sup>36</sup> Akka José Levī āfe fena ini. Chipre anoax fakea ini. Nāskakē a Jesúsnoa yoimisfāfe āa anenifo iskafakakī: “Yora Inimamamis” fanifo. Akka āfe ane kaiyakōi Bernabé ini. <sup>37</sup> Nā feronāfake tareya ini. Nāato āfe tare ato minixō kori fixō a Jesúsnoa ato yoimisfo ināni a afaamaisfo ato inānōfo.

## 5

*Āfe āfi feta Ananías ato feparapaini*

<sup>1</sup> Akka feronãfake fetsa ãfe ane Ananías ini. Æfe ãfinĩ ane Safira ini. Nãato ãfe tare ato minini kori fixii. <sup>2</sup> Nã feronãfake ãfe ãfi feta shinãkaxõ ranãri kori finifo. Ranãri a Jesúsnoa ato yoimisfo inãnifo keyokõĩ mã noko inãfo ixõ shinãõfo.

<sup>3</sup> Nãskaito Pedro yoini iskafakĩ: “Ananías, ¿afeskai mã mẽra Satanás naneamẽ mã Niospa Yõshi Shara feparapainõ ranãri mã mã kori fifiaxõ mã tareõxõ? <sup>4</sup> Akka, ¿taeyoi mã tare iyoamamẽ? Akka mã mã ato minia, akka, ¿na kori mĩnãmamẽ? Nãskakẽ nã mã apaiyai keskafatiro. Akka atiri mekepaikĩ mã noko yoia shara ikerana. Askatamaroko mã noko fomãpai. Mĩkai noko pãraima, akka Nios mã pãrapai,” ixõ Pedro yoini.

<sup>5</sup> Askafaiãfe nikai Ananías koshikõĩ nani. Askaito nikakani yorafã rasi ratei fetsenifo.

<sup>6</sup> Nãskakẽ naetapafo fẽkaxõ Ananías rakonifo mã nakẽ. Nãskafakãta maifaifokakĩ iyonifo.

<sup>7</sup> Mã askai samarakano ãfe ãfiri ikitoshini, afaa tãpiamax. <sup>8</sup> Nokotoshiaito Pedro yõkani iskafakĩ: “Ea yoipo mã tare minixõ afe tii mã kori fiamãki,” ixõ Pedro yõkani. Kemani a kẽroma iskafakĩ: “Nã noko inã tii nõ mato inã,” faito, <sup>9</sup> Pedro yoikĩ iskafani: “¿Afeskakĩ mã fene feta mã shinãxõ nõko Ifãfe ãfe Yõshi Shara mã feparapaimẽ? Mã mã fene nakẽ maifatakani a pexe kachiori fekani. Õipo, iskaratĩari mia iyoi fokani,” ixõ Pedro yoini.

<sup>10</sup> Askafaito nikai Safira koshikõĩ nãtani. Pedro nia nãmã pakeni. Naetapa tiito mã fene maifatakani ikiferakakĩ õiafo mã ãfe ãfiri naa fichitoshinifo. Ari ififainifo maifaifokakĩ, fene ketaxamei. <sup>11</sup> Askaito nikakani a Jesús Ifofamisfo ratenifo. Yora fetsafori askanifo nikakani akairi ratei fetsenifo.

### *Iskarafokai tsõa õiyomisma inifo*

<sup>12</sup> Tsõa atiroma keskafakĩ nã Jesúsnoa yoimisfoõxõ afama mĩstiffo fanifo yorafãfe õinõfo. Nãskakanax keyokõĩ ichanãnifo pexe kene ãfe ane Salomón anoax. <sup>13</sup> Atiri a Nios Ifofaafo a Nios Ifofaafo fe ato fe rafenifoma. Akka ato askafafiaifono yorafãfe, “Na Nios Ifofaafo isharakõiafo,” ato fanifo. <sup>14</sup> Ato askaifaifono yorafãfe nõko Ifo nikakõinifo, feronãfakefo feta kẽrofãfe. Nãskax ichapakõĩ inifo. <sup>15</sup> Nãskakata a isinĩ ikaifo xafakãa ato kãimanifo ãto rakatiki ato ratakaxõ fãĩ kesemẽ, “Pedro ãfe yõra ato fakish faafofãnaino sharatirofora,” ikaxõ. <sup>16</sup> Nãskakata a chaima ikafori yora kaya Jerusalén ano fonifo. A isinĩ ikaifo ato efeyanã a niafaka chakata ato mẽra nanexõ ato fekaxtefaifori ato efenifo. Nãfo a Jesúsnoa ato yoimisfãfe ato sharafapanifo.

### *A Jesúsnoa ato yoimisfo ato omiskõimãkõinifo*

<sup>17</sup> A Nios ato kĩfixomis xanĩfo fe saduceofo afe ikanax õitifishkinifo, afeskakĩ noko nikakanimamẽ ikanax. <sup>18</sup> Nãskakaxõ a Jesúsnoa ato yoimisfo ato achikaxõ karaxa mẽra ato ikimanifo. <sup>19</sup> Akka Niospa ãfe ãjiri fakishi oxõ karaxa ãfe fepoti fepexõ ato kãimani iskafakĩ ato yoianã: <sup>20</sup> “Nonoax kãifaikaxõ a Nios kĩfiti pexefã mẽraxõ ato yoitakãfe afeskaxõ nõko Ifo Jesús ato ikitiromãkĩ,” ato fani. <sup>21</sup> Nã ãjirinĩ ato yoiaito nikafo keskakani penakaiama Nios kĩfiti pexefã mẽra ikifainifo, anoxõ ato yoixikakĩ.

Nãskaifono a ato Nios kĩfixomis xanĩfãfe, a afe ikafoya israeli xanĩfofo ato kenani, ano fistiax ichanãĩ fenõfo xanĩfo finakõia anoax, anoxõ a Jesúsnoa yoimisfo ato ifitanõfo ato fe ichanãĩ fenõfo. <sup>22</sup> Mã ato nĩchiafono a ato kexemisfo fokaxõ õiafo a karaxa mẽra tsoa inima. Nãskakẽ anã ato yoifekani fenifo. <sup>23</sup> Iskafakĩ ato yoinifo: “Kaxõ nõ õia karaxa fetaxikõina nõ fichitoshia, sorarofãfe kexekõiafono kãiti ano. Akka a mẽra ikikaixõ nõ õia ano tsoa ikama,” ato faifono, <sup>24</sup> nikakani a Nios kĩfiti pexefã kexemisfãfe a ato xanĩfofo fe, a ato Nios kĩfixomisfo xanĩfokõifo ãa ranã yoinãnifo: “¡Aira! ¿Afeskax tsekeafomẽ?” ikanax ratenifo.

<sup>25</sup> Askafono feronãfake fetsa atoki oxõ ato yoini iskafakĩ: “Nikakapo a mã ato karaxa mẽra ikimanita feronãfake rafeta, a Nios kĩfiti pexefã mẽraxõ mã ato yoikani,” ato faino, <sup>26</sup> a ato kexemisfãfe ãto xanĩfo ãfe inafõ fe kani ato ifikai. Akka mã fokaxõ ato efenifo. Nãskaxõ ato afeska fanifoma yorafoki mesekakĩ tokirinĩ noko tsakatirofora ikaxõ.

<sup>27</sup> Mã fokaxõ ato iyonifo a xanĩfo finakõia ano. Nãnoxõ a ato Nios kĩfixomis xanĩfãfe ato yoini iskafakĩ: <sup>28</sup> “Mã nõ mato yoita, ‘Anã ato Jesúsnoa yoyiamakãfe,’ nõ mato feita,

akka, ¿afeskakĩ Jesúsnoa mã ato yoirifaimẽ? Jerusalén anoafõ mã ato yoiki mã mã ato tãpimakõia. Nãskaxõ mã noko pãrapai nafãfe Jesús reteitafora mã noko fapai, noko chakafapaikĩ.”

<sup>29</sup> Ato askafaifono Pedro a afe rafeafo feta ato kemani: “Akka nõfi Nios nikaikai. Yorafokai nõ nikapaima. <sup>30</sup> Nõko xinifãfe ãto Niospa Jesús otoaita, mã mã retefitano ifi cruz ikaki mastaxõ. <sup>31</sup> Nãskaxõ Niospa Jesús a keskara xanĩfofinakõi imani yorafo ato ifixõ ato ikikõipakexanõ. Nãskakẽ israelifãfe keyokõichi Nios chanĩmara fanõfo, a afara chakafamisfono ãto chaka ato soaxonõ. <sup>32</sup> Chanĩma mã nõ õimis, askatari Niospa Yõshi Sharapa mã tãpia. Akka a nikaifo Niospa ãfe Yõshi Shara ato mẽra nanea,” Pedro ato fani.

<sup>33</sup> Ato askafaito nikakakĩ akiki õitifishkianã ato retepainifo. <sup>34</sup> Akka nã xanĩfofo fe fariseo ãfe ane Gamaliel ato fe ini. Nãato a Moisés yoikĩ kirika keneni keskara ato tãpimamis ini. Yorafãfe aõnoa yoisharakõimisfo. Nãato niinãkafã ato yoini iskafakĩ: “Xafakĩa ato kãimayokãfe,” ato fani. <sup>35</sup> Nãskaxõ ato kãimaxõ a xanĩfo fetsafo yoini: “Efe yorafãfe israelifãfe, ea nikakapo ã mato yoinõ. Mãfi na feronãfake rafe retepaikã, ¿afeskaito mã ato retepaimẽ? Shinãsharakãfe. Ato retepaikakĩma,” ato fani. <sup>36</sup> Nãskata anã ato yoini: “Shinãkapo, oa feronãfake Teudas xanĩfo iyoni. Xanĩfo finakõia ipaiyaito cuatro cientos yorafãfe chĩfafainifo. Akka nã mã yora fetsafãfe retenifo. Mã reteafono ãfe inafõ paxkanã fetsenifo. Nãskakanax ariax keyonifo. <sup>37</sup> Askatari chipo ãto anefõ kenekakĩ censo akaifono, Judas fetsa. Galilea anoa ini. Xanĩfo ipaikĩ ato yoini yorafãfe chĩfafãinõfo. Askafafiaino nãri retenifo. Nãskakẽ ãfe inafõri paxkanã fetsenifo. <sup>38</sup> Nãskakẽ ã mato yoi na feronãfake rafe ato enekãfe ato afeska fakakĩma. Akka a Niospa shinã anori ato yoyamakakĩ, ãa ato yoikakĩ kaxpa ato yoitirofo. Nãskakanax keyotirofo. <sup>39</sup> Akka Nios ato fe ikano mã ato afeska fatiroma. Mãroko kexemesharakãfe ato chakafayanã Niosri mã chakafatiroki,” ixõ Gamaliel ato yoiaito nikanifo.

<sup>40</sup> Ato askafaito nikakakĩ, a Jesúsnoa yoimisfo ato kenakaxõ ato koshakata, “Anã Jesúsxõ mã afaa yoiki,” ato fakaxõ ato nĩchinifo. <sup>41</sup> Nãskakẽ a Niosnoa yoimisfo xanĩfofo anoax tsekekani inimakõinifo, Niosnoaxmã omiskõikanax Jesúsnoa meka shara ato yoikani. <sup>42</sup> Nãskakẽ pena tii nõko Ifo Cristo Jesúsnoa meka shara ato yoinifo. A Nios kĩfiti pexefã anoxõ ato yoita pexefo anoxori ato yoifõfãsafainifo.

## 6

### *Jesúsxõ tãpimisfãfe docefãfe feronãfake fetsafo siete ato ifnifo ato feta yononõfo*

<sup>1</sup> Nãskaifono a Jesús Ifofaifo ichapakõi inifo. Akka fetsafo a griego mekapa ikaifãfe, hebreofo ato mekafakakĩ taefanifo ato iskafakakĩ: “¿Afeskakĩ nõko kaifo a fenemaisfo a piaifo mã ato inãsharaimamẽ? Akka mãto kaifo fisti mã ato inã,” ikaxõ ato mekafainifo.

<sup>2</sup> Ato askafaifãfe nikakata a Jesúsxõ yoimisfãfe nã docefãfe a Jesús Ifofamisfo ato ichanãfakaxõ ato yoinifo iskafakakĩ: “Nõ mato Niospa meka yoikĩ nõ xatetiroma a ma piai mato paxkaxoxiki. Akka pena tii nõ mato Niospa meka yoifafãini,” ato fanifo.

<sup>3</sup> “Efe yora mĩshtichi, feronãfakefo siete fenakãfe a mã piai mato inãsharanõfo. Mã mã tãpiakĩ fatofomãkĩ Niospa Yõshi Shara fe rafeafo. Nãfo nõ ato yonomanõ a mã piai mato inãsharanõfo. <sup>4</sup> Akka nõ pena tii Epa Nios kĩfifafãinikai, ãfe meka sharari yoianã,” ixõ ato yoinifo.

<sup>5</sup> Ato askafaifono nikakani keyokõi inimanifo. Nãskakata Esteban ifnifo, nãato Nios chanĩmara fakõina ini, ãfe Yõshi Shara a mẽra naneano. Feliperi ifnifo, Prócorori ifnifo, Nicanori ifnifo, Timónri ifnifo, Parmenasri ifnifo, Nicolásri ifnifo. Nã Nicolás Antioquía anoa ini. Judeofãfe Nios Ifofaifo keskafakĩ Nicolás Nios shinãmis ini. <sup>6</sup> Ato askafakãta a ato Jesúsnoa yoimisfo ano ato iyonifo. Anoxõ ato Nios kĩfixoyanã ato mãmãnifo.

<sup>7</sup> A Jesúsxō yoimisfāfe Niospa meka ato yoiifono atoōxō yorafāfe chanīmara fanifo, Jerusalén anoxō. Askatari judeofāfe a ato Nios kīfixomisfāferi akairi Jesús Ifofanifo. “Jesús Niospa Fakekōira,” ixō chanīmara fanifo.

### *Esteban achinifo*

<sup>8</sup> Esteban Jesús chanīmara fakōina ini. Niospa āfe kerex shara a mēra naneano akiki inimakōini. Nāskakē aōxō afama mīshtifofakī ato ōimani. <sup>9</sup> Akka judeofo fetsafo nā ichanāti pexe mēranoax ichanāpaonifo. Nā ichanāti pexe anenifo: “Anā Ato Inafoma,” fakakī. Nāfo Cirene anoafō ikaino Alejandría anoafō ikaino Cilicia anoafō ikaino fetsafori Asia anoafō nāfo ichanākanax Esteban fe feratenānifo. <sup>10</sup> Meka finōmapaifiaifono Niospa āfe Yōshi Sharapa Esteban āfe ōiti mēra shināmani. Shināsharakōita ato yoini. Ato askafaito tsōa Esteban kemanima.

<sup>11</sup> Ato askafaito nikakakī akiki ōitifishkiyanā yora fetsafo ato kori inānifo ato iskafayanā: “Nō mato kori inānō Esteban mā pāratākāfe iskafakī: ‘Na Esteban Moisés yoini keskara chakafaito nō nika, Niosri chakafayanā,’ ixō ato yoitakāfe,” ato fanifo.

<sup>12</sup> Mā fokaxō ato yoikī askafaifono, yorafo ōitifishkikani mekai fetsenifo, a judeofāfe āto xanīfo fe a Moisés yoikī kirika keneni keskara ato tāpimamisfori askanifo. Nāskakaxō Esteban achikaxō xanīfokōi ano iyonifo. <sup>13</sup> Mā iyokaxō āa pāranifo āa chanī fetsekakī iskafakakī: “Na feronāfāke nōko Nios kīfiti pexefā mēxotaima chakafai, askatari a Moisés yoini keskara chakafai. <sup>14</sup> Nāskatari, ‘Nā Jesús Nazarete anoato nā Nios kīfiti pexefā pāoaxii kiki,’ ikaito nō nikamis. Nāskatari, ‘A Moisés yoini keskara ē fetsafaxii,’ ikaito nō nikamis,” fanifo āa pārakakī.

<sup>15</sup> Askafaifono xanīfofo feta a ano tsoafāfe ōiafo Esteban āfe femānā nā ājirinī femānā keskarakōi ōinifo.

## 7

### *Esteban ato kemasharakōini*

<sup>1</sup> A judeofo Nios kīfixomis xanīfo finakōiato Esteban yōkani: “¿Chanīmamakī a mīōnoa yoiaino keskara?”

<sup>2</sup> Askafaito nikakī Esteban kemani iskafakī: “Efe yora mīshtichi, ea nikakapo. Nōko Nios fāsi sharakōixō afetiāma nōko xini Abraham yoini, Mesopotamia ano iyoano, Harán mai ano kayoamano. <sup>3</sup> Iskafakī yoini: ‘Na mai anoax tsekekaini katāfe, mefe yorafoya ato ōifaini. Nā mī kai ano ē mia ispaikai,’ ixō Niospa Abraham yoini. <sup>4</sup> Nāskakē Abraham Caldea anoax tsekekaini kani, Harán ano ikikai. Mā anoax āfe apa naano Niospa Abraham efeni na mai ano, na iskaratīa nō ika ano. <sup>5</sup> Akka Niospa afaa pishta ināyonima. Mairi fena inānima. Akka iskafakī yoini: ‘Ē mia na mai ināxii,’ ixō yoiyoni. ‘Akka mā mī nanino mī fenafo ē ato ināxii,’ ixō Niospa Abraham yoiyoni āfe āfi feta fake akamano.

<sup>6</sup> Askata Niospa anā yoini iskafakī: ‘Mī fenafo yora fetsa keskarakanax mai fetsa ano iyonōfo. Nānoax āto yonomati keskarakanax omiskōikōiyonōfo cuatrocientos xinia akani.’ <sup>7</sup> Nāskata anā yoini iskafakī: ‘Ē na yorafo omiskōimani, nā ato yonomakī omiskōimanaifo. Ē ato askafaino anoax mī fenafo tsekefaixikani. Mā anoax fokaxō nā Canaán mai anoxō ea nikasharakōixikani,’ ixō Epa Niospa Abraham yoini. <sup>8</sup> Niospa afetiāma Abraham yoini: ‘Mī fake feronāfake mī foshki repa xatetiro,’ ixō yoiyoni. Nāskakē Abraham āfe fake Isaaca mā ocho nia ikano foshki repa xateni. Nāskarifikāi Isaaca āfe fake Jacobori askafani. Nāskarifikāi Jacobo āfe fakefo ato foshki repa xatepakeni.

<sup>9</sup> “Jacobō āfe fakefo nōko xinifo ipaonifo, nāfāfe āto exto José ōikaspapaonifo. Nāskakaxō Egipto anoax foaifono yora fetsafo ato inānifo aōxō kori fixikakī nāfāfe Egipto ari iyotanōfo. Askafafiaifono Epa Niospa José potanima. <sup>10</sup> José omiskōiaito Epa Niospa ifini. Nāskaxō shināsharamani. Nāskakē Egipto anoxō ato xanīfokōichi José noisharakōini. Nāskaxō xanīfāfe José xanīfo imani, Egipto anoxō āfe pexe anoax xanīfokōi inō.

11 “Nāskakē Ejipto anoafo fe Canaán anoax fonāiki finakōinifo omiskōiyanā. Nāskakē nōko xinifāfe afaa pinifoma. 12 Akka Jacobo nikani Ejipto anoa a piaifo ichapakē. Nāskakē nāri āfe fakefo nīchini a piaifo fitanōfo, nā nōko xinifo. Ari fokatsaxakakīma foitaenifo. 13 Nāskakata afianā fonifo. Mā anā foafono José āfe ochifo tāpimani. Nāskakē nā xanīfo Faraón tāpini José āfe kaifo. 14 Nāskata chipo José apa kenamani Ejipto ano onō āfe fakefo fe. Nā yorafo setenta y cinco inifo Ejipto ano ikifeaifo. 15 Nāskakē Jacobo kani Ejipto ano ikikai. Nānoax Jacobo nani, nānoaxri nōko xinifori nāpanifo. 16 Nāskakē Jacobo āfe xafo Siquem ano fonifo maifaifokakī. Nā mai nōko xini Abraham afetīama fini, feronāfake āfe ane Hamor minini. Nā mai kini mēra nōko xinifo maifanifo.

17 “Akka mā anoax chaima tsekeafono nā Epa Niospa Abraham yoiyoni keskai, mā Ejipto anoax kaikanax fakefo ichapakōi kainifo. 18 Nāskatari Ejipto anoax nā xanīfo fetsa finakōiato José ōimisma ini. 19 Nā xanīfāfe nōko kaifofo ato pārapaoni. Nāskaxō nōko xinifo ato omiskōimapaoni. Ato pāraxō āto fakefo ato potamapaoni nā fake rama kāiyaifo nanōfo. 20 Ato askafaino nānoaxri Moisés fakeni. Akiki Epa Nios inimakōini. Nānoxō apa feta āfe afa ato pexe anoxō kexesharapaoni. Tres oxe anifo kexekakī. 21 Mā tres oxe akano apa feta āfa fētamā fepoxō faka ketokonō ratanifo. Nānoa Faraón fake xomayato fichixō ifini āfe fake keskarakōi inō. 22 Nāskakē Moisés nā Ejipto anoxō tāpiafo keskarari tāpikōini. Mā yosixō yoikī tāpisharakōia ini a xanīfāfe yoitiro keskafakī.

23 “Mā cuarenta xinia axō Moisés āfe kaifo israelifo ōikai kani. 24 Akka mā kaxō ōia Ejipto anoato āfe kaifo koshaito ōini. Askafaito ōikī timamapaikī, Moisés Ejipto anoa feronāfake koshakī reteni. 25 Askafata Moisés shināni: ‘Ēfe kaifāfe tāpikani eōxō Niospa ato ifipai,’ ixō shināni. Akka tsōa tāpinima. 26 Nāskata pena fetsa Moisés āfe kaifo ari kaxō ōia āfe kaifo raferi setenāifāfe ōitoshini. Nāskaxō ato raefapaita ato yoini iskafakī: ‘Nā yora fistifiax ¿afeskai mā setenāimē?’ 27 Ato askafaino a fētsa setei Moiséski ōiti fishkiyanā yoini iskafakī: ‘¿Tsōa mia xanīfo imamē mī noko ĩkinō? 28 ¿Akka mī ea retepaime nā Ejipto anoa mī retefaiyamea keskafakī?’ ixō yoini akiki ōiti fishkiyanā. 29 Askafaito nikai Moisés onekaini Madián mai ari kani. Nāri ipaoni yora fetsa keskarax. Nāriax āfiyaxō fake feronāfake rafe ani.

30 “Nārixō Moisés mā cuarenta xinia akano, tsōa istoma machi Sinai chaima akiki ājiri nokoni, oa fanafo kooai keskara mēranoax. 31 Askaito nikai Moisés rateyanā namakē ōia fani. Nāskakē akiki chaimashta kaxō ōipaikī nika a mēranoax Nios mekaito nikani iskafakī yoiaito, 32 ‘Ēfi mī xinifāfe ato Nioski. Abraham ikaino Isaaca ikaino Jacobo ikaino ēfi āto Nioskōikī,’ ixō Niospa yoiaito nikai Moisés rateyanā choani. Nāskakē anā ari naisnima. 33 Nāskaito Epa Niospa yoini iskafakī: ‘Mī zapato pekafe, nā mī nia ano sharakōikī. 34 Efe yorafo mē ōia omiskōiaifāfe Ejipto anoax. Mē ato nika tetsosikaifāfe. Nāskax ē fotoa ato ifiyoi. Nāskakē iskaratīa Ejipto ano ē mia nīchi,’ Niospa Moisés fani.

35 “Āfe kaifāfe noikaspakakī iskafafianifono: ‘¿Tsōa mia yoiamē mī nōko xanīfo inō noko ĩkixikī?’ ixō yoifinifono. Akka Epa Niospa xanīfo imaxō nīchini āfe kaifo ifitanō, āfe ājiriōxō. 36 Mā Moisés kaxō Ejipto anoa nōko xinifo ifini. Mā ato ifitani oxō Moisés afama mīshṭi fani tsōa atiroma keskara fakī. Nā mai anoxō cuarenta xinia ani. Nā ĩamāfānē āfe ane Ōshi anoax tsōa istoma ipaonifo. 37 Moisés āfe kaifo israelifo yoikī iskafani: ‘Niospa fatora fetsa ea keskara mato ano nīchixii kiki. Nikasharakāfe,’ ato fani. 38 Nā Moisés judeofo fe tsōa istoma ano ipaoni. Nānoax ājiri fe mekani machi Sinai anoax, nā ājirinī yoia keskafakī nōko xinifo yoini. Nā Moisés a noko ĩkipakexatiro Niospa meka shara fini, nā meka sharapa noko ĩkipakexatiro ixō ato yoini.

39 “Akka nōko xinifāfe nikakaspayanā chakafanifo. Nāskakanax afianā Ejipto ano fepainifo. 40 Nāskakaxō Aarón yoinifo iskafakakī: ‘Noko nios faxōfe noko ĩkinō. Fakira Moisés kaaki nō tāpimaki, Ejipto anoa noko efefiitaxakī.’ 41 Nāskafaifāfe Aarón ato fakka fake keskara oro ato onifaxoni. Mā ato onifaxōano yoinā retexō ināyanā akiki inimayanā fista axonifo. ‘Aicho, nōko nios fasi sharakōi,’ fanifo āa onifakaxō. 42 Nāskakē Nios ato



makinoax paxkani iskafakĩ ato yoiyanã: ‘Na fishifo nai mëranoafo nõko niosra mã fatiro,’ ato fani. Akka nã Niosnoa yoimisfãfe, nãnorikõi kirikaki kenenifo iskafakĩ:

Israelifãfe tsõa istomaxõ mã mã cuarenta xinia afiaxõ mãkai yoinã retexõ mã ea inãpaonima, <sup>43</sup> Askatamaroko mã mã afara fetsa onifaxõ, ‘Nã nõko niosra,’ ixõ Moloc mã iyafofãsafamis. Askata mãto nios Refán ãfe fishifori mã noimis. Na nõko niosra ixõ mã afara onifanixakĩ, akiki mã inima kakãini. Nãskakẽ ã mãto na tsõa istoma anoa ã mato chai nĩchi, Babilonia finõfãi, Niospa ato fani.

<sup>44</sup> “Nãskakẽ nõko xinifãfe tsõa istomaxõ nã Moisés Niospa yoini keskafakĩ pexe fakanax ipaonifo. Nã Niospa Moisés yoini iskafakĩ: ‘Karpa pexe fafe nã ã mia õimana keskara fakĩ,’ ixõ yoini. <sup>45</sup> Nãskakẽ mã xini ichapa finõta nõko xinifãfe nã karpa pexe finifo. Akka mã Josué xanĩfoxõ ato iyoni yora fetsafo potaxõ ato mai fãifonõfo. Niospa ato axõfaino ato mai fãinifo. Mã askapakeafono Davidri chipo xanĩfoni. <sup>46</sup> Xanĩfo Davidki Nios fãsi inimakõini. Nãskakẽ David Nios yoini iskafakĩ: ‘Epa Niosi, ã pexe efapa shara mia faxopai ano Jacobo ãfe fenafo inõ,’ ixõ yoini. <sup>47</sup> Askafakĩ yoifixõ axonima, ãfe fake Salomón Epa Nios pexe faxoni. <sup>48</sup> Akka yorafãfe pexe faxõfiafono nã Nios finakõia a pexe mẽra itiroma. Niospa keyokõi ãkinã ixõ a Niosnoa yoimisto kirika keneni iskafakĩ:

<sup>49</sup> Ë nai mẽra ika. Nãrixõ na mai anoafo ã onifani tii keyokõi ã ãkinã. Akka, ¿afeskakĩ mã ea pexe faxotromẽ a fisti mẽra ã inõ faki kafã saxikima? <sup>50</sup> Akka, ¿ã afama mĩshti onifanimamẽ? ixõ Niospa ato yoini.

<sup>51</sup> “Akka mãfi mãto xinifo keskarakĩ. Mã nikayospakõifo Epa Niospa meka mã nikakaspakõimis, chanĩmarakai mã famisma. Niospa Yõshi Sharapa mato yoimis mã nikakõimisma. <sup>52</sup> Nãskaxõ mãto xinifãfe a Niospa meka ato yoimisfo ato omiskõimapaonifo. Nãfãferi retenifo, ‘A sharafinakõia nokoki fotoxii kiki,’ ixõ aõnoa yoinifo. Akka nã sharafinakõia mã nokoki oano, mã achixõ ato retemayamea. <sup>53</sup> Niospa ãjirifoõxõ Moisés Niospa meka shara mato yoifimisno mã nikakaspamis,” ixõ Esteban ato yoini.

### *Esteban retenifo*

<sup>54</sup> Esteban ato yoikĩ askafaito nikakani judeofãfe Esteban noikaspakani, akiki õitifishkikĩ finakõinifo. <sup>55</sup> Askafiaifono Esteban shinãchakanima mãmãi Niospa ãfe Yõshi Shara ãfe õiti mẽra naneano. Askata nai ari foisnĩfofãkĩ õia Niospa ãfe shara chaxasharakõiaito õini, Jesús Apa fe ketaxamei nikẽ. <sup>56</sup> Nãskaxõ ato yoini iskafakĩ: “¡Õikapo! Mã nai fepekemea ã õikai Jesucristo Apa ketaxamei niakĩ,” ixõ Esteban ato yoini.

<sup>57</sup> Ato askafaito nikakaspakõikakĩ fãsikõi fiisiyanã paopomenifo. Nãskakaxõ noikaspayanã akiki fareke ferakaxõ, <sup>58</sup> mã achikaxõ pexe rasi pasotai iyokaxõ nã Esteban yõaitafãfe feronãfake naetapa ãfe ane Saulo rapatĩ inãnifo ato kexexonõ. Nãskakaxõ chipo Esteban tokirinĩ tsakaketsanifo.

<sup>59</sup> Nãskafakĩ tokirinĩ tsakaketsaifono Esteban Epa Nios kĩfini iskafakĩ: “Ifo Jesús, ãfe fẽro mẽsho ifife,” ixõ yoini. <sup>60</sup> Nãskata ratokonõ mai chachipakefõfã, fãsikõi fiisini. Iskafakĩ yoini: “Ifo, ea chakafakani kiki ato raefãfe,” ixõ yoiãx nani.

## 8

### *A Jesús Ifofaafõ Saulo ato omiskõimani*

<sup>1</sup> Mã Esteban reteafono Saulo inimayanã: “Mã mã akakõikĩ,” ato fani. Nãskata afia penata nã Jesús Ifofamisfo ato omiskõimakĩ finakõinifo Jerusalén anoxõ. Akka Jesúsxõ tãpimisfo ichonifoma, Jerusalén ano nẽtenifo. Akka nã ato omiskõimanaifo ichokanax paxkanãi fetsenifo. Ranãri Judea mai ari foaifono, ranãri Samãria ari fonifo. <sup>2</sup> Atiri yorafãfe a Nios Ifofamisfãfe Esteban maifakani oia finakõinifo aõ noikani. <sup>3</sup> Akka nã

Saulo Jesús Ifofamisfo ato omiskōimani pexefo tii mēra ikikafākakāini ato achixō karaxa mēra ato ikimaxiki, kērofoya feronāfakefo.

*Niospa meka sharaōnoa Samāria ano ato yoinifo*

<sup>4</sup> Akka nā Jerusalén anoax ichoafāfe Jesucristoōnoa meka shara ato yoifofāsafanifo nā foaifo arixō. <sup>5</sup> Felipe pexe rasi Samāria ano kani, anoxō Cristoōnoa ato yoikai. <sup>6</sup> Ato yoiato nikakani yorafo ichanākaxō Felipe nikakōinifo. Askatari Niospa Yōshi Sharaōxō tsōa atiroma keskafakī Felipe afama mīshtifo faito ōinifo. <sup>7</sup> Askata a niafaka chakafo ato mēra nanea ato makinoa potapakeni. Nāskakē niafaka chakafo ato makinoax tsekei fiisiki fetsenifo. Askatari a finimisfoma sharafata chātofori sharafani. <sup>8</sup> Askafaito ōikani a pexe rasi anoafō Felipeki inimakōinifo, ato sharafapaito ōikani.

<sup>9</sup> Akka nā Samāria mai ano feronāfake āfe ane Simón ini. Taeyoi yōfe iyopaoni, nāato Samāria anoafō ato pārapaoni: “Ē feronāfake sharafinākōiara,” ixō. <sup>10</sup> Keyokōichi fakefoyaxō anifofofāfe nikakōisharanifo iskafakī yoiyanā: “A nā yoimisfo a nato Niosxō afama mīshtifo fai kiki,” ixō yoinifo.

<sup>11</sup> Nāskakē akiki inimakakī nikakōipaonifo āfe yōfēōxomāi mā ato pārapakemiskē. <sup>12</sup> Akka askafiaifono Felipe Nios xanīfoōnoa yafi Jesucristoōnoa meka shara ato yoiato nikakakī chanīmara fakōinifo. Nāskakē chanīmara faifāfe Felipe faka mēra ato ikimapakeni maotisafakī āto chaka xatenōfo. Feronāfakefoya kērofoya ato faka mēra ikimapakeni. <sup>13</sup> Askatari a Simón yōfe ifiakatsaxakī atori Jesús chanīmara faxō Ifofani. Askafaito ōikī aari Felipe maotisafani. Nāskax nā Simón Felipe afe kapaoni. Akka Felipe tsōa atiroma keskafakī Niosxō afarafo sharafaito ōikī yoini iskafakī: “Aira. ¿Afeskaxō iskafaimē?” ixō Simón yoini.

<sup>14</sup> Nāskaifono a Jesús fe rafemisfāfe Jerusalén anoxō nikanifo Samāria anoxō yorafāfe Niosnoa meka shara chanīmara faifāfe. Nāskakē Pedro yafi Juan nīchinifo, Samāria ari fotanōfo. <sup>15</sup> Mā Samāria ano nokokaxō a Nios Ifofaafō ato Nios kīfixonifo Niospa Yōshi Shara ato mēra nanenō. <sup>16</sup> Ato mēra Epa Niospa Yōshi Shara naneyoamano Jesús aneōnoax maotisanifo. <sup>17</sup> Nāskakē Pedro feta Juan ato māmānifo ato Nios kīfixoyanā. Ato askafaifono Niospa Yōshi Shara ato mēra naneni.

<sup>18</sup> Nāskakē Simón ōini Niospa Yōshi Shara ato mēra naneaito Pedro feta Juan ato Nios kīfixoyanā ato māmāifono. Ato askafaifono ōikī Simón ato kori ināpaina. <sup>19</sup> Ato iskafakī yoiyanā: “Eari na kerex shara inākāfe ēri ato māmāpakenō Niospa Yōshi Shara ato mēra nanenō,” ixō Simón ato yoini.

<sup>20</sup> Ato askafaito Pedro kemani: “A na mī koriya mī nai, akka mī shinā korioxō a Niospa noko ināpaiyai keskara nō fitiro. Maa, askarakaima. <sup>21</sup> Mīkai afaa tāpiama na nō Nios yonoxonai keskarakai mī nofeta atiroma. Mia Niospa tāpikōia mī ōiti mēraxokai mī shināsharaima. <sup>22</sup> Nāskakē mī chaka xatefe a mī shināi anori anā shinākima. Nios yōkafe mī kīfaiato mia chaka soaxotiroki. <sup>23</sup> Mē mia ōi mī ōitifishkiki finaito mīmāi chakakōiax,” ixō Pedro yoini.

<sup>24</sup> Askafaito nikakī Simón kemani iskafakī: “Ea Nios kīfixōfe, nā mīa yoiyai keskafakī, Niospa ea omiskōimayamanō,” ixō yoini.

<sup>25</sup> Askakāta Pedro feta Juan Samāria anoafō nōko Ifo Jesúsnoa meka shara ato yoitakani Jerusalén ano anā fenifo.

*Mā fekakī pexe rasi anoafō Jesúsnoa meka shara ato yoifenifo*

<sup>26</sup> Nāskata Niospa āfe ājirinī Felipe yoini: “Fai fētsa kakīma, na fāi katāfe na fāi Jerusalén yafi Gaza finōfainaki tsōa istoma ari na fai kaaki,” fani. <sup>27</sup> Askata Felipe fininākfāta kani. Fāi kai feronāfake Etiopía anoaki nokoni. Nā feronāfake xanīfori ini. Nāato kēro xanīfokōi kori kexexopaoni Etiopía ano. Nāato Jerusalén ano kaxō Epa Nios kīfitani. <sup>28</sup> Mā āfe kaifo mēra okī āfe karo mēra tsoxō kirika anefeni, nā Isaías Niosnoa yoikī kenei. <sup>29</sup> Nāskata Niospa Yōshi Sharapa anā yoini Felipe: “Oa karo ano katāfe,” fani.

<sup>30</sup> Mā Felipe akiki kaxō nikani nā feronāfake Etiopía anoato kirika aneaito, nā Isaías keneni. Nāskaxō yōkani: “¿Mā mī tāpiamē a mī aneai?” faito, <sup>31</sup> Etiopía anoato kemani iskafakī: “¿Afeskaxō ē tāpitiromē? ¿Tsōa ea tāpimatiromē?” fata nāskaxō nā feronāfake Felipe keneni: “Ēfe karomā naneyofe efe tsaoxiki,” fani. <sup>32</sup> A kirika kenea anekī ōiai iska ini:

Oveja iyokaxō retetirofo keskafakī, ari iyonifo retexikakī. Ovejanā fake achikaxō āfe rani xateifono feroitiroma keskai ari tooxinima. <sup>33</sup> Rāfinī fanifo afaa chakafayamafiakē noikaspa kakī. A xanīfofo aō rafañā inifoma aō rafañā itamaroko retenifo. Akka āfe fenafāfe nikanakafoma, ixō Isaías keneni ōini.

<sup>34</sup> Nāskata nā xanīfo Etiopía anoato Felipe yōkani: “Ea yoife ē tāpinō na Niospa meka yoimisto yoini afaa ikamākī, fetsaōnoa yoikī kenenimākī askayamakī āa anoi yoimekī kenenimākī,” faito, <sup>35</sup> Felipe yoini iskafakī: “Na mī kirika ōiai Isaías keneni a Jesucristo noko nāxoxiai yoikī keneni,” fani. Nāskafaxō Jesúsnoa meka shara yoipakeni. <sup>36</sup> Nāskakata fāi fokani faka ano nokonifo. Nānoxō a xanīfo Etiopía anoato Felipe yoini: “Na faka ōipo. ¿Na fāka mī ea maotisafatiromamē?” fani.

<sup>37</sup> Askafaito Felipe yoini: “Mī ōiti mēraxō mī chanīmara fakōinaito ē mia atiro,” fani. Askafaito a feronāfake kemani: “Ēje, ē chanīmara fai Jesucristo Niospa Fake,” fani.

<sup>38</sup> Askafaito nikakī Felipe, “Mī karo nētefafe,” fani. Mā karo nētefakata nā rafe fotopakefōfānifo faka ano. Nānoxō Felipe a feronāfake Etiopía anoa maotisafani. <sup>39</sup> Mā faka anoax feaifono, Niospa Yōshi Sharapa Felipe iyofaino yamarisatani. Nāskakē a feronāfake Etiopía anoato Felipe anā ōinima. <sup>40</sup> Nāskata Felipe mai fetsa, Azoto ano nokoni. Nānoax kakī a pexe rasi anoafō Jesúsnoa meka shara ato yoifoikaax, Cesarea ari nokoni.

## 9

### *Saulo Jesús chanīmara fani Damasco ano kakī* (Hch. 22.6-16; 26.12-18)

<sup>1</sup> Nāskatari nā Saulo mēxotaima ē mato reteikai ixō ato retepaipaoni a Jesús Ifofaafo. Nāskakē a ato Nios kīfixomisfo āfe xanīfo ano kani. <sup>2</sup> Mā kaxō ato yoini iskafakī: “Ea kirika kenexokāfe ē aya katanō, ichanāti pexefo Damasco ano a Jesús chanīmara faifo ē ato achitanō, feronāfakefoya kērofoya, Jerusalén ano ato iyoxō karaxa mēra ato ikimaxiki,” ixō ato yoini. <sup>3</sup> Akka mā pexe rasi Damasco chaima fāi kaino, nai mēraxō a kemataima chaxatanaino, <sup>4</sup> Saulo pakeni. Pakexō nikani, iskafakī yoiaito: “Saulo, Saulo, ¿afeskakī mī ea omiskōimanimē?” faito nikakī, <sup>5</sup> Saulo kemani: “Ifo, ¿mī tsoamē?” faito kemakī iskafani: “Ēkīa Jesús, a mī ea omiskōimanai. <sup>6</sup> Fininākfā. Pexe rasi ano katāxiki. Anoxō mia yoikani kiki mī afaa afeska faimākai,” fani.

<sup>7</sup> Akka a Saulo fe foaifo ratekōinifo mekaito nikakani. Akka anoa mekaito nikafikakī tsoa ōinifoma. <sup>8</sup> Nāskata Saulo fininākfani. Fininākfāta ōipaikī anā ōinima, mā fēxoa ini. Nāskakē mētsokaxō iyonifo Damasco ano. <sup>9</sup> Nā Damasco ano tres nia ini ōiaxma. Askatari afaa pinima, afaari ayanima.

<sup>10</sup> Akka nā Damasco ano Jesús Ifofaa fisti ika ini, āfe ane Ananías. Nāato namakē ōini nōko Ifāfe yoiaito iskafakī: “Ananías,” faito, “Ēkīa, Ifo,” fani. <sup>11</sup> Askafaito nōko Ifāfe yoini: “Na fai āfe ane ‘Mēstekōi’ ari katāfe. Mā nokoxō Judaspa pexe ano yōkafe nānoa feronāfake Tarso anoa, mī fichikai āfe ane Saulo. Nānoxō Epa Nios kīfi kiki. <sup>12</sup> Anoxō mia namakē ōiafai kiki, mī mīfi mī māmāito, anā ōisharaxiki,” ixō yoiaito, <sup>13</sup> nikakī Ananías kemani: “Ifo, na feronāfakeōnoa ea yoiaifāfe mē nikamis. Nāato keyokōi Jerusalén anoafō chakafaito a mia Ifofaafo. <sup>14</sup> Akka mā nono oa a ato Nios kīfixomis xanīfofōfāfe nīchiafono. A mia Ifofamisfo ato karaxa mēra nīchixikī mā ato ifiyoa,” faito, <sup>15</sup> anā nōko Ifāfe yoini iskafakī:

“Mē na feronāfake katoa eōnoa meka shara ato yoinō mai fetsafo anoafoya āto xanīfofoya israelifoya ato yoinō. <sup>16</sup> Nāskakē ē Saulo ōimana eōnoax omiskōifinakōinō,” ixō yoini.

<sup>17</sup> Askafaito nikafaini Ananías kani. Kaax pexe mēra ikitoshita nānoa Saulo fichi-toshini. Nāskaxō āfe mīfi māmāni iskafakī yoiyanā: “Saulo, ēfi mefe yorakī. Nōko Ifo Jesús nā mī fāi oaito mikiki nokoitato, ea nīchia ē mia fero sharafaxonō, askatari Niospa Yōshi Shara mī mēra ē nanenō,” faino, <sup>18</sup> koshikōi Saulo fero mēranoax oa foe pese keskara pakeni. Nāskaxō ōisharakōitani. Nāskakē Ananías maotisafani faka mēra ikimakī. <sup>19</sup> Nāskaxō mā pixō meea āfe yora sharakōi ini, anā āfe yora pachi inima. Nāskakē nā Jesús Ifofaafo fe Damasco ano ato fe oxa ranāyonifo.

### *Damasco anoxō Saulo Niosnoa yoini*

<sup>20</sup> Askata Saulo ichanāti pexe mēraxō ato yoikī taefani iskafakī: “Jesús Niospa Fakekōi,” ixō ato yoini. <sup>21</sup> Ato askafaito nikakani ratei fetsenifo. Nāskaxō yoinifo iskafakakī: “Akka, ¿nato Jerusalén anoxō a Jesús Ifofamisfo ato omiskōimamismamē? Akka, ¿naa-mamē? Mā nono oa nonoafō ato achiyoi, a Nios kīfixomisfāfe āto xanīfofo ato iyoxoni axiki.”

<sup>22</sup> Akka taeyoi Saulo ratepishtakī yoiyoni. Nāskaxō feyafani fāsikōi yoikī. Nāskaxō mēstekōi ato yoini Niospa āfe Fake Jesús nokoki nīchini. Nāskakē judeofāfe Damasco anoxō tāpipaiketsanifo. “¿Fato nō chanīmara faimē?” ikaxō, “Jesucristofi Niospa Fakekōikī,” ixō ato yoiaito.

### *Saulo judeofoki mesei onekaini*

<sup>23</sup> Nāskata mā oxai ichapano, judeofāfe ichanākaxō shinānifo: “¿Afeskaxō nō Saulo retetiromē?” ikaxō, <sup>24</sup> akka Saulo tāpini yoiaifono. Pena yafi fakishchāi manaifono pexe rasi kāiti anoxō retepaikakī. <sup>25</sup> Askaito ōikakī a Jesús Ifofamisfāfe Saulo fēta mēra nanexō kene fomākīaxō risfichi fakishi fotomanifo a tsoa niama anori. Mā fotomanafono onekaini.

### *Saulo Jerusalén ari kani*

<sup>26</sup> Mā Saulo Jerusalén ano nokoax a Jesús Ifofamisfo fe rafepaiyaito, akka keyokōichi omisnifo tāpikaxoma koshikairoko Nios Ifofara ikaxō. <sup>27</sup> Askaito ōikī Bernabé Saulo iyonī Jesús āfe inakōifo ari. Nāskaxō ato yoini iskafakī: “Na Saulo nōko Ifo ōia fāi kakī, nōko Ifāfe yoiaito. Nāskaxō na Saulo Damasco anoxō ato yoisharapakea, ‘Jesús Niospa Fakekōi,’ ixō ato yoia ranotamakōi,” Bernabé ato fani. <sup>28</sup> Nāskakē Saulo Jerusalén ano ato fe ikax, kafāsapaoni. Nōko Ifo Jesúsnoa ato yoifofāsafapaoni mesetama. <sup>29</sup> Anoxō ato yoiaito judeofāfe griego meka tāpikaxō fochishpamanifo. Nāskakaxō afeskaxoma retepainifo. <sup>30</sup> Askafaifono a Jesús Ifofaafāfe mā tāpikaxō Saulo iyonifo Cesarea ano. Nānoxō Tarso ano nīchinifo.

<sup>31</sup> Nāskakē a Jesús Ifofaafo Judea anoax ita Galilea anoax ita Samāria anoax ita isharakōinifo anā tsōa ato omiskōimanaimano. Anoxō Nios nikasharakōinifo isharakōikaxō Niospa Yōshi Sharapa ato axosharaino. Nāskakē a Nios Ifofaafo ichapakōi inifo.

### *Pedro Eneas sharafani*

<sup>32</sup> Nāskakē Pedro kafāsani a Nios Ifofaafo ato ōifofāsafai. A Lida ano ikaxō Nios Ifofaafari ato ōikai kani. <sup>33</sup> Nānoa feronāfake āfe ane Eneas fichini. Rakatiani mā ocho xinia aka ini. <sup>34</sup> Fichixō Pedro yoini iskafakī: “Eneas, Jesucristo mia sharafaaki fininākafta mī oxati itipinīfāfe,” ixō yoiaino, Eneas koshikōi fininākafani. <sup>35</sup> Nāskakē Lida ano ikafāfe, Sarón anoafāferi ōikakī nōko Ifo Jesús chanīmara fanifo.

### *Mā Dorcas naano Jesúsxō Pedro otofani*

<sup>36</sup> Nāskaifono nā pexe rasi Jope ano kēro Nios Ifofaa ika ini, āfe ane Tabita. Griego mekapa Dorcas famisfo. Nā kēromā isharakōixō ato axosharakōipaoni ato afara ināsharakōikī. <sup>37</sup> Nāato askafai, Dorcas isinī iki nani. Mā nakē chokakaxō fomākīa

māpemainĩfōfā pexe kene fetsa ano ratanifo. <sup>38</sup> Akka Jope fe Lida chaima ini. Nā Lida ano Pedro ika ini. Nāno ikē nā Nios Ifofaafāfe tāpikaxō feronāfake rafe nĩchinifo, iskafakĩ yoitanōfo: “Jope anoxō mia kenafo mĩ koshi kanō,” ixō yoitanōfo.

<sup>39</sup> Askafaifono Pedro ato fe kani. Mā nokoano fomākĩa māpemainĩfōfānifo a Dorcas raka ano. Anoax a kēro fenemaisfo oiakakĩ Dorcas nayoxoma ato samafaxomis ispanifo.

<sup>40</sup> Askaifāfe ōikĩ Pedro ato kaimani. Ato kaimata ratokonō mai chachipakefōfā Epa Nios kĩfini. Nāskata a kēro naa ōiyanā yoini iskafakĩ: “Tabita, fininākafe,” faino, nā kēromā Pedro feista nāskax tsaoinākafe. <sup>41</sup> Nāskata Pedro mētsoxō fininĩfōfāni. Nāskata a Jesús Ifofaafōya a kēro ifomafafo ato kenani ato ōimaxiki mā Dorcas anā otoano. <sup>42</sup> Askaito nikanifo a pexe rasi Jope anoafāfe. Nāskakē ichapakōichi nōko Ifo chanĩmara fakōinifo. <sup>43</sup> Mā askafata Pedro Jope pexe rasi ano oxaranāyoni, a Simón anoxō fichi shinā famis ano.

## 10

### *Pedro fe Cornelio*

<sup>1</sup> Nā pexe rasi Cesarea anoa feronāfake āfe ane Cornelio ini. Sorarofāfe āto xanĩfo ipaoni. Nā sorarofo, “Italianōra,” ato famisfo. <sup>2</sup> Nā feronāfake āfe yorafo fe isharakōixō Epa Nios kĩfipaonifo. Nāskatari judeofo ato axosharayanā kori ichapa ato ināpaoni. Nāskaxō Epa Nios mēxotaima kĩfipaoni. <sup>3</sup> Nāskata pena fetsa yātapake oa namakē ōia fani, Niospa āfe ājiri xafakĩakōi ōini akiki oxō iskafaito: “Cornelio,” faito. <sup>4</sup> Nāskakē Cornelio ājiris ōini. Nāskaxō rateifinakōiyanā yōkani iskafakĩ: “¿Afaa mĩ ea yoipaikĩ kenaimē, Ifo?” faito, ājirinĩ yoini: “Mĩ kĩfaiito mā Epa Niospa mia nikakōia, a yora afaamaisfo ato axosharayanā mĩ ato kori ināito.” <sup>5</sup> Nāskaxō yoini: “Fatora fetsa nĩchife Jope pexe rasi ano kaxō Simón ifitanōfo. Āfe ane fetsa Pedro. <sup>6</sup> Simón fetsa pexe ano oxaki nā Simón ĩamāfā ketokonō ikaki fichi koiro fai.”

<sup>7</sup> Askafakĩ yoiax mā ājiri kaino, Cornelio a yonoxomis rafeya āfe soraro fisti kenani nā soraronō kexekōimis ini. Akka nā soraronō Nios shināmis ini. <sup>8</sup> Nā ājirinĩ yoia keskara mā ato yoixō Jope ari ato nĩchini.

<sup>9</sup> Penama xini keya mā Jope chaima faifoafono, Pedro pexe māmākĩa māpeinĩfōfāni arixō Epa Nios kĩfikakĩ. <sup>10</sup> Nāskax fonāikōikĩ pipaini. Akka pixikakĩ mā pĩchaifono Pedro namakē ōia fani. <sup>11</sup> Ōia nai fepekemeaito ōini ariax sabanā keskara petapafā nexeax nai mēranoax nāmā fotopakekafanaito. <sup>12</sup> Nā sabanā petapafā mēra yoinā fetsa fetsatapafō ōini ronofōya, peyafo, afama mĩshti ini. <sup>13</sup> Nāskata mekaito nikani iskafakĩ yoiaito: “Pedro, fininākafe. Nafo retexō pixiki,” faito nikani.

<sup>14</sup> Askafaito nikakĩ Pedro kemanı: “Maa, Ifo, nafo ē pimisma, Moisés noko yoini nafo nō pitiroma,” faito, <sup>15</sup> afianā yoiaito nikani iskafakĩ: “Niospa nafo shara imaki. Akka nafo chakara fayamafe,” faito nikani.

<sup>16</sup> Yoikĩ tres fata nāskax nā sabanā petapafā anā nai mēra kaito ōini. <sup>17</sup> Nāskakē Pedro shināchakakōiyanā tāpipaini. “¿Afaa iskara Niospa ea yoipaimē na namakē ōia keskara ē ōiai?” ixō Pedro shināni. Nāskaino a Cornelio ato nĩchia fokaxō, pexe fepoti anoxō ato yōkanifo: “¿Fatomē Simón pexe?” ixō ato yōkanifo. <sup>18</sup> Anoxō fāsikōi ato yōkanifo: “¿Fanĩ Simón fetsa oxamē, āfe ane fetsa Pedro?” ixō ato yōkanifo.

<sup>19</sup> Oa namakē ōia keskara ōixō Pedro shināpaiyaino, Niospa Yōshi Sharapa yoini iskafakĩ: “Ōipo, feronāfake trespa mia fenai feafokĩ. <sup>20</sup> Fininākafe. Nā mā fotoax ato fe kataxiki tanaimakōi, ē ato nĩchia feafoki,” faino, <sup>21</sup> Pedro fotopakekafāxō a feronāfake tii ato yoini iskafakĩ: “¿Afaa mā akiyoamē? Ērokonō a mā ea fenai,” Pedro ato fani.

<sup>22</sup> Ato askafaino kemanıfo: “Nō oa nā sorarofāfe āto xanĩfo Cornelio noko nĩchiano nā feronāfakefi sharakōiki. Nios nikakōimis. Judeofāfe aōnoa meka shara yoimisfo sharara famisfo, Niospa āfe ājirinĩ yoia mia kenanō āfe pexe ano mĩ kanō, nāato mia nikasharai mĩ yoiaito,” fanifo.

<sup>23</sup> Askafaifãfe nikakĩ Pedro ato ikimani. Nãno afe oxa fistinifo, nãskata Pedro ato fe penama kani. A afe rafeafori Nios Ifofakanax Pedro fe fonifo Jope anoax.

<sup>24</sup> Mã fokanax pena fetsa Cesarea ano nokonifo, a Cornelio ato manai ano, afe yorafo feta. Æfe yamakõifori ano afe inifo ato kenamana fekanax. <sup>25</sup> Mã Pedro pexe ano nokoano, Cornelio ãfe pexe anoax kãinãkafã Pedro ifikai kani. Mã kaxõ a nãmã ratokonõ mai chachipakefofã: “Mĩ fãsi sharakõira,” fani.

<sup>26</sup> Askafaito õikĩ Pedro fininĩfofãni iskafakĩ yoiyanã: “Fininãkafãfe. Æri yoraki mia keskara,” fani.

<sup>27</sup> Nãskax afe mekayanã pexe mẽra ikikaikĩ õia yora ichapakõifo ichanã inifo. <sup>28</sup> Anoxõ Pedro yoini: “Mã mã tãpia a nõko xinifãfe noko yoini keskara a judeofoma fe nõ rafetiroma. Askatari ãto pexe mẽra nõ ikitiroma. Akka Niospa ea tãpimana ã tsoa chakafatama ã ato noisharakõinõ. <sup>29</sup> Nãskakẽ ea yoiainifo ã koshi oa, ã okaspama. Akka ã tãpipai afeskakĩ mĩ ea kenamãki,” faito, <sup>30</sup> Cornelio kemani iskafakĩ: “Mã cuatro nia finõa, a nono xini rakato ãfe pexe anoxõ foni teneyanã ã Epa Nios kãfiaino yãtapake, feronãfake rapati fafekõiai safeax ekeki nokoita, <sup>31</sup> ea yoikĩ iskafaita: ‘Cornelio, mã Niospa nika mĩ kãfiaino. A mĩ akai keskarari mã tãpia, a afaamaisfo mĩ ato afara inãsharaito,’ ea faito ã õita. <sup>32</sup> ‘Nãskaxõ feronãfake tres pexe rasi Jope ano nĩchife Simón ifitanõfo. Æfe ane fetsa Pedro. A Simón fetsa ãfe pexe mẽra ikaki. Nã Simón fẽtsa fichi koiro shinã famiski ãamãfã kesemẽ ikaki,’ ixõ ea yoita. <sup>33</sup> Nãskakẽ feronãfake tres ã koshikõi nĩchita mia ififonõfo. Akka mĩ nokoki osharakõiyãni mĩ noko inimamasharakõia. Nãskakẽ keyokõi mã nõ ichanã Niospa noko õiaino. Akka nõ nikapai a nõko Ifãfe mia yoia keskara mĩ noko yoinõ,” ixõ Cornelio yoini.

### *Pedro ato yoini Cornelio pexe anoxõ*

<sup>34</sup> Askafaito nikakĩ Pedro yoini iskafakĩ: “Chanĩma mẽ tãpikõia Niospa noko yora fetsa keskara õima, keyokõi mã yora fisti keskara noko õi. <sup>35</sup> Askakimaroko mã mani fetsafãferi Nios nikakõikakĩ, afarafo sharakõi fakanax, Epa Niospa fake itirofo. <sup>36</sup> Niospa israelifãfe fenafo meka sharaõnoa ato yoini, inimasharakõinõfo. Jesucristoõxõ ato yoini, mã nõko Ifoõxõ. <sup>37</sup> Mã mã nikamiski a Judea mai anoax ini keskara. Taefakĩ Galilea anoxõ ato yoikĩ taefani: ‘Mãto chaka xatekãfe Nios chanĩmara fakãfe ã mato maotisafapanõ,’ ixõ Juan ato yoini. <sup>38</sup> Akka mã mã tãpia Niospa ãfe kerex sharafoya ãfe Yõshi Shara Jesús mẽra naneni. Jesús afama mĩshtifo fapaoni, ato sharafayanã a omiskõiaifo, niafaka chakata ato omiskõimanaino. Nãskakẽ afama mĩshtifo fatiro Niosmãni afe ikano. <sup>39</sup> Akka nõ õiyamea Jesús afama mĩshtifo faito judeofãfe ãto mai anoxõ ata Jerusalén anoxori akaito nõ õiyamea. Nãskafafaito retyameafo ifi cruz ikakĩ mastakaxõ. <sup>40</sup> Akka mã retyafafono Epa Niospa tres nia oxata ofofayamea. Nãskakẽ nokoki nokoaito nõ õiyamea. <sup>41</sup> Akka atiri yorafoki nokoyameama, nokoki nokoaito nõ õiyamea. Afetĩamamãni Niospa noko katonixakĩ chanĩmakõi nõ mato yoi. Nõ a feta piyanã nõ afeta ayayamea mã Niospa ofofayameano. <sup>42</sup> Nãato noko nĩchiyamea pexe rasi anoafõ nõ ato yoinõ iskafakĩ: ‘Niospa Jesús nĩchini,’ ato yoinõ fatofomãkĩ afe nĩpanakafo mã nafianixakakĩ, askatari a niafori ato yoixii. <sup>43</sup> A Niosnoa yoimisfãfe a mã Jesús iskanõpokoai yoikĩ aõnoa yoionifo. Iskafakakĩ yoinifo: ‘Nã chanĩmara faifono aõxõ Epa Niospa ato chaka soaxotiro,’ ixõ yoinifo,” Pedro ato fani.

### *Nã judeofomafãfe Niospa Yõshi Shara finifo*

<sup>44</sup> Pedro ato yoikĩ xateamano Niospa Yõshi Shara ato mẽra naneni ãfe meka shara nikaifono. <sup>45</sup> Nãskakẽ a judeofãfe Jesús Ifofamisfãfe Pedro fe foitaxakakĩ ato õinifo. Ato iskafanifo: “Aira. Õikapo. Na nõko kaifomafo Niospa Yõshi Shara ato mẽra naneakekafana,” ikax yoinãnifo. <sup>46</sup> Anoxõ ato nikanifo meka fetsapa mekaifãfe iskakani a ato kaifomafo: “Nios fãsi sharakõi,” ikanax mekaifãfe ato nikanifo judeofãfe.

<sup>47</sup> Askaifāfe Pedro ato yoini: “Akka tsōa na yorafo ato maotisano fayamakāfe noko fatirofoma. Akka Niospa Yōshi Shara mā ato mēra nanea, nōmēra naneni keskai.”

<sup>48</sup> Pedro ato yoini Jesucristo aneōxō ato maotisano fanōfo. Mā ato maotisano faafono, Pedro nīchikaspanifo. “Kayamafe, nono nofe iyoxiki,” fanifo.

## 11

### *Pedro a Nios Ifofaafō Jerusalén anoafō ato yoini*

<sup>1</sup> Nā Cesarea anoafāfe Jesús Ifofanifo judeofo yamafikaxō. Afāfe Jesús Ifofaifāfe ato nikanifo a Jesúsxō tāpimiskōifāfe. A Nios Ifofamisfo fetsafāferi nikanifo. Atiixō ato nikanifo āto mai Judea anoxō. <sup>2</sup> Askata Pedro Cesarea anoax kani Jerusalén ano. Anoxō a Jesús Ifofamis fetsafāfe Pedro mekafanifo a Moisés kenei tāpiafāfe: “Judeofoma fe mī rafeira,” ikaxō. <sup>3</sup> Iskafanifo: “¿Afeskai a nōko kaifoma ano mī kaitamē? Anoxō ato fe rafexō mī ato feta piaito nō nikaita a Moisés yoini keskafakī nō ato feta pitiroma,” fanifo.

<sup>4</sup> Askafaiifāfe nikakī Pedro ato yoini a namakē ōiafāta keskara, <sup>5</sup> iskafakī: “Ē pexe rasi Jope anoxō ē Nios kīfiyanā oa namakē ōia keskara ē ōita. Ē ōita oa sabanā keskara nexeax nai mēranoax fotopakekafanaito a ē nia ano. <sup>6</sup> Askaito ē ōia a mēra yoinā fetsa fetsatapafō ikita askatari a xōchixaraifoya peyafōri ē ōita a mēra kechokomekē. <sup>7</sup> Askata mekaito ē nikaita ea yoikī iskafaito: ‘Pedro, fininākaifāfe. Na fetsa retexō pixiki,’ ea feita. <sup>8</sup> Ea askafaito nikakī ē kemakī iskafaita: ‘Maa, Ifo. Moisés yoikī kenei keskafakī, nafo nō pitiroma. Nāskakē na yoināfo ē pimisma,’ ē feita. <sup>9</sup> Ē askafaito afianā nai mēraxō iskafakī ea yoiaito ē nikaita: ‘Niospa yoia nafo mī pitiroki. Pife, sharaki, chakafakīma,’ ea faito ē nikaita. <sup>10</sup> Ea yoikī tres fata, afianā nai mēra kaito ē ōita. <sup>11</sup> Askaino Cesarea anoax feronāfake tres ekeki feitafo. Ato nīchiafono ea fenai fekani. Mā fekanax pexe ano nokoitafo a ē ika ano. <sup>12</sup> Nāskakē Niospa Yōshi Sharapa ea nīchita iskafakī ea yoianā: ‘Shināchakakīma ato fe katāfe,’ ea feita. Nāskatari a Nios Ifofaafō seis feronāfake efe foitafo. Nāskakē ato fe yora yamafīax Cornelio pexe mēra nō ikitoshita. <sup>13</sup> Nānoxō noko Cornelio yoita a āfe pexe anoxō ājiri ōitaxakī iskafakī yoiaito: ‘Fatora fetsa pexe rasi Jope ano nīchife Simón ifitanōfo, āfe ane fetsa Pedro. <sup>14</sup> Nāato mia yoi kiki afeskax Nios fe mī ipaxatiromākī, mefe yorafo fe,’ ixō Niospa yoitano Cornelio ea yoita,” Pedro ato fani. <sup>15</sup> “Ē ato yoiaino Niospa Yōshi Shara ato mēra naneita, taeyoi nō mēra naneni keskai. <sup>16</sup> Nāskakē ē shināfāta a nōko Ifāfe noko yoiyamea anori chanīma. ‘Juan ato fāka maotisafani, akka Niospa āfe Yōshi Shara mato mēra nanei,’ ixō Jesús noko yoiyamea. <sup>17</sup> Epa Niospa āfe Yōshi Shara ato mēra naneita a nōmēra naneni keskafakī, nōko Ifo Jesucristo nō chanīmara faito. Akka ē, ‘Mī Yōshi Shara ato mēra naneyamafe,’ ē Nios fatiroma,” ixō Pedro ato yoini.

<sup>18</sup> Ato askafaito nikakani a Nios Ifofamisfo Jerusalén anoax anā tsoa tooxinima, Nioskiroko inimanifo. Iskafakī yoinifo: “Aicho, Nios fāsi sharakōi, nā noko ināni keskafakī, āfe Yōshi Shara ato mēra nanea, a nikakōisharakanax afe ĩpaxanōfo,” ixō yoinifo.

### *Antioquía anoafāfe Jesús Ifofanifo*

<sup>19</sup> Mā Esteban reteitafono a Jesús Ifofamisfo ato omiskōimakī taefanifo. Ato askafai-fono ranāri Fenicia ari ichonifo, ranāri Chipre ari fonifo, ranāri Antioquía ari fonifo. Nārixō judeofo Jesúsnoa meka shara ato yoinifo. Yora fetsafo ato yoinifoma, judeofos ato yoinifo. <sup>20</sup> Ato askafaifono a Nios Ifofamisfo Chipre anoax fekāta Cirene anoaxri fenifo pexe rasi Antioquía ano. Mā fēkaxō a judeofoma nōko Ifo Jesúsnoa meka shara ato yoinifo. <sup>21</sup> Nōko Ifāfe āfe Yōshi Shara ato fe ikano, a āto xinifāfe ato yoipaonifo shināmāmakikāta nōko Ifo chanīmara fakōinifo.

<sup>22</sup> Askaifono a Jesús Ifofamisfāfe Jerusalén anoxō ato nikanifo. Nāskakē Bernabé Antioquía ano nīchinifo. <sup>23</sup> Mā Bernabé nokoxō ōia Niospa ato imasharakōia ōitoshini. Askaifāfe ōikī Bernabé inimasharakōini. Nāskaxō ato yoisharakōini shināsharakōixō.

“Isharakõixõ nõko Ifo nikasharakõikãfe,” ato fani. <sup>24</sup> Akka Bernabé feronãfake sharakõi ini. Niospa Yõshi Shara ãfe õiti mēra nanea, Jesús chanĩmara fakõina. Nãskakē yorafãfe aõxõ nõko Ifo Jesús chanĩmara fakõinifo.

<sup>25</sup> Mã askata Bernabé Tarso ano kani Saulo fenaikai. Mã fichixõ Antioquía ano iyoní. <sup>26</sup> Nãrixõ a Nios Ifofaafo feta xinia fisti ani, yora ichapafo ato tãpimayanã. Antioquía anoxõ taefakĩ ato anenifo a Jesús Ifofaafo. “Cristianõra,” ato fanifo.

<sup>27</sup> Askafono a Niospa ato shinãmanaino Niosnoa ato yoipaonifo nãfo Jerusalén anoax Antioquía ano fonifo. <sup>28</sup> Mã fokaxõ fishtichi niinãkafãxõ ato yoini ãfe ane Agabo, Niospa Yõshi Sharapa shinãmanaino, “Nã maitio anoax fonãiki finakõixikanira,” ixõ ato yoini. Akka chanĩma, askakõini Claudio xanĩfo ikano. <sup>29</sup> Nãskakē a Nios Ifofaafe Antioquía anoxõ shinãnifo a Nios Ifofaa fetsafo Judea anoafõ ato kori manamaxikakĩ, afe tii ato fomakanimãkai. <sup>30</sup> Nãskakaxõ Bernabé yafi Saulo inãnifo ato foxotanõfo. Nãno a Jesús Ifofamisfo Judea ano xanĩfofo ikafo inifo. Nãfo ato kori inãnifo ato paxkaketsaxonõfo.

## 12

### *Santiago retekãta Pedro karaxa mēra ikimanifo*

<sup>1</sup> Nãskaino Herodes xanĩfãfe a Jesús Ifofamisfo atiri ato achixõ karaxa mēra ato ikimani ato omiskõimayanã. <sup>2</sup> Nãskata Herodes ato yoini Santiago retenõfo kenopa. Nã Santiago Juan fe nanea ini. <sup>3</sup> Mã Herodes Santiago ato retemanano õikani judeofo akiki inimanifo. Askafaifãfe õikĩ Herodes ãfe inafõ yoini Pedrori achinõfo. Nãato askafanifo fistaña pãa faraxaxoma piyanã. <sup>4</sup> Mã Pedro achiafono Herodes Pedro karaxa mēra ikimani. Nãnoxõ dieciseis sorarofãfe kexenifo. Herodes shinãni: “Mã fista senēano chipo ã Pedro kãimanõ yorafãfe õinõfo,” ixõ shinãni. <sup>5</sup> Nãskakē Pedro karaxa mēra ini, sorarofãfe kexekõiafono. Askafafiafono a Jesús Ifofamisfãfe Epa Nios kĩfixonifo Niospa kexesharakõinõ.

### *Niospa Pedro kãimani karaxa mēranoa*

<sup>6</sup> Nã fakish fistichi Herodes shinãni: “Ë penama Pedro kãimanikai yorafãfe õinõfo,” ixõ, akka karaxa mēranoax Pedro oxani soraro rafe fe cadenãna takai rafe metexkere ikax. Nãskaino atiri sorarofãfe karaxa fepoti anoxõ kexeshinifo. <sup>7</sup> Nãskaino nõko Ifãfe ãfe ãjiri akiki nokorisatani. Karaxa mēra fakishfiãx penasharakõi ãtani. Nãskaxõ ãjirinĩ Pedro mõini ramãyanã iskafakĩ yoini: “Fininãkafãfe kataxiki,” faino koshikõi Pedro mifi inoax cadenãs mepekemetani. <sup>8</sup> Nãskafata ãjirinĩ yoini iskafakĩ: “Mĩ rapati yafi mĩ sapato safefe,” faito nikakĩ Pedro koshi ãfe rapati yafi ãfe sapato safeni. Nãskaxõ ãjirinĩ anã yoini: “Mĩ tariri safefe efe kaxiki,” fani.

<sup>9</sup> Nãskafaino Pedro ãjiri acho kani. Acho kakĩ shinãpaini: “¿Chanĩmamē mã ea ãjirinĩ kãimanamē? Akka ã namakē õiafai keskara ã õi,” ixõ shinãpaini. <sup>10</sup> Nãskax ãjiri fe kakĩ a soraro kexei taea finõfaini. A fetsari kexea finõfaini. Nãskax nã fepoti firo ano nokoxõ õia, mã fepoti ãakõi fepekemea ini. Nãskax ãjiri fe mã tsekeano fãi kaax ãjiri a makinoax yamarisatani.

<sup>11</sup> Nãskafaito õikĩ Pedro tãpini. Nãskaxõ shinãni iskafakĩ: “Chanĩma, mē õi ãfe Ifãfe ãfe ãjiri nĩchia. Herodes feta judeofãfe ea retepaiyaifono ea kãimana,” ixõ shinãni.

<sup>12</sup> Mã tãpiãx Pedro María pexe ano kani, Juan ãfe afa ano. Nã Juan ãfe ane fetsa Marcos ipaoni. Nã María pexe anoxõ yora ichapafãfe ichanãkaxõ Epa Nios kĩfiaifono Pedro kani. <sup>13</sup> Mã kaxõ pexe fepoti anoxõ ato kenaino, nã xomayato María yonoxomis ãfe ane Rode, nãato kaxõ õini tsoamãki. <sup>14</sup> Mã Pedro ãfe meka tãpikãta, inimakõiyanã pexe fepoti fẽpexotama ato yoikai ichoni. “Mã Pedro oa. Na pexe fepoti ano nia,” ato fani. <sup>15</sup> Ato askafaito tsõa chanĩmara fanima. Iskafanifo: “Mĩ chanĩ, Pedrokai oama,” faifono, “Maa, mē Pedro ãfe meka nikakõia,” ato fani. Ato askafaino iskafakĩ yoinifo: “Aamaki, ãfe ãjiriki,” fanifo.



<sup>16</sup> Askafaifono Pedro pexe fepoti anoxõ mēxotaima ato kenani. Mā fēkaxõ fepoti fepekaxõ Pedro fichikanax ratenifo. <sup>17</sup> Askaifāfe õikī Pedro āfe mēkemā mekayamakāfe ato fani. Nāskaxõ ato yoini afeskaxõ nõko Ifāfe karaxa mēranoa kāimanamākī. Nāskata anā ato yoini iskafakī: “Santiago yafi a Nios Ifofamisfo ato yoitakāfe,” ato fani. Ato askafakī yoita pexe fetsa ari kani.

<sup>18</sup> Akka mā penano anoa Pedro õikanima sorarofõ yoinānifo, tāpikanamax Pedro afeskamē ikanax. <sup>19</sup> Mā kāikaina nikaxõ, Herodes ato fenamani, “Akka mā fenafikāki fichiyamaifono mā kexesharamaki,” ixõ Herodes, “Nā sorarofõ retekāfe,” ato fani. Ato askafata Herodes Judea anoax kani Cesarea ari ikikai.

### *Herodes nani*

<sup>20</sup> Herodes atoki õitifishkini Tiro pexe rasi anoafõ yafi Sidón pexe rasi anoafoki. Atoki õitifishkikaino Tiro anoa feta Sidón anoafāfe shinānifo Herodes yõkaifoxikakī anā atoki õitifishkiyamanõ. Nāskakaxõ xanīfo Blasto yoinifo: “Noko Herodes yoixõfe nõ afe mekapaikai. Nokoki õitifishkiki kiki, nõ afe rafepaisharaikai anā nokoki õitifishkiyamanõ. Nokoki õitifishkiki afe yorafo yoitiroki a nõ piāi noko inānõfoma,” ixõ Tiro anoafõ feta Sidón anoafāfe Blasto yoiaifono. Nā yoiaifo keskafakī Blasto Herodes yoini. <sup>21</sup> Askafaito nikakī, “Pena fetsa ē ato fe mekanõ,” fani. Nāskata pena fetsa mā akiki feaifono, rapati sharakõi nā xanīfāfe safemis keskara safeax tsaoti sharakõi ano tsaoni, anoxõ ato yoixiki. <sup>22</sup> Ato yoikī askafaino fāsikõi yorafo mekainīfofānifo. Iskafakī yoinifo: “Na mekai yora mekaima, nios mekai,” fanifo. <sup>23</sup> Askafaifono nõko Ifāfe āfe ājirinī Herodes isinī imani, “Ē Niosma. Nios sharakõi,” ato faimano. Nāskax Herodes nani xenafāfe xaki mēraxõ piaino.

<sup>24</sup> Askano Niospa meka shara Jesúsnoa ato yoifofāsafanifo akairi Niospa meka shara nikakaxõ chanīmara fanõfo. <sup>25</sup> Nāskafaifono Bernabé feta Saulo mā yonokī mitokanax Jerusalén anoax fonifo, Antioquía ano. Juanri ato fe kani, āfe ane fetsa Marcos ini.

## 13

### *Bernabé feta Saulo Niospa meka ato yoikī taefanifo*

<sup>1</sup> Antioquía ano Jesús Ifofamisfo inifo, a Niosnoa ato yoipaonifori ano ato fe inifo. A Jesús Ifofaax afeskax isharatirofomākī ixõ ato tāpimamisfõri ano ato fe inifo. Bernabé ikaino, Simón āfe ane fetsa Nā Fisora fapaonifo ikaino, Lucio a Cirene anoa ikaino, Manaén xanīfo Herodes fe yosini ikaino, nā Saulori ato fe ini. <sup>2</sup> Akka pena fetsa foni teneyanā nõko Ifo kīfiaifono Epa Niospa Yõshi Sharapa ato yoini iskafakī: “Bernabé yafi Saulo ato paxkanāfakāfe ē ato katoaki eõxõ yononõfo,” ato fani.

<sup>3</sup> Nāskata foni teneyanā mā Epa Nios kīfikaxõ Bernabé yafi Saulo ato mīfi māmākaxõ Epa Nios ato kīfixoyanā, ato nīchinifo fetsafo ari fokaxõ Epa Niospa meka shara ato yoitanõfo.

### *Bernabé fe Saulo Chipre ano fonifo*

<sup>4</sup> Mā Niospa Yõshi Sharapa ato nīchia fokanax Bernabé fe Saulo Seleucia ano fonifo. Nānoax kanõanāfānē nanefainifo Chipre ano fokani. Nā ĩamāfā fakafā nakirafe mai toomāfā ano fokani. <sup>5</sup> Mā fokanax pexe rasi Salamina ano nokokaxõ judeofāfe āto ichanāti pexe mēraxõ Niospa meka sharaõnoa ato yoikī taefanifo. Juanri ato fe kani afara fetsa ato axoxii.

<sup>6</sup> Nā ĩamāfā nakirafe mai toomāfā anoa ato yoikāta, Pafos ano fonifo. Nānoa judeo yõfe fichinifo āfe ane Barjesús. Nā chanīkõi ipaoni ē Niosxõ yoirā iki. <sup>7</sup> Nā yõfe Barjesús xanīfo Sergio Paulo fe ipaoni. Nā xanīfāfe tāpisharakõia ini. Nāskaxõ Bernabé yafi Saulo kenamani, Niospa meka shara nikapaikõiki. <sup>8</sup> Akka nā yõfemā āfe ane fetsa griego mekapa Elimas fapaonifo. Nāato āfe xanīfo yoini: “Ato nikayamafe mia pārakani kiki,” fani, ea nikanõra ixõ. <sup>9</sup> Nāskakē Saulo āfe ane fetsa Pablo ini. Niospa Yõshi Shara a

mëra nanekõia. Nãato aas õini. <sup>10</sup> Nãskaxõ yoini iskafakĩ: “Chanĩchakapa nĩafaka fake, nã sharafo mĩ noikaspamis. Mĩ chanĩmis ato pãrapaiyanã nõko Ifãfe mēstekõi ato yoifimisno, akka anorima mĩ ato yoimis. ¿Afes kai mĩ xateimamē? <sup>11</sup> Akka iskaratĩa nõko Ifãfe mia omiskõimani. Mĩ anã fēro õima, xinĩ chaxafiaino mĩ anã fena õiyonakama,” fani.

Askafaino Elimas anã fēro õinima. Fakish mëra nia keskara ini. Askaxõ ato kenani mētsoxõ iyoifonõfo anã fēro õiyamaito. <sup>12</sup> Nãskaito õikĩ xanĩfãfe nõko Ifo chanĩmara fani. “Aira, Jesús afama mĩshti fatiro,” ixõ yoinifo.

### *Pablo fe Bernabé Antioquía ano inifo. Nã Antioquía Pisidia mai ano ini*

<sup>13</sup> Pablo afe rafeafo fe Pafos anoax kanõanãfãnē nanefainifo pexe rasi Perge ano fokani. Nã Perge Panfilia mai ano ini. Nãnoax Juan anã ato fe kanima. Nãno nēteax anã oni, Jerusalén ano. <sup>14</sup> Nã Perge anoxõ Antioquía finõfainifo, Antioquía anoxõ shinã Pisidia chaima ini. Nãriax pena tenetitĩa ichanãti pexe mëra ikifaikanax tsaonifo. <sup>15</sup> A Moisés Niospa meka yoikĩ kirikaki keneni yafi a Niospa ato shinãmanaino yoipaonifo keskara anekãta, a ichanãti pexe kexemisfo xanĩfofõfãfe Pablo yafi Bernabé ato yoini iskafakakĩ: “Nõko kaifo rafeta mã noko afara yoipaimãkai noko yoikãfe, noko inima-maxikakĩ,” ixõ ato yoinifo.

<sup>16</sup> Ato askafaifono Pablo niinãkafã atokiri mēshainãkafã mekayamakãfe ato fani. Nãskaxõ ato yoini iskafakĩ: “Ea nikakãfe ěfe kaifo israelifãfe yora fetsafo feta mã nofeta Epa Nios kĩfipaimãkai ě mato yoisharanõ. <sup>17</sup> Israelifãfe ãto Niospa taefakĩ nõko xinifo katonni afe yora inõfo. Nãskakē Egipto anoax kainifo yora fetsafo mëra iyokanax Ejipto mai anoax. Nãskakē chipo Epa Niospa ãfe kerex sharaõxõ Ejipto anoa ato iyonni. <sup>18</sup> Nãskakē Niospa meka tsõa nikasharayamafiaifono, Niospa ato kexepaoni cuarenta xinia tsõa istoma anoxõ. <sup>19</sup> Nãskata Niospa Canaán mai anoxõ siete faxõ mani fetsafo ato potani, nõko xinifo a mai ato inãxiki. <sup>20</sup> Nãskakē cuatrocientos cincuenta xinia ayonifo. Fena Canaán mai ano fonifoma. Mã cuatrocientos cincuenta xinia finõta xanĩfoya inõfo Niospa ato yoini.

“Nãskatari chipo nã Niospa meka ato yoimisri Samuel xanĩfo ini. <sup>21</sup> Nãskakē, ‘Xanĩfo finakõia nõ fichipai noko ĩkinõ,’ ixõ yoinifo. Nãskakē Niospa Saúl cuarenta xinia imani xanĩfokĩ. Akka nã Saúl ãfe apa Cis ini, Benjamín ãfe kaifo. <sup>22</sup> Nãskata Epa Niospa Saúl tsekani anã xanĩfo iyamanõ. Akka Epa Niospa David xanĩfo inõ imani. Nãskaxõ yoini iskafakĩ: ‘Isaĩ ãfe fãke David mã ea inimamakõi nã ě apaiyai keskafaki nãato akõini,’ ixõ yoini. <sup>23</sup> Nã David ãfe fena ini Jesús. Epa Niospa nai mēraxõ nãmã nĩchini israelifo ato ifipakexanõ nã yoiyoni keskafakĩ. <sup>24</sup> Askatari Jesús oyoamano israelifo Juan Jesúsnoa meka shara ato yoini iskafakĩ: ‘Mãto chaka xatexõ Nios Ifofakãfe maotisaxakakĩ fetsafãfe tãpinõfo mã mãto chaka mã xateano,’ ixõ ato yoini. <sup>25</sup> Askata mã Juan chaima nakĩ, ato yoini: ‘¿Mã shinãimē ě Cristokē? Maa, ěkai aama. Akka a Cristo samama oi a nõ manai nõko xanĩfo ikiyoi. Akai ea keskarama. Ato afama mĩshti tãpia. Atokai afaa chakafamisma,’ ixõ ato yoini.

<sup>26</sup> “Ěfe kaifo mĩshtichi, mãfi Abraham fenafokĩ, ea nikakapo a ěfe kaifomafo feta ě mato yoinõ. Mãfi Epa Nios chanĩmara fapaikai. Nã meka sharaõnoa nikakãfe Epa Niospa ãfe Fake nĩchiniki noko ifipakexanõ. <sup>27</sup> Nã Jerusalén ano ikafãfe ãto xanĩfofo feta tãpinifoma Jesús tsoamãki. A inõpokoai yoikĩ aõnoa kirika kenenifori tsõa tãpiyameama, pena tenetitĩa ichanãti pexe mēraxõ anefikakĩ. Nãskakaxõ reteyameafo nã aõnoa yoikĩ kenenifo keskakõifakĩ. <sup>28</sup> Afaa chakafaito õiyamafikakĩ retepaikakĩ. ‘Ato retemafe,’ yorafãfe Pilato fanifo. <sup>29</sup> Nãskakē nã aõnoa yoikĩ kirika kenenifo keskakõifakĩ, mã askafayameafo retekaxõ ifi cruz ikakinoa fotomapakefõfãkaxõ mafa kini mëra maifanifo. <sup>30</sup> Akka mã mafa kini mëra maifafiafono Epa Niospa otofayamea. <sup>31</sup> Mã oxa ranãta a Galilea anoax Jerusalén ano afe foitafãfe atoki nokoaito õiyameafo. Nãfãfe judeofo Jesúsnoa ato yoikani.

<sup>32-33</sup> “Nāskakē na meka shara aōnoa nō mato yoi, Epa Niospa nōko xinifo yoini keskafakī. Mā noko askafaxokōia nō āto fenafokē. Nāskakē Epa Niospa mā retelitafono Jesús otoayamea. A kirika Salmo ano kenea iskai:

Mī ēfe Fake. Iskaratīa ē mia nima,  
ixō kenenifo. <sup>34</sup> Niospa afetīama yoiyoni iskafakī:  
Mī nafiano ē mia otofaxii mī yora pisiyamanō,  
ixō yoinino, nānorikōi aōnoa kirika kenenifo:

Chanīma, nā ē David yoini keskafakī ē mia sharafai,  
ixō Niospa yoini. <sup>35</sup> Nāskakē ana aōnoa yoikī yōra kenei iskafakī:

Epa Niosi, mī Fake mī kexesharai āfe yora pisinōma,  
ixō kenei. <sup>36</sup> Chanīma, David nayoxoma ato īkiyopaoni, Niospa yoiaino. Nāskax chipo nani āfe xinifo nāpa keskai, nā āfe xinifo mai anori David maifanifo. Anoax āfe yora pisini. <sup>37</sup> Akka Jesús mā nafiakē Epa Niospa otoani. Ato āfe yora pisinima. <sup>38-39</sup> Efe yora mīshtichi, mā nō mato yoimis māri tāpisharakāfe, māto chaka mā soapaimā kai Jesúsxō mā atiro. Mā chanīmara faito aōxō Epa Niospa mato chaka soaxotiro. Akka a Moisés noko yoinioxō kai nōko chaka nō soatiroma. <sup>40</sup> Kexemesharakāfe a inōpokoai yoikī Niospa meka yoimisfāfe kenenifo keskai mā askatiroki. Iskafakī yoinifo:

<sup>41</sup> Akka ē yoiaito mā ea nikakaspai, ekeki kaxemetsamayanā. Nāskakē ē afarafo akaito ōiax rateyanā mā nai iskarafō nō ōimisma ikax. Nāskakē mā chanīmara famisma, fetsafāfe mato yoifiaifono,  
ixō kenenifo,” ixō Pablo ato yoini.

<sup>42</sup> Mā Pablo afe rafeafo fe judeofāfe āto ichanāti pexe mēranoax tsekefainaifono, nā judeofofāfema ato iskafanifo: “Mā noko yoia keskafakī pena teneti fetsatīa noko anā yoifaixakāfe,” ixō ato yoinifo. <sup>43</sup> Mā ichanāti pexe anoax ichanāi xateafono, judeofo feta yora fetsafāfe a Epa Nios Ifofafo keskafakī akairi Epa Nios Ifofapaikani ato fe fonifo, Pablo fe Bernabé foaifono. ato fe foaifono ato iskafanifo: “Nofe yora mīshtichi, Niospa mato yoiaino anori tāpisharakāfe. Niospa mato afara sharafaxōfai keskara shinākāfe inimayanā,” ato fanifo.

<sup>44</sup> Nāskata afianā pena fetsa pena tenetitīa, peche rasi anoax yora ichapakōifo ichanānifo nōko Ifāfe āfe meka shara nikakani. <sup>45</sup> Nāskaifono judeofāfe ato ōinifo yōrafā rasichi Pablo yafi Bernabé ato nikaifono. Nāskakē ōitifishkikōinifo. Nāskaifono judeofo Pabloki ōitifishkiyanā mekafakī chakafayanā īchanifo. <sup>46</sup> Ato askafaifono Pablo feta Bernabé mesetama ato kemanifo ato iskafakakī: “Nō mato Niospa meka sharaōnoa yoikī tae-fafiaino, mā nikakaspamis. Nikakaspaxkai mā Epa Nios fe īpanakama. Nāskakē nā judeofoma nō ato yoikai. <sup>47</sup> Nāskakē nōko Ifāfe noko nīchini iskafakī yoianā:

Ē mato nīchi oa luzpa keyokōi chaxa keskara faxō, eōnoa mā ato yoifotanō, efe īpaxanōfo. Maifo tii anoa na chai ikafo ari kaxō mā ato yoitanō,”  
ixō noko nīchini.

<sup>48</sup> Ato askafaifono nikakani, a judeofoma inimakōinifo. Nāskaxō yoinifo iskafakakī: “Nōko Ifāfe āfe meka sharakōi,” fanifo. Nāfāfe chanīmara fakōinifo a Niospa ato katoafo afe ipanakafora ikaxō. <sup>49</sup> Nāskakē nā mai anoafō, nōko Ifāfe āfe meka sharaōnoa ato yoifofāsafanifo. <sup>50</sup> Ato askafaifono judeofo nā kērofo isharakōimisfo fe mekanifo, a peche rasi anoa xanīfofo feri inifo. Nāskakaxō ato yoinifo Pablo yafi Bernabé ato chakafakī ato omiskōimata a mai anoxō ato potanōfo. <sup>51</sup> Ato askafaifono Pablo feta Bernabé āto sapato tsekakaxō taatakanifo yorafāfe ato tāpinōfo. Nāskanax Pablo fe Bernabé Iconio ari fonifo. <sup>52</sup> Akka nā Nios Ifofafo inimakōinifo, Epa Niospa Yōshi Shara ato fe ikano, mā Pablo fe Bernabé foaifono.

## 14

*Pablo fe Bernabé Iconio ano inifo*

<sup>1</sup> Mā fokanax Pablo fe Bernabé Iconio ano nokonifo. Nānoax judeofāfe ichanāti pexe mēra ikifainifo. Nānoxō Niospa meka sharaōnoa ato yoiaifono ato nikakōisharayanā ato chanīmara fanifo, judeofāfe yora fetsafo feta. <sup>2</sup> Askaifono judeofāfe ato nikakaspakakī, a judeofoma ato yoinifo iskafakakī: “Ato nikayamakāfe āa chanīkani kiki,” ato fanifo Pablo yafi Bernabé nikanōfoma. <sup>3</sup> Ato askafafiaifono Pablo fe Bernabé nāno ato fe iyopaonifo. Nānoxō nōko Ifoōxō mesetamakōi ato yoipaonifo. “Nōko Ifāfe noko chaka soaxotiro Nios fe nō ĩpaxanō,” ixō ato yoinifo. Nāskaxō afama mīshtifo fakakī ato ispanifo. Askafaifono Niospa ato noikī ato ōimani aōxō ato yoinōfo. <sup>4</sup> Akka yorafāfe pexe rasi Iconio anoxō anoris shinānifoma. Ranārīto judeofo chanīmara faifono, ranārītori Pablo yafi Bernabé chanīmara fanifo.

<sup>5</sup> Nāskaifono judeofo yora fetsafo fe xanīfofo fe yoinānifo, Pablo yafi Bernabé ato tokirinī tsakakī omiskōimaxikakī. <sup>6-7</sup> Ato askafapaiyaifono Pablo feta Bernabé mā tāpikanax Iconio anoax Listra ano fonifo, nānoax Derbe ano fonifo. Nā pexe rasi Listra fe Derbe Licaonia mai ano ini. Nāskakē nānoafo Niospa meka sharaōnoa ato yoifofāsafanifo.

### *Listra anoxō tokirinī Pablo tsakaketsanifo*

<sup>8</sup> Listra ano feronāfake finimisma ika ini, kafāsamisma chatomāiax. Nāskarapa kāini tsoa ini. <sup>9</sup> Pablo yoiaito nikai. Nāskaito Pablo aas ōikī shināni na feronāfake Jesús sharafatiroraka chanīmara faito ixō shināni. <sup>10</sup> Nāskaxō fāsikōi yoini iskafakī: “Fininākafe,” faino, koshikōi fininākafeānax kafāsani. <sup>11</sup> Pablo askafaito ōikani, yorafo Licaonia meka mekanifo iskakani: “Aicho, na nios rafe nokoki fotoaki yora keskarakanax,” ikanax yoinānifo.

<sup>12</sup> Nāskakaxō Bernabé na nōko nios Zeus fakaxō, Pablori ato yoiaito, “Na nōko nioskōi Hermes,” fanifo. <sup>13</sup> Zeus kīfiti pexeya ini pexe rasi chaima, pexe efapa ini. Nā mēraxō na nōko niosra ikaxō Nioskōima kīfipaonifo. Nā pexe mēra yonomisto Pablo yafi Bernabé shināmaxō fakkafoya charofo fexonifo. Nāfāfe yorafo feta mā niosra ixō ato fakka retexopainifo ato ināxikakī.

<sup>14</sup> Akka ato askafaifono Bernabé feta Pablo mā tāpikaxō, āto rapati faxtenifo, ato niosra faifono āto ōiti mēraxō shinākōikaki. Nāskakaxō ato mēra ikifaikata fāsikōi ato yoinifo <sup>15</sup> iskafakakī: “¿Afeskafakī mā noko na rafe niosra mā noko faimē? Nōkai niosma. Nōri mato keskara, nō mato meka shara yoioi oa na afarafo nōko niosra mā famis a chakafo mā potanō a chakafokai afama. Nāskaxō nā Nioskōi nīpanaka Ifokōi fakāfe, nai yafi mai fakafāri onifaniki. Nai mēranoafo onifata, nono mai anoafo onifata fakafāri mēranoafo onifani. <sup>16</sup> Nā iyopaonifāfe afara chakafakī xateafomano Epa Niospa ato xatemanima āa anōfo. <sup>17</sup> Nāskafiaifono Niosxō afarafo sharafakakī ato ōimanifo, tāpinōfo Nios tsoamāki. Akka nāato mato oi imaxona, mātō fanafori mato fofaimasharaxona, a mā piari mato ināsharataifa, mā inimasharakōinō,” Pablo feta Bernabé ato fani.

<sup>18</sup> Ato askafakī yoifikakī ato xatematiroma inifo, ato fakka retexopaiyaifono nōko niosra ixō ato ināpaikakī.

<sup>19</sup> Ato askafaifono judeofo Antioquía anoax fekāta Iconio anoax fenifo. Ato pārai fekanī, “Pablo feta Bernabé mato pārakani,” ixō ato yoinifo. Ato askafaifono Pablo tokirinī tsakaketsanifo. Mā nō reteara ikaxō xarafokaxō pexe rasi pasotai potanifo. <sup>20</sup> Askafaifono a Jesús Ifofaafo a mānāo niakekaxō ōiaifono Pablo fininākafe. Askata finikaini pexe rasi mēra anā kani. Nāskata nānoax pena fetsa Bernabé fe Derbe ano kani.

<sup>21</sup> Derbe anoxō Niospa meka sharaōnoa ato yoiaifono yōrafā rasichi ato nikakaxō Nios Ifofasharakōinifo. Mā ato yoikanax Listra ano fenifo, nānoax Iconio ano fenifo, nānoax Antioquía ano nokonifo. <sup>22</sup> Nāriafo a Nios Ifofaafo ato yoifofāsafakakī ato inimamakōinifo, “Isharakōikāfe Nios nikakōisharayanā. Epa Nios xanīfo fe ipaxakakī, nai mēra oyoamano nono mai anoax mā omiskōi finakōitiro,” ixō ato yoinifo. <sup>23</sup> Nāskatari Pablo feta Bernabé a Nios Ifofaafo anoafo a ato kexeaifo xanīfofo katonifo, Nios chanīmara fakōinafono. Mā

foni teneyanã Epa Nios kîfikaxõ iskafakakî: “Epa Niospa, ato kexesharafe mia chanîmara fakani kiki,” ixõ yoinifo.

*Pablo fe Bernabé anã Antioquía ano fenifo nã Antioquía Siria mai ano ini*

<sup>24</sup> Mã anoax fokakî Pisidia finõfãikanax Panflia ano nokonifo. <sup>25</sup> Nãskakata Perge anoxõ Niospa meka sharaõnoa ato yoikata, Atalia ano fonifo. <sup>26</sup> Nãnoax kanõanãfãnẽ fonifo Antioquía ano anã fokani. Nã Antioquía anoxõ ato nîchinifo. “Niosnoax fokaxõ ato yoisharatakãfe,” ixõ ato nîchiyameafono ato yoitakani anã fenifo. <sup>27</sup> Mã Antioquía ano nokoafono a Jesús Ifofamisfo ato fe ichanãfono anoxõ ato yoinifo a Niospa ato feta afama mîshti aka keskara. Iskafakî ato yoinifo: “Nõko Ifãfe a judeofoma ato chanîmara famaino mã Ifofaafõ,” ixõ ato yoinifo. <sup>28</sup> Nãskakanax Pablo fe Bernabé nã Nios Ifofaafõ fe nãno ato fe iyopaonifo.

## 15

*Jerusalén anoax a Jesús Ifofaafõ ichanãnifo*

<sup>1</sup> Nãskaifono feronãfakefo Judea anoax Antioquía ano fonifo. Mã nokokaxõ a Jesús Ifofamisfo ato yoinifo iskafakakî: “Moisés noko yoini iskafakî: ‘Foshki repa xateyamax nõ Nios ano katiroma,’ ixõ noko yoini. Nãskakẽ nã Moisés noko yoini keskai nõ askamis,” ixõ ato yoinifo. <sup>2</sup> Ato askafaifãfe nikakî Pablo feta Bernabé, “Maa, askarakaima. Fanîrira mã yoi,” ato fakanax ato fe feratenãnifo. Ato askafaifono Pablo yafi Bernabé a Jesús Ifofamisfo fetsafori ato katokaxõ Jerusalén ari ato nîchinifo a Jesúsxõ ãfe meka ato yoimisfoya a Nios Ifofaafõ ato kexemisfo ato yökatanõfo chanîmamakî.

<sup>3</sup> Nã Nios Ifofaafãfe Antioquía anoxõ ato nîchiafo fokakî, Finicia yafi Samãria finõfãikakî ato yoifainifo: “A judeofofãfema Nios Ifofakakî mã ãto chaka xateafora,” ixõ ato yoiaifono nikakani a Nios Ifofaafõ inimakõinifo.

<sup>4</sup> Mã Pablo fe Bernabé Jerusalén ano nokoafono, a Jesús Ifofaafõ feta a Jesúsxõ ãfe meka yoimisfo feta a ato kexemisfofãferi ato ifinifo, ato iskafayanã: “Aicho, mã nokoki osharakî,” ixõ ato yoianã. Ato askafaifono anoxõ ato yoinifo a Niosxõ afama mîshtifofamisfo. <sup>5</sup> Ato askafaifono nikaxõ fariseofãfe Jesús Ifofakaxõ ato iskafanifo: “Judeo yamafikaxõ Nios Ifofakaxõ ãto foshki repa xatetirofo Moisés yoini keskafakî,” ixõ ato yoinifo.

<sup>6</sup> Nãskaifono a Jesúsxõ ãfe meka ato yoimisfo fe ato kexemisfo fe ichanãnifo tâpixikakî a yoiaifo keskara. <sup>7</sup> Mã ichapa yoinãfono Pedro fininãkafã ato yoini iskafakî: “Efe yora mîshtichi, mã mã ea tâpia afetîama Niospa ea katonî, mato mẽranao ãfe meka shara a judeofoma ãfe ato yoinõ, akairi chanîmara fakanax afe îpaxanõfo. <sup>8</sup> Niospa a shinãifo keskara tâpikõia. Nãato ato tâpimani afe yora inõfo. Nãskaxõ ãfe Yõshi Shara ato mẽra nanei, a nõmẽra naneni keskafakî. Nãskakẽ keyokõichi tâpitirofo Niospa ato ifiaito. <sup>9</sup> Niospa atoya yora fetsa keskara noko õima, nã yora fisti keskara noko õi. Nã noko ani keskafakî ãto chakari mã ato soaxona chanîmara faifono. <sup>10</sup> Akka mãto xinifãfe a Moisés yoini keskara nikakõipaonifoma. Nãskarifiakî mãri mã nikakõimisma. Akka a Moisés yoini keskara nikakõiyamafikatsaxakî, ¿afeskakî a judeofoma Jesús Ifofafafono a Moisés yoini keskara nikakõikãfe mã ato famismẽ? Nãskakẽ afãferi nikakõitirofoma. Akka Jesús fistichi noko nimafitirono, ¿afeskakî mã chanîmara faimamẽ? <sup>11</sup> Akka Moisés yoini keskarato noko nimatirora ixõ mã shinãmis. Akka nõko Ifo Jesús nõ chanîmara faito, noko noikõixõ noko ifitiro afe nõ îpaxanõ. Nãskarifiakî a judeofoma ato ifitiro chanîmara faifono,” ixõ Pedro ato yoini.

<sup>12</sup> Nãskakẽ anã tsoa tooxinima, ato nikakani. Akka Pablo feta Bernabé ato yoinifo a Niospa atoõxõ afama mîshtifo faa, judeofoma mẽraxõ. <sup>13</sup> Mã yoikî xateafono, Santiagori ato yoini iskafakî: “Efe yora mîshtichi, eari nikakapo ãfe mato yoinõ. <sup>14</sup> Simón Pedro noko yoiyamea Epa Niospa a judeofoma ato noikî mã ato katoa ãfe yorafo inõfo ixõ

noko yoiyamea. <sup>15</sup> Nānorikōi a inōpokoai yoikakī a Niosnoa yoimisfāfe kenenifo. Iskafakī yoinifo na kirika keneano:

<sup>16</sup> Nāskata ē anā oxii a David āfe kaifāfe ea anā shinātama chaka shināifono, ato chaka soaxoxiki. Ato ōiti fepeaxosharayanā isharakōinōfo ea anā Ifofakanax. <sup>17</sup> Ea ōikakī fetsafāferi ea fenanōfo nā maitio ikafo feta nā ē ato katoafāfe ixō Epa Niospa yoini.

<sup>18</sup> Nōko Ifāfe afetīama afama mīshti tāpiyoni, ixō aōnoa yoikī kenenifo.

<sup>19</sup> “Nāskakē ē shinākī iskafai, nōko kaifāfema Nios Ifofapaiyaifono nō ato afara fetsa kerexkai amatiroma. <sup>20</sup> Askatamaroko nō ato kirika kenexō fomanō iskafaki yoikī:

Na nōko niosra ikaxō afara onifakaxō nami ināfo piyamakāfe. Askatari māto āfima chotayamakāfe. Kēromāri āto fenemafo chotamayamanōfo. Askatari yoinā yafi afara inafakaxō tetoxakafo āfe imi foyamaito piyamakāfe, āfe imiri ayayamakāfe, ixō nō ato kirika kenexō fomanō judeofoma. <sup>21</sup> Nā taeyoi ato yoipaonifo keskafakī, iskaratīari pexefo anoxō a Moisés ato yoipaoni keskafakī ato yoikani. Mēxotaima ichanāti pexe mēraxō pena tenetitīa nā kirika anemisfo.”

### *A judeofoma ato kirika kenexō fomanifo*

<sup>22</sup> Nāskakata a Jesúsxō ato yoimisfāfe a ato kexemisfāferi a Nios Ifofaafāferi shinānifo a Nios Ifofaa fetsafo katoxikakī, Antioquía ano ato nīchixikakī Pablo fe Bernabé foaifono. Judas yafi Silas ifinifo, nā Judaspa āfe ane fetsa Barsabás ipaoni. Na feronāfake rafe isharakōiafo a Nios Ifofaafāfe ato fapaonifo. <sup>23</sup> Nāskakaxō mā foaifono ato kirika kenei inānifo ato foxotanōfo, iskafakī ato yoikaxō:

Nōfi Jesúsxō āfe meka yoikatsaxakī, ato kexemisfo feta a Jesús Ifofaafo nō mato kirika kenexō fomai, mā tāpinō. Efe yora mīshtichi, mā nōko kaifoyamafekē nō mato meka shara fomai, Antioquía anoa fomata Siria anoa fomata Cilicia anoa fomata nō mato fai. <sup>24</sup> Mā nō tāpia yora fetsafo nonoax foitafo nō ato nīchiyamafiano, mā foitaxakakī mato yoikakī āto mekapa mato fekaxtefakani, fanīrira mato yoikakī nō ato anori yoiyamafekē fanīrira mato yoiiaifono mā ato tāpipai. <sup>25</sup> Nāskakē ichanāxō nō shinā feronāfake fetsafo katoxiki noko anoax fokaxō mato ōitanōfo. A nō ato noiai Bernabé yafi Pablo nō katoa. <sup>26</sup> Nā Bernabé feta Pablo nōko Ifo Jesucristoōnoa ato yoipafiaifono ato retepaimisfo ato nikakaspakakī. <sup>27</sup> Nāskakē Judas yafi Silas nō nīchia mā fokaxō mato yoisharakōinōfo nā nō mato kenexona keskafakī. <sup>28</sup> Nā Niospa Yōshi Sharapa shināi keskafakī nānorikōi nō shināi. Afaa fetsa nō mato yoipaima. Akka nā sharafinakōia nō mato yoipai mā nikanō: <sup>29</sup> Na nōko niosra ikaxō afara onifakaxō yoinā retexō ināfo piyamakāfe. Askatari āfe imi ayayamakāfe. Yoinā ina fakaxō tetoxakafo āfe imi foyamaito piyamakāfe. Askatari māto āfima chotayamakāfe, kērofāferi āto fenema chotamayamanōfo. Akka nā nō mato yoiiai anori mā nikasharakōiax, mā isharakōikai. Nā tii nō mato yoi na kirikaki kenexō, ixō ato yoinifo.

<sup>30</sup> Nāskakaxō Jerusalén anoxō ato nīchiafono Antioquía ano fonifo. Mā fokaxō a Nios Ifofaafo ato ichanāfakaxō kirika kenea ato inānifo. <sup>31</sup> A Nios Ifofaafāfe kirika anexō ōikani, inimaifinakōinifo, “Aicho, noko kirika kenexō manamakakī noko inima-masharakōikani,” ikanax. <sup>32</sup> Judas yafi Silas Niospa ato shināmanaino Niospa meka tāpikaxō Niosnoa meka shara ato yoikakī ato inimakōiyanā ato nikamasharakōinifo āto mekapa a Nios Ifofaafo. <sup>33</sup> Nā Antioquía ano ato fe iyopaonifo. Nāno ato fe ikafono nā Nios Ifofaafāfe ato nīchinifo iskafakī ato yoiyanā: “Tanaima fosharatakāfe,” ato faifono, tanaimakōi fosharakōinifo a anoxō ato nīchiameafo ano. <sup>34</sup> Akka Silas anā Jerusalén ano kanima nāno ato fe nēteni. Judas fisti kani. <sup>35</sup> Akka Pablo fe Bernabéri fonifoma, Antioquía ano nētenifo anoxō fetsafo feta nōko Ifoōnoa meka shara yoixikakī.

### *Pablo afianā kani Jesúsnoa meka shara pexefo tii ari ato yoikai*

<sup>36</sup> Mā askakāta Pablo Bernabé yoini iskafakī: “A Nios Ifofaafo nō anā ato ōikanō fokāfe pexe rasi anoafō a nōko Ifoōnoa meka shara nō ato yoikī taefaniano afeskax ikafomāki.”  
<sup>37</sup> Bernabé Juan iyopaini ato fe kanō, nā Juan āfe ane fetsa Marcos ipaoni. <sup>38</sup> Akka Pablo iyokaspani. Nā Marcosmāi Panfilia anoax ato makinoax nēteyameano, ato feta yonokaspakī. <sup>39</sup> Askai feratenākanax anoax paxkanāfainifo. Bernabé Marcos Chipre ano iyoikai kanōanāfānē nanekaini. <sup>40</sup> Akka Pablo Silas ifini afe kaxiki, afeta Niospa meka shara ato yoi axiki. Askaito ōikakī a Jesús Ifofamisfāfe ato Nios kīfixonifo fosharakōitanōfo Niospa ato kexesharanō. <sup>41</sup> Mā fokakī Siria yafi Cilicia anoafō Jesúsnoa meka shara ato yoifofāsafanifo, a Nios Ifofaaafē Jesúsnoa tāpisharakōinōfo inimasharaxikakī.

## 16

### *Timoteo ato fe kani Pablo feta Silaspa Niospa meka sharaōnoa ato yoikai foaifono*

<sup>1</sup> Pablo fe Silas pexe rasi Derbe ano nokonifo, nānoax Listra ano fonifo. Nānoa Nios Ifofaa fetsa āfe ane Timoteo fichinifo. Āfe afa Judea kēro ini, Nios Ifofa, akka āfe apa griego ini. <sup>2</sup> Nā Nios Ifofaaafē Listra anoxō Iconio anoafāferi, “Na Timoteo feronāfake sharakōira,” fanifo. <sup>3</sup> Pablo Timoteo iyopaini afe kanō. Akka iyoyoxoma āfe foshki repa xatemani, judeofāfe mekafayamanōfo, māmāi tāpikaxō Timoteo āfe apamāi griegokē. <sup>4</sup> Askata mā fokakī a pexe rasi anoafō a Jesús Ifofamisfo ato yoifainifo, nā Jesúsxō āfe meka yoimisfo feta, a Jesús Ifofamisfo ato kexemisfāfe Jerusalén anoxō ato yoitafo anori. <sup>5</sup> Ato yoiaifāfe nikakani a Jesús Ifofamisfāfe Jesús chanīmara fakī finasharakōinifo. Askatari a Jesús Ifofaifo ichapakōi kainifo pena tii.

### *Pablo namakē ōia keskara fani feronāfake Macedonia anoa*

<sup>6</sup> Akka Niospa Yōshi Sharapa, Asia mai ari ato nīchikaspani, arixō Jesúsnoa meka shara ato yoipafiaifono. Nāskakē Frigia yafi Galacia finōfainifo. <sup>7</sup> Fokanax Misia mai xatea ano nokonifo. Nānoxō Bitinia ano fopaikakī shinānifo, ari fopaiyaifono Jesús āfe Yōshi Sharapa ato nīchikaspani. <sup>8</sup> Nāskakē Misia finōfaini fokanax Troas ano nokonifo. <sup>9</sup> Nānoxō Pablo fakishi namakē ōia fani, feronāfake Macedonia anoato nīxō yoikī iskafaito: “Nono Macedonia ano ofe noko tāpimaxiki,” ixō yoiaito ōini. <sup>10</sup> Nāskara ōixō Pablo ato yoini iskafakī: “Itipinīkāfe nō Macedonia ano kanō, Niospa ari noko nīchipai kiki arixō Jesúsnoa meka shara nō ato yoinō,” noko fani.

### *Pablo fe Silas Filipos ano inifo*

<sup>11</sup> Nā Troas anoax nō kanōanāfānē nanekaini ĩamāfā nakirafe mai toomāfā ano kai āfe ane Samotracia ano. Nānoax kaax pena fetsa Neápolis ano nō nokoni. <sup>12</sup> Nānoax nō anā kani Filipos ano. Nā Filipos ano romanō xanīfokōifo ipaonifo nānoa āto pexe rasi sharafinakōia ini, nā Macedonia mai ano. Nāno nō oxa ranāyoni. <sup>13</sup> Nānoax pena tenetitīa pexe rasi anoax nō tsekekainikax faka ketokonō nō kani, nō shinā anoxō judeofāfe Nios kīfikanira ixō. Nāno tsaioxō Niosnoa meka shara kērofo nō yoini ano ichanāfono. <sup>14</sup> Nānoa fetsa āfe ane Lidia ini pexe rasi Tiatira anoa. Nā kēromā sama fexta nana sharakōi ato minimis ini. Askatari Nios shinākōimis. Nāskaxō Pablo Jesúsnoa yoiaito nikakōisharaito ōikī nōko Ifāfe āfe ōiti fepeaxosharakōini. <sup>15</sup> Nāskaito ōikī afe yorafoya maotisafanifo faka mēra ikimakī. Nāskaxō noko yoini iskafakī: “Mā ea iskafaikai, mī nōko Ifo ifofaki mā ea faikai, ēfe pexe ano oxai fekāfe,” noko fani. Noko askafaino nō nēteyoni.

<sup>16</sup> Nāskata pena fetsa a Nios kīfimisfo ano nō kaino nāno nokoki xomaya nokoni niafaka chaka a mēra naneano. Nāto ato ōnāxomis ini. Āto inakōima ini, āa ato onāxomis. Aōxō kori ichapa fimisfo ini. <sup>17</sup> Nā xomayato noko chīfafaini Pablo fe nō kaino fāsikōi mekayanā noko yoifoni iskafakī: “Na feronāfakefofi Nios nā keyokōi finōato āfe inakōifoki. Afeskax nō Nios fe ipaxatiromāki noko yoi feafo,” ixō yoini.

<sup>18</sup> Pena tii noko askafafōfāsa fani. Noko askafaito Pablo mā fekaxtēxō anā teneyamakī, ĩfiakekafā nā niafaka yōshi chaka xomaya mēra nanekē iskafani: “Jesucristoōxō ē mia

yoikai na xomaya makinoax tsekekaitāfe,” fani. Askafaino a makinoax niafaka chaka tsekekaini.

<sup>19</sup> Pablo askafaito õikakĩ, akka a xomayato āfe ifofāfe shināchakakõinifo anā afaakema, anākaikoro aõxõ kori fikani. Nāskakaxõ akiki õitifishkikakĩ Pablo yafi Silas achikaxõ xanĩfo finakõia ano iyonifo. <sup>20</sup> Nāskakaxõ xanĩfofo ano ato iyokaxõ iskafakĩ ato yoinifo: “Na judeo rafeta nõko pexe rasi anoa ato chakafakĩ mekafakani. <sup>21</sup> Nõ mato yoisharaira ikaxõ nā imisfo keskapaikĩ anori ato yoipaikani. Akka nõa nõ chanĩpaima, askara yoikĩ nõ feyafaima nõmāi romanõfoxõ,” ixõ ato xanĩfofo yoinifo.

<sup>22</sup> Ato askafaiifāfe nikakani yorafā rasi atoki õitifishkinifo Pablo yafi Silaski. Nāskakaxõ āto xanĩfofofāfe ato yoinifo ato rapati fiakaxõ ato chati koshanõfo. <sup>23</sup> Ato koshakĩ finakaxõ karaxa mēra ato ikimanifo. Nāskakaxõ a karaxa kexea yoinifo ato kexesharakõinõ tsekeyamanõfo. <sup>24</sup> Yoikĩ askafaiifāfe nikakĩ, a karaxa kexemisto oke mēra chaikõi ato ikimaxõ tafara rafe oyatamaxõ ato tsāoni.

<sup>25</sup> Ato askafafono Pablo fe Silas yamenakekafanaino Epa Nios kĩfiyanā fanāinifo. Askaifono a ato fe karaxa mēra ikafāfe ato nikanifo. <sup>26</sup> Nāskaifono fāsikõi mai naya naya ikĩ, nā karaxa pexe simĩto posa posa akõini. Nāskafaino āfe fepotifo fepekemei fetseni. Nāskaino a karaxa mēra ikafo cadenās mepekemei fetsenifo. <sup>27</sup> Askaino a karaxa kexea moinākaifā õia mā karaxa āfe fepoti fepekemei fetsea õini. Askaito āfe espada tsekata āa retemepaini, mā tsekeafora ixõ shināi. <sup>28</sup> Askaito Pablo fāsikõi yoini iskafakĩ: “Mīa retemeyamafe. Nõ faki kaamakĩ,” faito nikakĩ.

<sup>29</sup> A karaxa kexeato āfe soraro fētsa, “Ea kirosĩ otaxõ fexõfe,” fani. Mā fexoano koshikõi ichoni choayanā ratei, nāskax Pablo fe Silas niafono ato nāmā ratokonõ mai chachipakefõfāni. <sup>30</sup> Nāskata fininākāfe mā ato kaimaxõ ato yõkani iskafakĩ: “¿Afeskaxõ ēfe chaka ē soatiromē Nios fe ipaxakĩ?” ixõ ato yõkani.

<sup>31</sup> Ato askafaito nikakakĩ kemanifo iskafakakĩ: “Nõko Ifo Jesucristo chanĩmara fafe Ifokõi faax mefe yorafo fe mĩ afe nĩpanakakĩ,” fanifo.

<sup>32</sup> Nāskakaxõ nõko Ifoõnoa meka shara yoinifo, a afe ikafori āfe pexe mēranoa ato yoinifo. <sup>33</sup> Ato askafafono nā fakish fistichi nā karaxa kexemisto a ato koshafo ano ato fāka chokani. Ato askafaino āfe āfiyafi āfe fakefoya ato maotisanifo, ato faka mēra ikimapakekakĩ Jesús chanĩmara faifono. <sup>34</sup> Nāskaxõ āfe pexe ari ato iyoxõ ato pimani. Nāskax āfe āfi fe āfe fakefo fe inimakõini Nios chanĩmara fakõikanax.

<sup>35</sup> Nāskata penama xanĩfofofāfe āto sorarofõ nĩchinifo a karaxa kexeafõ ato yoitanõfo Pablo yafi Silas ato kaimanõfo. <sup>36</sup> Nā karaxa kexeato Pablo yoini iskafakĩ: “Xanĩfofofāfe ea yoiafo ē mato kaimanõ. Mā mā tanaima kasharatiro,” faino, <sup>37</sup> Pablo a ato kexeafõ yoini iskafakĩ: “Nõri romanõfofiano noko koshaketsafo yorafāfe ferotaifi, noko yõkasharakaxoma. Nāskakaxõ noko karaxa mēra ikimanafo. Akka, ¿afeskakĩ one mā noko kaimapaimē? Āakõi noko kaimani fenõfo ato yoitakāfe,” Pablo ato fani.

<sup>38</sup> Ato askafaito nikakakĩ mā fokaxõ sorarofāfe ato xanĩfofo yoinifo. Ato yoiaifono nikakani ratenifo: “Nõri romānõfora,” ato faifāfe nikakanax. <sup>39</sup> Ato askafafono xanĩfofo mā fokaxõ ato iskafanifo, Pablo yafi Silas: “Nõ mato tāpiama māri romanõfo fekē nõ mato koshaketsaxõ karaxa mēra nõ mato ikimanaki. Na karaxa mēranoax kākāfe, nõko pexe rasi anoax fõtaxikakĩ,” ato fanifo. <sup>40</sup> Mā karaxa mēranoax kākākanax Pablo fe Silas Lidia pexe ano fonifo. Nānoxõ a Nios Ifofafo Jesúsnoa meka shara ato yoikakĩ ato inimamakõinifo. Nāato yoikĩ askafakanax ato makinoax fonifo.

## 17

### *Tesalónica anoax mekai fetsenifo*

<sup>1</sup> Pablo fe Silas mā fokakĩ, Anfípolis yafi Apolonia finõfāikanax, Tesalónica ano nokonifo. Nā Tesalónica ano judeofāfe ichanāti pexe ini. <sup>2</sup> Pablo nā imis keskai pena tenetitā ichanāti pexe mēra kapaoni. Tres simānā anoxõ ani, anoax ato fe feratenāyanā a kirika



ano Niospa meka kenenifoõnoa ato yoiyãna. <sup>3</sup> Anoxõ ato yoini: “A Cristo omiskõiax nani. Mã nafiakẽ anã Epa Niospa otoani. Nã Jesúsnoa ẽ mato yoikai nãfi Cristoki,” ixõ Pablo ato yoini.

<sup>4</sup> Ato askafaifãfe nikakakĩ atiri judeofãfe Jesús chanĩmara fanifo. Mã Jesús chanĩmara fakanax ato fe rafenifo. Askatari griegofãferi Nios chanĩmara fakaxõ Nios fãsi sharakõĩ fanifo, nã kẽrofo xanĩfofo feta. <sup>5</sup> Askafaifãfe õikani judeofo noko anã nikakanimaraka ikanax, Pablo yafi Silas mepaikani õitifishkinifo. Nãskakaxõ a yora xani chakafo ato fenaifokani fonifo, Pablo yafi Silas chakafakakĩ mekafanõfo, fetsafãfe pexefo tii anoxõ ato nikanõfo. Nãskakanax Jasón pexe ano fonifo Pablo yafi Silas fenaifokani, ato kãimaxikakĩ yorafãfe ato omiskõimanõfo. <sup>6</sup> Akka Pablo yafi Silas anoa ato fichikaxoma, Jasón yafi a Nios Ifofamis fetsafo ato achikaxõ ãto xanĩfofo ano ato iyonifo. Mã ato iyokaxõ fãsikõĩ ato iskafanifo: “Na feronãfakefãfe fanĩma mĩstixõ ato chakafafõfãsafamifõ. Akka mã noko ano feafo. <sup>7</sup> Na Jasón ãfe pexe mẽra ato ikimana. Nafãfe a romanõ xanĩfãfe yoimis anori anã nikakanima. Akka nãno nõko xanĩfo fetsa ãfe ane Jesús ikani,” ixõ ato yoinifo.

<sup>8</sup> Ato askafaifãfe nikakani xanĩfofo õitifishkikĩ metsamanifo, noko anã nikakanimara ikanax. <sup>9</sup> Akka Jasón feta fetsafãfe a xanĩfofo ato kori inãfono ato kãimanifo.

### *Pablo fe Silas Berea ano fonifo*

<sup>10</sup> Nãskakata fakishi Pablo fe Silas Berea ano fotanõfo koshikõĩ ato nĩchinifo. Mã Berea ano nokokanax judeofãfe ichanãti pexe mẽra ikifainifo. <sup>11</sup> Nã judeofãfe Pablo feta Silaspa ato yoiãfono ato nikakõipainifo, Tesalónica anoafõ keskara inifoma. Ato nikasharapaikõikakĩ Niospa meka shara nikakõinifo. Nãskakata pena tii kirika fepekaxõ õinifo a ato yoiãfo keskara chanĩmamãkĩ. <sup>12</sup> Nãskakẽ judeofãfe Jesúsnoa chanĩmara fakõinifo. Askatari griegofãferi chanĩmara fakõinifo. Kẽrofãferi nikakõinifo a feronãfakefãfe nikaifo keskafakĩ.

<sup>13</sup> Akka judeofãfe Tesalónica anoxõ nikanifo Pablo Niosnoa meka shara Berea anoafõ ato yoiãto. Nãskakanax Berea ari fonifo, mã ari fokaxõ ato yoinifo Pablo mekafakĩ chakafanõfo. <sup>14</sup> Ato askafaifõno, akka a Jesús Ifofamisfãfe Pablo koshikõĩ katanõ nĩchinifo fakafã kesemẽ ano. Akka Timoteo fe Silas fonifoma. Berea ano nẽtenifo. <sup>15</sup> Akka a Pablo fe fofaifo, afe fonifo pexe rasi Atenas ano. Nãnoax anã feaifõno Pablo ato yoini iskafakĩ: “Timoteo yafi Silas ea ato yoixotakãfe koshi ekeki fenõfo,” ixõ ato yoini.

### *Pablo Atenas ano ini*

<sup>16</sup> Pablo Timoteo yafi Silas Atenas anoxõ ato manayanã õia Atenas anoxõ afarafo ichapakõifo onifakaxõ, “Na nõko niosra,” faifãfe õi. ãfe õiti mẽraxõ shinãchakakõini. <sup>17</sup> Nãskakẽ Pablo nã judeofãfe ichanãti pexe mẽranoax judeofo fe a judeofoma fe a Nios sharara faifo fe yoinãni. Nãskatari a pexe emãiti niãx yoinãifo mẽxotaima Pablo Jesúsnoa ato yoini. <sup>18</sup> Ato yoiãno yora fetsafo akiki fenifo afe feratenãxikaki. Nãfãfe shinãnifo iskakakĩ: “Nã nõ apaiyai keskafakĩ nõ atiro noko inimamanõ,” ixõ shinãnifo. Nãfãfe ãto anefo epicureofo. Ranãri iskanifo: “Afara afeskara afiãno nõ tenetiro,” ixõ shinãnifo. Nãfãfe ãto anefo estóicofo. Nãfo epicureofo fe estóicofo Pablo fe feratenãnifo. Iskafakĩ yoinifo: “Na mekakĩ finamisto ¿afaa noko yoipaimẽ?” ixõ yoiãfono, fetsafãferi iskafanifo: “Nios fetsafoõnoa noko yoipai rakikã,” ixõ yoinifo. Nãskafakĩ fetsanifo. Pablo Jesúsnoa meka shara ato yoiãto, mã Jesús nafiax anã otoyamea ixõ ato yoiãto nikakaspakakĩ. <sup>19</sup> Nãskakaxõ Areópago ano Pablo iyonifo a anoax mẽxotaima ichanãkaxõ afarafo yoimisfo ano. Nãnoxõ yõkanifo iskafakakĩ: “Nõ tãpinõ na mĩ yoiã anori meka fenakõiki noko yoife. <sup>20</sup> Na mĩ noko yoiã anori nõ nikamismaki. Afaa ikamãkĩ noko yoife nõ tãpinõ,” fanifo. <sup>21</sup> Nã Atenas anoafõ feta yora fetsafãfe anoxõ õikakĩ nikapaikõinifo a nikaifo keskara ato yoixikakĩ.

<sup>22</sup> Nãskaxõ nã ichanãmisfo ãfe ane Areópago anoxõ Pablo ato nẽxpakã niinãkãfe ato yoini: “Atenas anoafãfe, ea nikakapo, mẽ mato õi mã Niosnoa nikapaikõiaito tãpapaikõiyãna. <sup>23</sup> Nã mã nios kĩfimis ano kafasakĩ mẽ õia. Nãnoa ẽ fichia na nõko niosra

ixõ mã afara onifanixakĩ mã akiki kenekĩ iskafakẽ: ‘Nõ na nios õimisma,’ ixõ mã aõnoa yoikĩ keneni. Nã nios õikatsaxakĩma mã kĩfimis, nãõnoa ẽ mato yoi.

<sup>24</sup> “Nã Niospa keyokõi onifani, afama mĩshtifo nai mẽranoafoya mai anoafõ onifani ato Ifo ixikĩ. Nã Nios yorafãfe pexe faafõ mẽra ikama. <sup>25</sup> Askatari ea afaa axokãfe ikima. Akka nãato keyokõi noko nima. Nõ xakainõ noko nefefaxoni, afara fetsafori ani.

<sup>26</sup> “Askata feronãfake fisti onifakĩ taefani, nãnoax nã maniafo tii kainõfo, nã mai tio ano ipaxakakĩ. Nãskaxõ ato yoini, afe tii xinia akanimãkai fanĩra ikaxõ. <sup>27</sup> Nãskakẽ Niospa yorafo onifani keyokõichi fenanõfo tãpipaikakĩ. Akka fenakĩ fichitirofo. Chanĩma, Nios chai ikama, noko chai faama. <sup>28</sup> Akka Niosnoax nõ nia. Akka Niosyamakẽkai nõ nikeranama. Akka nã mato tãpimamisfãfe kenenifo iskafakakĩ: ‘Nõ Niospa fenakõifo,’ ixõ yoinifo. <sup>29</sup> Akka nõ Niospa fenafofiãxõ, nõ shinãtiroma Nios na yorafãfe afarafo onifaafo keskara inõ, ãa shinãxõ yorafãfe onifaafo keskara. <sup>30</sup> Askafiaifonokai Niospa ato afeska fanima. Akka iskaratĩa keyokõi ato yoi ãto chaka xatekaxõ chanĩmara fanõfo. <sup>31</sup> Nãskakẽ Niospa tãpiyoni afetĩa ato ichanãfaimãkai, a ato omiskõimanaitĩa, fatofo sharafofomãkĩ askayamai fatofori chakafomãkĩ. Nã feronãfake katonioxõ ato askafaxii. Akka mã nafiakẽ ãpa otofaito keyokõichi õinifo,” ato faito,

<sup>32</sup> a Jesús naax otoita nikakani, akiki kaxemetsamanifo. Ranãrito yoikĩ iskafanifo: “Mã nõ nikakĩ a mã noko yoiaito, anã pena fetsa noko yoifaixãfe,” fanifo.

<sup>33</sup> Askafaifono a ichanãfo anoax Pablo kani. <sup>34</sup> Akka Pablo mã kaino atiri afe fonifo Jesús chanĩmara fakanax. Dionisiori nãno ato fe ini, nã Dionisio Areópago anoxõ ato fe ichanãxõ ato yoimis ini. Kẽrori nãno ato fe ini, ãfe ane Dãmaris, kẽro fetsafori ano ato fe inifo.

## 18

### *Pablo Corinto ano ini*

<sup>1</sup> Nãskata Pablo Atenas anoax kaax Corinto ano nokoni. <sup>2</sup> Nãnoa feronãfake ãfe ane Aquilaki nokoni. Nã feronãfake Ponto pexe rasi anoa ini. Rama Italia anoax ãfe ãfi Priscila fe nokoita ini, nã Italia anoa ãto xanĩfãfe ãfe ane Claudio ato potaitano. Ato iskafayanã na judeofo Roma anoax fõtanõfo ixõ. Nãskakẽ Pablo ato õikai kani. <sup>3</sup> Nã Pablo nã akaifo keskafakĩ akairi pexe fakãki tãpia ini, karapa pexe fakĩ. Nãskakẽ nãno ato fe nẽteni, ato feta yonoxiki. <sup>4</sup> Nãskakẽ nãnoax mẽxotaima pena tenetitĩa ichanãti pexe mẽra kapaoni. Anoxõ judeofoya a judeofoma ato Jesúsnoa meka shara nikamapai chanĩmara fanõfo.

<sup>5</sup> Akka Silas fe Timoteo mã Macedonia anoax akiki nokoafono Pablo Jesúsnoa meka shara judeofo ato yoifofãsafani: “Jesúsfi Cristoki Niospa katonĩ ãfe Fakekõi inõ,” ixõ ato yoini. <sup>6</sup> Ato askafaito nikakakĩ judeofãfe Pablo iskafanifo: “Jesúskaĩ Cristoma. Mĩa mã chani,” fakaxõ Pablo ãchaketsanifo. Askafaifãfe nikakĩ Pablo ãfe rapatiõnoa atoki mapo taa taani mã anoax kakĩ ori fetsa ari ato iskafafãini: “Ë Niospa meka mato yoipaifiaito mã ea nikakaspai. Mãto shinãmã mã iki. Nãskax naax mã Nios fe nĩpanakama. Ë mato yoisharapaifiaito mã ea nikakaspai. Nãskakẽ na judeofoma ari ẽ kai ariafo ato yoixiki,” ixõ Pablo ato yoini.

<sup>7</sup> Nãato askafata ãto ichanãti pexe anoax kãikaini feronãfake ãfe ane Ticio Justo pexe ano kani. Nãato Epa Nios shinãkõikĩ kĩfipaoni. Nã ato ichanãti pexe chaima ika ini. <sup>8</sup> Feronãfake Crispa ichanãti pexe anoa ãto xanĩfo ini. Nãato ãfe ãfi feta ãfe fakefofaxõ nõko Ifo nikakõiyãna chanĩmara fani. Askatari nã Corinto anoafãferi chanĩmara fakõinifo, Pablo Jesúsnoa meka shara ato yoiaito. Nãskakẽ chanĩmara faifono ato maotisafakĩ faka mẽra ato ikimapakenifo. <sup>9</sup> Nãskano fakish fetsa Pablo namakẽ õia fani, nõko Ifãfe yoiaito iskafakĩ: “Ratekima mẽxotaima ẽfe meka sharaõnoa ato yoi xateyamafe. <sup>10</sup> Ë mefe ikaki mia tsõa afeska faima kiki. Na pexe rasi ano efe yorafo ichapa ikafokĩ,” ixõ yoini.

<sup>11</sup> Nāskakē Pablo Corinto ano nēteni. Anoxō xinia fisti finōmata oxe seis ani. Nānoxō mēxotaima Niospa meka ato yoipaoni.

<sup>12</sup> Akka Acaya mai anoax Galión xanīfo finakōia ini. Nānoax judeofo ichanānifo Pablo achixikāki. Mā achikaxō āto xanīfo finakōia ano iyonifo. <sup>13</sup> Iskafakī āto xanīfo yoinifo: “Na feronāfāke ato pārafōfāsafai, yoipai mā Nios kīfiki iskafatiro ixō. A Moisés yoini anori ato yoima, fakirira ato yoi,” ixō yoinifo.

<sup>14</sup> Pablo mā ato kemapaiyaito nā xanīfo Galión judeofo yoini iskafakī: “Na feronāfāke afara chakafakē, askayamakī ato retekē mā ea yoiaito ē mato nikakerana. <sup>15</sup> Akka nā mātō xinifāfe yoipaonifo keskaraōnoa mā yoita, a mātō kaifāfe āfe aneōnoa yoita, a Moisés yoini keskaraōnoa mā yoi. Akka nā mā apaiyai keskafakāfe, ē aōnoa afaa tāpipaimakai. <sup>16</sup> Nāskakē nonoax fotakāfe,” Galión xanīfāfe ato fani. <sup>17</sup> Ato askafa fokaxō Sóstenes achinifo nā ichanāti pexe anoa xanīfo. Mā achikaxō nāri seteketsanifo xanīfāfe ferotaifi. Akka nā xanīfo Galión aō rafanā inima.

*Pablo anā Antioquía ano kani Niosnoa meka shara ato yoikai. Taeyoi kai rafenixakī anā kai fistini*

<sup>18</sup> Pablo Corinto ano oxaranāyoni. Nānoax a Nios Ifofaafo makinoax kani Priscila fe Aquila afe fonifo. Nāskakata kanōnāfānē nanefainifo Siria mai ano fokani. Mā fokanax akka Cencrea anoax kanōanāfā mēra nanexoma Pablo ato testemayoni. Akka Pablo Nios yoiyoni: “Ē mīōxō afara axii, mī ea ōiaino,” ixō yoini. Akka mā axō ato testemani tāpinōfo. Ē Nios afara afeskarafaxōara ikax. <sup>19</sup> Nāskata mā fokanax Efeso ano nokonifo. Nāno Pablo ato nīchifaini Aquila yafi Priscila, ichanāti pexe mēra kakī nānoax judeofo ichanāfono ato fe yoināxiki. <sup>20</sup> Nānoxō nētefapainifo. “Kayamafe nono nofe iyofe,” fanifo. Askafaifono akka Pablo nētekaspani. <sup>21</sup> “Maa, ē nētetiroma, mē kai,” ato fani iskafakī ato yoivanā: “Epa Niospa ea nīchiaino anā oxō ē mato ōiyoxii.”

Nāato askafata Pablo kanōanāfānē naneinākafani Efeso anoax mā kai. <sup>22</sup> Mā Cesarea ano nokoax, Jerusalén ano kani a Nios Ifofaafo ato yoisharaikai. Mā ato yoita anā kani Antioquía ano. <sup>23</sup> Nāno ato fe ikatsaxakī, nānoax anā kani Niospa meka sharaōnoa ato yoifofāsafaikai. Galacia anoxō ato yoikī taefata, Frigia anoxori ato yoini. A Nios Ifofaafo ato inimamakōini, Niosnoa meka shara ato yoikī.

*Apolos Efeso anoafō Niosōnoa meka shara ato yoini*

<sup>24</sup> Nāskaifono Efeso ano judeo fisti nokoni āfe ane Apolos pexe rasi Alejandría ano ini. Nāato Niospa meka yoikī kirika kenenifo tāpikōia ini, xafakīakōi ato yoimis. <sup>25</sup> Nāato nōko Ifo Jesúsnoa tāpikōixō ato yoini, inimakōikai nā tāpia anori xafakīakōi Jesúsnoa ato yoini. Askafixō Jesúsnoa tāpisharaxō nā Juan ato maotisafakī faka mēra ato ikimani nā fisti tāpia ini. <sup>26</sup> Nāskata Apolos ichanāti pexe mēraxō ranotamakōi ato yoiaito nikakī. Aquila feta Priscila kenakaxō ori iyokaxō Niospa meka tāpimasharakōinifo nikasharakōinō.

<sup>27</sup> Nāskakē Apolos Acaya mai ano kapaiyaito nikakī a Nios Ifofaafāfe iskafanifo: “Nō a Jesús Ifofamisfo kirika kenexō fomanō mia ifisharakōinōfo,” ixō yoinifo. Apolos mā Acaya mai ano kaxō, ato yoisharakōini. Ato askafaito nikakani Niosnoax ini-masharakōinifo. <sup>28</sup> Nānoxō ōiaifo judeofo Apolos yoini: “Jesús Niospa Fakemara,” faifono. Akka nā kirika keneaōxō Apolos ato yoini iskafakī: “Nā nō manai Cristofi Niospa Fakeki,” ixō xafakīakōi ato yoiaito tsōa kemanima.

## 19

*Pablo Efeso ano oni*

<sup>1</sup> Apolos Corinto ano iyoano, māchi keya ari fai tāpiato kaax Efeso ano Pablo nokoni. Nānoa Nios Ifofamisfo fichitoshini. <sup>2</sup> “¿Mā Nios Ifofaxō Niospa Yōshi Shara mato mēra mā nanenimē?” ixō Pablo ato yōkaito, kemanifo iskafakakī: “Maa, nōkai aōnoa afaa nikayomisma, Niospa Yōshi Sharakai nō nikamisma,” fanifo.

<sup>3</sup> Askafaiŕāfe nikakī anā Pablo ato yōkani: “¿Afeskai mā maotisanimē?” ato faito, kemanifo iskafakakī: “Juan noko yoinino nō ini,” ixō yoinifo.

<sup>4</sup> Askafaiŕono anā Pablo ato yoini iskafakī: “Juan ato maotisafani afara chakafakat-saxakakī āto chaka xatepaiyaifono Nios Ifofapaikakī. Iskafakī ato yoiyanā a chipo oxiai nikakōisharaxikāfe ixō ato yoini, Jesúsnoa yoikī,” ato Pablo fani.

<sup>5</sup> Pablo ato yoikī askafaino, nikakani nōko Ifo Jesús āfe aneōnoax maotisanifo fetsafāfe tāpinōfo. <sup>6</sup> Askaiŕono ōikī Pablo ato māmāpakeaino Niospa Yōshi Shara ato mēra naneni. Nāskakanax meka fetsapa mekai fetsenifo. Niosnoa meka shara nikakaxō ato yoinifo. <sup>7</sup> A ato mēra Niospa Yōshi Shara nanea, doce feronāfake ini.

<sup>8</sup> Nāskaifono Pablo nāno ato fe ikax mēxotaima ichanāti pexe mēra kapaoni. Anoxō tres oxe ani. Niospa meka sharaōnoa ato yoiyanā ranotama, anoxō Nios xanīfoōnoa ato tāpimapaikōikī. <sup>9</sup> Ato askafafiaino atirifāfe nikakaspakakī yorafāfe ferotaifi mekafakī chakafanifo iskafakakī: “Nōkai Jesús chanīmara faima. Aōnoaxkai Epa Nios ari nō katiroma,” ixō yoiaino, Pablo ato makinoax kakī a Nios Ifofaafō ato iyonī, feronāfake āfe ane Tirano a anoxō ato tāpimamis ano. Nānoxō a chanīmisfo anoxō pena tii Pablo Jesúsnoa meka shara ato yoipaoni. <sup>10</sup> Anoxō Pablo Niospa meka sharaōnoa ato yoikī xinia rafe ani. Nā Asia mai ano ikafāfe nikasharakōinifo Niospa meka sharaōnoa. Judeofo feta a judeofofāfema nōko Ifo Jesúsnoa meka shara nikapaonifo. <sup>11</sup> Nāskakē Niospa Pabloōxō afama mīshtifo fakī ato ispani. <sup>12</sup> Nāskakē yorafāfe āto payōiro iyamata āto sama faxte pishta Pablo āfe yora ramākanifo. Nāskafata mā fokaxō a isinī ikaifoya a niafaka chaka naneafo ato ramānifo. Ato askafaiŕono a isinī ikaifo fe a niafaka chaka naneafo sharai fetsenifo.

<sup>13</sup> Nāskaifono atiri judeofāfe fofāsakakī niafaka chakafo yorafo makinoa pōtanifo pexefo tii fofāsakakī. Jesús āfe aneōxō niafaka chakafo yorafo makinoa ato pōtapainifo. Iskafanifo: “Niafaka chakafāfe, Jesús aneōxō Pablo noko yoimiski, akka nō mato yoikai ato makinoax tsekefaitakāfe,” ato fanifo.

<sup>14</sup> Nāskafapaonifo nā judeo āfe fake sietipa, nā judeo āfe ane Esceva ini. Nā ato Nios kīfixomisfāfe āto xanīfo ini. <sup>15</sup> Ato askafaiŕono a niafaka yōshi chaka yora mēra naneato ato kemani iskafakī: “Ē Jesús ōimis, askatari Pablori ě tāpia. Akka, ¿mā tsoamē?” ato fata, <sup>16</sup> nā niafaka yōshi chakayato ato rapati faxteyanā, fāsikōi ato achixō ato seteketsayanā ato imi tofeni. Nāato askafakī fetsaino pexe mēranoax yorioma ichonifo. <sup>17</sup> Nāato askafaano Efeso anoxō judeofāfe yora fetsafo feta nikakani ratenifo. Nāskakaxō, “Nōko Ifo Jesús fāsi sharakōi,” fanifo.

<sup>18</sup> Nāskakaxō a Jesús chanīmara famisfāfe fēkaxō a afara chakafapaoni xakakī yorafāfe ferotaifi yoinifo. <sup>19</sup> Askatari a yōfe tāpiafāfe āto kirika fēkaxō yorafāfe ferotaifi koanifo, mā Jesús Ifofakaxō. Nā kirika kene ōiafo kopikōi ini, como cincuenta mil ini. <sup>20</sup> Nāskakē nōko Ifāfe āfe mekashara nikaketsanifo Jesús Ifofamisfāfe ato yoiāifāfe, āfe kerex sharaōxō afama mīshtifo fakakī.

<sup>21</sup> Nāskafata Pablo shināni Macedonia yafi Acaya ano kaxiki. “Nānoax Jerusalén ano ě kaikai, Jerusalén anoax Roma ano ě kaikai,” ixō shināni. <sup>22</sup> Nāskaxō a afeta yonomisfo rafe Macedonia ano ato nīchini Timoteo yafi Erasto. Akka Pablo Asia ano nēteyoni.

### *Efeso anoax yorafo mekai fetsenifo*

<sup>23</sup> Nāskaifono nā Efeso anoāfo mekai fetsenifo: “Jesúsfi Niospa Fakekī aōnoax nō Nios ari katiro,” Pablo ato faino, <sup>24</sup> nāno feronāfake āfe ane Demetrio ini. Nāato yonokī afarafo kori exe keskara oxokōi onifapaoni. Nā feronāfake afara onifakī tāpikōia ini. Nāskaxō kēro ōitsa onifani, na nōko niosra ixō āfe ane Artemisa. Ranāfaxō kēro ōitsa fakī kafāshara mīshtifo onifani. Nāskakē a afeta yonofaiŕāfe aōxō kori ichapa fipaonifo. <sup>25</sup> Nāskaxō Demetrio ato ichanāfani, a afeta yonomisfo ato iskafayanā: “Ēfe yora mīshtichi, mā mā tāpiakī nōko nios Artemisa yora keskara onifaxō, aōxō nō kori ichapa fimiski. <sup>26</sup> Akka mā mā ōimis nikayanā, na Pablo ato yoifofāsafamis iskafakī: ‘Na yorafāfe niosra ixō

onifaafu, akai niosma, ixō ato yoi. Mā yora ichapafāfe chanīmara fakōinafo ato yoiaito nikakakī. Na Efeso anoafos ato yoiaima, Asia mai anoafari ato yoimis. <sup>27</sup> Na Pablo yoiai keskara mesekōi, ē shināchakakōi. Anā noko tsōa kori ināyamaino nō fenotiro, na nōko nios Artemisa anā tsōa kīfitiroma, nā maitio ikafāfe Asia mai anoxō kīfimisfo. Askatari a nōko nios kīfiti pexefā mēranoax anā ichanātirofoma,” ixō Demetrio ato yoini.

<sup>28</sup> Demetrio ato askafaito nikakani Pabloki ōitifishkiyanā fāsikōi yoinifo iskafakakī: “¡Na Artemisa Efesio anoafu nā sharafinakōiafo, tsoa keskarama!” ikanax fāsikōi mekai fetsenifo.

<sup>29</sup> Nāskakanax peXe rasi anoax fekaxtei fetsenifo. Nāskakaxō Gayo yafi Aristarco achinifo. Nā rafe Macedonia anoa inifo, Pablo fe feitafo. Nāskakaxō a yora kaya ichanāfo ano ato iyonifo. <sup>30</sup> Ato askafaifono Pablo ato mēra ikipaini arixō yorafo yoixiki. Akka a Jesús Ifofaafāfe Pablo nīchikaspanifo, “Mia retetirofoki,” ikaxō. <sup>31</sup> Askatari a Pablo fe rafemisfāfe, xanīfofōfāfe Asia mai anoxō ato yoinifo, Pablo yoitanōfo ato mēra ikiyamanō. <sup>32</sup> Nāskakē āa ranā ichanākanax fāsikōi mekanifo. Atirifāfe fetsa anori yoinifo. Nāskaifono ranārito tāpinifoma afeskai ichanāfomākī. <sup>33</sup> Nāskaifono judeofāfe shinānifo, na yorafo chakai mekai taeafora noko fakanira ikaxō. Nāskakaxō Alejandro pītsikinifo ōiaifono ori nīxō ato yoitakāfe ikaxō. Nāskafaifono Alejandro niinākaFā mēshaxō ato yoini iskafakī: “Mekayamakāfe, ē mato yoisharanō,” ixō Alejandro ato yoini. <sup>34</sup> Akka mā tāpikaxō Alejandro judeokē, fāsikōi āa ranā mekai fetsenifo, iskakani: “Na Efeso anoafāfe āto Artemisa sharafinakōia,” ikaxō.

<sup>35</sup> Askaifāfe ōikī a xanīfo kenexomisto, “Mekayamakāfe,” ato fani. Ato askafaito anā tsoa mekanima. Nāskaxō ato yoini iskafakī: “Efesofu anoafāfe ea nikasharakāfe. Keyokōichi tāpiafo nōfi Efeso anoafokī, nā āto nios Artemisa āfe kīfiti pexefā nō kexemis. Nā onifafo nai mēranoax pakeafari nō kexemis. <sup>36</sup> Nāskakē āa chanīkanira tsoa itiroma. Nāskakē anā mekayamakāfe, afaa afeskafapaiyamakāfe shināsharaxoma. <sup>37</sup> Akka na feronāfakefo mā ato efea afaa chakafayamafiafono, askatari na pexefā mēranoa tsōa afaa oneyamafiano, askatari na nōko nios Artemisa tsōa chakafakī mekafayamafiano mā ato efea. <sup>38</sup> Akka na Demetrio afeta yonomisfo feta, a ato chakafapai xanīfofo ano ato iyotiro, anoxō ato yōkanō afaa chakafafomākī. <sup>39</sup> Nāskaxō afara fetsa mā yoipaikī nā ichanāfo anoxō mā yoitiro. <sup>40</sup> Mā iskaratīa ato chakafai keskafakī xanīfofōfāfe nikaxō nokori askafatirofo. Na yorafāfe afaa chakafayamafiamisfono, afeskakī mā yōachepeimē xanīfofōfāfe noko faifono nō ato kematiroma,” ixō a xanīfo kenexomisto ato yoini.

<sup>41</sup> Ato yoikī askafata ato nīchiaino fonifo.

## 20

### *Pablo Macedonia ano kata Grecia ariri kani*

<sup>1</sup> Mā mekakani nishpafono Pablo a Nios Ifofaafu kenani ato yoisharaxiki. Mā ato yoisharata, ato makinoax kani Macedonia ari kai. <sup>2</sup> Mā kaxō nāriafo Jesúsnoa meka shara ato yoifofāsafakī a Nios Ifofaafu ato inimamakōini. Nāskata Grecia ano nokoni. <sup>3</sup> Nānoxō tres oxe ani anoax kanōanāfānē Siria ano kapaikī, nikani judeofāfe kexeafono retepai kakī. Nāskakē fāi kakī, Macedonia anā finōfaini. <sup>4</sup> Mā kaino feronāfake ranāri afe fonifo. A feronāfake fetsa āfe ane Sópater Berea anoa ini. Āfe apa ane Pirro ini, Aristarcori ini, Segundori ini, nā Segundo Tesalónica anoa ini. Fetsari Gayo, Derbe anoa ini. Fetsari Timoteo ini. Askatari Tíquico fe Trófimo Asia mai anoa inifo. Nā tii Pablo fe fonifo. <sup>5</sup> Nā tii rekē fokaxō Troas anoxō noko mananifo. <sup>6</sup> Akka mā fista senēano chipo nō kani. Nā fistaFā pāa faraxaxoma pimisfo ini. Nāskata Filipos anoax kanōanāfānē nō kai cinco nia mā nō oxax Troas ano nō atoki nokoni. Nāno nō siete nia oxayoni ato fe.

### *Troas ano ōikai Pablo kani*

<sup>7</sup> Nāskata mā pena nomīkoaino nō ichanāni pāa kaxke mīshtixō pixiki a Jesús noko nāxoyamea shinākī. Anoxō Pablo a Nios Ifofaafu yoini, mā penama kaxiki yamenake

kafanaino ato yoikī xatēni. <sup>8</sup> Nānoax pexe kene keya fomākīa anoax nō ichanāni, a rāpari ichapa ōtai fetsea anoax. <sup>9</sup> Nāskaino naetapa āfe ane Eutico pexe kene fomākīa āfe naisti anori tsaoni. Pablo ato chaikōi yoianō nā naetapa oxakatsaini. Nāskax mā oxachāi kaax pexe kene fomākīakōinoax pakeax nakē chishtoinīfofānifo. <sup>10</sup> Nāskakē Pablo fotopakekafā chishtoinīfofā nā naetapa ikōni, ato iskafakī yoiyanā: “Rateyamakāfe, naamaki,” ato fani.

<sup>11</sup> Nāskafata anā pexe fomākīa Pablo māpeinīfofāxō ato pāa kaxkeketsaxoni ato feta pixiki. Nāskaxō ato yoikī pena fani. Mā penano Pablo kani. <sup>12</sup> Ato askafaino nā naetapa nafiax mā otokē afe yorafāfe xanēnē iyonifo. Askafakī Pablo ato inimamakōini.

### *Troas anoax Pablo Mileto ano kani*

<sup>13</sup> Akka nō kanōanāfānē rekē kani, Aso anoxō Pablo ifixiki. Akka noko iskafakī yoini: “Ē fāi kaikai rekē fokāfe,” ixō noko yoini. <sup>14</sup> Nā Aso anoax noko fichiax nofe feronāfāke kani. Nāskax Mitilene ano nō nokoni. <sup>15</sup> Nāskata nānoax nō tsekekainax pena fetsa Quío mai nō finōfaini kaax pena fetsa Samos fai fototai nō nokoni. Anā anoax kaax pena fetsa pexe rasi Mileto ano nō nokoni. <sup>16</sup> Akka Pablo Asia ano samarakapainima. Efeso anori kakaspani, Jerusalén ano koshi nokopai ato feta fista Pentecostés apai.

### *A Nios Ifofaafo ato kexemisfo Efeso anoafō meka shara Pablo ato yoini*

<sup>17</sup> Mileto anoxō Pablo ato kenamani, Efeso anoxō Nios Ifofaafo ato kexemisfo. <sup>18</sup> Mā feafono ato iskafani: “Mā mā ea ōimis ē isharakōiaito nā ē oitachāi. Na Asia mai anoxō ē afaa afeska fama ē isharakōia Jesúsnoa meka shara mato yoi. <sup>19</sup> Mēxotaima ē mato mēra itiani, nōko Ifo yonoxoni. Ē mato yoi ē oiatiani Nios mato Ifo sharafamapai. Askatari ea omiskōimanaifono ē omiskōimis judeofāfe ea askafaifono. <sup>20</sup> Akka ea askafafiaifono Jesúsnoa meka shara ē mato yoikī xateima. A meka sharakapafo ē mato yoimis. Ranotamakōi ē mato yoimis, ichanāti pexe anoxō yoita a mātō pexekōifo anoxori ē mato yoimis. <sup>21</sup> Judeofo yoita a judeofomari mē yoimis āto chaka xatekaxō Nios Ifofanōfo nōko Ifo Jesucristori chanīmara fakōinōfo.

<sup>22</sup> “Akka iskaratīa Jerusalén ano ē kai, Niospa Yōshi Sharapa ea nīchiaino. Ē tāpiama arixō ea manafo ea afeskarafakani. <sup>23</sup> Akka mē tāpia Niospa Yōshi Sharapa ea yoiaito, pexe rasi anoxō ea karaxa mēra ikimakaxō ea omiskōimakani. <sup>24</sup> Akka ea askafafiaifono ē shināchakaima. Nā Epa Niospa ea amapaiyai keskara fisti ē shināi. Epa Niospa keyokōi yorafo noikōi na meka shara ato yoitāfe ea fani. Nā ea yoini keskara ē apai.

<sup>25</sup> “Ē mato mēraxō Nios xanīfoōnoa ē mato yoimis. Akka mē tāpikōia anā mā ea ōinakama. <sup>26</sup> Nāskakē ē mato yoipai. Na fetsafāfe ea nikakaspamisfo ē ato yoipaifiaito tsōa ea nikamisma. Nāskax omiskōixikani. Nāskakē ē ato afeskafatiroma, mē ato yoimis. <sup>27</sup> Mē mato yoimis a Niospa fichipaiyai keskafakī ē mato yoikaspamisma. <sup>28</sup> Nāskakē kexemesharakāfe, a Nios Ifofaafori ato kexesharakāfe. Niospa Yōshi Sharapa mato īkināki, a Nios Ifofaafo mā ato kexesharanō. Jesús nokoōnoax nai āfe imi foniki. <sup>29</sup> Mē mato makinoax kaano, chipo a fanīrira yoimisfo chakafo fekani mato fanīrira yoipaikani. Oa poomānā chaxo fichixō pitiro keskafakī mato pārapaikani mā anā Jesús shinānōma. <sup>30</sup> Afianofi mā fetsa mā ranā mā pāranōnāxii nō Niospa meka tāpiara ixō mā ato pāraxii, a Nios Ifofaafe mato nikanōfo. <sup>31</sup> Kexemesharakōikāfe, akka shinākapo. Tres xinia ē ani Niospa meka sharaōnoa mato yoikī. Penata yoita, fakishi yoikī ē mato famis, Niospa meka sharaōnoa ē mato yoi ē oiamis.

<sup>32</sup> “Akka efe yora mīshtichi, iskaratīa ē Epa Nios kīfi mato kexesharanō, a mato noiai keskafakī āfe meka shara mato mēra nanenō. Nāato āfe kerex sharaōxō āfe meka shara mato inātiro mato mēra nanesharanō askatari a yoiyoni keskafakī afe yorakōifo ato afara ināsharakōitiro afe īpaxanōfo. <sup>33</sup> Ēakōi ē afaa fipaimisma, askatari ē mato kori yōkamisma, rapatiri ē tsoa yōkamisma. <sup>34</sup> Askatamaroko ēfe mifkōichi ē yonofaito mā mā ōimis, a ē fichipaiyai fixiki, a efe ikafori ato ināxiki. <sup>35</sup> Mē mato ōimamiski afeskaxō

mã yonotiromãki, a omiskõiaifo ato axosharayanã. Nõko Ifo Jesús ãfe meka sharaõnoa shinãyanã fetsafãfe noko afara inãino nõ inimatiro keskai, ‘Nõri fetsafo afara inãsharai nõ inimaifinakõitiro,’ ixõ nõko Ifãfe noko yoini,” Pablo ato fani Efeso anoafõ.

<sup>36</sup> Mã ato yoikĩ askafata ratokonõ mai chachipakefofã Pablo ato Epa Nios kĩfixoni.

<sup>37</sup> Anoax keyokõi oiayanã Pablo ikõketsayanã kokoketsanifo. <sup>38</sup> Shinãmitsakõinifo: “Ë anã mato õinakamara,” ato faino, askakãta afe fakafã kesemẽ fonifo Pablo kaito õifokani. Nãskax Pablo kanõanãfãne nanekaini mã kai.

## 21

### *Pablo Jerusalén ano kani*

<sup>1</sup> Anoa a Nios Ifofaafõ nõ ato õifaini, kanõanãfãne nõ nanekaini kaax Cos ano nõ nokoni. Anoax kaax pena fetsa Rodas ano nõ nokoni, anã anoax kaax Pátara ano nõ nokoni. <sup>2</sup> Nã Pátara anoxõ kanõanãfã nõ fichini Fenicia ano kaino, nã nõ nanekaini. <sup>3</sup> Kakĩ fakafã nakirafe Chipre mai toomãfã nõ õifaini. Nã Chipre mai nõko põya mishkiori ini. Nã finõfaini kaax Siria ano nõ nokoni. Nãnoxõ pexe rasi Tiro fai fototai nokoxõ kanõanãfã mẽranoa afama mĩstifõ mãpemanifo. <sup>4</sup> Nãnoa a Nios Ifofaafõ nõ ato fichini, nãno nõ ato fe siete nia oxani. Nãfãfe Pablo yoinifo Niospa Yõshi Sharapa ato shinãmanaino iskafakakĩ: “Jerusalén ano kayamafe. Anoxõ mia retepaikani kiki,” ixõ yoinifo. <sup>5</sup> Askafaifono mã siete nia finõta nõ anoax kaino, keyokõi ãto ãfifõ fe ãto fakefo fe nofe fonifo pexe rasi pasotai. Nãnoxõ nã mãshifã anoxõ ratokonõ mai chachipakefofã nõ Epa Nios kĩfini. <sup>6</sup> Nãskata mã nõ kakĩ nõ ato yoisharaketsata, kanõanãfã mẽra nõ naneinãkafani, akka atii anã fenifo ãto pexe ano.

<sup>7</sup> Nãskata kanõanãfãne nõ kai Tiro ano nõ nokoni, nãnoax kaax Tolemaida ano nõ nokoni. Nãnoax a Nios Ifofaafõ fe nõ ato fe yoinãsharakõini, askatari nãno nõ ato fe oxa fishtiyoni. <sup>8</sup> Nãskata nãnoax kaax pena fetsa Cesarea ano nõ nokoni. Nãnoax Felipe pexe ano nõ kani. Nã Felipe Niospa meka shara yoimis ini. A Jesús Ifofaafãfe afetĩama Felipe ifinifo Jerusalén anoxõ a piãifo ato paxkaxonõ. Seis feronãfake fetsafoya Felipe ifinifo ato feta yononõ. Nãato pexe ano nõ nẽteni. <sup>9</sup> Felipe fake xotofake cuatro inifo fenemais. Nãfãfe Niospa Yõshi Sharapa ato shinãmanaino ato yoipaonifo. <sup>10</sup> Nãno nõ oxa ranãni, nãno Judea anoax feronãfake ãfe ane Agabo nokoki nokoni. Nãato Niosnoa yoimis ini, a inõpokoai yoikĩ. <sup>11</sup> Mã noko ano nokoxõ, Pablo ãfe nanexemeti fiata, aõ metexkere ita aõ otxekere ini. Nãskaxõ ato yoini iskafakĩ: “Niospa Yõshi Sharapa ea yoi Jerusalén anoxõ judeofãfe na nanexemeti ifo iskafaxikani. Nãskaxõ yora fetsafo inãxikani,” ixõ Agabo ato yoini.

<sup>12</sup> Noko askafaito nikakĩ Cesarea anoafõ feta, “Jerusalén ano kayamafe,” nõ Pablo fani. <sup>13</sup> Askafaifono Pablo noko kemani iskafakĩ: “¿Afeskakĩ mã oiayanã mã ea shinãmitsamanimẽ? Mẽ itipinĩshara ea nexayamakakĩ ea retekani Jerusalén anoxõ, nõko Ifo Jesúsxõ ea askafakani,” Pablo noko faito, <sup>14</sup> nõ anã afaa fanima noko nikayamaito. Nãskaxõ nõ yoini iskafakĩ: “Nõko Ifãfe nã mia apaiyai keskafanõ,” ixõ nõ yoini.

<sup>15</sup> Mã askata nõ itipinĩ fani, nãskax nõ Jerusalén ano kani. <sup>16</sup> Nõ kaino a Nios Ifofaafõ ranãri nofe fonifo Cesarea anoax. Nãfãfe noko iyonifo feronãfake ãfe ane Mnasón pexe ano, nã Mnasón Chipre ano ini. Nãato afetĩama Nios Ifofakĩ taefani. Nãskaxõ ãfe pexe anoxõ noko ifini ano nõ oxanõ.

### *Pablo Santiago õikai kani*

<sup>17</sup> Mã nõ Jerusalén ano nokoano a nofeta Jesús Ifofamisfãfe noko ifinifo nokoki inimakõiyã. <sup>18</sup> Askata pena fetsa Pablo nofe kani Santiago õikai. A Nios Ifofaafõ ato kexemisfori nãno inifo. <sup>19</sup> Mã atoki nokoxõ Pablo ato yoisharakõini. Nãskaxõ ato yoipakeni a Niospa aõxõ a judeofoma ato chanĩmara famakõikẽ.

<sup>20</sup> Ato yoiaito nikakakĩ, “Nios fãsi sharakõi,” fanifo. Nãskaxõ Pablo yoinifo iskafakakĩ: “Nofe yorashta, nõ mia yoisharapai, mã mã õimiski na judeofãfe ichapakõichi mã nõko Ifo

Jesús chanĩmara fafiakaxõ, nãfãfe a Moisés yoini keskara nikapaikõimisfo. <sup>21</sup> Nãfãfe yoiafo judeofo a yora fetsafo mēra ikafo mĩ ato yoikē iskafaki: ‘A Moisés yoini keskara nikayamakãfe,’ ixõ mĩ ato yoikē, ‘Askatari mãto fakefo foshki repa xateyamakãfe, askatari a mã imis keskai anã askayamakãfe,’ ixõ mĩ ato yoimiskē. <sup>22</sup> Akka, ¿nõ afeskaimē, yorafãfe nikakani mã mĩ nono oano? <sup>23</sup> Akka nã nõ mia yoiai keskafe. Na cuatro feronãfakefãfe Nios yoiafoki iskafakakĩ: ‘Epa Niosi, mĩ noko yoia keskai nõ askakõikai,’ ixõ yoiafoki. <sup>24</sup> Akka na cuatro feronãfake fe Nios yoiti pexefã mēra katãfe, nõ imis keskai ato fe ife mãto chaka soaxikakĩ. Mĩ ato kopifaxõfe mato testeaifono. Mĩ ato askafaito õikakĩ keyokõichi tãpitirofo a mĩõnoa yoiaifo ãa chanĩkani. Askatamaroko mĩri a Moisés yoini keskara mĩ nikakõimis. <sup>25</sup> Akka a judeofofãfema a Jesús Ifofaafãfe mã chanĩmara fakõinafo. Akka mã nõ ato kirika kenexona iskafakĩ: ‘Nõ nami pitiroma na nõko niosra ixõ afara onifakaxõ fetsafãfe inãfono. Askatari yoinãfo ãfe imiri nõ ayatiroma. Askatari yoinã ina fakaxõ tetoxakafo ãfe imi foyamaitori ãfe nami nõ pitiroma, askatari nõko ãfima nõ chotatiroma, kēromãri ãfe fenema chotamatiroma,’ ixõ nõ ato yoia,” Pablo fanifo.

### *Nios kĩfiti pexefã mēraxõ Pablo achinifo*

<sup>26</sup> Nãskafaifono nã cuatro feronãfake Pablo ato iyoni. Nãskata pena fetsa ato fe Nios kĩfiti pexefã mēra ikini, ãto chaka soaxikakĩ. Nãskata a Nios kĩfiti pexefã mēra ikikaini xanĩfo yoixiki a Epa Niospa yoini keskara afetĩa keyoimãkai, nã tiitori yoinã retexõ Epa Nios inãpaikakĩ.

<sup>27</sup> Mã siete nia ikano judeofo Asia mai anoax fokaxõ Nios kĩfiti pexefã anoa Pablo õikakĩ yorafo yoinifo Pablo chakafakĩ mekafanõfo. Ato askafaifono Pablo achinifo. <sup>28</sup> Mã Pablo achikaxõ fãsikõi ato yoinifo iskafakakĩ: “Israelifãfe, nofeta nãkifēkape, a na feronãfake kafãsakĩ yorafo ato pãrafofãsa famiski. Nõko maifo tii anoa ato chakafakĩ yoimiski. Askatari a Moisés noko yoini anori nikayamakãfe ato fai. Askatari nõko Nios kĩfiti pexefã chakafakĩ mekafai. Askatari nõko Nios kĩfiti pexefã sharafinakõifiano chakafaa, a mēra nõko kaifoma griego yorafo ikimana,” fanifo. <sup>29</sup> Akka taeyoi Pablo õinifo pexe rasi ano nã Trófimo fe kafãsaito. Nã Trófimo Efeso anoa ini. Na Pablo nõko Nios kĩfiti pexefã mēra Trófimo ikikinaki ixõ shinãnifo aa yamafiano.

<sup>30</sup> Nãskakē pexe rasi anoax mekai fetsenifo, nãskaifono yorafo nikaferakani ichonifo. Nãskakaxõ Pablo achikaxõ Nios kĩfiti pexefã mēranoa kãimanifo. Nãskata Nios kĩfiti pexefã koshikõi feponifo. <sup>31</sup> Nãskaxõ mã chaima reteaifono, romanõ anoa sorarofãfe ãto xanĩfãfe nikani pexe rasi Jerusalén anoafãfe yõachēpeaifãfe. <sup>32</sup> Nãskaifãfe nikakĩ a soraro xanĩfãfe a afe rafeafoya ãfe sorarofõ ichanãfani. Nãskax ato fe koshikõi ichoni yorafo mēra, a soraro xanĩfo ãfe sorarofõ fe kaito õikakĩ anã tsõa Pablo seteketsanima enerisafanifo.

<sup>33</sup> Nãskata a soraro xanĩfãfe mã Pablocki kaxõ mã achixõ, cadenãs rafeta ato metexkere amani. Nãskaxõ chipo yõkani tsoamãki, askatari afaa afeska faamãki. <sup>34</sup> Akka askafaino yorafo fanĩrira mekai fetsenifo anoris yoinifoma. Nãskai mekai fetseaifono soraro xanĩfãfe tãpitiroma ini. Nãskaxõ sorarofõ mēra ato iyomani. <sup>35</sup> Mã chaima sorarofõ mēra nokoikaino, anoxõ yorafãfe retepaiyaifono, sorarofãfe Pablo chishtokaxõ iyonifo yorafãfe afeska fanõfoma. <sup>36</sup> Nãskakē keyokõi acho fokani fãsikõi mekafonifo. “Aa chaka reterisafakãfe,” ato faafonifo.

### *Askafaifono yorafãfe ferotaiƒi Pablo ato yoini*

<sup>37</sup> A sorarofõ ika mēra mã ikimanaifono, a sorarofãfe ãto xanĩfo Pablo yõkani: “¿Ë mefe pishta mekatiro mē?” faito soraro xanĩfãfe kemani iskafakĩ: “¿Griego mekapa mĩ mekatiro mē? <sup>38</sup> Akka, ¿mĩmamē a Ejipto anoa afetĩama xanĩfo potapaiyanã cuatro mil yorafo tsõa istoma iyonifõ?” ixõ xanĩfãfe yõkani.

<sup>39</sup> Askafaito nikakĩ Pablo kemani iskafakĩ: “Maa, ěma. Ěfi judeoki. Ěfi Tarso anoax fakeakĩ nã pexe rasi Cilicia mēranoax. Akka na yorafo ě ato yoinõ ea yoife,” faito, <sup>40</sup> nã



soraro xanĩfãfe, “Mĩ ato yoitiro,” fani. Nãskafaino Pablo kipiti ano niinãkafã mēshainãkafã, “Mekayamakãfe,” oinoma ato fani. Mã ato nishpafaxõ hebreo mekapa iskafakĩ ato yoini:

## 22

<sup>1</sup> “Efe yora mĩshtichi, ea nikakãfe ã mato yoinõ ea chakafafo keskara, ea anã chakafayamanõfo,” ixõ ato yoini.

<sup>2</sup> Hebreo mekapa ato yoiaino nikakani, tsoa pishta tooxinima. Askaifono Pablo anã ato yoini, <sup>3</sup> “Èri judeo. Tarso anoax ã fakea, Cilicia mai anoax. Akka ã nono Jerusalén anoax yosia, ãfe maestro Gamalielxõ ã tãpia. Na Moisés nõko xinifo yoipaoni anori ã yoisim. Mēxotaima ã shinãkõimis ãfe õitifoaxõ ã Nios Ifofapaikĩ. Nã mã Nios Ifofapaiyai keskafakĩ ãri askafapaoni. <sup>4</sup> Taefakĩ a Jesús Ifofaifo ã ato omiskõimakĩ ã ato retepaipaoni. Nãskaxõ ã ato achixõ karaxa mēra ã ato ikimapaoni, feronãfakefoya kērofo. <sup>5</sup> A ato Nios kĩfixomisfãfe ãto xanĩfofo feta a xanĩfo fetsafãfe mato yoitirofo nã ã mato yoiaino keskara. Nãfãfe ea kirika kenexõ inãnifo, nofe yorafo judeofo Damasco anoafõ ã ato foxotanõ. Nãskax ã ari kani a Nios Ifofaifo ato fenaikai, ato achixõ Jerusalén ano ato efexiki anoxõ ato omiskõimaxiki,” ixõ Pablo ato yoini.

### *Pablo afeskaxõ Jesús Ifofamãki ato yoini (Hch. 9.1-19; 26.12-18)*

<sup>6</sup> Anã Pablo ato yoini iskafakĩ: “Akka fãi kaikĩ mē chaima Damasco faikaino, nãnoxõ xini keya oa luz keskarato nai mēraxõ ea chaxakõitani. <sup>7</sup> Ea askafaino ã nãmã pakeni. Nãskaxõ mekaito ã nikani, ea iskafaito: ‘Saulo, Saulo, ¿afeskakĩ mĩ ea omiskõimanimē?’ ea faito. <sup>8</sup> Ea askafaito ã yõkani iskafakĩ: ‘¿Mĩ tsoamē, Ifo?’ ã faito ea kemani iskafakĩ: ‘Èkĩa Jesús Nazarete anoa, nã mĩ ea omiskõimani,’ ea fani. <sup>9</sup> A efe foaifãfe luz keskarato ea chaxatanaito õikani ratenifo. Akka a ea yoi mekaito tsõa nikanima. <sup>10</sup> Ea askafaito ã yõkani iskafakĩ: ‘¿Ifo, ã afeskatiromē?’ ã faito, nõko Ifãfe ea iskafani: ‘Fininãkafãta Damasco ano katãfe. Anoxõ ã mia yoi kaikai mĩ afaa afeskafaimãkai,’ ea fani. <sup>11</sup> Akka anã ã fēro õitiroma ini, nã luzpa ea fechaxki mã ea fēxoano. Nãskakē a efe foaifãfe ea mētsoxõ Damasco ano iyonifo.

<sup>12</sup> “Nãno feronãfake ãfe ane Ananías ika ini. Nãato Nios nikakõixõ a Moisés yoini keskara nikakõipaoni. Nãnoxõ judeofãfe Damasco ano ikaxõ aõnoa yoisharapaonifo. <sup>13</sup> È Damasco ano nokoano ekeki Ananías oni ea õiyoi. Mã ekeki oxõ ea iskafani: ‘Efe yorashta Saulo, anã õife,’ ea faino koshikõi ã anã fēro õini. Nãskaxõ ã õisharakõini. <sup>14</sup> Anoxõ ea yoini iskafakĩ: ‘Nõko xinifãfe ãto Niospa mia katoa, a mia amapaiyai keskara mĩ tãpinõ. Askatari ãfe Fake sharafinakõia mĩ õinõ, ãfe meka sharafinakõia nikayanã. <sup>15</sup> Nãskaxõ mĩ ato yoixii Niosnoa, nã maniafo tii anoa, nã mĩ õiaifoya, nã mĩ nikaifo. <sup>16</sup> Nãskakē samarakakima koshikõi fininãkafãta maotisafe faka mēra ikipakekafãfe nõko Ifãfe ãfe aneõxõ mia chaka soaxonõ,’ ea fani” ixõ Pablo ato yoini.

### *Pablo ato yoini a judeofoma mēra Epa Niospa nĩchini*

<sup>17</sup> Anã Pablo ato yoini iskafakĩ: “Mē Jerusalén ano anã oax, Nios kĩfiti pexefã mēra ã kani anoxõ Nios kĩfikai. Nãnoxõ ã õia oa namakē õia ã fani. <sup>18</sup> È nõko Ifo õini ea iskafaito: ‘Nã Jerusalén anoax koshi tsekekaitãfe, mĩ eõnoa yoiaino mia tsõa nikaima kiki,’ ea fani. <sup>19</sup> Ea askafaito ã kemakĩ iskafani: ‘Ifo, mã ea tãpiafo nã ichanãti pexe mēranoafõ kaxõ ã ato achixõ karaxa mēra ã ato ikimapaoni a mia Ifofaifo. Askatari ã ato koshaketsapaoni. <sup>20</sup> Askatari a mĩ inakõi Esteban reteaifono, ãri nãno ato fe ini reteaifono. Nãskaxõ ã ato rapati kexexoni.’ <sup>21</sup> È askafaino nõko Ifãfe ea yoini: ‘Fininãkafãta fãi katãfe, mai fetsafo ari chaikõi ã mia nĩchikai a judeofoma ari,’ ea fani,” ixõ Pablo ato yoini.

### *Soraro xanĩfãfe Pablo kexeni*

<sup>22</sup> Ato askafaito nikakani, akka fãsikõi yorafo mekainĩfofãnifo: “Na feronãfake chaka retefe anã niyamanõ,” fayanã chakafakĩ mekafanifo. <sup>23</sup> Nãskakakĩ õitifishkikĩ finayanã

fāsikōi mekakakī āto rapati taa taa ayanā fomākīa mapo saakī fetsanifo. <sup>24</sup> Askafaiḡāfe nikakī a soraro xanīḡāfe ato yoini Pablo karaxa mēra ikimanōfo, koshaketsakaxō, nāskafaiḡāfe ato yoinō afeskai a yorafo akiki chakai mekakanimākai. <sup>25</sup> Akka mā metexkereakaxō koshapaiyaifono, a soraro xanīfo fētsa Pablo yoini iskafakī: “¿Tsōa mia yoiamē mā romanō koshanō xanīfo yōkaxoma?”

<sup>26</sup> Askafaito nikai a soraro xanīfo āfe xanīfokōi yoikai kani iskafakī: “¿Mī afeska faimē, na feronāfakeri nofe romanō?”

<sup>27</sup> Askafaito nikakī soraro xanīfokōi Pablo ano kani yōkaikai. “¿Mī chanīmamē mī romanōmē?” ixō yōkaito, “Ēje, ēri romanōki,” Pablo fani.

<sup>28</sup> Askafaito nikakī a xanīḡāfe yoini iskafakī: “Ē romanō ixiki kori ichapa ē ato ināni, akka taeyoi ē romanō iyopaonima,” faito nikaki, Pablo kemani iskafakī: “Akka ēfi romanōkōiki,” fani.

<sup>29</sup> Ato askafaito nikakani a koiro fichi koshapaiyaifo a makinoax fonifo. Nā soraro xanīḡāfe mā tāpiax Pablo romanōkōikē nikai ratekōini cadenānā ato metexkereakamax.

### *Judeofāfe āto xanīḡāfe ferotaifi Pablo yoini*

<sup>30</sup> Nāskata pena fetsa soraro xanīfokōichi tāpīpaikōikī judeofāfe aōnoa afaa yoiafomākī, a cadenānā menexafo mēpeni. Nāskaxō ato ichanāfani a Niosnoa ato yoimisfo ato kexemisfoya, a xanīfokōifo. Nāskaxō Pablo kāimaxō āto ferotaifi nīchini.

## 23

<sup>1</sup> A xanīfofo ōikī Pablo ato yoini iskafakī: “Efe yora mīshtichi, nā Epa Niospa ea yoikī taefani keskai, nē askakōimis. Ēfe ōiti mēraxō ē Nios shinākōiyanā ē sharakōimis,” ixō ato yoini.

<sup>2</sup> Akka Ananías ato Nios kīfixomis āfe xanīfo ini. Nāato a Pablo ketaxamei nia yoini Pablo apasnō. <sup>3</sup> Askafaito ōikī Pablo kemani iskafakī: “Epa Niospa mia koshai mīkai afaa tāpiama. Mī ano tsaōxō mī ea pārāi a Moisés yoini keskara nikaimara ixō. Akka mīroko a Moisés yoini keskara nikakaspakī, mī ea ato apasmana,” ixō Pablo yoiaino, <sup>4</sup> a anoxō ōiaifāfe Pablo iskafanifo: “¿Afeskakī a ato Nios kīfixomis xanīfo mī chakafakī mekafaimē?” faifono, <sup>5</sup> Pablo ato yoini: “Efe yora mīshtichi, ē tāpiama nato ato Nios kīfixomis xanīfofiano. Akka kirika ano kenekī iskafanifo: ‘Māto xanīfo chakafakī mekafayamakāfe,’ ixō yoinifo,” ixō Pablo ato yoini.

<sup>6</sup> Nāskaxō mā tāpixō ano fisti ichanāfono saduceofoya fariseofo fāsikōi Pablo ato yoini: “Efe yora mīshtichi, ēri fariseo, ēfe kaifofori fariseofo. Akka ea chakafakī mekafakani, yora naax anā ototirora ixō ē chanīmara faino.”

<sup>7</sup> Pablo ato yoikī askafaito nikakani, fariseofo fe saduceofo āa ranā feratenānifo. Nāskakanax ichanākanax paxkanānifo. <sup>8</sup> Akka saduceofāfe yoimisfo: “Naax nō anā ototiroma,” famisfo. Askatari anokai ājirima anorikai nōko yōshima famisfo. Akka fariseofāfe keyokōi chanīmara famisfo. <sup>9</sup> Nāskakanax fāsikōi mekainīfofānifo, akka nāno ranāri inifo a Moisés yoikī kirika kenenī keskara ato tāpimamisfo. Nāfo fariseofo inifo, nāḡāfe niinīfofākaxō yoinifo iskafakakī: “Na feronāfakekai afaa chakafama. Ōitsai, yōshi sharapa yoyamāki Niospa ājirinī yoia rakikīa,” ixō yoinifo.

<sup>10</sup> Ato askafaino fāsikōi mekai xatenifoma. Nāskakaxō Pablo achikaxō nini nini akanaifono nā soraro xanīfo ratekōini. Nāskakē āfe sorarofō kenamani, ato ano a ifixō anā āfe pexe ano iyoikaxiki.

<sup>11</sup> Nā fakishi Pabloki nōko Ifo nokoxō iskafakī yoini: “Pablo, inimafe. Na Jerusalén anoafō eōnoa mī ato yoimis keskafakī na Roma anoafori ato yoife,” fani.

### *Pablo retexikakī itipinīsharanifo*

<sup>12</sup> Nāskata pena fetsa ranāri judeofo yoinānifo Pablo retexikakī. “Nō Pablo retexoma nō foni tenekī taefanō, afaa piamata afaari nō ayaimakai, noko Niospa retetiroki. Akka

mã Pablo retexõ chipo nõ pixikai,” ikanax yoinãnifo. <sup>13</sup> Cuarenta feronãfakefo anori yoinãnifo. <sup>14</sup> Nãskakata nã feronãfakefo fonifo a ato Nios kifixomisfãfe ãto xanĩfofo fe a judeofãfe ãto xanĩfofo ikafo ano. Iskafakĩ ato yoifokani: “Nõ yoia iskafakĩ: ‘Pablo reteyoxoma, nõ foni teneyoi nõ afaa piyamata afaari nõ ayaima. Nõ askayamaino Epa Niospa noko retetiro,’ ixõ nõ yoia,” fanifo. <sup>15</sup> “Akka iskaratĩa mã na xanĩfo fetsafo feta, na soraro xanĩfo yoikãfe mato ano penama Pablo efenõ. Feparaxõ yoikĩ iskafakãfe: ‘Nõ Pablo yõkasharapaikai noko nõchixõfe nõ yõkanõ afaa aõnoa yoiafomãkĩ,’ ixõ yoikãfe. Oaito õikĩ nõ achixõ reterisafanõ,” fanifo.

<sup>16</sup> Nãskaifono Pablo ãfe pĩaka nikani nõ Pablo retenõ ikaifono. Nãskax sorarofo mẽra kani anoa ãfe koka Pablo yoikai. <sup>17</sup> Mã Pablo nikaxõ, soraro xanĩfo fetsa kenaxõ yoini iskafakĩ: “Na naetapa xanĩfokõi ano iyotãfe, afara yoipai kiki,” fani.

<sup>18</sup> Nã soraro xanĩfãfe ãfe xanĩfokõi kenaxõ yoini iskafakĩ: “Na karaxa mẽra ikato Pablo ea kenaxõ ea yoia na naetapa ã mikiki efenõ afara mia yoipai kiki,” faito, <sup>19</sup> nã xanĩfokõichi nã naetapa mêtsofaixõ a fisti iyoxõ orixõ yõkani: “¿Afaa mĩ ea yoipaimẽ? Ea yoife,” faito, <sup>20</sup> nã naetãpa yoini iskafakĩ: “Mã judeofo yoinãfo, mia yoixikakĩ mĩ penama a xanĩfofo ichanãfo ano mĩ ato Pablo iyoxonõ. Mia feparapaikani nõ Pablo yõkasharapai aõnoa nõ nikasharapai mia fai fekani. <sup>21</sup> Akka mia askafaifono ato nikayamafe. Cuarenta feronãfakefo fai nẽxpakĩa kexekaxõ ãfe koka manafoki achikaxõ retexikakĩ. Nõ Pablo retexii nõ foni tenekĩ taefanõ afaa piyamata afaari nõ ayaimakai. Nõ askayamaito Epa Niospa noko retetiroki. Akka mã Pablo retexõ chipo nõ pikai ikax yoinãfo, mã itipinĩkõikaxõ mia manafo mĩ ato afafaimãakai,” ixõ nã naetãpa yoini.

<sup>22</sup> Askafaito nikakĩ a soraro xanĩfãfe nã naetapa nõchini, “Na ea mã yoiai anori tsoa yoiyamafe,” fayanã.

### *Pablo xanĩfo Félix ano nõchinifo*

<sup>23</sup> Nãskaxõ a soraro xanĩfokõichi afe xanĩfo rafe kenaxõ ato yoini dos cientos sorarofo yoixõ nõchinõfo, askatari setenta kamayonõ fotanõfo, askatari dos cientos sorarofo ashifoya fotanõfo Cesarea ari fõkani fakishi. <sup>24</sup> Nãskata kamayori ato itipinĩfamani a kamaki Pablo tsaoax kanõ. Nãskaxõ ato yoini kexesharata iyotanõfo xanĩfo Félix ano. <sup>25</sup> Nãskaxõ kirika kenexõ ato inãni a xanĩfo Félix foxotanõfo iskafakĩ kenexõ:

<sup>26</sup> Efe xanĩfo Félix, ãkĩa Claudio Lisias, ã mia kirika kenexõ fomaia mia yoisharayanã.

<sup>27</sup> Na feronãfake judeofãfe achixõ retepaiyaifono, akka ã nikaita ãri romanõki ikaito, nãskaito nikakĩ ãfe sorarofo fe kaxõ ã ifita. <sup>28</sup> Afaa chakafaamakĩ ã tãpipaikĩ, judeo xanĩfofo ichanãfo ano ã iyoita. <sup>29</sup> Anoxõ ea yoiaifãfe ã nikaita, na Pablo a Moisés yoini keskara shinãima ea faifãfe. Akka afaakai chakafama retepanãfãfe, askatari karaxa mẽra ikimapanãfãfe. <sup>30</sup> Akka mẽ tãpia judeofãfe ea feparapaiyaifãfe Pablo retepai kakĩ. Nãskakẽ ã mikiki nõchi. A Pablo chakafaifori nãfori ã mia ari nõchi, afaa Pablo chakafamãkĩ mia yoinõfo. Nã tii ã mia yoi efe xanĩfãfe, ixõ keneni.

<sup>31</sup> ãto xanĩfãfe ato yoia keskafakĩ kexesharakõixõ, fakishi Pablo iyonifo Antípatris ano.

<sup>32</sup> Askata pena fetsa sorarofo atiri nõteferakani ãto pexe ano fenifo a tãe foaifo. Akka a kamayonõ foaifo Pablo fe fonifo. <sup>33</sup> Mã Cesarea ano nokokaxõ xanĩfo ano Pablo iyonifo, a ãto xanĩfãfe kirika kenexõ manamana, nã xanĩfo Félix inãnifo. <sup>34</sup> Mã a kirika kene anexõ, nã xanĩfãfe Pablo yõkani: “¿Mĩ fanĩamẽ?” faito, “Ë Cilicia anoa,” Pablo faito nikakĩ, <sup>35</sup> anã yoini iskafakĩ: “A mia mekafakĩ chakafaifo mã fẽkaxõ mĩõnoa yoiaifãfe ã nikanõ mia afaa fakanimãakai ã ato manayonõ,” ixõ yoini. Nãskaxõ sorarofo yoini Herodes xanĩfo ika ano iyoxõ Pablo kexesharakõinõfo.

<sup>1</sup> Mā cinco nia oxata nã ato Nios kīfixomis xanīfokōi, āfe ane Ananías, Cesarea ano oni. Judeofāfe āto xanīfo fetsafo fe feronāfake fetsari ato fe kani, āfe ane Tértulo, nãato ato yoixomis ini. Nāfo xanīfo ano fonifo, Pablo chakafakī mekafaxikakī. <sup>2</sup> Mā nokoafono xanīfāfe Pablo ifitanōfo ato yoini. Mā efeaifono nã Tértulo Pablo yōani. Iskafakī nã xanīfo Félix yoini: “Aicho xanīfo, mī noko ĩkinā nō isharakōiaki. Aicho mī tāpisharakōiaki nōko maitio anoafō mī ato yoisharakōimis noko chakafanōfoma. <sup>3</sup> Fanīmā mīshtixō mī askafaito nō nikamis. Nāskakē mī noko sharafamiskē nō mikiki inimasharakōimis. <sup>4</sup> Akka ē mia yoikī, ē mia chai samaratapaimakai. Nō mia yoiaito noko pishta nikayofe. <sup>5</sup> Na feronāfake mā nō ōimis ato fekaxtefamis, fakima mīshtifo kafāsakī ato pārafōfāsafakī judeofāfe anoris shinānōfoma. Askatari āto xanīfo nazarenōfo ato mekamamis. <sup>6</sup> Askatari nōko Nios kīfiti pexefā chakafakī mekafaito nikakī nō achita. <sup>7</sup> Akka nã sorarofāfe āto xanīfo Lisias nomakinoa kerexkai ifita. <sup>8</sup> Anoxō noko yoikī iskafaita: ‘Māri Cesarea ano fotakāfe afaa Pablo chakafamākī, a xanīfo yoixikakī.’ Nāskakē nō mia ano oa. Yōkaxō mī tāpitiro nã afara chakafakē aōnoa nō yoiai keskara,” ixō yoiaifono, <sup>9</sup> judeofāferi ano fisti ichanākaxō, nānoriri yoinifo: “Chanīma,” fanifo.

<sup>10</sup> Askafaifāfe nikakī xanīfāfe Pablo āfe mēkemā, “Mekafe,” faino, Pablo niinākafā yoini iskafakī: “Inimakōikai ē mia yoi ē afaa chakafamisma. Mē tāpia na mai anoafāfe mī āto xanīfokōi, mā mī xini ichapa aka xanīfokī. <sup>11</sup> Akka mī ato yōkaxō mī tāpitiro ē oxa ichapama doce nia ē ika na Jerusalén ano ē oita anoxō Epa Nios kīfixikī. <sup>12</sup> Ē tsofe feratenāito ea ōimisfoma, Nios kīfiti pexefā mēraxori ē tsoa mekafamisma, ichanāti pexe mēraxori ē tsoa mekafamisma, askatari a pexe rasi mēranoax ē tsofe feratenāito ea tsōa ōimisma. <sup>13</sup> Na yorafokai āa kaxpa chanītirofoma, ē afaa chakafaitokai ea ōiafoma. <sup>14</sup> Akka ē mia yoitiro nōko xinifāfe āto Nios ē shinākī ē kīfimis. Nōko Ifo noko yoipaoni keskafakī akka na yorafāfe āa chanīra ea famisfo. Akka a Moisés yoikī kirika kenei nāri ē chanīmara fakōimis. A Niospa ato shināmanaino yoipaonifori, nāfori ē chanīmara fakōimis. <sup>15</sup> Akka na ea yōaifāfe a yora sharafoya yora chakafo nafono Niospa ato otifaxii chanīmara famisfo keskafakī ēri nã akaifo keskafakī chanīmara famis. <sup>16</sup> Nāskakē mēxotaima ē isharapaikōimis, shināsharakōita. Niospa mā ea ōimis, yorafāferi mā ea ōimisfo.

<sup>17</sup> “Mai fetsa ari kafāsakī mē xini ichapa akatsaxakī, ēfe mai ano ē oita a afaamaisfo ato kori ināyoi, askatari a Nios kīfiti pexefā mēraxō Nios afara ināxiki. <sup>18</sup> Epa Niospa noko yoini keskarakōi ē faa. A nō imis keskai nē askakōikī Epa Niospa ferotaifi afaa chakafatama ē isharakōia. Akka yora ichapa ano efe ikafoma. Askatari anoax tsoa fāsi mekaitama. Akka atiri judeofo Asia mai anoax fenixakakī ea ōiafo. <sup>19</sup> Nāfāfe ē afara chakafaito ea ōifikaxō ¿afeskai afo feafomamamē, nonoxō ea yōaxikaki a ē afara chakafaito ōiafo keskara? <sup>20</sup> Akka afo feyamaifono, nã nonoafō mī ato yōkatiro ē afaa chakafaito ea ōiafomākī judeofāfe āto xanīfofāfe ferotaifi. <sup>21</sup> Akka ē anoxō fāsikōi mekainākafā ē ato yoita iskafakī: ‘Yora naax anā ototiro,’ ixō ē chanīmara faito, mā ea chakafakī mekafai ixō ē ato yoita,” Pablo xanīfo fani.

<sup>22</sup> Akka na Félixpa Jesúsnoa tāpia ini. Nāskaxō shināni iskafakī yoianā: “Mā soraro xanīfo Lisias oxō ea yoisharaiyonō ē tāpisharanō mī afaa chakafaamākī,” ixō yoini.

<sup>23</sup> Nāskaxō xanīfo Félixpa soraro xanīfo fetsa yoini anā Pablo karaxa mēra ikimayonō a āfe yorafāfe pimapaikakī ōipaiyaifāferi ato ikimanō.

<sup>24</sup> Mā oxa ranāta xanīfo Félix anā oni āfe āfi Drusila fe. Nã āfe āfi judeo kēro ini. Nāskaxō Félixpa anā Pablo kenamani. Mā oxō Pablo ato yoiaito nikanifo Jesús meka shara afeskaxō nō Jesucristo Ifofatiromākī. <sup>25</sup> Akka Pablo yoini afeskax nō isharatiromākī, askatari afeskax nōa nō kexemesharatiromākī. Jesús Ifofaxma naax omiskōipakenakafo ixō yoiaito nikai Félix ratekōini. Nāskaxō yoini iskafakī: “Iskaratīa katāfe ē mia anā kenaxikai afaa afeska fayamakī,” ixō yoini.

<sup>26</sup> Pablo askafaito nikakĩ Félixpa shinãni ea Pablo kori inãno ã kãimatiro ixõ. Nãskakĩ mēxotaima kenapaoni afe mekaxiki. <sup>27</sup> Nãskakĩ anoxõ xinia rafe anifo. Nãskatari Félix tsekeni anã xanĩfo inima, fetsa ini xanĩfoi, ãfe ane Porcio Festo. Akka Félixpa karaxa mēranao Pablo kãimanima, judeofãfe aõnoa yoisharakõinõfo.

## 25

### *Festopa ferotaiƒi Pablo yoini*

<sup>1</sup> Festo nokoni xanĩfo ixiki. Mã tres nia ikax Cesarea anoax Jerusalén ari kani. <sup>2</sup> Nãrixõ a ato Nios yoixomisfãfe ãto xanĩfofãfe a judeo xanĩfofo feta Pablo chakafakĩ mekafanifo. <sup>3</sup> Nãskaxõ Festo yõkanifo Festopa ato yoinõ Jerusalén ano Pablo iyotanõfo. Akka atiito shinãnifo fai nēxpakĩaxõ nõ Pablo retenõra ikaxõ. <sup>4</sup> Askafaifãfe nikakĩ akka Festopa ato kemani iskafakĩ: “Pablo Cesarea ano karaxa mēra ika. Akka ari mē samama kai,” ato fani. <sup>5</sup> Nãskaxõ ato yoini iskafakĩ: “Nãskakē mãto xanĩfofo Cesarea ano efe fotirofo, na Pablo afaa chakafaamakĩ arixõ yoixikakĩ.”

<sup>6</sup> Festo Jerusalén ano oxa ranãyoni. Nãskata Cesarea ano anã oni. Nãnoxõ pena fetsa a xanĩfofo tsaomisfo anoxõ tsoaxõ ato yoini Pablo ifitanõfo. <sup>7</sup> Mã Pablo oano õikakĩ, judeofãfe Jerusalén anoax fēkaxõ, akiki fokaxõ mekafakĩ chakakõi fanifo. Askafaifono, “Afaa Pablo chakafamãkĩ ea yoikapo,” xanĩfãfe ato feito, tsoa afaa inima Pablokairoko afaa chakafaito õikanax ãamãi noikaspakakĩ. <sup>8</sup> Askafaifãfe nikakĩ Pablo ato kemani iskafakĩ: “Èkai afaa chakafama, a Moisés judeofo yoini keskarari ã chakafamisma, a anoxõ Nios kĩfiti pexefãri ã chakafamisma, askatari romanõ xanĩfori ã chakafakĩ mekafamisma.”

<sup>9</sup> Askafaito nikakĩ judeofãfe nõko xanĩfo Festo sharakõira fanõfo Pablo yõkani iskafakĩ: “¿Mĩ Jerusalén ano kapaimē? Anoxõ ã õikanõ mĩ afaa afeska famãki.”

<sup>10</sup> Askafaito nikakĩ Pablo kemani: “È ari katiroma mĩrimãi romanõfãfe xanĩfokē nonoxõ ea yõkatirofo. Mã mĩ tãpia, ã judeofo chakafamisma. <sup>11</sup> Akka ã afara chakakõifaito ea õikaxõ ea retetirofo. Ea retekanira ikax ã meseima. Akka ã afaa chakafayamaito ãa ea pãrakaxõ ea ari nĩchitirofoma ea retenõfo. Akka ã xanĩfo finakõia César ano ã kapai anoxõ ea yõkanõ.”

<sup>12</sup> Askafaito nikakĩ Festopa a afe rafeafo feta yoini: “Mã mĩ yoiaki xanĩfo finakõi ari katãfe arixõ mia xanĩfãfe yõkanõ,” fani.

### *Xanĩfo Agripa ano Pablo iyonifo*

<sup>13</sup> Mã ano ikatsaxakĩ pena fetsa xanĩfo Agripa ãfe chiko Berenice fe Cesarea ano fonifo Festo fe mekasharai fokani. <sup>14</sup> Nãri oxa ranãifono, Festopa Pabloõnoa xanĩfokõi iskafakĩ yoini: “Na karaxa mēra feronãfake fisti ika Félixpa ikimayameano. <sup>15</sup> È Jerusalén ano ikano a Nios ato kĩfixomisfãfe ãto xanĩfofo fe judeofãfe ãto xanĩfofo ekeki fēkaxõ Pablo chakafakĩ mekafaitafo iskafakĩ ea yoiyanã na feronãfake omiskõimafe ea faitafo.

<sup>16</sup> “Ea askafaifono ã ato yoikĩ iskafaita: ‘Nõ romanõfãfe askara feyafamisma nikasharaxoma nõ tsõa retetiroma. A chakafakĩ mekafaifo fe ato fe yoinãmano, afeskakĩ aõnoa yoikĩ chakafakĩ mekafakanimãkai.’ <sup>17</sup> Nãskakē mã nono Cesarea ano feafono, pena fetsa mē xanĩfoxõ a xanĩfofo tsaomisfo ano tsoaxõ, ã ato manamayamea Pablo ifitanõfo. <sup>18</sup> Akka afaa chakafaamakĩ ea yoikapo ã ato fafiaino, tsõa aõnoa afaa chaka ea yoiama. Afara chakafakĩ finakē ea yoikanira ixõ ã shinãfiaino. <sup>19</sup> Akka aõnoa yoikĩ iskafaifãfe ã nikaita: ‘Na Pablo Niosnoa yoimisfo anori yoima, a feronãfake Jesús mã nafianino, mã anã otoyamea,’ ixõ yoimisfaifãfe ã nikaita. <sup>20</sup> È afeskaimē na yoiainõnoakai ã tãpiama ixõ ã shinãita. Nãskaxõ ã Pablo yõkaita, Jerusalén ano kapaimãkai xanĩfãfe anoxõ yõkanõ a aõnoa yoiainõnoa keskara.

<sup>21</sup> “È askafaito ea Pablo yoikĩ iskafaita: ‘È anã Jerusalén ano kapaima. Nonoxõ ãfe xanĩfokõichi ea yõkatiro,’ ixõ ea yoita. Ea askafaito ã ato yoita anã Pablo karaxa mēra

ikimanõfo, nã ã nĩchiatĩa,” ixõ Festopa yoiaito, <sup>22</sup> Agripa yoikĩ iskafani: “Ëri na feronãfake nikasharapaikõi,” ixõ Agripa yoiaito, Festopa kemani iskafakĩ: “Mĩ penama nikatiro,” fani.

<sup>23</sup> Nãskata pena fetsa Agripa ãfe chiko Berenice fe rapati sharakõi safekanax xanĩfãfe pexe mēra ikinifo. Soraro xanĩfofo fe a pexe rasi anoa xanĩfofori ato fe ikinifo. Nãskaifono Festopa Pablo ifitanõfo ato yoini. <sup>24</sup> Mã Pablo efeafono Festopa xanĩfo Agripa iskafakĩ yoini: “Efe xanĩfo Agripa, a xanĩfo fetsafori nofe ichanãfãfe na feronãfakekĩa õikapo. Judeofãfe ekeki efeafõ aõnoa afara chaka yoiyanã. Jerusalén anoxõ chakafamisfo, nono Cesarea anoxori chakafamisfo. Mēxotaima fãsikõi mekayanã retefe ea famisfo. <sup>25</sup> Akka afaa chakafakai ã õima ã retepanã. Akka iskaito ã nika: ‘Ë xanĩfo yoipai ã afaa chakafamãkĩ ea yoinõ,’ ixõ Pablo yoiaito ã nika. <sup>26</sup> Akka afaa chakafaitokai ã õiama, aõnoa yoikĩ ãfe xanĩfo ã kirika kenexõ ã fomapanã. Nãskakē mato ano ã Pablo efea mĩmãi xanĩfo finakõikē. Efe xanĩfo Agripa, mĩ Pablo yõkaxõ mĩ ea yoitiro nãnori yoikĩ ã xanĩfo kirika kenexõ fomanõ. <sup>27</sup> Akka ã shinã askara sharama na feronãfake xanĩfo ari nõ nĩchitiroma tãpixoma afaa aõnoa yoiáfomãki.”

## 26

### *Pablo xanĩfo Agripa ano kaxõ yoini a aõnoa chakafakĩ yoiáfo keskara*

<sup>1</sup> Nãskakē xanĩfo Agripa Pablo yoini iskafakĩ: “Mĩ yoitiro afeskakĩ mia chakafakĩ mekafafomãkĩ,” faito Pablo mēshainãkafã ato yoini iskafakĩ: <sup>2</sup> “Xanĩfo Agripa, ã inimakõi mĩ ferotaifi yoi na judeofãfe eõnoa afara chaka yoiáfo keskara yoi, na eõnoa yoiáfo keskara mĩ chanĩmara fanõma. <sup>3</sup> Akka mĩ xanĩfokõi mã mĩ õimis, nã judeofo imis keskai nõ yoinãito. Nãskakē ã mia yoi, fekaxtekima mĩ ea nikayonõ,” ixõ Pablo yoini.

### *Pablo Jesús Ifofamax isharayopaonima*

<sup>4-5</sup> Anã Pablo ato yoini iskafakĩ: “Keyokõi judeofãfe tãpikõiafo a ã ato mēranoax imis keskara, ãfe mai anoxõ tãpikãta, Jerusalén anoxori tãpiafo. Askatari mã tãpiafo, akka mia yoipaikakĩ mia yoitirofo, ãri fariseo. Nã nõko xinifãfe noko yoipaonifo keskara ã nikakõimis. <sup>6</sup> Epa Niospa nõko xinifo yoini keskafakĩ, a yora naax anã ototirora ixõ ã chanĩmara faito, ea chakafakakĩ mato ano ea efeafõ. <sup>7</sup> Ëfe kaifo judeofãfe nã doce xoko fetsafãfe, nã Epa Niospa yoiyoni keskara õipaikakĩ manamisfo. Nãskakē Epa Nios kĩfimisfo, penata kĩfita fakishi kĩfikĩ famisfo. Nãskarifiakĩ ãri õipaikĩ ã manaino, na judeofãfe ãa ea pãrakakĩ ea chakafakĩ mekafamisfo. <sup>8</sup> ¿Afeskakĩ mã chanĩmara faimamē, Niospa yora nakē otofiatirono?” ixõ Pablo ato yoini.

### *Pablo ato yoini a Jesús Ifofaáfo ato omiskõimapaonixakĩ*

<sup>9</sup> Anã Pablo ato yoini iskafakĩ: “Ëa shinãxõ a Jesús Ifofaáfo ã ato omiskõimapaoni. Nã Jesús Nazarete ano ikano, ãfe ane nikakaspakĩ ã chakafapaoni. <sup>10</sup> Jerusalén anoxõ ã ato askafapaoni. A Nios ato kĩfixomisfãfe ãto xanĩfofãfe ea yoiáfono a Nios Ifofaáfo ichapakõifo ã ato karaxa mēra ikimapaoni. Ato reteaifonori nõ ato retenõ ã ato fapaoni. <sup>11</sup> Mēxotaima ã ato omiskõimapaoni, anã Jesús sharara fayamakãfe ixõ. Nã ichanãti pexefo mēraxõ ã ato askafapaoni. Ë atoki õitifishkikĩ finakõikĩ pexe rasi fetsafo mēra kaxori ã ato omiskõimapaoni,” ixõ Pablo ato yoini.

### *Pablo yoini afeskaxõ Jesús Ifofamãki (Hch. 9.1-19; 22.6-16)*

<sup>12</sup> Anã Pablo ato yoini iskafakĩ: “Nãskakē achixõ ã ato omiskõimapai pexe rasi Damasco ano ã kani, a Nios ato kĩfixomisfãfe ãto xanĩfofãfe ea yoikaxõ ea nĩchiafono. <sup>13</sup> Xanĩfo Damasco ari fãi kakĩ ã õini xini keya nai mēraxõ chaxatanaito oa xinĩ chaxa keskara inima, chaxakĩ finakõini. Ea kemataima chaxakõia ini, a efe fofaifori ato askafani. <sup>14</sup> Noko askafaino nõ nãmã pakeni. Askata ãfe meka ã nikani hebreo mekapa ea

yoiaito iskafakī: ‘Saulo, Saulo, ¿afeskakī mī ea omiskōimanimē? Ea mīa iskafai, mīakōi mī chakamei oa fakka ifiki chachixō pae meetiro keskai.’

<sup>15</sup> “Ea askafaito nikakī ē kemakī iskafaita: ‘¿Ifo, mī tsoamē?’ ē faito, nōko Ifāfe ea kemakī iskafaita: ‘Ēkīa Jesús, ea mīa omiskōimamis. <sup>16</sup> Fininākakāfe ē mikiki nokoaki mī ea Ifofanō. Askatari na mī ōiai keskara mī ato yoinō, a ē mia chipo ōimanai keskarari. <sup>17</sup> Ē mia kexesharaxii judeofāfe mia retepaiyaifono, yora fetsafāferi mia askafaifono ē mia kexesharaxii. Nāskakē ato mēra ē mia nīchi. <sup>18</sup> Nāskakē ato mēra ē mia nīchi, eōnoa mī ato yoinō anā fakish mēra nia keskara inōfoma, askatamaroko penata nia keskara shara inōfo, Satanás chakata ato yoiaito anā nikayamanōfo, askatamaroko Nios Ifofanōfo. Nāskakaxō ea chanīmara fakaxō afara chakafakatsaxakakī āto chaka xatekanax Niospa yoini keskai efe ipaxanōfo,’ ixō Jesús ea yoini,” ixō Pablo ato fani.

### *Jesucristo yoiaito namakē ōia keskarafaxō Pablo nikakōini*

<sup>19</sup> Anā Pablo ato yoini iskafakī: “Ēfe xanīfo Agripa, ē nikakaspanima a ē namakē ōia keskarafaxō nī mēraxō ea yoiaito. <sup>20</sup> Damasco anoxō ē ato yoikī taefani Jesúsnoa meka shara ato yoikī. Nāskata Jerusalén anoafori ē ato yoini, Judea mai anoafori ē ato yoini. Askatari a judeofoma ē ato yoini iskafakī: ‘Māto chaka xatekāfe Nios Ifosharakōifaxikakī, askaxori afarafo shara fakī ato ōimakāfe mato chanīmara fanōfo mā Nios Ifofasharakē,’ ixō ē ato yoiaito, <sup>21</sup> judeofāfe ea achinifo Nios kīfiti pexefā mēraxō ea retepainifo. <sup>22</sup> Akka ea retepaiyaifono Epa Niospa ea kexesharani, iskaratīari ē isharakōia Niosnoa ato yoiyanā. A xanīfokōifoya a afamafori ē ato yoimis. Afaa fetsa ē yoimisma. A ato Niospa shināmanaino Moisés feta yoipaonifo anori fisti ē yoimis. <sup>23</sup> Iskafakī ato yoipaonifo, na Niospa nīchia Cristo omiskōiax naxii. Mā nafiax anā otoxii, mā otoxō ato yoisharax afeskax Epa Nios fe ipaxatirofomākī, judeofoya a judeofoma,” ixō Pablo ato yoini.

### *Pablo Agripa shināmapaini akairi Jesús Ifofanō*

<sup>24</sup> Pablo yoikī askafafiaino, Festopa mekatimafani iskafakī yoini: “Pablo, mā mī fekaxtekōia mēxotaima kirika fisti anekī tāpikōiax,” fani.

<sup>25</sup> Askafaito nikakī Pablo kemani iskafakī: “Ēfe xanīfo Festo, ē fekaxtemisma. Askatamaroko na ē yoiai anori sharakōi, chanīmakōi ē mato yoi. <sup>26</sup> Na ē mato yoiai anori nōko xanīfo Agripa mā tāpikōia a ē Jesúsnoa yoimis anori. Nāskakē xafakīakōi āfe ferotaifi ē yoi, akka mē tāpia na ē yoiai anori nāatori mā tāpia. Nā ē yoiai anori ē nikamisma mā itiroma onekai ē yoimisma. <sup>27</sup> Ēfe xanīfo Agripa, a Niospa ato shināmanaino yoipaonifo keskara, ¿mī chanīmara faimē? Akka ē tāpia mī chanīmara fai,” ixō Pablo Agripa yoini.

<sup>28</sup> Askafaito nikakī Agripa kemani iskafakī: “Mā mī ea chanīmara famakerana Jesús Ifofafa,” ixō yoini.

<sup>29</sup> Askafaito anā Pablo yoini: “Iskaratīa iyamai afetīara ea keskara mī inō ē fichipai, askatari nā mā ea nikaifo keyokōi ea keskara mā inō. Nōko Ifo Jesús Ifofai nāskafiax karaxa mēra mā ikiyamanō ē imis keskai. Nānori ē mato Epa Nios kīfixomis,” ixō Pablo ato yoini.

<sup>30</sup> Ato askafaito nikakī xanīfokōi fininākakani, xanīfo fetsa fe, Bereniceri ato fe askani, a ano tsaofori ato fe fininīfofanifo. <sup>31</sup> Nāskakanax ori fokanax āa ranā yoinākanani iskanifo: “Na feronāfākekai afaa chakafama afeskakīkai retetirofoma, askatari afeskai karaxa mēra itiroma.”

<sup>32</sup> Nāskaxō Agripa Festo yoini iskafakī: “Na feronāfake nō kāimakerana, ē xanīfo César ari kaimakai noko faino,” ixō Agripa Festo yoini.

## 27

### *Pablo Roma ari nīchinifo*

<sup>1</sup> Nāskakē shinākakaxō Italia ano noko nīchinifo. Pablo yafi a afe karaxa mēra imisfo soraro xanīfāfe āfe ane Julio ato kexenō. Nā sorarofa, “Xanīfo finakōia kexemisfo,”

ato famisfo. <sup>2</sup> Nānoax kanōanāfānē nō nanekaini. Nā kanōanāfā Adramitio fai fotoa anoax oaino mā itipinīkōiax Asia fai fotoa ano kaino. Aristarcori nofe ini, nā Aristarco Tesalónica anoa ini, Macedonia mai anoa. <sup>3</sup> Nānoax kaax pena fetsa Sidón fai fotoa ano nō nokoni. Nānoxō soraro xanīfāfe āfe ane Julio nāto Pablo noikōikī iskafani: “Mefe yorafo kaxō ōitāfe afāfe nā mī fichipaiyai keskara mia inānōfo,” ixō yoini. <sup>4</sup> Nāskata Sidón anoax nō anā kanōanāfānē kaino, nēfefanē noko akaino nā fakafā nakirafe mai toomāfā āfe ane Chipre aōri nō kani, takai fetsaxomāi noko nēfefanē katimafaino. <sup>5</sup> Askata mā nō kakī Cilicia yafi Panfilia fakafā kesemēkōi nō finōfaini. Askata pexe rasi Mira ano nō nokoni. Nā pexe rasi Mira Licia mai anoa ini.

<sup>6</sup> Nānoxō a soraro xanīfāfe kanōanāfā fetsa fichini Alejandría anoax okē. Nā kanōanāfā Italia anoax kaino, nāo noko naneni aō nō kanō. <sup>7</sup> Fenāmāshta kai nō oxa ranākōini, nō kanōanāfā tōfei nō xokenākōini. Nāskax pexe rasi Gnido okiri nō nokoni. Anoxō nēfefānē noko anā akaino, pexe rasi Salmona okiri nō finōfaini. Nā Creta anoa fakafā nakirafe mai toomāfā okiri nō kayakeni. <sup>8</sup> Nāskata nēfefānē noko katimafaino nō samarakakōi nō fekaxtekōini. Nāskata nō nokoni pexe rasi āfe ane Buenos Puertos ano. Pexe rasi Lasea chaima ini.

<sup>9</sup> Nāskai mā nō ano samarakōiano, mā mechakaino fakafā pooiki meseniaito ōikī anā katiroma meeki Pablo ato yoini <sup>10</sup> iskafakī: “Xanīfofōfāfe, nō katiromaki mesekōi iki kiki mē tāpiaki. Na kanōanāfā yafi nōko afama mīshtifo nō fenotiro, askatari nōri nō āsai fetsetiroki,” <sup>11</sup> ato faino akka tsōa Pablo nikanima. Akka na kanōanāfānē ifāfe yoini: “Maa. Nō meseima, nō āsaima. Nō kanō fokāfe,” ato fani. Ato askafaino nā sorarofāfe āto xanīfāfe nā kanōanāfānē ifo nikani. Nā rafeta Pablo nikanifoma. <sup>12</sup> Akka nā fai fototai shara inima anoxō mechaka finōpaifiaifono nāskakē anoxō shinānifo: “Nō nonoax kanō Fenice ano,” ixō shinānifo. Nā pexe rasi Fenice Creta mai anoa ini.

### *Nēfefanē fakafā anoxō ato ani*

<sup>13</sup> Nāskaxō shinānifo: “Anā nēfefaima kiki, fenāmāshta nefei kiki na nēfe nō kanō,” ikax yoinānifo. Nāskata nānoax mā nō kakī Creta ketokonōkōi nō finōfaini. <sup>14</sup> Akka mā nō kaino chipo nokoki nēfefākerakī, fakafā pooiki kanōanāfā rafe rafe ani. <sup>15</sup> Noko askafaino fakafā ketokonō nō kapaiifiaino, noko katimafani. Nāskakē nā nēfefanē nā iyopaiyai ari noko iyonī. <sup>16</sup> Noko askafaino nā fakafā nakirafe mai tōo efapama āfe ane Cauda nō finōfaini. Nāno nō finōfainaino anā noko nēfe fāsi anima. Nāskakē a kanōa kafāshara chirotamea fāsi kerexkai kanōanāfā xaki mēra nanenifo. <sup>17</sup> Mā askafakaxō risfi efapato kanōanāfā nexasharakōinifo ato nēfe toōxayamanō. Nexakaxō āto sama poteti pekakaxō kanōanāfā mēra rātanifo, nēfe noko iyoyamanō nā mashi āfe ane Sirte ano ikaxō, “Nēfe noko fakirira iyoikanōra,” ikaxō. Nāskakaxō kanōanāfāki nexakaxō āto afeskarafakafānaki nōtanifo, nato nā noko iyopaiyai ari noko iyoikanōra ikaxō. <sup>18</sup> Akka pena fetsa anā nokoki nēfefani, nāskakē nā kanōanāfā mēranoa āto afama mīshtifo fakafā naki potaketsanifo. <sup>19</sup> Askakāta mā tres nia ikano nēfefā nishpayamaito ōi kakī āto risfifoya āto firofo, āto fitifo, āto samafo, fakafā naki potakī mitonifo. <sup>20</sup> Nāskai nēfefā nishpayamaino xini yafi fishifo nō ōitiroma ini, nēfefanē noko ōitimafaino. Nāskatari anā afaa nō shinānima mā nō āsai fetseira ikax.

<sup>21</sup> Nāskakī mā nō foni tenekī ranā faano, Pablo niinākafā noko yoini iskafakī: “Efe yora mīshtichi, nō afeskakeranama na Creta anoax fena foyamakāfe ē mato fafiaino mā ea nikaitama. Nōko afama mīshtifokai nō fenokeranama, mārīkai omiskōikeranama. <sup>22</sup> Nāskakē rateyamakāfe. Mā āsaimakai. Kanōanāfā fisti fakafā mēra iki kiki. <sup>23</sup> Na fakishi Niospa āfe ājiri ekeki nokoakī Niospa nīchiano, nā Niosfi ēfe Ifokōikī, nā ē yonoxomis. <sup>24</sup> Ea iskafakī yoiakī: ‘Pablo, rateyamafe. Mī xanīfo César ano kaikai ato mia yōkanō mī afaa chakafamākī. Mīoxō Epa Niospa na kanōanāfā mēra mefe foaifo ato kexesharai kiki afeskakanima kiki,’ ixō ea yoiaki. <sup>25</sup> Nāskakē ē mato yoikai efe yora mīshtichi, ratekakima inimakāfe. Epa Niospa ea yoiyai keskara ē chanīmara fakōimiski. Mē tāpiaki tsoa āsaima kiki



mã ea ãjirinĩ yoiaki. <sup>26</sup> Akka fakafã nẽxpakĩa mai toomãfã anoax nõko kanõanãfã tooxai kiki,” ixõ Pablo ato yoini.

<sup>27</sup> Mã nõ catorce nia finõta fakafã ãfe ane Adriático ano nõ nokoni. Nãskakẽ nãnoxõ nẽfefanẽ nõ noko iyopaiyai ari noko iyoikaino, nõ fakish fistichi yamenake kafanaino a kanõanãfã mẽra yonomisfo yoinãnifo: “Mã nõ mai ano nokoikaira,” ikanax. <sup>28</sup> Nãskakaxõ ãto tanãtinĩ faka noamãkĩ ixõ meenifo. Mã meekaxõ õiafo treinta y seis metros ini, askata afianã ori fokaxõ meeafõ veintisiete metros ini. <sup>29</sup> Nãskakaxõ mesekakĩ nõ tokirinĩfakĩ nokoi katirora ikaxõ, cuatro faxõ ãto firopafãfo nexakaxõ kanõanãfãki chenexti fakaxõ fakafã naki potanifo, noko nẽfefanẽ iyoyamanõra ikaxõ. Nãskakaxõ Epa Nios kĩfinifo koshi penanõra ikaxõ. <sup>30</sup> Nãskaifono akka a kanõanãfã mẽra yonomisfo onefaipainifo kanõanãfã mẽranoax. Nãskakẽ a kanõanãfã mẽranoa a kanõa kafãshara fotomapainifo. Nõ firopafãfo nexaxõ kanõanãfã renexte faxõ nõ fakanaki potaira ikaxõ ato feparapainifo. <sup>31</sup> Nãskaifono Pablo soraro xanĩfo yoini, ãfe sorarofõya iskafakĩ: “Nafõ kanõanãfã mẽra nẽteyamaifono tsõa mato anã iyoyamaino, mã ãsai mitokomei,” ato faino, <sup>32</sup> sorarofãfe a aõ kanõa fotomapaiyai fo risfi xatenifo a kanõa fakanaki pakeano fãka fõtanõ.

<sup>33</sup> Nãskata mã penaino Pablo shinãxõ ato yoini afara pishta pinõfo. Iskafakĩ ato yoini: “Mã nõ nomĩko rafe akaki nẽfefã nishpaira ixõ, manayanã a mã pimis keskafakĩ mã afaa piamaki. <sup>34</sup> Ë mato yoikai pikãfe. Nõ piãx shara nõ itiroki anã mãto yora kerex inõ. Nõ afeskaimakai,” ixõ ato yoini.

<sup>35</sup> Ato yoikĩ askafata pãa tso mainĩfofã ãto ferotaifi, Epa Nios kĩfikĩ iskafani: “Aicho Epa Niosi, mĩ noko kexesharaki,” fata ato pãa pikĩni. <sup>36</sup> Ato askafaino inimakõiyana anã ratekakĩma akairi pinifo. <sup>37</sup> Akka nõ kanõanãfã mẽra docientos setenta y seis yorafo nõ ini. <sup>38</sup> Mã pii mãyakõikãta ato trigõfo fakafã naki potanifo, kanõanãfã xaka inõ.

### *Kanõanãfã ikini*

<sup>39</sup> Mã penaino a kanõanãfã mẽra yonomisfãfe, mã mai fichifikaxõ tsõa tãpinima. Akka a fakafã chitotanã anoa mashi fichikaxõ, “Ono nõko kanõanãfã nõ rĩtiaki kanõ,” inifo. <sup>40</sup> Nãskakata a aõ kanõanãfã nexea ãfe risfi xatekaxõ nãnoa õifainifo. Nãskatari ãto fitifo pekaketsanifo kanõanãfã mẽstekõi iyoikanõ. Nãskata afianã kanõanãfã rechokoki ãto samapafã poteinĩfofãnifo ato nẽfe iyoikanõ. Nãskax mã fõkakĩ mashi chaima fanifo. <sup>41</sup> Akka mã fõfãfono kanõanãfãnẽ mashi tsakax nãno rakani. Refokirixori mashi tsakakõia ini, pishta feroitiroma. Nãskakẽ aõ chipokirinoax toxai fetseni fãsikõi fãkafã poo ikaino.

<sup>42</sup> Nãskaino sorarofãfe a karaxa mẽra imisfo ato retepainifo, tsoa pishta ichoyamanõ. “Keyokõi nõ ato retenõ,” ikax yoinãnifo. <sup>43</sup> Akka a sorarofãfe ãto xanĩfãfe Pablo retepaikĩma, “Ato reteyamakãfe,” ãfe sorarõfo fani. Nãskaxõ ato yoini iskafakĩ: “Fatoto mã faka feakĩ tãpiamãkĩ faka feafaitakãfe mashi ano nokoxikakĩ. <sup>44</sup> Akka a faka feakĩ tãpiafoma tii na kanõanãfã kaxkẽ aõ nonoax fonõfo,” ixõ soraro xanĩfãfe ato yoini.

Nãskakẽ keyokõi ãsaxma mashi ano nokonifo.

## 28

### *Pablo mai toomãfã ãfe ane Malta ano ini*

<sup>1</sup> Mã nõ keyokõi fãkafã kesemẽ nokoxõ, nõ tãpini nõ fãkafã nẽxpakĩa mai toomãfã ãfe ane Maltakẽ. <sup>2</sup> Nãnoxõ keyokõi noko ifisharakõinifo. Nãnoax nokoki oi ikaino, matsikõi ini. Nãskakẽ anoxõ chii ketefakaxõ, “Yoofẽkãfe,” noko fanifo. <sup>3</sup> Pablo nãnoxõ karoya shano ikõferani chii ketefakĩ. Mã chii ketefaino chii xanamei shano kãikerani oxõ mifiki chachini. Mã mifiki chachiax aõ neetani. <sup>4</sup> Pablo ãfe mifi shano ronokẽ õikani ãa ranã is kai fetsenifo: “A na feronãfãke ato retemis rakikĩa. Fakafã anoax nokoshara fiaino, mã Niospa shano chachimana nai rakikĩa,” ikanax yoinãnifo.

<sup>5</sup> Akka Pablo metashkiri itakī shano chii nēxpakīa potani. Shanopa chachifiano Pablo paemenima. <sup>6</sup> Nāskakē keyokōichi ōiketsanifo faraxinānakafanax naira ikaxō. Akka faraxiyamaito ōikakī, iskafanifo: “Nakai retemitsamisma, nafi nioski,” ikanax yoinānifo.

<sup>7</sup> Anoxō shinā nā xanīfo Publio chaima ika ini. Nānori yorafo afe ikafo ini. Nā xanīfāfe āfe pexe anoxō noko ifisharakōixō noko pīchasharakōixoni, tres nia ano nō oxaino.

<sup>8</sup> Nānoax Publio āfe apa isinī iki rakani, yonayanā chixoi. Nāskaino Pablo ōikai kaxō Epa Nios kīfixota āfe mīfi māmāsharani. <sup>9</sup> Pablo sharafaito nikakanax a isinī ikaifori nā ika anoax feafono Pablo ato sharafapani. <sup>10</sup> Ato askafaito ōi kakī anoxō afama mīshtifo noko ināketsanifo. Nāskata mā nō ato makinoax kai kanōanāfā mēra nō naneikainaino, anā afama mīshtifo noko inānifo a nō kakī pifoikai.

### *Pablo Roma ano nokoni*

<sup>11</sup> Nāskata anoxō mā nō tres oxe akax, kanōanāfā mēra nō naneinākfāni. Nā kanōanāfānē nā mai anoxō mechaka finōmani. Nā kanōanāfā Alejandría anoa ini. Nā kanōanāfā recho koki afarafo tsaioxō fonifo na nōko niosra ikaxō, fetsa āfe ane Castor ini, fetsari Pólux ini. <sup>12</sup> Nāskax nō nokoni Siracusa fai fotoa ano, nāno nō tres nia oxayoni.

<sup>13</sup> Nānoax kanōanāfānē nō anā kai fakafā ketokonō pishtakōi nō kaax Regio ano nō nokoni. Nānoxō pena fetsa nēfefānē noko ani a xini oaikirinoaxma oxō. Nāskakē nānoax kaax pena fetsa nō nokoni Puteoli ano. <sup>14</sup> Nānoa a Jesús Ifofaafō nō ato fichini nāfāfe noko yoikī iskafanifo: “Nono nofe oxa ranāyokāfe,” noko fanifo. Nāskata nānoax ato makinoax kaax chipo Roma ano nō nokoni. <sup>15</sup> Mā nō kaino nō Roma ano nokoyoamano a Jesús Ifofamifāfe Roma anoxō nikaketsanifo. Nāskakē nokoki nokoifekani fenifo. Atiri pexe rasi Foro de Apio anoax fenifo, atiri pexe rasi Tres Tabernas anoax nokoki nokonifo. Askafāfe ōikī Pablo Epa Nios kīfikī iskafani: “Aicho Epa Niosi, mī yorafo ekeki nīchiaki,” fani inimakōiyānā. <sup>16</sup> Mā nō Roma ano nokoano, xanīfāfe ato yoini pexe fetsa mēra ares Pablo inō, anoxō soraro fistichi kexenō.

### *Roma ano Pablo ini*

<sup>17</sup> Mā nokoitaxakakī ano tres nia ixō, Pablo judeofo xanīfofo Roma anoa ato kenamani fenōfo. Mā fekanax ichanāfono Pablo ato yoini iskafakī: “Efe yora mīshtichi, ea nikakapo ē mato yoinō. Ēkai judeofo chakafakī mekafamisma. A nōko xinifo ipaonifo keskarari ē chakafakī mekafayamafiakē, ea achikaxō Jerusalén anoxō romanōfo ano ea nīchinifo.

<sup>18</sup> Nānoxō mā ea yōkakaxō, ea nīchipainifo, ēkairoko afaa chakafakē ea retexikakī. <sup>19</sup> Ea askafafono, akka judeofāfe ea iskafayameafo: ‘A chaka kāimayamafe,’ ea faifono, ē xanīfofo yoini iskafakī: ‘Ē xanīfokōi César ano kapai ato ea yoinō, ē afaa chakafayamafiakē efe yorafāfe eōnoa yoiafo keskara,’ ixō ē ato yoini. <sup>20</sup> Ē mato kenamana mato fe yoināxiki. Akka mā mā nikai ēfe kaifo israelifāfe, nā noko nimamis Niospa Fake nō manamis. Nāskakē mā mā ea ōi nonoxō ea metexkere akafono,” ixō Pablo ato yoiaito, <sup>21</sup> nikakakī iskafanifo:

“Judea anoxō mīōnoa tsōa noko kirika kenexō femama. Nofe yorafo judeofori ariax fēkaxō mīōnoa afaa chaka noko yoiafoma. <sup>22</sup> A mī yoiai keskara nō tāpipai, akka mā nō nikamiski, a maniafo tii anoxō a Jesús Ifofamisfo chakafakī ato mekafamisfokī,” ixō ea yoinifo.

<sup>23</sup> Nāskakata, “Pena fetsa nō mefe ichanāfainakaki,” fanifo. Nāskakē yora ichapakōi a Pablo ika ano fenifo nikai fekani. Mā feafono Pablo ato yoikī yātafani, Nios xanīfoōnoa ato yoikī. Afeska faxoma Jesúsnoa ato nikamapaikōini, a Moisés kenenioōnoa ato yoita, a Niospa ato shināmanaino kenenifoōnoari ato yoini. <sup>24</sup> Pablo ato yoiaito ranārito nikanifo, akka ranāritori nikakaspanifo. <sup>25</sup> Nāskakē āa ranā fochishpanā faatanānifo ares shinākanima. Nāskakata mā fopaiyaifono Pablo ato yoini iskafakī: “Isaías chanīmakōi ato yoipaoni Niospa shināmanaino. Nāōxō Niospa Yōshi Sharapa mātō xinifo yoini, iskafakī:

<sup>26</sup> Kaxō mī kaifo yoitāfe iskafakī: ‘Mā mā nikakōifikī mā nikasharaima; mā mā afara sharafo ōifikī mā ōisharaima.’ <sup>27</sup> Mā na yorafāfe nikafikakī shināsharakanima, āto ōiti

fěstokōi. Mā ōifikakī tãpipaikanima, na ě yoiyai keskara chanĩmakōi ōifikakī. Askatari nikakōiafoma ě ato chaka soaxopanã efe nĩpaxanōfo, ixō Niospa Yōshi Sharapa Isaías yoini. <sup>28</sup> Na ě mato yoiyai keskara tãpikãfe, Epa Niospa noko nimapaiyai keskara mā nikayamaino a judeofoma ě ato yoi afãfe ea nikakōixikani,” ixō Pablo ato yoini.

<sup>29</sup> Pablo ato yoikī askafaino, judeofo mā fokani ãa ranã feratenãfonifo.

<sup>30</sup> Anoxō Pablo xiniya rafe ani. A pexe ifo Pablo kori inãni a mēra ixiki. Nãnoxō ato ifisharapaoni ōikai fofaifono ato yoisharayanã. <sup>31</sup> Nãnoxō ranotamakōi ato yoini afeskaxō Epa Nios xanĩfãfe noko ĩkitiromãki. Nōko Ifo Jesucristoōnoari ato yoiaito tsōa xatematiroma ini. Nã tii.

## Pablo Roma Anoafo Kirika Kenexõ Fomani

### *Pablo Jesús Ifofaafo Roma anoafo kirika kenexõ fomani*

<sup>1</sup> Roma anoafãfe, ã mato kirika kenexõ fomai. Ëkã Pablo, ã Jesucristo yonoxomis. Niospa ea nĩchini ã aõnoa yoimis inõ, ãfe meka shara Jesúsnoa yoinõ.

<sup>2</sup> Niospa ãfe Fake nokoõnoax naiyonõpokoai tãpixõ a Niospa meka yoimisfãfe meka kenenifo. Jesúsnoa meka shara yoinifo. <sup>3</sup> Niospa Fakeõnoa meka shara kenenifo a inõpokoai keskafakĩ. Jesús Niospa Fakekõifiax David ãfe xini ini. Nã David nõko xinifãfe ãto xanĩfokõi ipaoni. <sup>4</sup> Niospa afama mĩshti fatiroxakĩ nõko Ifo Jesucristo otofani. Otofaxõ ato õimani nãmãi Niospa Fakekẽ. Niospa ãfe shinãmã ãfe Yõshi Sharaõxõ ãfe Fake otofani. Ato õimani Jesúsmaĩ ãfe Fakekẽ. <sup>5</sup> Jesucristoxõ noko noi. Noko noikĩ ãfe shinã noko inãni. Nãskaxõ noko nĩchini Jesúsnoa yoimis nõ inõ. A judeofomari a xoko fetsafori afãferi Jesús chanĩmara fanõfo nõ yoiaino. Jesús chanĩmara fakaxõ nikasharakõinõfo. <sup>6</sup> Mãri mã mã Jesucristo chanĩmara faito mato nĩchini mã afe yorafo inõ.

<sup>7</sup> Roma anoafãfe, ã mato kirika kenexõ fomai. Niospa mato noixõ mato ifini mato chaka soaxoxiki afe yorafo mã inõ. Mato noikĩ mãto shinã mẽraxõ mato shinãsharamanõ. Epa Nios feta nõko Ifo Jesucristo mato askafanõ.

### *Pablo a Jesús chanĩmara faafo Roma anoafo ato õipaini*

<sup>8</sup> Ë mato yoinõ. Nikakapo. Keyokõichi a maitio anoafãfe mato yoimisfo, mã Jesús chanĩmara faito õikakĩ. Nãskakẽ, “Aichora,” ã Nios famis. Jesucristoxõ, “Aichora,” ã famis. <sup>9</sup> Ëfi Nios yonoxokõikai. Chanĩmakõi ã yonoxonikai. Ë feparanima. ãfe Fakeõnoa ã meka shara yoimis. Pena tiifi ã mato Nios kĩfixõfafãini. Niospa tãpia. <sup>10</sup> Ë mato õisharapai. Nãskaxõ ã Nios kĩfifafãini ã mato ano kapaikĩ. Akka ã kai, ã kayamai ã kaima. A Niospa ea nĩchipaiyaino ã katiro. <sup>11</sup> Ë mato õisharapai. Õikaxõ ã mato Niospa meka yoipai. Niospa ãfe Yõshi Sharaõxõ ã mato yoipai mã chanĩmara fakĩ finakõinõ Jesús Ifo sharakõi faxiki. <sup>12</sup> Nãskax Jesúsnoax nõ inima faatanãno. Mã Jesús chanĩmara faino ã inimatiro. Nãskarifiakĩ ã chanĩmara faino mã inimatiro.

<sup>13</sup> Efe yorafãfe, ã mato tãpimapai mã tãpinõ afeskaxma ã matoki kapai ã katiroma mei, ã kamisma. Mẽ kãta katamis ifiakeranax afara fetsa aki ã kamisma, mato ari kapaifi. Mai fetsa aria ichanãmisfo judeofoma nãfo ã Jesús ato chanĩmara fama. Nãskari fakĩ ã matori askari famapai. <sup>14</sup> Jesús ea yoia ã ãfe meka keyokõi ato yoinõ. Nã kirika kenekĩ tãpiafo ita a kirika kenekĩ tãpimafori ã ato yoikai. Nafafoya a nafamafori ã ato yoitiro. Ë ato yoiaito nikakakĩ Jesús chanĩmara fanõfo. <sup>15</sup> Nãskari fakĩ ã Jesúsnoa mato Roma anoari yoikapaimis.

<sup>16</sup> Jesúsnoa meka shara yoipaikai ã ranotiro. ãfe meka xafakã shara. Noko Niosnoa tãpimatiro a tsõa atiro. Niospa atiro. Nõ chanĩmara faito Jesucristoxõ Niospa noko chaka soaxotiro nõ afe ipaxanõ, nõ fenoyamaino. Taefakĩ judeofãfe nikakõinifo. Akka iskaratĩari judeofomafãferi nikakani afe ipaxakakĩ. <sup>17</sup> Nã Jesúsnoa meka sharaõxõ Niospa noko õimatiro. Nõ Jesús chanĩmara faito Niospa nõko chaka noko soaxotiro. Nãnori kenenifo iskafakakĩ: “A Jesús chanĩmara fakõinaifo Niospa ãto chaka ato soaxõ afaa chakafamisma keskara ato õi. Nãskax shara ipanakafõ Nios fe.”

### *Keyokõi yorafo chakamisfo*

<sup>18</sup> Niospa meka nikakaspafãfe a chakafamisfo Niospa ato õimani ato omiskõimakĩ. Niospa meka chanĩmakõifiano nikakaspakata yora fetsafori ato Niospa meka chanĩmara ato famakaspakani. <sup>19</sup> Nõko Nios afe keskaramãkĩ tãpipaikĩ nõ tãpitiro. Akka Niospa noko õimamis. <sup>20</sup> Nõ Nios õiyamafixõ nõ tãpitiro Niospa keyokõi onifani, nãmãi Nioskõi ixõ.

Nã Niospa onifani òikĩ nõ tâpitiro tsoa fêtsa keyokõi atiro. Nios fistichi atiro, afama mĩshti. Nãskakẽ Nios nikakaspafãfe Nios chanĩmara fapaikanima, a onifani òifikakĩ. Nãskakẽ Niospa ato omiskõimani nãfãfe Nios tâpipaikanima. Akka tâpipaikĩ tâpikeranafo. <sup>21</sup> A Niospa onifani òifikakĩ iskafakĩ yoipaikanima: “Nios fistichi keyokõi onifani. Aicho, Nios finakõia,” ikaxõ shinãpaikanima. Nãskakaxõ ãto shinã mẽraxõ afara shinãsharakanima. Afara chaka fisti shinãkani ãto òiti fakish keskara ikaxõ. <sup>22</sup> “Nõfi tâpikõiaiki,” ifiakaxõ tsõa shinãsharaima. <sup>23</sup> Niosfi sharakõikĩ shara enenakama. Nãfi isharapakenakakĩ. Isharakõifiaito Ifofapaikanima. Askata yorafo isharayamaino yora fetsafãfe afara yora keskara onifakaxõ, “Na nõko Niosra,” ikaxõ kifimisfo Nioskõi kifikaspakakĩ. Yoinã keskara onifakaxõ, peya keskara onifakaxõ, rono keskarari onifakaxõ, nãskarafa onifakaxõ, “Na nõko Niosra,” ikaxõ kifimisfo.

<sup>24</sup> Askafafãfe òikĩ Niospa anã ato Ifofamaima. Nã chakafapaiyaifo fisti akaifãfe òikĩ Niospa ato xatemanima. Nãskax ãa ranã fekaxte faatanãkani. <sup>25</sup> Nios fistifi chanĩmismaki. Nã chanĩyamafimiskẽ tsõa Ifofapaima nã fisti nõko Nios sharakõifiano. Niospa keyokõi onifafianino tsõakai Ifofapaima. Akka nã Niospa onifanifo, “Nã nõko niosra,” ikaxõ kifitaifamisfo. Tsõakai Nioskõi Ifofapaima, mẽxotaima sharafinakõia ifiamiskẽ. Nãskakẽ, “Epa Niosi, mĩ sharafinakõia,” ikaxõ yoikani. Askapakexapainõfora.

<sup>26</sup> Askafafãfe òikĩ Niospa ato chaka xatexonama, afara chakafapaiyaifo fisti akaifãfe. Niospa noko onifani feronãfake yafi kẽro, kẽro feronãfake fe inõ. Askafafianino kẽro rafe fichinãpaikani chaka ikani. <sup>27</sup> Askatari feronãfake rafe fichinãpaikanax chotanãkani, kẽro tanatama. Askax chaka ikanax omiskõikani.

<sup>28</sup> Nãskakakĩ chaka fisti shinãpaikani. Anã Nios shinãpaikanima. Askaifãfe òikĩ Niospa ato potai nã apaiyai keskara fakĩ chaka fisti shinãnõfo. <sup>29-31</sup> Chaka fisti feyafakanax chaka shinãkani. Chaka faatanãi xatekanima. Feronãfakefãfe ãto ãfima fichipaikĩ chotamisfo. Kẽrofãferi ãto fenema fichipaikĩ chotamamisfo. Nãskaxõ afara shara ãa atonã fisti fipaikani. Fetsafo chakafakĩ xatekanima. Fetsafo xĩtipaimisfo. Yora retemitsamis ita, setemitsamis ita, feratenã faatanãmisfo. Òitifishkikĩ feyafamisfo. Ato pãrafõsafamisfo. Ato noikaspamisfãfe fetsafonã fiapaikakĩ. Ato noikaspamisfo. Chanĩmisfo fetsafo pãramisfo. Nios noikaspayanã tsoa noimisfoma. Ichamitsamisfo. Kakapaimisfo, ãa kakamepaimisfo. Afara fetsa chaka shinãi iskakani: “Afaa chaka fetsa ã afeska faimẽti,” ixõ shinãkani. ãto apa yafi ãto afa nikakaspakani. Afara shara shinãkanima. A yoiãi keskara amisfoma. ãa chanĩmisfo. Tsoa noikanima. Òitifishkikax fetsaki raemisfoma. <sup>32</sup> “Askakanax nakanax omiskõipakenakafo,” ixõ Niospa anori yoini. Niospa yoiã keskara ãto shinã mẽraxõ tâpifikaxõ afara chaka xatemisfoma. Askata fetsafãfe afara chakafafãfe òikani atoki inimamisfo.

## 2

*Niospa mẽstekõi noko òixõ yoitiro: “Nãto afaa chakafamisma. Akka natori chakafamis,” noko fatiro*

<sup>1</sup> Ëfe kaifo judeofãfe, ã mato yoinõ. Mã fatorafãfe yoi iskakĩ: “Na keskara yorafãfe afara chakafaifo omiskõipakenakafo,” ixõ mã shinãmis. Anori shinãfikĩ mãri ato keskarari afara chakafamis. Nãskata, “Nõ afaa chakafamisma,” mã itiro. <sup>2</sup> Mã nõ tâpia, Niospa ato tâpikõia a yorafãfe chaka shinãifo. Nãskakẽ ato omiskõimaxii. Niospa tâpikõixõ chanĩmakõi yoi. <sup>3</sup> Mã, “Nato afara chakafara,” ixõ mãri mã aki. ¿Nãskakĩ mã shinãimẽ: “Niospa noko omiskõimanimã,” ixõ? Akka nãskakẽ ã mato yoi. Niospa matori omiskõimani mã afara chakafaito. <sup>4</sup> Niospa mato noi. Mã chakafafiaito mato omiskõimarisaifaima. Mato noikikai mato omiskõimapaima. Nãskakẽ, “¿Nã ã ipaiyai keskara ã iki,” ixõ mã shinãimẽ? Askara shinãyamakãfe. Niospa mato noikĩ matõ shinã fetsafaxopai mãto chaka mã xatexõ ãfe meka mã nikasharakõinõ. <sup>5</sup> Niospa mato shinã fetsafaxopafiaito mã nikayospakõi. Mãto òiti mã kerexfaxõ mã Nios nikakaspai. Mãkai mãto shinã mã fetsafapaima mãto

chaka mā xatexiki. Mā askafiaino iskaratīa Niospa mato omiskōimayoima. Akka mā mai keyoaino mato omiskōimaxii mākauroko māto chaka xateano. Nā keyokōi yora chakafo ato omiskōimanaitīari nānori matori omiskōimaxii. Niospa mēstekōi noko ōi. Nāskakē nā yora chakafo ato omiskōimani. Nāskaxori nā yora chakafo ato omiskōimaxō noko ōimaxii. <sup>6</sup>Nā nō imis keskara Niospa tāpikōia. Nāskax nō naano keyokōi noko kopifaxii mā nōko mai keyoaino. <sup>7</sup>Yora fetsafāfe shara shināmisfo a Niospa ato amapaiyai keskara apaikī. Niospa ato inimamatiro. Askatari Nios fe ipaikani. Askara yorafo Nios fe ipanakafō. <sup>8</sup>Akka yora fetsafāfe nā apaiyai keskara shinākani. Niospa meka nikakaspakani. Chaka fisti shinākani. Askarafoki Nios atoki ōitifishkixō ato omiskōimani. <sup>9</sup>Nā chakafamisfo nāfo keyokōi omiskōixikani, judeofo, judeofomari omiskōixikani afara chakafakanax. <sup>10</sup>Nā Nios chanīmara faafo tii Niospa ato imasharaxii a keskara inōfo. Nāskaxō ato yoixii iskafakī: “Māfi sharaki. Mā ea nikasharakōia. Nāskax mā efe isharapakenaka,” Niospa ato faxii. Nānori judeofo yoixii. A judeofomari ato yoixii askafakī. <sup>11</sup>Niospa ōia nāskarafos ōi yorafo, a judeofo ōita a judeofomari nāskarafos ōi.

<sup>12</sup>Akka a Moisés kirika keneni tāpiamato afara chakafaax omiskōipakenaka. Nios fe ipanakama. Askatari a Moisés kirika keneni tāpiato afara chakafaax nāri omiskōipakenaka. Nānori Moisés kenekī yoini: “A afara chakafamisfo omiskōipakenakafo,” ixō Moisés kirika keneni. <sup>13</sup>A Moisés kirika keneni keskara nikafikakī nikakaspaifo. Afokai Niospa shara ato ōima. Akka nā Moisés kirika keneni keskara nikakōiaifo, “Sharafora,” Niospa ato faxii. <sup>14</sup>Moisés Niospa meka a judeofoma ato kirika kenexonima. Askafekē a Moisés keneni keskara judeofomafāfe tāpiamafikaxō āa tāpikōikaxō shara shinākani. Nāskakaxō a Moisés keneni tāpiafo keskara ikafo tāpiamafikanax. <sup>15</sup>Moisés keneni tāpiamafikaxō shināsharaifono fetsafāfe ato ōitirofo Moisés keneni keskara Niospa ato shinā mēra ato shināmana. Akka sharafakaxō shinākakī iskafatirofo: “Ē afaa chakafama,” ixō shinātirofo. Akka afara chakafaxō shinākani iskatirofo: “Oashta, ē afara chakafaa,” ixō shinātirofo. Nāskaxō anā afaa chakafapaikanima. <sup>16</sup>Niospa nōko ōiti mēraxō nō shināito noko tāpikōia. Jesucristori noko tāpia. Akka yorafāfe nōko ōiti mēraxō nō shināito noko tāpiafoma. Nāskakē mā nōko mai keyoaino Niospa noko yoikī iskafaxii māmāi noko tāpixō: “Nafō sharafo. Akka nafori chakafo,” noko faxii. Nāskara ē yorafo yoimis.

### *Moisés judeofo Niospa meka kenexoni*

<sup>17</sup>Ea nikakapo, efe yorafāfe. ¿Mā shinākī iskafatiromē? “Nōrifi nō judeofoki. Moisés keneni keskara mā nō tāpia. Nōfi Niospa afe yorafoki,” mā imis. <sup>18</sup>Moisés kenenioxō Niospa mato amapaiyai keskara mā tāpitiro. Askatari mā asharakōikī mā tāpitiro. <sup>19</sup>Akka mā shināmis iskafakī: “A Moisés keneni tāpiafoma yora fēxo keskarafō. Nāskakē nō ato tāpimasharatiro āto ōiti xafa shara inōfo, anā fakish keskara inōfoma,” ixō mā shināi. <sup>20</sup>“Nā afara shara tāpiamafori nō ato tāpimatiro,” mā iki. Nāskatari, “Nā rama tāpiafori nō ato yoitirora,” ixō mā shināi. Mā shināi iskafakī: “Mā nō Moisés keneni tāpikōia. Nāskaxō nō ato yoitiro noko chanīmara fanōfo,” ixō mā shināi. <sup>21</sup>A Moisés keneni keskara mā ato yoifikī, ¿afeskakīri māri mā nikakōimamē? “Atoki yometsoyamakāfe,” mā ato fafiāi māri mā yometsoi. <sup>22</sup>“Māto āfima fe iyamakāfe,” mā ato fafiāx māri māto āfima fe mā chotanāmis. Askatari yora fetsafāfe afara onifakaxō, “Na nōko niosra,” famisfo. Askafafiaifono mā ato yoimis: “Anā ano Nios fetsama. Nios fisti. Afara yora faxō, ‘Na nōko niosra,’ fayamakāfe,” mā askafamis. Mā ato askafafiai āto nios kīfiti pexefā mēranoax mā yometsomis. <sup>23-24</sup>Māfi yoikī iskafamis: “A Moisés Niospa meka kirika keneni nō tāpikōia,” nā kakapaimisfo keskara mā imis. Askafafiaxōkai a Moisés keneni keskara mā akama. Mā askayamaito ōikakī judeofomafāfe yoikī iskafamisfo: “Niospa afe yorafo judeofo isharafoma. Nāskakē Niosrikai sharama,” ixō yoimisfo. Askafakī matoōxō Nios chakafaifo. Nānori Niospa meka yōra kirika keneni.

<sup>25</sup> Moisés judeofo kirika kenexoni iskafakī: “Māto fake feronāfakefo foshki repa xatekāfe mato tāpinōfo mā judeofokē,” ixō Moisés kirika keneni. Māto fake foshki repa mā xatefixō nā Niospa mato yoini keskara mā nikayamaito Niospa mato ōi judeofoma keskara. Niospa yorafo mā itiroma mā judeofofiax. Nāskarari nā Epa Niospa noko yoini keskara mā ikaito Niospa mato ōi judeokōifo keskara. <sup>26</sup> Judeofoyamafixō Niospa meka nikaifono Niospa judeofo keskara ato ōi afe yorafo keskara. <sup>27</sup> Nā judeofoma foshki repa xateyamafikaxō a Moisés Niospa meka yoikī kirika keneni tāpiyamafikaxō nā Niospa yoini keskara chanīmara fakanax nāskarafofi sharafoki mato keskarama. Akka māfi judeofofixō a Moisés kirika keneni tāpifixō mā nikakōima. Moisés mato Niospa meka yoikī kirika kenexofianino mā nikasharakōima. <sup>28</sup> Māfi judeofo kāinikī. Nāskaxō mā foshki repa xatemis. Akka mā judeofofixō a Niospa yoini keskara mā nikaima. Nāskax mā judeokōifo keskarama. Mā māto feyafatifixō māto chaka mā xatemisma. Nāskaxkai mā Niospa afe yora ikima. <sup>29</sup> Moisés kirika kenekī yoini keskafakī judeofāfe āto fakefo foshki repa xatemisfo ato tāpinōfo judeokōifokē. Akka judeofo atirifāfe Nios shinākanima. Nāfofi judeomakōifo keskara. Nāfokai Niospa afe yorafoma. Akka judeofo atirifāfe Nios shinākani. Nāfofi judeokōifokī. Nāfofi Niospa afe yorafokī. Niospa Yōshi Sharapa noko ōiti fetsafaxōano Nios keskara shara ikafo. A Moisés kirika kenenito noko ōiti fetsafaxotiro. Niospa Yōshi Sharapa noko ōiti fetsafaxotiro. Akka yorafāfe, “Mīfi sharakī,” noko fayamafiaifono Niospa, “Mī sharakī,” noko fai.

### 3

<sup>1-2</sup> ĴNō judeofoxō nōko fakefo nō foshki repa xatemiskē sharamē? Ēje, shara itiro. Akka nōfi judeofo fake kāiniki. Moisés Niospa meka yoikī noko kirika kenexoni. Nāskakē nō inimai nō judeofo. Efe yora mīshtichi, shinākapo. Epa Niospa nā yorafo tii yoipaiyai keskara nōko kaifo taeyoi ato yoiyoni. Noko tāpimanai keskarari nō yora fetsafori nō ato tāpimanō āfe meka. <sup>3</sup> Akka nōko kaifāfe atirifāfe Niospa meka ifo shara fayamaifono akka Niospa a yoiyai keskara amis. <sup>4</sup> Yorafo chanīmisfo. Akka Nios ramashara chanīmisma. Yorafāfe keyokōichi noko pārafiaifono akka Niospa noko pāramisma. Nā David Niospa meka yoikī kirika keneni iskafakī:

Niospa āfe meka mēstesharakōi yorafāfe ōinōfo. A shara shināifo Niospa ato sharafaxōi. Akka a chaka shināifo Niospa ato tāpimakī omiskōimaxii, ixō David yoikī kirika keneni.

<sup>5</sup> Nios fistifi sharakōiki. Nōkai a keskarama. Nāskakē nō chakafaito yorafāfe ōikakī shinātirofo iskafakakī: “Nios iskarama, Niosfi sharakōikī. Na yorafāfe afara chakafakani. Akka Niospa afaa chakafamisma,” ixō shinātirofo. Nāskaxō Nios sharara fakani. Akka nāskaxō āa yora fētsa shinātirofo iskakī: “Ē afara chakafaito ōikakī yorafāfe yoitirofo: ‘Akka Nios iskarama, Nios shara.’ Nāskakē ē chaka shināi yorafāfe Nios sharakōi ōinōfo ea keskarama. Nāskakē Niospa ea omiskōimatiroma ē chakafafaito,” ixō yora fētsa shara shināima. Nāskara shinākī yōra shināi keskara shināi, Niospa shināi keskara shināima. <sup>6</sup> Nios chakama. Nios mēstekōi ika. Akka mēstekōi iyamaxō yorafo yoikeranama iskafakī: “Nafo sharakōifoki. Ē ato sharafaxōi. Akka nafori chakafo. Ē ato omiskōimani,” ixō Niospa yoikeranama mēstekōi iyamaxō. <sup>7</sup> Yora fētsa āa shināi iskatiro: “Yorafāfe ea yoitirofo ē chanīaito ōikakī. Iskafakakī ea yoitirofo: ‘Mī Nios keskarama. Nios chanīmisma. Nios mēstekōi ika,’ ixō ea yoitirofo. Akka ē chanīaito ōikakī fetsafāfe, ‘Nios sharakōi, mia keskarama,’ ea faxikani. Nāskakē ē shinātirofo iskafakī, Niospa ea yoitirofo iskafakī: ‘Mī afara chakafafaito ē mia omiskōimaxima,’ ea Niospa fatiro,” ixō āa yōra anori shināi. Anori Niospa yoiyamafiano āa shināi askatiro. <sup>8</sup> Iskafakakī yoipaikani: “Nō afara chakafanōkāfe. Nō afara chakafaito ōikakī yorafāfe, ‘Nios sharara,’ fanōfo,” ixō yoipaikani. “Nā Pablori anori yoimiski nō afara chakafanō,” ixō yoikani. Āa chanīmisfo. Ēkai anori yoimisma. Epa Nios chanīmisma. Nā keskara yorafo ato omiskōimaxii.

### *Nō keyokōichi chakafamis*

<sup>9</sup> “Nō judeofo sharakōifo. Akka nā judeofoma sharafoma,” ē faima. Askatamaroko ē iskafakī yoimis: “Nōfi nā judeofoma ōitsa, nāskarafos nō. Nō keyokōichi afara chakafamis. Nāskakē Niospa ato yafi noko omiskōimaxii noko tāpimakī,” nānori ē yoimis. <sup>10</sup> Niospa meka yoikakī kirika kenenifo iskafakakī:

Tsoa pishtakai nā Niospa yoia keskara famisma. <sup>11</sup> Tsoa pishtakai Nios shināpaikanima. Tsōakai Nios tāpipaisharakanima. <sup>12</sup> Tsoa pishtakai anā Nios Ifofapaikanima. Afara chaka fisti fapaikani. Afara sharakai tāpiafoma. Tsōa pishtakai sharafamisma. Fato fisticikai shara Ifofaima. <sup>13</sup> Yora naax maiax fepekemeax pisi kāitiro. Nāskarifiakī nōko axfapa meka chaka fisti nō yoimis. Mā nō ato pārakī feyafamis. Nā rono paekapato noko chachiano nō paemetiro keskarari nōko meka chakaōnoax omiskōixikani. <sup>14</sup> Nō ato fekaxtefapaikī meka mitsisipato fisti nō mekamis. Nō ato ĭchari famis. <sup>15</sup> Tsoa afayamafekē nō ato retepaimis. <sup>16</sup> Nōa kafāsakī nō ato omiskōimafofāsafamis. Nōa nō ato fekaxtefaafofāsafaki. <sup>17</sup> Yora fetsafokai nō ato raefapaimisma ato fe isharaxikima. <sup>18</sup> Nōko shinā mēranoaxkai Nioski nō rateima. Āfe meka nō nikapaima. Nōko chaka nō xatepaima, ixō nāskara yoikī kirika kenenifo.

<sup>19</sup> Mā nō tāpia a Niospa yoia keskara Moisés noko kirika kenexoni. Akka tsōakai Niospa meka nikakōimisfoma. Nāskaxō tsōa yoitiro ma iskakī: “Ēfi afaa chakafamismaki. Ē shara imis,” tsoa itiro ma. Akka Niospa noko yoitiro iskafakī: “Māri afara chakafamiski,” keyokōi noko fatiro. <sup>20</sup> Nāskakē Niospa meka a Moisés noko kenexoni nō nikapafiaito, Niospa noko yoikī iskafatiroma: “Mā shara imiski,” noko fatiro ma. Akka tsōa āfe meka nikasharakōima. Āfe mekaoxō nō tāpitiro keyokōichi nō chakafamisfo.

### *Jesucristo chanīmara faax nō Nios fe ipaxatiro*

<sup>21-22</sup> Iskaratīa Niospa noko afara fetsa tāpimana. Noko xafakīa ōimana afeska faxō noko imasharatiromākī a keskara shara nō inō. Moisés kenenioxō noko shara imaima. Akka nō Jesucristo chanīmara fakē Niospa noko shara imatiro Jesús māi noko nāxonikē nōko chaka noko soaxoxiki. Nānori Niospa meka Moisés yoikī kirika keneni. Niospa meka yoimisfāferi nānoriri kenenifo. Nā keyokōichi Jesucristo chanīmara faifo Niospa ato shara imai. Judeofo, judeofomafori Niospa shara imatiro Jesús chanīmara faifāfe. <sup>23</sup> Keyokōichi mā nō chakafamis. Tsoa Nios keskarama. Nios sharakōi. Afaakai chakafamisma. A keskarakai tsoama. <sup>24</sup> Nāskakē Niospa noko noikī nōko chaka noko soaxotiro nō Jesucristo chanīmara faino. Akka Jesucristo nōko chakaōnoax noko nāxonni. Nāskaxō nōko chaka noko soaxoni. Nō afaa kopifatiroma Niospa noko shara imanō. <sup>25</sup> Āfe Fake Jesucristo nīchini āfe imi foax nōōnoax nanō nōko chaka noko soaxoxiki. Nāskaxō Niospa noko omiskōimanimā. Nō Jesús chanīmara faino Niospa nōko chaka noko soaxoni nō shara inō. Nāskaxō nō ōitiro Nios sharakōi. Jesús nayoamano chakafafiaifono Niospa teneyoni. Ato omiskōimayonima Niospamāi tāpixō āfe Fākemāi chipo ato nāxoxiaino Niosmāi mēstekōi ixō. <sup>26</sup> Jesús nōko mai ano oax noko nāxonni. Nāskakē nō chanīmara faito Niospa nōko chaka noko soaxoni noko imasharai. Nāskaxō Niospa noko ōimasharai amāi mēstekōi ixō.

<sup>27</sup> Nāskaxō tsōa yoitiro ma iskafakī: “Ēfi sharaki, fetsafo keskarama. Nāskax ē Nios fe ipanaka,” ixō tsōakai yoitiro ma. Moisés kirika kenekī yoini keskara nikafixō tsōa anori yoitiro ma. Jesucristo noko nāxonni nōko chaka noko soaxoxiki nō shināsharanō. Nāskakē nō Jesús chanīmara faino, “Jesús nōko chaka noko soaxoni nō afe ĩpaxanō,” ixō nō yoitiro. <sup>28</sup> Nāskakē anā nō mato yoi. Jesucristo nō chanīmara fakēma a Moisés kirika keneni keskara nō ifofafiaito nōko chaka noko soaxonima. Akka nō Moisés meka nikaito Niospa, “Mī afara sharafamiski,” noko fatiro ma. Akka nō Jesús chanīmara faito, “Mī Jesúsnoax isharakōimis,” noko fatiro.



<sup>29</sup> Nāskakēri, ¿Niospa judeofo fisti ato ifitiromē afe yora inōfo? Maa, judeofomafori ato ifitiro Jesús chanīmara faifono afe yora inōfo. <sup>30</sup> Niosfi fistiki. Judeofori, judeofomafāferi Jesús chanīmara fakanax Nios fe nipanakafo ato chaka soaxonano. <sup>31</sup> ¿Nō Jesús chanīmara faxō a Moisés kirika keneni nō potatiromē? Maa, nō potatiroma. Jesús chanīmara faxō a Moisés Niospa meka yoikī kirika keneni nikakī nō chanīmara fatiro.

## 4

### *Abraham Nios chanīmara fakōini keskara yorafāferi keyokōichi Nios chanīmara fatirofo*

<sup>1</sup> Akka nōko xini Abraham ipaoni keskara ē mato yoinō. <sup>2</sup> Abraham afara sharafaōxokai Niospa āfe chaka soaxonima. Akka Nios chanīmara faito Niospa āfe chaka soaxoni. “Mī afara sharafaito nāskakē ē mia ifitiro mī efe yora inō,” ixō Niospa anori yoinima. Akka Niospa anori yoiano Abraham yoikerani: “Ē afara sharafaito ea Niospa chaka soaxona,” ixō yoikerani āa kakapaikī. Akka anori Niospa yoinima, nā Niospamāi mā āfe chaka soaxonano chanīmara faito. <sup>3</sup> Niospa meka yoikī Moisés kirika keneni iskafakī: “Abraham Nios chanīmara faito Niospa āfe chaka soaxoni. Nāskakē Niospa yoini iskafakī: ‘Mī afaa chakafamisma keskara ē mia ōi,’ Niospa fani.” Nāskakē Moisés kirika keneni. <sup>4</sup> Akka feronāfāke yora fetsa yonomaxō kori inātiro, kaxpa inātiro. <sup>5</sup> Akka nō afara sharafaōxokai Niospa nōko chaka noko soaxonima, nō afaa chakafamisma keskara noko ōixiki. Askatamaroko nō Jesús chanīmara faito Niospa nōko chaka noko soaxotiro. <sup>6</sup> Nāskarari David yoini iskafakī: “Mā Nios chanīmara faito oa afaa chakafamisma keskara Niospa mato ōitiro a Moisés keneni keskara mā nikakōiyamafiaito. Nāskax mā inimatiro.” David anā yoini iskafakī:

<sup>7-8</sup> Fatora yora Niospa āfe chaka soaxonano inimatiro Niospamāi ōiaino afaa chakafamisma keskara. Mā Niospa yora āfe chaka soaxō Niospa anā shināchakaima a yōra afara chakafapaoniōnoa. Nāskax yora inimakōitiro Niospamāi mā āfe chaka soaxonano, ixō David yoini kirika kenekī.

<sup>9</sup> ¿Nā judeofo fisti Niospa āto chaka ato soaxotiro? Maa, anorima. Judeomafāferi Nios chanīmara faifāfe ato chaka soaxotiro afori inimanōfo. Nāskakē Niospa meka yoimisto kirika keneni iskafakī: “Abraham Nios chanīmara faito Niospa sharakōi ōini,” ixō a Niospa meka yoimisto kirika keneni. <sup>10</sup> Akka taeyoi Abraham foshki repa xateyoamano Niospa yoini iskafakī: “Mī ea chanīmara fai nā mī afaa chakafamisma keskara ē mia ōi,” Niospa fani. <sup>11</sup> Nios chanīmara faito Niospa Abraham āfe chaka soaxoni afaa chakafamisma keskara ōixiki. Nāskaxō chipo Abraham foshki repa xatenifo fetsafāfe tāpinōfo Nios chanīmara faino. Akka taeyoi Abraham Nios chanīmara fani askayoxoma. Nāskaxō chipo foshki repa xateni. Taefakī Abraham Nios chanīmara fani Niospa fake ixiki. Nāskano a chipo Nios chanīmara faifo Abraham āfe fenafo. “Abraham nōko xini ipaoni,” fatirofo. Abraham keskara nō foshki repa xateyamafixō nō Nios chanīmara faito Niospa noko chaka soaxotiro afaa chakafamisma keskara noko ōixiki. <sup>12</sup> Abraham askayoxoma Nios chanīmara fani. Nāskaxō foshki repa xateni. Nā Abraham judeofāfe āto xini ipaoni. Judeofo a Nios chanīmara faafāfe nāfāfe āto xinikōi Abraham nafāferimāi Nios chanīmara fakanax.

### *Niospa noko yoiai keskara noko axōi*

<sup>13</sup> Niospa Abraham yoini: “Ē mia yafi mī fenafo keyokōi ē mato mai ināikai,” fani. A Moisés kirika keneni Abraham nikaito Niospa mai inānima. Akka Nios chanīmara faito Niospa mai ināni. Nāskaxō Abraham Nios chanīmara faito Niospa āfe chaka soaxoni, afaa chakafamisma keskara shara ōikī. <sup>14</sup> Fetsafāfe anorima shinātirofo iskafakakī: “Nō Moisés kirika keneni nikaito Niospa a yoiai keskara noko axotiro. Akka Jesús fisti nō chanīmara faito Niospa noko axotiro. Kaxpa nō Jesús shināi,” ixō anorima shinātirofo. Akka nōroko Jesús chanīmara faito Niospa yoia keskara noko axosharatiro Jesúsmāi

nōko Ifoxō. <sup>15</sup> Akka Niospa meka a Moisés yoini keskara nō nikayamaito Niospa noko omiskōimatiro. Akka Niospa noko afaa yoiyamanino nō nikayospa ikeranama. Akka iskaratīa nō nikayospakōifo mā nōmāi Moisés kirika kenei tāpiax.

<sup>16</sup> Taeyoi Niospa Abraham yoiyoni Nios chanīmara faino. Nāskakē Niospa afama mīshti axoni a yoiyoni keskafakī. Niospa Abraham afaa yōkanima afama mīshti axosharaxō. Akka Abraham āfe fenafori Niospa ato noikī nāskaxō afama mīshtiri ato axosharai a yoiyoni keskafakī. A Moisés yoini keskara nikakōiaito Niospa afama mīshti axosharanīma. Akka Nios chanīmara faito Niospa axosharani. Nāskarari a Abraham keskarafo Nios chanīmara faifori Niospa ato shara faxōi. Akka Abraham nōko xinikī nōmāi Nios chanīmara fai Abraham ipaoni keskara. <sup>17</sup> Niospa Abraham yoini keskafakī, yora fētsa kirika kenei iskaratīa: “Nā yora ichapakōifo āto apa keskarakōi mī inō,” ixō kirika kenei. Abraham Nios chanīmara fani. Askaxō Abraham nōko epa keskara Niospa ōi. Niospa nā namisfori anā otofatiro. Nāskaxō Niospa afama mīshti onifatiro tsōa ōimismafo. Nāskakē Abraham Nios chanīmara fani.

<sup>18</sup> Nāskax Abraham anifokōi ini anā fake atiromaxakī. Nios chanīmara faito Niospa yoini: “Mī chipo fake fixii. Mī fenafori ichapa rasi kaixikani,” ixō Epa Niospa yoini keskara Abraham chanīmara fani. Nāskax, “Yorafāfe āto xini mī iki,” Niospa fani.

<sup>19</sup> Nāskax Abraham anifokōi ini. Cien xiniya aka. Sara āfe āfiri yōxafokōi ini. Anā yōxafxō fake fitiroma ini. Nāskafixō Abraham Nios chanīmara fani. “Ē anifokōi, ē anā fake fitiroma,” ixō Abraham shinānima. “Akka Niospa tsōa atiroma keskara fatiro,” ixō Abraham shinākī Nios chanīmara fani. <sup>20</sup> “Mī āfi Sara fake nanexii,” ixō Niospa yoini. Niospa nāskara yoiaito nikakī Abraham Nios chanīmara fani. Niospa askafafiaino, “Ēfe āfi yōxafokōia. Anā fake nanetiroma,” ixō Abraham shinānima. “Niospa ea yoia keskara ea axotiro. Aicho, Nios fāsi sharakōi,” fani. <sup>21</sup> Niospa axōai keskara fakī Nios chanīmara faxō Abraham afaa fetsakai shinānima. <sup>22</sup> Nāskakē Niospa yoini: “Mī ea chanīmara fai afaa chakafamisma keskara ē mia ōi,” Niospa fani.

<sup>23</sup> Niospa Abraham askafaniōnoa yōra kirika kenei iskaratīa: “Nios chanīmara faifāfe afaa chakafamisfoma keskara Niospa ato ōi,” ixō Abrahamnoa fisti kirika kenenima. A Nios chanīmara faifo Niospa ato ōi afaa chakafamisfoma keskara māmāi āto chaka soafono. <sup>24</sup> Nokori askara kenexoni nō Nios chanīmara faito. “Nōko Ifo Jesús naafiakē Niospa otofani,” nōri chanīmara fakē, afaa chakafamisma keskara Niospa noko ōi. <sup>25</sup> Nōko chakaōnoax Jesús nani nōko chaka noko soaxoxiki. Askata mā otofaano aōnoax afaa chakafamisma keskarafo nō ixii.

## 5

### *Nō Nios chanīmara faito afaa chakafamisma keskara Niospa noko ōi*

<sup>1</sup> Nōko Ifo Jesucristo nō chanīmara fakē nōko chaka noko soaxonano aōnoax nō Nios fe isharapakexatiro. <sup>2</sup> Nō Jesús chanīmara faito noko noikī Niosya noko rafemani. Nāskakē, “Ē Nios ikano kaax ē a keskara shara itiro,” ixō nō shināi nō akiki inimakōitiro. <sup>3</sup> Askatari Jesúsnoax omiskōi nōko shinā mēra nō inimakōitiro. Askax nō a keskara nō itiro. Omiskōifaito Jesús āfe shināmā nōko shinā mēra noko mitsisfamaxotiro nō tenenō. <sup>4</sup> Akka Jesúsnoax omiskōikī nō tenei nō yora finakōia ipainākafatiro anā chaka shināyamaxiki. Nāskakē Nios nokoki inimai. Nokoki inimaino nō tāpia nō afe ĩpaxanō. <sup>5</sup> Nō askara shināi nō rāfitiroma Niospamāi a yoia keskara noko axōaino. Akka noko Niospa noikōikī āfe Yōshi Shara nōko shinā mēra noko nanexotiro.

<sup>6</sup> Akka nōa nōko chaka nō soametiroma. Nāskakē Niospa āfe Fake nīchipaiyaitīa nai mēraxō nāmā nīchini yora chakafoōnoax naaxinō. <sup>7</sup> Tsōakai yora fetsa nāxopaitiroma sharafiano. Ētsa, itiro rakikīa yora nai yora sharafoōnoax. <sup>8</sup> Akka nō chakafokē Niospa āfe Fake nīchini noko nāxonō. Nāskakē nō tāpitiro Niospa noko noikōiai. <sup>9</sup> Askax nōōnoax naano āfe imi foni. Nō chanīmara fakē afaa chakafamisma keskara noko ōi noko chaka

soaxō. Akka nō chakakē Jesús nōñoax nani. Nāskakē iskaratīa mā nō chanīmara fakī finakōia. Anā nokoki Nios ōitifishkikī noko omiskōimaxima. <sup>10</sup> Askata nō Nios noikaspaino āfe Fāke noko nāxoni Nios fe nō rafenō. Nāskax nō iskaratīa Jesús afe yorafo nō afe rafekōia. Askaxō noko sharafakī finakōi. Jesús nakē Niospa anā otofani, nōri afe nipaxanō. <sup>11</sup> Akka nō Nios noikaspayoni. Iskaratīa mā nōko Ifo Jesucristoōxō noko raefaa nō afe isharakōia. Nāskakē Jesús Nioski noko inimamasharakōia.

*Adáōxō yorafāfe keyokōichi chakafamisfo. Akka Cristo nōko chaka noko soaxotiro*

<sup>12</sup> Niospa nā feronāfake Adán taefakī onifani. Nā Adán taefakī afara chakafani. Nāskakē aōxō afara chakafapafo. Nā Adán afara chakafaniōnoax keyokōi nō natiro nōmāi keyokōichi afara chakafaax. <sup>13-14</sup> Mā Adán afetiama naniano Moisés Niospa meka yoini kirika keneni afe keskara nō niimākai. Akka Niospa Moisés yoiyoamano keyokōichi chakafayopaonifo. Nāskax mā nai keyonifo. Fetsafāfe chakafafiakaxō Moisés kirika keneni tāpipaonifoma. Askafafiāifāfe oa afaa chakafamisfoma keskara Niospa ato ōini tsōakairoko āfe meka tāpikē. Adán keskara foma. Adán Niospa meka tāpifiāx nikayospani. Nāskaxō Adán chakafakī taefani. Nāskarifiakī yorafāfe keyokōichi chakafamisfo. Akka nāskax mā nai keyokani, Adánmāi taeyoi nanikē. Nāskarifiāi Cristo oni yora chakafoōnoax naiyoi. Nāskakē yorafo aōnoax nīpaxatirofo.

<sup>15</sup> Akka Jesucristo Adán keskarama. Adán Nios nikakaspax nani. Nāskakē nōri aōnoax natiro. Akka Jesúsxō Niospa yorafo noikōikī ato imasharapakenaka afaa chakafamisma keskaramāi ato ōikī. Akka nā Adán nai taeni afara chakafaax. Nāskax yorafo Adánnoax nāpanakafo. Akka Jesús Ifofakanax Jesús fistiōnoax keyokōi isharapakenakafo. Jesúsxō Niospa ato raefatiro a chanīmara faafo tii. <sup>16</sup> Adán afara chakafaniōnoax yorafo nai keyotirofo. Nāskatari āto chakaōnoaxri nai keyotirofo. Akka nō keyokōichi chakafakē Niospa noko omiskōimatiro. Nā Adán ani keskarakai Cristo afaa chakafamisma. Mā nō keyokōichi afara chakafamiskē Jesucristoōxō Niospa noko noikī nōko chaka noko soaxotiro afaa chakafamisma keskara noko ōikī. Omiskōitamaro nō afe isharapakexanō. <sup>17</sup> Adán āfe chakafoōnoax keyokōi nakani. Akka Cristo fisti nokoōnoax nani nō aōnoax Nios fe nīpaxanō Niospamāi noko shara ōiaito. Jesucristoōxō Niospa noko noixō noko nimapakenaka. Nāskakē noko askafaxōkī Jesús Adán finōkōia.

<sup>18</sup> Nāskakē ē mato yoiai keskara nā feronāfake Adán āfe chakaōxō keyokōi Niospa noko omiskōimani. Akka Jesús kai afaa chakafamisma. Nāskakē nā chanīmara faafo tii Nios fe nīpanakafo. Nāskakē nā afaa chakafamisma keskara Niospa ato imai. <sup>19</sup> Akka nā feronāfake Adán Nios nikakaspakī taefani. Nāskax Adán nikayospakōi taeyoi ini. Keyokōichi aōxō nō chakafapamis. Akka nā Cristo fistichi ares Nios nikakōimis. Afaakai chakafamisma. Nāskakē nā chanīmara faafo tii aōnoax afaa chakafamisma keskarafo ipanakafo.

<sup>20</sup> Moisés Niospa meka yoikī ato kirika kenexoni afara chakaōnoa tāpinōfo. Akka nā Moisés ato kenexoni mā ōifikakī a Niospa ato yoia keskara tsōa nikakōikanima. Keyokōichi afara chakafamisfo. Mā chakafakī finafiāfono Niospa ato noisharakōixō āfe Fake atoki nīchini ato chaka soaxonō. <sup>21</sup> Afara chaka fisti shinākani namisfo. Akka Niospa noko noikōia. Nāskakē āfe Fake Jesús noko nāxoni nōko chaka noko soaxoxiki. Nāskakē nō Jesús chanīmara faito Niospa afaa chakafamisma keskara noko ōi. Noko chaka soaxonano nō afe ipanaka.

## 6

*Cristo nia keskara nōri afe nīpatiro*

<sup>1</sup> Akka yorafāfe atirito shinākakī iskakani: “Nō afara mēxotaima chakafafiaino Epa Niospa noko noikī nōko chaka noko soaxotiro. ¿Nāskakē nō afara chakafa fafāfāitiro,” ixō anori shinākani sharamē? Maa, sharama. <sup>2</sup> Nāskakē afara chaka shināyamakāfe. Nō Jesús

chanĩmara faxõ mã nõko chaka nõ pota. A nõ ipaoni keskara nõ anã shinãpaima. <sup>3-4</sup> Mã mã tãpia noko maotisafani nõ fetsafo õimanõ. Nãskax nõ a Jesús fe naa keskara nõ chaka ipaoni keskara anã shinãima. Nãskakẽ nõko chaka soapaikĩ nõ Jesús chanĩmara faino noko maotisafani. Jesús nokoõnoax naano maifanifo. Nãskax nõ afe naa keskarax nõri maia keskara. Akka Jesús naax otoiñakafata Apa ari kani. Nõri nono mai anoax Jesúsnoax ari nõ katiro. Askaxõ Apa Niospa mã Jesús otifaxõ noko õimani nãatomã afama mĩshti fatiroxakĩ. Nõko õiti noko fetsafaano a nõ ipaoni keskara nõ anã itiroma, a keskara sharakõ nõ ipai.

<sup>5</sup> Cristo nõkoõnoax nani. Nã nõ chanĩmara faax nõ afe rafetiro. Nãskakẽ Jesucristo nakẽ Apa Niospa otofani keskafakĩri anã otofatiro, a keskara shara nõ inõ. <sup>6</sup> Jesús mastanifo nõko chaka noko soaxonõ. Nõri Jesús fe masta keskarakõ anã chakafapaima. Nãskarifiã nõ Jesús Ifofaax nõ afe naa keskara. Nãskaxõ nõ anã chaka shinãima. Afara chakafo nõko ifoma. <sup>7</sup> Akka yõra nãxokai anã chaka shinãtiroma. Nãskarifiã nõri chaka shinãtiroma afara chakakairoko nõko ifokẽ.

<sup>8</sup> Nõ Cristo fe naa keskaraxõ nõ Jesús chanĩmara faax nõ afe isharapakenaka nãmã nõ chanĩmara faax. <sup>9</sup> Mã nõ tãpia Cristo mã nafiano Niospa otofani. Nãskax anã natiroma. Anãkai afeskaõ Cristo natiroma. <sup>10</sup> Akka nai fistinixakĩ nõko chaka noko soaxoni anã afara chaka nõko ifo inõma. Nãskakẽ iskaratĩa Cristo mã nia. Nãskaxõ mã Niospa apaiyai keskafai.

<sup>11</sup> Mãri Cristo fe naa keskara. Nãskakẽ iskaratĩa mã shinãtiro iskakĩ: “Ë chaka ipaoni keskara anã shinãpaima. Nãskax ã iskaratĩa Jesucristoõnoax Epa Nios fe rafe kakaini ea amapaiyai keskara axiki,” ixõ anori shinãkãfe. <sup>12</sup> Nãskaxõ afara chaka anã ifofayamakãfe afara chaka mato famapai kiki a keskara mã anõma. <sup>13</sup> Nãskax Niosnoax isharakãfe. Afara chaka mato famapaiãito nikayamakãfe. Afara chakafamis iyamakãfe. Nios Ifofakãfe mato sharafanõ. Iskafakãfe: “Nios ãfe Ifokõixõ ea amapaia keskara ã aki sharafakĩ.” <sup>14</sup> Akka anã afara chakapa mato afeska fatiroma. Afara chaka anã mãto Ifo itiroma mã mã Cristo chanĩmara faano. Epa Niospa mato noikĩ ares fisti mato ifitiro mã afe ipaxanõ. Akka mã Moisés kirika kenenioõnoaxkai mã Nios fe ipaxatiroma.

*Epa Niospa mato amapaiyai keskara mã nikakõiyã mã yonoxokõitiro*

<sup>15</sup> Moisés yoini keskara nõ nikaito Epa Niospa noko nimasharaima. Akka Cristo nõ chanĩmara feito noko noikĩ noko nimasharatiro. Nã fisti nõko Ifo itiro noko chaka soaxonano. Nãskatari, ¿nõ afara chakafa fafãitiromẽ Niospa noko noikĩ nõko chaka soaxonõ? Maa, nõ afaa chakafatiroma. <sup>16</sup> Mã tãpia ãfe yonomatixõ mãto ifo nikakõiyã mã yonoxotiro. Nãskarifiã mã katotiro fatomãkĩ mãto Ifo. Epa Nios mã nikakõitiro ãfe yonomati ixii, askayamai chaka mã katoax mã ãfe yonomati mã itiro. Chaka katoax mã naax mã omiskõixii, mã Nios fe nipanakama. Askatamaroko Epa Nios nikakõiax mã afe isharapakenaka. <sup>17</sup> Mã afara chaka ifofaax ãfe yonomati mã ipaoni. Akka iskaratĩa mã mã Epa Nios Ifofaa. Mato yoimis keskara mãto shinã mẽraxõ mã nikakõimis. ¡Aicho! Mã mã Epa Nios Ifofaano mato nimasharamis. <sup>18</sup> Nãskakẽkai afara chaka anã mãto ifo itiroma anã mato yonomatiroma. Akka iskaratĩa afara shara fisti mãto ifo itiro. Mãfi ãfe inakõifoki. <sup>19</sup> Ë mato meka fekax yoima, mãto ifoõnoa ã mato yoinõ mã tãpisharakõinõ. Chaka fetsa fetsatapafõ mãto ifo ipaoni. Nãskaxõ mã afara chakafakĩ finakõipaoni. Akka iskaratĩa Epa Niospa ãfe inafõ, mã. Anã afara chakafayamakãfe afara shara fisti mãto ifo inõ.

<sup>20</sup> Taeyoi afara chaka mãto ifo ipaoni. Nãskakẽ afara shara mã shinãpaonima mãto ifo ipanã. <sup>21</sup> ¿Mã ipaoni keskara sharamẽ? ¿Mato imasharapaonimẽ? Maa, a nõ ipaoni keskarakai anã afokai nõ shinãpaima. Afo nõ shinã nõ rãfitiro. Nã chakafo xateyamax mã nõ naitĩa mã omiskõipakenakafo mẽra nõ katiro. <sup>22</sup> Nãskakẽ iskaratĩa afara chaka anã mãto ifoma. Epa Nios mãto Ifo. Mãfi ãfe yonomatifoki. Mã ãfe yonomatifokẽ mato sharafa

fafafāini a keskara shara mā inō mā afe ĩpaxanō. <sup>23</sup> Nā afara chaka nōko ifono, ¿afanā noko kopifaimē? Akka aōnoax nō naax nō omiskōipakenaka. Akka Jesucristo nō Ifofaino Epa Niospa noko afaa kopi yōkaima nō afe nipaxanō.

## 7

### *Nō anā chaka ifofaxoma nō Cristo Ifofatiro*

<sup>1</sup> Efe yorafāfe, mā mā tāpia nōko xanĭfokōichi noko yoia keskara nō nikatiro. Nō niyoxō nō nikatiro. Akka mā nō naxō nō anā nikatiroma. <sup>2</sup> Nāskarifiāi kēromā āfe fene niyoano enetiroma. Akka mā fene naano fetsa fe fianātiro ixō anori Moisés yoini Niospa meka. <sup>3</sup> Akka fene niyoanokai kēromā fene eneta fetsa fe fianātiroma. Askarafi chakakī. Chota feroma itiro. Akka fene naano kēro feronāfake fetsa fe fianā askara shara, ixō Moisés keneni.

<sup>4</sup> Akka mā fenē naxō anā āfe āfi yonomatiroma. Nāskarifiakī mā Cristo fe naa keskarax a Moisés kirika keneni anā mā nikatiroma. Akka mā Cristo fe naa keskarax mā yora fena sharakōi itiro Cristo māto Ifono. Mā Cristo naax otoiñakafanax Nios fe ipanaka. Nāskaxō afara shara mato amatiro mā Nios yonoxonō. <sup>5</sup> Nō Cristo Ifofamatai afara chaka fetsa fetsatapafo nō ayopaoni. Moisés keneni keskara atama nō chaka fisti shināpaipaoni. Nā chakaōnoax nō naxii. <sup>6</sup> Cristo noko nāxonī nōko chaka noko soaxoxiki nō fena shara keskara inō. Nāskakē nō Cristo Ifofaax mā nō afe naa keskarakōi. Nō afe naa keskarax nō yora fena shara iki. Afara chaka anā nōko ifoma. Askatamaroko āfe Yōshi Sharaōxō Niospa noko amapaiyai keskara noko amatiro. A fisti nō Ifofai, a Moisés keneni keskara ifofayopaonixaki anā nō ifofatiroma.

### *Moisés kenenioxō nō tāpia nō chakafamis*

<sup>7</sup> Iskafakī shināyamakāfe. A Moisés noko kenexoni, chakara fayamakāfe. Akka Moisés Niospa yoini keskara keneyamanikēkai nō chakafamis nō tāpikeranama. Moisés keneni iskafakī: “Yora fetsanā afara ĩapayamakāfe. Nō yora fetsanā ĩapaikī nō chakafai,” Moisés anori keneyamanikē nō tāpikeranama. <sup>8</sup> Moisés anori keneni tāpifixō nōko ōiti chakakōikē nō shināsharaima. Nōkonāyamafekē nō fichipaimis. Afara chakafori nō fichipai. Akka Moisés Niospa meka keneyamanikēkai nō nikayospa ikeranama. <sup>9</sup> Niospa meka tāpixoma afara chakafafiakī nō shināma. Askata chipo nō āfe meka tāpifixō nō akama a noko yoia keskara. Nāskafaxō āfe mekaōxō a nō afara chakafamis nō tāpitiro. <sup>10</sup> Niospa yoia keskara akax nō nipaxatiro. Niospa yoiai keskara nō akima mā tāpifiāx, askax nō omiskōi. “Moisés keneni keskara ayamax nō natiro,” ixō nō shināmis. <sup>11</sup> “Epa Niospa noko yoia keskara nō aki. Nāskai nō Nios fe nīpanaka,” ixō nō shināfikī nō afara chakafakī nō xateama. Akka chakapa noko pārai. Nāskakē nō tāpia nōko chakaōnoax nō omiskōi nō Nios fe nīpanakama.

<sup>12</sup> Moisés keneni keskara sharakōi nāmāi Niospa meka. Niospa meka mēstekōi, chanīmakōi. <sup>13</sup> A Moisés keneni sharafianokai a keneni keskara nō nikasharamisma. Moisés kenenioxō nō tāpitiro nō chakafamis. Moisés keneni ōifikī, ¿afeskafaxō nōko chaka nō potatiromē? Nāskax nō naax nō omiskōipakenaka. ¿Moisés kenenioānoax nō omiskōipakenakamē? Maa, askarama. Akka nō Nios nikakaspax nō omiskōipakenaka. A Moisés keneni sharakōi, Niospa meka. Moisés kenenioāxō nō tāpia nō nikayospakōi. Nō Niospa meka nikakōimisma. Nāskax nō chakakōi.

*Nōakōi nōko chaka xatepaifikī nōko shinā mēraxō nō xatetiroma. Nōko shinā mēra chakakōi*

<sup>14</sup> A Moisés Niospa Yōshi Sharapa shināmanaino noko kenexoni. Niospa meka nō shināyamai nō sharama. Afara chakafi nōko ifokī nō āfe yonomati. <sup>15</sup> ¿Afeskai nō iskamismē? Nōkai tāpiama. Nō sharafapaiyai keskara nō akima. Akka nō akaspafiakī nō aki. <sup>16</sup> Moisés keneni keskara nō nikapai, “Nā meka shara,” shinākī. Askara shināfikī nō akima. Nā afara chakafapaiyamafikī nō aki. <sup>17</sup> Nōakai nō afara chakafapaima. Akka

nōko shināmā nō shinākī nō afara chakafamis. Afara sharafapaifikī nō shināsharaima, nōko shinā mēramāi chakakōikē. <sup>18</sup> Mā nō tāpia nōko shinā mēra sharama. Isharapaifi nō itiroma. <sup>19</sup> Akka a nō akai keskara sharama. Nā sharafapaifikī nō amisma. Nā afara chakafapayamafikī nāskara nō amis. <sup>20</sup> Nāskakī a nō akaspai nō aki. Nōakōi nō afara chakafapaima. Nō chaka potapaifikī nō potatiroma nōko shinā mēramāi chakakōikē. <sup>21</sup> Akka nō askamiski. Nō sharafapaifaito nōko shinā mēraxō afara chakapa noko fakirira shināmapai nō shara shinānōma. Nō keyokōi askamis.

<sup>22-23</sup> Nōa nō iskafai: “Aicho. Niospa noko yoiai keskara shara,” ixō nō shināfi nō nikayospamis afara chakapamāi noko fekaxtefaito. Niospa meka nō tāpifiax nō nikayospamis. Nōa nō sharafapayai keskara nō atiroma. Nō chaka xatetiroma. <sup>24</sup> Nāskakēkai ē inimaima. Ē shināchakai. Ēfi feronāfake chakakī. Ē inimaima. Ēfe shinā mēraxō ē afara chakafaax ē omiskōixii. Ooa. ¿Tsōa nō Ifofatiromē nōko Ifokōi inō, afara chaka anā nōko ifo inōma? <sup>25</sup> Aicho Epa Nios. Ēfe Ifokōi Jesucristoōxō ēfe chaka ē xatetiroki. Iskaratīa ē tāpia Niospa meka nō ifofapaifikī afeska faxō nōa nō atiroma nōko shinā mēramāi chakakē. Akka Jesucristoōxō nō atiro.

## 8

### *Niospa Yōshi Sharaōnoax nō ika*

<sup>1</sup> Akka Jesucristo nōko Ifono nō afe yora. Nāskakē Epa Niospa noko yoima iskafakī: “Mā chaka. Ē mato omiskōimanō. Emakinoax fotakāfe omiskōipakenakafo mēra nānoax mā omiskōipakenaka,” ixō noko yoipakenakama māmāi nōko chaka noko soaxō, <sup>2</sup> Jesucristoōxō Niospa āfe Yōshi Sharapa noko nimasharai anā chaka nōko ifo inōma, nō omiskōipaxanōma. <sup>3</sup> Moisés yoini keskara nō tāpifiano aato noko imasharatiroma nōko chaka noko soaxotiroma. Akka Epa Niospa shināyoni āfe Fake nai mēraxō mai ano nīchixiki ari noko keskara yora inō. Noko keskarafiaxokai nō amis keskara afaa chakafamisma. Akka noko nāxonī anā afara chaka nōko ifo inōma. <sup>4</sup> Nāskata iskaratīa nō Niospa Yōshi Shara Ifofaax aōxō Moisés yoini keskara nō nikatiro. Nō Niospa meka ifofasharakōitiro.

<sup>5</sup> Akka nō chaka xateyamano afara chakapa noko amapayai keskara fisti nō atiro. Akka Niospa Yōshi Sharapa noko īkināno nā noko amapayai keskara fisti nō atiro. <sup>6</sup> Nā apaiyaifo keskara fisti shinākanax afo nakanax anā otokanax omiskōipakenakafo. Nios fe ipanakafoma. Akka Niospa Yōshi Shara ato mēra naneano nā apaiyai keskara Niospa Yōshi Sharaōxō atirofo. Nāskax isharapakenakafo shināsharakata. <sup>7</sup> Fetsafāfe Nios noikaspakani Niospa ato yoia keskara nikapaikanima. Āto shinā mēraxō afara chaka fisti shinākani. Nāskaxō Niospa ato yoia keskara nikatirofoma. <sup>8</sup> Nā āto shināmā shināifo keskara fisti shinākakī Niospa ato amapayai keskara atirofoma. Afara chaka ifofaifono Nios atoki inimaima.

<sup>9</sup> Akka mākai askarama. Māto shinā mēraxō afara chakapa mato shināmanima. Akka Niospa Yōshi Shara māto shinā mēra nanexō mato shināmasharamis. Akka Niospa Yōshi Shara māto shinā mēra naneyamaino mā Cristo fe rafetiroma. <sup>10</sup> Cristo mato fe rafefiaino afara chakaōnoax māto yora nai. Māto yora nafiano māto fēro mēsho naima Nios fe nipanaka Niospamāi afaa chakafamisma keskara mato ōiaino. <sup>11</sup> Mā Jesús naano Niospa ofofani. Nāato āfe Yōshi Shara māto shinā mēra nanea. Nāskarifiakī māto yora naano āfe Yōshi Sharaōxō Niospa anā mato ofofatiro māto yora fenasharakōi inō.

<sup>12</sup> Efe yora mīshtichi, Niospa Yōshi Shara nofe rafeaino Epa Niosnoa nō shinātiro noko amapayai keskara akī. A nō afara chakafamiskai anā nō shināpaitiroma noko Niospa amapayai keskara akī. <sup>13</sup> Akka a nō apaiyaifo keskara fisti shināx nō omiskōipakenaka nai. Akka nāskafixō Niospa Yōshi Sharaōxō afara chakafakī nō xatexō anā chaka nō shinātiro. Nō Epa Nios fe nisharapakenaka.

<sup>14</sup> Niospa Yōshi Sharapa noko shināmanaino nō Niospa fakefo iki. <sup>15</sup> Āfe Yōshi Sharapa noko shināmasharapai nō anā mesenōma. Mā nōfi Niospa Yōshi Shara fiaki. Nā āfe Yōshi Sharaōxō āfe fakefo noko ima. Aōxō nō yoitiro iskafakī: “Epa Nios, mī ēfe Epa,” ixō nō yoitiro. <sup>16</sup> Nōko shinā mēraxō Niospa Yōshi Sharapa noko yoi iskafakī: “Mī Epa Niospa Fakekōi,” ixō noko yoi. <sup>17</sup> Nō Niospa fakekē nā noko yoia keskara noko inātiro. Nōfi nō Niospa fakekē nā āfe Fake Cristo ani keskara nokori inātiro. Nōōnoax omiskōifinixakī iskaratīa nai mēranoax Apa Nios fe xanīfokōi. Nāskarifiāi nōri aōnoax omiskōiax nō nai mēra Epa Nios ano nokoano noko sharafinakōia imaxii nō afe isharapakexanō, a keskara shara nō inō. Akka afe yorafo Niospa ato sharafaxōi nāfomāi āfe fakefokē.

### *Niospa fakefo Jesús fe isharapakenakafo*

<sup>18</sup> Nō iskaratīa omiskōiyofiax nō chipo Jesús fe isharapakenaka. A keskara sharafinakōi noko imai. Tsōa ōimisma keskara sharafo noko ōimaxii. A nō omiskōipaoni anā nō shināima. <sup>19</sup> Epa Niospa āfe fakefo otofaxii a keskara sharakōi ato imaxii. Akka nā Niospa onifanifāfe manakani ōisharapaikōikakī afe keskarrafo ato imaimākai. <sup>20-21</sup> Niospa āfe fakefo sharakōi ato ōimaxii. Nāskatari a onifanifori sharakōi ixii. Anā afaa chaka ixiima. Afarafo anā payokomepakenakama. Akka iskaratīa nā Niospa onifanifo payokomepak-enakafo askayamapaiifaifono. Nāskaxō Niospa yoini: “Adán afara chakafaōnoax keyokōi payokomepakenaka.” Akka Niospa āfe fakekōifo akiki nokoafono ato yora fetsafaxoxii anā payokomenōfoma, afara chakafāfe ato fekaxtefanōma. Nāskarifiāi Niospa onifanifori nā Niospa fakekōifo keskara shara ixii, anā payokomepakenakama.

<sup>22</sup> Kēromā fake kākī pae meytiro. Mā kāixō anā pae metiroma. Nāskarifiāi a Niospa onifanifo omiskōiyokani. Akka mā Niospa ato fetsafaano anā omiskōixikani. <sup>23</sup> Akka nō Niospa fakefo āfe Yōshi Shara nofe rafeaino nō tāpitiro nō Nios ikano kaax nō isharakōixii. Akka iskaratīa nō isinī iki fekaxtei. Nāskakē nō manasharai Epa Nios ika ano noko ifinō nō āfe fakefokē a keskara shara noko imanō. Nāskatari nōko yora fena sharakōi noko imai anā nō isinī inakama. Anākai nō nanakama. <sup>24-25</sup> Nāskara nō shināi nō akiki nokoaito noko fetsafaxii a keskara shara nō inō. Nāskax nō afe ipanaka. Chanīmara faxō inimayanā nō manasharatiro fena fenakima nā nō akiki nokoaitīa. Akiki nokoxō nō anā manatiroma māmāi nō ōikī.

<sup>26</sup> Nāskarifiakī Epa Niospa āfe Yōshi Sharapa noko axosharafafāini. Afeskaxō nō Epa Nios kifisharatromē nōkai tāpiama. Akka āfe Yōshi Shara nō mēra nanexō noko shināmanaino nō kifisharatiro. Noko noikī noko kifixonai. Noko kifixonai keskarakai tsōarikai kifitiroma. <sup>27</sup> Āfe Yōshi Sharapa shināi keskara Epa Niospa tāpikōia. Keyokōi nōko shinā mērari nō shināi keskara tāpikōia. Epa Niospa noko amapayai keskara nānori āfe Yōshi Sharapa a chanīmara faafo tii ato kifixomis.

### *Jesúsxō nō keyokōi finōkōitiro*

<sup>28</sup> Akka nō tāpia Epa Niospa noko katonī a apaiyai keskara nō anō. Nō Epa Nios noiaino afarafāfe noko afeskarafafaino afoxō Epa Niospa noko axosharai. <sup>29</sup> Nō Jesús Ifofayoamano Epa Niospa tāpiyoni fatofomākī a chanīmara faifo. Akka chanīmara fayoafoamano shināni iskafakī: “Nafō ēfe Fake keskara ē ato imaxii,” ixō shināyoni. Niospa āfe Fake iyoa Jesús. Nāskaxri nōri āfe fake chipoko ixii. <sup>30</sup> Tāpiyoni nō āfe fakefo ixinō. Askano nōko shinā mēraxō noko yoini: “Ēfe Fake chanīmara fakāfe,” noko fani. Fatora anori yoixō ato chaka soaxoni isharanōfo, afaa chakafamisma keskara ato ōixii, ato chaka soaxonano āfe Fake sharakōi keskara inōfo.

<sup>31</sup> Noko askasharafaino ¿nō fakiri yoitromē? Epa Niospa noko sharafakōinaino afara chakafāfe noko chakafamatiroma. <sup>32</sup> Epa Niospa noko noikī āfe Fake Jesús timamanima noko naxonō. Nāskanixakī noko axosharatiro nā apaiyai keskara nō anō. <sup>33</sup> Epa Niospa noko katonī nō afe yora inō. Nāskaxō nōko chaka noko soaxonano afara chakafamisma keskara noko ōixiki. Askano fetsafāfe mī chakara noko faifono nō ato ifofaima. <sup>34</sup> Jesucristo noko nāxokē Āpa otofani. Iskaratīa Apa Nios ika ano ika Apa feta ato keyokōi

ĭkinā. Epa Nios noko kĭfixōfafāini. Nā chanĭmakōikē tsōa, “Mĭ afara chakafamiski. Nāskax mĭ omiskōipakenaka,” noko tsōa fatiroma. <sup>35</sup> Tsōakai Jesucristo nomakinoa potatiroma noko noiyamanō. Nō omiskōikāi, nōko shinā mēra fekaxtekāi, nō Jesúsnoa yoiaito noko omiskōimafāi, noko fonāimafāi, nō rapati yopafāi, noko mesemafāi noko retepafāi, keyokōi afāfekāi Cristo nomakinoa potatirofoma noko noiyamanō. <sup>36</sup> Niospa meka yoikĭ David kirika keneni iskafakĭ:

Epa Nios, pena tii mĭōxō noko retepaikani. Nō oveja keskara. Ifāfe nā oveja itipinĭfasharai retexiki. Nāskarifiakĭ a mĭōxō noko chakafaifāfe noko retepaitirofo, ixō kirika keneni. <sup>37</sup> Noko askafafiaifono keyokōi nā chakafo nō finōkōitiro Jesús noko noiaino. <sup>38-39</sup> Jesucristo nōko Ifonokai afanā Epa Nios nomakinoa potatiroma anā noko noinōma. Nā ē chanĭmara fakōini. Epa Niospa noko noiaino afanā noko afeska fatiroma anā noko noinōma. Nō nafiakēkai nomakinoa afanā Nios potatiroma. Nō niyoanori nomakinoa tsōa paxkatiroma. Āfe ājirifāferikai nomakinoa paxkatirofoma. Yōshi chakafāferikai nomakinoa paxkatirofoma. Afarafo iskaratĭa ikaifāferikai nomakinoa paxkatirofoma. Inōpokoaiifāferikai nomakinoa paxkatirofoma. Afara chakafāfe āto xānifofofāferikai nomakinoa paxkatirofoma. Nā nai ari ikafāfe, mai ano ikafāferikai nomakinoa paxkatirofoma. Epa Niospa nōko Ifo Jesucristoxō noko noi. Nāskakē keyokōi onifanifāferikai nomakinoa paxkatirofoma anā noko noinōma.

## 9

### *Niospa judeofo katonĭ afe yora inōfo*

<sup>1</sup> Ĕ Cristo fe rafexō ē mato mēstekōi yoi. Ĕ mato pāraima. Niospa Yōshi Shara ē mēra naneano ēfe shināmā shinākĭ chanĭma ē mato yoi. <sup>2</sup> Ĕ mato yoi iskafakĭ, ēfe kaifo atirito Cristo Ifofaafoma. Nāskakē ēfe shinā mēra ē atoōnoax omiskōi kakaini. Ĕ ato shinākōikĭ finamis afomāi efe yorafokē. <sup>3</sup> Nāskakē ē shināmis iskafakĭ: “Epa Niospa, ēfe kaifo nā israelifo ē ato axopai fenoyamanōfo, mefe nipaxanōfo omiskōipakenakafo mēra fonōfoma. Nāskaxō Cristo makinoa ea potāfe ato potakima ē ato omiskōixonō afo omiskōipakexanōfoma. Nā ē fichipai ēfe kaifo judeofo Cristo fe ĭpaxanōfo,” ixō ē shināmis. <sup>4</sup> Nō judeofo, Jacobo āfe fenafo. Epa Niospa noko ifini āfe fakefo nō inō. Nāa Nios sharafinakōixō nōko kaifo israelifo ato ōimapaoni. “Ĕ mato afara sharafaxōikai. Cristo nā oxiai judeokōi ixii. Aōxō ē mato sharafaxōikai,” ixō Niospa yoini. Nāskara Moisés Niospa meka yoikĭ israelifo ato kirika kenexoni nikanōfo. Nāskaxō ato tāpimani afeskaxō Nios kĭfitirofomāki ichanāxō. Nāskata afara sharakōi ato axoxiai keskara ato yoiyoni. <sup>5</sup> Judeofāfe xinifāfe Epa Nios Ifofasharapaonifo. Cristori judeo fake kāini, Niospa Fakekōifiax. Nāskax arifi nōko xinifāfe āto fena. Nāfi yorafāfe āto Ifokĭ, nāatomāi keyokōi ato ĭkikē. Nāskakē, “Nios fāsi finasharakōia,” nō fapaxanō. Askapainō.

<sup>6</sup> Epa Niospa noko yoisharayoni keskara judeofo atirito chanĭmara fayamafiaifono āfe meka chanĭmakōi. Afe yorafo yoiyoni keskara axii. “Nā judeofo Israelifāfe āto fenafo ē katoa efe yora inōfo,” ixō Niospa yoini. Askafafiano atirito Nios chanĭmara famisfoma. Nāskakē afe yorakōi keskara Niospa ato ōima. <sup>7</sup> Nāskarifiakakĭ Abraham apaoni keska fakĭ āfe fena atirifāfe Nios chanĭmara famisfoma. Afokai Niospa yorakōifoma. Akka Niospa Abraham yoini iskafakĭ: “Mĭ fakekōichi Isaaca āfe fakefo mĭ fenakōifo ixii, mĭ fake fetsafāfe āto fakefori mĭ fenakōifo ixiima,” ixō yoini. <sup>8</sup> Nāskano nō tāpitiro Abraham āfe fenafo atiri āfe fakekōifo Niospa ato ōima. Akka Niospa Abraham yoiyoni āfe āfinĭ Sara fake fixiai. “Nā fakefi mĭ fakekōi ixii. Mĭ fakē āfe fakefori mĭ fenakōifo ixii,” fani. Nā yoini keskara Abraham Nios chanĭmara fani. Nā Abraham Nios chanĭmara fai keskafakĭri Nios chanĭmara faifono nāfofi Niospa fakekōifoki. <sup>9</sup> Abraham āfe āfinĭ Sara fake naneamatai Epa Niospa yoiyoni iskafakĭ: “Xinia fētsa ē anā mikiki nokoxii. Nāskano mĭ āfi Sara fake kāixii feronāfake,” ixō Niospa Abraham yoini.



<sup>10</sup> Nāskata Sara āfe fake kāini. Nāskaxō aneni, Isaaca fakī. Nāskakē nā Isaaca nōko xini. Isaaca naetapaxō Rebeca fini āfe āfi inō. Rebeca fake rafe naneni. Nā fake rafeta āto apakōi Isaaca ipaoni. <sup>11-12</sup> Rebeca fake kāini fake rafe naneax. Esaú kāi taeni. Chipō Jacobo ini. Akka kāiyoafomano tsōa tāpiyonima fatoto shara shināimākai, fatotori chaka shināimākai. Nāskano Niospa fisti katonni afe yora inō. Kāiyoafomano Niospa āto afa yoyoni iskafakī: “Mī fake chipokoto āfe ochi yonomaxii,” fani. Akka Niospa nā apaiyai keskara fatiro, yorafāfe apaiyai keskara Niospa faima. Askano nō tāpitiro Niospa a inōpokoai keskara shināyoni nāskarakōi aki. <sup>13</sup> Nāskara Niospa meka yōra kirikaki keneni iskafakī: “Ē Jacobo ifipai efe yora inō. Esaú ē fichipaima,” fani.

<sup>14</sup> Nāskakē ĵiskara nō yoitiromē, “Niospa mā fake fisti katoa kāiyoafomano, afaa chakafayoafomano fisti mā katoa akka fetsa katoama ōixoma. Nāskakē Niospa shināsharaima,” ixō nō shinātiromē? Maa, anori nō shinātiroma. Akka Niospa tāpisharakōia. Nā apaiyai keskara fatiro. Nā fichipaiyai katotiro. <sup>15</sup> Niospa Moisés yoini iskafakī: “Nā ē axopaiyai ē axosharaikai. Nāskarifiakī nā ē noipaiyai ē noisharaikai,” ixō Niospa yoini. <sup>16</sup> Askatari nō Nios nikasharatama nōakōi nō afe yora isharapaiyaito askara noko axōima. Askatamaroko Niospa noko noikī noko ifitiro afe yora nō inō, nāatomāi noko ōiti tāpikaxō. Nāskaxō noko noikī nā apaiyai keskara shara axōi. <sup>17</sup> Moisés kirika keneni iskafakī: “Epa Niospa Egipto anoa āto xanīfo yoini iskafakī: ‘Ē mia xanīfo imapaikī ē mia xanīfo imani mīoxō nā maitio ikafāfe tāpinōfo ē afama mīshti faito. Akka mī afara chakafaito ē mia potai mī anā xanīfo inōma. Ē mia askafaito ōikakī eōnoa ato yoitirofo nā maitio ikafāfe: ‘Nios tsoa keskarama āfe shināōxō mā Faraón pota,’ ixō eōnoa yoitirofo,’ ixō Niospa Faraón yoini.” <sup>18</sup> Akka shinākapo. Nā Niospa ato noipaiyai ato noikī axosharatiro. Nāskarifiakī fetsa afara chakafakī xateamano Niospa āfe ōiti nikayospakōi imatiro afaa shināpaiyamai keskara imatiro.

<sup>19</sup> Nāskakē fetsa shinātiro iskafakī: “ĵAfeskakī Niospa noko yoitiromē afara chakafamisfora fakī? Akka nāato noko amai nā apaiyai keskarafakī. Nāskakē noko omiskōimatiroma nō nikayospaito,” ixō fetsa yoitiro. <sup>20</sup> Askafayamafe. ĵAfeskakī mī Epa Nios kemapaimē? Mīfi yoraki. Aafi Nioski nā apaiyai keskara atiro. Akka a Niospa onifatokai yoikī iskafatiroma: “ĵAfeskakī mī ea iskara onifaamē?” ixō yoitiroma. <sup>21</sup> Kēromā kesho rafe faxō nā apaiyai keskara fatiro. Kesho fetsa mēra afara shara nanetiro, fetsa mērari afara chaka nanetiro. Akka na kēsho iskafatiroma: “ĵAfeskakī mī ea iskara faamē?” ixō yoitiroma.

<sup>22</sup> Nāskarifiakī Epa Niospa keyokōi yorafo onifafaxō atiri ato potatiro āfe meka nikaka-spaifāfe. Fenāmāshta ato yoiyofiaito nikayospamisfo. Nāskakē anā teneima, mā atoki ōitifishkikī ato omiskōimaxii. Nāskaxō yorafo ato ōimapai ato potakī omiskōinōfo chaka fisti shināifāfe. <sup>23</sup> Akka nōfi ato keskarama. Noko Niospa noikī noko tāpimamis. Nāskatari noko itipinīsharafamai inimakōikai nō nai mēra shara afe ipaxanō. Noko askafamakī yorafo ōimani nā noiaifo Niospa ato noikōia. <sup>24</sup> Noko judeofo fisti Niospa katonni nō afe ipaxanō. Akka judeofomatori ato katonni. <sup>25</sup> Nānori Oseas Niospa meka yoikī kirikaki keneni iskafakī:

Fetsafo judeofomari ē katōxii efe yorafori inōfo. “Ē mato noi,” ē ato yoiyamafikat-saxakī, ē ato yoixii iskafakī: “Ē mato noikōi,”

ixō Epa Niospa yoini keskara Oseas kirikaki keneni. <sup>26</sup> Askata anā keneni iskafakī:

Niospa judeofoma ato iskafani: “Māakai efe yorafoma,” ato fayoni. Nāskata chipo anā Epa Niospa ato ifixii afe yora inōfo. Nāskakē yorafāfe ato yoixikani iskafakakī: “Nafō Niospa fakefo. Epa Nios finakōia afama mīshti fatiro,”

ixō yoixikani. <sup>27</sup> Isaías israelifoōnoa yoini iskafakī: “Na Israel āfe fenafo ichapakōifo ixii oa makex mīshtifo nō tanātiroma tiikōi. Nāskarifiakī judeofo ichapakōi kaixikani. Askafikaxō fisti rasichi Nios Ifofaxikani Nios fe ipaxakakī. <sup>28</sup> Nāskaxō nā yoyoni keskara

nā maitio ikafāfe nā chanīmara faafoma. Nōko Ifāfe ato omiskōimaxii anā ato manayoima āto chaka potayonōfo,” ixō Isaías yoini. <sup>29</sup> Isaías yoiyoni keskara nāskakōi. Nāskata anā yoini iskafakī:

Nōko Ifo finasharakōia nōko fenafo fetsafo ifini afe ĩpaxanōfo. Askafayamafiano anā judeofo ikeranama. Akka nō nai keyokerana Sodoma anoa fe Gomorra anofo ini keskai,  
ixō Isaías kirika keneni.

### *Nā judeofoma na meka shara Jesúsnoa Pablo ato yoini*

<sup>30</sup> Nāskakē ē mato yoi. Nā judeofomafāfe shināyonifoma iskafakakī: “Nōko chaka nō soapai,” ixō shināyonifoma. Akka iskaratīa Cristo chanīmara faifāfe Epa Niospa mā ato chaka soaxona afaa chakafamisma keskara ato ōixiki. <sup>31</sup> Akka ēfe kaifo israelifāfe Epa Niospa Moisés yoini keskara ifo sharafapainifo. Nāskaxō shinānifo iskafakakī: “A Moisés keneni nō ifofasharaito Niospa noko shara ōitiro,” ixō shināfiaifono Moisés kenenioxō Niospa ato chaka soaxotiro ma ato shara ōixiki. <sup>32</sup> ¿Afeskakī Niospa ato shara ōimamē? Ē mato yoinō. Afāfekairoko Jesucristo chanīmara faifono ato chaka soaxopanā. Askatamaroko Moisés ato yoini keskaraōnoax isharapaikī āto chaka soapaikani Niospa ato shara ōinō. Akka Moisés yoinioxō Niospa ato chaka soaxotiro ma. Ē mato afara fetsa anā yoinō. Tokiri fai nēxpakīa rakano finōpai akiki nō otisikaināi nō paketiro. Nāskarifiakī Jesús finōpaiyafāfe chanīmara fakanima afe nīpāxakakīma. Akka nā yorafo oa nō tokiriki otisikai paketiro keskarafo. Nāskakī Jesús finōpaikakī shināchakatirofo. Akka tsōa Jesús finōtiro ma. <sup>33</sup> Nānori Isaías Niospa meka yoikī kirika keneyoni iskafakī:

Nikakapo, judeofāfe āto pe xe rasi ano Niospa tokiri keskara nīchixii yorafo akiki otisikī shināchakaxinōfo. Nā tokiri efapaki yorafo otisikani paketirofo. Akka nāskarari nā Jesucristo chanīmara faafo tiikai paketirofoma. Anā shināchakakanima,  
ixō Jesúsnoa Isaías kirika keneni. Akka Jesús nā tokiri efapa keskarakōi.

## 10

<sup>1</sup> Efe yora mīshtichi, ēfe kaifo ē shinākī finakōi. Ē ato Nios kīfixōfafāini Jesús chanīmara fanōfo, Nios fe ĩpaxanōfo. <sup>2</sup> Mē tāpia nāfāfe Epa Nios tāpisharapaikani. Nāskafikakī a Niospa ato tāpimapaiyai keskara shinākanima. Āa āto shināmā fisti shināxō akani. <sup>3</sup> Jesúsxō Epa Niospa āto chaka ato soaxotiro afaa chakafamifoma keskara ato ōixiki. Akka nā Jesús ato chaka soaxotiro nikakaspakani. Āakōi shinākanax shara ipaikani. <sup>4</sup> Iskakakī shinākani: “Moisés keneni keskara nō nikakōiaito Niospa noko chaka soaxotiro afaa chakafamisma keskara noko ōixiki. Nāskax nō afe ĩpaxanō,” ixō āakōi shinākani. Akka Moisés kenenioxō nōko chaka nōa nō soametiroma afaa chakafamisma keskara ixii Niospa noko ōinō. Askatamaroko Moisésxō nō Cristoōnoa tāpitiro. Nāskakī nō Jesucristo chanīmara faax aōnoax nā afaa chakafamisma keskarakōi nō itiro nō Nios fe ipaxakī. Nāskakī nō Cristo fisti Ifofatiro. Nō anā Moisés keneni nikatiroma.

### *Jesús yorafoōnoax ato nāxoni*

<sup>5</sup> Moisés kirika kenekī iskafani: “Epa Niospa noko yoini keskara ē kirika keneni. Fatora fētsa nā meka ifo sharakōi fai isharakōixii, afaa chakafaamax. Akka māfi Nios fe ikōisharapakenakaki. Akka nā Niospa yoini keskara nō ifo sharakōi fatiroma. Askakimaroko nō Cristo chanīmara fai Niospa noko shara ōinō, nō afe ĩpaxanō.” <sup>6-8</sup> Askata anā kirika kenekī iskafani: “Niospa noko yoini afeskax nō shara itiomākī. Nō Cristo chanīmara faito nōko chaka noko soaxotiro afaa chakafamisma keskara noko ōixiki. Nā Cristo meka shara nōko shinā mēra ikakī. Nō aōnoa tāpixō nō ato yoimis. Akka iskara shināyamakāfe: ‘¿Tsoa nai mēra katiromē Cristo fotomaxiki nō chanīmara fanō?’ Akka tsoakai nai mēra katiroma Cristo fotomaxiki. Askatari iskafakī shināyamakāfe: ‘¿Afeskaxō mā Cristo naafianikē mai mēranao nō ifitiromē?’ ixō shināyamakāfe. Akka iskaratīa Niospa meka nō mēra ikakī,” ixō kirikaki Moisés keneni. Nānori nō mato yoimis. <sup>9</sup> Akka,

“Jesús ěfe Ifoki,” nõ ato fakĩ nõ shinãtiro iskafakĩ: “Chanĩma, Jesús nafianikẽ Apa Niospa otofani,” ixõ nõ shinãito nõko chaka noko soaxotiro nõ afe ĩpaxanõ. <sup>10</sup> Akka nõko shinã mēraxõ nõ chanĩmara fakẽ Epa Niospa nõko chaka noko soaxotiro afaa chakafamisma keskara noko õixiki. Askatari, “Jesucristo ěfe Ifoki,” ixõ nõ ato yoiax nõ afe ipanaka.

<sup>11</sup> Nãnori Niospa meka yoikĩ yõra kirika keneni iskafakĩ: “A Jesucristo Ifofakanax anã ãto ifo fetsa fenakanima. Cristo fistichi ato nimasharatiro afe ĩpaxanõfo,” ixõ kirikaki keneni. <sup>12</sup> Judeofo feta judeofomafãferi Cristo chanĩmara faifono ãto Ifo itiro. Niospa ato õia nã yora fisti keskarafo, nãskarafos ato õi. Nãskaxõ fatotora yõkaito Niospa axosharakõifafãini aõ noikõikĩ. <sup>13</sup> Nãnorikõi Joel yoikĩ kirika keneni iskafakĩ: “Fatotora nõko Ifo chanĩmara faxõ yoikĩ iskafaito: ‘Mĩ ěfe Ifoki, ea ifife ěfe chaka ea soaxoxiki,’ faito ãfe chaka soaxotiro afe ĩpaxanõ,” ixõ Joel kirika keneni.

<sup>14</sup> Akka tsõa Jesús Ifofaxoma, “Ea ifife ěfe chaka ea soaxoxiki,” ixõ tsõa yõkatiroma chanĩmara faxoma. Akka Jesúsnoa nikakatsaxakĩma afeska faxõ chanĩmara fatirofoma. Tsõakairoko Jesúsnoa ato yoimiskẽ nikapanãfãfe. <sup>15</sup> Akka Niospa ato nĩchiyamaino tsoa katiroma Niospa meka shara ato yoixikakĩ. ãkai fotirofoma. Nãnori Isaías kirika keneni iskafakĩ: “A meka shara yoi feai sharakõi,” ixõ yoini.

<sup>16</sup> Ě mato yoinõ Niospa mã yorafo nĩchini Cristoõnoa meka shara ato yoitanõfo. Niospa meka yoisharafiaifono judeofo atirifãfe ato nikapaikanima. Nãnori Isaías kirika keneni iskafakĩ: “Ěfe Ifãfe, nõ ato yoiaino tsõa chanĩmara faima,” ixõ yoini. <sup>17</sup> Nãskano Cristoõnoa meka shara yoiaino nikakakĩ fetsafãfe chanĩmara fatirofo.

<sup>18</sup> “Akka, ¿judeofãfe nã meka shara Jesúsnoa nikamisfomamẽ?” ixõ fẽtsa ea yõkaito, ě kematiro iskafakĩ: “Ěje, mã nikamisfo.” Nãnori David yoini kirika kenekĩ iskafakĩ:

Nã maifo tii anoafãferi nã meka shara mã keyokõichi nikamisfo, ixõ David kirika keneni. <sup>19</sup> Mã shinãiraka iskafakĩ: “Akka judeofãfe na meka shara Jesúsnoa mã nikafikakĩ nikasharamisfomara,” ixõ mã shinãi rakikĩa. Akka ě mato yoi iskafakĩ, mã nikamisfo nã meka shara Jesúsnoa. Mēxotaima mã nikafikakĩ chanĩmara faafoma. Akka israelifomafãfe Nios nikakatsaxakakĩma mã rama aõnoa nikafo. Moisés Niospa meka yoikĩ kirika keneni iskafakĩ:

Nã judeofoma efe yora iyopaonifoma. Akka iskaratĩa ě ato noikõikĩ ě ato ifi efe yora inõfo. Ě ato askafaito õikakĩ judeofãfe ato noikaspaxikani ato xĩtipaikakĩ. Askatari, “Na judeofomafãfe afaa tãpiafoma, judeofãfe ato fafiaifono ě ato ifi efe yora inõfo. Nãskakanax judeofo atoki õitifishkixikani,” ixõ Niospa yoini,

ixõ Moisés kirika keneni. <sup>20</sup> Chipõ Isaíasri Niospa meka yoikĩ kirikaki keneni iskafakĩ:

A judeofomafãfe akõi ea fenayamafikatsaxakakĩ chipõ ea fichixõ ea chanĩmara fakanax efe ipanakafo. Askatari, “Niosnoa noko tãpimafe,” ixõ ato yoiyamafikatsaxakakĩ. Akka chipõ ě ato tãpimaxii,

ixõ Niospa yoini keskara Isaías keneni. <sup>21</sup> Askafiaifono ěfe kaifoõnoa Niospa yoini iskafakĩ: “Nã pena tiixõ ãto shinã mēraxõ ě ato yoimis iskafakĩ: ‘Ekeki fekãfe,’ ixõ ě ato shinãmafiaino ekeki fepaikanima. Nikayospamisfo,” ixõ Niospa yoini keskara Isaías kirika keneni.

## 11

### *Niospa israelifo noikõi*

<sup>1</sup> Mã iskafakĩ shinãiraka: “Epa Niospa afe yorafo israelifo mã pota,” ixõ mã shinãiraka. Mã askaito ě mato kematiro iskafakĩ: “Maa, ato keyokõi potama. Nãskaxõ eari potama ěri israeli. Akka Abraham fe Benjamín ěfe xini. Nãskax ě israelikẽ ea Niospa potama,” ixõ ě mato kematiro. <sup>2</sup> Epa Niospa afe yora inõpokoaifo israelifo ato katoyonixakĩkai ato potamisma. Shinãkapo. Nõko xini Elías israelifoõnoa yoikĩ kirika keneni iskafakĩ:

<sup>3</sup> “Ěfe Ifãfe, a mã meka shara yoimisfo mã ato retemisfo. Askatari a mãsa kamakixõ mia

kĩfimisfo mã potafo. Iskaratĩa ã fistichi mia Ifofai. Anã ano tsoama. Eari retepaikani,” ixõ Elías Nios yoini. <sup>4</sup> Nãskafaito nikakĩ Epa Niospa çafaa fanimẽ, Elías? Iskafakĩ kemani: “Maa. Meres fistikai mĩ ea chanĩmara faima. Akka nãno mĩ kaifo siete mil yorafãfe ea chanĩmara fakaxõ afaa fetsakai ifofaafoma. Akka yorafãfe onifanifo ãfe ane Baal, ‘Akai nõko niosra,’ famisfoma,” ixõ Niospa Elías yoini. <sup>5</sup> Nãskarifiakĩ iskaratĩari ãfe kaifo fisti rasichi mã Nios Ifofaafoma, Niospamãi afetiãama ato noikĩ ato katoyonino afe yora inõfo. <sup>6</sup> Niospa noko noikõisharakĩ noko ifi nõ afe yora inõ. Akka nõ afara sharafaõxokai noko ifima. Niospa noko afaa kopi yõkaima noko ifixiki. Akka ãakõi noko ifi noko noisharakĩ. Nãskakẽ nõ afara sharafatiroma noko ifinõ. Akka a nõ kopifa keskara noko õikĩ ãakõi noko ifikeranama. Nãskakẽ noko afaa kopi yõkaima ãakõimãi noko ifixõ.

<sup>7</sup> Akka ãfe kaifo israelifo fisti rasichi Nios fenapaonifo afe rafexikakĩ, nãfomãi Niospa katoyonino afe yora inõfo. Akka israeli fetsafãfe Nios nikakaspapaonifo Nios fe rafekaspakakĩ. Akka a Nios nikakaspafãfe ãto õiti kerexkõifakaxõ nikakaspakani. <sup>8</sup> Nãnori Niospa meka kirika kenekakĩ iskafanifo: “Epa Nios nikakaspakani nã oxafoma keskarafo afaa shinãkanima. Askatari oa yora fẽxo keskara ipaikani. Nãskaxõ Nios nikakõipaiakanima. Askafafãfe Epa Niospa ãfe meka shara ato tãpimanima. Iskaratĩari nãskakani,” ixõ yõra kirikaki keneni. <sup>9</sup> Askatari David kirika keneni iskafakĩ:

A Nios nikakaspafãfe shinãkani iskafakakĩ: “A nõ piai ichapa ita nõko afama mĩshtifori ichapa. Nãskakẽ Niospa noko shara õi,” ixõ shinãkani, Nios nikayamafikakĩ. Akka nõko afama mĩshtiõxõ Niospa noko shara õima nõ afe ipaxanõ. A Nios nikakaspafãfe ãto afama mĩshtiõnoax fenoxikani afama mĩshtifo shinãifãfe. Niospa ato omiskõimaxii. <sup>10</sup> Oa yora fẽxo keskara inõfo. Askarafãfe Nios nikayamaifono oa yora afara efekõi pefea keskara Niospa ato imanõ, ixõ David kirika keneni a Nios nikakaspafãfe noa yoikĩ.

### *Judeofomafãferi Jesús chanĩmara fakanax afe ipanakafoma*

<sup>11</sup> Akka, çNiospa afe yorafo israelifo ato potapakenakamẽ? Maa, ato keyokõi potaima. Akka nã israelifãfe Cristo chanĩmara famisfomano a israelimafãferi mã Jesucristo chanĩmara fakani. Ifofaifono Niospa ato ifi afe yora inõfo. Akka nã israelifomafãfe mã Cristo chanĩmara faifono israelifãfe ato õikakĩ akairi Jesucristo chanĩmara fapaikani afe ipaxakakĩ. <sup>12</sup> ãfe kaifãfe, afara chakafamisfo Jesucristo Ifofapaimisfoma. Akka Epa Niospa nã maitio anoafoma Jesucristoõnoa ato tãpimanano chanĩmara fakanax afe ipanakafoma. Nãskaxõ Niospa ato shara faxõi, inimakõinõfo. Askatari ãfe kaifo judeofãferi chipo Jesucristo chanĩmara fakanax inimai finakõixikani Niospa ato sharafaxõano.

<sup>13</sup> Akka mã ãfe kaifoyamafiano Epa Niospa ea mato mẽra nĩchini Jesúsnoa ã mato yoinõ. ã inimakõi Epa Niospa ea katonĩ ã mato ano onõ. <sup>14</sup> ã mato yoiaino mã Cristo chanĩmara fayana mã inimakõiaito mato õikakĩ ãfe kaifãferi Jesucristo chanĩmara fapaikani, mato keskara ipaikakĩ. Nãskarokõi ipainõfora. <sup>15</sup> Shinãkapo. ãfe kaifo judeofãfe Jesucristo chanĩmara fayamaifono Niospa ato potani anã afe yorakõi inõfoma. Akka nã maifo tii anoafãfe Cristo chanĩmara fakanax Nios fe rafekani. Nãskakẽ ãfe kaifãferi Cristo chanĩmara faifono Niospa anã ato ifi afe yora inõfo. Nãskakanax sharakõi ixikani. Nã yora naax otoa keskara itirofo, inimakõikani. <sup>16</sup> Nãskaxõ ã anã mato yoinõ pãakiri keparanãkĩ iskafakĩ: Pãa kaxke pishta Niosnã ikano keyokõi ãfenã itiro. Nãskatari ifi ãfe tapo ãfenã ikano ãfe teshpafori keyokõi Niosnã itiro. Nãskarifiakĩ ãfe kaifãfe Jesucristo chanĩmara fakakĩ taefanifo fisti rasichi. Nãskakẽ ãto fenafãfe Nios Ifofakanax chipo afe yora ixikani chanĩmara fakanax.

<sup>17</sup> ã mato afara fetsa anã yoinõ mã tãpinõ. ãfe kaifo judeofo ifi olivo ãfe põya keskarafo. Nã ifi põya fimioa ifãfe mextexõ potatiro. Nãskaxõ ifi olivo fetsa nã nii mẽra nia ãfe põya fetsa fãxõ tichixotiro nã olivo kayakõiki. Nãskarifiakĩ judeofãfe Jesucristo chanĩmara fayamaito Niospa mã ato pota. Akka mã judeofoma. Mãfi nã ifi olivo nii mẽra nia

keskarafokī. Nā ifi ifoyama keskarafō, mā. Nāskax mā Epa Niospa yora ipaonima. Akka Jesucristo mā Ifofaito Niospa mato ifi afe yora mā inō. Nāskata nā ifi olivo mā āfe pōya tichiax āfe tapo mēranoax yosiaino foaisharatiro. Nāskarifiakī nā judeofāfe āto xinifāfe mekaōxō mā Niosnoa tāpisharakōiafo nā ifi olivo yosiai keskaraxō. <sup>18</sup> Iskara shināyamakāfe: “Nō sharakē noko Niospa ifia. Akka judeofo chakafokē Niospa mā ato pota,” iyamakāfe. Shinākapo. Māfi ifi āfe pōya keskarafō. Ifi pōyakai āfe tapomais nitiroma, xanatiro. Ifi pōyafō aō tapoōnoax nia. Nāskarifiakī judeofo āto xinifāfe Nios tāpinifo taefakakī. Atoōxō māri Nios tāpitiro.

<sup>19</sup> Mā shināiraka iskakī: “Ifi pōya chakakē, ifāfe mextexō pōtatiro. Nāskarifiakī judeofāfe Jesucristo chanīmara fayamaifono Niospa ato potani. Akka nō judeofo keskarama nō Jesucristo chanīmara faax nō afe ipanaka,” ixō mā shināiraka. <sup>20</sup> Nā mā yoiai keskara chanīmakōikī kexemesharakāfe. Akka judeofāfe chanīmara fayamaifāfe Epa Niospa ato potani. Nā judeofo potani keskafakī Epa Niospa matori potatiroki. Kexemesharakāfe, mā anā Jesús chanīmara fayamaito matori potatiroki. Nāskakē kakapaiyamakāfe. Mā Jesús chanīmara fayamax mā fenotiroki. <sup>21</sup> Judeofāfe Nios chanīmara fakī taefafianifono chipo āto fenafāfe chanīmara fayamaifāfe Niospa ato potani. Māri mā chanīmara fayamaito matori potatiroki.

<sup>22</sup> Akka shinākapo. Niospa noko noifiaino nō nikayamaino noko tāpimatiro omiskōimakī. Nāskakē judeofāfe chanīmara fayamaifāfe ato omiskōimakī ato potai. Akka Niospa mato noikī afe yora mato imai. Nāskakē mato noiai keskara shināfafāikāfe. Chanīmara fafafāikāfe. Mā askafayamaino matori potatiro. <sup>23</sup> Ēfe kaifo judeofāfe anā chaka shinākakima, Jesús chanīmara faifono anā afe yora Epa Niospa ato imatiro. Ifi mextexō anā āfe pōya tichixotiro anā foainō. Nāskarifiakī Epa Niospa anā ato ifitiro afe yora inōfo. <sup>24</sup> Mākai judeofoma. Judeofo ifi olivokōi keskarafō. Akka mā judeoma. Mā nā olivo nii mēra nia keskara. Olivokōi āfe ifāfe nā nii mēra olivo āfe pōya xatexō olivokōiki tichitiro foaisharanō. Nāskarifiakī mā Niospa yora ipaonima. Akka iskaratīa Epa Niospa mato ifia mā afe yorafō inō. Nāskakēri ēfe kaifo anā Niospa ato ifipaisharakī ifitiro afe yora inōfo. Jesús chanīmara faifāfe afe yorafō ato imatiro.

### *Epa Niospa judeofo anā ato ifixii afe yora inōfo*

<sup>25</sup> Efe yora mīshtichi, māfi israelifoma. Meka fetsaōnoa mā nikamisma ē mato tāpimanō māto shinā mēraxō mā shinānō, nā ē mato yoiai keskara mā tāpiax kakapaimis mā inōma, mā iskanōma: “Nō israelifo keskarama, nō sharafinakōia,” mā inōma. Chanīma, iskaratīa ēfe kaifo israelifāfe āto ōiti kerexkōixō Niospa meka shara Jesúsnoa nikakaspakani. Akka israelifāfema Jesús chanīmara faafono Niospa ato ifini afe yora ato imaxii. Nāskatari ēfe kaifāferi anā Nios chanīmara faifāfe Niospa anā ato ifixii afe yora inōfo. <sup>26</sup> Akka keyokōichi israelifāfe Jesús chanīmara faifāfe Epa Niospa ato ifixii afe yora inōfo. Nānori Isaías kirika keneni iskafakī:

Nōko Ifo Sión anoax oxii nōko chaka noko soaxoxiki nō afe ĩpaxanō. Nā nōko Ifo israeli yora ixii. Nāto israelifo ifiyoi anā afara chaka āto ifo inōma, ixō Isaías kirika keneni. <sup>27</sup> Askata Isaías Niospa meka anā yoini iskafakī:

Ē ato yoyoni keskara ē āto chaka ato soaxoxii,  
ixō Niospa yoini Isaías kirikaki keneni.

<sup>28</sup> Jesúsnoa meka shara judeofāfe nikakaspakani, noikaspakakī. Akka mā judeoma. Nāskakē Epa Niospa mato sharafaxōa āfe meka shara Jesúsnoa mā chanīmara fanō. Akka judeofāfe āto xinifo Niospa yoini iskafakī: “Ē mato ifi mā efe yora inō,” ixō ato yoini. Nāskakē āto xinifoōxō Niospa ato noi, āfe fenafori noikōi. <sup>29</sup> Epa Niospa ēfe kaifo āfe afama mīshti ināxixakī yoyoni keskara anā fetsafaima afetīamamāi ato ifiyonixakī. Nāskakī ato potapakenakama. <sup>30</sup> Akka mā judeoyamafixō mā Epa Niospa nikayopaonima. Akka iskaratīa mā anā nikayospa ipaima. Nāskakē Niospa mato sharafaxopai

mã chanĩmara faito. Akka ěfe kaifo judeofo ato sharafaxopaifiaito nikakaspapaonifo. Nãskakẽ mã chanĩmara faito Epa Niospa mato noikĩ mato sharafaxõi. <sup>31</sup> Nã mã Nios nikakaspayopaoni keskakani ěfe kaifofo. Nãskafiaifono nã mato noiai keskari fakĩ atori Niospa noikõi. Nãskakẽ chipo Epa Nios anã shinãxikani. <sup>32</sup> Epa Niospa yoini tãpixõ iskafakĩ: “Yora keyokõichi chakafamisfo, nikayospafo,” ixõ yoini. Askafiaifono ato noikĩ ato chaka soaxoxii afe ĩpaxanõfo.

### *Nios sharafinakõia*

<sup>33</sup> ¡Aicho! ¡Nõko Nios sharakõi! Afama mĩshti tãpikõia. Shinãsharakõia. Āfe shinã mēraxõ yorafoõnoa shinãi keskara tsõa tãpitiroma. Aato akai keskara tsõa tãpitiroma. <sup>34</sup> Tsõa nõko Ifãfe shinãi keskara tãpitiroma. Tsõarikai nõko Ifo tãpimatiroma. <sup>35</sup> Tsõarikai nõko Ifo afaa inãma noko niminõ. <sup>36</sup> Ares Āfe shinãmã shinãxõ afama mĩshti onifani. Keyokõi Āfenã. Aõnoax nipanaka. Nãskakẽ, “Nios sharakõira,” fapanakafo. Askapainõ.

## 12

### *Afeskax Niospa Āfe yonomati nõ itiomãkĩ*

<sup>1</sup> Efe yora mĩshtichi, ě mato yoisharapaiyai keskara akãfe. Epa Niospa mato noikĩ mato sharafamiski. Nãskakẽ mãri inãmekãfe mato Ifo inõ, Āfe yonomati ipaxakakĩ. Mã askaino anã afara chaka mato ifo itiroma, Nios mato Ifo iki. Shinãkapo. Mã mēste shinãsharakõikĩ Nios noiyanã sharafakãfe. Mã askafaino Nios matoki inimakõitiro. <sup>2</sup> Nios Ifoafãfãfema shinãi keskara shinãyamakãfe. Mã shinãpaoni keskara anã shinãyamakãfe. Iskaratĩa Niospa mato shinã mēra fetsafapaiyai keskara shinãkãfe. Afaa fetsakai mã shinãtiroma. Mã askakĩ mã tãpitiro Niospa mato imapaiyai keskara sharafinakõi. Mato imapaiyai keskara mã ikaino matoki inimatiro.

<sup>3</sup> Epa Niospa ea noikĩ ea yoia ě mato tãpimanõ. Nãskakẽ ě keyokõi mato yoisharapai. Kakapaimis iyamakãfe. Niospa mato imapaiyai keskara fisti shinãkãfe. Afaa fetsa shinãyamakãfe. Niospa mato shinãmana keskara fisti matoõnoa shinãkãfe. Mēstekõi matoõnoa shinãkãfe. Mã Nios chanĩmara fakĩ shinãkãfe iskakĩ: “Ea Niospa imapaiyai keskara ě ipai,” ixõ shinãkãfe. <sup>4</sup> ě mato afara fetsa ěa yoipai. Nõko yora fistifiano nõ põyayai fetsea. Askata nõ feroyata, pachoyata, nã nõ fisti askai fetsea. Nãskaxõ nãfãfe nõ afara fetsafo atiro. <sup>5</sup> Nãskarifiiai nõko Ifo Cristo fistikõi. Akka nõfi Āfe põya keskarata, Āfe fero keskarata, Āfe tae keskarata nõ iki fetsea yora fisti fiax.

<sup>6</sup> Epa Niospa noko amapaiyai keskara nõ aõxõ fetsafo axosharatiro. Mã nõ Nios Ifoafaano a noko imapaiyai keskara noko imaketsai fetsa Āfe meka ato yoinõfo, fetsari ato tãpimanõ, fetsari afaamaisfori ato inãnõ. Nãskarafo noko imaketsai. Mã nõ Nios Ifoafaano noko noikĩ noko katoa noko amai keskara nõ anõ. Noko fetsafo katoa Āfe shinãõxõ fetsafo Āfe meka nõ ato yoinõ. Nãskakẽ mã mato katoano mã chanĩmara faxõ mato yoiai keskara fetsafo ato yoisharakãfe. <sup>7</sup> Mã mato fetsafo katokẽ Āfe shinãõxõ fetsafo ato axosharafãfãikãfe. Mato fetsafo katokẽ Āfe shinãõxõ Āfe meka ato tãpimasharakãfe. <sup>8</sup> Mato fetsafo katokẽ aõxõ fetsafo õiti ato fepeaxõfãfãikãfe. Mato fetsafo katokẽ afara yopaifo inimayanã ato inãsharakãfe. Mato fetsafo katokẽ Āto xanĩfo mã inõ. Nãskakẽ Niospa shinãmana keskara ato yonomasharakãfe. Xanĩfo mēsteshara ikãfe. Nã mato katokẽ Āfe shinãõxõ omiskõiaifo ato noikĩ inimayanã ato axosharakãfe.

### *Afeskax Nios Ifoafafo itirofomẽ*

<sup>9</sup> “Ē mato noira,” ifiata ato pãrayamakãfe. Yorafo noikõikãfe. Afara chakafo noikaspakãfe. Afara shara noisharakãfe. Afo potayamakãfe. <sup>10</sup> Nã mã Nios chanĩmara faafo tii noinãkãfe. Mato fe yorakõifo fe mã noinãmis keskariai noinõnãkãfe. A mã mã nõimeai keskariai fetsafo ato noisharakãfe. “Fetsafo finakõiaiki, ě finakõiyamaki,” ixõ ato sharafakãfe. <sup>11</sup> Nõko Ifo yonoxoni xaniyamakãfe. Niospa Yõshi Sharaõxõ inimakãi yonosharaxokãfe. <sup>12</sup> Epa Niospa mato sharafaxoxiai keskara shinãkãfe. Nãfo shinãi

inimakāfe. Akka omiskōifi fena fenayamakāfe. Epa Nios kīfikī xateyamakāfe. <sup>13</sup> Nios Ifoafāfe afara yopaifono ato inākāfe. Fetsafo pimasharakāfe. Pexe yopaifāfe mātō pexe mēra ato ikimakāfe. Ato kexesharakāfe.

<sup>14</sup> Mato omiskōimanaifāfe ato kopiyamakāfe. Nios kīfikāfe iskafakī: “Epa Niospa ato chakafayamafe ato sharafafe,” ixō Epa Nios kīfikāfe. Nāskaxori ato ĭchayamakāfe. Askatamaroko ato sharafaxokāfe. <sup>15</sup> Inimaifono māri inimakāfe. Ato sharafaifono aōnoax inimakāfe. Oiaifono māri shināmitsayanā ato shinākāfe. Omiskōiaifono māri atoōnoax omiskōikāfe. <sup>16</sup> Afe feratenākakīma Epa Niospa mato shināmapaiyai keskara fisti anori shinākāfe. “Ĕ ato keskarama,” iyamakāfe. Xanīfofo fisti fe rafepaimis iyamakāfe. Afaayamafo feri rafekāfe. “Ĕ tāpia keskarakai fetsafāfe tāpiafoma,” ixō anori shināyamakāfe. Kakapaiyamakāfe.

<sup>17</sup> Mato chakafafiaifāfe ato kopiyamakāfe. Āto ferotaifi isharakāfe, “Nios chakara,” fayamanō. <sup>18</sup> Keyokōi yorafo fe rafepaisharakāfe. Mā aska sharafapaiiaino fet-safo mato fe rafesharapaikanima. <sup>19</sup> Efe yora mīshtichi, fētsa mato chakafafiaito ato kopiyamakāfe. Epa Niospa meka yoikakī kenenifo iskafakakī: “Mato chakafaifo ĩ ato omiskōimanikai,” ixō kirika kenenifo. Epa Niospa yora chakafo ato omiskōimaxii. Mākai ato omiskōimatiroma. <sup>20</sup> Ato kopitamaroko nā mato noikaspaifo fonāikaifāfe ato pimakāfe. Nōamā ikaifāfe ato ayamakāfe. Ma askafaito ōikani, “Noko kopikan-imara,” ikanax rāfipainōfo. <sup>21</sup> Askata fetsafāfe mato chakafapaiiaifāfe māri kopikiri ato chakafayamakāfe. Chaka ifofayamakāfe. Askatamaroko afara sharafatitaifakāfe. Askafakī mā chaka potatiro.

## 13

### *Nō xanīfofo nikakōitiro*

<sup>1</sup> Epa Niospa yoini keskara nā maitio ikafāfe xanīfofo katotirofo. Akka xanīfo finakōia nikata afe rafeafori nikakōikāfe Niospa ato xanīfo imaino. Akka Niospa xanīfo ato imayamaino itirofoma. <sup>2</sup> Niospa noko yoini iskafakī: “Mātō xanīfofo nikakōikāfe.” Akka mātō xanīfo mā nikakaspakī Niosri mā nikakaspai. Mā nikakaspaito mato omiskōimaxii. <sup>3</sup> Akka nō isharaxkai nō xanīfoki mesetiro. Akka nō isharayamax nō xanīfoki mesetiro. Xanīfoki mesexikima isharakāfe. Mā askaito mato chakafatama matoōnoa yoisharanōfo. <sup>4</sup> Xanīfofo Epa Nios yonoxomis keskarrafo mato axosharakani. Akka mā afara chakafaax xanīfoki mā mesetiro. A xanīfoafo afokai kaxpa xanīfoafoma, mato omiskōimatirofo. Nāfofi Niospa ōimati keskarafokī afara chakafaifāfe ato omiskōimatirofo. <sup>5</sup> Akka mātō xanīfofo nikakōikāfe mato omiskōimayamanōfo. Mātō shinā mēraxō shināsharaxikakī. Ato nikayamakī mā shinātiro iskafakī: “Ooa, ĩ nikayospakōi. Nāskax ĩ shināmitsaito ĩ mei,” ixō mā shinātiro xanīfofo nikayamax.

<sup>6</sup> Mātō xanīfofo Nios yonoxomisfo keskarrafo pena tii mato yonoxokani mā isharanō. Nāskakē mato kori yōkaifāfe ato inākāfe aōxō mato axosharanōfo. <sup>7</sup> Mā ato nimixō ato kori inākāfe. Askatari ato noisharata ato noisharakāfe.

### *Nō nōinōnātiro*

<sup>8</sup> Tsoa nimiyamakāfe. Askatamaroko noinākāfe. Noināi eneyamakāfe. Nā nō yorafo noiaiōxō Epa Niospa yoini keskarakōi nō amis. <sup>9</sup> Noko yoikī iskafani: “Mātō āfima fe iyamakāfe. Kērofori mātō fenema feri iyamakāfe. Retemitsapaiyamakāfe. Yometsoyama-kāfe. Fetsa pārayamakāfe. Fetsa fīapaiyamakāfe,” ixō noko yoini. Afara fetsafori noko yoini. Nō yorafo noikī na Epa Niospa yoini keskara nō ato chakafaima. Nāskakē a mīa mī noimei keskari akī fetsafo ato noife. <sup>10</sup> Nō fetsafo noikōixō nō ato chakafatiroma. Akka nō ato noikōikī Niospa yoini keskara nō aki. Nō āto āfi fe nō ipaima. Askatari nō ato noikōixō nō atoki yometsoima. Askatari nō ato pārima. Akka nō ato noiaiōxō Niospa noko yoia keskara nō atiro.

<sup>11</sup> Nā Jesús fena oyoaima chāi ē taefakī Jesús Ifofani. Akka iskaratīa nōko Ifo Jesús mā chaima oi. Nāskakē ē mato yoiai keskara akāfe. Oxakatsa ikai keskara iyamakāfe. Oxakatsa ikīkai nō yonosharatiroma. Nāskakē xanikakīma Jesús yonosharaxokāfe itip-inīsharaxikakī. <sup>12</sup> Mā penaino samamakōi penatiro. Nāskarifiakakī mā nōko Ifo chaima oaino fakish mēra ika keskara iyamakāfe. Māto chaka xatekōikāfe. Jesús ika keskara māri xafakīa ikāfe afara chakafaxikakima. <sup>13</sup> Isharakōikāfe penano nō ōisharatiro pakexikima. Nāskarifiakī Jesús Ifofaax nō isharakōitiro afaa chakafatama. Akka fetsafāfe monokakī afara chakafaifo mēra foyamakāfe. Chaka fetsa fetsatapafo ayamakāfe. Pāeyamakāfe. Askatari māto āfima chotayamakāfe. Kēromāri māto fenema chotamayamakāfe. Afara chaka fetsafo shināyamakāfe. Feratenā faatanāyamakāfe. Fetsa xītipaimis iyamakāfe. <sup>14</sup> Askatamaroko nōko Ifo Jesucristo fe rafekāfe. Jesús ika keskara māri ikāfe afara chakafakīma. Afara chaka mā shināpaiyai keskara ayamakāfe.

## 14

### *Mato fe yorafo a Nios Ifofafo mekafakī chakafayamakāfe*

<sup>1</sup> Meka fetsa ē mato yoinō. Fetsafāfe Jesús Ifofafiakaxō āfe meka tāpisharakanamax mato fe ichanāifono, “Aicho, nofe ichanāi fekāfe,” ato fakāfe. Mā shināi keskara anori shināyamaifono ato fe feratenāyamakāfe. Ato mekafakī chakafayamakāfe. <sup>2</sup> Mato mēra ixō fētsa yoitiro iskafakī: “Ē Jesús chanīmara faxō keyokōi ē pitiro,” ixō yoitiro. Akka fētsa yoikī iskafatiro: “Ēfi Jesús chanīmara fakī ēkai nami pitiro. Ē fanafo fisti pitiro,” ixō yoitiro Jesús meka tāpisharaxoma. <sup>3</sup> Fētsafāfe nami pikī a nami pimisfoma ato mekafakī chakafatiroma. Ato yoikī iskafatirofoma: “Mā afaa tāpiama. Nō nami pia shara, noko chakafatiroma. Nami shara,” ato fatirofoma. Nāskarifiakī nā nami pimismato a nami pimisfo ato mekafakī chakafatiroma. Ato yoikī iskafatiroma: “Nafāfe nami pikakī chakafakani,” ixokai atoōnoa yoitirofoma. Akka Epa Niospa keyokōi nāskarifo noko ifi nō āfe fakefo inō. Nāskakē fetsafo mekafakī chakafayamakāfe. <sup>4</sup> Jesús Ifofaafokai māto inafoma. Akka afāfe Epa Nios yonoxomisfo. Nāskakē ato mekafakī chakafayamakāfe. Epa Niospa ato yoitiro. A chakafaifo ato iskafatiro: “Mā chakafai,” ixō ato yoitiro. Askatari a sharafaifo, “Mā sharafai,” ato fatiro. Akka a chaka shināifo Niospa ato tāpimatiro isharanōfo anā chaka shinānōfoma.

<sup>5</sup> Akka a Nios Ifofafo fetsafāfe shinākani iskafakakī: “A judeofāfe tenetitīa nō ichanātiro Jesús shināi,” ixō anori shinākani. Akka fetsafāferi shinākani iskakakī: “Nā pena keyokōi shara nō ichanātiro Jesús shināi,” ixō shinākani. Nāskaxō nā āto shināmā shināifo keskara shara. Nā shināifo penata ichanātirofo Jesús shinākani. Akka mā shināi keskara shināyamaifono ato mekafakī chakafayamakāfe. <sup>6</sup> “Na judeofāfe tenetitīa nō ichanātiro Jesús shināi,” ixō shināifāfe, nāfāfe nōko Ifo Jesús Ifofasharapaikani. Akka a nā fatora penata nō ichanātiro Jesús shināi ikaifāferi, nāfāfe nōko Ifo Jesús Ifofasharapaikani. Askatari fetsafāfe shinākani: “Nō nami pitiro. Aicho, Epa Niospa mī noko nami inā nō pinō,” ixō shinākani. Nāfāferi nōko Ifo Jesús Ifofasharapaikani. Akka fetsafāferi nā nami piyamaifāfe nāfāferi nōko Ifo Jesús, “Aicho,” fatirofo. Nāskaxō nāfāfe Nios shināsharapaikani. <sup>7-8</sup> Nō niyoxōkai nōa nō apaiyai keskara fisti nō shinātiro. Epa Niospa noko amapaiyai keskara nō shinātiro. Nōfi āfenāfoki. Nāfi nōko Ifokī. A nō naitīari nōko Ifo Jesús niyoxō nō Ifofasharapai nokoki inimanō. A nō naitīari nōko Ifo nō shinātiro nōmāi āfenākōixō.

<sup>9</sup> Cristo noko nāxonī. Mā maifafono otokainixakī. Iskaratīa mā nia. Nāskakē nō nayoamax nōko Ifo iki. Mā nō naaxri nōko Ifo ixii. <sup>10</sup> ¿Afeskafakī mato feta chanīmara faafo mā mekafakī chakafaimē? ¿Afeskafakī mā fetsaōnoa mā shināchakaimē? “Aakai afaamara,” ixō mā shināi. Shinākapo, keyokōi nō chipo Nios ikano nō akiki nokoi kaikai. Askatari noko yoixii nō afara sharafayamakē nō chakafamiskē. <sup>11</sup> Isaías Niospa meka yoikī kirika kenenī.



Niospa yoini iskafakī: “Chanīmakōi ē nia. Chanīmakōiri keyokōi maifo tii anoafo ekeki nokoxikani. Ekeki ratokonō mai chachikaxō yoixikani: ‘Epa Niospa, mī chanīmakōi, mī Nioskōi,’ ixō ea keyokōichi yoixikani.”

<sup>12</sup> Akka keyokōichi Epa Niospa ferotaifi nō amis keskara nō yoixii. Nō shināmis keskarari nō yoixii.

### *Fetsafo afara chakafamayamakāfe*

<sup>13</sup> Nāskakē a mato feta Jesús chanīmara faafo mekafakī chakafayamakāfe. Iskafakī shinākāfe: “Nō afara chakafaito ōikaxō akairi chakafatirofo. Nāskakē nō afaa chakafapaima akairi afaa chakafayamanōfo.” <sup>14</sup> Jesús ēfe Ifokē ē mato yoisharapai. Keyokōi a nō piaifo shara nō pitiro. Nā ē chanīmara fakōini. Nāskafiano fetsafāfe shinākani iskafakakī: “Na piaifo nō pixō nō chaka shinātiro,” ixō shinākani. “Nō nami pitiro,” ixō shināfikakī mā nami pikani. Nāskaxō chaka shinākani. <sup>15</sup> Mato feta fētsa Jesús chanīmara faito āfe ferotaifi a nami pitiro piyamakāfe āfe shinā mēraxō shināchakanōma. A noikōixō mā āfe ferotaifi pitiro. Nōko Ifo Cristo aōnoaxri nani. Nāskakē a pitiro pikī mā fetsa shināchakamatiro. Nāskakē āfe ferotaifi piyamakāfe Jesús kachikiri faax fenoyamanō. <sup>16</sup> “A ē akai keskara chakama,” ixō mā shināfiaino fetsafāfe askara shinākanima. Iskafakī shinākani: “Na mā akai keskara chaka,” mato faifono mā xaterisafatiro matoxō shināchakayamanōfo. <sup>17</sup> A nō piaito Niospa yora noko imatiroma. Askatari a nō ayaito Niospa yora noko imatiroma. Akka Nios nōko xanīfokōino āfe Yōshi Sharaōnoax nō sharakōi. Nōko ōiti fekaxteima nō inimakōitiro. <sup>18</sup> Nōko Ifo Cristo nō nikasharaino Epa Nios nokoki inimasharatiro. Yorafāferi nokoōnoa shināsharatirofo.

<sup>19</sup> Nāskakē Jesús chanīmara fai fetsafo fe isharakōikāfe. Jesúsnoa yoinōnākāfe a keskara shara ixikakī. <sup>20</sup> Niospa yoini keyokōi a nō pi ai shara. Nāskafekē fetsafāfe, a Nios tāpisharafāfema shinākani iskafakakī: “Afaa fetsa nō pixō nō chakafai,” ixō shināifono āto ferotaifi afara piyamakāfe. Akka mā āto ferotaifi piaino mato ōikakī āto shinā mēra shināchakatirofo. Nāskaxō anā Jesús Ifofasharatirofoma. <sup>21</sup> Mā nami piaito fetsafāfe mato ōikī shināchakatirofo. Nāskaxō anā Jesús Ifofatirofoma. Nāskakē āto ferotaifi afaa piyamakāfe. Askatari mā māmā ayaito ōikakī fetsafāfe shināchakatirofo. Nāskaxō anā Jesús Ifofatirofoma. Nāskakē anā ayayamakāfe. Afaa fetsafori akī mā ato shināchakamatiro, nāskakē xatekāfe Jesús Ifofanōfo. <sup>22</sup> Nāskaxō mā shināi keskara mares shinākāfe. Epa Nios fisti mā yoitiro. Mā Nios chanīmara faxō mātō shinā mēra shināsharakī mā iskafatiro: “Chanīma, ē akai keskara chakama,” ixō shinākī mātō shinā mēra mā inimatiro. <sup>23</sup> Nāskaxō fētsa Niospa meka tāpisharaxoma shinātiro iskafakī: “Nafo pikī ē chakafairakaiti,” ixō shināfikī akairi pikī chakafatiro. Afaa fetsafori shinākī iskafakī: “Nafo akī ē chakafairakaiti,” ixō shinākī akairi akī chakafatiro.

## 15

### *Nā mā apaiyai keskara fatama fētsa apaia keskara axokāfe*

<sup>1-2</sup> Jesús chanīmara fakōixō a Niospa meka tāpisharafoma nō ato fenāmāshta yoitiro ato fe feratenātama. Nōa nō apaiyai keskara fisti nō atiroma. Nā Jesús chanīmara faa fetsafori noikī nō ato axotiro āto shinā mēra inimamakī shara inōfo Jesús Ifo sharafakōinōfo. <sup>3</sup> Shinākapo. Nōko Ifo Cristo aafi apaiyai keskara fisti shināpaonima. Aōnoa Nios yoimisto kirika keneni iskafakī: “Epa, ē mia nikakōia. Akka mia chakafakakī eari chakafakani,” ixō kirika keneni Cristoōnoa yoikī. <sup>4</sup> Niospa meka kenepakenifo noko tāpimaxikakī. Āfe meka nō chanīmara faxō afara chaka finōkōixō nō tenekōinō. Āfe mekaōxō nōko ōiti nō fepeaxō nō tāpitiro nōko Ifo fe nai mēra chipo nō afe ipanaka anā afara chakapa noko omiskōimanōma. <sup>5</sup> Noko afara chakapa afeskarafafaito Epa Niospa noko mitsisfamatiro nō tenenō nōko ōiti fepeaxokī. Nāskakē mā Jesús Ifofasharaino mato nānori fisti shināmatiro. <sup>6</sup> Nāskakē nōko Ifo Jesucristo āfe Apa nō yoisharai. Nāskax nā meka fistipa nō me kai keskarakōi Epa Nios yoisharakī nā yora fisti keskara.

### *Niospa meka shara judeofoma yoinifo*

<sup>7</sup> Cristo nokoki inimakī noko ifini afe yorafo nō inō. Nāskakē māri fetsafo fe yōra faatanākāfe. Mā askaino Niosnoa shināsharatirofo. <sup>8</sup> Ē mato yoinō Jesucristo mai ano oni judeofo ato yonoxomis keskara ikiyoi. Niospa nōko xinifo yoiyoni keskara Cristo oni. Nāskakē Niospa nōko xinifo yoini keskara chanīmakōikē nō tāpitiro. <sup>9</sup> Akka judeofomaōnoaxri Jesús oni. Nāfāferi chanīmara faxō yoixikani iskafakakī: “Aicho, Epa Niospa noko noikī āfe Fake nokoki nīchini. Epa Nios shara,” ixō yoixikani. Nānori David kirika keneni iskafakī:

Epa Niosi, ē mīōnoa ato yoisharaxii, a judeofoma. Ē mia fanāki, “Aicho, Nios shara,” ē mia faxii,

ixō kirika keneni. <sup>10</sup> Anā Niospa meka yoikī kirika keneni iskafakī:

Judeofoma nā judeofo fe inima faatanākāfe. Māri ato fe Niospa yora ixii, ixō kirika keneni. <sup>11</sup> Anā kirika keneni iskafakī:

Maitio anoafāfe, nōko Ifoōnoa yoisharakāfe. Keyokōi nā maifo tii ikafāfe nōko Ifo fanākāfe,

ixō kirika keneni. <sup>12</sup> Isaías aatori iskafakī kirika keneni:

Nōko xini Isaí āfe fena na maitio ikafāfe āto xanīfo ixii. Shināxikani iskafakakī: “Nā fistichi Nios ika ano noko ifitiro nō afe ĩpaxanō, nō anā nanakama,” ixō shināxikani, ixō Isaías kirika keneni Cristoōnoa yoikī.

<sup>13</sup> Epa Nios chanīmara faxō nōko Ifo oxiaino nō manai. Epa Niospa noko shināmani iskafakī: “Chanīma, nōko Ifo oxii noko ifixiki nō afe ĩpaxanō,” ixō noko shināmani. Nāskakē ē mato kīfixomis Niospa mato inimamanō. Askatari māto shinā mēra mato shināmasharai mā afeskatama mā isharanō mato axosharai. Mā Nios chanīmara faano āfe Yōshi Sharapa mato axosharai mā isharanō.

### *Pablo Jesucristoōnoa judeofoma ato yoini*

<sup>14</sup> Efe yora mīshtichi, mē tāpia mā noinā faatanāito Jesúsnoa mā tāpisharai mā yoinōnāsharatiro. <sup>15-16</sup> Niospa ea noikī ea katonī Jesucristo āfe yonomati ē inō, āfe meka shara ē mato tāpimanō. Nāskakē ē ranotama anā aōnoa ē mato shināmasharai kirika kenekī. Akka Niospa ea nīchini judeofoma ē ato Jesús Ifofamanō. Mā Jesús Ifo sharafaxō, māto chaka mā soax a keskara shara mā inō. Nāskax Epa Nios matoki inimakōi.

<sup>17</sup> Nāskakē ē inimakōi nōko Ifo Jesucristomāi ea katonikē Epa Nios ē yonoxonō judeofoma Niospa meka ē ato yoinō. <sup>18</sup> Ēa ē ato yoima. Cristo ea shināmanaino ē ato yoimis. Nāskakē a ē ato yoimis keskara Epa Niosnoa nikakōimisfo. <sup>19</sup> Āfe Yōshi Sharapa ea shināmanaino a tsōa atiroma keskara ē ato ōimana. Nā maitio Jerusalén anoafō yoita Ilírico anoafori ē ato yoini. Keyokōi nā meka shara Cristoōnoa ē ato yoifofāsafamis. <sup>20</sup> Ēkai a yora fetsafāfe Cristoōnoa yoimisfo ari ē kapaimisma. A Cristoōnoa nikamisfoma ano ē kapaimis ato tāpimaxiki. <sup>21</sup> Nānori Isaías Niospa meka keneni iskafakī:

Tsōa aōnoa nikayomisma chipo nikakaxō tāpinōfo, ixō keneni.

### *Pablo Roma ano kapaikī shināni*

<sup>22</sup> Akka ē mato ari kapaimis. Ē mato ōikapaifi ē kamisma. Afara fētsa ea katimafamis. <sup>23</sup> Nāskafixō iskaratīa Jesúsnoa mē ato yoikī mē mitoa. Nāskax mē itipinīa mato ari kaxiki. Mē xini ichapa amis mato ōikapaikī. Mēxotaima ē mato ari kapaimis. <sup>24</sup> Ē España ari kai ē mato ano nēteyoxii mato fe mekaxiki nō yoinōnāsharaxiki. Mato anoax ē kaito a ē yopai ea ināxikāfe ē España ari nokosharanō. <sup>25</sup> Akka iskaratīa ē Jerusalén ano kayoikai. Jesús chanīmara faafāfe ea nīchikani a Jerusalén anoxō Jesús chanīmara faafo ē ato kori inānō. <sup>26</sup> Macedonia anoxō a Jesús chanīmara faafāfe Jerusalén anoafō a Jesús chanīmara faafo ato kori ināpainifo. Acaya anoxori Jesús chanīmara fakaxō ato kori ināpainifo a afaamaisfo. Nāskakē ea kori inānifo ē ato inātanō. <sup>27</sup> Inimayanā ato ināpaikakī ato yoinifo

iskafakakī: “Jerusalén anoax Jesúsnoa yoimisfo nokoki fenifo Jesúsnoa meka shara noko yoi fekani. Akka nokoki feyamanifono na meka shara nõ nikakeranama. Nāskaxõ nõ afarayaxõ nõ ato ināpai ato sharafakī,” ixõ yoinifo. <sup>28</sup> Nāskata ẽ ato kori ināfainikai Jerusalén anoax España ari kakī. Nāskaxori ẽ Roma anoa ẽ mato õifainikai. <sup>29</sup> Mẽ tãpia ẽ mato ano nokoxõ nõko Ifoxõ ẽ mato yoisharaxii mãto shinã mẽra mã inimanõ.

<sup>30</sup> Efe yora mĩshtichi, meka fetsari ẽ mato yoipai. Mã nõko Ifo Jesucristo noixõ ãfe Yõshi Sharaõxõ ea noikãfe. Ea Nios kĩfixokãfe ẽ yonosharaxonõ afanã ea afeska fanõma. <sup>31</sup> Ea kĩfixokãfe Epa Niospa ea kexenõ Judea anoafãfe a Jesús chanĩmara faafãfema ea afeska fanõfoma. Ea kĩfixokãfe a Jesús chanĩmara faifo Jerusalén anoafõ ẽ ato kori inãino inimakõikai finõfo. <sup>32</sup> Mẽ ato inãkĩ mitoano Epa Niospa ea nĩchiano ẽ inimayanã matoki nokoxinõ. Nāskata nõ yoinõnãsharaxinõ nõko õiti mẽra inimayanã. <sup>33</sup> Epa Nios mato fe inõ. Akka Niospa noko imasharatiro nõ isharanõ.

## 16

### *Pablo ato meka fomani*

<sup>1-2</sup> Nofe yora Febe, Cencrea anoax matoki nokokẽ sharafakãfe. Nã kẽromã nõko Ifo Ifofasharakõimis. Cencrea anoxõ a Nios Ifofaafõ ato sharafaxomis. Yora fetsafori ato afara yopaito axokãfe.

<sup>3</sup> Aquila ãfe ãfi Prisca nã rafe efeta Jesucristo yonosharaxomisfo. Ea ato yoisharaxokãfe. <sup>4</sup> Yorafãfe ea retepaiyaifãfe nã rafeta ea kexesharamisfo ea reteyamanõfo. Ẽfe kaifomari nã Jesús chanĩmara faafãfe ichanãkaxõ yoimisfo iskafakī: “Aquila yafi Prisca nõ atoki inimasharakõi,” ixõ yoimisfo. <sup>5</sup> Ẽto pexe anoaxri ichanãkaxõ ea ato yoisharaxokãfe. Efe yorakõiri Epeneto ea yoisharaxokãfe. Nãatofi Asia anoxõ Cristo chanĩmara fakī taefaniki. <sup>6</sup> Mariari mato yonosharaxomiski aari ea yoisharaxokãfe. <sup>7</sup> Efe yora raferi Andrónico yafi Junias ea ato yoisharaxokãfe. Nã rafe efe karaxa mẽra ikinifo. A Jesúsnoa yoimisfãfe a rafeõnoa yoisharamisfo. Ẽ Jesucristo chanĩmara famatai nã rafeta chanĩmara fakī taefanifo.

<sup>8</sup> Ampliatori ẽ noishara nãatomãi nõko Ifo Ifofasharakõiaito. Aari ea yoisharaxokãfe. <sup>9</sup> Urbano efeta Jesucristo yonoxomis. Nãrifi ea yoisharaxokãfe. Efe yorashtari Estaquis nãri ea yoisharaxokãfe. <sup>10</sup> Apeles feronãfake sharakõi. Epa Nios akiki inimamis. Nãatoro Jesucristo yonosharaxomis. Nãri ea yoisharaxokãfe. Aristóbulo yafi afe yorafori ea ato yoisharaxokãfe. <sup>11</sup> Efe yorashtari Herodiõn ea yoisharaxokãfe. Narciso yafi afe yorafãferi nõko Ifo chanĩmara faafõ, afori ea ato yoisharaxokãfe. <sup>12</sup> Trifena yafi Trifosari ea ato yoisharaxokãfe. Nã kẽro rafeta nõko Ifo yonosharaxomisfo. Nofe yora Pẽrsidari ea yoisharaxokãfe. Nã kẽromãri nõko Ifo yonosharaxomiski. <sup>13</sup> Nõko Ifãfe Rufori katonni afe yora inõ. Nã Rufo ãfe afa ẽfe efakõi keskara. Ea kexesharamis. Nã raferi ea ato yoisharaxokãfe. <sup>14</sup> Asíncrito ikaino Flegonte ikaino Hermas ikaino Patrobas ikaino Hermes ikaino nãfãfe nõko Ifo chanĩmara faafõ. A fetsafãferi nõko Ifo chanĩmara fakanax ato fe ikafori ea ato yoisharaxokãfe. <sup>15</sup> Filólogo ikaino Julia ikaino Nereo ikaino ãfe poi Olimpasi ikaino keyokõi a nõko Ifo chanĩmara fakanax ato fe ikafori ea ato yoisharaxokãfe.

<sup>16</sup> Keyokõi ichanãkanax yoinõnã faatanãsharakãfe noinõnãsharaxikakī. Nã maitio ikafãfe a Cristo Ifofaafãfe mato yoisharapaikani.

<sup>17</sup> Efe yora mĩshtichi, ẽ mato yoinõ nikakapo. Mato fe ichanãmis fetsafãfe mato afara chakafamapaikani anã mã Jesúsnoa shinãnõma. Akka nõ mato mẽstekõi tãpimanai keskara nãfãfe mato anori yoikanima. Akka fakirira mato yoipaikani anã mã Jesús shinãnõma. Nāskax ato fe rafeyamakãfe, mato pãratirofokī. <sup>18</sup> Afãfekai nõko Ifo Cristoõxõ yoimisfoma. Nãfãfe afara fipaiyaifo fistis shinãmisfo. Niospa meka tãpisharafoma ãto meka fistiõxõ ato pãrapaikani ato anorima shinãmaxikakī. <sup>19</sup> Keyokõichi mã nikafo nõko Ifo mã Ifofasharakõikẽ. Nāskakẽ ẽ matoki inimakõini. Afara sharafoõnoa tãpikõikãfe. Mã

afara chakaõnoa tâpiyamakãfe. Afoõnoa shinãyamakãfe. <sup>20</sup> Epa Niospa mato imasharatiro mã isharanõ. Nãato Satanás mato nãmã potai anã mato afeskafanõma. Nõko Ifo Jesucristo mato sharafaxopainõ.

<sup>21</sup> Nã Timoteo efeta Jesús yonoxomisto mato mekashara fomai. Askatari Lucio ikaino Jasón ikaino Sosípater ikaino nãfãferi mato mekashara fomakani. Nãfo efe yorakõifo.

<sup>22</sup> Nã Terciori mato mekashara fomai. Nãato ea kirika kenexona.

<sup>23</sup> Gayopa pexe mēra ē ikē ea kexemis. Jesús chanĩmara faa fetsafori Gayopa pexe mēranoax ichanãmisfo. Nãfãferi mato mekashara fomakani. Na Erasto pexe rasi anoa ato kori kexexomisto mato mekashara fomai. Askatari nofe yora fetsari Cuarto nãatori mato mekashara fomai.

<sup>24</sup> Nõko Ifo Jesucristo mato noikĩ mato sharafanõ. Askapainõ.

*Mã ato yoikĩ enekĩ Niosnoa ato yoisharani*

<sup>25-26</sup> Epa Niospa mato kexesharanõ. Ë Jesucristoõnoa mato yoimis keskara ãfe shinãmã mato shinãmatiro mã Ifofasharanõ. A iyopaonifãfekai tsõa Jesucristoõnoa tâpiyopaonifoma. Akka iskaratĩa keyokõichi mã tâpiafo. Epa Niospa nã nipanakato noko nĩchini Jesucristoõnoa nõ ato yoinõ. A ixiainoa Epa Niospa ato yoini nãnorikõi kirika kenenifo. Nã maitio ikafãfe Jesús chanĩmara fayaná nikasharatirofo.

<sup>27</sup> Nõko Ifo Jesucristoxõ keyokõichi Niosnoa yoisharapakenakafo. Nõko Nios fistichi keyokõi tâpikõia. Askapainõ.

Nã tii ē mato yoi.

## Pablo Corinto Anoafu Kirika Kenexõ Fomani

### *Pablo Jesús chanĩmara faafu Corinto anoafu kirika kenexõ ato fomani*

<sup>1</sup> Ēkĩa Pablo, ẽ mato kirika kenexõ fomai. Nofe yora feta nã Jesús Ifofamis feta, ẽfe ane Sóstenes, efeta mato kirika kenexoni. Epa Niospa ea katopaikĩ ea katonĩ ẽfe meka shara Jesucristoõnoa ẽ yoifofãsafanõ. <sup>2</sup> Akka Jesucristo ea nĩchini ẽ ẽfe meka shara keyokõĩ maifo tii ẽ ato yoifofãsafanõ. Corinto anoafãfe mãfi Niospa fakefoki. Nãskakẽ ẽ mato kirika kenexõ fomai. Mã mẽxotaima ichanãmis Niospa meka shara tãpisharakõixikĩ. Niospa mato katonĩ Jesucristoõnoax mã afe yora shara inõ. Mato fisti katonĩma, a shinãifori keyokõĩ ato katonĩ mato fe Niospa yora inõfo. Nã mai fetsa anoafãfe nõko Ifo ẽto Ifo. <sup>3</sup> Mato noikĩ mãto shinã mẽraxõ mato shinãmasharanõ. Epa Nios feta nõko Ifo Jesucristo mato askafanõ.

### *Jesucristo afara sharafo noko axotiro*

<sup>4</sup> Mẽ tãpia Jesucristo mato noikĩ afarafo mato tãpimani ẽfe õiti keskara mã inõ. Nãskara tãpixõ ẽ Epa Nios kĩfikĩ iskafa fafãfãini: “Aicho Epa Niosi, mã Corinto anoafu afara sharafo Jesucristoõxõ mã ato tãpimanaki,” ixõ ẽ kĩfifãfãini. <sup>5</sup> Chanĩma, Jesucristo mato fe rafesharaino aõxõ mã Niosnoa tãpisharakõitiro. Akka ẽfe shinãõxõ xafakĩa mã yorafo mã yoisharatiro. Jesucristoõnoa mã ato yoisharatiro. <sup>6</sup> Nõ mato Jesúsnoa yoini keskara nikakĩ mãto õiti fetsafaxõ a keskara shara mã ixii. Nãskakẽ mã Jesús chanĩmara faxõ mã mã ato õimana. <sup>7</sup> Nãskakẽ Epa Niospa ẽfe Yõshi Sharaõxõ mato imapaiyai keskara mã iki. Nios chanĩmara faa fetsafo nãskarifiakani Niospa mato shinãmasharaino. Nãskakẽ mã nõko Ifo Jesucristo fe ipaikõikĩ mã manasharai nã nokoaitĩa õixikĩ. <sup>8</sup> Oyoxoma mato kexesharayoi. ẽfe kerex shara mato inãyoi mã Ifofasharano. Nãskakẽ nokoõxõ yoixii iskafakĩ: “Mãfi efe ipanakaki, ẽ mato chaka soaxonano. Nãskakẽ tsõa mato iskafatiroma: ‘Mã chakakõifoki,’ mato tsõa fatirofoma,” ixõ mato Jesús yoixii. <sup>9</sup> Epa Niospa mato katonĩ ẽfe Fake nõko Ifo Jesucristo fe mã rafenõ. Epa Nios chanĩma, noko yoiaĩ keskara aki.

### *Corinto anoxõ Jesús chanĩmara faafãfe anoris shinãnifoma*

<sup>10</sup> Efe yora mãshtichi, ẽ mato yoisharapai. Nõko Ifo Jesucristo ea yoiaino ẽ mato yoi nãnorifos mã shinãnõ, mã fetsa shinãnõma. Jesucristo mato shinãmapaiyai keskara fisti shinãkãfe. <sup>11</sup> Efe yora mãshtichi, mẽ nika a Jesucristo mato shinãmapaiyai keskara fisti mã shinãima. Cloẽpa afe yorafo nono fẽkaxõ ea yoiãfo mã feratenã faatanãito. <sup>12</sup> Akka mã atiri iskai fetsei: “Nõfi Pablo ifofamiski. Noko tãpimanai keskara kayakakõĩ nõ nikamis. Fetsafãfekai kayakai shinãkanima,” ixõ mã yoimis. Askatari fetsafori iskakani: “Nõfi Apolos ifofamiski,” ixõ mã yoimis. Askatari fetsafori mã iskamis: “Nõfi Pedro ifofamiski,” ixõ mã yoimis. Askatari fetsafori mã iskamis: “Nõfi Cristo Ifofai,” ixõ mã yoiketsamis.

<sup>13</sup> Efe yora mãshtichi, ẽafeskai mã feratenãimẽ? Askarakai sharama. Cristokai anori noko shinãmanima feratenãyanã anorima nõ shinãketsanõ. Cristokai ẽfe shinã ranãyama. Mẽstekõĩ fisti noko yoimis. Akka, ẽafeskakĩ “Nõ Pablo ifofairã” mã ato faimẽ? Ēkai mato ifi cruz ikakĩnoax nãxonima. Cristo fistichi mato ifi cruz ikakĩnoax nãxonĩ mã Ifofanõ. Askatari ẽkai tsoa faka mẽra ikimakĩ maotisafama ea ifofanõfo. <sup>14</sup> Nãskakẽ ẽ inimai. Ēkai tsoa maotisafama. Akka Crispo yafi Gayo nã rafes ẽ maotisafa Cristo Ifofãfãfe õikĩ. <sup>15</sup> Nãskakẽ tsõa yoitiroma iskafakĩ: “Pablo ẽfe aneõnoax ẽ maotisameni. Nãskakẽ ẽ Pablo ifofai,” ixõ tsõa shinãtiroma. <sup>16</sup> Chõõ, iskaratĩari ẽ rama shinãĩ. Estẽfanas yafi afe yorafori ẽ ato maotisafani. Ē shinãyoama ẽ tsoa fetsa maotisafamara ẽ ika. <sup>17</sup> Cristokai ea yoiama ẽ yorafo maotisafapanõ. Akka ea yoia ẽ aõnoa meka shara ẽ mato yoinõ. Ēa shinãxõ ẽ mato yoima. Ēa shinãxokai ẽ mato Jesucristo chanĩmara famatiroma. Jesucristo mato

ifi cruz ikakĩnoax nãxoni mato chaka soaxoxikĩ. Cristo mekaõxõ Niospa mato chanĩmara fatiromo.

*Epa Niospa keyokõi tãpikõia afara fetsa apaikĩ atiro. Cristoõxõ noko õimayopaoni*

<sup>18</sup> Nãskakẽ Jesús ato nãxoni nikakanax a chanĩmara faafãfema yoikĩ iskafakani: “Jesús ifi cruz ikakinoax noko nãxoni nõko chaka noko soaxoxikĩ, ixõ noko yoipaiyaifãfe nõkai chanĩmara fatiroma. ãa chanĩkani,” ixõ shinãmisfo. Nãskakanax nãfo fenokõikani. Omiskõipakenakafo mẽra fokani. Akka nõ Jesús chanĩmara feito noko nimapakenaka nõ afe ãpaxanõ. Niospa ãfe shinãõxõ Jesús noko nãxoni nõko chaka noko soaxoxiki. Afara fẽtsakai noko nimatiroma nõ afe nãpaxanõ. <sup>19</sup> Akka Niospa meka kirikaki kenekĩ iskafanifo:

Fẽtsa yoikĩ iskafatiromo: “Nõ tãpikõia. Nõko mãpo shinãsharafãi nõ afara fetsafo fatiromo nõfi tãpisharakõiakĩ,” ixõ shinãfikakĩ afaa tãpiafoma. Askarafofi ẽ ato õimanikai afãfe shinãifo keskarakai ẽ ato shinãanima. Nãfãfekai afaa tãpimisfoma. ãa shinãmisfo, ixõ Niospa yoini.

<sup>20</sup> Akka, ¿fanĩmẽ a nõ kirika kenekĩ tãpiakõiara imisfo? Akka tãpifikaxõ a Niospa shinãi keskara shinãkanima. Nãfofi Niospa ato õimaxii afaa tãpiafoma keskara fakĩ. “Nõfi afama mĩshti tãpikõiaiki,” ifiaifãfe Niospa afaa tãpiama keskarafoma ato imai. <sup>21</sup> Tsõa pishtakai ãto shinãmã Nios tãpitirofoma. Nios fistichi keyokõi tãpisharakõia. Nãskakẽ nõ ato yoimis iskafakĩ: “Niospa tãpikõixõ ãfe Fake Jesucristo nĩchini noko nãxonõ nõko chaka noko soaxoxikĩ,” ixõ nõ ato yoimis. A Nios chanĩmara faafãfema yoikĩ iskafamisfo: “Jesús chanĩmara faifãfe aõnoa anorima yoimisfo,” ato famisfo. Akka nã Jesús chanĩmara faifo Niospa ato chaka soaxoni afe nipaxanõfo. Nã nõ mato yoimis.

<sup>22</sup> Akka ẽfe kaifo judeofo iskamisfo: “Niospa nai mẽraxõ afama mĩshti noko õimanaito chipo nõ Jesús chanĩmara fatiromo,” ixõ shinãmisfo. Akka nã judeofomafãferi afama mĩshti tãpipaikani. Afeskaxõ Niospa yorafo imasharaimãkai tãpipaikani. Askatari afeskaxõ Jesús yorafo ãto chaka soaxonamãkĩ nãri tãpipaikani. Afama mĩshti ãa shinãkakĩ tãpipaikani. Akka tãpitirofoma. Nãskakẽ iskamisfo: “Noko Jesucristoõnoa yoiaifono nõ tãpitiroma, fekaxkõi. Nãskakẽ nõ Jesús chanĩmara faima. Nã afara nõa nõ shinãi nã nõ chanĩmara fai,” ixõ yoimisfo. <sup>23</sup> Nãnori shinãfiaifono nõ yoikĩ iskafamisfo: “Jesucristo ifi cruz ikakinoax noko nãxoni noko chaka soaxoxikĩ,” ixõ nõ yoimis. Akka ẽfe kaifãfe judeofãfe yoikĩ iskafamisfo: “Ifi cruz ikakĩ mastafa askarakai nõko Ifo itiroma. Akka Cristokai afeskax natiroma,” ixõ judeofãfe shinãmisfo. Nãskatari yora fetsafo Cristoõnoa nikakani akiki kaxepaikani iskamisfo: “Tsõakai askara chanĩmara faima. Akka tsoa fẽtsakai noko nãxotiroma,” ixõ yoimisfo. <sup>24</sup> Askafiaifono nã chanĩmara faifo tii Niospa ato katonni afe ipaxanõfo. Judeofo yafi judeofomari Cristoõxõ Epa Niospa ato katonni chanĩmara faifãfe. Nãskakẽ ãfe shinã sharaõxõ ato nima. Atofi keyokõi tãpikõiaiki Cristoõxõ noko nima nõ afe nipaxanõ. <sup>25</sup> Jesús chanĩmara faafãfema yoikĩ iskafamisfo: “Jesucristo noko nãxoni,” ixõ yoifikakĩ anorima shinãmisfo, ãa chanĩkakĩ. “Akka yora mapo sharayato Cristo chanĩmara fatiromo,” ixõ yoimisfo a Jesús chanĩmara faafãfema. Akka anorima yoifiaifono Niospa ãfe Fake Jesús noko nĩchixonni noko nãxoyonõ. Nãskax Niospa ãfe shinã a chanĩmara faafãfema ãto shinã keskarama. Aatoifi mẽstekõi shinãmisfo. Akka nã chanĩmara faafãfema yoimisfo iskafakakĩ: “Nõ tãpikõia,” ixõ yoifikakĩ yoisharamisfoma. Anorima shinãmisfo. “Nõ afama mĩshti fatiromo,” ifiakakĩ fetsafo nimasharatirofoma. Askafikata aforikai ãa chaka soamatirofoma. Akka Epa Nios fistichi afama mĩshti fatiroxakĩ noko chaka soaxotiro.

<sup>26</sup> Efe yora mĩshtichi, Niospa rama mato katoano afe keskara mã iyopaonimãki. Shinãkapo. Mã fisti rasichi mã kirika kene tãpia mã ipaoni. Askatari mã xanĩfo ipaonima. Nãskax mã finakõia mã ipaonima. Akka nã Jesús chanĩmara faafãfema yoikĩ iskafamisfo: “Afãfekai afaa tãpiafoma,” ixõ mato yoimisfo. <sup>27</sup> Mato askafiaifono Epa Niospa mato katonni afe yora mã inõ. Matoõnoa yoimisfo iskafakakĩ a Jesús Ifoiaifãfema: “Afãfekai afaa tãpiafoma. Shinãsharakanima,” ixõ yoimisfo. Askatari shinãmisfo iskakakĩ: “Nõfi

afama mīshti fatiroki. Akka a Jesús chanīmara faifo pachikōifo, kerexkai shinātirofoma. Nō atiro keskara atirofoma,” ixō shināmisfo. Mato askafafiakakī chipo mato tāpitirofo. Niospa mato afara shara tāpimanaino ōikani rāfipaitirofo. <sup>28</sup> Nāskakē shinākani iskakakī: “Jesús chanīmara faifo afāfekai afaa tāpiafoma. Nāskakē nō ato ōipaima,” ixō matoōnoa mato yoifiaifono Niospa mato katonni afe yora mā inō. “Māakai afaama,” mato fafiaifono Niospa mato katonni mā ato ōimanō akka afāfekairoko afaa tāpiafoma. <sup>29</sup> Akka tsōa pishtakai Niospa ferotaifi yoitiroma iskafakī: “Ē tsoa keskarama. Ē shara shināi fetsafo keskarama,” ixō yoitiroma. <sup>30</sup> Niosnoax Jesucristo afe yorafo mā inō. Jesucristoōxō noko mēstekōi tāpimani āfe ōiti keskara noko imaxii. Noko nāxonni noko chaka soaxoxiki nō afe nīpaxanō. <sup>31</sup> Nāskakē nō Jesús chanīmara faaxkai nō kakapaimis itiroma. Niospa meka yoikī yōra kirika keneni iskafakī: “Akka tsoakai āa yoimesharatiroma iskai: ‘Ē afama mīshti tāpikōia,’ ikax āa kakapaitiroma. Askatamaroko nō yoisharatiroma nā afara sharafo nōko Ifāfe aka,” ixō kirika ano yōra keneni.

## 2

### *Jesucristo ifi cruz ikakī mastanifo Pablo ato yoini Corinto anoafu*

<sup>1</sup> Efe yora mīshtichi, ē matoki nokofenaxō yōra shināōxō ē mato Niospa meka yoiyameama. Niospa āfe shinā fistiōxō ē mato yoiyamea. Ēa shināōxō ē mato yoiyameama. Niospa ea shināmanaino ē mato yoiyamea. <sup>2</sup> Ē matoki oyoxoma ē shinākī iskafani: “Jesucristo ifi cruz ikakinoax noko nāxonni, nā fisti ē ato yoixikai. Afaa fetsa ē ato yoitiromaki,” ixō ē shināyamea. <sup>3</sup> Askata mē nokoax ē matoki ratekōiyamea. Nāskakī rateyanā ē shināyamea iskafakī: “Ē mitsisipama ea ōikakī ea nikakaspatirofo,” ixō ē shināyamea. <sup>4</sup> Nāskakē ē mato Jesucristoōnoa yoimis ēfe shināmā shināōxō ē mato yoitamaro Niospa Yōshi Sharapa ea shināmanaino ē mato yoiyamea. Ē mato yoiaino aōxō mā Jesús chanīmara fayamea. <sup>5</sup> Akka yōra shināōxō mā Jesús chanīmara fayameama. Niospa shināōxō mā chanīmara fayamea.

### *Niospa Yōshi Sharapa noko shināmasharatiroma*

<sup>6</sup> Nāskakē a Niospa meka nikasharaifāfe mā tāpiafo nō Niospa Yōshi Sharaōxō xafakīakōi nō ato yoiaito. Nāskaifono fetsafāferi kirika kene tāpisharakōifikaxō Niospa shināi keskara tsōa anori shināima. Āto shināōxōkai Niospa meka nō mato yoima. Āto xanīfofōfāfe shināifo keskararikai nō mato yoima. Akka āto xanīfofo mā chaimashta tsekekani. Anā afo xanīfo ikanima. Nā xanīfofōfāfe shināifo keskara mā keyoi. A shara shināifo keskara shinākanaxma. <sup>7</sup> A nō mato iskaratīa Niosxō yoia tsōa tāpiyopaonima. Niospa mai onifayoxoma shinākī iskafani: “Ēfe Fāke ato chipo nāxoxii nā chanīmara faafo tii ato nimapakexixakī,” ixō shināni. <sup>8</sup> Ē na meka mato yoiai keskarakai xanīfofōfāfe tāpiyopaonifoma. Nāskaxō Jesús retenifo. Akka tāpikaxokai tsōa nōko Ifo Cristo ifi cruz ikaki mastakeranifoma. Nā nōko Ifo Cristo sharafinakōia. <sup>9</sup> Akka yōra kirika kenekī iskafani:

Afama mīshti shara Niospa ato axoxii. Tsōa ōiyomisma sharafo ato axoxii. A tsōa nikayomisma ato axōfāi a tsoa pishta āto shinā mēraxō shināyomisfoma nāfo ato axosharaxii. A ato noiaifo ato itipinīshara faxoxii, nāskara yoikī Niospa meka yōra kirikaki keneni. <sup>10</sup> Nā kirika kenekī yoinifo keskarakōi Epa Niospa āfe Yōshi Sharapa noko ōimani. Āfe Yōshi Sharapa keyokōi tāpikōia. Epa Niospa shināi keskarari āfe Yōshi Sharapari tāpikōia.

<sup>11</sup> Yōra āfe shinā mēraxō āa shināitokai tsōa tāpitiro. Akka ares fisti tāpitiro. Nāskarifiiai Epa Niospa shināi keskara āfe Yōshi Shara fistichi tāpikōia. <sup>12</sup> Epa Niospa āfe Yōshi Shara nokoki nīchini noko tāpimapaiyai keskara noko tāpimanō. Akka nā chanīmara faafāfema Niospa meka nikakanima. Nāfāfe shināi keskarakai Niospa noko shināmanima.

<sup>13</sup> Nāskakē yorafāfe noko tãpimanifo keskara nõ mato yoitamaroko Niospa Yõshi Sharapa nõko shinã mēraxõ noko shinãmana keskara nõ mato yoimis. Āfe meka chanĩmakõi fisti. Nāskakē nõri aõxõ nõ mato chanĩmakõi Niospa mekakõi tãpimani. Nã meka shara mã nikamis mãmãi Niospa Yõshi Shara mato fe rafeano.

<sup>14</sup> Akka fetsafo Niospa Yõshi Shara fe rafeyamano nãfãfe Niospa Yõshi Sharapa yoiãi keskara nikakaspakani. Nāskaxõ iskafatirofo: “Tsõakai nã meka chanĩmara faima. Akka nã shara shinãifãfe chanĩmara fakanima,” ixõ shinãkani. Akka Niospa Yõshi Sharapa shinãi keskara tsõa tãpiama. Nāskakē Niospa Yõshi Shara ato fe rafeyamano a yoiãi keskara tãpiafoma. Akka Niospa Yõshi Shara fistichi ato tãpimatiro chanĩmara faifono. <sup>15</sup> Akka fatora fetsa Niospa Yõshi Shara afe ikano Niospa tãpimapaiyai keskara tãpitiro. Fatoformãkĩ chaka shinãifo, askatari fatoformãkĩ shara shinãifo Niospa Yõshi Sharapa ato tãpimatiro. Nāskakē a Niospa Yõshi Shara fe rafeyamato a Jesús chanĩmara faifo ato tãpitirofoma. <sup>16</sup> Akka Isaías kirika keneni iskafakĩ:

Tsõakai nõko Ifãfe ãfe shinã mēraxõ shinãi keskara tãpitiro. Tsõakai nõko Ifo tãpimatiro, ixõ kirika keneni. Askafiaifono nã nõ Cristo chanĩmara faifãfe a shinãi keskara nõ tãpitiro nõ afe rafexõ.

### 3

#### *Corinto anoãfo Niospa Yõshi Shara fe rafeafoma*

<sup>1</sup> A fake rama kãiatokai afaa tãpitiro. Mã yosixõ tãpitiro afara fetsa. Nāskarifiãi a rama Jesús Ifofaifãfe Niospa meka tãpisharafoma a fake yome rama kãia keskarafo. Nāskarafo mã Jesús mãto Ifo fiano ranãrito ãfe meka mã tãpisharama. Mã rama Jesús Ifofayamafiãi oa rama Jesús Ifofaifo keskarafo, mã. Niospa meka mã mã nikafikat-saxakĩ a yoiãi keskara mã nikasharama. Ooa efe yora mĩshtichi, mãfi Niospa meka nikamisma keskarafoki, rama Jesús Ifofaifo keskara. Mãfi nã Niospa Yõshi Shara fe rafeama keskarafo. Nāskakē ãfe mato Niospa meka tãpimasharatiroma mãkairoko itipinĩsharakē nikasharaxikima. <sup>2</sup> Fake yome rama kãiato chocho fisti atiro, afaakai pitiro. Nāskarifiãkĩ Niospa meka mã nikapaifikĩ ãfe meka mã nikasharatiroma. Nāskakē ãfe meka ichapa ãfe mato yoiyotiroma. Āfe meka fetsafori ãfe mato yoipaifiaino mã nikasharaima. Nāskax mãkai itipinĩsharapaima Niospa meka nikasharaxikima. <sup>3</sup> Mãfi nã Niospa Yõshi Shara fe rafeama keskarafokĩ. Nāskaxõ fetsafo mã ato xĩtipai mã ato keskara ipaikĩ. Nāskax mã fochishpanã faatanãi mã ika. Nāskaxõ yõra shinãi keskara mã shinãi. Akka Niospa Yõshi Sharapa mato shinãmapaiyai keskara mã shinãima. <sup>4</sup> Mã fatora fetsafãfe yoikĩ iskafai: “Nõfi Pablo ifofakĩ. Pablo fistichi noko tãpimasharatiro,” ixõ mã yoimis. Akka fetsafãferi mã yoikĩ iskafai: “Nõfi Apolos ifofakĩ. Apolos noko shara yoitiro,” ixõ mã yoimis. Nāskax mã fochishpanã faatanãpai. Nāskaxõ yõra shinãi keskara mã shinãi. Askarafokai Niospa Yõshi Sharapa mato shinãmanima.

<sup>5</sup> Akka askayamakãfe. Nõ afaama. Akka Apolos fetakai nõ afaa tãpiama. Nõkai Niospa keskarama. Akka nõfi ãfe inaki. Nāskaxõ nõ mato Jesús chanĩmara famani. Nõko Ifo Niospa noko katonni noko yonomapaiyai keskara nõ yonoxonõ. <sup>6</sup> Ē mato iskafakĩ yoipai. Yora fetsa taefakĩ xiki fanatiro. Fetsafãfe a nãmã orometirofo foaisharanõ. Nāskafixokai nã rafeta xiki foaimatirofoma. Nios fistichi xiki foaimasharatiro. Nāskarifiãkĩ ãfe mato taefakĩ Jesucristo chanĩmara famani. Chipo Apolos Cristoõnoa mato yoini ãfe meka mã nikasharakõinõ. Nõ mato yoiaino Nios fistichi mãto shinã mēraxõ mato shinãmasharatiro ãfe meka mã tãpisharakõinõ. <sup>7</sup> Nã ãfe mato yoiãito mã nikai keskara Apolos feta nõ afaa tãpiama. Akka Nios fistichi yorafo shinãmasharatiro ãfe meka tãpisharakõinõfo. <sup>8</sup> Akka taefakĩ fetsafo Jesús chanĩmara famano, a chipo ato yoiãitori nãnorikõiri ato yoi. Nã rafetamãi nãnorikõi shinãkakĩ Niospamãi ato shinãmanaino. Nāskakē ato Jesúsnoa yoixikani a Ifofasharanõfo. Nāskatari Niospa a yonoxonafo ato afara inãxii. Fetsa ichapa



ināta fetsafori ichapama ināxii yonoxosharafomano. <sup>9</sup> Efe yora mīstichi, ē meka fetsa mato yoipai. Tarepa ifo fistifiano fetsafāferi yonoxotirofo. Askatari pexe ifo fistifiano fetsafāferi yonoxotirofo. Nāskarifiāi māfi Niospa āfe tare keskarafokī. Askatari mā āfe pexe keskara. Nios fisti mātō Ifo. Akka nōri Apolos feta yonoxomiski. Noko yoiai keskara nō mato tāpimasharani āfe meka mā nikasharakōinō.

<sup>10</sup> Ē mato yoinō afeska faxō pexe fatirofomāki. Taefakī āfe kishi kerexkōi fikaxō nīchitirofo. Mā kishi nīchikaxō aōxō yonotirofo. Nāskarifiāi māfi pexe keskaraki. Akka nō mato Niospa meka tāpimani nā pexe faifo keskara. Cristofi pexe kishi keskaraki. Nā āfe kishiōnoax pexe nitiro. Nāskarifiakī Cristo mato nimai. Ea Niospa tāpimashara keskarari taefakī ē mato yoiaito mā Cristo Ifofani. Askatari fetsafāferi nānorikōi mato yoikani mā Cristo Ifofasharanō. Nāskata nā fetsafo ē ato yoimis iskafakī: “Shināsharata ato mēstekōi yoisharakāfe,” ixō ē ato yoimis. <sup>11</sup> Ē mato taefakī Cristoōnoa yoini mā Ifofanō. Akka tsōakai mato yoikī iskafatiroma: “Ē mato meka fetsa tāpimanō mā chanīmara faax Nios fe ĩpaxanō,” ixō tsōa mato anori yoitiroma. Jesucristo fistichi noko nimasharatiro nō Nios fe ĩpaxanō. <sup>12</sup> Afara fetsa anā ē mato yoinō, ea nikakapo. Fētsa pexe fakī kishi kerexkōi nīchitiro. Akka fētsari akiki rofetaxō kerexkōi kenetirofo. Fētsari akiki oro kenetiro. Fētsari akiki tokiri sharakōi kenetirofo. Askatari fētsari akiki ifi kerexma kenetirofo. Fētsari xepa pei akiki kenetirofo. Fētsari tafa akiki kenetiro. Nāskakē nā pexe kooaino pexe ano ikafo ichotirofo kooyamaxikakī. Akka pexe kishi kerexkōi akiki keneafō oro akiki keneta, roe taxō akiki keneta, tokiri sharari akiki keneafono kootirofoma. Akka nā ifi kerexma kootiro. Xepa peifori kootiro. Tafari kootiro. <sup>13</sup> Nāskarifiāi Nios nā pēxe ifo keskara. Niospa meka yoimisfo nā pexe ifo pexe faxōaifo keskarafō. Fetsafāfe shara faxomis, fetsafāferi shara faxomisma. Nāskaxō anā oaitīa Cristo noko ōimaxii nā nō axomis keskara fatofo keyonakamakī. Akka fatofori nipanakafomākī. Noko ōimaxii afeskaxō nō Nios yonoxonamāki. Fētsa Jesús Ifofasharaxoma āa shināxō Niospa meka ato yoisharaima, tāpisharaxoma ato yoisharatiroma. A yoiai keskara sharama, ifi kerexma keskara, samama keyotiro. Akka fētsa Niospa mekakōi ato yoi. Niospa shināmanaino ato tāpimani. Nā tokiri kerexkōi keskara keyotiroma. <sup>14</sup> Nāskatari fatotora Nios yonosharaxonano Niospa afara shara ināsharaxii nā Jesús oaitīa. <sup>15</sup> Akka fatotorari Nios yonosharaxonamano Niospa afara shara ināima. Nāskafiax Nios fe ipanaka. Āa kaxpa yonokatsaxakī akka āfe yono keyoxii.

<sup>16</sup> Akka, ĵmā tāpimamē mā Niospa pexe keskarakōi? Āfe Yōshi Shara mato mēra ika. <sup>17</sup> A Nios ika anokai afaa chakama. Nāskakē āfe Yōshi Shara mato mēra ikano ōisharakāfe chaka shināi iyamakāfe. Mā afe nīpaxanō Niospa mato katonī afe yora mā inō. Nā Ifofaafo tii ato shara imai. Akka fatotora ato anorima yoikī ato afara chakafamaino Niospa kopikiri omiskōimaxii.

### *Cristo noko tāpimasharatiro*

<sup>18</sup> Efe yora mīstichi, iskafakī shināyamakāfe: “Nā Jesús chanīmara famafāfe kirika raiskakī afama mīшти tāpisharakōiafo. Nōri ato keskaraxō anori shinākī tāpikōia,” ixō anori shināi mā pārameyamakāfe. Jesús chanīmara famafāfe shinākakī iskafakani: “Nā Jesús chanīmara faafāfe shināsharakanima,” ixō nokoōnoa yoimisfo. Matoōnoa anori yoifiaifono Niospa mato mēstekōi shināmasharapai mā shinātiro. <sup>19</sup> Nā Jesús chanīmara famafāfe shinākani iskafakakī: “Nōfi mēstekōi shināsharakī,” ifiaifāfe Niospa ato ōia mēstekōi shināsharakanima. Tatima keskarafō ato ōi. Nānori yōra Niospa meka yoikī kirika keneni iskafakī: “Nā Jesús chanīmara famafāfe āa shinākani iskakakī: ‘Nōfi tāpikī finakōiaki,’ ixō shinākakī Nios pāratirofoma. Āakōi anori pāramekani. Nāskakanax fenoafō,” ixō Niospa meka yōra kirikaki keneni. <sup>20</sup> Anā David kirika keneni iskafakī: “ ‘Nōfi tāpisharakōiaki,’ ifiaifāfe nōko Ifo Niospa ato tāpikōixō yoikī iskafatiro: ‘Nafāfekai mēstekōi shināsharafoma, tatima keskarafō,’ ” ixō David kirika keneni.

<sup>21</sup> Nāskakē anā yoi iskayamakāfe: “Na feronāfāke a noko tāpimamisto āfe meka fisti mēstekōi, sharakōi,” ixō anori anā shināyamakāfe. Niospa ato shināmayamainokai tsōa mēstekōi shinākeranama. Nios fistioxō nō mato mēstekōi yoitiro mā tāpisharakōinō. Keyokōi Niosnā, nā Niosnāri mātonā. Nāskakē aōxō mato shara faxōi. <sup>22</sup> Ē ikaino, Apolos ikaino, Pedro ikaino nō Nios yonoxomis. Āfe meka nō mato yoimis mā nikasharanō. Askatari naax mā afe ĩpaxanō. Keyokōi Niosnā, askatari nā Niosnāri mātonā. Iskaratīa afara sharafo ikai aōxō Niospa mato shara faxōi. Nā chipo ixiaifori aōxori Niospa mato shara faxoxii. Keyokōi a Niospa onifanifo mātonāri. Nāskakē māri āto ifo ixii. <sup>23</sup> Akka Cristofi māto Ifokī. Cristori āfe Ifori Nios.

## 4

### *Cristo yonoxomisfāfe afeskaxō yonoxotirofomāki*

<sup>1</sup> Akka mā nokoōnoa shinākī iskafatiro: “Nafāfēfi Cristo yonoxomisfokī,” ixō nokoōnoa yoikāfe. Cristoōnoa meka shara tsōa nikayomisma Epa Niospa nōko shinā mēraxō noko shināmanaino nō atori tāpimani. <sup>2</sup> Akka āfe inafāfe āfe ifo nikakōitirofo. Āto ifāfe ato yoia keskara axosharatirofo. Akka nōfi Cristo āfe inafoki. Niospa noko yoini iskafakī: “Ē mato yoia keskara ato yoikāfe ato fomākakīma. Ato yoikāfe xanikakīma,” ixō noko yoimis. <sup>3</sup> Nios fistichi tāpikōiakī nā ea yoia keskara ē aki. Akka yorafāfe ea mekafakī chakafakani. Akka fetsafāferi ea yoisharakani. Nāskanōki āa ea mekafanōfo. Ē āto yonomatimaki. Akka ē Niospa yonomatiki. Akka Nios fistichi tāpia ē yonoxosharakōiaito. Yorafāfekai tāpiafoma. Ērikai tāpiama. <sup>4</sup> Ēfe shinā mēraxō ē shināi iskafakī: “Ea Niospa yoiai keskara ē aki,” ixō ē anori shināfiaino nōko Ifo fistichi ea tāpikōia a ea yoia keskara ē ayamakī ē akima. <sup>5</sup> Cristo anā oyoamano iskafakī yoyamakāfe: “Nāfāfekai Nios yonosharaxokan-ima,” ixō anori yoyamakāfe. Akka yora fētsa shināi keskara tsōa tāpiama. Shinākapo. Nōko Ifo anā oaitīa keyokōichi noko ōiaifono nōko shinā mēraxō nō shināmis keskara nōko Ifāfe ato ōimaxii. Anākai nō afaa pishta nō fomāxiima, Niospamāi keyokōi tāpikōikē. Nā nō afara shara nō one axomis tsōa ōiyamaino, askatari nā nō afara chakafamis nāfo keyokōi Niospa noko kāimaxoxii. Askatari nō afara shara faino Niospa noko yoikī iskafaxii: “Aicho. Ē mato yoia keskara mā amis. Mā sharakōi,” ixō noko yoixii.

<sup>6</sup> Efe yora mīstichi, nānori ē mato yoi mā isharanō. Yōra kirika kenenī keskara a Niospa yoiai nā fisti ē aki. Nā Apolosri Epa Niospa yoia keskara fisti aki. Nō askafaito mā noko ōixō nō akai keskara māri akāfe. Nāskakē iskayamakāfe: “Nā noko yoimisto āfe meka sharafinakōia, fetsafo keskarama. Akka nō fetsafo nikapaima,” ixō anori shināyamakāfe. <sup>7</sup> Akka Niospa keyokōi noko onifani. Nō Nios fistiōxō afara fetsa nō ato sharafaxonō. Nāskaxō, “Nā ē akai keskarakai tsōa atiroma,” ixō shināyamakāfe. Nāskax kakapaimis iyamakāfe.

<sup>8</sup> Mā shinākī iskafamis: “Nō Niospa meka tāpikōia. Nō fetsafo finōkōia. Nāskaxō nō anā toa fichipaima noko tāpimanō. Nōfi Cristo fe xanīfo keskaraki. Nō yorafāfe āto ifo keskarakī,” ixō mā shināi. Nāskapainōra mā xanīfokōifo iki. Mā xanīfokōifo ikaino nōri mato fe xanīfo ikerana. Akka nō xanīfoma. Noko tsōa ifofaima. <sup>9</sup> Ē afara fetsa mato yoipai, nikakapo. Karaxa mēra ikiafo ato retematirofo. Yora ichapafāfe ōiaifono ato retematirofo. Nāskarifiakī nōri ato keskara. Noko Jesús nīchini nō aōnoa meka shara nō ato yoinō. Nō Jesúsnoa yoiax nō Jesúsnoax omiskōiaino keyokōi yorafāfe noko ōikani. Niospa āfe ājirifāferi noko ōikani. Nō yora mitsisipama noko ōikani, nōkairoko xanīfo keskarakē. Nō āto nāmā rakakōia noko ōikani.

<sup>10</sup> Nāskakē ē Jesucristo Ifofamis. Akka mā ea yoimis: “Pablo afaa tāpiamara,” mā ea famis. Askatari, “Nō Jesús Ifofakī nō tāpisharakōia,” mā imis. Askafixō mā tāpisharakōiama. Nāskaxori mā ea yoimis, “Na Pablo afaa afeska fatiroma. Akka nō afarafo nō atiro,” mā imis. Askafixō mā askafatiroma. Mā shinākī sharakōi mā meei. Akka ea mā ōia ē afaamakōi mā ea ōimis. <sup>11</sup> Akka iskaratīari nōfi fonāianā nōamaikīyanā rapati shara

safeyamata nõ imis. Askatari noko koshamisfo. Akka pexemais ixõ Niospa meka fisti nõ ato yoifofãsafamis. Nãskax nõ omiskõi. <sup>12</sup> Nãskaxõ nõ kerexkai yonotiro a nõ piai fixiki. Nãskatari yorafãfe noko mekafakĩ chakafaifono ato kopitamaro ko nõ tenemis. “Jesús mato shara faxopainõ,” ixõ nõ yoimis. Noko omiskõimafiaifono nõ tenemis. <sup>13</sup> Askatari noko ìchaifãfe ato kopitamaro ko Niospa meka shara nõ ato yoimis. Nãskakẽ iskaratĩa noko chakafakani, “Mãfi nã afamafo keskarakĩ, nã afara chaka potafo keskara,” ixõ nokoõnoa yoimisfo.

<sup>14</sup> Nãskakẽ ã mato nãnoru yoikĩ kirika kenexõ ã mato rãfimapaĩma. Askatamaroko ã mato shinãmasharapai. Akka mãfi ãfe fakekõifo keskarafoki. ã mato noikõi. Nãskakẽ ã mato yoisharapai anã mã anorima shinãyamanõ. <sup>15</sup> Yora ichapato mato Cristoõnoa tãpimakani. Akka ã taefakĩ mato Cristoõnoa tãpimayoni. Nãskakẽ mã Cristo chanĩmara fani. Eõnoax mã Niospa fakekõifo. Nãskatari ã mãto epa keskarakõi. Fetsafãfe Cristoõnoa mato tãpimafiaifono afokai mãto epa keskarama. Akka ã fisti mãto epa keskarakõi. <sup>16</sup> Nãskakẽ nã ã ikai keskakãfe. ã Nios Ifofasharai keskafakĩ mãri askafakãfe. <sup>17</sup> Nãskakẽ ã Timoteo matoki nĩchikai. ã Timoteo Cristo chanĩmara famaki taefani. Nãskax ãfe fake keskarakĩ. ã aõ noikõi. Nõko Ifo Jesús yoiai keskarakõi nikakõi. ã Jesucristo Ifofai keskara Timoteo mato shinãmaxii mã shinãmakinõma. Nã chanĩmara faafo pe xe rasi tii anoafõ ã ato tãpimani keskara Timoteori mato tãpimaxii.

<sup>18</sup> Mẽ tãpia mã ranãrito shinãkĩ iskafai: “Pablo Timoteo nokoki nĩchi nokoki mesekĩ. ãakai nokoki opaima. Akka nõ keyokõi tãpikõia. Nõ Pablo yopaima,” ixõ mã shinãi. Askai mã kakapaimis. <sup>19</sup> Anori mã shinãfiaino ã samamakõi ã mato ari kaikai. Niospa ea yoiaĩno ã samamakõi mato ari kai. Mẽ mato ano nokoõxõ ã tãpixii nã kakapaimisfãfe Niospa Yõshi Sharaõxõ yoikanimãkai, ãakõi yoimisfomãkĩ. <sup>20</sup> Nios nõko Ifono nõ meka fisti yoitamaro ko ãfe shinã sharaõnoax nõ ishariatiro. <sup>21</sup> Nãskakẽ nã ã matoki nokoaitĩa ãfe shinã sharaõnoax ã matoki nokoxii. Mẽ nokoxõ ã tãpixii afeskax mã ikamãkĩ. Mã chaka xateyamakẽ Niosxõ ã mato tãpimaxii omiskõimakĩ. Akka mãto chaka mã xatekẽ ã mato noikõikĩ fenãmãshita ã mato yoisharaxii. Nãskakẽ ã matoki nokoxõ ã mato omiskõimayamano fenãmãshita oi tsii faxõ ã mato yoixii ea yoikãfe fato mã fichipaimãkai.

## 5

### *Jesús chanĩmara fafiakaxõ afara chakafakani* (Hch. 9.1-19; 22.6-16)

<sup>1</sup> Mẽ nika mato mẽraxõ feronãfake fistichi afara chakafaito. Akka, ¿afeskakĩ mã yoimamẽ anã afaa chakafayamanõ? Nã feronãfake ãpa ãfi fe oxakĩ chakafai. Askara chakakõi. Nã Nios chanĩmara faafoma tosa askamisma. <sup>2</sup> Ooa. Nã feronãfake mato mẽraxõ afara chakafai aõnoa rãfipaĩanima, “Nõ sharakõifora,” ixõ mã yoimis kaka-paiyanã. Akka, ¿afeskakĩ nã feronãfakeõnoa mã shinãchakaimamẽ? Akka nãskaxõ ãfe chaka xateyamax anã mato fe ichanãito potakãfe anã mato fe ichanãyamanõ. <sup>3-5</sup> ã mato fe iyamafixõ ã mato shinãkõi. ã ano mato fe iyamafixõ nã feronãfake afeskaimãkai mẽ tãpikõia. ã mato anoxõ yoikĩ iskafakerana: “Mã Jesucristo shinãyanã ichanãino Niospa ãfe Yõshi Sharaõxõ nã feronãfake ãpa ãfi fe imiskẽ mato makinoa potakãfe Satanás ifofaafõ mẽra inõ. Nãskakẽ Satanás nã feronãfake omiskõimanõ. Nãskaxõ Satanás nã apaiyai keskara faxii nã feronãfake. Nãskafaino omiskõixii. Satanás omiskõimanaino ãfe chaka xatepaixii Jesús anã Ifofapaikĩ anã omiskõiyamaxiki. Mã ãfe chaka xateano nõko Ifo Jesucristo anã oaitĩa nã feronãfake ifixii afe ipaxanõ anã omiskõinõma,” ixõ ã mato yoikerana ã mato fe ixõ.

<sup>6</sup> Ooa, mã iskamis: “Nõ sharakõi,” ixõ mã shinãfikĩ mãkai nã feronãfake mato mẽranoa mã potapaima afara chakafafaito. ¿Mã tãpimamẽ, yora fistichi mato mẽra ixõ afara chakafaito mã xatemayamax aõnoax keyokõi mã chaka itiro? <sup>7</sup> ã mato afara fetsa yoipai. Nikakapo. Kẽromã pãa fakĩ levadura aya osiano keyokõi faraxitiro. Pishta aya osiano

keyokōi faraxitiro. Nāskarifiakī fētsa mato mēraxō afara chakafaito mā xatemayamax aōnoax keyokōi mā chaka itiro. Nāskakē nā yora fistichi afara chakafaito potakāfe mato mēraxō anā afara chakafayamanō, mā fena keskara ixikakī. Akka Niospa Fake, Jesucristo, noko nāxoni nōko chaka noko soaxoxiki. Nāskakē mā afaa chakafamisma keskara. <sup>8</sup> Nāskaxō a nō chakafapaoni anā nō shināpaima. Fetsafo fekaxtefayamata ato pārayamata meka chanīmakōi fisti nō ato yoitiro.

<sup>9</sup> Ē mato kirika kenexoyoni iskafakī: “Feronāfakefo āto āfima fe imisfo. Askatari kērofori āto fenema fe imisfo. Askarafo yorafo fe rafeyamakāfe.” <sup>10</sup> Akka a Jesús Ifofafoōnoama ē mato kenexoyonima. Nā Jesús Ifofaifoōnoa ē mato kenexoni. Akka faki pishtakai iyamafoma a Jesús Ifofaifoma. Nāskakē nō ato fe imis. Fakira kaxō nō ōimis nāriri ikafo a Jesús Ifofaafoma. Nō ato fe ifiaxō afāfe akaifo keskarakai nō amisma. Afāfe āto ifo Satanās. Nāskaxō āto chaka xateafoma. Chaka fetsa fetsatapafo amisfo. Nāskaxō āto āfimafo chotamisfo. Kērofori nāskarifiamisfo āto fenema fe chotanākani. Afama mīshti fipaikata āfenāfoma fipaimisfo. Nāskatari yometsokōifo imisfo. Nāskakata nioskōiyamafekē, “Na nōko niosra,” ikaxō afara kīfimisfo. Nāskafaifono nō ato feta afaa chakafamisma. Nāskafikē nō ato fe imis. Nō ato makinoax faki paxkatiroma. <sup>11</sup> Akka mā efeta Nios Ifofaino ē mato kirika kenexoyoni. Nāskakē fatotora yoikī iskafatiro: “Ēri mato feta Jesucristo Ifofai,” ixō yoifixō āfe āfima chotamis. Kērofori askari amisfo āfe fenema fe chotanāmisfo. Askatari afama mīshti fichipaimisfo. Atonāma fipaimisfo. Nioskōiyamafekē afara kīfimisfo. Yora fetsafo chakafamisfo. Pāemisfo. Yometsomisfo. Askarafo fe rafeyamakāfe. “Nō Jesús Ifofaira,” ifiakaxō afara chakafamisfokī. Askarafo fe rafeyamakāfe.

<sup>12-13</sup> Nā Jesús Ifofaifāfema afara chakafaifāfe nō ato yoitiro ma omiskōinōfo. Akka Nios fistichi ato yoitiro iskafakī: “Mā afara chakafamis. Nāskaxō māto chaka mā xateyamaito ē mato omiskōimaxii,” ixō Niospa ato yoitiro. Akka nō ato yoitiro ma. Nāskakē Niospa noko yoia nā Nios Ifofaa fetsafāfe afara chakafaifono nō ato yoitiro āto chaka xatenōfo omiskōixikakima. Akka Niospa meka yōra kirikaki kenenī iskafakī: “Nā feronāfāke mato mēraxō afara chakafamis yoikāfe anā mato fe ichanāyamanō āfe chaka xateyamax,” ixō kirika kenenī.

## 6

*A Nios Ifofamisfo rafeta fētsa chakafaino fētsa chakafayamafaito, askara achixō a xanīfo Nios Ifofaama ano iyotiro ma ato yoinō*

<sup>1</sup> A mato feta Nios Ifofafo ato yōayamakāfe xanīfofo yoikī a xanīfofofāfe Nios Ifofafofo maki. Askatamaroko nā Nios Ifofafofo ano ato iyokāfe ato yōkanōfo mato chakafafomakī.

<sup>2</sup> Akka, ĵ mā tāpīamamē mā Nios Ifofaxō mā nōko Ifo nokoaino mā xanīfo keskara mā ixii? Nāskaxō mā ato yoixii fatofomākī shara imisfo. Askatari mā yoixii fatofomākī chaka imisfo Niospa ato omiskōimanō. Nāskakē iskaratīari fētsa pishta chakafaano mā ranā yoinōnāsharakāfe xanīfofoki chanīkakīma. <sup>3</sup> Askatari mā Nios feta yoixii āfe ājirifo fatofāfe sharafafomākī, askatari fatofāferi chakafafomākī Niospa ato omiskōimanō, a chakafamisfo. Nāskakē iskaratīa mā mā ato ōi fatofomākī chakafo fatoforimākī sharafo. Nāskakē mā ranā mā yoinōnāsharakāfe xanīfofoki chanīkakīma a xanīfofāfe Nios Ifofafofo maki. <sup>4</sup> A mato feta shara shināifo mā ato ifitiro mato yoisharanōfo, mā fochishpanā faatanāino. Akka a Jesús Ifofafofo mā ato ifitiro ma. <sup>5</sup> Afaa tāpīafoma mā ato ifiax mā rāfitiro. Akka, ĵ a shara shināifo mato fe ikafomamamē? Ēje, nāno ikafo a shara shināifo. Nāskakē ato ifikāfe mato yoisharanōfo mā fochishpanā faatanāino. <sup>6</sup> Akka mā fochishpanā faatanāx, mā raenā faatanāsharamisma. Askakimaroko mā ato yōaxō nā Nios Ifofafofo ano mā ato iyomis xanīfofofāfe ato yōkanōfo.

<sup>7</sup> Mā ranā mā fochishpanā faatanāx nā Nios Ifofafofo maki mā atoki chanīmis. Akka askarakai sharama. Nāskakē Jesús Ifofaa fētsa mato chakafaito kopitamaroko a Jesús

Ifofaafomaki mā chanitiroma. Nāskax mā shara itiro. Askatari a Jesús Ifofaa fētsa matoki yometsoano nā Jesús Ifofaafomaki mā chanitiroma āa matoki yometsonōfo. Nāskax mā shara itiro. <sup>8</sup> Akka mā ranā mā yometso faatanāmis chaka faatanāyanā. Askatari mato fe yorafori mā ato chakafamis.

<sup>9</sup> ¿Mā tāpīamamē a yora afara chakafamis Nios xanīfo ano katiroma? Nāskakē māri mā pārameyamakāfe. Mā afara chakafaax Nios xanīfo ano mā katiromaki. Akka nā āto āfima chotamisfo Nios xanīfo ano fotirofoma. Askatari kērofori āto fenema chotamamisfo Nios xanīfo ano fotirofoma. Nāskatari nioskōiyamafekē afara fetsa fichipaikī, “Na nōko niosra,” ixō fichipaimisfo. Afokai Nios xanīfo ano fotirofoma. Askatari feronāfakefo aa ranā chotanāpaimisfo. Kērofori nāskari amisfo aa ranā chotanāpaikani. Afokai Nios xanīfo ano fotirofoma. <sup>10</sup> Askatari yometsomisfo, atonāma fipaimisfo, pāemisfo, Īchamitsamisfo, nikayospamisfo, afara fētsa fīatīaxō ato pāraxō afara fetsa fīamisfo. Nāskarafokai Nios xanīfo ano fotirofoma. <sup>11</sup> Mā askapaonixakī iskaratīa mā mā Niospa afe yorafo. Niospa āfe Yōshi Sharaōxō māto chaka mato soaxona nōko Ifo Jesucristo mā Ifofaito. Māto chaka mato soaxoyanā āfe ōiti keskara shara mato imai. Askafaxō afaa chakafamisfoma keskara mato ōi.

### *Nō Cristo fe rafexō nō chakafatiroma*

<sup>12</sup> Akka mā yoiraka iskafakī: “Cristo ēfe Ifo. Nāskakē a Niospa yoiyamano nā ē apaiyai keskara ē atiro, afaa chakama,” ixō mā yoiraka. Ēje, nānorikōi. Askatamaroko afara shara fetsa fekē ē aki ē ifofatirora ixō ē apaima. <sup>13</sup> Askatari mā yoiraka iskafakī: “Niospa nōko xāki noko onifaxoni a nō piai nō pinō. Nāskaxori a nō piai noko onifaxoni,” ixō mā yoimis. Akka chipo Niospa a nō piai yafi nōko xāki yamafaxoxii nāatomāi a nō piai noko onifaxonixakī. Chanīmakōi Niospa noko onifani nō afe rafepakexanō. Niospakai nōko āfima fe nō inō noko onifanima. Kērofori āto fenema fe inō ato onifanima. Askatamaroko Niospa nōko yora noko onifaxoni nō nōko Ifo fe nō rafepakexanō, Jesús āfe ina nō inō, nāskata Jesús nōko Ifo inō. <sup>14</sup> Nōko Ifo Jesús mā nafianikē Ēpa Niospa āfe shinā sharayaxō otofani. Nāskarifiakī āfe shinā sharayaxō nokori otofaxii.

<sup>15</sup> ¿Mā tāpīamamē nō Cristo Ifofaax nō āfe yorakōi? Nāskaxō nō nōko āfima chotatiroma nōmāi Jesús afe yorakōixō. <sup>16</sup> Niospa meka yoikī yōra kirika kenekī iskafani: “Feronāfake kēro fe ikaino nā rafe yora fisti keskarakōi itirofo,” ixō kenenī. ¿Mā tāpīamamē, nā māto āfima fe mā ikī yora fisti keskara mā itiro? Nāskakē māto āfima fe iyamakāfe mā chakanatiroki. Askatari kērori fene fetsa fe itiro. <sup>17</sup> Nāskax nō nōko Ifo Jesús fe rafeax nā yora fisti keskara nō ixii. Niospa āfe Yōshi Shara nokoya rafemaxii. Nāskax nōko fero mēsho nā fisti keskara ixii Niospa Yōshi Shara fe rafeax.

<sup>18</sup> Nāskakē māto āfima fe ipaiyamakāfe. Askatari kērofori māto fenema fe ipaiyamakāfe. Askara shināyamakāfe. Askapaikakīma ato makinoax ichotakāfe māto āfima fe ixikakīma. Mā chakanatiroki. Askatari kērofori ichotakāfe māto fenema fe ipai kakīma mā chakanatiroki. Akka māto āfima mā chotakī māto yora mā chakanafatiro. Askatari afara chaka fetsa akī māto yora mā chakanafatiroma, afara chaka afiafikī mā chakanatiroma. <sup>19</sup> ¿Mā tāpīamamē Niospa Yōshi Shara nofe ika? Nōko yora āfe peke keskarakōi. Nāskakē Niospa Yōshi Shara nōmēra ika nāmāi nōko Ifofaax. Nāskax mākōi mā ifofametiroma. Akka Nios māto Ifo. <sup>20</sup> Jesucristo mato nāxoni māto Ifo ixikī. Nāskax mā āfe inakōifo. Nāskatari Nios māto Ifokōi. Nāskax māto yora Niosnā. Nāskakē Niosnā ixosharakāfe Niospa mato imapaiyai keskara. Mā askafaito ōikakī fetsafāfe, “Nios sharara,” fatirofo.

## 7

### *Afeskax feronāfake āfi fe isharatiromē*

<sup>1-2</sup> Mā ea kirika kenexō femakī mā ea yōkaita. Nāskakē nā mā ea yōkai keskara ē mato yoisharapai mā tāpinō. Feronāfake kēromaisax shara itiro. Askafīax āfiyapai āfiyatiro chakafaxikīma. Nāskax feronāfakefo āfiyatirofo. Xotofakefori feneyatirofo. Nāskara shara.

3-4 Feronãfake mã ãfiyax ãfe yora anã ãfenã fistima. ãfe ãfinãri itiro. Nãskarifiã kãro mã feneyax anã ãfe yora ãfenã fistima. ãfe fenenãri itiro. Nãskakã ãfinĩ ãfe fene afe ipaiyaito fene ranĩtiroma. Nãskatari fenãri ãfe ãfi afe ipaiyaito ranĩtiroma. <sup>5</sup> Nãskakã ranĩnõnãyamakãfe. Akka nãskaxõ mã shinãtiroma iskafakĩ: “Nõ Epa Nios kĩfiyonõ, nõ paxkanõnãx oxa ranãyoxikĩ. Chipõ anã nõ kemãnãxikĩ,” ixõ mã yoitiro. Nãskafiax chai samarakayamakãfe. Mã samarakainõ Satanás mato chakafamatiro mã kãro fetsa fe ipaitirokĩ. Nãskarifiã kãrori feronãfake fetsa fe ipaitiro. Afe ipaikĩ chakafatiro.

<sup>6</sup> Ë mato, “Fianãkãfe,” ixõ ã mato yoima. Akka mã fianãpai mã fianãtiroma. <sup>7</sup> Askata ã shinãkĩ iskafai: “Feronãfakefo ea keskara kãromais ikanax shara itirofo. Niosnoax ã ãfiyamax ã isharaĩ. Ë shinãchakaima. Ë inimakõĩ. Akka Niospa ea kãromais ima keskarakai ato askafaima. Fetsafo Niosnoax ãfiyãfo. Fetsafori kãromaiskanax nã ã ikai keskariaĩ inimatiromafo.”

<sup>8</sup> Akka iskaratĩã nã kãromaisfo yafi fenemaisfo ã ato yoinõ. Feronãfakefo ea keskara kãromais itirofo. Askatari kãrofori fenemais itirofo. Askara shara. Askatari ãto fene ato makinoax namis, afo anã feneyatiromafo. Ea keskara shara itirofo. <sup>9</sup> Akka feronãfake ares ixõ teneyamai kãro fe ipaikĩ fatora kãro fe oxatiroma. Askara sharama. Askatamaroko ãfiyatiroma tanaima shara ixikĩ, anã kãro fetsafo fe ipaixikĩma.

*Feronãfãke ãfe ãfi potatiroma, nãskarari kãromãri ãfe fene potatiroma*

<sup>10-11</sup> Askata iskaratĩã feronãfake ãfiyã ã yoipai, xotofãke feneyari ã yoisharapai. Ëã ã mato yoima. Nõko Ifoõxõ ã mato yoi iskafakĩ, kãromã fene enetiroma. Mã fene eneax fetsa fe fianãtiroma. Ares itiro. Akka askayamai anã feneki kematiroma. Askara shara itiro. Askatari feronãfãke ãfi enetiroma.

<sup>12</sup> Nãskakã iskaratĩã keyokõĩ ã mato yoisharapai. Na meka ã mato yoiã Niospa ea yoiyamafekã ã mãstãkõĩ shinãkĩ ã mato yoi. Feronãfãke Jesús Ifofainõ ãfe ãfinĩ Jesús Ifofaxõ fene noikĩ fene enepaiyamainõ fenã ãfe ãfi potatiroma. <sup>13</sup> Askatari ãfe ãfinĩ Jesús Ifofainõ fenã Jesús Ifofaxõ ãfe ãfi enepaiyamainõ ãfinĩ fene enetiroma. <sup>14</sup> Feronãfãke Nios chanĩmara faimano ãfe ãfinĩ Nios chanĩmara fainõ ãfe ãfiõxõ Niospa nã feronãfake shara faxotiro. Nãskaxõ ãfe ãfinĩ Jesús Ifofãito õikĩ ãfiõxõ fenã Jesús Ifofãtiroma. Nãskatari kãromã Jesús Ifofayamainõ fenã Jesús Ifofainõ feneoxõ Niospa nã kãro shara faxotiro. Akka feronãfake fe ãfi enenãifono ãto fakefo shara itirofoma. Akka enenãyamaifono Niospa ãto fakefo shara õitiro. <sup>15</sup> Akka feronãfãke Jesús Ifofayamakã ãfinĩ Jesús Ifofãito fenã enepaikõikĩ enetiroma. Nãskax kapaiyaito nãtefayamãfe. Katanõ. Mã nãtefainõ fekaxtetiroki. Askatari kãromã Jesús Ifofayamakã fenã Ifofãito kãromã enepaikõikĩ enetiroma. Kapaiyãitori nãtefayamãfe. Katanõ. Mã nãtefainõ fekaxtetiroki. Niospa noko katonĩ nõko shinã mãraxõ afanã noko fekaxtefanõma nõko õiti tanaimakõĩ shara inõ. <sup>16</sup> Kãromã Jesús Ifofaxõ ãfe feneri Jesúsnoã tãpimatiro ãfinĩ fene yoiãino fenã Ifofã rakikĩã nõ tãpitiroma. Feronãfãkeri Jesús Ifofaxõ ãfe ãfiri Jesúsnoã tãpimainõ Ifofã rakikĩã, nõ tãpitiroma.

<sup>17</sup> Nã nõko Ifo Jesús mato ima keskara nãskara ikãfe. Akka Niospa mato ifini nã Jesús mato ima keskara mã inõ. Askatari nã Nios Ifofãfo tii Nios kĩfiti pexefã anofoya nã maitio anofofori nãnorikõĩ ã ato yoimis. <sup>18</sup> Iskafakĩ ã ato yoimis. Judeofo Niospa ato yoini keskarakõĩ ãto fake feronãfakefo foshki repa xatepaonifo. Akka mato foshki repa xatenifono Jesús Ifofaxõ shinãkĩ mã iskafatiroma: “Iskaratĩã ã Jesús Ifofã. Nã fistichi ãfe chaka ea soaxonano ã afe ipaxanõ. Ooa, ¿afeskakĩ ea foshki repa xatenifomã, ã askayamãpaiãino? Aatokai ãfe chaka ea soaxotiroma. Nãskakã ã foshki repa xateama keskarakã ã ato fomã,” ixõ shinãyamakãfe. Akka mãto foshki repa mã mato xatenifono shinãchakayamakãfe. Askatari mã Jesús Ifofaxõ iskakĩ shinãyamakãfe: “Judeofo ãto xinifãfe ato yoini keskara ã ipai. Ë foshki repa xatepai nã Moisés yoini keskara ã ixikĩ,” ixõ anori shinãyamakãfe. Nõ foshki repa xateitiroma Niospa noko ifinõ. <sup>19</sup> Akka nõ foshki repa xatemisma askatari nõ foshki repa xatemis nãskara shara. Akka nõ askanokai, “Mã

chakafaa,” noko Niospa faima. Askatari nō askamanori, “Mā chakafaa,” noko Niospa faima. Nā judeofo imis keskarakai nō itiroma noko Niospa ifinō. Askatamaroko Niospa noko yoini keskara nā fisti nō atiro. <sup>20</sup> Akka nā Niospa mato ifini keskarakōi ikāfe. <sup>21</sup> Mā fētsa yonomati ikatsaxakī shināchakayamakāfe. Nāskarakōi ikāfe. Akka māto ifāfe mato nīchipaiyaino, “Fotakāfe anā yonoxoxikakīma,” mato faino mā katiro. <sup>22</sup> Akka nōko Ifo Jesús mato ifini. Mato ifiyoamano ranāri mā āto yonomati iyopaoni. Iskaratīari mā āto yonomati mā ato yonoxomis. Mā askafixō mā Jesús Ifofaano, Jesús māto chaka mato soaxonano, āfe yonomatikōifo mā iki. Nāskaxō tsōa mato iskafatiroma: “Mā kai Jesús afe yorafoma,” tsōa mato fatiroma. Akka ranāritokai mā tsōa yonoxomisma. Askafix māri Jesús Ifofaax māri āfe yonomatikōifo. <sup>23</sup> Epa Niospa āfe Fake Jesucristo noko nīchixononi noko nāxoyonō nāskax nōko Ifo inō. Nāskax mā afe yorakōifo. Nā fisti māto Ifokōi. Nā fistichi mēstekōi mato shināmasharatiro. Askaxō fetsafo ifofayamakāfe mato shināmasharatirofomaki. <sup>24</sup> Efe yora mīshtichi, Niospa mato ifiano nā mā ipaoni keskara ikāfe Epa Nios mato fe ikaino.

*Feronāfake āfimaisfoya kērofo fenemaisfoōnoa Pablo yoini*

<sup>25</sup> Akka iskaratīa afara fetsa anā ē mato yoipai mā ea yōkaita. Feronāfakefo āfimaisfoya kērofo fenemaisfoōnoa ē mato yoi. Ē mato yoi ai keskara nōko Ifāfe ea yoiyamafixō ea noikī ea nīchini ē āfe ina inō. Nāskakē ē mato yoi ai keskara mā chanīmara fatiro. <sup>26</sup> Iskaratīa afara mesekōikī noko omiskōimani. Nāskakē mā āfimais ika shara. Nios Ifofaafāfema noko omiskōimapaikani nō Jesús Ifofakē. <sup>27</sup> Akka āfiyakaxō māto āfi eneyamakāfe. Askatari āfimaisxō kēro fenayamakāfe. <sup>28</sup> Akka mā kēroyaxō mā chakafatiroma. Kērofori feneyakatsaxakīma mā feneyaxō mā chakafatiroma. Askata mā feneyax askatari feronāfake mā āfiyax mato omiskōimanaifono mā omiskōitiro. Nāskaxō mato omiskōimatirofo mā Jesús chanīmara faino. Nāskakē ē mato yoisharapai mā omiskōiyamanō.

<sup>29</sup> Askatari ē mato iskafakī yoipai, efe yora mīshtichi. Nōko Ifo Jesús mā chaima oi kiki. Nōko Ifo nō yonoxokī nō chai faima. Nāskakē nō nōko Ifo yonoxosharakōipai. A āfimaisfāfe nōko Ifo yonoxosharakōitirofo kēro shinākima. Askatari nā āfiyatori nōko Ifo yonoxosharatiro nā āfimaisfāfe yonoxonaifo keskafakī. <sup>30</sup> Askatari nā shināchakaifāfe nōko Ifo yonosharaxotirofo nā shināchakaifāfema yonoxonaifo keskafakī. Nāskatari nā inimaifāfema nōko Ifo yonoxosharatirofo nā inimaifāfe yonoxonaifo keskafakī. Askatari nā afara fiaifāfe shinātirofo iskafakī: “Na nōkonāma, akka na nōko Ifonā,” ixō shinātirofo. Akka nōko Ifo shinākōikī nō yonotiro. <sup>31</sup> Nōko Ifo Jesús mā chaima oi kiki. Nāskakē nōko mai anoxō nō yonosharafafāinō nā nō yopai fixiki. Nāskafixō afama mīshtifos shinākima nōko Ifokōiroko nō shinākōinō. Keyokōi mai anoafō keyoxikani. Nāskakē Jesús nō shinākī finakōikī afama mīshti fipaikī nō shinātiroma.

<sup>32-35</sup> Ē mato anori yoi māto shinā mēraxō afarana mato fekaxtefanōma. Ē mato, “Āfiyayamakāfe,” faima. Askatari xotofakefori, “Feneyayamakāfe,” ē ato faima. Ē mato mēstekōi imapai nōko Ifo fisti mā shinākī finakōinō, mā afara fetsa shinānōma. Askaxō ē mato yoi ai keskara feronāfake āfimaisto āfe Ifo inimamapai. Akka feronāfake āfiyaxō āfiri inimamapai. Āfinī afara yopaito fenē shināchakakī āfi fixotiro. Nāskakī āfe Ifo fistikai shinātiroma. Nāskaxō āfe Ifo inimamapaikī āfiri inimamapai. Askatari xotofake fenemaisto āfe Ifo Jesús fisti yonoxosharapai. Afara fetsakai shināima āfe Ifo fisti shināi. Niospa amapaiyai keskara fisti aki. Akka xotofake feneyaxō āfe feneri inimamapaikī afara fetsafori shinātiro āfe Ifo Jesús fisti shinākīma.

<sup>36</sup> Nāskakē meka fetsari ē mato yoi. Feronāfake taefakī xotofake yoiyoxō fichisharapaikī chipo fitiro āfe āfi inō. Shinākī iskafatiro: “Mē afetiama afe mekaitakī, mia fipa,” shināchakayamaxiki ixō fitiro, chaka shināyamaxiki. Nāskafakī afaa chakafaima.

<sup>37</sup> Askatari feronāfake fētsa shinākī iskafatiro: “Ēfe Ifo ē yonoxosharapaiyai keskara ē

ãfiyaxõ ã axotiroma. Nãskakẽ ã ãfiyaima mẽ yoifixõ,” ixõ anori shinãkĩ afaa chakafaima. Tsõa kerexkai, “Ãfiyafe, mã mẽ yoiaki,” fayamaino nã feronãfãke xotofake fe fianãtiroma Nios yonoxosharaxii. <sup>38</sup> Akka feronãfãke nã xotofake fe fianãsharatiro. Akka nã xotofake fe fianãima nõko Ifo yonoxosharatiro. Nãskarari shara itiro.

<sup>39</sup> Askata meka fetsari ã mato yoi. Æfe fene naamanokai kãromã fene enetiroma fetsa fe fianãxiki. Akka mã fene naano fetsa fe fichinãpai afe fianãtiro nã Nios Ifofaa fe. Askara shara. <sup>40</sup> Nãskatari ãa ã shinãkĩ iskafai. Mã fene naano fetsa fe fianãmax nãskarari sharakõi itiro. Ë shinãi Niospa Yõshi Sharapari nonorikõi mato yoipai.

## 8

### *Nioskõima onifakaxõ yorafãfe kãfipaonifo. Nãskaxõ nami inãpaonifo atoõnoa Pablo yoini*

<sup>1</sup> Mã ea yõkaito ã mato yoisharatiro. Yora fetsafãfe afara onifakaxõ, “Na nõko niosra,” ikaxõ nami inãmisfo. Askata anã nã nami fikaxõ ato inãmisfo yorafãfe pinõfo. Akka yorafãfe ãto niosnã nõ nami pia, shara. Nõ piamari, shara. Nãskaxõ nõ afaa chakafaima. Akka mã yoikĩ iskafamis: “Mã nõ tãpia nõ ãto niosnã nami pia, shara. Akka nõ piamari, shara,” mãmãi shinãkĩ Nioskõimara ixõ. Akka mã fatora fetsafãfe shinãkĩ iskafamis: “Ëfi tãpikõiaki. Nã ã shinãi keskara ã mẽstekõi shinãi. Ë fetsafo keskarama. Ë apaiyai keskara ã atiro,” ixõ mã yoimis. Askara yoi kakapaimis mã itiro. Askara shinãkĩkai nõ fetsafo inimamatiroma. Askakimaroko nõ yorafo noixõ nõ ãto õiti fepeaxosharakõitiro Jesús Ifofasharanõfo. Nãskakẽ nõ ato inimamatiro. <sup>2</sup> Askatari fatora fẽtsa shinãkĩ iskafamis: “Ëfi afama mĩshti tãpiakĩ,” ixõ anori yoifikĩ atiri afaa tãpiama. <sup>3</sup> Akka fatora fẽtsa Nios noiaino nãskarifikĩ Niospa aõnoa yoitiro iskafakĩ: “Nã ea noiai mẽ tãpikõia. Nãfi efe yoraki,” ixõ yoitiro.

<sup>4</sup> Nãskaxõ yorafãfe afara fetsa onifakaxõ, “Na nõko niosra,” ikaxõ nami inãifo. Nã nami nõ pitiro. Nã shara. Nõ chakafaima. Akka nõ piamari, shara. Akka mã nõ tãpia a afara fetsa yorafãfe onifafo akai afama. Nã onifafotokai afaa tãpiama. Akai õitiyama. Æfe mãporikai afaa shinãtiroma. Akai Niosma. Akka Nioskõi fisti. <sup>5</sup> Jesús Ifofaafãfema yoikĩ iskafamisfo: “Nios ichapa. Nai mẽranoafoya mai anoafoya nios ichapakõi,” ixõ yoimisfo. Akka nã ãto nios ichapafiax Nioskõifoma. <sup>6</sup> Mã nõ tãpia Epa Niosfi fistiki. Fetsakai anoma. Nãato keyokõi onifani. Nokori onifani nõ ãfe fakefo inõ. Nãskatari nõko Ifo Jesucristori fisti. Anã ano fetsama. Nãskaxõ Niospa ãfe Fake feta keyokõi onifani. Aõnoax nõ nitiro.

<sup>7</sup> Nã ã mato yoiai keskara fisti rasichi Jesús chanĩmara faifãfe tãpiafoma. Shinãmisfo iskafakakĩ: “A fetsafãfe afara onifafo, nã ãto nioskõi nia,” ixõ yoimisfo niyamafiakẽ. Akka ãto xinifãfe nãnori ato yoipaonifo. Nãskakẽ shinãkani iskakakĩ: “Nã ãto niosnã nõ nami pixõ nõ Nioskõi chakafatiro,” ixõ shinãtirofo. Akka mã pikaxõ ãto shinã mẽraxõ shinãchakatirofo: “Mã nõ chakafara,” ikaxõ. <sup>8</sup> Anori shinãfiaifonokai a nõ afara piatokai Nios yafi noko rafemasharatiroma. Nios makinoa noko potatiroma. Afara onifakaxõ, “Na nõko niosra,” ikaxõ nami inãfo nã nami nõ piamanokai noko shara imatiroma. Askatari noko chakafatiroma. Nãskatari mã nõ pianori noko chakafatiroma. Nãskatari noko shara imatiroma.

<sup>9-12</sup> Nãskakẽ mato feta Nios Ifofaafo afaa chakafamayamakãfe. Mã shinãi iskafakĩ: “Nõ keyokõi pitiro. Afara onifakaxõ, ‘Na nõko niosra,’ ikaxõ nami inãfo. Nã nami nõ pitiro nã onifafokairoko Nioskõikẽ. Akka mã nõ na nami pixokai nõ ãto nios chanĩmara faima. Akka mã nõ tãpia Nioskõima. Akka pixõ Nioskõi nõ chakafaima. Jesúsri nõ kachikirifaima,” ixõ mã shinãi. Mã anori shinãfiaino Jesús Ifofaa fetsafãfe anori tãpiafoma. Tãpiamaifono nã nioskõimato kãfiti pexefã anoxõ mã piai fisti mã pipai mãkai ãto nios ifofapaima, nãskakĩ mato õikakĩ akairi apaikani. Akka mã mã tãpia yorafãfe ãto niosnã nõ nami pia shara, chakama. Akka fetsafãferi Nios Ifofafiakaxõ yoimisfo iskafakakĩ: “Ãto niosnã nõ nami pia sharama, nõ chakafatiro,” ixõ yoimisfo.



Nāskaxō mā nami piaito fetsafāfe mato ōikakī akairi afāfe nami pitirofo. Nāskaxō mā nami pikaxō chipo shinātirofo iskafakakī: “Ooa, mē nami pixō ēfe Ifo Jesús ē chakafaa ēmāi āto niosnā nami pixō. Nā nami pikī ē āto nios sharafai. Ē āto nios ifofai ōitsai. Ooa, ē chakafaa,” ixō shinātiro. Askaxō āfe shinā mēraxō shināchakakōitiro mā nami piaito ōikakī akairi pikaxō. Nāskakē mā chakafamatiro. Askafakī Cristori mā chakafai. Mā mā tāpia afara onifakaxō, “Na nōko niosra,” ikaxō nami ināifo nā pixokai mā chakafaima nā onifafokairoko Nioskōikē. Akka fetsafāfekai tāpiafoma. Afāfe shinākani: “Nā nami pixō nō chakafatiroki,” ixō shināmisfo. Akka mā piaito ōikakī akairi pikaxō shināchakatirofo. Mā akai keskafakīri shinākani. Akka mā nā nami piyamainokai akairi pikeranafoma. Shināchakakeranafoma. Nāskakē mato fe yorafo noikōixō mā nā nami pitirofo ato chakafamaxikima. Akka atoŋoaxri Cristo naniki. <sup>13</sup> Nāskakē nō nami pixō Jesús Ifofaa fetsafo nō ato chakafamatiro. Nāskakē āto niosnā nō nami pitirofo fetsafo chakafamayamaxikī. Nāskakē nō fetsafo chakafamapaima. Nofeta Jesús Ifofaa fetsafo noikī nō afaa chakafamapaima.

## 9

### *Niospa Pablo nīchini āfe meka ato yoinō*

<sup>1</sup> Nios fistifi ēfe Ifokī. Nā ea yonomapaiyai keskara ē atiro. Tsōakai ea yonomatiroma. Jesús ea nīchini ē aōnoa yorafo yoinō. Akka nōko Ifo Jesús mē ōisharakōini. Aōnoa ē mato yoiaito mā chanīmara fani. Nāskakē nōko Ifo Jesús ē yonoxonaōxō Jesús mā Ifofai.

<sup>2</sup> Fetsafāfe shinākakī iskafamisfo: “Niospakai Pablo nīchiana Jesúsnoa noko tāpimanō,” ixō anori yoimisfo. Fetsafo mekaino anori shināyamakāfe. Ē mato yoiaito mā nōko Ifo Jesús chanīmara fai. Nāskakē mā tāpitiro chanīma Niospa ea nīchini ē mato Jesúsnoa yoinō.

<sup>3</sup> A ea īchakakī mekaifaifono iskafakī ē ato kematiro: <sup>4</sup> Fetsafāfe Jesúsnoa yoiaito nikakakī afaa kopi yōkaxoma kaxpa ato pimamisfo. Akka ē mato Jesúsnoa yoiaito nikakakī, ¿eari afaa kopi yōkaxoma kaxpa eari pimatirofomamē? <sup>5</sup> Ē akai keskafakī Pedrori Jesúsnoa yoifofāsafamis. A Jesús nīchiafāfe fetsafāferi Jesúsnoa ato yoifofāsafamisfo. Jesús āfe extofāferi ato yoifofāsafamisfo. Nāfo kēro Jesús Ifofaafo fe fianākaxō Jesúsnoa ato yoifofāsafafono āto āfifori ato fe fofāsamisfo. ¿Nāfāfe āto āfifāfe Jesús Ifofaafo fe fianāfo keskari ēri nā kēro Jesús chanīmara faa fe ē fianātiromamē eferi kafāsanō? <sup>6</sup> ¿Afeskakī ē Bernabé feta nō mato Jesúsnoa yoifikī nō yonoimē, a nō yopai yafi a nō piyai fixikī? Akka fetsafāfe Jesúsnoa mato yoifikakī yonokanima nō akai keskafakī. Akka afara yopaifono mā ato ināmis. Akka a nō yopai kaxpa nō fimisma, yonoxō nō fimis. <sup>7</sup> Anā meka fetsari ē mato yoinō. Sorarofāfe kaxpa yonokanima. Āto xanīfāfe a piaifo ato inākani. Askatari ato kori inākani. Nāskarifikī yora tare fanamisto āfe tare foaisharano āfe yono pitiro. Askatari fakka kexemistori āfe fakka chocho fīaxō ayatiro. Nāskarari a Jesúsnoa yoimisfāfe a piaifo fitirofo pixikakī tsōa kopifaxoma.

<sup>8</sup> Nā ē mato yoiyai keskara yōra mekama. Akka Moisés nānori kirika keneyoni Niospa meka yoikī. <sup>9-10</sup> Moisés Niospa meka kenekī iskafani: “Nā fakka keskara nexakaxō xiki peama peama amamisfo āfe xaka potaxikakī. Nāskakē ifāfe renextiroma xiki xaka pinō ifomāi yonoxokī,” ixō Moisés Niospa meka yoikī kirika keneni. Akka fakkaōnoa Niospa yoinima. Yorafoŋoari yoini. Nā Jesús yonoxomisfoŋoari yoini. Nāskaxō afaa kopifaxoma fitirofo yopaifo Niosnoa ato yoikakī. Askatari fetsafāfe tare kexexō shinātirofo iskakakī: “Ē na tare kexeakī nāskakē ē tarepanoa afama mīshti fipa,” ixō shinātirofo. Nāskarifikī a Niospa meka ato yoimisfāfe a piyai fitirofo. <sup>11</sup> Nāskarifikī nokori kopikiri a nō yopai mā noko kaxpa inātiro afaa kopi yōkaxoma. <sup>12</sup> Fetsafāfe Jesúsnoa mato yoiiaifono nikakī nā yopaifo mā ato ināmis.

Akka nō mato taefakī yoiyoni. Nāskakē mā noko afama mīshti inātiro fetsafo finōmainīfofā. Mā noko afama mīshti ināfitirokē nō mato afaa yōkamisma. Nāskaxō nō

tenemis. “Nō ato kori yōkaito anā noko nikapaitirofoma,” ixō nō shināmis. Nāskakē nō mato afaa yōkapaimisma. <sup>13</sup> ¿Mā tāpīamamē? Nōko kaifo judeofo na Nios kīfiti pexefā mēra femisfo a piaifo. Nā piaifo Nios ināxikakī. Nāskakē a Nios kīfiti pexefā mēra yonomisfāfe a piai kaxpa pimisfo tsōa kopifaxoma. <sup>14</sup> Nāskarifikā nōko Ifāfe yoini iskafakī: “Fētsa ēfe meka shara fetsafo yoiaito nikakakī nā nikaifāfe a yopaifo ato inātirofo,” ixō nōko Ifāfe yoini. <sup>15</sup> Nānori nōko Ifāfe yoifinikē ē mato afaa pishta yōkamisma. Mato Niospa meka yoifikī ē mato kirika kene fomaima: “Ea kori inānōfora,” ixō. Nāskakē tsōa ea yoikī iskafatiroma: “Pablo ato kori fīapaikī ato Jesucristoōnoa yoimis,” ixokai tsōa eōnoa anori yoitiroma. “Akka Pablo ato kori fīamiski ato Jesucristoōnoa yoikī,” ea mā faito ē rāfipaitiro. Nāskaxō ē mato afaa pishta yōkamisma: “Pablo kori fia,” mā ea fanōma. <sup>16</sup> “Ē mato afaa yōkatama Jesúsnoa ē mato yoimis. Nāskakē ē sharafinakōiakī,” ixokai ē yoitiroma kakapaiyanā. Akka Niospa ea katoxō ea nīchini ē Jesúsōnoa ē yoifafāinō. Akka ē Jesúsōnoa yoiyamaito Niospa ea omiskōimatiro. <sup>17</sup> Ē yoikī iskafamis: “Epa Niosi, mī Fakeōnoa ē yoipai,” ixō ē yoikē Epa Niospa ea afara inātiro. Akka ēa ē yoima. Niospa ea nīchini Jesúsnoa ē ato yoinō. Nāskakē nā ea yoini keskara ē ato yoimis. <sup>18</sup> Akka ē Niospa meka shara yoimiskē, ¿afaa ea Niospa ināimē? Ato Niospa meka yoixokai ē afaa ato yōkamisma. Askaxorikai ē ato yoimisma iskafakī: “Niospa mato yoikē Jesúsnoa ē mato yoifafainaito a ē yopai ea inānōfora,” ixokai ē ato yoimisma. Akka ē Niospa meka ato yoipai afaa yōkaxoma. Nāskax ē inimasharakōi Epa Niospa ea inimamaino.

<sup>19</sup> Ēkai tsōa yonomatima. Nāskafīax ēakōi ē mātō yonomati keskarakōi. Nāskakē keyokōi yorafo ē axosharapai ato Jesús chanīmara famaxikī. Nāskax ē yorafāfe āto yonomati keskaraki. Akka nā Nios Ifofaafoma ē ato fe rafemis āto feyafati shara keskara ixō ē ato yoiaito, Jesús Ifofanōfo ē Niospa meka yoiaito. <sup>20</sup> Ēfe kaifo judeofo fe ē ikax nā ikaifo keskari ēri ato keskara ipai. Ē ato keskara ikaito ea ōikakī Jesús chanīmara fatirofo. Nōko xini Moisés nōko kaifo yoipaoni keskarakai iskaratīa anā ē nikaima. Akka ē nikayamafikī a Moisés yoipaoni keskara nikamisfo fe ēri ato fe ixō Moisés yoini keskara ēri askai ato Jesús chanīmara famaxikī. <sup>21</sup> Nāskakēri nā Moisés yoini keskara nikaifoma fe ē ato fe ixō nā Moisés yoini keskara ē akima ato Jesús chanīmara famaxikī. Ē nāskafīamiskē Cristo ea yoini keskara ē amis. Ē nikasharaxō nā fisti ē kachikiri fatiroma. <sup>22</sup> Jesús chanīmara faafāfe ranārīto Niospa meka tāpīsharayokanima. Ē nā keskarāfo fe ikax ēri ē ato keskara ipai eari Jesús tāpīmasharanō. Nā ea tāpīmana keskara ēri ato tāpīmasharanō. Nāskatari fatora fetsafo fe ē ikax ē ato keskarari ē ipai. Eōxō Jesús chanīmara fakanax afe isharapakexanōfo. <sup>23</sup> Nāskakē ē askafakī ē ato Jesucristoōnoa tāpīmasharai nā chanīmara faifono ēri ato fe inimai finakōitiro.

<sup>24-25</sup> Akka mā mā tāpia nā naetapafo xonōnōnāxikakī ichotirofo yora ichapafāfe ato ōiaifono. Akka nā koshi fistichi ato xonōtiro. Nāskakē akiki xanīfo inimakī afara shara fetsa inātiro. Nāskakē kerekxai ichotirofo fetsafo xonōpaikani. Akka ichoyokanaxma tae fenai ichoyofofāfōfāitirofo feyafaxikakī xokenāxikakima. Nāskarifikā nōko Ifo Jesús kerekxai yonosharaxokāfe afara chakafo fayamaxikakī. Akka Niospa mato yoiaito nikakī akāfe Jesús feyafaxō Ifofaxikakī mā akiki nokoaitīa mato afara shara inānō. Akka nā ichokī ato xonōa xanīfāfe afara shara inā keyotiro. Akka Niospa noko afara inā keyonakama. <sup>26</sup> Nāskakē ē Jesús fisti yonoxoni afaa fetsa shinātama. Akka ēa ē kaxpa mato yoimisma. Niospa ea shināmanaino ē mato yoimis. Naetapafo xonōnōnāpaikani mēstekōi ichotirofo. Nāskarari ē mēstekōi ika. Ēfe Ifāfe ea yoiai keskarakōi ē iki akiki nokosharaxiki. <sup>27</sup> Ēa ē apaiyai keskara ē akima. Ēfe Ifāfe ea amapaiyai keskara ē aki. Ē tenepaifikī ē tenetiroma Jesús Ifofasharaxikī. Ē xokenāfiakī ē tenetiroma Jesúsnoa yoikī. Jesús fistichi ea yonomatiro. Nāskakē ē fetsafori yoifafāini Jesús Ifofaxō yonosharaxonōfo. Nāskakē Niospa ea yoia keskara ē ayamax ē fenotiro, afianā ē Nios yonoxotiroma. Niospa anā ea yonomatiroma. Ē fenopaima. Nāskakē nā ēa ē apaiyai

keskara ě akima. Ĕfe Ifāfe ea amapaiyai keskara, nā fisti ě aki.

## 10

### *Judeofāfe Nios chakafapaoni keskara iyamakāfe*

<sup>1</sup> Efe yora mīshtichi, tāpikāfe. Nōko xinifo Egipto anoax fonifo. Akka Niospa nai kōi nāmā pishta ato fotomaxoni a ōiax nōko kaifo judeofo acho fonifo. Niospa nā nai kōiōxō ato iyopaiyai ari ato iyonī. Ato iyoikaino nā ĩamāfā āfe ane Ōshi ano nokonifo. Nānoxō nōko kaifo judeofo Niospa ato ĩamāfā nēxpakīa rafe ato paxkaxotani anori pokefainōfo. <sup>2</sup> Moisés ato rekē tanaxoni. Akka nōko kaifo judeofo Moisés acho fonifo. Nā Moisés chanīmara fakanax afe rafepaonifo. Nāskakē nai kōi nāmā pishta kaino Moisés nāmā ato iyonī. ĩamāfā pokeifokani mā ĩamāfā nakirafekōi shinātanano. Nāskakē pokefainifo ĩamāfā nēxpakīa. Mā āfe kaifo ato ififani Moisés kani. <sup>3</sup> Askatari Niospa nai mēraxō a pi-aifo ato potaxoni fikaxō pinōfo. <sup>4</sup> Nāskatari ano fakamano Moisés tokirinīfā āfe mēstetini ramāino faka sharakōi tsekeni keyokōichi ayanōfo. Cristoōnoax faka sharakōi tsekeni judeofāfe ayanōfo. Akka fakirira fofāfofāipaonifo Cristo ato fe kaino, tsōa Cristo ōinima. ato fe kakī ato axopaoni ato kexexō. <sup>5</sup> Askafafiaifono Epa Nioskai atoki inimanima āfe meka nikayamaifono. Nāskakanax tsōa istoma anoax fofāfofāikani nikayospakanax nai keyonifo. Nā tsōa istoma ano ato maifakī fetsanifo Niospa ato namakī keyoano.

<sup>6</sup> Akka afāfe afara chakafapaonifo. Nāskakē atoōnoa noko tāpimani afara chakafo fapaonifo keskara nōri ayamanō inifo keskai omiskōixikima. <sup>7</sup> Afāfe afara chakafapaonifo keskara ayamakāfe. Akka nāfāfe afara fetsa onifakaxō, “Na nōko niosra,” fapaonifo. Nāskakaxō kīfipaonifo. Kīfikaxō āfe ferotaifi piyanā ayata ikaxō afara fet-safo chakafapaonifo. Pāeyanā monopaonifo. “Nōko nios nokoki inimaira,” ikanax askapaonifo. Nāskakē māri ato keskara iyamakāfe. <sup>8</sup> Nāskakanax āto āfima fe ipaonifo. Askatari kērofori āto fenemafo fe ipaonifo. Askaiāfe ōikī Niospa veintitrés mil yorafo ato namarisafatani nā pena fisti. <sup>9</sup> Māri ato keskara chaka iyamakāfe. Akka, “Nioskai nokoki fena ōitifishkiyotiroma. Nāskakē ě afara chakafafiaito ea Niospa omiskōimania,” ixō shināyamakāfe. Akka nōko xinifāfe chakafaiāfe ōikī anā teneyamakaikī Niospa ato omiskōimani. Nāskakē ato mēra rono paekōifo nīchini ato chachinōfo. Ato chachino ranāri nanifo. Nāskakē noko tāpimai nōri Nios chakafaito nokori omiskōimatiro. <sup>10</sup> Askatari mēxotaima mekaifāfe ōikī Niospa āfe ājirinī ranāri ato namani. Akka māri ato keskara iyamakāfe mato omiskōimayamanō.

<sup>11</sup> Nā nōko xinifāfe afara chakafapaonifoōnoa noko kenexonifo noko yoisharanō nōri ato keskara iyamanō omiskōixikima. Akka nōko Ifo Jesús oyoamano chaima nō itipinīsharayoi mā nōko Ifo nokoaino anā nō keskara chaka nō ixikima. <sup>12</sup> Akka fētsa shinākī iskafai: “Ĕkai ato keskarama. Ĕ afaa chakafatiroma. Akka afara sharafo fisti ě amis,” ixō anori shinātiro. Nāskakē kexemesharakāfe ato keskara iyamaxikakī afara chakafai. Akka māri Jesús Ifofasharamax mā ato keskarari mā itiro afara chakafai. <sup>13</sup> Satanás mato afara chakafamapaikī mato fisti chakafamapaimisma. Keyokōi nā Nios Ifofafori ato chakafamapaimis. Mato chakafamapaifiaino Niospa mato yoia keskara mato kexesharatiro mā afaa chakafanōma. Akka mato yoimis keskara mato axōi mā chanīmara faito. Nāskakē Niospa Satanás mato ichapama fekaxtefatimafai mā chakafanōma. Mato Niospa amatiro mā tenenō mato fekaxtefafiaino. Māto ōiti mato kerexfaxotiro mā Satanás nikanōma. Askatari afara afe keskararafāfe mato fekaxtefaino Niospa mato amatiro mā tenenō mā Nios kachikirifaxikima.

<sup>14</sup> Efe yora mīshtichi, fetsafāfe afara onifakaxō, “Na nōko niosra,” ikaxō chanīmara faifono ato makinoax paxkafaitakāfe. <sup>15</sup> Nāskakē shināsharakōikāfe nā ě mato yoiai keskara ōitsai ě mato pāairaka. Akka ea yoikāfe ě mato pāaimākai. <sup>16</sup> Mā mā tāpia Niospa meka nikai nō ano fisti ichanāmis. Nāskaxō nō fimi ene ayamis Jesús noko nāxonī shināyanā. Nā nō ayamis, “Fimi ene Jesús āfe imira,” ixō nō shināmis. Nāskaxō nō shinātiro Jesús

noko naxōi āfe imi foni nō afe nīpaxanō. Nāskakē nō yoitiro iskafakī: “Aicho Epa Niosi, mī Fāke noko nāxoni nō afe īpaxanō,” ixō nō yoitiro. Nāskatari pāa torepakexō Jesús noko nāxoni shinākī nō pimis. “Nā pāa Jesús āfe namira,” ixō nō shināmis. Nāskaxō nō shinātiro Jesucristo noko omiskōixoni mastafono ifi cruz ikakinoax. Nāskakē nō afe rafepakenaka Ifofaax. <sup>17</sup> Akka pāa fisti torepakexō keyokōichi nō pimis. Nāskarifikī Jesucristo fisti keyokōichi nō chanīmara faax fisti keskara nō ixii.

<sup>18</sup> Nāskatari nōko kaifo israelifo shinākāfe. Nāfāfe āto inafō retekaxō Nios ināmisfo āto chaka soapaikakī. Nāskatari nā israelifāfe Nios kīfiti pexefā mēraxō Nios yonoxomisfāfe nā nami pimisfo. Nāskakanax nā fisti keskara imisfo ano fisti ichanānākaxō pikani Nios shināyanā. <sup>19</sup> Nāskakē ē mato yoi nā afara fetsa onifafo akai afama. Askatari afara fetsa onifakaxō nami ināfo nā namikai afama a onifafokairoko Nioskōikē. <sup>20</sup> Akka nā Jesús Ifofaafāfema Nioskōi nami inātamaro ko afara fetsa onifakaxō, “Nā nōko niosra,” ikaxō niafaka chaka nami ināmisfo. Nāskakē māri nami ināyamakāfe. Niafaka chaka fe mā rafeaito ē mato ōipaima. <sup>21</sup> Mā nōko Ifo Jesús fe rafepai a niafaka chakafo fe rafeyamakāfe. Askaxō nā rafe mā ifofatiromaki. Nā Jesús Ifofaafō fe mā ato fe ichanākaxō pāa torexō mā ato feta pimis Jesús noko nāxoni shināyanā. Nāskakē nā Jesús Ifofaafoma fe ato fe mā ichanātiro ma niafaka chakafo nikaxikīma. <sup>22</sup> Nōko Ifo Jesús fe rafepaikī nō niafaka chaka fe rafepaikī nō nōko Ifo Jesús nō ōitifishkimatiro. Nō askafaito noko omiskōimatiro. Akka, ¿nō Jesús kerexkai finōtiromē noko omiskōimayamanō? Maa, nō Jesús finōtiroma. Jesús noko omiskōimaito tsōa noko timamatiroma.

### *Nā Jesús Ifofaafō nō ato noikōixō nō ato shināchakamatiroma*

<sup>23</sup> Akka mā shināiraka iskafakī: “Cristo ēfe Ifo. Nāskakē nā ē apaiyai keskara ē atiro, afaa chakama,” ixō mā shināiraka. Ēje, nānorikōi mā shināmis. Nāskakē afara shara shinākī: “Nā chakama nō atiro,” ixō mā shināfiaino akka fetsafāfe anori shinākanima: “Chakara,” famisfo. Nāskakē fētsa ferotaifi nō afara pitiroma ato shināchakayamaxikī. Chanīma, nō Jesús Ifofaxō Niospa noko yoini keskara keyokōi nō pitiro. Keyokōi nami shara nō pitiro. Chanīmakōifiano, Jesús Ifofaa fetsafāfe shināmisfo iskafakakī: “Ē nami pitiroma. Ē nami pixō ē Jesús chakafatiro,” ixō shinātirofo. Nāskakē nō ato ferotaifi nō nami pitiroma shināchakanōfoma. Akka nō ato shināchakamatama Jesús fisti nō ato shināmapai. <sup>24</sup> Nāskakē nā mā apaiyai keskara fisti shināyamakāfe. Fetsafoōnoari shinākāfe. Ato axosharakāfe.

<sup>25</sup> Fatora fētsa mato nami ināpai mato kori fīaxikī akka pipaikī mā fitiro pixikī. “¿Fanīa mī na nami feamē?” ixō yōkayamakāfe mā pixō shināchakaxikikīma: “Nā nami nā mī niosnāraka,” ixō yōkayamakāfe. Akka noko Niospa yoini iskafakī: “Keyokōi mā nami pitiro,” ixō noko yoini. <sup>26</sup> Nōko Ifāfe keyokōi onifani. Keyokōiri āfenā. Nā onifani tii noko ināpai nōkonā keyokōi inō.

<sup>27</sup> Akka nā Jesús chanīmara famato mato pimapaiyaito mā a feta pipaiyai afeta pikāfe. Nāskaxō iskafakī yōkayamakāfe: “¿Fanīa na nami mī feamē? Nā mī niosnāraka,” ixō yōkayamakāfe. Yōkaxoma mā pitiro shināchakaxikima. <sup>28-29</sup> Askatari fētsa mato yoikī iskafatiro: “Ē mato nami pimai nā ēfe niosnā,” ixō mato yoiaito nā nami piyamakāfe. Akka mā piaito ōikī āfe shinā mēraxō shinātiro iskafakī: “Ajaa, na feronāfāke Jesús Ifofafaxō nā ēfe niosnā mā nami pii. Na feronāfākekai Jesús Ifofasharama,” ixō āfe shinā mēraxō shinātiro. Nāskakē māri mā nami pixō māto shinā mēraxō mā shināchakatiro: “Mā nō chakafara,” ixō. Akka mā mā tāpia keyokōi nō nami pitiro. Nāskakē fetsafāfe tāpiamano ato ferotaifi nā nami piyamakāfe shināchakayamanōfo. <sup>30</sup> Mā yoiraka iskafakī: “Ē keyokōi nami pikī ē Nios, ‘Aichora,’ fafafaīni. ¿Akka afeskakī fētsa eōnoa shināchakatiromē?” ixō mā shināiraka.

<sup>31</sup> Ē mato yoinō afara mā akai shara shinākī akāfe. Niospa mato shara ōinō akāfe. Niosnoa shināsharanōfo akāfe. <sup>32</sup> Nā mā akai keskafakī fetsafo shināchakamayamakāfe.

Nōko kaifo judeofo iyamai mani fetsafo Nios Ifofaafoya ato shināchakamayamakāfe matoōxō nōko Ifoōnoa shināchakanōfoma. <sup>33</sup> Nāskari fakī ēri keyokōi yorafo ē ato shara faxopai inimanōfo. Akka nā ē apaiyai keskara fisti ē akima. Fetsafāfe afara apaiyai fo keskafakī ē ato axopai Jesucristo Ifofakaxō ato chaka xatekanax afe ĩpaxanōfo.

## 11

<sup>1</sup> Akka na Cristo akai keskara ēri aki. Akka māri nā ē akai keskara akāfe.

*Ichanāxō nō Nios shināino feronāfake fe kēro afeskax itirofomāki Pablo ato yoini*

<sup>2</sup> Mā ea shināmiskē ē mato aicho fai matoki inimakī. Nā ē mato yoimis keskara mā nō feyafamiski. Nā mā nikafafāini. <sup>3</sup> Efe yora mīshtichi, ē afara ē mato yoipai mā tāpinō. Cristofi keyokōichi nōko Ifokī. Nāskarari kērofāfe āto ifo āto fenefo. Akka Cristo āfe Ifokī Epa Nios. <sup>4</sup> Nāskakaxō feronāfake Nios yoiti pexe anoxō yoivanā kifikani marakometirofoma Cristo shinākani. Nō marakomexō nōko Ifo nō noima. Nāskakē nōko Ifo nō rāfimatiro. <sup>5</sup> Askatari kērofāfe Nios kifipaiyanā Niospa meka yoipaikani marakometirofo fetsafāfe tāpinōfo āto fenefo āto ifokē. Nāskara mā nō feyafamis. Āto marakometimaisax maxko ika keskara itirofo. Nāskaxō āto fenefo rāfimatirofo. <sup>6</sup> Akka kērofāfe Nios kifipaikani marakomekaspakani feronāfakefo keskara maxko itiro. Nāskakanax kērofo maxko ikanax rāfipaitirofo. Nāskakē ato iskafatirofo: “Nā kērofo chakafora,” ikaxō yoitirofo. Nāskakē kērofāfe Nios kifipaiyanā āfe mekari yoipaikani marakometirofo. <sup>7</sup> Akka feronāfakefāfe Nios kifipaikani askayamai āfe meka yoipai marakometirofoma Nios keskara sharamāi ikanax. Askatari Nios nikakōikanax āfe ōiti keskara shara ikafo. Nāskafakīri kērofāfe āto fene nikakōikanax shara itirofo. Nāskakē āto fenefo atoki inimatirofo. <sup>8-9</sup> Niospa feronāfake onifakī taefani. Chipō xotofake onifani. Feronāfakeōnoa Niospa xotofake onifani. Kēronoakai Niospa feronāfake onifan-ima. Akka feronāfakeōnoa xotofake Niospa onifani fene afara axosharanō. <sup>10</sup> Nāskakē feronāfake kēro ĩkitiro. Kērofāferi āto fene nikakōitirofo. Nāskax Nios Ifofaafo ichanāifono kērofāfe āto marakometi maitirofo āto fenefo nikakōikaxō fetsafāfe ato ōinōfo āto fenefo nikakōiaifono. Askaifono Niospa āfe ājirifāfe ato ōikakī yoitirofo iskafakakī: “Niospa yoini keskara na kērofāfe āto fenefo nikakōisharakani,” ixō yoitirofo. <sup>11</sup> Nāskax nōko Ifo fe nō rafeax feronāfakefo fe xotofakefo nō axō faatanāsharatirofo. Akka xotofakefo iskatirofoma: “Nō feronāfakefo nō yopaima,” itirofoma. Askatari feronāfakefo iskatirofoma: “Nō xotofakefo nō yopaima,” itirofoma. <sup>12</sup> Niospa taefakī feronāfake onifani, āfe ane Adán. Nāskaxō xotofakeri onifani, āfe ane Eva. Adán āfe pishi tsēkaxō Niospa onifani. Nāskatari xotofake fake feronāfake kāipakemis. Akka xotofakefoya feronāfakefo Niospa onifani.

<sup>13</sup> Efe yora mīshtichi, shinākāpo. Xotofakefāfe mato fe ichanākaxō Nios kifipaikakī marakomexoma Nios kifikī, ¿askara sharamamē? Mā ea yoitiro. <sup>14</sup> Mā mā tāpia feronāfake foo chainipaya nō shara ōitiro. Akka nōkai askara feyafamisma. Nāskakē feronāfake foo chainipaya fatiro. Foo chainipayax rāfitiro. <sup>15</sup> Akka xotofakefāfe āto foo chai faafo nā marakometi shara ōitsa itirofo. <sup>16</sup> Akka na ē mato yoiai keskara ea nikakaspai fetsa efe feratenāito ē afaa yoipaima. Akka nā fisti ē mato yoimis. Xotofakefo marakometiro ē mato yoimis. Nā ē mato yoimis keskarari Nios Ifofaa fetsafāfe nānorikōiri yoimisfo nā ichanāifotia.

*Nios yoiti pexe anoax ichanākaxō Corinto anoafāfe afarafo chakafaifono Pablo ato yoini anā askanōfoma*

<sup>17</sup> Akka afara fetsari ē mato yoipai. Mē nika Nios yoiti pexe anoax ichanāxō mā afara chakafaito. Nāskaxō afara shara fatama mā afara chakafakōini. Nāskakē, sharafora ē mato faima. <sup>18</sup> Akka mē nika mato anoax fēkaxō ea yoiaifono nā mā ichanāitīa fetsafo fe mā osināxma ato fe ichanākaspaifo. Nāskax mā ato ketaxamei tsaopaitiro. Mā ichanāxō nā nōko Ifo Jesús mato nāxoni shināpaifi mā ranā mā noikaspa faatanāi. Nā ē matoōnoa nikai keskara ē chanīmara fai rakikīa. <sup>19</sup> A mā shināi fisti anori mā shināima. Nāskarafo yorafo a shināi fisti anori shinākanima. Nāskakē mā ranā feratenākakīma

yoinãñsharakãfe tãpisharaxikakĩ. Fetsafãfe anori mã shinãino, nãskakẽ fetsafãferi anorima shinãi. Nãskakẽ yoinãsharakãfe fato sharamãkĩ. <sup>20</sup> Ë anã mato yoisharapai. Mã Nios yoiti pexe anoax ichanãxokai mã pãa piyanã ayayanã a noko Jesús nãxoni mã shinãima. Askatamaroko mã piai yafi a mã ayai fisti mã shinãmis. <sup>21</sup> Mẽ nika a mã piai mã feaito mares pixikĩ ichanãxõ ato manayoxoma. A fonãikaifokai mã ato inãima. Nãskakẽ fonãikani. Askatari mã pãemis. Askarakai sharama. <sup>22</sup> Akka pipaikĩ ichanãti pexe ano kayoxoma ìkisi mãto pexe anoxõ piyokãfe. Akka mãto pexe anoxõ piyoxomaroko nã Nios yoiti pexe ano mã femis anoxõ mares pixikĩ a fonãikaifo ato akĩxikima. Nãskakẽ a fonãikaifo rãfitirofo. Mã askafakĩ a mato fe ichanãfo mã chakafai. Mã ato noima. ¿Ë matoõnoa yoisharaimẽ? Maa. Ëkai matoõnoa yoisharaima mãmãi ato chakafaito.

*Jesús noko nãxoni shinãyanã nõ piyanã nõ ayatiro*  
(Mt. 26.26-29; Mr. 14.22-25; Lc. 22.14-20)

<sup>23-24</sup> Nãskakẽ nõko Ifo Jesús ea yoini keskara ã anã mato yoini. Ea tãpimani keskara ãri mato tãpimapai. Nõko Ifo Jesús Judaspa ato achimayoamano nã fakish fisti aõxõ tãpimisfo fe ichanãyoni. Nãskaxõ ato feta pikĩ pãa tsofaxõ Apa Nios yoini iskafakĩ: “Epa Niospa, mã sharafinãkõia. Mĩfi keyokõi tãpiaki. Aicho,” fata pãa torepakexõ ato tii inãni. Nãskaxõ ato anã yoini iskafakĩ: “Na pãafi ãfe yoraki. Ëfi matoõnoax chipo naikai mato noikõiax. Mẽ naano nã mã ichanãitĩa nã mã pãa piatĩa ea shinãfãfãikãfe,” ixõ ato yoini. <sup>25</sup> Nãskaxõ mã piaifono anã kecho tsofaxõ ato yoini iskafakĩ ato ayamayanã: “Afara fena shara ã mato yoinõ. Nã mã ayai ãfe imi. Nãskakẽ mã ea shinãtiro. Ëfe imi foyanã ã matoõnoax nai mã efe Epa Nios ari ìpaxanõ. Nã nõ akai keskara chipo akãfe mẽ naano nã mã ichanãitĩa ea shinãkĩ,” ixõ ato Jesús yoini. <sup>26</sup> Nãskakẽ nã mã ichanãitĩa pãa piyanã ayayanã Jesús shinãfãfãikãfe: “Nõko Ifãfe noko nãxoni,” shinãyanã. “Nã pãa Jesús ãfe yora,” ixõ shinãfãfãikãfe pãa piyanã. Jesús anã oaitĩa nã chanĩmara faifo askapakexanõfo. Ë anã oaitĩa nãskaras akãfe.

*Ichanãifo anoxõ pãa pikĩ nõ Jesús shinãtiro*

<sup>27</sup> Nãskakẽ nã mã ichanãi anoxõ mã pãa piyanã ayayanã mã Jesús shinãtiro. Askafafiakĩkai mãto chaka xatekaspaxõ mãri mã chakafai pãa pixõ. Akka nõko Ifãfe noko nãxoni ãfe yora omiskõiyãnã ãfe imi foyanã noko nãxoni. Nãskakẽ nõ ichanãi anoxõ pãa piyanã ayayanã nõko Ifoõnoa shinãkima nõ nõko Ifo nõ chakafai. <sup>28-32</sup> Nãskakẽ nõ ichanãyanã nõ pãa piyanã nõ ayatiro nõko Ifo shinãyanã. Akka taefakĩ nõ shinãtiro iskafakĩ: “Ë afara chakafamis,” ixõ nõ shinãtiro. Akka nõ afara chakafãfaxõ Epa Nios nõ yõkayotiro nõko chaka noko soaxonõ. Nãskaxõ Jesús noko nãxoni nõ shinãkõitiro pãa piyanã. Akka nõ askafayamaito Epa Niospa noko omiskõimani. Akka nã ã mato yoiai keskara atiri mã askaima. Nãskakẽ mã iramanai. Ranãri mã isinĩ iki. Nãskatari ranãri mã mã nai. Nãskakẽ nã mã ichanãitĩa pãa piyoxoma afara chakafaxõ ìkisi Epa Nios yoiyokãfe mato chaka soaxonõ matori omiskõimayamanõ. Akka noko omiskõimãfiakĩ a Jesús Ifofaafoma Niospa ato omiskõimanai keskafakĩ noko omiskõimasharaima. Akka afokai ãfe fakefoma. Nãskaxõ omiskõipakenakafo mẽra ato potaxii. Akka nõfi ãfe fakekõifokĩ. Nõko Ifãfe noko omiskõimãfiakĩ a omiskõipakenakafo mẽra noko potatamaroko noko omiskõimakĩ noko tãpimani nõ anã chakafanõma.

<sup>33</sup> Akka mã ichanãxõ pãa pixikĩ ranãrito mã taefakĩ piimis. Nãskakẽ fetsafãfe akairi pipaikani afaa pitirofoma. Akka piyoxoma ato manayokãfe fetsafo feta pixikakĩ. Nãskakẽ mã ato manayotiro keyokõichi pitirofo. <sup>34</sup> Akka fatora fetsa mã fonãiki ichanãyoxoma mãto pexe anoxõ mã piyotiro. Nãskaxõ mã ichanãxõ mã ichapa piyamaino fetsafãferi pitirofo. Nãskaxõ mã ichanãxõ Jesús shinãkĩ ato feta mã pisharaino Niospa mato omiskõimanimã. Afara ichapakõi ã mato yoipai. Nãskaxõ ã matoki nokoxõ atoõnoa ã mato yoisharapai.

## 12

*Jesús Ifofaafāfe Niospa Yōshi Sharaōxō afarafo atirofo fetsafo fe axō faatanāsharaxikaki*

<sup>1</sup> Efe yora mīshtichi, afara fetsa anā ē mato yoisharapai. Niospa Yōshi Sharaōxō afarafo nō atiroōnoa ē mato tāpimapai aōnoa mā tāpisharakōinō. <sup>2</sup> Shinākapo. Mā Jesús Ifofaamano afara fetsa onifakaxō, “Na nōko niosra,” ikaxō mato chanīmara famapaonifo. Mā chanīmara fafiaino a onifafotokai afaa shinātirofoma. Askaxorikai afaa pishta mato yoitiroma. Nāskakē mā anorima shināyopaoni. <sup>3</sup> Askata yora fetsafāfe matoki nokoxō yoitirofo iskafakakī: “Ē mato Niospa meka yoinō. Niospa Yōshi Sharaōxō ē mato yoi,” ixō mato yoiaito, ¿afeskaxō mā tāpitiromē Niospa Yōshi Sharaōxō mato yoimākī? Ē mato tāpimanō afeskaxō mā tāpitiromākī. Fatora yora fētsa Jesús mekafakī chakafai, akai Niospa Yōshi Sharaōnoax mekaima. Akka, “Jesúsfi nōko Ifokī,” ixō yoi Niospa āfe Yōshi Sharaōxō yoitiro.

<sup>4</sup> Nā nō Epa Nios Ifofa tii āfe Yōshi Sharapa noko amapaiyai keskara noko amai. Ares fisti noko shināmatiro aōxō nā Nios Ifofaafō fetsafo nō ato asharaxonō. <sup>5</sup> Aōxō fetsa fetsafakī afo akī nōko Ifo nō axotiro. Nā keyokōi Nios chanīmara faifo tii nōko Ifo fisti. <sup>6</sup> Nāskakē Niospa nā nō Ifofa tii noko shināmani aōxō nō fetsafo afara axosharanō. Askatari Niospa keyokōi noko tāpimani a noko axopaiyai keskara noko axōi. Nā nōko Nios fisti anā ano fetsama. <sup>7</sup> Askatari nō Nios Ifofaito noko tāpimani āfe Yōshi Shara nofe iki. Nofe ixō noko amatiro nā Nios Ifofaifo nō ato axosharanō. <sup>8</sup> Fetsafāfe Niospa Yōshi Sharaōxō mēstesharakōi noko yoitiro. Askatari fetsafāfe Niospa Yōshi Sharaōxō tāpisharakōikī noko tāpimasharatiro. <sup>9</sup> Askatari fetsafori Niospa Yōshi Shara fistiōxō Nios chanīmara fakanax finakōia ikafo. Askatari fetsafāferi Niospa Yōshi Sharaōxō yorafo sharafakani. <sup>10</sup> Askatari fetsafāferi Niospa Yōshi Shara fistiōxō tsōa atiroma keskara faino, fetsafāferi Niospa Yōshi Sharaōxō nā Niospa yoiyai keskara noko yoiiaifono, fetsafāferi Niospa Yōshi Sharaōxō tāpitiro fētsa niafaka chakaōxō yoimākai askayamai Niospa Yōshi Sharaōxō yoimākai. Askatari fetsafāferi Niospa Yōshi Sharaōxō meka fetsa nikayomisma yoitiro. Askatari fetsafāfe meka fetsafāfe noko yoiaito nikafikī nō tāpiyamaito fetsafāferi Niospa Yōshi Sharaōxō noko yoisharatiro tāpinōfo. <sup>11</sup> Nā nō Nios Ifofatifi Niospa Yōshi Shara fistichi noko amapaiyai keskara nō atiro. Nā noko amapaiyai keskara noko amatiro.

*Nōfi yora fisti keskaraki*

<sup>12</sup> Nōko yora fistifiano nō pōyayai fetsea. Askata nō feroyata, pachoyata nā nō fisti askai fetsea. Nāskarifiyai nō keyokōichi Cristo Ifofaano nā fisti keskarakōi. <sup>13</sup> Cristo fistifiano nōfi āfe pōya keskarakī. Atiri nō judeofo ikaino mani fetsafori judeofoma ikaino yorafāfe āto yonomatifo ikaino askatari yorafāfe āto yonomatifoma ikaino nō askai fetsea. Nā nō Cristo chanīmara faafo tii nō afe yora ika. Niospa Yōshi Sharapa noko ōiti fetsafaax nō mēra iki.

<sup>14</sup> Nōko yora fistifiano nō pōyayai fetsea. <sup>15</sup> Nāskakē nōko tāekai yoikī iskafatiroma: “Ēkai mēkema. Nāskakē ēkai āfe afaama,” ixō yoifi nā nōko tāeri nōko yoraō nea. <sup>16</sup> Nāskatari nōko pachori yoikī iskafatiroma: “Ēkai feroma. Nāskakē ēkai āfe afaama,” ixō yoifi nā nōko pachori nōko yoraō nea. <sup>17</sup> Akka nōko yora nōko fero fistikē afeskaxō nō nikakeranama. Nāskatari nōko yora nōko pachō fistikē afeskaxori nō xetekeranama. <sup>18</sup> Akka Niospakai askara noko onifanima. Nā apaiyai keskara fakī noko onifani. Mapoya fāta feroya fāta pōyaya fāta pachoya fata kishiya fāta noko fani. <sup>19</sup> Akka nōko yora afara fistiya ikanokai shara ikeranama. <sup>20</sup> Akka nōko yora fistifiano nō pōyayai fetsea.

<sup>21</sup> Nāskakē nōko fērokai mēke yoikī iskafatiroma: “Ē mia yopaima,” ixō yoitiroma. Māporikai tae yoikī iskafatiroma: “Ēkai mia yopaima,” ixokai yoitiroma. Nāskafakīri a Nios Ifofaafō fetsafo iskafakī yoiyamakāfe: “Ē mia yopaima,” ixō yoiyamakāfe. Niospa nā Ifofaafō tii noko noikōia. Nāskakēri nōa ranā noinākāfe. <sup>22</sup> Nōko yora āfe afara

fetsafo mitsisipayamafekē nāfori nō yopakōi. <sup>23</sup> Nōko yora āfe afara fetsafo, sharamara, nō fafiakī nāfori nō kexesharai. Nōko afara fetsafori nō onesharatiro nō rāfixikīma. <sup>24</sup> Akka nōko yora āfe afara fetsa sharano nō onetiroma. Niospa noko yora onifaxoni nō kexesharanō. Nāskaxō nō yoitiro iskafakī: “Ēfe afara ē yopakōi,” ixō nō yoitiro. Nāskafakiri fētsa a Nios Ifofaa fetsa yoikī iskafatiroma: “Nakai afama,” ixō yoiflaino Nios aō noikōi. Nāskakē noko onifani nā Ifofaafo tii keyokōi nō yopakōi. <sup>25</sup> Niospa noko onifani nā Ifofaafo tii keyokōi nō kexenōnāsharatiro isharaxikī nānori fisti shināxikī. <sup>26</sup> Akka nō fanīra moxaki chachixō nō pae meetiro keyokōi nōko yora pāei fetsetiro. Nāskarifikī Jesús Ifofaa fetsa omiskōiaito keyokōi nōri shināmitsatiro. Nāskafakī yorafāfe Jesús Ifofaa fetsa sharafakē keyokōi nō afe inimakōitiro.

<sup>27</sup> Akka nō Cristo yora keskarakōi. Nāskax nō āfe pōya keskarrafo. Nō ichapaflix nō yora fisti keskarakōi. <sup>28</sup> Nāskaxō keyokōi nā nō Jesús Ifofaa tii Epa Niospa noko katonī aōxō afara fetsa nō anō. Akka fetsafori taefakī ato katonī Jesucristoōnoa ato yoifofāsafanōfo. Askatari fetsafori katonī āfe meka yoimis inōfo Niospa ato shināmanaino. Askatari ato katonī ato tāpimamisfo inōfo. Askatari aōxō tsōa atiroma keskara amisfo ato katonī. Askatari Niospa Yōshi Sharaōxō a isinī ikaifo ato sharafamisfo ato katonī. Askatari fetsafo ato axomisfo ato katonī. Askatari fetsafo shara yonomamisfo ato katonī. Askatari fetsafāfe āfe Yōshi Sharaōxō meka fetsapa yoiyomisma ato katonī ato yoinō āfe mekapa. Noko keyokōi katonī aōxō yorafa nō axosharanō. <sup>29</sup> Niospa keyokōi noko katonī a apaiyai keskara nō anō. Akka noko askafafianino keyokōichi Jesucristoōnoa nō ato yoifofāsafamisma. Askaxori keyokōi noko katonīma āfe meka yoimisfo nō inō. Askaxori keyokōi noko katonīma aōxō ato tāpimamisfo nō inō. Askaxori keyokōi noko katonīma tsōa atiroma keskara aōxō afama mīshti nō fanō. <sup>30</sup> Keyokōi noko katonīma Jesúsxō isinī ikaifo ato sharafamisfo nō inō. Keyokōi noko katonīma nā meka fetsapato āfe Yōshi Sharaōxō nō ato yoinō. Keyokōi noko katonīma nā meka fetsa nikaxō nā yoia keskara nō ato tāpimanō. <sup>31</sup> Nāskakē Niospa mato imapaiyai keskara ixō nā Jesús Ifofaafo mā ato shara faxotaifai. Niospa Yōshi Sharapa mato amapaiyai keskara nāfo fichipaikāfe. Akka nāfo sharafiano ē mato afara fetsa sharafinakōia iskaratīa ē mato yoinō. Ea nikasharakapo. Shara finakōia Niospa noko imapaiyai keskara ē mato tāpimanō, a noko Niospa noiai keskari fakī nōri fetsafo noisharakōinō.

## 13

### *Nō fetsafo nōisharakōitiro*

<sup>1</sup> Ēfe mekapa ē yoifitiroxakī, yora fetsafāfe mekapari ē yoifitiroxakī, Niospa āfe ājirifāfe mekapari ē yoifitiroxakī ē Niosxō yorafa noiyamax ēkai afaa itiroma. Nāskax ē mekai achakōi itiro, fetsafo fekaxtefai keskara ē itiro. Nāskafakī ēa ē fetsafo axomis keskara ē itiroma. <sup>2</sup> Niospa meka ē ato yoifikī ē ato noiyamax ēkai afaa itiroma. Askatari fetsafāfe Niospa meka tāpiyamaino akka ē tāpikōifixō ē ato noiyamax ēkai afaa itiroma. Askatari ē Nios chanīmara fakī finakōixō ē Niosxō ē nā machi xekafitiroxaki ē yorafa noiyamax ēkai afaa itiroma. Ē ato noiyamaino Niospa ea shara ōima. <sup>3</sup> Nāskatari ē afama mīshti nā afaamaisfo keyokōi ē ato ināfixō ē ato noiyamax ēkai afaa itiroma. Askatari Niospa meka shara ē ato yoiaito ea nikakaspakakī ea koaifono ē atoōnoax nafiakī ē ato noiyamax ēkai afaa itiroma. Ē ato noiyamaino Niospa ea shara ōima.

<sup>4</sup> Nō yorafa noikōiaino noko fekaxtefaifono nō atoki ōitifishkitiroma, nō tenetiro. Nāskaxori nō ato noikōikī nō ato axosharatiro. Askaxori nō ato noikī nō xītipaitiroma. Askatari kakapaimis nō itiroma. Nō yorafa noikōikī nō iskatiro: “Ē tāpikōiaki. Ē fetsafo keskarama,” ixō nō yoitiro. <sup>5</sup> Nāskaxori nō ato noikōikī nō ato rāfinīfaima. Askaxori nōa apaiyai keskara fistis nō shinātiroma. Akka nō fetsafori nō ato axosharatiro. Askaxori nō ato fena feratemisma nō itiro. Nāskaxori noko fētsa chakafakī mekafaino nō shinātaifatiroma. Afo shinātaamaroko nō aō noisharatiro. <sup>6</sup> Askaxori nō ato



noixō fetsafāfe afara chakafaito ōi nō inimatiroma. Akka afara chanīmakōi shara nikai nō inimakōitiro. <sup>7</sup> Askaxori afara afe keskararafiaino nō Nios noikī nō shināchakatiroma. Nō tenetiro. Askatari ato noikōikī atoōnoa afara chaka yoiaifono nikakī nō chanīmara fatiroma. Akka fetsafoōnoa chaka nikafixō nō tāpioxoma, “Afaa chakafayamapainōfora,” ixō nō shinātiro ato noikī. Askatari a mēxotaima chakafaifoōnoa atoōnoa nō yoitiroma iskafakī: “Nāfāfe mēxotaima afara chakafaifono Niospa ato chaka soaxotiroma,” ixō nō yoitiroma. Askatamaroko nō iskafatiro: “Nios Ifofakakī āto chaka xatetirofo,” ixō nō shinātiro ato noikī. Nāskaxori afara afe keskararafiaino nō Nios noikī nō kachikiri fatiroma.

<sup>8</sup> Nā Jesús Ifofaafāfe Epa Nios yafi yorafo ato noipakenakafo. Askafiaino nōko mai keyoaino Niospa meka yoimisfāfe anā ato yoixikanima. Askaxori a yōra mekapama meka fetsapa yoimisfāfe anā meka fetsapa yoixikanima. Askaxori nā tāpimamisfāferi anā noko tāpimaxikanima. Mā nōko Ifo nokoaino nō anā ato yopaxiima noko axonōfo. <sup>9</sup> Nāskakē iskaratīa Niospa noko tāpimanai keskara nō tāpisharayoama. A Niospa meka noko yoimisfāfe keyokōi tāpisharafoma. <sup>10</sup> Mā Jesucristo nokoaino nō a keskara shara ixii. Aato fi keyokōi tāpiakī. A tāpia keskara nokori tāpimaxii.

<sup>11</sup> Akka ē yomeax ēfe meka fāke meka keskara ē iyopaoni. Fakefāfe metiro keskarari ē meyopaoni. Fakefāfe shinātiro keskarari ē shināyopaoni. Iskaratīa mē yosixō fakefāfe shināi keskara ē anā shināima. Fakefāfe ichapa tāpiama. Akka ē iskaratīa mē yosiax fakefo keskara anā ē ikima. Iskaratīa ē feronāfakekōi ē anā fakefo keskarama. <sup>12</sup> Feisiti fetakōikē nōko femānā nō ōisharatiroma. Nāskarari Jesús nō ōitiroma afe keskara ikamākī. Akka nā oaitīa nō ōixii afe keskaramākī. Akka iskaratīa nō tāpisharayoama. Akka Jesús oaino nō tāpisharakōixii. Jesús noko tāpikōia keskarari nōri tāpikōixii. <sup>13</sup> Iskaratīa nō Nios chanīmara fai. Nō Nios chanīmara faxō nō manai nā oaitīa afe ipaxakī. Nō Nios chanīmara fai nā shara. Askatari afe ipaxakī nō manaino nāri shara. Askatari nō fetsafo noikōia nāfi sharafinakōiaki.

## 14

### *Niospa Yōshi Sharapa noko amapaiyai keskara anā Pablo yoini*

<sup>1</sup> Nā Niospa noko noiai keskafakī fetsafori noitaifakāfe. Nāskara sharakōi. Nāskara fichipaikāfe askaxikakī. Askatari Niospa Yōshi Sharapa afara fetsa mato amapaiyai keskara nō fetsafo fe axoshara faatanānō, afori fichipaikāfe. Niospa Yōshi Sharaōxō nā Niospa meka mā ato yoinō fichipaikōikāfe. <sup>2</sup> Askatari fētsa Niospa Yōshi Sharaōxō meka fetsapato yoikī yorafo yoitama Niosroko yoitiro. Niospa Yōshi Sharaōxō yoifiaitokai tsōa tāpitiroma. <sup>3</sup> Askatari fētsari Niospa meka shara noko yoikī noko tāpimasharatiro nō Jesús Ifofasharanō. Askata nōko ōiti noko fepeaxosharatiro nōko ōiti mēra nō inimanō afara afeskarafiaino. <sup>4</sup> Askatari fētsa Niospa Yōshi Sharaōxō meka fetsapato yoikī āa metiro āfe ōiti fepeaka keskara. Askatari fētsa nōko mekapā Niospa meka shara noko yoisharaito nō keyokōichi nikatiro. Nāskakē Niospa noko yoiai keskara nikasharax nōko ōiti fepeaka keskara shara nō itiro.

<sup>5</sup> Mā keyokōichi nā meka fetsapato Niospa Yōshi Sharaōxō mā yoipainō. Nāskara sharafiano akka fētsa māto mekapā mato tāpimasharai nāfi sharafinakōiaki. Akka fētsari meka fetsapato mato yoiaito mā nikatiroma tsōa mato yoiyamaino. Akka nā mato yoiai keskara fētsari mato tāpimatiro mā tāpinō. Nikai māto ōiti fepeaka keskara shara itiro. <sup>6</sup> Efe yora mīshtichi, meka fetsapato ē mato yoiaito mā nikayamax nā mekakai mātonā afama. Nāskakē nā ē mato yoiai keskara Niosxō māto mekakōichi ē mato tāpimatiro Niospa mato yoipaiyai keskara mā tāpinō.

<sup>7</sup> Shinākāpo, meka fetsa ē mato yoinō. Xāiti anorima maneaite nō nikasharatiroma fatomākī xafakīa maneaifo. <sup>8</sup> Askatari soraro fētsa nā kexemisto āfe pōōiti pōōatiro āfe sorarofō itipinīsharanōfo ato reteifoxikakī. Askafafiakī pōōasharamano tsōa tāpitiroma. Nāskakē tsoa itipinīsharatiroma ato reteifoxikakī. <sup>9</sup> Askatari meka fetsapa mā fetsafo

yoiaino afeska faxōkai mā yoiai keskara tsōa tāpitirofoma. Mā askara mekapa mekai māakōi mā mekai tsōa mato nikayamafiaino. <sup>10</sup> Akka nā maitio ikafo meka fetsapa mekakani. Akka nō ato nikatiroma. Āto kaifāfe meka fisti nikatirofo. Nāskax keyokōi meka shara. <sup>11</sup> Akka ēfe mekapa ē ato yoiaito yora fetsafāfe tāpitirofoma. Ēkairoko āto kaifāfe mekapa yoiaito ea nikafo. Akka ē āto meka tāpimāx ē āto kaifo keskara itiroma. <sup>12</sup> Nāskakē Niospa Yōshi Sharaōxō mato afara fetsa amapaiyai keskara nāfo mā fichipaikōitiro. Mato askafaino aōxō nā Jesús Ifofafo mā ato ōiti fepeaxosharakōitiro Jesús Ifofasharanōfo. Nāskara fichipaikāfe Nios yonosharaxoxikakī.

<sup>13</sup> Nāskakē Niospa Yōshi Sharaōxō meka fetsapato yoikī Epa Nios kīfikāfe nā mā yoiai keskara mato tāpimanō. Mā tāpisharaxō atori mā ato tāpimatiro akairi nikakōisharanōfo. <sup>14</sup> Nāskakē Niospa Yōshi Sharaōxō meka fetsapato nō Nios kīfikī nōko shināmā shināxō nō kīfima. <sup>15</sup> Akka Niospa Yōshi Sharaōxō meka fetsapato ē Nios kīfitiro. Askatari yorafāfe mekakōichiri ē Nios kīfitiro keyokōichi nikanōfo. Askatari meka fetsapa fanāitiro. Askatari yorafāfe mekapari ē fanāitiro keyokōichi nikanōfo. <sup>16</sup> Mā Niospa Yōshi Sharaōxō meka fetsapa Epa Niosnoa mā yoifiatio afeskaxokai a mato fe ichanāfāfe yoitirofoma iskafakakī: “Chanīmakōi mā yoi,” mato fatirofoma tsōakairoko māto meka tāpixō. <sup>17</sup> Mā meka fetsapato Nios aicho fafiakī fetsafo mā ato ōiti fepeaxosharatiroma mato nikafi-aifono māmāi meka fetsapato yoikī. <sup>18</sup> Efe yora mīshtichi, Niospa Yōshi Sharaōxō yōra mekapama meka fetsapa mato finōinīfofāta ē yoimiskī. Nāskakē ē Epa Nios aicho fai. <sup>19</sup> Askafia a Jesús Ifofafoya fetsafori ē āto yoipai ea nikanōfo. Ichanāti pexe anoxō ato ichanāfaxō āto mekakōichi ē ato yoipai meka ichapama ē yoifiatio. Nāskarafi sharakī. Akka yōra mekapama meka fetsapa ē ato yoiaito ea nikatirofoma meka ichapa ē ato yoifiatio. Nāskakē mekakōichi ē ato yoipai ea nikanōfo.

<sup>20</sup> Efe yora mīshtichi, ē mato tāpimapaiyai keskara tāpisharakāfe. Fake yomē tāpisharayoxoma, shināsharatiroma. Nāskarifikī fake yomē shināi keskara shināyamakāfe. Mēstekōi shinākāfe. Akka yora xinifāfe chaka shināitirofo. Akka fake yomēfāfekai chaka shināitiro. Nāskakē fake yome keskara ikāfe. Afara chaka tāpipaiyamakāfe. <sup>21</sup> Isaías Niospa meka yoikī keneni iskafakī:

Nā israelifo ē ato yoifiatio ea nikakaspamisfo. Nāskakē ē ato kaxpakōi yoimis.

Nāskaifāfe ōikī āto kaifoma ē atoki nīchikē, āto mekapa ato yoiaifāfe ato nikakanima meka fētsapamāi yoiafono. Ato yoifiatifonokai ato nikakanima, ixō Isaías kirika keneni Niospa meka yoikī. <sup>22</sup> Nāskakē yōra mekapama nō meka fetsapa ato yoiaito a Nios Ifofaafāfema noko nikatirofoma. Nāskakē Niospa ato ōimani afāfekai Niospa meka tāpitirofoma Nios chanīmara fayamakaxō. Akka Nios Ifofaafāfe Niospa meka tāpitirofo. Askata ichanāxō āto mekakōichi nō ato Niospa meka yoiaino Niospa Yōshi Sharaōxō nikasharatirofo. Akka nā chanīmara faafāfema nikasharakanima āto mekakōichi nō ato yoifiaino. <sup>23</sup> Nāskakē ichanāx yōra mekapama meka fetsapa mā mekaino a Nios chanīmara faafoma fe a mato fe yoramafori mato fe ichanāxō mato nikakakī shināitirofo iskafakakī: “Ōikapo, nā yorafo nā afaa shināifoma keskarafo,” ikanax yoināitirofo. <sup>24-25</sup> Nāskata mā ichanāxō Niospa meka mā yoisharaito a Nios chanīmara faafoma fe a nofe yoramafori mato nikakaxō āto ōiti mēraxō shināitirofo iskakakī: “Ooa, nōri Niospa yoiai keskara nō amisma. Niospa keyokōi tāpikōia. Nōko shinā mēraxō nō afara pishta fomāpaimisfo Niospa tāpikōia. Chipō noko kāimaxoxii,” ixō shināitirofo. Nāskaxō shināitirofo Niospa meka mēstesharakōikī. Anori shinākakī ratokonō mai chachixō Epa Nios kīfitirofo iskafakakī: “Epa Niospa, mī sharafinakōia. Na mia chanīmara faafo fe mī ika keskai nōri mēfe ipai,” ixō kīfitirofo.

### *Pablo ato yoini nō ichanāx nō afeskatiromāki*

<sup>26</sup> Efe yora mīshtichi, ē mato yoipai iskafakī ē mato tāpimapai. Mā ichanāino fētsa mato fanāixotiro. Fētsari mato Niospa meka yoitiro. Fētsari Niospa Yōshi Sharaōxō

meka fetsapa mato yoitiro. Fětsari Niospa Yōshi Sharaōxō a meka fetsapato mato yoiaino mato tãpimatirofo. Nãskakē nã ě yoiaino keskara asharakãfe. Nãskax mã ranã mã õiti fepeasharatiro. <sup>27</sup> Mã ichanãino yora ichapama a yōra mekapama meka fetsapa mekapai mekatirofo. Nãskakē fetsa mekai taetiro. Askatari fetsari chipo mekatiro. Akka meka fetsapato mato yoiaino fětsari mãto mekapa xafakãa mato tãpimatiro a mato yoiaino keskara mã nikasharanõ. <sup>28</sup> Akka yōra mekapama meka fetsapato mã yoipaiyaito tsõa nikatiroma. Akka a ato tãpimatirofo ano ikafomano meka fetsapa mã ato yoitiro. Akka mãto pexe anoax mares fisti mã mekatiro yōra mekapama Epa Nios fe.

<sup>29</sup> Mã ichanãino nã Niospa meka yoimis rafeta Niospa meka mato yoitirofo. A yoiaino keskara nikakaxõ nã Jesús Ifofaifãfe shinãtiro iskafakakĩ: “Niospa Yōshi Sharaōxō noko yoi,” askayamai, “Ãa shinãxõ noko yoiara,” ixõ shinãtirofo. <sup>30</sup> Askaxõ fětsa Niospa meka mato yoioaino fetsari tsaono Niospa Yōshi Sharapa shinãmanaino mato yoipaikĩ yoitiro. Akka a taefakĩ yoiato tsoaxõ nikatiro. <sup>31</sup> Nãskakē Niospa Yōshi Sharapa mato shinãmanai keskara fětsa yoikĩ taefatiro fětsari chipo yoitiro. Askatari fětsari yoitiro. Nãskaifono nã ichanãfãfe keyokõichi ato nikatirofo. Nãskaxõ ato õiti fepeaxosharakani. <sup>32</sup> Nã Niospa meka ato yoiaino afe shinã mēraxõ shinãtiro iskafakĩ: “Fětsari ato yoipai kiki ikax xatetiro.” <sup>33</sup> Askaxõ ichanãxõ rafekaita ato yoiaifono tsõa ato nikasharatiroma. Nãskakē ãto õiti fekaxtefatirofo. Askarakai Niospa fichipaima. Akka Niospa fichipai nã ichanãfo anoxõ rafekaita ato yoiyamaino fistichi ato yoinõ nikasharakõinõfo.

<sup>34</sup> Askatari afara fetsari ě mato yoisharapai. Nios Ifofaafõ ichanãifo anoax xotofakefo mekatirofoma. Niospa meka yoimisto yoiaino xotofakefãfe nikakõitirofo. Mekatamaroko nã Niospa meka yoiaino keskara nikasharaxikakĩ. Nãnori taeyoi Niospa meka yoikakĩ kirikaki kenenifo. <sup>35</sup> Nã ichanãkaxõ nikafo keskara xotofakefãfe tãpisharaxoma ãto fene yõkapaikakĩ manayotirofo. Akka ãto pexe ano nokokaxõ ãto fenefõ yõkatirofo ãto fenefãfe ato tãpimanõ. Nãskakē mã ichanãino xotofakefo mekaifokai sharama.

<sup>36</sup> Akka Epa Niospa yoipaiyai keskara mato fisti taefakĩ tãpimaino. Niospa meka yoimisfo matoki fisti fenifoma Niospa meka yoifekani. Fetsafori yoifekani fenifo. <sup>37</sup> Akka fatora fětsa mã yoikĩ iskafatiro: “Nõ Niospa meka ato yoimis. Askatari nõ Niospa Yōshi Sharaōxõ nã Nios Ifofaafõ nõ afara fetsa ato axosharatiro,” ixõ mã yoikĩ mã tãpitiro nã ě mato kenexonai keskara nõko Ifãfe mato yoiaino mã anõ. <sup>38</sup> Fětsa anorima mato yoiaino nikayamakãfe. <sup>39</sup> Nãskakē efe yora mĩshtichi, nã mã ichanãino anoxõ Niospa meka ato yoipaikãfe. Nã sharakõikĩ. Akka fětsa yōra mekapama meka fetsapa Niospa Yōshi Sharaōxõ mato yoipaiyaito xatemayamakãfe. <sup>40</sup> Akka mã ichanãino fětsa taefakĩ yoitiro. Askatari fětsari chipo yoitiro nã yoiaino keskara mã nikasharakõinõ. Mã askaino mãto õiti fekaxteima.

## 15

### *Cristo nafx anã otoni*

<sup>1-2</sup> Efe yora mĩshtichi, iskaratãa meka shara Jesúsnoa ě mato yoimis keskara ě anã mato shinãmapai. Ĕ mato Jesúsnoa yoiaino mã chanãmara fani. Mã chanãmara faito Jesús mato chaka soaxoni mã afe ipaxanõ. Akka ě mato yoini keskara mãkai kachikiri famisma. Akka mã kachikiri faino ěa kaxpa mato yoikerani.

<sup>3-7</sup> Yorafãfe ea meka shara finakõia yoionifo. Nãskakē ěri mato yoini iskafakĩ: Cristo noko nãxonai nõko chaka noko soaxoxiki. Akka Cristo tres nia maiyoni. Askata anã otoni. Mã otoax Pedroki nokoi taeni. Nãskatari chipo a aõxõ tãpimisfokiri nokoni. Askatari nã chanãmara faafoki yorafã rasifokiri nokoni. Akka fisti rasi nãpaifono, akka ranãri nanifoma. Nãskatari chipo Santiagoki nõko Ifo nokoni. Askatari a aõnoa afe meka yoimisfoki nokoni.

<sup>8</sup> Akka chipokōi ekeki Jesús nokoni. Ēkai aōnoa afaa tāpiyopaonima. Akka fetsafāfe mēxotaima nikayopaonifo. Nāskakē chanīmara fakī taefanifo. Akka ē afe niyopaonima taeyoi a fetsafo ikai keskai. Ē askafiaino ea Jesús katoni chipo. Ekeki nokoxō ea yoiaito ē koshi Ifofani. <sup>9</sup> Akka ē chakafayopaoni keskara Jesús Ifofaa fetsafāfe chakafamisfoma. Akka ē afara chakafakī finayopaoni. A Jesús Ifofafo ē ato omiskōimayopaoni. A afe yorafo ē chakafayopaonifikē Jesús ea noikī ea nīchini aōnoa ē ato yoinō. <sup>10</sup> Niospa ea noixō ea katoni a apaiyai keskara ē anō. Nāskakē nā ea amapaiyai keskara mē amis. Akka ea kaxpakōi katonima. Nā aōxō yonoxomisfo keskafakī ē yonoxokī finakōimis. Akka ēakōi ē yonoxomisma. Ea noikī Niospa ea katoni ē Jesús yonoxomis inō. <sup>11</sup> Akka ē Jesúsnoa yoimis iyamai fetsafāfe mato Jesúsnoa yoimis itirofo nānori fisti nō mato yoimis. Nāskakē nā Jesúsnoa fisti nō mato yoimis keskara nikakī mā mā Jesús chanīmara faa.

### *Namisfo otoxikani*

<sup>12</sup> Nō mato yoimis iskafakī: “Cristo noko naxōfinixakī mā anā otoni,” ixō nō mato yoimis. Akka, ¿afeskakī atirito mā yoikī iskafamismē? “Yora naax anā ototiroma,” ixō mā anorima yoimis. <sup>13</sup> Akka yora naax ototirokēma Cristori otokeranima. Akka nō tāpia yora naax ototirokē nāskakē Cristo otoni. <sup>14</sup> Akka Cristo otoyamanikē kaxpa aōnoa nō mato yoikerana. Nāskakē kaxpakōi mā chanīmara fakerana. Akka chanīma Cristo naax otoni. <sup>15</sup> Akka Cristo otoyamanikē nō mato pārakerana. Akka nō mato yoimis iskafakī: “Epa Niospa Fake Jesús otofani,” ixō nō mato yoimis. Yora naax ototirokēma Epa Niospa Cristo otofakeranima. <sup>16</sup> A naafo otoyamaino Cristori otokeranima. <sup>17</sup> Cristo otoyamanikē kaxpakōi mā chanīmara fakerana. Māto chaka mato soaxokeranama. <sup>18</sup> Akka Cristo otoyamanikēkai nōri naax nō otokeranama. Askax nō afe nīpakeranama. <sup>19</sup> Nono mai anoxō niyoxō nō shinākī iskafakerana: “Ē naax Cristo otoni keskai ēri otoxii ea Niospa ofaano,” ixō nō shināfiar Cristo otoyamanikē nāskakē kaxpa nō chanīmara fakerana. Akka Cristo otoyamanikē chanīmayamakē, “Afaa tāpiafoma,” noko fakeranafo nokoōnoa shināchakakōikeranafo.

<sup>20</sup> Akka chanīmakōi, Cristo otoi taeni. Anā naxiima. Nāskakē Cristo otonino nā chanīmara faafo nakanax otoxikani afe ipaxakakī. <sup>21-22</sup> Akka Adán Niospa onifakī taefani. Adán taefakī afara chakafani. Nāskakē afara chakafaax nani. Akka nā feronāfakeōnoax keyokōi nāpamisfo. Nāskarifiar nā feronāfake Cristoōnoax nā chanīmara faafo ototirofo afe nīpaxikakī. <sup>23</sup> Cristo otoi taeni nīpaxakī. Nā anā oaitīa keyokōi afe yorafo ofofaxii afe nīpaxanōfo. <sup>24</sup> Nāskatari nono mai anofo keyoxikani. Nāskatari Cristo keyokōi xanīfofo potaxii anā xanīfo inōfoma. Askatari niafakafāfe āto xanīfofori potaxii. A niafakafāfe āto xanīfo finakōiari potaxii. Cristo ato potano anā ato yonoma-pakenakafoma. Nāskaxō Cristo Apa Nios yoikī iskafaxii: “Mā yorafo keyokōi āto xanīfo mī itiro. Ē anā āto xanīfo ikima,” ixō Apa yoixii. <sup>25</sup> Akka iskaratīa Cristo nōko xanīfo iyoa. Nā xanīfo fetsafo a Cristo nikakaspaifo Niospa anā ato afaa imaxiima. Cristo nāmāri ato nīchixii. Nāskatari Epa Nios xanīfokōi ipanaka. <sup>26</sup> Akka Niospa Satanás omiskōipakenakafo mēra potaxii. Akka nā Satanás Adán afara chakafamanino keyokōichi nō afara chakafaax nō napanaka. Nāskakē Niospa Satanás omiskōipakenakafo mēra potano anā tsoa nanakama. <sup>27</sup> Nāskaxō Niospa āfe Fake Cristo nāmāri keyokōi ato nima. Akka mā nō tāpia Apa Nios fisti āfe Fake nāmā ikama nāatomāi nāmā keyokōi ato nimax. <sup>28</sup> Keyokōi Niospa Fake nāmā ikafono Apaōxō ato yonomatiro. Nāskaxō āfe Fāke Apa yoixii iskafakī: “Epa mīri ea yonomatiro,” ixō yoixii. Nā Apa yoiai keskara nikasharakōi. Nāskakē Apa Nios fistichi keyokōi yonomaxii āto xanīfo finakōimāiaxō.

<sup>29</sup> Akka yora maotisamisma naano fētsa maotisaxotiro. Nāskara mā feyafamisfo. Akka yora naax otoyamanikēkai tsōa ato maotisanoxokeranama. Tsoa otoyamanikē nōri ototiroma. Akka, ¿afeskai nō maotisaxonimē nō otoyamafi? Akka nō tāpia mā nō naax nō anā otoxiai. <sup>30</sup> Akka tsoa otoyamanikēkai ēri otokeranama. Nāskakē,

¿afeskai mēxotaima Cristoõnoax mesekõi mēra ě kafāsaimē ě otoyamafi? Akka ě tãpia a ě otoxiai. Nãskakē mēxotaima ě Cristoõnoax mesekõi mēra kafāsai Cristoõnoa ato yoifofãsafai. <sup>31</sup> Nãskakēri ě fetsafo matoõnoa yoisharamis mãmãĩ eõxõ nõko Ifo Jesucristo mã Ifosharafaino. Efe yora mĩshtichi, chanĩma ě mato yoi mēxotaima Cristoõxõ ea retepaikani. <sup>32</sup> Poomãnã noko pipaiyai keskara nã Efeso anoafãfe ea retepainifo, a Cristo nikakaspafãfe. Akka Cristoõnoax ě naax ě otoyamax kaxpa ě aõnoax nakerana. Askatari ě ato Cristo Ifofamano nakanax tsoa otoyamaino kaxpa ě ato Cristo Ifofamakerana. Nõ naax anã otoyamafixixakĩ nã nõ apaiyai keskara nõ anõkãfe. Nãskakē fetsafãfe yoikakĩ iskafakani: “Nõ nayoxoma nõ piyanã nõ ayayoi inimayanã. Nõ Nios shinãtama nã nõ apaiyai keskara nõ ayoi,” ixõ shinãkani anorima. Akka nõ naax nõ anã otoxii. Nãskakĩ nõ nayoxoma Niospa noko amapaiyai keskara nõ anõkãfe.

<sup>33</sup> Niosnoa yora chakafãfe mato pãramisfo. ato fe rafeyamakãfe. Yora chakafo fe mã rafeaito matori afara chakafamatirofoki. <sup>34</sup> A mã anorima shinãmis anã shinãyamakãfe. Chakafakĩ xatekãfe. Atiritokai mã Nios tãpisharama. Nãskax mã rãfipaitiro.

### *Nõ naax anã nõ otoaitĩa nõko yora fetsa keskara ixii*

<sup>35</sup> Akka yoikĩ iskafakani: “¿Afeskakõ Niospa naafo otofaxiimē? ¿Anã nõ otonõ afe keskara yoraya noko imaimē?” ixõ yoikani. Anori yoikakĩ afaa shinãkanima. Akka shara shinãsharakakĩ tãpitirofo. <sup>36</sup> Nõ ifi exe fanano ãfe xaka payokometiro. Akka ãfe exe oke mēranoa pishta payokometiroma chipo foaitiro. Maiax ãfe exe xaka naamax ãfe exe pishta foaitiroma. <sup>37</sup> Akka nõ afara fanakĩ nõ ãfe kayafoya fanatiroma. ãfe exe fisti nõ fanatiro. Mã ãfe xaka payokomeaino ãfe exe foaitiro. Nãskax mã foaikax anã ãfe exe keskara itiroma. Fetsa keskara itiro. <sup>38</sup> Nã ifi exe nõ fanano Niospa foaimasharatiro. Nã apaiyai keskafakĩ fanafo fetsa fetsatapafo fai.

<sup>39</sup> Akka nõko yorari yoinãto yora keskarama. Nõko yora fetsa keskara. Yoinãnã fetsa keskarafono peyafonãri fetsa keskarafõ. Foenãri fetsa keskarafõ. Akka nã yora fisti keskara Niospa noko onifanima, fetsa fetsatapafo Niospa noko onifani. <sup>40</sup> Akka nõko mai anoafãfe ãto yorafo fetsa keskarafõ. Askatari Epa Nios ari anoafori nai mēranoafãfe ãto yorafori fetsa keskarafõ. Keyokõi sharafiax askarafoma. <sup>41</sup> Akka xini ikaino oxe ikaino fishifo ikaino nã yora fisti keskarama fetsa keskarafõ. Nãfo sharafiax askarafoma.

<sup>42</sup> Nãskarifiãri yora naino ãfe yora payokometiro. Anã nõ otoaxkai nõko yora payokomenakama. Nãskara shara nõ ipanaka anãkai nõ nanakama. <sup>43</sup> Nõko yora maia anoax chakakõi ixii. Akka nõ otoax sharakõi nõ ipanaka. Nõ nono mai ano niyoax nõ iramanapakeax nõ natiro. Nõ anã otoaxkai nõ anã nanakama, mitsisipa shara nõ ipanaka. <sup>44</sup> Nõ naano noko maifafono nõko yora payokomei. Akka nõ otoano Niospa noko nimaxii afe ĩpaxanõfo. Akka nõ mai ano niyoax nõ natiro. Akka mã nõ naax anã nõ otoax nõko yora fetsa keskara ixii. Nõ anã nanakama. <sup>45</sup> Niospa meka yõra kenekĩ iskafani: “Feronãfake Adán Niospa onifakĩ taefani. Onifaxõ xãka ĩkai fani,” ixõ yõra kirikaki kenei. Akka Cristori Adán keskara feronãfake. Feronãfakekõixõ noko nimapakenaka. Nõ naax anã otoax nõ anã natiroma. <sup>46</sup> Niospa feronãfake Adán onifakĩ taefani. Chipõ Cristori kãini noko nimapakexakĩ. <sup>47</sup> Niospa nã feronãfake Adán onifakĩ taefani. Mã yorafaxõ onifani. Akka Cristo nai mēranoax nokoki fotoni. Tsõakai Cristo onifanima. <sup>48</sup> Akka nono mai anoax nõ kãiax nõko yora Adán yora keskara. Nõ Jesús Ifofaax nã keskara nõ ixii. <sup>49</sup> Nõ nono mai anoax fake kãini. Nãskax nõ Adán keskarakõi. Askatari nõ Niospa yora ikax nõ Jesucristo keskarakõi ixii.

<sup>50</sup> Efe yora mĩshtichi, ě mato yoinõ nõ afeskax iximãkai. Nõ iskaratĩa namiya. Askatari nõ imiya. Nãskara yorayax Nios fe nõ ipanakama. Akka nõko yora natiro nõ anã otoxixakĩ. Nõ anã otoax nõko yora fetsa keskara ixii. Nãskakē nõ anã nanakama. <sup>51</sup> Tsõakai nikayomisma na meka shara ě mato yoi. Tãpipaikĩ ea nikasharakãfe. Akka nõkai atiri naima. Askafiax nõ keyokõi fetsa keskara ĩki fetsexii. <sup>52</sup> Jesús anã oaino

ãfe ãjirinĩ ãfe maneti maneaino Jesús chanĩmara faafo, a nayoamafo, fetsa keskara itaxikani. Fetsoitanai keskarataxikani fetsa keskara itãxikani. Askatari Jesús chanĩmara faax namisfori otorisataxikani. Nãskakẽ keyokõi Jesús chanĩmara faafo tii fetsa keskara ixikani. Askax anã nanakafoma. <sup>53</sup> Nõ iskaratĩa naino nõko yora payokometiro. Askafiano Niospa nõko yora noko fetsafaxoxii nõ anã nanõma, nõ afe nĩpaxanõ. <sup>54</sup> Nãnorĩ Niospa meka yoikakĩ kirika kenenifo. Nã yoinifo keskara chanĩmakõi ixii. Iskafakakĩ kirika kenenifo yoikakĩ: “Aicho. Anãkai Niospa yorafo nanakama. Cristoõnoax nõ afe isharapakenakaki,” ixõ kirika kenenifo. <sup>55</sup> Askatari kenenifo iskafakĩ: “Anãkai afanã noko namatiroma. Anãkai nõ nai omiskõinakama,” ixõ kirika kenenifo. <sup>56</sup> Nõ afara chakafamisnoax nõ nai nõ omiskõitiro. Nãskakẽ nã Moisés noko yoinioxõ nõ tãpitiro afara chakafaax nõ natiro. Naax nõ omiskõixii. <sup>57</sup> Akka Jesucristo noko nãxoni noko chaka soaxoxiki. Nãskakẽ nõ Jesucristo Ifofaax nõ nafiax nõ anã otoax nõ anã nanakama. Nõ afe nĩpanaka. Nãskakẽ nõ Epa Nios aicho fai.

<sup>58</sup> Akka efe yora mĩshtichi, afara fetsa shinãyamakãfe. Niospa noko imapaiyai keskara nã fisti shinãsharakãfe. Jesús Ifofasharakãfe. Nõko Ifo Jesús yonoxosharafafãikãfe. Mã mã tãpia nõko Ifoõxõ nõ yonoai kaxpa nõ yonomisma, nõko Ifomãi noko amakẽ. Nãskakẽ nõ aõxõ ato axosharatiro nõ kaxpa ato axõima.

## 16

### *Nã Nios Ifofaafãfe kori ichafaxõ Nios Ifofaafo fetsafo fomani*

<sup>1</sup> Iskaratĩa mã ea yõkaita, afara fetsa kirikaki kenexõ ã mato yoi. Nios Ifofaafo Jerusalén anofo afaamais. Ato noikĩ mã ato afara fomatiro. Akka nã Nios Ifofaafo Galacia anofo ã ato yoia keskara ã matori yoipai nã afaamaisfo afarafo mã ato inãsharanõ. <sup>2</sup> Nomĩkotĩa ichanãi mã kori ichafaxõ chipo Jerusalén anofo mã ato fomatiro. Yonoxõ kori fĩta atiri mã ato inãtiro. Akka mã kori ichapama fixõ ichapamari mã ato inãtiro. Akka mã ichapa fixõ ichapari ato inãkãfe. Nomĩkotĩa ichanãi mã kori ichafatiro, ea manakima kori ichafayokãfe. Nã ã matoki nokoaitĩa mã anã kori meketiroma. Nã kori mã ichafaa nã Jerusalén anofo afaamaisfo mã ato fomatiro mẽ Corinto ano matoki oano. <sup>3</sup> Nãskano feronãfake sharakõifo katokãfe afãfe nã afaamaisfo ato kori foxotanõfo Jerusalén anofo. Nãskatari ã Corinto ano nokoxõ Jerusalén anofo ã kirika kenexõ ã ato fomanõ. Nã feronãfake sharakõifãfe ato foxotanõfo. Akka nã feronãfakefãfe nofeta Jesús Ifofaafo. Nãskakẽ ato ifisharakãfe ixõ ã kirika kenei nã feronãfakefo sharakõifãfe foxonõfo Jerusalén anoxõ Jesús Ifofaafãfe ato tãpinõfo. <sup>4</sup> Niospa ea nĩchipaiyaino nã feronãfakefo mã katoa efe fotirofo.

### *Pablo Corinto ano kapaikĩ ato yoini*

<sup>5</sup> ã Macedonia finõfainikai ã matoki Corinto ano nokoikai. <sup>6</sup> ãtsa, ã ano mato fe samaraka pishtayotiro rakikĩa. Askayamai ã mato feta mechaka fisti finõyotiro rakikĩa. Nãskakẽ ã matoki nokoaino mã ea axosharayotiro. Askatari mẽ kaino mã ea nĩchitiro ã kasharatanõ. <sup>7</sup> ãkai mato finõfaipaima. Niospa ea nẽtefayopaiyaino ã mato ano nẽteyotiro.

<sup>8</sup> Askafiax ã nono Efeso ano iyoi nã nõko fista ãfe ane Pentecostés ikaitĩa. <sup>9</sup> Nonoxõ yorafãfe nõko Ifoõnoa nikapaikani. Nãskakẽ ã nonoxõ nõko Ifoõnoa ã ato yoisharayoi chanĩmara fanõfo. ã nõko Ifoõnoa ato yoifiaito atirifãfe ea xatemapaikani ã Jesúsnoa yoiyamanõ.

<sup>10</sup> Akka ã nõko Ifo yonoxomis keskafakĩ Timoteori nõko Ifo yonoxomis. Nãskakẽ matoki Timoteo nokoaino kexesharakãfe akiki inimayanã. <sup>11</sup> Nãskakẽ, “Mĩ afaamara,” fayamakãfe. Nãskax mato anoax ekeki oaino nĩchisharakãfe inimayanã ekeki nokonõ. Nios Ifofaa fetsafo fe ekeki nokoyonõ ã anã ato fe rafesharanõ.

<sup>12</sup> Askatari iskaratĩa nofe yora Apolosõnoa ã mato yoi. ã Apolos yoia iskafakĩ: “Corinto anofo õiyotãfe,” ã feito ea yoia iskafakĩ: “ã iskaratĩa kayotiroma. Niospa ea nĩchipaiyaitĩa ã katiro,” ixõ ea yoia.

*Pablo mā mekai xatekī Corinto anoafō ato meka fomani*

<sup>13</sup> Jesús shināfāfāikāfe chakafakakīma. Jesús Ifofasharakāfe. Jesús chanīmara faax afara afeskarafaito rateyamakāfe. Kachikirifayamakāfe. <sup>14</sup> Afarafo mā akai keskara Nios yafi yorafo noikī axosharakāfe.

<sup>15-16</sup> Estéfanas afe yorafo fe Acaya ano ixō nānoxō Jesús chanīmara fakī taefanifo. Mā mā ato ōimiskī. Mā mā tāpia nāfāfe Nios Ifofafo sharafamisfo. Nā keskarafo nikasharakāfe. Nā ato feta yonoaifori nikasharakāfe.

<sup>17</sup> Ē inimasharakōi Estéfanas, Fortunato, Acaicori afo ekeki nokoafono. Akka mā ea axopaiyai keskara nāfāfe mā ea axōafo. Mā ea axotiroma mā chaikōi ika. <sup>18</sup> Nā tiito ea inimamamisfo. Mato inimamamisfo keskafakī eari inimamamisfo. Nāskakē atoōnoa yoisharakāfe.

<sup>19</sup> Nā nōko Ifo chanīmara famisfāfe Asia anoafāfe mato yoisharapaikani. Aquila feta āfe āfi Priscila mato yoisharapaikani. Mato shinākōikani. Āto pexe mēranoax ato fe ichanāmisfāferi mato yoisharapaikani. <sup>20</sup> Keyokōi nōko Ifo chanīmara faafāfe nono efe ikaxō mato yoisharapaikani. Nāskakēri mā ranā yoinōnāsharakāfe.

<sup>21</sup> Ēfi Pablocki mē mekai xatekī meka rafes ē mato kenexonō. Akka taefakī nofe yora Sóstenes ea kirika kenexona. Akka iskaratīa ēkōi kirika mato kenexoni mā tāpinō.

<sup>22</sup> Fatotora nōko Ifo noiyamaino Niospa omiskōimapainō omiskōipakenakafo mēra potakī.

Nōko Ifo Jesús chaima nokopainō.

<sup>23</sup> Nōko Ifo Jesucristo mato noikī mato inimamasharakōinō.

<sup>24</sup> Ē nōko Ifo Jesucristoōxō keyokōi ē mato noi. Nā tii.

## Pablo Corinto Anoafu Afianã Kirika Kenexõ Fomani

### *Pablo Corinto anoafu yoisharani*

<sup>1</sup> Ëfe yora mĩshtichi, êkĩa Pablo. Ë kirika kenexõ mato fomai mã tâpinõ. Nofeta Jesús Ifofamis Timoteo feta ã mato kirika kenexõ fomai. Epa Niospa ea katopaiyaito Cristo Jesús ea katonĩ ãfe meka ã mato yoifofãfõfãinõ.

Nios chanĩmara faafu Corinto anoafu, Acaya mai anoafori ã mato keyokõĩ yoisharai. <sup>2</sup> Ë nõko Nios mato kĩfixomis iskafakĩ: “Epa Niospa, nõko Ifo Jesús feta ato noikõikĩ ãto õiti inimamasharaxõfe. Askatari ato shara fafe,” ixõ ã matoõnoa yoimis.

### *Pablo omiskõini*

<sup>3-4</sup> Nõ Epa Nios yoisharanõ iskafakĩ: “Epa Niospa, mĩ noko sharafa fafãfãini. Mĩ sharafinãkõia. ¡Aicho!” ixõ nõ Epa Nios yoinõ. Nãfi nõko Ifo Jesucristo ãfe Apaki. Nãatorĩ noko noisharakõĩ. Askatari nõ omiskõiaito noko inimamatiro. Akka nõ meemis keskara mei, fetsa omiskõiaito nõ inimamatiro, nõ Epa Niospa nõ omiskõiaito noko inimamamis keskafakĩ. <sup>5</sup> Cristo omiskõimakĩfinakõinifo. Nãskakẽri nõri Cristoõnoax omiskõikõĩ. Akka Cristo omiskõiaito Niospa axosharakõini. Nãskakẽ Cristoõxori nokori Niospa axosharakõĩ. <sup>6</sup> Akka nõ Niospa meka mato yoi nõ omiskõiaito mã noko nikakõixõ mã nõko Ifo Jesús chanĩmara faax mã afe isharakõitiro. Nãskax mã inimakõitiro. Akka nõ mato yoi nõ omiskõifiaito nõko õiti Epa Niospa noko inimamaxomis. Akka mã mã noko õimis nõ omiskõiaito Epa Niospa noko axosharaito. Nãskarifiã mãri omiskõiaito Epa Niospa matori axosharakõixii mã tenesharakõinõ. <sup>7</sup> Mã nõ tâpia nõ omiskõiaĩ keskai mãri nofe omiskõiaito Epa Niospa nõko õiti inimama keskafakĩ matori inimamasharai.

<sup>8-9</sup> Efe yora mĩshtichi, Asia mai anoax nõ omiskõita ã mato yoi mã tâpinõ. Nõ omiskõifinãkõita tenetiroma mei nai keskarakõĩ nõ meita. Nãskakẽ nõ tâpitiro nãskara Epa Niospa noko tâpimana nõã nõ ifimetiroma nõ omiskõiyamanõ. Epa Nios fistichi noko ifitiro. Akka nõ omiskõiaino nõ naano, nãatofi yorafo ofofatirokĩ, ixõ nõko shinã mẽraxõ nõ shinãita. <sup>10-11</sup> Akka nõ fãsi omiskõĩ nakerafiaino Epa Niospa noko ifita. Anã afetiãra noko ifixii. Askatari nõ chanĩmara fakõini nokomãĩ ifitaifamiskẽ, mãmãĩ noko Epa Nios kĩfixomiskẽ. Mã noko askafaino nõ Nios chanĩmara faa fetsafãfe shinãkĩ iskafaxikani: “Aicho Epa Niospa, mĩ Pablo yafi afe rafemisfo mĩ ato ifisharakõia. Mĩ fãsi sharakõĩ,” ixõ yora ichapafãfe yoixikani.

### *Afeskai Pablo kanimamẽ Corinto ano*

<sup>12</sup> Nã nõ fakira kafãsai ariax nõ isharakõimis, nõ afaa chakafamisma. Niospa fichipaiyai keskara nõ amis. Askatari mato mẽranoax nõ isharaifinãkõimis. Nãskakẽ nõ shinãchakaima nõ inimasharakõĩ. Akka nõkai nõ mato pãramisma, chanĩma fisti nõ mato yoimis. Niospa noko noikĩ noko shinãmanaino nõ isharanõ mato mẽranoax. Askatari nõ nõ fakira kafãsai ariax nõ isharakõimis. <sup>13-14</sup> Ë mato kirika kenexõ manamani tâpitiropinĩ shara faxõ fekaxma mã tâpitiro xafakĩã sharakõĩ. Nãskafekẽ atirifãfe tâpisharãfoma ã afe keskaramãki. Nãskafixõ mã tâpisharai, nãskara shara ã fichipai. Nãskakẽ nõko Ifo Jesús anã oaino mã nokoki inimasharaxii, nõri matoki inimasharanõ.

<sup>15-16</sup> Nãskakẽ ã shinã ã Macedonia ano kaitĩã ã mato ano mãpefaixii anã ã mato yoisharaxiki mãto õiti mẽra mã inimanõ. Askata nõ Macedonia anoax ã oaitĩã anã ã mato ano mãpetiro mato fe iyoxiki. Chipõ Judea ano ea nõchitirofo, ixõ ã shinãni. <sup>17</sup> Nãnori ã shinãfiãx ã mato ari ã kayoikaima. Akka mã iskafakĩ shinãiraka: “Pablo ã kaira ifiãx kaima, ¿afeskakĩ noko pãramẽ?” ixõ mã shinãiraka. Akka êkai õiti ranãyama fetsa yoikĩ, fetsa yoikĩ ã fapanã. Nã yõra Jesús Ifofaamato shinãĩ keskara ã shinãima. <sup>18</sup> Nã Niospa noko pãramisma keskafakĩ nõrikai mato pãramisma. Nãskakẽ tâpisharakõia nõ mato pãramisma. <sup>19</sup> Akka Timoteo ikaino Silvano ikaino ã ikaino Jesucristo Niospa Fakeõnoa



nõ mato yoimis. Jesucristo mekakai rafema, ãfe meka mẽstekõi. Chanĩma fisti. <sup>20</sup> Epa Niospa noko yoioa keskara keyokõi Cristo mã noko axomis. Nãskakẽ nõ keyokõichi yoimis iskafakĩ: “Epa Niosi, mĩ fãsi sharakõi. Jesúsxõ keyokõi mĩ afama mĩshti famis nã mĩ yoioa keskafakĩ. Nãskakẽ Jesús aneõxõ nõ mia aicho fai,” ixõ nõ yoimis. <sup>21</sup> Askatari Epa Niospa mato yafi noko Jesús Ifosharakõifama. Nãskatari noko katõxõ noko nõchini ãfe meka yoimis nõ inõ. <sup>22</sup> Akka fẽtsa ãfe afarafo marakka fatiro fetsafãfe tãpinõfo ãfenãkẽ. Nãskafakĩri Epa Niospa ãfe Yõshi Shara nõ mẽra nanea aõxõ nõ tãpinõ nõ afe yoraxõ. Nãskakẽ nõ tãpitiro afara fetsa nã noko yoioa keskara chanĩmakõi noko inãxii.

<sup>23</sup> Ë mato ari kaira ixõ ã shinãfiitaxakĩ ã kaama. Epa Niospa ea tãpikõia ã chanĩkẽma. Ë mato ari kakerana. Nãskafiax ã kaama ã mato shinãkĩ. Ë ato ari kaxõ ã ato fasi yoikĩ ã ato shinãmitsamatiroma ikax nãskax ã mato ari kaama. <sup>24</sup> Ë mato askafatama ëroko mato inimamapaisharai. Ëkai mãto ifo ipaima. Akka Jesús fisti nõko Ifo. Akka mã mã Jesús chanĩmara faxõ mã mã Jesús Ifo sharakõifai. Nãskakẽ ã mato feta Jesús yonoxopai mã inimai finakõinõ, askatari mã Jesús Ifo sharakõifanõ.

## 2

<sup>1-2</sup> Nãskakẽ ãfe shinã mẽraxõ shinãkĩ ã iskafayamea: “Ë Corinto ari kapaifi ã kaima. Akka ã kaxõ ã ato yoikĩ iskafapaima: ‘A mã afara chakafamis keskara xatekãfe,’ ixõ ã ato yoikĩ ã ato inimamatiroma. Askakimaroko ã ato shinãmitsamatiroma. Ë ato shinãmitsamanaino, ¿tsõa ea inimamatiromẽ? Akka ares fisti ea inimamatiromofo,” ixõ ã shinãyamea. <sup>3</sup> Nãskakẽ ã mato kirika kenexona, mato ari kakĩma. Akka ã shinã, “Ë ato ari kaxõ ã ato iskafaino: ‘Mã isharakõiyama mãto chaka xatekãfe,’ ã ato faino shinãmitsakõitirofo,” ixõ ã shinãyamea. Akka mã ea nikayamaino ëri shinãmitsakõitiro. Akka mã anã Nios nikakĩ anã isharakõiaino, mã ea inimamasharakõitiro. Akka mẽ tãpikõia ã inimakõiaino mãri inimakõitiro. <sup>4</sup> Ë mato kenexokĩ ã meyamea ãfe õiti shinãmitsakõiaito oiayanã. Ëkai mato shinãmitsamapainima. Askatamaroko ã mato kenexoni a ã mato noikõiai keskara mã tãpinõ.

### *Fẽtsa noko chakafaito nõ rae fatiro*

<sup>5</sup> Akka nã feronãfake fẽtsa ea chakafakĩ mekafakĩ ea fisti shinãchakamanama, nã mã Nios Ifofaafori keyokõi mato shinãchakamana. Nãskakẽ noko keyokõi chakafakĩ mekafaa. Noko askafafaino ãkai na feronãfake omiskõimaki finapaima. <sup>6</sup> Akka mã ranãrito omiskõimanakĩ nãskanõkãfe. <sup>7</sup> Akka a mã aka keskafakĩ anã askafakĩma rae fakãfe. Nãskaxõ yoisharakãfe inimamasharakõikakĩ anã omiskõinõma. Akka mã askafayamaino ãfe shinã mẽra shinãmitsakõitiro anã shinãsharatiroma anã Nios Ifofapaima. <sup>8</sup> Nãskakẽ ã mato yoiai keskafakĩ ea nikasharakãfe. “Nõ mia noikõi. Mĩ anã nofe isharakõitiro,” ixõ yoikãfe tãpinõ. <sup>9</sup> Ë mato kirika kenexõ manamayamea tãpipaikĩ mã mẽxotaima ea nikakõimãkai. <sup>10</sup> Mã fetsa raefakẽ ëri nã raefatiroma. Fẽtsa ea chakafaito ã mato shinãkĩ Cristo ea õiaino ëri nã raefatiroma. <sup>11</sup> Nõ fetsa raefasharakõiaino Satanás noko feparatiroma. Nõ tãpisharakõia Satanás noko kexepaikõi. Akka a Nios Ifofaafoma tiito chakafakĩ mekafatiromofo Satanás fichipaiyai keskara. Akka nõ fetsa raefaino Satanás noko afeskafatiroma.

### *Pablo pexe rasi Troas ano nokoax inimanima*

<sup>12</sup> Akka ã mato eõnoa tãpimapai. Ë pexe rasi Troas ano kani meka shara Cristoõnoa ato yoikai. Cristoõnoa nikapaikõinifo. Nãskano nõko Ifãfe ea atoki nõchini ã ãfe meka ato yoinõ. <sup>13</sup> Akka ã shinãni nofe yora Tito Troas anoa ã fichikaira ixõ. Akka fichiyamax ã inimanima. Nãskaxõ ã fãsi shinãkõini. Nãskata, “Mẽ kai,” ixõ Troas anoafo nã nõko Ifo chanĩmara faafo ã ato yoita ã oni nono Macedonia ano.

### *Cristoõxõ nõ keyokõi finõtiro*

<sup>14</sup> Aicho Epa Niosi, mĩ Cristo Jesús afara chaka potamana anã afeskafanõma. Nãskakẽ nõri afe inimai nõmãĩ aõxõ ãfe meka yoikatsaxakĩ yorafãfe tãpinõfo. Akka pirofomã nakas shara nachikomea nõ keyokõichi xetetiro keskafaki, nãskafakĩri Niospa noko nĩchiano nokoõxõ keyokõichi tãpitirofo ãfe meka shara. <sup>15</sup> Akka nõ meka shara Cristoõnoa yoimis keyokõichi nikanõfo. Akka atirifãfe chanĩmara fakõikani, Nios fe ipaxakakĩ. Akka atirifãfe nikasharakanamax Jesús Ifofakanamax nakanax omiskõipakenakafo. <sup>16</sup> Akka na meka shara nikaifoma mã nakanax omiskõipakenakafo mẽra fokanax omiskõixikani, nãfãfemãĩ na meka shara nã nõ afara pisikõĩ xetemis keskara xetekatsaxakakĩ. Akka nã meka shara nikaifãfe nã nõ pirofomã nakas shara xetemis keskara xetemisfo. Nãskakanax Nios fe nĩpanakafo. Akka, ¿tsõa Niospa meka Jesúsnoa yoisharatiromẽ? Akka tsõa atiroma. <sup>17</sup> Akka fetsafãfe Niospa meka ato yoikakĩ kori fipaikani ãa ato pãrakaxõ. Nõ mato Niospa meka yoikai noko kopifakãfe ikaxõ ãa ato pãrakaxõ ato kori fãiffo keskafakĩ nõkai mato askafamisma. Mã nõ tãpia nõ ãfe meka yoiaito Epa Niospa noko õisharakõĩ, nãatomãĩ noko nĩchinixakĩ. Æfe meka yoikai nõ kaxetiroma, Niospamãĩ noko õiaino nõmãĩ Cristo ãfe inaxõ.

### 3

#### *Jesús ato meka fena yoimis Pablo ato yoini*

<sup>1</sup> Askara nõ yoiaino, mã shinãiraka nã nõa nõ yoimesharai keskara. Maa. Nõa nõ yoimesharaima. Mã chaka shinãĩ. Akka fẽtsa yonopaiyaito fẽtsari fetsa kirika kene fomaxotiro fetsafãfe õinõfo yonosharamiskẽ. Akka, ¿mã shinãimẽ fetsafãfe nokoõnoa kirika kenenõfo noko yoisharakakĩ nõ yonosharamiskẽ Niospa meka yoikĩ? Akka nõ askara fichipaima. Akka, ¿mã shinãimẽ nõ mato kirika kene yõkaito kirika kenexõ mã noko inã nõri fetsafo inã nõ noko tãpinõfo nõ mato mẽraxõ yoisharamiskẽ? Maa. Askara nõ fichipaima. <sup>2</sup> Akka nã kirika kenea keskara nõ fichipaima mãmãĩ nã kirika kenea keskarakẽ, fetsafãfe mato õitirofo mãmãĩ Nios Ifofasharakẽ. Mato õikakĩ nokori tãpitirofo nõ Niosxõ yonosharamiskẽ. <sup>3</sup> Akka mã mã isharakõia anã mã imis keskarama a Niospa fichipaiyai keskaraino. Nã noko õimana Cristo mãto õiti fetsafaa fena keskara mã inõ. Nãskakẽ mã kirika kenea keskara. Mato õixõ fetsafãfe tãpitirofo nõ Niospa meka mato tãpimasharamiskẽ. Akka na kirika kene lapisi kenemeama, askatari tokiri sapaki kenemeama; Epa Nios nĩpanakato ãfe Yõshi Sharapa mato imashara mã isharakõinõ.

<sup>4</sup> Iskafakĩ nõ yoia, mã nõmãĩ tãpixõ Niospamãĩ noko nĩchinikẽ nõ ãfe meka mato yoinõ Cristo ãfe sharaõxõ nõ mato yoisharamis. <sup>5</sup> Akka nõa nõ afara shara nõ mato yoitiroma mã isharanõ. Askatamaroko Epa Niospa ãfe Yõshi Sharaõxõ nõ fetsafo tãpimatiro isharanõfo. <sup>6</sup> Niospa Yõshi Sharaõxõ na meka fena nõ ato yoimis Jesúsnoa nõ Nios fe nĩpaxatiro. Akka a Moisés kenenĩõnoa nõ ato tãpimamisma, sharafiano keyokairoko nikanõfo nõ ato yoipanã. Akka a Moisés yoini keskara keyokõĩ nikakanamax Nios ika ano katiroma. Askatamaroko Niospa Yõshi Sharapa noko imasharapakenaka Nios ika ano nõmãĩ Cristo Ifofakẽ.

<sup>7-8</sup> Epa Niospa nõko xinifo israelifo nã ato yoipaiyai keskara ato yoini nikanõfo. Tokiri pãraki kenexõ ato yoini. Epa Niospa Moisés tokiri kene inãino luz keskara fafekõini. Nãskatari Moisés femãnã fafekõini. Nãskakẽ mã Moisés mãchi keya ariax fotokẽ nõko xini israelifãfe õitiroma inifo. Nãskax fafekõifix fenãmãshta matapakeni. Akka Epa Niospa Moisés yoini keskara sharakõifixõ noko imapakexatiroma. Sharakõifixõ, akka iskaratĩa Niospa Yõshi Sharapa noko yoiai keskara nãroko sharafinakõia. <sup>9</sup> Akka nã Moisés yoini keskara sharafiano nikakanamax nakanax Nios ika ano katiroma. Akka iskaratĩa Niospa ãfe Fake Jesúsxõ noko chaka soaxotiro nõ afe isharapakexanõ. Nã sharafinakõia afaa fetsakai askarama. <sup>10</sup> Epa Niospa Moisés yoini keskara sharafix, akka Epa Niospa Jesúsxõ noko axoni keskara nãroko sharafinakõia. <sup>11</sup> Niospa meka shara Moisés fiaino fafesharakõini. Mã fiix ãfe femãnã fafesharakõini, Moisés. Æfe femãnã

fafesharakõifiax fenãmäshta matapakeni. Epa Niospa Moisés yoini keskara sharafiax, akka Epa Niospa Jesúsxõ noko axoni keskara keyonakama nãroko sharafinakõia.

<sup>12</sup> Nãskakẽ mã nõ tãpikõia Epa Niospa Jesúsnoa yoini keskara keyonakama. Nãskakẽ ranotama nõ Jesúsnoa yorafo yoitiro. <sup>13</sup> Nõkai Moisés keskarama. Moisés ãfe femãnã fafeaino samapa feopomeni israelifãfe õinõfoma nãskax fenãmäshta matapakeni. <sup>14</sup> Akka nõko xinifãfe nikasharapaonifoma, ãto õitimãi fẽstokõi keskarakẽ. Iskaratĩari nõko kaifo nãskaraforti. A Moisés ato yoini keskara ato kirika anexonaifono ato nikakaspakanax. Nãskakaxõ Epa Niospa meka tãpisharatirofoma. Akka Cristo fistichi ato shinãmatiro mã õiti fẽstoa keskara inõfoma. <sup>15</sup> Iskaratĩari mã Moisés yoini keskara ato anexonaifono ãto õitimãi fẽstokõiano shinãsharapanãfãfe. <sup>16</sup> Askafikaxõ iskaratĩa a Moisés keneni keskara anã shinãkaxoma nõko Ifo chanĩmara fakaxõ aõnoa fisti shinãtirofo. Nãskakẽ anã feopomea keskara ixikakima. <sup>17</sup> Niospa Yõshi Shara nõ Ifofaax nofe ikaino afaa fetsa nõko ifo itiroma, noko ìkixikĩ. <sup>18</sup> Akka nõko õitikai fẽstoa keskarama. Nõko Ifãfe ãfe meka nõ nikasharakõitiro. ãfe Yõshi Sharapa noko ìkixõ noko fetsafatiro a keskara shara nõ inõ. Akka mã noko fetsafaano nõ sharakõi ixii. Nãskakẽ fetsafãfe noko õikakĩ tãpitirofo nõ shara isharakẽ. Nã feisiti xinĩ chaxaino fafeai keskara noko õikakĩ nõko Ifo Jesús tãpitirofo afe keskaramãki.

#### 4

<sup>1</sup> Akka Epa Niospa noko shinãkĩ noko yoini ãfe meka shara Jesucristoõnoa nõ yoifofãfõfãinõ. Nãskakẽ nõ shinãchakaima, nõ Niospa meka yoiki xateima. <sup>2</sup> Nãskakẽ nõ afaa one chakafamisma rãfixikima, a afara one chakafamisfo keskafakĩ. Askatari nõ tsoa pãramisma. Askatari nõa nõ Niospa meka fetsafaxõ yoimisma. Akka Niospa tãpia meka chanĩma fisti nõ yoimiskẽ. Nãskakẽ mã nokoki inimasharapainõ, mã nõ afarafo shara faito õi. <sup>3</sup> Na meka shara Jesúsnoa nõ yoimis nikakaspafono mã onea keskara. Nãskakẽ tãpikanamax oa fẽstoa keskarafõ. Nãskakanax omiskõipakenakafo. <sup>4</sup> Nãfofi mã niáfaka chaka ãto ifoxõ ato yoimis. Nãskaxõ mã õiti fẽstoa keskara ato faano na meka shara Jesúsnoa tãpitirofoma. Mã yora fẽxõ luz ota sharafiano õitiroma keskarafõ. Nãskaraxori Jesús finakõia tãpitirofoma. Nãskatari tsõa tãpitiroma Jesús Apa keskara sharafinakõifiano. <sup>5</sup> Akka nõkai nõa nõ nokoõnoa nõ mato yoimisma mã noko ifofanõ. Askatamaroko nõ mato yoimis Jesucristo mãto Ifo inõ. Nõko Ifokẽ aõ noixõ nõ yonoxosharapai. Akka nõ mato axosharapai Cristoõnoa mã tãpinõ. <sup>6</sup> Niospa pena onifayoxoma fakishkẽ yoini pena inõ. Nãskarari nõ Jesús Ifofayamax nõko õiti mã fakish keskara chakakõi ipaoni. Akka Niospa Jesucristoõxõ nõko õiti mẽra noko chaxamashara aõxõ nõ tãpinõ afe keskara sharakõimãki.

#### *Pablo yoini nõ Jesús chanĩmara faax nõ isharatiro*

<sup>7</sup> Akka nõ afaayamafekẽ Niospa ãfe sharakõi noko mẽra nanea nõ ãfe meka shara Jesúsnoa ato yoinõ. Akka mã kesho noko keskarari akai afaama. Samama moshitiro. Moshifitirokẽ a mẽra afara sharakõi nõ nanetiro. Nãskarifiãi nõ afaayamafiano Jesús nofe rafea. Nãskakẽ yorafãfe tãpitirofo Niospa Yõshi Shara nõmẽra nanea. <sup>8</sup> Mã nõ imis keskara iskaratĩa ã mato yoinõ mã tãpinõ. Noko chakafafiakakĩ noko xatemakanima. Nãskafixõ nõ afeskaimẽti ixõ, nõ shinãchakafikĩ mã nõ tãpia Epa Niospamãi noko axosharafafainaito. <sup>9</sup> Noko noikaspakakĩ noko chakafapaimisfo. Nãskakaxõ noko chĩfafõfãsafamisfo. Noko askafafiaifono Epa Niospa noko potaima. Nãskakatari noko reteaipakakĩ noko tsefeya fafiafono Epa Niospa noko kexesharamis nõ nayamanõ. <sup>10</sup> Jesús niyoano reteaipaonifo keskafakĩ nokori nãskari fakani reteaipakakĩ. Noko reteaifiaifono nõko Ifo Jesús noko kexesharai noko retenõfoma. Nãskakẽ yorafãfe tãpitirofo mã Jesús nafianixakĩ anã otoax nikẽ. <sup>11</sup> Nõ Jesús yonoxonaito mẽxotaima noko reteaipakani. Akka noko reteaifiaifono nõko Ifo Jesús noko kexesharai noko reteyamanõfo. Akka nõa nõ ifimetiroma nayamaxiki. Nãskakẽ tãpitirofo mã Jesús

nafianixakī anā otoax nofe ikē. <sup>12</sup> Nāskakē Jesúsnoa nō mato yoimis fetsafāfe noko retepaifiaifono mā chanīmara faax mā afe ĩpaxanō.

<sup>13</sup> Akka Epa Niospa meka kirika ano yōra keneni iskafakī: “Ĕ Epa Nios chanīmara fakōini. Nāskakē Niosnoa ě ato yoi,” ixō kirikaki Niospa meka keneni yōra. Nāskarifiakī nōri Niospa meka chanīmara fakōixō nō mato yoi. <sup>14</sup> Akka mā nō tāpia nōko Ifo Jesús mā nafiakē Ĕpa Niospa anā ōtofani afe ĩpaxanō. Nāskakē Apa Jesús otofani keskafakī mato yafi nokori otofaxii nō afe ĩpaxanō. <sup>15</sup> Akka nō omiskōikōi mato Epa Niospa meka yoi mā āfe meka chanīmara fakōinō. Nāskakē yora ichapafāferi Epa Nios nikakōikaxō, “Aicho, Epa Niosi, mī fāsi sharakōi,” faxinōfo.

<sup>16</sup> Nāskakē nō omiskōifikī nō shināchakaima. Nōko Ifokai nō kachikiri faima. Akka nōko yorari anā kerexma nō omiskōiaino. Askafixō nōko shinā mēra mēxotaima noko kerex fafāfāini. <sup>17</sup> Akka a nō niyoax nō omiskōiyoai akai afaama, samamashta keyoi. Akka nō Jesúsnoax omiskōiaito a noko sharakōi imai a keskarakai tsōa ōiyomisma. Nāfori keyonakama. <sup>18</sup> Akka nā nō omiskōiai shinātamarako nā nō ōiyomisma nō shināi. Nios ika anoxō noko inimamapakenaka. Nāa nō shināi. Akka nā afaranā noko omiskōimanai samama keyoxii. Akka a Niospa noko chipo imai keskara keyonakama.

## 5

<sup>1</sup> Akka ě mato yoinō nikakapo. Pexe xiniax pāo ikax keyotiro. Nāskarifiāi nō naino nōko yora keyotiro anā nōko fero mēsho nō mēra inōma. Akka tsōakai noko yora fenafaxotiro. Epa Nios fistichi noko yora fena onifaxotiro. Akka mā nō nai mēra kaax nōko yora fena shara ixii. Epa Niospa noko yora fena shara faxōano a anā keyonakama. <sup>2</sup> Akka nō fekaxtemis nōko yora fekaxkōimei. Nōko yora fenashara fapai nai mēraxō. <sup>3</sup> Akka nō naax, nōko fero mēsho yoraya itiomamamē? Maa. Epa Nios fisti nō Ifofamiskē noko yora fena shara faxotiro nō afe ĩpaxanō. Nāskakē nōko fero mēsho yoramais nai mēranoax itiro. Epa Niospamāi noko yora fena faxōano. <sup>4</sup> Iskaratīa nono mai ano niyoax nōko yora omiskōiyoai. Askafix nō nayopaima. Nō nayoamano Cristo onō noko yora fetsafaxoxiki nō isharapakexanō. <sup>5</sup> Nā Epa Nios fistichi noko onifani nō afe ĩpaxanō. Nāskakē āfe Yōshi Shara nō mēra nanea nō tāpinō noko yora fetsa faxoxiaino.

<sup>6</sup> Nāskakē nō shināsharafafāini nono mai ano niyoxō, nayoxoma, nōko Ifo Jesús ari kayoxoma mā nō tāpia. <sup>7</sup> Nāskakē nā Jesús ika ano ōiyamafikī nono mai anoxō nō chanīmara fafāfāini. Nāskaxō chipo nō ōixii Epa Niospa noko fetsafaano. <sup>8</sup> Akka mā nō tāpisharakōia Epa Niospamāi noko yora fetsa ināino. Akka mā nō nakī nōko yora nō ratafainikai nō sharafinakōia ikikakī. Nāskakē nō inimasharakōi mā nō nai nōko Ifo Jesús femāi nō ikikai. <sup>9</sup> Akka nono mai ano nō niyoxō nōko Ifo nō yonoxosharayopai nokoki inimanō. Nāskatari nai mēraxori na fischisharapaiyai keskafakī nōko Ifo nō inimamapaisharakōi. <sup>10</sup> Akka nā chanīmara faafo tii Cristoki nokoxikani. Nāskatari noko yoipakexii nono mai ano niyoxō nō shara famismākī, askayamakī nō chakafamismākī. Akka nō afara shara famiskē afara sharakōi noko ināxii. Akka nō afara chakafamiskē afara shara noko ināpaifikī noko ināxima. Nāskakē nō fixiima. Nāskakē Jesúsxō nō yonopai sharakōi.

### *Pablo yoini Cristoōnoax nō Nios fe rafetiro*

<sup>11</sup> Akka Niospa noko yoia keskara nō ayamax nō rāfitiro. Nāskatari fetsafori nō ato yoipai nā Niospa ato yoiai keskara anōfo. Niospa noko tāpikōia nōmāi mēstekōi yoiaito. Nōkai ato feparapaima. Māri mā mā noko tāpikōia nō mato pāramisma. Nōko meka mēstekōi fisti nō mato yoimis. Nānori fisti mato shinā mēraxō mā shināpainō. <sup>12</sup> Akka kakapai nōa nō yoimesharapaima. Akka mēstekōi fisti nō mato yoimis, mā mā tāpia. Akka fetsafāfekai mato yoikōikanima mato feparapaikani. A yoiaifo anorikai yoimisfoma āa āto shinā mēraxō shinākaxō yoimisfo kakapaiyanā. Akka nōfi mato pāramisma, chanīma fisti nō mato yoimis. Nāskakē mā nokoki inimakōimis. Nāskaxō mā

nokoõxõ ato yoikĩ nokoõnoa mã ato yoisharatiro. <sup>13</sup> Chanĩma, nõ Nios noikĩ kerexkai nõ yonoxofafãimis aõnoa fetsafãfe nikasharanõfo. Akka yorafãfe nokoõnoa yoimisfo iskafakakĩ: “Na Pablo feta yonomisfãfe shinãsharamisfoma mẽxotaima ato Niospa meka yoifofãsafamisfo omiskõifinafikakĩ,” ixõ noko yoimisfo. Åa noko askafanõfokĩ mã nõ tãpiakĩ Niosxõ nõ yonofikai mã ãfe meka tãpinõ. Akka nõ mẽstekõi shinãsharakĩ nõ mato yonoxosharamis. <sup>14</sup> Cristo noko noikĩ noko yoini nõ ãfe meka shara mato yoinõ. Cristo keyokõi yorafoõnoax naani. Nãskakẽ mã nõ naa keskara a nõ iyopaoni keskara ixikima. <sup>15</sup> Akka mã Jesús nayoni yorafoõnoax keyokõi a keskara shara ixiki. Nãskakẽ a nõ chaka ipaoni keskara ixiiima. Nãskakẽ mã nõ apaiyai keskara fisti anã nõ shinãtirioma. Cristoõnoax nõ yonosharaxotiro. Cristo ãa nokoõnoax nayoni. Nafiano Epa Niospa ãfe sharaõxõ anã otofani.

<sup>16</sup> Akka mã Jesús chanĩmara faafãfema fetsafoõnoa shinãifo keskarakai nõ anã atoõnoa anori shinãpakenakama. Nõri anori shinãyopaoni nõ anã askapaima. Cristoõnoari nõ chakakõi shinãyopaoni. Nõkai anã aõnoa anori shinãima. <sup>17</sup> Nãskakẽ Cristo mã Ifofafo ato shinã fetsafaxõa anã shinãyopaoni keskara inõfoma, fena keskara shara inõfo. A Niospa fichipaiyai keskara fena keskara nõ ixii. Keyokõi fena keskara ixii. <sup>18</sup> Epa Niospa Cristoõxõ noko fetsafaa anã nõ noikaspanõma, nõ afe rafenõ. Askatari noko yoini aõxõ ãfe meka nõ ato tãpimanõ Epa Nios fe rafenõfo. <sup>19</sup> Epa Niospa Cristoõxõ keyokõi yorafo afe rafemapai anã noikaspanõfoma. Cristomãi noko nãxonikẽ Epa Niospa a nõ afara chakafamisnoa anã shinãima. Mã Epa Niospa noko yoia keskafakĩ nãnorikõi nõ mato yoimis.

<sup>20</sup> Akka Cristo noko nĩchini nõ ãfe meka mato yoinõ. Nõ ãfe meka mato yoi mã Epa Niospa mato yoiai keskara. Epa Niospa nokoõxõ mato yoi mã Cristo mato yoipaiyai keskafakĩ. Nãskakẽ nikakõikãfe Cristo mato nãxonikĩ mato chaka soaxoxiki. Nãskakẽ Cristo Ifofaxõ mãto chaka xatekãfe Epa Nios fe rafexikakĩ. <sup>21</sup> Akka Cristo afaa chakafapaonima. Nãskafikẽ Apa Niospa nõko chakafo akiki nĩchini. Cristo afaa chakafayamafiakatsaxakĩ noko nãxonni Epa Niospa noko omiskõimayamanõ. Mã yora chaka keskarax nõko chakafoõnoax Jesús nani. Nãskakẽ nõ Jesús Ifofaino Niospa noko õitiro sharakõi mã nõ afaa chakafamisma keskara, nokoki inimakõikĩ.

## 6

<sup>1</sup> Akka nõ Nios feta yonomis ãfe meka mato yoikĩ. Nãskakẽ nõ mato yoisharapai Epa Niospa mato noisharakõiaino, mã shinãmakiyamanõ, ãfe meka mã kachikiri fayamanõ. Fetsafãfe anorima mato yoiaito nikayamakãfe. Askatamaroko Jesús meka shinãmakiyamakãfe. <sup>2</sup> Taeyokĩ Niospa meka yoimisto kirika keneni iskafakĩ Niospa yoiaino:

Ë mato shinãito, mã ea yoiaino ã mato nikai mã omiskõiaino. Ë mato ifinõ, ã mato axosharaxiki, ixõ yoini Epa Niospa. Nãskakẽ nikasharakãfe iskaratĩari Epa Niospa noko axosharapai noko ifixii.

<sup>3</sup> Nõkai mato afaa chaka yoipaima tsõa noko chakafayamanõfo. Akka nõ chaka niaito õikaki a Nios chanĩmara faamafãfe noko mekafatirofo. Nãskakẽ nõ afaa chakafapaima. <sup>4</sup> Akka mã nõ keyokõi Niosxõ aka keskara nõ mato õimamis nõmãi yonoxokatsaxakĩ. Noko omiskõimafiaifono nõ tenekõimis. Askatari fekaxteifinakõita nõ tenekõimis. Noko chakakõi famisfo, noko askafafiaifono nõ tenekõimis. <sup>5</sup> Nãskakaxõ noko koshamisfo, askatari karaxa mẽra noko ikimamisfo. Nãskatari yora chakafãfe noko noikasapakĩ fãsi noko mekafamisfo. Noko askafafiaino fekaxtekõiyanã nõ yonomis. Askatari nõ oxa tenekõimis. Nãskaxri nõ fonãikõimis. <sup>6-7</sup> Noko askafafiaifono afaa chakafatama nõko õiti mẽraxõ nõ afaa chaka shinãima. Nõ Cristo fe rafeaito mã noko yoimis keskara mã nõ tãpia. Noko chakafafiaifono nõ atoki õitifishkitama. Fena fenakima nõ tenekõimis. Nãskax fetsafo fe rafepaikĩ nõ ato sharafa fafãfãimis Niospa Yõshi Sharaõxõ nõ ato

askafamis ato p̄arakĩma nō ato noikōimis. Nō askakĩ keyokōi nō mato ōimatiro nōmāi Niospa yonomatixō. Satanás noko afara chakafamapafiaito Niospa Yōshi Sharapa nā Nios keskara shara noko imaino āfe Yōshi Sharaōxō nō afara chaka potatiro. <sup>8</sup> Akka fetsafāfe nokoōnoa meka shara yoifiaifono fetsafāferi nokoōnoa meka chaka yoimisfo. Akka fetsafāferi na yorafo sharakōira noko fafiaifono fetsafāferi noko ĩchamisfo. Nō chanĩmakōi yoifimiskē noko feparamisfo ixō nokoōnoa fetsafāfe yoimisfo. <sup>9</sup> “Pablo fe rafeakai tsoama. Nōkai ato ōimisma,” noko fafiaifono akka fetsafāfe Nios Ifofakōikaxō noko noikani. Nāskatari nō napafiax nō nia. Noko omiskōimafiakakĩ noko tsōa reteama. <sup>10</sup> Akka nō shināmitsafiaito nōko Ifo Niospa noko inimamamis. Akka afaamaisfixō nō Niosxō nō fetsafo imasharakōimis, Nios Ifo shara faifono. Nō afaamais keskarafix nō aya a Niospa noko ināi. Akka nā keyokōi Niosnā nōkonāri.

<sup>11</sup> Efe yora mīshtichi Corinto anoafāfe, nā nōko ōiti mēraxō nō shināi keskara nō mato yoimis. Nō mato fomāmisma. Keyokōi nōko shinā mēraxō nō shināi keskara nō mato yoimis mā tāpinō. <sup>12</sup> Akka nō mato noikaspamisma. Akka māroko noko noisharamisma. <sup>13</sup> Akka iskaratīa ē mato yoi āpa fake noisharakĩ yoitiro keskafakĩ, nokori noisharakāfe nā nō mato noiai keskafakĩ.

*Nā Nios chanĩmara faafāfema akaifo keskara ayamakāfe*

<sup>14</sup> Nā Jesús chanĩmara faafoma fe rafeyamakāfe. Akka na yora Nios Ifofaafāfe shināifo keskarakai nā yora chakafāfe shinākanima. Nāskarifiāi pena fe fakish osinātiroma. <sup>15</sup> Nāskarifiakĩ Cristo feta Satanás anoris shinātirofoma. Akka nā Cristo Ifofaafāfe fichipaiyaifo keskara nā Cristo Ifofaafāfema askara fichipaikanima. <sup>16</sup> Nā Cristo chanĩmara faafāfe ichanāmisfo Epa Nios kīfinōfo. Akka nā Ifofaafoma ato fe ichanātirofoma afara nimofa fakaxō kīfitirofo na nōko niosra ikaxō. Nāskakē nā rafe osinātiroma. Akka afāfekai Epa Nioskōi kīfipaikanima. Akka Epa Nios nō mēra ika. Nāskakē nō Niospa pexe keskara. Nōko Nios nia. Epa Niospa yoini iskafakĩ:

Ēfi ato fe ikikai, ato fe rafexikĩ. Ē āto Nios ikaino afo efe yora ikani, ixō yoini. <sup>17</sup> Askatari Epa Niospa yoini iskafakĩ:

Akka nā Cristo chanĩmara faamafāfe akaifo keskara ayamakāfe. Ato fe rafeyamakāfe afaa chakafaxikākima. Mā askaino ē mato ifikai, ixō yoini. <sup>18</sup> Askatari nā afama mīshti atiroto ato yoini iskafakĩ:

Akka ē mātō Epa ixii. Akka mā ēfe fakefo ixii, ixō nōko Ifo Niospa yoini.

## 7

<sup>1</sup> Ēfe yora mīshtichi, Epa Niospa nā noko yoiyoni keskara shara. Nāskakē nō isharanō keyokōichi nōko chaka nō xatenō. Afarafāfe nōko yora iyamai nōko ōiti mēraxō noko chakafamatiro nāfo nō xatekōinō sharakōi ixiki. Nō Epa Nios noikōiax a keskara shara nō ipai.

*Corinto anoxō chaka shināyopaonifo. Akka iskaratīa mā shara shinākani*

<sup>2</sup> Akka nā yora fisti keskara nō inō noko noisharakāfe. Nōkai mato chakafamismaki. Askatari nō mato afaa chakafamamisma, askatari nō mato pāramisma. <sup>3</sup> Ēkai nā ē mato yoiai keskafakĩ mekakĩ chakafakĩ ē mato yoimisma. Akka ē nayoxoma ē mato mēxotaima noikōifafāini. Nāskatari mē nafixō mēxotaima ē mato noikōixii. Nāskakē tsōa noko paxkanā fatiroma nā yora fisti keskarāmāi nō ikē. <sup>4</sup> Mā nō tāpikōia mā noko noikōiyanā, mā Jesús Ifo sharakōi fakē. Nāskakē nō yorafo yoimis mā isharakōimiskē. Nāskatari nō omiskōifi nō inimakōimis.

<sup>5</sup> Akka nā nō Macedonia ano nokoitatīa nō teneama, mēxotaima fanīma mīshtinoax fekaxteaifāfe ōi. Akka nō shināchakakōimis. Askatari a Nios Ifofaa fetsafori nō ato shinākōimis, mā nōko Ifo Jesús kachikiri faafora ixō. <sup>6</sup> Akka nā shināmitsaifo Niospa ato inimamamis. Nāskakēri nokoki Tito nīchiano nō inimakōimis. <sup>7</sup> Akka mā nokoki Tito nokoxō noko inimama noko yoia iskafakĩ: “Corinto anoafāfe ea inimamakōiafo,” ixō

Titopa noko yoia. Askara nõ nikai nõ inimakõia. Askatari noko yoia mã eõnoa yoikĩ iskafakĩ: “Nõ Pablo shinãkõi nokoki samamashta nokopainõ,” ixõ mã yoikẽ: “Nãskaxori nõko õitinĩ nõ shinã chanĩma nõ afara chakafamis. Akka nõkai anã askapaima. Nõ Pablo shinãi,” ixõ mã yoiaino Titopa ea yoia. Nã keskara nikai ẽ inimai finasharakõi.

<sup>8</sup> Akka ẽ mato kirika kenexõ manamakĩ ẽ mato shinãmitsamana. Nãskax ẽri shinãmitsakõiyoa. Akka anã ẽ shinãmitsaima. <sup>9</sup> Akka iskaratĩa ẽ inimakõi. Akka ẽ mato shinãmitsamanax ẽ inima. Akka mã shinãmitsayanã mã Epa Nios kĩfiti iskafakĩ: “Epa Niosi, nõ afara chakafakĩ noko raefafe nõ afara chakafamiski,” ixõ mã yoikĩ. Nãskakẽ ẽ inimasharakõimis. Mã askafaino Epa Niosri matoki inimasharakõi. Akka ẽ mato kirika kenexõ manamakĩ ẽ mato yoikĩ chakafaama. Askatamaroko ẽ mato yoisharakõia mato axosharayanã. <sup>10</sup> Akka nõ shinãkĩ iskafatiro: “Ooa, ẽ afara chakafakĩ, Niosri ẽ chakafaa,” ixõ shinãkĩ nõko chaka nõ xatepaitiro Epa Nios Ifofapaikĩ. Nõ askaito õikĩ Epa Niospa noko ifitiro nõ afe ãpaxanõ. Nãskaxõ nõ shinãtiroma iskafakĩ: “Ooa, ẽfe chaka ẽ xateama shara ẽ ikerana. Niosri ẽ Ifofaama ẽ shara ikerana,” ixõ anori nõ shinãtiroma. Akka nã chanĩmara faamafãfe nõ shinãi keskara shinãkanima. Iskafakĩ shinãmisfo: “Ooa, nõ afara chakafaa,” ixõ shinãkani ãto õiti mẽra shinãmitsakanima Nioskai shinãpaikanima. Nãskax nakanax Epa Nios fe ipanakafoma. <sup>11</sup> Akka mãkai askarama. Shinãkapo. Mã mãto õiti mẽraxõ mã mã shinã anã mã Nios Ifofai mãto chaka xatepaikĩ nã Niospa fichipaiyai keskafakĩ. Nãskax mã ratekõia Niospa keyokõi noko omiskõimaxira ikax. Nãskakẽ mã mã itipinĩkõia ika a afara chakafaifo ato omiskõimaxiki. Nãskaxõ mã fãsikõi ato yoia ãto chaka xatenõfo. Nãskakẽ mã mã noko isпамãkai ato keskarama. Nãskakẽ mã ea fichisharapaikõi ẽ mato õikanõ mã isharakõiyamãkĩ. <sup>12</sup> Akka ẽfe kirika kene fixõ mã ea noiyanã mã ea nikakõisharamis. Akka ẽ kirika keneama, nã feronãfãke afara chakafaaõnoa omiskõimakãfe ixõ. Askatari nã feronãfãke omiskõimanafoõnoari ẽ kirika keneama. Akka ẽ mato kirika kenexona mã tãpinõ mã ea noimãkai. Akka mã ea nikakõimis. Nãskaxõ mã tãpitiro mãmãi ea noikĩ Niospa ferotaifi.

<sup>13</sup> Nãskakẽ nõ inimasharakõi, mãmãi noko noisharakõiaino nikakõisharayanã. Akka Titori matoõnoax inimasharayamea. Nã Tito inimaito õi nõri inimaifinasharakõiyamea. <sup>14</sup> Akka Tito kayoamano ẽ yoiti iskafakĩ: “Na Corinto anoafõ sharakõifo,” ixõ ẽ yoiti. Nãskakẽ Tito mato mẽra kaano mã ifisharakõiyamea. Nãskakẽ ẽ matoõnoax rãfiyameama. Akka chanĩma fisti nõ mato yoimis. Nã ẽ matoõnoa Tito yoia keskara chanĩmakõi Titopa mato õia. <sup>15</sup> Tito matoki nokoxõ õia mã rateaito mato õita noko Titopa ferateneira ikax. Nãskakẽ pishta rateyanã mã Tito nikakõita. Nãskakẽ Titopa mato shinãkĩ, mato noikĩ finakõi. <sup>16</sup> Ẽri matoki inimakõi. Akka iskaratĩa mẽ tãpia nã ẽ mato yoiai keskara mã amiskẽ.

## 8

### *“Afarayaxõ fetsafõ inãsharakãfe,” ixõ Pablo Corinto anoafõ yoini*

<sup>1</sup> Akka meka fetsari ẽ mato yoinõ mã tãpinõ. Mã Epa Nios Macedonia anoxõ chanĩmara faafono Epa Niospa ato noikĩ ãto shinã mẽraxõ ato shinãmashara fetsafori kori inãsharakõinõfo. <sup>2</sup> Akka Macedonia anoax omiskõifikakĩ Niosnoax inimakõikakĩ, afaayayamafiakaxõ nã yora afaamaisfo ato afara fetsa inãsharakõiafo. <sup>3</sup> Akka nã ẽ õia keskara ẽ mato yoinõ. Fetsafãfe afaayayamafiakaxõ fetsafori ato afara ato inãsharakõiafo. Ato afaa fĩshkofafoma. Nãskakẽ atonã afaa ichapa nẽteama. <sup>4</sup> Iskafakĩ ea yoiafo ato inãsharapaikĩ: “Nã Jesús chanĩmara faa fetsafãfe kori yopakani. Nãskakẽ nõri ato afara fomasharapai,” ea faafõ. <sup>5</sup> Nõ shinãyamea kori fistis noko inãkanira ixõ, Jerusalén anoafõ a Nios Ifofaafõ ato foxopaikĩ. Akka noko kori inãyokaxoma taefakĩ Nios inãyameafõ, iskafakĩ yoianã: “Ifo, nõfi mefe yorakĩ nã mã noko afara amapaiyai keskara mã noko yoitiro,” ixõ yoiyameafõ. Nãnori yoikãta nokori yoiyameafõ iskafakakĩ Niospa fichipaiyai keskafakĩ: “Nõri nõ mato nikakõinõ,” ixõ noko yoiyameafõ. <sup>6</sup> Titopa

taefakī mato yoiyoni iskafakī: “Māto korifo ichafakāfe a afaamaisfo Jerusalén anoafō ato ināxikakī,” ixō mato yoiyoni. Nāskakē nō Tito yoiyamea iskafakī: “Nā mī yoimis keskafakī anā ato yoife nā afaamaisfo Jerusalén anoafō ato kori inānōfo. ‘Mā ato noikī mā ato kori inātiro,’ Corinto anoafō ato yoife,” ixō nō Tito yoiyamea. <sup>7</sup> Akka mā Jesús chanīmara fakī finakōiyanā mā Niospa meka mēstekōi yoimis, āfe meka tāpisharakōiyanā. Chanīmakōi mā Jesús yonoxosharakōiyanā mā noko noisharakōi. Nāskakē nā mā afarafo shara faa keskafakī nā afaamaisfori mā ato ināsharatiro. Niosxō mā ato noikōikī inimasharakōikai mā ato inātiro, fetsafo finōkōinīfōfā nā mā imis keskayanā.

<sup>8</sup> Akka ēakōi ē mato yoima nā afaamaisfo mā ato kori inānō. Akka ē tāpipai fetsafāfe ato kori ināpaiyai keskafakī māri ato ināpaimākai. Askayamakī māto meka fistichi mā yoiaraka nō ato ināira ixō. Akka askakīma mā ato noikōiyanā mā ato ināsharatiro. <sup>9</sup> Mā mā tāpia nōko Ifo Jesucristo nai mēranoax nāmā fotoyoamax afama mīshtifoya iyopaoni. Afaakai yopapaonima. Nāskafixō noko noikōikī āfe afama mīshtifo keyokōi potāferani. Nāskax nokoōnoax afaamais iyopaoni nō aōnoax isharapakexanō.

<sup>10</sup> Akka nā ē shināinoa ē mato yoinō mā tāpinō. Akka mā xinia fisti finōa māakai inimakōiyanā kori ichafaxō mā ato ināma. Akka taefakī nā afaamaisfo mā ato noikī mā ato kori ināpaikī mā fiyamea mā mekea ato chipo ināxiki. <sup>11</sup> Nāskakē inimakōikī mā kori ichafakī taefati keskafakī iskaratīari inimayanā ato ināsharakāfe anā afaa yopanōfoma. Nā mā ato ināpaiyaiti ato inākāfe. <sup>12</sup> Akka mā ato ināpaikī mā ato inātiro. Askatari mā afarayaxō mā ato ināsharaito Epa Niospa tāpia. Askatari mā afara ichapayaxoōma mā ato ināitori nāri Epa Niospa tāpia. Nāskakē inimakōi.

<sup>13-14</sup> Akka ē mato iskafakī yoima: “Ichapakōi ato inākāfe,” ixō ē mato yoima. “Askatari keyokōi mā ato ināx mā afayaima,” ixō ē mato yoima. Akka iskaratīa mā afara ichapaya. Nāskakē nā afara yopaifo mā ato inātiro. Akka māri afara yopaito nāfāfe afara ichapayakaxori matori inātirofo. Mā askai mā ranā mā kexenōnāsharax mā isharakōitiro afaa yopaxikima. <sup>15</sup> Akka kirika ano Niospa meka kenea iskai: “Akka nōko xinifo tsōa istomaxō a piaifo Niospa ato ināpaoni. Akka nā ichapa fiato texefapaonima. Akka nā ichapama fiatori afaa yopapaonima,” ixō kirika ano Niospa meka yōra keneni. Nāskakē yora fetsafo nō afara ināito, Niospari noko afara fetsafo noko inātiro nō afaa yopayamanō.

### *Tito fe rafeafo*

<sup>16</sup> Ē matoōnoa shinākōiai keskafakī Titopari āfe ōiti mēraxō mato shinākōi, Epa Niospa shināmanaino. Nāskakē nō Epa Nioski inimakī nō aicho fai. <sup>17</sup> Akka iskafakī nō yoiyamea: “Corinto anoafō anā ato ōitāfe ato yoisharaxikī,” ixō nō Tito yoiyamea. Nānori nō yoiano inimayamea. “Aicho, ē ato ari kaikai ē ato yoisharai kaikai,” ixō noko yoiyamea. Akka ē shināi nō yoiai fistiōnoax kaima. Āari matoki kasharapai kai. <sup>18</sup> Akka nā nofeta Nios Ifofamis fetsa nō Titoya nīchi. Nā nofe yora, nāatori Jesúsnoa ato yoisharamis. Nāskakē aōnoa keyokōichi meka shara yoimisfo. <sup>19</sup> Akka nā Nios chanīmara faafo tiito ichanākaxō na feronāfake katonifo, nofeta nā kori yopaifo foxōikanō. Nios shinākī na kori nō ato ināyanā nōko Ifo sharara fanōfo. Askatari nō mato feta nō ato ināpai tāpinōfo nō ato axosharapai.

<sup>20-21</sup> Nā afaamaisfo nō ato kori foxosharapai. Nāskakē yorafāfe ferotaifi nō ato ōimasharapai noko chakafakī mekafayamanōfo. Na kori ichapa nō ato foxosharapai noko iskafanōfoma: “Nōko kori ranāri oneafō,” noko fanōfoma. Nāskakē nōko Ifāfe ferotaifi nā yorafāfe ferotaifiri nō ato ōimapai nō isharakōixō.

<sup>22</sup> Akka nā nofe yora nā Jesús Ifofamis fetsa Tito yafi nō mato nīchi. Nā feronāfake mā nō ōimis nāato Jesús chanīmara fakōimis. Nofeta Jesús yonoxosharakōimis. Akka nāato mato nikamis mā Jesús Ifofasharakōixō nā afaamaisfo mā ato ināsharakōiaito. Nāskakē mato ari kapaimis mato feta ato shara faxiki. <sup>23</sup> Akka mā mā Tito ōimiski. Nāato efeta



mato yonoxosharamiski. Nã efe rafemis Jesús yonosharaxoxiki. Nã Jesús chanĩmara faafo raferi afe mato ari fokani. Akka nã Jesús chanĩmara faafãfe ichanãkaxõ ato katonifo mato ari fonõfo. Nã rafeta Nios Ifofasharakõimisfo. Nãskakẽ ato katonifo mato ari fonõfo. <sup>24</sup> Akka mato ari nokofaifãfe ato ifisharakõikãfe nã Nios Ifofafo ato katonifo ato tãpinõfo mã ato ifisharaito. Mã ato askafaino nã ã matoõnoa yoisharamis keskara tãpitirofo chanĩmakõikẽ.

## 9

*Nã Nios Ifofaafãfe Corinto anoafõ feta Macedonia anoxõ nã Nios Ifofaa fetsafori ato kori manamanifo*

<sup>1-2</sup> Akka nono Macedonia anoxõ ã kirika kenexõ ã mato fomakĩ ã mato yoikĩ iskafapaima: “Ato kori fomakãfe,” ixõ ã mato yoipaima. Akka mẽ tãpia mã xinia fisti aka nã Jesús chanĩmara faa fetsafãfe afara yopaifãfe mã ato inãpaiyaito. Akka ã Macedonia anoafõ ã yoikĩ iskafaa: “Acaya anoxori ato kori fomapaikani Judea anoafõ,” ixõ ã yoia. ã ato askafaito nikakaxõ akairi ato kori fomasharapaikani. <sup>3</sup> Nãskakẽ ã Tito yafi nã afe rafeafo ã matoki nĩchi nã ã matoõnoa yoisharai keskara chanĩmakõikẽ tãpinõfo. ã Macedonia anoafõ ato yoimis iskafakĩ: “Nã Corinto anoafãfe mã itipinĩshara faafo ato kori fomaxikakĩ,” ixõ ã ato yoia. Akka ã Tito yafi a afe rafeafo ã nĩchi mato ano nokokaxõ õinõfo nã ã matoõnoa ato yoia keskara chanĩmamãkĩ. <sup>4</sup> Akka Macedonia anoafori efe foaifono ã ato fe mato ano nokoxõ õia mã kori ichafayamano ã mãto rãfiaino mãri mã rãfipaitiro. <sup>5</sup> Nãskakẽ ã shinã Tito yafi afe rafeafo rekẽ mato ari nĩchixiki mato feta kori itipinĩfanõfo ato fomaxikakĩ nã afaamaisfo. Akka afetiama mã mã shinãxõ yoiyoni: “Nã afaamaisfo nõ ato kori fomanõ,” ixõ. Akka ã mato yoia: “Ato kori inãkãfe,” ixõ. Mãakõĩ mã ato inãĩ. Akka nãskara shara mã ato inãpaiki mã ato inãtiro.

<sup>6</sup> Nãskakẽ shinãsharakãfe. Akka nõ fimi exe fisti fanaxõ ichapa fitiroma. Akka nõ fimi exe ichapa fanano nõ fimi exe ichapa fitiro. Nãskarifiakĩ nõ fetsafo afara ichapama inãkẽ nokori Niospa ichapama inãxii. Akka nõ inimayanã fetsafo ichapa inãito nokori Niospa ichapa inãtiro. <sup>7</sup> Nã ãto shinã mẽraxõ shinãifo keskafakĩ fetsafo inãtirofo. Nãskakẽ iskafakĩ shinãtirofoma: “Ooa, ã ichapama inãpaifaito ea yõkarifaito ã inã.” Askatari iskafakĩ shinãtirofoma: “Akka ã inãyamaino ekeki õitifishkitiro. Akka ã inãĩ ekeki õitifishkiyamanõ,” ixõ anori shinãyamakãfe. Askatamaroko inimayanã inãkãfe. Nã fetsafo ato afara inãĩ inimamis nã Niospa noikõĩ. <sup>8</sup> Akka nã mã fichipaiyai tii keyokõĩ Niospa mato inãtiro afara sharafo fetsa fetsatapafo mã afaa yopanõma. Askatari nã afara yopaifo mã ato inãno, Niospa keyokõĩ tãpia mato sharafa fafafaĩtiro mãri fetsafo shara fanõ. <sup>9</sup> Niospa meka aõnoax kirikaki kenea iskai:

Feronãfake sharapa nã afaamaisfo afara ichapa ato inãsharamis. Nãskakẽ Epa Niospa nã feronãfake axosharaino mẽxotaima ato afara inãsharatiro, ixõ kenenĩ. <sup>10</sup> Niospa fimi exefo onifani. Nãskakẽ nõ fimi exe fanatiro. Chipõ Niospa ãfe fanafo foaimasharaxotiro pisharanõ. Nãskarifiakĩ mã afara yopaito Niospa mato inãsharatiro. Afara ichapakõĩ mato inãno mã inimayanã nã Nios Ifofafo Jerusalén anoafõ mã inãsharafafaĩtiro. <sup>11</sup> Chanĩma, Niospa mato afaa fĩshkoima afara ichapa mato inãĩ mãri ato afara ichapa inãno. Akka nã afara yopaifo mã ato inãĩ nãfo nõ ato foxoxii. Nãskakẽ inimayanã yoixikani iskafakĩ: “Aicho Epa Niosi, mã fãsi sharakõĩ,” ixõ yoixikani. <sup>12</sup> Akka mã ato afara inãsharaino nã afaamaisfãfe fixikani. Nãskakẽ mã fikaxõ inimayanã Epa Nios yoixikani iskafakakĩ: “Aicho Epa Niosi, mã noko shara famis,” ixõ yoixikani. <sup>13</sup> Mã ato afara inãsharano nã afaamaisfo inimakõixikani mã ato inãsharano. Nãskakẽ yoikĩ iskafaxikani: “Aicho Epa Niosi, nã noko afara inãifãfe mã meka nikasharakõimisfo. Jesús nõko Ifo mia famisfo. Mã ato yoia keskafakĩ noko inãsharafo. Fetsafori nãfãfe afara ato inãsharafo. Nãskakẽ mã nõ ato tãpikõia chanĩmakõĩ mã Fake Jesús ãto Ifokõĩ,” ixõ nã afaamaisfãfe yoixikani. <sup>14</sup> Nãskakẽ mato Epa Nios kĩfixoxikani. Mã Niosxõ ato

afara ināsharakē, yoikī iskafaxikani: “Epa Niosi, mīōxō na yorafāfe noko afara ināsharāfo. Aicho Epa, nō ato fāsi noikōi. Atori shara fafe,” ixō mato Epa Nios kīfixoxikani. <sup>15</sup> Aicho Epa Niosi, mī Fake Jesucristo mī noko ināsharakōini nofe rafesharapakexanō. Nāfi sharafinakōiakī aōnoa nō yoisharapaikōi nōkai tāpiama afeskaxomāi nō yoisharakōinō.

## 10

*“Niospa ea nīchini Jesúsnoa ē mato yoinō” ixō Pablo ato yoini*

<sup>1</sup> Iskaratīari meka fetsari ē mato yoisharapai. Efe yora mīshtichi, ea nikasharakāfe. Jesucristokai meka mitsisipato noko yoimisma. Noko yoikī fenāmāshta noko yoisharamis nō āfe meka nikasharakōinō. Nāskarifiakī ēri Cristoōxō mato fenāmāshta yoisharapai mā tāpinō. Akka eōnoa yoikī iskafamisfo: “Pablo nofe ixō fenāmāshta noko yoiāito nō ōimis. Nāskafixō noko kirika kenexoni mitsisipakai noko kirika kenexonaito nō ōimis,” ixō ea yoimisfo. <sup>2</sup> Ē matoki nokoxō fāsi mekakai ē ato yoipaima ea nikanōfo. Askafixō ea nikayamafiaifono fāsi kerexkai ē ato yoitiro. Akka nā ea chakafakakī mekaiffo ato nikayamakāfe. Akka eōnoa yoi iskafamisfo āa chanīkani iskakani: “Pablo noko yoi nā Nios Ifofaamafāfe yoiāifo keskara. Niospa shināōxōkai noko yoima,” ixō yoimisfo. Akka ē matoki nokoxō ē mato yoitiro nā Nios Ifofaamafāfe shināifo keskara ē mato yoimisma. Niospa shināi keskara fisti ē mato yoimis. Akka mē nokoxō fāsi mekakai ē ato yoixii tāpinōfo. <sup>3</sup> Chanīma, nono mai ano nō ika nā Nios Ifofaafoma fe. Akka nā Nios chanīmara faamafāfe fetsafo finōpaiyaifo keskai nōkai askamisma nā noko noikaspaifo ato finōxiki. <sup>4</sup> Akka a Nios Ifofaafoma a Satanās nikakī mato chanīkī tāpimapaikani mā anā Jesús Ifofayamanō. Mato pārapaikani. “Nō Nios Ifofara,” ikani. Askatamaroko nō Nios nikakī nō mēxotaima yoimis chanīmakōi. Nāskaxō Nios āfe sharaōxō nō ato xatematiro afara chaka anā yoiyamanōfo. <sup>5</sup> Epa Niospa noko yoiaino nō fetsafo tāpimatiro āa chanīaifo, “Nō Niospa meka tāpisharakōiakī,” ikanaifo, kakapaiyaifo. Akka nō Niospa sharaōxō fetsafo nō ato tāpimatiro nā chanīmisfo Niospa meka tāpisharafoma. Shara shināfoma. Epa Nios Ifofaima. Niosxō nō ato yoimis Nios Ifofanōfo. <sup>6</sup> Akka ea Jesús nīchini āfe meka ē mato yoinō. Nāskakē mā Jesús yafi ea nikakōixō mā anā afaa chakafayamaino ē mato afeskafatiroma. Akka mā noko nikakaspaito ē mato omiskōimatiro.

<sup>7</sup> Akka mā ōikī shināi oa shara keskaraxō fetsafāfe yoiāifono iskafakī: “Cristo ea nīchini āfe meka ē mato yoinō. Akka Pablokai ea keskarama,” ixō mato yoimisfo. Akka nāfāfe shināsharakaxō tāpitirofo eari Cristo nīchinikē āfe meka shara ē mato yoinō. <sup>8</sup> Nōko Ifo Jesús ea yoimis keskara ē mato yoitiro. Mato afaa chakafamatama nōko Ifo ē mato Ifofamasharapai mato ōiti fēpeaxosharaxiki. Ē anori mato yoi ēa kakapaitama, ēroko mato yoisharapai. Ē anori mato yoikai ē rāfima. <sup>9</sup> Akka ē mato kirika kenexō ē mato ratepaima mā mesenōma. <sup>10</sup> Akka fetsafāferi eōnoa yoikī iskafamisfo: “Pablo noko kirika kenexokī noko feratekōiāito nō ōimis. Akka askafiax nofe ikē nō ōia afaamakōi nō ōimis. Āfe mekakai mitsisipama,” ixō eōnoa yoimisfo. <sup>11</sup> Nānori eōnoa yoifimisfono ē mato ari samama kaxō ē ato tāpimaxii. Nā ē mato kenexona keskafakī nānorikōi ē mato yoixii.

<sup>12</sup> Fetsafāfe mato yoimisfo iskafakī: “Nōfi afara tāpikōiakī nō mato tāpimasharakōitiro,” ixō mato yoimisfo. Nāskarafo ichanākanax āa ranā yoinākani iskakani: “Noko keskarakai tsoama. Nores fisti nō tāpisharakōia,” ikanax kakapaimisfo. Nāfo tatimakōifo afaakai tāpiafoma. Nāskakaxō nāfāfe anorima afara chaka yoimisfo. Akka ēkai ato keskarax ē sharakōi ē itiroma ēroko ato keskarax. <sup>13</sup> Akka nōkai anori yoipaitiroma. Nā Niospa noko yoiāi keskara fisti nō mato yoitiro. Noko yoini āfe meka shara fisti nō mato yoinō. Nā fisti nō mato yoimis. Akka mā ika nā Niospa ea nīchini ano. Akka ē kani Corinto anoxō mato Niospa meka tāpimaxiki. <sup>14</sup> Nāskakē ori fetsa ari ē kanima, nā ea nīchini ano ē kani. Akka nā nō mato yoiāi keskara chanīmakōi. Nōkai kakapaimisma. Nā Niospa noko yoiāi keskara fisti nō mato yoitiro. Akka nō mato Niospa meka yoikī taefatani Jesucristoōnoa

meka shara mā nikamiskēma. <sup>15</sup> Akka nā ē kamisma anoxō fetsafāfe ato yoiafono nō ato yoia ixō nō ato yoimisma. Akka nō mato yoi nā nō mato afara axosharamis fistiōnoa. Akka nā fetsafāfe mato axomisfoōnoa nō yoimisma. Akka mā mā Jesús nikasharai. Nāskapainō. Mēxotaima mā nikasharakōifafāinō. Akka mā ea ifisharakōiano mēxotaima ē mato yoisharatiro nā Niospa fichipaiyai keskafakī. <sup>16</sup> Nāskakē mai fetsa ari chaikōi mato finōfāi ē kapai Jesúsnoa ato yoixiki nā Niospa meka nikamifoma ari. Akka nārixō mā fetsafāfe ato yoiafono nō ato yoia, nō ipaima fetsafo imis keskai. Nōkai fetsafo ato yono xītikapaima. <sup>17</sup> Akka kirika ano Niospa meka kenea isakai: “Akka tsōakai āa yoimesharatiroma isakai ē afama mīshti tāpikōiakī ikax āa kakapaitiroma. Askatamaroko nō yoisharatiro nā afara sharafo nōko Ifāfe aka,” ixō kirika ano yōra keneni. <sup>18</sup> Akka fetsa āa yoimesharai akai afaama. Akikikai Nios inimatiroma. Akka Niospa fetsa na feronāfake sharakōi faax akiki inimakōitiro.

## 11

*Pablo ato yōani āa chanīkani noko Niospa nīchiaki nō Niospa meka mato yoinō imisfoōnoa*

<sup>1</sup> Iskaratīa ē mato yoinō, nā yora shināsharayamaito yoiai keskara nānorikōi ē mato yoifikīkai askarakōi ē mato yoima. Nā mā ea nikamis keskafakī iskaratīa ea nikasharakāfe. <sup>2</sup> Feronāfāke kēroyapaikī āfe apa yōkatiro, nā kēro fixiki āfe āfi inō. Nāskakē apa āfe fake xotofake kexesharatiro feronāfake fetsa fe oxayamanō. Nāskax mā fianākanax fene fes fianātirofo feronāfake fetsafekairoko oxakatsaxakī. Nāskarifiakī ē mato Nios Ifofamakī ē mato kexesharani. Nāskaramāi Epa Niospa fichipaiyaino. Nāskakē mēxotaima ē mato kexesharai mā fetsafo nā chanīmisfo mā ato nikayamanō. Nāskakē mā nai mēra Nios ano kaax Cristo afe yorakōi mā ixii. <sup>3</sup> Nāskakē ē shināchakakōi Satanās Eva ani keskafakī fetsafāfe matori pārayamanōfo, mato pāraifono mā anā Cristo noinōma. <sup>4</sup> Ooa. Fetsafāfe mato pārapaikani. Nō Jesúsnoa mato yoimis keskara anori mato yoikōiyamafiaifono māakai ato xatematama mā ato chanīmara fai. Nō Niospa Yōshi Sharaōxō meka shara Jesúsnoa nō mato yoimis keskara anorikai afāfe yoikanima. Jesúsnoa anorima mato yoifiaifono mā ato xatemanama. Mā ato nikayanā mā yoimis iskafakī: “Aicho, mā nofe isharpainō,” ixō mā ato yoimis. <sup>5</sup> Akka mā shināi nāfāfe Niospa meka yoisharakōimisfora ixō. Akka askafikaxō ea finōfafoma. <sup>6</sup> Akka, ¿mā shināimē ē yoisharatiroma? Akka ē Niospa meka tāpisharakōia. Nā ē mato yoiai anori mēstekōi. Mā mā ea tāpikōia ē mato Niospa meka xafakīakōi yoimis. Nā keskara ē mato ōimafafāini.

<sup>7</sup> Nā ē mato Niospa meka yoimis chāikai ē mato afaa yōkamisma. Ēkai mato afaa fīamisma, koriri ē mato yōkamisma. Ōitsai, ē mato chakafairaka ē mato kori fīakīma. Akka ē Niospa meka shara Jesúsnoa ē mato yoimis Niospa fakefo mā inō. Ē mato askafai afaamais keskara ē imis mā Niospa meka tāpisharakōinō. <sup>8</sup> Akka ē mato fe ikano nā Nios chanīmara faa fetsafāfe ea kori inānifo aō nā ē fichipaiyai keskara ē finō. Ōitsai, ē atoki yometsoa keskararaka nā kori fii mato Niospa meka yoi, ē mato yonoxomis keskaraxō. <sup>9</sup> Ē mato fe imis chāikai ē afara yopafikī ē mato fekaxtefamisma. Akka Macedonia anoafāfe Nios chanīmara faafo fēkaxō ea afarafo inānifo. Akka ē mato fe imis chāikai ē tsoa afaa yōkamisma. Askatari ē tsoa afaa yōkapakenakama. <sup>10</sup> Cristo āfe meka chanīmakōi. Nāskarari nā ē mato yoiairi chanīmakōi. Nāskakē Acaya mai anoxō nā ē mato yoiai keskara ea tsōa xatematiroma. <sup>11</sup> Ē mato anori yoikī, ¿ē mato noimamē? Maa. Anorikaima Niospa tāpikōia ē mato noikōi.

<sup>12</sup> Nā ē mato yonoxomis chāi ē mato afaa fīapaimisma. Iskaratīari ē mato afaa yōkaima. Nāskaxos ē mato yonoxoni nā chanīmisfo mā anā ato chanīmara fanōma. Nā ē yonoaito ōikaxō fetsafāfe yoimisfo iskakakī: “Nōri Pablo yonoai keskafakī nō yonoi,” ifiakaxō afāfekai ē yonoai keskafakī tsōa yonomisma. <sup>13</sup> Akka nāfo chanīmisfo. Ē ikai keskara ipaifikani tsoa askakōimisma. “Cristo noko nīchia aōnoa āfe meka nō mato yoinō,” ixō

mato yoifikani afokai Cristo fe rafemisfoma. <sup>14</sup> Chanĩma, Satanás nokoki nokotiro nã Niospa ãfe ãjiri fafeai õitsa. Nãskarato noko yoitiro iskafakĩ: “Èfi mato xafakĩa yoikai,” ixõ noko feparapaitiro. <sup>15</sup> Akka nã Satanás yonoxomisfori nã keskara itirofo. “Nõri nõ Nios yonosharaxomis,” ixõ noko pãrapaikani. Nãskafãfe õikĩ Niospa ato omiskõimakĩ finakõixii. Nãskakẽ nãfãfe afara chakafakanax omiskõipakenakafo.

*Pablo omiskõini Niospa meka yoikatsaxakĩ*

<sup>16</sup> È mato yoia keskara anã ã mato yoinõ: “Pablo afaa tãpiama,” ixõ eõnoa shinãyamakãfe. Akka ea nikapaikĩ ea nikayokãfe. Nã yora fetsa afaa tãpiama mã nikamis keskafakĩ eari nikasharayokãfe. Èari ã pishta yoimeyonõ. <sup>17</sup> Nã ã mato yoiai keskara a ãa ã yoimesharai ãfe Ifãfe ea anori yoiaama. Akka nã afaa tãpiamafãfe anori yoimisfo. <sup>18</sup> Akka nã nõko Ifo chanĩmara faafoma ãa yoimesharaifo keskara nãnori fetsafãfe mato yoimisfo. Akka iskaratĩari ã mato yoi a ãari ã yoimesharai keskara. <sup>19</sup> Akka mã shinãi mã tãpikõia. Nãskaxõ nã afaa tãpiamafo mã ato nikamis. Akka afeskakĩ mato anorima yoifiaifono mã ato xatemamisma. <sup>20</sup> Mato yoimisfo ãto yonomati keskarakõi mato fakaxõ, askatari mato kaxpa yonomamisfo. Nãskatari mato pãramisfo, askatari mato chakafamisfo, askatari mato ãchamisfo. Mato askafaifono mã tenekõimis. <sup>21</sup> Mato askafakakĩ shinãkaniraka nõ mitsisipakõira ikaxõ. Ooa. Nõkai mitsisipama oa ato akaifo keskafakĩ nõri mato askafapanã. Akka nõkai mato askafamisma nõkairoko ato keskaraxõ.

Akka nãfo ãa yoimesharakakĩ mato afara yoimisfo keskafakĩ ãari ã yoimesharatiro. Ooa. Nã afaa tãpiamafo keskaraxõ anã ã mato yoi. <sup>22</sup> Akka nãfo, “Nõ hebreos yorafo,” ikani. Akka ãri hebreo yora. Askatari, “Nõ israeli yorafo,” ikani. Akka ãri israeli yora. Askatari, “Nõ Abraham ãfe fena,” ikani. Akka ãri Abraham ãfe fena. <sup>23</sup> Akka, ¿nãfo fistimẽ Jesucristo yonoxomisfo? Maa. Akka ãroko yonoxokĩ finakõimis. Ooa. È iskafakĩ ã mato yoi oa shinãsharayamaito yoiai keskaraxõ ã mekai askayamapaifi. Akka nã chanĩmisfãfe mato yoikĩ iskafakani: “Nõ Jesús yonoxokõimis. Askatari Jesúsxõ noko karaxa mẽra ikimanafo,” imisfo. Akka ãroko yonokĩ finakõimis. Nãskakẽ earoko karaxa mẽra ikimakĩ finakõimisfo. Askatari ea koshakĩ finakõimisfo. Ea askafakĩ fetsaifono mã nakerakõimis. <sup>24</sup> Efe yora judeofãfe ea koshakakĩ cinco veces fakĩ ea koshamisfo. Nã ea koshaifo tii treinta y nueve ea famisfo. <sup>25</sup> Romano xanĩfofõfãferi ãto chãti ea koshanifo tres veces fakĩ. Askatari ãfe kaifãferi tokirifãfe ea tsakakĩ fisti fanifo. Askatari kanõanãfãne ã pokofainaino kanõanãfã fakafã fospia ikiaino mã ãsakerani. Mã kanõanãfã fakafã mẽra ikiano nã kanõanãfã ãfe kaxke ã fakafã mãnão ã nononi ãsaxikima. Fakish fisti ita pena fistiri ã ini. <sup>26</sup> Mẽ kafãsamis, faka faiyaito mesekõi ã õimis; askatari yometsoafãfe ea achikaxõ ea mesenifaifono mã õimis; askatari ãfe kaifokõifãfe ea mesenifaifono mã õimis; yora fetsafãferi ea mesenifaifono mã õimis; pexefã rasi anoxori ea mesenifaifono mã õimis; tsõa istomaxori ea mesenifaifono mã õimis; fakafã anoari mesekõi mã õimis; “Nõri Nios Ifo sharakõifamis,” ikax a chanĩmisfãfe ea mesenifaifonori mã õimis. <sup>27</sup> È omiskõiyanã ã yonomis xokenãkõiyanã; askatari ã oxa tenekõimis; askatari ã fonãiyanã nomi tenekõimis; askatari ã pimisma; askatari matsi mei ã omiskõikõimis rapatimais ikax.

<sup>28</sup> Nãskarafo ã mei ã omiskõikõimis. Askatari afara fetsafoõnoaxri ã omiskõimis. Askatari mẽxotaima ã mato shinãkõimis nã mã ichanãxõ keyokõichi mã nõko Ifo Jesús Ifofamis tii mã kachikiri fayamanõ. <sup>29</sup> Akka ã nika fẽtsa Jesús Ifofasharapaifi rateaino ã aõxõ shinãchakakõitiro. Akka fẽtsa a Nios Ifofaa afara chakafamakẽ ã akiki õitifishkikĩ rãfikõitiro. <sup>30</sup> Akka nã ã mato rama yoiai keskara kakapaikĩ ã mato yoima. È mato yoi mã tãpinõ ãa ã afaa atiroma. <sup>31</sup> Nã Nios fisti nõko Ifo Jesucristo ãfe Apa, nãato tãpikõia ãkai chanĩmisma. Iskafakĩ nõ yoinõ: “Epa Niospa, mã sharafinakõia,” ixõ nõ yoipakexanõ. <sup>32</sup> Akka Aritas xanĩfokõi iyopaoni. Nã Aritas fetsa nĩchini Damasco anoax xanĩfo inõ. Damasco ano ã ikano, nãato ãfe sorarofõ yoini nã pexe rasi anoxõ ãfe kãiti anoxõ ea

kexenõfo ea achixikakĩ. <sup>33</sup> Akka anoxõ ea achipaiyaifono, nã nõko Ifo Jesús Ifofaafãfe fêta efapa mêra ea onekaxõ pexe rasi kene fomãkĩaxõ ea fotomanifo ã katanõ.

## 12

### *Pablo ãfe namapa õiai keskara õini Niospa tãpimanaino*

<sup>1</sup> Akka ãa ã yoimesharai. A ãa ã yoimesharai keskarakai akai afaama. Nãskafekẽ nõko Ifo Jesús ea õimana keskara ã mato yoinõ. Nã ãfe namapa ã õiai keskara ea õimana. Nã tsõa nikamisma ea tãpimani. Nãnori ã mato yoi. <sup>2</sup> Mã catorce xinia finõa a Niospa ea ifirisafayoni, ã Cristo fe rafeaito õikĩ. Ëkai tãpiama ãfe fero mẽsho fisti nai mêra kani rakikĩa, askayamai ãfe yora kani rakikĩa. Nios fistichi tãpia a ã ini keskara. <sup>3-4</sup> Niospa nã ika ano ea ifirisafayoni. Nã ã mato yoiyoa keskara anã ã mato yoi. Ëfe yora iyamai ãfe fero mẽsho fisti kani rakikĩa ãkai tãpiama. Nios fistichi tãpia nã ã ini keskara. Nã ika anoxõ ea afara nikamani keskara ã tsoa yoitiroma. Akka ea yoikĩ iskafani: “A mĩ nika keskara tsoa yoiyamafe,” ixõ ea Niospa yoini. <sup>5</sup> Ë nã õia keskara ã fetsafo yoipaima iskafakĩ: “Niospa ea fisti nã ika ari ea õimani,” ixõ ã yoitiroma. Ë anori yoipaima. Anori ã yoi kakapaimis ã itiro. Ëkai ãa ã yoimesharapaima. Ereskai ã afaa fatiroma. Nãskakẽ nã fisti ã yoimis inimakĩ. <sup>6</sup> Akka ãa ã yoimesharai ã yoimetiro. Ë anori yoi nã yora afaa tãpimafãfe yoimisfo keskara ã yoima. Chanĩmakõi eõnoa ã yoimesharatiro. Akka ãkai eõnoa ã yoimesharapaima eõnoa shinãkĩ finakõinõfoma. Mã ea õimis ã afe keskaramãkĩ, askatari mã ea nikamis ã afe keskara yoimismãkĩ.

<sup>7</sup> Akka Epa Niospa a ika ari ea õimani keskara tsõa õimisma. Akka Niospa ea õimaniõnoax ãa ã yoimesharapaitiro ã tãpikõiara ikax. Nãskakẽ Niospa nẽtefayamano Satanás ea isinĩ imani nã nõ moxaki chachiano noko mõxa fekaxtefaĩ keskafakĩ ãa ã yoimesharayamanõ. <sup>8</sup> Nãskakẽ ã kĩfikĩ iskafani: “Ifo, ea sharafafe,” ixõ tres ves fakĩ ã yõkani. <sup>9</sup> Ë askafaito nõko Ifãfe ea kemakĩ iskafani: “Ë mia noi. Askafixõ ã mia sharafaima. Cristo mia axotiro na pae mĩ tenenõ ã mefe rafekakaini. Mĩ mitsisipayamafikẽ ã mĩõxõ ã ato õimatiro ã afama mĩshti fatiro,” ixõ ea kemani. Nãskakẽ ã isinĩ ifiai ã inimasharakakaini. <sup>10</sup> Nãskakẽ ã mitsisipayamafix Jesucristoõnoax ã inimakõi. Nãskaxõ ea ãchaifono ã tenemis, afaayayamaxri ã inimakõimis ea omiskõimanaifonori ã tenemis. Nãskatari afarafo fekaxkõifekẽ ã tenemis. Ë askafakĩ ã mitsisipayamafixõ Jesucristoõxõ ã afama mĩshti fatiro.

### *Pablo nã Nios chanĩmara faafo Corinto anoafõ ato shinãkõini*

<sup>11</sup> Akka nã yora afaa tãpimafõ ãa yoimetirofo keskarax ãa ã yoimea. Akka mã eõnoa afaa yoisharama. Akka mã ea õisharakĩ, “Nã Pablo sharakõi,” ixõ mã eõnoa yoiano nã sharakõi ikerana. Nãskakẽ ãa ã yoimesharakõi fetsafãfe ea tãpinõfo ã afe keskaramãki. Akka ãkai ã afaa asharatiroma. Ëkai afaama. Nãskafekẽ nã eõnoa afara chaka mato yoimisfãfe ea finõkanima. <sup>12</sup> Jesucristo ea nĩchini aõxõ ãfe meka ã mato yoinõ. Nãskakẽ tanaimakõi ã yonomis fena fenakima. Nãskara ã yonofaino Niospa afama mĩshti amis eõxõ mã tãpinõ Jesucristo ea nĩchinikẽ. <sup>13</sup> Akka, ¿afeskakĩ mã iskafakĩ shinãimẽ? “Pablo nã Nios chanĩmara faa fetsafo ato shara fai keskafakĩ nokori shara faima,” ixõ mã eõnoa yoitiroma. Akka nã Nios chanĩmara faa fetsafori ã ato shara fai keskafakĩ, nãskarifikĩ ã mato sharafa fafãfãini. Ëkai mato afaa fĩapaimisma. Askatari ã mato fekaxtefamisma. Ea pimakape ea rapati safemayanã ã mato famisma. Õitsai, ã mato afaa fĩapaikima ã mato chakafaamakĩ ea raefakãfe.

<sup>14</sup> Mẽ mato ari kai rafea. Akka iskaratĩa mẽ itipinĩsharax anã ã mato ari kai. Ë mato amis keskafakĩ anã ã mato yõkakĩ fekaxtefaima. Ë mato afaa fĩapaitama ãroko mato shinãfãfãini. Shinãkapo. Fakefãfekai apa yafi afa pimatiro. Akka afa fetaroko apa fakefo pimatiro. Akka mãfi ãfe fakekõifo keskarakĩ. Akka ã mato Niospa meka tãpimasharakõia eõnoax mã isharanõ. <sup>15</sup> Akka ã afarafo fikĩ mẽ kori potakĩ keyokõia,

askafafixō ē shināchakaima, askatari ēakōi ē ināmei mā Niosnoax isharakōinō. Akka ē mato noikī finasharakōifianokai ōitsai mā ea noikī finasharakōimisma rakikīa.

<sup>16</sup> Akka ē mato afaa yōkamisma. Akka fetsafāfe mā Corinto anoafāfe eōnoa yoimisfo iskafakakī: “Akka mā nō tāpia Pablo mato afaa yōkamisma. Askafixō mato pāraxō mato kori fīamis, Judea anoafō ē ato foxotanōra,” ixō. <sup>17</sup> ¿Nā feronāfakefo ē matoki nīchinioxō ē mato pāramē ē mato kori fīaxiki? Maa. <sup>18</sup> Ē Tito yoini iskafakī: “Corinto ano katāfe,” ixō ē yoini. Nā nōko Ifo chanīmara faa fetsafori ē matoki nīchini. Akka, ¿Titopa mato pāramē mato afara fīaxiki? Maa. Mē tāpia Titopakai mato afaa fīapaimisma. Nā ē mato fe imis keskai ari mato fe imis. Noko rafeta nō mato yoimis. Nāskara fisti nō mato afara shara faxopai noko rafe nō mato fe imis.

<sup>19</sup> Mā shināiraka ē mato yoiai keskara mā eōnoa shināsharanō. Maa. Anorikaima. Epa Niospa nā ē yoiai keskara ea nikamis Cristo ea shināmanaino. Efe yora mīshtichi, nā ē mato yoiai keskafakī ē mato shara fapai Jesús shināi keskafakī māri mā shināsharanō.

<sup>20</sup> Akka ē tāpiama, ōitsai, ē ari nokoxō ōia a ē yoiai keskai mā isharayamakē ē mato fichikai. Askatari ē matoki nokoaino ōitsai, mā ekeki inimaima rakikīa nā mā shināi keskai. Akka ē matoki nokoxō ōipai mā mā chaka xatexō mā Jesús Ifofasharaino. Akka ē matoki nokoxō ōia mā chaka xateyamano ē shināmitsatiro. Mā fochishpanā faatanāta, fētsa fiaiti mārifi mā fīpaita, fetsa mekafata, ōitifishkita, mares fisti mā fīpaita, mā chanīta, fetsafo mekafata, nō tsoa keskarama ita, isharayamata, mā askaito ē mato ōipaima.

<sup>21</sup> Nāskatari ē shināchakakōi, shināyanā ōitsai Niospa atoōxō ea rāfimaniraka ixō ē shināi mā isharayamaino. Mā askaino ē matoki nokoax ē rāfikōixii mā afara chakafaino. Akka ranāri mā isharapaonima. Māto āfima fe mā oxapaoni. Askatari kērofori āto fenema fe oxapaonifo. Nāskatari afara chakafo fetsa fetsatapafo mā apaoni. Akka mā xateyamaino ē nokoax ē mato ōi ē shināmitsakōixii, rāfikōiyanā.

## 13

### *Pablo iskafakī ato yoini: “Anā afaa chakafayamakāfe,” ixō ato yoini*

<sup>1</sup> Mē mato ōikī rafe faa. Iskaratīari anā ē mato ōikaikai. Ē anā mato ōikaikai mā māto chaka mā xateamākī. Akka kirika ano Epa Niospa meka kenenifo iskafakī: “Fētsa afara chakafaito ōixō yōfaito, ‘Nato afara chakafaa,’ ixō rafeta yoiaifono, askayamakī trespa yoiaino askayamakī ranāfai yoiaifono chanīmara nō fatiro,” ixō kirika ano Niospa meka kenenifo. Nāskafakīri ē mato ano nokoxō ē nikai mā afara chakafaito mā afara chaka xateyamaito. Akka ē mato ōitiro mā chaka ikamāki, askayamai shara mā ikamāki. <sup>2</sup> Akka anā ē mato ano kayoxō mē mato yoiyoni mā afara chakafanōma. “Mā afara chakafakī xateyamaino ē mato omiskōimaxii,” ixō ē mato yoiyoni. Anā iskaratīari chai ixō ē mato yoi kirika kenexō iskafakī: “Ē anā kaxō ē mato ōikai mā mā chaka xateamāki. Akka mā chaka xateyamaito ē mato omiskōimaxii. Akka tsoa pishtakai ē finōmaxima.” <sup>3</sup> Akka mā tāpipai Cristo eōxō mato yoiaino. Chanīma, mā samama tāpinō xafakīakōi ē mato ōimani. Akka ēakai ē mato yoima, Cristoōxō ē mato yoi. Jesucristo mitsisipakōikai mato tāpimani māto chaka mā xatenō. <sup>4</sup> Chanīma, Jesucristo nokoōxō ifi cruz ikakī mastafono nā feronāfake pachikōi keskara ini. Nokoōnoax nai āakai ifimenima. Nāskafinixakī iskaratīa Niospa sharaōnoax nia. Nāskarifiāi nōri mitsisipama. Nāskafixō Jesús feta nā Niospa apaiyai keskara nō atiro Epa Niospa sharaōxō.

<sup>5</sup> Akka māto shinā mēraxō shināsharakāfe chanīmamākī mā mā Jesús Ifofasharamākī. Māa tāpimesharakāfe. Akka, ¿mā mā tāpiamē Jesucristo mato fe ikano? Askayamai mā mā chanīmis rakikīa nō Jesús Ifofaira ifiaxō mā Ifofaama. <sup>6</sup> Akka mā mā ea ōikī tāpia ē Jesucristoōxō yonosharakōimiskē mato mēraxō. Nā mā chanīmara fakōipainō. <sup>7</sup> Ē mato Epa Nios kīfixomis mā afaa chakafanōma. Nokoōnoa shinānōfo ixokai ē Epa Nios kīfimisma. Iskafakī fetsafāfe nokoōnoa shinākani rakikīa: “Pablo fe rafeafāfe ato yonoxosharafoma,” ixō nokoōnoa yoikani rakikīa. Akka noko askafafiaifono mā Jesús

Ifosharakōifai nāskara nō fichipai. <sup>8</sup> Akka Niospa meka shara fistiōnoa nō yoitiro. Aōnoakai meka chaka nō yoitiro ma āfe mekamāi sharakōikē. <sup>9</sup> Akka fetsafāfe nō afama noko askafakī shināfiaifono nō shināchakaima. Akka mā Jesúsnoax isharakōikē nō fāsi inimakōitiro. Akka nō mato Epa Nios kīfixona mā a keskara sharakōi inō. <sup>10</sup> Akka ē mato kirika kenexona mato ari kayoxoma mā ea nikanō. Mē mato ari nokoxō ōia mā Cristo Ifo sharakōifaino ē mato ōitoshinō. Nāskakē mā isharakōiaino Niosxō fāsi mekakai ē mato yoima mā isharakōinō. Epa Niospa ea yoia ē mato yoisharanō mā Nios Ifo sharakōifanō isharakōixō.

*Mā Pablo āfe meka xatekī ato yoisharani*

<sup>11</sup> Mē mekai xatekī ē mato yoisharai. Jesús keskara isharakāfe. Ea nikasharakāfe. Nānori fisti shinākāfe. Isharakāfe. Mā askaino Niospa mato noikōikī mato ini-mamasharai āfe Yōshi Sharaōxō mato fe ixō. <sup>12</sup> Keyokōi nā mā Nios Ifofaa tii yoinōnāsharakāfe. <sup>13</sup> Keyokōi nōko Ifo Jesús chanīmara faafāfe nā efe ikafāfe mato yoisharapaikani.

<sup>14</sup> Nōko Ifo Jesucristo mato axosharapai. Epa Niospari mato noikōi. Niospa Yōshi Shara mato fe rafepakexanō. Nā tii.

*Ēkīa Pablo*

## Pablo Galacia Anoafu Kirika Kenexõ Fomani

### *Galacia anoxõ Nios Ifofaafu Pablo ato kirika kenexõ fomani*

<sup>1</sup> Ëkĩa Pablo, ã mato kirika kenexõ fomai. Niospa ea nĩchini aõnoa meka shara ã ato yoinõ. Yorafãfe ea nĩchinifoma, Jesucristo feta Epa Niospa ea nĩchini. Nã Niospa Jesucristo otofani mã nakẽ.

<sup>2</sup> Mã Galacia anoxõ Nios Ifofakẽ, na nono efe ikafãfe, akairi Nios Ifofakaxõ efeta mato kirika kenexõ fomakani. <sup>3</sup> Epa Niospa nõko Ifo Jesucristo feta mato noikĩ mato sharakõi fanõ. Askatari mãto õiti mẽranoax mã anã fekaxtenõma. <sup>4</sup> Nõ afara chakafamisno nokoõnoax Jesús nani nõko chaka noko soaxoxiki, askatari nã yorafo chakafo mẽranoa noko ifixiki Epa Niospa fichipaiyai keskafakĩ. <sup>5</sup> Nãskakẽ Nios sharakõi mẽxotaima fapanakafo. Nãskapakexapainõ.

*Anã ano meka fetsama a nikax Epa Nios fe nõ ipaxanõ. Akka Epa Nios fistichi noko nimapakenaka*

<sup>6</sup> Ooa. Epa Nios potakanimara ixõ ã shinãmis, koshikõi kachikiri fayanã mã potafiaino, Cristo mato noiaino Epa Niospa mato katofinino. Epa Nios fe ipaikakĩ ãfe meka shara nikafiyana, meka fetsa fetsatapafo nikakakĩ kachikiri famisfo. <sup>7</sup> Akka anã anokai meka fetsama, a nikax Nios fe nõ ipaxatiro. Akka nã Nios Ifofaafãfema mato fekaxtefakani. Meka fetsafaxõ anorima mato yoipaikani, Cristoõnoa meka shara mã nikapafiaito a nikax afe ipaxakĩ. <sup>8</sup> Akka fetsafãfe Nios fe mã ipaxanõ Niospa mekaõnoa mato yoifikakĩ, meka fetsafaxõ anorima mato yoikani, mã nõ mato yoifimisno. Nã keskara yorafo nã omiskõipakenakafo mẽranoax omiskõipakenakafo, ã iyamai Niospa ajiri itiro nai mẽranoax oax. <sup>9</sup> Nã ã taefakĩ mato yoiyoni keskafakĩ, iskaratĩa anã ã mato yoi. Fetsafãfe Nios fe mã ipaxanõ Niospa mekaõnoa mato yoifikakĩ anorima mato yoikani, mã nõ mato yoifimisno. Nãnoru mato yoikanax nã omiskõipakenakafo mẽranoax omiskõipakenakafo.

<sup>10</sup> Ë yoiki iskafaino, yorafãfe eõnoa yoisharanõfora ixõ ã shinãima, askatamaroko Niospa eõnoa yoisharanõ. Ëkai yorafo eõnoa shinãmasharapaima. Akka yorafo eõnoa shinãmasharapai, ãkai Cristo yonoxomis itiroma.

### *Jesucristo ea nĩchini ãfe meka sharaõnoa ã ato yoinõ*

<sup>11</sup> Efe yora mĩstichi, xafakĩakõi ã mato yoipai. Na meka shara Jesucristoõnoa ã mato yoimis nõ afe ipaxanõ. Na keskarakai yorafãfe ãto shinãmã shinãmisfoma. <sup>12</sup> Na meka shara ã mato yoimis keskara yorafãfe ea tãpimanifoma. Tsõarikai ea tãpimanama. Askatamaroko nõko Ifo Jesucristo ea tãpimana keskara ã mato yoimis.

<sup>13</sup> A ã ipaoni keskara mã mã nikapaoni. Ëmãĩ judeoxõ a nõko xinifãfe yoipaoni keskara ã nikayopaoni. Mã mã tãpia mitsisipakõikai a Nios Ifofaafu ã ato omiskõimapaoni, anã Nios Ifofayamanõfora ixõ. <sup>14</sup> Nõko xinifo judeofãfe yoipaonifo keskara ã nikakõini, ãfe kaifofo ã ato finõkõini, efe yosifinifono. Ë nikakõikĩ a ãfe xinifãfe yoipaonifo keskara ã nikakĩ finakõini.

<sup>15</sup> Akka taefakĩ Epa Niospa ea katoni ã fakeyoamano. Ea noikõikĩ ea katoni. Nãskakẽ ea tãpimapaikĩ ea askafani. <sup>16</sup> Nãskaxõ ãfe Fake ea tãpimani ãfe meka shara a judeofoma ã ato yoinõ afe ipaxanõfo. Nãskakẽ ã rama Jesús Ifofakĩ ã tsoa yõkai kanima ea tãpimanõ. <sup>17</sup> Nãskakẽ Jerusalén ano ã kayonima a taefakĩ Jesúsnoa meka sharaõnoa yoimisfo ato õikai. Askatamaroko Arabia mai ano ã kani. Nãskata Damasco ano anã ã oni.

<sup>18</sup> Nãskata Jerusalén ari fena ã kayonima, mã xinia tres akax ã kani. Nãnoxõ ã Pedro tãpini, nãno ã afe oxa ranãyonu quince nia ã ini ano oxai. <sup>19</sup> Akka nã Jesús fe rafemisfo fetsafori ã õinima. Nõko Ifãfe ãfe exto Santiago fisti ã õini. <sup>20</sup> Niospa ferotaifi ã mato yoikõi, na ã mato kirika kenexokĩ chanĩmakõi ã mato yoi.



<sup>21</sup> Nāskata chipo Siria yafi Cilicia mai ano ě kani. <sup>22</sup> Akka Judea mai anoxō Cristo Ifofafiakaxō ea tāpiayonifoma. <sup>23</sup> Ea ōiyamafikatsaxakakī eōnoa iskafakī yoiaifāfe nikapaonifo: “A na feronāfāke taefakī noko omiskōimapaofinixaki, iskaratīa Jesúsnoa meka shara ato yoifofāsafai. Askatari noko keyokōi omiskōimakī noko xatemapaipaoni nō anā Jesús nikanōma,” ixō eōnoa yoinifo. <sup>24</sup> Nāskaxō eōxō Epa Nios aicho fakani, mā Pablo Nios Ifofara ikaxō.

## 2

*“Na Pablori noko ani keskafakī Jesús katoa aōnoa āfe meka shara ato yoinō,” fanifo*

<sup>1</sup> Mā catorce xinia finōta Jerusalén ano anā ě kani Bernabé fe. Titori ě iyoni. <sup>2</sup> Ě ari kani Niospamāi ea yoiano. Nā Jerusalén anoxō xanīfofo fes ichanāxō ě ato yoini a judeofoma Niospa meka sharaōnoa afe ipaxanōfo ě ato yoimis keskara. Nāskakē ě ato yoini: “A ě ato yoimis keskara sharamamākī, mī shara yoimiski ea fakanimākai,” ixō ě ato yoini. <sup>3</sup> Nāskakē tsōakai Tito afaa fanima efe oiano. Tito judeoyamafiano foshki repa xatefe tsōa fanima. <sup>4</sup> Nānoa fetsafo nō Nios Ifofara ikanax one ikikanax nofe ichanānifo, Nios Ifofayamafiakanax. Nāfāfe yoinifo iskafaki: “Titopari foshki repa xatetiro,” ixō yoinifo. Nāfāfe noko ōipaikani ikiafo ini, chanīmamākī tāpipaikakī afeskax Cristo Jesús Ifofaax nō ikamāki. Noko anā yonomapaikani nō Jesucristo Ifofanōma a Moisés yoini keskara fisti nikanōfora ixō noko anā yonomapaikani. <sup>5</sup> Akka nāfāfe noko yoipaiyaifono nō ato nikamisma. Akka nō fichipaimis nā meka shara chanīmakōi Jesucristoōnoa mā nikakōinō afe ipaxaki.

<sup>6</sup> Akka a xanīfofofāfe ě ato fe ichanāino, “Nā mī ato yoiai anori sharamaki, meka fetsa shara ato yoife,” ea tsōa fanima. Akka afo xanīfofofiano ě atoōnoa shināchakaima. Nāskarifiakī Niospa nōko femānāōxō noko onāima, akka Niospa noko tāpikōia. <sup>7</sup> Meka fetsa shara ea yoitamaroko, afāfe tāpinifo a Niospa āfe meka ea yoini keskara a judeofoma āfe meka sharaōnoa ě ato yoinō afe ipaxanōfo. A Pedro yoini keskafakī judeofo na meka sharaōnoa ě ato yoinō. <sup>8</sup> Nā Nios fistichi Pedro nīchini judeofo mēra āfe meka sharaōnoa ato yoinō. Nāatori ea nīchini a judeofoma mēra ěri a judeofoma āfe meka sharaōnoa ě ato yoinō.

<sup>9</sup> Nāskakē Santiago ikaino Pedro ikaino Juan ikaino, afāfe a Nios Ifofaafō ato ikikaxō ea tāpinifo Niospa ea nīchinino nā meka sharaōnoa a judeofoma ě ato yoinō. Nāskakaxō ea yafi Bernabé noko metakaxanifo. Noko askafakāta nokoki inimakaki noko yoikī iskafanifo: “Aicho, judeofoma mēra kaxō Niosnoa meka shara mā ato yoitiro,” noko fanifo, judeofoma mēra kaxō Niospa meka sharaōnoa nō ato yoikanō, akka afāfemāi nā judeofo Niospa meka sharaōnoa ato yoikakī. <sup>10</sup> Akka noko yoikī iskafanifo: “A afaamaisfo ato shināmakiyamakāfe. Afarayaxō ato inākāfe,” ixō noko yoinifo. Askara yoikī ea inimamanifo ěrimāi a afaamaisfo ě ato ināsharamiskē.

*“Na mī akai keskara sharama,” Pablo Pedro fani Antioquía anoxō*

<sup>11</sup> Akka Pedro Antioquía pexe rasi ano kaxō afara chakafaino āfe ferotaifi ě yoikī iskafani: “Na mī akai keskara sharama, mī chakafai,” ixō ě yoini. <sup>12</sup> Akka taeyoi a judeofoma feta pipaonifo. Nāskaifono chipo a Santiago fe rafeafo fenifo. Mā feafono judeofoma makinoax Pedro paxkani anā ato feta pinima a rama feafoki atoki mesekī mī chakafai na judeofoma feta mī pii ea fatirofora ixō. Nāskakē anā a judeofoma feta pinima. Akka a judeofo rama feafāfe ato yoikī iskafanifo: “Mā Nios ari kapaikī mātō foshki repa mā xatetiro,” ixō mēxotaima ato yoinifo. <sup>13</sup> Nāskakē a judeofori Nios Ifofakanax nā Pedro ikai keskanifo. Nā Bernabéri ato fe askani. <sup>14</sup> Akka nōko xinifāfe Niospa meka sharaōnoa noko yoinifo nō afe ipaxanō anori Pedro nikayamaito ōikī yorafāfe ferotaifi ě Pedro yoikī iskafani: “Mī judeo. Akka a judeofoma fe mī imis, nāskax judeoma keskara mī imis. Akka, ¿afeskakī a nōko xinifāfe yoipaonifo keskara a judeofoma mī ato yoipaimē, judeofo keskara ixō?” ě Pedro fani.

### *Judeofo a judeofoma feta Nios Ifofakanax Nios fe ipaxatirofo*

<sup>15</sup> Akka nõ judeokõifo nõ sharakõifo nõ afaa chakafakĩ finakõimisma na yora fetsafãfe amisfo keskafakĩ. <sup>16</sup> Askatamaroko mã nõ tãpia a Moisés noko yoini keskaraõxõ nõko chaka nõ soatiroma Niospa noko omiskõimanõma. Akka nõ Jesucristo Ifofaito nõko chaka noko soaxotiro, nõ askainokai noko omiskõimaxima. A Moisés yoini keskara nõ shinãito nõko chaka noko soaxotiroma. Akka Jesucristo fisti nõ Ifofaito noko omiskõimaxima.

<sup>17</sup> Nõfi Cristoõxõ nõko chaka nõ soatiroki noko omiskõimanõma. Nãskara mã nõ tãpifixõ nõ afara chakafamis. Akka nõ afara chakafaito, ¿Cristo noko afara chakafamapaimẽ? Maa, askarama. Noko afaa chakafamatiroma. <sup>18</sup> A Moisés noko yoini keskara mã nõ tãpia, aõnoaxkai Nios fe nõ nipaxatiroma. Jesús fistichi nõko chaka noko soaxotiro nõ afe nipaxanõ. Nã nõ chanĩmara fai. Akka a Moisés keneni keskara afianã nõ nikapai nõ fenotiro Nios fe nõ ipaxatiroma. <sup>19</sup> Akka a Moisés yoini keskara ayamakĩ mẽ tãpia êkai aõnoax isharatiroma. Ê askaino Epa Nios ekeki inimatiroma. Nãskakẽ nõfoõxõ mẽ tãpia Cristo fisti ã chanĩmara faino Epa Nios ekeki inimatiro. Nãskax ã afe yora itiro. Akka iskaratĩa a Moisés yoini keskaraõnoa anã ã shinãpakenakama, atokai ea ãkipakexatiroma. Askara shinãtamaroko Nios fisti fe ã rafei afe isharaxiki. <sup>20</sup> Nõko Ifo Cristo ifi cruz ikaki mastafono nani keskai ãri ã afe naa keskarakõi ini. Nãskakẽ iskaratĩa a ã ipaoni keskara anã ã ikima. A ã Jesús Ifofayamax ã ipaoni keskara anã ã shinãima. Niospa Fake Cristo ea noikõi nã ipaiyai keskakĩ ea nãxonĩ. Nãskakẽ ã chanĩmara faino iskaratĩa Cristo efe ika a keskara shara ea imaxiki. <sup>21</sup> Akka Epa Niospa ãfe Fakeõxõ ãfe chaka ea soaxoni ã afe nipaxanõ. Êkai afaa fetsa shinãmisma nisharapakexakĩ, Nios fisti ã shinãkõimis Nios fe nipaikĩ. A Moisés kenenioxõ nõko chaka nõ xateax Nios fe nõ nipaxafiatirono Cristo noko nãxokeranima. ãakõi Cristo noko nãxokerani.

## 3

### *A Moisés yoini keskara nõ nikayamakĩ nõ Jesús chanĩmara fakõinaito nõko chaka noko soaxotiro*

<sup>1</sup> Efe yora mĩshtichi Galacia anoafãfe, mãfi oa yõra shinãsharaima keskarafoki. Akka, ¿tsõa mato paraimẽ oa mato parakani afianã mã shinãsharanõma? Akka nõ xafakĩakõi mato yoimis Jesucristo ifi cruz ikaki mastafono matoõnoax nani. Nõ mato yoisharafimisno meka fetsa nikakĩ mã anorima shinãmis. <sup>2</sup> Akka ã mato yõkapai mã ea yoinõ a Moisés noko yoini keskara tãpixõ mã Niospa Yõshi Shara fiamãki, askayamaki Jesucristoõnoa meka shara nikaxõ mã fiamãki. <sup>3</sup> Niospa Yõshi Sharaõxõ Jesús mato amapayai keskara mã ayopaoni. Akka iskaratĩa mã shinãkĩ iskafai: “A Moisés noko yoini keskara nikax nõ isharatiro,” ixõ mã shinãmis. Ooa. ¿Afeskakĩ oa yorafãfe shinãsharaifoma keskara mã shinãimẽ? <sup>4</sup> Mã Jesús Ifofaino mato omiskõimapaonifo, askafikĩ Niospa Yõshi Sharaõxõ mã Jesús Ifofasharamis. Akka afianã mã Jesús Ifofayamai mãkõi kaxpa mã Jesúsnoax omiskõipaoni. Mã askayamapainõ. <sup>5</sup> A mã nikamis keskara mã mã chanĩmara fakõina. Nãskakẽ ãfe Yõshi Shara mato mẽra naneyanã, tsõa atiroma keskafakĩ afama mĩshti mato faxõfa. Moisés kenenioxokai mato askafaxõama.

<sup>6</sup> Shinãkapo. Abraham Nios chanĩmara faito Niospa yoiyoni iskafakĩ: “Mĩ ea chanĩmara faito mĩ chaka ã mia soaxoni mĩ efe ipaxanõ,” ixõ yoini. <sup>7</sup> Nãskakẽ tãpisharakãfe nã Abraham ãfe fenafãfe nã Nios chanĩmara faifãfe, nãfãfe chanĩmara fakõinafoki. <sup>8</sup> Epa Niospa a inõpokoai keskaraõnoa tãpiyoni a nõko kaifofofãfemari Ifofafono ãto chaka ato soaxota ato imasharaxixakĩ. Askaifono atoki inimakõini, akka Niospa Abraham yoiyoni iskafakĩ: “Ê mĩõxõ keyokõi nã maifo tii anoafõ ã ato sharafaxii,” ixõ Niospa yoinino kenenifo. <sup>9</sup> Nãskakẽ Abraham chanĩmara fani keskafakĩ, akairi chanĩmara faifono Epa Niospa ato sharafaxõi, Abraham sharafaxoni keskafakĩ.

<sup>10</sup> Akka fêtsa shinākī iskafai: “Moisés yoini keskara ě nikai ě isharakōi,” ixō shināi afi āfe chaka aō nepakenaka. Akka kirika kenekī yoikī iskafanifo: “Moisés yoikī kirika kenekī iskafakī yoinino: ‘A Moisés yoini keskara nikayamakani āto chaka āto nepakenaka,’ ” ixō yoinifo. <sup>11</sup> Akka fêtsa Epa Nios chanīmara faino āfe chaka soaxota imasharakōitiro. Akka fêtsa a Moisés yoinioxō āfe chaka soapaikī iskafakī shinātiro: “Moisés noko yoini keskara nō nikaito Epa Niospa noko imasharatiro,” ixō shināfiafonokai Epa Niospa a Moisés yoini keskaraōxō ato imasharatiro. <sup>12</sup> Akka mā nō tāpia Jesús fisti nō chanīmara faax Epa Nios fe nō ipaxatiro. Akka a Moisés noko yoini keskaraōnoax nō askatiroma. Akka Moisés noko yoini iskafakī: “Nā Niospa noko yoini keskafakī mēxotaima nō nikayamax Nios fe nō ipaxatiroma,” ixō noko yoini.

<sup>13</sup> Akka a Moisés noko yoini keskara: “Nō nikayamaito Epa Niospa noko omiskōimaxira,” ixō kenefinifono, noko omiskōimatama, āfe Fake omiskōimani. Niospa meka kenenifo iskafakī: “Fatora fetsa ifi cruz ikaki mastafono, atori Epa Niospa omiskōimaxii akairi omiskōinōfo,” ixō kenenifo. Akka nō afara chakafamisno Cristo nokoōnoax ifi cruz ikakinoax nani. Noko nāxoyamanikē nō omiskōipakexakerana. <sup>14</sup> Akka Epa Niospa Abraham sharafani keskafakī, judeofori Jesucristoōxō ato sharafaxii. Nāskakē a chanīmara faifo tii ato yoiyoni keskafakī āfe Yōshi Shara atoya rafematiro. Akka Cristo nokoōnoax nani Apa Nios fe nō ipaxanō. Nāskatari Niospa Abraham yoiyoni keskafakī chanīmara faifono a judeofomari ato imasharaxii.

### *Niospa Abraham yoiyonino Moisésri ato yoini nikanōfo*

<sup>15</sup> Efe yora mīshtichi, iskaratīa nā nō amis keskaraōnoa ě mato yoi mā tāpinō. Fer-onāfake mā afe feronāfake yoiyoxō anā shinākī fetsafatiroma māmāi āfe ane kenexō. <sup>16</sup> Nāskarifiakī Epa Niospa Abraham yoiyoni āfe fena fistiōnoa yoikī. Āfe fena Cristo fistiōnoa yoini. <sup>17</sup> Ē mato xafakīa yoinō Epa Niospa Abraham yoiyoni keskara cuatro cientos treinta xinia finōta Epa Niospa Moisés yoiniki. Niospa Moisés yoinino akka Abraham yoini keskara anā fetsafatiroma. Nā yoiyoni keskakōimis. Nāskaxō Epa Niospa anā shinākī fetsafanima, nā yoiyoni keskara amiski. <sup>18</sup> Epa Niospa Abraham yoiyoni keskara Abraham chanīmara faito, chipo Epa Niospa Abraham noikī āakōi axosharakōini.

<sup>19</sup> Akka, ¿afeskai a Moisés yoini keskara sharamē? Ē mato yoinō, ea nikakapo. Niospa yoiaino Moisés keneni yorafāfe tāpinōfo afeskax isharatirofomāki, Niospa fichipaiyai keskai. Askatamaroko tsoa askamisma, nikayospakōimisfo. Nāskakē Epa Niospa āfe ājirifo yoini afāferi Moisés yoinōfo Moisésri yorafo yoinō yorafāfe nikakōinōfo Abraham āfe fena Cristo oyoamano. <sup>20</sup> Akka Epa Niospa Abraham anori yoinima. Āfe ājiriōxō yoiyamata, yorafoōxori yoinima. Epa Niospa āakōi yoipaiyai keskafakī Abraham yoini.

### *¿Afeskakī Epa Niospa Moisésxō ato yoinimē?*

<sup>21</sup> Akka, ¿Epa Niospa a inōpokoai fo yoiyoni keskara yafi a Moisés yoini keskarakōiri mā shināimamē? Maa. Epa Niospa mekakai rafema. A Moisés yoini keskaraōxō noko nimapakexatirokē Epa Niospa nāfoxō nōko chaka noko soaxokerana nō a keskara shara inō. <sup>22</sup> Akka Niospa meka yoikī kirikaki kenekī iskafanifo: “Keyokōichi nō afara chakafakatsaxakī nā nō karaxa mēra ika keskarakōi,” ixō kenenifo. “Akka Jesucristo nō chanīmara faito ares fisti noko kāimatiro afara chaka nōko ifo inōma.” Nāskarakōi yoikī kenenifo.

<sup>23</sup> Nāskakē nō chanīmara fayopaonima. Akka Cristo oyoamano a Moisés noko yoini keskaraōnoax oa karaxa mēra ika keskarafo nō iyopaoni. Akka mā Cristo oano nō chanīmara faino noko kaimanano anākai oa karaxa mēra ika keskara nō itiro. <sup>24</sup> Nāskakē nō tāpitiro Epa Niospa apaiyai keskafakī Moisés noko yoini. Nāskakē nōko ifo keskara iyopaoni. Akka Cristo oaino nō chanīmara faino nōko chaka noko soaxota

noko imasharaxiki. <sup>25</sup> Nõ askafipaonixakĩ mã Cristokõi nokoano a Moisés yoini keskara afianã nõko ifo itiro ma anãkai aato noko ìkitiro ma.

<sup>26</sup> Akka mã chanĩmara faax Niospa fakekõifo mã iki mãmãi Cristo Jesús Ifokõi faxõ. <sup>27</sup> Keyokõi mãfi mã mã Cristo fe rafekõiakĩ mã maotissimeax keskarax Niospa Yõshi Shara mato mēra naneeano. Nāskax oa rapati fena shara safea keskarakõi mã. <sup>28</sup> Epa Niospa Cristoõxõ keyokõi mã maifo tii anoafõ keyokõi nāskarafos noko õi. Judeofoya a judeofoma, a ato yonomatifoya a yonomatifoma, feronāfakefoya kērofo, nāskarafos noko õi. Jesucristo nõko Ifo ikano aõnoax yora fisti keskara nõ itiro. Akka keyokõichi nõ Ifofaax nõ afe yorafo. <sup>29</sup> Akka mã Cristo afe yorax Abraham afe fenafori mã iki. Nāskakē mã keyokõi Epa Niospa Abraham yoyoni keskara mãtonãri iki.

## 4

<sup>1-2</sup> Akka ã mato iskara yoipai. Apa naano afe fãke afe apanãfo fitiro. Nāskakē mã fake yomekē, fetsafãfe afe afama mĩshtifo kexesharaxoyokaxõ, mã fake yome yonomayotirofo. Nāskakē ãpa yoini keskafakĩ ãa yosiyonõ, yora fetsafãfe afe afama mĩshti kexexoyotirofo. <sup>3</sup> Nāskarifiakĩ nõ Cristo Ifofayoamano nõ oa fake yome keskarakē nõko xinifãfe noko yoipaiyai keskafakĩ noko yoipaonifo. Nāskakē ato yonoxomis keskara nõ iyopaoni. Nã Cristo chanĩmara faafãfema amisfo keskara noko amapaonifo nõ ato yonoxomis keskara inõ. <sup>4</sup> Akka Epa Niospa mã yoinitĩa, afe Fake nĩchini, kēromã xakĩ mēranoax kãini judeokõi mã Moisés noko yoini keskara nikakõipaoni. <sup>5</sup> Akka nono mai ano oni, noko imasharaxii a Moisés yoini keskara nikapaimisfono, nāskax Niospa fakekõi keskara nõ inõ.

<sup>6</sup> Chanĩma, mãfi iskaratĩa Niospa fakefoki. Nāskakē Epa Niospa afe Yõshi Shara nõ mēra naneeano aõxõ nõ yoitiro iskafakĩ: “Epa Niosi, mĩfi ãfe Epakõi,” ixõ nõ yoitiro. <sup>7</sup> Nāskakē iskaratĩa mã Niospa fakefo, a Moisés yoini keskara nõ anã nikaima nõko ifo inõ. Nāskakē afe fakefo afara ināsharai keskafakĩ matori afara ināsharaxii Jesucristoõxõ.

### *Pablo a Jesús Ifofafo ato shinãkõini*

<sup>8</sup> Akka taeyoi mã Nios tãpiyoamax mã nioskõimafo mã ato nikaito mato yonomayopaonifo. <sup>9</sup> Mã mã askapaonixakĩ, akka iskaratĩa mã mã Nios tãpikõia. Epa Niospari mato tãpikõia. Mã mã Nios tãpikõifiax, çafeskakĩ a mã apaoni keskafakĩ afianã mã ato yonoxopaimē? Afãfekai Epa Nios xanĩfo ika ari mato iyotirofoma. <sup>10</sup> Nã mãto xinifãfe yoinifo keskai mã askakõimis. Nāskakē pena safaronõ mã tenemis, askatari rama oxo kãiyaino mã fista amis, askatari rama xiniaino mã fista amis, askatari seis xinia finõmata mãto tare mã fanamisma. Mã shinãkĩ iskafamis: “Nã fistatĩa nõ ato fe inimaino Epa Nios nokoki inimatiro, nāskaxõ nõko chaka noko soaxotiro,” ixõ mã anorima shinãmis. <sup>11</sup> Ë mato shinãkõimis ã mato yonoxopaoni. Ë mato Jesúsnoa yoikĩ kaxpa ã mato yoipaoni rakikĩa mã shinãyamafiaino.

<sup>12</sup> Efe yora mĩshtichi, ã mato yoisharapai ã akai keskafakĩ anã mã Jesús Ifofanõ. Mã Jesús Ifofai keskafakĩ ãri Ifofaaki. Ë mato fe ikano mã ea chakafapaonima, askatamaroko mã ea sharafapaoni. <sup>13</sup> Akka mã mã tãpia Epa Niospa ea nētefani taefakĩ Niospa meka sharaõnoa ã mato yoinõ nõ afe ipaxanõ. Akka ã isinĩ iki ã anã katiroma ini. Nāskakē ã mato ano nēteni. <sup>14</sup> Ë isinĩ iki ã omiskõifiaino mã ea iskafanima: “Pablo isinĩ iki mesekõi nõ afe ichanãtiro ma,” mã ea fanima. Askatamaroko mã ea ifisharakõini oa Niospa afe ãjiri keskara õikĩ, askatari oa Jesucristo keskara ea õikĩ mã ea ifisharakõini, askatari mã ea kexesharakõipaoni. <sup>15</sup> Ë mato yoianõ mã inimapaoni. Akka, çafeskai iskaratĩa a mã ipaoni keskai anã mã inimaimamē? çMã shinãimamē a mã ea noikõipaoni keskara? Ë afara yopaito mã ea inãpaoni ea noikõianã. Akka mãto ferori tsekatiro pinikē mã ea inãkerapaoni. <sup>16</sup> Akka, çMã shinãimē na meka chanĩmakõi yoikĩ ã mato noikaspai keskara?

<sup>17</sup> A Moisés yoikĩ keneni keskara yora fetsafãfe mato tãpimapaikani. Nãfãfe a shinãifo keskara mato tãpimapaikani mã ato keskara inõ. Akka a akaifo keskara mã ato feta aka

a keskarakai sharama. Nāskaxō nāfāfe noko paxkanā fapaikani afianā mā ea nikatama afāfe mato yoiaifo keskara mā ato nikanō. <sup>18</sup> Akka fetsafāfe mato sharafaifono shara itiro. Ē mato fe iyamafiano mato sharafaifono, nāskarari sharakōi itiro. Jesucristoōxō mato sharafaifonori sharakōi itiro. <sup>19</sup> Ēfe fakefāfe, afianā ē matoōnoax omiskōikī ē pae meekōi. Nā kēromā fake kākī pae meetiro keskarakōi ē mei. Akka mā fake kākō anā pae meetiroma. Nāskarifiakī mā Jesús Ifofayamaino ē matoōxō pae meekōitiro. Akka Cristo āfe Yōshi Shara māto ōiti mēra naneano afianā ē matoōxō pae meetiroma. <sup>20</sup> Ooa. Iskaratīa ē ano mato fe ipainō afianā ē mato yoisharaxiki. Akka ē tāpiama a mā shināi keskara mā anorima shināi. Akka ē ano mato fe ixō ē mato yoisharakōikerana.

### *Agar fe Sara ipaonifo keskaraōnoa noko yoi*

<sup>21</sup> Niospa shināmanaino a Moisés kirika keneni keskaraōnoa mā anā nikapaimākai Nios Ifofakaspakī ea yoikapo ē mato yoinō. Akka, ¿a Moisés yoini keskara mā nikamismamē? <sup>22</sup> Iskafakī yoikī kenenifo: “Abraham fake rafeya ini. Fetsa āfe āfinī yonomati feta fake ani, fetsa āfe āfikōi feta ani. Nā āfe āfikōi tsōa yonomati inima,” ixō keneni. <sup>23</sup> Nā Abraham āfe āfinī yonomatinī fake fini, nā kērofāfe fake fimisfo keskarari fake fini. Akka Abraham āfe āfikōi yōxafokōi ini fake fitiroma. Nāskafekē Epa Niospa Abraham yoiyoni iskafakī: “Mī āfinī fake feronāfake fixii,” ixō yoinino, nāskakē Abraham āfinī fake feronāfake fini. <sup>24-25</sup> Nā xotofake rafeoxō Niospa afara fetsa noko shināmani. Niospa yoiyoni afeska faxō yorafo ifitiromākī. Nā kēro Agar nō shināino machi Sinai noko shināmani, Arabia anoa. Nā machi āfe ane fetsa Agar. Nā machi arixō Niospa Moisés yoini Moisésri nā israelifo ato yoinō nikakōinōfo. Askatari nā kēro Agar nō shināino noko Jerusalén shināmatiro. Nā Jerusalén ano ikafo nō shināino nā Agar āfe fakefo noko shināmatiro. Nāfāfe Moisés yoini keskara nikakanax nāfo āto yonomati keskarāfo. <sup>26</sup> Akka nāno kēro fetsa Abraham āfe āfikōi. Āfe ane Sara, nā nōko efakōi keskara. Nō Sara shināino Jerusalén fetsa nai mēranoa noko shināmatiro Epa Nios ika aria. Nāskakē chipo nō ari ixii. Nōri Sara keskara nō āto yonomatima, āfe fakefori āto yonomatifoma. A Moisés yoini keskarakai nōko ifo itiro. <sup>27</sup> Akka kirika kenekī iskafanifo:

Kēromā, mī fake fimismakī inimafe, askatari mī fakeyamakī inimayanā tai tai ife mī fake pae meemismaki. Akka nā kēro fenē eneyoa nāfi chipo āfe fena ichapayakōi ixii kiki, a kēro feneya finōmainīfofā, ixō yoikī kirika ano kenenifo.

<sup>28</sup> Efe yora mīshtichi, nōfi Isaaca keskaraki. Epa Niospa Abraham yoiyoni keskai āfe fake Isaaca chipo kāini. Nāskarifiakī Epa Niospa yoiyoni keskai nōri āfe fakefo. <sup>29</sup> Nā āto yonomati Agar yōxafoxoma āfe fake fikī tafani āfe ane Ismael. Akka nā fake fimismato Sara chipo yōxafoxō fake fini Niospa Yōshi Sharaōxō. Nāskano Agar āfe fake Ismael iyoaxō āfe exto omiskōimapaoni. Nāskarifiakī Niospa Yōshi Sharaōnoax nō Niospa fake ikaino, fetsafāfe Nios Ifofakaxoma noko omiskōimatirofo. <sup>30</sup> Akka kirika kenekī, ¿afaa fanifomē? Kenekī iskafanifo: “Mī fake Isaaca ē ināxiai keskara, akka nā māto yonomati Agar āfe fāke afaa fixiima. Nāskakē mato anoxō āfe fakeyafi ato nīchikāfe afianā mato fe inōfoma,” ixō Epa Niospa Abraham yoini. <sup>31</sup> Nāskakē ē mato yoi efe yora mīshtichi, nōkai a āto yonomatinī fake keskarafoma. Askatamaroko nōfi Abraham āfe āfikōichi fake keskarāfo. Nāskaxō nō Nios Ifofaax nō tsōa yonomati itiro, nō Niospa fakekōifo itiro.

## 5

### *Cristoōnoax isharakāfe a mā ipaoni keskara chaka anā shinākakima*

<sup>1</sup> Akka Cristo nokoōnoax nani a Moisés yoini keskara nō anā nikanōma, nāskax anā āto yonomati nō inōma. Cristo fistiōnoax nō isharatiro, nāskakē Cristo kachikiri fayamakāfe. Mā ipaoni keskara anā iyamakāfe, nōko xinifāfe yoinifo keskara afianā nikayamakāfe āto yonomatifo ixikakīma.

<sup>2</sup> Ĕ mato yoinō, ea nikasharakapo. Iskafakī shināyamakāfe: “Ĕ foshki repa xatekema Epa Niospa ēfe chaka ea soaxotiroma,” ixō shināyamakāfe. Anori mā shināito Jesús mātō chaka mato soaxotiroma Epa Nios fe mā ipaxanō. <sup>3</sup> Afianā xafakīakōi ē mato yoipai. Fatora fētsa mā foshki repa xatepai Nios fe ipaikī, anori shināfikī nā Moisés yoini keskara nikakōiamax, anorima shināx Nios fe mā nipaxatiroma. <sup>4</sup> Moisés yoini keskara fisti mā nikaito mātō chaka mato soaxotiroma. Nāskax mā Cristo fe rafeima, akka Epa Niospa mato noifiaino mā Cristo fe rafeima, akka Epa Niospa mato noifiaino mā Cristo kachikirifai. Nāskafekē mato afeska fatiroma mātō chaka mato soaxona mā afe ipaxanō. <sup>5</sup> Akka Niospa Yōshi Sharaōxō mā nā tāpia, Cristoōxō nōko chaka noko xoaxotiro Niospamāi noko noikōikī. Nāskakē nō manasharai. <sup>6</sup> Nō foshki repa xateano, askayamākī nō xateamano, afāfekai nōko chaka noko soaxotiroma. Akka nō Jesucristo Ifofakōinaino fetsafo noko ato noimasharakōitiro nō ato noisharakōinō. Nā fisti nō fichipai, chanīmara fasharakōixii.

<sup>7</sup> Mā Jesús Ifofasharayopaoni. Akka, ėtsōa mato yoiamē, na meka sharakōi kachikirifayanā mā anā nikanōma? <sup>8</sup> Akka Niospakai anori mato yoiamā. Āfe Fake fisti mā chanīmara fanō mato yoia. <sup>9</sup> Akka mato mēraxō yora fistichi chaka shinākī, nā fistichi keyokōi mato afara chaka shināmatiro, aōxō chakakōi mā shināno. <sup>10</sup> Ĕ Nios kīfiyanā nōko Ifo ē chanīmara fakōini, ē akai keskafakī māri chanīmara fanō. Akka nā mato fanīrira chaka shināmanaifo Niospa ato omiskōimaxii.

<sup>11</sup> Efe yora mīshtichi, akka eōnoa yoikī mā iskafamis: “Na Pablo yoimis nō foshki repa xateamax nō Nios ari katiroma ixō yoimis,” mā ea famis. Maa, ēkai anori yoimisma, ē anori yoiaito ea omiskōimakeranafo. Akka ē yoimis: “Jesucristo ifi cruz ikaki mastafono noko nāxoni, nōko chaka noko soaxoxii Epa Nios fe nō ipaxanō,” ixō ē yoimis. Nānori ē yoiaito nikakī nā Jesúsnoa nikakaspamisfāfe ea omiskōimamisfo. <sup>12</sup> Akka fetsafāfe mato yoimisfo iskafakakī: “Mā foshki repa xatexoma mā Nios chanīmara faima,” ixō fanīrira mato shināmamisfo. Nānori yoikakī mato fekaxtefamisfo, nāfo anā mato fe iyamapainōfo.

<sup>13</sup> Efe yora mīshtichi, Jesucristoōxō iskaratīa āfe meka fisti nikakōikāfe. Afaa fetsa mato yonomayamafiaino chakafayamakāfe. Jesucristo mato imasharakī iskaratīa nā nō apaiyai keskara nō atiro iyamakāfe. Akka fetsafo fe axō faatanākāfe noinākōiyanā. <sup>14</sup> Akka Niospa Moisés yoini iskafakī: “Nā mā noimeai keskariakī fetsafori noisharakāfe,” ixō yoini. Mā askafakī nā Niospa Moisés yoini keskara, keyokōi mā aki. Mā askafakī keyokōi a Niospa Moisés yoini keskara mā aki. <sup>15</sup> Akka mā chakafaatanax mā keyotiro, oa paxta rafe keyonākanax retenātirofo keskai. Nāskakē kexemesharakāfe askaxikakīma, a mato feta Nios nikamisfo anā mato fe ichanātirofomaki. Askatari Nios kachikiri fatirofoki.

*Nōko shinā mēraxō nō afara chakafapaimis keskara yafi a Niospa Yōshi Sharaōnoax nō isharatiro Pablo ato yoini*

<sup>16</sup> Akka ē mato yoi Niospa Yōshi Shara nikasharakāfe aōnoax isharaxikaki. Nāato mato yoitiro mā afeskaimākai. Nā nikakōixō afianā a mā apaoni keskara mātō shinā mēraxō afara anā mā atiroma. <sup>17</sup> A nōko shinā mēraxō nō afara chakafapaiyai keskarakai Niospa Yōshi Sharapa shināima. Nāskaxō āfe Yōshi Sharapa noko amapaiyai keskara nōko shinā mēraxō nō shināfikī nōkai askafapaimisma. Nōko shinā mēraxō nō shināpaoni keskarakai Niospa Yōshi Sharapa anori shināmisma. Akka nā nō apaiyai keskafakī nō atiroma. A nō afara chakafapaoni keskara nō anā ayamakī Niospa Yōshi Sharapa nōko shinā mēraxō noko yoiai keskara nō nikakōitiro. <sup>18</sup> Nāskakē Niospa Yōshi Shara nofe rafeaino a Moisés yoini keskara anā nōko ifo itiroma noko yonomaxiki.

<sup>19</sup> Fetsafāfe Nios nikakaspakakī afarafo chakafakani. Mā mā tāpia afe keskarafō ikafoimākai. Nāskakē feronāfakefāfe āto āfimafo chotamisfo. Nāskakata afara fetsa fetsatapafo chakafamisfo. <sup>20</sup> Nāskakaxō afara yora fakaxō na nōko niosra ixō kīfimisfo. Askatari koshoiti tāpiafo, askatari ato noikaspaamisfo, askatari isharakātama

õitifishkimisfo. Nãskakaxõ atonã fisti afara apaimisfo, askatari noikaspa faatanãmisfo nores fisti nõ tãpikõia a nõ tãpia keskara tsõa tãpiama ikanax. <sup>21</sup> Nãskaxõ fetsafo afara fãapaimisfo, askatari pãemisfo, askatari pikĩfinapaikõimisfo. Nãskakaxõ afara fetsa fetsatapafo chakafamisfo. Ë mato yoimis a keskara chakafo Epa Niospa keyokõi ato ìkinã ano tsoa katiroma afe ipaxakakĩ.

<sup>22</sup> Akka Niospa Yõshi Sharapa noko ìkinãno fetsafo nõ noikõitiro inimakõiyã, askatari nõ isharakõita nõ fekaxtetiroma, askatari fena fenakima nõ manasharakõiyotiro, askatari nõ fetsafo chakafamisma itiro, askatari nã nõ yoimis keskara nõ atiro isharakõita. <sup>23</sup> Askatari isharakõita, fetsafo fe feratenãtama oi tsifaxõ ato yoimis ita, askatari a Niospa fichikaspai atama nõa nõ kexemetiro afaa chakafaxikima. Nãskaxõ Niospa ãfe Yõshi Sharaõxõ noko yoia keskara nõ atiro isharaxiki. Nãskakẽ anã meka fetsa nõ yoipaima Niospa Yõshi Sharaõnoax isharaxiki. Nãskakẽ anã noko tsõa yonomatiroma. <sup>24</sup> Nã Cristo chanĩmara faifo tii afe yorakõifo. Jesús cruznoax noko nãxoni nõko chaka noko soaxoxiki. Akka nõ naa keskaraxõ anã afaa nõ chakafatiroma a nõ apaoni keskara. Nãskakẽ nã noko Niospa amapaiyai keskara fisti nõ atiro. <sup>25</sup> Nãskakẽ Niospa Yõshi Shara fe nõ rafekĩ nã noko yoiai keskara nõ nikakõitiro. Nãskaxõ nã noko amapaiyai keskara nõ atiro.

<sup>26</sup> Nãskakẽ Niospa Yõshi Shara fe nõ rafeax kakapaimis nõ itiroma, fetsafãfe nokoõnoa yoisharanõfora ixõ ã mato finõkõiara iyamakãfe. Mã askakĩ fetsafo mã shinãchakamatiroki. Mã askara chakafo shinãkĩ mã shinãsharatiroma, askara chakakõiki.

## 6

### *Mã ranã axosharanõnã faatanãkãfe*

<sup>1</sup> Efe yora mĩshtichi, fẽtsa afara chakafaito õikĩ, Niospa Yõshi Sharayaxõ aõ noikĩ oi tsii faxõ yoisharakãfe, afara chakafakĩ xatenõ. Meka mĩtsisipato yoiyamakãfe. Nãskakẽ mãri kexemesharakãfe afara chakafayamaxiki. <sup>2</sup> Nãskakẽ fetsafo fe afara axonõnã faatanãsharakãfe. Mã ranã Nios kĩfinõnã faatanãkãfe. Fetsa omiskõiaito aõ noikĩ inimamakãfe, nãskakẽ kexenõnã faatanãsharakãfe. Fetsa omiskõiaito Nios kĩfixokãfe Jesúsnoa shinãmasharayanã Ifo sharafanõ. Mã askakĩ nã Cristo yoini keskara keyokõi mã akikai.

<sup>3</sup> Akka fẽtsa shinãkĩ iskafai: “Ë sharakõi. Ëkai tsoa yopaima ea Nios kĩfixonõ,” ixõ shinãi. Nã keskara yorakai afama, ãakõi pãramei. <sup>4</sup> Akka nõ nõko shinã mëraxõ nõ shinãtiro nõ Jesús yonoxõsharaimãkai. Akka nõ yonoxõsharai mã nõ tãpiax nõ inimasharatiro. Nãskakĩ nõ shinãkĩ iskafatiroma: “Na fetsafãfe afara chakafaifo keskafakĩ ã afaa chakafamisma,” ixõ nõ shinãtiro. <sup>5</sup> Akka keyokõichi nõ afara chakafamis. Nãskaxori keyokõichi nõko shinã mëraxõ nõ shinãtiro a nõ afara chakafamis keskara. Tsõakai a Niospa noko amapaiyai keskara noko amatiroma, nõakõi nõ atiro.

<sup>6</sup> A Niospa meka mato yoimisto afara yopaito inãsharakãfe.

<sup>7</sup> Mãrifi anofi pãrameyamakãfe, tsoari Nioski kaxemetsamapaitiroma. Akka akiki kaxemetsamapaiyaifono Niospa ato omiskõimatiro. Akka afara nõ fanaxõ mã fimiano ãfe fimi nõ fitiro. Nãskarifiakĩ Niospa meka nikayamata nõ afara chakafaax nõ omiskõitiro. Akka nã Niospa noko yoia keskara nõ akax nõ isharakõitiro. <sup>8</sup> Akka fẽtsa ãfe shinã mëraxõ afara shinãkĩ afara chakafaax omiskõifinakõitiro. Akka Niospa Yõshi Sharapa amapaiyai keskara fẽtsa afafãini, nãfi Niospa Yõshi Sharaõnoax nisharapakenakaki. <sup>9</sup> Nãskakẽ afara sharafakĩ eneyamakãfe. Nãskaxõ iskafakĩ shinãyamakãfe: “Mẽ fetsafo sharafayomiski iskaratĩã ã anã askaimakai, ã anã fetsafo sharafatiromaki. Nãskanõ,” ixõ anori shinãyamakãfe. Akka nõ askatama nõ inimakõikẽ nã noko inãpaiyai keskara shara Niospa noko inãsharaxii. <sup>10</sup> Nãskakẽ afeskaraifãfe õikĩ keyokõi ato axosharafafãikãfe. Nãskatari a Nios Ifofafo ato noisharayanã ato axosharafafãikãfe.

*Pablo mã mekai xatekĩ ato yoisharani*

<sup>11</sup> Akka iskaratĩa ěkõi mato kirika kenexoni. Ěfe kene efapakõikĩ õikapo. <sup>12</sup> Akka fetsafãfe mato yoipaikani iskafakakĩ: “Mãto foshki repa xatekãfe nõri askaraki,” ixõ mato yoimisfo. Akka mato yoipaikanima a Jesucristo ifi cruz ikakinoax noko nãxoni nõko chaka noko soaxoxiki. Askara mato yoimisfoma, askara nõ ato yoiaito noko omiskõimatirofora ikaxõ. <sup>13</sup> Nãfãfe mã foshki repa xatefikaxokai a Moisés keneni keskara tsõa nikakõimisma. Nãskakaxõ matori yoipaikani mãto foshki repari mã xatenõ. Mãri nã imisfo keskai mã ato fe askaito, nãfãfe fetsafo yoitirofo iskafakakĩ: “Nafãfe noko nikakõimisfo,” ixõ ato yoitirofo. <sup>14</sup> Akka ěkai anori shinãpaima, nã meka shara fistiõnoa ě yoipaifafãini. Nã meka shara fistiõnoa ě yoipaikĩ ě iskafai: “Aicho, Jesucristo ifi cruz ikakinoax ea nãxoni, aõxõ a ě chaka shinãpaoni keskara anã ě shinãtiroma. Jesús nã ea nãxofaitĩa nã ě afarafo chakafapaonifo mã Jesús fe naa keskarakõi. Nãskakẽ anãkai ea afeska fatiroma,” ixõ ě shinãtiro. <sup>15</sup> Nõ Jesucristo Ifofaxõ nõ foshki repa xatea askarakai sharama atokai nõko chaka noko soaxotiroma. Akka nõ Ifofaito Niospa nõko chaka noko soaxotiro fena keskara shara nõ inõ. <sup>16</sup> Niospa Yõshi Sharapa Jesúsnoa noko yoia keskara mã akẽ Epa Niospa mato inimamakõiyanã mato noikõi. Nãskax Niospa fakekõifo mã iki.

<sup>17</sup> Akka mẽ mekai xatekĩ ě mato yoinõ. Ěfe Ifo Jesúsnoax ě omiskõimis, ěfe yora toafo õikĩ mã tãpitiro ě Jesús yonosharaxonaito ea iskafamisfo. Nãskakẽ anã ea fekaxtefayamakãfe.

<sup>18</sup> Efe yora mĩshtichi, nõko Ifo Jesucristo keyokõi mato noikĩ mato sharafa fafãini. Nãskapainõ. Nã tii.

*Pablo*



## Pablo Efeso Anoafu Kirika Kenexō Fomani

### *Pablo ato yoisharani, Efeso anoafu*

<sup>1</sup> Ēkīa Pablo ē mato kirika kenexō fomai. Ea Jesucristo nīchia ē aōxō āfe meka yoimis inō, Niospa fichipaiyai keskafakī. Ē na kirika mato fomai a Nios Ifofaafu, Jesucristo chanīmara faafu, Efeso anoafu. <sup>2</sup> Nōko Epa Nios feta nōko Ifo Jesucristo mato shināsharanō mato noikī mātō shinā mēra mato shināmasharanō, mātō ōiti fekaxtenōma.

### *Nō Cristo chanīmara faito afara sharafo noko amatiro*

<sup>3</sup> Nōko Ifo Jesucristo āfe Apa Niospa noko afara sharafo noko shara famai, nai mēraxō nō ōiamafaito nōko ōiti mēra noko inimamasharai nōmāi āfe fakefokē. Nāskakē nō yoisharai nō inimasharakōi Epa Nioski. <sup>4</sup> Epa Niospa mai yafi nai onifayoxoma noko katonī nō afe ĩpaxanō āfe Fake Cristo keskara afaa chakafamisma keskara sharakōi nō inō. Niospa noko noikī, <sup>5</sup> āfe fakefo noko fani. Anori shināni Niospa a Jesucristo noko nāxoyoxiai. <sup>6</sup> Nāskakē Niospa āfe Fake noikōikī nokori nāskarifai noikī. Nāskaxō noko nimasharapakenaka. Nāskakē Nios sharafinakōikē nō aicho fai akiki inimakī nokomāi afama mīshti sharafo famaito Jesúsxō. <sup>7</sup> Niospa noko noikī finakōikī āfe Fake Jesús noko nāmā nīchixonī nokoōnoax āfe imi foax ifi cruz ikakinoax noko nāxonō nō sharakōi afe inō, askatari nōko chaka nokoōnoa noko soxonō. <sup>8</sup> Nāskaxō Niospa noko ōimana noko noisharakōikī noko tāpimasharakōikī, askatari noko shināmakī finakōi. <sup>9-10</sup> Nāskakē Epa Niospa yoini afama mīshti onifayoxoma āfe Fake xanīfo imaxikī, keyokōi, nai mēranoafoya, nāmānoafoyari āto xanīfo finakōi inō. Tsoa pishta anori meka nikayomisma Niospa onāxō yoini a shināi keskafakī, anori noko tāpimani nō tāpisharanō aōxō. Nāskakē Niospa āa shinākī iskafani: “Nā ēfe Fake ē nīchipaiyaitīa ē nāmā nīchixii keyokōi nai mēranoafoya, nāmānoafori āto xanīfokōi inō,” ixō Niospa shināni. Nāskaxō nānori iskaratīa noko tāpimana.

<sup>11</sup> Nōfi Cristo fakekōifokī. Nō afe yorakōifo ikaito, Epa Niospa noko katonī noko onifayoxoma āa shinākī taefani. Epa Niospa nonori iskafakī shināni: “Na ēfe Fake Jesús ē ināi keskari fakī nā ēfe Fake Jesús Ifofaifori ē ato ināira,” ixō Epa Niospa shināni. A Niospa shinākī yoini keskara, nāskarifakī iskaratīa mā askafaa. <sup>12</sup> Akka nō Cristo Ifofakī taefaxō nō yoikī iskafanō: “Epa Niosi, mī fāsi sharakōi. Mī noko sharafamis keskara sharakōi. Tsoa fetsakai mia keskara sharama,” ixō nō yoinō.

<sup>13-14</sup> Nāskakē ē mato yoi mākai judeofoma. Nāskafixō Niospa meka shara Jesúsxō mā nikakī māri chanīmara fai. Mā askaito Niospa mato chaka soaxona mā afe nipaxanō. Nāskakē māri iskaratīa Cristo afe yorafokī. Anori Niospa yoikī taefani keskafakī, āfe Yōshi Shara nō mēra nanea noko ĩkinō. Noko askafaito nō tāpitiro āfe shara noko ināxii. Nāskaxfi nō Niosnoafoki. Nāskakē nō tāpiama afetīara nai mēra noko ifi. Taekōifakī anori noko yoini. Nāskakē nā chanīmara fakī nō yoipakenaka: “Nōko Nios fāsi sharakōi,” ixō nō yoipakenaka.

*Pablo Epa Nios yōkani iskafakī: “Epa Niosi, mī Fake chanīmara faafu ato tāpimasharafe,” fani*

<sup>15-16</sup> Nāskakē nirixō ē mato nikai mā Jesús Ifo sharafata, a fetsafo ferī a mato feta Nios Ifofamisfo fe mā rafesharakōiaito ē nikakī inimayanā ē nirixō ē mato Epa Nios kīfixōfafāini. Nāskakē ē iskafa fafafāini: “Epa Niosi, na Efeso anoxō mia noisharakata fetsafo ferī rafesharakōiafo,” ē fai yoikī. <sup>17</sup> Niospa āfe Fakekōikī Jesucristo. Nāskax sharafinakōia. Nāskakē ē mato kīfixokī iskafamis: “Epa Niosi, mī Yōshi Sharapa na Efeso ano ikafo ato tāpimasharakōife mia xafakīakōi tāpisharakōinōfo. <sup>18</sup> Oa xini peisharaino nō fomākīa foiski nō nai xafakīakōishara nō ōitiro keskara, mī Yōshi Sharapa ato ōimafe

Epa Niosi, mia tãpisharakõinõfo ãto õiti mëraxõ. Askatari ato tãpimafe a nõ oniyamatai mĩ noko shinãni nono nãmãxõ mĩ Fake Jesús nõ Ifofaax nõ mefe ìpaxanõ nai mëra. Askatari a nõ õimismafo mĩ noko inãxiai ato õimafe. <sup>19-20</sup> Epa Niosi, mĩ Yõshi Sharaõxõ mĩ afama mĩshti famis. Nãskaxõ mĩ Fake Cristo mĩ anã nimani mĩ Yõshi Sharaõxõ mefe pataxamei niax mefe xanìfokõi inõ. Nãskax mĩ põya kayakai aõri mefe tsoa. Afia mĩ Yõshi Shara nõ mëra nanexõ a nofeta mia chanĩmara faafo tii afara fetsafo mĩ noko ispasharakĩ mĩ noko amasharakĩ.” <sup>21</sup> Æfe Yõshi Sharaõxõ Cristo ato mãnão nĩxõ, nã nãmãnoafo ãto xanìfo tii finõkõia. Askatari nai mëranoafori ãto xanìfofo Cristo ato finõkõia keyokõi. Nãskax ãto xanìfo finakõia. Tsoa pishta finõtiro. <sup>22-23</sup> Akka Epa Niospa ãfe Fake yoini keskafakĩ keyokõi mai anoafoya nai mëranoafo ato ìkinã. Nãskaxõ ãfe Fake katonì nã chanĩmara faafo tii ãto Ifo inõ. Nã chanĩmara faafofi ãfe yorakõi keskarafoki. Cristo ãto mapo keskara. Akka nõko mãpo nõ shinãtiro. Nã fistichi nã chanĩmara faifo yoitiroki, noko ìkinãno afeskaxõ nõ atiomãki. Akka nõ mapomaisax nõ nitiro. Nãskarifiyai nõko Ifo Jesúsmasax tsoa nitiro. Keyokõi nã chanĩmara faafo nofe ikafo. Nãskax nofe rafe kakãini nã noko amapayai keskara nõ anõ.

## 2

### *Niospa noko noikĩ noko ifia nõ afe ìpaxanõ*

<sup>1</sup> Taeyoi mã iyopaoni oa naa keskara mãto chaka soaxma. <sup>2</sup> Nãskakẽ mã afara chakafamis, a yora chakafãfe akai keskafakĩ. Askata a nai mëra ikafãfe a niafaka chakafãfe ãto xanìfãfe Satanás mato amapayai keskafakĩ mã amis, Satanás ifofakĩ. <sup>3-4</sup> Nõri askafapaoni, nã nõ afara chakafapayai fo keskara nõ apaoni. Afara chaka shinãmiskõifo nõ ipaoni. Epa Niospa nã nikayospamisfo ato omiskõimanaitĩa ato omiskõimakõixii. Nõri ato keskaraxõ nõ afara chakafaito nã ato akai keskafakĩ nokori omiskõimakerana. Akka nõ afara chakafafiato noko omiskõimatama. Niospa noko fãsi noisharakõimis, noko shinãkõikĩ noko omiskõimapaima. Noko chakafapaimisma. <sup>5-6</sup> Nõ Nios Ifofayoxoma nõ shinãyopaonima, chaka fistis nõ shinãyopaoni, nõ chakafayopaoni. Niospa noko noikõifiaito, nõ oniyamatai ares noko Niospa õikĩ yoini: “Na ãfe Fake Jesús Ifofaifo ãto nãmã nĩchixonì mã reteafono, ãto ofofaxõ, ato yafi ifixii niri nai mëra afe ìpaxanõfo,” ixõ Niospa yoini ares õikĩ afe ikaifono ato omiskõimayamaxii. Nãskakẽ nõ nãmãnoax oa nõ afe nai mëra ika keskara nõ nono ika nãmã. <sup>7</sup> Epa Nios xanìfokõixõ Jesús yafi noko otoani noko noikõikĩ nõ afe nai mëra ìpaxanõ, nã chipo fakeaifãferi tãpinõfo Epa Niospa noko noikõiaito. <sup>8-9</sup> Nios sharafinakõia. Nõ Jesús chanĩmara fakẽ noko ifi nõ afe ìpaxanõ. Akka nõa nõ ifimetiro, Nios fistichi noko ifitiro noko noisharakõikĩ. Akka nõ afarafo shara fatokai noko ifitiro nõ afe ìpaxanõ. Akka fetsafo ãa chanĩkani iskatirofoma: “Ë afama mĩshti famis. Nãskakẽ ã tanaima sharakõi Nios ano kai,” ixõ yoifiax askara yorakai Nios ano katiroma ãamãi chanì Jesús Ifofaamax. <sup>10</sup> Nãskakẽ Epa Niospa taeyoi shinãyoni Jesucristoõxõ yorafetsafo nõ axosharakõinõ. Nãskakẽ aa fistichi noko onifani afara fetsafo nõ sharafanõ aõxõ. Akka nores fisti nõ afaa sharafatiroma. Cristo Jesús Ifofaxõ nõ afama mĩshti sharafatiroma. Nãskakẽ taeyokĩ Epa Niospa ares õikĩ yoini.

### *Jesucristoõnoax nõ õiti sharakõiya ipanaka anã nõko õiti chaka neenõma*

<sup>11</sup> Nãskakẽ shinãmakiyamakãfe. Mã chanĩmara fayopaonima. Nã judeofãfe yora fetsafo ato yoikĩ iskafanifo: “Nã yora fetsafo nõko kaifoma. Akka nõfi Niospa yorafokĩ. Akka na yora fetsafokai Niospa yorafoma. A Niospa noko yoimis keskafakĩ keyokõi nõko foshki repa nõ xatepakemis na nõ judeofãfe. Nãskakẽ nõ õimani afe yorakõifoxõ. Akka a yora fetsafãfe ãto foshki repa xatemisfoma. Nõ ato tãpitiro afokai Niospa ãfe yorafoma,” ixõ judeofãfe mato yoimis mã judeofokẽma. <sup>12</sup> Akka shinãkapo. Taeyoi mãkai Cristo fe iyopaonima. Epa Niospa israelifo ato katonì keskafakĩ matorikai katoyonima mã ato fe afe yorafo ipanã. Afe yorafo yoiyoni keskafakĩ matorikai yoiyonima. Mã shinãkĩ

iskafani: “Ooa. ¿Nō afeskatromē nōko chaka noko soaxonō nō Nios fe ipaxanō?” ixō mā shināpaoni. Nāskatari nā Nios chanīmara faafoma mēra mā iyopaoni. Mā Nios fe rafexoma mā tāpiyopaonima. <sup>13</sup> Nāskaxō mā Niosnoa shināyopaonima. Nāskafiano Cristo Jesús matoōnoax naino, āfe imi foni mā afe ipaxanō. <sup>14</sup> Nāskakē Jesucristoōnoax nō noinātiro, ēfe kaifo israelifo fe yora fetsafo. Nāskakē nāskarafos noko shināmasharatiro nō aōnoax noinā faatanāx afianā nō noikaspa faatanānōma. Nāskakē afanā noko anā afeska fatiroma. Iskaratīa nō Cristoōnoax yora fisti keskarafō. <sup>15</sup> Nāskakē Jesús nokoōnoax nani. A Moisés Niosxō keneni keskara anā noko tsōa yoitiroma. Jesucristo keyokōi noko nāxoni nō afe yorafo inō. Nāskakē mārī judeofoyamafekē, mato yafi noko ifini. Nāskax a yora fisti keskarafō nō inō. Mā nō fetsa keskarax ōitisharayaokōifo nō inō noināsharakōi. <sup>16</sup> Nāskakē Jesús ifi cruz ikakinoax noko nāxoni. Na ēfe kaifo judeofo yafi a judeofomari Jesúsxō Niospa noko a yora fisti keskara noko fani. Noko noisharakōikī nō nikayospafo iyopaofinikē, Jesús nokoōnoax nani. Nāskakē Niospa noko yora fetsafoya rafema sharakōia afe yorafo nō inō.

<sup>17</sup> Nāskakē Jesús nāmā fotoxō noko yoini āfe meka shara Niospa noko ifinō. Noko judeofo akai keskafakīri, matori ifia mā judeofoyamafekē mā Nios shināyopaoni. Akka nō judeofāfe nō Nios shināyopaoni. Nāskakē iskaratīa nō anā noikaspa faatanātama nō nōināsharakōi. <sup>18</sup> Jesús noko nāxoni nōko chaka noko soaxoxiki nō Nios fe rafesharakōinō afe ipaxakī. Nāskakē Niospa āfe Yōshi Shara nokoya rafemana na nōko kaifomafo fe nō rafesharakōinō. Nāskax Epa Nios fe nō ipaxanō.

<sup>19</sup> Nāskakē iskaratīa mā anā Nios chaifaama mā afe yorakōifo. Nāskakē iskaratīa a Jesús Ifofamisfo fe a rama Jesús Ifofaifo Niospa yorakōifo. <sup>20-22</sup> Nāskax mā oa pexe sharakōi keskarafō. Oa tokiri nō pexe shara faa, afeskax paketiroma keskara. Taefakī nō mai pōkita a mēra tokiri nanexō, nō pexe fatiro pakeyamanō. Tokiri kerex sharakōiki nō atiro pexe fakī. Nāskarifiakī taefakī a Niospa mekaōnoa ato yoipaonifāfe ato yoipaonifo Niospa ato shināmanaino. Akka chipo mā Jesús nāmā fotoxō, aōxō tāpimisfo ato ifini aōxori a fetsafo tāpimanōfo, oa pexe fisti mēra nō imis keskaraxō, akairi ato tāpimanōfo Niospa meka sharaōnoa ato yoikakī, atoōxori yorafāfe chanīmara fanōfo. Askaxori a rama fakeaifāferi Jesús Ifofakanax, oa nō pexe mitsisipakōi faano, anā paketiroma keskarakōi inōfo Jesucristo Ifofakanax. Nāskakē nōri Ifokōi faax, nōri anā paketiroma nō keyokōichi Ifofaax. Oa pexe sharakōi mēra nō ika keskara, nō ixii, Niospa āfe Yōshi Shara nō mēra naneano.

### 3

#### *Niospa Pablo yoini a judeofoma Jesúsnoa yoinō*

<sup>1</sup> Nāskakē ē mato Epa Nios yoixonī. Ēfi judeokī mā ēfe kaifoyamafekē ē mato noi. Mato noixō, ē mato Jesucristoōnoa yoi. Nāskakē ea achixō karaxa mēra nīchitifo. <sup>2-3</sup> Niospa ea nīchini ē aōnoa ē mato yoinō. Niospa keyokōi yorafo ato noi, judeofo fisti ato noima. Akka a iyopaonifāfekai tsōa tāpiyopaonima Niospa ares ato noifaito. Nāskakē ē aōnoa ē mato kenexona, pishta fakī. <sup>4</sup> Na ē mato kenexona ōixō, mā tāpitiro nā ē tāpia keskafakī Cristoōnoa. Akka a nōko xinifo iyopaonifāfekai tsōa tāpipaonima. <sup>5</sup> Niospa taefakī tsoa tāpimayonima. Mā iskaratīa Niospa āfe Yōshi Sharaōxō a aōnoa yoimisfo mā ato tāpimana. Askatari a āfe mekaōnoa yoimisfori mā ato tāpimana. <sup>6</sup> Akka na meka sharakai tsōa Jesúsnoa tāpiyopaonima. Akka yora fetsafori Epa Niospa afe yorafo itirofo. Nāskakē iskaratīa matori Niospa tāpimani, judeofoya yora fetsafo Jesúsnoax Niospa fakefo mā inō. Nāskakē Epa Niospa āfe kaifo judeofo yoiyoni keskafakī Jesucristoōxō akairi fitirofo.

<sup>7</sup> Nāskakē a Jesús Ifofafo ē ato chakafafaito, ea noisharakī Epa Niospa ea nīchini ē āfe meka shara ato yoinō āfe Yōshi Sharaōxō. <sup>8</sup> Ē fāsikōi Jesús chakafakī finakōipaoni, na fetsafāfe chakafakī finayamafiaifono. Ē askafafaito, ares fisti Niospa ea noikī ea nīchini aōxō na yora fetsafo judeofoma ē āfe meka shara ato yoikī tāpimanō Niospa ato

noisharakōiaito. Ato noikī ato shināmakōipai. Nios fisti tsoa keskaramakōi. Āfe Fake Jesúsnoa keyokōi nō tāpitiroma. <sup>9</sup> Niospa keyokōi onifaxō, ea nīchini ē ato mēstesharakōi tāpimanō. Tsoa pishta tāpiamano ares fisti tāpini Jesús noko nāxoyoamatai ato tāpimanima. <sup>10</sup> Nāskakē Niospa ea nīchini āfe meka sharaōnoa ē ato yoinō akairi Nios tāpinōfo. Tāpikanax oa ato fe yorakōifo keskara ixikakī Jesúsnoax. Mā askaito nai mēraxō a xanīfo tiito askara ōikī tāpisharatirofo. “Chanīma, Niospa tāpikīfinakōia,” fatirofo. <sup>11</sup> Afaa pishta onifaatama nānori shināni: “Na ēfe Fake Cristo Jesús Ifofaifo efe yorakōifo ixikani,” ixō yoini keskara mā iskaratīa askakōia. <sup>12</sup> Jesúsmai noko nāxonikē, nō Ifofaax, nō Nios fe rafesharatiro mesetama noko potayamanō. <sup>13</sup> Ē mato yoinō, ea nikakāfe. Ē mato yoiāito ea nikakakī ea karaxa mēra ikimatifo. Ē omiskōifiaino eōnoa shināchakayamakāfe. Ea karaxa mēra ikimanafoki ē Cristoōnoa mato yoiaino. Nāskafekē inimasharakāfe, mā Niospa yorafokī.

### *Cristo noko noi*

<sup>14</sup> Nāskakē nāfo shinākī ē ratokonō mai chachipakefōfā ē Epa Nios kīfimis. <sup>15</sup> Nāmāi nai mēranoafo feta nono mai anoxō nā Ifofaafāfe āto Epakē, nāato ēfe fakefora noko famis. <sup>16</sup> Nānori ē mato Epa Nios kīfixokī iskafamis: “Epa Niosi, mī fāsi sharakōi. Maitiofo yafi nai mēranoafo mīnākōifo. Mī afama mīshti fatiro. Mī Yōshi Sharaōxō mia chanīmara faafo Efeso anoāfo mī kerex shara ato ināfe. <sup>17-19</sup> Nā Jesús Ifofaāfo mī Yōshi Shara atoya rafemafe. Mia tāpikī finakōinōfo. Askaxō tāpinōfo mī fāsi ato noiāito. Mī Fake Cristori fāsi ato noi. Cristo noko noiāi keskara tsōa tāpitiroma. Askafikē ato tāpimafe, Epa. Akka tāpikanax, mī ato fe rafekōiaito mia keskara inōfo,” ixō ē matoōxō Epa Nios kīfifāfāini.

<sup>20</sup> Akka Epa Niospa afama mīshti fatiro a nō yōkai tii noko axotama finōmata noko axotiro. Nāato āfe sharaōxō noko axotiro afama mīshtifo. Noko axopaiyai keskafaito nō tāpitiroma. Finōmainīfōfāta noko shara fatiro. <sup>21</sup> Nāskakē nō Epa Nios yoikī iskafatiro: “Epa Niosi, mī sharafinakōia. Mī Fake Jesucristoōxō mī noko sharafamis,” ixō mēxotaima nō yoifafāini. Keyokōichi nā chanīmara faafo feta a inōpokoāifāferi yoisharapakenakafo. Nāskapakexapainō.

## 4

### *Niospa Yōshi Sharaōnoax oa yora fistikōi keskara nō itiro*

<sup>1</sup> Ē mato yoisharakōi. A Jesucristoōnoa ē mato yoimis. Ē ato yoiāito a Jesucristo nikakaspaifāfe ea karaxa mēra nīchiafo. Ē mato yoisharanō, ea nikasharakōikāfe. Niospa mato katonī Jesucristo mā Ifosharakōi fanō. A ē mato yoiāi keskai isharakōikāfe. <sup>2</sup> Nāskax, “Ē finakōia,” iyamakāfe, anori shinātama. Yora fetsafo noisharakāfe ato shinākī. A fētsa tāpisharamato mato afeskarafaito, shināchakatama ato noisharakāfe, ōitifishkitama, isharakōita. <sup>3</sup> Niospa Yōshi Sharaōnoax nō isharakōinō a yora fistikōiax itikini. Tanaimakōi ikāfe, ōitifishkiki faatanākakīma. <sup>4</sup> Niospa noko yoimis keskai: “Isharakōikāfe, nōko Ifo ifofasharax, mā chaima anā fotoiyoi kiki,” shināi isharakāfe. A Nios Ifofaāfori oa nofe naneafo keskarakōifoki. Nāskax isharakāfe. Niospa āfe Yōshi Shara askarakī. <sup>5</sup> Nōko Ifokōi Jesucristo. Nā fisti nō chanīmara fai Epa Nios fe ipaxakī. Nāskakē āfe Yōshi Shara nō mēra nanei. <sup>6</sup> Anā fato fetsa nōko Niosma. Nā fistikōi āfe Fake fe a chanīmara faafo tiito āto xanīfokōi. Nāskaxō keyokōi onifani. Nāskakē a Ifofaāfo āfenākōifo. Nāskaxō afara sharafo noko amai nōko shinā mēraxō afe keskararafo noko amatiro. Āfe Yōshi Sharaōxō keyokōi a fichipaiyai keskara nō anō āfe shinā noko ināi.

<sup>7</sup> Nō Jesús Ifo sharafaito ōikī āfe shara noko minia fisti rasi chanīmara faifo nō ato axonō Jesús Ifofasharakōinōfo. Keyokōi āfe sharaōxō afara fetsa nā Jesús apaiyai keskara anōfo ato ināi. Nō fisti keskarafiakē nā noko imapaiyai keskara noko ima nō afara axonō.

<sup>8</sup> Nāskakē Niospa meka Cristoōnoa yoikī David kirika kenekī iskafani:

Nono mai anoax Apa Nios ari kaitīa nā Ifofaafō tii āto chaka ato soaxoni afianā Satanās āto ifo inōma, askatamaroko Ifo sharakōi fanōfo. Nāskatari keyokōi nā afe yorafo ato imapaiyai keska fakī ato imani aōnoax ishara faatanānōfo, ixō kenei.

<sup>9</sup> Nāskaxō kenekī iskafani: “Nono mai anoax Cristo afianā Apa Nios ari kani,” ixō kenei. Nānori kenenino nō tāpitiro Apa Nios ari kayoamano na mai ano fotoyonino nai mēranoax noko keskara ixiki. <sup>10</sup> Niospa yoiaino, ftoni. Mā reteafono āfe Apa Niospa otoani. Nāskaxō ifini afe nai mēra ixii. Nāskakē keyokōi nai mēranoafōfāfe nono nāmānoafāferi āto xanīfo ixii. <sup>11</sup> Nāato noko katoni noko imapaiyai keskai aōnoax nō shara faatanānō. Nāskaxō fetsafo afe rafemisfo ato imata, nokōri nīchi aōnoa fetsafo nō ato yoisharanō. Fetsafori katoni nā meka shara aōnoa ato yoinōfo Jesús Ifofanōfo. Fetsafori katoni āfe meka shara chanīmara faifono ato tāpimayanā ato kexesharanōfo āfe meka nikasharakōinōfo. <sup>12</sup> ¿Afeskakī ato Niospa katonimē? Aōxō yoinōfo Niospa ato katoni a yora fetsafo ato yoisharanōfo, a Jesús chanīmara faafo aa yora fisti keskara inōfo Jesús tāpikōikanax. <sup>13</sup> Afāfe Niospa Fakeōnoa noko tāpimasharakōiaifono, aōxori fetsafori nō ato yoikī tāpimasharanō. Askax keyokōi oa yora fistikōiax itikini nō inō. Askaxori Jesús afe keskaramāki nō tāpisharakōinō. Askax oa Jesús ōiti keskara sharakōi ixiki. <sup>14</sup> Nāskax anā oa fakefo keskara nō itiro ma mā nōmēra Niospa meka yosiano. Oa nefe onori kai, anā onori kai imis keskai, fakefo askatirofo afaa shināsharaima. Askaxō a Niospa meka tāpisharafāfema ato yoiāifāfe nikafofāsa fatirofo. Askaxō tāpisharaxikakīma Niospa mekakōi. Askatari a yora āa chanīki fanīrira ato yoimis nō nikatiro ma. <sup>15</sup> Fanīrira ato yoitama nō nōināsharakōixō Niospa meka mēstesharakōi nō ato tāpimasharakōitiro. Nō askai nōko Ifo Jesucristo āfe ōiti keskara sharakōi nō itiro. <sup>16</sup> Jesús nōko mapo keskaraxō noko shināmākī noko yonomanaino, oa afe yora keskara nō itiro. Akka nōko yora meemafīax nō mifimais ita, nō kishimais ita, nō pachomais ita, nō feromais ita, ixō nō afaa yonotiro ma, afaakairoko shinākī. Akka nō mifi rafeyata, nō tae rafeyata, nō fero rafeyata, askai fetsexō nō meemasharakōixō nō yonosharakōitiro shināfāi, nōko yoramāi meemasharakōikē. Nāskafakīri keyokōichi nō Jesús Ifokōi faax nofe yorafo fe nō isharakōitiro noināsharakōikai, Jesúsnoax mā noko āfe Yōshi Shara ināno oa āfe yora keskara sharax.

*Cristo nōko ōiti noko fetsafaxōano a keskarakōi nō itiro, anā nō ipaoni keskara ixikima*

<sup>17</sup> Jesucristo ea īkinā aōxō ē mato yoinō. Ea nikasharakōikāfe a Jesús Ifofamisfāfema fanīrira chaka fisti yoimisfo fanīrira shinā kakī. Nāskakē tsōa shināsharaima. Nāskakē ato keskara iyamakāfe. <sup>18</sup> Tsōa shināima oa fakishifā mēra niafo keskarafo. Askatari oa feromais keskara ikafo chai ōima. Nāskakē tsōa tāpifāi shināmisma. A Niospa shināi anori shināmismisfoma. Nāskakē tsōa Nios Ifofapaimisma. <sup>19</sup> Āto ōiti kerexkōi. Askakaxō afarafo chakafakani tsoa rāfitiro ma. Nikayospakōimiffo, nō finakōiara ikani nikayospakani. <sup>20</sup> A Jesús noiaifāfema shināifo anori mato Jesús tāpimamisma fanīrira chaka. <sup>21</sup> Jesús mato tāpimamis chanīkī mato yoimisma. <sup>22</sup> A Nios tāpīamax mā iyopaoni anori anā shināyamakāfe. Fanīrira mato Satanās shināmayopaoni mā chaka inō. <sup>23</sup> Anā anori shinātama, iskaratīa Niospa Yōshi Sharapa mato shināmapaiyai anori shinākāfe a mā iyopaoni shināmākikāta, isharakāfe. <sup>24</sup> Ōiti fenashara fichipaikāfe. Oa nō rapati chapokōi potaxō nō rapati fenasharakōi nō safemis keskafakī, ōiti fena sharaya ikāfe Niospa fichipaiyai keskai.

<sup>25</sup> Nāskax nō Cristo yorafo. Nāskakē anā fanīrira chanī yoiyamakāfe. Afara ōixō yoikōikāfe chanīmakōi.

<sup>26</sup> Mā ōitifishkikī anā afarafo chakafayamakāfe. Askata aa chai ōitifishkiyamakāfe. Ōitifishkipai samama raekāfe xini ikiyamano. <sup>27</sup> Mā ōitifishkiriāito koshikōi Satanās mato chakafamarisafai. Askayamakāfe Satanās nō mēra ikiyamanō.

<sup>28</sup> Mā yometsoyopaoni anā askayamakāfe. Iskaratīa yonokāfe a mā fichipaiyai fixikakī, a yora afaamaisfo ato ināxikakī afara sharafo.

<sup>29</sup> Askata anā fanīrira chaka yoiyamakāfe. Shināsharata yoisharakāfe. Mā askaito mato nikakanax āto ōiti mēra inimanōfo. Askatari Jesús Ifofasharanōfo. <sup>30</sup> Askata Niospa āfe Yōshi Shara nōko ōiti mēranoa omiskōimayamakāfe afara chakafakī. Askatamaroko nōko Ifāfe āfe Yōshi Shara nokoōnoa inimamasharakōikāfe. Āfe Yōshi Shara nō mēra naneakī, oa koxa marakka faa keskarafakī Niospa noko askafaa nā Jesús anā fotoaitīa.

<sup>31</sup> Māto yora mēraxō mato ōiti fishkimamis a chaka shināmakikāfe. Ato noikaspai ōitifishkikī finakōimis iyamakāfe. Afaa shināima oa ōitimaes keskara āakōi mekai keskara iyamakāfe. Fāsikōi yōachepemis ato feratēni iyamakāfe. Ato noikaspakī ato īchayamakāfe. Mā chakara ato fayamakāfe. Mākōi chakafakī ato noikaspayamakāfe. <sup>32</sup> Askatamaroko ato fe raenā faatanāsharakōikāfe, a mato Niospa aka keskafakīri Jesúsxō ato rafakāfe.

## 5

### *Afeskax Niospa fakefo itirofomē*

<sup>1</sup> Mā Niospa fakefokē mato noisharakōi. Nāskakē a keskara ikāfe, Ifofasharakōi. <sup>2</sup> Cristo noko shinākī finakōi nokoōnoax nani. Nōko chaka noko soaxoni. Nāskakē noko nāxoni, aakōi nanima. Nāskaito xafakīa Epa Niospa ōini nōko chakaōnoax nani, anā nōko chaka nokoō neenōma. Nāskakē mā ranāri nōināi finasharakōikāfe.

<sup>3</sup> Mā Niospa fakefokī ōisharata ikāfe. Isharakāi afarafo chaka shinātama. Māto āfimafo chotayamakāfe. Kēromāri māto fenemafo chotamayamakāfe. Askatari mares fisti afama mīshti a mā fichipaiyaifo fiyamakāfe. <sup>4</sup> Askatari fanīrira meka chaka yoiyamakāfe. Anori shinātama a Niospa fakefo isharakōikaxō, mēstekōi yoisharatirofo iskafakī: “Aicho Epa Niosi, mī noko īkisharakōiaki,” ixō mā yoimis. <sup>5</sup> Mā mā tāpimis yora fetsafāfe fanīrira shināmisfo āto āfimafo chotamisfo ato fe oxakaxō, kēromāri āto fenemafo chotamamisfo, askara yorafo Nios ano fokanima. A afarafo noikakī fichipaimisfo, askara yorafāfe afama mīshtifo noikani Nios shinātama, askara yorafo a Nios xanīfo ano fokanima.

<sup>6</sup> Ōisharakakī yora fetsafāfe anorima mato yoipaikani fanīrira āa mato pāarakakī. Askara yorafāfe Nios nikakaspakakī chakafakani. Askaito ōikī Niospa ato kopikiri chakafaxii atoki ōitifishkikī. <sup>7</sup> Nāskakē nā ikaifo keskara mā iyamakāfe. Afarafo ato feta chakafakī, anori shināyamakāfe.

<sup>8</sup> Mā fanīrira shināyopaoni māto ōiti oa fakish keskara ikax, akka iskaratīa mā Cristo fe rafeax a mā iyopaoni keskara anā mā shināima. Māto ōiti xafasharakōia mā ika. Nāskara shara. Mēxotaima isharakāfe. <sup>9</sup> Nāskax mā isharakōimis. Cristo mato īkināno māto ōiti xafasharakōi mā imis. Mā isharakōiax shara mā itiro. Māto ōiti mēraxō mēstesharakōi mā shinākōitiro. Mā anori shināxō anā fanīrira mā yoima. <sup>10</sup> A Niospa fichipaiyai keskafakī tāpisharakōikāfe. Nāskakōi fakāfe. <sup>11</sup> Nā Nios Ifofakaspamisfāfe, afaa tāpiamafāfe afarafo chakafaiifāfe ōiki māri ato feta chakafayamakāfe. Ato ōitamaroko ato yoisharakōikāfe: “Anā afaa chakafayamakāfe,” ixō ato yoikāfe. <sup>12</sup> Askatari a yora fetsafāfe one afama mīshti chakafafiakī onepaimisfo. Askarayakai nō mekaima nō yoi nō rāfitiro. <sup>13</sup> Akka mā fakishano nō rāpari otaxō, keyokōi nō ōisharakōitiro. Nāskarifiāi a yorafāfe afarafo chakafakaxō onepaifaiifāfe, Niospa meka ōikī tāpitirofo a chakafamisfo. <sup>14</sup> Nāskakē Niospa yoimis iskafakī:

Afarafo mā chakafamiski moinīfofākāfe oa mā naa keskara ikax fininīfofākāfe Cristo māto ōiti mēra oa fafeai keskara mato fasharanō, ixō yoimiski.

<sup>15</sup> Nāskax isharakōikāfe. Oa Niospa meka tāpiama keskara iyamakāfe. A Niospa mekaōnoa yoikī kenenifo anori isharakōikāfe. <sup>16</sup> Nāskakē a Nios Ifofaafomafo iskaratīa chakafinakōiafo. Nāskakē māri isharakōikāfe ato keskara ikakīma. A Niospa apaiyai keskara akāfe mēxotaima. <sup>17</sup> Nāskakē fanīrira chaka shināpaiyamakāfe a Niospa mato

amapaiyai anori tãpisharakõikãfe. <sup>18</sup> Askatari anã pãeyamakãfe. Mẽxotaima pãeriai mã chakakõifo itiroki. Askaxõ mã afaa shinãsharaima. Askatamaroko Niospa Yõshi Shara mato mẽra naneano afe rafesharakãfe mato yonomasharanõ. <sup>19</sup> Nãskakẽ mã ranã Niosnoa yoinõnãkãfe isharakõikai. Nõko xini David mẽxotaima fanãipaoni keskariai mãri Nios Ifofaax aõnoax fanãikãfe mã ranã mãto õiti mẽraxõ nõko Ifo shinãi inimayanã. <sup>20</sup> Pena tii aichora fakãfe Epa Niospa noko afama mĩshti faxõfaino, nõko Ifo Cristo shinãyanã nõ Ifo sharafanõ.

### *Afe keskara nõ itiomẽ Cristo yorafo*

<sup>21</sup> Cristo nikasharapai, mã ranã nikanõnãsharakõikãfe.

<sup>22</sup> Kẽromãri a mãto Ifo Jesús mã nikasharai keskafakĩ, mãto fenefo ato nikasharakõikãfe mato yoisharaifãfe, mãto Ifo Jesús mã nikai keskafakĩ. <sup>23</sup> Cristo nõko xanĩfofinakõia nõ nikasharai keskafakĩ, kẽrofãferi ãto fenefo nikasharakani ãto xanĩfomãiyakẽ. Askatari Cristo noko ifimis nõ nikasharakõitiro oa nõ afe yorakõifo keskaraxõ. <sup>24</sup> Nãskakẽ kẽromã ãfe fene nikasharatiro ãfe xanĩfomãiyakẽ a nõko Ifo Jesús chanĩmara faafo tiito nikasharaifo keskafakĩ.

<sup>25</sup> Nõ Cristo Ifofaano noko noikõiax aakõi nokoõnoax nani. Nãskarifikĩ feronãfakefãfe, mãto ãfiffo noisharakõikãfe. <sup>26</sup> Mã ãfe meka chanĩmara faito, oa noko fãka choka keskara faxõ noko katonu, oa nõ afaa chakafamisma keskara noko imaxii. <sup>27</sup> Mã noko ifiax, nãskax nokoõnoax nani nõko chaka noko soaxoxiki nõ isharanõ. Nã anã nõko Ifo Jesús oaitĩa a chanĩmara faafo tii noko ifixõ sharakõi noko õixii, oa nõ afaa chakafamisma keskara noko õixii. <sup>28</sup> A feronãfakefo ãa noimesharaifo keskafakĩ, mãto ãfiffo noisharakãfe. <sup>29-30</sup> Akka shinãkapo. Tsõa pishtakai ato yora chakafamisma. Nõko yora nõ mesefakĩ fonãikĩ nõ pimis shara nixiki. Nãskafakĩri Cristo a afe yorafo ato kexesharamis mãmãi nõ afe yorakõifokẽ. <sup>31</sup> A Niospa meka yoimisto keneni iskafakĩ: “Nãskakẽ feronãfake kẽro fiax anã apa fe afa ikanõ anã ano itiroma. Paxkatiro, ãfi fe ixiki. Askax oa fisti keskara ixiki anã rafema,” ixõ yoikĩ keneni. <sup>32</sup> A Niospa meka yoimisto keneni anori taefakĩ tsõa tãpinima. Mã iskaratĩa noko Niospa tãpimasharai a nõko Ifo Cristo Ifofaafõ tii afe yorafokanax, oa fisti keskara afe yorafo ixõ keneni. <sup>33</sup> Ë mato yoi fisti rasichi mãto ãfiffo noisharakõikãfe. Mẽxotaima aa mã mã noimeai keskafakĩ mãto ãfiffo noisharakãfe. Askatari kẽrofãferi ãto fenefo noisharakõikaxõ nikasharakõinõfo.

## 6

<sup>1</sup> Fakefãfe, mãto epa nikasharakõikãfe mãto efa yafi, nõko Ifo Jesús noikĩ. Nãskara sharakõi. <sup>2-3</sup> Epa Niospa Moisés shinãmanaino kirika keneni iskafakĩ askara nõ nikanõ: “Mãto epa yafi mãto efa noisharakõiyãno ato nikasharakõikãfe. Mã askafakĩ nono mai anoxõ xinia ranã mã aki inimayanã,” ixõ Niospa shinãmaino Moisés kirika keneni.

<sup>4</sup> Iskaratĩa ãto apafõri ã yoisharai. Mãto fakefo ferateyamakãfe matoki õitifishkiyamanõfo. Atõ askafatamaroko a nõko Ifãfe noko noiai keskafakĩ, mãto fakefo tãpimasharakõikãfe. Fenãmãshta ato yoisharakõikãfe akairi Jesús tãpisharakõinõfo.

<sup>5</sup> Askatari ato yonoxomisfãferi mãto xanĩfo tii ato nikasharakõikãfe, nono mai anoxõ mato yonomanãifãfe mãto xanĩfo tiito. Nãskakẽ mato yoiaifãfe ato nikasharakõikãfe, nã nõko Ifo Jesús fichipaiyai keskafakĩ mã samama ato axorisa fai. Askatari mãto xanĩfãfe mato yonomanaito mã axosharatiro. Nãskakẽ, “Ë Cristoõxõ yonosharai,” ixõ nõ yonosharatiro. Nãskarifikĩ ãfe xanĩfori ã yonosharaxotiro. <sup>6</sup> Mãto xanĩfãfe mato õiainos yonoxosharakakima, mato õiayamafiainori yonosharaxokãfe inimakõiyãno. Mã askaito õi inimanõ. Mã mãto xanĩfo yonosharaxokĩ, nã nõko Ifo Cristo yonoxona keskara mã faikai. Akka nono mai anoxõ mãto xanĩfo mã inimama keskafakĩ, nõko Ifo Niospa mato amapaiyai keskara mã axikai. Nãskax nõko Ifo Jesús ãfe yonomati ixikakĩ. <sup>7</sup> Inimasharakĩ yonosharaxokãfe. A mã nõko Ifo yonosharaxonai keskafakĩ mãto xanĩfori

yonosharaxōkāfe inimayanā. <sup>8</sup> Mā mā tāpia yorafāfe yonosharaifāfe ōikī, Cristo afara sharakōifo ato ināxii, a xanīfomais ināta a xanīfoyari ināxii.

<sup>9</sup> Nāskakē mā xanīfofofāferi, a mato yonoxomisfo ato shara fakāfe. Nō mato chakafaira ixō ato ferateki koshapaiyamakāfe. Shinākāfe, māri Ifoyakī a nai mēra ika. Nōko Ifo Cristo keyokōi nāskarafos noko ōi kiki.

*Afeska nā nō chanīmara faafo tii nō mitsisipasharakōi itiro mē fetsafāfe noko afara chakafamapaiyaifono nō afaa afeska fanōma*

<sup>10</sup> Ē mato yoisharanō, ea nikasharakōikāfe, efe yora mīshtichi. Nōko Ifo Niosnoax nō mitsisipakōi itiro āfe Yōshi Shara no mēra naneano. <sup>11</sup> Ē afara fetsaōnoa mato yoinō mā tāpinō. Sorarofō āto xanīfāfe ato yoitiro itipinīsharanōfo fetsafāfe ato afeska fanōfoma. Nāskaxō a aō xorakomeaifo kerexkōi ato inātiro, maiti kerexkōiri ato inātiro, sītora kerexkōiri ato inātiro fetsafāfe ato retenōfoma. Nāskarifiakī Epa Niospa āfe Yōshi Shara mato ināpaiyaito fikāfe, Satanás chakata mato afara chakafamapaiyai keskara axikakīma. <sup>12</sup> Akka nōkai yorakōifo fe mēnāima. Askatamaroko nā niafaka yōshi chakafo fe nō iki, kerexkai noko afara chakafamapaiyaifono. Nāfāfe nō ōiamafiaino noko afara chakafamapaikani. Nā niafaka yōshi chakafo ichapakōifo. <sup>13</sup> Nāskakē Epa Niospa āfe kerex shara mato ināpaiyaito fikāfe aōnoax mitsisipakōi ixikakī, niafaka yōshi chakafo matoki nokoxō, mato afeska fanōfoma. Nāskaxō nā niafaka yōshi chakafāfe mato afara chakafamapaiyaito Niospa kerex sharaōxō mā finōtiro mato afaa chakafamanōfoma. Akka Niospa nā mato amapaiyai keskara mā akōinax mā isharakōitiro, niafaka chakafo mato makinoa potax. Nāskax Jesús fe rafexō mā afaa chakafaima.

<sup>14</sup> Ē mato yoiāi keskai sorarofō itipinī sharatirofo keskai. Māri itipinī sharakāfe niafaka yōshi chakafo matoki nokoxō mato afara chakafamapaiyaifo keskara axikakīma. Epa Niospa mato amapaiyai keskara fisti akāfe isharaxikakī. Sorarofāfe ikisi āto sītora kerexkōi itipinī fatirofo ayaxō āto rapati safexikakī. Nāskarifiāi mā isharakōiaino niafaka yōshi chakata mato afeska fatiroma. Askatari sorarofō āto safeti kerexkōichinī xorakometirofo, nā ato noikaspaifāfe āto ōitiki ato pīanōfoma. Māri Niosnoax isharakōikāfe, nikafaka yōshi chakafāfe māto ōiti mēraxō mato afaa chakafamanōfoma. <sup>15</sup> Oa sorarofāfe āto sapato shara safekanax ichotirofo keskariai, māri nāskari akāfe. Nāskarifiāi mā ato Niospa meka yoisharaikai mā katiro a Niospa meka nikamisfoma mēra. Itipinī sharakāfe fetsafoki nokoxō Niospa meka sharaōnoa mā ato yoiāito nikai inimakōinōfo. <sup>16</sup> Akka sorarofāfe āto xītimati nā kerexkōi tsomatirofo a ato noikaspaifāfe ato pīanōfoma. Nāskarifiakī a mato xītixonai mā fenai. Mā nōko Ifo Jesús chanīmara faino nā niafaka chakafāfe mato afara chakafamapaiyaito mā atiroma. Nāskakē nō Jesús chanīmara fakōinaino nā nōko xītimati keskara itiro. <sup>17</sup> Sorarofāfe āto maiti kerexkōi safekaxō āto mapo kexesharatirofo, a ato noikaspaifāfe ato mapoki afeskafanōfoma. Nāskarifiakī mā Jesús chanīmara fakōinax mā Epa Nios fe nipaxatiro. Mā askaito niafaka chakata mato afeska fatiroma. Sorarofāfe āto keno fitirofo a ato noikaspaifo fe aō ato fe retenāxikaki. Nāskarifiakī Niospa Yōshi Shara oa keno keskaraki fikāfe. Nā keno keskaraki Niospa meka shara nā mā fichipaikōi niafaka yōshi chaka matoki nokopaiyaito otimafaxikakī. <sup>18</sup> Shināmakiyamakāfe. Mēxotaima kīfikāfe Niospa āfe Yōshi Sharaōxō mato tāpimasharai. Shināmakiyoma mato shinākōi. Nāskakē shināchakayamakāfe. Mēxotaima ato Nios kīfixokāfe a Ifofaafo ato axosharanō. <sup>19</sup> Nāskaxō eari kīfixokāfe Niospa Yōshi Sharaōxō āfe meka shara mesetama ē ato yoinō. Nā āfe kaifomafoōnoaxri Jesús ato nāxoni ē yoinō tsōa tāpiyonifoma. <sup>20</sup> Ea Niospa nīchini anori ē ato yoinō āfe meka shara. Nāskakē ea karaxa mēra ikimanifo. Nāskakē ea kīfixokāfe ē Niosxō ato yoinō mesetama.

*Pablo mā mekai xatekī Efeso anoafō meka shara fomani*

<sup>21</sup> Nofe yora Tíquico ē aō noisharakōi. Efeta nōko Ifo Jesús yonoxomiskē. Ē Tíquico mato ari nīchixii, ē afe keskara ikamākī mato tāpimanō. <sup>22</sup> Nāskakē ē a mato ano nīchikai nō afe



keskaramãki a Tíquico mato tãpimanõ. Nãskakẽ mãto õitinĩ shinãsharai mã inimanõ mã mã tãpiax.

<sup>23</sup> Nõko Epa Nios feta nõko Ifo Jesucristo mãto õiti mẽra mato shinãsharamanõ mã fekaxteyamanõ. Jesús chanĩmara faax, keyokõi mã nõinãi fetsenõ. <sup>24</sup> Nã nõko Ifo Jesucristo noipakenakafo Nios sharakõi mato noikõipakenaka. Askapakexapainõ. Nã tii.

Ëkã Pablo ã mato kenexoni.

## Pablo Filipos Anoafu Kirika Kenexō Fomani

### *Pablo karaxa mēraxō a Nios Ifofaafu Filipos anoafu ato kirika kenexō fomani*

<sup>1</sup> Ēkīa Pablo, Timoteo feta nō Jesucristo yonoxomis. Nāskakē nā Epa Nios Ifofaafu nā mātō xanīfofoya a mato kexemisfo nō kirika kenexō fomai mā tāpinō. Nā pexe rasi Filipos anoafu nō fomai, nāfofi Jesucristo afe yorafoki. <sup>2</sup> Nōko Epa Nios feta nōko Ifo Jesucristo mato noikī mato sharafai kiki mato inimamakī mā anā fekaxteyamanō mā isharakōinō.

### *A Nios Ifofaafu Pablo ato kīfixopaoni*

<sup>3</sup> Nā ē mato shināitīa, ē Epa Nios aichofa fafafaīni. <sup>4</sup> Ē Epa Nios kīfikī mēxotaima inimakōikai keyokōi ē mato kīfixōfafāini. <sup>5</sup> Mā efeta Jesucristo chanīmara fakī taefanitīa, iskaratīari mā efeta Niospa meka shara Jesucristoōnoa mā ato yoimis. <sup>6</sup> Chanīmakōi ē yoi, nā Epa Niospa mātō ōiti mato shara faxoni keskafakī nē askakōifa fafafaīni nā Jesucristo oaitīa. <sup>7</sup> Nāskakē nānori shinākī ēfe ōiti mēraxō ē matoōnoa shināfafāini, ēmāi mato noikōikī nā Epa Niospa ea sharafai keskafakī mārimāi efeta meemiskē. Akka ea karaxa mēra ikimanifo. Nāskakaxō xanīfofofāfe ferotaifi ea iyomisfo anoxō ē ato yoisharanō Niospa meka sharaōnoa afe ĩpaxanōfo. Iskafakī ē ato yoimis: “Jesús noko nāxonī nōko chaka noko soaxoxiki nō afe ĩpaxanō,” ixō ē ato yoimis. <sup>8</sup> Epa Niospa tāpia keyokōi ē mato noikōiaito a nōko Ifo Jesucristo noko noikōiai keskafakī. <sup>9</sup> Ē mato Nios kīfixokī iskafaxōfafāini, mā nōināi finakōinō, askatari mā tāpisharakōixō nikakōisharayanā mā tāpikōinō. <sup>10</sup> Nāskaxō afara sharakōifo tāpixō katonōfo. Nāskakanax isharakōitirofo, afaa chakakai matoō netiroma, matoōnoari afara chaka yoitirofoma mā Cristo oaino. <sup>11</sup> Nāskaxō nā Jesucristo mato sharafai keskafakī, māri askafatiro. Mā askaito mato ōikī fetsafāfe mato yoikī iskafatirofo: “Aicho, nāfo isharakōiafo Epa Niosnoax. Nios fāsi sharakōi,” ixō yoixikani. Nānori matoōxō ē Epa Nios kīfifafaīni.

### *Ē shināi ē Cristo fe rafepakenaka*

<sup>12</sup> Efe yora mīshtichi, mā tāpinō ē mato yoinō. Ea karaxa mēra ikimafafono, akka ē mēxotaima Niospa meka sharaōnoa ē ato yoifafaīni afe nīpaxanōfo. <sup>13</sup> Nāskakē sorarofāfe xanīfāfe pexe anoxō fetsafo feta mā tāpiafo ē karaxa mēra ikē Cristo Ifofai. <sup>14</sup> Ē karaxa mēra ikano nā nōko Ifo Jesús Ifofaafāfe atirifāfe Niospa meka sharaōnoa ato yoikakī mesetamakōi inimakōikai nōko Ifoxō ato yoikani.

<sup>15-17</sup> Chanīma, fetsafāfe Cristoōnoa meka shara yoifikakī ea finōpaikani, ea shināchakamapaikakī. Akka fetsafāfe ea noikakī eōnoa shināmisfo iskafakakī: “Pablo karaxa mēra ikimafafono Epa Niospa meka yoiaito tsōa xatematiroma Jesúsnoa ato yoiaito nikakōinōfo,” ixō Jesúsnoa yoisharatirofo. Akka fetsafāfe Cristoōnoa yoikakī: “Noko nikakōinōfora,” ixō ato yoipaikani ea finōpaikakī ē karaxa mēra ikano. Akka fetsafāfe ato noikakī ato yoisharamisfo, māmāi tāpikaxō nonoxō ē Cristoōnoa meka shara yoimiskē afe nīpaxanōfo. <sup>18</sup> Akka nāskanō, nā yoipaiyai keskafaxō Cristoōnoa ato yoinōfo. Nāskafakī ato yoiaifono nikai ē inimakōini.

<sup>19</sup> Akka mē tāpia ē inimakōi, mā ea Epa Nios kīfixonaito nikai Jesucristo āfe Yōshi Shara-pari ea axōfaino. <sup>20</sup> Epa Niospa ea amapaiyai keskara akiki ē rāfitiroma. Ranotamakōi ē yoitiro. Ē askafakī yoiaito ōikakī fetsafāfe Cristoōnoa shinākōinōfo. Nāskakē ē nayoamax ē niyoya sharakī. <sup>21</sup> Akka Cristo fistiōnoax ē ĩpanaka, akka ē nairi sharafinakōia, ē inimakōi ēmāi Cristo fe nīpaxakī. <sup>22</sup> Akka ē niyoxō fetsafo Cristo ē ato chanīmara famatiro afe nīpaxanōfo. Akka ē fato katotiroma, nia rakikīa shara, askayamai naa rakikīa shara. Ēkai tāpiama. <sup>23</sup> Akka fekaxkōi. Nā rafe sharafaxo fato ē katotiroma. Akka ē napai Cristo ari kaax afe ĩpaxakī, nā sharafinakōia ē mei. <sup>24</sup> Akka fetsari nā sharafinakōia ē shināi, mā ea

yopai Niospa meka shara ě mato yoinō. <sup>25</sup> Mē tāpia māmāi ea yopakōiaito, askatari mē tāpia ě nayoamax ě mato fe iyoikai. Niospa meka shara ě mato yoiaino mā inimayanā chanīmara fakī mā finakōinō. <sup>26</sup> Nāskakē ě anā mato fe ikaino mā inimaifinakōixii Cristo Jesúsnoax.

<sup>27</sup> Akka shināsharata isharakāfe. Nāskaxō na meka shara Jesucristoōnoa chanīmakōi yoixikakī. Mā askaito ě mato ōikanō, askayamai chai ixō ě matoōnoa nikakī ě tāpitiro mā Jesús Ifofasharaino nāskara fisti shinākaxō. Nāskaxō keyokōi Niospa Yōshi Sharaōxō fetsafo mā ato Jesús chanīmara famaxikāki. <sup>28</sup> Mā askafakī yoiaito a mato noikaspaifāfe mato mekakī xatemapaiyaifono rateyamakāfe. Nāskakē mā atoki rateyamaito ōikakī tāpitirofo akka nāfo fenokōikani, akka mā fenotama Nios fe mā nīpanaka. <sup>29</sup> Epa Niospa mato sharafaxōa mā Cristo chanīmara fata aōnoa māri mā omiskōinō. <sup>30</sup> Ě ikai keskai mā efe omiskōimis. Mā mā ea ōipaoni ě omiskōiaito, iskaratīari mā mā ea nika Cristoōnoa ě omiskōiaito nāskafixō ě eneima Niospa meka ato yoikī.

## 2

### *Cristo nono mai anoax afama iyopaofinixakī iskaratīa xanīfo finakōia*

<sup>1</sup> Nāskakē Cristo mato inimama mato noikī mato inimamashara āfe Yōshi Shara mato fe ika. Chanīma, Cristo mato noikī mato inimamashara mā mā meemis. <sup>2</sup> Nāskakē ea inimamakōikāfe. Isharakōita keyokōichi nānorifos shinākāfe. Mā ranā nōināsharakōikāfe. Nāskakē Jesús mato amapaiyai keskara fisti axikakī. <sup>3</sup> Akka fetsafo afara axotama a mā mā afara apaiyai keskara fisti shināyamakāfe, askatari fetsafāfe eōnoa yoisharakōinōfora ikax kakapaimis iyamakāfe. Askatamaroko isharakōita fetsafoōnoa yoikī iskafakāfe: “Nafāfe ea finōtirofoki. Akka ěkai afama. Jesús fistichi ea imasharatiro,” ixō fetsafo finōpaiyamakāfe. <sup>4</sup> Askatari a mā mā fichipaiyai keskara fisti shināyamakāfe, askatamaroko a fetsafāfe fichipaiyaifo keskarafori shinākāfe.

<sup>5</sup> Nāskaxō nōko Ifo Jesucristo shināi keskafakī māri nānori shinākāfe. <sup>6</sup> Nāfi Nioskōikī Apa Nios keskara ari onifafianino yoikī iskafapaonima: “Ěri ě Nioskōi nā ěfe Epanāfori ěfenā. Nāskakē ěfe Epa nai mēra ika keskariai ě nono mai ano itiro. Ě askaito afanā ea afeska fatiroma,” ixokai anori Jesús shināpaonima. <sup>7</sup> Askatamaroko Jesús āfe sharafoya āfe afama mīshtifo potayoni, nono mai ano oax ato yonoxomis keskara ixiki. Nāri fake feronāfake kaitiro keskai, feronāfakekōi kāini. <sup>8</sup> Feronāfakekōi ixō isharakōixō Apa Niospa yoiai keskara nikakōiax nani. Afara chakafamis keskarax ifi cruz ikakinoax omiskōikai nani. <sup>9</sup> Nāskakē Epa Niospa xanīfo finakōia imani, nāatofi keyokōi finōinīfofanakī. <sup>10</sup> Nāskakē Jesús keyokōi ato finōano āfe ane nikakakī keyokōichi akiki ratokonō mai chachikaxō yoikī iskafaxikani: “Jesús, mīfi xanīfo finakōiakī,” ixō yoixikani keyokōi nā nai mēranoafoyaxō nono mai anoafāfe. Askatari nā Ifofax namisfāferi askafaxikani, niafakafāferi askafaxikani. <sup>11</sup> Nāskafafono keyokōichi tāpaxikani, “Jesucristo nōko Ifora,” faifono. Askafakāki Apa Niosri inimamakōixikani.

### *Jesús Ifofaafāfe ato ōimasharatiro afeskax isharatirofomāki, a Jesús Ifofaafoma*

<sup>12</sup> Nāskakē ěfe yora mīshtichi, ě mato fe ixō ě mato yoiaito mēxotaima mā ea nikapaoni keskafakī, ea nikakī finakōikāfe iskaratīa ě chai ikakī nono karaxa mēra. Jesús māto chaka mato soaxonō isharakōita shināsharakōikāfe afe ipaxakakī kachikiri fakakīma. Nāskakē meseyanā nikakī finakōifafāikāfe Niospa māto chaka mato soaxonō. <sup>13</sup> Niospa māto shinā mēraxō mato shināmafafāini a mato amapaiyai keskara mā anō. Nā apaiyai keskafakī, nānori mato shināmapai.

<sup>14</sup> Nāskatari nā mato amapaiyai keskara akāfe, yōachēpekakima, askatari feratenāyamakāfe, <sup>15</sup> mā isharakōiano tsōa matoōnoa afaa chaka yoiyamanō. Askatamaroko yora chakafo mēra ikax mā isharakōiaito mato ōitirofo māmāi Niospa fakekōiax afaa chakafamisma. Akka mā ato mēra ixō ato ōimasharakāfe, oa fakishi

fishifāfe chai chaxatiro keskafakī. <sup>16</sup> Nāskaxō Niospa meka sharaōnoa ato yoifofāfōfāikāfe afe īpaxanōfo. Nāskakē mā Cristo oaino ē matoōnoax inimaifinakoītiro, ēakairoko kaxpa Niospa meka ē mato tāpimanax, askatari ēa ē kaxpa yonomisma. <sup>17-18</sup> Ē mato yoisharamis mā Jesús chanīmara fakōinō. Akka Epa Nios ē yoitiro iskafakī: “Epa Niospa, ea mīa yoini keskafakī Filiposo anoafō mī Fake Jesúsnoa ē yoimis. Nā chanīmara fakōinōfo, a mī ato yoiai keskara akōixikani. Ē mia ato chanīmara famaōxō ea retexikani rakikīa,” ixō ē Epa Nios yoitiro. Akka ea retefiafono eōxō mā Jesús Ifofaano ē inimatiro. Nāskakē māri efe inimakāfe Niospa ea sharafaino matoōnoax ē natiro.

### *Timoteo fe Ipafrodito*

<sup>19</sup> Nōko Ifo Jesucristo nīchipaiyaino ē matoki samamashta Timoteo nīchipai mato ōikanō. Mā anā oxō matoōnoa ea yoiaito nikai ē inimakōixii. <sup>20</sup> Akka tsōakai efeta iskafakī shināima, Timoteo fistichi shināi ē shināi keskara. Chanīma, na Timoteo mato noikōikī matoōnoa tāpipai mā Jesús Ifo sharafaamāki. Akka tsoakai na Timoteo keskarama. Nāskaxō ē mato noiai keskafakī nāatori mato noikōi. <sup>21</sup> Akka fetsafāfe āakōi apaiyaifo keskara fisti shināmisfo. Cristo Jesús ato amapaiyai keskara amisfoma. <sup>22</sup> Akka mā mā tāpia na Timoteo isharakōixō mato ōimamis efeta Niospa meka sharaōnoa ato yoimis. Nā fāke āfe apa feta yonotiro keskafakī na Timoteo efeta yonosharamis. <sup>23</sup> Nāskakē Timoteo, ē mato ano nīchipai mato ōikanō. Mē tāpixō ē afeskaimākai, akka mē tāpixō mato ari ē Timoteo nīchi eōnoa mato tāpimanō. <sup>24</sup> Akka ē nōko Ifo chanīmara fai, ea mato ari nīchiaino samamashta kaxō ē mato ōikai.

<sup>25</sup> Akka ē shinā nofe yora Ipafrodito mato ari nīchipaikī. Fekaxfiano nāato efeta yonokōimis na Ipafrodito mā ekeki nīchini, ē afara yopaito ea axonō. <sup>26</sup> Na Ipafrodito mato ōisharapaikōi, mato shinākōi māmāi nikamiskē isinī ikaito. <sup>27</sup> Chanīma, na Ipafrodito isinī ikōini, mā nakerati. Nāskaino akka Nios aō noikōikī mā sharafaita, eari noikōiyānā. Akka mā naano ē shināmitsaifinakoīkeraita. <sup>28</sup> Nāskakē ē mato ari nīchipaikōi mā inimakōinō matoki anā nokoaino, ēri shināmitsakōiyamaxiki. <sup>29</sup> Nāskakē matoki nokoaito inimayanā ifisharakōikāfe nōko Ifoōxō. Nāskakē nā mā Ipafrodito noiai keskafakī nā keskarafori fetsafo noikōikāfe. <sup>30</sup> Akka na Ipafrodito Cristo yonoxoni mā nakeraita. Akka mā chai ikax ekeki oyamaino matoōnoa omiskōinixakī nā Ipafrodito ekeki oyamea ea axosharaxiki.

## 3

### *Jesús chanīmara faafo a chanīmara faafoma mēra ikaxō ato ōimatiro afeskax isharatirofomākī*

<sup>1</sup> Efe yora mīshtichi, iskaratīa nōko Ifoōnoax inimakāfe. Mē mato kirika kenexokat-saxakī, anā ē mato yoi. Akka mā nikakōisharanō ē mato yoi. <sup>2</sup> Kexemesharakāfe, a yora chakafo fishtayamakāfe, nā paxta pōfe keskarafoki. Nāfāfe afara chakafamisfoki. Iskafakī mato yoipaikani kiki: “Mā foshki repa xateyamax mā Nios ari kaima,” ixō mato yoipaikani kiki. <sup>3</sup> Akka nō foshki repa xatexokai nōko chaka nō soatiroma. Cristo Jesús noko nāxonī nōko chaka noko soaxoxiki. Niospa āfe Fakeōxō āfe fakefo noko imatiro. Āfe Yōshi Sharaōxō nō Nios yoitiro iskafakī: “Nō mia noi. Mī sharakōi,” ixō nō yoitiro. Nāskakē nō akiki inimakōi ares fisti noko nimatiro. Mā nō tāpia nō foshki repa xateaōxokai noko afeska fatiroma. <sup>4</sup> Fetsafāfe yoikī iskafakani: “Ē shara famis. Nāskax ē Nios fe īpanaka,” ixō shināifono, ēri anori shināpaiki ē shinākī finapaoni. <sup>5</sup> Mē kāiax ocho nia ē oxano ea foshki repa xatenifo. Ēfi israelikōikī, ēkai osiama. Benjamín ēfe xini ipaoni, ēfi āfe fenaki. Ēfe epa feta ēfe ēfa hebreoxomāi ea fake fiafono, nāskakē ēri hebreo. Askatari fariseo ē iyopaoni, nāskaxō Niospa Moisés yoipaoni keskara ē nikakōipaoni ēmāi fariseoxō. <sup>6</sup> Askatari Niospa meka nikasharapaikōikī a Nios Ifofaafō ē ato chakafapaoni. Askatari ē isharapaikōikī Moisés yoini keskara ē nikasharakōipaoni. Nāskakē eōnoa

yoikĩ tsõa iskafatiroma: “Na Pablokai Moisés yoini keskara nikakõipaonima,” ixõ tsõa yoitiroma.

<sup>7</sup> Akka nãfo taeyoi ã õia ãfenã sharafinakõia iyopaoni. Akka iskaratĩã ã õia afokai anã afama. Cristo Ifofakĩ afo ã anã shinãima mẽ shinãmakikõia. Cristo fisti Ifofakĩ afe ãpaxakĩ. <sup>8</sup> Akka a ã ipaoni keskara anã ã shinãima. Nãfo mẽ shinãmakikõia, afo shinã ã finakõia ipaoni. Akka ã shinã ãfokai afama, nã afara chaka potamea keskarafo. Akka ãfe Ifo Jesucristo fisti ã tãpipaikõi, nãfi sharafinakõiaki. Ares fisti ea imasharatiro, a Moisés yoini keskarakai ã anã nikatiroma ea imasharanõ. <sup>9</sup> Askatamaroko ã Cristo chanĩmara faino Epa Niospa ãfe Fakeoxõ ea imasharatiro a keskara shara ã inõ. Akka ã Nioski nokoaino ekeki inimitiro, ã Cristo fisti chanĩmara fakẽ ea imasharanõ. <sup>10</sup> ã Cristo tãpipaikõi afe rafesharaxiki. Niospa ãfe kerex sharayaxõ Cristo anã otofani keskai, ãri ãfe kerex shara mepai a keskara shara ea imanõ. Jesucristo omiskõini keskai ãri aõnoax omiskõipai. Jesús naani keskai ãri askapai a keskara ixiki, afaa chakafaxikima, askatari afaa chaka shinãxikima. <sup>11</sup> Nãskakẽ a chakafo kachikiri fata, nã Jesús keskara sharakõi ã ipai, oa yora naax anã otoa keskara shara.

### *ã Jesús Ifokõi fai nã ã akiki nokoaitã*

<sup>12</sup> ã isharakõira ã ifiax ãkai isharakõiama. Askatari Jesús keskara ã ipaifi ã askakõima. Jesucristo ea Ifofamani ã a Ifofanõ. Nãskakẽ ã Jesús Ifofakõini a keskara sharakõi ixiki. <sup>13</sup> Efe yora mĩshtichi, ã Jesús keskara iyamafiai a ã ipaoni keskara ã anã shinãima. Akka ã Jesús fisti Ifofai. Nã feronãfakefo ichokani xonõnõnãkĩ texkeakekafã õitirofoma. Nã ifi nĩchiti nia ari fisti õiax ichotirofo keskariakĩ afara chaka shinãkima Jesús fisti ã shinãmis a keskara sharakõi ixiki. <sup>14</sup> Nãskaxõ afaa fetsa ã shinãima. Nã Cristo Jesús ã shinãmis Ifofapaikõikĩ. Akka Niospa ea katoni ã afe ãpaxanõ, Cristo Jesúsõnoax Epa Nios ari ã nokotiro, ariax a keskara sharakõi ixiki.

<sup>15</sup> Mã Jesús Ifofakĩ nã ã mato yoimis keskafakĩ nãnorikõi shinãkãfe. Akka fetsafãfe a ã shinã ã keskara shinãyamaifono, Niospa ato tãpimakĩ mẽstekõi shara ato yoixii. <sup>16</sup> Akka nãfo nõ tãpiax, shinãsharakõita nõ isharakõitiro, mã nõmãi Jesucristoõnoa tãpiax.

<sup>17</sup> Efe yora mĩshtichi, ã Jesús Ifofaa keskafakĩ mãri Ifofakãfe. Mã nõ mato õimamiskĩ, nõ ikai keskai mãri askakãfe. <sup>18</sup> Mẽ mato mẽxotaima yoitaifamis, nãskafekẽ afianã ã mato yoi oiayanã. Akka fetsafãfe na ã mato yoiai keskara nikakaspakani. ãto chaka xatekaspakĩ Jesucristo ifi cruz ikakinoax noko nãxoni nikakaspakani. Nãskakanax Jesús noikaspayanã ikafo. <sup>19</sup> Jesús ato amapaiyai keskara shinãtama ãa apaiyaifo keskara fisti shinãmisfo. Nã piai fisti shinãkata, a ayai fisti shinãmisfo. Feronãfakefãferi kãrofo shinãmisfo, ãto ãfifoma. Kãrofãferi feronãfake fetsafo shinãmisfo ãto fenefoma. Nãskara chakafos shinãkĩ, nã keskara fisti tãpiafo. Akka nõ chakama, nõ isharakõimis imisfo. Nãskakanax rãfitirofoma, nã keskarafo mã keyokani. Askatari nã omiskõipakenakafo mẽra fokani. <sup>20</sup> Akka nõfi askaramakĩ, nõ Niospa fakefokĩ nõ afe nai mẽra ãpanaka. Akka nõ manai a noko Ifimis nai mẽranoax oxõ noko ifiyonõ, nõko Ifo Jesucristo. <sup>21</sup> Nãato nõko yora chakakẽ noko fetsafaxoxii afe yora keskara sharafinakõia nõ inõ. Nãskaxõ ãfe kerex sharaõxõ nõko yora noko fenasharafaxoxii afara chakafo nõ finõinĩfofanõ.

## 4

### *Nõko Ifo Jesúsnoax mẽxotaima inimafafãikãfe*

<sup>1</sup> Nãskakẽ efe yora mĩshtichi, ã mato noikõikĩ ã mato õisharapai. Nã ã mato shinãitã ã ã mea ã inimakõikakãini. Nãskakẽ ãfe fakefãfe, Jesús kachikiri fayamakãfe. Ifo sharakõi fakãfe.

<sup>2</sup> Akka a xotofake rafe Evodia yafi Síntiqui ã ato yoisharapai mẽnãpaikakĩma isharakõinõfo nã yora fisti keskarakanax nõko Ifoõnoax. <sup>3</sup> Yamã, mã efeta Nios yonox-omiskĩ, ã mia yoinõ nã kãro rafe ato yoisharafe isharanõfo. Nã rafeta efeta Niosnoa meka

shara yoimisfoki afe ìpaxanõfo. Clementeri nofeta yoimis. Fetsafãferi efeta Niosnoa yoipaonifo. Nãskakẽ ãto anefo Niospa mã kirikaki kenea afe ìpaxanõfo.

<sup>4</sup> Nãskakẽ Jesús mãto Ifokĩ mēxotaima inimakãfe. Afianã ã mato yoi, inimaifinakõikãfe.

<sup>5</sup> Nãskakẽ isharakõikãfe keyokõichi mato õinõfo, isharakõiafora mato fanõfo. Mã chaima nõko Ifo oi kiki.

<sup>6</sup> Nãskakẽ afara afeskara afiaino shinãchakayamakãfe, askatamaroko mēxotaima Epa Nios kĩfiki. A mã fichipaiyai keskara yõkakãfe iskafakĩ kĩfikĩ: “Aicho Epa Nios, mã ea nikasharakõimis. A ã yopai keskara tãpixõ mã ea axosharamis,” ixõ kĩfikãfe. <sup>7</sup> Nãskakẽ mã ratepaiyaito Niospa mato inimamasharakõixii. Afara afeskara ifiaino Niospa nõko õiti noko inimamaxotiro. Nãskakẽ nõ tãpitiroma afeskaxora nõko õiti noko inimamaxotiro. Askafiano Cristo Jesús nõ chanĩmara faino noko shinãmasharatiro. Afara sharafoõnoa shinãkãfe.

<sup>8</sup> Efe yora mĩshtichi, ã kirika kenekĩ keyokerana. Afara nã chanĩmakõi fisti shinãkãfe, askatari afara sharafos shinãkãfe, askatari nã noko mēstekõi shinãmatiro shinãkãfe, yorafãfe a afara sharafaifo keskarari shinãkãfe, a Niospa noko axõai keskarafori shinãkãfe. Askaxõ nõko Ifo aicho fakãfe.

<sup>9</sup> Afara a ã mato yoiai keskara yafi a ã mato tãpimana keskara akãfe. Nãskaxõ afara fetsa ã akaito mã õia keskafakĩ, mãri askafakãfe. Mã askaito õikĩ Niospa mãto õiti mēra mato inimamasharakõitiro. Nãskax mato fe isharapakenaka.

#### *Filipos anoafãfe kori ichanãfakaxõ Pablo fomanifo*

<sup>10</sup> ã nõko Ifoõnoax inimakõi, taeyoi mã ea kori manamayopaofinixakĩ anã mã ea manamamisma. Akka iskaratĩa ea shinãkĩ mã mã ea manamana ã aõ pinõ. Akka ea shinãmakiafora ã mato faima, ea manamatiroma meekĩ mã ea manamamisma. <sup>11</sup> ã afaayayamafixõ ea afaa inãfoma ã mato famisma. ã shinãchakaima, Niospa anori ea tãpimana. ã afaamais fiãx ã inimatiro, askatari afara ichapayax ã inimatiro. <sup>12</sup> Akka mē tãpia afaamaisax afeskax ã itiomãki. Askatari mē tãpia a afara ichapayax ã itiro. Askatari mē tãpia afara afeskara ifiaino ã inimatiro. Nãskakẽ ã shinãchakaima. Askatari mãyaxri ã inimatiro, fonãifiari ã inimatiro. Afara mekefaxri ã inimatiro, afaa meke fayamafiãxri ã inimatiro. <sup>13</sup> Afara fetsafo ã atiro Cristo ãfe kerex shara ea inãno.

<sup>14</sup> Nãskafekẽ mã ea shinãkĩ mã ea sharafa ã omiskõiaito. <sup>15</sup> Akka Filipos anoxõ mã mã tãpia, nã ã Jesúsnoa meka shara yoikĩ taefanitĩa noko ifipakexanõ. Akka ã Macedonia anoax kaino, mã Nios Ifokõifaxõ, mã ea kori manamani, ãmãi Niosnoa mato tãpimanano. Akka fetsafãfe ea afaa manamanifoma. <sup>16</sup> ã Tesalónica ano iyoano, ã kori yopaito mã ea femayopaoni. <sup>17</sup> Akka ã shinãima a ã afara fiãi fisti. Askatamaroko ã shinãi mã ea sharafaino Niospa mato sharafa fafãfãinõ, mato noikĩ. <sup>18</sup> Nãskakẽ iskaratĩa ã anã afaa yopaima, mēmãi yaxõ. Ipafrudito ea fexoyamea a mã ea manamayamea tii. Nã ã fichipaiyai tiimaroko finõmainĩfofã mã ea femayamea. Nã mã Nios noiai keskafakĩ eari noikĩ mã ea femayamea. Mã ea askafaito õi matoki Nios inimakõixii. <sup>19</sup> ãfe Niospa nã mã fichipaiyai tii mato inãxii. Epa Niosnã ãfe afara sharakõifo nã ichapakõifo keyonakama, ãfe Fake Cristo Jesúsxõ mato inãsharaxii. <sup>20</sup> Akka nõko Epa Niosfi nõko Epakõikĩ nã fãsi sharakõi, tsoa keskarama. Ares fisti sharakõi. Tsõakai a finõtiroma. Nã nõko Ifokõira nõ fapanaka. Askara ipainõra.

#### *Pablo mã mekai xatekĩ Filiposo anoafõ meka shara ato fomani*

<sup>21</sup> Eõxõ keyokõi a Cristo Jesús Ifofaafõ ea ato yoisharaxokãfe. Askatari na nono efe ikafãferi nã Jesús Ifofaafãfe mato yoisharakani kiki. <sup>22</sup> Na nono ikafãfe Nios Ifofakanax, xanĩfo César ãfe peXe ano yonomisfãfe afãferi mato yoisharakani. <sup>23</sup> Nõko Ifo Jesucristo mato noikĩ mato sharafanõ. Nã tii ã mato yoi.

*Pablo*

## Pablo Colosas Anoafu Kirika Kenexõ Fomani

### *Pablo Jesús Ifofaafu kirika kenexõ fomani, Colosas anoafu*

<sup>1-2</sup> Ēkīa Pablo, Niospa ea nīchini, aato apaiyai keskafakī ē yorafo yoinõ Jesucristoõnoa. Nofe yora Timoteo feta nõ mato kirika kenexõ fomai. Mā Cristo Ifofakõikē, pexe rasi Colosas anoxõ Nios nikakõiyana. Nõko Epa Niospa mato noikī mato shināfafāinõ afanā mato fekaxtefanõma mā isharakõinõ.

### *Pablo a Jesús Ifofaafu ato kīfixõfafāini*

<sup>3-4</sup> Nā nõko Ifo Jesucristo āfe Apa Nios nõ mato kīfixõfafāini. Nõ mato kīfikī iskafaxokī aicho fakī māmāi nõ nikax mā Cristo Jesús Ifofakõikē. Nāskaxõ nā Jesús Ifofaa fetsafori mā ato noikõimiskē mā nõ nikamis. <sup>5</sup> Na meka shara chanīmakõi Jesucristoõnoa mā mā nikamis. Jesucristo chanīmara faax Nios ika ari mā afe ipaxatiro ixõ yoinifo mā mā nikamis. Na meka chanīmara fakõixõ fetsafo mā ato noikõimis. <sup>6</sup> Na meka shara Jesucristoõnoa mā nikakī taefakī mā chanīmara fakī finakõini. Nāskaxõ nikakī mā tāpini chanīmakõi, Niospa mato noikī Jesucristoõxõ mato chaka mato soaxoni mā chanīmara faino. Nāskakē na meka shara, nikakani maifo tii anoafori nāskarifiamisfo. <sup>7</sup> Nonori nofe yora Ipafras mato yoini. Akka nā Ipafras nofeta Cristo yonosharaxomis, nāskakē nāato Jesucristoõnoa mato yoipaoni. <sup>8</sup> Nā Ipafras matoõnoa iskafakī noko yoiaito nõ nikamis: “Na Colosas anoafu Niospa Yõshi Sharaõnoax isharakõikaxõ fetsafo noikõikani,” ixõ noko yoiaito nõ nikamis.

<sup>9</sup> Nāskakē nā ē matoõnoa nikakī taefanitīa, ē mato Epa Nios kīfixokī xatemisma. Kīfikī ē iskafa fafafāini: “Epa Niospa, Colosas anoafu mī Yõshi Sharaõxõ mī ato amapaiyai keskafakī ato tāpimafe, mī ato tāpimanai keskafakī āto õiti mēraxõ mia tāpikaxõ mia Ifokõi fanõfo,” ixõ ē mato kīfixõfafāini. <sup>10</sup> Nāskaxõ nā mato amapaiyai keskara mā akaino õi Nios matoki inimakõixii. Nāskax āfe Fake keskarakõi mā itiro. Nāskaxõ mā fetsafo sharafa fafafāikī mā Nios tāpiki finakõitiro. <sup>11</sup> Akka Epa Niospa afama mīshtifo shara fatiroki, āfe kerex shara mitsisipakõi mato inātiro afara afeskarafiaino aõxõ mā tenekõinõ. Nāskafikī mā tenetiro fena fenakīma inimasharakõikai. <sup>12</sup> Nāskakē mā inimakõi. “Aicho Epa Niospa,” mā fatiro nāatomāi noko imasharata afe yorafo ināpaiyai keskafakī nokorimāi ināito. Nõri afe yorafokē noko inimamaxii, a ika anokai fakishma penasharakõi. <sup>13</sup> Nāskakē noko imasharakõia anā fakish mēra nõ inõma. Akka nā Satanās ika ano fakishifākõi. Nānoa Epa Niospa noko ifia, āfe Fake fe nõ ipaxanõ. Nāato āfe Fake noikõi. <sup>14</sup> Āfe Fāke noko nāxonikē aõxõ Epa Niospa noko ifia, nõko chaka noko soaxoyanā.

### *Jesús noko nāxonioõnoax Nios fe nõ isharapakenaka*

<sup>15</sup> Akka nõ Epa Nios õiyamafitirono āfe Fake Jesús mai ano oni. Nāskaxõ āfe Fāke noko tāpimani afe keskaramākī Apa Nios. Nā āfe Fake Jesús Apa Nios keskarakõi, āfe õiti keskarakõiri. Afaa oniataima Apa Nios fe nai mēra iyopaoni. <sup>16</sup> Āfe Fake Jesucristoõxõ Niospa keyokõi onifani, nai mēranoafoya nono mai anoafu. Nā nõ õitiromafoya, a nõ õitirofo onifani. Askatari āfe ājirifo nā afe ikafo onifata, niafakafāferi āto xanīfori onifani. Epa Niospa āfe Fake Jesucristoõxõ keyokõi onifani. <sup>17</sup> Afaa oniataima Cristo iyopaoni. Āfe kerex sharaõxõ keyokõi kexesharakõimis. Nāskaxõ fishifo kexeta, xini kexeta, oxe kexeta, nõko mai kexeta famis. Akka nāfo kexeyamaino, chakanai fet-sekerana. Nai fe mairi chakanakerana. <sup>18</sup> Tsõakai Jesús finõtiro, afaa oniataima keyokõi finõyopaonixakī, iskaratīari keyokõi finõa. Nāfi nā chanīmara faafāfe āto Ifokõiki. <sup>19</sup> Nāskaxõ Epa Niospa yoikī iskafani: “Ē imis keskai ēfe Fakeri nāskakõimis, nāskax nāri efe Nioskõi, nõ nāskara rafekõi,” ixõ inimakai Epa Niospa yoini. <sup>20</sup> Jesús ifi cruz ikaki

mastaifono āfe imi foax noko nāxoni nōko chaka noko soaxoxiki. Nāskakē aōnoax Epa Nios fe nō anā isharatiro. Aōnoax keyokōi mai anoafoya nai mēranoafo afe isharatirofo.

<sup>21</sup> Māto ōiti mēraxō mā Nios noikaspayanā, mā chakakōi fapaoni. Nāskata mā Nios fe rafeyamata, afe yorarikai mā ipaonima. <sup>22</sup> Nāskafikē āfe Fake Jesucristo nai mēraxō mai ano nīchini feronāfakekōi ikiyonō. Nāskax ifi cruz ikakinoax noko nāxoni, aōnoax Epa Nios mato fe rafexō māto chaka mato soaxotiro a keskara shara mā inō. Nāskax mā akiki nokoaito matoōnoa afaa chaka yoitiroma. Nāskaxori mā yoitiroma iskafakī: “Mī afara chakafamis,” ixō aōnoa mā afaa yoitiroma. <sup>23</sup> Nāskano na meka shara Jesucristoōnoa mā chanīmara faxō afara fetsa mā shināyamaino Epa Niospa matoōnoa yoipakenakama iskafakī: “Mī afara chakafamis,” ixō matoōnoa afaa yoipakenakama. Askatamaroko mā chanīmara faax mā inimakōiaito mato ifixii mā afe ipaxanō. Mā Jesucristo āfe meka shara nikakī taefani keskafakī nānorikōi keyokōi ē ato tāpimani. Ēkīa Pablo, ē Epa Niospa āfe meka yoifafāini Jesucristoōnoa ato yoikī.

### *Niospa Pablo yoini a Jesús chanīmara faafo ato yonoxonō*

<sup>24</sup> Nāskakē ē inimai ē matoōnoax omiskōifi, māri afara afeskaraino mā Cristo Ifosharakōi faano. Cristo nokoōnoax omiskōini keskai, ēri nā afe rafemisfoōnoax nā Niospa fakefo atoōnoax ē omiskōimis. Ē matoōnoax omiskōita iskaratīari ē Cristoōnoax omiskōimis. <sup>25</sup> Akka Epa Niospa ea katonī, a mato yonoxomis keskara ē inō, āfe meka shara ē mato yoinō. Nāskaxō ea yoikī iskafani: “Na maniafo tii anoā ēfe meka shara Jesucristoōnoa ato yoifofāsafafe,” ixō ea yoini. Nāskaxō āfe kaifoma mēra ea nīchini. <sup>26</sup> Na meka shara Jesucristoōnoa nōko xinifāfe tāpiyopaonifoma. Niospa ato tāpimayopaonima. Akka iskaratīa Niospa noko tāpimani nō afe yorafokē. <sup>27</sup> Epa Niospa Cristoōnoa mato yoiyomis keskafakī keyokōi mato tāpimaxii, mato fisti tāpimatama, nā yora fetsafori ato tāpimaxii. Iskafakī ato yoixii: “Ēfe Fake Cristo mato fe rafekakāini, nāskakē mā chanīmara fatiro a ē ika ano efe ipaxakī. Nā Cristo isharakōiai keskafakī ēri mato askafatiro māri isharakōinō,” ixō mato yoini.

<sup>28</sup> Nō Cristoōnoa yoimis, keyokōi nō ato yoifofāsafamis keyokōi nō ato yoimis nikakōinōfo. Mā isharakōiano nō keyokōi Niospa ferotaifi nō ōimasharapai a keskara shara ixii. <sup>29</sup> Nāskakē ē mato yonoxokī finakōifafāini, Cristo āfe kerex shara ea ināno.

## 2

<sup>1</sup> Akka ē mato yoipai mā tāpinō, ē mato Epa Nios kīfixōfafāini. Laodicea anoāfo yafi fetsafori a ea ōimifoma nāfori ē ato Epa Nios kīfixōfafāini. <sup>2</sup> Nāskaxō ē mato kīfixōfafāini māto ōiti mēranoax mā inimakōiyanā, mā ranā mā nōinākōinō. Nāska faatanāxō Epa Niosnoa xafakīakōi mā tāpitiro, akka a iyopaonifāfe Cristoōnoa tsōa tāpiyopaonima. Nāskakē iskaratīa xafakīakōi mato tāpimapai aōnoa mā tāpisharakōinō. <sup>3</sup> Nāato keyokōi tāpikōia, Apa Niospa tāpia keskafakī āfe shinā mēraxori tāpikōia. Akka Epa Nios afarafo sharafoyakē, Cristoōxō mā tāpitiro. <sup>4</sup> Nānori ē mato yoi, tsōa mato pārayamanō, meka fetsafaxō fanīrira mato yoipaikani kiki. <sup>5</sup> Ē mato fe iyamaflaxō pena tii ē mato shināi. Akka matoōnoa nikai ē inimakōi, mā chanīmara fakōixō mā Cristo nikakōiaito.

### *Jesucristo nōko ōiti fetsafaxōfaano a keskara shara nō inō*

<sup>6</sup> Nāskakē mā nōko Ifo Jesucristo chanīmara fakōixō, mā Ifofakōina. Nāskakē pena tii afe rafefafāikāfe. <sup>7</sup> Oa afara fanafono āfe tapo mai mēra chaikōi kaax feroitiroa keskara, Jesúsri nāskarākōikī, afe rafefafāikāfe afaa chakafatama a keskara shara ixikakī. Ipafras mato yoini keskafakī pena tii nikakōikī Jesús chanīmara fafafafāikāfe. Nāskaxō pena tii Epa Nios aichofa fafafāikāfe.

<sup>8</sup> Nāskakē kexemesharakāfe, fetsafāfe mato pārayamanōfo. Mā Jesús nikakōiai keskafakī anori mato yoipaikani. Akka nā mato yoiaifo keskara mā ato nikakī kaxpakōi mā



ato chanĩmara fatiro. Nãfãfe Cristoõnoa yoikõikanima, nãskaxõ nã imisfo keskakakĩ mato yoipaikani. Nã chanĩmara faafãfema shinãifo anori fisti mato shinãmapaikani.

<sup>9</sup> Akka Cristo fe Apa Nios nãskara rafe, Cristo noko keskara feronãfakekõifiax Apa Nios imis keskara nã nãskakõini. <sup>10</sup> Nãfi keyokõichi ãto xanĩfokõiki, xanĩfo fetsafoya, a niafaka chakafãfe ãto xanĩfofo finõkõinĩfofãna. Nãskakẽ mã Jesús fe rafexõ mã afaa fetsa yopaima. <sup>11</sup> Askatari mã Cristo Ifofai akka feronãfakefãfe ãto foshki repa xatepaonifo, nãskaramã feyafakatsaxakakĩ. Akka mã foshki repa xatefiafono mãto chaka mato soaxotiroma. Cristo fistichi mãto õiti mato fetsafaxotiro, mãto chaka mato soaxotiro afianã a mã chaka apaoni keskara mã anã atama a keskara shara mã inõ. <sup>12</sup> Akka mã maotisai faka mẽra mã ikinitĩa, nã mã chakafapaonifo oa maia keskara, askatari nã Jesús maifanifotĩa a mã afara chakafapaonifo oa maia keskarafõ. Mã faka mẽra iki maotisameax mã fininãkafãni oa Jesús fe fininãkafani shinãtsatiro mã a keskara sharakõi ixiki. Niospa ãfe kerex sharaõxõ afianã Jesús otofani nã nõ chanĩmara fai. Askatari mã mẽranoax Jesús otonitĩa, mãri afe otoni keskara itiro, a keskara sharakõi ixiki. <sup>13</sup> Mã Jesús Ifofamax nã yora naa keskara mã iyopaoni. Nãskaxõ mã afara chakafapaoni mãto chaka xatexoma. Nãskafikẽ Epa Niospa Cristo otofani afe nipaxanõ. Nãskarifiakĩ matori aõxõ nimapakexatiro, nãskaxõ nõko chakafo mã noko soaxona. <sup>14</sup> Shinãkapo. Keyokõi nõ chakafamis keskara nõko chakafo Epa Niospa noko soaxoni, anã afoõnoa shinãyamaxii. Nãskano Niospa yoini keskara nõ nikatama afara fetsa nõ chakafapaoni. Nãfo keyokõi nõ chakafamisfo keskara kenepakea. Askafixõ ifi cruz ikakinoa Jesús mastanifoxõ nõ nõko chaka noko soaxoni. <sup>15</sup> Akka Cristo ifi cruz ikakinoax noko nãxonixakĩ, Satanás yafi keyokõi niafaka chakafo finõkõia. Nãskakẽ noko anã afeskafatiroma, anã nõko ifo ixõ noko ãkitirofoma. Nãskakẽ Jesús ifi cruz ikakinoax naino Niospa keyokõi maifo tii anoafõ ato ispani na niafaka chakafo anã kerexfoma.

*Jesús ika ari nai mẽra sharakõi nã fisti fichipaikãfe*

<sup>16</sup> Akka mãto xinifãfe ãto feyafati ipaoni xinia fena ikaino fista apaonifo. Askatari oxe rama kãiyaino fista apaonifo. Akka mato yoitirofo iskafakakĩ: “Afaa mã pitiroma askatari afaari mã ayatiroma. Askatari nõko pena tenetitĩa mãri tenetiro,” ixõ mato yoitirofo. Akka mã askayamaino fetsafãfe mato mekafakĩ ãchatirofo. Mato askafaifono ato nikayamakãfe. <sup>17</sup> Akka nã mãto xinifãfe ãto feyafati noko õimatirofo afe keskara iximãkai a Cristo oaino. Akka mã Cristo oano nã fisti nõ Ifofatiro. Nã nõ feyafamis keskara nõ anã atiroma. Cristo fisti nõ nikatiro a nõ ayopaoni keskara nõ anã axikima. <sup>18</sup> Õisharakãfe fetsafãfe mato pãrapaikani kiki iskafakakĩ: “Nõ afaa tãpiama. ãjirifo nõ kãfitiro,” ixõ mato pãrapaikani. Afãfe afaa õiyamafikatsaxakakĩ afama mĩshtifo yoipaimisfo. ãto shinãmã shinãkata kakapaikõimisfo, Niospa shinãi keskarakai shinãmisfoma. <sup>19</sup> Afokai Cristo fe rafepaikanima. Akka Cristo nõko mapo keskara askatari nõ ãfe yora keskara. Nãskaxõ nõko yora nõ kexesharax nõ mitsisipakõi itiro. Nãskatari nõko pono efapayafo, nõko pono mĩshti, nõko nami mẽranoax ichanãtirofo. Afeskatama nõ isharakõinõ. Akka nõ Cristo fe rafekõiaito Epa Niospa ãfe Fãkeoxõ ãfe kerex shara noko inãtiro a keskara shara nõ inõ. Nãskarakõi noko axopai.

<sup>20</sup> Mã oa Cristo fe naa keskara mã ini. Nãskakẽ iskaratĩa a mã chakafapaoni keskara mã anã akima. Askatamaroko mã isharakõimis. Mã askaito nã chanĩmara faafãfema mato afaa yoitirofoma. Nãskafekẽ, çafeskakĩ mã ato nikaimẽ, mã ato nikaxõ nã mato yoiaifo keskara ma apai? Nãskakẽ ato nikayamakãfe. <sup>21</sup> Nãskakẽ mato yoiki iskafapaikani: “Na afarafo meyamakãfe, afori piyamakãfe, mato inãifonori mãto mẽkemã achiyamakãfe,” ixõ mato yoipaikani. <sup>22</sup> Akka na mato yoipaiyaifo keskara Niospa anori ato yoiaima. ãa shinãkaxõ mato yoipaikani. Akka nã mato yoipaiyaifo keskara nãfo mã keyoxii, anãkai afo inakama. Nãskakẽ ato nikayamakãfe. <sup>23</sup> Chanĩma, yora fetsafãfe shinãkĩ iskafakani. Na ato yoiaifo keskara shara, nafãfe tãpikõiafo, a Niospa noko yoini keskarari tãpikõiafo.

Nāskakē Niospa āfe ājirifo kīfifāikani. Nāskakatari ato fanīrira mekafamisfoma, askatari āto yorari mese famisfoma āa koshamemisfo. “Nafo sharakōifo,” ixō atoōnoa yoipaikani. Akka afokai isharakōimisfoma. A afarafo chakafaifo keskarakai xateafoma, chanīma nāfo kakapaikōimisfoki.

### 3

<sup>1</sup> Akka Cristo naax anā otoiñakafani keskai māri nāskariai afe otoiñakafani keskara mā itiro mā isharakōiax afe ipaxakī. Cristo iskaratīa Apa Nios fe ika afeta keyokōi īkinā. Nāskakē aōnoa shināta nā mato amapaiyai keskara aōnoa shināfafāikāfe. <sup>2</sup> Nāskakē nā Niospa fichipaiyai keskara fisti shinākāfe, nāskakōixikakī. Akka nono mai anoxō yorafāfe afara chakafapaiyaifo keskafakī māri askafayamakāfe. <sup>3</sup> Anā ē mato yoi Cristo noko nāxoni. Akka mā oa Cristo fe naa keskara iyoni, nāskakē iskaratīa mā afe rafekakaini, Epa Nios feri mā askakakāini. Nāskariai Epa Niosri mato fe rafekakaini. Mā askaito tsōa mato tāpitiroma, a mā Cristo fe rafeai keskai ari askaxiki. <sup>4</sup> Cristo anā mai ano fotofaino māri afe ixii. Nāato noko īkipakenaka. Nāskakē a keskara sharakōi nōri afe ixii, keyokōichi yorafāfe noko ōixikani.

#### *Nō chaka iyopaonixakī iskaratīa nō ōiti fena sharayakōi*

<sup>5</sup> Nāskakē a mā afarafo chakafapaoni keskafakī anā askafayamakāfe. Askarafo anā shināyamakāfe. Askatari māto āfimafori chotayamakāfe, kērofāferi māto fenemafori chotamayamakāfe. Nāskaxō ato chaka shināmayamakāfe. Afarafori noiyamakāfe feronāfakefāfe māto āfima fichipaiyamakāfe, kērofāferi māto fenemafo fichipaiyamakāfe. Afara chakafori fichipaiyamakāfe, nā mā fichipaiyai fisti fichipaiyamakāfe. Mā askakī Nios mā noima, nā afarafo fisti noikī. <sup>6</sup> Askara chakafo Niospa ōipaima, nāskakē ato omiskōimakī finakōixii nikayamaifono. <sup>7</sup> Nāskakē taeyoi chakakōi mā iyopaoni Nios nikamax. <sup>8</sup> Mā mā askapaoniki. Akka iskaratīa a chakafo shināmakikāfe. Anā ōitifishkiyamakāfe, anā chaka shināyamakāfe, ato chakafayamakāfe, ato īchayamakāfe, askatari māto axfapa meka chaka yoiyamakāfe. <sup>9</sup> Nāskakē mā ranā pāranōnāyamakāfe, mā taeyoi ipaoni keskara a chakafo mā mā potakōiakī. <sup>10</sup> A mā apaoni keskara anā atama iskaratīa, mā mā Jesucristo fe rafekōia a keskara shara ixiki. Akka Epa Niospa māto ōiti mēra fena sharakōi mato ōi. Nāskakē a keskara sharakōi mato imafafāini, aōnoa mā tāpisharakōinō. <sup>11</sup> Nō Cristo Ifokakē Niospa keyokōi nāskarafos noko ōi. Judeofo yafi a judeofoma, a kene tāpiafoya a kene tāpiafomari, yorafoya nafafo āto yonomatifoya a āto yonomatifomari Niospa nāskarafos noko ōi. Keyokōi nō afe yoraxō nō Jesucristo fisti yopakōi.

<sup>12</sup> Niospa mato noikī mato katoni afe yorafo mā inō. Aa keskara shara mato imaxiki. Nāskakē fetsafo noikī ato sharafa fafāikāfe. Nāskakē fetsafo shināki nā mā apaiyai keskara fisti shinātama, fetsafāfe apaiyaiifo keskarari shinākāfe, oi tsii faxō ato yoifafāikāfe. <sup>13</sup> Nāskakē fetsafo fe mēnāpaitama ato yoisharakāfe raenāsharakāki. Nōko Ifāfe mato raefa keskafakī fetsafo fe raenā faatanāsharakāfe. <sup>14</sup> Nāskakē nā ē mato yoiai keskai, keyokōi noinākāfe, nō noināsharafinakōiaki. Nāskai nō noināx nō isharakōitiro, nā nōko Ifāfe noko yoini keskai nō noināsharakōiax nō nāskasharakōitiro. <sup>15</sup> Nāskakē Cristo nikasharakōikāfe māto ōiti sharanokai mā fochishpanā faatanātiroma. Askatamaroko aōnoax isharakōiax nā yora fisti keskara shara mā itiro. Nāskakē Epa Niospa mato katoni aōnoax mā isharakōita fetsafo mā afeska fanōma. Nāskakē mā Epa Nios yoitiro iskafakī: “Aicho Epa Niosi, ēfe ōiti mīa sharafaxōa,” ixō mā yoitiro.

<sup>16</sup> Cristo noko tāpimani keskafakī māto ōiti mēra nanekōikāfe. Nāato mato īkinākī āfe meka tāpisharakōixō fetsafori yoisharakāfe isharaxikakī. Māto ōiti mēraxō Nios aicho fata David fanāini keskai māri fanāixota āfe mekaōnoari fanāixokāfe. <sup>17</sup> Nāskaxō nā mā apaiyai keskafakī yoikāfe iskafakī: “Aicho, Epa Niosi. Nōko Ifo Jesucristoōxō nā nō apaiyai keskafakī keyokōi mī noko axōfafāimis,” ixō yoifafāikāfe.

*Nõ Jesús Ifofakõinax aõnoa nõ afeskatromãki*

<sup>18</sup> Kërofãfe, mãto fenefãfe mato yoiaifãfe ato nikasharakõikãfe. Nãskax mã isharakõikai nõko Ifãfe mato yoiai keskai. <sup>19</sup> Feronãfakefãfe, mãto ãfiffo noikõikãfe ato fe feratenãyamakãfe.

<sup>20</sup> Fakefãfe, mãto epa yafi mãto efa nikakõikãfe. Mã askaino nõko Ifo matoki inimakõi kiki. <sup>21</sup> Epafo feta efafãfe, mãto fakefo ferateyamakãfe, mãto fakefãfe shinãkĩ iskafayamanõfo: “Ooa, ãfe epa feta ãfe efa ea feratenafo,” ixõ shinãyamanõfo.

<sup>22</sup> Æto yonomatifãfe, mãto ifofo ato nikakõikãfe nono mai anoxõ. Akka mato õiaifonos ato yonoxokakĩma, mato õiamai fonori ato yonoxokãfe. Nã mãto Ifo Jesucristo mã noiaino, matoki inimanõ ato yonoxosharakãfe. <sup>23</sup> Afara yonokĩ inimayanã axosharakõikãfe. Nõko Ifo shinãkĩ ato yonoxosharakãfe. <sup>24</sup> Nãskakẽ shinãmakiyamakãfe mã mã tãpiaki nõko Ifo chipo afara sharafo mato inãxii kiki. Mã nõko Ifo Jesucristo yonoxosharamiski, nãfi mãto Ifokõikĩ. <sup>25</sup> Akka nã afara chakafamisfo, nãfo omiskõi finakõixikani afara chakafakatsaxakakĩ. Nãskakẽ Niospa fetsa keskarafõ noko õima, nãskarafos noko õi.

## 4

<sup>1</sup> Ato yonomamisfãfe, mãto yonomatifo ato paraxõ yonokakĩma ato noisharayanã afara sharafo ato inãsharakãfe ato parakakĩma. Mã mã tãpiakĩ mãri Ifoyakĩ, mãto Ifãfe nai mëraxõ mato õifafaini kiki.

<sup>2</sup> Nãskakẽ Epa Nios kĩfikĩ xateyamakãfe, kĩfikĩ afara fetsa shinãkakĩma, Epa Nios fisti kĩfikĩ iskafakãfe: “Aicho Epa Niosi, mã ea sharafa fafafãini,” ixõ kĩfikãfe. <sup>3</sup> Nãskakẽ nokori kĩfixokãfe, Epa Niospa fetsafo mëra noko nĩchiano Cristoõnoa nõ ato yoisharanõ. Afãfe Cristoõnoa nikamisfomaki. Akka ã Cristoõnoa meka shara yoiaito yorafãfe ea karaxa mëra ikimanifo. <sup>4</sup> Ea Epa Nios kĩfixõfafãikãfe xafakĩakõi Jesucristoõnoa anã ã ato yoinõ.

<sup>5</sup> Akka nã Jesús Ifofaafo mëra mã ikaki ato õimakãfe mã isharakõixõ. Nãskaxõ mã mã atoki nokoaitĩa Jesucristoõnoa ato yoisharakãfe. <sup>6</sup> ato fe mekakĩ meka shara fisti ato yoifafãikãfe, ato kaxemetsama fakakĩma ato yoisharakõikãfe, ãto õiti mëraxõ shinãchakanõfoma. Mã askakĩ nã yorafo mã ato kexesharatiro.

*Pablo mã mekai xatekĩ Colosas anoafõ ato meka shara fomani*

<sup>7</sup> Nofe yora Tíquico, ã aõ noikõi. Nãato efeta nõko Ifo Jesús yonoxomis. Nãskakẽ aato eõnoa mato yoi kiki ã afeskax nono ikamãkĩ. <sup>8</sup> Nãskakẽ ã mato ari nĩchia, aato mato yoinõ afeskax nono nõ ikamãkĩ, askatari mato inimamasharakõixiki. <sup>9</sup> Nã nofe yora Onĩsimõri afe kai, nãri ã noikõi. Nã mato fe iyopaoni, nofeta nõko Ifo Jesúsnoa yoi inimakõimis. Nã rafeta matoki noko kaxõ mato yoikani nono afe keskaramãki.

<sup>10</sup> Akka na efe karaxa mëra imisto Aristarcori mato meka shara fomai. Marcosri mato meka shara fomai, nã Marcos Bernabé ãfe chai. Nãskakẽ mã Marcos matoki nokoaito ã mato yoia keskafakĩ ifisharakãfe kexesharayanã. <sup>11</sup> Na feronãfake ãfe ane Jesús nãatori mato meka shara fomai, ãfe ane fetsa Justo. Nãfãfe judeofo mëraxõ Nios Ifokõi fakaxõ efeta Nios xanĩfoõnoa yoikĩ yonomisfo. Nãskafakakĩ ea inimamakõimisfo. Akka ãfe kaifãfe nonoxõ efeta Nios yonoxomisfoma, mã ã mato yoiaifo feta ã Niosnoa yoimis. <sup>12</sup> Na feronãfake Ipafrasri meka shara mato fomai, nãatori Cristo yonoxomis, mã mato mëra iyopaoni. Nãato mëxotaima matoõxõ Epa Nios kĩfikĩ iskafa fafafãini: “Epa Niosi, mã ato amapaiyai keskafakĩ ato amafe afaa fetsa shinãnõfoma. Nãskakanax mã Fake Jesús õiti keskara shara inõfo,” ixõ mato kĩfixõfafãini. <sup>13</sup> Akka mẽ õia na Ipafras matoõxõ shinãchakakõiaito. Askatari nã pexe rasi Laodicea anoafõ yafi Hierápolis anoafõ ato Epa Nios kĩfixõfafãini. <sup>14</sup> Na Lucas ato sharafamis, ã aõ noikõi. Nãato Demãs feta mato meka fomakani.

<sup>15</sup> A Jesús Ifofaafo Laodicea anoafõ ea ato yoisharaxõfe. Nĩnfasri ea yoisharaxõfe, a ãfe pexe anoax Nios Ifofakanax ichanãmisfori ea ato yoisharaxõfe. <sup>16</sup> Akka na kirika kene ã mato fomai mã mã õixõ, mã Nios Ifofaafo Laodicea anoafõri ato fomakãfe akairi

õinõfo. Mãri na kirika kene õikãfe Laodicea anoxõ mato mana manafono. <sup>17</sup> Nãskakẽ Arquipori ea yoikĩ iskafaxokãfe: “Epa Niospa mia yoia keskafakĩ axosharakõife,” ixõ ea yoisharaxokãfe.

<sup>18</sup> Ëkã Pablo, ã mato kirika kenexoni. Mato yoisharakĩ, ãfe mifikõichi ã kenei. Nãskakẽ ea shinãmakiyamakãfe ã karaxa mëraxõ ikakĩ. Niospa mato noikĩ matoõnoa shinãfafãinõ. Nã tii.

## Pablo Tesalónica Anoafō Kirika Kenexō Fomani

*Pablo a afe rafeafo feta a Tesalónica anoxō Nios Ifofaafo ato kirika kenexō fomani*

<sup>1</sup> Ēkīa Pablo, nō mato kirika kenexō fomai, Silvano ikaino Timoteo ikaino nā tiito nō mato fomai. Nā peXe rasi Tesalónica anoxō Nios Ifofaafo nō fomai, anoxomāi Epa Nios yafi nōko Ifo Jesucristo mā Ifokōi faafono. Epa Nios feta nōko Ifo Jesucristo mato noikī mato sharafanō fekaxtetama mā isharakōinō.

*Tesalónica anoafāfe Jesús Ifokōi fakaxō ato ōimanifo*

<sup>2</sup> Mēxotaima nō matoōxō Epa Nios aicho fakī nō kīfīkī iskafa fafafāini. <sup>3</sup> “Epa Niosi, na Tesalónica anoafāfe, mia noikakī mia yonoxosharamisfo, nāskakaxō fena fenakākima nōko Ifo Jesús manasharamisfo nokoki anā oi kiki,” ikaxō. Nānori pena tii ē mato kīfixōfafāini. <sup>4</sup> Efe yora mīshtichi, Niospa mato fāsi noikī mato katonī afe yorafo mā inō. <sup>5</sup> Nō mato Niospa meka sharaōnoa yoimis afeskax nō afe ĩpaxatiromāki. Akka nōko mekapas nō mato yoimisma, askatamaroko Niospa Yōshi Sharayaxō āfe kerex sharafoyaxō nō mato Jesúsnoa nā meka chanīmakōi nō mato yoimis. Akka mā mā tāpia nō mato fe isharapaoni. Nō askaino mā Jesús Ifofakōini.

<sup>6</sup> Akka nō Jesús Ifofai keskafakī māri Ifofani. Nāskakē Niosnoa meka shara nō mato yoiaito inimakōiyanā mā nikakōini, Niospa Yōshi Sharapamāi mato inimamakōiaino fetsafāfe mato omiskōimafiaifono. <sup>7</sup> Nāskakē mā isharakōixō mā ato ōimakōia nā Nios Ifofaafo Macedonia anoafō yafi Acaya anoafō. <sup>8</sup> Matoōxō nōko Ifāfe meka shara nikakī taefanifo Macedonia anoafō feta Acaya anoxō. Akka anoxos nikanifoma. Nā peXe fetsafo anoxori nikanifo. Nāskaxō mā tāpiafo mā Nios Ifokōifakē. Nāskakē nō anā matoōnoa ato yoitiro, māmāi matoōnoa tāpikōiafono. <sup>9</sup> Askatamaroko fetsafāfe nokoōnoa ato yoimisfo iskafakāki: “Tesalónica anoafāfe nōko Ifo Nios Ifofakōinafo, nāskaxō Pablo yafi a afe rafeafo ato sharafayanā a yoiaifo keskara ato nikakōimisfo. Nāskakaxō afara fetsa onifakaxō, ‘Na nōko niosra,’ ikaxō anā kīfimisfoma, Nioskōi Ifofakakī. Nāskakaxō nā nipanaka Nioskōi yonoxomisfo. <sup>10</sup> Akka nā Niospa Fake Jesús mā manakōi nai mēranoax anā oaitīa. Akka Niospa āfe Fake otofani. Nāato noko ifitiro a omiskōiaifo mēranoax nō omiskōinōma.”

## 2

*Pablo Tesalónica anoxō Jesúsnoa ato yoini*

<sup>1</sup> Efe yora mīshtichi, mā mā tāpia kaxpa nō mato ōikai kanima. Jesúsnoa nō mato yoikai kani nikakī mā Ifofakōinō. <sup>2</sup> Mā mā tāpia nō matoki kayoamano na Filiposo anoafāfe noko ĩchayanā noko omiskōimaponifo. Nāskaxō noko xatemapaiyafono, Epa Niospa āfe kerex shara noko ināno, nō ratetama na meka sharaōnoa Jesúsnoa nō mato yoimis keskara tsōa noko xatematiroma. <sup>3</sup> Akka nō mato yoiki fanīrira nō mato yoimisma, nō mato yoisharakōimis. Askatari nō mato chakafakī yoimisma, askatari nōa nō mato paramisma. <sup>4</sup> Askatamaroko Epa Niospa noko katonī āfe meka shara Jesúsnoa nō mato yoinō. Akka nōkai yorafo nokoōnoa shināmapaitiroma. Askatamaroko nokoōnoa Nios fisti nō inimamapai, nā fistichi nōko shinā mēraxō nō shināi keskara tāpikōia. <sup>5</sup> Mā mā tāpia nōkai matoōnoa meka shara yoimisma, māri nokoōnoa yoisharanō. Ēkai mato feparamisma, “Noko afara shara inānōfora,” ixō. Akka a ē mato yoimis keskara Epa Niospa tāpikōia, nāato ea ōifafaini. <sup>6</sup> Nōkai fetsafo nokoōnoa yoisharakāfe nō ato famisma. <sup>7</sup> Akka nō aōnoa yoinō noko nīchini āfe meka shara nō mato yoinō. “Akka noko afara afeskarafaxokāfe,” ixō nō mato yoikerapaoni. Akka āfa āfe fake yome kexesharamis keskafaki nō mato kexesharapaoni. <sup>8</sup> Nō mato noikōikī inimakāi nō mato Niospa meka shara yoianā nōa nō ināmeपाikōini, mā Nios tāpisharakōinō. Nāskaxō nō mato

noipaoni keskafaki, iskaratīa nō mato noikī finasharakōimis. <sup>9</sup> Efe yora mīshtichi, mā mā tāpia nō mato mēraxō yonomiski omiskōikōiyanā, a nō fichipaiyai fixiki, penata yonota fakishchāiri nō yonomis. Akka nō mato afaa kaxpa fīapaimisma, Niospa meka sharaōnoa mato yoivanā.

<sup>10</sup> Akka mā mā noko ōimis, Niospari tāpia nō tanaima isharakōimiskē mato fe a mā Nios Ifofaafo fe. Nāskakē nokoōnoa tsōa afaa chaka yoitirofoma. <sup>11</sup> Askatari mā mā tāpia nō mato inimamakōimis, mā shināmitsaitori nō mato askafamis inimamamis oa āpa āfe fake inimamatiro keskafakī. <sup>12</sup> Akka nō mato yoimis mā isharakōinō a Nios Ifofaafo imis keskai. Akka nāato mato katonī Jesús keskara shara mā ĩpaxanō.

<sup>13</sup> Nāskakē mēxotaima nō Epa Nios aicho fatitaifaa māmāi noko nikasharaito, nō mato Niospa meka sharaōnoa yoiaito. Nāskakē mā yoikī iskafani: “Na meka shara mā noko yoiaī yōra mekama, Niospa meka shara,” ixō mā yoini. Chanīma, Niospa mekakōi nō mato yoimis. Nāskakē mā āfe meka nikakī mā chanīmara faino mato shināmasharai Jesús keskara shara mā inō. <sup>14</sup> Efe yora mīshtichi, māri omiskōini mato kaifāfe mato omiskōimanaifono. Nāskarīfiai nā mā ikai keskai a Nios Ifofaafo Judea anoxō Cristo Jesús Ifofakanax omiskōikani āto kaifo judeofāfe ato omiskōimanaifono. <sup>15</sup> Nā judeofāfe nōko Ifo Jesús retenifo, taefakī a ato Niospa meka sharaōnoa yoimis ato retepaonifo, nāskaxori noko omiskōimayanā noko potanifo. Nāskaxori Nios aicho fayamata yorafo chakafakī mekafamisfo. <sup>16</sup> Askatari a judeofoma Nios fe ĩpaxanōfo nō ato yoisharapaiyaino, noko ato yoitima famisfo. Nāskakē afaa chakafakī finayamafikatsaxakakī mā afara chakafakī finakōimisfo. Akka iskaratīa anā tenetiromameki Niospa ato omiskōimaki finakōi.

### *Pablo Tesalónica anoafō anā ato ōipai kapaini*

<sup>17</sup> Efe yora mīshtichi, mā nō mato fe paxkanāifinixakī, nōa nō shināki mato ōiamafikī mēxotaima nō mato shinātaifai nōko ōiti mēraxō. Akka nō kaxō nō mato ōisharapaikōi. <sup>18</sup> Akka mā nō mato ari kapaitaiamis, nāskaifi ēroko mēxotaimakōi mato ari kapaikōimis. Nō askafiaino, akka Satanās noko katimafamis. <sup>19</sup> Nō mato yoimis Jesús keskara shara mā inō. Nāskakē Jesucristo oaino keyokōichi tāpitirofo Jesúsmaī Ifokōi fakaxō. Nāskakē Jesús ōiaino matoōnoax nō inimakōixii, nō mato yoipaoni keskaramāi mā nikakōimiskē. <sup>20</sup> Chanīma, nokoōxō mā Jesús Ifofakōinafono nō inimakōi. Nāskakē Epa Nios nokoki inimakōi.

## 3

<sup>1-2</sup> Nāskakē nō anā tenetiroma meekī nō shināita nono Atenas ano nores nētexiki, nāskaxō nofe yora Timoteo nīchixiki mato ōikanō. Na Timoteori Nios yonoxomis, nāato nofeta yonomis Jesucristoōnoa meka sharaōnoa ato yoikī. Nāato mato yoikī mato inimamasharakōitiro. <sup>3</sup> Nāskakē ē matoki Timoteo nīchini: “Omiskōikāki anā Niospa meka nikatirofomara,” ixō. Akka mā mā tāpia na nō omiskōiai keskara. <sup>4</sup> Akka nō mato fe iyoxō, nō mato yoifafāiyamea, nō omiskōixiira fakī. Nō mato yoifafāiyamea keskai mā askakōia, nāskakē mā mā tāpia. <sup>5</sup> Nāskakē ē anā tenetiroma meekī, ē Timoteo nīchiyamea mato yōkatanō, a mā Jesús Ifofapaoni keskafakī ai mā Jesús Ifofamākī ē tāpipaikī. Akka ē ratekōiyamea, “Niafaka chakata ato afara chakafamaira,” ikax. Akka nōakōi kaxpa Niospa mekaōnoa nō mato yoiyamea ikerana.

<sup>6</sup> Akka Timoteo mā Tesalónica anoax anā oa mato ōitani. Meka shara matoōnoa noko yoitoshia, mā Jesús Ifofasharayanā mā noināsharakōiaito. Noko yoia mā noko shināyanā mā noko noikōiaito, askatari mā noko ōisharapaikōiaito, nā nō mato ōipaiyai keskafakī mā noko ōisharapai. <sup>7</sup> Nāskakē efe yora mīshtichi, noko Jesúsxō omiskōimayanā noko fekaxtefaifono mā Jesús Ifo sharafakī mā noko inimamakōimis. <sup>8</sup> Akka mā mā Jesús Ifofashara, mā anā afaa fetsa shināima. Mā nō tāpiax nō inimasharakōi nō isharakōitiro. Nāskakē afara afeskaraino nō tenetiro. <sup>9</sup> Nō matoōnoa shināki nō Epa Nios kīfikī, nōko ōiti mēranoax nō fāsi inimakōi. Nāskakē nō matoōxō Epa Nios kīfiki nō aichofa fafāfāini.

<sup>10</sup> Nāskakē penata yoita fakishi yoita nō Nios kīfifafāini matoōxō, noko mato ari nīchiaino nō mato ōikanō a mā tāpiamafo nō mato yoixiki mā Jesús Ifofakōinō.

<sup>11</sup> Nāskakē Epa Nios feta nōko Ifo Jesucristo mato ari noko nīchipainō nō mato ōikanō.

<sup>12</sup> Nōko Ifāfe mato shināmasharaino mā noināi finakōinō, fetsafori mā noisharanō, nō mato noiai keskafakī māri keyokōi yorafo noisharakōinō. <sup>13</sup> Mā askaino Epa Niospa mātō ōiti mēraxō mato shināmasharai, Jesús Ifo sharafayanā mā afaa chakafayamanō. Mā askaino nōko Ifo Jesús afe yorafoya oaitīa māri a keskara shara ixii, Epa Niospa ōiaino.

## 4

### *Afeskax isharaxō nō Nios inimatiromē nokoki inimanō*

<sup>1</sup> Efe yora mīshtichi, mē mekai xatekī ē mato yoinō. Nō mato yoipaoni afeskax mā itiriromākī Nios matoki inimanō. Akka nā nō mato yoipaoni keskai mā mā askakōia. Nāskakē anā nō mato yoi noko nikakapo. Mā Nios Ifofaa keskafakī nōko Ifo Jesucristoōxō Ifofakī finakōikāfe.

<sup>2</sup> Akka mā mā tāpia nōko Ifo Jesús noko yoini keskara, nānorikōi nō mato yoimis.

<sup>3</sup> Akka Niospa fichipai a keskara shara mā inō. Nāskakē tsōa āfe āfima chotatiroma. Kērofāferi āto fenemafo chotamatirofoma, <sup>4</sup> Askatamaroko āfiyatirofo āfe āfi noiyanā āfe āfifes ixiki. <sup>5</sup> Nāskata afara chakafapaimiskōi iyamaxikakī, a Nios tāpiamafāfe amisfo keskara axikakima. <sup>6</sup> Akka Epa Niospa yoini iskafakī: “Fētsa āfi fe ipaiyamakāfe. Tsoa fomāyamakāfe fetsa āfi fe ixiki,” ixō Niospa yoini. Akka nō mato yoini keskai, tsoa askayamakī afara chakafaifono Epa Niospa ato omiskōimaxii. <sup>7</sup> Epa Niospa noko katonima nō afara chakafanō. Askatamaroko noko katonī a keskara shara nō inō.

<sup>8</sup> Nāskakē a ē mato yoimis keskara tsōa nikayamakī atokai yora fisti nikakaspaima. Niosri nikakaspai, nāato āfe Yōshi Shara mato ināfiano a mato amapaiyai keskara mā anō.

<sup>9</sup> Ēfe mekakai mā fichipaima mā ranā noināixiki. Epa Niospa mato tāpimani mā noinānō. <sup>10</sup> Mā nō tāpia nā Nios Ifofaafō Macedonia anoxō mā ato noikōiaito. Nāskakē nō mato yoisharapai, mā ato noiki finakōinō. <sup>11</sup> Nāskakē isharakāfe mātō ōiti mēraxō afanā mato fekaxtefanōma. Fētsa afara afeskarafaino aōnoa shināchakayamakāfe. Nā Niospa mato amapaiyai keskara fisti akāfe. Askatari mā yonotiro xanikima. Nānori nō mato yoimiski. <sup>12</sup> Nāskafakī mā yonotiro a mā fichipaiyai fixiki. Kaxpa afaa ato yōkayamakāfe. Mā askaito a Nios Ifofaafāfema matoōnoa shinākōitirofo.

### *Nōko Ifo Jesús anā oaino, ĵafe keskara ixiiimē?*

<sup>13</sup> Efe yora mīshtichi, ē mato yoiai keskara nikasharakāfe. Jesús Ifofaafō nakanax afeskakanimākai ē mato yoinō, akka a Ifofaafoma ato fe yorafo naafono, manomitsakani omiskōikani. Akka mā askaima māmāi Nios Ifofaax, māmāi anā ōinōnāixiakī. Akka a Nios Ifofaafoma anā ōinōnākanima. <sup>14</sup> Mā nō tāpia Jesús nafiax afianā otoni. Nāskarifiakī mā nō tāpia Niospa atori ofofaxii. Jesús anā oaino, a Ifofakanax namisfo.

<sup>15</sup> Nāskakē nō mato yoimis nōko Ifo Jesús noko tāpimamis keskara. Akka nō nayoamax nōko Ifo Jesús oaino nō rekē nai mēra kaima, nā naitaenifo rekē fokani. <sup>16</sup> Akka nōko Ifo nai mēranoax fotopakekafāni fāsikōi mekakeraxii xanīfo finakōimāiax. Askatari nā ājiri xanīfo finakōiafāfe āto mekari nō nikaxii. Askatari Niospa āfe maneti chāi chāisaito nō nikaxii. Nāskakē a Cristo Ifofakanax namisfo otoi taexikani. <sup>17</sup> Nāskata a nō namisfoma Niospa atoya noko iyoxii, nāskakē nai kōi mēranoax nō fichināxii. Nōko Ifori nofe ixii nai kōi mēra. Nāskakē nōko Ifo fe mēxotaima nō ipanaka. <sup>18</sup> Nāskakē mā ranā inima faatanāsharakāfe, na meka sharaōnoax.

## 5

<sup>1</sup> Efe yora mīshtichi, nōko Ifo Jesucristo anā oaino anā nō mato yoitiroma. <sup>2</sup> Akka mā mā tāpikōia nā oaitīa tsōa manasharayamaino nōko Ifo nokotiro. Nā afaa shināima tanaima oxafono, fakishi oxax yometso atoki yometsotiro keskai. <sup>3</sup> Yorafo iskaifono:

“Nōkai afaa chakafamisma nō isharakōia,” ikaifono Epa Niospa ato omiskōimanaino pae meexikani. Oa kēromā fake nanexō mā fake kākī pae meetiro keskara meexikani. Nāskakē nā omiskōiai nokoaino tsoa faki onetiroma.

<sup>4</sup> Akka efe yora mīshtichi, mākai oa fakish mēra nia keskarama, askatamaroko mā oa penata nia keskara. Nāskakē mā manasharaito nōko Ifāfe mato fichitoshitiro. Akka nā Ifofaafoma oa fakish mēra nia keskarafono, atoki yora yometso oax atoki yometsoaino tsōa tāpitiroma keskarafono. Nāskarifiakī nōko Ifo oaino afaa shinātirofoma, Ifokairoko fakaxō. <sup>5</sup> Akka māfi nā penata nia keskara sharakōifokī. Mākai oa fakish mēra nia keskarafoma. <sup>6</sup> Nāskakē nā Satanás ifofamisfo keskara nō imisma, afāfe afarafo chakafaifo fisti shināmisfo. A Jesús fotoaino tsōa shināmisma. Akka nō anā Jesús oaitīa nō shināi, oa yora oxa keskara nō imisma. Oa yora moia keskara nō imis Jesús oaitīa manai xafakīakōi isharaxō. <sup>7</sup> Nā afaa shināifoma a Satanás ifofaafō nā fakishi oxafo keskarafono. Nāskarifiakī a Satanás ifofaafō a afaa shināifoma fakishi pāemisfo keskarafono. <sup>8</sup> Akka nōkai ato keskarama, nōfi oa penata nia keskara sharafoki. Nāskakē Jesús Ifokōi fata nō yorafo noikōita nā Jesús oaino nō manakōitiro, nō askaito Satanás noko afaa chakafamatiroma. Māraki sorarofāfe āto rapati kerexkōi safeafono tsōa ato retetiro, āto maiti kerexkōi safeafonori tsōa ato retetiroma. Nāskarifiakī nō Jesús Ifofaano, āfe Yōshi Shara nō mēra naneano Satanás noko afeska fatiroma. <sup>9</sup> Akka Niospa shinānima a omiskōipakenakafo mēranoax nō omiskōipakexanō. Askatamaroko noko ifini Jesucristoōxō nōko chaka noko soaxoxiki nō afe ĩpaxanō. <sup>10</sup> Akka Jesucristo nokoōnoax nani nō afe ĩpaxanō. Nayamafiāx mā naaxri nō afe nīpanaka. <sup>11</sup> Nāskakē inimayanā fetsafo ato inimamasharakāfe. Mē tāpiaki mā ato askafaino. Nāskakē ato fe mēxotaima aska faatanākāfe.

#### *Pablo A Nios Ifofaafō ato yoisharani*

<sup>12</sup> Efe yora mīshtichi, ē mato yoisharapaikai, ea nikasharakāfe. Epa Niospa nā Ifofaafō katonī āfe meka shara mato yoinōfo. Nāfāfe nōko Ifoōnoa mato yoisharamisfo nōko Ifo mā Ifo sharafanō. Nāskakē ato noiyanā ato nikasharakāfe. <sup>13</sup> Nōko Ifoōxō mato yoisharamisfo, nāskakē ato nikasharakāfe, ato noisharayanā. Mato fe yorafo fe isharakāfe, mēenāpaitama isharakōikāfe.

<sup>14</sup> Askatari efe yora mīshtichi, nō mato yoisharamis iskafakī: A xanimisfori ato yoisharakāfe yonosharanōfo, askatari a shināmitsaifo ato inimamakāfe. Nāskaxō a Nios Ifofasharafoma ato yoisharakāfe chanīmara fakōinōfo. Nāskaxō ato noiyanā fenāmāshta mā ato yoisharatiro.

<sup>15</sup> Nāskakē kexemesharakāfe, fetsafāfe mato noikaspaifono ato kopiyamakāfe. Askatamaroko noinā faatanāsharakāfe, keyokōi yorafo sharafakāfe.

<sup>16</sup> Mēxotaima inimaafāikāfe. <sup>17</sup> Pena tii Epa Nios kīfifafāikāfe. <sup>18</sup> Afara afeskara afiaino, Epa Nios aicho fakāfe. Nāskara Niospa matoōnoa fichipai kiki mā Cristo Jesús Ifo shara fakē.

<sup>19</sup> Niospa Yōshi Sharapa mato amapaiyai keskara xateyamakāfe. <sup>20</sup> Fetsafāfe Niosxō mato yoiāifono a yoiāifo keskara, “Na afamara,” ixō ato nikakaspakakīma, ato nikasharakōikāfe. <sup>21</sup> Akka fētsa mato yoipaiyaito Niospa Yōshi Sharaōxō yōkakāfe nā mato yoiāi keskara chanīmamakī askayamai chanī itiroki. Akka nā meka chanīmakōi nikafafāikāfe, a meka chanī nikakakima. <sup>22</sup> Afara chaka fishtayamakāfe.

<sup>23</sup> Niospa māto yorafoya, māto fero mēshofoya māto yōshi sharafoya Niospa mato sharakōi fatiro mā fekaxtenōma. Nāato shara mato imatiro āfe ōiti keskara shara mā inō. Mato kexesharata māto ōiti mēraxori mato shināmasharatiro. Askax mā sharakōi inō. Epa Niospa mato askafaino nōko Ifo Jesucristo afianā oaitīa mato shināmasharaxii. <sup>24</sup> Niospa mato katonī mā Ifofanō. A noko yoiāi keskara Niospa noko pāratiroma, noko axotiro.

#### *Mā mekai xatekī Pablo ato yoisharani*

<sup>25</sup> Efe yora mīshtichi, noko Epa Nios kīfixokāfe.



<sup>26</sup> Keyokõi a nõko Ifo Jesús Ifofafo fe yoinõnãsharakãfe.

<sup>27</sup> Nãskaxõ Epa Niospa mato yoia keskara nikasharakãfe. Nã mã Ifofa tii ã mato kirika kenexõ fomaikai ato nikamasharakãfe.

<sup>28</sup> Nõko Ifo Jesucristo mato noikĩ mato sharakõifanõ. Nã tii ã mato yoi.

*Pablo*

## Pablo Tesalónica Anoafo Afianã Kirika Kenexõ Fomani

*Pablo afe rafeafo feta Tesalónica anoxõ Nios Ifofaafono ato kirika kenexõ fomani*

<sup>1</sup> Ëkĩa Pablo. Silvano ikaino Timoteo ikaino nõ mato kirika kenexõ fomai. Efe yora mĩshtichi, mã Epa Nios Ifofaano pexe rasi Tesalónica anoxõ, mãfi nõko Epa Nios fe rafekõiakĩ nõko Ifo Jesucristo feri mã askakõia. <sup>2</sup> Nãskakẽ Epa Nios feta nõko Ifo Jesucristo mato noikĩ mato sharakõifanõ, askatari mato imasharakõinõ mãto õiti mẽranoax mã anã fekaxtenõma.

*Epa Niospa a yora chaka omiskõimaxii mã Cristo anã oaino*

<sup>3</sup> Efe yora mĩshtichi, mã taefakĩ mã Nios chanĩmara fani. Nãskakẽ iskaratĩa mã chanĩmara fakĩ finakõia. Askatari mã rama Nios Ifofaax mã nõinãsharakõini. Nãskakẽ iskaratĩa mã nõinãifinakõi. Nãskakẽ nõ matoõxõ Nios kĩfikĩ iskafa fafafaĩni: “Aicho Epa Niosi, mefe yorafãfe Tesalónica anoafãfe mia Ifokõi faafoki,” ixõ ã mato kĩfixõfafaĩni. <sup>4</sup> Nãskakẽ Niospa mekaõnoa nõ ato yoifofãsafakĩ nã Nios Ifofaafono fe nõ ato fe ichanãitĩa nõ matoõnoa ato yoimis iskafakĩ: “Nã Nios Ifofaafono anoafo ãto kaifo fetsafãfe ato omiskõimamisfo. Nãskakẽ afara chakafãfe ato afeskarafafaĩno a shinãtamaroko Jesús Ifokõi fakaxõ tenekõimisfo,” ixõ nõ matoõnoa ato yoixomis. <sup>5</sup> Nãskakẽ mã Jesucristoõnoax omiskõifixõ mã tãpitiro Niospa isharakõixõ mato yoikĩ iskafaino: “Nafo isharakõiafo,” mato faino mã afe ipaxatiro. Nãskax mã mã omiskõifiax chipo mã afe isharapakenaka.

<sup>6</sup> Niospa mẽstekõi fisti shinãmis, a mato omiskõimamisfo kopikiri chipo Niospa ato omiskõimaxii. <sup>7</sup> Nãskakẽ nõko Ifãfe mato tenemasharaxii mã anã omiskõinõma a noko akai keskafakĩ mã nõko Ifo fotoxõ. Akka nõko Ifo nai mẽranoax fotoi oa chii xoisai itikikeraxii ãfe ãjiri finakõiafo fe oi. <sup>8</sup> Akka nõko Ifo oxii a Nios Ifofamisfoma ato omiskõimaniyoi, askatari ãfe meka sharaõnoari nikamisfomano ato omiskõimaxii. <sup>9</sup> Nãfo omiskõipakenakafo, anãkai nĩpanakafoma. Nõko Ifokai õipakenakafoma, askatari ãfe shara yafi ãfe kerex shara õipakenakafoma. <sup>10</sup> Akka nõko Ifo oaino, nã penata a Ifofamisfãfe aõnoa yoisharaxikani. Nãskafaifono nã Nios Ifofamisfãfe õiketsaxikani, akka mã mã nikamis nõ mato yoiaito.

<sup>11</sup> Nãskakẽ nõ matoõxõ Nios kĩfikĩ iskafa fafafaĩni: “Epa Niosi, mã ato imapaiyai keskafakĩ ato imasharafe mia Ifofakaxõ fetsafo sharafapaikani kiki mã kerex shara ato inãfe,” ixõ ã matoõxõ Epa Nios kĩfimis. <sup>12</sup> Nãnori nõ mato Epa Nios kĩfixomis, fetsafãfe mato õikakĩ nõko Ifo Jesúsnoa yoisharanõfo iskafakakĩ: “Jesús afama mĩshti fatiro, nãskaxõ afe yorafo a keskara sharakõi ato ima,” ixõ aõnoa yoisharanõfo. Nãskakẽ Epa Nios feta nõko Ifo Jesucristo mato noiyanã a keskara sharakõi mato imatiro.

## 2

*Nã feronãfake afara chakafamisnoa ato yoini*

<sup>1-2</sup> Akka nõko Ifo Jesucristo anã fotofaino nã Ifofaafono tii akiki nokoxikani afe ipaxakakĩ. Nãskafekẽ fetsafãfe mato parapaikani iskafakakĩ: “Jesús mã oxõ a inõpokoaifo keskara ea tãpimana,” ixõ mato yoikani. Nãskatari fetsafãferi mato yoikĩ iskafakani: “Mã nõ nika Jesús mã oa,” ixõ mato yoiaifono, fetsafãferi yoikĩ iskafakani: “Pablo noko kirika kenexõ fema, ‘Jesús mã oa,’ ” ixõ mato yoipaikani, ãa chanĩkakĩ. Nãskakẽ rateyamakãfe. Ë mato yoinõ. Jesús oaino nã Ifofaafono afe ichanãxikani, nãskax afe ipanakafono. Akka mato yoisharapaiyaito nikasharakãfe. <sup>3</sup> Nã chanĩmisfo ato nikayamakãfe. Jesús oyoamano keyokõichi Epa Niospa meka kachikiri fakani anã nikaxikakima. Nãskakanax nikayospakõi ixikani. Nãskaifono a feronãfake chakafinakõia oxii. Nãato a Niospa yoini keskara nikakaspakõimis. Nãato Satanás ifofakõimis. Askafiax chipo a omiskõipakenakafo

mëra kaxii. <sup>4</sup> Akka a feronãfãke niyoxõ iskafakĩ yoixii: “Ë keyokõi finõa. ‘Na nõko Niosra’ ixõ mã kĩfimis, nãri ã finõa. Akai Niosma,” ixõ ato yoita, nã Nios kĩfiti pexefã mëra ikikaixõ ato yoixii iskafakĩ: “Afaa fetsa kĩfiyamakãfe. Askatari afaa fetsari noiyamakãfe. Ëfi Nioski,” ixõ ato pãraxii.

<sup>5</sup> Akka, çmã shinãimamẽ a ã mato fe iyoxõ a ã mato yoipaoni keskara? <sup>6</sup> Akka mã mã tãpia nã chaka finakõia Epa Niospa nãtefayoa, fena oyoyamanõ. Nãskafiax chipo oxii Epa Niospa anã nãtefayamaino. <sup>7</sup> Nã noikaspamis Epa Niospa nãtefayoano fena oyoima. Chipo oxii Epa Niospa anã nãtefayamaino. Akka oyoamano nã aõxõ afara chakafamisfãfe fomãpaiyoxikani. <sup>8</sup> Nãskakẽ nã chakafinakõia mã oano, nõko Ifo Jesús ãfe axfapa xoõ atakĩ retakĩ mapokõi fataxii. <sup>9</sup> Nõko Ifãfe reteyoamano nã yora chakafinakõiato Satanãõxõ afama mĩshtifo faxii afarafo afeskarafakĩ ato parayanã. <sup>10</sup> Nãskaxõ afarafo afeskarafakĩ ato pãraxii a nikaifo, nãskakẽ nã nikakanax afe nã omiskõiskõipakenakafo mëra foxikani. Nãfãfe Niospa mekakõi nikayamakãta, ãfe meka sharari noimisfoma Nios fe ipaxakakĩma. Nãskakẽ nã omiskõipakenakafo mëra foxikani. <sup>11</sup> Nãskakẽ Niospa anã ato yoipaima ãa ato paranõfo, a ato paramisfãfe ato yoiãifo keskara nikakõiaifono. <sup>12</sup> Nãskakẽ nãfãfe Niospa mekakõi nikayamakãta, tsoarikai aõ noimisma. Askatamaroko afara chaka fisti fichipaiyaifono Epa Niospa nã omiskõipakenakafo mëra ato potaxii nã ato paramisfo fe omiskõipakexanõfo.

### *Niospa noko katoni nõko chaka noko soaxoxiki nõ afe ipaxanõ*

<sup>13</sup> Efe yora mĩshtichi, taekõifakĩ Epa Niospa mato noikĩ mato katoni afe mã ipaxanõ. Nãskakẽ ãfe Yõshi Sharaõxõ mato ifini afe yora mã inõ, Jesúsnoa mã chanĩmara faino. Nãskakẽ mẽxotaima nõ Nios aicho famis mato shinãkĩ. <sup>14</sup> Nãskakẽ ãfe meka shara nõko Ifo Jesucristoõnoa nõ mato yoiãino nokoõxõ mã mã tãpikõia. Nãskaxõ mã chanĩmara faino ãfe Fake Jesucristo ofofani keskafakĩ matori õtofaxii a ika ano mã afe ipaxanõ.

<sup>15</sup> Nãskakẽ efe yora mĩshtichi, nã nõ mato yoimis anorikõi nikafafãikãfe. Akka anoriyamakẽ afo nikayamakãfe. Nã nõ mato yoipaoni keskara nã fisti chanĩmara fayana, a nõ mato kirika kenexoki nõ mato yoini keskarari shinãfafãikãfe. <sup>16</sup> Nõko Ifo Jesucristo feta nõko Epa Niospa noko noikĩ, nõko õiti mëraxõ noko inimamakõinõ. Nãskakẽ nõ tãpitiro noko potanakama nõ afe ipaxanõ. <sup>17</sup> Mãto õiti inimamakõikãfe mato imasharakõiaino. Nãskaxõ afara afeskara afiãino ato yoisharakõita mã ato axosharafafãixikakĩ.

## 3

### *“Noko Epa Nios kĩfixokãfe,” ixõ Pablo ato yoini*

<sup>1</sup> Akka efe yora mĩshtichi, mẽ mekai xatekĩ ã mato yoi. Noko Epa Nios kĩfixokãfe, nõko Ifãfe ãfe meka shara mã nika keskafakĩ nõko Ifoõnoa keyokõichi nikanõfo. <sup>2</sup> Askatari noko Epa Nios kĩfixokãfe na yora chakafo feta a shinãsharaifãfema noko afeskafanõfoma. Nãkakẽ Jesúsnoa nõ ato yoiãito noko nikakatama noko xatemapaimisfoki. <sup>3</sup> Akka nõko Ifo sharakõi, nã noko yoimis keskara noko axomis. Nãato mato imasharapakenaka, afara chakatari mato fekaxtefanõma. Askatari nãato mato kexesharapakenaka. <sup>4</sup> Nãskakẽ nõko Ifoõxõ nõ chanĩmara fai, nã nõ mato yoimis keskara mã akaito. Nãskakẽ mẽxotaima mã askafa fafãfãini a nõ mato yoimis keskafakĩ. <sup>5</sup> Epa Niospa mato noiai keskafakĩ nõko Ifãfe mato tãpimapainõ. Cristo omiskõifikĩ teneni keskafakĩ, aõxõ mãri mã tenesharakõifãfãinõ.

### *Keyokõichi nõ yonosharakõitiro*

<sup>6</sup> Efe yora mĩshtichi, nõko Ifo Jesucristoõxõ nõ mato yoimis. A Epa Nios Ifofaa fetsafãfe yonokaspafono mã ato makinoax paxkanõ a nõ mato yoimis keskara nikakaspafono. <sup>7</sup> Akka mã mã tãpia a nõ imis keskara mã askapai mã isharakõitiro. Nõ mato mëra ixõ nõ yonokaspapaonima. Askatamaroko nõ yonokõipaoni. <sup>8</sup> Askatari nõ tsoa afaa kaxpa pãpaonima. Askatamaroko nõ yonopaoni, penata yonota, fakishi yonota nõ fapaoni a

nõ piai fĩxõ pixii mares fisti mãto kori ichapa mã potanõma. Nõ yonokĩ askafapaoni. <sup>9</sup> Niospa mekaõnoa yoinifo iskafakĩ: “Nã mato Niospa meka yoimisfãfe afara yopaifãfe ato inãkãfe,” ixõ kenenifo Niospa ato shinãmanaino. Nãskakẽ, “Noko afara inãkãpe,” ixõ nõ mato yõkakerapaoni. Askatamaroko nõ yonopaoni nõ mato õimakĩ a nõ akai keskafakĩ mãri mã yononõ. <sup>10</sup> Akka nõ mato mẽra ixõ nõ mato yoipaoni iskafakĩ: “Akka nã yonoyamaito afaa pitiroma,” ixõ nõ mato yoini. <sup>11</sup> Akka matoõnoa noko yoiãfo iskafakakĩ: “Na ranãrito yonokaspata ikafo, nãskakanax afaa meekatama ãa fofãsakaki ato parafofãsa famisfo,” ixõ noko yoiãfo. <sup>12</sup> Nãskakẽ nõ mato yoi iskafakĩ, nõko Ifo Jesucristoõxõ mã tanaima yonosharakõinõ anã xanikima a mã fichipaiyai keskara fixiki. <sup>13</sup> Efe yora mĩshtichi, a mã afarafo sharafamis keskafakĩ xateyamakãfe. <sup>14</sup> Akka na kirika kenexõ nõ mato yoiã keskara nikakaspai, aõnoa shinãkãpo. Nãskakẽ afe rafepaiyamakãfe, mã askafaino rãfinõ. <sup>15</sup> Nãskafiaito noikaspayamakãfe. Askatamaroko yoisharakãfe mato fe yora keskara fakĩ.

*Mã mekai xatekĩ Pablo ato yoisharani*

<sup>16</sup> Nõko Ifãfe nõko õiti noko inimamaxotiro. Pena tii afara afeskara afiaino mato inimamatiro. Nõko Ifo keyokõi mato fe isharanõ.

<sup>17</sup> Ëkã Pablo, ãkõi ãfe mẽkemã kirika kenexõ ã mato fomai yoisharakõiyã. Akka nã ãfe kirika kenefo ã iskafamis kenekĩ. <sup>18</sup> Nõko Ifo Jesucristo mato noikĩ keyokõi mato sharafanõ. Nã tii ã mato yoi.

## Pablo Timoteo Kirika Kenexõ Fomani

### *Pablo Timoteo yoisharani*

<sup>1</sup> Ëkĩa Pablo. Iskaratĩa ã mia kirika kenexõ fomai Timoteo, ã mia yoikĩ. Epa Niospa ea katonĩ ã ãfe meka Jesucristoõnoa ã ato tãpimanõ. Epa Nios noko ifimis, Jesucristo nõko Ifo feta ea yoini ã ato tãpimanõ. Jesucristo nokoõnoax nani ares noko Epa Nios ari iyoxii kiki. <sup>2</sup> Nãskaxõ ã mia Jesucristo chanĩmara famaxõ, ã mia fakekõĩ faa, Timoteo. Nãskaxõ ã mia yoixõ Epa Nios, Cristo Jesús nõko Ifo feta mia shinãsharanõ mĩo noikĩ, mĩ shinã mēra mia shinãmasharanõ, mĩ õiti fekaxtenõma.

### *Pablo Timoteo yoini: “Õisharakõife, ato anorima tãpimapaikõikani kiki”*

<sup>3-4</sup> Ë Macedonia ano kayamea taefakĩ, ã mia yoifaini kati. Ë mia anã yoiaito nikasharafe. A Efeso anoax fena kayamafe. Nãno ixõ mĩ efesofo ato yoisharafe. Atiixori Niospa meka anorima yoimisfokĩ. Niospa meka yoitamaro ko ãto xinipao ipaoni fisti ato yoifafãikani. Askakani feratenãkani. Nãskakē ã mia yoi mĩ ato yoisharanõ iskafakĩ: “Niospa meka mēstekõĩ yoisharakõikãfe. Mãto xinipaofãfe afeskax Epa Nios ari nõ nokotiromãki noko tãpimapaonifoma. Jesucristo noko nãxonĩ nõko chaka noko soaxoxiki. Epa Nios ano noko imaxiki nõ Jesús chanĩmara fakē. Nã fisti chanĩmara fakãfe, a fisti ato yoikãfe. A mãto xinipao ipaoni anori mã anã shinãnõma. Anorima chaka ato yoiyamakãfe. Niospa meka yoisharakãfe mēstekõĩ,” ixõ ato yoife.

<sup>5</sup> Niospa meka ato yoisharafe noinãnõfo. Mĩ ato yoiaito nikakĩ ãto õiti sharafanõfo. Askatari ãto chakafo Jesús ato soaxonõ, anã afaa pishta chaka shinãifomano, askatari Jesús chanĩmara fakõinõfo. Nãskax keyokõĩ shara faatanãkõinõfo. <sup>6</sup> Mã askafiax atiri yorafãfe anã shinãsharakanima. Anã ato noisharakanima. Nãskakĩ mēxotaima ato mekafofãsa fakani. Nãskakĩ anã ato tãpimasharatiroma, fanĩrira yoitiro. <sup>7</sup> Nãskaxõ a Moisés yoikĩ kirika keneni keskara ato tãpimapaikakĩ nãfãfe yoimisfo iskafakĩ: “A Moisés yoini keskara nõ fãsi tãpikõia,” ixõ yoifikatsaxakakĩ a yoiaifo keskara tãpikõiafoma.

<sup>8</sup> Akka mã nõ tãpia nã Moisés yoini keskara shara. Mēstekõĩ ato yoiaifono nikasharatirofo isharaxikakĩ. <sup>9</sup> Mã nõ tãpia a yora sharafoõnoa yoikĩ Moisés kenenima. Akka nã yora chakafoõnoa yoikĩ keneni. A nikayospafoõnoa yoikĩ, askatari a yora chakafoõnoa yoikĩ, askatari a Niospa meka nikamisfomaõnoa yoikĩ, askatari ãto apa yafi ãto afa retemisfoõnoa yoikĩ, askatari a ato retemisfoõnoa yoikĩ, <sup>10</sup> askatari a ãto ãfimafo chotamisfoõnoa yoikĩ, kērofãferi ato fenemafo chotamamisfoõnoa yoikĩ, askatari feronãfakefori aa ranã chotanãmisfoõnoa yoikĩ, nãskakãkĩ ãto ãfifo anã tanamisfomaõnoa yoikĩ, askatari yora fetsafo achikaxõ onemisfo ato yonomaxikakĩ, askatari ãa chanĩmisfo, Niospa meka fanĩrira yoimisfo, askatari afarafo chakafamisfo, afãfe Niospa meka tãpiafoma, nãskara yorafoõnoa Moisés ato kenexoni tãpinõfo afeskax isharatirofomãkĩ a Niospa noko imapaiyai anori. <sup>11</sup> Nãfãfe Niospa meka tãpisharafoma, nikakanima. Epa Niospa ea yoia ã ãfe meka mēstesharakõĩ ato tãpimanõ. ãfe Fake Jesucristo fãsi shara nokoõnoax nani nõko chaka noko soaxoxiki nõ afe nipaxanõ. Aicho, Nios fãsi sharakõĩ.

### *“Aicho, mĩ ea õia mĩ ea shinãkõia,” Pablo Nios fani yoikĩ*

<sup>12-14</sup> Ë anorima shinãyopaoni Niospa Fake tãpiaxma. Ë fãsi anorima shinãpaoni iskafakĩ: “Jesús Niospa Fakekēroko. ãa pãrakaninõ, yorakõifekē,” ixõ ã chakafapaoni, ã anorima shinãkĩ. Anori shinãki a Jesús Ifofamisfo ã fãsi ato chakafapaoni. Ë fãsi feronãfake mesekõĩ ipaoni ea omispaonifo ã tãpisharaxma. Anorima ã shinãkĩ ã noikasapaoni, ares ea shinãfaiito Niospa ea noikĩ. Nãskaxõ ea ifisharani. Ë fãsi chakafafiamiskē ea noisharai.

Nãatofi ea shinãmamiskĩ ã aõ noinõ. Ea askafaito ã nikasharakẽ nõko Ifo Cristo Jesús ea yora fetsafo fãsi noimasharai. Aicho, ã Jesúski inimasharakõi ea noisharaito. Jesucristo ea shinãmani iskafakĩ: “Mĩ ea noikĩ, ea shinãsharafe, mĩ ea tãpisharaxõ eõxõ mĩ yonoi ato tãpimakĩ,” ixõ ea yoia.

<sup>15</sup> Timoteo, na ã mia yoiai chanĩma. Keyokõichi chanĩmara fanõfo. Jesucristo nai mẽraxõ Apa Niospa nãmã nĩchini nõko chakafoõnoax noko nãxoyonõ nõ afe ãpaxanõfo. Askafiaino na fetsafãfe chakafakĩ finayamafiaifono ã fãsikõi chakafakĩ finakõipaoni. Jesús Ifofamisfo ã chakafayopaoni. <sup>16</sup> Nãskafiaito õikĩ Jesús ãfe chaka ea soaxona. ã chakafafiafismiskẽ Jesucristo ea fãsi noi. Ea askafaito õi kakĩ yora fetsafãfe iskatirofo: “¡Õikapo! Na Pablo fãsi chakafafiamiskẽ mã Jesús aõ fãsi noi,” shinãito õikĩ, “Nokori Jesús noikĩ noko ifitiro, na Pablo akai keskafakĩ, nõ afe ãpaxanõ na Pablo ikai keskai Jesús fe nipanaka, nõri afe nipaxanõ,” ikaxõ anori shinãtirofo.

<sup>17</sup> Anori shinãkĩ nãnori nõ yoitiro iskafakĩ: “Aicho Epa Niospa, mĩ fãsi sharakõi. Meres mĩ xanĩfokõi, tsõa mia finõtiroma. Mĩ nanakama, mĩ nĩpanaka. Tsõa mia õitiroma. Meres mĩ keyokõi tãpikõia. Meres mĩ Nioskõi, anã fato fetsama.” Nãskafakĩ nõ Nios yoipakenaka.

<sup>18</sup> ãfe fake Timoteoshta, a Jesús Ifofanifãfe mia yoiaito mĩ nikamiski. Niospa ato shinãmanaino anori mĩ kerexkai ato yoisharanõ mẽstekõi, ãri mia yoi kerexkai yoife mĩ Niospa meka nikasharakõixõ Jesús Ifofaxõ ato yoisharafe. <sup>19</sup> A yora fetsafãfe mã Niospa meka tãpifikaxõ iskaratĩa anã Nios shinãkanima. Niospa meka nikakaspakakĩ Jesús anã chanĩmara fakanima. Fanĩrira shinãkani mã na meka tãpifikatsaxakakĩ. <sup>20</sup> Akka a feronãfake rafe Himeneo feta Alejandro iskafamisfo. Nã rafeta Nios chakafamisfo noikaspakakĩ. Askaito õikĩ ã ato yoia: “Mã mã Satanás nikakĩ, Nios chakafakĩ, afianã Niospa mato kexeima.” Mã askafaito Satanás mato omiskõimatiro. Mato omiskõimanaito mã tãpitiro mã anã Nios chakafanõma.

## 2

### *Afeskafaxõ nõ Nios kĩfitiromẽ*

<sup>1</sup> Timoteo, a Nios Ifofamisfo ã mia yoiai anori ato fãsi yoife. Taefakĩ mĩ ato yoitiro iskafakĩ: “Keyokõi yorafo ato yoixokãfe. Afara yopaifãfe Nios ato yoixokãfe. Mato Niospa axõfaito aicho fakãfe akiki inimakĩ. <sup>2</sup> A xanĩfokõi fe afe rafeafo keyokõi xanĩfofo ato Nios yoixokãfe mato yonoxosharanõfo isharaxikãkĩ. Nãskakẽ afanã mato fekaxtefayamanõ, mã Nios shinãsharanõ, Nios Ifofasharaxiki.” <sup>3</sup> Nãskakẽ Nios noko ifimisto noko õikĩ noko iskafatiro: “Na ãfe fakefo isharafo. Iskara sharakõi. Na yorafoki ã inimakõira,” ixõ Niospa yoitiro. <sup>4</sup> Niospa keyokõi yorafo ifisharapai, keyokõi yorafo Jesús ato nãxoni ato chaka soaxoxikĩ a tãpikõinõfo. <sup>5-6</sup> Nios fistikõi, anã fato Nios fetsama. Nã Nios fisti ares shara. Akka na yorafo chakakõifo. Afara chakaya shara nõ ositiroma. Akka yõra ato mẽraxõ afara chakafamisto Nios õikaspai, nikakaspakĩ. Akka nã yora chaka askara Nios ari katiroma. Nãskakẽ Cristo Jesús nãmã na mai ano oni yorafo nãxoxiki nõko chaka noko soaxoxiki. Askafakĩ, yorafo chaka soaxonano isharanõfo, ato askafaano, Nios ari nokotirofo. Nãskakẽ nõ tãpia Jesucristo fistichi noko Nios ari iyotiro. Nãskakẽ keyokõi yorafo ifipai. Nãskakẽ noko õimani Jesucristo keyokõi yorafo ifipai. <sup>7</sup> Nãskakẽ Niospa ea katonĩ aõnoa judeofoma ã ato tãpimanõ nãfãferi tãpinõfo. Yora fetsafoõnoaxri Jesús nani. “Eõxõ yoixiki,” ixõ Niospa ea yoini. ã chanĩma, ã mia paraima. Niospa ea yoini ã ato tãpimanõ Jesús ato nãxoni chanĩmara fanõfo.

<sup>8</sup> Akka feronãfakefo ichanãkaxõ kifikani inimakani, keyokõi mã raenã faatanãkaxõ ato chaka Jesús soaxonano, ãto mẽke rafe Nioskiri mẽshaxotirofo Niospa õitiro. Askafono Jesús ato chaka soaxonano, nã Nios kĩfiaifãfe ato Niospa nikatiro. Askapainõfora ixõ ã yoi.

<sup>9</sup> Nāskarifiakī nō ichanāino xotofāke iskara shinātiroma: “Sama shara safeta, teoti ichapa safeta, askata femānāki keneta, foaromesharata, irosharakōita, ē ikaino yorafāfe, ‘Na xotofake sharakōira’ ixō ea yoinōfo,” ixō anori shināyamakāfe. <sup>10</sup> Askafatamaroko, fetsafo axosharakāfe, Nios Ifofaxō Nios ōimaxikakī. “Na xotofake sharakōira,” ikaxō aōnoa yoitirofo. <sup>11</sup> Ano fisti ichanākaxō xotofakefāfe ato nikakōisharatirofo. Akairi tāpisharaxikakī atoōxō. <sup>12</sup> Ē fichipaima xotofāke feronāfakefo Niospa meka ato tāpimanaino. Askatamaroko feronāfakefāfe xotofakefo Niospa meka sharaōnoa ato yoitirofo. Nāskakē xotofakefāfe feronāfakefo nikakōitirofo. <sup>13</sup> Akka Niospa Adán onifakī taefani. Nāskaxō chipo Evari onifani. <sup>14</sup> Nāskakē Satanás Eva pārani. Adán anima pārakī. Nāskakē xotofakefāfe nikakōisharatirofo. <sup>15</sup> Nāskaxō xotofāke fake fixō pekoksharatiro, Nios Ifo shara famaxiki. Nāskakē chanīmara fatirofo. Mā askafaito Niospa ato ifitiro. Āto ōiti inimasharanōfo a fetsafo noisharakanax ato fe isharanōfo. Isharakaxō, shināsharakōinōfo.

### 3

#### *Afe keskara itiomē a Niospa meka ato yoimis*

<sup>1</sup> Nā ē mia yoiai chanīmakōi. A feronāfake Niospa meka yoimis ipai askara sharakōi itiro. Askatari a Nios Ifofamisfo ato kexemis ipai askarari shara. <sup>2</sup> Nāskakē nā isharakōimis ifife. Isharaito ōikakī fetsafāfe yoitirofoma iskafakī: “Nato afara mēxotaima chakafamis,” ixō yoitirofoma. Askatari āfi fistiya itiro. Kēro fetsa kaxefamisma ikāi, shināsharakōita isharakōimis ikāi, fāsi yonosharamis xanimisma ikāi, fetsafo sharafamiskōi āfe peke anoxō yora pimamis ikāi, fētsa peke yopaito āfe peke mēra yora ikimamis ikāi, ato tāpimasharamis ikāi, nāskara feronāfake ifife. <sup>3</sup> Askatari pāemisma ikāi, setemit-samisma ikāi, yorafo noimiskōi ikāi, ato chakafamisma ikāi, kori noimisma ikāi, askara feronāfake shara katofe. <sup>4</sup> Āfe āfinō āfe fakefonō afe isharakōimisfo itirofokī. Āfe fakefāfe noikakī nikasharakōimisfo itirofo. <sup>5</sup> Akka askayamaito, afe yorafāfe a nikakaxoma askara yora Jesús Ifofamisfāferi a nikatirofoma. <sup>6</sup> Akka a rama Jesús Ifofaa a Niospa meka ato yoimis askara katoyamafe. Aato shināki iskafatiro: “Ē fāsi sharakōi, ē Niospa meka ato tāpimani. Tsoa fetsa ea keskarama,” ixō shināi Jesús shināyamafi āa shināi askatiro. Satanás anori mekani: “Ē Nios finōikai,” ini. Askaito Niospa nai mēraxō potani nāmā. Nāskari fakī a rama Jesús Ifofai, Satanás ani keskari fatiro. Nāskakē a ato Niospa meka yoimis askara katoyamafe a rama Jesús Ifofai. <sup>7</sup> Akka askaito ōikī a Nios Ifofamisfāfema yoitirofo isharakōiaito ōikakī. Akka isharayamaito, tsōa yoisharatiroma. Askara yōra fanīra chaka shināi paketiro Satanás paraino.

#### *Afe keskara itiomē a Nios Ifofamisfo ato kexemis*

<sup>8</sup> Nā a Nios Ifofamisfo ato kexemis nā keskara feronāfake katoxō ifife. Nāskara yora sharakōifo itirofo, āto meka mēstekōi shara itirofo, askara yorafo pāemis itirofoma, nā kori fisti shināfafāinaifoma. Nāskara feronāfake isharamisfo ifife Nios Ifofamisfo ato kexesharanō. <sup>9</sup> Na Niospa meka nō tāpiyopaonima, iskaratīa rama nō Niospa meka tāpi. Nāskakē na feronāfake Niospa meka nikasharakōimis ifife, askatari afara chakafayamaino āfe ōiti fekaxtemisma askara ifife. <sup>10</sup> Nā Nios Ifofaafo ato kexemis ikimākai mī ōiyotiro. Askarato afe keskara yonosharaimākai mī ōiyotiro asharamākai. Askata asharakōiaito ōikī, askara yora mī ifitiro a Nios Ifofaafo ato kexemis inō. <sup>11</sup> Mā askafono āto āfifori ato keskara sharafori itirofo. Nāskaxō anā ato mekafakī chakafatirofoma. Askatari pāemismafori itirofo. Askatari āa kakapaimisfo itirofoma. Askara yorafāfe shināsharamiskōifo itirofo. <sup>12</sup> Nāskax a Niospa meka yoimisfo fe rafekanax āfi fistiyafo itirofo. Nāskakanax ato peke anoax isharakōitirofo, āto āfinō, āfe fakefori afe isharatirofo, askara nikakōisharatirofo. <sup>13</sup> Nāskaxō a Nios Ifofaafo ato kexemisto yonosharakōiaito ōikakī fetsafāfe ōikaxō yoisharakōitirofo aōnoa. Nāskaxō a feronāfake mesetama fetsafo yoisharatiro: “Cristo Jesús ea ifia,” ixō ato yoitiro.

*Niospa meka chanĩmakõi noko yoimis.*

<sup>14</sup> Timoteo, iskaratĩa ě mia kenexõ fomai, mia ari samama kapaikĩ. <sup>15</sup> Akka ě mia ari fena kayamaino õikĩ na kene tãpixõ mĩ tãpitiro afeskax itirofomãkai a Jesús Ifofaifo. Akka Nios nĩpanaka. Nãskax a Ifofamisfo Niospa fakekõifo afe ipanakafo. Nãskaxõ Niospa meka mẽstekõi ato yoisharaifãfe fetsafãferi ato nikasharakõitirofo. <sup>16</sup> Fetsafãfe yoikĩ iskafatirofoma: “Niospa meka chanĩra,” ixõ yoitirofoma. Jesús Niospa Fakeferonãfakekõi kãini. Niospa Yõshi Sharapa, “Jesús Niospa Fakekõi,” ixõ yoini. Askatari Niospa ãjirifãfe Jesús õinifo Niospa Fakekõikẽ. Askatari yorafãferi õinifo Jesús Niospa Fakekõikẽ. Nãskaxõ yorafo tãpimakõinifo ato yoisharakõikakĩ, akairi tãpisharakõinõfo. Askaifãfe yora fetsafãfe mai fetsafo arixõ nikakakĩ ato chanĩmara fanifo akairi Jesús shinãkakĩ. Nãskakẽ Jesús anã nai mẽra kani Apa Nios ano.

## 4

*Pablo yoini anã Nios shinãyamaifono*

<sup>1</sup> Niospa Yõshi Sharapa noko mẽstekõi yoikĩ iskafamis: “Jesús mã chaima oaitĩa atiri yorafãfe Nios kachikiri fakani. ‘Ě Jesús Ifofaira’ ifiamisxakakĩ nã nĩafaka ato pãrafiaito anorima ato yoimisfo. Askara anori yoimisfãfe nikakaxõ niafaka fisti ifofamisfo,” ixõ ato yoimis. <sup>2</sup> Askara yorafãfe yora fetsafo anorima yoikani ãa ato pãrakakĩ, õiti chakayafiakaxõ. Anori fisti shinãkĩ feyafamisfo. Nãskakẽ afara chakafakani rãfikanima. <sup>3</sup> Askarafãfe fetsafo tãpimakĩ iskafakani ãa ato pãrakakĩ: “Niospa yoikĩ iskafamis: ‘Feronãfakefo ãfiyatirofoma. Askatari nami piyamakãfe,’ ixõ yoimis,” ato fatirofo. Akka Niospa keyokõi onifani nõ pinõ. A Nios Ifofamisfãfe pixikakĩ Nios kĩfiyotirofo. Nãskaxõ nõ pitiro afama mĩshti. <sup>4</sup> Keyokõi a nõ piaifo Niospa onifakĩ sharakõi fani. Nãskakẽ nõ inimakĩ yoitiro aicho fakĩ. Nãskakẽ nõ pikaspakĩ chakafatiroma a nõ piaifo Nioski inimakĩ. <sup>5</sup> Epa Niospa noko yoia: “Keyokõi shara,” ixõ noko yoia. Nãskakẽ nõ, “Aicho Epa Niosi, mĩ noko yoinã shara inã,” nõ fai. Nãskaxõ nõ pitiro.

*Afe keskara itiromẽ Jesús yonoxosharamis*

<sup>6</sup> Timoteo, na ě mia yoiai anori mĩ chanĩmara famis. Nãskakẽ Jesús Ifofamisfo ato tãpimasharafe, mĩ Cristo Jesús yonoxomis shara ixiki. Askatari Niospa meka mẽxotaima õife a mĩ piai keskafakĩ, fãsi shinãsharakõixiki, shara nixiki. <sup>7</sup> A tãpiamafãfe yoimis anori nikayamafe. Mẽxotaima Niospa meka shinãfafãife. Askata õiti kerexfafãi Nios shinãfafãife mĩ õiti pachi fakĩma. <sup>8</sup> Akka afaa meeyamai rakatsax nõko yora xokenãtiro. Nõ anã afaa yonopaitiroma. Akka nõ mẽxotaima yonoi nõ mitsisipakõi itiro. Nãskara shara. Nãskafakĩri nõ mẽxotaima Niospa meka nõ õirifakĩ, Nios kĩfirifai nõ mitsisipakõi itiro nõmẽra sharafinakõia. Nãskax nõ shara itiro. Nãskatari nõ naax, nai mẽra kaax, ariaxri nõ mitsisipakõi itiro sharafinakõimãi niax Nios anoax, nõmãi Nios Ifofakatsaxakĩ. <sup>9</sup> Na ě mia yoiai chanĩmakõi. Nãskaxõ keyokõichi chanĩmara fanõfo. <sup>10</sup> Nãskaxõ mitsiskai nõ Niospa meka yoifafãini. Nõ askafaito fetsafãfe noko omiskõimatirofo a Niospa meka õikaspaifãfe. Askai omiskõifikĩ nõ tãpikõimis Jesús iskaratĩamãi nikẽ. Nãskaxõ Jesúmãi noko nãxonikẽ, keyokõi yorafoõnoax, nãskaxõ a Ifofamisfo ato ifixii.

<sup>11</sup> Timoteo, na ě mia yoiai yonosharata ato tãpimafe. <sup>12</sup> Nios Ifofafãi isharakõife. Mĩ isharakõiaito mia õinõfo, ato õimasharakõife. Askax mĩ isharakõixiki Nios Ifokõi faax, ato yoisharakõife mĩ meka pachi faxõ, ato noikõisharata, nãskax isharaito õikakĩ yorafãfe mia chakafakĩ yoinõfoma iskafakĩ: “Na naetapa Timoteo fanĩrira noko yoi kiki nikayamakãfe,” ixõ mia tsõa yoitiro. <sup>13</sup> Nã ě kayamaichãi, ato ichanãfaxõ Niospa meka ato anexõ, ato nikamasharakĩ, ato yoisharakõife. <sup>14</sup> A Nios Ifofaifo ato kexemisfãfe mia mãmãkaxõ mia Epa Nios kĩfixonaifono Niospa mia amapaiyai keskara mia axoni a Nios Ifofaifo mĩ ato tãpimasharanõ ato kexesharayanã. Akka Epa Niospa mia kaxpa tãpimanimakĩ fetsafori sharafaxõfafãini xateyamafe.



<sup>15</sup> Shinãfãikõï isharafe nã ã mia yoiai keskafakĩ. Mĩ askafaito mia tãpisharakõinõfo mĩ yorafo Niospa meka yoiaito mia tãpisharakani. Askaxõ, “Timoteo fãsi sharakõï,” ixõ mia yoikani. <sup>16</sup> Nãskakẽ kexemesharafe. Niospa meka mẽstesharakõï ato yoife, isharakõita. Mĩ askafai Epa Nios fe mĩ isharakõïpakenakaki. A mia nikaifori askapakenakafoki.

## 5

### *Afeska x nõ ishara tiromẽ a nõ Nios Ifofaa tii*

<sup>1</sup> Anifo fãsi mekafata yoiyamafe. Nã mĩ epa mĩ aka keskafakĩ, oitsifafãï yoisharafe. Askatari nã naetapafori mĩ ochi yafi mĩ exto aka keskafakĩ ato shinãmasharata ato yoisharafe. <sup>2</sup> Yõxafofori nã mĩ efa mĩ aka keskafakĩri shinãsharafãï ato yoisharafe. Mĩ chiko yafi mĩ chipi mĩ aka keskafakĩ nã xomayafo sharafo feesyamafãï, askara shinãtama ato yoisharafe.

<sup>3</sup> Nã kẽro ifomafafo, askata fakemaisfo, askatari fafamaisfo, nãfo shinãmakiyamafe nã Jesús Ifofamisfãfe kexesharanõfo. <sup>4</sup> Akka nã kẽro ifomafa fakeyakẽ, askayamai fafafoyakẽ afãfe kexesharatirofo. Askarifakĩ nã yome pishtakẽ ato kexesharapaonifo keskafakĩri kopikiri kexesharanõfo ãfe fakefãferi. Nãskafãifãfe fetsafãfe õi kakĩ, “Nã yorafãfe Nios nikasharakani,” ikaxõ yoisharanõfo. Nãskaito õi Nios atoki inimai. <sup>5</sup> Nã kẽro ifomafa fakemais ita, fafamais ita, fenemais ita, nãskarafãfe Nios fisti shinãkĩ: “Niospa ea kexei,” ixõ shinãkĩ iskafakĩ, nã pena tii kĩfita fakish tii kĩfita famisfo Epa Nios mẽxõtaima kĩfikakĩ. <sup>6</sup> Nãskafiax nã ifomafa fetsa fenemaisax kafãsatiro. Aa inimasharakõï nã ipaiyai keskai. Niospa meka mã shinãmakixõ, kachikiri faax, nã mã naa keskara. Shinãsharaima, chaka shinãï. <sup>7</sup> Timoteo, keyokõï ã mia yoiai na kẽro ifomafa Jesús Ifofamisfo tãpimasharafe, askara tãpikaxõ nikasharakõinõfo, fetsafãfe, “Mã chakara,” ikaxõ yoitirofoma. <sup>8</sup> Akka fẽtsa afe yorafo kexesharama, ãfe pexe mẽra ikiaifãfe ato kexeima nãskafakĩ chakafai. Aa keskaratokai Niospa meka nikasharama. A Jesús Ifofamato askarato afara chakafai, akka a Jesús Ifofaafãfe afe yorafo kexesharakakĩma fãsi chakafamisfo.

<sup>9</sup> A kẽro ifomafa sesenta xini aka, ãfe fene fisti fe iyopaoni nã keskaraki kirika kenefe nã Jesús Ifofamisfãfe ato kexenõfo. <sup>10</sup> Nãskata nã kẽroõnoa yorafãfe yoisharamisfo; nãskata ãfe fakefo pexkosharakõini; askatari yora fetsa ãfe pexe ano kaito atoki inimamis; fetsafo pimamis; omiskõiaito ato sharafamis; ato feta amis; kẽro askara fistichi ãfe ane kenetiro Jesús Ifofamisfãfe a kexenõfo.

<sup>11-12</sup> Akka nã kẽro ifomafa sesenta xinia akama, a keskaraki ãfe ane mĩ kenetiroma. Nã kẽromã ãa shinãkĩ iskafatiro: “Jesús, ã mia fisti shinãpai. Mia fisti ã yopai. Ë anã feneyapaima,” iflaxõ anã fetsa anori shinãtiro feneyapaikĩ, anã Jesús shinãtiroma. Nã Niospa yoiai anori shinãïma ãa chanĩ mekatiro. Askafai ãa chanãaito õikĩ, askara kẽroki Nios inimatiroma. Nãskakẽ ãfe ane kenetiroma. <sup>13</sup> Askara kẽro fenemaisax xani itiro, pexe tii õifofãsafakĩ, askai kafãsakĩ, ato pãrafofãsafatiro ãa chanĩkĩ. Nãskakẽ ato fekaxtefatiro. <sup>14</sup> Askatamaroko kẽro ifomafa yõxafo famatai feneyatiro. Mã feneyaxõ fake fitiro. Fake fixõ ãfe pexe fisti anoxõ kexesharatiro. Askafasharaito õikĩ yorafãfe chakafakĩ mekafatirofoma. <sup>15</sup> Atiri kẽro ifomafafãfe Nios kachikiri fakaxõ Satanás ifofafo.

<sup>16</sup> Timoteo, a Jesús Ifofamisto afe yora ifomafakẽ, kexesharatiro. Askatari a ifomafafo kaifoyakẽma, fenemais ita, fakemais ita, fafamaisfo askara a Nios Ifofamisfãfe ato kexetirofo.

<sup>17</sup> A Nios Ifofaafãfe xanĩfõfõfãfe noko kexesharakaxõ noko ikisharamisfo Niospa meka noko tãpimanaifono nõ atoki inimakĩ nõ aicho fatiro. Askatari nõ ato inãsharatiro nã afara yopaifo keskara finõfo. <sup>18</sup> Moisés kenekĩ yoikĩ iskafani: “A ato yonomanaito ato yonomakĩ kopifatiro.” Askatari keneni yoikĩ fakkaki keparanãkai. Moisés keneni yoikĩ iskafakĩ: “Oa fakka keskara nõ yonomanaino trigo ãfe xaka chona chona a fõfãsafatiro

nō renexiroma piifofāsafanōfo. Askatari a noko tāpimasharamis nō kopifatiro afaa yopayamanō. Nāskafakī nō yoitiro akiki inimasharakī,” ixō yoikī kenenī.

<sup>19</sup> A yora fistichi Nios Ifofamisto xanīfoōnoa mia yoiaito, chanīmara fayamafe. Akka feronāfake rafe iyamai trespa a afara chakafaito ōikaxō, mia yoiaifāfe mī ato nikatiro.

<sup>20</sup> Askaito nikakī a Jesús Ifofamisfāferi ichanākaxō yoitirofo iskafakī: “A mī chakafaa keskafakī anā askafayamafe. Nā mī chaka shināi, Jesús yoife na afarafo mī chakafakī fetsai, mī yoiaito nikakī Jesús mia chaka soaxonō.” Mī askafaito ōikani fetsafo rāfitirofo. Askaxō afaa chakafapaitirofoma rāfikaspakakī.

<sup>21</sup> Epa Nios feta Jesucristo āfe ājirifāfe mia ōikani. Nāskakē na ē mia yoiai anori askafafe. A afara chakafamisfāfe āto ferotaifi yoife. Mī kaifofo yafi mī kaifofoma ōikī, nāskarāfāfe āto chaka xatenōfo ato yoife. <sup>22</sup> Ōisharata ato katofe Niospa meka ato yoimis. A kaa fisti ato katoyamafe. Ato ōisharayofe taefakī. Mī ōisharaxoma ato ifitiroma. Mī askara ifikē chipo afara chakafaira ixō, fetsafāfe mia mekafakī chakafatirofo. Nāskakē shināsharafāi ife, Timoteo. Afaa chakafayamafe.

<sup>23</sup> Timoteo, mī xāki pāemiski faka fisti ayakima uva ene pāepishta ayafe sharaxikī.

<sup>24</sup> Atiri yorafāfe afara chakafaito nō ōitiro xafakīakōi. Akka atirifāferi afara chakafaifāferi nō ōitiro. Mā askafimisfono chipo nō tāpixii Niospa kāimanaino.

<sup>25</sup> Nāskarifakī atirifāfe shara faifāfe nō ōitiro xafakīakōi. Askatari fetsafāferi afara shara faifāfe nō ōitiro. Mā askafamisfono chipo nō tāpixii Niospa xafakīakōi kāimakē afo.

## 6

<sup>1</sup> A ato yonoxomisfāfe Jesús Ifofamisfāfe āto xanīfo shināfāi yonosharaxotirofo. Askakaxō tsōa chakafakī mekafatiroma āto xanīfo. Akka āto xanīfo yonosharaxokima chakafakī mekafaifāfe fetsafāfe ato iskafatirofo: “Kee, na Nios Ifofamisto yonokī finasharaima.” Nāskarifakī Niosri chakafakī yoi. Niospa mekari chakafakī yoi. <sup>2</sup> Āfe xanīfāfe Jesús Ifofamiskē a yonoxomistori Jesús Ifofaxō askarato āfe xanīfo noikī shināfāi yonosharaxotiro, akiki xanikima aō noisharakōita afe nanea ōitsakōi ixō shināsharakōitiro āfe xanīfo.

Timoteo, nā ē mia yoiai anori Jesús Ifofamisfo tāpimasharafe. <sup>3-4</sup> Nōko Ifo Jesucristo āfe meka fāsisharakōi. Jesús meka nikax oa Nios keskara nō shara itiro. Akka a yora fētsa noko anorima yoitiro, āa shināxō. “Ēfi fāsi tāpifinakōiakī, ea keskarakai tsoama,” ixō āa yoi askara yōra afaa tāpiamafix. Āa chanī askamis. Askara yora ato fe feratenātiro. Askakī meka shara yoitiro. Āa kakapaimis askara yōrari āa shinātiro: “Ea tsōa finōyamanōra,” ixō āa shinātiro. Askara feronāfākekai Niospa meka ato yoisharatiroma. Askaito ōi kakī feratetirofo, meepaitirofo, nikakaspaitirofo, īchatirofo, noikaspaitirofo, “Noko chakafaira,” ixō shinātirofo. <sup>5</sup> Akka a feratenāmisfāfe anorima fisti shināmisfo. Mā Nios shināyopaofinixakakī anā shināsharatirofoma. Anā ato yoisharatirofoma mēstekōi. Afāfe shināfo: “Nō Nios Ifofakatsaxakī nō kori ichapaya itiro,” ixō shināmisfo anori Niospa yoiamafiano. Akka fētsa shināi iskatiro: “Ēri a keskara shara ipai,” ixō shinātiro.

<sup>6</sup> Akka anori shinātamaroko nō afaamaisfixō nō Nios Ifofaax, nō inimasharakōitiro. <sup>7</sup> Na nō fake kāiyaitīa nō afaaya pakenima. Nāskairi a nō naitīa nōkai afaaya katiroma. <sup>8</sup> A nō piyai yafi a nō rapatiyax nō inimatiro, afaa anā ichapafō fichipaitama. <sup>9</sup> Akka atiri yorafo rapati ichapaya ipaimisfāfe nonori shinākani iskamisfo: “Afara ē fipaikī ē fitiro, nāskax ē inimatiro,” ixō anori fisti shinātiro. Fētsa kori fisti fichipai samama shināchakatiro, afara chakafo fetsa fetsatapafō fichipaitiro. Kori ichapa fipaikī afeskaxoma askarato chaka shināfafāini. Askara naax, a omiskōipakenakafo mēra katiro. <sup>10</sup> Nāskakī kori fisti noi, Niospa meka shinātama afara chakafōfa fafafāini kori fixikī. Nāskafakī Nios kachikiri famisfo. Askara yorafo āto shinā mēraxō shinākani omiskōikanax anā inimasharatirofoma.

*Pablo yoini afe keskaramāki Nios Ifofaax nō kerexkai ikai*

<sup>11</sup> Timoteo, Niospa mia katoa. Kori yafi rapati shināyamafe. Nios Ifofasharafe a keskara ixiki, afaa chakafamisma ixiki, Jesús meka chanīmara fakōixiki. Askaxō mī yorafo noimiskōi ixiki, Niospa meka Ifofakī, akka mī yorafo yoikī oitsifafāi yoisharafe. <sup>12</sup> Mia yora ichapafāfe ōiaifono mī ato yoimis: “Jesús ea nāxonī ēfe chaka ea soaxoxiki. Nā Jesús ēfe Ifo. Ē fāsi inimai,” ixō mī yoisharani. Akka anā shināmakiyamafe. Jesús mia nāxoniki nō afe nīpaxanō. Nā fistiōnoa shināfe. Satanás mia chaka shināmapaiyaito nikayamafe. <sup>13</sup> Ea nikasharafe Niospa keyokōi noko onifani noko nimaxiki. Jesucristo nā xanīfo Poncio Pilato yoini: “Ēfi Niospa Fakekōi,” ixō ratekima yoini. Iskaratīa Nios feta Jesús mia ōi. <sup>14</sup> Nāskakē Jesús meka nikasharafe. Afara ē mia yoiāi keskara afe, mī askaito ōikī fetsafāfe, “Timoteo chakafamisra,” ixō yoinōfoma. Nāskara afe nōko Ifo Jesucristo nokoaitīa. <sup>15</sup> Nios fistichi Jesús nokoaitīa tāpiakī āa nīchixiki. Ares afara apaikī atiroki. Afi xanīfo efapakōiki xanīfo fētsa finōtiroma. Nā nōko Ifo efapakōi fato xanīfo fētsa finōtiroma. <sup>16</sup> Akka tsōa onifanima, aakōi ares ika. Nāskax nanakama. A chaxasharai mēra ika tsoa akiki nokotiroma. Askatari tsōa ōimisma, tsōa ōitiroma. Nāskakē keyokōichi nō aōnoa yoisharatiro: “Nios fisti sharafinakōia. Nā fistichi afara sharafo ares atiroki,” ixō yoipakenakafo. Askapainō.

<sup>17</sup> A kori ichapayafō ato yoife: “Ē kori ichapayaki tsoa ea keskarama,’ ixō anori shināyamakāfe. Māto koriōnoax inimamis iyamakāfe. Askatari māto kori mato afeskafatiroma, keyotiro samama. Askatamaroko Nios fisti shinākāfe. A nō afara fipaiyai noko ināi noko fishkoima. <sup>18</sup> Nāskakē māto korioxō fetsafo aō noisharakāfe. Fishkomītsayamakāfe. Afaamaisfo ato inākāfe. Fishkoyamakāfe. Inākōikāfe. <sup>19</sup> Akka mā ato ināsharaito ōi Nios matoki inimai. Mato afara fāsi shara faxōi mā Nios ari nokoaitīa. Iskaratīa mā fetsafo ināsharai keskari fakī, Niospari chipo mato ināsharaxii kiki. Nāskax mā Niosnoax isharapakexatiro,” ixō ato yoife.

*Pablo mā mekai xatekī, “Timoteo, mī isharaxō ato yoi sharafe,” ixō kirika kene manamani*

<sup>20</sup> Nāskakē Timoteo, Niospa āfe meka shara mia tāpimani fetsafori mī ato yoinō. Nāskakē tāpisharayofe, āfe meka tāpisharaxō fetsafo mēstekōi tāpimaxii. Akka fetsafāfe Niospa meka anorima yoimisfo. Aa ranā yoinōnākakī kaxpakōi yoimisfo. Nāfāfe yoimisfo nō tāpikōiara ifiakaxō tāpiafoma. Nāskakē ato fe rafeyamafe. <sup>21</sup> Nāskakē nikayamafe. Fetsafāfe nāfo nikakanax ifofakaxō Niospa meka kachikiri fakanax, nāfo fenoafo. Afianā chanīmara faafoma.

Nōko Ifofāfe mato noikī mato kexesharanō. Nā tii.

*Ēkīa Pablo.*

## Pablo Timoteo Afianã Kirika Kenexõ Fomani

### *Pablo Timoteo yoisharani*

<sup>1</sup> Ëkãa Pablo ã mia kirika kenexõ fomai. Epa Niospa fichipaiyai keskakakĩ Cristo Jesús ea katonu aõnoa ãfe meka shara ã yoifofãsafanõ. Ea yoini iskafakĩ: “Keyokõi yorafo yoife iskafakĩ: ‘Jesucristo matoõnoax nãxoni mãto chaka mato soaxoxiki nã chanĩmara faafo tii afe nĩpaxanõfo,’ ixõ ato yoife nã ã mia yoiai keskakafe,” ixõ Jesús ea yoini. <sup>2</sup> Timoteoshta, ã mĩo noikĩ ã mia kirika kenexõ fomai mĩ tãpinõ. Epa Nios nõko Ifo Cristo Jesús feta mia noikĩ mia shara famanõfo. Askatari mĩ shinã mẽra mia shinãmasharakõinõfo mĩ õiti fekaxtenõma.

### *Ato Jesúsnoa yoisharafe*

<sup>3</sup> A ãfe xinifãfe Epa Nios yonoxosharapaonifo keskari fakĩ, ãri a yonoxosharai. Ë mẽraxõ ã afaa shinãchakayamafai ã yonoxosharai. Nãskakẽ ã mia Nios kĩfixõfafãini aicho fakĩ. Pena tii yafi fakish tii ã mia Nios kĩfixõfafãini. <sup>4</sup> Nãskakẽ mẽ oaino, mĩ ea shinãi oiaito ã mia õiferani. Nãskakẽ ã anã mia õisharapai, mia õi ã inimasharakõixiki. <sup>5</sup> Taefakĩkõi mĩ chichi Loida Jesús Ifofani. Askata mĩ efa Euniceri Jesús Ifofani. Afãfe Ifofasharakõimisfo keskakakĩ, mĩri Ifofasharai. Mẽ mia tãpia mĩ Ifofasharakõiaito nãskakẽ ã mia yoi.

<sup>6</sup> Anã shinãmakiyamafe ã mia mãmãxõ ã mia Nios kĩfixoni. Nãskakẽ Niospa mia katonu Jesús yoimis mĩ inõ. Mã chii nokakẽ nõ anã xofisa fatiro anã xofisanõ. Nãskarifiakĩ mĩ anã yorafo ato yoipaima mã mĩ xokenãifinaxõ askara meekĩ mĩ Nios kĩfitiro anã mia õiti fepeaxosharanõ, mĩ anã ato yoisharanõ inimayanã a mĩ taefakĩ ato yoini keskakakĩ. <sup>7</sup> Nãskakẽ Niospa Yõshi Sharapa noko yorafoki mesematama. Aõxõ afama mĩshti noko amatiro. Askatari noko ato noimasharai. Aõxori noko shinãmasharatiro anã nõ chakafanõma. <sup>8</sup> Askafai rãfiyamafe Jesúsnoa yorafo yoitaifãfe rãfikima. Askatari eõri rãfiyamafe. Ë Jesucristo ato yoirifaito ea karaxa mẽra ikimatifoki. Mĩri Jesús ato tãpimasharafe; mĩ askaito, miari omiskõimanaifono rateyamafe. Jesúsnoax mĩ omiskõiaito, Niospa mia axoxii. <sup>9</sup> Akka Niospa ãfe Fake Cristo Jesús noko nĩchixonu nokoõnoax nãxoyonõ nõko chaka noko soaxoxiki. Askaxõ noko shinãni afe yora nõ inõ. Nõ yora chakafofiakẽ Niospa noko noimis. Taefakĩkõi Niospa mai onifaxoma, a inõpokoai tãpixõ, noko shinãni noko ifixixakĩ Jesúsxõ. <sup>10</sup> Jesús noko ano oamatai Niospa noko ifipaiyai anori nõ tãpipaonima. Akka rama iskaratĩa mã nõ tãpia noko ifimis Jesucristo noko nãxoni. Nãskax iskaratĩari nõ nai, nõ rateima omiskõipakenakafo mẽra nõ kairoko. Nõ Nios ari kaax anã nõ naxima. Jesús noko chaka soaxonano nõ Nios ari nĩpanaka. Mã iskaratĩa nõ tãpia Jesús noko nãxoni nõ chiifã mẽra kanõma noko ifiano.

<sup>11</sup> Niospa ea katonu na meka shara Cristoõnoa yora fetsafo ã ato tãpimanõ. <sup>12</sup> Nãskakẽ ã karaxa mẽranoax Cristoõnoax omiskõifi ã rãfima. Ë Jesús tãpikõiax chanĩmara fayanã. Jesús ãfe chaka taefakĩ ea soaxonitĩa ã Epa Nios iskafakĩ yoini: “Epa Niosi, ea kexesharapakexafe Jesús afianã oaitĩa,” ixõ ã yoini keskara ea axoxii ã chanĩmara fakõini.

<sup>13</sup> Na ã Cristo Jesúsnoa mia chanĩmakõi tãpimana shinãmakiyamafe. Ë mia mẽstekõi tãpimana keskakakĩ, nãskari fakĩ ato tãpimafe. Cristo Jesús chanĩmara fakĩ afe rafekĩ aõxõ yorafo noife mĩ afe rafeakĩ. <sup>14</sup> Nã ã mia yoia keskara mĩ mẽraxõ shinãfe, shinãmakixikima. ãfe Yõshi Shara mĩ mẽra ikano mefeta aki. Õifãi, Niospa mia yoia keskakakĩ kachikiri fayamafe.

<sup>15</sup> Mã mĩ tãpia keyokõichi chanĩmara faafo Asia mai anoafãfe ea õifainafõ. Askatari ato feta Figelo feta Hermógenesri ea õifainafõ ato fe fokãkĩ. <sup>16-17</sup> Akka Onesíforokai askanima, eõ rãfinima ã karaxa mẽra ikikẽ. Nãafi Roma ano nokoxõ pena tii ea fenafafãikĩ ea karaxa mẽranoa fichita, ea õiyoi nã otitaiapaoni mẽxotaima ea õifaa õifakĩ, ea pishta

inimamani. Nāskakē nōko Ifāfe Onesíforo āfe āfinō āfe fakefonō Efeso anoxō ato noikī ato kexesharaxonō. <sup>18</sup> Onesíforo Efeso anoxori ea yonosharaxopaoni, mīfi a ōixō tāpisharakī. Jesucristo anā fotoxō noko ichanāfaxō Onesíforoki inimakōikī noikī axosharaino ē askara fichipai.

## 2

*Nō Jesús Ifofakī oa soraronō āfe xanīfo nikakōiai keskafakī nōri Nios nikasharakōitiro*

<sup>1</sup> Timoteoshta, Jesucristo āfe kerex sharaōnoax isharafe, afaa chakafaxima. <sup>2</sup> Ē yorafo Jesúsnoa yoiaito mīri ea nikafafāini. Nāskarifiāi mī ato chanīmara fasharatiro. Nāskaxō a feronāfakefāfe a shinā sharaifo ifife mī ato tāpimaxikī afāferi fetsafo tāpimanōfo.

<sup>3-4</sup> Akka soraro ōiti sharayato omiskōifikī tenetiro. Āfe pexe shināyamata āfe xanīfo fisti ifofaxō nikasharakōi. A afara yonoai keskara āfe xanīfāfe yonomanaino soraro sharapa yonosharatiro. Nāskarifikī Niospa mia yonomapaiyai keskari fakī yonosharaxōfe fanīrira fetsa shinākima. Jesúsnoax omiskōifi meseyamafe. <sup>5</sup> Askatari fetsafo xonōnōnāxikakī ikisi itipinīsharatirofo xonōnōnāpaikani. Askatari mīri shināsharafai Niospa mia yoiaito nikasharakōife. Akka mī nikasharayamaito Niospa mia, “Aicho, mī fāsi sharakōi,” ixokai mia yoitiroma. <sup>6</sup> Askatari feronāfāke yonosharamiskōi āfe tare efapafaxō, ikisi āfe yono fitiro pixikī. Nāskarifiakī mīri Jesúsnoa yonoxosharamis Jesús mikiki inimakōinō mia afara shara ināxii. <sup>7</sup> Ē mia yoiai keskara shināsharafe. Nōko Ifāfe mato tāpimasharai kiki.

<sup>8</sup> Nāskakē shināmakiyamafe Jesucristo naafiakē anā Niospa otofani noko ifimis inō. Nā David āfe fena. Nānori nā meka shara ē yoifafāimis. <sup>9</sup> Nā ē yoifiaito, yorafāfe Jesús Ifofaafoma ōitifishkikakī. Ē Niospa mekasharaōnoa yoiaino ekeki ōitifishkikakī ea karaxa mēra ikimanafo. Ē afaa chakafayamafiakē ē feronāfake chaka keskarakē ea karaxa mēra ikimanafo. Ea ikimafianifono Niospa meka Jesucristoōnoa ē enetiroma. <sup>10</sup> Nāskakē ē atoōnoax omiskōifikī ē tenekōi a Jesús Ifofaafō tii ē ato tāpimani chanīmara fanōfo, Nios fe ĩpaxakakī.

<sup>11</sup> Na meka sharakōi nikafe:

Nō Jesúsnoax nakī nō chanīmara faax nō afe ĩpanaka. <sup>12</sup> Askatari nō Jesúsnoax omiskōifikī nō tenei, nō Jesús fe Epa Nios ariax xanīfo ĩpanakakī. Akka nō Jesús potakī, “Niospa fakemara,” ixō nō askafaito Jesús noko yoitiro iskafakī: “Mā ea Niospa Fakemara faito ēri mato kopitiro iskafakī: Mī ēfe fakema,” fakī noko fatiro. <sup>13</sup> Askatari nō Jesús nikayamai nō isharayamafimisno, akka akai askarama, aroko isharakōimis. Aatokai afaa chanī yoimisma, āfe meka chanīmakōi. Aakai ōiti ranāyama.

*Afe keskara a Niospa meka yoimis shara itiomē Nios akiki inimanō*

<sup>14</sup> Na ē mia yoiai anori, mefe yorafo ichanāmisfo ato shināma fafāife. Niospa mia xafakīa ōiaino ato yoife Niospa mekaōnoa feratenānōfoma, feratenākani aōnoax mekanōfoma. Akka fatotokai yoisharaimākai fatotori yoisharaimamākai ikaxō tsōa tāpitiroma tāpipai kakī. Anorima nika kakī tsōa tāpitiroma. Askakani fanīrira mekamisfo āa chanīkani. <sup>15</sup> Timoteo, Niospa meka pena tii ōife. Askafaxō Niospa meka tāpisharaxō yorafo mēstekōi ato tāpimafafāife. Mī askaito Niospa mīōnoa yoitiro iskafakī: “Na ea yonoxosharamis, ē akiki inimasharakōi,” ixō mīōnoa yoixiki. Mia askafainokai mī aō rāfitiroma. <sup>16</sup> A feratenāmisfo āto meka nikayamafe. Nō āto meka nikaxō meka mēstekōi Jesúsnoa nō nikapaitiroma. Askaxō anā nō Nios Ifofapaitiroma. Chakakōi itiro. <sup>17</sup> Oa yora faraxiki finaxō, koofi payokometiro keskafakī, a yōra anorima yoikī yorafo āto ōiti chakana fatiro. Himeneo feta Fileto askara chakakōi ato yoimisfo. <sup>18</sup> A Jesús oaitīa a namisfo anā otōxiaifo mā nō tāpifekē, a feronāfake rafeta Himeneo feta Fileto anorima mato yoimisfo. Akka nō tāpia mā Jesús anā fotoaino Epa Niospa nā namisfo otofaxii. Akka nā rafeta mato pāramisfo āa chanīkakī. Iskara mato yoimisfo: “Mā finōa a mato

yoimisfo keskara. A Niospa namisfo mǎ ato otofaa,” ixõ a refeta yoimis. Afãfe nǎ meka nikaxõ shinãkĩ iskafatirofo: “Ooa. Mǎ nõ nakẽ Niospa noko anã otofaima,” ixõ anorima shinãtirofo. Anori shinãkani Jesús shinãmakitirofo. <sup>19</sup> Akka Niospa meka chanĩmakõi. Tokirinĩfakai tsõa rafetiroma. Niospa meka nãskarari. Tsõakai ãfe meka fetsafatiroma. A chanĩma, nǎ yoimis keskara nãskarakõi. Tokirinĩfakĩ yõra keneakai tsõa soatiroma. Nãskarifiakĩ Niospa meka kenenifo iskafakĩ: “Nõko Ifãfe afe yorafo tãpikõia.” Nãskakaxõ, “Afe yorafãfe a afara chakafamisfo keskara potatirofo,” ixõ kenenifo.

<sup>20</sup> Feronãfãke ãfe pexe efapa sharakõi faxõ a mẽra kecho sharakõifo faa, askaxõ a kecho sharafo mẽra afara sharafo fatiro. Akka a kecho chakafo mẽra afara chakafori fatiro. <sup>21</sup> Mǎ mĩ chaka mĩ xatekõiax, nǎ fẽta xinikĩ afara chaka potatiro keskara itamaroko. Nǎ sapa choka keskara sharakõi mĩ itiro. Nãskax Jesús keskara shara mĩ ikaino Epa Niospa mia yonomapaiyai keskara mĩ aõxõ afara sharafo faxotiro.

<sup>22</sup> A naetapafãfe afara chakafo shinãkĩ nǎ apaiyai keskara faifono mĩri askayamafe. Anori shinãtamaroko Niospa fichipaiyai keskara shinãfe, Jesús chanĩmara fafãi, yorafo noikĩ, fetsafãferi shinãsharakõiaifono, Jesús Ifofaifo ato fe mẽstekõi isharakõife. <sup>23</sup> Anã ã mia yoinõ, ea nikasharafe. A feratenãifo ato nikayamafe. Ato fe feratenãpaiyamafe. Askara yorafo samama õitifishkitirofoki. <sup>24</sup> Niospa meka yoimisto tsoa feratetiroma. Anori askatamaroko keyokõi yorafo ato noisharafãi, ato tãpimasharatiro, tenekõisharata ato yoitiro. <sup>25</sup> Fẽtsa Niospa mekakõi nikakaspakĩ meka anorima fisti shinãito, fenãmãshta ato tãpimasharafe. Mĩ ato askafaino ãto chaka xatetiromo Niospa mefeta akaino. Askaxõ Jesús chanĩmara fakõinõfo. <sup>26</sup> Nãskafakĩ anã Niosnoa shinãsharanõfo. Oa tarapa mẽra ikia keskara Satanás ato fapai kiki. Nãskaxõ ato amapaiyai keskafakĩ ato yonofafãini. Akka mia nikaxõ Jesús ato ifitiro. Nãskaifono Satanás afianã ato afara yonomatiroma. Afianã tarapa mẽra ikia keskara ikanima.

### 3

#### *Afeskakanimãkai yorafo na mai keyoaino*

<sup>1</sup> Timoteo, õisharafe. Ë mia yoi Jesús chaima oaino fekaxkõi ixii kiki. <sup>2</sup> Fetsa noitama ãakõi kexemei, askatari fẽtsa ãfe kori fisti shinãfãi, ãakõi anofi inimamis ikãi, Niosnoa chaka yoimis ikãi, askaxõ ãto apa yafi ãto afa nikakaspamisfo ikãi, yonox-ofiaifãfe aichora ato famisfoma ikãi, ato noikaspamisfo, Niosnoa shinãtama chakakõi fistis shinãmisfo, <sup>3</sup> afe yorakõi noiyamafãi, fetsafo noiyamata axokaspafãi, fetsafo ãa pãramis ikãi, ãa apaiyai keskafakĩ enemisma ikãi, mitsisipakõi ikãi, afara mĩshti sharafo noiyamafãi, <sup>4</sup> askata a afe rafeafo ato chakafafãi, samama õitifishkimis ikãi, “Ëkai tsoa keskarama,” ixõ yoifãi, Nios noitama afara chaka fisti fakĩ ato inimapaimiskõi ipaikani. <sup>5</sup> Askata a Nios Ifofaifo ichanãifono ato fe ichanãkaxõ Niospa meka nikafikaxõ shinãsharakanima. “Nõri Nios Ifofai,” ixõ ãa mato pãrakani. Askax ãa chanĩmisfo Nios Ifofayamafiakanax.

Askafãfe õi ato fe rafeyamafe. <sup>6</sup> Askara yorafãfe a fofãsakakĩ ato pãratirofo a kẽro tãpisharamisfoma fanĩrira ato yoimisfo ato anorima yoiãifãfe. Atirifãfe noko yoikõikanira ato famisfo. Nãskakẽ a xotofakefãfe noko yoikõikanira ikaxõ a yoiãifo anori ato nikataifafo. Nãskakẽ a kẽrofãfe ãa shinãkani iskakakĩ: “Nõ fãsi chakakakainaito, noko tãpimasharanõfo,” ixõ shinãkani anorima ãto shinã mẽraxõ shinãkaxõ nãskai fekaxtetitaiãfo. <sup>7</sup> Nãskaxõ a ato yoimis fẽtsari ato yoiãito, nikatai fakaxõ Niospa meka sharakõi tsõa mẽstekõi tãpinakafoma. A rama ikai fẽtsari yoiãito, nikakãkiri aõxõ tãpisharapaifikakĩ, tsõa tãpinakama Niospa mekakõi. <sup>8-9</sup> Mǎ mĩ shinãimẽ anori aakõi Egipto anoa xanĩfãfe Faraón israelifo ato yonomapaoni, mesemaxõ? Askaito õikĩ Niospa Moisés nĩchini afe yorafo israelifo mai fetsa ari ato iyotanõ. Ato askafaito Faraón ato nĩchikaspani. Askaino a feronãfãke rafe ano mokaya inifo; fẽtsa ane Janes ikaino fẽtsa aneri Jambres ini, nǎ rafe Faraón fe rafeafo ini. A rafe Moiséski õitifishkinifo. Nãskaxõ ãto xanĩfo Faraón ãa pãranifo

ato Moisés nikanõma. Askafaiifãfe õikĩ chipo ãto xanĩfãfe tãpini Moisés a feronãfake mokaya rafe finõkõia ini. Mokayafiakaxõ afaa tãpiama inifo. Nã rafeta Faraón yoinifo Moisés nikanõma. Nãskafakĩri fetsafãfe Niospa meka mēstekõĩ ato nikamakaspakani. Nãskakaxõ Niospa meka mēstekõĩ tsõa yoima ãto shinãmã anorima shinãkani. Oa Janes feta Jambres ãto xanĩfo anorima yoiaifono ãto xanĩfãfe ato tãpini keskafakĩ. Nãskafakĩri na iskaratĩa na anorima yoimisfo ãa chanĩaifãfe nõ ato tãpixii afãfe afaa tãpiafoma.

### *Mã Pablo mekai xatekĩ Timoteo yoisharani*

<sup>10</sup> Timoteo, mã mĩ ea õisharakõimiskĩ ã ato afo tãpimanaito. Mã mĩ ea õimiskĩ afeskax ã isharamĩkai, Nios fisti inimamapaifãĩ, Jesús noikĩ chanĩmara fafãĩ, afarafo chakafo nokoaito ã tenefãĩ, ã yorafo noifãĩ, <sup>11</sup> a yora chakafãfe ea Jesúsxõ chakafaiifãfe ã tenefãĩ, askai ã omiskõimis. Mã mĩ tãpia ã afo tenemis. Askatari mã mĩ tãpia a Antioquía anoa ita, Iconio anoa ita, a Listra anoxõ ea chakafafiaifãfe ã teneni. Nãskakẽ nã chakafoõxõ nõko Ifo Nios ea kexesharamis ã tenesharakõimis inõ. <sup>12</sup> Na ã mia yoiai anori chanĩma. Nõ Cristo Jesús fe rafesharapaiyaito a Jesús noikaspamisfãfe noko omiskõimaxii. <sup>13</sup> A yora chakafãfe ãa ato pãrakani. Askatari chipo ato pãrakĩ finakõixikani. Nãskakẽ afara chakafakĩ ato pãraifãfe õikĩ Satanásri ato pãraxii.

<sup>14</sup> Nãskakẽ Timoteo, na meka Jesúsnoa mĩ tãpisharai. A mia tãpimanafo mã mĩ tãpikõia. Nãskakẽ mĩ tãpisharakõĩ. Anori meka chanĩmara fafe, shinãmakikima. <sup>15</sup> ¿Mã mĩ shinãimẽ yomepishtaxõ mĩ Niospa meka tãpiakĩ? A mekaõnoa mĩ shinãsharamiskĩ Cristo Jesús chanĩmara faax nõ afe isharamipakenaka. <sup>16</sup> Niospa ato shinãmanaino feronãfakefãfe kirika ato kenexonifo Niospa meka ato tãpimaxikakĩ. Fetsafãfe afara chakafaifono, nõ ato Niospa meka tãpimasharatiro anã askayamanõfo. Askatari nõ isharamipakõikĩ nõ Niospa meka õikĩ nõ tãpitiro afeska faxõ nõ Jesús Ifofasharatiromãkĩ. <sup>17</sup> Akka Nios Ifofamisfãfe ãfe meka nikasharakõikaxõ, Nios yonoxosharakõitirofo.

## 4

<sup>1</sup> Timoteo, ã mia kaxeta yoima, nikafe. Jesús oatĩa nõko xanĩfokõĩ ixii Apa Nios feta, keyokõĩ yorafo namisfo yafi niafori ato yoixii. Jesús chanĩmara fakanax afe nai mẽra nisharamipakenakafo; akka a chanĩmara famisfoma chiifã mẽra Niospa ato potai omiskõipakexanõfo. Nãskakẽ ãfe Fake Jesucristo feta Niospa noko õiaino ã mia yoi iskafakĩ: <sup>2</sup> Niospa meka fena fenakima ato yoife fenãmãshta shara. A nikapaiyaifo askatari a nikakaspaifori ato yoisharafe, mĩ ato yoisharaino ãto chaka xatenõfo Jesús Ifofasharax isharamipakenakafo. Shinãsharata, Niospa meka mēstekõĩ yoife. <sup>3</sup> A yora chakafamai nokoaino yorafãfe Niospa mekakõĩ nikakaspaitirofo. A nikatamaroko meka fetsafo shinãtirofo, nã apaiyai keskafakakĩ. Anori fisti shinãkani. Nãskakanax ano fisti ichanãkaxõ anorima a fetsafãferi yoiaito nikakakĩ. <sup>4</sup> A Niospa mekakõĩ nikakaspakani a ãto xinifãfe shinãpaonifo keskari fakakĩ. <sup>5</sup> Nãskakẽ Timoteo, õisharafe. Afara afeskaraito Niospa mekakõĩ Ifofasharafe; mĩ shinãfenotama anori tãpisharafe. Mia omiskõimanaifono tenefe. Kafãkakaikĩ yorafo Jesúsnoa tãpimafe Ifofanõfo. Nã mia Niospa yoiai keskafafe shinãfãĩ.

<sup>6</sup> Iskaratĩa eõnoa ã mia yoi. Anã ã samarakaima mẽ chaima nai ea Jesúsxõ retexikani. <sup>7</sup> Mẽ yonosharakõitiani ãfe Ifo Jesúsxõ. ã chanĩmara fatitaifaa enekima. Keyokõĩ Niospa ea yoiai keskara mẽ aka. <sup>8</sup> Nõko Ifokõichi ea õimis ã Ifofasharakõiaito. Nãskakẽ ã akiki nokoaito ea afarafo inãsharaxii. Eres fisti ã fixiima. Nã nõko Xanĩfo finakõia oaitĩa keyokõĩ nã Ifofaafãferi fixikani. Aõ noikĩ a manaifori ato inãsharaxii.

### *Pablonõ Timoteo fisti yoini kirika kenexokĩ*

<sup>9</sup> Timoteo, ea ano orisape. <sup>10</sup> Demãs afarafo fichipaikĩ ea nonoa õifaiti, Tesalónica ano kakĩ. Askatari Crescenteri kati Galacia ano. Askatari Titori Dalmacia ano kati. <sup>11</sup> Akka na Lucas fisti efe ika. Nãskakẽ Marcos ea efexõfe ea axosharaiyonõ Niospa meka ato yoikĩ. <sup>12</sup> Akka ã Tíquico Efeso ano nĩchiamea ã. <sup>13</sup> Mĩ oaitĩa ea ãfe rakoti fexõfe a Troas

ano ã faferati a Carpo pexe ano. Askata ãfe kirikari ea fẽxota, askatari kirika fetsari ea fẽxota a fakka fichisharakõĩ ã akiki kenemis, aari ea fexõfe. Ë afo fichipaikai.

<sup>14</sup> Na yami famis Alejandro ea fãsi mekafamis. Aato ea chakafaito õikĩ Niospa kopikiri omiskõimaxii. <sup>15</sup> Õisharafe. Alejandro miari chakafatiroki na meka shara Jesúsnoa nõ yoiaito noko meka xatemapai kiki.

<sup>16</sup> Akka ea taefakĩ xanĩfo ano iyonifo tsõakai eõnoa yoisharanima. Akka keyokõichi ea õifainifo fõkakĩ. Askafiaifono ã Nios iskafakĩ yoini: “Epa, na ea nonoa õifainaifo ato chakafayamafe,” ixõ ã Nios yoiyamea. <sup>17</sup> Ea askafafiaifono ãfe Ifãfe Jesús ea potayameama, ea kexexõ. Ea askafaifono ã ratetima ãfe Ifãfe ea kexeano ãfe kerex ea inãno ã ato yoinõ. A judeofomafãfe ea yõkaifãfe keyokõĩ nikanõfo ã Niospa meka Jesúsnoa ato yoiyamea. Ë askaito ea retepaikakĩ, oa poomãnã noko pipaiyai keskara ea fatifo ea retepaikakĩ. Ea askafafiaifono ea Niospa kexesharayamea ea tsõa retenõma. <sup>18</sup> Afara chakafo ekeki nokoaito õikĩ ãfe Ifãfe ea kexetaifa a ã akiki nai mẽra nokoaitã. Fãsi nõko Nios sharakõĩ, tsoa fẽtsakai askafatiroma. Nãskakẽ tsõa nõko Nios finõtiroma. Ares fisti sharafinakõia. Nõ aõnoa yoisharapakexanõ. Nãskapakexapainõ.

*Pablo mã mekai xatekĩ ato meka shara fomani*

<sup>19</sup> Timoteoshta, ea Prisca yafi Aquila ea yoixõfe, keyokõĩ yorafo Onesíforo pexe ano ikafori ea yoixõfe. <sup>20</sup> Erasto Corinto ano nẽteyamea. Trófimo isinĩ ikĩ rakakẽ ã Mileto ano rataferayamea. <sup>21</sup> Nã mechaka ikamano ekeki ofe. Eubulonõ, Pudentenõ, Linõnõ, Claudianõ, keyokõichi Jesús chanĩmara faafãfe mato yoisharapaikani.

<sup>22</sup> Nõko Ifo Jesucristo mefe ipaxanõ. Askatari Niospa mato noikõikĩ mato kexe-sharakõinõ keyokõĩ. Nã tii ã mato yoi.

*Ëkã Pablo*



## Pablo Tito Kirika Kenexō Fomani

### *Pablo Tito yoisharani*

<sup>1</sup> Tito, ě mia kirika kenexō fomai. Ĕfi Pabluki, Niosfi ěfe Ifokōiki. Nã ea yoiyai keskamis ě. Jesucristo ea nĩchia ě ađnoa yoimis inō, nã Niospa katoa yorafo ě ato tãpimanō afafe Jesús chanĩmara fanōfo. <sup>2</sup> Niospa mai onifatama shinãkĩ iskafani: “Na yorafo ě ato katoano efe rafeaifono ě ato ĩkikōipakenaka efe ĩpaxanōfo,” ixō shinãni. Nãskakē nō Nios Ifofapaikĩ nã yoiyai keskara nō chanĩmara fatiro. Nios ramashara chanĩmismo. <sup>3</sup> Aatofi noko tãpimapaiyaitĩa ěfe meka shara noko tãpimani. Nãskakē iskaratĩa ea nĩchia ě ato ěfe meka shara yoinō eōxō tãpinōfo. Nã Nios noko ifimis nō afe ĩpaxanō. <sup>4</sup> Tito, ě mia kirika kenexō fomai. Mĩfi ěfe fake keskarakōikĩ, eōxomãĩ mĩ Nios chanĩmara fakē. Epa Nios mĩ Ifofakē mia imasharakōipakenaka mia noikĩ mia shinãsharamani. Nōko Ifo Jesucristori mia askafai.

### *Pablo Tito Creta ano nĩchiferani ato tãpimanō*

<sup>5</sup> Tito, ě mia nĩchiferati Creta ano a nō yonofai mitoxoma mĩ chipo mitonō. Nãskakē ě mia yoiti iskafakĩ: “Nã pexe rasi anoafo kexemisfo katofe nã Nios Ifofaafo ichanãfono ato kexenō,” ixō ě mia yoiferati. <sup>6</sup> A Nios Ifofaafo kexemis katofe afaa chaka shinãmismo. Āfi fistiya inō. Āfe fakefo Jesús tãpiafo inōfo, ato kemamismo inōfo, afaa chakafamisfoma inōfo ěfe fakefo. <sup>7</sup> Nã Nios Ifofaafo kexemis sharakōi itiro, afaa chaka shinãmismo nãmãĩ xanĩfoax. Nã keskara yora mĩ katotiro nã Nios Ifofaafo kexemis inō. Nã Niospa shinãmanai keskara inō ađnoa afaa chaka yoiyamanōfo. Askatari kakapaimis itiroma. Askatari samama oitifishki imiskai itiroma. Askatari pãemis itiroma. Askatari setemitsamis itiroma. Askatari yora fetsa pãraxō kori fĩamis itiroma. <sup>8</sup> Askatamaroko isharakōixō yorafo ěfe pexe nokoaito atoki inimayanã ato ifitiro. Askatari yorafo keyokōi ato afara shara axosharakōimis itiro. Askatari ģa kexemesharamis itiro mẽstekōi isharakōiyanã. Niospa meka nikasharakōipai afara chakafapaifikĩ anã akima. Nãskaxō a Niospa fichikaspaifo anã shinãima. <sup>9</sup> Niospa meka nikasharaxō kachikiri fayamafãĩ, nã Niospa yoiyai anori chanĩmara faxō fetsafori yoitiro. Xafakĩakōi yoitiro. Nãskaito nikai yorafo Nioski inimanōfo. Askatari anorima yoimisfori ato tãpimatiro, akairi tãpinōfo.

<sup>10</sup> Akka nã fetsafo nikayospakōimisfo Niospa meka ato yoiiaifono nikakaspakōimisfo. Nãskaxō meka fetsafaxō yoimisfo ģa fanĩrira yoikakĩ nã Moisés yoini keskara fisti nō nikanōra ikaxō. Akka nã judeofo ranãri askamisfo ģa chanĩkani. <sup>11</sup> Nãskakē ato xatemafe ato pãranōfoma. Kori fisti fipaikakĩ anorima chakakōi ato tãpimapaikani kiki. Nãskakē ranãrito atoōxō Jesús kachikiri fayomisfoki.

<sup>12</sup> A feronãfake onãyato a inōpokoai keskarađnoa Creta anoxō yoini: “Nono ikafo, Cretafofi chanĩmisfokĩ, nikayospafo, pikĩ fisti tãpiafo, yoinã keskara pitsikōifo xanikōifo,” fani. <sup>13</sup> Nã tãpiato ato yoikōini ato pãranima. Creta anoafo chakakōi ikafo. Nãskafiaifono ato yoisharafe Titopa, anã askanōfoma, Niospa yoiyai keskara nikanōfo. Nãskaxō Niospa meka chanĩmara fanōfo. <sup>14</sup> Akka judeofãfe āto xinifãfe ato yoipaonifoki anorima, ģa chanĩkakĩ. Nãskakē ato yoisharafe anã ato nikanōfoma. Askatari a Niospa meka anã nikaifãfema ato yoipaiyaifono, ato yoisharafe anã ato nikanōfoma.

<sup>15</sup> Fetsafo oiti sharayafo, mãmãĩ Epa Niospa ato chaka xatexonano. Nãskakē afara sharafo atonã sharakōifo. Akka a oiti chakayafãfe āto shinã mẽraxō chakakōi shinãmismo. <sup>16</sup> Askafiax chanĩmisfo, “Nō Nios tãpiara,” iki, tsōa Nios shinãyamafi. Askara yōra Niospa meka nikakaspakĩ chakafai. Nãskakē nō tãpitiro askara yora Nios fe rafemismo. Askara yōra shara shinãima, afaa pishta shara fatiroma, chakakōi shinãĩ.

## 2

*“Niospa meka ato mēstekōi tāpimasharafe,” Pablo Tito fani*

<sup>1</sup> Mīfi askaramakī, Titopa, mī ato yoisharafe. Niospa meka ato mēstekōi tāpimasharafe, mia nikasharanōfo. <sup>2</sup> Askata anifo tiiri ato yoisharafe isharanōfo. “Anā pāeyamakāfe,” ato fafe. Askafaxō ato yoisharafe: “Māri isharakāfe mā askaito ōikī fetsafāfe mato ōinōfo. Afara chakafapaikī anā ayamakāfe, kexemesharakāfe. Shara shināi ikāfe. Māto ōitinī Nios shinākī kachikiri fayamakāfe. Askata māri yorafo fe rafesharakāfe. Ato noikāfe. Māto afara afeskaraito shināchakayamakāfe, a finōmataroko Nios yoikāfe.” Nāskaxō anori ato tāpimasharafe, Titopa. <sup>3</sup> Askatari a yōxafo tiiri ato yoisharafe iskafakī: “Isharakāfe a Niospa fichipaiyai keskai. Askatari mā ranā paranōnāyamakāfe. Parakī ato chakafayamakāfe. Yōxafofiax pāeyamakāfe. Askatamaroko afara sharakōifo fetsafo ato tāpimakāfe,” ixō ato yoife. Askafafe ato yoikī, a ranā askanōfo. <sup>4</sup> Nāskafaxō anā ato yoisharafe, Titopa, yōxafo tiito a naetafafo ato yoisharanōfo a tiitori tāpinōfo, nāskaxō āto fene noisharakōinōfo, āto fakefori noikōinōfo, <sup>5</sup> afara chakafapaifikakī anā anōfoma, kexemesharanōfo, askatari āto pexe anoxō āto fakefo kexesharakōinōfo faki fofāsapaiyamanōfo, askatari ato noisharakōinōfo, askatari āto fene nikakōinōfo. Nāskaifāfe ōikī fetsafāfe Niospa meka chakara fatirofoma, nā kērofo shara niaifāfe ōikī, Nios Ifofakanax. Akka kērofāfe Nios Ifofafiakakī anorima shināifono fetsafāfe Niospa meka chakara fatirofo, nā kērofo ōikī, chaka niaifono, Nios Ifofafiakanax. Akka nā kērofo Nios Ifofaax shara ikaifono ōikī fetsafāfe Niospa meka chakara fatirofoma. Nāskara yōxafofofāfe ato shara tāpimatirofo, naetafafo.

<sup>6</sup> Askatari naetapafori yoisharafe iskafakī: “Māri tāpikāfe, shināsharakāfe isharaxikāki. Afara chakafapaifikī anā ayamakāfe, kexemesharakāfe,” ixō ato yoife, Titopa. <sup>7</sup> Askatari mīri isharafe. Keyokōi yorafo shara fafe. Afeskax isharatirofomākī ato ōimafe. Ato Niospa meka tāpimafe, mēstekōi ato yoisharafe, xafakīakōi. Niospa mekaki kakapaiyamafe. <sup>8</sup> Ato meka shara yoife. Mī shara yoiaito, mia fetsafāfe iskafanōfoma: “Titopa noko meka chaka yoirā,” inōfoma. Tsoa mefe feratenāyamanō. Mefe feratenāpaikani rāfitirofo. Mī afara chakafaino mia tsōa ōiyamanō.

<sup>9</sup> Askatari a ato yonomatifo ato yoife iskafakī: “Māto xanīfāfe mato yoiaito akiki inimayanā nikakōikāfe afe feratenākakima. <sup>10</sup> Nāskaxō māto xanīfo āfe afara onēyamakāfe. Shara yonoxokāfe, ramashara mā ato pāramismakī. Askara ōikī mato tāpisharanōfo mā ato yonoxosharakōiaito māmāi Niospa meka shara shinākī.” Nāskakē mātoōxō, “Niospa meka sharara,” fatirofo. Nā Nios noko ifimis nō afe ĩpaxanō.

<sup>11</sup> Epa Niospa āfe Fake Jesús nāmā nīchini nokoōnoax naiyonō nōko chaka noko soaxoyanā nō afe ĩpaxanō. Nāskakē nō tāpitiro Epa Niospa keyokōi noko noikōiaito. <sup>12</sup> Noko noikī noko tāpimani afara chakafakī nō xatenō. Noko afara chakafamapaiyaiāfāfe nō ato yoitiro iskafakī: “Maa, ē anā afaa chakafapaima. Ē shara nipai, ē anā chaka shināpaima,” nō ato fatiro. Nāskaxō nōko ōiti mēraxō a afara chaka nō fichipaiyai a Niospa fichipaiyaima, nōri anā fichipaitiroma. Askara fichipaitama a nō shināmakitiro. Nāskata nō isharakōitiro. Niospa noko shināmanai keskara fisti nō shinātiro. Nāskax nō shara nitiro. Yora fetsafāfe chaka shināifono nō askara shinātiroma, Nios Ifofaxō. <sup>13</sup> Iskaratīa nō Jesucristo manai anā oaito nō ōisharapai. Nāfi nōko Ifokōikī. Nāfi Nioski. Nō tāpia nokoki anā oxii. Nokoki nokoaito sharafinākōia nō ōixii. Nāato noko nāxoni nō omiskōipakexanōma nōko chaka noko soaxoxiki, nō afe nīpaxanō. <sup>14</sup> Nā nokoōnoax nani. Nōko chaka keyokōi noko soaxōfaini. Nāskaxō nōko ōiti noko sharafaxōa. Nō afe yoraxō nō afara sharafapaikī nō anō.

<sup>15</sup> Nāskakē ē mia yoiāi keskafakī keyokōi yorafo ato tāpimafe, mia Niospa shināmanaino. Afara chakafaiāfāfe ato yoisharafe, anā askanōfoma. Niospa yoiāi keskafakī mīri ato yoisharafe, inimanōfo. Mī ato askafaito mia nikasharanōfo Niospa mia yoiāi keskarafakī akairi nikasharanōfo.

## 3

*Nios Ifofaafu shara nitirofo*

<sup>1</sup> Nāskaxō mefe yorafo ato yoisharafe, Titopa, iskafakī: “Māto xanīfofo feta nafa xanīfāfe yoiaito nikasharakāfe. Ato nikasharax a mato yoiaifo keskakāfe. Askatari afara afeskaraito ato axosharakāfe. Shara shinākāfe. <sup>2</sup> Askatari ato mekafakī chakafayamakāfe. Fētsa mato yoipaiyaito ferateyamakāfe. Akiki ōitifishkiyamakāfe. Ato shināsharakāfe. Fenāmāshta ato yoikāfe,” ixō ato yoisharafe, Titopa.

<sup>3</sup> Nāskakē nōri afaa shināyopaonima. Nōko ōiti mēra nō afaa pishta shinātiroma nō ipaoni. Nō nikayospakōi nō ipaoni. Nō chaka shināpaoni. A nā nō ipaiyai keskara nō ipaoni. “E shara shināi, nā ē ipaiyai keskara ē iki,” ikax nōa nō pāramepaoni. Nō yora fetsa āfe afara fichipaipaoni. Nō ato mekafakī chakafapaoni. Chakakōi nō ipaoni, afaa pishta nō mekeaima. Nāskax nō noikaspa faatanāpaonixakikai nō xatemisma. <sup>4</sup> Mā nō askapaonino, Epa Niospa noko noikī āfe Fake fisti nīchini nōko chaka noko soaxoniyonō, nō omiskōipakexanōfoma nokoōnoax naiyonō. Nāskaxō noko ōimani afeskaxō noko noimākai. <sup>5</sup> Akka nō chaka shināmiskē noko nāxoni nōko chaka noko soaxoxiki, nokomāi noikōikī. Akka nō afara shara faōxō noko ifima. Noko noikī nōko ōiti fetsafaxō noko shināmasharai. Noko askafaano nō niax fena keskara shara nō itiro. Niospa Yōshi Sharapa noko askafatiro. Nōa nō niax nō askatiroma. Nōa nō chaka soametiroma. <sup>6</sup> Nōko Ifo Jesucristo noko nāxoni, nōko chaka noko soaxoxiki noko ikipakexakī. Nāskakē Niospa āfe Yōshi Shara noko inā nō mēra nanenō, fishkomītsatiroma. <sup>7</sup> Nāskaxō noko ōiti shara faano, nō afe rafekōitiro nokomāi noikōikī. afe rafeax nō afe nisharakōipakexatiro nā nō ipaiyai keskai.

<sup>8</sup> Titopa, ē mia xafakīakōi yoiaki. Nā ē mia yoiai keskara chanīmaki. Nāskakē Nios Ifofaafu yoisharakōife, shināsharata isharakōinōfo, yora fetsafo shara fanōfo. Askara shara ikax keyokōi nō isharatiro. <sup>9</sup> Nāskata fētsa mia feratenāito kemayamafe. Mia iskafaito: “Nōko xinifo mī tāpiama, mī ea keskarama,” mia faito kemayamafe. Askata oi mitsisipato mekaito kemayamafe. Moisés yoini keskafakī mia mekafainīfofānaito kemayamafe. Mī kemapanā sharamaki. A noko askafai yōra afaa tāpiamakī. Askara fe nō kemanātiromaki.

<sup>10</sup> Akka fētsa a Jesús Ifofaafu ato yoisharakima āa ato pārakī ato paxkanāfaino kenaxō yoisharafe mia nikasharaimākai anā askanōma. Akka mā mī yoikī rafefafiano mia nikayamaino anā afaa yoiyamafe. Askatari anā afe rafeyamafe, ares inō. <sup>11</sup> Mā mī tāpia askara yōra Nios Ifofaama. Niospa meka nikaima, chaka shināi, ōiti chakaya. Askarato afashta shara faima. Mā āa tāpimekōia, yora chaka.

*Pablo mā mekai xatekī ato meka shara fomani*

<sup>12</sup> Askata ē mikiki Artemas iyamakī Tíquico ē mia nīchixoni. Mikiki nokokē, ekeki ofe, Nicópolis ano. Na oi pakeaitīa ē shinā ē nono Nicópolis ano itiroki, mechakaino.

<sup>13</sup> Apolos yafi Zenas kexesharafe. Nā Zenasmā noko ato yoixomiski, nōko xanīfo. A rafe mato makinoax foaifāfe ato kexesharafe. Nāskaxō afara fichipaiyaiāfe ato ināfe, aya fōtanōfo. <sup>14</sup> Askatari a Jesús Ifofaafu ato yoife yonomisfo inōfo, yonosharakōi yononōfo, yonochakama. Askarafāferi afara yopakakī fitirofo, yonokaxō. Askarafo ato yoife xanimisfoma inōfo, ato afara ināxikākī a omiskōiaifo, afaamaisfo.

<sup>15</sup> Na ēfe ikafāferi āto meka shara mia fomakani, Jesús Ifofaafāfe. A noko shināifori noko ato yoixōfe. Niospa āfe shinā shara māto ōiti mēra nanemanō mato noikōikī. Nā tii ē mia kenexō fomai, Titopa.

*Pablo*

## Pablo Filemón Kirika Kenexō Fomani

### *Pablo Filemón yoisharani*

<sup>1-2</sup> Ēkīa Pablo. Na karaxa mēraxō ē mia kirika kenexō fomai. Na nōko exto Timoteo feta nō mia kirika kenexō fomai. Ē Jesucristoōnoa ato yoiaito, ea nikakaspakakī ea achikaxō karaxa mēra ea ikimatifo. Nāskakē ē mia yoi, Filemón, mīfi noko keskarakī Niosnoa ato yoimis. Nāskakē nō mia noikōi. Nō mia kirika kenexō fomai, mia yafi a mefeta Jesús Ifofaafō a mī pexe anoax ichanāmisfori nō mato kirika kenexō fomai. Akka Apia nōko poi keskara, nāskakē Arquipo yafi nō ato kirika kenexō fomai. Akka nā Arquipo noko keskarari nāatori ato Niospa meka yoimis. <sup>3</sup> Niospa mato noikī mato shinā mēra mato shināmashara mā fekaxtenōma. Epa Nios feta nōko Ifo Jesucristo mato askafanō.

### *Filemón Jesús Ifofaxō yorafo noipaoni*

<sup>4-5</sup> Mē mia nika mī nōko Ifo Jesús noikōiaito, askatari mī chanīmara fakōinaito, askatari a Jesús Ifofaafari mī ato noisharakōia keyokōi. Mī askaito nikakī ē mia nirixō kīfixōfafāini iskafakī: “Aicho Epa Niosi, na Filemón mia Ifofasharakōia,” ixō ē mia Epa Nios kīfixomis. <sup>6</sup> Askatari mī Epa Nios Ifofasharakōiyanā mī ato afara axosharakōimis ato tāpimasharakōiyanā. Nāskakē ē Epa Nios mia kīfixomis mī tāpisharakōinō nā Cristo Jesús nō Ifofaito noko inimamamis keskafakī. <sup>7</sup> Ē mikiki inimasharakōi mī ato noisharakōiaito nikai. Nāskakē ē mikiki inimai, efe yorashta, a Nios Ifofaa fetsafo mī ato noikī mī ato inimamasharakōiaino.

### *Pablo Filemón iskafani: “Mī yonomati Onīsimō eōxō sharafafe,” ixō yoini*

<sup>8</sup> Cristo ea ifini ē āfe meka yoimis inō. Nāskakē fāsi mekainīkafā ē mia yoifitiroxakī, akka ē mia askafapaima mīmāi fetsafo ato noiyanā mī ato inimamasharakōiano. <sup>9</sup> Ē mia askafatamaroko ē mia noikōiyanā ē mia yoipai. Ēkīa Pablo mē anifokōia ē Cristo meka ato yoiaito ea nikakaspakakī karaxa mēra ea ikimatifo. <sup>10</sup> Nāskakē Onīsimōōnoa ē mia yoisharapai. Na Onīsimōfi ēfe fake keskaraki. Nono karaxa mēraxō ē Onīsimō Jesús chanīmara famati. Nāskakē Onīsimō ēfe fake keskara.

<sup>11</sup> Akka taeyoi Onīsimō mia yonoxosharapaonima. Mā askayopaofinixakī, iskaratīa mīo noikī mia axosharatiro, nā ea axōai keskafakī. <sup>12</sup> Ē mia anā Onīsimō nīchixonī ē aō noikōifikī. <sup>13</sup> Epa Niospa meka shara ē yoiaito ea karaxa mēra ikimanifono, oa nono efe ixō mī ea kexesharamis itikixō na Onīsimō ea kexenō ē fichipaikerana. <sup>14</sup> Akka ē mia yōkaxoma nonoxō ea kexenō, ē nētefapaima. Nāskakē, “Na ea Onīsimō anā nīchixōfe,” ē mia faima. Nāskakē na Onīsimō mī efeta yonomapaikī ea kexenō mī yoitiro. <sup>15</sup> Ōitsai, Niospa anori fichipaiyaino askayameaki nāskax anā mī yonomati keskara ikima Nios chanīmara faax. Mī yonomatifax mikiki onekeratiki afetīama. Anā iskaratīa mia ano kaax, chaka ikima mefe rafesharakōi kiki. Anā mikikinoax faki kanakama. <sup>16</sup> Anā mī yonomati keskarama. Iskaratīa mā Jesús Ifofaa. Nāskax oa mefe nanea keskara mā Jesús Ifofaax. Nāskai ē aō noiai keskafakī, mī aō noifinakōitiro. Iskaratīa anā oa mī yonomati keskarama. Mā isharakōia oa mī exto keskara, anā oa yora fetsa keskarama.

<sup>17</sup> Nāskakē mī oa efe nanea keskaraxō mī efeta Jesús Ifofai, ē mikiki nokoaino mī ekeki inimayanā mī ea ifitiro keskafakī, na Onīsimōki inimayanā ifisharakōife. <sup>18</sup> Akka mia chakafaferatimākī, askayamākī mia nimiferatimākī ea yoife ē mia kopifanō. <sup>19</sup> Nānori ē mia yoi mia kirika kenexō fomayanā. A Onīsimō mia nimia ē mia kopifanō ea chanīmara fafe. Efe yorashta, mī ea nimia shināfe. Mī ea kori nimiyamafekē ē mia Jesús meka yoiyamano mī Jesús Ifofakeranama afe nīpaxakī. <sup>20</sup> Efe yorashta, ē mia yoi nōko Ifoōxō ea Onīsimō shara faxōfe. Ēfe ōiti inimamasharakōife.

<sup>21</sup> Mě tãpia a ě mia yoiã anori mĩ ea nikasharakõi. Askatari a ě mia kirika kenexona õikĩ a finõmainĩfofã mĩ ea axosharai. <sup>22</sup> Ě mia anã fetsari yoi. Mĩ ea Epa Nios kĩfixotitaifanõ. Mĩ askafaino ea karaxa mēranoa kãimanafono ě mikiki samama nokotiro. Nãskakē ea mĩ peXe kene ano mĩ ea itipinĩ faxotiro, Niospa ea kãimanano ě ano oxaxinõ.

*Mã Pablo mekai xatekĩ ato meka shara fomani*

<sup>23</sup> Na Ipafras Cristo Jesúsnoa yoimis a yafi ea karaxa mēra ikimatifo, aatori mia yoisharai. <sup>24</sup> A efeta Jesucristo yoimis, fetsafori Marcos ikaino, Aristaroco ikaino, Demãs ikaino, Lucas ikaino, nã tiito mia yoisharakõikani mikiki inimakãkĩ.

<sup>25</sup> Nõko Ifo Jesucristo mato noikĩ mato kexesharakõipainõra. Nã tii ě mato yoi.

*Ěkã Pablo.*

## Jesúsnoa Yoikĩ Fětsa Hebreofo Kirika Kenexõ Fomani

*Jesús afe Apaõxõ yoini. Nāskakē nō tāpitiro afe keskaramāki*

<sup>1</sup> Efe yora mīshtichi, ē mato kirika kenexõ fomai mā tāpinõ Jesúsnoa. Taeyoi Epa Niospa afe meka nōko xinifo israelifo yoipaoni mēxotaima. Afe ājiriõnoa ato yoipaoni. Askatari afe namapa ato yoipaoni. Askatari afe meka yoimisfoxõ ato yoipaoni. <sup>2</sup> Akka iskaratīa noko yoia afe Fakeoxõ. Nāskakē nō tāpitiro Nios afe keskaramāki. Afe Fakeoxõ keyokõĩ nai mēranoafoya mai anoafoyari onifani. Nāskafata afe Fake katonĩ nai mēranoafoya mai anoafoyari nōko xanīfo finakõia inõ. <sup>3</sup> Nāfi sharafinakõiaiki Apa Nios keskarakõĩ. Apa Nios afe keskaramāki noko õimani. Nāato keyokõĩ kexesharamis afe mekasharaõxõ. Askatari nokoõnoax nani nōko chaka noko soaxoxiki a keskara shara noko õi. Nāskakē nōko chaka anā shināima. Nāskata mā otoax nai mēra kani Apa fe xanīfokõĩ ixiki.

*Niospa afe ājirifo Jesús ato finõkõia*

<sup>4</sup> Nāskakē nō tāpitiro Niospa Fāke ājirifo ato finõkõia. Nāskax Niospa Fake xanīfokõĩ Jesús.

<sup>5</sup> Akka Niospakai afe ājirifo yoikĩ iskafamisma:

Māfi ēfe Fakekõifokĩ. Ē māto Epaki, ato famisma. Akka afe Fake fisti yoikĩ iskafani:

Mĩ ēfe Fakekõĩ. Nāskakē mĩ fisti āto xanīfo finakõia ipanakaki, ixõ yoini. <sup>6</sup> Nāskaxõ afe Fakekõĩ mai ano nīchini. Nāskata afe ājirifo yoini iskafakĩ:

Keyokõichi ēfe Fake noikõikāfe. “Mĩ fāsi sharakõĩ,” ixõ yoikāfe. <sup>7</sup> Nāskata afe ājirifoõnoa yoikĩ iskafani:

Ēfe ājirifo oa nefe koshi katiro keskara ē fai, ēfe meka yoinõfo. Nāfori oa chii xoisai keskarafo. Nāskakē nā ē ato yoiaĩ keskafakĩ afara arisafatirofo, ixõ Niospa yoini. <sup>8</sup> Akka afianā afe Fakeõnoa yoikĩ iskafani:

Mĩ ea keskarari. Mĩri mĩ Nioskõĩ. Mĩ āto xanīfokõĩ ipanaka. Mĩ keyokõĩ ĩkikõisharapakenaka. <sup>9</sup> Mĩ afara sharafo noikõimis, nā afara chakafo noikaspayanā. Nāskakē ē mia katonĩ mĩ āto xanīfo inõ. Akka ājirifo ē ato inimamai. Akka ē mia inimamakõĩ, ixõ yoini. <sup>10</sup> Askata anā yoini,

Mĩri ea keskarakõĩ. Mĩ āto xanīfokõĩ. Afaa oniyamatai mai yafi nai mĩ onifakĩ taefani. <sup>11</sup> Nāskakē nāfo keyokõĩ mitokomexii. Akka mĩ fisti keyonakama. Nā rapati mā chapoax keyotiro keskai mai fe nai keyoxii. <sup>12</sup> Rapati chapokē potatirofo fetsa fena shara fixikakĩ. Nāskarifiakĩ mai fe nai anā sharakēma mĩ anā mai yafi nai pāofakĩ keyotiro. Anā fenashara faxiki fenashara inõfo. Akka mĩ fetsatiroma. Mĩ fisti ipanaka, ixõ Epa Niospa afe Fake yoini. <sup>13</sup> Niospakai afe ājirifo yoikĩ iskafamisma:

Mā efe xanīfo ikikai efe ketaxamei. Tsaokāfe, ixokai yoimisma. Akka afe Fake fisti yoini iskafakĩ:

Mĩ efe xanīfokõĩ ikano nā mia noikaspaiḡafe anā mia afeska fatirofoma mĩmāĩ keyokõĩ ato ĩkikē. Nā mia noikaspaiḡo mĩ ato ĩkixii, ē mia askafaino mĩ efe xanīfokõĩ ixii,

ixõ yoini. <sup>14</sup> Akka Epa Niospa afe ājirifo yoini noko kexesharanõfo. Fatorafāferi Jesús Ifofaafomākĩ afe ipaxakakĩ. Nāskakē Niospa afe ājirifo yoini a Ifofaafõ kexesharanõfo.

Nāskakē nō tāpia ājirifo Jesús finõkõia.

## 2

*Jesús nokoõnoax nanixakĩ noko imapakenakakĩ. Nāskakē kachikiri fayamakāfe*

<sup>1</sup> Akka Cristo ãjirifo finõkõia. Nãskakẽ nã meka chanĩmakõi Niospa Fakeõnoa nõ nikasharakõitiro, na meka shara kachikiri fayamaxiki. <sup>2</sup> Niospa ãfe ãjirifo nõchini ãfe meka yorafo yoitanõfo nõko xinifãfe nikasharanõfo. Akka nikasharayamaifono Niospa ato omiskõimani. <sup>3</sup> Akka taefakĩ Jesús yoiyoni nokoõnoax chipo naxiai, nõko chaka noko soaxoxiki nõ afe ãpaxanõ. Nãnori ato yoiaito nikakaxõ a afe rafemisfãfe noko yoinifo. Akka nõ Jesús Ifofaino, Niospa noko ifitiro. Akka nõ nikayamaino Niospa noko ifitiro. <sup>4</sup> Askatari Niospa afara fetsa fetsatapafo tsõa atiroma keskara ato ispapaoni aõxõ tãpinõfo ãfe meka chanĩmakõikẽ. Askatari ãfe Yõshi Shara ato mẽra naneni ato katoxõ nãfãfe yonokĩ fetsa fetsafakĩ yonoxonõfo. Nãskakẽ nõ Niospa meka chanĩmara fai.

*Jesucristo nono mai anoax yorakõi ikiyoi oni, feronãfakekõi askafiax Nioskõi*

<sup>5</sup> Akka Niospa ãfe ãjirifo yoikĩ iskafanima: “Na mai fena anoax mã xanĩfo ixõ yoinima. (Nãskakẽ nõ Jesúsnoa nõ shinãmakitiro ma nãmãi xanĩfofinakõikẽ.) <sup>6</sup> Akka na kirika kenekĩ David yoikĩ iskafani Niospa shinãmanaino:

Epa Niosi, keyokõi mĩ onifani. Akka nõkai afama. Nãskafekẽ mĩ noko noiyanã mĩ noko shinãmis, noko kexesharayanã. <sup>7-8</sup> Akka mĩ ãjirifãfe noko finõyonifo. Nãskafiano nono mai anoã mĩ noko xanĩfo ima. Nãskakẽ nã mĩ onifanifãfe noko nikakõitirofo mĩmãi noko xanĩfo imasharakẽ,

ixõ keneni. Akka keyokõi nã Niospa onifanifo nõ ãto xanĩfo itiro. Tsoa fetsakai xanĩfo itiro. Askafiano keyokõichi noko nikakanima. <sup>9</sup> Akka mã nõ tãpia Niospa noko noikĩ nono mai ano Jesús nõchini yorakõi inõ. Nãskakẽ ãfe ãjirifãfe Jesús finõyonifo. Akka mã nokoõnoax nai omiskõixõ noko chaka soaxokẽ. Epa Niospa xanĩfo finakõi imani, nãskaramãi Niospa fichipaikĩ keyokõi noko noikĩ. <sup>10</sup> Epa Niospa keyokõi onifani aõnoax keyokõi inõfo. Nãskakẽ ãfe fakefo afe isharpakenakafo. Nãskaxõ ãfe Fake Jesús nõchini nokoõnoax omiskõiyonõ nõ afe ãpaxanõ. ãfe Fake fisti nokoõnoax omiskõitiro nõko chaka noko soaxoxiki. Nãato Apa Nios ika ari noko iyoano nõ afe ipaxatiro. <sup>11</sup> Akka Jesús ãfe Apa Nios nãri nõko Epa. Nãskaxõ noko chaka soaxona nõ a keskara shara inõ. Nãskaxõ rãfikima noko yoikĩ iskafatiro: “Nafõ ãfe fakefo,” ixõ noko yoitiro. <sup>12</sup> Nã chanĩmara faafoõnoa Jesús Apa Nios yoikĩ iskafani:

Epa Niosi, mĩõnoa efe yorafo ã yoisharaxii. Nãskakẽ ato fe mĩõnoax ã fanãixii, ixõ yoini. <sup>13</sup> Nãskaxõ anã yoikĩ iskafani:

Epa Niosi, ã mia chanĩmara faaki, ixõ yoini. Nãskafata anã yoikĩ iskafani:

Epa Niosi, nã ea chanĩmara faafo mã mĩ ea inã ãfe fakefo inõfo, ixõ Jesús Apa Nios yoini. Nãskarakõi keneni David.

<sup>14</sup> Nã fakefo apa fistichi ato fake fãfãno nã yora fistiyata nã imi fistiya ikafo tsoa osiama. Nãskarifiã Jesúsri noko keskara yorakõi ipaoni. Yorakõi kãinixakĩ noko nãxonni Satanás yõshi chaka nõko ifo iyamanõ anã noko namapakenõma. Nokoõnoax Jesús naitã Satanás ãfe kerex xateni anã noko afeska faxima. <sup>15</sup> Akka Jesús nokoõnoax nayoamano yorafo nõ naira ikax ratekõipaonifo. Askafiano mã nokoõnoax Jesús naxõ noko chaka soaxona afe ãpaxanõfo. Nãskakẽ napai nõ anã ratetiro. <sup>16</sup> Akka mã nõ tãpia Jesúska onima ãfe ãjirifo afara ato axoyoi. Askatamaroko Abraham ãfe fenafo nã chanĩmara faafo, Abraham chanĩmara fapaoni keskafakĩ chanĩmara faifono ato afara axosharayoi oni. <sup>17</sup> Akka Jesús noko keskara yorakõi ini. Nãskakẽ nã nõ meemis keskarari arifi meepaoni. Yorafãfe noikaspaifono meepaoni paekõi. Askatari mekafaifono, askatari chakafamapaiyafono, meepaoni paekõi. Nãskakẽ nokoõnoa shinãi. Noko potaxikima. Nãskakẽ Epa Nios noko kãfixomis noko imasharanõ. Akka nã Jesús nokoõnoax nani nõko chaka noko soaxoxiki. Nãskakẽ noko Apa Nios kãfixotiro iskafakĩ: “Epa Niosi, ã ato nãxonikĩ ato chaka soaxõfe nã ea chanĩmara faifo,” ixõ Apa yoitiro. Nãskaxõ noko Epa Nios kãfixomis xanĩfokõi itiro. <sup>18</sup> Satanás Jesús chakafamapaini. Akka Jesús

omiskõifikĩ afaa chakafanima. Nāskakē nokori Satanás afara chakafamapaiyaito Jesús noko axosharatiro nõ afaa chakafayamanõ.

### 3

#### *Jesús Moisés finõkõia*

<sup>1</sup> Efe yora mĩshtichi, Epa Niospa mato katonĩ ãfe Fakekõifo mã inõ, nāskaxri mã afe xanĩfo inõ. Niospa Jesús nĩchini nokoõnoax nanõ. Akka nāatori Apa Nios noko kĩfixomis. Akka a ato Nios kĩfixomisfo Jesús ato finõkõia. Nāskakē Jesús shināsharakõikāfe. <sup>2</sup> Akka a Niospa Jesús yoini keskara, nāskara asharakõini. Nāskatari Niospa Moisés katonĩ israelifo Egipto mai anoa ato ifinõ, askatari ãfe meka shara ato yoinõ. Nā Niospa yoini keskarari Moisés asharakõini. <sup>3</sup> Akka Moisésnoa yoisharafitirofono, askatamaroko Jesúsnoa yoisharakõitirofo. Nā pexe sharaõnoa yoisharatirofono, askatamaroko nā pexe famisnoa yoisharakõitirofo. Nāskarifiakĩ Moisésnoa yoisharafitirofono akka Jesúsnoaroko yoikĩ finasharakõitirofo. <sup>4</sup> ãa pexe itiroma. Akka nā pexe famisto atiro pexesharafakĩ. Nāskarifiakĩ Epa Niospa keyokõĩ onifani. <sup>5</sup> Akka Moisés Epa Niospa ãfe yonomati ini. Niospa yoini keskafakĩ, nāskarakõĩ ani. ãfe kaifo israelifo ato yoipaoni Niospa meka. Askatari ato kexesharapaoni. Askatari Egipto anoa ato ifixõ ato iyoni. Nā Moisés apaoni keskafakĩ õikĩ keyokõichi tãpikõitirofo Epa Niospa ãfe Fake nĩchiai afe yorafo ichapakõĩ ifinõ nai mēra afe ĩpaxanõfo. <sup>6</sup> Akka Jesúskaĩ Epa Niospa ãfe yonomatima. ãfe Fakekõĩ. Nāskakē afe yorafãfe ãto Ifokõĩ. Akka tsoamãki afe yorafo ě mato yoinõ. Nõ Jesús Ifofaxõ a noko yoyoni keskafakĩ nõ manasharai nā anã oaitã, nõ kachikiri fayamax nõ afe yorakõĩ nõ iki.

#### *Niospa fakefo aõnoax inimakõitirofo anã ãto õiti fekaxtenõma*

<sup>7-8</sup> Akka Niospa Yõshi Sharapa yoikĩ iskafani:

Epa Niospa mato yoiyai keskafakĩ nikasharakãfe. Mãto õiti kerexfayamakãfe Niospa meka nikakaspakĩ. Mãto xinifo keskara iyamakãfe. Mãto xinifo ě ifini Egipto anoa. Ğ ato ifininõ tsõa istoma anoxõ ea nikasharanifoma. Askakimaroko Jesús mato yoiyai keskara nikasharakõikāfe. <sup>9</sup> Nā tsõa istoma anoxõ mãto xinifãfe ea nikakaspapaonifo nā tsõa õiyomisma ěfe yonoshara ě ato ispafiaino. Ano afaamano a piaifo ě ato inãpaoni. Askatari ano fakamano, ě ato inãpaoni. Ğ ato xinia ranã askafafiaino ea nikakaspapaonifo. <sup>10</sup> Nāskakē ě atoki õitifishkini. Nāskakē ě yoini iskafakĩ: “Ea nikatamaroko ãto õiti mēraxõ afara chaka shināmisfo. A ě ato shināmapaiyai keskarakai tsõa nikaforma.” <sup>11</sup> Nāskakē ě atoki õitifishkikĩ ě atoõnoa yoini iskafakĩ: “Na israelifãfe ea nikakaspakani. Nāskakē a ě ato inimamapaiyai keskafakĩ ě ato axopakenakama,” ixõ Epa Niospa nõko xinifoõnoa yoini.

<sup>12</sup> Efe yora mĩshtichi, õisharakãfe. Nõko xinifo keskara iyamakãfe. Mãto shinã mēraxõ mã Jesús chanĩmara fayamax chakakõĩ mã itiro. Mã askaikai nā Nios nĩpanakãfe mã ipanakama. <sup>13</sup> Askatamaroko pena tii yoinõnāsharakĩ inimama faatanãkãfe nõko Ifoxõ shināsharakõixikakĩ. Afara chakafãfe noko pãratirofoki nõ chakafanõ. Akka nõ nikaxõ nõ anã shināsharatiroma. Nõko õiti chakakõĩ itiro. Nāskakē ato nikayamakãfe. <sup>14</sup> Akka nõ taefakĩ Jesús chanĩmara fakõini keskafakĩ eneyamax nõ afe ipaxatiro. <sup>15</sup> Akka nā kirika keneano iskakĩ ě mato yoinõ,

Epa Niospa mato yoiyai keskara fisti nikasharafafãikãfe. Mãto xinifãfe Epa Nios nikakaspakakĩ ãto õiti kerexkõĩ fapaonifo. Nāskakē ato keskara iyamakãfe. Mãto õiti kerex fayamakãfe. Nāskax nikayospa iyamakãfe, ixõ Niospa meka yoikĩ kenenifo.

<sup>16</sup> Akka, ģtsoafo Niospa tsekanimē Egipto mai anoa ãfe meka nikakaspakakĩ kachikiri faifono? Akka keyokõĩ nõko xinifo Moisés Egipto mai anoa iyoni. Nãfãfe Nios nikakaspapaonifo. <sup>17</sup> Akka, ģtsoafoki Epa Nios õitifishkinimē cuarenta xinia mã akax? Nã



nikakaspayanã afara chakafaifoki ini. Nãskakẽ Epa Niospa tsõa istoma anoxõ keyokõi ato namapakeni. <sup>18</sup> Akka, çtsoafo Niospa yoinimẽ iskafakĩ? “A ã mato inimamapaiyai keskafakĩ ã anã askafapanakama,” ixõ yoini. Akka nã nikayospafo ato yoikĩ askafani. <sup>19</sup> Akka Epa Nioskai tsõa chanĩmara fanima. Nãskakanax a Niospa ato imapaiyai ano tsoa ikinima. Nãskakẽ tsõa anoxõ tenenima inimayanã.

## 4

<sup>1</sup> Akka Epa Niospa noko yoiyoni iskafakĩ: “Mã ea Ifofaino ã mato anã inimamatiro. Akka mã ea Ifofayamakẽ ã mato inimamatiroma,” ixõ noko yoiniki. Nãskakẽ keyokõichi nõ Ifofanõkãfe. <sup>2</sup> Epa Niospa noko yoia: “Ë mato ifipai,” noko fani. Nãskarifikĩ Epa Niospa nõko xinifo yoikĩ iskafani: “Ë mato ifipai mato inimamapaixikĩ anã mã fekaxtenõma,” ixõ ato yoini. Ato askafafiaino tsõakai nikasharanima. Kaxpakõi Epa Niospa ato yoini. <sup>3</sup> Akka Niospa Moisés shinãmanaino iskafakĩ kirikaki kenekĩ yoini:

Ea nikayamaifono ã atoki õitifishkikĩ. Nãskakẽ ã ato fãsikõi yoia iskafakĩ: “Mã ea nikayamaino ã mato mai shara fetsa ano imapakenakama anoax mã isharanõ,” ixõ ato yoini. Akka Epa Niospa keyokõi onifani. Mã keyokõi askafakĩ fetsaxõ teneni. Nãskafakĩri Niospa fichipai afe yorafo isharanõfo anã fekaxteyamanõfo. Iskaratĩari afe yorafo isharamapai afe isharapakexanõfo. Akka nõa nõ Nios chanĩmara faino, Epa Niospa noko ifisharai nõ inimapakexanõfo. <sup>4</sup> Akka kirikaki Moisés keneni pena tenetiõnoa yoikĩ. Iskafakĩ keneni:

Seis nia yonokĩ Epa Niospa keyokõi onifani. Nãskaxõ pena fisti teneni, ixõ keneni. <sup>5</sup> Askatari anã kirikaki keneni, iskafakĩ yoikĩ:

Efe isharapakenakafoma,  
ixõ kirikaki kenekĩ yoini.

<sup>6</sup> Askafiano ranãri afe isharapakenakafo. Akka nã Niospa meka nikakaspaifo afe ipanakafoma. <sup>7</sup> Nãskakẽ Niospa shinãmanainori chipo David kirika kenekĩ yoini iskafakĩ:

Iskaratĩa Niospa meka nikakĩ mãto shinãmã shinãsharakãfe. Anorima shinãkakima, ixõ David yoini.

<sup>8</sup> Mã Moisés naano, Josué israelifo iyonni Canaán mai ano isharanõfo. Nãskaifono Niospa iskafakĩ yoini: “Nã ea Ifofaafõ efe nai mẽra isharapakenakafo,” ixõ yoini.

<sup>9</sup> Nãskakẽ mã nõ tãpia nõ Ifofaax, nõ afe isharapakenaka. Epa Niospa afe yorafo inimamasharapai isharapakexanõfo. <sup>10</sup> Epa Niospa keyokõi onifaxõ inimayanã teneni. Nãskarifikai nõ Epa Nios ano kaax a nõ iyopaoni keskara nõ anã itiroma, Niospa noko inimamasharakõiaino. <sup>11</sup> Akka fekaxfiano nõ Nios Ifofakõitiro afe isharapakexakĩ. Akka nõko xinifãfe nikayamaito Epa Niospa ato mai shara inãpaifikĩ ato inãanima. Nãskakẽ nõri ato keskara ipaima.

<sup>12</sup> Epa Nios nipanaka. Nãskarifikai ãfe meka keyonakama, mitsisipakõi. Akka keno ikikõichi nami potexõ ãfe xaki mẽra nõ õitiro. Nãskarifikai Epa Niospa meka fãsi finakõia. ãfe meka shara nõ mẽra ikano aõxõ nõ tãpitiro nõ shara ikamãki askayamai nõ chakamãki. <sup>13</sup> Epa Niospa keyokõi tãpia nõ õtatiroma. A nõ afara shinãxõ nõ amis keskara keyokõi tãpikõia. Akka nõri tãpia a nõ amis keskara. Nãskakẽ nõ Nios pãratiroma.

### *A Nios ato kĩfixomisfo Jesús ato finõkõia*

<sup>14</sup> Akka Jesúsfi Niospa Fakekĩ. Askatari noko Nios kĩfixomis. Nãatofi a Nios ato kĩfixomisfo finõkõiaiki. Nãskax nai mẽra Nios ano kani. Nãskakẽ nõ kachikiri fatiroma nikakõisharayanã. <sup>15</sup> Nãatoro meemis a Satanás noko afara chakafamapaiyai keskara. Nãskakẽ nãato tãpia a nõ meemis keskara fekaxkõi. Akka Satanás Jesúsri afara chakafamapaini. Nãskafekẽ Jesús nikanima. Nãskakẽ nokori axotiro. <sup>16</sup> Nãskakẽ nõ Nioski ranokima nã nõ yoipaiyai keskara nõ yoitiro. Nõ yoiaito Niospa noko noikĩ noko afara axosharatiro.

## 5

<sup>1</sup> Ē mato yoinō afeskax ato Nios kīfixomis xanīfo itirofomāki. Nā Niospa ato katoato nāato noko kīfixonō. Nā Niospa katoa noko keskara yorari itiro. Nāfi Nios noko kīfixomis xanīfo itiro. Nāskakē yorafāfe Epa Nios aicho fakakī a Nios ato kīfixomisto āfe xanīfo afara ināmis atori Nios inānō. Askatari yorafāfe āto chaka soapaikakī nā yoinā ina fexomisfo retexō ato koofaxonō Epa Niospa āto chaka ato soaxonō. <sup>2</sup> Akka nāri noko keskarari nāatori afara chakafatiro. Nāskakē tsōa tāpisharayamakī, shināsharakima afara chakafaino, nā xanīfāfe tanaima isharaxō ato axosharatiro. <sup>3</sup> Nāskaxō yorafāfe nā yoinā inafō ināino nāato retexō koofakī Epa Nios ato kīfixomis Epa Niospa āto chaka ato soaxonō. Nāskatari āri āfe yoinā ina retexō koofamis ari Epa Niospa chaka soaxonō, a noko axomis keskafakī. <sup>4</sup> Akka ākai tsoa katometriroma Nios ato kīfixomis xanīfo ixii. Nios fistichi ato katotiro Aarón ani keskafakī. <sup>5</sup> Nāskarifiāi Cristo aari katomenima Nios ato kīfixomis xanīfokōi ixiki. Akka Apa Nios fistichi yoini iskafakī:

Mī ēfe Fakekōi. Nāskakē mī fisti āto xanīfo finakōia ipanakaki, ixō yoini. <sup>6</sup> Askatari anā iskafakī yoini:

Mīfi ato Nios kīfixomis xanīfo ipanakaki, nā xanīfo Melquisedec ipaoni keskara, ixō Apa yoini.

<sup>7</sup> Jesús nono mai ano ikax, mā chaima naxiki omiskōikōini. Nāskaxō fāsikōi mekayanā oiaianā Apa kīfini iskafakī: “Epa, mī keyokōi tāpia. Ea mīa ifipaikī ea mīa ifitiro ē nanōma,” ixō yoini. Mēxotaima nā Āpa amapaiyai keskara fisti shinākī Jesús āfe Apa nikakōini. Nāskakē āfe Āpa tenemakōini axosharakōiyanā omiskōiaino. <sup>8</sup> Akka Jesús Niospa Fakekōifiax omiskōini. Omiskōifikī Apa nikakōini. <sup>9</sup> Nokoōnoax omiskōifikī Apa Niospa yoiai keskara nikakōini. Nāskaxō a nikaifo ato ifipakexakī. Nāskax noko ifimis sharakōi imis. <sup>10</sup> Epa Niospa āfe Fake Jesús katoxō yoikī iskafani: “Mīfi nā Melquisedec keskara ikikai. Nāskakē a ea ato kīfixomisfāfe āto xanīfokōi mī ipanakaki ato īkipakexakī. Nāskaxō a eōnoa ato kīfixomisfo xanīfofori mī ato finōkōinīfofānakī,” ixō Āpa yoini.

*Ōisharakōikāfe. Mā Jesús kachikiri faa fāsi mesekōi itiroki*

<sup>11</sup> Ē mato yoia Epa Niospa Jesús katoa a noko Nios kīfixomis afe xanīfo finakōia ixii. Akka nāōnoa ē mato fetsa yoisharapai. Nāskakē ē mato anā yoisharatiroma māmāi fenāmāshta tāpiaino. <sup>12-13</sup> Akka mā Niospa meka nikakī mā mā xinia ranā aka. Nāskakē tāpikōixō mā ato yoikerana. Akka mākai tāpisharama. Akka a mā taefakī Niosnoa mā ato yoiyoni mā mā shināmakia. Nāskakē mato anā tāpimanōfo mā ato fenai. Nā fake yome chocho afiai yosiaima keskarakōifo, mā. Akka fake yomēkai afaa piyotiroma. Nāskarifiakī māri Niospa meka tāpisharaima. Nāskakē mā tāpiama fato sharamākī fatofori chakamakī. <sup>14</sup> Akka nō pena tii Niospa meka ōifafāikī nō tāpikōiax isharakōitiro māmāi nō tāpiax fato sharamāki, fatofori chakamāki.

## 6

<sup>1</sup> Akka nōkai fakefo keskarama. Fakefāfekai afaa tāpisharafoma. Akka nōroko tāpisharakōia. Akka fetsa ē mato yoipai a ē mato yoiyomis keskara anā ē mato yoima. Mā nō tāpia a nō afara chakafamis. Nāskakē nō rāfikōiyanā nōko chaka shināmakitiro. Nāskaxō nō Nios Ifofaino noko chaka soaxotiro nō afe īpaxanō. <sup>2</sup> Mā nō tāpia noko fētsa maotisafaino keyokōi tāpitirofo mā nōmāi Nios Ifofaino. Askatari nō tāpia noko Nios kīfixoyanā āto mifi noko māmātirofo Niospa Yōshi Sharapa noko imasharanō. Nāskatari mā nō tāpia nō Jesús Ifofaax nō naax nō anā otoxiai. Akka a Jesús nikakaspamisfo Niospa a omiskōipakenakafo mēra ato potaxii. Nāskakē nāfo mā nō tāpikōia. <sup>3</sup> Nāskakē a Niospa fichipaiyaino afara fetsafori nō tāpitiro.

<sup>4</sup> Nāskakē nō Jesucristoōnoa meka shara nikaxō chanīmara faax mā naax Nios fe nō ipaxatiro. Nāskatari Niospa Yōshi Shara noko fe iki. <sup>5</sup> Nāskakē nō Niospa meka tāpisharakōiaino a Niospa afara shara noko yoiai nō atiro. Askatari Niospa afara sharafo

noko famapai afara sharafo nō atiro, āfe Yōshi Sharaōxō. <sup>6</sup> Nāskakē keyokōi nō afo tāpifixō nō Niospa Fake kachikiri faxō chakafakī mekafaxō, nō anā Ifofatiroma mā nōmāi chakafaxō a noko Ifimis. Anā tsōa noko ifitiroma. <sup>7</sup> Akka ē mato yoinō nikakapo. Oi ikaino mai mechanatiro. Nāskakē tare anoax fanafo foaisharatiro. Nāskakē a tare yonomisfo inimatirofo fanafo foaisharaino Niospamāi imasharaino. <sup>8</sup> Akka nā tare fetsa chaka anori oi ikaino, fanasharafo foaitiroma. Moxa chakafo fisti foaitiro. Nāskakē koofatirofo nā fanachakafo kooi mitokomenō. Nāskarifiakī fētsa Niospa meka shara nikafafāifikī Nios chakafakī mekafaito nā keskarrafo Niospa nā omiskōipakenakafo mēra potaxii. Nō tare shara keskarakē Epa Nios nokoki inimatiro. Akka nō tare chaka keskarakē Epa Nios nokoki inimatiro. Nāskakē noko omiskōimaxii.

*Akka mā nō tāpia nō Jesús chanīmara faax nō isharakōitiro*

<sup>9</sup> Efe yora mīshtichi, mē matoōnoa tāpisharakōia. Mākai ato keskarama. Akka Jesús Ifofaax oa mā fāi kai keskara mā Nios ari kai. <sup>10</sup> Akka Epa Nios sharakōi. Afaa chaka shināmisma. A mā sharafamis Epa Niospa tāpia, shināmakima. Askatari mā Nios noikī a chanīmara famisfo mā ato axosharamis. Nāskakē Epa Nios shināmakima. <sup>11</sup> Akka Epa Nios kachikiri faxoma a mā akai keskararifakī, ato sharafakī mēxotaima Ifofasharakōikāfe, “Nioski nokoaitīa nō afe isharapakexakī,” shinākōikī. <sup>12</sup> Akka Epa Niospa meka shināmakiyamakāfe. Epa Niospa fetsafo yoini iskafakī: “Mā ea Ifofakī mā ea manasharaito ē mato afara shara ināxii,” ixō ato yoini. Nāskarifiakī māri manasharakāfe, Jesús kachikiri faxoma. Māri afara shara fixikakī.

<sup>13-14</sup> Niospa nōko xini Abraham yoiyoni iskafaki: “Ēkīa mī Nios. Ea tsōa finōtiroma. Ramashara ē chanīmisma. Ē mia yoinō mī tāpisharakōinō. Ē mia axosharakōikai mī fenafo ichapakōi inōfo. Akka mīkai ato tanātiroma mī fenafo māi ichapakōikē,” ixō Niospa Abraham yoiyoni. <sup>15</sup> Nāskakē Abraham fena fenakima manakōipaoni. Nā Niospa yoiyoni keskarakōi fakī Abraham āfinī fake fini. Āfe fake Isaaca. <sup>16</sup> Akka fētsa noko yoikī iskafatiro: “Ē mia pāraima ēfe xanīfāfe mā ea ōi. Nāskakē nā ē mia yoiai keskara ē mia axoxii,” ixō noko yoitiro. Nāskakē nō tāpitiro nokokairoko pāraito. <sup>17</sup> Nāskarifiakī Niospa noko tāpimapai āfe meka chanīmakōi. A noko yoiyoni keskara afeskaxō anā fetsafatiroma. Nāskaxō ato yoini iskafakī: “Ē Nioskōi. Tsōakai ea finōtiroma. Nāskakē nā ē mato yoiai keskafakī mā ea chanīmara fatiro,” ixō ato yoini chanīmara fanōfo. <sup>18</sup> Chanīma Niospa a noko yoiyoni keskara mā noko ōimasharakōia mā nō tāpia. Nāskakē noko pāratiro. Noko yoini iskafakī: “Ēfe Fake ē matoki nīchixii māto chaka mato soaxonō mā efe ipaxanō,” ixō noko yoini. Nāskakē nō chanīmara fai nā noko yoiyoni keskara āfe Fakeōnoax Epa Nios ano nō afe ipaxatiro. <sup>19</sup> Nāskaxō anā afaa fetsa nō shinātiroma. Nios makinoakai tsōa noko potatiroma. Nāskakē Epa Nios fe nō ipanaka. <sup>20</sup> Jesús nai mēra kani nō aōnoax chipo kanō. Nārixō xanīfokōixō noko Apa Nios kīfixōfafāini Melquisedec ipaoni keskaraxō.

## 7

*Nā Melquisedec yorafa Nios kīfixomis ipaoni*

<sup>1</sup> Akka Melquisedecnoa ē mato yoinō afe keskara ipaonimāki. Melquisedec xanīfo ipaoni pexe rasi āfe ane Salem anoax. Askatari ato Nios kīfixomis ipaoni. Nā cuatro xanīfofo yometso chakafo ato ĭchoxō Abraham āfe pia ifitani, afama mīshtifoya oaino, nā Melquisedec Abrahamki nokoni. Nāskata Melquisedec Abraham Nios kīfixoni axosharanō. <sup>2</sup> Askafaito ōikī Abraham Melquisedec nā afama mīshti fitanai ranāri ināni. Nā Melquisedec āfe ane “Asharakōimis,” famisfo. Nā Salem pexe rasi anoax xanīfo ipaoni. Nā Salem āfe ane “Isharakōi,” fapaonifo. <sup>3</sup> Nā Melquisedec āfe epa yafi āfe efa nō tāpiana. Āfe xiniforikai nō tāpiana. Askatari nō tāpiana a fake kānitiā. A nanitīari nō

tāpiama. Nāskakē nō Melquisedec shinākī Niospa Fakeri nō shinātiro. Nāato noko Niosnoa kīfixomis xanīfo ipanaka.

<sup>4</sup> Efe yora mīshtichi, shinākapo. Melquisedec xanīfokōi ipaoni tsoa keskarama. Akka Abraham israelifāfe taefenai āto xini iyopaoni. Abraham sharakōi ipaoni. Askafixō Abraham Melquisedec afama mīshti ināni āfe afaayamafekē. Akka Melquisedec xanīfo finakōia ini Abraham sharafiano. <sup>5</sup> Israeli xoko fetsafo Leví āfe fenafo Epa Niospa katonī. Nāfāfe āto kaifo Epa Nios kīfixopaonifo. Nāskakē Moisés yoini keskafakī nā ato Nios kīfixomisfo kori fisti rasi ato ināpaonifo. Askatari āto afama mīshtifori ato inānifo āto kaifāfe. <sup>6</sup> Akka Melquisedec Leví āfe fenayamafiano Abraham āfe afama mīshtifo fetsa fetsatapafō ināni. Nāskakē Melquisedec Abraham yoini iskafakī: “Abraham, mia Niospa axosharai,” ixō yoini. <sup>7</sup> Chanīma, keyokōi nō tāpikōia fētsa ato finōkōixō āfe mekapa ato shara fatiro. Nāskakē nō tāpia Melquisedec Abraham finōkōia. <sup>8</sup> Nāskakē nā israeli xoko fetsafāfe nā Leví fenafo afama mīshti ato ināfinifono nāfo mā nai keyonifo. Akka Melquisedec Abrahamnā afama mīshti fini. Akka Niospa meka yoikī kenenifo Melquisedec iskaratīa nia keskara. <sup>9-10</sup> Leví fenafāfe āto xini Abraham ipaoni. Nāskaxō Abraham Melquisedec afarafo ināino Levífāfe akairi ināi keskafanifo. Nō tāpiama afetiāra nani. Nāskakē nia keskara nō famis. Nā Abraham Melquisedec afarafo ināitīa Abraham āfe fena Leví anokai fakeama ini. Chipō Leví fakeni. Nāskakē nō tāpitiro Melquisedec fistichi āto xini Abraham yafi ato finōkōia.

<sup>11</sup> Efe yora mīshtichi, shinākapo. Epa Niosxō Moisés noko yoini keskafakī Leví fenafāfe noko Nios kīfixomisfāfe noko ifitirofono Niospa āfe Fake nīchikeranima Apa Nios noko kīfixomis inō. Cristokai Leví āfe fena Aarón keskarama. Nā Cristo Melquisedec keskarakōi. <sup>12-14</sup> Akka tae fenai Leví āfe fena Aarón ini. Nā Aarón yorafo ato Nios kīfixomis ini fetsafāfe āto xanīfo. Akka nōko Ifo Jesús kai Leví āfe fenama, xoko fetsa ini. Nāskax Aarón keskarama. Akka nōko Ifo Jesús Judapa fena. Nā Levīpa chipoko Judá. Akka, “Judapa yorafāfe yorafo ato Nios kīfixomisfo itirofora,” ixō Moisés yoinima. Askafiano Niospa āfe Fake Jesús nīchini yorafo ato Nios kīfixomis inō. Nāskatari a Moisés yoini keskara Epa Niospa fetsafani.

<sup>15</sup> Nāskakē anā ē mato mēstekōi yoisharapai. Iskaratīa xafakīakōi nō tāpishara Nios afara fetsa yoini keskara noko Nios kīfixomis āfe fena Jesús, Melquisedec keskara nokoki nokoni. <sup>16</sup> Akka Moisés yoini keskarakōi Leví āfe fenafo fisti ato Nios kīfixomisfo itirofoki. Jesús kai Leví fenaxoma a Moisés yoini keskaraōnoax noko Nios kīfixomis itiroma. Askatamaroko Niospa Jesús katonī noko kīfixomis inō. Āfe sharaōxō Epa Niospa Jesús otofani. Anā nanakama. Nāskax noko Nios kīfixomis ipanaka Niospa sharaōxō. <sup>17</sup> Nānori Niospa yoiyoni David Jesucristoōnoa kenekī iskafani:

Mī Melquisedec keskara. Nāskaxō mī yorafo Nios kīfixomis ipanaka, ixō kenenī. <sup>18-19</sup> Nāskakē a Moisés yoini keskarakai nō anā ifofaima. Nokokai imasharatiroma. Askatari nōko chaka noko soaxomisma nō Nios fe ĩpaxanō. Akka Jesús āfe meka askarama. Āfe meka sharafinakōia. Epa Niospa Fake nokoki nīchini aōnoax nō afe ipanaka.

<sup>20-21</sup> Akka Epa Niospa āfe Fake yoini keskafakī kai Leví āfe fenafo anori yoinima. Niospa yora shināmanaino iskara kenenī, Niospa āfe Fake Jesús yoikī iskafani:

Na meka ē mia yoiai chanīmakōi. Nāskakē ē anā fetsapakenakama. Ē yorafāfe āto Ifokōi. Nāskakē a ē mia yoiai keskafakī yorafo mī ato ea kīfixomis ipanaka, ixō Epa Niospa āfe Fake yoini. <sup>22</sup> Akka Apa Niospa nānori yoinikē nō tāpitiro Jesúsnoax Nios fe nō ipaxatiro. Akka Moisés meka askarama. Aōnoax Niospa yorafo nō itiroma. Akka Epa Niospa Moisésxō Leví āfe fenafo yoini keskara sharafiano akka āfe Fake Jesús yoini keskara sharafinakōia.

<sup>23</sup> Akka a āto kaifo ato Nios kīfixomisfo ichapafofiax afo natirofo. Tsoa nīpaxatirofoma. Mā fetsa nano fetsari katotirofo atori āfe yorafo Epa Nios kīfixomis inō. <sup>24</sup> Akka Jesúskai ato keskarama. Nāfi nīpanakakī nāato noko Epa Nios mēxotaima kīfixomis ipanaka. <sup>25</sup> Nāskakē Apa Niosxō noko ifitiro nō afe ipaiyaito nokoōxō Apa Nios yoifafāini iskafakī: “Epa Niosi, ē ato nāxoniki, ato chaka soaxōfe. Nāskaxō a mī ika ano ato imafe,” ixō nokoōxō Apa yoimis. Nāskakē a nokoōnoa Apa yoia keskafakī noko nāskakōi faxoxii nō afe ĩpaxanō. Nāskaxkai nō fenopakenakama.

<sup>26</sup> Akka nā Jesúsfi noko Nios kīfixomis xanīfokōikī. Apa Nios keskara sharafinakōia. Fetsafo finōkōia. Tsōakai aōnoa afaa chaka yoitiroma. Aatokai afaa chaka shināmisma yora chakafo keskarama. Nāskaxō Apa Nios ika anoafori ato finōkōia. Nāskaxō a nō yopaifo noko axosharatiro. <sup>27</sup> Akka a ato Nios kīfixomis xanīfo fetsafo keskarafoma. Taefakī afāfe pena tii yoinā ina retepaonifo Epa Nios inānakī ato chaka soaxonō. Nāskakē Niospa mā ato chaka soaxonano yora fetsafāferi ato yoinā inafō inānifo, atori Epa Niospa chaka soaxonō. Akka Jesúskai ato keskarama. Jesús ato finōkōia. Nāskakē Jesús nai fistini noko chaka soaxonano Epa Nios fe nō ipaxatiro. <sup>28</sup> Akka Epa Niosxō Moisés yoini keskafakī yorafoōnoa Epa Nios ato kīfixomisfo inōfo āto xanīfofo katonifo. Akka nāfofi noko keskarafori nāfāferi afara chakafamisfo. Nāskakē Niospa yoiyoni keskafakī āfe Fake Jesús chipo katoni nokoōxō Nios kīfixomis ĩpaxanō. Aatokai afaa chakafamisma. Isharakōimis.

## 8

### *Epa Niospa meka fenasharakōi yoini Jesús noko nāxonō nōko chaka noko soaxoxii*

<sup>1-2</sup> Akka nā sharafinakōia nō yoiai nāfi Apa Nios xanīfokōi ika ari afe ikaki. Nāskakē nō afara yoipaiyaito nokoōxō Apa yoipakenaka. Nāatofi noko Apa Nios kīfixomis xanīfokōikī. Nāskakē a ika arikai tsōa afaa fetsa onifanima. Akka Nios fistichi onifani. Nāskakē ariax Apa fe nokoōnoax mekakakāini. Nā ika ari nai mēra anoa a anoxō Nios kīfiti pexefā keskarakōifiax finakōia. Nāskakē nā ē mato kenexona keskara xafakīakōi mā tāpitiro.

<sup>3</sup> Nā ato Nios kīfixomis xanīfokōi inōfo Niospa ato katoni afarafo yorafāfe Nios inākata finōfo. Askatari yoinā inafō fixō retekaxō koofaxō ato kīfixonōfo āto chaka ato soaxonō Niospa ato katoni. Nāskakē nā Jesús, noko Nios kīfixomisto, nāatori Nios ināni. Yoinā ina inānima. Askatamaroko āa noko nāxonī nōko chaka noko soaxoxiki. Āfe Āpa amapaiyai keskara ani. <sup>4</sup> Moisés yoini keskafakī Levī āfe fenafos israelifāfe ato Nios kīfixomis itirofo yoinā retekaxō ato Nios ināxoxikakī Niospa ato chaka soaxonō. Akka Jesúskai Levī āfe fenama. Nāskakē Jesús nono mai ano ixō nokoōxō Apa Nios kīfimis ikeranama. Akka nai mēra ixō noko kīfixomis, Niospa ato katoano. <sup>5</sup> Akka nono mai anoxō nā Levī fenafāfe a anoxō Nios kīfiti karapa pexe mēraxō yonopaonifo. Nānoxō āto kaifo israelifo tāpimapaikakī Nios ika ari afe keskaramākī tāpinōfo. Askafixō askarakōi tsōa tāpiyonima. Nāskakē Epa Niospa Moisés yoini iskafakī karapa pexe fayōamano: “Ē mia yoiai keskafakī a anoxō ea kīfiti karapa pexe fafe. ¿Mā mī shināimē ē mia machi anoxō tāpimana keskara nāskakōi fafe karapa pexe fakī? Nāskakē a yonomisfo tāpimafe nā ē mia yoiai keskarakōi fanōfo,” ixō Epa Niospa Moisés yoini. <sup>6</sup> Akka Niospa āfe Fake Jesús yoini keskarato a Moisés yoini keskara finōkōia. Nāskakē Jesús Apa ika arixō nokoōxō Apa Nios kīfifafāini. Akka Levī fenafāfekai askafapaonifoma. Epa Niospa āfe Fake Jesús yoiyoni keskarakōi ato yoimisma. Akka nā ato yoiyoni keskara sharafiano nā āfe Fake Jesús yoini keskararoko sharafinakōia.

<sup>7</sup> Niospa Moisés yoini keskara nō nikasharakōixō nō afara chaka nō fakeranama. Akka nō nikasharakōima. Nāskakē Epa Niospa aōxō noko ifitiro. Nāskakē noko fetsa yoini iskafakī: “Ēfe Fake ē nīchixii mato nāxonō mato chaka soaxonō. Mā Jesús Ifofaino ē mato ifixii,” ixō Epa Niospa yoini. <sup>8</sup> Akka Epa Niospa Moisésxō yoini keskarakai tsōa

askara nikasharakanamax nõko xinifo nikayospakõ i inifo. Nãskakẽ nõko Ifo Niospa yoini iskafakĩ:

Ë chipo na efe yorafo israelifo yafi Judapa ãfe fenafo meka fena shara ã ato yoixii. Nã ã ato sharakõ i axõ ai keskara ã ato õimaxii. <sup>9</sup> Ë ãto xinifo Egipto anoa i yoni. Nãskaxõ ã ato yoisharani ãfe meka nikasharaifãfe ato kexesharafafãixikĩ. Ë ato yoisharafiaino ãfe meka kachikiri fanifo. Nãskakẽ ã ato potani. Akka a ãto xinifo ã ato yoini keskarakai ã ãto fenafo askara ã yoixiima. Askatamaroko ãfe meka fena shara ã ato yoixii ea nikasharanõfo. <sup>10</sup> A ã israelifo yoixiai kene fistiõxõ ã ato tãpimaxima. Askatamaroko ãto shinã mẽra ãfe meka shara ã nanexii ãto õiti mẽraxõ a kirika kenea keskara sharaõxõ shinãsharanõfo. Nã ã ato yoiai keskakõixii shinãsharaxikani. Nãskakẽ ã ãto Epa Nioskõ i ixii. Akka afo efe yorafo ixikani. <sup>11</sup> Akka anã fisti rasichi ato tãpimaxikanima. Keyokõichi ea tãpixikani. Yorafo afamafãferi ea tãpiaifono, xanĩfofofãferi ea tãpikõixikani. Nãskakẽ anã eõnoa tsõa ato tãpimaxima akõ i keyokõichi mã ea tãpikõiafono. <sup>12</sup> Ë ato chaka soaxoxii afara chakafafiaifãfe. Nãskaxõ a afara chakafamisfo ã anã shinãpakenakama, ixõ Niospa yoini. <sup>13</sup> Nãskakẽ Niospa anã ato yoini iskafakĩ: “Meka fena shara ã mato yoinõ,” ixõ ato yoini. Akka a Moisés ato yoini keskarakai anã tsõa shinãtiroma. Nã Moisés ato yoini keskara meka xinikõ i. A mekakai anã tsõa shinãpakenakama. Nãskakẽ nã meka shinãmakipakenakafo.

## 9

*Karapa pexe kene fetsa mẽraxõ Epa Nios ato kĩfixopaonifo. Akka iskaratĩa Jesús noko kĩfixomis Apa Nios ika arixõ*

<sup>1</sup> Ë mato yoinõ afe keskara yorafo ipaonifomakĩ. Akka Epa Niospa Moisés yoini afeskaxõ nono mai anoxõ afe yorafo ato Nios kĩfixotirofomãkĩ Niospa ato chaka soaxonõ. Akka karapa pexe fanifo a mẽraxõ Nios kĩfinõfo. <sup>2</sup> Akka a karapa pexe fanifo mẽra kene rafe ini. Nã kene rekõtana mẽra siete rãpari oro otatia metax keskara ini. Askatari mĩsari a mẽra ini. Nã mĩsa kamaki mẽxotaima doce pãa fapaonifo. Nã kene rekõtana anenifo iskafakakĩ: “Nios chaimashta ika,” ixõ anenifo. <sup>3</sup> Akka karapa pexe fanifo mẽra sama namikõ i nakirafekõ i potexõ xĩtia ini. Nã kene chikaya anenifo iskafakakĩ: “Nono Nios ikõina,” ixõ anenifo. <sup>4</sup> Nã kene rekõtana ketaxamei mĩsa kafãshara oroya taxta fanifo ini. A kamakixõ nakas potoshara kooati ipaoni. Nãskatari kene chikaya fetsa mẽrari kafo oroya taxtafanifo ini. Nã kafo mẽra pãa keskara ãfe ane mãnã kecho oro mẽra nanea ini. Akka Aarón ãfe chatiri nã kafo mẽra naneyoamano Niospa nã Aarón ãfe chati charofo onifayoni. Nãskata Aarón ãfe chati chipo kafo mẽra naneni. Nãskatari Niospa Moisés ãfe meka makexki kenexõ inãni nikanõfo. Nã makex para Niospa mekaya nã kafo mẽra nanea ini. <sup>5</sup> Nãskakẽ nã kafo mãmãkĩa Niospa ãfe ãjiri keskara raferi nia ini. ãto peta rafeta kafo fepoafõ keskara ini. Nãskakẽ nã Niospa ãfe ãjiri keskara rafeoxõ nõ tãpitiro Nios fãsi sharakõ ikẽ nõko chaka noko soaxomis. Askafiano akka nãfoõnoakai ã mato iskaratĩa yoitiroma.

<sup>6</sup> Nãskakẽ nã Nios kĩfiti karapa pexe kene rekõtana mẽra a ato Nios kĩfixomisfo mẽxotaima ikipaonifo anoxõ nakas potoshara koofaino ato Nios kĩfixoxikaki. <sup>7</sup> Akka a kene fetsa mẽrari tsoa ikitiroma ipaoni. Nã ato Nios kĩfixomis xanĩfo finakõia fisti ikipaoni. Xinia fisti ata ikipaoni. Nãskatari imimais ikipaonima. Yoinã imiya ikipaoni nã imi Epa Nios inãxikĩ ãfe chaka soaxonõ, askatari afe yorafori ato chaka soaxonõ. <sup>8</sup> Nãskakẽ Niospa Yõshi Sharapa xafakĩa noko tãpimani. Akka nã karapa pexe iyoano ãfe kene fetsa mẽra tsoa ikipaonima. Nã ato Nios kĩfixomis xanĩfokõ i fisti ikipaoni Nios fe mekaxiki. Yorafo Epa Nios fe mekayoxoma, Nios ato kĩfixomis xanĩfo fisti yoiyopaonifo. <sup>9</sup> Nãskakẽ nã ipaonifoõnoa iskaratĩa noko shinãmatiro Moisés ato yoini keskafakĩ. Karapa pexe ano

yoinã ina retexõ inãpaonifo Niospa ãto chaka ato soaxonõ. Askafikanax isharapaonifoma afara chakafakaxõ shinãtaifapaonifo. <sup>10</sup> Akka Moisés ato yoini keskafakĩ a ato Nios kĩfixomisfãfe nãskakõi fanifo. Nãskaxõ afara shara fetsafori ato tãpimani Moisés meka. Afara pita, afara ayata mã fatiro ato fani. Askatari afaari mã pitiroma, afaari mã ayatiroma ato fani. Askatari ato tãpimani afeskax mechokometirofomãki Epa Niospa ato nikakõinõ. Akka askafiaifono afãfekai ato chaka soaxokõitirofoma. Cristo oyoamano nãnori Niospa ato yoiyoni. Nã Cristo naitãa aõxõ keyokõi Niospa fetsafani. Nãskakẽ nõ Jesús Ifofaino, Niospa nõko chaka noko soaxotiro. Nãskakẽ a Moisés yoini keskara anã tsõa ifofasharatiroma ãfe chaka soapaikĩ.

<sup>11</sup> Akka Cristo mã anã nai mẽra kaax, noko Nios kĩfixomis xanĩfokõi ini. A Niospa noko yoiyoni keskara noko inãmis. A karapa pexe anoxõ a ato Nios kĩfixomisfãfe ato Nios kĩfixopaonifo yorafãfe anifo. Akka Jesús noko kĩfixomis ano sharafinakõia Nios fistichimãi nai fanino. <sup>12</sup> Akka Cristokai karnĩro imi fota fakka fakeshtari fonima. Askatamaroko nokoõnoax nakĩ ãfe imi foax ikisi Apa Nios ari kani. Nãskaxkai anã Jesús nanakama. Nãskaxõ nõko chaka noko soaxonano ãfe Apa Nios ari nõ katiro. <sup>13</sup> Akka chanĩma, karnĩro yafi fakka retexõ ãfe imi fikaxõ nã karnĩro koofakaxõ ãfe chii mapoya nã imi osikaxõ saa saa anifo Epa Niospa ato chaka soaxonõ anã choshta keskara iyamanõfo. <sup>14</sup> Akka Cristokai afaa chakafamisma. Nãfi sharafinakõia. Niospa Yõshi Shara a nĩpanakato Jesús shinãmani. Nãskakẽ Apa yoini iskafakĩ: “Epa, ã atoõnoax naikai. Nãskakẽ ãfe imi foano eõxõ mã ãto chaka soaxotiro mefe yorafo inõfo,” ixõ Apa yoini. Akka a nõ Nios inimamapaikĩ nõ shinãpaoni keskara nõ anã shinãima. Akka iskaratãa nõ Nios inimamapaikĩ nõ nikasharakõitiro. Nã Nios nĩpanaka sharafinakõia.

<sup>15</sup> Akka a Moisés ato yoini keskara sharafiano tsõa nikapaonima. Afara chakafapaonifo. Nãskakẽ nã afara chakafapaonifo keskara Cristo fistichi ato chaka soaxotiro. Akka a Moisés yoipaoni keskara anã ato yoitiro. Nãskakẽ Cristo oni nokoõnoax naiyoi nõko chaka noko soaxoxiki nõ Nios fe ipaxanõ. Nãskakẽ Niospa noko yoini iskafakĩ: “Ekeki fekãfe ãfe Fakeõnoax efe yorafo ixikakĩ,” ixõ noko yoini. Nãskaxõ a noko yoiyoni keskara noko inãxii. <sup>16-17</sup> Iskaratãa afara fetsa ã mato yoinõ mã tãpinõ. Nõ nayoxoma nõ yoitiro iskafakĩ ato yoikĩ: “Ë naano tsõa ãfe afarafo fiimãkai ikisi ã mato tãpimayonõ,” ixõ nõ yoitiro. Nãskakẽ nã nõ yoiyomis keskafakĩ nõ nayoxoma nõko afarafo fetsafo inãpaikĩ nõ yoitiro. Akka nõ nayoamano nõko afarafo tsõa fena fitiroma. <sup>18</sup> Nãskakẽ Niosxõ Moisés afe yorafo yoini ãto yoinã inafõ reteafono imi fonõ. Akka a yoinã inafãfe imi foyamaino a ato yoiyoni keskafakĩ Niospa ato chaka soaxotiroma. <sup>19-20</sup> Taefakĩ Epa Niospa shinãmanaino Moisés israelifo keyokõi ato yoini nikanõfo. Mã ato yoikĩ mitoxõ, nã ifi hisopo ãfe põya pishta fini. Mã fixõ fakka fake imi yafi oveja imi fakkaya osini. Nãskaxõ ifi hisopo põya pishta fixõ oveja raniya texkeani. Nãskata nã ifi hisopo põya pishta texkeata fakka fake imiki momo momo axõ nã Niospa meka kirikaki kenea a Niospa yoiyoni keskafakĩ fakka imi saa saa ani. Askatari yorafokiri fakka imi saani. Ato yoikĩ iskafayanã: “Na imioxõ mã tãpitiro Epa Niospa noko yoiyoni keskara axii. Nãskax nõ afe yorafo itiro,” ixõ Moisés ãfe kaifo yoini. <sup>21</sup> Nãskatari nã karapa pexe a mẽraxõ Nios kĩfiti Moisés imĩ saa saa ani, askatari a mẽranoafori keyokõi imĩ saa saa ani. <sup>22</sup> Chanĩma, nã Epa Niospa Moisés yoini keskafakĩ Moisés imi saakano karapa pexe anoafõ keyokõi ato chaka soaxona. Akka imi foyamaino noko chaka soaxotiroma. Anã ano fato fetsama nõko chaka noko soaxotiro.

*Cristo nõkoõnoax nani noko chaka soaxoxiki*

<sup>23</sup> Nã anoxõ Nios kĩfiti karapa pexe mẽranoa keskarakõifo Nios ika ari. Nãfoki ato Nios kĩfixomisfãfe yoinã imi saanifo Niospa afo õisharanõ. Akka a karapa pexe mẽranoa imifo sharafiano afãfe nõko chaka noko soaxotiroma. Askatamaroko nã Cristo nokoõnoax nai fistini nõko chaka noko soaxoxiki. Noko chaka soaxonano Nios ika ari nõ katiro, a keskara shara afe ipaxakĩ. Askatari anokai a anoxõ Nios kĩfiti karapa pexe keskarama.

A Nios ika ano sharafinakōia. <sup>24</sup> Akka yorafāfe karapa pexe fanifo anoxō Nios kīfinōfo. Nāskakē a mēra a Nios nai mēra ika keskarakōi ipaoni. Akka Cristo mā otoax a karapa pexe fanifo mēra ikinima. Askatamaroko Apa ari nai mēra kani. Nāskakē iskaratīa ari afe ika noko Apa Nios kīfixōfāfāixiki. <sup>25</sup> Akka nā ato Nios kīfixomis xanīfo karapa pexe kene fetsa mēra ares fisti xinia fisti akax ikipaoni a mēraxō Nios kīfixiki. Āfe imikōiya a mēra ikitamaroko, yoinā imiya ikipaoni. Akka Cristokai ato keskarama. Akai mēxotaima natiroma, nai fistini Apa Nios ari kaziki. <sup>26</sup> Akka askakatsaxakī Cristo nokoōnoax nai ranā ranākerana nā Niospa mai onifanichāi. Akka askamisma. Jesús nai fistini ikisi noko keyokōi chaka soaxoxiki. <sup>27</sup> Akka keyokōi nō nai fetsexii. Nō naax keyokōi nō akiki nokoaito noko yoixii a nō niyoxō amis keskara. Nāskakē a nō amis keskara noko yoiaino nā Jesús Ifofaafo tii afe isharapakenakafo. Akka nā nikamisfoma omiskōipakenakafo mēra ato potaxii. <sup>28</sup> Cristo āari ināmeax noko naxōi fistini. Yora ichapafōōnoax omiskōixō noko nāxoni. Askafīax anā āfe yorafoki oxii, noko ikisharapakexakī. Nāskakē anā nokoōnoax nanakama noko chaka soaxoxiki. Askatamaroko aōnoax nō isharapakenaka.

## 10

<sup>1</sup> Niospa Moisés yoini keskaraōxō nō tāpitiro Cristo noko afarasharakōi faxoxiai. Nāskakē nā Moisés ato yoini keskarakai tsoa imasharatiroma. Afia Moisés ato yoini keskafakī nā xinia tii a ato Nios kīfixomisfāfe yoinā inafō retepaonifo Niospa ato chaka soaxonō. Askatari a Moisés yoini keskaratokai ato imasharamisma Nios fe ipaxanōfo. <sup>2</sup> Akka a ato Nios kīfixomisfāfe yoinā inaoxō ato chaka soaxonaifono, tsōa anā akeranama yoinā ina retekī. Āfe chakaōxō anā shināchakakeranama. Nāskakē anā tsōa yoinā ina retek-eranama. <sup>3-4</sup> Akka askarama. Nā xinia tii cabra ato retexonaifotīa nā afara chakafamis keskara ato shināmapaonifo. Akka yoinā ina imioxō āfe chaka ato soaxotiroma.

<sup>5</sup> Nāskakē Cristo mai ano fotoyoxoma Apa yoini iskafakī:

Epa, mīkai fichipaima yoinā ina imioxō āto chaka soanōfo. Askatamaroko yorakōi mīa ea onifani ēfe yora ē mia inānō. Nāskaxō yorafoōnoax naxō ē ato chaka soaxoxiki.

<sup>6</sup> Akka yorafāfekai mia inimamakanima yoinā ina retekaxō kooakī mī ato chaka soaxonō, ixō yoini. <sup>7</sup> Akka anā mē mia yoia iskafakī:

Mē nono mai ano fotoa a mīa amapaiyai keskara ē axiki. Nānorikōi mī meka yoimisto eōnoa yoikī keneyoni,

ixō Cristo Apa yoini. <sup>8</sup> Efe yora mīshtichi, shinākapo. Cristo Apa yoikī taefani iskafakī: “Epa, mīōxō Moisés ato yoini keskara sharafiano mī anā fichipaima. Akka nāato ato yoikī iskafani: ‘Yoinā inafō retekāfe āfe imi foano aōxō Niospa mato chaka soaxonō,’ ixō ato yoini. Akka a yoinā retexō koakaxō mia ināifāfekai afāfekai mia inimaima,” ixō Apa yoini. <sup>9</sup> Nāskaxō anā yoikī iskafani: “Epa, ē nono mai ano ē fotoni a mīa amapaiyai keskara axiki,” ixō Apa yoini. Akka Cristo noko nāxoni noko chaka soaxoxiki. Nāskakē a Moisés ato yoini keskara nō anā nikatiroma nōko chaka Epa Niospa noko soaxonō. Nāfo mā Niospa fetsafaa. <sup>10</sup> Nāskakē a Apa amapaiyai keskai Jesucristo āari ināmeni noko nāxoxikī aōnoax nō a keskara shara inō. Nāskakē nō anā afaa fetsa fichipaima māmāi Jesús noko nai fistixonikē.

<sup>11</sup> Akka a atoōxō Nios kīfixomisfāfe pena tii yoinā ina retepaonifo Epa Niospa keyokōi ato chaka soaxonō. Askafekēkai afāfe ato chaka soaxopaonifoma. <sup>12</sup> Akka Jesucristo mā noko nai fistixononi noko chaka soaxoxiki. Nāskakē nō anā afaa fetsa yopanakama noko chaka soaxonō. Nāskakē mā nokoōnoax naax Apa Nios ari kani ariax afe xanīfokōi ikikai. <sup>13</sup> Akka mā Apa ari kanixakī iskaratīa arixō manai, a noikaspamisfo Apa Niospa ato potaitīa. Nāskakē Jesucristo Apa fe xanīfofinakōia ixii. <sup>14</sup> Nāskakē āarifi ināmei fistixō noko nāxoni nōko chaka noko soaxoxiki. Nāskaxō nō Ifofaa a keskara shara nō ixii. Nāskakē Niospa anā afaa chaka nōkoōnoa ōipakenakama. Nāskakē nōri a keskara sharakōi ixii.



15-16 Nānori Niospa Yōshi Sharapa noko yoiyoni iskafakī:

Efe yorafāfe, ea Ifofaifono āto shinā mēra ēfe meka ē nanexii āto ōiti mērari a ēfe meka kenea keskara ē faxii ea Ifofasharanōfo, ixō yoini. 17 Nāskaxō anā yoikī iskafani:

Mā ea Ifofaino ē anā shināpakenakama a mā chakafamisfo, ixō Niospa Yōshi Sharapa yoini. 18 Akka mā noko chaka soaxonano, nāskakē nō anā yoinā ina inātiroma noko chaka soaxonō.

### *Nios fe rafesharakōikāfe*

19 Efe yora mīshtichi, nāskakē nō nai mēra ikitiro Nios ano ranotama Jesucristomāi nokoōnoax nai imi fonikē, noko chaka soaxoxiki. 20 A ato Nios kīfixomisfo kīfiti pexefā kene fetsa mēra xinia tii ikifistipaonifo ato Nios kīfixoxikakī. Anā iskaratīa nō yopatiroma askara. Anā askafapanakama. Akka iskaratīa afara fetsa fenasharakōi Jesús noko axoni. Nāskakē mā Jesús naino nā Nios kīfiti pexefā kene mēranoa sama nāmīfā faxtetani anā tsoa ikiyamanō. Nāskakē nākōi nā Nioskōi nō kīfitiro. 21 Nōko Ifo Jesús nokoōxō Apa Nios kīfixomis xanīfokōi. Nāskakē keyokōi Niospa fakefāfe āto Ifokōi. 22 Nāskakē nō Jesús chanīmara fakē nā noko nāxonioxō nōko ōiti fena sharakōi noko faxotiro. Nāskaxō a nō afarafo chakafamis keskarafo anā nō shinātiroma nōko ōiti inimakōitiro. Nāskaxō faka sharapa nashimana keskara noko fatiro anā afaa chaka nōko shinā mēraxō nō shinānōma. Nāskakē Nios fe rafekāfe. 23 Akka nō yoikī iskafamis: “Jesús nōko Ifokē Epa Niospa a noko yoiyoni keskara noko axoxii,” ixō nō yoimis. Nāskakē afaa fetsa shināyamakāfe. Nā nō shināi fisti shināfafāikāfe. 24 Akka Epa Niospa noko sharafamis. Nōri nō shināsharanō afeskaxō nō fetsafo shināmasharatiromākī nōinā faatanākaxō afara axoshara faatanānōfo. 25 Mā mā tāpia mā Jesús chaima oi. Akka fet-safo anā ichanāmisfoma. Nāskakē ato keskara iyamakāfe. Nāskakē ichanāi xateyamakāfe. Jesúsnoa mā shināi keskafakī fetsafori yoitaifakāfe mātō ōiti inimasharakōinō.

26 Fatora fētsa mā tāpia Jesús nokoōnoax nani nōko chaka noko soaxoxiki. Nāskara mā tāpifixō afara chakafakī nōko Ifo Jesús kachikiri fakī, askarakai Niospa āfe chaka soaxotiroma. 27 Nāskarafo Niospa ato omiskōimaxii. Akka Niospa ato ōiaino ratei finakōixikani. Nāskakē Niospa ato yoixii iskafakī: “Emakinoax omiskōipakenakafo mēra fotakāfe, chiifā mēra,” ixō ato yoixii. 28 Akka fētsa nā Moisés yoini keskara nikakaspakī afara chakafaito fētsa ōixō xanīfo yoimis. Fistichi yoiyamakī rafeta yoitiro, askayamakī trespa yoitiro iskafaki: “Mā nō ōia nato afara chakafaito,” ixō yoitirofo. Nāskakē xanīfāfe yoitiro: “Na feronāfāke afara chakafaa mā natiro,” ixō yoitiro. 29 Akka nā Moisés yoini keskara nikakaspaifo afo retepaonifo keskafakī fatorafāferi Jesús nikakaspamifokē Niospa ato omiskōimakī finakōixii. Nāskakē nā yora chakafāfe shinākī iskafamisfo: “Mē nikamis Jesús ea nāxoni. Nā naino āfe imi foni. Nāskaxō ea katonī aōnoax ē Niospa fake inō. Akka ē shināikai afama. Nāskakē ē Jesús Ifofapaima,” ixō anori shinākī nāato Niospa Fake nikakaspakōimis. Askara meka yoikī Niospa Yōshi Shara chakafakī mekafamis, Niospa Yōshi Sharapa sharafafiamisno noikī. 30 Akka mā nō tāpia Niospa yoikī iskafani: “Afara chakafāifāfe ē ato omiskōimaxii,” ixō yoini. Askatari yoikī iskafani a kirika keneano: “A ea Ifofaafāfe afara chakafāifono ē ato omiskōimaxii,” ixō yoini. 31 Akka fatorafāfe nōko Ifo Jesús kachikiri fakaxō afara chakafariafāifono atonā fāsi mesekōi ixii. Nāskakē askarafo nā Nios nīpanakato ato achixō ato omiskōimakī finakōixii.

32 Shinākapo efe yora mīshtichi. Mā taefakī Jesúsnoa tāpixō mā Ifofani keskafakī shināmakiyamakāfe. Fetsafāfe mato Jesús Ifofatimafāifono ato nikatama mā nōko Ifo Jesús Ifofasharakōipaoni. 33 Nāskaxō mā Jesús Ifofasharaito ōikakī fetsafāfe mato ūchayanā mato omiskōimamisfo. Akka a Jesús Ifofamis fetsafori omiskōiaifono māri ato fe omiskōipaimis. 34 A Jesús Ifofaa fetsafo karaxa mēra ato ikimanifo. Nāskakē mā ato noiyanā ato inimamapai karaxa mēranoa mā ato ōikai kani ato shināmasharata ato inimamaxiki. Nāskatari nā Jesús Ifofaafāfema mātō afarafo mato fīakī keyokōinifo. Mato

askafafiaifono a shināchakatamaroko mā tāpini Epa Niospa nā ika arixō mato afara mekexona afokai fenopakenakama. Nāskara tāpiax mā inimakōini. <sup>35</sup> Nāskakē a mā Jesús chanīmara faa keskafakī kachikiri fayamakāfe. Mā kachikiri fayamakē Epa Niospa mato sharafaxii noko yoiyoni keskafakī. Nāskaxō afara shara mato ināxii. <sup>36-37</sup> Akka Niospa meka keneni iskai:

Cristo mā chaima matoki oi, samarakaima, ixō kenenifo. Nāskakē mā Jesús Ifofasharai keskafakī omiskōifikī tenekāfe. Epa Niospa mato ināpaiyai keskara aōxō nā mato yoiyoni keskara mā fixii. <sup>38</sup> Nāskaxō anā Niospa meka kenenifo iskafakī yoikī:

Nā ea chanīmara fai ē imasharaito, nāato ea Ifofasharakōixii. Akka nā ea kachikiri faafoki ē inimaxima, ixō Niospa yoini kirika keneano. <sup>39</sup> Nāskarafāfe Jesús kachikiri fakanax omiskōipakenakofo mēra fokani. Akka nōkai askarama. Askatamaroko nō Jesús chanīmara fakōimis noko nimasharapakexanō nō afe ipaxakī.

## 11

### *Nios nikakōipaonifo*

<sup>1</sup> Akka nō Epa Nios chanīmara fakōixō a noko yoiyoni keskara noko axoyoamano nō chanīmara fai chipomāi noko axōfaito. Nāskarifiakī a noko yoiyoni keskara nō ōiyamafixō āfe mekaōxō nō chanīmara fai. Nāskara nō shinākī nō Nios chanīmara fai. <sup>2</sup> Nāskakē nōko xinifāfe Niospa ato yoini keskara chanīmara fakōipaonifo. Nāskakē Epa Nios atoki inimakōikī atoōnoa meka shara yoini.

<sup>3</sup> Akka nō chanīmara faxō nō tāpitiro Niospa āfe mekapa mai yafi nai onifani. A nō ōiyomisfoma afarafo Niospa onifani, akka iskaratīa mā nō ōitiro. Nāskakē āfe mekapas keyokōi onifani.

<sup>4</sup> Ē mato yoinō nikakapo mā tāpinō a nōko xinifo ipaonifo afe keskaramākī. Nōko xini Abel Nios chanīmara faxō oveja fake ināni nā Niospa yoini keskafakī. Nāskakē Nios akiki inimakōini. Akka āfe ochi Caínkai askara inānima. Nā Caín Nios nikakaspayanā āfe afarafo ināpaiyaito Niospa fichikaspani. Akka āfe exto Abel Nios chanīmara fakōikē Niospa aōnoa yoikī iskafani: “Mī ea chanīmara fakōina,” ixō yoini. Abel Nios chanīmara faax mā nafianikē nō Abel shinākī nō tāpitiro Nios chanīmara faxō nō nikasharakōitiro. Nō askafaino Nios nokoki inimasharakōi.

<sup>5</sup> Nōko xini Enoc aatori Nios chanīmara fakōinax afe rafekōipaoni. Nāskakē nayamafiakē a ika ari Niospa ifirisafatani. Aōnoa yoikī Niospa meka kenenifo iskafakī: “Ē Enoc yoiai keskafakī ea nikakōimis. Nāskakē ē akiki inimakōi,” ixō Niospa yoini. <sup>6</sup> Akka nō Nios nikayamakī nō Nios inimamatiroma. Akka nō Nios fe ipaikōikī nō nikakōitiro. Iskaratīa Nios nia. Nāskakē nō chanīmara fatiro Niosmāi nikē. Askatari nō nikapaikōikī chanīmara fayanā akiki nokoaito Niospa noko afara shara faxoxii.

<sup>7</sup> Nōko xini Noéri Nios chanīmara fakōipaoni. Nāskakē Niospa Noé yoikī iskafani: “Ē oi kaya imai faka faipafanō āsai fetsenōfo. Nāskakē kanōanāfā pexeya fafe. Mī fakefo fe mī āfinō ano ikanax āsaxikanima. Nā ē mia yoiai keskafafe,” ixō Niospa Noé yoini. Akka tsōa askara ōiyomisma nāskakē Noé chanīmara fakī kanōanāfā fani āfe fakefo fe āsaxikakima. Nā Noé Nios chanīmara faax isharakōipaoni. Akka nā nikakaspaifo askapaonifoma, afāfe afara chakafapaonifo. Nāskakē Niospa ato omiskōimani āsanōfo. Nāskakē Nios fe Noé rafeaito akiki inimakōini.

<sup>8</sup> Nōko xini Abrahamri Nios chanīmara fakōipaoni. Nāskakē Niospa Abraham yoikī iskafani: “Nā ē mia nīchipaiyai ari mī katiro. Ē mia mai inānō mīnā inō,” ixō Epa Niospa yoini. Akka Abraham tāpia inima fakiri kaimākai. Askafiax nā Niospa yoia keskakōini. <sup>9</sup> Nāskakē nā Niospa yoiyoni keskara chanīmara faax, a Niospa nīchia mai ano nokoax Abraham yora fetsafo mēra kani. A keskarafoma inima. Nānoax pexe keskara a karapa pexe

fofāsafapaoni a mēra oxaxikaki. Nāskakēri āfe fake Isaaca fe āfe fafa Jacobo nā keskara mēra ipaonifo. Epa Niospa Abraham yoini keskafakī nā raferi ato yoikī askafani: “Ē mato mato mai ināxii,” ixō yoini. <sup>10</sup> Nāskakē Abraham manapaoni. Akka Niospa yoini keskara nā mai ano iflaxō tāpīpaoni a Nios ika ari afe ipanaka. Nāno Niospa onifanifo keyokōi sharakōifo nāfori āfenā ipanaka. Nāskakē Abraham manapaoni.

<sup>11</sup> Niospa Abraham yoini iskafaki: “Mī āfi Sarapa chipo fake fixii. Āfe fake feronāfake ixii. Nāskakē mī fenafo ichapakōi ixikani,” ixō yoini. Akka Abraham anifokōi ini āfe āfiri yōxafokōi ini fake fimisma. Nāskakē Abraham āfe shinā mēraxō shinākī iskafani: “Epa Niospa ea yoiyoni keskara ea axōi. Nāato nā yoiai keskarakōi famis,” ixō Abraham Nios chanīmara fani. Nāskakē Abraham āfinī fake fini, āfe fake feronāfake. Nāskakē Abraham fakeya ini. <sup>12</sup> Akka Abraham mā anifokōia ini. Nāskano āfe fenafo ichapakōifo ini. Tsōa ato tanātiroma. Nā fishifo tiikōi askatari nā mashi exe tiikōi inifo tsōa ato tanātiroma. Abraham āfe fenafo ichapakōi inifo.

<sup>13</sup> Nā ē yorafoōnoa mato rama yoia keskara atoōnoa ē mato yoinō. Nā yorafo nai mitokomenifo a Niospa ato yoiyoni keskara fikanaxma. Akka askafikaxō chanīmara fakakī ato shinā mēraxō oa ōiai keskara fanifo. Nāskakē inimakōinifo. Nāskakanax yoinānifo iskakani: “Nonokai na mai ano nō ipanakama, mai fetsa ano nō ixii,” ikax yoinānifo. <sup>14</sup> Akka nānori yoiaifāfe nō tāpitiro nāskara yorafo nono mai ano ipaitama Nios ika ari fopaikani afe ipaxakakī. <sup>15</sup> Akka a ipaonifo ano shinākani āto mai ano anā fopaikani fokeranifo. <sup>16</sup> Akka āto mai ari fopai atama Nios ika ariroko shinānifo ari nokopaikakī. Nāfāfe tāpinifo Nios ika ari sharafinakōia. Nāskakē Epa Niospa a ika ari ato pexe shara faxoni afe ipaxanōfo. Nāskakē Niospa atoōnoax inimakī ato yoikī iskafani: “Ēfi mato Nioski,” ixō atoōnoa yoini inimayanā.

<sup>17-18</sup> Anā Abrahamnoa ē mato yoinō. Epa Niospa tāpipaini Abraham chanīmara fakī nā yoia keskara akimākai. Nāskaxō yoikī iskafani: “Mī ina ea retexotamaroko mī fake fisti Isaaca ea retexōfe,” ixō yoini. Nāskatari Epa Niospa taefakī Abraham yoiyoni āfe fake fisti Isaacaōnoax āfe fenafo ichapakōi ixiaifo. Nā afara sharafo Niospa Abraham yoiyoni keskafakī āfe fake Isaacaōxō keyokōi axoxixakī tāpimayoni. Nānori Niospa Abraham yoiaino āfe fake fisti retexō Nios inākerani. Nāskaxō Nios chanīmara fakōixō nā yoini keskakōi fani. <sup>19</sup> Nāskaxō Abraham āfe shinā mēraxō shinākī iskafani: “Epa Niospa ea yoia iskafakī: ‘Mī fake Isaaca ea retexōfe,’ ea faito ē shinā Niospa afama mīshti fatiro. Akka ēfe fake nafiakē Epa Niospa samama ea otifaxotiro,” ixō shināni. Chanīma, āfe fake nakerani. Nāskakē Abraham shināni āfe fake nafiakē Niospa otifaxotiro.

<sup>20</sup> Akka Isaaca nāatori Nios chanīmara fakōipaoni. Nāskakē āfe fake feronāfake rafe yoini a inōpokoai: “Jacobu yafi Esaú, chipo Epa Niospa afara shara mato faxoxii,” ato fani.

<sup>21</sup> Nāskarifiakī Jacobori Nios chanīmara fakōipaoni. Nāskakē mā chaima naito Niospa āfe shinā mēra shināmanai keskafakī āfe fafa rafe, José fake rafe, Niospa ato shara faxonōpokofai ato yoini. Ato yoita āfe chatiki mēstexō Epa Nios kīfiyanā aicho fani.

<sup>22</sup> Nā Joséri Nios chanīmara fakōipaoni. Nāskaxō mā chaima nakī āfe yorafo yoikī iskafani: “Chipo Epa Niospa nōko fenafo nā israelifo Ejipto anoa ato iyoxii kiki. Fokakī ēfe xaori foxikani kiki. Nā ikaifo ano ea maifaifoxikakī,” ixō ato yoiyoni.

<sup>23</sup> Moisés āfe apa feta āfe afa Nios chanīmara fakōipaonifo. Nāskakē Moisés yomeax sharapishtakōikē āfe apa feta āfe afa ōini. Nāskaxori tāpinifo mā yosixō a Niospa yoiai keskara yonosharakōixiaito. Nāskakē Ejipto anoa xanīfāfe ato yoini a israelifāfe āto fake feronāfake yome mīshti keyokōi ato rētekī mitokakōinōfo. Askafiaifono Moisés āfe apa feta āfe afa Nios chanīmara fakaxō ratekakima tres oxe anifo āto fake onekakī xanīfāfe āto fake rēteyamanō.

<sup>24</sup> Moisés āfe chata keskara ini Faraón. Askafiaifono Moisés askara fichikaspani. Nāskaxō ato yoini iskafakī: “Xanīfo Faraónkai ēfe chatama. Āfe fakerikai ēfe efama,” ixō ato yoini, chanīmara fanōfo israelifo āfe kaifo ini. Moisésri Nios chanīmara fakōipaoni.

<sup>25</sup> Akka Moisés shināni iskakī: “Ē Ejipto anoax xanīfāfe pexe ano ikax ěri ato fe inimasharakai xini ranā ayanā ě afara chakafatiro Nios shināyamakī. Ē askapaima,” ixō shināni. Askapaitamaroko iskakī shināni: “Ēkai ejiptofo feta afara chakafapaima, askakimaroko ěfe kaifo fe nā Niospa inafō omiskōiaifo keskai ěri ato fe omiskōi. <sup>26</sup> Ē Egipto anoafō ato afara fiapaikī ě ato fiakerani. Ē fiaxoma, ea mekafafiaifono Egipto anoafāfe, nāskanō. Akka afarafoyafix shara. Akka Cristo, a Niospa noko nīchixii noko ifinō, nā sharafinakōia. Ē Cristoōnoax omiskōifiano Epa Niospa a ika arixō ě nokoaito afara sharakōi ea ināxii ě afe ĩpaxanō,” ixō shināni.

<sup>27</sup> Akka Nios chanīmara fakōinax Ejipto anoax āfe kaifo fe Moisés kani. Ejipto anoax āto xanīfo akiki ōitifishkifiaino akiki mesetama nā xanīfāfe mai anoax kani. Akka Nios tsōa ōiyamafitirono Moisés fisti Nios fe rafekōiax afe mekapaoni. Nāskakē nā Niospa yoini keskafakī enepaonima. <sup>28</sup> Akka Ejipto anoax israelifo foyoafomano Niospa Moisés yoini iskakī: “Mī kaifo yoife ovejanā fake retenōfo. Nāskakaxō nā oveja imi āto pexe fepotifo raish anōfo, askafafono ōiki ěfe ājirinī āto fake iyoafō rēteyamanō, nā Ejipto anoafō āto fake iyoafō ato reteaitīa,” ixō Niospa yoini. Nāskakē Moisés nā Niospa yoia keskara chanīmara faxō āfe kaifo israelifo yoini. Nāskakē israelifāfe āto fake iyoafō nanima.

<sup>29</sup> Nāskakē israelifāfe Nios chanīmara fanifo. Nāskakaxō nā fakafā āfe ane Ōshi pokefainifo. Epa Niospa nēxpakīa fakafā shināfatanaino israelifāfe pokefainaifono ato acho Ejipto anoafō fonifo ato retepaikani. Mā fakafā nēxpakīa kāiyaifono Niospa atoki fakafā yosifani. Nāskakē āsai mitokomenifo.

<sup>30</sup> Akka Niospa israelifo yoini: “Nā Jericó pexe rasi kachiori siete nia foaketi fayakenōfo,” ixō yoini. Nā pexe rasi kachiori simīto kene keyakōi masoa ini. Nāskakē israelifāfe a pexe rasi kachiori foaketi fayakenaifono nā Niospa yoini keskara nā pexe rasi maokomei fetseni. <sup>31</sup> Akka keyokōi Jericó anoafō nai keyonifo. Akka nā kēro chotaferoma āfe ane Rahab nā fisti nanima nāatomāi mā Nios chanīmara faax. Akka Jericó pexe rasi ano foyoafomano israeli xanīfāfe feronāfake rafe nīchini ato onāti fatanōfo. Mā foafono nā rafe Rahab āfe pexe mēra ato ikimani tsōa ato fichixō reteyamanō. Nāskakē nā Rahab tsōa retenima āfe kaifo retetikakī.

<sup>32</sup> Akka, ¿anā afaa fetsa ě mato yoitiromē? Nā yora ichapafāfe Epa Nios chanīmara fapaonifoōnoa ě mato yoikī keyotiro. Nā Gedeón ikaino, Barac ikaino, Sansón ikaino, Jefté ikaino, David ikaino, Samuel ikaino nā Niospa meka yoimis fetsafoōnoari ě mato yoipanā ěkai yoikī keyotiro. <sup>33</sup> Nāskakē afāfe Epa Nios chanīmara fakaxō āto sorarofō yoinifo a ato noikaspaifo ato retenōfo. Nāskakē a ato noikaspaifo ato retepaifikakī finōkōinifo. Akka atiri xanīfo ikaxō āfe yorafo kexesharapaonifo isharanōfo. Nāskakē a Niospa ato yoyoni keskara ato axosharani. Nāskatari atiri nā Nios Ifofaafāfema poomā mēra ato potanifo. Askafiaifono Epa Niospa ato kexesharani poomānā ato pinōma. <sup>34</sup> Akka atiri xanīfo chakafāfe ato yoinifo chiifā mēra ato potanōfo. Chii mēra ato potafiafono Niospa ato kexesharani koonōfoma. Atiri kenofāfe ato retepaifikakī tsōa ato retenima. A isinī ikani ato yora pachikōifokē afori Niospa ato mitsiskōi imani. Nāskakē nā ato noikaspaiifāfe āto sorarofāfe ato retepaifiaifono nāfāferoko ato ĩchonifo ato afeskafanōfoma. <sup>35</sup> Kērofāferi Nios Ifofaino, fake naano Niospa ato otifaxoni anā ninō.

Akka fetsafo Nios chanīmara fakōinafono nā Nios Ifofaifāfema ato omiskōimanifo ato retekakī. Nāskaxō ato yoikī iskakifano: “Mā Nios Ifofayamaito nō mato afeska faima mā kasharatanō. Akka mā Ifofaito nō mato retei,” ixō ato yoinifo. Ato askafiaifono tsoa Nios shināmakinima. Nāskakē ato retenifo ato reteyoafomano shinākī iskakifano: “Noko retefiaifono Epa Niospa samama noko ōtofatiro nō afe ĩpaxanō,” ixō shinānifo. <sup>36</sup> Askatari a Nios chanīmara faa fetsafori ato kaxemetsamafayanā ato koshaketsayanā ato cadenānā metexkere ata ato otxekere axō ato karaxa mēra ikimanifo. <sup>37</sup> Askatari ranāri tokirinī ato tsakaketsakaxō ato retenifo, ranāri sirochonō nakirafe ato xatenifo nanōfo, ranāri kenopa ato retenifo, ato askafiaifono. Nāskakē nā afaamaisfāfe ano

rapatiamano oveja fichi iyamai cabra fichi rapati fakaxõ safenifo. Ato retepaikakĩ ato ïchorifaifono. Nãskakẽ omiskõikõinifo. <sup>38</sup> Nãskakẽ tsõa istoma anoax machi keya anoax a mafa kini mẽra ikikata mai kini mẽrari ikinifo. Akka nã Nios chanĩmara faafo a Nios Ifoafafema ato shara fanifoma Niospa ato õia sharafiafona, ato chakafapaonifo.

<sup>39</sup> Nãskakẽ nãfo omiskõi finafikakĩ Nios Ifokõi fapaonifo. Nãskakẽ Niospa atoõnoa yoikĩ iskafani: “Nafãfe ea nikakõikani. Nãskakẽ ã atoki inimakõi omiskõifikani isharakõimisfo,” ixõ Niospa atoõnoa yoini. Askafikaxõ a Niospa ato yoyoni keskara tsõa fiama ini.

<sup>40</sup> Nãskakẽ Epa Niospa ato manamayopaoni. Akka nõri nõ Nios chanĩmara faax nõ ato fe a Jesús ika ari nõ nokoxii. Nãskakẽ yora fisti keskara nõ ato fe ixii a keskara shara noko imaino. Nãskaxõ ato feta anã afaa fetsa nõ yopapakenakama. A Niospa yoyoni keskara keyokõi noko inãxii nai mẽraxõ.

## 12

### *Nõ Jesúsnoa shinãsharatiro*

<sup>1</sup> Akka nõko xinifãfe Nios chanĩmara fapaonifo. Nãskakẽ nõri ato keskara nõ itiro. Nãskaxõ a afara chakata noko nẽtefapaiyai keskara nãfo nõ kachikiri fakõini. Nãskaxori afara chakafãferi samamakõi noko afara chakafamapaitiro. Nãfo chakari nõ kachikiri fakõini a Niospa noko amapaiyai keskara fisti axiki, fena fenakima a noko yoiai keskara nõ axosharakõi. <sup>2</sup> Akka nõ Jesús fisti shinãfafãinõ. Nãfi nõko Ifokõikĩ noko tãpimamiskõi. Akka nãato noko õimakĩ taefanikĩ afara afeskara afiaino nõ Nios chanĩmara fakõinõ. Nãskaxõ a Apa yoia keskara akõipaoni. Nãskakẽ nõri a keskara inõkãfe. Nãskaxõ mã mastakakĩ yorafãfe ferotaifi rãfinĩ fanifo. Askafafiaifono omiskõiyanã tenekõini mãmã tãpiax a chipo xanĩfo ixõ Apa Nios feta noko ifixiai inimakõiyanã Apa Nios ika arixõ.

<sup>3</sup> Yora chakafãfe chakafafiaifono tenekõini. Nãskaxõ a nokoõnoax omiskõini keskara shinãkĩ matori omiskõimanaifono, shinãchakatama mãto õiti fekaxtefayamakãfe. Nãskaxõ a Niospa mato amapaiyai keskara mã enetiroma. <sup>4</sup> Akka yorafetsafãfe mato afara chakafamapaimisfo anã mã Jesús Ifofanõma, ato nikatama mã omiskõifi mã omiskõi sharamisma. Akka Jesúsroko omiskõi finakõini. <sup>5</sup> Mã mã shinãmakia keskara ã anã mato yoinõ. Mã ãfe fakekẽ, Epa Niospa mato yoini keskara ãfe meka kirikano kenea iskara fẽtsa keneni:

Èfe fãke, ãfi mã Ifokõikĩ. Akka nã ã mia yoiai keskara mã ayamaito ã mia omiskõimani mã ea nikanõ, mã ea Ifofasharanõ. Ë mia askafaino, akai afamara mã fatiroma.

Askatari shinãchakayamafe. Tãpisharafe. <sup>6</sup> Nã ã aõ noiai tãpimasharai aõ noikĩ. Èfe fake keyokõi omiskõimani anã nikasharanõ,

ixõ keneni a Niospa shinãmanaino. <sup>7</sup> Epa Niospa mato tãpimapaiyai keskara tãpikãfe. Nãskax omiskõifikĩ shinãchakatamaroko tenesharakõikãfe. Nãskakẽ omiskõixõ mã tãpitiro mãmã Niospa fakefoxõ. Apafãfe ãto fakefo tãpimatirofo keskafakĩ Epa Niospa mẽstekõi nokori tãpimani. <sup>8</sup> Keyokõi Epa Niospa ãfe fakefo ato tãpimanaito mã meemisfo. Akka Epa Niospa noko tãpimayamaino nõ ãfe fakekõifo itiro. Nãskax nõri ãfe yorafo itiro. <sup>9</sup> Akka nõ yomekẽ nõko epafãfe nono mai anoxõ noko tãpimapaonifo. Nãskakẽ nõ shinãkĩ nõ ato nikakõimis. Akka Epa Niospa noko tãpimanaino nõ tenekõitiro. Nãskaxõ nã noko tãpimapaiyai keskai nõ inimayanã nõ isharakõitiro. <sup>10</sup> Nõko epafãfe ãa shinãkaxõ noko tãpimamisfo nõ shara inõ. Akka mã nõ yosiano anã noko askafamisfoma. Nãskarifikĩ Epa Niospa mẽste shinãsharakõikĩ, nokori shara fapaikĩ noko tãpimamis a keskara shara nõ inõ. <sup>11</sup> Chanĩma, noko tãpimayanã noko omiskõimanaino nõ shara meetiroma. Paekõi mei nõ ichopaitiro. Askafixõ mã yosixõ chipo nõ shinãtiro Epa Niospa noko tãpimasharai, nõko õiti inimasharatiro shara noko imaino.

### *Nõ Niospa meka nikakaspaino mesekõi ixii*

<sup>12</sup> Nãskakẽ afara afeskara afiaino shinãchakayamakãfe. Epa Niospa mato tãpimapaiyai keskara fisti akãfe. Nãskaxõ Nios Ifofakĩ kachikiri fatama nikasharafafãikãfe. Nãskatari

āfe meka shara nikakī enepaiyamakāfe. Yora pachi keskara iyamakāfe. <sup>13</sup> Nāskax isharakōikāfe Jesús Ifofasharaxikakī. Mā askaito ōikani nā Jesús Ifo sharafaafoma mato fe rafepaitirofo Jesús keskara shara ipaikani.

<sup>14</sup> Nāskakē mēenāpaitama keyokōi yorafo fe isharafafāikāfe. Nāskatari Jesús keskara shara ipaikāfe. Akka tsoa Jesús keskara shara iyamakani afāfekai nōko Ifo ōinakafoma. <sup>15</sup> Epa Niospa noko noikōikī āfe Fakeoxō noko sharafa fafafāimis. Nāskakē a Niospa noko amapaiyai keskara akāfe fenoxikakima. Askatari mato shināmā afaa shināyamakāfe. Akka mato shināmā mā afara shinākī fetsafori mā ato afara chakafamatiro akairi askara anōfo. <sup>16</sup> Nāskatari mato āfima fe iyamakāfe. Kērofori mato fenema fe iyamakāfe. Akka nō naino, nōko fake iyoato nōko afama mīshti fitiro. Akka Esau shināsharanima. Fonāikī āfe exto yōkani āfe exto pimanō. Nāskaxō a āfe apa ināpaiyai shinākima āfe exto yoini iskafakī: “Epa naano āfe afama mīshtifo ē fiaī ē mia inānō kopifakī,” ixō yoini. Nāskakē nā Esau keskara iyamakāfe. Atokai Niosnoa shināpaonima. Akka a Niospa mato ināpaiyai keskara fikaspakīma, fikāfe. <sup>17</sup> Mā mā tāpia āpa afara shara ināpaiyai keskara fipafikī finima. Nāskaxō apa yōkakī iskafani: “Epa, a mā ināpai keskara ea ināfe, ē mī fake iyoakōi,” ixō oiayanā yōkafaito āpa inānima māmāi chipokoto fiano. Nāskakē ōisharakāfe. Mā Nios nikayamai māri Esau keskara itiro. Nāskakē Niospa mato ināpaiyai keskara mā fitiroma.

<sup>18</sup> Epa Niospa a nōko xinifo yoini keskara iskaratīa noko yoimisma a keskara. Ato yoini machi āfe ane Sión tenāmā fotanōfo anoxō afara fetsa ato yoixiki. Akka nā machi anoax chiifā erepafākōi, askatari kōi fakishifākōi, askatari nēfefākōiyanā kana piishini. <sup>19-20</sup> Nai mēranoax maneti fāsikōi chāi chāisaito nikanifo. Nāskatari nai mēraxō fāsikōi ato yoiaito nikanifo ato Niospa iskafaito: “Na machi ano tsōa māpetiroma. Māpeaifāfe tokirinī ato tsakakī retekāfe. Askatari yoināfāferi māpeaito mā retetiro,” ixō ato yoiaito nikanifo. Nāskakē ratekōikakī Moisés yoinifo iskafakakī: “Moisés, nō anā Niospa meka nikapaima. Māchi ari māpei nō narisatiro. Nāskakē Nios yoife noko anā yoiyamanō,” ixō israelifāfe Moisés yoinifo. <sup>21</sup> Akka Moisésri nā ōia keskara ato yoini iskafakī: “Ēri fāsi ratekōi, tari tari iki,” ixō ato yoini.

<sup>22</sup> Akka nōkai machi Sión ano nō kaima. Askatamaroko machi Sión fetsa ano nō kai, āfe ane fetsa nā Jerusalén Fena ano a Nios ika ari. Nāskakē nānoax āfe ājirifo ichanākaxō, “Nios sharara,” fafafafāikani. Akka nā āfe ājiri ichapakōifo tsōa ato tanātiroma. <sup>23</sup> Nānori nō keyokōi a Jesús chanīmara faafo afe ixii. Akka nā Nios ika ari āto anefo kenea afe ipaxanōfo. Nāskakē nōri nō Nioski nokoa. Nāskakē noko yoixii fatofāfe Ifofakanax afe ipanakafomāki. Nā Ifofaafos a keskara shara ato nai mēraxō imai afaa chakafamisfoma keskara inōfo. <sup>24</sup> Jesús noko nāxoyoamano tsōakai nokoōnoax nāxoyonima. Nāskakē iskaratīa Jesús noko nāxonikē nō Nios fe isharapakexatiro. Akka nōko xini Caín onefetsa Abel reteni. Nāskakē Epa Niospa Caín yoikī iskafani: “Caín, ¿afesakī mī exto mī reteamē? Iskaratīa ē mia omiskōimani,” ixō yoini. Abel nafianixakī aato noko nimapaketiro, Jesús keskarama. Akka Jesús nanixakī noko nimapakenaka.

<sup>25</sup> Nāskakē Niospa mato yoiai keskara nikakaspayamakāfe. Nā nono mai anoxō nōko xinifo Moisés ato yoini keskara nikayamaifāfe Epa Niospa ato omiskōimani. Akka Jesús Moisés keskarama. Nios ika ariax nokoki ftoni Niospa Fakekōiax. Nāskakē a Jesús noko yoiai keskara nō nikayamaito nokori omiskōimakī finakōixii. <sup>26</sup> Akka Epa Niospa Moisés yafi nōko xinifo machi Sión anoxō ato yoikī āfe mekapa mai naya naya ani. Nāskaxō anā ato yoini iskafakī: “Anā mai fisti ē naya naya axima. Nairi ē naya naya axii,” ixō ato yoini. <sup>27</sup> Nāskakē nā Epa Niospa noko yoini keskaraōxō nō tāpitiro nā afara nipatirofoma, Niospa nāfo yamafarisafataxii anā afaa inōfoma. Akka nā Niospa ato imapaiyai fisti itirofo. <sup>28</sup> Nāskatari a Nios ika ariax mai naya naya itiro. Nāskakē nāno nō afe isharapakexatiro. Nāskakē aōnoa nō shināsharayanā nō kīfifafāinō. Nāskaxō a noko amapaiyai keskara nō axōaino nokoki Epa Nios inima sharakōixii. <sup>29</sup> Akka mā nō tāpia nōko Ifo Nios nā chiifā erepafāi keskara. Akka nā āfe meka shara nikakaspakī kachikiri

faifono Niospa chiifã erepafã mēra ato potaxii anoax omiskōipakexanōfo. Nāskakē nō nikasharakōinō.

## 13

### *Afeskaxō nō Nios inimamatiromē*

<sup>1</sup> Māfi Cristo afe yorafokī. Nāskakē mā ranā nōināi xateyamakāfe. <sup>2</sup> Yora fetsafori mai fetsa ariax oaito mātō pexe anoxō ifisharakāfe. Nāskakēri tāpixoma fetsafāfe yorayama fiano ājirifo fiano ifimisfo.

<sup>3</sup> Nā karaxa mēra ikafori ato shinākāfe. Nāskaxō ato ōiti inimamasharakāfe. Askatari ato axosharakāfe. Nā mā ato fe karaxa mēra ika keskara shinākōikāfe.

<sup>4</sup> Feronāfakefo, mātō āfiffo fe nōināsharakāfe. Nāskax isharakāfe. Askatari mātō āfima fe ipaiyamakāfe, mātō āfi fisti fe ikāfe. Kērofori mātō fenema fe ipaiyamakāfe, mātō fene fisti fe ikāfe. Akka nā āto āfima fe ikaifono, kērofori āto fenema fe ikaifono, nāskarafo Niospa ato omiskōimaxii.

<sup>5</sup> Akka kori ichapa noiynamakāfe. Askatamaroko inimakāfe afe tii mā ayamakī. Epa Niospa yoinikī iskafakī: “Ēkai mato makinoax paxkanakama. Askatari ē mato potanakama. Nāskakē a mā yopai ē mato ināxii,” ixō yoini. <sup>6</sup> Nāskakē chanīmakōi nō yoitiro iskafakī:

Afara afeskara afiaito ēfe Ifāfe ea axomis. Nāskakē ē rateima, Epa Niospamāi ea kexesharaino yorafāfe ea afeskafanōfoma, ixō nō yoitiro.

<sup>7</sup> Niospa meka yoimisfāfe mato yoinifo keskara atoōnoa shināfafāikāfe. Nāfāfe mato shara famisfo. Nāskakaxō nōko Ifo Jesús chanīmara famisfo. Nāskakē ato keskara ikāfe nō Jesús Ifofasharakōinō.

<sup>8</sup> Akka Jesucristo nā ipaoni keskara ĩpanaka. Anākai iskaratīa fetsatiroma. <sup>9</sup> Akka fetsafāfe mato anorima yoipaikani, a tsōa nikamisma keskara. Nāskakē ato nikayamakāfe mato iskafakī yoipai ani kiki: “Nōko xinifāfe noko yoinifo keskara nō nami fetsa piaino nōko shinā mēra noko shināmasharatiro,” ixō mato yoipai ani kiki. Akka a nō piatokai nōko shinā mēra noko shināmasharatiroma. Askatamaroko Niospa noko noixō noko imasharatiro a keskara shara nō inō.

<sup>10</sup> Nāskakē nō chanīmara famis Jesucristo ifi cruz ikakinoax noko nāxonni nōko chaka noko soaxoxiki. Akka Jesucristo chanīmara fatama nā Moisés ato yoini keskara fisti chanīmara famisfo. Nāskakē afāfekai ato chaka soaxotirofoma.

<sup>11</sup> Akka nā Moisés ato yoini keskai a ato Nios kīfixomis xanīfo fisti, ares fisti pexe kene fetsa mēra ikipaoni, nā mēra yoinā ina imiya ikikē ōikī Epa Niospa ato chaka soaxonō. Akka nā yoināfāfe ato kaya pexe rasi pasotaixō koofapaonifo. <sup>12</sup> Nāskarifiāi Jesús Jerusalén pasotainoax noko omiskōixokī āfe imi foax noko nāxonni nōko chaka noko soaxoxiki a keskara shara nō inō. <sup>13</sup> Akka nōri Jesús ipaoni keskara inōkāfe a nō ipaoni keskara anā ixikima. Nāskaxō āfe kaifāfe potanifo keskafakī nokori nofe yorafāfe potatirofo. Nāskakaxō Jesús ĩchaketsanifo keskafakī nokori aōxō ĩchatirofo. Akka Jesúsnoa chaka shināmisfo keskafakī nokori aōxō chakafatirofo. <sup>14</sup> Nono mai anoax nō omiskōifikī nō shināchakaima, mā nōmāi tāpiax nono mai ano nō ipanakama. Askatari mā nō tāpia a Nios ika ari nokoax nō afe ipanaka. Nāskakē nā nō manasharamis.

<sup>15</sup> Jesús noko nāxonioxō nō Epa Nios aicho fai. Akka nō yoikī iskafatiro: “Aicho Epa Niosi, mī Fake Jesús ēfe Ifokōi. Aōxō ē mia aicho fai,” ixō nō yoitiro. <sup>16</sup> Askatari ato shināmakiyamakāfe mā afarayaxō a afaamaisfo ato ināsharakāfe. Mā ato askafaito ōikī Nios matoki inimasharakōi kiki.

<sup>17</sup> Akka nā ichanāti pexe anoxō Niospa meka mato yoimisfo ato nikasharakōifafāikāfe. Nāskax nā mato yoiaifo keskakōikāfe. Nāfāfe mato kexesharamisfo mā Jesús nikasharanō. Akka nāfāferi tāpiafo Nios ari nokoafāfe ato yōkaxii iskafakī: “¿Mā ēfe meka mā ato

tāpimasharamismě?” ixõ ato yõkaxii. Nāskakē ato nikasharakāfe inimakõinõfo. Akka mā ato nikayamaino inimatirofoma, shināchakatirofo. Nāskaxõ mato axosharatiroma.

<sup>18</sup> Nokori Epa Nios kīfixokāfe. Epa Niospa noko amapaiyai keskara mā nõ apaimiski. Nāskaxõ nõko shinā mēraxõ nõ afaa chaka shināima. Nõ isharapaikõi. <sup>19</sup> Eari Nios kīfixokāfe matoki ea samama nīchinõ ē anā mato fe inõ.

*Ato Nios kīfixoyanā mā mekai xatekī ato yoini*

<sup>20-21</sup> Epa Niospa noko inimamakõimis nõ afaa shināchakanõma. Nõko Ifo Jesús mā nokoõnoax nafiakē Apa Niospa otofani Jesús keyokõi finõax noko kexemis inõ. Jesús noko nāxonionõnoax Epa Nios fe nõ afe yora ipanaka. Nāskakē mā afara shara yopaito Epa Niospa mato inātiro a mato apaiyai keskara shara mā anõ. Āfe Fake Jesucristoõxõ nõko shinā mēra noko shināmasharax nokoki inimakõixii. Nāskakē keyokõichi Jesúsnoa nõ yoisharapakenaka. Nāskara sharakõi ĩpanaka.

<sup>22</sup> Efe yora mīshtichi, nā ē mato ichapama yoia keskara nikasharakāfe fena fenakākima. Nā ē mato kenexona keskai mātõ shinā mēra mato shināmasharaxii kiki. <sup>23</sup> Ē mato yoipai mā nofe yorashta Timoteo iskaratīa karaxa mēranoax mā tsekea. Akka samamashta ekeki oano ē afe kai mato ari.

<sup>24</sup> Keyokõi ichanākaxõ a mato Niospa meka yoixomisfo yafi a mato kexemisfori nõ ato yoisharai. Akka nono Italia anoxori nā Nios Ifofaafāferi mato yoisharakani.

<sup>25</sup> Epa Niospa keyokõi mato noikī mato shara faxõfafāinõ. Nā tii.



## Santiago Jesús Chanĩmara Faafo Kirika Kenexõ Fomani

### *Judeofo paxkanãnifono Santiago ato kene fomani*

<sup>1</sup> Ëkĩa Santiago ẽ mato kirika kenexõ fomai. Epa Nios yafi nõko Ifo Jesucristo ẽ ato yonoxomis. Mãfi Jesucristo mã Ifofamiskĩ nã maitiofo mã paxkanãi fetseni. Ë mato meka shara fomai.

### *Niosxõ nõ tãpisharatiro*

<sup>2</sup> Efe yora mĩshtichi, afara chakafo nokoaino, inimasharakãfe, shinãchakakakima. <sup>3</sup> Mã mã tãpiakĩ, ano afara chakafo nokoaino, mã Jesús nikakĩ finasharakõikĩ, afara chakafo nikakãkima mã tenesharakõitiro. Nãskaxõ afara chakafo mã finõinĩfõfãtiro. <sup>4</sup> Mã askaino Jesús mato imapaiyai keskara mã itiro mēxotaima mãmãi mã Jesús nikakõisharakĩ. Mã askakĩ afarafo Jesús mato amapaiyai keskara mã atiro afaa chaka shinãkima.

<sup>5</sup> Akka Niospa mato amapaiyai keskara mã tãpixoma, Nios yõkakãfe mato tãpimanõ. Mã yõkaito mato tãpimatiro. “Ea fekaxtefayamakãfe,” ixokai Niospa mato anori yoima. Inimayanã mato tãpimani. <sup>6-8</sup> Nãskata mã Nios yõkakĩ iskafakĩ shinãyamakãfe: “Ë Epa Nios yõkaito ea tãpimanimaraka,” ixõ anori shinãyamakãfe. Akka nã mã yõkapaiyai keskara shinãkãfe. Nãskaxõ, “Aicho, ẽ Nios yõkaito mã ea tãpimasharaki. Nãskakẽ ea amapaiyai keskara ea tãpimaxii,” ixõ shinãkãfe. Askatari anã afaa shinãyamakãfe. Fekaxteyamakãfe. Nãskarari nēfefakĩ ifi fokẽ fokẽ akaito nõ tãpitiroma fakiri kaimãkai. Nãskarifiakĩ Niospa mato tãpimafiaino mã anã afara fetsa shinãkĩ mã shinãsharatiroma. Nãskakẽ mã fekaxtexõ mã shinãsharatiroma. Nãskakẽ Niospa mato afaa tãpimatiroma mã fekaxteaito.

<sup>9</sup> Jesús chanĩmara fafiakani ranãri yorafo afaamaisfo. Nãskakẽ fetsafãfe ato tanakanima. “Nafokai afama,” ixõ shinãkani. Askatamaroko afaamaisfiafono Niospa ato iskafai: “Mãfi ẽfe fakekõifokĩ. Keyokõi ẽfenãfo mãtonãri,” ixõ Niospa ato yoini. Nãskakẽ inimatirofo. <sup>10-11</sup> Fetsafori Jesús chanĩmara faafo afama mĩshtiyafõ. Nãskakẽ feronãfake afama mĩshti ichapayato shinãkĩ iskafatiro: “Ë afama mĩshti ichapayafekẽ ẽfe afama mĩshtifãfe ea inimamatiroma. Ëfe afama mĩshtiõnoaxkai ẽ isharatiroma. Akka ẽfi Niospa fakekõiax, ẽ afe rafepakenakakĩ. Nãskax ẽ inimakõi,” ixõ shinãtiro. Akka taeyoi charofo sharashta iyotiro. Askafiaino xinĩ tsofifaano, anã shara itiroma mãmãi xinĩ tsofifaano. Nãskarifiyai feronãfake afama mĩshti ichapayato shinãtiro iskafakĩ: “Nã charo ikai keskariai fatora penata ẽ natiro. Mẽ nãxõ ẽfe afama mĩshti ẽ fotiroma. Askatari ẽfe afama mĩshtifãferikai ea afeska fatiroma,” ixõ nã feronãfãke afama mĩshtiyato shinãtiro. Nãskakẽ mã ãfe afama mĩshtifoõnoax isharakõiax narisatiro.

### *Santiago ato tãpimani afara chakafamisfoõnoa*

<sup>12</sup> Nõko Ifãfe yoikĩ iskafayoni: “Nã ea noiaifi efe ãpanakakĩ,” ixõ yoiyoni. Nãskakẽ afara chakafo nokoki nokoaino, nãskara teneyanã nõko Ifo Nios nõ kachikiri fayamaito õikĩ nokoki inimatiro. Nãskax a yoiyoni keskai nõ afe nãpanaka. <sup>13</sup> Chanĩma, keyokõichi nõ Jesús Ifofaxõ afara chakafapaikĩ nõa nõ yoitiroma iskafakĩ: “Ea Niospa afara chakafamapai,” ixõ nõ yoitiroma. Akka Nios sharafinakõia. Afara chakafatiroma. Tsõarikai Nios afaa chakafamatiroma, Niosmãi sharafinakõikẽ. Nãskakẽri Niospa ato afaa chakafamatiroma. <sup>14</sup> Nãskakẽ nõ afara chakafapaiyaino afara chaka nõo nea. Nãskatari nõko shinã mēraxõ nõ afara chakafapaikĩ nõ atiro. <sup>15</sup> Ë mato yoinõ, nikakapo. Kẽro fistichi fake naneano fenãmãshata yositiro. Akka mã kãiax yositiro. Mã yosiax anifoax, natiro. Nãskarifiakĩ nõko shinã mēraxõ nõ afara chakafo fapai, akka afara chakafo nõ shinãmakiyamaxõ, afara chakafo nõ atiro. Nãskakẽ mēxotaima nõ afara chakafatiro. Nãskax nõ naa keskara nõ itiro.

<sup>16</sup> Akka efe yora mīstichi, anorima shināyamakāfe. Niospa afaa chakafatiromaki.  
<sup>17</sup> Akka Epa Niospa nai mēraxō mēxotaima noko kexesharafafāini. Nāskaxō noko afama mīшти onifaxoni. Xini onifata, fishifo onifata, oxe onifata, nāfo noko onifaxoni, afāfe noko chaxasharanō. Akka oxe ikiaito nō anā ōitiro. Fishiri nāskarari ikiaito nō ōitiro. Chipō kāiyaito nō anā ōitiro noko chaxasharaito. Akka Epa Nioskai askarama. Akai fetsatiroma. Noko mēxotaima sharakōi faxomis. Nokokai chakafatiroma. <sup>18</sup> Niospa ares shināyoni iskakī: “Ēfe meka chanīmakōi nikaifono ě ato fetsafaxii ěfe fakekōi inōfo,” ixō Niospa shināyoni. Nāskakē noko katokī taefani. Nāskatari a rama chanīmara faifo āfe fakekōifo ixikani.

*Niospa meka mēstesharakōi nikax askakōikāfe. Nāskakē mā chanīmara fakōinikai*

<sup>19</sup> Efe yora mīstichi, nikasharakāfe ě mato yoisharanō. Fētsa mato yoipaiyaito, nikakaspatama nikayokāfe. Māri chipo fenāmāshta yoisharaxikakī. Akka samamashta ōitifishkiyamakāfe. Nāskakē nō ōitifishkiki nō mekatiro. <sup>20</sup> Mā ōitifishkikikai Niospa mato afara sharafamapaiyai keskara mā atiroma.

<sup>21</sup> Nāskakē afara chakafo mā famis xatekāfe. Mā mā chaka xatexō mā Niospa meka nikakōisharatiro. Nāskaxō mā yoikī iskafatiro: “Epa, mī meka shara emēra nanefe ě mia Ifofasharapaikai. Ē mia nikapaisharakōikai,” ixō anori yoikāfe. Āfe meka shara mato mēra naneano, a mato yoiyoni keskai mā afe nīpanaka.

<sup>22</sup> Āfe meka fisti nikakākima nā Niospa yoini keskakōiri akāfe. Mā mā nikafi mā askayamai māa mā pāramei, “Nō Nios Ifofara,” ixō shinākī. <sup>23-24</sup> Nā keskarafofi iskam-isfokī: Espejo fikaxō āto femānā choshtakē ōikanax fechokomepaikani shināmakitirofo. Nāskarifiakani Niospa meka nikafīkakī, nāskakaxō afara chakafakakī xateafoma. <sup>25</sup> Akka fētsa Niospa meka shara nikafafāikī nā yoiai keskara amis, shināmakitama. Nā keskara yōra Nios chanīmara faxō Niospa yoiai keskara amis, nāskax inimakōimis. Shinākī iskafamis: “Niospa meka sharakōi. Nā ea yoiai keskara ě aki,” ixō shināmis. Nā keskara yora isharakōitiro inimayanā.

<sup>26</sup> Akka fētsa shinākī iskafai: “Ē Jesús Ifofasharai,” ifiakī meka chaka fisti yoimis āa pārameyanā. Askara yōrakai Jesús Ifofasharama. Akikikai Nios inimaima. Nā keskara yōrakai tsoa ōimatiroma afeskax isharatiromāki. Atokairoko Nios Ifofaxō ato ōimaxiki. <sup>27</sup> Askatari nō Jesús Ifofasharaxō fakefo apamaisfoya, kēro ifomafafari nō ato kexesharatiro, omiskōiaifāfe. Nāskatari nō Jesús Ifofasharaxō a afara chakafaifo keskara nō atiroma. Nō aska sharaito noko ōi nokoki Jesús inimatiro. Nāskarafa nōko Ifo Jesús keskara sharakōi ikani.

## 2

*Yora kori ichapaya fisti sharafatama a afaamaisfori ato sharafakāfe*

<sup>1</sup> Efe yora mīstichi, nōko Ifo Jesucristo xanīfofinakōia. Nāskakē noko noipakenaka. Yora afama mīstifoya, afaamaisfoiyari keyokōi noko Jesús noi. Nāskatari māri Jesús chanīmara famis, noko Jesús noiai keskafakī, keyokōi noikāfe. Nā yora kori ichapaya fisti noikakīma, nā yora afaamaisfoiyari noikāfe. <sup>2-3</sup> Akka mā ichanāino feronāfake kori ichapaya oro anīcho efapa safefāi rapati sharakōi safeax mato fe ichanāiyoi oaito, mā shinākī iskafatiro: “Nafi afama mīstifoyaki, nāskakē nō ifisharai,” ixō mā shinātiro. Nāskaxō, “Nono tsaoyofe keyokōichi mia ōinōfo,” mā fatiro. Mā askafaino, feronāfake afaamais rapati chapokōi safeax mato fe ichanāpaiyaito mā iskafatiro: “Onī nīxō ōife,” askafayamakī, “Onī nāmā tsoxō ōife,” mā fatiro. <sup>4</sup> Mā askafakī mā chakafai. Nā kori ichapaya noikī nā feronāfake afaamaisya mā ifimisma. “Jesús shināi keskara nōri nō shināi,” ixō mā yoimis. Anori yoifi mā askamisma. Feronāfake afaamaisya ifisharaxma Jesús shināi keskara mā shināima.

<sup>5</sup> Efe yora mīstichi, ē mato noikōi. Akka ē mato yoiai keskara ea nikasharakāfe. Yorafāfe afaamaisfikaxō, Jesús chanīmara faifāfe ato noixō Niospa ato katonī afe yorakōifo inōfo. Ato yoiyoni iskafakī: “Mā ea chanīmara fakī, mā ea noikōi. Nāskakē mā efe ipanaka ē xanīfo ika ano. Nāskatari nā ēfenāfo mātonāri ixii,” ixō Niospa ato yoiyoni. <sup>6-7</sup> Askafixō a afaamaisfoya mā ato ikisharakōima, mā ato chakafai ato ōikaspayanā. Akka shinākapo afe keskarafomākī kori ichapayafo. Nā kori ichapayafāfe mato omiskōimakani. Mā ato nimikē xanīfo ano mato iyokaxō mato karaxa mēra ikimapaikani. Askarafāfe nōko Ifo chakafakī mekafamisfo. Akka a kori ichapayafāfe mato noikanima ato kori fisti noi kakī. Akka, ¿afeskakī a kori ichapayafo mā ato ifisharapaimē mato chakafafiaifono? Akka a afaamaisfo mā ato noikaspamis.

<sup>8</sup> Akka kirikaki Niospa meka kenekī iskafanifo: “Nā mā noimekōiai keskariakī fet-safori noikōikāfe,” ixō yoinifo. Nā Niospa yoini keskara mā nikakōiax mā isharakōikai. <sup>9</sup> Akka mā fetsafo noiamax mā shara ikima, chaka mā iki. A Niospa Moisés yoini keskara mā akima. Nāskakē, “Mā nikayospakōifo,” Niospa mato fatiro. <sup>10</sup> Niospa noko yoiyoni iskafakī: “Keyokōi noikāfe,” noko fani. Akka keyokōi Niospa noko yoini keskara nō nikafikī afara fisti nō shināmakixoma nō chakafai. Nāskakē Epa Niospa noko ōi nā nō afaa nikama keskara. <sup>11</sup> Shinākāpo. Niospa noko yoini iskafakī: “Kēro fetsa fe oxayamakāfe. Xotofakeri feronāfake fetsa fe oxayamakāfe,” noko fani. Askatari, “Yora reteyamakāfe,” Niospa noko fani. Akka kēro fetsa fe mā oxayamafikatsaxakī mā yora retekī Niospa noko yoini keskara keyokōi mā nikama.

<sup>12</sup> Akka Niospa noko noikī, āfe meka noko yoini nō afaa chakafanōma. Nāskakē noko yoini keskara, nō keyokōi nikasharaito noko omiskōimanima. Akka nāfo tāpikōixō, keyokōi nō nikakōixō nō ato yoisharatiro. Askatari fetsafo sharafakāfe, askara sharakōikī. <sup>13</sup> Mā askaxō Niospa noko yoini keskara, mā yorafo noiyanā ato shinākī mā ato sharafai. Mā askafaito Niospa mato omiskōimatiroma. Akka mā yora fetsafo mā noiyamaito Niospari mato noixoma mato omiskōimatiro.

### *Nō Jesús chanīmara fakōixō nō fetsafori afara sharafaxotiro*

<sup>14</sup> Efe yora mīstichi, ē mato yoisharapai. Akka fētsa yoikī iskafai: “Ē Jesús chanīmara fai,” ixō yoifixō yorafo sharafamisma, askarakai sharama. Nāskaxō mā noko ōimani māakai Jesús chanīmara faama. Nāskakē mā Nios fe nīpanakama. <sup>15-16</sup> Akka a Jesús chanīmara faa fetsa omiskōi afaamaisyax matoki nokoaito, mā iskafatiro: “Mī rapati safesharata katāfe, matsi meymaxiki. Askatari pisharatāfe fonāiyamaxiki,” mā fafiakī māakai afaa ināmisma, askarakai sharama. <sup>17</sup> Akka mā yōra nāxokai anā fetsafo afaa sharafaxotiroma. Nāskarifiakī fetsafāfe yoikī iskafatirofo: “Ē Jesús chanīmara fai,” ifiaxō fetsafo afaa sharafaxomisma atokai Jesús chanīmara fakōinama. Nā keskarafi yora naa keskarakī.

<sup>18</sup> Akka fētsa shinākī noko iskafatiro: “Ē Jesús chanīmara fai. Nāskakē Epa Nios ēfe Ifo,” ifiaxō fetsafokai sharafamisma. Akka ē iskafai: “Ēri Jesús chanīmara fai. Askatari ē fetsafo sharafamis. Nāskakē mī ea tāpitiro Nios ēfe Ifokē.” Akka mī, “Ē Jesús chanīmara fai,” ifiaxō mī fetsafo sharafamisma. Akka, ¿afeskafaxō mī ato ōimatiromē mī Jesús chanīmara faxō? Akka ē fetsafo sharafakī ē ato ōimatiro ē Jesús chanīmara fakī. <sup>19</sup> Akka mī yoimis iskafakī: “Nios fisti, anā ano Nios fetsama,” ixō mī yoimis. Nāskakē mī chanīmara fai. Nā mī chanīmara fai keskara shara. Akka nā niafaka chakafāferi chanīmara fakani Nios fistikē. Akka chanīmara fafiakanax rateifinakōikani choakani māmāi tāpikanax a omiskōipakenakafo mēra Niospa ato potaxiaino. <sup>20</sup> Akka mī yoimis: “Ē Jesús chanīmara fai. Nāskakē ē Nios fe nīpanaka,” ixō mī shināfikī, mī afaa sharafamisma. Nāskakē mī shināsharaima. Akka ē mia yoisharapai. <sup>21</sup> Akka nōko xini Abrahamnoa shināfe. Niospa yoini iskafakī: “Mī fake Isaaca ea fīshkoyamafe,” fani. Askafaino Abraham āfe fake fishkomītsanima, āfe fakekōifiano. Nāskakē Niospa Abraham ōini sharakōi māmāi

nikasharakōiaino. <sup>22</sup> Akka shināpo. Abraham Nios chanīmara faxō nā yoiāi keskara ani. Akka Abraham yoikī iskafanima: “Epa Niospa, ē mia chanīmara fafiāxō mīa yoiāi keskara ē akima,” ixō yoinima. Askafaino akiki Epa Nios inimakeranima. Abraham Nios chanīmara faxō, Niospa yoini keskara ani. Nāskakē Nios akiki inimakōini. <sup>23</sup> Taefakī kirika kenenifo Abraham Nios chanīmara fakōinaito. Nāskakē Abrahamki Nios inimani. Nāskaxō Niospa yoini: “Mīfi efe rafepakenakakī,” fani.

<sup>24</sup> Nāskaxō mā tāpitiro fetsa iskaito: “Ē Nios chanīmara fai,” ifiāxō Niospa yoiāi keskara akima, askara yorakai Nios fe nīpaxatiroma. Niospakai, “Ē mikiki inimai,” fatiroma. Akka fētsa chanīmara fakī, Niospa yoiāi keskara aki, nāfi Nios fe nīpanakakī. <sup>25</sup> Nāskarifiakī nā xotofāke Rahab Nios chanīmara faxō nā israeli rafe ato oneni tsōa ato reteyamanō. Rahab taeyoi chota feromakōi iyopaoni. Mā askapaonixakī, chipo Nios Ifofaax sharakōi ipaoni. Nāskaxō nā israeli rafe Josué ato nīchini Jericó anoāfo ato ōitanōfo onexō. Nā rafe Rahab ato oneni tsōa ato reteyamanō. Nāskaxō ato fai fētsa nīchini fotanōfo. Nāskakē nā xotofake Rahabki Nios inimani.

<sup>26</sup> Mā nō naano, nōko fero mēsho nomakinoax tsekeano, anā nōko yora shara itiroma. Nāskarifiakī nō Nios Ifofayamakī nō isharatiroma. Nāskaxō Niosxō nō fetsafo nō axosharatiroma. Nāskaxō nō tāpitiro nō Nios chanīmara faimākai.

### 3

#### *Meka shara fisti yoikāfe*

<sup>1</sup> Efe yora mīshtichi, ē mato afara fetsa yoinō. Mā Niospa meka tāpifixō nikasharaxoma mā ato tāpimapaiyamakāfe. Akka nō Niospa meka nikasharaxoma nō ato yoiāito noko nikakaxō akairi afara chakafatirofo. Nāskakē Niospa ato omiskōimafiakī, ato omiskōimasharanima. Akka nokoroko omiskōimakī finai. Nāskakē Niospa meka nikasharaxoma nō ato yoitiro. <sup>2</sup> Akka fake yome rama finipai paketiro kerex sharaxma. Nāskarifiakī nōko mekapa nō afara chakafatiro, Nios Ifofasharaxoma. Akka fētsa meka chaka yoikīma meka shara fisti yoifafāini nā keskaratokai afaa fetsa chakafaima āa kexemesharatiro. Akka shara ifiakani tsoa shara imisma, afara chakafamisfo.

<sup>3</sup> Akka shinākapo. Āfe ifāfe āfe kamayo renexiti fatiro. Askatari afara pishta aostatiro. Nāskax a kamakī tsaoax ifo kafāsatiro. Akka kamayo efapafiano nā aostamea pishta āfe yora kexetiro nā kapaiyai ari kanō. <sup>4</sup> Askatari shinākapo. Kanōa efapanāfāfiano āfe fiti pishtafakeshta. Kanōa efapanāfāfiano āfe fīti āfe ifāfe chiataxō nā iyopaiyai ari iyotiro. Faka faipafāfekē, nā iyopaiyai ari iyotiro ifāfe chiataxō. <sup>5</sup> Nāskarifiakī nōko anari efapayamafiano nō yoikī chakakōi nō yoitiro. Nāskarifiakī chii pishta nō kētefaano nefekī chii xoisafatiro. Nāskakī nōko afarafo noko kōatiro. <sup>6</sup> Nāskarari nōko ana pishtafiano, nō chakai mekaino, nōko meka efapatiro. Nāskakē nō yorafo chakana fatiro Satanás noko pāraino.

<sup>7</sup> Akka yoināfo fetsa fetsatapafoya, peyafoya, xōchixaraifori, faka mēra ikafoya nō ifofamatiro. <sup>8</sup> Akka nōko anakai tsōa ifofamatiroma noko nikanō. Nōko anā nō mekai chakakōi imis nō itiro. Nā rono pae keskarakōi. Rono paekapato noko chachiano nō omiskōitiro. Nāskarifiakī nōko anā yora fetsa mekafakī, chakafakī, nō omiskōimatiro. <sup>9-10</sup> Nā nōko ana fistichi nō afara chaka yoitiro. Nāskatari nā nōko ana fistichi nō Epa Nios yoitiro iskafakī: “Epa Niospa, mī sharakōi. Mī nōko Ifo,” ixō nō yoitiro. Epa Niospa keyokōi yorafo onifani āfe ōiti keskara inōfo. Askafixō nō fetsa mekafakī chakafatiro, askafayamakī Niosnoa meka shara nō yoitiro. Efe yora mīshtichi, meka sharafekai meka chaka osia shara itiroma. <sup>11</sup> Mai mēranoax faka tsekeai shara itiro, askayamai faka pota tseketiro. Nāskax nōko faka fiti anoax faka pota fe faka shara tseketiroma. <sup>12</sup> Shīko fanax xopaya foaitiroma. Askatari sātera fanax fārāya foaitiroma. Askatari faka fiti anoax faka

pota tsekeaino, faka shara tseketiroma, nō mea shara itiroma. Nāskarifikā yōra āfe shinā mēraxō Jesús shinākī fena afaa chaka shināyotiroma.

### *Nios fistichi noko shināsharamatiro*

<sup>13</sup> Akka fētsa mato mēraxō Niospa meka tāpisharax āfe ōiti keskara shara ikī, nā keskara yōra shara ixō mato axosharafafāitiro. Nā keskara yōra āfe shinā mēra shinākī iskafatiro: “Ē afaayamafixō ē Jesucristoōnoax isharaxō, ē yorafo sharafai,” ixō shinātiro. Askaxō mā noko ōimani Jesús Ifosharafakī. <sup>14</sup> Akka mā isharaxoma, mā fetsafāfe fiaī keskara mā fipaimis, askatari mā finakōia ipaimis, ato finōpaiyanā mā askaino mātō ōiti fekaxtetiro. Nāskax mā isharatiroma. Nā afara chaka fisti mā shinātaifa, askarafo shināi, inimayamakāfe. Anori shināi iskayamakāfe: “Ē Niospa meka tāpishara, ē āfe ōiti keskarakōi,” iyamakāfe. Anori shinākī mā yoisharaima. <sup>15</sup> Mā askara chaka shināito Niospa mato shināmanima. Mā chaka shināi keskara nā Jesús Ifofaafāfema nāskarari shinākani, Satanás ato shināmanaino. <sup>16</sup> Fetsafāfe fiaī keskarari mā fipaimis, askatari mā ato finōpaimis, askafakī nā Jesús chanīmara faafo fe mā feratenāmis. Askaxori mā ato fekaxtefapaimis. Askatari afara chaka fetsa fetsatapapo mā ato amamis.

<sup>17</sup> Akka Niospa noko mēstesharakōi noko shināmasharakōitiro. Nō shara inō, askatari nō fetsafo fe nō mēnāpaiyamanō, tanaimakōi isharakōixō fetsafo nō noisharakōitiro afara axosharayanā, askatari fetsafāfe noko yoipaiyai keskara nō nikakōitiro, askatari fetsafo omiskōiaino nō noiyanā nō axosharatiro. <sup>18</sup> Nō afara fanaxō, āfe fimi nō fitiro mā fimiyano. Nāskarifikā nō isharakōixō a Niospa apaiyai keskara nō shināsharaxō, nō fetsafo shināmasharatiro, tanaima isharakōinōfo.

## 4

### *Niospa fichipaiyaima fichipaiyamakāfe*

<sup>1</sup> ¿Afeskai mā raenā faatanāsharakōimamē? Akka mātō shinā mēraxō afarafo mā chakafapai. Nāskax mā feratenā faatanāpai, ōitifishkiyanā. <sup>2-3</sup> Mā afarafo fipaikī fiamax mā ōitifishkikī finakōikī mā fetsafo meepaiyanā mā retepaitiro. Akka a Niospa mato ināpaiyai mā yōkama. Nāskakē Niospa a mato ināpaiyai mato inātiroma mā yōkayamaino. Nā afama mīshtifo mā apaiyai nā fisti mā shināi, fetsafo shinākima. Askaxō mā afara yōkafiaito Niospa mato ināima, mākōimāi mā afarafo fipaiyaito fetsafo inākima.

<sup>4</sup> Akka kēro feneyafix feronāfake fetsafo fe imis keskarakōi māri nāskarakōi. “Jesús ēfe Ifoki,” ifiaxō mā Jesús Ifofakōinama. Nā mā shināi keskara chakakōi. ¿Mā tāpiamamē mā fetsafo feta afara chakafakī, mā Nios noima? A Niospa fichipaiyaima, mā fichipaiax mā Nios fe rafetiroma māmāi noikaspakī.

<sup>5</sup> Niospa āfe Yōshi Shara nō mēra naneano nō afe rafepakenaka. Akka shinākapo. Nō afara fetsa noikōikī nō Nios noisharaimano āfe Yōshi Shara shināmitsatiro. Akka Niospa meka kirikaki kenenifo iskafakakī: “Epa Niospa āfe Yōshi Shara nō mēra naneni. Aōxō noko noikī finakōi. Akka nō Epa Nios noisharayamakī nō afara fetsa noikōiaino āfe Yōshi Shara shināmitsatiro,” ixō kirikaki kenenifo. Nāskakē kaxpa noko kenexonifoma. <sup>6</sup> Askatari Niospa meka kirikaki kenekī iskafanifo: “Fētsa Epa Nios nikakaspakī āa apaiyai keskara fisti aki āa kakapaiyanā, aa keskara fekai, Epa Nios afe rafetiroma, akiki inimaima. Akka fētsa Epa Nios nikapaikī Epa Nios fenai afe isharapakexakī. Nāskakē Epa Nios akiki inimatiro, askara fe Epa Nios rafesharatiro,” ixō kirikaki kenenifo. Nāskakē Epa Niospa āfe Yōshi Shara nō mēra naneano nā fisti nō noikōiaino Epa Niospa noko axosharai nō Ifofasharanō.

<sup>7</sup> Nāskaxō yoikī iskafakāfe: “Epa Niospa, mā amapaiyai keskara ea amafe,” ixō yoikāfe. Akka Satanás mato afara amapaiyaito yoikī iskafakāfe: “Satanás, Jesucristo ēfe Ifokī ea fekaxtefakima, emakinoax katāfe,” ixō yoikāfe. Mā askafaino mato makinoax ichotanō. <sup>8</sup> Nios Ifofasharakāfe. Mā Nios Ifofasharaino mato fe rafei. Nāskakē mātō chaka xatekāfe afaa chakafapaikakima. Akka fētsa Nios Ifofasharapaifikī, Satanásri

ifofapai, askatamaroko, Nios fisti Ifofasharakāfe. <sup>9</sup> Afara chakafaxō shināchakakōikāfe inimakakima. “Ē afara chakafaax ē rāfikōiaito meei,” ixō shinākāfe. <sup>10</sup> Nāskakī Jesús yoikāfe iskafakakī: “Jesús mī ēfe Ifofekē ē mia chakafaki. Ea anā chaka soaxōfe,” ixō yoikāfe. Mā askafaito Niospa mato inimamai. Nāskakē noko yoixii iskafakī: “Ē mia noi. Ē mia anā chaka soaxonō, mikiki inimayanā,” ixō noko yoixii.

### *Fetsaōnoa yoikī chakafayamakāfe*

<sup>11</sup> Niospa meka noko yoikī iskafakī Moisés kirikaki keneni, Niospa shināmanaino, “Nōinā faatanākāfe,” ixō noko yoini. Nāskakē fetsafo pārayamakāfe, ato chakafakī mekafayamakāfe. Mā ato chakafakī Niospa noko yoini keskara mā akima ato noikīma. Akka, “Niospa meka chakara,” nō fatiroma nikakaspakī. Askatamaroko nō nikakōisharatiro. <sup>12</sup> Nios fistichi noko yoini afeskax nō isharatiromākī, ares fistimāi xanīfokōixō. Ares fistichi tāpikōia nō afe keskara ikamākī, shara iyamai chaka nō ikamākī. Ares noko ifitiro. Akka noko ifiyamakī omiskōipakenakafo mēra noko potatiro. Nāskakē fetsafo pārayamakāfe.

### *Mā kai tāpiama a inōpokoai afe keskara iximākai*

<sup>13</sup> Meka fetsari ē mato yoipai. Ea nikakapo. Mā kai afaa tāpiama fatora penata afara afeskara ifiatio mā yoimis iskafakī: “Na penata nō kayamai, penama nō kai pexe rasi ano. Anoxō nō xinia fisti akikai. Anoxō nō kori ichapa fixii nōko afarafo minixō,” ixō mā yoimis. <sup>14</sup> Nāskakē anorima mā shinākōimis. Mā kai afaa tāpiama fatora penata afara afeskara afiaino. Akka fakishpari nai nifi keyopaketiro. Nāskax yamarisatatiro. Nāskarifiāi nō nīpanakama. Fatora penata nō narisatani. <sup>15</sup> Nāskakē mā yoitiro iskafakī: “Niospa fichipaiyai keskara ē iki. Nāskakē nā apaiyai keskara ē aki,” ixō yoikāfe. <sup>16</sup> Askatamaroko mā kakapaikōimis. “Ē afara ichapa fii,” ixō mā yoifafāini. Niospa mato amapaiyai keskara mā shināima. Nā mā shināi keskara chakakōifo. <sup>17</sup> Niospa mato amapaiyai keskara mā tāpifixō mā askara atama mā afarafo chakafamis.

## 5

### *Nā afama mīshti ichapayafō Santiago ato yoini*

<sup>1</sup> Nikakapo kori ichapayafāfe, mato Niospa omiskōimaxii. Nāskakē oiakāfe mā mā omiskōixikai. <sup>2</sup> Māto afama mīshtifo mā payokomea. Māto rapati sharakōifo mā nakaxfāfe pikī keyoa. <sup>3</sup> Māto kori mā mekemis mātonā fisti mā fapaikī. Mā mekeaino mā xinina. Nāskakē fetsafāfe tāpitirofo māto kori mā mekea mā xininaano, tsoa pishta ināxoma, mātonā fisti mā fapaikī. Mā askafaito Niospa mato ōi. Akka mato yoikī iskafaxii: “Māfi afara fishkomītsamiskī. Mā kai tsoa noimisma. Nāskakē ē mato omiskōimaxii,” ixō yoixii. <sup>4</sup> Shinākapo. A mato yonoxomisfo mā ato afaa ināsharamisma, mā ato feparamis finōmafāi fifiakī. Nāskakē Epa Nios yoimisfo iskafakakī: “Epa Niospa, noko axōfe nōko patoronō noko kopifamismakī,” ixō yoimisfo. Askafafono Niospa ato nikamis. Akka a mato yonoxomisfo mā ato omiskōimanai keskara Niospa mā tāpikōia. <sup>5</sup> Askatari mā afama mīshtifoyax mā isharakōia, afaa yopatama. Afama mīshti ichapayata, ichapa pifāi, rapati ichapayata, nā afarafo mā fipaiyaifo mā fifiaxō fetsafo mā noimisma. Fetsafo keskarama mā isharakōikē, Niospa mato omiskōimakī finakōixii mā fetsafo noiyamaito. <sup>6</sup> Fetsafāfe afaa chakafayamafiakē mā ato pāramis xanīfo yoikī, xanīfāfe ato retemanō. Nāskatari āakai afeskax ifimetirofoma a yorafo.

### *Omiskōifikī tenekāfe, Nios kīfikāfe*

<sup>7</sup> Efe yora mīshtichi, mā omiskōifi fena fenayamakāfe. Nōko Ifo kachikiri fayamakāfe. Akka nō tarepa xiki fanano fenāmāshta foaitiro. Nāskakē nō fena fenakima. Nō oi

manayotiro. Akka mā choshiano nō fisharakōitiro foaisharano. <sup>8</sup> Nāskarifikī manasharayokāfe nā nōko Ifo Jesús chaima nokoaitīa. Nāskakē āfe meka kachikiri fakākima, nikasharakāfe shināchakakākima.

<sup>9</sup> Efe yora mīstichi, feratenāyamakāfe Niospa mato omiskōimayamanō. Nā nōko Ifo Jesús chaima nokoaitīa nā yora chakafo ato omiskōimaniyoi. <sup>10</sup> Efe yora mīstichi, ē mato yoisharapai, shinākapo. Niospa meka yoimisfo Niospa meka yoikani omiskōipaonifo. Omiskōifikani fena fenapaonifoma. Nōko Ifo nikaki finakōipaonifo. Āfe meka yoikī enepaonifoma. <sup>11</sup> Nāskakē Nios atoki inimani. Askatari nōko xini Job omiskōifikī teneni. Omiskōifikī Nios potanima. Nāskakē Nios Jobki inimani. Nāskakē Niospa Job sharafarisafatani. Nāskatari Niospa Job āfe fake fetsafoya āfe ina fetsafori ichapa anā ināni. Nāskakē nōri nō Job shinākī nō tāpisharatiro Niospa noko noisharakōiaito.

<sup>12</sup> Efe yora mīstichi, ea nikasharakapo ē mato yoinō. Afara chanīma fisti yoifafāikāfe. Nāskakē, “Ēje, ē mia axōi,” ixō axosharakāfe. Akka mā yoikī iskafakī: “Maa. Ē mia axōima,” ixō anori yoita ayamakāfe. Mā askafamiskē keyokōichi tāpitirofo mā chanīkima yoimiskē. Nāskakē iskayamakāfe: “Ē mia pāraito, Epa Niospa ea omiskōimatiroki,” ixō yoiyamakāfe Epa Niospa mato omiskōimayamanō.

<sup>13</sup> Fetsa omiskōikī Epa Nios kīfitiro kexesharanō. Askatari fetsari inimai fanāitiro. “Aicho Epa Niosi, mī fāsi sharakōi,” ikax fanāitiro. <sup>14-16</sup> Askatari nā isinī ikaito Jesús chanīmara faafo āto kexemisfo kenatiro Nios kīfixonōfo. Nāskakē ichanākaxō a isinī ikai Nios kīfixoxikakī. Taefakī a mā afarafo chakafamis kāimakāfe. Nāskax mā ranā Epa Nios kīfinōnākāfe mato chaka soaxonō, askatari a isinī ikairi sharafanō. Nāskakē a isinī ikai xiniyaxō femākāfe, Epa Nios kīfixoyanā. Mā nōko Ifo chanīmara fakōixō nōko Ifo mā kīfixonaino, nōko Ifāfe a isinī ikai sharafatiro. Askatari afara chakafaino Niospa āfe chaka soaxotiro. Nō Epa Nios chanīmara fakōita nōko chakafori keyokōi kachikiri faxō nō kīfiaito noko nikakōitiro. Nō yōkai keskara noko afama mīshti axotiro.

<sup>17</sup> Nā Nios yoimis āfe ane Elías feronāfake noko keskarari ini. Nāskaxō Epa Nios fāsikōi kīfiaino oi inima. Kīfikī iskafani: “Epa Niosi, efe yorafāfe mia kachikiri faafokī, fena oi imayamafe, efe yorafāfe anā mia Ifofayonōfo,” ixō yoini. Askafaino xinia tres ata mā xinia fistiri keyoaino oi inima. <sup>18</sup> Askata anā Elías Epa Nios kīfini oi inō. Nāskakē oi ranā ikaino fanafō foaisharani.

<sup>19-20</sup> Efe yora mīstichi, fētsa Niospa meka kachikiri fakī anā Jesús Ifofaimano, nā Jesús chanīmara faato yoikī iskafatiro: “A mī afara chakafamis xatefe, anā Jesús Ifofaxii,” ixō yoiaino anā Jesús Ifofatiro. Nāskaxō fētsa mā āfe chakafo xatemanano, Niospa āfe chaka soaxoxii. Nāskakē nā feronāfāke afara chakafapaoni Niospa āfe chaka soaxō, anā Niospa shināchakaima fētsamāi taefakī āfe chaka xatemanano. Nāskakē a omiskōipakenakafo mēra kaima. Nāskakēri mā ato yoisharatiro anā Jesús Ifofanōfo. Nā tii.

*Santiago*

## Pedro Jesús Chanĩmara Faafo Kirika Kenexõ Fomani

### *Pedro Jesús Ifofafo paxkanãnifono ato kirika kenexõ fomani*

<sup>1</sup> Ëkĩa Pedro. Jesucristo ea nĩchini aõnoa ã ato yoimis inõ. Niospa mato katonĩ afe yorafo mã inõ. Akka mato potaifono mã Jesúsnoax paxkanãnino ã mato kirika kenexõ fomai mã tãpinõ. Ponto anoafõ fomata, Galacia anoafõ fomata, Capadocia anoafõ fomata, Asia anoafõ fomata, Bitinia anoafõ fomata, ã mato fomai. <sup>2</sup> Epa Niospa taefakĩ mato katonĩ mã afe yorafo inõ, ãfe Yõshi Sharaõxõ nã mato amapaiyai keskara mã anõ, mã Jesucristo nikasharakõinõ. Akka ãfe Fãke Jesús mato nãxoni ãfe imiõxõ mãto chaka mato soaxoxiki. Niospa mato noikĩ mãto õiti mato sharafaxonõ ixõ ã matoõnoa shinãi.

### *Jesucristoõnoax nõ Nios fe ipaxatiro*

<sup>3</sup> Nãskakẽ nõko Ifo Jesucristo ãfe Apa Nios nõ aicho fatiro: “Mĩ fãsi sharakõi,” ixõ nokomãĩ noikõĩaino ãfe Fake Jesucristomãĩ nõkoõnoax naax anã otonikẽ. Nãskaxõ fake yome rama kãia keskara shara noko imai õiti fenasharayakõi. Nãskakẽ nõ afe isharakõipakenaka. <sup>4</sup> Nãskaxõ noko ĩkisharapakenaka nõ afe ipaxanõ. Akka nõ ãfe fakekẽ nã nai mẽraxõ noko mekexona nõkonãri ixii. Nã Niospa noko mekexona afanã afeskafatiroma, chakanari atiroma, askatari keyotiro. Charofo keskarama. Charofo sharashtafix chipo otsi fetsetiro. Nãskakẽ nãfo Niospa noko mekexona nõkonã inõ. <sup>5</sup> Akka mã Nios chanĩmara fakẽ, Epa Niospa ãfe sharaõxõ mato kexesharafafãini nã Jesús oaitĩã mã omiskõinõma, nã oaitĩã afe isharpakexakĩ a mato itipinĩshara faxoni ano.

<sup>6</sup> Nãskakẽ mã inimai finakõikakaini, omiskõifi nono mai anoax. Mã omiskõifix chipo Jesús fe mã isharakõipakenaka. <sup>7</sup> Akka mã Jesucristo chanĩmara fakõini mã oa oro keskara. Akka kooaito mã õitiro orokõimãki, chakaya osiyamaito. Nãskarifiakĩ Niospa noko tãpitiro nõ chanĩmara faimãkai, akka oro sharafiano nõroko finõinĩfofana. Akka nã oro sharafix keyotiro. Akka mã Epa Nios chanĩmara fasharakõiyana mã Jesús potayamaino Jesús anã nãmã matoki fotoax inimasharakõixii. Iskafakĩ mato yoixii: “Aicho, mĩ ea chanĩmara fakõimis. Mĩ efe isharakõipakenaka,” ixõ mato yoixii.

<sup>8</sup> Mã Jesucristo noisharakõi õiyamafikatsaxakĩ. Askatari iskaratĩã mã chanĩmara fakõini õiyamafikatsaxakĩ. Nãskakẽri mã inimai finasharakõiyana mã tsoa yoisharatiroma. <sup>9</sup> Nõmãĩ chanĩmara fasharakõiax, nãskax nõ afe isharakõipakenaka.

<sup>10-11</sup> Nã Niospa meka yoimisfãfe a inõpokoai yoikakĩ Cristoõnoa meka shara yoipaonifo, Niospa Yõshi Sharapa ato shinãmanaino. Iskafakĩ yoinifo: “A noko noikĩ noko ifimis nokoki oxii, mato omiskõioxoxiki mã aõnoax isharanõ,” ixõ kenenifo. Ato askafafiaino tsõa tãpisharapaonima afeskaxoma tãpisharapaonifo. ¿Tsoamẽ noko ifimis ixiai afetĩari oximẽ? ixõ shinãpaipaonifo. <sup>12</sup> Akka Niospa Yõshi Sharapa ato tãpimani a inõpokoai yoiaifo keskara, akka afãfe niyokaxõ õiyonifoma. Akka afãfe õiyamafiaifono mãroko mã mã õia. Akka na meka shara Jesucristoõnoa keyokõichi mã nõ nikamis. Noko yoiaifãfe Epa Niospa ãfe Yõshi Shara atoki nĩchini nai mẽraxõ Jesucristoõnoa noko yoinõfo. Nã mã nikamis keskarari Niospa ãjirifãferi tãpipaikõikani.

### *Epa Niospa noko yoini Jesucristo keskara shara nõ inõ*

<sup>13</sup> Nãskakẽ itipinĩsharakãfe shinãsharakõiyana. Nã Niospa noko noikĩ noko afara shara inãxiatĩã Jesucristo oaino. Nãskakẽ manasharakõikãfe. <sup>14</sup> Mãfi Niospa fakefoki. Nãskakẽ Epa Nios nikasharakõikãfe. Mato amapaiyai keskara mã tãpiyopaonima. Mã afara chakafapaoni keskara anã ayamakãfe. <sup>15</sup> Askatamaroko afaa fetsa shinãtama isharakõikãfe. Akka Nioskai afaa chakaya osiama. Niospa mato katonĩ a keskara shara mã inõ. <sup>16</sup> Akka Niospa meka kenekĩ iskafanifo Niospa ato shinãmanaino: “Ë isharakõimiski. Nãskakẽ isharakõikãfe,” ixõ Niospa ato shinãmanaino kenenifo.



<sup>17</sup> Shinākapo. Mā Epa Nios kīfikī Epa mā famis. Nāskax nō āfe fakefokē noko ōi. Akka a āfe meka nikamisfo Niospa ato shara fai. Akka a nikamisfoma ato omiskōimatiro. Ares fisti Epa Niospa noko ōimis mēstekōi. Nāskakē isharakōikāfe nono nāmānoax. Nāskaxō Nios shināsharakāfe meseyanā. <sup>18</sup> Akka mātō xinifāfe mato tāpimapaonifo keskarato mato nimapakexatiroma. Mātō xinifo Nioski mesepaonifoma. Āakōi ipaonifo. Nāskakē māri ato keskara ipaoni chaka shināi. Mā askaito Niospa mato ifini mā anā chaka shināyamanō a mā ipaoni keskara Nios shināmax. Akka shinākapo. Mā mā tāpia a oro sharakōi mā Nios ināx mā aōnoax nīpaxatiroma. Askatari kori exe mā ināx aōnoaxri mā nīpaxatiroma. <sup>19</sup> Akka Cristo fistichi noko nimatiro. Atokai afaa chakafamisma, nā oveja fake meema keskara sharakōi. Jesús noko nāxononi āfe imi foni noko imasharapakexakī nō anā chaka inōma. <sup>20</sup> Epa Niospa mai onifatama āfe Fake Jesús katonni noko nimapakexanō. Nāskafekē fetsafāfe tāpiyopaonifoma, akka iskaratīa Epa Niospa mā mato tāpimana. <sup>21</sup> Jesucristoōxō mā Epa Nios chanīmara fai, Epa Niospa Jesucristo otoax akiki inimakōini. Nāskakē mā iskaratīa chanīmara fakōini, Nios manakōiyanā afe ipaxakī.

<sup>22</sup> Akka mā mā Jesucristoōnoa meka shara nikakōixō anā afaa chaka shināyamakī. Mā mā isharakōixō mā fetsafo noikōi. Nāskakē māa ranā nōinā faatanāsharakōikāfe mātō shinā sharafoyaxō shināsharakōita. <sup>23</sup> Nāskakē nā mā rama fake kāia keskara shara mā. Akka mātō epa feta mātō ēfa mato fake fifiakanax chipo natirofo. Akka Niospa āfe meka sharaōxō fena keskara shara noko ima, nā keyonakama. <sup>24</sup> Akka kirika ano kenekī iskafanifo:

Keyokōi yorafo fana keskarato, sharakōifikanax nā charofo keskarato. Akka nā fanafo naino āfe charofo keyopaketiro. Nāskarifiā keyokōi yorafo nīpaxatirofoma, keyokōi natirofo. <sup>25</sup> Akka nōko Ifāfe āfe mekakai keyonakama, ixō kenenifo. Nā mekaōnoa Jesucristoōnoa fetsafāfe mato yoimisfo mā afe ipaxanō.

## 2

<sup>1</sup> Nāskakē nā mā afara chakafamisfo xatekāfe. A mā ato pāramisfo, askatari a mā ato feparamisfo: “Noko sharara fanōfora,” ixō nāfori xatekāfe. Nāskatari a fētsa fiaī tii fipai fekaxtemis iyamakāfe. Askatari fetsafo ato chakafapai chanīmis iyamakāfe. <sup>2-3</sup> Askatamaroko nā fake rama kāiato yosixiki chocho apaiyai keskakakī, māri Niospa meka shara fichipaikāfe, oa fake yomē chocho aki yositiro keska shara ixikakī. Mā mā tāpiaiki nōko Ifāfe mato shara faxōaito. Nāskakē nā Epa Niospa mato amapaiyai keskara fisti akāfe.

### *Cristo nā tokiri mitsisipa keskaraki*

<sup>4</sup> Nō peke fakī tokiri mitsisipasharakōi nō fenatiro, peke mitsisipa sharakōi inō. Akka tokiri mitsisipakima nō peke faano peke shara itiro. Nōko Ifo Jesucristofi nāskarakī oa tokiri mitsisipakōi keskara shara. Nāskaxō afama mīshti fatiro. Nāskafekē tsōa chanīmara famisma, nōko Ifo fichipaimisfoma. Nāskaxō yoimisfo iskafakakī: “Afeskakīkai nō fichipaitiroma,” ixō yoimisfo. Akka Epa Niospa Jesús katonni noikōikī nōko Ifo inō. Nāskakē akiki fekāfe Ifofaxikakī. <sup>5</sup> Nāskarifiakī Niospa mato tokiri pexefā keskara faxii mā afe yorafokē. Askatari mā ato Epa Nios kīfixomis inō mato imaxii afaaya osiama sharakōi mā inō Jesúsnoax, Jesúsmai noko nāxonikē. Nāskakē Nios aicho fakāfe akiki inimakōikāfe, “Epa Niosi, mī fasi sharakōi,” fayanā. <sup>6</sup> Akka kirika ano kenekī iskafanifo, Niospa ato shināmanaino:

Ōikapo, ē Cristo ōia ares fisti sharakōi. Nāskakē ē katonni efe yorafo afe yora inōfo. Nā tokiri mitsisipa keskarakōiki. Nāskakē afe yorafo afe isharakōipakenakafo. Nāskakaxō Cristo chanīmara fakaxō anā afaa chaka shināpakenakafoma. Askatamaroko afe inimakōipakenakafo, ixō Niospa yoini.

<sup>7</sup> Nāskakē nō Jesús Ifofaxō nō shinākī iskafatiro: “Jesúsfi nā tokiri kerex keskarakōikī, nāskax sharafinakōiaki,” ixō nō shinātiro. Akka a Jesús Ifofaifāfema askara shinākanima: “Oa tokiri shara nō potatiro,” keskafakani. Akka aōnoa yoikī kirika kenekī iskafanifo Niospa ato shināmanaino:

Oa tokiri pexe famisfāfe tokiri efapa shara potafono, pexe ifāfe ato yoitiro iskafakī: “¿Afeskakī na tokiri efapa mā potaimē? Potayamakāfe, efapa sharaki. Ē fichipaikai ē akiki pexe fanō,” ixō pexe ifāfe yoitiro, ixō yoinifo Jesúsnoa yoikakī. <sup>8</sup> Askatari kirika kenenifo iskafakakī Niospa Yōshi Sharapa ato shināmanaino:

Tokiri efapafai nēxpakīa rakano tsōa ōiamax akiki otisikaini paketirofo keskakani. Nāskarifiakani tsōa nōko Ifo chanīmara fakanaxma, oa pakeai keskarakanax fenokanax Epa Nios ika ari fopaifikani nā omiskōipakenakafa mēra fokani, ixō kenenifo. Niospa anori yoifinino Cristoōnoa nikayamakanax fenopakenakafa. Nānori kirika kenenifo, Niospa ato shināmanaino.

<sup>9</sup> Akka māfi askaramakī. Niospa mato katonni afe yorafo mā inō. Nāfi nōko Xanīfokōikī mā yonoxotiro, fetsafori mā ato kīfixotiro Jesúsnoa ato tāpimaxiki. Noko aa keskara shara imaino mā afe yorakōi itiro. Nāskaxō aōnoa fetsafo mā yoisharatiro iskafakī: “Epa Nios sharafinakōia afara noko sharafaxomis,” ixō nō ato yoitiro. Epa Niospa mato katonni afe yorakōifo ikax xafakīakōi shara mā afe ipaxanō, anā fakish mēra ika keskara mā inōma. <sup>10</sup> Akka māakai Nios shināyopaonima, afe yorakai mā iyopaonima. Akka iskaratīa mā afe yorafo, taeyoi Niospa mato noifiaino mā tāpiyopaonima. Akka iskaratīa mato noikōiaino mā mā tāpia.

### *Nō Niospa yorafo ikax nō shara itiro*

<sup>11</sup> Efe yora mīshtichi, ē mato yoisharapai ea nikasharakāfe. A Nios Ifofaafomafo fe nō ato fe ikax oa yora fetsa keskara nō iki. Askafax nōkai ato fe ipanakama. Akka nōroko Epa Nios fe ĩpanaka. Nāskakē nā Epa Nios Ifofaafoma keskara iyamakāfe. A mato shināmapaiyai fo keskara shināyamakāfe. Mā ato keskara itiroki, Satanās mato chakafamapai kiki. <sup>12</sup> Nāskakē ato mēranoax Jesús Ifofaax isharakōikāfe. Akka afāfe mato yoikī chakafamisfo fanīrira mato mekafakakī. Nāskakē ato kopiyamakāfe. Tanaimakōi ato mēra ikāfe. Mā askaito mato ōinōfo mā afaa chakafatama mā isharakōikē a Niospa keyokōi noko ichanāfaitīa mā mai keyoaino. Nāskakē mato iskafakani: “Aicho, na yorafo fāsi sharakōifo, nō ato chakafafiaino noko kopikanima, Niosxō noko shara famisfo. Fāsi Nios sharakōi,” ixō yoinōfo.

<sup>13-14</sup> Nōko Ifo Jesús fichipaiyai keskafakī, xanīfofo nikasharakōikāfe. Askatari a noko ĩkinā nōko xanīfo finakōia nikasharakōikāfe. A xanīfo fetsafori ato nikakāfe. Nā xanīfo finakōiato ato xanīfo imakī, afāfe nā afara chakafai fo ato omiskōimanōfo, askatari a afara shara famisfo ato yoisharanōfo. <sup>15</sup> Nāskakē Niospa fichipaiyai keskafakī mā fetsafo afara shara faxōfafāikāfe. Nā afaa tāpiamafāfe shara shināmisfomakī, askatari Niospa meka tāpiafomakī ōikaxō anā mato mekafatirofoma māmāi ato shara faxōaito a Niospa fichipaiyai keskafakī.

<sup>16</sup> Jesús fisti māto Ifokōi, akka afaa fetsa shinātama isharakōikāfe. Niospa mato amapaiyai keskara fisti shinākāfe. Mā askax afaa fetsa māto ifo itiro. Afaa chakafatama Nios yonosharaxōfafāikāfe. <sup>17</sup> Nāskakē keyokōi yorafo shināfafāikāfe. Nā Jesús Ifofaafori ato noikōikāfe. Niosnoa shinākōikāfe iskafakī: “Ē Nios noikōi nā ea yoiai keskara ē nikakōi. Ēkai nikayospapaima ea omiskōimanōma,” ixō Niosnoa shinākāfe. Nāskaxō māto xanīfofo nikakaspayamakāfe, ato nikasharakāfe.

### *Cristo noko omiskōixoni keskai nōri nō aōnoax omiskōitiro*

<sup>18</sup> Ato yonoxomisfāfe māto xanīfofo ato nikasharakōikāfe. Nā mato sharafai fo shinākakīma. Nā yora chakafāferi mato yonomamisfoki ato nikakāfe. <sup>19</sup> Mā afaa

chakafayamafiakē mātō xanīfāfe mato omiskōimanaino Nios shināki tenekāfe. Mā askaito Epa Niospa matoōnoa yoisharai kiki. <sup>20</sup> Akka mā afara chakafakē mātō xanīfāfe mato omiskōimanaino, Niospa mato iskafakī yoitiro ma mā teneaito: “Mī afara sharakōifaa,” ixō mato yoitiro ma māmai afara chakafakē. Akka mā afara sharafaino mato omiskōimanaifono mā omiskōifināfikī mā tenekē, nōko Ifo Niospa matoōnoa yoikī: “Sharakōifo,” mato fatiro. <sup>21</sup> Cristo nokoōnoax omiskōikōini, nāskakē nōri aōnoax nō omiskōitiro. Nāskax nō aa keskara shara itiro. <sup>22</sup> Cristokai afaa pishta chakafamisma, askatarikai tsoa pishta pāramisma. <sup>23</sup> Fetsafāfe mekafakakī ĭchafiaifono, atorikai kopikī tsoa ĭchamisma. Askatari omiskōimanaifono, “Ēri mato kopixii,” ixō ato yoinima. Askatamaroko Apaōnoa shinākī iskafani: “Epa, mī eōnoa tāpiaki. Nāskarifikī mī ato tāpikōia. Nāskakē a mī ato chipo omiskōimaxiai chanīmakōi,” ixō Apa shināni, Apamāi mēstekōi ikē. <sup>24</sup> Cristo cruznoax noko nāxoni, nōko chaka noko soaxoxiki. Nāskakē nō anā fanīrira shinātiro oa yora naa keskara nō itiro mā noko chaka soaxonano nō afe isharpakexanō. Māraki yora naato afaa shinātiro. Nāskax mēstekōi nō isharakōitiro. Nā noko omiskōixoniōnoax nō isharakōipakexanō. <sup>25</sup> Akka mā taeyoi oa oveja fenoa keskara mā iyopaoni afara chaka shināi. Akka iskaratīa mā Cristo Ifofasharakōi, mato kexesharano oa oveja kexemisto āfe oveja kexetiro keskafakī. Nāskaxō mato kexesharakōiaino mā afe yora iki.

### 3

#### *Afeskax fene fe kēro isharatirofomāki Pedro ato yoini*

<sup>1</sup> Nāskarifikī māri kērofāfe, mātō fenefo nikasharakōikāfe. Nā Niospa meka shara chanīmara faifāfema mā isharaite mato ōikakī Niospa meka shara chanīmara fanōfo, mā afaa yoiyamata mā isharakōiaite ōikakī. <sup>2</sup> Mātō fenefāfe mato yoiāifono ato nikakaspakakīma ato nikasharakāfe. Mā Jesús keskara shara ikaito ōikakī nōko Ifo chanīmara fanōfo. <sup>3</sup> Akka mā samasharakōi safexō, foarome sharakōita, teoti sharakōi safeta, parotameti sharakōi mā safekē, mato tsōa tāpitiroma mā ōiti sharaya iyamai mā ōiti chakayakē. <sup>4</sup> Akka mā Cristo Ifofasharakōixō mā ato ōimasharakōitiro. Mātō ōiti mēraxō shināsharakōita, meka mitsisipato mā ato yoitiro ma, tanaima sharakōi mā itiro. Fetsafo ōikī ato yoisharakāfe, ato fe isharakāfe. Mā askaito ōikī Niospa mato iskafatiro: “Na kērofo sharakōifo ē ōi,” ixō Niospa mato yoitiro matoki inimayanā. <sup>5</sup> Nāskakanax kērofo ranāri Nios Ifofasharakanax isharakōipaonifo. Nāskakaxō āto fenefo nikakōisharapaonifo. <sup>6</sup> Akka nā Sara āfe fene Abraham nikakōisharapaoni, “Ēfe ifora,” fayanā. Nāskax mā isharakōiax, askatari mā meseyamax Sara āfe fenafo keskara mā itiro.

<sup>7</sup> Akka māri feronāfakefāfe, mātō āfiffo ĭkisharakōikāfe. Nā kērofokai mitsisipafomakī mato keskara. Nāskakē ato kexesharakāfe, mato feta Nios Ifofaafoki Niospa ato noikī atori ifiakī afe ipaxanōfo. Nāskakē mātō āfiffo ato noisharakāfe. Mā ato noiamax ato kexesharaxoma mā kifiaite Niospa mato nikasharatiroma.

#### *Afara ato sharafaxōkani omiskōitirofo*

<sup>8</sup> Nāskakē isharakōixō keyokōichi nānori fisti shināsharakāfe. Oa mato fe yora mā noiai keskafakī ato fe nōinā faatanāsharakōikāfe. Ato shinākī ato axosharafafāikāfe. Askatari, “Nā yora afaa tāpiamafo ē finakōia,” ikaifo keskai askayamakāfe. <sup>9</sup> Fētsa mato chakafaito kopiyamakāfe. Askatari mato ĭchaito kopikiri ĭchayamakāfe. Askatamaroko ato noisharakāfe, akka Niospa noko katonikī noko sharafakī. <sup>10</sup> Niospa meka yōra kenekī iskafani, Niospa Yōshi Sharapa shināmanaino:

Mā isharaaikī afara chakafo yoiyamakāfe, fetsafo pārayamakāfe. <sup>11</sup> Afara chakafo fishtayamakāfe, ato makinoax fotakāfe. Askatamaroko afara sharafos akāfe. Afeskax mā isharatiro mākī nāskax isharakōikāfe fetsafo fe. <sup>12</sup> A Niospa meka

nikasharakōipaiyaifono Niospa ato kexesharakōifafāini, kīfiaifāferi ato nikakōimis. Akka a afara chakafamisfo Niospa ato nikatama ato tāpimatiro ato chakafakī, ixō yorafāfe Niospa mekaōnoa kenenifo.

<sup>13</sup> ¿Mā afara ato axosharaino, akka tsōa mato chakafatiromē? <sup>14</sup> Akka mā askafiaino mato omiskōimanaifono inimai finasharakōikāfe. Nāskakē atoki meseyamakāfe, askatari shināchakayamakāfe. <sup>15</sup> Askatamaroko nōko ōiti mēraxō nōko Ifo kīfikī iskafakāfe: “Cristo, mīfi ēfe Ifokōiki. Mīkai afaa chakafamisma, mī sharakōi,” ixō yoikāfe. Askatari fetsafāfe mato iskafaifāfe: “¿Afeskaxō mī tāpiamē mī Nios fe ipanaka?” ixō mato yoiaifāfe ato yoixikakī ikisi itipinīsharakāfe ato tāpimasharaxikakī. <sup>16</sup> Akka māroko isharakōita ato nikasharakōikāfe, mato ōinōfo mā shara ikaito. Māto ōiti fekaxtefayamakāfe. Akka mato chakafakī mekaifaifāfe iskafakī mato yoikanax: “Na Jesús Ifofamisfāfe afara chakafamisfo,” ixō mato yoifikanax rāfitirofo māmāi isharakōikē. <sup>17</sup> Akka nō afara shara faino fetsafāfe noko omiskōimanaifono nō teneaino Epa Nios nokoki inimatiro. Akka nō afara chakafaax nō omiskōiaino nokoki inimatiro.

<sup>18</sup> Akka Cristo nokoōnoax omiskōiax nani nōko chaka noko soaxoxiki. Anākai nanakama nai fistini. Sharakōifiano retenifo. Akka nō chakakōifokē noko nāxonni. Apa Nios ano noko imapakexakī. Akka mā nafiax āfe fero mēsho nanima, anā otoni Apa Yōshi Sharaōnoax. <sup>19</sup> Akka mā naax āfe fero mēsho Niospa Yōshi Sharaōnoax a namisfo mēra kayoni a tsoa tseketiroma ano, anoxō yoikai. <sup>20</sup> Akka nāfo nayokanaxma taeyoi nikayospakōi iyopaonifo. Nāskaifono Noéri nāno ato fe iyopaoni. Nāskakē Epa Niospa Noé manayopaoni kanōanāfā fayofaino, Noémāi Epa Nios Ifofakē. Āfe fakefori afe inifo, āto āfiffo fe. Ocho inifo. Nāskakē ato fāka āsanima Epa Niospamāi ato kexesharakē. Akka nā nikayospafo ato fakafānē āsakī mitoni. <sup>21</sup> Faka faipafāino kanōanāfā mēra ikiax Noé āfe āfi fe āsanima. Āfe fakefori āto āfiffo fe afe ikikanax āsanifoma. Ocho inifo. Nāskarifiakī fētsa noko maotisafakī faka mēra noko ikimaxō, noko fininīfofanaino nō yorafo ispai nō Jesús Ifofakī nōko chaka noko soaxonō nō afe ipaxanō. Akka nā noko maotisafafoōxokai nōko choshta nō soatiroma. Askatamaroko nō Nios yōkai nōko chaka noko soaxonō noko ikipakexanō Jesúsmāi mā naax anā otonikē. Nāskaxō nō anā shināchakatama Jesucristoōxō nō shināsharakōi Nios fe ipaxakī. <sup>22</sup> Jesús Apa ari nai mēra kani Apa Nios fe xanīfokōi ixiki. Nāskakē ājirifāfe āto xanīfofofāfe Jesús finōtirofo nā yōshifāferi. Askatari nā yōshifāferi xanīfofiakaxō Jesús finōtirofoma Jesúsmāi finakōikē.

## 4

### *Epa Niospa noko āfe shara ināi keskafakī fetsafori nō sharafaxotiro*

<sup>1</sup> Nāskakē nā Cristo āfe yora omiskōini keskai, māri nāskai omiskōixikai itipinīsharakāfe. Akka nā omiskōiato anā afaa chaka shinātiroma māmāi āfe chaka xatexō. <sup>2</sup> Isharakōixō nā mā apaiyai keskara mā atiroma, nā Niospa mato amapaiyai keskara mā atiro. <sup>3</sup> Mā xini ichapa finōa, nā Jesús Ifofaafāfema apaonifo keskara mā ayopaoni. Nā mā afara chakafapaiyai keskara fisti mā ayopaoni. Māto āfimafo mā fichipaipaoni. Kērofori askapaonifo. Askatari mēxotaima mā pāepaoni, ato fe ichanāx afarafo chakafayanā ayakī finakōiyānā. Askatari afara fetsafo mā noikōipaoni nā Nioskōi noitama. <sup>4</sup> Akka mā anā ato fe rafeyamaxō mā anā ato feta afaa chakafayamaito ōikakī. Nāskaxō mato yoikī iskafatirofo: “Ōikapo. Na yorafāfe anā nofeta afaa akanima,” ikaxō mato chakafakī mekatatirofo. <sup>5</sup> Akka ato askafaifāfe Niospa ato yoixii iskafaki: “¿Afeskakī māto chaka mā xatekaspakī na fetsafo mā ato chakafamismē?” ixō ato yōkaxii. Ato askafata ato omiskōimaxii. A niyoafoya a namisfo Niospa ato omiskōimaxii, tsōa Ifofatama āto chaka xateyamafono. <sup>6</sup> Nāskakē Epa Niospa āfe meka yoimisfo nīchini yorafāfe nayokaxoma Jesucristoōnoa meka shara nikanōfo. Nā namisfāfe niyokaxō nikayopaonifo. Akka mā keyokōi nanifo. Nāskafikē fatora fetsafāfe Jesús chanīmara fakē Epa Niospa nā nia keskara ato imapakenaka afe ipaxanōfo.

<sup>7</sup> Nāskakē meka fetsari ě mato yoinō. Nikakapo. Mā chaima mai keyoi kiki. Nāskakē shināsharakāfe, afaa chaka shinātama. Epa Niospa mato shināmapaiyai keskara fisti shinākāfe. Nāskaxō Epa Nios fisti kīfifāikāfe. <sup>8</sup> Nāskax noinā faatanākōikāfe nō noinākōia sharaki. Fetsa noikōixō nō rae fatiro, a noko chakafai keskara anā shinānōma. <sup>9</sup> Fetsafo mātō pexe ano nokoaito akiki inimayanā mātō pexe anoxō ifikāfe, ato mekafakī chakafaxoma. <sup>10</sup> A Niospa āfe Yōshi Sharapa noko tāpimanai keskafakī nōri fetsafo axosharatiro fetsafāferi Nios Ifofanōfo. Nāskaxō fetsafo afara shara faxokī xateyamakāfe. A Niospa afe yorafo noikōiai keskafakī māri ato noikōikāfe. <sup>11</sup> Mā Niospa meka yoi, nā Nioskōi mekai keskaraōxō ato yoikāfe. Mātō shināmā shināxō ato yoikakīma. Askatari mā Niospa Yōshi Sharaōxō mā afarafo ato shara faxōfaito ōikakī yorafāfe iskafakī yoitirofo: “Aicho, Epa Nios sharakōi. Āfe Fake Jesucristoōxō afama mīshtifo fatiro,” ixō yoitirofo. “Epa Niospa ares fisti afarafo shara famis, atokai afaa chakafapanakama. Ares fisti āfe Yōshi Sharaōxō afama mīshti fapanaka,” ixō yoinōfo.

### *Nō omiskōifikī nō tenetiro nōmāi Jesucristo chanīmara fakī*

<sup>12</sup> Efe yora mīshtichi, omiskōifikī rateyanā shināchakayamakāfe. Mā askaito Epa Niospa tāpitiro mā Jesús Ifokōi fakē. Nāskakī shinākī iskafayamakāfe: “¿Afeskai ě omiskōimē?” ixō anori shināyamakāfe. <sup>13</sup> Askatamaroko inimakōikāfe Jesucristo omiskōiai keskai māri omiskōifikī. Askatari chipo mā inimasharakōixii Jesucristo anā nai mēranoax fotoaino. Nāskakē keyokōichi ōixikani āfe sharafoya nai mēranoax fotokē, nōko xanīfo finakōi ixiki. <sup>14</sup> Akka mā Cristo Ifo shara faino Cristoōxō mato ĩchaifono inimakōikāfe. Nāskakē Epa Niospa āfe sharafoya āfe Yōshi Shara matoya rafemani kiki. <sup>15</sup> Akka fatora mā fetsa mā afaa chakafamiskēma mato omiskōimanaifono tenekāfe inimayanā. Askatari yometsoyamata, askatari afara chakafakī finata iyamata, askatari fetsafāfe afara yoipaiyaifo keskara ato feta ayamakāfe omiskōixikākima. Ato keskara iyamakāfe. <sup>16</sup> Akka nō omiskōi Nios Ifofaax, nāskakē rāfiyamakāfe. Askatamaroko Epa Nios yoikāfe iskafakī: “Aicho Epa Niosi, ě mī Fāke Jesús afe yora. Nāskakē nā chanīmara faafāfema ea omiskōimanaifono ě Jesúsnoax omiskōi. Aicho,” ixō yoikāfe.

<sup>17</sup> Akka Epa Niospa yorafo keyokōi tāpimaniyoi afe keskara ikafomākī. Taefakī noko ōikī taefaiyoi nōmāi afe yorafokē. Akka chipo nā Jesús chanīmara faafomafori ato yoixii afe keskara ikafomākī. Akka iskaratīa nō omiskōiyoi, anākai nō omiskōinakama nō isharakōipakenaka, Epa Nios fe nai mēra. Akka chipo nā Niospa meka nikakaspamisfo omiskōi finakōixikani, afokai anā nīpanakafoma. <sup>18</sup> Niospa meka yoikī iskafakī kenenifo: “Nā Nios chanīmara faifo isharakōimisfo, Nios ari foyokanaxma omiskōiyotirofo. Nāskafikanax mā Nios ari nokokanax anā omiskōinakafoma. Akka nā Nios chanīmara faafāfema afara chakafamisfo nāfo omiskōi finakōipakenakafo,” ixō kenenifo. <sup>19</sup> Nāskakē nā Niospa mato yoiai keskai mā omiskōifikī shināchakayamakāfe. Nāato mato onifaniki. Nāskakē yoikī iskafakāfe: “Epa Niosi, mī ea amapaiyai keskara fisti ě apai. Meres fisti mī ea yoitiro,” ixō yoikāfe. Nāskax isharakōikāfe nā mato yoiai keskara amiski.

## 5

### *Afeskax isharatirofomāki a Nios Ifofafo Pedro ato yoini*

<sup>1</sup> Akka nā Niospa meka nikakani ichanāfono ato kexemisfo, ě mato yoisharapai ea nikasharanōfo. Nāskaxō mātō shinā mēra ěfe meka nanesharakāfe. Ēri nā Jesús chanīmara faafo ě ato kexemiski. Nōko Ifo Cristo omiskōiaito ě ōini. Anā oaino ěri afe isharpakenaka. Tsōa a keskara ōimisma sharakōi keyokōichi ōixikani. Ēri ōixii a keskara sharafinakōia. <sup>2</sup> Nāskakē ě mato yoi nā Jesús chanīmara faafo ichanāfono Niospa mato yoini keskafakī ato kexesharakāfe. Ato Niospa meka yoisharakāfe isharanōfo. Nāskaxō shinākī iskafayamakāfe: “Ooa, ě afara fetsafapaifikī ě Niosxō ato kexei,” ixō shināyamakāfe. Askatamaroko a Niospa fichipaiyai keskafakī ato kexesharakāfe ato noiyanā. Nāskakē, “Ea Niospa ato yoimanaino ě ato yoikaspai,” ixō yoiyamakāfe. Anori

shinātamaroko inimasharayanā Niospa meka ato yoisharakāfe. “Ĕ ato yoiaito ea kori inākani kiki,” ixō shināyamakāfe. Anori shinātamaroko ato Niospa meka yoisharakāfe inimayanā. <sup>3</sup> Nāskata āto xanīfo ipaikakīma ato ōimasharakāfe afeskaxō Jesús Ifofasharax isharatirofomākī. <sup>4</sup> Mā askaito a noko kexemis, nōko Ifo Jesucristo anā nāmā fotoxō mato ōisharaxii. Nāskaxō mato afara shara ināxii a keyonakama. Nāskakē mā afe īpanaka.

<sup>5</sup> Nāskarifiakī māri naetapafāfe anifofo yafi a mato Niospa meka yoimisfo nikakōisharakāfe. Naetapafāfe anifofo fe isharakōikāfe. Nāskata mā ranā axoshara faatanākāfe. “Ĕ xanīfoki,” iyamakāfe. Akka, “A xanīfo nipaikani kakapaimisfoki Nios atoki inimaima. Akka a kakapaimisfomaki Nios atoki inimayanā ato afara axosharai ato noikī,” ixō kenenifo Niospa meka yoikakī. <sup>6</sup> Epa Nios finakōixō afama mīshti famis. Nāskakē kakapaimis iyamakāfe. Anori shinātamaroko iskafakāfe: “Epa Nios finakōia. Ĕ afaa tāpiama,” ixō yoikāfe kakapaimis ikakīma. Mā askaito Niospa ato mǎnǎo mato nīchixii xanīfo keskara mā inō. <sup>7</sup> Askatari afaa shināchakayamakāfe. Afaa shinātamaroko Nios yoikāfe mato kexesharanō. Niospa mato noikī mato kexesharaino anā mǎto ōiti fekaxtefayamakāfe.

<sup>8</sup> Shināsharata mēste shinākāfe. Satanás noko noikaspakī noko chakafapai kiki, oa poomā fonāiki kafāsakī yoinā fenai keskaraxō. Satanás chakata noko afara chakafamapaimiski Niosnoa tsōa shinānōma, Satanás ato chakafamaino afe yora inōfo. <sup>9</sup> Nā mā omiskōiai keskariai nā nōko Ifo chanīmara faa fetsafori maitio anoax omiskōikani. Nāskakē Satanás mato afara chakafamapaiyaito nikayamakāfe. Mǎto Ifo fistiroko chanīmara fakāfe. Afara chakafayamakāfe. <sup>10</sup> Niospa mato noikōikī mato katoni, Cristo ika ari mā afe isharakōipakexanō nā sharafinakōia ano. Nono mai ano mā iyoax mā aōnoax omiskōiyoi. Mā askaino Epa Niospa mǎto ōiti mato kerex faxōi. Nāskaxō afara afeskara afiaino mā tenekōixō mā Jesucristo Ifofasharakōixii. <sup>11</sup> Nāatofi afama mīshtifo fapanakaki. Nā fistichi atiro keskafakī tsōa askafatiroma. Nā fistichi askafāpanaka.

### *Mā mekai xatekī Pedro ato meka shara yoini*

<sup>12</sup> Ĕfi Silvano shinākōimis. Ĕ tāpia nā Niospa amapaiyai keskara amiskē. Akka nā Ĕ mato yoipaiyai anori ea kirika kenexoni. Na kirika ichapama Ĕ mato kenexoni mǎto ōiti mato inimamasharakōixonō mā shināsharakōinō. Ĕ mato yoi chanīmakōi Niospa noko noikōi. Nāskakē nānori fisti shinākāfe fanīrira shinākakima.

<sup>13</sup> Jesús chanīmara faafo ichanāmisfo mēraxō Babilonia anoafāfe mato yoisharakani. Ĕfe fake Marcosri mato yoisharapai. Nāfori Niospa katoni afe yora inōfo, noko akai keskafakī. <sup>14</sup> Māri mā nōinā faatanāi yoinōnāsharakāfe. Mā Cristo yorakōifokī, nāskakē inimasharakōikāfe. Nā tii.

*Pedro*

## Pedro Jesús Chanĩmara Faafo Afianã Kirika Kenexõ Fomani

### *Pedro Jesús Ifofaafo ato kirika kenexõ fomani*

<sup>1</sup> Ëkĩa Simón Pedro, Jesucristo ẽ yonoxomis. Aõnoa yorafo әне meka shara ẽ ato yoinõ ea nĩchini. Nãskakẽ ẽ mato kirika kenexõ fomai, mã mã nõko Ifo Jesús mã chanĩmara fakĩ finakõiano ẽ akai keskafakĩ. Nã nõko Ifo Nios feta Jesucristo noko ifimis nã ẽ chanĩmara famis nãmãisharakõimiskẽ.

<sup>2</sup> Akka Epa Nios yafi nõko Ifo Jesús mã tãpikõikẽ matoõnoa shinãkĩ mato inimamakõikĩ mãto õiti mato inimamaxotiro tanaima sharakõi mã inõ.

### *A Nios Ifofaafo afeskax isharatirofomãki*

<sup>3</sup> Niospa noko katonni a keskara shara ikax nõ afe ãpaxanõ. Nãatofi afama mĩshti fatiroki. Nõ Nios tãpikõikẽ afara nõ yopaito әне kerex sharaõxõ noko inãxii. Nãskaxõ noko amapaiyai keskara nõ anõ. <sup>4</sup> Nãskakẽ noko yoiyoni keskafakĩ әне kerex sharaõxõ afara sharakõifo noko axoxii a keskara sharakõi nõ inõ. Akka a nikakaspaifãfe nã afara chakafapaiyaifo keskara fisti amisfo. Nãskaifono Niospa noko imasharai nõ ato keskara inõma. <sup>5</sup> Nãskakẽ nã mato imapaiyai keskakãfe, chanĩmara faax a keskara sharakõi ikãfe. A keskara sharakõi mã ikaino, Niosxõ mato amapaiyai keskara fisti tãpikãfe. <sup>6</sup> Akka nã mã apaiyai keskara fisti shinãkakĩma, kexemesharax aõnoax isharakõita afara afeskaraino tenekõita Niosnoa fisti shinãfafãikãfe. <sup>7</sup> Askatari keyokõi yorafo sharafata oitsifaxõ ato noifafãikãfe.

<sup>8</sup> Mã askafakĩ nõko Ifo Jesucristo mã tãpikõitiro. Nãskaxõ nã mato amapaiyai keskafakĩ mã yonoxosharakõitiro. <sup>9</sup> Akka mã askafayamai oa fẽxo keskara mã itiro, õisharaima. Nãskakẽ mãto chaka mã mato soaxofiano mã anã shinãima, mã mã shinãmakiax. <sup>10</sup> Nãskakẽ efe yora mĩshtichi, Niospa mato ifikĩ mato shinãmani mã afe yorakõifo mã inõ. Nãskakẽ afe yorakõi isharapaikõikãfe. Shinãsharata isharakõikãfe. Askafaax mã anã afara chakafo ifofaima. <sup>11</sup> Mã askaito õikĩ mato ifisharakõixii a ika ano mã afe ãpaxanõ nõko Ifo fe. Nõko Ifo Jesucristo noko ifimis.

<sup>12</sup> Nãskakẽ ẽ mato shinãmafãini, mã mã tãpifekẽ, nãskakẽ iskaratĩna na meka shara mã mã tãpixõ nã fisti mã shinãkõimis. <sup>13</sup> Akka ẽ nayoxoma ẽ mato yoisharafãini, <sup>14</sup> mã mã nõko Ifo Jesucristo ea tãpimanano ẽ chaima naino. <sup>15</sup> Nãskakẽ mẽxotaima ẽ mato yoirifai mẽnaano nã ẽ mato yoimis keskara mẽxotaima mã shinãfafãinõ.

### *“Cristo Niospa Fake chaxapakekafanaito ẽ õini,” ixõ Pedro ato yoini*

<sup>16</sup> Nõ mato yoimis nõko Ifo Jesucristo әне kerex sharaõxõ afama mĩshti fatiro. “Anã nokoki oxii,” ixõ nõ mato yoimis. A yorafãfe yoipaonifo anori nõ mato yoimisma. Akka nõko ferokõichi nõ õini, nõko Ifãfe chaxapakefõfãnaito. <sup>17</sup> Askatari әне Apa Niospa iskafakĩ yoini: “Nafi әне Fakekõikĩ ẽ aõ noisharakõi, ẽ akiki inimakõi,” ixõ yoini. <sup>18</sup> Nõkõi nikani nai mẽranoax mekai askaito. Nã mãchifã ano nõko Ifo fe nõ ini, nã mãchifã anoxõ nõ nikani anoax Nios mekaito.

<sup>19</sup> Akka a Niospa meka yoipaonifãfe a inõpokoai keskara yoikakĩ Jesúsnoa kenenifo keskara nõ chanĩmara fakõitiro. Nãskakẽ mãri mã na meka mã chanĩmara fakõitiro. Oa rãparinĩ fakish mẽraxõ chaxatiro keskafakĩ, akka mã penano xafasharakõitiro. Nãskarifikĩ mã Niospa meka nikasharaino Epa Niospa mãto õiti mẽra oa pena keskara mato fatiro. <sup>20</sup> Akka taefakĩ iskara tãpikãfe. A Niospa meka yoipaonifãfe ẽa ẽto õiti mẽraxõ shinãkaxõ kenepaonifoma. <sup>21</sup> Askatari ẽa ẽto shinãmã shinãxõ yoipaonifoma. Askatamaroko Niospa Yõshi Sharapa ato shinãmanaino nãnorikõi ato yoipaonifo. Nãskakaxõ a Niospa Yõshi Sharapa ato shinãmanai keskara kenepaonifo.

## 2

*Fetsafāfe chanī fisti ato yoipaonifo*  
(Ju. 4-13)

<sup>1</sup> Akka, “Nō Niospa meka mato yoinōra,” ixō āa nōko xinifo ato pārapaonifo. Nāskarifiakī mato mēraxō mato pāramisfo, “Nō Niospa meka mato yoinōra,” ikaxō. Afāfe mato pārakani fanīrira mato yoikani mā anā shināsharanōma. Akka nōko Ifo Jesús ato nāxoni afara chaka āto ifo inōma. Nāskakē a nōko Ifāfe noko tāpimapaoni keskara chanīmara faafoma. Nāskakē nāfo Epa Niospa ato omiskōimarisafoxii omiskōipakexanōfo. <sup>2</sup> Nāfāfe afara chakakōifo ato tāpimanaifo keskakakī yora ichapafāfe ato nikamisfo. Nāskakaxō atoōxō Niospa mekaōnoa chakakōi fatirofo. Nāskakē a Niospa ato shināmapaiyai keskara shinākanima mā fenoafo. <sup>3</sup> Nāskakaxō kori fisti noikōimisfo, “Nō mato yoinōra,” ixō mato pārakani. Akka a afara chakafaifo keskara mā Niospa tāpia fatora penata ato tāpimani omiskōipakexanōfo. Afetīama Niospa shināyoni a yora chakafo ato omiskōimapakexakī.

<sup>4</sup> Epa Niospa āfe ājirifo āto chaka ato soaxonima afara chakafaifāfe. Askatamaroko chiifā mēra ato potani, anoax fakishifā mēra īpaxanōfo kaninānā ato metexkere axō. Nā ato ichanāfaitīa ato yoixō ato omiskōimaxii. <sup>5</sup> Nāskatari nā yorafo Noé niyoatīa Niospa meka nikakaspafono Niospa āto chaka ato soaxonima. Askatamaroko oi kaya imani faka faipafaxō a yora chakafo ato āsakī mitonō. Akka Noé fisti āsanima. Nā Noé ato yoiyopaoni iskafakī: “Nios sharakōikī māto chaka xatekāfe a keskara shara ixikakī,” ixō ato yoipaoni. Nāskakē Noé āsanima afe yora sietefo fe Niospa ato kexesharano. <sup>6</sup> Nāskatari Niospa pexe rasi Sodoma yafi Gomorra pāoakī fetsaxō kooakī mitoni, mapokōifakī. Nāskakē nā rama chipo ixiaifāfe tāpinōfo yora chakafo keyokōi Niospa ato omiskōimaxiai. <sup>7-8</sup> Akka Lot fisti nanima Niospa nimasharakōini. Nā feronāfakemāi sharakōikē, nāato ōipaoni yorafāfe anoxō chaka shināifāfe. Nā Lot fekaxtekōini, nā yora chakafo askaifāfe ōi. <sup>9</sup> Nāskakē nōko Ifāfe afe yorafo kexesharatiro afarafo ato chakafamapaiyai keskara anōfoma. Nāskaxō nā afara chakafamisfo ato omiskōimakī nā omiskōipakenakafo mēra ato potaxii anoax omiskōipakexanōfo.

<sup>10</sup> Nāskakē Niospa ato omiskōimaxii āa shināxaxō afara chakakōi famisfono, nōko Ifāfe āfe meka sharari nikakaspamisfono. Afāfekai afaa tāpiafoma. Mesetamakōi ato īchamisfo a nō ōimisma nai mēranao xanīfo finakōiafo. <sup>11</sup> Akka nā ājirifo xanīfokanax afokai askamisfoma. Afāfe toa īchamisfoma nōko Ifāfe ferotaifi. Askatamaroko yoikī iskafamisfo: “Āa Niospa ato tāpimanō omiskōimakī,” ixō shināmisfo āfe ājirifāfe a yora chakafāfe chakafafiaifono ato afeska fapaimisfoma.

<sup>12</sup> Akka na yorafo yoinā keskarafo, afaa tāpiafoma. Afaa shināima ikafo. Nāskakē achixō retetirofo. Afāfe afara chaka yoimisfo ōiyamafikakī, nāskakē afori naxikani na yoināfo natirofo keskakani. <sup>13</sup> Fetsafo omiskōimakatsaxakakī afori omiskōixikani. Afāfe afarafo chakakōifo fakakī sharakōimeyokani. Akka nā mato pāramisfo mato fe ichanāfo Jesús nikayamafikatsaxakakī. Anoxō mato feta piyanā mato pārapaikani. Akka māfi askaramakī mā noināsharakōita ano fisti ichanāxō mā piisharamis. Mā askafiaito a ato pāramisfo mato fe ichanāpaikani mato fanīrira chakafo yoipaikani mā anā shināsharanōma. Inimakōiyanā nā mato pārapaiyai fisti yoipaikani. <sup>14</sup> Askatari kēro fetsa ōikakī akiki nokofenepaikakī chotapaimisfo, chaka fisti shināmisfo. Akka kēromā Jesús Ifofayamaxō ato fichipai ato fe ixiki. Askatari a chanīmisfāfe Jesús Ifofasharamisfoma ato chakafamapai ato feta afarafo chakafanōfo ato ōikakī. Askatari ato afama mīshti ato fichipaimisfo mā askara feyafamisfo. Niospa nā keskara yorafo ato omiskōimani omiskōipakexanōfo, yora chakafomāiano. <sup>15</sup> Nāfo fofāsakani mā fenoafo, Niospa meka shara kachikiri fakanax nā Balaam ipaoni keskarafo. Nā Balaam Niospa meka yoimis iyopaoni, Beorpa fake. Mā Niospa meka yoipaofinixakī kori kaya fichipaini, afara chaka shinākī. <sup>16</sup> Niospa yoiaino Balaam āfe burro nā yora mekai keskani. Nāskaxō āfe ifo



iskafakī yoini: “¿Afeskakī mī ea koshaimē?” ixō nā burropa yoini. Askafaito nikai Balaam oa yōra shināsharaima keskarakōi ini.

<sup>17</sup> Na feronāfakefo faka fiti anoa faka netsoa keskarrafo. Afaakai tāpiafoma, nāskaxō Niospa meka shara noko tāpimatirofoma. Askatari mā oi fei kiki ixō, nai kōi choshta nō ōifiaino, nēfe nai kōi potatiro keskarrafo. Nāskarakaxō noko pāratirofo: “Niosnoa nō mato yoirā,” ikaxō āa shināi imisfo Niosnoa yoikōimisfoma. Nāskakē Epa Niospa ato potaxii fakishifā mēra ipaxanōfo. <sup>18</sup> Nāfo chanīkani kakapaimisfo. Nāskaxō yoimisfo iskakani: “Nō tāpia keskakakī tsōa tāpiama. Nā tsōa atiroma keskakakī nō tāpikōia,” ixō āa yoikani chanīfinamisfo. Nāskakaxō a rama Nios Ifofapaikakī āto chaka xatepaiyaifo ato yoitirofo iskakakakī: “Mī fētsa āfe āfi fe ika sharakī, nāskax mī afe inimakōitiroki, nō anō kafe,” ixō fētsa iyotiro afara chakafamaxiki. <sup>19</sup> Afāfe iskakakī yoimisfo: “Mā afara shara faōnoaxkai Nios fe mā ipaxatiroma. Akka nā mā afarafo apaiyai keskakakāfe. Nā mā apaiyai keskafaino tsōa mato xatematiroma inimayanā akāfe,” ixō ato yoikakī anorima ato yoikani. Afori isharamisfoma, āa pāramemisfo. Afara chakafo āto ifo, nāfo Satanás inafō. Nāskakē shināsharakanima. Chaka fisti shināmisfo. <sup>20</sup> Akka nōko Ifo Jesucristo nā noko ifimis, nō nikakōixō nā nikaifāfema afara chakafaifo keskakakī, anā afaa chakafakanima. Nā afara chakafo makinoax paxkatirofo anā āto ifo inōma. Akka anā afara chakafaifono afara chakakōi ato mēra nanetiro a ipaonifo keskara chakafinakōia inōfo. <sup>21</sup> Akka afo shara ikeranafo Jesús nikayamakatsaxakakī. Akka a meka shara mā nikafikatsaxakakī chipo anā kachikiri faifono ato omiskōimaki finakōixii. <sup>22</sup> Akka nōko xinifāfe Niospa mekaōnoa kenekī yoikōinifo iskakakī: “Paxta nā imis keskai ori kafāsayotiro. Chipō anā a anāpakea ano otiro. Nāskariai kochiri mīfamā raish iyotiro, nāskax fakanaki kaax choki sharata, mā choki sharafīax anā chipo mīfamā raish itiro.” Nāskari akani Niospa Yōshi Sharaōxō āto chaka potakanamax Satanás āto ifo iki. Āto chaka xatepaifikanax afianā afara chaka mēra paketirofo.

### 3

#### *Nōko Ifo Jesús anā fotoxii*

<sup>1</sup> Efe yora mīshtichi, anā ē mato kirika kenexō fomai. Taeyoi ē mato manamayonixakī, nā kirika kene rafeoxō ē mato shināmasharapai mā shināsharakōinō. <sup>2</sup> Shinākāfe, a Niospa meka yoimis sharafāfe afetiāma mato yoipaonifo anori. Askatari a noko ifimisto nōko Ifo Jesús ato yoiāto a aōnoa yoimisfāfe nikakatsaxakakī nānori mato yoipaonifo keskara shinākāfe.

<sup>3</sup> Nāskakē ē mato yoinō shinākōikāfe. Mā chaima Jesús oaino nā yora chakafo matoki fekanax nāfo matoki kaxemetsamapaixikani kiki āakōi askara chakafo shinākanax. <sup>4</sup> Nāskaxō mato yōkaxikani iskakakakī: “A Niospa yoini keskai, ¿afeskai Cristo oimamē? Akka nōko xinifo nanifo chāikai afaa afeskaito nō ōimisma, keyokōi nāskara. Nā Niospa mai onifani chāi afaa afeskaito nō ōimisma,” ixō yoixii. <sup>5</sup> Akka nā yorafāfe mā tāpifikaxō shinākanima, afetiāma Niospa nai onifafianino Niospa yoiaino fakafā nēxpakīa mai onifani, taeyoi fakafā iyopaoni. Nāskakē Niospa āfe mekapā fakafā nēxpakīa mai onifarifatani. <sup>6</sup> Askatari fakafaipafakī mai maiyaino keyokōi yorafo āsai mitokomeni. <sup>7</sup> Akka mai yafi nai iskaratīa ato mekeyoa, chipo ato koofakī mitokōixii. Niospa yoiaino askai fetsexii. Nā Niospa ato ichanāfaitīa na chiifānē ato koofakī mitoxii nā yora chakafo ato omiskōimanaitīa.

<sup>8</sup> Nāskakē efe yora mīshtichi, shināmakiyamakāfe. Nō ōimiski xiniachāikōi. Akka nōko Ifāfe ōia pena fisti xini ichapa keskara, askatari xini ichapa pena fisti keskara ōi. <sup>9</sup> Nāskakē shinākī iskakamisfo: “Nōko Ifāfe yoiyoni keskara ikamano, akka mā yoini keskara mā finōkōia,” ixō shināmisfo. Askatamaroko Niospa noko noikōikī a omiskōipakenakāfo mēra ato potapaima. Fena fenakima ato manasharamis keyokōichi āto chaka xateyonōfo āfe meka shara nikaxikakī omiskōipakexakakīma.

<sup>10</sup> Akka nõko Ifo nokoki nokorisai tsõa manasharayamaino nõ yometso nõko pexe ano oaito nõ tãpitiroma keskai. Nãskarifiakĩ tsõa tãpiama afetiara nõko Ifo nokorisai, itipinĩsharafomano. Mã nõko Ifo nokoaino chãa itakõixii. Nãskaino nai mẽranoafo koofi keyokõixii, nãskatari nono mai anoafori koofi keyokõixikani.

<sup>11</sup> Nã ã mato yoiai keskai keyokõi keyoxii. Nãskakẽ tãpisharakõixõ nõko Ifo nikasharakõikãfe. Mã mã itipinĩsharakõixõ a mã apaoni keskara anã mã akimakai. A mato amapaiyai keskara fisti mã akikai. Epa Nios shinãkĩ finakõiax sharakõi ikãfe. <sup>12</sup> Fatora penata Jesús nokoi kiki manashara fafãikãfe. Nãskakẽ fetsafo Jesúsnoa yoisharakãfe tãpisharakõinõfo, ãto chaka xatekaxõ mã chaima Jesús oi kiki. Mã Jesús oaino nai mẽranoafo koofi mẽsho mẽshokõixikani. <sup>13</sup> Akka nai fenashara nõ manai, mai fena yafi a Niospa yoiyoni keskafakĩ afo sharafai. Akka afara chakafo ano itiro, nõ sharafos ano itirofo.

<sup>14</sup> Nãskakẽ efe yora mĩshtichi, mã Jesús manakĩ manasharafafãikãfe. Mã askaito Niospa mato õi kiki ãfe Fãkeõnoax mã isharakõikẽ. Nioski mesekĩma iskafakĩ shinãfafãikãfe: “Epa Niospa ãfe Fakeõxõ ea noi. Ëri Epa Nios noi afe rafepakexakĩ,” ixõ anori shinãfafãikãfe.

<sup>15</sup> Nãskakẽ mãri fekaxtekãkima. Shinãsharata isharakõikãfe. Õikapo. Nõko Ifo samarakamis fena omisma yorafãfe ea Ifofanõfora ixõ shinãmis Epa Niospa. Nãskarifikĩ nofe yora Pablo mato kirika kenexoni Epa Niospa shinãmasharaino. <sup>16</sup> Nã kirika keneai tii nõko Ifo anã oxii kiki ixõ aõnoa yoikĩ mato kirika kenexoni Pablo. Akka a atiri yoikĩ kenenĩ afokai nõ tãpisharatiroma. Akka a Niospa meka tãpiamafãfe ãa fanĩrira yoimisfo a Pablo yoikĩ kenenĩ anori tsõa yoimisma. Nãskarifikĩ Niospa mekakõi yoitama, fanĩrira yoimisfo. Nãskakanax omiskõipakenakafo.

<sup>17</sup> Efe yora mĩshtichi, a ã mato yoiai keskara mã mã tãpiaki. Nãskakẽ õisharakãfe, a chanĩmisfãfe mato yoipaiyaifo anori mã ato nikaxikima. Mã Jesús nikakõiaito mato kexesharakõitiro. Akka a fanĩrira yoimisfo mã ato nikaxõ anã mã shinãsharatiroma. Nãskaxõ fanĩrira mã shinãtiro. <sup>18</sup> Akka a noko ifimis nõko Ifo Jesucristo nikasharakõifafãikãfe tãpisharakõixikakĩ. Mato sharafapaiyai keskara a keskara shara ixikakĩ. Mãto õiti mẽraxõ a mato tãpimapaiyai keskara tãpisharakõikãfe. Nã fisti nõ yoikĩ iskafatiro: “Mĩ nõko Ifo, mĩõxõ afara shara nõ atiro, meres fisti mĩ sharakõi,” ixõ iskaratĩa yoita a inõpokoai keskara nõ yoipakenaka. Nãskakõipakexanõ. Nã tii.

*Pedro*

## Juan Jesús Chanĩmara Faafo Kirika Kenexõ Fomani

### *Jesús noko nimasharaino nõ afe ãpaxanõ*

<sup>1</sup> Ëkĩa Juan, ã mato kirika kenexõ fomai mã tãpinõ. Jesucristo ã õimixaki ã mato yoi mãri mã tãpisharanõ. Nã Jesucristo nõko Ifokõi tae fenakõi Nios fe iyopaonixakĩ. Akka Niospa afama mĩshti onifamatai afe iyopaonixakĩ, chipo nãmã fotoxõ noko yoiaito nõ nikamis. Oa yorakõi keskara nõ õimis. Mã õikĩ feyafaxõ nõ ramãti nõko mĩfi. Nãskakẽ noko yoiaito nikayamexakĩ ã mato yoi, noko imasharanõ nõ afe ãpaxanõ. <sup>2</sup> Apa Nios ariax nokoki Jesús fotoni. Fotokẽ nõ õikĩ feyafani. Nãfi afeskapishta nakama, nãfi nĩpanakakĩ. Apa Nios fe ikatsaxakĩ nokoki fotoni. Nãskakẽ nã nõ õia keskara nõ mato yoi. <sup>3</sup> Nõ õipaonixakĩ nõ mato yoi noko yoiaito ãfe meka. Nãskakẽ nofe rafexõ nã nõ shinãi keskarari mãri mã shinãtiro. Nios feta ãfe Fake Jesucristo shinãi keskafakĩ nõri anori nõ shinãi, nõ ato fe rafekõitiro. <sup>4</sup> Nãskakẽ ã mato kirika kenexõ fomai nã kirika kene õiax mã inimakõinõ.

### *Nios xafakĩakõi ika oa luz keskara*

<sup>5</sup> Akka noko Cristo yoiai, anori ã mato yoinõ. “Oa xinĩ chai chaxaino fakishtiroma keskara, xafakĩakõi Nios ika. Afaa chaka afe rafemisma,” ixõ Cristo noko yoimis. <sup>6</sup> Akka anorima shinãi yora fetsafo iskakani: “Ë Nios fe rafea,” ifiaxõ a Niospa yoiai anori shinãima ãa chanĩ anorima yoi. Æfe õiti sharama xafakĩakõi ikama, fakish keskara a Niospa yoiai anori shinãyamafi. <sup>7</sup> Nios xafakĩakõi ikakĩ, afaa pishta chakafamisma. Æfe õiti mẽra oa fakish keskarama, xafakĩa sharakõi ika. Akka nõri afe rafekõixõ, nõ ãfe meka nõ mẽra nanekõixõ, Niospa shinãi keskafakĩ nõri nõ shinãtiro. Nõ askara shinãx, nã Ifofafo fe nõ ato fe rafetiro. Nãskax nõ xafakĩakõi nitiro, Niospa Fake Jesús mãi noko nãxonikẽ. Æfe imĩ nõko chaka noko soaxõfafãini keyokõi.

<sup>8</sup> Akka nõ yoikĩ iskafamis: “Ë afaa chakafamisma,” ifiax nõa nõ pãramemis. Nãskax nõa nõ chanĩkõimis. Nõko õiti mẽra Niospa meka naneama. <sup>9</sup> Akka nõ afara chakafaxõ nõko chaka nõ soapaikĩ, nõ Nios yoiaito nõko chaka noko soaxotiro. Keyokõi noko soaxotiro noko raefakĩ, Nios mãi mẽstekõi isharakõixõ. <sup>10</sup> Niospa yoimis: “Keyokõi yorafãfe chakafamisfo,” noko famis yoikõikĩ. Noko askafafiaino, “Ëkai afaa pishta chakafamisma, ã chaka shinãima,” ixõ yoikĩ nõ Nios chanĩmara faima, “Æa chanĩra,” nõ Nios fai. Nãskakẽ ãfe meka nõko õiti mẽra naneima.

## 2

### *Jesús Apa Nios noko yoixonĩ*

<sup>1</sup> Efe yora mĩshtichi, ã mato shinãi. Mẽ mato Jesús Ifofamaxõ ã mato fakefai. Mato fakefaxõ ã mato kirika kene fomai, mã anã afarafo chakafanõma, shinãsharata mã inõ. Askara Niospa fichipai. Akka nõ chakafaino Niospa fichipaima. Nãskakẽ nõ anã afara chakafaxõ nõ nõko Ifo Jesucristo nõ yoitiro anã nõko chaka nõ soapaikĩ, nokomãi nikaito. Noko nikaxõ Apa Nios noko yoixonĩ iskafakĩ: “Epa, ã ato nãxonĩ. Eõxõ ato chaka soaxõfe, ãto chaka soapaikani kiki,” Apa fatiro. Nã fistimãi mẽstekõi ixõ, afaa chakafamisma. Nãskaxõ Apa Nios noko yoixotiro. <sup>2</sup> Noko nãxonĩ nõko chaka noko soaxoxiki. Noko fistima, keyokõiõnoax noko nãxonĩ. Nõko Ifo Jesucristo noko nãxonĩ. Nõko chaka noko soaxõfaini nani.

<sup>3</sup> Nãskakẽ Cristo noko yoiai keskafakĩ nõ nikakõixõ nõ tãpisharakõitiro nõ mãi afe rafexõ. <sup>4</sup> Yora fetsafo iskai: “Ë Cristo fe rafea,” ifiaxõ ãfe meka nikama, ãa akikiri kãtapamis, mẽstekõi ikama. <sup>5</sup> Akka nõ Niospa meka nikakõikĩ nõ aõ noikõi. Nãskafaxõ nõ tãpitiro nõ afe rafekõia, Nios fe. <sup>6</sup> “Mẽ Nios fe rafekõiaiki,” ixõ yoi, a Jesús imis keskara ikãfe.

### *Noko meka fena shara yoini nō nōināsharakōinō*

<sup>7</sup> Efe yora mīshtichi, ē mato yoisharakī ē mato kirika kenexoni. Na ē mato yoiai keskafakī taefakī mā mā nikamiskī. Jesús noko yoia keskafakī ē mato kenexonō. <sup>8</sup> Mā mā nikafimiskē, ē mato anā fenafakī yoinō chanīma. Jesucristo noko noikōi. Nāskari fakī nō fetsafo noikōi. Fetsafo noikī, nōko ōiti mēra xafakīakōi iki. Anā fakish keskara ikima. <sup>9</sup> Akka, “Ē Nios fe rafea ē xafakīakōi ika,” ixō nō yoifixō nofe yorafo nō noikaspamis, nōkai xafakīakōi ikama. <sup>10</sup> Akka nōroko nofe yorafo noi, nō xafakīakōi iki. Nō shināsharata nō ikax, nō anā fenotiroma. Nāskakē nō xafakīakōi iki, afaa pishta chaka shinātama. <sup>11</sup> Akka a afe yorafo noikaspaifo, afokai sharama. Fakish mēra niafo keskara. Afaakai shinākanima. Āto chaka xatekaspakani. Askafakaxō afaa tāpiafoma, fenokōiafo.

<sup>12</sup> Efe fakefāfe, māto chakafo Jesúsxō Epa Niospa mato soaxonano, nāskakē ē mato shinākī ē mato kirika kenexoni. <sup>13</sup> Afaa oniataima Epa Nios fisti iyopaoni. Efe anifo tiito, ē mato kirika kenexoni, afe keskaramāki mā mā Epa Nios tāpiakī. Mā mā tāpixō mā chanīmara famiski. Naetapafāfe, matori ē kirika kenexoni, Satanás chakata mato afara chakafamapaiyaito mā mā finōfakī. Nāskakēri naetapa tiito ē mato kenexō fomai, mā Satanás chaka finōano. Efe fakefāfe, ē mato yoikī kenexona māmāi Epa Nios tāpikē.

<sup>14</sup> Efe anifo tiito, matori ē kirika kenexona, mā mā tāpiakī, afaa oniyataima Epa Nios fisti iyopaoni. Naetapafāfe, matori ē kirika kenexona, māto ōiti kerexkōifafāi Epa Nios āfe meka shara nikakōiyanā mā mā Satanás chaka finōfakī.

<sup>15</sup> Akka a Niospa fichipaiyamai, nōri fichipaitiroma. Afo fichipaikī nō Nios shinātiroma. Afarafo na yora chakafāfe āto shinā mēraxō shināifo keskara afo fichipaiyamakāfe. Afo fichipaikī mā Nios shinātiroma. <sup>16</sup> Akka a Nios shināifoma nono nāmā ikafo āa shinākani iskamisfo: “Ēa ē shināxō nā ē apaiyai keskara ē atiro. Afara ōikī ē fichipaikī ē fitiro. Ē tsoa keskarama. Ē afama mīshti shināi. Ea keskara tsoama,” ixō fētsa yoitiro āa chanīkī. Aato Niospa meka shināima, āa shināx askatiro. <sup>17</sup> Akka na afe keskararāfo Niospa ōikaspaifo mā afo mitokomei. Nāskatari a yora chakafāfe fichipaiyaifo mā afori mitokomei. Akka nā Niospa yoiai keskara nikakōiax nō Nios fe nīpanaka.

### *A yora chanīaifo nō nikatiroma*

<sup>18</sup> Efe fakefāfe, mā chaima Jesucristo anā nāmā fotoiyoi mā nō nika. Nāskakē Jesús nāmā fotoyoamano, akka nā yora chakafāfe Cristo shināmisfoma āto xanīfo finakōia oi taei. Nāato, “Ē Cristora,” ixō noko pārapaixii. Mā mā tāpia nāato Jesús noikaspamis. Akka iskaratīa, “Ē Cristora,” ikanaifo yora ichapakōifo. Nāskakē mā nōri tāpia nā Cristo kayakōi samama fotoi. <sup>19</sup> Nā Cristo noikaspaifo nofe iyoafo, mā noikaspakani nomakinoax tsekeafō. Afokai noko keskarafoma. Cristo anā shinākanima, mā kachikiri faafo. Nāskax nomakinoax tsekeafono nō tāpitiro afāfekai Cristo Ifofaafoma. Akka a Cristo āto Ifokōikē nomakinoax tsekekeranafoma.

<sup>20</sup> Akka Cristo āfe Yōshi Shara māto ōiti mēra nanea. Nāskakē keyokōichi mā mā tāpia Niospa Yōshi Sharapa mato tāpimapaiyai keskara. <sup>21</sup> Nāskata Jesucristo mā tāpikī finakōiakī. Tāpixō mā mā chanīmara fakī. Nāskakē ē mato kenexoni. Nāskaxō afara mato pārāifāfe mā chanīmara faima. Mā tāpia Jesucristo ramashara anorima ato yoimisma, nāfi chanīmakōikī. <sup>22</sup> Yora fetsafo iskamisfo: “Cristokai Niospa nai mēraxō nīchinikeroko, akai Niospa Fakekēroko,” ixō yoimisfo. Askafakaxō Epa Nios yafi āfe Fake Jesús chanīmara fakanima. Afāfe Cristo noikaspakōikani. <sup>23</sup> Akka nā Cristo noikaspaiāfe iskafakani: “Jesús Niospa Fakema,” fakanax Epa Nios fe rafemisfoma. Afokai Niospa yorafoma. Akka a yoikī iskafaifo: “Jesús Niospa Fakekōi,” fakanax nāfo Nios fe rafekani.

<sup>24</sup> Nāskakē Jesúsnoa mā nikakī taefani keskafakī, āfe meka shara shināmakiyamakāfe. Nā mā nikakī taefani keskafakī, mā shināmakiyamax mā nikakōisharaino Epa Nios fe āfe Fake Jesús mato fe rafekōipakenaka. <sup>25</sup> Nāskakē Jesús noko iskafakī yoiyoni: “Ea yafi ēfe Epa mā Ifofaax, mā nofe nīpanaka, anā mā nanakama,” ixō noko yoini.

<sup>26</sup> Akka na yorafāfe Cristo noikaspaifo afāfe mato pārapaikani. Mato anorima yoipaiikani. Nāskakē ē mato yoisharakī kirika kenexoni mā tāpikōinō tsōa mato pārayamanō anorima yoikī. <sup>27</sup> Akka Epa Niospa āfe Yōshi Shara mato ināni mato fe rafekōinō. Nāskakē aōxō mā mā tāpikōia. Mā anā tsoa yopaima mato tāpimanō, āfe Yōshi Sharapamāi keyokōi mato tāpimakē. A mato tāpimanai keskara chanīmakōi, mato pāratiro. Nāskakē nikakōiyanā Cristo fe rafesharakōikāfe, a Niospa Yōshi Sharapa mato yoiai keskai. A Niospa Yōshi Sharapa mato yoini keskai shināmakikakīma Cristo fe rafesharakāfe enekakīma.

<sup>28</sup> Ēfe fakefāfe, iskaratīa Cristo nikakōiyanā afe rafekōikāfe, mā nāmā fotofaino nō akiki meseimakai nōmāi isharakōiax. Askatari nō akiki rāfimakai.

<sup>29</sup> Mā mā tāpiakī Nios isharakōimiskī afaa chakafatama. Nā isharakōimisfo nāfo Epa Niospa imasharapakenaka āfe fakefo inō. Nafofi Epa Niospa fakekōifokī.

### 3

#### *Niospa fakefo*

<sup>1</sup> Epa Niospa noko noikōi. Shināfāi ikāfe. “Ēfe fakefora,” noko famis. Akka nō āfe fakekōifo. Akka nā yora fetsafāfe Jesucristo shināifoma Nios tāpiafoma. Nāskafakīri nokori tāpiafoma, nō Niospa fakefofiano. <sup>2</sup> Efe yora mīshtichi, ea nikakāfe. Nōfi iskaratīa Niospa fakekōifokī. Nāskakē afe keskarara chipo noko Niospa imai nō tāpiama. Cristo fotoaito nō ōiax nā keskarakōi nō iki, āfe ōiti keskarakōi. <sup>3</sup> Niospa fakekē nonori nō yoi: “Ē Jesucristo fe ipanaka. Ē Jesús fe ikaino āfe ōiti keskarakōi ē ixii,” ixō shinākī nō anā chaka shināpaima. Jesucristo shināi keskarari nō shinātiro, anā chaka shināyamakī.

<sup>4</sup> Akka yora fetsafāfe ato chakafakakī, āto chaka potakaspakani, a Niospa yoiai keskara shinākanima, afara chaka fisti shināmisfo. <sup>5</sup> Jesucristo nai ariax nokoki fotoni nōko chaka noko soaxoxiki. Akka nāatofi afaa chakafamismakī. Nā fistifi finakōiakī. Ē mato yoiai keskara mā mā tāpiakī. <sup>6</sup> Nāskakē a afe rafeafāfe chaka shināmisfoma. Akka a ōiti chakayafāfe Jesús tāpiafoma, Jesús shinākanima. Jesús fe rafeafoma. <sup>7</sup> Ea nikasharakāfe, ē mato yoinō. Fetsa iskatiro: “Ē Niospa meka mato yoinō,” ixō mato yoisharaima. Mato anorima tāpimapai, akka aa nikax mā chaka nitiro. Akka a isharakōixō shināsharamis. Aa keskarafi yora sharakōikī. A Cristo ika keskarari ari isharakōia shināsharakōita. <sup>8</sup> Akka nā afara chakafamisfo Satanás fe rafeafo. Nā Satanāsmāi taeyoi ōiti chakaya inino, iskaratīari nāskara. Nāskaxō Satanás keyokōi yorafo afara chakafamapai. Nāskakē Niospa āfe Fake nokoki nīchini. Noko nāxoxiki nokoki fotoni, nōko chaka noko soaxoxiki. Nomakinoa Satanás potatiro noko afara chakafamapaiyaito. Nāskakē Jesucristo Satanás finōinīfofana.

<sup>9</sup> Akka Niospa āfe Yōshi Shara nōmēra naneano nō Niospa fake itiro. Nō Niospa fakexō nō anā afaa chakafapaima. Nā Niospa Yōshi Shara nōko ōiti mēra ikē nō anā afaa chakafatiroma, nōko ōiti noko fetsafaano. Nōko ōiti noko fetsafaxō, mā Niospa noko fakefa. <sup>10</sup> Fetsafāfe afara chakafamisfo, afokai Niospa fakefoma. Afofi aa ranā noinākanima. Askarafo Niospa fakefoma. Afofi Satanás fakefoki. Nāskakē Satanás fakefo nō tāpitiro. Nāskafakīri Niospa fakefo nō tāpitiro.

#### *Nōa ranā nō noinātiro*

<sup>11</sup> Nāskakē taefakī mā Nios Ifofaxō mā mā nikamiskī mato yoiaito: “Nōa ranā nō noināsharanō,” ixō mato yoiaito mā mā nikamis. <sup>12</sup> Akka nā Caín onefetsa noikaspakī reteni keskara iyamakāfe. Askara Satanás chaka fe rafea. Nāskaxō onefetsa reteni noikaspakī, ē mato yoinō nikakapo. A Niospa yoia keskafakī onefētsa Nios shināni. Akka Caín askanima. Āfe onefetsaki ōitifishkikī reteni. A onefētsa Nios Ifofaito ōikī noikaspakī reteni, Niosri noikaspayanā. <sup>13</sup> Akka māri Jesús Ifofaito, matori noikaspatirofo. “Ē Jesús Ifofaito ea tsōa noikaspaima kiki,” ixō shināyamakāfe. A mā Jesús Ifofaito a

Jesús Ifofaafāfema mato noikaspapirofo. <sup>14</sup> Nō yorafo noikōixō nō tāpitiro nōmāi Niospa fakefoxō. Nāskakē a omiskōipakenakafo mēra katama, afe nō ipanaka. Akka a yora fetsafo noikaspai, afokai Niospa fakema. Nios fe rafeamax afe ipanakama. <sup>15</sup> Akka a yorafo noikaspairo afofi retemitsamis keskarafoki. Afo chakakōifo. Askarafo mā mā tāpia Niospa fakefoma. Askarafo Nios fe rafeafoma. Nios fe nīpanakafoma, yorafo noikaspakanax. <sup>16</sup> Akka Jesús noko noikōikī, noko nāxoni. Āakōi nokoōnoax nani. Nāskarifiakī nō fetsafo noikōiax nō atoōnoax natiro. <sup>17</sup> Akka afama mīshti ichapayafixō, fetsafāfe afara yopaito nō ato afaa ināmā, askara sharama. Epa Niospa noko noiai keskafakī, nō ato noima. <sup>18</sup> Efe yorafāfe, ea nikakōikāfe, ē mato yoinō. Fetsafo iskakani, āa chanīkani: “Ēfi yorafo noikai,” ifiaxō ato chakafakani, atokai noikanima. Akka nōfi askaramakī. Nō yorafo noisharakōixō nō ato shara fatiro.

### *Nō Nios nikasharax nō akiki ranotiroma*

<sup>19</sup> Akka nō ato noisharakī nō tāpitiro nō fanīrira chaka shinākīma, Jesús nōko Ifokōimāiyakē. Anori shināi nō akiki meseima. <sup>20</sup> Nāskafixō nōko ōiti mēraxō nō shinākī iskafatiro: “Ē afara chakafaa,” ixō nō shināito Niospa noko ōi. Noko ōikī tāpia a nō shināi keskara. Nāskakē nōko chaka nō soapiyaito nōko chaka noko soaxotiro. Nios nōko ōiti keskarama. Aato keyokōi tāpia. <sup>21</sup> Efe yora mīshtichi, ea nikasharakāfe. Nōko ōitinī nō shināi iskatiro: “Ē Nios Ifofaito ēfe chaka mā ea soaxona, mā ea shināsharamana,” ixō shināi, nō Nios fe rafetiro, nō akiki nō ranotiroma. <sup>22</sup> Nō askaino Epa Nios nokoki inimatiro. Nāskakē nā nō yōkai keskara noko inātiro, a noko yoiai keskaramāi nō nikasharaito, askatarimāi nō inimamasharaito. <sup>23</sup> Iskafakī noko yoini: “Ēfe Fake Jesucristo nikasharakōikāfe,” ixō noko yoini. Nāskatari a noko yoini keskai nōa ranā nō noināsharai. <sup>24</sup> Akka a Niospa noko yoini keskafakī nō nikasharakōiax Nios fe nō rafekōitiro. Askatari Niosri nofe rafekōitiro. Epa Niospa āfe Yōshi Shara nokoki nīchini. Aōxō nō tāpitiro Epa Nios nofe ikaito.

## 4

### *Niafaka chakata Niospa Yōshi Shara noikaspai. Askatari Cristo noikaspai*

<sup>1</sup> Efe yora mīshtichi, fetsafāfe mato anorima yoiaifāfe ato nikayamakāfe. Iskafakī mato yoipaikani: “Nō mato Niospa meka yoi Niospa noko shināmanaino,” ifiakaxō anorima mato yoimisfo. Askaifono Niospa meka ōikī mā tāpitiro a yoiaifo keskara chanīmamākī. Niospa Yōshi Sharaōxō mato yoikanimakī. Akka afokai Niospa ato afaa yoiaima. <sup>2</sup> Nāskakē ē mato yoisharai, ea nikakāfe. Fetsafāfe a Niospa meka mato tāpimasharaito mā tāpitiro. Niospa Yōshi Shara a mēra naneano yoiaito mā tāpitiro. Iskara mato yoiaito: “Jesucristo ftoni Apa ariax nai mēranoax. Nāfi yora keskara kāiniki. Aafi yorakōiki,” mato faito mā tāpitiro Niospa shināmanaino mato askafakī yoiaito. <sup>3</sup> Akka yora fetsafāfe anori yoiyamaifāfe nō tāpitiro afāfe Jesucristo noikaspamisfo, Niospa Yōshi Shara āto mēra naneama. Satanás ato shināmamis. Akka a Cristo noikaspairo noko ano fexikani mā mā nikamis. Akka iskaratīa mā noko ano feafo, afāfe Cristo noikaspamisfo.

<sup>4</sup> Akka māroko askaramakī efe yorafāfe, Niosfi māto Ifokōikī, māfi Niospa yorakōifokī. Āfe Yōshi Shara mā māto ōiti mēra nanea. Akka a anorima shināifo askarafoma, Satanás yōshi āto ōiti mēra nanea. Akka Niospa Yōshi Shara mato mēra naneano mā Satanás finōkōia. <sup>5</sup> Akka fetsafāfe Nios tāpiafomano, nāskakē anorima ato yoimisfo, Satanás ato shināmanaino. Nāskakē Satanás ifofaafāfe ato nikamis Satanasmāi āto ifokē. <sup>6</sup> Akka nōfi Niospa yorafokī. Nāskakē a Nios tāpiafāfe noko nikakōitirofo nō yoiai anori. Akka a Nios Ifofaafāfema a nō yoiai anori nikatirofoma. Akka nō tāpitiro ato mēra Niospa Yōshi Shara naneano noko nikasharaifono. Ato mēra nanexō fanīrira ato shināmanima. Akka a noko nikaifoma ato mēra Satanás nanea. Satanás ato mēra nanexō fanīrira ato shināmani. Satanás chanī finakōia. Nāskax ōiti chakaya.

### *Niospa noko noikōi*

<sup>7</sup> Efe yora mīshtichi, nō noinākōinō, Niospa noko ato noimanō. Nios fistichi noko shināmatiro nō ato noinō, a fistichimāi noko noikī finakōixō. Nāskakē nō ato noikōikī nō Nios tāpia nō afe yora, nōko ōiti mā noko fetsafaano. <sup>8</sup> Niospa yorafo noikōia. Nāskaxō ato noikī noko tāpimatiro. Akka a yorafo noiaifāfema, Nios tāpiafoma. <sup>9</sup> Niospa āfe Fake fisti nāmā nīchini, nāmānoax noko nāxoyonō. Nāskakē nō afe nīpaxatiro, nāatomāi nōko chaka noko soaxomiskē. Nāskakē Niospa noko ōimani afeskaxō noko noimākai. <sup>10</sup> Nāskakē nō Nios noi. Akka nō Nios keskarama, nō ato noikī finamisma. Nios fistichi noko noikōimis. Noko noikōikī āfe Fake Jesús nāmā nīchini noko nāxoyonō nōko chaka noko soaxoxiki.

<sup>11</sup> Akka efe yora mīshtichi, Epa Niospa noko noikōi. Nāskakē nōa ranā nōri nō noināsharakōikāfe. <sup>12</sup> Akka tsoa pishta Nios ōimisma. Nāskafix nō noināino, Nios nōmēra ika. Nofe ixō yorafo noko noimasharatiro. <sup>13</sup> Niospa āfe Yōshi Shara nōmēra ikimakē nō tāpitiro nō Nios fe rafea, Nios nofe ikano. <sup>14</sup> Epa Niospa nai arixō āfe Fake noko nāmā nīchixonī. Āfe Fake nāmānoa nō ōipaoni. Ōipaonixakī nō ato yoimis iskafakī: “Epa Niospa āfe Fake noko nāmā nīchixonī, keyokōi nokoōnoax nanō nōko chaka noko soaxoxiki noko ifiano nō afe ipaxanō.” <sup>15</sup> Fetsa iskai: “Jesúsfi Niospa Fakeki,” ixō shināi. Aafi Nios fe rafeakī Nios afe ikano.

<sup>16</sup> Niospa noko noikōia mā nō tāpia, nō chanīmara faiyanā, Niospamāi noko noimiskē. Nō Nios chanīmara faito nofe rafexō noko yorafo noimatiro. Akka nō ato noikōiaino Nios nofe ika, afe nō rafekōia. <sup>17</sup> Nō Nios noi. Nō Nios noikī finakōiax nō inimatiro Jesús anā nāmā fotoano. Anā fotoxō noko iskafatiro: “Nā ea Ifofaafō tii ēfe Epa Nios ari fokani. Akka nā ea Ifofaafō tii ēfe Epa ari fokanima, nā omiskōipakenakafō mēra fokani,” ato fatiro. Ato askafaino nōkai Nioski meseima. Nō ranoima nō afe rafekōi. Afe rafei nō Jesús keskara iki, āfe ōiti keskara nō iki. Nāskakē Jesús oaitīa nō akiki meseima. <sup>18</sup> Nō Nios noikōiax nō akiki mesetiroma. Nōko shinā mēraxō nō Nios noikī finakōixō nō rate potatiro. Akka fētsa mesekī iskafai: “Niospa ea omiskōimani,” ixō shināi aatokai noikī finakōiama. Ato noikōiamax Nioski mesetiroma.

<sup>19</sup> Nō Nios noiyamatai noko noikī taefani. Akka noko taefakī noinikē iskaratīari nōri nō aō noi. <sup>20</sup> Akka fetsafo iskakani: “Ē Nios noi,” ifiaxō a Nios Ifofaafō noima, anorima yoimisfo. Mā afe yorafo ōifikī atokairoko noikatsaxakakī, Niosri noisharakanima askara ōiroko fakatsaxakakī. <sup>21</sup> Niospa noko yoimis: “Ea noixō nā ea Ifofaafōri noikāfe,” noko famis.

## 5

### *Nō Nios Ifofakē tsōa noko afaa chakafamatiroma*

<sup>1</sup> Jesucristo Niospa Fakekōi. Nokoki nīchini noko nimapakexanō, nōko Ifo inō. Akka nō a chanīmara fai nō Niospa fakefo itiro. Nāskaxō āfe Apa Nios nō noixō, āfe Fakeri nō noikōitiro. <sup>2</sup> Nō Nios noikōikī noko yoiai keskara nō nikai. Nāskaxō mā nō tāpia nō Niospa fakefōri noikōi. <sup>3</sup> Nō Nios noikōixō āfe meka nō nikakōikī a noko yoiai keskara nō nikai nō fekaxteima. <sup>4</sup> Nāskakē nō Epa Niospa fakexō afara chakafāfe noko amapaiyai keskarakai nō atiroma. Niospa Fake Jesucristo chanīmara faxō afarafāfe noko afara chakafamapaiyai keskara nō finōtiro. <sup>5</sup> Afara chakafo noko amapaiyaifo keskara Niospa noko amatiroma nō anōma. Nāskaxō Jesucristo Niospa Fake nō chanīmara faxō aōxō na chakafo nō finōtiro anā afaa chakafaxikima. Nā chanīmara faafāfe finōtirofo.

### *Niospa āfe Fakekōi noko ōimani*

<sup>6</sup> Mā nō tāpia Niospa āfe Fake feronāfakekōi ini. Nā Jesús mā maotisata faka mēra ikipakekafāta kainākafanaino, Epa Niospa yoini iskafakī: “Nafi ēfe Fakeki,” ixō yoini. Jesús naino āfe imi foaino Apa Niospa noko tāpimani āfe Fakemāiakē. Āfe Yōshi Shara chanīmisma nōmēra nanexō noko yoimis Jesús Niospa Fakekōi. <sup>7</sup> Nā trespatō yoimisfo Jesús Niospa Fakekōi. <sup>8</sup> Jesús faka mēra maotisanī shināta, askatari naino āfe imi foni

shināta, askatari Niospa Yōshi Sharapa noko yoiaino, nānorifos nā trespa shināmisfo. <sup>9</sup> Akka yorafāfe noko afara yoiaito ato chanīmara fata a Niospa noko yoiairi nō chanīmara fakī finakōitiro. Akai yora keskarama, afi Nioskōikī. Akka āfe Fakeōnoa noko yoiaito nō chanīmara fakōitiro. <sup>10</sup> Akka Niospa Fake chanīmara faxō Apa Niospa aōnoa yoini keskara āfe ōiti mēraxō chanīmara fatirofo. Nāskafekē āfe Fakeōnoa yoimis keskara tsōa chanīmara fayamaxō, “Nios chanīra,” fakaxō yorafo fanīrira shināmapaikani. <sup>11</sup> Nāskakē Nios iskamis: “Ē mato nimasharapaketiro ēfe Fake Jesúsxō,” ixō noko iskafamis. Nāskakē nō Jesús Ifofaax nō afe nīpaxatiro. <sup>12</sup> A Niospa Fake Ifofaifo afe nīpaxatirofo. Akka a Ifofaima afe nīpaxatirofoma.

*Mā mekai xatekī ato yoisharani*

<sup>13</sup> Mā Niospa Fake chanīmara faaki. Nāskakē ē mato kirika kenexoni, mā tāpinō mā afe nīpanaka.

<sup>14</sup> Nō afara sharafo nō fichipaiikī, a Niospa noko shināmanaino, nō Nios yoitiro kīfikī, a Niospa fichipaiyai keskafakī. Nō askakī nō tāpitiro Niospamāi noko nikasharamiskē. <sup>15</sup> Nāskakē nō tāpitiro a nō Nios yoiaito noko nikaito noko nikaxō noko afara inātiro nō yōkaito.

<sup>16</sup> Akka a Nios Ifofaa fētsa afara chakafaito ōikī, a Nios Ifofaa fētsa Nios kīfixotiro āfe chaka xatenō. Akka Epa Niospa ato nimatiro isharapakexanōfo. Askafikanax fetsafāfe oa Nios Ifofafo keskara iyokanax mā potakaxō chaka shināfafāikakī Nios kachikiri fakōinafo. Askarafokai tsōa ato nimatiroma nīpaxanōfo. Naax omiskōipakenakafo mēra fokani. Atoōnoa Epa Nios kīfixokāfe ixō ē mato yoiama. <sup>17</sup> A Niospa noko yoiyai keskara nō nikayamaxō nō chaka shināi. Askafixō anā nō chaka xatepaiyaito ōikī nōko ōiti noko fetsafaxotiro, nō anā chaka shināpaiyamanō.

<sup>18</sup> Mā nō Nios Ifofaano, noko fakefai. Nō āfe fake ixō nō tāpia nō anā chaka shināpaima, māmāi noko Niospa ōiti fetsafaano. Mā nō askano Satanás afara anā noko chakafama-paiyaito, Niospa Fakekōichi Jesús noko ifixō noko kexesharatiro. Noko askafakē Satanás noko afeska fatiroma. <sup>19</sup> Mā nō tāpia nō Niospa fake. Akka fetsafāfe Nios nikakaspafono, afo Satanás ato shināmani āto ifo inōfo. <sup>20</sup> Niospa Fake nokoki oni. Noko tāpimaniyoi āfe Apa nō tāpisharakōinō. Āfe Apafi mēstekōi ikaki. Akka nō Jesús fe rafeax āfe Apa feri nō rafetiro. Nā Jesucristo Niospa Fake. Nāri Nioskōi. Nāskakē noko nimapakexatiro. <sup>21</sup> Efe yora mīshtichi, Nios fisti Ifofakāfe. Satanás mato afara chakafamapaiyaito afe rafeyamakāfe. Askatari afara chakafo mā ifofapaiikī afo shināyamakāfe. Nios fisti shinākāfe.

Nā tii ē mato kirika kenexō fomai, efe yora mīshtichi.

*Ēkīa Juan*



## Juan Jesús Chanĩmara Faafo Afianã Kirika Kenexõ Fomani

### *Juan a Nios Ifofaafo ato kirika kenexõ ato fomani*

<sup>1</sup> Ëkĩa Juan, ã Jesús Ifofaafo ã ato kexemis ã mato kirika kenexõ fomai mã tâpinõ. Mã mã tâpia Niospa mato katonĩ afe yorafo mã inõ. Chanĩma, ã mato noikõĩ, eres fistima, a Jesús Ifofaafo feta ã mato noikõĩ. <sup>2</sup> Nõ mato noikõĩ Jesúsmãĩ nofe rafeano. Akka mã Jesús nofe rafepakenaka. <sup>3</sup> Efe yorafãfe, ã mato yoisharanõ. Nõko Epa Nios feta ãfe Fake Jesús noko noikõĩ. Nãskakẽ noko noikõĩyanã nõko õiti mẽra noko inimamasharai, nõko õiti mẽra nõ inimasharakõinõ.

<sup>4</sup> Mẽ tâpia ã inimaifinakõĩ ranãri mã isharakõĩaino a Epa Niospa noko yoini keskai. Nãskakẽ ã matoki inimakõĩni. <sup>5</sup> Ea nikakãfe ã mato yoisharanõ, mã ranã noinãkãfe. Mã mã nikamiskĩ mã mã Jesús Ifofakĩ taefanitĩa. Akka ãa shinãxõ ã mato meka fena kenexonima, mã mã nikamis. Nãskakẽ mã ranã noinãsharakãfe. <sup>6</sup> Nõ Nios noikĩ a noko yoiai keskara nõ aki. Niospa taefakĩ noko yoiaito mã mã nikamiskĩ iskafakĩ yoiaito: “Mãa ranã noinãkãfe,” ixõ noko yoiaito mã mã nikamis.

### *Ãa anorima yoikĩ ato pãramisfo*

<sup>7</sup> A ãa ato pãramisfo ato mẽra fofãsamisfo. Afãfe, “Na Jesucristo Niospa Fake Apa Nios ariax oni feronãfakekõĩ ixikĩ,” ixõ yoimisfoma. Afãfe ato pãrapaimisfo Cristo noikaspakata imisfo. <sup>8</sup> Mãri ato keskara iyamakãfe. Shinãfai ikãfe ato keskarama. Mã askakĩ mã ato Nios yoisharaimano tâpitirofoma, fenotirofo. Akka ato Niospa meka mẽstekõĩ ato yoisharakõikãfe Nios tâpisharakõinõfo. Nãskakẽ mãri afara shara a Niospa mato mekexona mã fitiro, mã Nios yonoxosharakĩ.

<sup>9</sup> Akka fetsafãfe a Cristo noko yoiai keskara nikayamakaxõ anã shinãkanima, ãa fanĩrira shinãkani. Afokai Nios fe rafeafoma. Akka fetsafãfe a Cristo yoiai anori nikakanax Apa Nios fe rafekõikata ãfe Fake Cristo feri rafekani. <sup>10</sup> Akka yora fetsa matoki oxõ Cristoõnoa yoisharaima fanĩrira yoi, askara fe rafeyamakãfe. “Noko Niospa meka yoife,” fayamakãfe. <sup>11</sup> Nãskakẽ askara yora mã chanĩmara fakĩ afe rafexõ afeta mã anorima yoitiro chaka shinãkĩ.

### *Mã Juan mekai xatekĩ ato yoisharani*

<sup>12</sup> Ë mato kirika kenexõ ichapa fomapaifikĩ askatamaroko ã matoki nokopai mato fe yoinãxiki. Ë matoki nokoano nõ inima faatanãsharanõ.

<sup>13</sup> Nã efe yora mĩshtichi, Nios Ifofafo nonoax ichanãmisfo afãferi. Nã tii ã mato yoi kirika kenexõ.

*Ëkĩa Juan*

## Juan Gayo Kirika Kenexō Fomani

### *Juan feronāfake yoisharani, āfe ane Gayo*

<sup>1</sup> Efe yorashta Gayo, ĕkĭa Juan. Ĕ xini ichapa amis a Nios chanĭmara faafo ĕ ato kexekĭ. Ĕ mia kirika kenexō fomai mĭ tĕpinō. Ĕ mia noikōi.

<sup>2</sup> Yamā, ĕ mia noikĭ Nios kĭfixōfafĕini mĭ yonayamanō. Mĕ tĕpia mĭ ōiti sharakōi mĕ mĭ Nios Ifofasharai. Nāskakĕ ĕ mia kĭfixōfafĕini mia kexesharanō mĭ afeskanōma shara mĭ inō. <sup>3</sup> Mĕ mia nikamis mĭ Nios potakaspakōiaito. Nāskaxō a Ifofafo mĭ ika anoax ekeki nokokaxō ea iskafamisfo: “Nā Gayopa Niospa meka nikasharai,” ixō ea yoimisfo. Nā nikai ĕ mikiki inimai finakōi. <sup>4</sup> Ĕfe fakefĕfe Jesŭs Ifokōifaifĕfe nikai ĕ inimakōimĭs. Afara fĕtsakai ea inimamakĭ iskafatiroma.

<sup>5</sup> Yamā, ĕ mia noisharai. Mĕ nika a Nios Ifofafo yora fetsafo mĭ ato kexemis mia ano nokoifĕfe, mĭ ato ĭkisharakōia, ato ōiyamafikatsaxakĭ. <sup>6</sup> Nāskakĕ na mĭ ato kexeafĕfe noko yoitafo mia yoikakĭ. Nāskakĕ na Nios yoiti pexe mĕranoax ichanākanax fanĕikani mĕ nō nika mĭ ato noikĭ, mĭ ato ĭkisharakōia. Nāskata ĕ mia yoikĭ iskafai: Afara ato inĕfe Niospa meka ato yoinōfo pexe tii, Niospa meka ato yoifofĕsafanōfo. Mĭ askafaino Nios mikiki inimai. <sup>7</sup> Nĕfo fofĕsamisfo Jesŭsnoa meka shara ato yoifofĕsafakani. Afara yopafikĕki a Jesŭs chanĭmara faafoma ato afaa yōkamisfoma. <sup>8</sup> Nāskakĕ a Nios Ifofafo nō ato kexesharatiro afara fichipaiyafĕfe nō ato inĕtiro. Nō ato askafakĭ nōri ato feta Nios yonoxomis itiro.

### *Yora fetsa āfe ane Diótrefes chaka ini*

<sup>9</sup> A Niospa meka nikapaikani ichanĕmisfo ĕ ato kirika kenexō fomayamea ōinōfo. Akka Diótrefes ea nikakaspamis, “Ĕ āto xanĭfo finakōia inōra,” ixō. Nāskaxō ea ōikaspai, efe rafepaima. <sup>10</sup> Ea mekafakĭ chakafamis, ea yafi a Niospa meka yoimisfori noko chakafai. Askatari a Nios Ifofafo fetsafo ato ifikaspamis Niospa meka ato yoiyamanōfo. Fetsafĕfe ato ifipaiifaifono a Diótrefes ato ifimakaspamis. “Mĕ anĕ nofe ichanĕtiroma nono ikiax,” ixō ato chakafamis. Nāskakĕ ĕ matoki nokoxō ĕ mato xafakĭakōi yoi kaikai mĕ tĕpisharakōinō, afeskakĭ ato chakafaimĕkai. <sup>11</sup> Yamā, ōiti chakayafo keskara mĭri iyamafe. Akka a ōiti sharayafo keskara mĭri ife. A ato sharafamisfo Niospa fakefokĭ. Akka a ato chakafamisfo Nios tĕpimisfoma afe keskaramĕki.

### *Na yora fetsari āfe ane Demetrio shara ini*

<sup>12</sup> Keyokōichi a yoisharakani Demetrioōnoa iskafakakĭ: “Na Demetrio feronāfake sharafinakōia,” ixō yoikani. Nōri anori yoimis. Nō anori yoiaito mĭri chanĭmara fatiro, mĕ mĭmĕi noko tĕpixō.

### *Mĕ mekai xatekĭ Juan ato meka shara fomani*

<sup>13</sup> Ĕ mia ichapa yoipaifkĭ ĕ anĕ mia kirika ichapa kenexonima. Kaxō ĕ mia yoisharaxiki. <sup>14</sup> Akka ĕ mikiki koshi nokosharapai. Ĕ mikiki nokoax mefe yoinōnĕsharaxiki.

<sup>15</sup> Mĭri isharafe, ōiti fekaxteyamaxiki. Na efe ikafĕferi mia meka shara fomapaikani. Mĭri a mefe ikafo noko ato yoioxsharafe. Nāskakĕ nĕ tii ĕ mia yoi kirika kenexō mia fomai.

*Ĕkĭa Juan*

## Judaspa Jesús Chanĩmara Faafo Kirika Kenexõ Fomani

### *Judaspa ato kirika kenexoni a Nios Ifofafo*

<sup>1</sup> Èkĩa Judas, Santiago ãfe exto. Nõko Ifo Jesucristo ã yonoxomis. È mato kirika kenexoni a Epa Niospa mato noikĩ mato ifini tii ãfenãkõĩ faxiki. Akka Epa Niospa nõko Ifo Jesucristoõxõ mato kexesharafafãini. <sup>2</sup> Epa Niospa mato noikĩ, mato inima-masharakõinõ mato õiti fekaxteyamanõ, askatari mato noikĩfinakõinõ.

### *Fetsafãfe chanĩ fisti ato yoipaonifo* (2 Pe. 2.1-17)

<sup>3</sup> Efe yora mĩshtichi, nõko Ifãfe noko nãxoni keskara ã yoi, a noko imapaiyai keskai nõ chipo afe ixiai keskaraõnoa ã mato kenexopaifikĩ mẽ nika mã meka fetsa yopaito. Nãskakẽ iskaratĩa ã mato kirika kenexoni mã Jesucristo nikakõiyana mã shinãfafãinõ. Nãnori Epa Niospa ãfe Fakeõxõ noko tãpimani. Nã ãfe Fakeõnoa noko tãpimani keskafakĩ nã fisti nõ yopai Ifo sharafaxiki. Akka meka fetsa mato fanĩrira yoipaiyaifãfe ato nikatamaroko nã mato yoini keskara nã fisti nikakõikãfe. <sup>4</sup> Yora chakafo mato mẽra fõkaxõ anorima mato pãrakani chaka tãpimapaikakĩ. Afokai Niospa yorafoma. Akka nõ afara chakafamisxakĩ nõ Epa Nios yoiato nõko chaka noko soaxonano nõ afe ipaxatiro. Nãskafekẽ nãfãfe fanĩrira chakakõĩ mato yoipaikani, iskafakĩ mato yoipaikakĩ: “Mã Jesús Ifofaxõ nã mã apaiyai keskara mã atiro, mato ãfima fe mã ikaino, kẽrofori ãfe fenema fe itirofo. Nãskaxõ nã afara chaka fetsafo mã apaikĩ mã atiro. Mã askafaito Niospa mato omiskõimatiroma,” ikaxõ fanĩrira mato yoipaikani. Nõko Ifo Jesucristo fisti nikakaspamisfo. Nã keskarafoõnoa Niospa shinãmanaino keneyonifo Niospa ato omiskõimakĩ finakõixii.

<sup>5</sup> Akka mã mã tãpifekẽ anã ã mato yoipai nõko Ifãfe Ejipto anoa israelifo ato ifini anã omiskõinõfoma. Akka ato ifinixakĩ chipo a chanĩmara faafoma ato keyokõĩ reteni. <sup>6</sup> Nãskatari Niospa ãfe ãjirifo taeyoi Nios fe isharayopaonifo. Nãfãferi Epa Nios yonosharaxoyopaonifo. Nios fe isharafiakatsaxakĩ atirifãfe afara chaka shinãkakĩ anã Nios Ifofapainifoma. Askaifãfe õikĩ Niospa kaninãnã metexkereaxõ fakishifã mẽra ato nĩchiyoni. Nãskaxõ nã nikamisfoma ato omiskõimanaitĩa ato ichanãfaxõ nã omiskõipakenakafo mẽra ato potaxii. <sup>7</sup> Nã Niospa ãjirifãfe afara chakafapaonifo keskafakĩ Sodoma anofo feta Gomorra anoafãfe a pexe rasi ano chaima ikafãferi nãskafapaonifo afara chakafakakĩ. Feronãfakefãfe ãto ãfimafo chotaifono, kẽrofãferi ãto fenemafo chotamapaonifo. Askatari feronãfakefo ãa ranã chotanãpaonifo, kẽrofori askapaonifo ãa ranã chotanãkani. Nãskarafo õikĩ Niospa ato omiskõimani, chiifã tokiriya nai mẽraxõ atoki potani. Nã askafanioxõ Niospa noko tãpimani. Nã tãpixõ nõ tãpitiro fatorafãfe ãto chaka xateyamakanax nãskarifiakani, chiifã mẽranoax omiskõipakenakafo.

<sup>8</sup> Nãskarifiakĩ nã chanĩmisfãfe afara chaka fisti shinãfafãikani. Nãskakaxõ afia ãto namapa õia keskafakakĩ, nãskakõĩ fakani, ãto yora chakanafakakĩ. Askatari Nios nikakaspakani. Nãskakaxori Niospa ãjirifori ãchamisfo. <sup>9</sup> Akka Niospa ãfe ãjiri Miguel xanĩfokõifixõ atokai Satanás ãchanima. Mã Moisés naano Satanás Miguel fe feratenãni. Miguel Moisés ãfe yora maifapaifiaino, akka Satanás Moisés ãfe yora chakafapaixikĩ fipaini. Askafaito õikĩ Miguel afe feratenãfikĩ ãchanima. Yoikĩ iskafani: “Satanás, ã mia afeskafatiroma. Akka ãfe Ifo Niospa mia yoinõ mẽ omiskõinõ,” ixõ yoini. <sup>10</sup> Akka nã feronãfakefãfe mato mẽra fõkaxõ nã afaa tãpamafikaxõ meka chaka yoimisfo. Askatari nã apaiyai keskara fisti famisfo, nã yoinãto shinãsharatiroma keskarafo. Nãskakaxõ ãa afarafo chakafakanax omiskõipakenakafo.

<sup>11</sup> Ooa. Nã Caín ini keskarafo. Caín ãfe onefetsa noikaspapaoni. Nãskakẽ reteni. Askatari nã Balaam kori fisti fichipaikĩ Nios kachikiri fani. Na yorafori nãskarafori.

Nāfori nā Coré keskarafō. Nā Coré āfe xanīfo Moisés nikakaspapaoni. Nāskakē nikakas-paito Niospa reteni, nāskarifikī nā ato pāramisfo Niospa askari faxii omiskōimakī. <sup>12</sup> Akka mā noinākī ayayanā mā pimis nōko Ifo shināyanā. Akka nā yora chakafori rāfitama mato fe ichanākaxō nōko Ifo shināmifoma. Fetsafo noitama āakōi noimemisfo. “Nō mato yoi mato kexesharaxiki,” ifiakaxō tsōa afaa yoisharamisma. Nāfo nā nai kōi oimais keskarafō. Nō nai kōi fakish ōikī mā oi feira nō fatiro inimayanā. Akka oi iyamaino nēfe nai kōi potano nō shināchakatiro. Nā ato kexemisfo keskarafofikanax afāfe nōko Ifoōnoa tsōa tāpiama. Nāskatari nā yorafo nā ifi fimimistīa fimiyamai keskarafō. Nā ifi mā nai rafea keskarafō, mā nakē āfe tapo tsekatirofo. Nāskarifiakī nā ato pāramisfāfe tsōa ato Jesús Ifofamatiroma afe nīpaxanōfo. <sup>13</sup> Nāfo oa fakafā poo ikī fākox potatiro keskarafō. Nāskakaxō afāfe afaa shara yoitirofoma, mēxotaima afara chaka yoikani rāfimifoma. Nāfo nā fishi keskarafō. Mā fishi nāmā pakexō, anā chaxatiroma. Nāskarifiakī nā mato pāramisfo Nios kachikiri fakanax fakishifā mēra fokani, Niospa nā keskarafō ato tāpimakī ato omiskōimakōixii anoax omiskōipakexanōfo.

<sup>14</sup> Nāskatari Enoc chipo fakeni, mā Adán afetiama Epa Niospa onifanino. Akka Enoc āfe xini ini Adán. Nā Enoc nā chanīmisfāfe ato pāranōpokoxiaifoōnoa yoini. Nāskata aato ato yoikī iskafani: “Nikakapo, ē ōia nōko Ifo oi, afe nai mēra ikafo fe ichapakōifo tsōa ato tanatiroma afe fexikani. <sup>15</sup> Nāskaxō ato yoipakexii nā niyoxō amisfo keskara. Keyokōi maitio anoafō nōko Ifoki fexikani, fatofomāki afe yorafo a afe ipanakafo ato ōinō, askayamai fatoforimākai a chanīmara fayamakanax omiskōipakenakafo mēra foaifo. Akka nā nikamisfoma afe yorafoma. Akka nā chakafamisfo tii ato yoita, niyokaxō Nios nikakaspapaonifoōnoa yoita, keyokōichi mekafakī chakafamisfoōnoari ato yoixii,” ixō Enoc ato yoini. <sup>16</sup> Nāfāfe yōachepeyanā ato mekafamisfo. Nā chakafapaiyai keskara fisti shināfafāimisfo. Askaxori fetsafo pārakaxō afara fīapaimisfo ea ināsharakanira ixō shināfafāimisfo.

### *Nā Nios Ifofafō ato yoisharani isharanōfo*

<sup>17</sup> Efe yora mīshtichi, nā nōko Ifo Jesucristoōnoa mato yoimisfāfe mato yoinifo keskara shināmakiyamakāfe. <sup>18</sup> Iskafakī mato yoinifo: “Nōko Ifo mā chaima oaino nā Jesús Ifofaafāfema mato kaxemetsama faxikani, Niospa meka nikakaspakakī. Nāfāfe afaa shinātama nā chakafapaiyai fisti shināfafāikani,” ixō mato yoinifo. <sup>19</sup> Nā keskarafāfe mato paxkanā fatirofo, afarafo chakafo shināfafāikani. Askarafō Niospa Yōshi Shara ato mēra naneama.

<sup>20</sup> Akka efe yora mīshtichi, kexemesharata isharakōikāfe Niospa āfe meka shara nikakōiyanā. Nāskakē kīfikāfe āfe Yōshi Sharaōxō mato imapaiyai keskara mato tāpimanō. <sup>21</sup> Nāskakē Jesús Ifosharakōifakāfe, Epa Niospa mato noikōiaito mā mā meemiski. Nōko Ifo Jesucristo noko noikōikī nō nafiakē noko nimapakenaka nō afe ipaxanō.

<sup>22</sup> Fetsafāfe iskafakī shināifono: “Ētsa, chanīma rakikīa,” ixō shināifono, fenāmāshta ato yoisharakāfe nikasharakōinōfo. <sup>23</sup> Oa afara chiifā mēra pakeax koofaito, nō koshi firisafatiro keskafakī nāskarifiakī fetsafāfe afara chakafaifono ato noikī yoisharakāfe Jesús chanīmara fanōfo, chiifā mēra foyamanōfo. Akka yora chakafinakōiafori mā ato noikī ato yoisharakāfe xatenōfo, chiifā mēranoax omiskōiyamanōfo. Nāskatari nō kooyoxō rapati chakana faxō nō anā fichipaitiroma. Nāskatari āto chakafo noikaspaifo keskara iyamakāfe. Ato noikōita nā afara chakafaifo keskafakī ato feta ayamakāfe.

### *Mā mekai xatekī Niosnoa ato yoisharani*

<sup>24-25</sup> Nōko Ifo Nios fisti finakōia, nāato keyokōi tāpiakōia. Askatari nāato noko ifimis. Āfe kerex sharaōxō noko kexesharatiro nō fenonōma. Nāato noko inimamasharakōi nō nai mēra kai, afaa chakafamisma keskarax. Nā sharafinakōia, efapakōi, afama mīshti fatiro, tsōa atiro ma keskafakī nōko Ifo Jesucristoōxō atiro. Nāskarakōi mēxotaima ipanaka. Nā tii.

*Ēkīa Judas*

## Jesucristo Juan Ōimani Keskara

### *Afara afeskara ixiai anori Jesucristo Juan tāpimani*

<sup>1-2</sup> Efe yora mīstichi, iskaratīa ē mato kirika kenexō fomai mā tāpinō. Ēkīa Juan ē mato kirika kenexō fomai. Nai mēraxō Epa Niospa Jesucristo yoini afe keskara a inōpokoai fo nāmānoafo a yonoxomisfo tāpimaximākai. Askafaito nikakī Jesús āfe ājiri ekeki nīchia. Anoxori ea ājirinī yoinō afe keskara ikimākai nāmānoafo. Ea ōimanaito mē ōia a inōpokoai fo xafakīakōi. Askaito ōikī ē kirika kenea a inōpokoai fo anori a Niospa Jesús yoia anorikōi mā tāpisharakōinō.

<sup>3</sup> Na ē mato yoiai ikataima. A inōpokoai ē mato yoiai na kirika ano. Nā ōikani fetsafori inimanōfo. Askatari a nikaifori chanīmara fakanax, afori inimaxikani. Nā ē mato yoiai keskai mā samamashta iki. Ea nikasharakāfe.

### *Juan a ichanāmisfo anoafo siete Nios yoiti pexe anoato kirika kenexō fomani tāpinōfo*

<sup>4-5</sup> Nā Asia mai anoafo a Nios Ifofaafo tii siete pexefo anoafo ē mato kirika kenexō fomai. A ē mato yoiai anori ōisharakōikāfe. Afetīama Epa Nios niyopaofinixakī iskaratīa nia. Epa Nios nīpanaka. Āfe Yōshi Sharari afe itiani. Nāskakē Epa Nios feta āfe Yōshi Sharapa, āfe Fake Jesucristo mato noikī māto ōiti mēra mato shināmasharapainō afanā māto ōiti fekaxtefanōma. Nāskakē nōko Ifo Jesucristo Niospa meka noko yoimis chanīmakōi. Jesúsfi Niospa Fakekōifekē retenifo. Mā retexō maifafiafono Apa Niospa anā otofani anā nanakama. Fato fetsa askayomisma. Nāskaxō Apa Nios fe rafexō a xanīfofo maitio anoafo ato ikixii xanīfokōi ixō. Aatofi noko noikōiakī, āfe imi foax noko nāxoni Satanás chaka nōko ifo inōma. <sup>6</sup> Nō aōnoax nō Epa Nios afe yorakōi ixō noko yonomapaiyai keskafakī nō anō. Nō askai afe yorakōifo ixō nōri yora fetsafo nō kīfixotiro Epa Niospa noko nikai. Nāskarafoskōi nōko Ifo Jesucristo noko imai. Nāskakē keyokōi yorafāfe aōxō iskafakakī yoipakenakafo: “Aicho, tsoa fetsakai na Jesús keskarama. Nā fisti sharafinakōia. Ares fisti nōko Ifo nīpanaka. Ares fisti keyokōi yorafo ato ikipakenaka,” ixō yoipakenakafo. Askapakexapainō.

<sup>7</sup> Ōikapo. Oa nai kōi keskara sharakōi nōko Ifo Jesús oaito keyokōi yorafāfe ōixikani. Askatari a retenifāferi ōikani, akiki rāfixikani. Oaito ōikani keyokōi yorafo a Ifofamisfo-mafo, “¿Afeskakī nō Jesús Ifofamismamē?” ikanax oiaxikani, shināmitsakōixikani.

<sup>8</sup> Epa Niospa yoia: “Afara onifataima ē iyopaoni. Ēfi nīpanakakī. Afetīara na nōko mai keyoai eres fisti ē ato yoitiro. Nāskaxō ē afama mīshti famis. Akka ē niyopaoni. Nāskatari ē nīpanaka,” ixō nōko Ifo Niospa yoia.

### *Nōko Ifo Jesucristo āakōi oa namakē ōiai keskara Juan ōimani*

<sup>9</sup> Ēkīa Juan, ē māto ochikōi. Nāskax māri Jesús Ifofaax mā efe yorakī. Askax mā aōnoax omiskōifikī, mā tenemis. Nāskariai ēri aōnoax omiskōifikī ē tenei. Ē Niospa meka ato yoita Jesúsnoari ē ato yoimis. Ea nikakaspakakī, āto xanīfāfe sorarofo ea achimaxō, fakafā nakirafe ea ato nīchimana āfe nāsīmā, āfe ane Patmos ano. <sup>10</sup> Ē mato yoinō, ea nikakāfe. Anoxō iskafani. A Jesús otoni penata, nomīkonō, Niospa Yōshi Sharapa ea ikixō a ea tāpimapaiyai ea ōimana. Oa namakē nō ōimis keskara xafakīakōi ea ōimana. Askata ea kachiorixori fāsikōi oa xāaiti keskarato ea yoiaito ē nika. <sup>11</sup> “Nā mī ōiaifo fetsafo kenexōfe. A kirika kenexō Jesús Ifofamisfo tii ato fomafe. A siete Nios yoiti pexe anoafo Asia anoato fomafe, afāfe ōinōfo. A Nios Ifofamisfo a pexe tii Efeso anoafo fomata, Esmīrnā anoafo fomata, Pérgamo anoafo fomata, Tiatira anoafo fomata, Sardis anoafo fomata, Filadelfia anoafo fomata, Laodicea anoafori nā mī ōiaifo ato kirika kenexō ato fomafe,” ea faa.

<sup>12</sup> Ea askafaito ẽ fesoakekafã ẽ õia tsõa ea yoimãkai ixõ. Ẽ õia siete oa rãpari efapa õta keskara oro ẽ õia. <sup>13</sup> Nãskai rãpari nakirafe feronãfake xanĩfo finakõia nia keskara ẽ õia. Ẽfe tari ẽfe tae fepokõia, ẽfe sitorari orokõi aõ nonexemea ika. <sup>14</sup> Askata ẽfe foo oxokõi. Askatari ẽfe fero oa chii keskara xafakĩakõi. (Nãskarifiakĩ xafakĩakõi Jesús noko õitiro a nõ shinãi keskara.) <sup>15</sup> Askatari ẽfe taeri chaxasharakõia ika. Ẽfe mekari oa oi kaya feito nõ nikamis keskarakõi. <sup>16</sup> Ẽfe põya kayakai aõri ẽfe mifi kamaki siete fishi keskara ika. Ẽfe ana keno chainipa keskara aostamea ika. Askatari ẽfe femãnã fafekõi oa xini nõ õimis keskara ika.

<sup>17</sup> Nãskara õi ẽ pakea, oa nai keskara. Ẽ askaito õikĩ ea ramã ẽfe mifi kayakai aõxori. Ẽ askaito ea yoia iskafakĩ: “Rateyamafe. Ẽ Jesúski. Afara onifataima ẽ iyopaoniki. Ẽfi anã nanakamaki. <sup>18</sup> Iskaratĩari ẽ nia. Mẽ nafianixakĩ, iskaratĩa ẽ nia. Ẽ anã nanakama. Ẽ anã afeska pishta nakama. Eres fisti ẽ ato namata, chiifã mẽra ẽ ato potatiro a ea nikakaspamisfo. <sup>19</sup> Nãskakẽ a mĩ taefakĩ õiafo kirikaki kenefe. Askatari na mĩ iskaratĩa õiaifori kirikaki kenefe. Askatari a chipo ixiaifori kenefe. <sup>20</sup> Ẽ mia yoinõ afeskai siete fishimẽ ẽfe mẽke kayakai aõri; askatari afeskai siete rãpari oro keskara otamãki. Na siete fishi mĩ õiai nãato noko shinãmamis siete Niospa meka yoimisfo Nios yoiti pexe mẽranoa ichanãmisfo. Askatari nã siete rãpari keskara mĩ õiai nãatori noko shinãmamis siete Nios yoiti pexe mẽranoax ichanãmisfo Nios Ifofakanax,” ixõ ea faa.

## 2

### *Jesús a Ifofaafo Efeso anoafõ ato yoini taekõifakĩ*

<sup>1</sup> Jesús ea yoia iskafakĩ: “Efeso anoxõ a ea Ifofaafo a ato Niospa meka yoimisto na kirika ato anexonaito nikanõfo, iskafakĩ kenexõfe: ‘Èkĩa mãto Ifo Jesús keyokõi yorafo ẽfe Epa Niospa meka yoimisfo ẽ ato kexetaifaa. A ẽ mato yoiai anori ea nikasharakõikãfe. <sup>2</sup> A mã ikai keskara mẽ tâpia, mẽ mato õi. Mãfi eõxõ fãsi yonosharakõimiskĩ. Afara fetsa afeskara afiaito mã tenekõimis. A yorafãfe afarafo chakafamisfo anorikai mã tâpipaimisma. Akiki mã inimapaimisma afara chakafafono, nãskax mã ato fe rafekaspamis. Yora fetsafãferi mato yoikĩ iskafakani: “Cristo ea nĩchia ẽ mato yoinõ,” ixõ mato yoiaifãfe, “Nõ ato nikayonõ,” ixõ mã ato nikataifaa. Fanĩrira mato yoiaito anã chanĩki yoimara mã faima mẽ mato õia mã askafaito. Anorima yoi ãa chanĩmisfo mã mã tâpia. <sup>3</sup> Nãskax mã eõnoax omiskõikĩ mã tenemis ea potakaspakĩ. <sup>4</sup> Mã anori shara shinãfimiskẽ ẽ anã meka fetsari yoinõ. Taefakĩ mã ea noiyopaonixakĩ anã iskaratĩa mã ea anã noisharaima. Mã mã ea shinãmaki fetsea. <sup>5</sup> Shinãsharakãfe a mã taefakĩ shinãyopaoni anori. A ea noikĩ mã taefani keskafakĩ anã ea noikãfe. Askatari mã ranã mã nõinãyopaoni keskakõikãfe. Akka mã ea tanaima, oa chii nokaito nõ anã kẽtefatiro keskafakãfe ea shinãkĩ. Mã ea Ifofasharayamainokai chipo tsõa anã mato tanaima. Mã ichanãi ano anã tsoakai mato fe ichanãima. <sup>6</sup> Mã askafixõ afara fetsa mã shara famis. A feronãfake ẽfe ane Nĩkoraita fanĩrira yoiaito nikakakĩ atirifãfe mato anoxõ nikakaxõ, afãferi chakafamisfo keskafakĩ ẽri ato noikaspai. A ẽ noikaspai keskafakĩ mãri efeta noikaspai. <sup>7</sup> Mã pachoyakĩ ea nikakõikãfe. Niospa Yõshi Sharapa mato yoiaito nikasharakõikãfe. Satanás mato fanĩrira shinãmapaimiskĩ. A Satanás finõinĩfofã ea kachikiri fatama ea Ifofasharakõiaito, aafi Epa Nios ano ẽ ikimaxii efe isharpakexanõ,” ixõ Jesús ea yoia anori Efeso anoafõ a chanĩmara faafo ato ẽ kenexonõ.

### *Jesús Ifofaafo Esmĩrnã anoafõ ato yoini*

<sup>8</sup> Anã Jesús ea yoia iskafakĩ: “A ea Ifofamisfo Esmĩrnã anoafõ a ato Niospa meka yoimis ẽ yoinõ ea kirika kenexõfe iskafakĩ: ‘Èkĩa mãto Ifo Jesús ẽ mato yoi mã tâpinõ. Ea nikasharakãfe. Nã afama mĩshti onifataima ẽ iyopaoni. Iskaratĩa ẽ nĩpanaka. Mẽ nayofinixakĩ ẽ anã nanakama. Ẽ mato nonori yoi iskafakĩ: <sup>9</sup> Mã omiskõiaito mẽ õi. Askatari mã afaayafoma. Mã askafiaino ẽ mato fe ikano, ea keskarari mã shara itiro.

Mē tāpia matoñoa yora fetsafāfe meka chakayoiaifāfe. “Nō judeofo, nō Nios Ifofamis,” ikaxō yoiaifo afokai efe yorafoma. Afofi Satanás yorafoki. <sup>10</sup> Akka a inōpokoai ē mato yoinō. Satanás ifoafāfe fatora fetsa fisti mato karaxa mēra ikimaxikani mā ea shināmakimā kai ōixikakī. A mato mesenifaifono rateyamakāfe. Ea shināmakitama nonori shinākāfe iskafakī: “Ea retefaifono ē meseima, ē Nios ari kai. Ēfe Ifāfe ea potanakama. Ē ēfe Ifo noikī finakōifafāini,” ixō yoikāfe. Mā askax, nakē, ē mato ĩkipakenaka mā efe ĩpaxanō. <sup>11</sup> Mā pachoyakī nikasharakōikāfe Niospa Yōshi Sharapa mato yoiaito mā Jesús Ifofakī. Fetsa omiskōifikī ea shināmakiyamaito Satanás afeskafatiroma. Nāskax naax a omiskōipakenakafo mēra katiroma,’ ixō anori Jesús ea yoia a Ifofafo Esmīrnā anoafō ē ato kenexonō.

### *Jesús Pérgamo anoafō a chanīmara faafō ato yoini*

<sup>12</sup> Anā Jesús ea yoia iskafakī: “A ea Ifofamisfo Pérgamo anoafō a ato Niospa meka yoimis a ē yoipaiyai anori ē yoinō ea kirika kenexōfe tāpinōfo. Iskafakī kenefe: ‘Ēkīa mātō Ifo Jesús ē mato yoi mā tāpinō. Ēfe meka oa keno chainipa takairafe ikikōiai keskaraxō, ēfe mekapas a ea noikaspai fo tii ē ato chakafatiro kopikī. <sup>13</sup> Mē tāpia a pe xe rasi Pérgamo ano mā ika. A Pérgamo anoafāfe Satanás nikakōikani. Askaito ōi mā mesemisma, ea Ifo sharafai. “Jesús nōko Ifokōi,” ixō mā ato yoimis. A ea Ifofamis fetsa āfe ane Antipas eñoa ato yoimis ōikī mā reteafō noikaspakakī. Mā reteafāfe ōifiax mā atoki meseima, mā ea chai faama. Mātō ōiti mēra mā shināsharakōi. “Noko retefaifonokai nōko Ifo Jesús nō chai faima,” ixō mā yoimis. Anori mā shināi sharakōi. <sup>14-15</sup> Akka nāno afara fetsa a sharama ē mato yoipai. Fatora mā fetsa a Balaam afara chaka yoini keskara mā shināmakikaspai. Akka taeyoi xanīfo Balac israelifo chakana famapaini. Nāskaxō Balaam yōkani: “¿Afeskaxō mī kaifo ē ato chakana famatiromē?” faito, Balaam kemani iskafakī: “Mī ato yoitiro mī fista mēra ato ikikixiki. Nā mā akai keskarari akairi anōfo. Nā nōko niosra ixō afara onifaxō a mā pi ai mā ināmis. Nā israelifāfe pikanax chakananōfo mātō fista mēranoax. Askatari āto āfima fe ikanax chakananōfo,” fani. Iskaratīari nāskarāfori mā fisti rasi chakanafō nā Nicolaitafāfe ato afara chaka tāpimanaifo keskara ikafo. <sup>16</sup> Nāskakē anā iskaratīa askafayamakāfe. Nios Ifofakāfe, anā shinākāfe. Mātō chaka xatekāfe shināmitsayanā. Akka mā chaka xateyamaito, ē matoki samamashta nokoxō ēfe mekapa ē mato kopikī chakafatiro mā omiskōinō. Ēfe mekafi oa keno ikiai keskarakōikī. <sup>17</sup> Mā pachoyaki ea nikakāfe. Niospa Yōshi Sharapa eñoa mato yoiaito, nikasharakāfe. Satanás mato chakafamapai. Fētsa Satanás nikayamaxō ea kachikiri faamano, nā ē kexesharaxii nā ēfe Epa israelifo kexesharani keskafakī. Shinākapo. Epa Niospa israelifāfe āto xinifo a piaifo ato ināni fonāikaifāfe afaa piamaifāfe Epa Niospa nai mēraxō ato pōtani oa misi keskarāfo āfe ane mānā nā pinōfo ato pōtapaoni pena tii ato noikī. Nāskafakīri nā ea chanīmara faafō ea Ifo sharakōi faifo ē ato ināxii ēfe Yōshi Shara isharapakexanōfo. Ea ōiyamafiaifono pena tii ē āto ōiti xafasharakōi faxotiro. Askatari mā ea Ifo sharafaifono isharakōiyanā mā ea chanīmara faino, akka ē mato ane fetsafaxōi tsōa tāpimisma, nā fi ai fistichi tāpitiro. Tokiri oxosharakōikī nā tokiriki mā mātō ane kenea mātō ane fena ē mato ināxii. Nāskakē ea tāpisharakōixikani. Mā ōitisharayakōi ixii,’ ixō Jesús anori ea yoia a chanīmara faafō Pérgamo anoafō ē ato kenexonō.

### *Jesús a Tiatira anoafō a Ifofamisfo ato yoini*

<sup>18</sup> Anā Jesús ea yoikī iskafaa: “Ea Ifofafo Tiatira anoafō Niospa meka ato yoimis a ē yoipaiyai anori ē yoinō ea kirika kenexōfe iskafakī: ‘Ēkīa ē mātō Ifo Jesús ē mato yoisharapai mā tāpinō. Ēfe fero oa chii xoisai keskara. Nāskakē ē mato tāpikōia. Ēfe taeri nā keno fakka fakka ikai keskara. Nāskakē ē mato yoikī iskafai: <sup>19</sup> “Mē mato tāpia, nā mā afara shara famis. Mā nōinākōi. Askatari mā ea chanīmara faxō mā ea Ifokōi famis. Nāskakē fetsāfori mā noisharakōimis ato kexesharayanā. Mā omiskōifikī eōxō mā tenekōimis. Mā ea chanīmara fakī taefanitīa mā fetsāfo sharafamis. Nāskakē iskaratīari

mã ato noisharataifaa. <sup>20</sup> Mã mã askafimisno afara fetsa ã mato yoinõ a ã fichipaiyaima mã anã fichipainõma. Akka kãro fisti mato fe ichanãxõ, 'Ë Niospa meka ã mato yoinõ, ea nikakãfe,' ixõ mato yoipaikĩ, ãfe mekakõi mato yoima. Nã kãro Jezabel fanĩrira mato yoikĩ ãa mato pãramis. Mã Jesús Ifofafiamiskẽ mato pãramis iskafakĩ: 'Mãto ãfimafo chotakãfe; kãrofãferi mãto fenemafo chotamakãfe,' mato famis. Askatari mato yoimis iskafakĩ: 'Afara fetsa yora fakaxõ, nã nõko niosra ixõ, a mã piai ispaxõ nõko nios nõ inãira ixõ, ano fisti ichanãxõ, mã pitiro,' ixõ na kãro Jezabel mato yoikĩ mato pãramis. <sup>21</sup> A kãromã fanĩrira mato yoimis mẽ yoitaifamis anã chakafanõma. Ë yoifiaitokai ãfe chaka xatepaima. <sup>22</sup> Ë yoifiaino ea nikayamaito õikĩ ã isinĩ imaxii rakatsax omiskõinõ. Askata a fetsafori a keskara a sharashinãifoma ãto chaka xateyamaifãfe ã ato omiskõimani. <sup>23</sup> A kãromã shinãi keskarari shinãifo ã ato retexii. Ë askafaito, õikani a ea Ifofamisfo mai fetsafo arixõ tãpitirofo ã keyokõi yorafo ã tãpisharakõia. Mãto õitinĩ a mã shinãi anori mẽ tãpikõia. Tsõakai afaa pishta ekeki onetiroma. Ë keyokõi tãpikõia. Nãskakẽ mã afarafo shara famis ã mato shara faxii kopifakĩ. Akka a afarafo chakafamisfo ã ato omiskõimaxii kopikiri. <sup>24</sup> Efe yora mĩshtichi Tiatira anoafãfe, mã atiri nã kãromã mato fanĩrira yoipaiyai anori mã nikamisma. Satanás ato tãpimamis keskara mã anori shinãpaima. Askara shara. Nãskakẽ ã anã mato afaa fetsa yoima. <sup>25</sup> Nãskakẽ ã anã fistiri mato yoi. Na eõnoa mã tãpimis anori shinãmakiyamakãfe. Ë mato ifiyoai mã eõnoa tãpimis anori shinãmakipaiyamakãfe. <sup>26-28</sup> Fẽtsa Satanás finõkõixõ, ea fisti Ifokõifaax mã naax nã efe nĩpanaka. Ë ato xanĩfo imaxii. Epa Niospa ea xanĩfokõi ima keyokõi ã ato ikinõ. Nãskarifikã ã ato xanĩfo imatiro efeta na maitio anoafõ ato ikinõfo, mitsisipakõixõ. Akka a fetsafãfe ãfe meka shara nikakaspaifãfe nõ ato omiskõimaxii. Oa nõ kesho kerexkai nõ yamĩ moshaino moshitiro keskara afeskaxõ nõ anã shara fatiroma. Nãskarifikã nã nikayospamisfo nõ ato omiskõimanaitĩa tsoa pishta ato timamatiroma nanõfoma. Mã penaino, fishifã fisti fafeaito, keyokõichi yorafãfe õitirofo. Aa keskara ã anã oxii ea õisharanõfo. Ë anã nokoxõ, ã ato yoixii nã ea Ifofamisfo efe isharpapakexanõfo. <sup>29</sup> Mã pachoyakĩ ea nikasharakãfe. Niospa Yõshi Sharapa mato yoiai keskara nikasharakãfe," " ixõ Jesús anori ea yoia a Ifofafo Tiatira anoafõ ã ato kenexonõ.

### 3

#### *Jesús Sardis anoafõ a chanĩmara faafõ yoini*

<sup>1</sup> Askata anã Jesús ea yoia iskafakĩ: "A ea Ifofamisfo Sardis anoafõ a ato Niospa meka yoimis a ã yoipaiyai anori ã yoinõ ea kirika kenexõfe iskafakĩ: 'Ëkã mãto Ifo Jesús ã mato yoi mã tãpinõ. Niospa Yõshi Shara efe ika. Ëfi Nios yoimisfãfe ãto xanĩfokõiki. Ë mato yoi iskafakĩ: Mã ika keskara mẽ tãpimis. Yorafãfe matoõnoa iskafakĩ yoimisfo: "Nafo shara ikafo. Na Sardis anoafãfe mã Jesús Ifofakõinafo," ixõ matoõnoa yoimisfo. Mã isharamis keskara õikani. Mãri shinãmis iskafakĩ: "Nõ shara ikara" ifiax mã shara ikama. Mã ea Ifofasharakõiama. <sup>2</sup> Akka mã mã ea shinãmakia. Askakakĩma, anã a mã shinãyopaoni anori shinãkãfe. Mẽ tãpia Epa Niospa mato imapaiyai keskara mã isharakõiama. Ë mato yoiai keskara mã akama. Mã eõxõ asharayopaoni anã iskaratĩa mã anã askafaima. Mã ea shinãmakipai. Nãskakẽ afianã ea shinãsharainĩfofãkãfe. <sup>3</sup> Nã mã ãfe meka mãto õiti mẽra mã shinãyopaoni keskafakĩ anã shinãkãfe. A mã chakafamis keskara shinãkakima; ea Ifo shara fakãfe. Akka mã ea shinãyamaito ã matoki samama nokorisatiro mato omiskõimaxiki. Oa yometso tsõa tãpimano ãto pexe mẽra ikirisatiro keskai, ã matoki nokorisataxii mato omiskõimaxiki. <sup>4</sup> Askafiax a mato fe ichanãmisfo fisti rasi a Sardis ano ikafãfe chakafamisfoma. Nõko rapati choshtakõi nõ pekaxõ fatiro fetsa fena shara safexiki. Nãskafakĩri atirito mã chaka shinãpaoni keskara mã anã shinãima, mã mã pota. Nãskaxõ mẽstekõi mã eõnoa shinãi. Nãskaxõ rapati fenasharakõi keskara ã mato õitiro. Mã askano, mã ea ano nokoaito ã mato rapati oxokõi sharakõi inãxii mã efe ipaxanõ.



Mã isharakõimixakĩ mã efe rafepakenaka. Nã ã keskara shara ixikãki. <sup>5</sup> Tsoa ãfe meka shinãmakitama ea Ifofakaxõ, eõxõ Satanás finõkanax afo efe isharakõipakenakafo. Afori ã ato rapati oxokõi sharakõi inãxii. Askaifãferi ãfe Epa Niospa a ea Ifofaafo tii ãto ane tii kirikaki kenea. Nãskaxõ ãto ane kenea kirikaki a ea Ifofaifãfe tãpinõfo efe nĩpaxakãki. Askaifãfe ã ãto ane soanakama. Epa Nios feta ãfe ãjirifãfe õiaifono ã ato yoixii iskafakĩ: “Nafofi efe yorafokĩ,” ixõ ã ato yoixii. <sup>6</sup> Mã pachoyakĩ ea nikasharakãfe. Niospa Yõshi Sharaõxõ eõnoa a ea Ifofaafãfe yoiaito nikasharakõikãfe,’ ” ixõ anori ea Jesús yoia a Ifofaafo Sardis anoafõ ã ato kenexonõ.

### *Jesús Filadelfia anoafõ a chanĩmara faafõ yoini*

<sup>7</sup> Askata anã Jesús ea yoia iskafakĩ: “A ea Ifofaafo Filadelfia anoafõ a ato Niospa meka yoimis a ã yoinõ ea kirika kenexõfe iskafakĩ: ‘Èkĩa mãto Ifo Jesús ã mato yoi mã tãpinõ. Ë afaa pishta chakafamisma. Ë sharañnakõia. Ëfe meka chanĩmakõi. Nã fichipaiyai afama mĩshti sharafo ãfe pexe ano fapaoni, xanĩfo David. Akka ãfe pexe fepoti chamisyano tsoa ikitiroma ipaoni, chamismaisax. Akka ato ikimanaino ikitirofo. Akka ato ikimayamaino tsoa ikitiroma. Nãskarari mã Nios ano ikipai mã ikitiroma ã mato ikimayamaino ãmãi chamis keskaraxõ. Akka ã mato ikimanaino mã ikitiro Nios ano. Akka fetsafãfe ikikãfe mato faifono mã Nios ano ikitiroma. Eres fistichi ã mato ikimatiro. <sup>8</sup> A mã imis keskara mã tãpia. Mã yora ichapayamafaxõ mã shinãsharakõimis. A ã yoimis keskara mã ato tãpimatiro a mã amis keskara eõnoa. A ã yoimis anori tsõa mato xĩtitiroma. Yora fetsafãfe mato yoiaifo mã metsanima. Mato askafafiaifono ãfe meka mã shinãmakimisma. “Na Jesús nõko Ifo,” mã ea famis. <sup>9</sup> Fetsafãfe chanĩkakĩ mato yoimisfo iskafakĩ: “Nõ judeofo,” ixõ mato yoimisfo. Afokai Niospa afe yorafoma, Epa Nios chanĩmara faxoma. Afãfe Satanás ifofamisfo. Nãskakẽ ãfe Epa fe nõ ãto kaifoma. Afofi ãa chanĩmisfo. Shinãkãfe. Nã yorafo ã ato yoimaxii iskafakĩ yoinõfo: “Nõkai shara shinãima. Nõ afama. Chanĩma, Niospa ãfe Fake mato noisharakõimis,” ratokonõ mai chachikaxõ iskafakĩ mato yoixikani. <sup>10</sup> A ã mato yoimis anori mã isharaõia omiskõifikĩ mã tenekõimis ãfe meka nikakatsaxakĩ. Mã eõnoax omiskõifikĩ mã tenekõimis. Nãskakẽ mã ea shinãmakimismano ã mato kexesharaxii a omiskõia nokoaino nã maitio. Keyokõi omiskõixikani ea Ifofayamakanax. <sup>11</sup> Ë anã samama oxii matoki. Ea shinãmakiyamakãfe. Mã ea Ifofakĩ ea chaifayamakãfe. Mã ea chaifayamaino eõxõ Epa Niospa mato inãpaiyai keskara mato inãi fetsafãfe finõfoma. <sup>12</sup> Fetsa omiskõikĩ ãfe meka shinãmakitama tenekõifai ea Ifo sharakõi faxõ ato Satanás finõkõia. Nãskakẽ a ãfe Epa Nios ika ano, ã ato imasharapakenaka. Anoax anã faki fonakafoma. Nãskakẽ ã afo tãpimaxii afomã Epa Niospa yorafokẽ. Askaxõ ã ato yoixii iskafakĩ: “Nono Epa Nios ikano, nofe mã ipanaka,” ã ato faxii. A Niospa yorafo, judeofo, Jerusalén ano ipaonifo. Akka iskaratĩ Epa Nios ika ari Jerusalén fena. Jerusalén fena nai mẽra. Nai mẽra ifiax, chipo nãmã fotoxii. Akka fetsafo ea shinãmakikanaxma afo ano ipanakafo. Nãskakẽ fotoxõ ãfe Epa ane ã atoki nẽtaxii. Askatari Jerusalén fenapa aneri ã atoki nẽtaxii. Askatari ãfe ane fenari tsõa nikayomisma ã atoki nẽtaxii keyokõichi tãpinõfo ã ãto Ifokẽ. <sup>13</sup> Mã pachoyakĩ ea nikasharakõikãfe. A Niospa Yõshi Sharapa ato shinãmanaino yoiaifo anori nikasharakõikãfe,’ ” ixõ Jesús ea anori yoia a Ifofaafo Filadelfia anoafõ ã ato kenexonõ.

### *Jesús Laodicea anoafõ a chanĩmara faafõ ato yoini*

<sup>14</sup> Askata anã Jesús ea yoia iskafakĩ: “A ea Ifofaafo Laodicea anoafõ a ato Niospa meka yoimis a ã yoipaiyai anori ã yoinõ ea kirika kenexõfe iskafakĩ: ‘Èkĩa mãto Ifo Jesús ã mato yoi mã tãpinõ. Epa Niospa ea amapaiyai keskara ã fakatsaxakĩ ãfe meka yoinõ. Epa Niospa yoipaiyai keskara ã keyokõi yoimis. Ë chanĩkima yoimis. Epa Niospa onifani tii keyokõi ãfe ãto xanĩfokõikĩ. Ë mato iskafakĩ yoi: <sup>15-16</sup> Mã amis keskara mã tãpia. Ea kachikiri fayamakaxõ akka askafaxõ ã mato amapaiyai keskara mã fichipaikõia. Askara sharama. Afara matsishara nõ nĩskakĩ nõ inimayanã nõ ayatiro. Askatari afara

xana shara mā matsikē nō inimayanā ayatiro. Askafixokai afara katsa nō inimayanā ayatiroma. Katsa meei nō anāpaketiro. Nāskarifiiai ranāri yorafo afara xana keskarafō. Ea Ifo sharakōi faafo. Akka ranāri afara matsi keskarafō. Ēfe meka tāpisharafoma. Ē atoōnoax rafanā ikōini. Askafiakx kai mā kai xana yafi matsi keskarama. Mā katsa keskara. Afara katsa meekī nō anāpaketiro keskara ēri mato askafai. Nāskakē ē mato potaxii oa ē anāpakeai keskafakī. <sup>17</sup> Akka mā yoimis iskafakī: “Ē afara ichapaya. Ē afaa yopaima. Ē Niospa mekari tāpifinakōia,” ixō, anori mā yoifiax mā tāpiama mā chaka imis. Ooa. Ea mā yopafikī mā kakapaimis. Niospa āfe Yōshi Sharapa mato imapaiyai keskara mā ikama. Mā katsa keskarakī. Mā imis keskara mē tāpia. Akka ē kai askara fichipaima. Askafixō ē matoōnoa shināi keskara mā kai tāpiama. Mā nā fēxo keskarafō. Fēxo afara ōitiroma. Nāskarifiiai māri ēfe mekakōi nikasharamisma. Mā yora chitoria keskarafō. Akka mā tāpiama mā chitoria keskara. Yora chitoriato rapati yopai chitoria ixikima. Nāskarifiakī mā ea yopaima keskara ea yopafikī. <sup>18</sup> Akka ē mato yoisharapai mā afara chakafamis keskara mā anā anōma. Ea yōkakāfe ē mato tāpimanō afeskax mā ea keskara itiomākī. Eres fisti ē mato imasharatiro. Akka mā chitoria keskara. Akka ē mato rapati safemasharatiro mā anā rāfinōma. Akka rapati ē mato yoitamaro mā afara chakafamis ē mato yoi. Akka ē mato ōiti fetsafaxotiro ea keskara shara mā inō. Akka a afara mā chakafamis ē xafakīa ōia. Mā fēxo keskarakōi imis. Nāskakē ea yōkakāfe ē mato sharafanō, ēfe meka ē mato tāpimasharanō. <sup>19</sup> Akka ē mato noiyamakī ē anori mato yoikeranama. Askatamaroko ē mato keyokōi noikōi. Nāskakē ē mato omiskōimatiro tāpimakī mā chaka xatenō. Nāskaxō nāfori ē ato yoisharapai ea Ifo shara fanōfo. Akka a mā chaka shināmis keskara anā shināyamakāfe. Iskaratīa ēfe meka nikakōikāfe ē mato yoiai keskara axikakī māto chaka xatekāfe. <sup>20</sup> Shinākapo efe yora mīshtichi. Akka a yora pexe mēra ikipaikī ikisi pexe ifo kenatoshitiro pexe ifāfe ikimanō. Nāskarifiiai ē mato ano nokoxō mato yoikī iskafaxii: “Ē mefe rafepai,” ixō ē mato yoimis. Fētsa āfe shinā mēraxō ea nikaxō ea yoi: “Ifo, emēra ikife. Ē mia fichipai,” ixō anori yoiaito ē a mēra ikiax ē afe rafei. Ari efe rafei. <sup>21</sup> Fētsa afara chakafakī xatexō ea Ifosharafai nā ēfe Epa Nios ika ano efe ipasharatiro. Nāato Satanās finōa. Ēfi xanīfokōikī ari efe xanīfo itiro. Ē Satanās yafi niafaka chakafo finōkōia. Ēfe Epa Nios ika ano afe xanīfokōi ē ika. Nāskarifiiai fētsa āfe chaka kachikiri fakī, ea Ifosharafaxii ē ika anoax ari efe xanīfo ipaxatiro. <sup>22</sup> Mā pachoyakī ea nikakāfe. Niospa Yōshi Sharapa ea yoiai keskara nikasharakāfe, ” ixō ea anori Jesús yoia a Ifofaafo Laodicea anoafō ē ato kenexonō.

## 4

<sup>1</sup> Akka nā ea taefakī yoia, mē kenekī mitoano, ea anā yoiaito ē nika. Ea iskafaito ē anā ōia nai mēraxō oa pexe fepoti fepekemea keskaraxō. Ē nika afia ē nika keskara xāaiti āfe oi efapa keskarato ea yoia anā ea iskafakī: “Niri ekeki māpeferafe,” ea faa. Oa namakē ōia keskara ē ōia ea iskafaito: “Nafō ē mia ispanō nafō afarafo chipo ixiaifo ē mia ispanō,” ea faa.

<sup>2</sup> Ea askafaito samama Niospa Yōshi Sharapa ea ōimana āfe tsaoti efapa sharakōi ea ōimana a xanīfāfe tsaoti ano tsaokē ē ōia. <sup>3</sup> A ē ōimismafo ē ōia sharakōifo. Nāskakē ē tāpia. Nioskōiromē ē faa. Askaito ē ōia fafesharakōiaito. Iskara ē ōia. Tokiri rafe āto ane jaspe fe cornālinā nā rafesharakōi fakka fakka sakōini. Nāskara āfe femānā ē ōia. A āfe tsaoti ano oa nāfa fai nana keskara ē ōia fafesharakōiaito. <sup>4</sup> Nā nōko Ifo tsaao ano a kematai veinticuatro tsaotifo ē ōia. A tsaoti kamaki feronāfakefo tsaaofo ikafo. Nā feronāfakefo Jesús Ifofamisfo ikafo. Afāfe nā ato chanīmara faifo ato kexemisfo ipaonifo. Āto rapati oxo sharakōifo māmāi ato Niospa āfe chaka soaxonikē. Askatari xanīfāfe maiti keskara oro sharakōi safeafō ika. <sup>5</sup> A āfe tsaoti anoax kana peitaitani oa kana piishikai keskara a mēranōa ē nika. A fesoa anori siete rāpari xofisaito ē ōia. A ē ōiaino Epa Niospa

ea shinãmana iskafakĩ: “A Epa Nios tsaono rãpari otaito ẽ õia keskara, nãskarifikĩ Epa Niospa ẽfe Yõshi Shara nokoki nĩchiarokomẽ nofe rafeno,” ixõ ẽ shinã.

<sup>6</sup> Askatari a fesoa anori oa fakafã keskara fakka fakka ikaito ẽ õia, oke mẽra xafakĩakõi ika. Askatari a nõko Ifãfe ẽfe tsaoti ano a onifanifo cuatro ano niafo ika. Askai fero ichapayafo. Takairafe fero neeafo. <sup>7</sup> Oa poomã femãnã keskara fetsa ita, fetsari oa fakka fene femãnã keskara ita, fetsari oa yõra femãnã keskara ita, fetsari oa tete yoyai keskara ika. <sup>8</sup> Askakani ẽto pei ichapa seis ika, fisti rasi pei ichapayafo. Askai ẽto fero rasi ato neei fetsea ika. Penachãi fanãita, fakishchãiri fanãiki xatepakenakafoma. Fanãiyana iskafakani:

Sharafinakõia, sharafinakõia, sharafinakõia, nõko Nios sharafinakõi. Nõko Niospa afama mĩshti famis nã apaiyaifo. Epa Nios niyopaofinixakĩ, nãskakẽ iskaratĩa nia.

Askatari Epa Nios afeska pishta nakama, ikax fanãikaifo.

<sup>9-10</sup> Nãskakẽ aõnoax fanãikafo iskakani: “Epa Niosi, mĩ fisti nõko Ifo. Fato fetsakai na mĩ ikai keskarama. Mĩfi nĩsharapakenakaki. Mĩ sharakõi. Mĩ afaa pishta chakafamisma. Mĩ askaito nõ mia Ifofasharakõi. Aicho Epa Niosi. Fato fetsakai mia keskarama,” ixõ Nios fanãkafo. Mã askafono nã Jesús Ifofamisfo veinticuatro xanĩfofo nõko Ifo Nios ẽfe tsaotiki tsaono a nãmã feopakefofãnafo. Feopakefofãkata, ẽto maiti tsekakata feofafo Nios nãmã mãmã askafakatsaxakakĩ. Nãskaxõ yoiãfo iskafakakĩ: “Nõko Ifo Nios mĩ noko maiti inã keskari fakĩ nõri miari mini. Mĩ noko inãfikẽ nõ mia fãsi noikĩ na maitifo nõ mia mini. Meres fisti mĩ noko ikitiro. Mĩ noko ifimis. Akka mĩ nõko Ifokõi itiro. <sup>11</sup> Mĩ afaa chakafatamaroko mĩ sharakõifamis. Akka mĩõnoa fisti nõ yoitiro iskafakĩ:

Mĩ nõko Ifokõi. Mĩ nõko Nios. Tsoa fetsakai mia keskarama shara. Mĩ isharaakenaka. Mĩkai afaa chakafamisma. Nãskakẽ nõ mia fãsi noi. Mĩ shinãmãs mĩ afama mĩshti fatiro. Mĩ keyokõi onifani. Mĩ apaiyai keskara mĩ keyokõi onifani ato nimapakexakĩ,” ixõ nã Jesús Ifofamisfãfe veinticuatro xanĩfofofãfe yoisifo.

## 5

### *Jesús kirika katarama tsoamaxõ ato yoiyoni afeskaximãkai chipo*

<sup>1</sup> Askata ẽ anã õia oa ẽfe namapa õia keskara nã ẽ mato yoinõ. Nã mifi kayakai aõri nõko Ifo Nios tsaono ẽ õia kirika katarama takai rafe kenea ẽ õia, siete taxtati aõ neekẽ.

<sup>2</sup> Niospa ẽjiri finasharakõia ẽ õia. Fãsikõi mekayanã iskafakĩ yoiã: “Na kirika taxtatinĩ taxta afeskaxõ tsõa õitiro. Nã xanĩfo afaa chakafamisma fistichi fẽpetiro õixii. ¿Fato xanĩfãfe afaa chakafamismato fẽpetiromẽ nõ õinõ?” ixõ yoiã.

<sup>3</sup> Askafixõ tsõa fẽpetiroma nai mẽranoa ikafãferi fẽpetirofoma. Askatari a nãmã ikafãferi, Niospa ẽjirifãferi fẽpetirofoma a mẽra õixikakĩ. <sup>4</sup> Nãskakẽ ẽ oiã finakõiyana iskafakĩ yoiã: “¡Ooa! Xanĩfo afaa chakafamisma tsõa fichiama na kirika noko fẽpexopanã a mẽra nõ õipanã,” ixõ ẽ shinã. <sup>5</sup> Askata nã veinticuatro xanĩfofofãfe Jesús Ifofamis fẽtsa ea iskafaa: “Oiyamafe. Oipo. Nõko Ifo oa ono nia. Cristo fisti nõko xanĩfo finakõi. Afama mĩshti atiro. Tsoa a keskarakõima. Nõko xinifãfe ẽto xanĩfo ipaoni David ẽfe fena Jesús. David xanĩfo finakõia ipaofinikẽ, Jesús finõkõia. Keyokõi ato finõa. Satanãs finõta, a xanĩfo fetsafori ato finõkõia Jesús. Iskaratĩa nono Epa Nios fe ika. Nãskakẽ na siete taxtati Jesús noko fẽpexotiro nã kirika nõ õinõ. Nãskakẽ anã oiyamafe,” ea faa.

<sup>6</sup> Nãskakẽ nãnoa ovejanã fake ẽ õia ẽfe mãxo sieteya, ẽfe ferori nãskara ika. Reteafo keskarafix Niospa tsaoti ano nia ika. Nãnoa nã Niospa onifani cuatrofo feta a veinticuatro Nios Ifofafofo xanĩfofofãfe foaketefayakenafo ika. Tsoa fetsakai a keskarama. Nãato afama mĩshti fatiro. Nã fero sietefãfe noko shinãmani Niospa ẽfe Yõshi Shara nĩchiano keyokõi nã maitio ano inõ. <sup>7</sup> Akka Epa Niospa nã kirika ẽfe mifi kayakai aõri tsoamakẽ Jesús fã. <sup>8</sup> Fĩxõ tsoano nã cuatro Niospa onifanifo fe nã veinticuatro xanĩfofofo Jesús Ifofamisfo a nãmã feopakefofãnafo. Nãfãfe maneti yafi kechofo tsoafo. Nã kechofo oro fakka fakka ikai keskara mẽranoax otano ẽfe kõi nofe nakas shara nai mẽra foai keskara.

Nāskarifiāi nā Nios Ifofamisfāfe kīfīaifono Epa Niospa nikamis. <sup>9-10</sup> Akka nā fanāikaifo tsōa nikayomisma fanāikani, iskakani:

Mī afaa chakafayamafiamiskē mia retenifo. Mī noko nāxoni, mī imi foni Satanás anā nōko ifo inōma Epa Nios āfe fakefo nō inō. Nāskakē mī fistichi fitiro kirika kenea fēpexiki noko tāpimaxiki. Mīōnoax nā mia chanīmara faafo tii maifo tii anoafō Niospa yora itirofo meka fetsa fetsatapafāfe mekakani. Nāskakē nāfāferi fetsafo mī meka shara ato tāpimanano, mī ato amapaiyai keskara anōfo. Askatari nā maifo tii anoafō xanīfo mefe ixikani, ikax fanāikafo.

<sup>11</sup> Askatari ē ōia Niospa ājirifo ichapakōifo tsōa ato tanatiroma ichapakōi fanāikaifāfe ē ato nika. Nios xanīfo tsaoti ano nā Niospa onifaa cuatrofo fe nā xanīfofo veinticuatrofo feta nakifayakenafo. <sup>12</sup> Fāsikōi fanāikani iskafo:

Niospa Fake Jesús oveja fake keskara yorafo nāxōa āto chaka soaxoxikī. Akka keyokōi nā maitio anoafō ato īkitiro, keyokōi nai mēranoafori ato īkitiro, nōko mai anoafori āfenā, keyokōi tāpikōiakī, afama mīshti atiro, keyokōichi mī sharakōira fapanakafo. Mī fisti nōko Ifo itiro. Aicho, mī nōko Ifo mī isharakatsaxakī mī nīpanakara, ikax fanāikafo.

<sup>13</sup> Askata ē nika keyokōi nai mēranoafo tii fanāikaifono, mai anoafori fanāikaifono ē nika. Mai mēranoafori ē nika. Fakafā anoafori fanāikaifono iskakani:

Epa Nios āfe tsaoti ano tsaōa, āfe Fake Jesús oveja fake keskara, nā rafe nōko Ifo isharakōimisfo. Keyokōichi mā sharakōira ato fapanakafo. Mares fisti mā nōko Ifo itiro. Mā afama mīshti atiro. Nāskara mā īpanaka, ikanax fanāikafo.

<sup>14</sup> Askatari nā cuatro Niospa onifafāfe yoiafo iskafakakī: “¡Aicho! Askapainōra,” fata, nā veinticuatro xanīfofo Nios nāmā feopakefofānafo. Afāferi Epa Nios yafi Jesús yoisharakani.

## 6

### *Nā siete taxtati*

<sup>1</sup> Nāskata ē namakē ōiai keskara ē anā ōia. Jesús oveja fake keskara nāato noko nāxoni nāato nā kirika āfe taxtati fisti fēpeaito ē ōia. Fēpeaino ē nika nā cuatro Nios onifaa fetsa fāsikōi mekaito nai tiri ikai keskara: “Niri ofe,” ikaito.

<sup>2</sup> Askaino kamayo oxo chaima nia ē ōia. Nā kamayo kamaki fētsa kati tsomax tsaōano xanīfāfe maiti Niospa maimana. Nānoax kamayonō kaa fetsafo īkipai xanīfo ixiki. Tsoa pishtakai nētefatiroma.

<sup>3</sup> Askata Jesús anā kirika taxtati fetsa fēpea. Fēpeaino nā cuatro Niospa onifani fetsa ē nika iskaito: “Niri ofe,” ikaito.

<sup>4</sup> Nāskafaino kamayo fetsari ōshi nokotoshia. Nā kamayo kamaki tsaōa fetsari ē ōia. Keno chainipa Niospa inā aya katanō maifo tii anoafō ato shināmatanō anā isharanōfoma noikaspa faatanākanax retenānōfo.

<sup>5</sup> Askatafata Jesús anā kirika taxtati fetsa fēpea. Fēpeaino nā cuatro Nios onifaa fetsa ē nika iskafakī yoiaito: “Niri ofe,” ikaito. Anori yoiaino kamayo fetsa fisokōi nokotoshiaito ē ōia. A kamaki tsaōa aō kilo tanati tsomax. <sup>6</sup> Nā cuatro Niospa onifani anoax mekaito ē āfe meka nika iskaito: “Kori texe fayamanō, feronāfāke pena fisti yonoxō kori fixō trigo kilo fisti fikī kopifatiro. Askayamakī tres kilo xiki fitiro. Kori texefayamaxō afaa fetsa fitiroma. Nāskakē xini yafi nā uva fimi ene chakanafayamafe. Akka mā texefayamax mā fonāiki omiskōixii,” ixō yoia.

<sup>7</sup> Askata Jesús anā kirika āfe taxtati fetsa fēpea. Fēpeaino ē nika na cuatro Nios onifani fetsa, “Niri ofe,” ikaito.

<sup>8</sup> Anori askafaino kamayo fetsa pāshikōi nokotoshiaito ē ōia. Nā kamayo kamaki fetsa tsaōa ika āfe ane Ato Namamis. Nāato yorafo namatiro. “Ē yorafo namapaira,” faito, “Ēje.

Mī ato namatiro,” Niospa faa. Askafaito nã ato namamisto yora fetsafoya ato retenãmai. Akka atiri ato fonĩ namai, atiri pae fetsa fetsatapafãfe ato namaxii, atiri yoinã pōfefãfe ato yokakani. Akka yora kayakōi ato namaxiai ē ōia tsōa ato tanãtiroma.

<sup>9-10</sup> Nãskata Jesús ãfe kirika taxtamea anã fēpea. Fēpeaino nã Niospa meka ato yoifofãsafafono fetsafãfe ato retefinifono mã otoafō ē ōia. Epa Nios kĩfiti mĩsa ano nã Jesúsnoax nanifo ãto fero mēshofo ichanãkanax fãsikōi mekaito ē nika iskai mekaifono: “Nōko Ifo Nios, mĩ keyokōi tãpikōia. Mĩ afama mĩshti fatiro. Mĩ shara famis. Mĩkai afaa chakafayomisma. Mĩ chanĩmakōi. Nã mia chanĩmara faafãfema mai anoafãfe noko retemisfo. Nãskakē, ¿afetĩa mĩ ato kopimē omiskōimakĩ?” ixō yoiaifãfe ē nika. <sup>11</sup> Nãskakē nōko Ifãfe yoia isfakĩ: “Manayokãfe. Fena fena kakĩma. Fetsafori mato keskarafori eōxō yonomisfo ixikani. Nãfori eōxō nã yora chakafãfe ato retexikani. Akka mã ato reteskĩ mitoafono mã nakanax mato ano nokoxikani keyokōi. Nãskakē nã ato retemisfo ē ato kopixii ato omiskōimakĩ omiskōipakenakafo mēra ē ato potaxii afaramãi chakafamisfokē,” ixō nōko Ifo ato yoia. Ato yoita rapati oxosharakōi chainipa ato inã, nãfãfemãi taeyoi nikanifono nã Epa Nios Ifofasharamisfo tii ato inã.

<sup>12</sup> Askata Jesús anã kirika ãfe taxtati fetsa fēpeaito ē ōia. Fēpeaino fãsikōi mai naya naya ika. Xini anã pee iyamaino, rapati fisokōichi fepoa keskara ika, fakishkōi. Oxeri ōshikōi imi keskara ika. <sup>13</sup> Oa nefe kerexepato nokoki nefekĩ fana fimi yome mĩshti niriatiro keskara. Nãskarifiã fishifo nai mēranoax mai ano pakei fetsea. <sup>14</sup> Askatari nai katarameake kafãkē ē anã ōiama. Mãchifã fe mai toomãfã mai naya naya ikaino, anã ano ikama. <sup>15</sup> Nãskakē keyokōi mai anoafō ratekōiafo. Yorafãfe ãto xanĩfofori sorarofãfe ãto xanĩfofori ratekōiafo; afama mĩshtiyafori, yora mitsisipafori, ãto yonomatifori, fetsafori ifomaisfori keyokōi nãfo ratekōiafo. A tiiri mafa kini mēra ikiafo. A tiiri mãchi keya ano ichoafō tokirinĩfã nãmã oneafō. <sup>16-17</sup> Askata fiisikafo iskayanã: “¡Ooa! Epa Nios nai mēra ikato ãfe Fake Jesús fe iskaratĩa nokoki ōitifishkikōina. ¿Nō afeskatiromē omiskōiyamaxiki? Tsōakai Nios timamatiroma noko omiskōimayamanō. Nã mãchi keya anoa tokirinĩfã nokoki pakepainō Niospa noko fichinōma nō omiskōinōma,” ixō nã nikakaspamisfãfe yoiafo.

## 7

### *Niospa ciento cuarenta y cuatro mil afe yorafo kexexii*

<sup>1</sup> Nãskata ē anã ōia oa ēfe namapa ōia keskara nã ē mato yoinō. Niospa ãfe ãjiri cuatro afe nai mēra imisfo ē ōia. Fetsa xini oaikiri nia, fetsa xini kaikiri nia, fetsa xini oaima anori nia, fetsa xini kaima anori nia. Askano nefe nishpapakekafana. Nefe nishpapakekafanaino keyokōi maifo tii anoa nii peifo takka takka ikama. Fakafãri anã poo ikama. <sup>2</sup> Nã cuatro Niospa ato yoiaito mai yafi fakafã chakafatirofo. Askata Epa Nios nipanakato ãfe ãjiri fetsa ē ōia xini oaikirinoax oaito, nōko Epa Nios ãfe marakka fati feaito, a afe yorafo aō marakka faxii keyokōichi tãpinōfo Niospa afe yorafokē. Nã Niospa ãjiri okĩ nã cuatro Niospa ãjiri fetsafori fãsikōi ato yoia iskafakĩ: <sup>3</sup> “Manayokãfe, nã Nios Ifofamisfo ikisi ãto femãnãki ãfe anefo keneyonō nãfãfe Nios yonoxomisfoki keyokōichi tãpinōfo. Nãskakē fena ato chakana fayamakãfe. Mai anoafō fakafã anoafori, iffo ato chakana fayamakãfe. Chipo ato axikakĩ,” ixō ato yoia.

<sup>4</sup> Akka ē nika mã Niospa ãjirinĩ mã ato marakka faano ciento cuarenta y cuatro mil judeofãfe femãnãki. <sup>5-8</sup> Nōko xini Israel ãfe fakefo feronãfakefos doce inifo. Ato iyoakōichi ãfe ane Judá. Judá ãfe pefeta Rubén. Rubén ãfe pefeta Gad. Gad ãfe pefeta Aser. Aser ãfe pefeta Neftalí. Neftalí ãfe pefeta Manasés. Manasés ãfe pefeta Simeón. Simeón ãfe pefeta Leví. Leví ãfe pefeta Isacar. Isacar ãfe pefeta Zabulón. Zabulón ãfe pefeta José. José ãfe pefeta ato chipo fakekōi Benjamín. Nã doce feronãfake fisti rasi paxkakanax mã kaiafono nã doce feronãfake anoa Niospa ato katonĩ. Fetsa anoa doce mil faxō ifita, fetsa

anoari doce mil faxõ ifini. Nãato askafakĩ fetsa doce mil faxõ ato ifiketsani. Nãskakẽ mã afo yosikanax ciento cuarenta y cuatro mil inifo.

### *Yorafã rasikõichi rapati oxokõi safeafo*

<sup>9</sup> Askata Epa Nios fe ãfe Fake Jesús nã oveja fake keskara nã tsaoafo ano yorafã rasi niafo tsõa ato tanatiroma. Nã maitio anoafo fisti rasi anoafo, xoko fetsafo, meka fetsayafo ikafo, rapati oxokõi chainipa safeafo ã õia fisti rasichi epe pei tsomafãfe.

<sup>10</sup> Nãfãfe fãsikõi yoiafo iskakakã:

Nõko Epa Nios feta ãfe Fake Jesús noko ifimis nõko Ifo Jesús oveja fake keskara nokoõnoax nani nõko chaka noko soaxoxikĩ nõ afe nĩpaxanõ, ixõ yoiafo. <sup>11-12</sup> Nãskata nõko Ifo xanĩfãfe tsaoti ano tsaoano ãfe ãjirifãfe foaketi fayak-enafo ikafo. Nãskakẽ nã veinticuatro xanĩfofo fe nã Niospa onifanifo cuatrofo nõko Ifo tsaoano tsaoafo ikafo. Nãskafono nã ãjirifo nã nõko Ifo tsaoano ratokonõ mai chachipakefofãkanax feopakefofãnafo Nios yoisharakakã iskakakã:

¡Aicho! Chanĩmakõi, meres fisti mĩ isharapakemis. Meres fisti nokori mĩ imasharatiro. Mĩ keyokõi tãpia. ¡Aicho! Nã nõ yopai keskara mĩ noko axomis. Keyokõichi sharakõi mia fapanakafo. Mĩ afama mĩshti fatiro. Mĩ nãskapakenaka. Nãskaroko anõkĩ, ixõ yoiafo.

<sup>13</sup> Nãskata nãnoa xanĩfo fẽtsa ea yõka: “¿Na yorafo rapati oxo chainipa safeafo tsoamẽ? ¿Fakiax feafomẽ, mĩ tãpamẽ?” ixõ ea yõka. <sup>14</sup> “Maa. Êkai tãpiana. Mĩ tãpia. Mĩ ea yoitiro,” ã feito ea yoia iskakã: “Yorafo omiskõiaifono na yorafori fãsi omiskõinifo. Akka omiskõiaifono Niospa ãfe Fãke Jesús ato nãxonĩ ãto chaka ato soaxoxiki. Ato chaka soaxõ mã ato imasharakõia. Nãskakẽ ato rapati oxo shara safemana. <sup>15</sup> Nãskakẽ Epa Nios ano iskaratãa afe ikafo. Epa Niospa ato yonomana keskara axopakenakafo. Nãskakẽ ato kexefafãini afara chaka atoki nokoyamanõ. <sup>16-17</sup> Niospa ãfe Fake Jesús Epa Nios fe imis. Nãato ato kexepakenaka. Nãskakẽ anã fonãitama, anã nomipakenakafoma. Xinĩri anã ato pipanakama. Jesús ato kexeaino inimapakenakafo. Epa Niospa ãto õiti ato fepeaxoxii anã oianõfoma,” ixõ ea yoia.

## 8

### *Nã taxtati mã keyoaino Jesús fẽpea*

<sup>1</sup> Mã kirika ãfe taxtati keyoano Jesús fẽpeaito ã õia namakẽ õiai keskara. Nã seis taxtati taefakã fẽpeyoa. Akka iskaratãari fetsari fẽpea mã keyoaino. Fẽpeano Nios ika ano nai mẽranoax keyokõi nishparakafo. Media hora nishparakayofo. <sup>2</sup> Nishparakaifono ã õia Niospa ãfe ãjirifo siete a ketaxamei niafãfe, nãfãfe Niospa ato yoimis keskara anõfo. Niospa ato tii maneti inã nã ato yoiaitã ãto maneti chãĩ chãisafanõfo. <sup>3</sup> Askata Niospa ãjiri fẽtsa sapa oro fakka fakka ikai keskara tsomax Epa Nios kĩfiti ano nia ã õia. Akka fẽtsa sapa kamaki nakas otaxõ naneaito ã õia. Nãskaxõ Nios kĩfiti mĩsa ano oro kamaki sapa faa. <sup>4</sup> Askano ãfe kõi nakas shara nai mẽra foa ãfe mifi kamaki sapa tsomano. Nãskarĩfiai Niospa yorafãfe kĩfiaifono Epa Nios ika ari nokoaito nikatiro. <sup>5</sup> Akka ã anã õia Epa Niospa ãfe ãjiri yoiaino, mĩsa kamakinoa chii fixõ ãfe sapa kamaki chii fospi faa. Fospi fata nai mẽraxõ mai ano pota. Askaino mai anoax nai fãsikõi tiiri ika pachakõi ika, kanari piishika mairi naya naya ika. Nãskakẽ nã chanĩmara faafoma tii ato omiskõimaxii.

### *Ãjirifãfe maneti chãĩ chãisafafo*

<sup>6</sup> Askata Niospa ãfe ãjirifãfe siete nã manetifo Niospa ato tii inã itipinĩsharafafo chãĩ chãisafaxikãki.

<sup>7</sup> Askata fẽtsa ãfe maneti chãĩ chãisafaino faka matsi tokoro efapafo imia osia nai mẽranoax keyopakea. Chiiri imiya osia nai mẽranoax mai ano pakea. Mãifã kaxke fetsa koofi keyoa ififoya. Akka ranãri texea. Akka fasifo kooi keyokõia.

<sup>8</sup> Askata Niospa ājiri fētsa āfe manetiri chāi chāisafaino machi efapa chii xoisai keskara Niospa nai mēraxō nāmā pota. Fakafā mēra pakea. Askaino fakafā kaxke fetsa imi keskara ika. <sup>9</sup> Nāskakē fakafā mēranoax fafīfo ranāri naafo. Askatari kanōanāfāfori ranāri kooafo.

<sup>10</sup> Askata Niospa ājiri fētsa atori āfe maneti chāi chāisafaino fishi efapakōi xofisai chii keskara nai mēranoax pakea fakafo mēra. Akka faka fetsafo mērari pakeama. Askatari faka poyo poyo ikai ano pakea. <sup>11</sup> Nā fishifā āfe ane Mokara famisfo. Nā fishi faka mēra pakeano, faka moka paekōi ika. Nāskakē nā faka ayakanax yorafo ranāri nai fetsefo.

<sup>12</sup> Askatari Niospa ājiri fētsa āfe manetiri chāi chāisafaino xinī anā chaxasharama. Ōxeri anā chaxasharama. Askatari fishifāferi anā ranārito chaxasharama. Nāskakē penafekē tsōa anā ōisharatiroma. Fakish finakōia ika. Tsōa askara fakish ōiyomisma.

<sup>13</sup> Ē nāfo ōiaino tetepafā keskara keya yoyaito ē nika. Fāsikōi mekayanā yoia iskafakī: “¡Ooa! Yorafāfe Nios nikakaspakanax omiskōikani finakōixikani. Niospa ājiri tres fetsafāfe āto maneti chāi chāisafaifono mai ano ikafo omiskōifinaxikani,” ixō tetepafā keskarato yoia.

## 9

<sup>1</sup> Askatari Niospa ājiri fētsa āfe maneti chāi chāisafaino nai mēranoax oa fishi keskara nāmā pakeaito ē ōia. Nāskata nā niafaka chakafo kinīfā fakishifā mēra ikafo ano kaa. Nā kinīfā fepotiya. A mēranoaxkai kāitirofoma. Akka nā nai mēranoax nāmā pakea Niospa chavis inā aato kinīfā fakishifā mēranoa ato kāimanō. <sup>2</sup> Fēpeaino mafa kinīfā mēranoax kōinīfā nai mēra foa. Nāskakē xinī chaxasharama. Nai fakishkōi ika. <sup>3</sup> Askata nā kōinīfā mēranoax kōketsere keskara ichapa rasi mai ano fotoa. Niospa ato pōfekōi ima nifo keskara inōfo. <sup>4-5</sup> Ē nika iskaito: “Mai anoa fasifo fanafo ififo chakana fayamakāfe. Akka nā Niospa yorafo femānāki keneafō, ato tekayamakāfe. Akka nā keneamafo mā ato tekatiro. Akka ato reteyamakāfe. Ato retetamaroko cinco oxe ato amakāfe ato omiskōimakī,” ixō ato yoia. Nāskakē kōketserefāfe ato tekafo nā chanīmara faafoma nifo keskara paekōi meafō omiskōiafo. <sup>6</sup> Nāskakē kōketserefāfe cinco oxe ato omiskōimana nā chanīmara faafomafo napaixikani, tenetirofoma mekani. Askafikanax nakanima.

<sup>7</sup> Iskaratīa na kōketserefo afe keskaramākī ē mato yoinō mā tāpinō. Kamayofō itipinī faax a kamaki tsoax katiro fetsafo reteikai. Nāskarīfai na kōketserefo nā kamayo keskarafo. Kamayo kamaki tsoaxō fetsafo reteikai keskara īta, xanīfāfe āfe oro maiti maia keskara īta, āto fēso feronāfāke fēso keskara īta, <sup>8</sup> āto foo kērofāfe foo keskara īta, āto piti poomānā piti keskara īta, <sup>9</sup> āto xochi ano rapati kerexkōi keskara safemanano ato tsakapaiyafono a mēra ikitiroma īta, āto petafo pei pei ikī kamayonō karo keskara niniaino pachakōi īta, fetsafo retenāifo keskara īta, <sup>10</sup> keyokōi tsitsisyafō. Āto tsitsisi yora chachitiro nifo pae keskara. Āto tsitsisi yorafo omiskōimatiro. Mā oxe cinco finōano anā ato omiskōimatirofoma. <sup>11</sup> Nā kinīfā fakishifā mēra niafaka chakafo ikafo anoa āto xanīfāfe ane israelifāfe mekapa Abadón famisfo. Griego mekapari Apolión famisfo. Nōko mekapari, “Yorafo Retemis,” nō famis.

<sup>12</sup> Akka taeyoi a omiskōiaifo mā finōfiano, akka nāno raferi a finakōia finōama.

<sup>13</sup> Askata Niospa ājiri fētsa āfe maneti chāi chāisafaino, Epa Nios kīfiti oro mīsa shara ano fakka māxo cuatro nia ika. Nā mīsa nakirafenoax mekaito ē nika iskafakī āfe ājirinī yoiaino āfe maneti tsomaxō nika. <sup>14</sup> “Nā cuatro niafaka chakafo menexemexō nā faka efapa Eufrates anoxō manaifo ato mēpetāfe fotanōfo,” ixō āfe ājirinī yoia.

<sup>15</sup> Nā tsekeafō penata Niospa ato yoiaino ichapakōi ato retenōfo. Nāskakē nā niafaka chaka cuatro Niospa itipinīfani mai kaxke fetsa ano ikafo ato retexinōfo. <sup>16</sup> Ē nika dos cientos millones sorarofō kamayo kamaki tsoafāfe fetsafo retexikakī.

<sup>17</sup> Askata Epa Niospa oa namakē ōia keskara ea ōimana nā sorarofō yafi āto kamayofō ē ōia iskara. Āto xochi ano oa chii ereai keskara kerexkōi āto xochi ano safeafō ikafo.

Askatari nanakōiri ika, chaxtari ika a aō xorakomeafo. Akka a kamayofāfe āto mapo poomā mapo keskarafo. Āto āxfā mēranoax kōi fe chii ereai keskara. <sup>18</sup> Chii fe kōi xofisakī āto āxfā mēranoax kāifaikī ato retepakeafo yorafo ichapakōi ranāri naafo. <sup>19</sup> Āfe āxfā feta āfe tenēri yorafo retetiro. Āfe tene rono pae keskara. Āfe tene mapoya ika. Nāo yorafo omiskōimana nanōfo.

<sup>20</sup> Tsoa nayamafixō āto chaka xateafoma Epa Nios Ifofaxikakīma. A niafaka chakafo ifofamisfo xateafoma. Nāskakē oro nimofa fakāta, a kerexkōi fakkai fakkaisai nimofa fakāta, keno āfe ane bronze nimofa fakāta, ifi nimofa fakāta, tokiri nimofa fakāta; nāfo askafaxō, “Nāfo nōko nios. Nō aō noi,” ixō yoimisfo. Afāfe ōiyamafiaifono, askatari mekayamafiaifono, askatari kafāsayamafiaifono, nāskakē afo kīfimisfo. Epa Niospa nā āto kaifo yafi yora fetsafo omiskōimafaito ōifikanax āto chaka xateafoma Epa Nios Ifopaikania. <sup>21</sup> Ato retekakī xatemisfoma, askatari koshoiki xatemisfoma, askatari āto āfima chotamisfo, kērofāferi āto fenema chotamamisfo, yometsoriai xatemisfoma nāfo xateafoma. Tsōa āto chaka xateama. Nōko Ifo Jesús Ifofaxikakīma. Nāfo chakakōifikaxō āto chaka xateafoma nōko Ifo Jesucristo Ifofasharaxikakīma.

## 10

### *Epa Niospa āfe ājirinī kirika tsoma*

<sup>1</sup> Askata ē ōia Niospa āfe ājiri fetsa mitsisipakōi nai mēranoax fotoaito, nai kōiya. Āfe maiti nāfa fai keskara maia. Āfe femānā xinī chaxai keskara. Āfe kishi rafe chii keskara. <sup>2</sup> Kirika fepekemea tsomax nia ika. Āfe tae kayakai aōri fakafā femākīa paia. Akka āfe tae oshkiori mai ano paia ika. <sup>3</sup> Askata āfe meka poomā efafo meka keskara ē nika. Askatari ē nika naitiriki fetseaito. <sup>4</sup> Mē nikaxō nā yoiafo keskara ē kenekerana. Akka nai mēranoax Nios ika anoa meka fetsa ē nika ea yoiaito iskafakī: “Nā mī nika keskara āto meka keneyamafe. Mī tsoa tāpimatiroma,” ixō ea yoia.

<sup>5-7</sup> Askata nā Niospa āfe ājirinī takai fetsa fakafā aōri paita takai fetsari mai ano paixō anā yoia. Epa Nios nā nipanakato nai onifaa. Askatari nai mēra ikafo onifaa. Askatari mai onifaa. Mai ano ikafori onifaa. Askatari fakafā onifaa. Fakafā mēra ikafori onifaa. Nā Nioskōichi āfe ājiri yoia iskafakī: “Epa Niospa ea ōiaino chanīmakōi ē mato yoi. Epa Niospa anā manaima. Āfe ājiri fētsa āfe maneti manekī chāi chāisafaino Epa Niospa axiai keskara āfe meka yoimisfāfe yoiaifo keskara yorafāfe tāpinifoma. Iskaratīa a Nios yoimisfāfe yoinifo keskara mā askakōia,” ixō Niospa ājirinī ea yoia.

<sup>8</sup> Askata anā nai mēranoax mekaito ē nika ea yoia iskafakī: “Oa Niospa ājiri fakafāki paita mai ano paia nia ano katāfe. Nā kirika kataramēa fēpexō tsoma fīatāfe,” ea faa.

<sup>9</sup> Askata ē Niospa ājiri ano kaxō ē yoia iskafakī: “Nā kirika pishta ea ināfe,” ē faito, “Nakīa, fife. Ōixō tāpikōife. Mā tāpikōixō mī tāpitiro nā meka chanīmakōi. Niospa meka shara. Askatari mī tāpitiro na meka yoiaifo keskara yorafo omiskōikani. Mīri tāpixō mī fāsi shinātiro,” ea faa.

<sup>10</sup> Nāskaxō ē kirika pishta fita ē ōia. Ea yoia keskara chanīmakōi mē tāpikōia. Nā Niospa meka sharafinakōia. Nāskakē nā inōpokoai yoia keskara yorafo omiskōixikani. Nā ōiax ē shināmitsakōia. <sup>11</sup> Ē askano, anā ea yoia: “Niospa afe yorafo yoipaiyai keskara anā ato yoife. Afarafo ixiai yorafoōnoa yoife, manifetsafoōnoari yoife, xanīfofoōnoari ato yoife,” ea faa.

## 11

### *Nōko Ifo Jesús yorafo yoipaiyai anori feronāfake rafeta ato yoixikani*

<sup>1</sup> Askata na tanati metro keskara ea ināyanā ea yoia iskafakī: “Nāo Nios kīfiti pexefā anoa āfe chainipa yafi āfe xāki tanatāfe. Anoxō Nios kīfiti mīsari tanafe. Askatari a mēranoax fanā ikanaifo ato tanasharafe afe tiito Epa Nios fanā ixokanimākai, askatari afe tiixori kīfikanimākai ato tanasharafe. <sup>2</sup> Akka a ketokonō mapofo a israelifoma ato



tanayamafe; afāfe na Jerusalén anoafō ato chakafakani oa fāka nō afara faanano fāka peamanaino kaitiroma keskafakani ato. Cuarenta y dos oxe amaxō ato askafaxikani. <sup>3</sup> Nāskakē nā feronāfake rafe ē ato nīchixii. Nā rafeta nā ē ato yoipaiyai anori ato yoixikani. Un mil dos cientos sesenta pena ato yoixikani ēfe meka. A rafeta āto rapati chapokōi safexō ato ōimaxikani. A ato chakafamisfāfe, ato ōikakī a afara chakafamisfo shināxikani,” ixō ea yoia.

<sup>4</sup> Nāskakē Niospa afe yorafo yoipaiyai keskara nā rafeta yoimisfo. A rafe oa ifi olivo keskara. Āfe xini fospia keskariai, a feronāfake rafe Niospa Yōshi Shara ato mēra nanekōiafo. Askatari afia rafe oa rāpari ōtai keskara. Mā fakishkē rāpari otakē nō ōisharakōitiro. Nāskarifikā nā rafeta Niospa Yōshi Sharaōxō ato tāpimaxikani Niospa meka. Mā isharakōikaxō āto Ifāfe meka ato fe yorafo yoixikani. <sup>5</sup> Na Niospa meka yoimis rafe fetsafāfe ato chakafapaiyaifono, āto axfa mēranoax chii kaitiro ato koofaxii nanōfo. Nāskakē nā rafe tsōa ato chakafatiroma. <sup>6</sup> Epa Niospa ato yoiaino, nā rafeta āto mekapa oi nesefatirofo anā fena oi iyamanō nā ato yoiiafotīa. Askatari faka yafi ĩa āto mekapa fetsafatirofo oa imi keskara inō. Askatari afara afeskarafapaikakī āto mekapas afara meseni fetseaifo fatirofo pae fetsa fetsatapafori fatirofo.

<sup>7</sup> A feronāfake rafeta mā ato yoikī senēfaafono, a chakakōi mai kinīfā mēranoax Satanás shināmanaino, tsekeināka fā a feronāfake rafe retexii. <sup>8</sup> Mā reteafono, fāi nēxpakīa pakeax rakaxikani nā Jesús mastanifo ano, a Jerusalén ano. Nā Jerusalén anoafāfe nōko Ifo Jesús āfe meka shināmisfoma. Nāskakē nō aōnoa yoitiro iskafakī: “Na Sodoma ano ikafo feta Egipto ano ikafāferi, afaa shināpaonifoma. Nāskakē chakakōi ipaonifo anoafō. Nāskarakōi Jerusalén anoafori.” Nāskax nā feronāfake rafe Jerusalén anoax nakanax āto yora fai nēxpakīa rakaxii. <sup>9</sup> Nāskakē yora fetsafo a mai fetsa ari ikafāfe, xoko fetsafāferi, meka fetsayafāferi, a feronāfake rafe rakafāfe ato ōixikani. Nāskafono āto xanīfofōfāfe, “Ato fena maifayamakāfe,” ixō ato yoixikani ato noikaspakōikakī. Nāskakē tres nia ato ōixikani. <sup>10</sup> Askaito ōikani a mai ano ikafo atoki inimaxikani. Askakanax atoki inimakakī fista axikani. Aa ranā kaxpa afarafo inānōnāxikani. Yoikani iskaxikani: “Anā na rafeta noko fekaxtefakanima kiki,” ikanax inimasharakōikani. “Anā nōko chaka noko yoikanima,” ikanax yoināxikani.

<sup>11</sup> Askafiaifono mā tres nia oxata nayoafono anā chipo Niospa ato otofaxii a feronāfake rafe. Askaito ōikani a ato mānāo nikaxō ato ōiaifo, afo mesexikani, ratekōixikani, askaifāfe ato ōikani. <sup>12</sup> Askata nā feronāfake rafe otokāta nai mēranoax mekaito nikakani ato iskafaito: “Niri ekeki māpeferakāfe,” ato faito nikakani a rafe āto ferotaifi ronoinīfōfākani nai kōi mēra māpefainifokani. Askaifāfe a ato noikaspaiifāfe ato ōikani. <sup>13</sup> Askata samama atoya mai naya naya iki finakōia. Pexefā rasi fisti rasi potaito ē ōia. Askaino siete mil yorafo naafo. A naamafāferi ratekakī Nios yoiafo, “Nios mīfi afama mīshti fatirokī,” faafo.

<sup>14</sup> Mā afo askayoa anā chipo finakōixii.

### *Niospa ājiri fētsa āfe maneti chāi chāisa faa*

<sup>15</sup> Akka Niospa ājirinī chipokōitakī nā sietepa āfe maneti chāi chāisafaino, nai mēra Epa Nios ika ariax fāsikōi mekaifāfe ē nika iskai mekaifāfe:

Iskaratīa na nōko Ifo Cristo xanīfokōi iki nāmānoax nai mēra ika keskarari ixii nāatixō xanīfo ĩpanaka,

ixō yoiafo. <sup>16-17</sup> Akka nā Jesús chanīmara faafo ato kexemisfo nā veinticuatro feronāfakefo tsaokanax a Nios nāmā feopakefōfā nafo Nioski inimayanā iskafafo:

¡Aicho, mī fāsi sharakōiki! Mī afama mīshti famiski. Mī Yōshi Sharapa ato ĩkinā. Afama mīshti onifaaxma mī iyopaonixakī. Iskaratīari mī nia. <sup>18</sup> A mai fetsa anoafāfe mia noikaspamisfo mikiki ōitifishkikōikakī mefe ikaspakakī. Afama mīshti chakafamisfo. Askaifāfe ōikī, mīri ato kopikī ato omiskōimaxii atoki ōitifishkikōixō. Akka a mia Ifofamisfo mī ato ināsharakōixii afara sharakōifo. Akka a mia yonoxoyanā mī meka mēxotaima yoimisfo afo mī ato ināsharakōiketsaxii, a mia chanīmara famisfo tii;

keyokōi afaamaisfo ita, a xanīfori a afama mīshiti ichapayafori mī ato ināsharakōixii a mia Ifofamisfo tii. Akka nā yorafo chakafamisfo, mī ato omiskōimaxii, a amēranoax, omiskōimisfo mēra mī ato potaxii, ixō yoiāfo.

<sup>19</sup> Askata a Nios kīfiti pexefā nai mēranoax fepekemeaito ē ōia. Nānoa Niospa kafo ē ōia, nā kafo mēra a Niospa israelifo yoini kirika kenea nanea ika. Askatari ē ōia kana pee ikaito nairi tiri ikaito ē nika, mīamāfanēri mai naya naya akaito ē ōia, nai mēranoaxri oi kaya ikaino, oi nami keyopakeaito ē ōia.

## 12

### *Kēro yafi kapetafā keskara nai mēranoa Juan ōini*

<sup>1</sup> Askata ē afianā ēfe namapa ōia keskara ē mato yoinō a ea Niospa ispaito ē ōiafo nā inōpokoai fo ōikī ē tāpinō a tsōa ōimismafo. Ē kēro ōia āfe rapati oa xini pee ikai keskara safea ika nai mēranoax. Oxe kamaki paiya keskara. Askatari āfe maiti ano fishi doce aō neafo.

<sup>2</sup> Askata nā kēro mā chaima fake kākī, fāke pāefai. <sup>3</sup> Askainori fetsari ē ōia a tsōa ōiyomisma keskara nai mēranoax. Nā Satanās oa ronofā keskara efapanāfakōi ōshimāfa, askai mapo ichapayakōi siete mapoya, askai a āto xanīfokōichi maiti sharakōi keskara maiya siete faxō, askatari āfe māxofori diez ika. <sup>4</sup> Askata āfe tene fininīfofā nai mēshanānaino nai mēranoax fishi rasi pakea. (Naskarifakī Epa Niospa ājirifo Satanās atiri ato chakana fama ato ikipai, “Ea ifofakāfe,” ixō ato feparapaikī. Nāskakē a keskara niafaka chakafo ato ikinō Niospa nāmā potani nāmāxō ato ikinō.) Nāskakē mā kēro chaima fake kāiyaino, a ronofānē kexei āfe fake pīapaikī kāiyaito. <sup>5</sup> Askata a kēro fake kāi feronāfake mitsisipakōi. Nāskakē yorafo manifo tii, ato kexesharakōixii āto xanīfo finakōia ixii. Mēstekōi ato yoisharakōixii nikasharakōinōfo. Askafiaito a fake yome rama afa kāiyaito ronōfānē pipaiyaino Niospa ifirisafaa nai mēranoax afe xanīfokōi inō. <sup>6</sup> Askaito ōifaini afa ichoachāi tsōa istoma ano a Niospa afetīama itipinī faxoni ano Satanās afeskafanōma arixō Niospa kexenō cuarenta y dos oxe akaino Niospa kexesharanō.

<sup>7</sup> Askatari ē anā ōia Satanās āfe ināfo fe nā ājiri Miguel āfe ināfo nai mēranoax retenāpaiyaifono Satanās ato finōpaiyaino. Nāskaxō Satanās Niosri finōpaini. <sup>8-9</sup> Akka Satanās ato finōpaifikī ato finōnima. Nāskakē fanī itirokēma Niospa nāmā potani āfe ināfoya. Taeyoi ājiri iyopaoni. Nāskaxō nāato keyokōi yorafo maifo tii anoāfo ato pāramis anorima ato yoikī chaka shinānōfo, chaka nīpaxakakī.

<sup>10</sup> Askaito ē anā nika meka efapato mekai iskaito: “¡Aicho! Epa Niospa mā Satanās nirixō nāmā potaki, mēxotaima āakōi noko fanīrira pārarifaito. Nāskakē Epa Niospa Satanās finōinīfofana. Nāskakē Satanās anā nōko ifo ikima, anā fanīrira noko shināmanima, Epa Nios fisti nōko Ifokōi iki. Askatari āfe Fake Jesucristori nōko Ifokōiri iki. Nā rafe nōko Ifokōi. <sup>11</sup> Nāskakē Jesús Ifofaxō mēxotaima nō yoimis niri nai mēra oyoxoma nō yoiyopaoni nāmāxō iskafakī: ‘Nōko Ifo Jesús, Niospa Fakekōi, oa oveja fake keskaraxō noko nāxoni nōko chaka noko soaxoxiki,’ ixō nō yoimis mēxotaima. Askatari nō Niospa meka ato yoimis. Nāskai nō meseima, ‘Noko retēfiaifono, nō inimasharai,’ ixō anori mēxotaima nō yoimis. Askaxō nō Satanās finōinīfofana. <sup>12</sup> Nāskakē māri nono nai mēranoax inimakāfe Niosnoax. Nā chanīmara faafāfe Jesúsxō mā Satanās finōkōiafo. Akka Satanās Niospa nāmā potani nai mēraxō. Askafaino ōitifishkiki nāmā fotoxō yorafo chakafapaikōi. ¡Ooa! Yorafo ono mai anoax fe fakafā mēranoaxri omiskōikani. Satanās mā tāpia afetīara Jesús mai ano fotoai tsōa anā afaa chakafanōma. Nāskara mā tāpiax Satanās ōitifishkikōikī keyokōi maifo anoāfo ato chakafamapai omiskōinōfo Jesús fe ipaxanōfoma,” ixō nai mēranoax mekaito ē nika.

<sup>13</sup> Mā afo nikakī ē anā ōia afia ē ōiyoa keskara. Mā Niospa Satanās nāmā potano, Satanās shinākī iskafai: “Na kēro ē akiki nokoxō omiskōimanikai,” ixō shināki Satanās chīfafaina. <sup>14</sup> Nāskakē Niospa nā kēro tetepafā pei keskara inā aō katanō tsōa istoma ano.

Nā afetĩama Epa Niospa itipinĩ faxoni ano mã kaxõ anoxõ piinõ cuarenta y dos oxe akĩ, nã niáfaka chakata ronõfã keskarato afeskafanõma. <sup>15</sup> A kēro ari ikano chakafapaikai Satanás ari kai. Mã kaxõ chaima nikaxõ ãfe axfapa faka siiakĩ faka faipafãne iyotanõ ãsapaikĩ. <sup>16</sup> Askafaito õikĩ Niospa mai kaxkexoni a mēra faka faipafã ikikaitanõ a kēro afeskafanõma. <sup>17</sup> Nãskaito õi Satanás a kēroki õitifishkikõina. Nãskax nã kēromã ãfe fakefoki kaa ato retepai, nãfãfemãi Niospa meka nikakõisharaifono isharakõiyana Jesús Ifofasharakõiyana. <sup>18</sup> Askata ã anã õia Satanás fakafã kesemē nia.

## 13

### *Fakafã mēranoax yoinã keskara mesekõi kãinãkafana*

<sup>1</sup> Askata ãfe namapa ã õia keskara afianã ã mato yoi. Ë õiaino fakafã mēranoax yoinã keskara mesekõi kãinãkafanaito ã õia. Nã yoinã põfe keskaraõnoa ã mato yoinõ. Ea nikasharakãfe. Nã fistiflax mapo ichapaya, siete mapoya. Askatari ãfe mãxo rasi diezya. A ãfe mãxo rasi xanĩfãfe maiti maimakĩ fetsa. Nãskaxõ Epa Nios mekafakĩ chakakõi faa. ãfe femãnfãfoki ane fetsafo chakakõifo nēta. <sup>2</sup> Askai oa poomã keskara ãfe yora. Askatari ãfe tae oa osopa tae keskara. Askatari oa poomã axfa keskara. Nãskara Niospa ea õimana ã tãpinõ a feronãfãke Satanãõxõ tãpikifinakõia, oa xanĩfo finakõia keskara ixii nãmãnoax. Satanás ãfe yõshi inãno ato yoimis ixii, afama mĩshti fakĩ fetsaki ato õimaxii. <sup>3</sup> ãfe mapo fetsa ano mã mãpeafiafono anã otoax afianã nia. Nã mai tio anoxõ yora rasichi õikani askaito: “Kee, ¿afeskax otoamē mã nãkõina nõ õia?” ixõ yoikani. Nãskaito õikĩ ifofaxikani. <sup>4</sup> Nãskakē ifofakaxõ yoikani Satanás iskafakĩ: “Mĩ fãsi sharakõi. Mĩ afama mĩshti famis,” fakaxõ ifofakani. “Nãskaxõ nã yora põfekõi inõ mĩ yõshi mĩ inã nõko xanĩfokõi inõ. Nãskaxõ nõ mia chai faima,” fakaxõ yoikani. Askatari oa yoinã keskara akiki inimakakĩ fanãixokani iskafakakĩ: “Mia keskarakai tsoama. Mĩ fãsi sharakõi. Miakai tsõa chakafatiroma. Mĩ fistichi ato finõkõia,” fakaxõ yoikani fanãikakĩ.

<sup>5</sup> Askatari anã Nios chakakõifakĩ yoia iskafakĩ: “Fato fetsakai ea keskarama. Ë Nios finõkõia,” ikax, ãa chanĩ Nios chakafakĩ finakõimis. Nãskafekē Niospa yoixii: “Cuarenta y dos oxe finõta mĩ anã afaa fatiroma xanĩfokõixõ afara fetsafo sharafakĩ.” <sup>6</sup> Nios noikaspakĩ mekafakĩ fetsaito ã nika iskafaito: “Fato Nioskai nai mēra ikama. Anã ano Niosma. Mã kaxpakõi mã Nios Ifofai,” ixõ yoia. “A yora namisfãfekai fato Nios Ifofamisma,” ato fakĩ fetsai. <sup>7</sup> Askatari Satanás ifofakaxõ ato afara shinãmãnaino yorafãfe a Jesús Ifofamisfo ato finõpaikĩ ato retepaikani ato xanĩfo ipaikakĩ. Askatari maitio anoafõ, xoko fetsafo, meka fetsafoya keyokõi ato xanĩfo ikani a feronãfake xanĩfo chakakõi a Satanás yõshi a mēra nanea. <sup>8</sup> Askafaxõ yoisharaxikani akiki inimakakĩ: “Mĩ fãsi finakõia, mĩ nõko nioskõi,” ixõ yoixikani akiki inimakakĩ. Askafãfe tãpixõ nõko Ifo Niospa atoki kirika keneama a Ifofaafãfema õikĩ. Mai onifataima mã tãpixõ Niospa ato anefõ ãfe kirikaki keneeni fatofãfe Jesús Ifofaimãkai. Akka nã Jesús ovejanã fake keskara noko nãxoni noko ãkipakexakĩ.

<sup>9</sup> Mã pachoyakĩ ea nikasharakãfe. <sup>10</sup> “Nã Satanás ifofaafãfe mato karaxa mēra ikimakaki mato ikimaxikani. Askatari mato kenopa retekakĩ mato retexikani.” Nãskakē efe yora mĩshtichi, shinãchakayamakãfe. Nã nõ Jesús chanĩmara faafo tii nõ omiskõifikĩ, nõ tenekõixii nõko Ifo Jesús shinãmakitama.

<sup>11</sup> Askatari ã anã õia oa namakē õia keskara. Mai mēranoax kãinãkafanaito ã õia yoinã põfe fetsa keskara. ãfe mãxo tiixo pishta rafe oveja fakenã keskara. Askai fãsikõi mekai oa poomã keskara ãfe meka mēxakõi chai potai. Askaito ã õia. <sup>12</sup> Akka nã yoinã põfe taeyoi fakafã mēranoax kãiyaito afama mĩshti atiroxakĩ nãato yoiaino nã rama oatori afama mĩshti atiro nã fētsa aka keskafakĩri nãskaxõ yorafo tii ãkitiro. Keyokõi maifo tii anoafõ ato yoia iskafakĩ: “A yoinã keskara mã mapoki rerafo mã nayoflax afianã mã otoa nã fisti ifofakãfe. ‘Na nõko ifora,’ fakãfe,” ixõ ato yoia. <sup>13</sup> Afama mĩshti tsõa atiroma keskara ato ispa yorafãfe chanĩmara fanõfo. Nãskata yorafãfe ato ferotaifi nai mēranoa

chii fotomana. <sup>14</sup> Satanáõxõ nãskarifikĩ yorafo pãra niosra fanõfo. Askafata ato yoia: “Nã yoinã põfe keskara retefiafono mã otoa nã nimofonõfã faxõ inãkãfe a keskara faxõ,” ixõ ato yoia. <sup>15</sup> Nãnori ato yoiaino mã nimofonõfã mãpeakano xãkaitiroma. Askafiano Satanáõxõ xãkaima mekanõ, askatari a siete mapoya mekayamaifo ato retenõ. <sup>16</sup> Askata anã ato yoia iskafakĩ: “Maitio ikafãfe ãto mẽke kayakai aõri kenenõfo askayamakĩ ãto femãnãki kenenõfo.” Nã yoinã põfe keskara fakafã mẽranoax kãiato ãfe ane keneyamakĩ ãfe número ato kenemana. Keyokõi ato kenemana. Fakefo kenemata, xinifori kenemata, afama mĩshtifoyari kenemata, afaamaisfori kenemata, inafomari kenemata, inafori kenemana. Tsoa pishta finõmanama. Keyokõi nã yoinã põfe keskarato ãfe ane atoki kenemana. <sup>17</sup> Tsõa nã ane keneyamaxõ afaa fitiroma. Askatari afaa inãmitsatiroma a piaifori tsõa fitiroma, a rapati yopaiifori tsõa fitirofoma.

<sup>18</sup> Nãskakẽ Niosxõ shinãsharatirofo nã yoinã põfe keskara ãfe número tãpitirofo. ãfe número tãpixõ ãfe aneri tãpitirofo. Nã yoinã põfe keskarafiax feronãfakekõi, ãfe número seiscientos sesenta y seis.

## 14

### *Jesús chanĩmara faafo ciento cuarenta y cuatro mil akiki fanãikani*

<sup>1</sup> Askata ãfe namapa ã õia keskara afianã ã mato yoinõ. Nã Jesús ovejanã fake keskara mãchifã ãfe ane Sión ano nia ã õia. Askatari ciento cuarenta y cuatro mil afe yorafo afe niafo ika. ãfe ane Jesús yafi Epa Nios ãto ane femãnãki kenea ã õia. <sup>2</sup> Nãskatari nai mẽranoa meka efapakõi ã nika. Faka põoitifã keskara ã nika, nai tiri ikai keskarari pachakõi ã nika. Meka efapari ã nika yora ichapa fanãikanaifono ãto manetiya ichapa rasi fanãikanaifãfe ã nika. Nã manetinĩ ãfe ane arpa. <sup>3</sup> Fana fena tsõa nikayomisma Epa Nios ferotaifi fanãixõafo. Nãnoxori nã cuatro Niospa onifanifãfe nikakani. Askatari nã veinticuatrofãfe nikakani. Nã ciento cuarenta y cuatro mil nono mai anoa Jesús ato ifini, nãfãfe na fana fena tãpitirofo. Tsoa fẽtsakai tãpitirofoma. <sup>4</sup> Nã ciento cuarenta y cuatro mil yorafãfe nõko Ifo Jesús Ifokõi famisfo. Afara chaka shinãtamaroko Jesúsnoa shinãfafãikani. Aato ato ifimis ato nãxonixakĩ Epa Nios yafi ãfe Fake Jesús Ifokõi fakanax ãfe yora inõfo. Ato iyopaiyai ari afe fomisfo. Ato katoa afe yorakaxõ ato yoiai keskara anõfo. <sup>5</sup> “Nãfãfe chanĩkĩ yoimistra,” ixõkai tsõa atoõnoa yoitiroma. Jesúsnoax isharamisfo. Aõxõ afaa chakafamisfoma.

### *Niospa ãfe ãjiri trespa yoiafo*

<sup>6</sup> Askata ã õia Niospa ãjiri fẽtsa nai mẽra ika fãsi keyakõi yoyakĩ keyokõi yorafo maifo tii anoafo ato meka shara yoia. Yorafo keyokõi yoita, xoko fetsafo tii yoita, nã meka fetsa fetsatapafãfe meka yoimisfori yoita, nã mani fetsafo tiiri ato meka shara yoia. Epa Nios nipanakaõnoa ato yoia. <sup>7</sup> Mekakĩ fãsikõi ato yoia iskafakĩ: “Nios shinãkãfe. Nikakõikãfe. A noikõikãfe. ‘Mĩ sharakõi, mĩ afama mĩshti mĩ atirora,’ fakãfe. Iskaratĩa Niospa nã keyokõi chakafamisfo ato omiskõimani. Nãato nai onifani, mairi onifani, fakafãri onifani, faka sharari onifani. Nãskakẽ a noikãfe: ‘Mĩ nõko Ifo Nios sharakõi,’ fakãfe,” ato faa.

<sup>8</sup> Askata Niospa ãjiri fẽtsa mã mekai keyoano fetsari nokotoshixõ iskafakĩ yoia: “Babilonia ano pexe rasi iyopaoni. Iskaratĩa anã ano tsoa ikama. Nãnoxõ yorafãfe afara chaka shinãpaonifo. Fetsafori afara chaka ato famapaonifo ato keskara inõfo. Askafãfe Epa Niospa ato omiskõimani anã ano inõfoma. Nãskakẽ Babilonia anã anoma,” ixõ Niospa ãjirinĩ nai mẽra ikato yoia.

<sup>9-11</sup> Askata afianã Niospa ãjiri fetsari nai mẽranoax nokotoshixõ meka fãsikõi yoia iskafakĩ: “Fẽtsa nã yoinã põfe keskara yafi ãfe nimofõ keskara nikakõikĩ yoimis iskafakĩ: ‘Nã ãfe nioskõi,’ ixõ anori yoikĩ ãto mẽkeki kenenifo, askayamakĩ ãto femãnãki na yoinã põfe keskarato ãfe ane keneafãfe Epa Nios atoki õitifishkikõixii. Nãfo Niospa ato fãsi kerexkai omiskõimaxii. Chii mẽra ato potafianokai keyonakafoma. Jesús ãfe ãjirifo

sharakōifo feta ōiaino a omiskōipakenakafo mēra Niospa ato potaxii chakamāi famisfono, Nios nikakaspakakī. Pae meekakī xatenakafoma. Tsōa ato ifitiroma, nā yoinā pōfe keskarato āfe ane āto mēkeki keneafono, askayamakī ato femānāki keneafono. Nāskakē pena tii ita, fakishchāi ita, omiskōixikani tenepakenakafoma,” ixō Epa Niospa āfe ājirinī yoia.

<sup>12</sup> Nāskakē efe yora mīshtichi, māto ōiti inimamasharakāfe. Omiskōifikī tenekāfe. Niospa noko yoini keskara akāfe. Nōko Ifo Jesús kachikiri fayamakāfe.

<sup>13</sup> Askata ē meka nika nai mēraxō ea yoiāito: “Ē mia yoiāi keskara kenefe. Fatorāfo nōko Ifo Jesúsnoax nai, inimakōixikani,” ixō ea yoia. “Chanīmakōi. Mā nakanax anā omiskōitirofoma. Epa Niospa ato ama keskara akōikanax, nāskakē inimakōixikani. Nāfāfe fetsafo shara faxomisfono Nios atoki inimasharaxii. Akka Epaki nokoafono ato ināsharaxii,” ixō Niospa Yōshi Sharapa yoia.

### *Nā chakafamisfoki Nios ōitifishkikōikī maifo tii anoāfo ato ichanāfai ato omiskōimaxii*

<sup>14</sup> Akka ēfe namapa ōia keskara afianā ē mato yoinō. Ē afara fetsa ōia nai kōi oxokōi kamaki feronāfake tsaokē ē ōia. Ē ōikī iskafaa: Xanīfāfe maiti orokōi maiya, askatari keno extea ikikōi tsuma ika. <sup>15</sup> Akka āfe ājiri fetsa Nios kīfiti pexefā anoax kaxō fāsikōi yoia iskafakī: “Nā maifo tii ano mā fanafo ōshia. Nāskakē iskaratīa mā fanafo chetekani. Akka mī keno exteato taxtexō ichafafe,” faa. Nānori yoifikī fanakōifoōnoa yoiama. Niospa yorafoōnoa yoia iskafakī: “Iskaratīa keyokōi Jesús chanīmara faafo tii ifife Epa Nios fe ika anoax ichanākanax afe ĩpaxanōfo,” ixō yoia.

<sup>16</sup> Askata nā nai kōi kamaki tsaoato āfe kenopa fanafo taxtea keskafakī āfe sharaōxō a chanīmara faafo tii ifia afe ĩpaxanōfo.

<sup>17</sup> Askata ē ōia nai mēranoa ājiri fetsari Nios kīfiti pexefā anoax kaito, aatori keno extea ikiai tsomax. <sup>18</sup> Afianā ājiri fetsari Nios kīfiti mīsa anoax kaa. Nāato Niospa maifo tii anoā koatiro. Nāatori keno extea ikiai tsomax fāsikōi mekayanā yoia: “Nā uva fimi mā pachiaki. Mextexō ichafafe,” ixō yoia. Nāskarifikī Epa Niospa āfe ājiriōxō a nikakaspamisfo ichanāfaxii. <sup>19</sup> Nāskata nā Niospa ājirinī āfe keno extea ikiai tsomaxō uva xatexō āfe tsinīti mēra nanea āfe ene fonō. Nāskarifikī Niospa ājirifāfe nā Niospa meka nikakaspamisfo ato ichanāfai. Akka Nios atoki ōitifishkikōixō ato omiskōimani. <sup>20</sup> Nios ika anoxō ato omiskōimanama. Iskafakī ēfe namapa ē ōiai keskara ea ōimana. Fetsafāfe ato retexikani āto imi ichapa foxii. Askara tsōa ōiyomisma. Āto imifo kamayofa tesanākōixii. Āto imi chaikōi trescientos kilometros foxii. Ato imi noakōi un metro ixii, nakirafekōi. Nāskarifikī nā Epa Nios nikakaspamisfo omiskōixikani ato omiskōimanaitīa.

## 15

### *Epa Nios āfe ājiri siete afianā ato yoia mai anoāfo ato omiskōimanō*

<sup>1</sup> Askata anā ēfe namapa ē ōia keskara ē mato yoinō. Afara fetsa tsōa ōiyomisma nai mēranoa ē ōia. Ē ratekōia. Akka Nios nā yora nikayospafoki ōitifishkiki. Nāskakē āfe ājiri siete ato yoia keyokōi mai anoāfo ato omiskōimanōfo. Mā askafafono Epa Niospari ato omiskōimani. Akka anā tsoaki ōitifishkixō, Niospa ato omiskōimatiroma.

<sup>2</sup> Askata ē ōia fakafā feroikima raka chiiya osia keskara. Nāno yorafā rasi niafo ika. Nā yorafāfekai yoinā pōfe keskara ifofaafoma; āfe nimofori ifofaafoma; āfe numerori āto yoraki keneafoma. Nāfāfe ato finōkōiafo. Nā fakafā feroikima raka chiiya osia keskara a kesemē maniafo. Epa Nios ato tii maneti ināpakea. Nā maneti āfe ane arpa. <sup>3</sup> Taeyoi Nios yonoxomiskōi Moisés ipaoni. Nā Moisés āfe rāfifō finōkōiax fanāini keskara nāskarifikī āto arpa tsomakaxō Jesús shinākakī fanāikani a Moisés fanāini keskara iskafakakī:

Ifo, mīfi Nioski. Mī afama mīshti atiro. Mī amis keskara sharakōi. Tsoa fētsakai atiro. Mī mai fetsa anoāfori keyokōiōnoax mī āto xanīfokōi ipanaka. Mī shināmis keskara mēstekōi ikōina. <sup>4</sup> Ifo, keyokōi mikiki mesekakī mia nikasharapainōfo. Mī

afama mīshti tsōa ōiyomisma mī atiro. Keyokōi maitio anoafāfe anori yoipakexanōfo. Mī fistichikai afaa chakafamisma. Mī shara fisti famis. Afetiara mī ato apaiyaitīa mī ato omiskōimaxii a chakafamisfo. Chanīmakōi mī ato askafaxii. Keyokōichi mā fēkaxō mia shinākani inimayanā fanāikani, ixō yoiaifāfe ē nika.

<sup>5</sup> Askata afianā ē ōia nai mēranoa Nios ika anoa. Ea fēpexona Nios ika ano ē ōinō. <sup>6</sup> Nios ika mēranoax āfe ājiri siete ichanāfo. Rapati oxokōi chainipa choshtama fafeai safeafo, oro ōshi keskarato xonexemeafo. Nāfāfe mai anoafō ato omiskōimakani omiskōinōfo. <sup>7</sup> Nāskakē nā cuatro Niospa onifaa fētsa Niospa āfe ājiri sietefo ato oro kecho ināakea. Nios nā nipanakato nā Ifofaafoma mai anoafoki ōitifishkikōikī nā kechofo mēra afara chakafo fospi faa nāskaxō chipo atoki ājirifāfe nachiakeafono omiskōinofō. <sup>8</sup> Nios ika mēra kōinīfā nashfiāi keskara. Niospa āfe kerex shara a mēra fospiā. Nāskatari a mēraxō chaxasharai. Akka mai anoxō nā Nios nikakaspamisfo Niospa ājirifāfe ato omiskōimakani omiskōinōfo. Nāskakē a ato omiskōimanai xateamano tsoa Nios ika ano ikitirofoma.

## 16

### *Nikayospafo Niospa ato omiskōimani omiskōinōfo*

<sup>1</sup> Askata Nios ika ariax fāsi mekaito ē nika. Niospa ājirifo siete ato yoia iskafakī: “Niospa a nikakaspamisfo mai ano ikafo atoki ōitifishkikī nā kechofo mēra afara chakafo fospi faa atoki nachitakāfe,” ixō ato yoia.

<sup>2</sup> Nikakaxō Niospa ājiri fētsa taefakī āfe kecho mēranoa nai mēraxō mai ano nachia. Nāskatari nā yoinā pōfe keskarato āfe ane āto mēkeki keneyamākī āto femānāki keneafō, āfe nimofō keskarari ifofaafō nāfo kooyoi fetsekaxō paekōi meexikani.

<sup>3</sup> Askata afianā Niospa ājiri fētsa āfe kecho mēranoa nai mēraxō fakafānaki nachia. Mā nachiano fakafā ōsinātana nā yora reteafono āfe imi foa keskara. Nāskakē keyokōi nā fakafā mēranoax nai fetseafō.

<sup>4</sup> Askata afianā Niospa ājiri fētsa āfe kecho mēranoa nai mēraxō fakafoki nachia, askatari mai mēranoax faka tsekeafokiri nachia. Nachiaino fakafo fe mai mēranoax faka tsekeafō fe imi keskara osiafo. <sup>5-6</sup> Askatari Niospa āfe ājiri fetsa mekaito ē nika. Nā faka kexemisto iskafakī yoia: “Epa Niosi, mī tsoa onifataima mī iyopaoni. Nāskakē nā mī iyopaoni keskarari iskaratīari mī nīpanaka. Mī shara fisti amis. Aicho, iskaratīa nā mia nikakaspamisfo mī ato omiskōimani chanīmakōi. Āto chaka xatekaxō mī Fake Jesús Ifokōi fanōfo, mī meka ato yoimisorī nā Jesús Ifofaafāfema ato reteafō. Nāskakē nā mia Ifofaafoma mī kopikiri ato namai chanīma. Mefe yorafo omiskōimamisfo. Nāskakē ato kopikiri nā mia Ifofaafoma mī ato omiskōimani omiskōinōfo. Chanīmakōi ato omiskōimani,” ixō Niospa ājirinī yoia.

<sup>7</sup> Askatari Nios nai mēra ika anoa nā kīfiti ano fistixō Epa Nios kīfimisfo anoa ē fetsa nika yoikī iskafaito: “Nōko Ifo Nios, mī ājirinī yoia keskara chanīmakōi. A mia nikakaspamisfo mī ato omiskōimatiro. Chanīma, mī mēstekōi ixō mī ato omiskōimani,” ixō yoia.

<sup>8</sup> Askata Niospa ājiri fētsa Nios ika arixō āfe kecho mēranoa afara chaka xiniki nachia. Akiki nachiano xini chii keskara ikano yorafo koofafo. <sup>9</sup> Xini xanakōiaino yorafo koofafo. Kookani omiskōiafo. Mā tāpiyomisfo Niospa ato omiskōimafiaino āto chaka xateafoma. Nios Ifofatamaroko. Iskafakī yoimisfo: “Niospa noko chakafai. Nios chakakōi,” ixō yoiafo. “Nios shara. Afama mīshti fatiro,” ixōkai tsōa anori yoipaikanima.

<sup>10</sup> Askatari Niospa āfe ājiri fētsa Nios ika arixō āfe kecho mēranoa nā yoinā pōfe keskara chakakōikī afe ikafokiri atoki nachia. Nachiano nā yoinā pōfe keskara ifofaafō ika ano fakishkōi ika. Nāskakē keyokōichi paekōi meafō, aripe iyanā. <sup>11</sup> Nāskai omiskōifikakī āto chaka xateafoma. “Niospa noko iskafai. Nios chakakōi,” ikaxō āto chaka xateafoma.

<sup>12</sup> Askatari anã Niospa ãjiri fẽtsari nai mẽraxõ ãfe kecho mẽranoa faka efapa ãfe ane Eufrates kamaki nachia. Mã nachiano nã Eufrates netsorisatana. Nãskakẽ xanĩfofo xini oaikirinoax fekani, mã Eufrates netsokõiano, ãto sorarofa feta pokeferakani.

<sup>13</sup> Askatari ẽ niafaka chakakõifo tres feŋko keskara ẽ õia. Fetsa ronõfã keskara nã Satanãs ãfe ãŋfa mẽranoax kãikaina, fetsari nã yoinã põfe keskarato ãfe ãŋfa mẽranoax kãikaina, fetsari: “Ë Niospa meka ẽ mato yoimisra,” iki, a chanĩmisto ãfe ãŋfa mẽranoax kãikaina. <sup>14</sup> Nã tres niafaka chakafãfe tsõa afaa õiyomisma keskara afama mĩshti yorafo ispafo. Keyokõi xanĩfofo a ano fokani ato ichanãfanõ nõko Ifo Jesús afe yorafo retenõfo. Nãskatari nõko Niospa afama mĩshti famisto afe yorafo ispaxii.

<sup>15</sup> Askatari nõko Ifo Jesús ato yoiato ẽ nika iskafakĩ ato yoi: “Ea nikakãfe. Yometso tsõa yoyamano koshikõi peŋe mẽra ikirisatiro afara onexikĩ. Nãskarifikĩ ẽ tsoa tãpimanima nã ẽ matoki nokoaitã. Ë matoki samamashta nokorisai. Mã itipinĩsharakaxõ ea manasharakanax inimasharaxikani. Akka tsoa itipinĩsharayamano ẽ matoki nokoaitã keyokõi yorafãfe ea õikani afãfekai ea Ifofasharama. Nãskakẽ rãfikõitirofo,” ixõ yoi.

<sup>16</sup> Nãnori nõko Ifo Jesús yoifiano nã tres niafaka chakafãfe keyokõi xanĩfofo maifo tii anoafõ ichanãfaa Niospa yorafo retepaikĩ. Ato ichanãfai nã mai ãfe ane israelifãfe mekapa Armagedón famisfo anoxõ.

<sup>17</sup> Askata Niospa ãjiri fẽtsa anã nai mẽraxõ ãfe kecho mẽranoa nachia. Mã nachiano Epa Nios meka fãsikõi iskai: “Mẽ keyokõi aka,” ixõ yoiato ẽ nika.

<sup>18</sup> Askatari fãsikõi kana piishikai ita, afarafo pachakõifo ita, nai tiri iki ikai ita, mai naya naya ita, askarafokai tsõa õiyomisma. Nã feronãfake onifakĩ taefanitã tsõa mai naya naya iki finakõiaito askara tsõa õiyomisma. <sup>19</sup> Akka nã Babilonia anoax mai naya naya ikaino mai tres kaxketani. Maifo tii anoari ãto peŋe rasi nã mai naya naya ikaino maokomea. Nã Babilonia anoafõ anã Niospa shinãni afara chakafamisfono. Nãskakẽ atoki õitifishkikõikĩ ato omiskõimani omiskõinõfo. <sup>20</sup> Nãskatari nã mai toomãfã anoafõ yamarisatana. Keyokõi mãchifãfori yamarisatana. <sup>21</sup> Nãskatari oi nami matsi tokorofõ efapakõi ãfe efe cincuenta kilo nai mẽranoax yorafoki pakea. Askafiaito õikakĩ ãto chaka xateafoma. “Nios chakakõi. Na oi nami efapakõi nokoki potai,” ixõ yoiãfãfe ẽ nika.

## 17

### *Mai fetsa anoafõ kẽro feroma keskarafõ*

<sup>1</sup> Askata anã ẽfe namapa ẽ õia. Afara afeskara ixiai keskara anã ea õimana. Nã Niospa ãjiri sietepa kecho tsomafo ikafo akka fistichi ea yoi: “Niri ofe. Na peŋe ichapa rasi fakafãfo chaimashta anoafõ chakakõifo. Kẽro feromakõi keskarafõ Nios nikakaspakani.

<sup>2</sup> Akka keyokõi xanĩfofo maifo tii anoafõ ato fe chaka imisfo. Nãskakẽ atoõnoax afori chakakõifo ikafo. Nã kẽro feromakõi keskara ikafo chakafakani. Akka nã Niospa ato omiskõimaxiai keskara ẽ mia õimanõ,” ixõ ea yoi.

<sup>3</sup> Ea askafaino ẽ anã namakẽ õia keskara ẽ õia. Epa Niospa Yõshi Sharaõxõ ãjirinĩ ea iyoa tsõa istoma ano ea iyoa. Nãnoa kẽro ẽ õia yoinã põfe õshikõi kamaki tsaokẽ. Nã yoinã põfekõi ãfe yora tiixõ ane ichapato kenea ika. Keyokõi nã anefõ kenekĩ Nios mekafakĩ chakafaa. Nã yoinã põfe ãfe mapo sieteya. ãfe mãxo diezya. <sup>4</sup> Nã kẽromã sama chainipa yafi nana õshi safea ika. Oro fakka fakka ikai keskara safea. Askatari makex keskara fakka fakka ikai sharashta yafi fetsa ãfe ane perla oxoshara, nãri safea ika. Nã kẽromã kecho oro tsoma a mẽra afara chakakõi naneato, a mẽra nanea keskara yorafo afara chakakõi fetsa fetsatapafo chakafama. ãto mẽra nanexõ ato afara chaka shinãmana. Ato pãemata, chanĩmis ato imata, ãto ãfima chotamisfo ato imata, ãto fenema chotamamisfo ato imata, nãskara chakakõifos ato imamis. <sup>5</sup> ãfe femãnãki kenea keskara tsõa tãpimisma. Iskara kenea: “Babilonia anoafõ tsoa keskarafoma. Nã kẽro feromakõichi Nios nikakaspai keskarafõ. Nãskakẽ fetsa fetsatapafo chakafakĩ finakõimisfo,” ixõ kenea. <sup>6</sup> Nã kẽro feroma keskarato Jesús chanĩmara faifo ichapakõi ato

reteā inimayanā. Nāskaito ōikī tāpia. “Choo, na kēromātsi ato retemiski,” ixō ē shinā. <sup>7</sup> Ē askaito Niospa ājirinī ea iskafaa: “¿Afeskai mī ratemetsamaimē? Ē mia yoinō, ea nikapo. Na kēro yafi nā yoinā keskaraōnoa ē mia yoinō. Na yoinā pōfe keskara siete mapoya askatari diez māxoya tsōakai askara tāpiyomisma. Akka iskaratīa ē mia tāpimani. <sup>8</sup> Nā yoinā pōfe mī ōiai yoinākōima. Nāfi xanīfo efapa chakakōi. Nāato Nios nikakaspamis. Taeyoi niyopaoni. Anā iskaratīa niama. Askaflix chipo nā niafaka chakafo kinīfā mēra ika anoax kaixii. Nānoax kāifekē Epa Niospa a omiskōipakenakafo mēra potaxii anā anoax faki kanakama. Akka nā taefakī mai onifakī taefanitīa yorafāfe āto anefo Niospa āfe kirika kenei, nāfo afe ipanakafo. Akka a āfe kirikaki āto anefo keneama, afo Nios fe ipanakafoma. Nāfāfe yoixikani iskafakakī: ‘¡Kee, ōikapo! Mā nafianixakī afianā mā otoa,’ ixō yoixikani.

<sup>9</sup> “Akka fētsa Niosxō mēstekōi shinākī nāato nā ē rama kenea keskara tāpitiro. Nā yoinā pōfeōnoa ē mato yoinō, ea nikasharakāfe. Āfe mapo siete mapokōima. Nā siete mapoxō xanīfoōnoa noko tāpimai. Nā ikafo siete māchifā. Nānori nā kēro feroma ika. <sup>10</sup> Cinco xanīfofo anā anoma. Mā nanifo. Fisti iskaratīa nia. Fetsari chipo ixii xanīfoi. A chipokōi xanīfoxiāi xanīfoi chaima. <sup>11</sup> Nā yoinā pōfe keskara ōshi ē mia yoia, ari yoinākōima, xanīfo chaka fetsa. Nā xanīfo siete ipaonifo keskara nāri chakakōi. A iyopaonikai iskaratīa anā xanīfoma. Nāskakē nāri fetsafo fe omiskōipakenakafo mēra kai anoax anā kāinakafoma.

<sup>12</sup> “Askatari nā māxo diez mī ōiai mākōkōima. Nāōxō diez xanīfofo noko tāpimani. Nāfo xanīfofo iyoafoma. Chipo mani fetsafo anoax nā diez āto xanīfofo itirofo. Na yoinā pōfe keskara fe xanīfo ixikani. Askafikanax xanīfoi chai samaraka kanima. <sup>13</sup> Nāskakē nā diez xanīfofōfāfe shināmisfo: ‘Na yoinā pōfe keskara nōko xanīfo iki kiki,’ ixō shinākani. Nāskakē, ‘Mī noko yoia keskara nō atiro,’ ixō nā diez xanīfofōfāfe nā feronāfake yoinā pōfe keskara yoikani. <sup>14</sup> Nāskaxō nā feronāfake yoinā pōfe keskarato nōko Ifo Jesús afe yorafoya noikaspai, xanīfofo fetsafāferi ato noikaspaxikani. Nā yoinā pōfe keskarato nā diez xanīfofo feta Jesús yafi afe yorafo retea paikani. Retemapafiaifono Jesús ato kanāxii. Niospa ato katoa afe yorafo kena a Ifofamisfo. Nāfāfe afara afeskarafiaito nōko Ifo kachikiri famisfoma. Nōko Ifo Jesús xanīfo fetsafori ato ĩkitiro. Nōko Ifo finakōixō keyokōi ato ĩkitiro. Akka tsōakai nōko Ifo Jesús finōtiroma,” ixō nā Niospa ājirinī ea yoia.

<sup>15</sup> Askano afianā ea yoia iskafakī: “Na mī ōiai nā kēro feromakōi keskara, fakafā femākīa tsoa nā fakafākai fakafākōima, askatari yorafo mai fetsa anoafō, meka fet-sayafo. <sup>16</sup> Nā diez xanīfofo feta nā xanīfo yoinā pōfe keskarato nā kēro feroma keskarakaxō noikaspakōixikani. Keyokōichi āfe afara fīaxikani anā aya inōma. Nāskakē anā tsoa nā kēro feroma keskara fe ipaikanima. Poomānā retexō koshi pikī keyotiro. Nāskafakīri nā diez xanīfofo feta nā xanīfo yoinā pōfe keskarato nā kēro feromakōi keskara chakafaxikani omiskōimayanā. Askafaxō chīi koofaxikani anā ninōma. <sup>17</sup> ‘Mī noko yoia keskara nō atiro,’ ixō nā diez xanīfofōfāfe xanīfo yoinā pōfe keskara yoikani. Akka Niospa anori ato shināmana a apaiyai keskara fanōfo. Askata taeyoi Niospa yoiyoni nā inōpokoai keskara nāskarakōi ixii. <sup>18</sup> Na kēro feromakōi keskara mā ōiai kērokōima, akka nā pexefā rasi Babilonia keskara. Babilonia anoa yorafo chakakōifo. Nāfāfe manifo tii anoa ato ĩkināno ato chakafakani ato keskara ikaxō,” ixō Niospa ājirinī ea yoia.

## 18

*Ājiri fētsa yoia iskafakī: “Iskaratīa Babilonia pexe rasi mā keyoa,” ixō yoia*

<sup>1</sup> Askata anā ājiri fetsa nai mēranoax mai ano fotoaito ē ōia. Epa Niospa yoia nā xanīfo fētsari afama mīshti atiro. Nāato chaxaito maifo tii anoxō ōikani. <sup>2</sup> Fāsikōi yoia iskafakī:

Pexefā rasi Babilonia anoafō mā keyoa, anā anoma. Iskaratīa anā ano tsoa ikama, askatamaroko niafaka yōshi chakakōifo ano ika, askatari peya yōshi chakakōifori ano ika. <sup>3</sup> Nā kēro chakapa yorafo ato māmā pae ayamatiro keskafakī, nāskarifiakī nā



Babilonia anoafāfe yora fetsafo mai fetsa anoafō ato afara chakafamafo ato keskara inōfo. Āto xanīfofori ato askafamafo. Askatari afara sharafos fichipaimisfo. Nāskakē a afama mīshtifo ato minimisfo, afara ichapayakōifo, ixō yoiaito ē nika. Niospa inapa askara ato yoia a Niospa keyoxiai a Babilonia anoafō.

<sup>4-8</sup> Yoikī askafatanaino nai mēranoax mekaito ē meka fetsa nika iskai mekaito:

Babilonia ano ikafāfe fāsi afara chakafakī finakōiafo. Nā afara chakafamisfo Epa Niospa ato ōia chakakōifaifāfe. Nāskakē ato omiskōimaxii. Nā Babilonia anoafāfe fetsafo afara chakafamamisfono afori. Epa Niospa ato omiskōimakī finakōixii omiskōinōfo. Nā Babilonia ano ikafāfe āto shinā mēraxō mā shināfo iskafakakī: “Nō Nios yopaima. Afara fetsafori nō yopaima. Nō isharakōimis. Oa xanīfokōi isharamis keskara nōri nāskamis, xanīfo keskara. Nōkai oa kēro ifomafa keskarama. Nō omiskōitiroma. Askatamaroko nō isharapakenaka,” ixō kakapaimisfāfe yoimisfo. Akka Epa Niospa ato fāsi omiskōimani omiskōikakī tenēnōfoma. Akka nā ea chanīmara faafāfe, ea nikasharakāfe. Epa Niospa mā ato samamashta omiskōimani anā isharayamanōfo. Atiri ē ato namai, atiri ē ato omiskōimani, a piaifori ato kēyoi. Nāskakē fonāikani. Nāskatari atiri ē ato koofaxii kooi fetsenōfo. Tsōa atiroma keskara Epa Niospa afama mīshti atiro. Nāskakē Epa Niospa mato yoi iskafakī: “Efe yora mīshtichi, Babilonia anoafō keskara iyamakāfe. Ato fe rafeyamakāfe. Ato feta chakafayamakāfe ē ato omiskōimanai keskafakī, matori ē omiskōimanōma,” ixō Epa Niospa ato yoixii kiki, ājirinī faito ē nika.

<sup>9</sup> Askano Babilonia kooaino mai fetsa anoafāfe āto xanīfofofāfe ōikakī manoxikani. Nāfāferi Babilonia anoxō afara chakafakī tāpinifo. Nāskakē ato feta Epa Nios chakafakakī potakani afara chakafaxikakī. Nā Babilonia anoafō keskarafori afāfe afama mīshti ichapa fimisfo. <sup>10</sup> Babilonia kooaino nā xanīfofofāfe ratekōixikani chai inoaxri fetsafo mesexikani.

¡Ooa! Babilonia anoafō fato yora fetsafo keskarafofoma. Mā tāpikōisharafikē samamashta Epa Niospa mato omiskōimani mā kooi fetsenō. ¡Keexto! Koshikōi Babilonia mā kooi keyoa. Nōri iskayamapainō, ixō shinākanī xanīfofofāfe ratekōiyanā.

<sup>11</sup> Nāskatari maifo tii anoafō āto afama mīshtifo minimisfo oiaxikani shināmitsakani. “¡Ooa! Mā Babilonia kooi keyoa. Iskaratīa anā nōko afama mīshtifo noko tsōa fīatiroma.

<sup>12</sup> Nōko oro ōshishara fīayamata, a kerexkōi fakkai fakkaisai fīayamata, nōko tokirinī fakeshta fakkai fakkaisai fīayamata, nōko tokiri fetsa āfe ane perla fīayamata, nōko sama sharafinakōia fīayamata, nōko sama nana shara fīayamata, sama fetsa fetsatapafo fīayamata, nōko ifi nakas sharakōi fetsa fetsatapafo fīayamata, tokiri keskara kerexkōi oxosharakōi āfe ane mārfil nāato afarafo onifaa fīayamata, afe keskara ifi sharakōifo fīayamata, firo shara āfe ane bronze fīayamata, keno fetsa āfe ane firo fīayamata, tokiri āfe ane mārmofo fīayamata, nāfo kopikōifo noko anā fīakanima. <sup>13</sup> Akka nō pīchamis afama mīshtifoya osixō, nā itsa sharafoya fetsa fetsatapafoya osixō, afo noko tsōa fīatiroma. Askatari a nakas shara āfe ane incienso, fetsari mīrra, fetsari pirofomā, fetsari vinō, fetsari xini, fetsari arinā, fetsari trigo, askatari nōko yoinā inafori ovejari, kamayori, nōko karori, yonomatifori, nāfo noko anā tsōa fīatiroma. <sup>14</sup> ¡Ooa! Babilonia anoafāfe nā afara fetsa fetsatapafo fichipaikakī anā fitirofoma. Keyokōi afara sharafo fichipaikakī mā fimis anā anoma mā fenokōia anā mā fipanā. Mā afaa yopakima mā fimis. Mākai anā fitiroma. Keyokōi nā mātonā mā keyoa,” ixō nā ināmitsamisfāfe yoixikani.

<sup>15</sup> Nā mai fetsa anoafō fēkaxō afama mīshti minikaxō kori ichapa fimisfāfe mā noko kaxō chaima nīxō ato ōikani, ratekōiyanā, oiakani, askatari shināmitsakōikani. <sup>16</sup> Yoikī iskafaxikani: “¡Ooa! Fato fetsakai Babilonia anoafō keskarama. Ato fe yorafāfe rapati sharakōifo safeafo. Rapati ōshi sharafo, askatari oro teoti safeafo, tokiri fakkai fakkaisai keskarafo menexemeafo, perlari askari faafo. <sup>17-19</sup> Koshikōi na afama mīshtisharafo mā keyokōia,” ixō yoixikani.

Nāskarifiāi nā kanōanāfā āfe ifofāfe shinākani, a kanōanāfā mēra fomisfāferi shinākani, a kanōanāfā nexa yonomisfāferi shinākani, a kanōanāfā mēra fokaxō, ato afama mīshti minikaxō kori fimisfāferi shinākōikani. Babilonia kooaito chai ixō ōikani manokakī shināxikani. “¡Ooa! Fato pexe fetsakai Babilonia keskarama. Na Babilonia fistiōxō kanōanāfānē āfe ifofāfe kori ichapa fimisfo. Akka a aya imisfo koshikōi mā keyoa,” ixō a kanōanāfā yonomisfāfe yoixikani.

<sup>20</sup> Askaifono keyokōi Epa Nios ika anoafō inimakāfe. Babilonia anoafāfe a Jesús chanīmara faafo ato omiskōimamisfo, Epa Niospa ato kopikī omiskōimaxii. Nāskakē keyokōi a Jesús chanīmara faafo fe, Jesúsxō āfe meka yoipaonifo fe, a Niospa meka inōpokoai yoimisfori inimakāfe.

<sup>21</sup> Akka Epa Niospa āfe ājiri fetsa mitsisipakōichi tokiri efapakōi fininīfōfāta fakafā mēra potaxō yoia iskakakī: “Na tokiri kerexkai ē potai keskafakī, nāskafakīri Epa Niospa na pexe rasi anoafō Babilonia kerexkai omiskōimana kooi keyonō. Mā keyokōikanax anā ano tsoa ikima. <sup>22</sup> Nāskakē anā Babilonia anoax manetifo, xāitifo, maneti fetsafori, afo anā tooxikama. Askatari anā tsoa fanāikama. Tsōakai anā ato nikatirofoma. Askatari a yonomisfo anā ano ikafoma. Askatari a aō xiki reneaifo nō anā nikatiroma. <sup>23</sup> Anā luzri ōtapakenakama. Feronāfāke kēro fiaino inimaifāfe mā nikamis keskara anā tsoa askara mā nikapakenakama. Babilonia anoa a ināmitsamisfāfe tāpikōikani. Nāfāfe ichapakōi fimisfo. Askatari koshōiti tāpixō yora fetsafo pāramisfo. Askafikanax mā keyoafo.

<sup>24</sup> “Babilonia anoafāfe a Niospa meka yoimisfo, fetsafori a Jesús chanīmara faafo, fetsafori mai fetsa anoafō ato retemisfo Jesús ōikaspakakī. Niospa meka mato yoipaifiaifono mā ato nikakaspamiskē, Niospa mato omiskōimana,” ixō Niospa ājirinī yoia.

## 19

*Nios ika anoax fanāiki iskakani: “¡Aicho! Nōko Ifo Nios sharakōi,” ikaxō Niosnoa afara sharafo fanāikani*

<sup>1-2</sup> Askata nai mēra ikafo ichapakōi āto meka ē nika, fāsikōi iskaifāfe:

A fetsafāfe chakafamisfo Epa Niospa ato omiskōimani. Chanīmakōi, ato omiskōimani. ¡Aicho! Nōko Ifo Nios fāsi sharakōi. Nāato nōko chaka noko soaxona nō afe nīpaxanō. Aōnoa fisti nō yoitiro iskakakī: “Mī nōko Ifokōi. Fato fetsakai mia keskarama afara sharafamis. Mī sharaōxō mī afama mīshti fatiro,” ixō keyokōichi yoipakenakafo. Epa Niospa Babilonia anoafō atoōnoa iskakakī yoia: “Nā Babilonia anoafō nā kēro feromakōi keskarafo. Nā chakafamisfoōxō maifo tii ano ikāfori ato chakafama. Nāskakē Babilonia anoafāfe ea fāsi chakakōi famisfo. Efe yorafori ato omiskōimakani nanōfo. Nāskakē ē ato kopia omiskōimakī,” ixō Epa Niospa yoi, ixō yoiaifāfe ē nika. <sup>3</sup> Afianā meka fetsari ē nika nai mēranoafāfe yoiaifāfe iskakakakī:

¡Aicho! Nōko Ifo fāsi sharakōi. Afaa chakafamisma. A chakafamisfo chanīmakōi ato omiskōimani. Ato chiifā mēra potano afo kooi nishpapakenakafoma, ixō yoiaifāfe ē nika.

<sup>4</sup> Askanori Epa Nios tsoa ano nā veinticuatro xanīfori nā Nios onifani cuatro a nāmā feopakekakakī iskakakī yoiafo: “Askapainō. ¡Aicho! ¡Nōko Ifo fāsi sharakōi!” ixō yoiaifāfe ē nika. <sup>5</sup> Askata Epa Nios tsoa ano a ē meka fetsa nika iskakakī yoiaito:

Epa Nios yonoxomisfāfe xanīfofōfāfe askatari afamafofāfe mato Niospa yoia keskara mā apaikōimis. Māri Epa Nios yoikāfe iskakakī: “¡Aicho! ¡Epa Niosi, mī sharafinakōia!” ixō yoiaito ē nika.

*Feronāfāke āfiyakī fista atiro inimakī. Nāskarifikī Jesús nai mēraxō noko fista axoxii nokoki inimakī*

<sup>6</sup> Askatari ē anā nika yōrafā rasi mekaifāfe nā fakafā poo ikai keskara, askatari fāsikōi nai tiri ikai keskarari ē nika āto meka:

¡Aleluya! Nõko Ifo Nios tsõa atiroma keskara afama mĩshti fatiro. Nã nõko Xanĩfo finakõia. Maifo tii anoafõ noko ìkitiro. ¡Aicho! ¡Nõko Ifo Nios sharafinakõia! <sup>7-8</sup> Akka feronãfãke kẽro fiaino nã kẽro inimakõi itipinĩsharatiro ãfe fene fe fianãxiki. Nãskarifiã nõko Ifo Jesús fe iskaratĩa afe yorafo afe ipanakafo. Akka afe yorafo mã itipinĩsharafo afe ipaxakakĩ. Akka ãfinĩ ãfe fene inimamapai itipinĩsharatiro. Sama fena sharakõi patsaxõ safetiro afe fianãxikĩ. Nãskarifiãkĩ nã Jesús Ifofamisfãfe itipinĩshara fatirofo. Epa Niospa ato shara fapaikĩ, ato chaka soaxoni Jesús fe ìpaxanõfo. Nãskakẽ nõ inimai. Tsoa fetsakai mia keskarama afara shara famis, ixõ yoiafo. Niospa yoraãfe Jesúsxõ fetsafo sharafamis. Nãskakẽ Niospa ato rapati sharafinakõi safemana Jesús fe ipasharanõfo.

<sup>9</sup> Askatari ãjirinĩ ea yoia: “È mia yoiai keskara kenefe iskafakĩ: ‘Èfe Fake Jesús iskaratĩa keyokõi afe yorafo ichanãfai afe ìpaxanõfo. “Niri fekãfe,” ato faino, nikakanax inimakõikani. Nãskakaxõ èfe Fake feta pikani afe ipaxakakĩ,’ ixõ Epa Niospa yoia. Nãskakẽ Epa Nios ãfe meka mã chanĩmara fatiro,” ixõ ea yoia.

<sup>10</sup> Ea yoiaino ã nãmã feopakekafana, “Mĩ fãsi sharakõi,” ixõ yoixiki. È askafaino ea yoia iskafakĩ: “Ea askafayamafe. Èri Nios yonoxomiski mã axomis keskafakĩ, a Nios Ifofaa fetsafãferi askafamisfokĩ. Jesús mato yoiai keskara mã kachikiri famisma. Nãskakẽ Nios fisti nãmã nõ feopakekafã yoitiro: ‘Mĩ fãsi sharakõi. Mĩ èfe Ifokõi,’ ixõ anori fisti nõ yoitiro. Nã Niospa meka yoimismfãfe yoimiso keskarifakĩ èri Jesúsnoa yoimis Epa Niospa ea shinãmanaino,” ixõ ãjirinĩ ea yoia.

### *Jesús mai ano afianã oxiai keskara yoi*

<sup>11</sup> Akka ã anã èfe namapa õia keskara anã ã mato yoinõ mã tãpinõ. Epa Nios ika anoa nai mẽranao ã õia. Fepoti fepekemea keskara ã a mẽra õia. Nãskara Epa Nios ika ari xafakĩakõi ã õia. Nãno kamayo oxokõi ã õia. Nã kamayo kamaki Jesucristo nõko Ifo tsoa. ãfe ane ichapa. ãfe ane rafeõnoa ã mato yoinõ. Fẽtsa, “Nã Yoia Keskara Akõimis.” Akka ãfe ane fetsari, “Chanĩmismã.” Nãato chanĩmakõi yora chakafo omiskõimani. Niospa meka nikakaspamisfono a omiskõipakenakafo mẽra ato potaxii. <sup>12</sup> ãfe fero rafe chii xofisai keskara. Fakishi chii xofisaino yõra õisharatiro. Nãskarifikĩ nõko Ifãfe yoraãfe ãto õiti mẽraxõ shinãifo keskara tãpia. Xanĩfãfe maiti sharakõifo ichapakõi maiafo ika. ãfe femãnãki ãfe ane kenea. Ares fisti nã ane tãpia. <sup>13</sup> Rapati chainipa safea. Nã rapati imiki momoa. Nãskara õikĩ ea shinãmana Jesús noko nãxoni. ãfe ane fetsari, “Niospa Meka,” famisfo. <sup>14</sup> Afe yorafo nai ariax kamayofõ oxokõi kamaki ãto Ifo kachiori fokani. ãto rapatifo oxokõi chainipa safeafo. Nã rapati oxokõi rama pãtsaxona keskarafafo. <sup>15</sup> ãfe axfa mẽranao keno chainipa ikiaikõi ã õia. Akka ãfe kenoma, ãfe meka. ãfe mekapas maifo tii anoafõ nikayospamisfo omiskõimani. Maifo tii ato ìkinã, fetsafo nikayospamisfo ato kerexkai omiskõimakõi. ãfe meka nikakaspamisfono Nios õitifishkikõini. Akka Jesúsxõ ato omiskõimani, omiskõipakenakafo mẽra ato potaxii. <sup>16</sup> Jesús ãfe ane fetsa ãfe rapati chainipaki kenea mãnãkiri keneta maikiriri kenea iskafakĩ: “Xanĩfo maifo tii anoafõ ãto Xanĩfo finakõia, askatari ãto Ifo finakõia,” ixõ kenea.

<sup>17-18</sup> Askatari ã õia ãjiri fetsa xini ano nĩxõ fãsikõi yoia iskafakĩ: “Xanĩfofo ikaino, sorarofõ ãto xanĩfofo ikaino, ãto xanĩfofo fe rafea ikaino, feronãfakefo mitsisipafo ikaino, kamayofõ ikaino, a kamayofõ kamaki tsoafo ikaino, keyokõi Niospa meka nikakaspamisfo ikaino, ato yonomatifoma ikaino, a ãto yonomatifo ikaino, yora afamafori ikaino, a yora finakõiafo ikaino, keyokõi Niospa ato namaxii,” ixõ yoia. Nãskakẽ ishpfifo ato yoia: “Fekãfe ãto nami pixikakĩ,” ixõ nã ãjirinĩ ishpfifo kena.

<sup>19</sup> Askatari afianã ã õia a nõko Ifo Jesús noikaspai nã yoinã põfe keskara yafi maifo tii anoafõ xanĩfofo ãfe sorarofõya èfe namapa õia keskara ã õia. Mã ichanãfo Jesús ãfe kamayo kamaki tsoakẽ afe yorafoya reteaikani. <sup>20</sup> Akka ato retetamaroko Jesús ato achia chiifã

mēra ato potaxiki. Nā ato pāramisto, “Ē Niospa meka mato yoimis,” ifiax āa chanīmis. Nāato na yoinā pōfe keskaraōxō tsōa atiroma keskara famis Satanás yōshixō. Nāskaxō keyokōi yorafoki kenea nā marakkaōxō yoinā pōfe keskara tāpīxikani. Nāfāfe yoimisfo iskafakakī: “Mī ēfe nios. Ē mia noi,” ixō anori yoinā pōfe keskara yoimisfo. Akka nā ato pāramisto yōra atiroma keskafakī afama mīshti faito nāfāfe ōiafo. Nāskakē ato pārakōia. Nā yoinā pōfe keskara fe nā ato pāramis naafomano iriyafi Jesús ato chiifā mēra pota. <sup>21</sup> Nā rafeta āto inafō Jesús āfe kamayo kamaki tsaōxō āfe mekapa ato reteaino nai fetseāfo. Mā naafono ishpifo atoki ichanākaxō āto nami pikani māyakōiafo.

## 20

### *Jesús Satanás achixō nexaxii mil xinia*

<sup>1</sup> Askata Niospa ājiri Nios ika ariax fotoaito ē ōia, chamis keskara tsoma. Nā niafaka chakafo kinīfā fakishifā mēra ikafoki atoki fepoti fepoa keskara ē ōia. Nā Niospa āfe ājirinī fepotinī āfe chamis yafi kaninā efapa tsoma ika. <sup>2</sup> Tsomaxō nā ronōfā keskara achia. Nā ronōfā keskara nā niafaka chakakōi Satanás. Nā achixō nexa. <sup>3</sup> Nāskaxō kinīfā fakishifā mēra pota. Potata akiki fepokōia mil xinia a mēra inō anā yorafo pāranōma. Mā mil xinia finōano afianā kāimayoxii samarakatama chaimashta anā mai ano kafāsayonō.

<sup>4</sup> Askata xanīfāfe tsaotifo Epa Nios ika anoa ē ōia. Jesús afe yorafo yoia nā tsaoti kamaki tsaofono, “Mā yoitiro fatofomākī omiskōipakenakafo mēra foaifoma, akka fatoforimākī a omiskōipakenakafo mēra foaifo.” Askano nānoari ē ōia nā Jesús chanīmara faafo yamī ato textenifo. Ato texteyoafomano yoiyopaonifo: “Jesús nōko Ifo,” fayopaonifo. Niospa meka ifofamisfono, nāskakē ato textenifo. Akka nāfāfekai nā yoinā pōfe keskara yafi āfe nimofō yoimisfoma iskafakakī: “Mī nōko ifo nios. Nō mia noi,” ixōkai anori yoimisfoma. Askatari aō ato tāpinōfo āto mēke yafi āto femānā kenemisfoma. Nāskakē nā yoinā pōfe keskara atoki ōitifishkikī ato textemani. Mā nai fetsefiafono Jesús ato otoani. Mā otokaxō Jesús feta maifo tii anoafō mil xinia yorafo tii ato ikināfo. <sup>5</sup> Nāfo mā otoafono mā mil xinia keyoano fetsafori Epa Niospa ato otoaxii. <sup>6</sup> Shinākapo efe yora mīshtichi, mato yoiai keskara. Noko Epa Niospa otokakī taefaxii. Noko katonī afe yorafo nō inō. Epa Nios feta Cristo noko yoiai keskara nō fetsafo Epa Nios kīfixomis. Nō omiskōifikatsaxakī Jesúsnoax omiskōifikatsaxakī naax nō omiskōipakenafo mēra kanakama. Askatamaroko Cristo ika anoxō a feta fetsafo nō ikixii. Nāskakē Jesús keskara shara ikax nō fāsi inimaxii.

*Satanás kinīfā chaikōi mēranoa kāimayoi anā yorafo pāranō. Ato askafaino koshikōi anā kinīfā mēra potaxii anā kāipakexanōma*

<sup>7-8</sup> Askata mā mil xinia finōano Satanás kinīfā fakishifā mēranoa anā kāimayoxii anā maifo tii anoafō ato pārayonō. Askata mā kāixō nā Nios nikakaspaifo maifo tii anoafō ato ichanāfai nā Niospa yorafo ato retemaxii. Ichanākani ichapakōifo. Nā Nios nikakaspamisfo tsōa ato tanātiroma. Gog anoax fekāta, Magog anoax fekāta, ikanax ichanāfo Nios nikakaspamisfo. <sup>9</sup> Maifo tii anoafō ato ichanāfaxii Niospa yorafo ikafo anoafō ato cheteakenōfo ato retexikakī. Ato askafaifono Epa Niospa afe yorafo noikī ato ifixii. Nā yorafo Satanás ichanāfaa ono nai mēraxō atoki chiifā potano nai fetsekani anā tsoa pishta ninakama. <sup>10</sup> Akka nā Satanás niafaka chakata yorafo feparamiskōikē Epa Niospa chiifā mēra pota. Nā taefakī nā yoinā pōfe yafi nā ē mato Niosnoa mato yoimisra iki a chanīmis ato mērari Satanás niafaka chaka Epa Niospa pota. Nā tii chiifā mēranoax omiskōikani xatenakafoma.

### *Jesús chanīmara faafoma ato omiskōimaxii*

<sup>11</sup> Askata xanīfāfe tsaoti oxokōi efapakōi ē ōia. Nāno Epa Nios tsaofa. Akka mai fe nai anā ano ikama. <sup>12</sup> Askata ē ōia nā xanīfofo fe nā yora afamafori nakanax Epa Nios tsaofa ano niafo. Nāno niafono Epa Niospa āfe kirikafo fēpea. Kirika fetsari fēpea. Nā kirikakī nā Ifofamisfo atoki kenea. Akka a Ifofamisfoma atoki keneama. Akka nā kirikanā

āfe ane Nīpamisfo. Nā nayoxoma apaonifo keskara kirikafo mēra keyokōi Epa Niospa mā kenenī. Nāskakē nā afara chakafapaonifo keskara atoki kenexō ato ispai tāpinōfo chanīmakōi ato omiskōimaxii. <sup>13</sup> Nā āsamisfo fe mai anoax namisfori askatari fetsafori nafiakanax otoyokanima keyokōi namisfo Epa Nios āfe ferotaifi feafo. Nā chakafamisfo tii Epa Niospa ato omiskōimapakea. <sup>14</sup> Keyokōi nā Niospa meka nikakaspamisfo Epa Niospa ato chiifā mēra pota. Mā nafianifono iskaratīa afianā ato chiifā mēra potaito ē ōia. Nānoax omiskōikani xatepakenakafoma. <sup>15</sup> Akka nā kirika āfe ane “Nīpamisfo” a mēra Epa Niospa āto ane kenemisma, nāfo chiifā mēra pota. Nāskara ē ōia Epa Niospa ea ōimanaino a ixiai keskara mai keyoaino.

## 21

### *Nai yafi mai fenakōi Epa Niospa onifaxii*

<sup>1</sup> Akka nā ēfe namapa ōia keskara Epa Niospa anā ea ōimana. Ē ōia nai yafi mai fenakōi Niospa onifaa. Nā nai yafi mai taefakī onifani yamarisatana. Fakafāri yamarisatana. <sup>2</sup> Askano ē ōia Niospa yorafo nāfāfe Jesús Ifo shara famisfo nai mēranoafo Epa Nios ika ariax fotokani. Nāfo ikafo Jerusalén fena ano. Nā Jerusalén fena Nios ika ariax nāmā fotoa nāno ikafo. Fotoaifono ē ōia fāsi sharakōi. Akka kēromā āfe sama sharakōi safetiro itipinīsharakī fene fe fianāxiki. Nāskari fakī Epa Niospa nā Jerusalén fena itipinīshara faa sharakōi inō afe yorafo nāno afe nīpaxanōfo. <sup>3</sup> Askano Epa Nios tsoa ano meka achakōi ē nika. Yoia iskafakī: “¡Aicho! Iskaratīa Epa Nios yorafo fe ixikiki. Ato mēra ixii nāfo afe yorafo inō, nā yora fisti keskara. <sup>4</sup> Ato kexesharaxii anā tsoakai omiskōitiro. Ato noikī oiaifono Epa Niospa ato shināmasharaxii āto fēo tereaxoxii anā shināchakakakima tanaima inimanōfo. Ato kexeaino tsoakai anā natiroma, anārikai manomitsai oiakanima, anārikai paemekanima. Afara chakafo iyopaoni keskarakai anā askanakama,” ixō yoia.

<sup>5</sup> Askata Niospa āfe tsaoti kamaki tsoaxō yoikī iskafaa: “Ē keyokōi fenafai,” ixō Niospa yoia. “Ēfe meka chanīmakōi. Nāskakē nā mī nikai keskara kenefe,” ixō ea yoia.

<sup>6</sup> Askaxō anā Niospa ea yoia iskafakī: “Mē aka. Iskaratīa ē yoiyoni keskara mē keyoa. Afara onifataima ē iyopaoni. Afetīara maifo tii keyoai eres fisti ē yoitiro. Ē keyokōi īkinā. Ēfi nīpamiski. Fetsa nōamāikī yoitiro iskafakī: ‘Ē faka fenakōi naxikima,’ ixō yoitiro. Nāskarīfai fetsa ipaisharapaikōikī yoitiro iskafakī: ‘Ēa ē isharityoma. Ē Nios yopakōi,’ ixō anori yoiaito ē inimakī ifitiro, efe īpaxanō. <sup>7</sup> Fētsa ea kachikiri fatamaroko nā naitīa ea Ifofasharaxō nāato keyokōi nā ē mia yoia keskara fixii. Ē kaxpa ināxii. Ē āfe Nios ixii. Akka ēfe fake ixii. <sup>8</sup> Akka fetsa ratei eōnoax omiskōikaspakī ea kachikiri faa, askatari fētsa ēfe meka nikakaspamis, fētsari afara chakafo fetsa fetsatapafo xatekaspai, askatari fetsari retemitsamis, fetsari āto āfima chotamis, askatari kēromāri āto fenema chotamamis, fētsari koshoiti tāpiax nā niafaka chakafo fe rafemis, askatari fētsari ea noitamaroko afara fetsa noikī, ‘Na ēfe nioski,’ famis. Nāskakē askarafo fe nā chanīmisfo afokai efe nīpanakafoma. Chiifā mēra nā omiskōipakenakafo mēra ipanakafo. Anoaxkai faki fonakafoma,” ixō Epa Niospa ea yoia.

### *Jerusalén Fena*

<sup>9</sup> Askata Niospa ājirinī siete kecho keskara mēra afara chakakōi fospia maifo tii ano nachixii ato omiskōimanō fētsa ekeki oxō yoikī iskafaa: “¡Ofe! Ē mia afara sharakōi ōimanō. Akka feronāfāke mā āfiyaxō kexesharatiro. Nāskarīfakī Jesús chanīmara faafo afe yorafo ifia. Ofe. Ē mia ōimanō,” ea faa. <sup>10-11</sup> Askano Niospa Yōshi Sharapa ea īkināino Niospa ājirinī ea machi efapa keyakōi ano ea iyoa keyokōi ē ōinō. Jesús chanīmara faafo nā Nios ika anofo ato chaka soaxona nāfo nai mēranoa Epa Nios ika ariax fotoaifāfe ea ōimana. Na māchifā keyakōi anoxō ea ōimana. Nāfo ika ano āfe ane Jerusalén Fena. A mēra ikafo Jesús Ifo shara famisfo. Epa Niosri ato fe ika. A ato fe ika ano fakkai fakkais ishara.

Tokiri fakkai fakkais ikai keskara sharafinakōia. Nā tokiri āfe ane jaspe fēxta shara, tokiri fetsa āfe ane cristal. Shara fakkai fakkais ikai keskara. <sup>12</sup> Nā tokiri kenea efapa Jerusalén foake tii fayakena. Nā kene keyakōi doce fepotiya. Nā doce fepoti ano Niospa ājiri niafo kexesharaxikakī. Israel iyopaonito āfe fake doce ipaoni. Nā docefāfe āto fakefo paxkanifo. Nāskakē fepoti tii āto anefo doce kenea. <sup>13</sup> Nā kene keya āfe fepoti ichapaya. Xini oaikiri tres ikaino, xini kaikiri tres ikaino, xini kaima anori tres ikaino, xini oaima anori tres ika fepoti ichapaya. <sup>14</sup> Nā kene keyakōi tokiri doce efapanāfā kamaki kenea. Jesúsnoa yoimisfāfe āto anefo nā tokiri doceki kenea.

<sup>15</sup> Niospa ājirinī nā ea taefakī yoiato, nāato tanati oro tsoma, Jerusalén Fena tanaxii, āfe kene yafi āfe fepoti tanaxiki. Nā tanati tafa chainipa keskarafix oro ōshi keskara sharakōi. <sup>16</sup> Nā Jerusalén Fena āfe kene keya senēsharakōi. Āfe chainipa fe āfe xākī nātixō rafe. Āfe keyari nātixori. Niospa inapa tana dos mil dos cientos kilometro āfe chainipa fe, āfe xākī, āfe keyari. <sup>17</sup> Āfe kenefo keyakōi a akiki kenea sesenta y cuatro metros. Nā Niospa ājiri yorafāfe tanamis keskari fakī nāatori metropa tana.

<sup>18</sup> Nā Jerusalén Fena sharakōi. Nā manishomo fēxta nō ōimis keskara sharafix ōshi keskara. Nāōxō Epa Niospa Jerusalén Fena onifaa. Askatari a kenea keyakōi nā tokirinī āfe ane jaspe Niospa onifaa. <sup>19</sup> Tokiri sharakōifo fetsa fetsatapafo Epa Niospa onifaa, nā doce tokiri kamaki nā kene keya tsaoa. Taeyoi jaspeki iyoa. Āfe pefeta zafiroki ika. Āfe pefetari agataki ika, āfe pefetari esmeraldaki ika, <sup>20</sup> āfe pefetari onīceki ika, āfe pefetari cornālināki ika, āfe pefetari crisolitoki ika, āfe pefetari beriloki ika, āfe pefetari topacioki ika, āfe pefetari crisoprasaki ika, āfe pefetari jacintoki ika, āfe pefetari amātistaki ika; nāfo sharakōifoki nā kene Epa Niospa nimainīfofāni. <sup>21</sup> Nā kene keyapa āfe fepotifo perla oxo efapa Niospa onifaa. Nā perla tokiri keskara oxo sharakōi. Nā perla fistiōxō fepoti fisti onifaa. Nāskakē doce fepoti onifaa nā perlaoxō. Nā Jerusalén Fena āfe fai manishomo fēxta sharakōi keskara oke rafe nō ōitiro. Manishomo fēxta keskara sharafix oro ōshi keskara shara.

<sup>22</sup> Akka Epa Niospā kīfiti pexefā anoma. Epa Niospa nā afama mīshti fatiroxakī nōko Ifo Jesús noko fe Jerusalén Fena mēra imisfo. Askatari yorafāfe Epa Niospā kīfiti pexefā nā anā yopanakafoma. <sup>23</sup> Nāskarifikā anā xini yafi oxe yopakanima Epa Niospā fe Jesús ato fe ikano. Epa Niospā nāno ato fe ixō ato chaxaxoni. Jesúsri ato askafaxōi ōisharakōinōfo. Anā afaa yopakanima. <sup>24</sup> Mai fetsa anoaxri fofāsatirofo Epa Niospā ato chāxano. Xanīfofori Jerusalén Fena mēra ikikaxō a aya imisfo afara sharafo ināxikani. <sup>25</sup> Nāno fakishri anā ikima. Fakishpakenakama. Akka anā Jerusalén Fena āfe fepotifo fepopakenakama. <sup>26</sup> Akka fetsafori maifo tii anoax Jerusalén Fena mēra ikikakī a aya imisfo ato afara sharafo ināxikani. <sup>27</sup> Akka afara chaka nā Jerusalén Fena mēra ikitiroma. Nā chaka shināmisfo fe a afara chakafamisfo, a ato pāramisfori afo ikitirofoma. Akka Jesús āfe kirika mēra āto ane keneano afe ipaxatirofo. Nāfo fisti Jerusalén Fena mēra ikitirofo Jesús fe ipasharaxikakī.

## 22

<sup>1-2</sup> Askano ēfe namapa ōiai keskara Niospa ājiri fētsa ea ōimana afe keskaramāki Niospā ika ano. Niospā fe Jesús tsaoa anoax faka shara fakkai fakkaisai keskara kafani, fai nēxpakīa. Afara choshta a mēra ikitiroma. Nāno ikafāfe nā faka shara ayapaiyaitīa ayatirofo, nāskakē nomipakenakafoma. (Nāskarifikā nāno Niospā noko potapakenakama noko ikipakenaka.) Nānori fai nēxpakīa ifi nia ika. Faka takai raferi nii xokoa ika. Nāno ikafāfe nā nii fimi pipaiyaitīa pitirofo. Nāskakē fonāipanakafoma. Nāskarifikā Niospā nofe ikano nō aōnoax omiskōitiroma nō nisharapakenaka. Nā ifi oxe tii fimimis. Āfe pei tsasimisma xachoko fena shara ipanaka. Nāskarifikā nā chanīmara faafo tii maifo tii anoax Niospānoax meema sharakōi ipanakafo. <sup>3</sup> Nā Jerusalén Fena ano Epa Niospā fe Jesús nofe ixii. Nō ato fe yorakōixō nō ato noikōixii. Nō āto yonoxomiskōi nō ixii. Atoki fanāisharayanā nō ato

yoisharapakenaka. Akka nõko mai xini ano afara chaka fetsa fetsatapafo imis. Akka iskaratīa nã Jerusalén Fena ano afara chaka a mēra itiroma. <sup>4</sup> Nãnoax nõko Ifo fe ãfe femãnãki õinõnãfãixikani. Āto femãnãki ãfe ane ato nētamana. <sup>5</sup> Nõko Ifo Nios ari ikafo ato penafaxõa. Nãskakē anã rãpari yafi xini yopatirofoma. Anokai anã fakishima. Nãskax afe xanīfo ipanakafo.

### *Jesús chaima oi*

<sup>6</sup> Askata Niospa ãjirinī anã ea yoia: “Nõko Ifo Niospa ãfe Yõshi Sharaõxõ a ãfe meka yoimisfo ãto õiti mēraxõ ato tãpimamis a afara afeskara ixiai keskara afe yorafori ato tãpimanõfo. Nãskarifiakī iskaratīa ãfe ãjiri fetsa nīchia afara afeskara ixiai keskara a yonoxomisfo tii ato tãpimanõ. Nã ã mia yoiai keskara chanīmakõi. Keyokõi ãfe meka mã chanīmara fatiro,” ixõ ea yoia.

<sup>7</sup> Akka yoikī iskafaa nõko Ifo Jesús yoia iskafakī: “Ē nai mēranoax mai ano matoki nokorisai. Nã mī õia a inõpokoai a mī nikafori, nãfo mī kenetiro. Akka nãfo chanīmara fakakī kachikiri fayamakanax inimakõixikani,” ixõ Jesús ea yoia.

<sup>8</sup> Ēkīa Juan ã nika, askatari ã õia ea Niospa ãjirinī õimanaino. Nãskakē ã a nãmã feopakekafana ãfe Ifo keskara shinãi. Nãskaxõ, “Mī fãsi sharakõi,” ã fakerana. <sup>9</sup> Ē askafaito ea yoia iskafakī: “Ea askafayamafe. Ēri mia keskaraki. Mī ikaino, Jesús chanīmara faafo ikaino, ãfe meka yoimisfo ikaino, keyokõi nã mī rama kenea keskara chanīmara faafo fe, ãri mato keskara nõko Ifo Nios ã yonoxomis. Akka Epa Nios fisti mī Ifofatiro. Nã fisti nãmã mī feopakekafatiro,” ea faa.

<sup>10</sup> Askata afianã ea yoia iskafakī: “Nã mī kenea oneyamafe. Nã mī kenea keskara samama askakõi. Nãskakē a mī kenea keskara keyokõi yorafãfe tãpinõfo. <sup>11</sup> Akka mã Jesús nokoaino nã nikakaspamisfãfe chakafakī finakõixikani. Yora chakafamisfãferi nãskari faxikani chakakõi fakakī. Akka nã Niospa yoiai keskara amisfãfe nãskarokõi fakakī mimakõi faxikani Niospa yoiai keskara akakī. Nã Jesús keskara shara imisfo nãfori isharakõixikani ãto Ifo ifosharakõifakani,” ixõ Niospa ãjirinī ea yoia.

<sup>12</sup> Nãskaxõ Jesús anã yoia iskafakī: “Ea nikasharakãfe. Ē matoki samama nokorisai. Nokoxõ ã mato yoiyoa keskara ã mato inãsharaxii. Nã afara shara famisfo ã ato shara fata nã afara chakafamisfo ã ato omiskõimaxii. <sup>13</sup> Afarafo onifataima ã iyopaoni. Ēfi nīpamiskī. Ē niixatepakenakama. Nã mãto mai keyoai eres fisti ã yoitiro,” ixõ ea yoia.

<sup>14</sup> Anã Jesús yoia iskafakī: “Nõ Jerusalén Fena mēra ikixõ, nã ifi ãfe fimi pipaiyaitīa nõ pitiro. Nãskarifiiai nõ Epa Nios fe ikaino ares fisti noko nimapakexatiro. Nã Jesús chanīmara faafo ato chaka soaxona nãfo fisti Epa Niospa ato ikimatiro afe ipaxanõfo. <sup>15</sup> Nãskakē nã yora chakakõi paxta põfe keskarrafo fe, a koshoiti tãpiafo, nã koshoiti chanīmara faifori, feronãfãke ãfe ãfima chotamis, kērofãferi ãto fenema chotamamisfo, retemitsamisfori, Nioskõima noikī ifofamisfori, chanīmisfori, nã chanī noimisfori, askara yorafokai Jerusalén Fena mēra ikitirofoma.

<sup>16</sup> “Ēkīa Jesús, ãfe ãjiri matoki nīchia ã mia yoia keskara nã ea Ifofaafo tii ichanãfo anoxõ ato tãpimanõ. Ēkīa David ãfe fena. Ēfi nã fishi efapa penaino õimisfo keskarakī. Nã fishi õikī nõ tãpitiro mã penaino. Nãskarifiiai mē chaima oaino tãpikanax itipinīsharatirofo Jerusalén Fena mēra efe ipaxakakī,” ixõ Jesús ea yoia.

<sup>17</sup> Askano Niospa Yõshi Shara feta Jesús afe yorafãferi yoikakī iskafatirofo: “Jesúsiki fekãfe,” ato faifono, fetsafãferi nikakaxõ ato yoitirofo: “Jesúsiki fekãfe,” ato fatirofo. Fetsa nõamã ikī faka yopai, faka ano katiro mã ayax anã nõamã itiroma. Nãskarifiiai fetsa ãfe chaka xatepai, Jesúsiki otiro Epa Nios fe ipaxakī. Afaa inãtama Jesús chanīmara faax, afe ipaxatiro.

*Juan mã mekai xatekī Jesús yoiai keskara keneni*

<sup>18</sup> Ĕkĭa Juan, afara ixiai keskara ĕ mato kenexona. Ĕ mato kenexonai keskara chanĭmakōi. Nā meka ĕ mato yoiai nikasharakāfe. Ĕ mato kenexona keskara akka fĕtsa afianā meka fetsa shināki keneax, na kirika mĕra kenea mā ōiai keskara omiskōipakenakafo chanĭmakōi Epa Niospa keyokōi nāfo omiskōimaxii. <sup>19</sup> Askatari a afara afeskara ixiai keskara ĕ kenea fĕtsa na meka atiri soakĕ Epa Niospari āfe ane soaxii āfe kirika mĕranoa. Nāskakanax nā Jerusalĕn Fena shara mĕra ikitirofoma. Ĕ kenea keskara soakanax nā Epa Nios afara shara yoiyoni keskara, aya ipanakafoma.

<sup>20</sup> Jesús yoia keskara nānori ĕ mato kenexona. Nāato yoikĭ iskafaa: “Chanĭma, ĕ matoki samama nokorisai,” ixō yoia. Askapainō. Nōko Ifo Jesús orisapainō.

<sup>21</sup> Mā Niospa yorafo. Afara afeskara afiaino nōko Ifo Jesús mato noixō mātō ōiti mato fĕpeaxosharapainō. Askapainōra. Ĕri mato fāsi shināi. Nā tii.

*Ĕkĭa Juan*